

Lenavolo

Lovoang Kaala Maxat La Sam

**New Testament
and Psalms**

Madak



Lenavolo Lovoang Kaala Maxat La Sam

The New Testament and Psalms in the Madak language
New Ireland Province, Papua New Guinea
[mmx]

© 1995, 2011 Wycliffe Bible Translators, Inc.

Print publication 2011 by Wycliffe Bible Translators, Inc.

Web version

2014, Wycliffe Bible Translators, Inc.

<http://www.Wycliffe.org>

<http://pngscriptures.org>

www.ScriptureEarth.org



Creative Commons license (Attribution-Noncommercial-No Derivative Works)

<http://creativecommons.org/licenses/by-nc-nd/3.0>

Your are free to share — to copy, distribute and transmit the text under the following conditions:

- **Attribution.** You must attribute the work to *Wycliffe Bible Translators* (but not in any way that suggests that they endorse you or your use of the work).
- **Noncommercial.** You may not use this work for commercial purposes.
- **No Derivative Works.** You may not alter, transform, or build upon this work.
- **In addition,** you have permission to port the text to different file formats, as long as you don't change any of the text or punctuation of the Bible.

Notice — For any reuse or distribution, you must make clear to others the license terms of this work.

Tok Orait

Dispela Buk Baibel i kam wantaim tok orait na lo bilong Creative Commons Attribution-Noncommercial-No Derivative Works license. Em i tok olsem **yu ken givim kopi long narepela manmeri**. Yu ken wokim kopi na givim long husat i laikim. Tasol, yu mas tok klia dispela samting i kam long <http://tokplesbaibel.org>. Yu no ken kisim mani na salim dispela. **Yu mas givim nating**. Na tu, **yu no ken senisim Tok**.

Ol piksa i kam wantim ol Baibel na narapela buk i stap long dispela sait i gat tok orait long usim wantaim dispela samting tasol. Sapos yu laik narapela tok orait, yu mas askim husat i papa bilong copyright long dispela ol piksa.

Sapos yu laik stretim samting i no orait long dispela tok orait, stretim tok, salim Buk Baibel, o tainim Tok bilong God long nupela tok ples, yu ken **askim mipela**.

Olgeta tok orait na lo long tok ples English i stap long

<http://creativecommons.org/licenses/by-nc-nd/3.0>

Sapos yu gat askim long dispela, **plis askim mipela**.

Levenbuk Keneng At Lenavolo

Sam	1
Lagale Lavavang At Ne Iesu Karisito Metiu Ga Malagan I	
MetiuMt.133
Lagale Lavavang At Ne Iesu Karisito Mak Ga Malagan I	
MakMk208
Lagale Lavavang At Ne Iesu Karisito Luk Ga Malagan i	
LukLu255
Lagale Lavavang At Ne Iesu Karisito Jon Ga Malagan I	
JonJo333
Leven Gugu At Luvuttadi Vavang	
Leven GuguGu.388
Lovoang At Ne Pol Ti Limixin Nunu to Rom	
RomRo.457
Lovoang Avot At Ne Pol Ti Limixin Nunu To Korin	
1 Korin.1 Ko.490
Lovoang Sepsev Agepura At Ne Pol Ti Limixin Nunu To Korin	
2 Korin.2 Ko.524
Lovoang At Ne Pol Ti Limixin Nunu To Galesia	
Galesia.Ga.544
Lovoang At Ne Pol Ti Limixin Nunu To Epesas	
EpesasEp.557
Lovoang At Ne Pol Ti Limixin Nunu To Pilipai	
PilipaiPl568
Lovoang At Ne Pol Ti Limixin Nuunu To Kolosi	
KolosiKl576
Lovoang Avot At Ne Pol Ti Limixin Nunu To Tesalonia	
1 Tesalonia1 Ts.584
Lovoang Sepsev Agepura At Ne Pol Ti Limixin Nunu To Tesalonia	
2 Tesalonia2 Ts.591
Lovoang Avot At Ne Pol Saparap Ne Timoti	
1 Timoti1 Ti596
Lovoang Sepsev Agepura At Ne Pol Saparap Ne Timoti	
2 Timoti2 Ti605
Lovoang At Ne Pol Saparap Ne Taitas	
TaitasTa612
Lovoang At Ne Pol Saparap Ne Pilimon	
PilimonPm617
Lovoang Ti Limixin Me Ibru	
IbruIb620
Lovoang At Ne Jems	
Jems.Je646

Lovoang Avot At Ne Pita		
1 Pita1 Pi655
Lovoang Sepsev Agepura At Ne Pita		
2 Pita2 Pi665
Lovoang Avot At Ne Jon		
1 Jon1 Jo672
Lovoang Sepsev Agepura At Ne Jon		
2 Jon2 Jo681
Lovoang Sepsev Avantun At Ne Jon		
3 Jon3 Jo683
Lovoang At Ne Jut		
JutJu685
Lisilimet At Ne Jon		
LisilimetLi689

Sam

Salmo 1

Lomomo Raturun

¹Luvukat mo ik lok tinedi di raba arulu lavapaase axasep at limixin kapmek la dixo mumu asu lampoovo at limixin di lok laxakapmek, kopladi nak lok esogo minedi di paase aksaksa ri ne Moroa. ²Ketla, di suma ka lomomo atla di mumu asu Lenavolo at Leeme Silok, la dim doma mumu amisix i at levenaleng kangking la at levenaleng kanimin bok. ³Di lok ngan larauna di suusu ro at lisigege dan, la di pisik akmokso levempeven at levengaaling pipisik at laxampeeve, la levenang atdi kopmen nak mada si, la na mamang. Mo limixin di ngasang kobot at levempanga axap di lox i.

⁴Ketla limixin kapmek dixok lok kuren; di lok ngan mun levempusuvus at levenbeo, lamanman it mas kepe i. ⁵At laaleng ne Moroa na viila mumu loklok at limixin axap, ni naba lok li lumumuat mavana at limixin kapmek, la naba riki pes di basinge limixin akmokso ren. ⁶Limixin manmanton dit pas keneng at loklok tatao at Leeme Silok, ne Moroa, ketla nedi di mumu asu langas kapmek, dinaba seeve.

Salmo 2

Loorong Soksoxolik At Ne Moroa

¹Tila ba, limixin at levenabung mixin petpes di sevut li leventaangas kapmek kusu dinoxok lok maxopok at ne Moroa? Tila ba limixin di mumu asu lodoxoma gamasa xerepmo? ²Lavaorong at mo levengkot, di gagas ti esep eburu mi ne Moroa. La luvuttadi amgomgo dit kis buru ri puse ngas ti lox asi Leeme Silok, eburu mi loorong no neni ga soxolik ka i. ³La di lok, “Ata lox asepmus dik basinge lamgomgonga atnedu, la ataba ke xepe levelinga atnedu.”

⁴To vana at loxot kitkis orong teren at lebelen laxalibet, Leeme Silok ing longon mumu mo lodoxoma atdi, la i paase kalise ba ridi. ⁵La melemu

neni i belengatngas tinotno, la i paase sok di la lumukmusak silok teren ing long amarat aleng tinotno di. ⁶Ni i lok tidi, “To Saion at lakaana xaala rak, ara vaxaxis aulis li vam Loorong Silok tarax e.”

⁷Loorong Silok i lok, “Anaba vaase asu bok levempanga Leeme Silok i tong ali i. La ni ga lok tia, ‘Nenu ne Nuruk; ningina nia a lok ngan ne Tamam. ⁸Una sing ia, la nia anaba raba u mi larabung mixin axap; unaba ruuna ka axap lavatbung menemen. ⁹Unaba sak tup midi mi lolos silok taram. La unaba sep kapmek di ngan laradi i sep povorok lavasopen kangka.”

¹⁰Kuren la nemi lavaorong, mina xasep at levelinga rak la nemi lubang amgomgo at na lavatbung menemen, mina ronga avukat na levempapaase aronga. ¹¹Mina lok ngangao at ne Moroa mi lanmarat, la minak lok maxopok teren. ¹²Minat kis tintiding to melango ren; naba lok kapmek do ni na musak la soso mun nemi axap mina uu. Nedi axap dik sixit uto saparap ne Moroa kusu ne Moroa na lok see atdi, dinaba momo.

Salmo 3

Lisingising Ti Loklok Tooro Maxantamak Suubu

¹Leeme Silok, limixin solo di munepen minia. La buaang bok limixin di vas taba arulu xepe nga ia, dira munepen minia. ²La di paase mumu ia la dik lok keretna, “Moroa noxo lok tooro i.”

³Ketla nenu, Leeme Silok, amisik nenu lavatban tia at levenaniu. Nenu mene u raba ia mi lolos ti sak tup mi limixin dit kis munepen minia. La nenu mun u lox alolos ia ngan laabelemes. ⁴A sing lolos Leeme Silok mo ik lok tovana at lakaana kaala ren Saion la ing tonga ka lanteng tarak kusu ri loklok tooro.

⁵A subu midi xopok la a unga, la a nemen avukat at laxanimin axap atla Leeme Silok i kok avukat ia. ⁶Nia axo marat at legesa sangaun larabin sangaun kobot limixin munepen minia di tu xangkan ia at levengkot axap.

⁷Ude u, Leeme Silok! Lox aroo ia, Moroa rak! Unaba lox i atla uk lox asongot limixin munepen minia, la uk lok kepe lolos basinge di kusu di noxo lox asongor ia. ⁸Leeme Silok ik lok tooro limixin teren la di sak tup mi limixin munepen midi. La a sing i xusu neni naba lox anarong limixin teren.

Salmo 4

Lisingising Ti Loklok Tooro Ukantinao

¹O Moroa, nenu lentupe rak! Una vaase porang ia do ana sing u. Dola nia aga ekip tangarang mi levenmumuat, nenu ga lok tooro ia. Mo nga una lox asuusu lebelemumu ram tia la una ronga lising tarak.

²Lingisa ba nemi limixin kapmek miba xap ti paase aksaksa ria? Lingisa ba uba xap ti vavara solo ri levempanga xopmen turuturun teren, la ti mumu asu levempanga xaxarang?

³Ketla mina xasep do Leeme Silok ira soxolik ka vam limixin mokmokso kusu tin, la ing tonga ia do a toro rin.

⁴Mi guta ke gat lebelemamao na sat arup nimi at laxapmek, la mina ke xepe libilinga. Do minak midi at laraora atnimi, minak midi pilo la minam doma mumu avukat na levelinga. ⁵Minaplavang ti Leeme Silok mi levempanga naba lox epovo at lodoxoma ren, la minat kis nuunu saga ren. ⁶Buaang nedi di ngising keretna: “O Leeme Silok, una raba nema mi laxaloklok anarong solo. Una lox asuusu amisik lebelemulus tinama. ⁷Ketla mo lomomo rak tu, ne Moroa, i volo mo lomomo nedi dinaba ruuna i, ap mo laaleng levempipisik at leventaamang piao eburu mi laxadan vaen na umsu aleng.

⁸Dola a subu midi, a unga xeneng at lenmila. O Leeme Silok nenu xusuk, u xok nunuan ia.

Salmo 5

Lisingising Ti Loklok Tooro

¹O Leeme Silok. Una ronga levelinga rak. Una ronga ia, a duudu. ²Una ronga res at lerengteng tarak ti loklok tooro. Nu ne Moroa rak la Loorong Silok tarak! Nia a sing tu.

O Leeme Silok, ³ung tonga laxaka rak maxantamak suubu. At laxangking i so su, a tong asu levesingising tarak, la at kis ngangais ti lovoporang taram tia.

⁴Nenu xopmen lomoroa no uk lok momo ri libilinga; uxo esuxun mi libilinga. ⁵Nenu uxo tu ebelen tinotno minedi limixin loklox aaso; uxopara rinotno rinedi axap limixin kapmek. ⁶U sesele utut kepe limixin kaxarang. La u bulunga xepe rino nedi, dip sep amet limixin, la nedi di babala vukpuk limixin petpes.

⁷Ketla mumu mene labalamu silok taram, u ke avolo ia xusu ana vubeles at loogu laplavang taram i xaala; la ana lotu saparav u go, la ana xis tintiding saparav u mi loklok ngangao. ⁸O Leeme Silok, buaang limixin di munepen minia! Unamgo nga ia xusu ana mumu asu lavavara xa ram; una lox axasep langas taram tia ri mumu asu i.

⁹Levempanga salai limixin munepen minia dina tong i, a noxo mu asu i; nedi mun limixin sepsep tadi. Levelinga atnedi ik sixit nunuan ketla ni levelinga loklok atdan mun la i umsu mi laxaxarang arup kusu dina sep amet limixin. ¹⁰O Moroa, una vaase asi di la una lox asongot di; naba lox avukat do mo leveloklok kakapmek atnedi naba lox asuusu levenmumuat

silok tidi. Una xala xepe di basinge u, mumu loklok kakapmek mi lorongtonga xepe atnedi saparav u.

¹¹Ketla nedu dik lok keneng at loklok tatao ram, dina momo la dinak pixan momo amisik. Una kok avukat nedu di vavara aleng u; nedu di momo aleng mumu mun u. ¹²O Leeme Silok, uk lox anarong nedu di mumu asu levelinga ram; labalamu ram i tupe di ngan lenban.

Salmo 6

Lisingising At Laradi Mekmeres

¹O Leeme Silok, nemen uta musak la uta vaase sox ia. Nemen uta lox asongor ia keneng mun at lebelemamao ram. ²O Leeme Silok, lengkot tarak i molo axap; una balamu ia! Una lox alolos ia, nia na ara molos axap. ³O Leeme Silok, labalak i umsu mi lanbulu silok. Lingisa ba unaba lok tooro ia?

⁴O Leeme Silok, ude u, la una lox asepsu ia. At lebelemumu ram una lox asepsu ia basinge lanmet, ⁵atla to at lemenemen at labarongan, limixin kopmen dinam doma su ram; la kopmen tara na emi asu minu go.

⁶Lanbulu silok i suxuna ia la lolos tarak i auret na xap; at laxangkanimin axap loora rak mi lavatlingun imlumlu at levengkamkabili dan at lamarak. ⁷Axo epovo do ana reven avukat ta; luxatli rak ira dang pe axap, atla ang teng amisik at limixin munepen minia ding long areng amisix ia.

⁸Nemi limixin kapmek, uto nimi basinge ia. Leeme Silok ing tonga lerengteng tarak. ⁹I ronga bok lerengteng tarak ti loklok tooro la naba ronga res at levesingising tarak. ¹⁰Limixin munepen minia dinaba ekip tangarang mi lainmangan la langsung lumumu atla Leeme Silok naba sak tup midi. Soso mun dinaba lok tangtangu la ni naba xala oo di.

Salmo 7

Lisingising Ti Lomokmokso.

¹O Leeme Silok, nu ne Moroa rak; ana a vot saparav u kusu una lok see rak; una lok tooro ia la una lox asepsu box ia basinge nedu di xala mu rak. ²Naba lok kapmek do dina lok ngan lavat laion la dina xip kepe ia uto vaxalom la kopmen tara go ri lok tooro ia, la dinaba lais axakalik labantuxu rak.

³⁻⁴O Leeme Silok, la nu ne Moroa rak, dola aga lok pam tibilinga ri tara, la dola aga bala vukpuk tara tarapentangas tarak, kopla aga lok tavanga i lok kapmek tino ti laradi munepen minia la kopmen tavasuun

teren, koplá aga xarang taba tara. Dola nia agara lok pam tevempanga at na i, ⁵i lox avukat do una ke avolo limixin munepen minia (dina mamat mu ia) la dina rebeng alis kaka ia la dina sev asi ia la dina sev amer ia, la dina ke xepe labantuxu rak nak midi gamasa go at laxangka!

⁶O Leeme Silok, una lox asuusu lebelemumu ram. Una beleku kaxat, la una tu pe lumukmusak silok at limixin munepen minia, la una lok tooro ia. Nenu u vavara mene limixin dina rooro mokmokso. ⁷Kuren la unak lok bubua ka axap limixin saparav u, la unam gomgonga di boro vana at lixitkis orong taram. ⁸Nenu laradi rongtonga linga at limixin axap. O Leeme Silok, una ru ria; uklen i do nia laradi sepse. ⁹Nenu ne Moroa manmanton la u viila mumu levendoxoma atnema, la lavavara bok atnema. Una lox axap loklok kakapmek at limixin kapmek. La una raba luunun ti limixin nunuan.

¹⁰Moróa ni Lurutu See Pe rak. Neni ik lox arooro nedi di mumu asu levelinga ren. ¹¹Moróa ni lagale laradi rongtonga linga la levelinga ren ik mokso. Amisik ni i paase asi limixin kapmek.

¹²Dola kopmen dinak lox ekun loklok atdi, Moróa naba sua ka lavarise ren la naba rep tong pen labanara ren la na lox agagas li i. ¹³Ni naba lok kaka levempanga esep teren, la na lok dola na so asu mi levesoosoo xao ren.

¹⁴Moróa, una ven ba limixin kapmek di doxoma gagas li leventaangas ti laxakapmek. Dik soxovo li levenmumuat la di xaxarang arup limixin. ¹⁵Ketla nedi xa di onon at larapelixo di lili i ri leventaba vetpes. ¹⁶Kuren la di ruuna ka losongsongot mumu xa laxakapmek atnedi. La lemusak mi leesep di gagas min ti leventaba vetpes i lok kapmek axa di.

¹⁷A tong aorong ti Leeme Silok atla i tong asu lavapaase ramtaba ina mi lodoxoma mokmokso; ak pixan emi asu ri Leeme Silok, ni ne Moróa Avolo.

Salmo 8

Laasen Silok At Ne Moróa Mi Laasen Avukat At Laradi

¹Leeme Silok, nenu xusuk mun Leeme Silok atnema. Limixin axap at na lavatbung menemen di ven lempanga uga rudum li i, la kerepmo di ven kibis i do nu u silok aleng. Leemi asu saparav u di ronga i rovana at lebelen laxalibet. ²Laxamdak mi laxaalik kakalik dik pixan emi asu minu la lubungkadede bok. Uga bos loroboro ri lok pe lebelemamao at limixin dit kis munepen minu la atnedi dik sok tixirixes kepe levelinga ram.

³Dola a ven laxalibet nu ga rudum li i, lagaaling mi laxampenti uga vaxaxis di at levengkot atnedi la am doma xeretna; ⁴limixin nedi lempanga salai, la uram doma mu solo di; nedi lempanga gamasa mun, ketla uk lok tatao avukat tino di.

⁵Nenu uga raba di mi lolos pana at lempanga axap, ketla lolos atdi i lixilik mun ti lolos taram ne Moroa; la uga lox asilok di mi levenasen silok la lisisinang nunuan. ⁶Uga lok katling di xusu neni dinam gongonga levempanga axap nu ga rudum li i. Uga lox asilox di mavana at levempanga axap, ⁷i ngan levesipsip, laxanbulumaxao, la laxampanga sio axap bok at laxairing; ⁸lavapixa mi levenmat, la levempanga axap at lebelen laras.

⁹O Leeme Silok, nenu xusuk mun Leeme Silok atnema. Limixin axap at na lavatbung menemen di ven lempanga uga rudum li i, la kerepmo di ven kibis i do nu u silok aleng.

Salmo 9

Laradi I Tong Loklok Avukat Ti Ne Moroa Ti Lomokmokso Ren

¹Leeme Silok, nia ana emi asu minu mi labalak axap; anaba tong asu axap nom levempanga nunuan nu ga lox i. ²Anabak pixan mi lomomo, lavasuun teren ataram. Anabak pixan emi asu minu, ne Moroa; nu Lanaraavuk.

³Limixin munepen minia di sixiro do di ven u, dik sak subu epopolo ri lanmet. ⁴Ut kis at loxot tongtonga linga ram, la u tong asu lavapaase ramtaba ina mi lodoxoma mokmokso. Uga ronga linga rak la uga ru ria.

⁵Uga paase asi lavamolon, la uga sele utut kepe limixin kapmek; la kopmen tara noxo doma asu bok ba atdi. ⁶Lavamunepen minema ma noxo ven bok ba di; ura sele utut kepe vam laramenemen silok atnedi, la limixin axap dira domampe axap pam di.

⁷Ketla Leeme Silok, neni Loorong Avolo la naba nemen amisik kuren; ira lox agagas li vam loxonin teren ti viila mumu loklok at limixin. ⁸Ni im gongonga lavatbung menemen mi lavapaase mokmokso, la mi lodoxoma mokmokso i viila mumu loklok at limixin boro at larabung mixin.

⁹Leeme Silok i tu ngan loogu matmatkun, la limixin dip kip levenmumuat at limixin papavas, di epovo dina vubeles at mo loxot loklox alipe ren, la dina nemen nunuan e at levenaleng kakapmek. ¹⁰Leeme Silok, nedi dikleklen u, dinaba nuunu saga ram. La uxu raba arulu tara do lebelen i ngaongao ru.

¹¹Minak pixan emi asu ri Leeme Silok, mo it kix ngan lamgomgorovana Saion. Mina tong axasev i ri limixin at larabung mixin axap mumu levempanga ni gak lox i. ¹²Morua im doma su amisik atnedi ding songot mi laxanmumuat; neni ixong tonga xepe lerengteng atnedi, ketla ik lox asongot nedi mo limixin loklox araut mumuat.

¹³O Leeme Silok, una belemumu ia! Una ven na levesongsongot limixin munepen minia dik lox i ria! O Leeme Silok. Lox aroo ia basinge lanmet,

¹⁴kusu anaba tu ro melamgo at limixin to Jerusalem, la ana tong asu i ridi ri levempanga nia a emi asu minu min. La ana lox asuusu lomomo rak atla uga lox asepsu ia. ¹⁵Lavamolon diga xe lemet kusu ri sep limixin taram, ketla nedi xa diga subu tup teren, nedi xa diga onon at larapelixo atdi. ¹⁶Leeme Silok ira lox asuvos pam i keneng at lorongtonga linga at langas ik mokso, la limixin kakapmek dinaba tu at lavapaase mumu leveloklok atnedi.

¹⁷Lanmet ni langas at limixin axap dik lok laxakapmek, la tinedi axap bok dik sok sisixe ne Moroa. ¹⁸Moroo noxo domampe rino amisik limixin dik pakes. Moroo noxo ke xepe amisik levendoxoma voovo at limixin banbalo ti loklok tooro la ni noxo lox abulubun kepe amisik di.

¹⁹Leeme Silok, ude u! Nemen uta ke xepe limixin dina lox abulubun kepe levelinga ram! Una lam kaka lavamolon uto melamgo ram la una vaxaru di at lavapaase. ²⁰O Leeme Silok. Una lox amarat di, la una lox asuma xibis di do nedi luvuttadi gamasa dina ekip tangarang mi lanmet.

Salmo 10

Laradi I Ngising Ne Moroa Ri Loklok Tooro

¹Leeme Silok, tila ba u nemen paxalom basinge nama? Tila u lipe basinge nema, dola nema ma ekip tangarang mi lumumuat? ²Laradi xapmek it las i la ik lox asongot limixin banbalo; una rebeng alis ka i at larapelixo i lili i xusu ri lox asubu limixin taram.

³Laradi xapmek it las i mi levendoxoma xakapmek teren; laradi mokmorong i paase aksaksa ri Leeme Silok la im taba sinta i. ⁴Laradi xapmek kopmen nak lok ngangao at Leeme Silok; ik lox aso, kuren la at lodoxoma ren i lox abulubun ne Moroa.

⁵Laradi xapmek ipnovos at levempanga axap ni ik lox i. Ni ixo epovo na xasep avukat at lavapaase ramtaba ina at ne Moroa. Neni i paase aksaksa ri limixin munepen min. ⁶Neni ik lok tin axa xeretna, "Kopmen tepanga naba lox abulu ia la ana ekip tangarang mi levenmumuat at lorooro axap tarak." ⁷Levempapaase ren i umsu mi lavapaase aksaksa, laxaxarang la levelinga xikiilu, la i paase asu soso mun levelinga bilinga.

⁸Neni it kis alipe ro at laramenemen; la i gagas kusu nap sep amet limixin nunuan. La neni i kuxut tangais luvuttadi mokmokso, ⁹la neni it kis alipe ro at loxot kukuxut teren ngan lavat laion. Ik midi tangais limixin banbalo, la im tebeng alis kaka di at lelixo ren, la i sasat pes kaka di;

¹⁰kopmen tara go ti lok tooro di, kuren la ip sev asi di la di subu uto xopok, la lolos silok teren ik lok kakapmek tino di. ¹¹Laradi xapmek im doma i do, "Moroo xopmen nam doma solo limixin! Ira vamet pam la kopmen na epovo ri ven ia!"

¹²O Leeme Silok, una lox asongot mo limixin kakapmek la una doma nedi limixin ua dim suma mo losongsongot! ¹³Kereva lodoxoma at limixin kakapmek? Dim taba sinta ne Moroa, la dim doma i do, “Neni noxo lox asongot dik.”

¹⁴Ketla nenu, Leeme Silok, u ven lenget ka mo levenmumuat la levesongsongot dik lox i ri limixin baava, la u gagas amisik kusu una lok tooro di. Limixin pakpakes di vosiga u xusu una lok tooro di la uk lok tooro amisik di.

¹⁵Una lox axap lolos at luvuttadi xapmek, anak lox asongot di mumu levempanga xapmek dira lok pam i, kusu di noxo lok bok ba i.

¹⁶Leeme Silok, neni Loorong amisik la kopmen tekavaxap teren. Nedi di lotu saporap lomoroa vetpes, dinaba sonao rino basinge lenep kangka ren.

¹⁷O Leeme Silok, unabang tonga levesing at limixin di lox alixilik di maxopok taram. La unaba lox abelemes nedi. ¹⁸Unabang tonga levesing at lubungkurun la atnedi limixin baava. Unaba ru ridi, kusu limixin at lavatkangka di noxo lox amarat bok ba di.

Salmo 11

Laradi I Nuunu Lolos At Ne Moroa

¹Nia a nuunu saga at Leeme Silok, ni laradi xumkubak pe ria. Kuren la a noxo ronga res at limixin tangtangu di tong i ria dola, “Una rava oo ngan lapka uto vana at lempatkaana, ²atla limixin kapmek di gagas kusu dina soo u mi levesoosoo atdi; di kuxut tangais luvuttadi avukat to at levengkot buxumin kusu do dina soosoo di. ³Laradi avukat naba lok lavanga salai, dola limixin axap ding tonga xepe levelinga at lubung amgomgo la kerepmo lorooro at limixin ik lok kapmek aleng?”

⁴Leeme Silok, mo it kis at loogu laplavang kaala ren; lixitkis orong teren ik lok toxun pana at lebelen laxalibet. I reven tatao limixin axap at lavatbung menemen la ikleklen axap levempanga dik lox i. ⁵I viila mumu loklok at limixin avukat la limixin kapmek bok; neni ixo esuxun mi limixin di los polo Lenavolo ren.

⁶Neni naba soli asi laxao bokbolot la nabak bolot limixin kapmek mi la salpa (sulfur); la naba lox asongot di mi lamanman kapmek iplivi aleng. ⁷Loklok at Leeme Silok in mantan la i vara mun leven gugu nunuan; nege ik lok lempanga avukat nabat kis esogo eburu min to at lemenemen teren.

Salmo 12

Lisingising Ti Loklok Tooro

¹O Leeme Silok. Lok tooro nema. Kopmen bok ba taradi avukat go i nemen; u noxo ven kaka bok ba taradi ruturun go ik lok kantubu

at limixin axap. ²Nedi axap di vekearang taba; la di velok atdan ka la kerepmo dira xaxarang arup bok di.

³O Leeme Silok. Una vamngus nedi limixin di velok atdan ka, la una vamngus bok nedi limixin dim simi aurut di la dik lok keretna, ⁴“Mi levelinga atdik dik ta lok kaka levempanga dik ta vara rin. La dik ta tong levempanga nedik ta vara i do ata tong i, la ixo epovo tara na sep pepe dik.”

⁵Ketla Leeme Silok i vaase xeretna, “Na nia anaba vot, atla di lox abaava limixin dik pakes. La nedi di sev asongot labantuxu atdi mo dip kup mi losongsongot. Anaba raba nedi limixin baava mi nom lixitkis avukat ding kongkat tin.

⁶I epovo rinotno do ata nuunu at levengkakaape at Leeme Silok atla levengkakaape ren i lok ngan loxon siliva uat gamgames din tin i at laxao bokbolot ise at lavanuti rintin axap la i nunuan axap.

⁷⁻⁸Limixin kakapmek di umsu at lengkot axap la nedi axap di emi asu mi laxakapmek. O Leeme Silok. Una lok tatao avukat nema basinge di. La una lok tooro nema xusu limixin kerepmo di noxo lok kapmek nema.

Salmo 13

Lisingising Ti Loklok Tooro

¹O Leeme Silok, ningisa bok ba unaba doma su rak? Kereva, u domampe rino nga ia? Tila rinotno la ulupe lamaram basinge ia?

²Ningisa ba unaba lox axap na levenmumuat nia arap kip tutu min? Lavanisa aleng kangking la kanimin lanbulu silok ba nemen keneng at lorooro rak? Ningisa ba unaba lok tooro ia xusu anoxok lok bok ba at loklok tatao at limixin munepen minia?

³O Leeme Silok; nu ne Moroa rak. Doma su rak. Una rongalising tarak. Una raba amlong ia mi lolos tarak; la nemen uta ke xepe ia xusu ana met.

⁴Nemen uta ke avolo lavamunepen tarak dina tong i do, “Nedik tara sev asubu vam i.” Nemen uta ke avolo di kusu dina lok momo mumu i nom.

⁵Ketla a nuunu saga ram, atla labalamu lexen taram tia naba nemen amisik. Anaba momo dola una lox asepsu box ia basinge lavamunepen tarak. ⁶O Leeme Silok. Anabak pixan tu, atla ugara lox anarong pam ia.

Salmo 14

Loklok Kakapmek At Limixin

¹Luvuttadi loklok papavas di tong i xeretna do, “Kopmen to Moroa.” Nedi axap na limixin, loklok atdi itpospa aleng, la dik lok levempanga i lok pis aleng; kopmen tara rinotno nak lok levempanga ik mokso.

²Leeme Silok ik milik si boro vana at lebelen laxalibet, la i reven limixin axap, do ni naba epovo ri ven kaka taradi leklen la tara bok i lotu saporav i. ³Ketla nedi axap digara oon soogong pam; lorooro atnedi axap ira mau axap pam. Kopmen tara atdi na lok tavanga ik mokso, kopmen tinotno mo tegesera bok mene nga.

⁴Leeme Silok i sue xeretna, “Kopmen dinaklen leventaangas nunuan? Kereva, nedi axap na dik lok laxakapmek, kopmen takleklen atdi? Dip kip pilo amisik limixin tarak, la kopmen tinotno dina ngising tia.”

⁵Ketla melemu dinaba lingun aleng, atla ne Moroa i nemen eburu minedi limixin di mumu asu levelinga ren. ⁶Nedi dik lox aekarakat levempanga luvuttadi banbalo di vara i do dina lox i; ketla Leeme Silok nabak lok see atdi.

⁷A vara rinotno i do ne Moroa na riki tara boro Saion kusu na lox asepsu limixin me Israel basinge limixin munepen atdi, la limixin me Israel diba lok momo dola Leeme Silok na lox asang kobot amu manga di.

Salmo 15

Loklok Ne Moroa I Vara I

¹Leeme Silok, nege i epovo na vubeles at loogu xaala ram? Nege i epovo na nemen eburu minu ro Saion at lakaana xaala ram?

²Neni laradi i mumu asu lavavara at ne Moroa at leventaangas axap, la ik lok amisik leveloklok ik mokso la levelinga ren i ruturun amisik; ³la kopmen ni na paase asi taasen at tara ukopok; kopmen na lok tibilinga ri larapen tangas teren, kopla na paase mumu nedi dik lok auret tin.

⁴Neni i rexes nedi no ne Moroa ik sok sisixe nedi. Ketla neni ip kiv aurut levenasen atnedi di mumu asu levelinga at Leeme Silok. Ik lox epovo amisik leveng kakaape ren, keke i do i lolos aleng tin, ni ixo epovo na ke xepe i. ⁵Im taba levendinau, ketla kopmen dina porang i mi luunun i volo. Ixo epovo do tara na un i mi tevempilas kusu na vaxaru taradi mokmokso at tavapaase.

Laradi i mumu asu na leveloklok, lixitkis teren naba nemen matmatkun.

Salmo 16

Laradi I Nuunu La I Ngising Ne Moroa

¹O Moroa, una lok tatao ia, a nuunu saga ram kusu una kubak pe ia basinge lavamunepen tarak. ²A tong i ri Leeme Silok, “Nenu Leeme Silok tarak; levempanga nunuan axap tarak, nenia a ruuna i, nenu axa um taba ia min.”

³Limixin tuturun at Leeme Silok, nedi limixin nunuan. Ak lok momo amisik ti nemen eburu midi.

⁴Limixin dit pas uto at levenmoroa vetpes, dinaba ekip tangarang mi laxanmumuat solo. Nia noxo nemen eburu midi at levelaplavang atnedi. La nia noxo lotu saparap levenmoroa atnedi.

⁵Leeme Silok, nenu mun tarak la kopmen tomoroa bok. Ang song kobot mumu mun u, la kopmen bok ba tepanga vetpes nia anak pakes tin. Lorooro axap tarak i nemen at lukngam. ⁶A ruuna ka leventamtaba nunuan mun taram la di lox avukat tinotno.

⁷A emi asu mi Leeme Silok, atla neni im lam lorooro rak, la at leveng kanimin lodoxoma rak i anasa ia mi loklok avukat. ⁸Nia a xasep amisik ti Leeme Silok i nemen eburu minia; i nemen auret amisik la kopmen tavanga noxo sev asubu ia.

⁹Kuren la nia a tong loklok avukat tu, Leeme Silok; la a momo la kopmen tinotno nia na marat tangarang ka tepanga, ¹⁰atla uk lok tatao ia basinge lolos at lanmet lexen. Ara mumu asu u mi luruturun tinotno, kuren la u noxo ke xepe ia xusu anat pas uto at lemenemen at labarongan. ¹¹Unaba lox ase ia mi langas it pas uto at loxot ti lorooro. Ut kis esogo minia, la a momo amisik. Uk lox aumsu ia mi lososoro mo naba nemen amisik la kopmen tekavaxap teren.

Salmo 17

Lisingising At Laradi Mokmokso Ga Tu At Lavapaase

¹O Leeme Silok, una ronga lorotoro rak la una ru ria mi levelinga ruturun, una ronga res at lerengteng tarak saparav u ri loklok tooro. Una ronga na lising tuturun tarak saparav u. ²Unaba ronga linga rak la unaba ru ria, atla nenu uklen leveloklok ik mokso.

³Uklen lorooro rak. Uga vot pasa ia at laxanimin la uga viila mumu axap lorooro rak, ugoxo vuse kaka tibilinga rak. Nenia axo paase kapmek, ⁴ngan leventaba vetpes di lox i. A mumu asu amisik levelinga ram, la kopmen ana mu asu langas at lemusak la leesep. ⁵At pas amisik at langas taram, la kovisi nia ana vas aase ren.

⁶O Moro, a sing saparav u atla uk lok epovo levesing tarak; una xa roolong tia la una ronga levelinga rak. ⁷Una lox asuusu nom labalamu avukat taram la una lox asepsu ia; nia at kis esogo minu la kopmen nia ana marat at limixin munepen minia.

⁸Una lok tatao ia ngan uk lok tatao luxatli ram; una lipe ia at lamamau at luvapa ram, ⁹kusu limixin kapmek di noxo sev asi ia.

Limixin munepen minia di tu kangkan ia kusu dina sep amer ia. ¹⁰Kopmen dina balamu leventaba vetpes. Dit las amisik di. ¹¹Na nga ding

kan ia, at levengkot nia a tepukus taba ve, di mamat mu amisix ia kusu dina sev asubu ia. ¹²Di lok ngan lubung laion, di kuxut tangais ia, di vara i xusu dina lais koxorop axakalik labantuxu rak.

¹³O Leeme Silok, ude u. Una esep tangarang limixin di munepen minia, la una sak tup midi. Una lox asepsu ia basinge limixin kapmek mi lavarise esep taram. ¹⁴O Leeme Silok, una lox arooro ia mi lolos taram basinge nedi limixin at na lorooro di ruuna ka levempanga axap nedi xa di vara i. Una lox asongot di mi levesongsongot nu ga gagas li i ridi, teventaba bok ti laxamdak mi laxaalik atdi, la teventaba naba volo bok ti luvuttubuno avolo atdi.

¹⁵Ketla nia anaba ven lamaram atla nia goxo lok tibilinga; la dola ana aus, anaba umsu mi lososoro atla anaba nemen eburu minu.

Salmo 18

Loxompixan At Ne Devit - Ti Lok Momo

¹O Leeme Silok. A vavara aleng tu! Nenu lentupe rak.

²Leeme Silok ik lok see rak basinge lavamunepen; neni Loogu Matmatkun tarak. Moroa rak, neni Lurutu See Pe rak, la keneng mun teren nia a nemen matmatkun. I tupe ia ngan lavatban; i tu tooro ia, la i kubak pe ia basinge lavamunepen tarak. ³A toro ri Leeme Silok, la i lox aroo ia basinge limixin munepen minia. Leemi asu ri Leeme Silok!

⁴Loxoxo uu ga suxuna ia (Lanmet ga auret tia) ngan ta lovo paxanao sesele utut ga vuulus labaaxin tarak. ⁵Loxoxo uu ga suxuna ia (Lanmet ga auret tia) ngan ta loos ga itis ia; lamaut ga lok do na xonom ia. ⁶At lumumuat keneng at lorooro rak, aga ro ke at Leeme Silok. Aga ro ke at ne Moroa rak ti loklok tooro ro xeneng at loogu laplavang teren la ni ga ronga laxaka rak; la ga ronga bok lerengteng tarak ti loklok tooro basinge lavamunepen tarak.

⁷La ne Moroa ga musak di la ga lox angne lavatkangka la lempar abuxumkun at lempatkaana gang nengne. ⁸Lusuxa ga ravasu at lisna ren la langangao at laxao bokbolot tin tin asonao vanga eburu mi laxali kao bokbolot ga ravasu at lungusno. ⁹Ni ga vaxat kuang laxalibet la ni ga vas si ude xopok, mi loxontaxabu bibi maxopok at luxangkedek teren ¹⁰Ni ga xis pana at lavanga raptava ren (cherubim) la ga rava si soso min ude xopok ngan lamanman silok. ¹¹Ni ga xua pe i mi lubuxumin; lengkon takabu lolos ga umsu mi laxadan gak lok kangkan i. ¹²Laxampengkos uat gan bun aleng ga subu la laxao mi lavanga ga mam gamgomgo rin, la ga soosoo das su at loxon takabu bibi. ¹³To vana at lamavangkap, Leeme Silok gap kup butbutki ngan lerepaavat. La limixin axap diga ronga laxaka at Leeme Avolo. ¹⁴Ni ga soo lavamunepen mi laxasosoo ren, la

diga oo epeseves, la diga sixiro basinge laxasep at lavanga ga mam etitit. ¹⁵To maxopok at lebelen laras gamdi saxaven, la lavarabuxumkun at lavatkangka bok gamdi saxaven, at loxonaleng nu Leeme Silok uga musak lavamunepen taram, la uga vaase lolos aleng tidi.

¹⁶Leeme Silok ga song asi boroxun pana la ga rebeng tu rak; la ni ga rev asu ka ia boro xeneng at lamaxat. ¹⁷Ni ga lox asepsu ia basinge limixin lolos diga munepen minia, la basinge bok di, ding long antungun ia. Nedi diga lolos polo ia. ¹⁸Nia ga nemen keneng at lumumuat, diga esep minia, ketla Leeme Silok ga kok avukar ia basinge di. ¹⁹Ni ga lok tooro ia basinge laniu; la ga lox asepsu ia atla ni ga lok momo minia.

²⁰Leeme Silok im taba ia mi luunun atla nia laradi mokmokso la ni ik lox anarong ia atla nia laradi sepsen. ²¹Agara mumu asu Lenavolo at Leeme Silok; a goxo raba sinta ne Moroa rak. ²²Agara mumu asu amisik leventaangas axap teren; nia goxo ronga xepe at lavapaase ren. ²³Iklen i do kopmen tibilinga rak, la aga lok tatao avukar ia la nia goxo lok taxakapmek. ²⁴Kuren la im taba ia mi luunun atla nia aga lok mun lomokmokso la iklen i do nenia laradi sepsen.

²⁵O Leeme Silok, nenu u ruturun tinedi di ruturun saparav u; la uk lox avukat tinotno rinedi din mantan tino. ²⁶La uk lok lempanga i dadat tinedi loklok atdi i dadat. Ketla do tentaba dik lok laxakapmek, nenu u porang loklok atdi mi laxakapmek. ²⁷Uk lox asepsu nedi di lox asi di ukopok, la uk lox asi nedi dim simi aurut di.

²⁸O Leeme Silok, um taba ia mi laxasep; la uk lok kepe ia basinge loklok at lamain. ²⁹Um taba box ia mi lolos ti vesep mi limixin munepen minia, la lolos tip sev asi di.

³⁰Na ne Moroa, loklok teren i lox avukat tinotno. Dola ni na xaape mi tavanga, ni naba lox i; la neni i lok ngan lentupe tinedi di vot pasa i xusu na lok see atdi. ³¹Leeme Silok, neni xusuk ne Moroa. Moroa xusuk i lok ngan lentupe ridik. ³²Neni mun ne Moroa ik lox alolos ia, la neni mun ik lok tatao lavatpas tarak. ³³Neni mun i su auru ia at lavatpas tarak ngan lavanga mi lavanuet kangkedek it pas matmatkun. Ik lok tatao box ia rovana at lempatkaana. ³⁴Ik lox ase ia ri vesep, kusu anaba soosoo avukat mi losoosoo lolos.

³⁵O Leeme Silok, um taba ia mi loxokok la uk lox asepsu ia; loklok tooro ram ira lox asilok pam ia; la lolos bok taram ga kubak pe ia basinge lavamunepen tarak. ³⁶Uga lok tatao avukar ia basinge di la di goxo xoxo ka ia. La nia goxo subu bok. ³⁷Nia ga xala limixin munepen la aga rebeng alis kaka di. Nia goxo lok mamas se aga sep amet axap di. ³⁸Aga bobo amet di, la digoxo epovo na xatu kaxar amlong; digak midi etaba ro melamgo rak. ³⁹Uga raba ia mi lolos ti nom leesep, la nia aga sak tup mi limixin diga munepen minia. ⁴⁰Uga lox aoo limixin munepen minia la diga sixiro rak. Agap sep kakapmek tino nedi diga lox angtungun minia.

⁴¹Digang teng ti loklok tooro, ketla tara goxo lox aroo di. Diga toro ri Leeme Silok, ketla ni goxo rongga res atdi. ⁴²Aga long povorok tino di la di lok ngan ta lakbus kao no lamanman it mas kepe i. Aga vas asi di, ngan ta at pas at lapke ro at langas. ⁴³Uga lox aroo ia basinge limixin tongtonga xepe la uga lox asilox ia ngan loorong silok at leven abungmixin axap; limixin nia goxoklen di, na nga nia am gomgonga di. ⁴⁴Limixin boro xadiong dit kis tintiding mi levempatgulom atnedi saparav ia; dola di rongga ia, di rongga res at levelinga rak. ⁴⁵Dixo abelemes bok ba, la di dede aleng, mo do di on basinge laraugu matmatkun atdi.

⁴⁶Leeme Silok ni Luntoo rak. A emi asu min, ni lentupe rak. Ana tong asu i ri limixin do ne Moroa i silok aleng la ik lox asepsu ia basinge limixin munepen minia. ⁴⁷Im taba ia mi lolos ti sak tup mi limixin munepen minia, la i tupe ia at limixin kapmek. La neni mun ik lox asi at larabung mixin axap kusu diba nemen maxopok tarak, ⁴⁸la ik lox asepsu ia basinge lavamunepen tarak.

O Leeme Silok, u raba vam ia mi lolos kusu ri sak tup mi limixin munepen minia, la u lok tatao ia kusu limixin sepsep di noxo sev asi ia. ⁴⁹Kuren la a emi asu minu kantubu at limixin at laramenemen; ak pixan emi asu saparav u.

⁵⁰Moróa im taba lolos silok ti loorong kusu nak sak tup mi lavamunepen teren; ik lox asuusu labalamu lexen teren ti no lara neni xa ga soxolik kaka i, ti ne Devit la ri luvuttubuno avolo umelemu.

Salmo 19

Luruntudum Li At Ne Moroa I Lox Asuusu Laasen Silok Teren

¹Laxalibet i lox asuusu laasen silok at ne Moroa la levempanga neni ga rudum li i. ²At levenaleng kangking axap mo levempanga di paase asuusu i; la levenaleng kanimin axap bok, di paase asuusu i. ³Kopmen dina vaase asu tevelinga la kopmen bok ata rongga asu i. ⁴Ketla lavapaase axasep atdi i lox ase limixin axap at lavatbung menemen la di rongga ka xa i ro vaxalom at na lavatbung menemen. Moroa ga lok loxot kitkis to vana at lamavangkap ti laxangking. ⁵Ip tavasú maxantamak suubu ngan laradi i epot maxat la i lok momo ri vas su, i ngan bok laradi lolos i lok momo ti sixit at lekampovo. ⁶Laxangking i ravasu ro at lenep kavaxap at lavatbung menemen la ik sixit korop uto at lara lenep kavaxap bok. Kopmen tempanga i epovo na lipe basinge liplivi ren.

Lenavolo At Ne Moroa

⁷Lenavolo at Leeme Silok ik mokso axap; im taba lolos maxat ti limixin di mu asu i. Lavapaase matmatkun at Leeme Silok, i epovo do dik ata

nuunu saga ren. La im taba lodoxoma avukat tinedi xopmen todoxoma avukat atnedi. ⁸Lenavolo at Leeme Silok ik mokso aleng, la nedi di mumu asu i di momo; leventaangas at ne Moroa i nunuan, la im taba lodoxoma avukat ti limixin. ⁹I lox avukat do laradi na lok ngangao at Leeme Silok, la limixin dinaba lok ngangao epasum amisik. Levelinga loklok akmokso at Leeme Silok ik mokso la i lox avukat amisik. ¹⁰I lox avukat do limixin dina vara aleng i polo logol; la i so avukat tino ri limisiu. ¹¹Leeme Silok, leventaangas taram im taba ia mi lakleken, nia lasaxaruki ram; anabak lok kaka luunun teren, mo do nia ana mumu asu levelinga ram.

¹²Leeme Silok, kopmen tara i epovo xusu ni na ven axa libilinga ren, kuren la una doxoma xepe mo libilinga nia xopmen na xasep teren. ¹³Una lok tooro ia xusu nia noxo lok laxapmek ua nenia a vara i. Nemen uta ke xepe i na sak pava ia xusu nia anabak mokso la anaba sepumus basinge lolos at libilinga. ¹⁴Nia a vara i do levempapaase rak mi lodoxoma rak nak mokso at lamaram. O Leeme Silok, nenu loxot loklok alipe rak, la nenu laradi rutu korop pe ria.

Salmo 20

Lisingising Ti Loorong At Leesep

¹Ma sing Leeme Silok, ni ne Moroa at ne Jakop, do ni naba ronga ram dola una ekip tangarang mi lumumuat, la naba xok avukar u! ²Ma sing box i do loklok tooro ru naba laa boro xeneng at loogu laplavang teren, la loklok tooro bok tu naba vot boro Saion at lakaana ren. ³Ma sing box i do ni naba siam ka ampama letaba ram, la ni naba momo rino bok mi levelaplavang taram. ⁴Ma sing box i do ni naba raba box u mi lempanga ung kongkat tin, la ni naba lox asoxos levendoxoma gagas taram. ⁵Do Leeme Silok na lox epovo na levesingising la una sak tup mi lavamunepen taram, manabap kup mi lomomo, la manaba lok katling i mi leemi asu mi ne Moroa. Ma sing Leeme Silok naba lox asoxos axap levesingising taram.

⁶Na nia aklen i do Leeme Silok im taba lolos ti loorong soksoxolik teren kusu ri sak tup mi limixin munepen min; neni i paase porang levelinga ro at loxot melemelengan teren keneng at lebelen laxalibet at ne Moroa. At lolos axa ren neni im taba i mi lolos avolo aleng ti sev asi limixin munepen. ⁷Leventaba di nuunu saga at levenkaris esep atnedi, la leventaba di nuunu saga laxanos atdi, ketla nedik ta nuunu saga at lolos at Leeme Silok, ni ne Moroa atdik. ⁸Limixin kerepmo dinaba vas kais la dina subu, ketla nedik tanaba xatu upana la manaba tu tuxuruxun.

⁹O Leeme Silok, una raba lolos ti loorong kusu na sak tup mi limixin munepen min; la una ronga atnema do mana toro ru.

Salmo 21

Moroa I Lok Tooro Loorong La Loorong I Xiv Aurut Laasen Teren

¹O Leeme Silok. Loorong i lok momo, atla nenu ugam taba i mi lolos; i sosoro atla nenu ugam taba i mi lolos tik sak tup mi lavamunepen teren. ²Uga raba vam i mi levempanga axap lebelen ga tu i; uga raba box i mi mo lavanga neni ga ngising tin.

³Uga raba i mi leveloklok anarong silok, la ugara vaxasiga i mi lavatbungorong gol at lavatlak teren. ⁴Ni ga sing u ri lorooro, la nu ga raba vam i min, lorooro abao naba baalom aleng. ⁵Lisisilok teren i volo, atla nenu uk lok tooro i; laasen silok mi lisisinang teren, nenu xa uga raba i min. ⁶Um taba amisix i mi leveloklok anarong, la ik lok momo atla ut kis esogo amisik min.

⁷Loorong i nuunu saga at Leeme Silok, ni Lanaraavuk; nom labalamu lexen at Leeme Silok naba tu amisik, kuren la lixitkis orong teren nabak lok amisik. ⁸Loorong naba xoxo alis ka limixin axap di munepen min, la ni naba xoxo alis axap nedi di velox angtungun min. ⁹La ni naba sele utut kepe axap di ngan laxao, imsum at laxairing, dola ni na ru asuvos.

Leeme Silok naba lox asi axap di mi lebelemamao ren, la laxao naba rin asonao di. ¹⁰La kopmen tara at livipisik li atnedi noxo sepsu at lanmet; loorong naba sep kepe axap di.

¹¹Di epaase li la di sevut li leventaangas kusu dinaba lok kapmek loorong, ketla di noxo lox epovo i. ¹²Ni naba xala di mi levesoosoo ren, la dinaba repukus la dinaba sixiro.

¹³Leeme Silok, ma emi asu minu, ti mo langsung lolos taram! Manabak pixan la mana emi asu mi leveloklok taram i lolos aleng.

Salmo 22

Lanteng At Laradi Mekmeres

¹Moroa rak, Moroa rak, tila u raba arulu ia? Arang teng pupuse aleng ri loklok tooro ram, ketla uxok lok tooro ia. ²Moroa rak, a toro ru at laxanaleng kangking, la uxok vorang lisingising tarak; la at levengkanimin bok a toro ru, ketla uxok lox amamana labalak. ³Ketla nenu ut kis at loxot kitkis orong taram ngan Laradi Melemelengan, nenu mun limixin me Israel di emi asu minu. ⁴Lavalabat atnema diga nuunu saga ram; diga nuunu at levelinga ram, la uga lox asepsu di basinge levenaniu. ⁵Diga ro ke ram la di goxo ekip tangarang mi levenaniu. Diga nuunu saga ram la uga lox epovo levendoxoma atdi.

⁶Ketla nia xopmen bok ba ana ngan laradi, a lok ngan ta laxalon; limixin axap di lele abulubun ia! ⁷Limixin di ven ia, la di paase aksaksa

ria. Dim lem gam tia la dira piripat patlak. ⁸Dik lok tia xeretna, “Nenu ga nuunu saga at Leeme Silok, tila neni xopmen na mulus ti lox aroo u? Dola Leeme Silok i vavara ru, tila ni xopmen na lok tooro u?”

⁹Nenu mene, ne Moroa, uga lox asu avukar ia at lebelen ne naga at laaleng pipisik tarak. Nenia nove aga xadede, uga lok tatao avukar ia. ¹⁰Agam doma saga ram, ga ru xaka i at laaleng ne naga ga visix ia ren, la at levenaleng axap tarak, nenu mun ne Moroa rak. ¹¹Nemen uta nemen vaxalom basinge ia! Levenmumuat mo i auret, la kopmen tara ri lok tooro ia. ¹²Limixin solo di munepen minia, la di tu xankan ia ngan ta laxanbulumaxao temes, ngan ta laxanbulumaxao mukmusak boro Basan. ¹³Di vavangangba la di booro ngan ta lubang laion, di gagas ti atat lalais ka ia ngan levempanga anan.

¹⁴Lolos tarak ira xap pam, i xap ngan laxadan i soli su ri laxangka. Levennin etudum at levesi rak ira rem kida vam. Labalak i umsu mi lainmarat i silok aleng. ¹⁵Luxukung tarak ira vatmang axap ngan laxakup, la lagam tarak i xis pe langsuk; nenu xa u ke xepe ia ro at laxangka xusu ana met.

¹⁶Libinam tadi at limixin kakapmek na nga di ru xangkan pam ia; di lok ngan ta lubangman di xala sa rak, di atat lais koxorop luxangkedek tarak mi lukngak. ¹⁷Ara gelegen axap. Limixin munepen minia di reven tooro ia la di paase aksaksa ria. ¹⁸Diga lu buru mi lengkon uat i ruuna leveloklok katling at leexes kusu ri lok kisip ka nege ba lok ka labantamon tarak.

¹⁹O Leeme Silok, nemen uta on basinge ia! Ude, una lox asepsu soso mun ia! ²⁰Lox asepsu ia basinge lavarise esep; lox asepsu ia basinge na lubangman. ²¹Lox asepsu ia basinge na lubang laion; axo epovo kusu ri sixiro basinge na laxanbulumaxao sio.

²²Do una lok tooro ia, anaba tong asu i ri limixin tarak. Anaba emi asu minu ro at lovtopot buru atnedi. ²³Nemi livisik li at ne Jakop me Israel, mi lok ngan lavasaxaruki at Leeme Silok, mina vemi asu amisik min. Minak lok ngangao ren la mina lotu saparap amisix i! ²⁴Leeme Silok ixo raba sinta limixin baava dip kip levesongsongot. La ixo raba arulu bok di, ketla ing tonga di do di toro ri loklok tooro.

²⁵Anaba emi asu mi laasen taram to at lovtopot buru silok, ti levempanga ugara lok pam i. Anaba tu ro melamgo atnedi di lotu saparav u la anabaplavang tu mi levempanga nia aga xaape min. ²⁶Limixin banbalo dinaba an mais at leveluxa di vavara rin. Nedi di repukus taba Leeme Silok, dinaba emi asu min. A sing ne Moroa na lox anarong di xusu dina ngasang kobot amisik at levempanga axap!

²⁷Limixin boro at larabung mixin axap dinabam domasu amisik at Leeme Silok. Boro at lengkot axap at lavatbung menemen, dinaba repukus taba i, la levenasen bantuxu axap dinaba lotu saparav i. ²⁸Leeme

Silok neni Loorong Silok mavana at limixin axap. La neni im gomgonga limixin at leven abungmixin axap.

²⁹Limixin dit las nedi, dinaba xis tiktikbu saparav i. Limixin at lavatbung menemen axap dinaba xis tiktikbu saparav i. ³⁰Lavaola melemu dinaba gugutaba amisix i. Limixin dinaba paase avolo na loklok at Leeme Silok ri lavaola mo dinabat pot melemu. ³¹Limixin kovisi dina visik nedi, dinabaklen i do, “Leeme Silok ga lox asepsu limixin teren basing lavamunepen atdi.”

Salmo 23

Lisingising At Laradi Loklok Tatao Sipsip

¹Leeme Silok, ni laradi ik lok tatao ia ngan laradi ik lok tatao levesipsip teren; kuren la a ruuna ka axap levempanga ak pakes tin. ²I lox amdi ia ro at lenep kangka i ruuna levempivilis avukat kusu ana lok mamana ren, la i lam kaka box ia uto at laradan i sesen atnaasan kusu ana inin. ³Neni im taba ia mi lolos maxat. La im lam ase ia keneng at larangas mokmokso, ngan ni gara vaase ali vam i. ⁴Keke i do ana vas beles keneng at langangan lamain bonot, nia noxo marat. Leeme Silok, u nemen eburu amisik minia, luvuukup mi lakdak taram ik lox amenemen amisix ia.

⁵U lok gagas li leluxa silok tia, kuren la limixin munepen minia, dinaba ven ia, dola una seega rangarang ia ngan laradi silok. La unantu aumsu aleng lavanga inin tarak. ⁶Aklen i do loklok nunuan mi labalamu ram naba kuxun amisik keneng at lorooro axap tarak, la loogu ram naba lok ngan loogu aulis tarak at levenaleng axap nia anaba rooro ren.

Salmo 24

Loorong Silok.

¹Lavatbung menemen la levempanga axap di nemen keneng teren, ni at Leeme Silok. Lavatkangka mi levempanga axap di rooro, ateren mun. ²At lurutu kaxat, neni ga lok li laxangka ro mavana at lamaxat. La ni ga lok li bok levenamkumkun to xa maxopok at lisimaramain.

³Loklok atnege i lox avukat kusu neni ba epovo na vas urut uto vana at lakaana at Leeme Silok ti lotu saparav i? Loklok atnege i lox avukat kusu neni ba epovo na vubeles uto xeneng at loogu laplavang teren i xaala?

⁴Nedi mene di dadat at loklok atnedi la lodoxoma atnedi, la kopmen dina lotu saparap laxampoovo moroa la kopmen dina tong asu levengkakaape xaxarang. ⁵Leeme Silok naba lox anarong di. Moroa ni Lunto atdi la naba tong atkatla li atdi do nedi limixin sepse. ⁶Limixin kerepmo di ngaongao ri ne Moroa, la dit pas amisik ti lotu saparap ne Moroa at ne Jakop.

⁷Mina suang soso mene lempatban at langas uat, mina suang axap lempatban megano kusu Loorong Silok na vubeles. ⁸Nege na Loorong i silok solo? Ni Leeme Silok la ne Lanaraavuk; lolos teren i volo la ik sak tup mi lavamunepen teren at levenaleng at leesepe. Neni Leeme Silok.

⁹Mina suang soso mene lempatban at langas uat, mina suang axap lempatban megano, kusu Loorong Silok na vubeles. ¹⁰Nege na Loorong i silok solo? Neni Leeme Silok, neni Lanaraavuk. Neni Loorong Silok.

Salmo 25

Lisingising Ti Loklok Tatao La Logomgonga At Leeme Silok

¹O Leeme Silok, a lok lisingising tu mi lorooro axap tarak. ²O Moroa rak, a nuunu mene ram. Una lok tooro ia kusu ana sak tup mi limixin munepen minia la nia anoxo ruuna ka lainmangan at leesepe. Nemen uta ke xepe di xusu dina sev asubu ia la dina lox aksaksa ria. ³Limixin di nuunu saga ram, lavamunepen atdi noxo epovo na sak tup minedi, ketla nedi mene ding tonga viribang at levelinga ram, dinaba subu at leesepe.

⁴O Leeme Silok, una anasa ia mi leventaangas taram. Una lox axasev i ria. ⁵Una anasa ia xusu ana rooro mu asu levelinga ruturun taram, atla nenu ne Moroa rak, la uk lox asepsu ia. A nuunu saga amisik taram.

⁶O Leeme Silok, una doma amlong ti lebelemumu ram mi labalamu lexen taram, ugara lox asuusu vam i, ga ru ka i ganoxa at lereot. ⁷Una doxoma xepe axap leveng kakapmek la levesoogong tarak, aga lok pam i, ganoxa ga laau mun be ia. O Leeme Silok, una domangke rak mumu labalamu lexen taram mi loklok avukat!

⁸Loklok at Leeme Silok ik mokso la i lox avukat. Kuren la i anasa limixin kakapmek mi langas i epovo dina mumu asu i. ⁹Nedi dik lox axakalik di at langas ik mokso, neni im gomgonga di. La i anasa bok di mi lavavara ren. ¹⁰Nedi di mumu asu lekabus teren eburu mi leventaangas teren, neni im gomgonga nedi mi luruturun tinotno la labalamu.

¹¹Leeme Silok, una lox epovo laxakaape ram la kerepmo una doxoma xepe laxaloklok kakapmek axap tarak, atla a ruuna laxaloklok kakapmek solo. ¹²Nedi ding tonga res at Leeme Silok, ni naba anasa di mi langas dina mumu asu i. ¹³Limixin kerepmo dinaba ngasang kobot amisik la laxamdak mi laxaalik atnedi dinaba ruuna ka mo lenep kangka aulis atdi. ¹⁴Leeme Silok neni lentangas atnedi ding tonga res teren, la neni i lox amuat levelinga at lekabus teren eburu minedi.

¹⁵Am tem saga amisik ti Leeme Silok ti loklok tooro, la ik lox asepsu amisix ia basinge levenaniu. ¹⁶O Leeme Silok, una doma amlong tia, la una belemumu ia, atla ak lok tuntun la kopmen tololos tarak. ¹⁷Una lox

asooloo ia basinge lodoxoma saasaa, la una lox asepsu ia at laxanmumuat tarak. ¹⁸Una doma loklok tuntun mi laxaloklok asongot tarak, la una doxoma xepe laxangkakapmek axap tarak.

¹⁹Una doma mumu i do buaang nedo limixin di munepen minia la dik lox angtungun amisix ia. ²⁰Una kok avukar ia, la una lox asepsu ia, kusu limixin di munepen minia di noxo sak tup minia. A vot pasa u na ri loklok tooro. ²¹Nia a sing u xusu unaba lok tatao amisix ia atla a nuunu saga ram, la loklok tarak i nunuan la i ruturun.

²²O Moroa, una lox asepsu leme Israel basinge levenmumuat axap atdi. Una lox asepsu leme Israel, nedo limixin tinotno ram.

Salmo 26

Lisingising At Laradi Mokmokso.

¹O Leeme Silok, una tong atkatla li rak do, nenia laradi sepsen, atla nia a nuunu saga mun taram la ak lok amisik levempanga ik mokso. ²Una lok tong pen axap na lorooro rak, la una ven mumu avukar ia. La una viilla mumu lavavara axap keneng at labalak eburu mi lodoxoma rak. ³Una lox i na atla um gomgonga ia mi labalamu lexen taram, la um lam amisix ia at lavatpas tarak la kopmen tinotno una ke aie xepe ia at tenkon leng.

⁴Nia xopmen ana vemu eburu mi limixin gamasa. Nia axot kis esogo mi luvuttadi sosolo arup. ⁵Nia axo vesum mi limixin kakapmek, la a tu asepsu basinge di. ⁶O Leeme Silok, na a gos lukngak ti lox asuusu i do nia laradi sepsen. La at pas emi asu kangkan loxonin laplavang taram. ⁷A vixan loxompixan ti tong avukat tu la a tong asu levempanga nunuan ugak lox i.

⁸O Leeme Silok. A vara rinotno na loogu laplavang, ua nenu u nemen teren. Ni na loxot lisisixam taram i nemen e. ⁹Nemen uta sele utut kepe ia eburu mi limixin kapmek, la una ke ia basinge levenmumuat uba raba limixin sepsep amet min, ¹⁰nedo limixin dik lok amisik laxakapmek la di gagas amisik ti siam ka lempilas ti lox alolos lenngitngit atdi.

¹¹Ketla nenia, ak lok amisik leveloklok ik mokso, una belemumu ia la una lox asepsu ia basinge di! ¹²La xerepmo nia ana nemen avukat basinge levenaniu; la anaba emi asu mi Leeme Silok to at lovtopot eburu at limixin teren.

Salmo 27

Lisingising Emi Asu

¹Leeme Silok ni laxasep la Lanatoo rak. Nia anoxo marat tangarang ka teta. Leeme Silok neni loogu matmatkun tarak ti pe levenaniu. Kuren la nia noxo marat bok ba.

²Dola limixin kakapmek dina esep tangarang minia xusu dina sev amer ia, dinaba sak kikixin la dinaba subu. ³Keke i do buaang atnedi limixin esep dina ru xangkan ia, nenia noxo marat. Dola lavamun epen dina lox agagas do dina sev asi ia, nenia move anaba nuunu saga at ne Moroa.

⁴Nia ara sing pam Leeme Silok mi legesa vanga; legesa vanga mene nia a vara rin, do at lorooro axap tarak ana nemen ia ro xeneng at loogu ren, la anaba reven solo loklok nunuan teren la nia anaba ngising i kusu nam lam lorooro rak. ⁵At levenaleng kakapmek neni naba lox alipe ia ro xeneng at loogu ren. Neni naba xubak pe ia ro xeneng at loogu laplavang, la ni naba vaxaxis aurut ia uto vana at langsung luuat kis silok kusu anaba nemen matmatkun teren. ⁶La kerepmo anaba sak tup mi limixin munepen minia do dina ru xangkan ia. Anabaplavang saparav Leeme Silok mi luxupkup momo ro xeneng at loogu laplavang teren. Anabak pixan, la ana emi asu min.

⁷O Leeme Silok, una ronga ia, dola ana toro ru! Una belemumu ia la una ronga res tarak! ⁸Uga lok tia, “Ude u, una lotu saparav ia.” Aga vorang i do, “Leeme Silok anaba vosiga u.” ⁹Kuren la nemen gat uta lipe rak!

Nemen uta belemamao ia; nemen uta musak kepe ia lasaxaruki ram, atla nenu loklok tooro rak. Nemen uta on basinge ia! Nemen ut ta ke asevee ia atla nenu ne Moroa, laradi loklok arooro rak. ¹⁰Keke i do ne tamak mi ne naga duna raba arulu ia, ketla nenu, Leeme Silok, unabak lok tatao ia.

¹¹O Leeme Silok, una lox ase ia mi langas sala u vara i do nia ana mumu asu i. La unam lam ia at langas nunuan, atla a ruuna buaang limixin munepen. ¹²Nemen gat uta on taba arulu xepe ia ri levengkikngen limixin di munepen minia, di xaxarang taba amisix ia, la di rooro ri vaaban ia. ¹³Nia akleklen i do anaba ven luvukat at Leeme Silok at na lorooro. ¹⁴Kuren la minam doma ngangais ti Leeme Silok, la mina lolos, nemen gat mita doma abulubun kepe i, mina nuunu saga at Leeme Silok.

Salmo 28

Lisingising Ti Loklok Tooro.

¹O Leeme Silok, nenu Lentupe rak, na nia a ro ke ram! Una ronga lanteng tarak! Dola u noxo ronga ia, nenia anaba lok ngan nedi diba si uto xopok at lemenemen at labarongan. ²Una ronga ia at loxonaleng nia anang teng saparav u ri loklok tooro, la at loxonaleng ana xip aurut lukngak ti loogu laplavang taram i xaala aleng. ³Nemen gat uta lii

lumumuat tarak at loxonaleng u vaase asi limixin kakapmek, la eburu minedi dik lok libilinga, nedi limixin levelinga atnedi ik sixit nunuan, ketla lodoxoma atdi i umsu mi loklok kakapmek.

⁴Una lox asongot nedi mumu leveloklok kakapmek atnedi eburu mi lempanga bilinga digara lok pam i. Una lox asongot nedi mumu xa leveloklok atnedi, la una raba bok nedi mi luunun i epovo at loklok atdi.

⁵Kopmen dina ven kisip levempanga Leeme Silok gara lok pam i, kopla at levempanga neni ga rudum li i. Kuren la ni naba lox asongot di la naba sele utut kepe axap tino di.

⁶Leemi asu ri Leeme Silok, atla ni ira ronga ka vam lanteng tarak ti loklok tooro. ⁷Leeme Silok i kok nunuan ia, la i lok ngan lavatban tia. Labalak it kis saga ren, neni im taba ia mi loklok tooro, la ik lox amomo box ia. A tong avukat tin mi livikpixon momo.

⁸Leeme Silok i kok nunuan limixin teren la neni i lok ngan lavatban tidi, la ik lox asepsu mo loorong ni ga soxolik ka i. ⁹Leeme Silok, una lox asepsu limixin taram, la una lox anarong nedi limixin mokmokso ram; una nemen ngan laradi loklok tatao sipsip tinedi, la mo loklok tatao ram noxo xap.

Salmo 29

Laxaka At Leeme Silok Keneng At Lamanman Silok

¹Nemi limixin lolos toxun pana at laxalibet, mina emi asu mi Leeme Silok, mina emi asu min mumu lisisixam la lolos teren. ²Mina emi asu mi laasen silok at Leeme Silok. Mina xis tintiding to melamgo ap mo lara neni i umsu mi lemelemelengan do ni na ru asuvos.

³Limixin di ronga laxaka at Leeme Silok to at levengkot axap at laras la ne Moroa silok ik lox asuusu leretepaavat. Laxaka at Leeme Silok i onon to mavana at laras aaxa. ⁴Limixin di ronga i la i silok la i lolos aleng.

⁵Laxaka at Leeme Silok ik sak pirivit larauna Seda, keke i do ni larauna i silok aleng to Lebanon. ⁶Neni inglong angne larakaana ro Lebanon kusu dinat los ngan laxannatnat bulumaxao, la lakaana Emon nat los ngan lanat bulumaxao temes.

⁷Laxaka at Leeme Silok ik lox asuusu lavanga i mam. ⁸Laxaka ren i lox angne lamatbin, la ingne bok lamatbin to Kades. ⁹Laxaka at Leeme Silok ingne larauna Ok la it mas kepe larapavaxan una, at loxonaleng limixin axap to xeneng at loogu laplavang teren dinabap kup lolos keretna, "Leemi asu ri ne Moroa."

¹⁰Leeme Silok ni Loorong mavana at lisimaramain, ni im gomgonga amisik limixin ngan Loorong Silok la kopmen tekavaxap teren. ¹¹Leeme Silok im taba lolos limixin teren la ik lox anarong nedi mi limila.

Salmo 30

Lisingising Ti Tong Avukat

¹Leeme Silok, nenia a emi asu minu, atla nu uga lox asepsu ia. La uga rupe limixin munepen minia di goxo lok momo aksaksa ria. ²O Leeme Silok, nia agang teng saparav u ri loklok tooro; nenu ne Moroa rak, la uga lox aroo ia basinge lanmeres. ³La uga lox asepsu ia basinge lamaut atla ga auret kusu ana met. Nia aga mumu langas uto xa xopok at lemenemen at labarongan, ketla nenu uga lox asepsu ia basinge lanmet.

⁴Nemi luvuttadi ruturun teren, minak pixan emi asu ri Leeme Silok! Mina doma lempanga silok laradi melemelengan gara lok pam i, la mina tong loklok avukat tin. ⁵Lumukmusak teren kopmen nak lox abao, ketla loklok nunuan teren i nemen at levenaleng axap at lorooro rak. Kuren la levengkamkabili dan ba sesen su at luxatli rak at laxanimin, ketla lomomo naba ravasu maxantamak suubu.

⁶Nia aga nemen avukat, la aga doma i do, tepanga noxo sev asi ia. ⁷Leeme Silok, uga lok lempanga nunuan tia; uga rupe ia ngan loogu matmatkun to at lempatkaana silok, ketla melemu uga lox alipe manga rak la nia aga marat.

⁸Leeme Silok, gano aga ro ke ram; aga ngising aleng u ri loklok tooro keretna. ⁹O Leeme Silok, uba ruuna ka lavanga salai at lanmet tarak? Luunun salai uba ruuna ka i do nia ana si uto at lamaut? Kereva, i epovo limixin diga met pam dina emi asu minu? I epovo bok dina tong asu lebelemumu lexen taram? ¹⁰Leeme Silok, una ronga ia, la una belemumu ia! Lok tooro ia, Leeme Silok!

¹¹Ketla monga lingina ura lok kun pam lanbulu rak mi liriti momo. Ura lok kepe vam lumumuat at labalak, la ura lox aumsu ia mi lososoro. ¹²Kuren la nia noxo vamngus, anak pixan emi asu minu. Leeme Silok, nenu ne Moroa rak. Anaba tong avukat amisik tu.

Salmo 31

Lisingising At Laradi I Nuunu Saga At Ne Moroa

¹Leeme Silok, na a vot parav u xusu unak lok see rak. Nemen uta ke avolo limixin munepen minia dina sep kapmex ia la ana lok mamangan. Loklok taram ik mokso axap, na a sing u do una lox asepsu ia basinge di. ²Una ronga ia, na! Una lox asepsu ia basinge di! Nenu una nemen ngan loxot loklok alipe rak, kusu una kok avukar ia. La una rupe avukar ia, kusu anaba nemen avukat, la limixin munepen minia di noxo sep kapmex ia.

³Nenu mun loxot loklok alipe rak la lentupe rak; unam gomgonga ia, la unam lam ia at nom langas nenu ga xaape min. ⁴Una kubak pe ia basinge

lelixo no diga lok li ngais ia min; una xua pe ia mi lolos taram basinge laniu. ⁵A lox abeles ia ukeneng at loklok tatao ram. Leeme Silok, unaba lox asepsu ia, nenu ne Moroa uk lox asoorun amisik levelinga ram.

⁶Uk lox antungun tinedi di lotu saporap leven moroa xaxarang. Ketla nia a nuunu saga ram. ⁷Anaba momo la ana sosoro mumu nom labalamu lexen taram. Ura ven pam laxasongsongot nia a ruuna i; la uklen bok levenmumuat tarak. ⁸Nenu nu goxo ke xepe limixin munepen minia, gita xoxo ka ia. Nu uga lok tooro ia la nia aga nemen avukat, la nia agat pas tangtagap at lavavara axa rak.

⁹Leeme Silok, una belemumu ia, na nia a ruuna langsgangan lumumuat. Luxatli rak ira ung axap at lerengteng la lengkot tarak ira molo axap. ¹⁰Lanbulu rak at laxanmumuat i lox atmut lorooro rak. Ara molos axap at na laxanmumuat tarak, labantuxu tarak ira meramun axap.

¹¹Limixin munepen minia, la nedi di nemen auret ia, di ven ia la di paase aksaksa ria mumu lanmeres tarak. Nedi dikleklen ia, dik marat tarak. Dola di ven ia at pas to at langas dik sixiro rak. ¹²Limixin axap dira domampe vam ia, ngan ta dola agara met pam. Nia a lok ngan ta lavanga no digara lu xepe vam min. ¹³A ronga buaang limixin munepen di paase siksikma mu ia; lanmarat silok i suxuna ia. Di seput li leventaangas kusu dina rebeng alis ia la dina sev amer ia.

¹⁴O Leeme Silok, lunuunu rak i tu mun taram; la nenu ne Moroa rak. ¹⁵Nia a nemen amisik keneng at loklok tatao ram, una lox asepsu ia basinge limixin munepen minia, la basinge bok nedi di lox asongor ia. ¹⁶Nia lasaxaruki ram, la unak lok tatao ia mi lebelemumu ram. Una lox asepsu ia atla u ruuna labalamu lexen. ¹⁷Leeme Silok, na nia a ro ke ram. Nemen gat uta ke avolo limixin munepen minia dina lox amangan ia. Keke nedi limixin bilinga dina lok mamangan; la dina rakdu aleng kusu dina lok pilo mun at loxonaleng dina si uto xopok at lemenemen at labarongan. ¹⁸Una vamngus limixin di xaxarang, nedi dit las di la dim simi aurut di, di paase aksaksa mumu limixin mokmokso, la di paase asi di.

¹⁹Nenu u umsu mi lempanga avukat, mo ura gagas li vam i kusu na lox asuusu i rinedi dik lok ngangao aleng taram! U kok avukat nedi di nuunu saga ram, la limixin axap di ven kibis i. ²⁰Uk lox alipe nedi maxopok at loklok tatao ram basinge lodoxoma alii at limixin kapmek la uk lox amaaui di basinge levelinga aksaksa at limixin munepen minedi.

²¹Leemi asu ri Leeme Silok! Ni ga lox asuusu nom labalamu nunuan teren tia at laaleng limixin munepen minia diga ru xangkan ia ri leesep! ²²Nia aga marat la nia aga nua i do ni ga lok kepe ia basinge loklok tatao ren. Ketla ni ga ronga lanteng tarak, at levenaleng nia aga sing i ri loklok tooro.

²³Nemi luvuttadi mi nuunu saga at levelinga at Leeme Silok, mina ngaongao rin. Leeme Silok i kok nedi luvuttadi ruturun teren; ketla ni

ik lox asongot nedi dit las di, mo losongsongot i epovo rinedi limixin kerepmo. ²⁴Nemi axap limixin mina doxoma ngangais ti Leeme Silok; mina tu tuxuruxun la minam doma abelemes.

Salmo 32

Lavapaase Asu Laxakapmek Mi Lodoxoma Xepe

¹Nedi, dira sepmus pam basinge laxakapmek atnedi, dina momo. Laxakapmek atnedi ne Moroa ira doxoma xepe vam i. ²Do taradi go la Leeme Silok kopmen na vuse ka taxapmek teren la kopmen bok taxaxarang teren, ni na lok momo.

³Ga ruka i nia goxo vaase asu laxakapmek tarak, agang teng amisik at levenaleng kangking la kanimin, kuren la labantuxu rak ira xat molos. ⁴At levenaleng kangking la kanimin, nenu Leeme Silok ugap sev aleeng ia; kuren la lolos tarak gara ravasu axap pam, ik lok ngan laxangking at lamaares ik lox avatmang laxangka.

⁵La na nia aga vaase asu laxakapmek tarak tu, kopmen a goxo lipe toxot teren basinge u; aga vara i do ana soxomus laxakapmek axap tarak tu, la uga doxoma xepe axav i.

⁶Kuren la i lox avukat do limixin tuturun taram dinaba sing saparav u at levenaleng at levenmumuat; dola langsung lekarakat i rava beles mu nedi ngan ladanut, kopmen noxo lox abaava di. ⁷Nenu loxot loklok alipe rak, la unaba lox asepsu ia basinge levenmumuat. Ak pixan momo at loklok arooro ram, atla nenu u kok avukar ia.

⁸Leeme Silok i lok keretna, “Nia anaba lox ase u mi langas unabat pas teren; nia anaba anasa u, la anaba vaase aronga box u. ⁹Nemen gat nu tangtangku ngan la os kopl dongki. Limixin di lok li loxonaen at lungusno at lavaros la di xoxo alu labanoos to melemu at lavatlak teren, kusu na ronga res atdi.

¹⁰Limixin kakapmek dinaba ekip tangarang mi laxasongsongot, ketla nedi di nuunu saga at Leeme Silok, di nemen ma xeneng at loxokok at labalamu lexen teren. ¹¹Nemi limixin mokmokso, mina momo la mina sosoro at levempanga Leeme Silok gak lox i. Nemi ming tonga res teren, minap kup momo.

Salmo 33

Loxompixan Emi Asu

¹Nemi axap limixin mokmokso, minap kup mi lomomo mumu levempanga Leeme Silok gak lox i. Nemi axap ming tonga res teren, mina emi asu min!

²Mina tong loklok avukat ti Leeme Silok mi leven gita. Mina vixan tin mi leventaaleng. ³Mina vixan loxompixan maxat saparav i; mina sep maraanu lerengteng at li gita, kusu naba reng nunuan, la minap kup mi lomomo!

⁴Levelinga at Leeme Silok i ruturun; la i epovo do ata nuunu saga at leven gugu ren. ⁵Leeme Silok i vavara mo leveloklok ik mokso la i ruturun. Labalamu lexen teren i umsu at lavatbung menemen.

⁶Leeme Silok ga rudum li laxalibet mi lavapaase mun teren. Laxangking, lagaaling mi laxampenti ga ravasu mun at levelinga ni ga tong asu i. ⁷Ni ga lok bubua laras at lara loxot, la ni ga lok li lisimaramain utou xa xopok at loxot teren.

⁸Limixin at lavatkangka axap, mina lok ngangao aleng at Leeme Silok! Nemi axap limixin at lavatbung menemen mina xis tintiding saparav i.

⁹Ni ga vaase mene, la lavatbung menemen ga raut. At lavapaase mun teren levempanga axap ga ravasu.

¹⁰Leeme Silok ik lox amun lodoxoma ali at limixin amgomgo at levennep silok la kopmen dinak lox epovo levendoxoma belemamao atnedi. ¹¹Ketla leven doxoma agagas teren i nemen amisik, la mo do ni i doma i xusu na lok tavanga, ni nabak lox epovo amisik axa i. ¹²Nedi lubangmixin ne Moroa it kis ngan Leeme Silok atnedi, dina momo; atla Moroa ga soxolik ka di ngan teren axa, dina momo.

¹³Leeme Silok ik milix asi boro vana laxalibet, la i reven limixin axap. ¹⁴Ni itkis tovana at loxot kitkis orong teren, la ik milik asi ri limixin axap di nemen at na lavatbung menemen. ¹⁵Neni xa ga lox araut lodoxoma atnedi la ikleklen axap levempanga dik lox i.

¹⁶Loorong at lavatbung menemen ixo epovo na sep kepe axap limixin munepen min mumu i do i ruuna buaang limixin esep la di lolos aleng; la laradi esep ixo sak tup mi limixin munepen teren mumu lolos axa ren. ¹⁷Laxan os ti leesep ixo epovo ri sev asi limixin munepen mi lolos axa atdi; lolos silok atnedi ixo epovo na lox asepsu tara.

¹⁸Ketla Leeme Silok i reven tatao nedi dik lok ngangao aleng teren, la nedi di nuunu saga at labalamu lexen teren. ¹⁹Neni ik lox asepsu di basinge lanmet, la ni ik lok tatao nedi at levenaleng at loroxo.

²⁰Ata nuunu saga at Leeme Silok. Neni Lurutu See Pe la Laradi Loklok Tooro atdik. ²¹Ata momo saga ren, la ata nuunu at laasen teren i melemelengan.

²²O Leeme Silok, ma sing u do labalamu lexen taram na nemen eburu amisik minema. La ma doxoma ngangais tu.

Salmo 34

Leemi Asu Ri Luvukat At Ne Moroa

¹Nia anaba tong loklok avukat amisik ti Leeme Silok, la a noxo xap mun at leges aleng ti emi asu min. ²Nia anaba emi asu min ti

levempanga ni gak lox i. Nege nedu di xip laxanmumuat dina ronga i la dinak lek. ³Nedik eburu ata tong asuusu i ri limixin do Leeme Silok i silok aleng; nedix eburu axap ata emi asu mi laasen teren!

⁴Aga sing saparap Leeme Silok la ni ga ronga ia; ga lox asepmus ia basinge levenanmarat axap tarak. ⁵Limixin di ruuna laxanmumuat dinaba ven tu ren la dinabak lek; la di noxo doma abulubun. ⁶Luvuttadi baava di toro ke ren, la ni ing tonga nedu, la ik lox asepmus di basinge laxanmumuat axap atnedi. ⁷Laangelo at leeme Silok ik lok tatao nedu dik lok ngangao aleng teren, la ik lox asepsu nedu basinge levenaniu.

⁸Nemi xa mina ven terek luvukat at Leeme Silok. Laradi ik soxolik ka loxokok at Leeme Silok, ni na sosoro. ⁹Nemi axap limixin teren, mina lok ngangao at Leeme Silok. La nedu ding tonga res teren, di ruuna xobot kaka levempanga axap dik pakes tin. ¹⁰At lepenaleng lubung laion dik toxo la dik pakes ti levempanga anan, ketla nedu ding tonga res at Leeme Silok kopmen dinak pakes ti levempanga avukat, atla Leeme Silok im taba amisik di.

¹¹Ude nemi, laxamdak loklox ase, la mina ronga rak, la ana anasa nemi kusu minaba lok ngangao at Leeme Silok. ¹²Kereva, mi vara ri lorooro nunuan? Kereva, mi vara bok ti lorooro babaalom mi lomomo? ¹³Dola mi vara i xuren, nemen bok ba mita tong levelinga xapmek, la nemen bok lavapaase xaxarang. ¹⁴Mina repukus basinge laxakapmek la minak lok leveloklok avukat. Mina lolos amisik ti ruuna ka limila ukeneng at lorooro axap atnemi.

¹⁵Leeme Silok i reven tatao amisik limixin mokmokso, la ing tonga res at levenanteng atnedi; ¹⁶Ketla ik sok tixirixes kepe nedu dik lok laxakapmek, kusu dola dina met, limixin axap dinaba domampe soso mun nedu. ¹⁷Limixin mokmokso di toro ke at Leeme Silok, la ni ing tonga res atnedi. Neni ik lox asepsu di basinge levenmumuat atnedi. ¹⁸Leeme Silok i gagas amisik ti lok tooro nedu dik lok tuntun, la i lox asepsu nedu di baava la di doma i do diba met.

¹⁹Do laradi nunuan na ekip tangarang mi laxanmumuat solo, Leeme Silok naba lox asepmus i basinge axap mo lempanga. ²⁰Leeme Silok naba lok tatao axav i, la kopmen toxosi ren naba repit. ²¹Limixin kakapmek dinaba met nop loklok kakapmek atdi; nedu dik lox angtungun mi limixin mokmokso, dinabap kip ka losongsongot.

²²Leeme Silok naba lox asepsu limixin teren; nedu dinaba repukus taba i ri loklok tooro ren, di noxo ruuna ka lumumuat mavana atdi.

Salmo 35

Lisingising Ti Loklok Tooro

¹Leeme Silok, una tu pe nedu di tu tangarang ia, la una esep eburu minedi di vara esep minia! ²Una lok kaka lenban taram la una siga

lisingsiga esep taram la una lox asepsu ia basinge di. ³Una rebeng aurut losoosoo mi laasop taram ti esep eburu minedi nom di xaxala mu rak do dina sev ia. Una xaape do unaba lox asepsu ia basinge di.

⁴Nedi nom di lok do, dina sev amer ia, una sev asi axap di kusu dinaba lok mamangan. Nedi nom di vengir ia, una sax amlong di la una lox ekarakat lodoxoma atnedi, ⁵la dina lok ngan levempavagam mang, lamanman it mas kepe i, at loxonaleng laangelo at Leeme Silok i xaxala mu di! ⁶Keke langas atnedi na main pe la na gagaii, at mo loxonaleng laangelo at Leeme Silok na sev asubu di!

⁷Gano goxopmen tavasuun teren, la diga lok li pe ia mi lelixo, la diga xe lemeron kusu anaba subu tup teren la dina rebeng alis kaka ia. ⁸Ketla langangan lumumuat naba vor asangu nedi, la nedi xa dinaba on at lara pelixo atnedi, la dinaba subu tup at langangan leeteke!

⁹Kuren la nia anaba momo ri Leeme Silok; nia anabak lek atla neni ga lox asepsu ia basinge di. ¹⁰Anaba tong i ri Leeme Silok mi lodoxoma axap tarak keretna, “Kopmen teta i lok ngan u. Uk lok tooro amisik limixin kopmen tololos atnedi basinge limixin lolos, la limixin banbalo basinge limixin loklok papavas.”

¹¹Limixin kakapmek di vaxaru ia at lavapaase la dik sok taba ia mi leveloklok kakapmek mo nenia xopmen anaklen i. ¹²Dip sepo loklok avukat tarak mi laxakapmek, kuren la ak lok tuntun aleng. ¹³At levenaleng nedi digak meres, aga siga leventamon ti lox asuusu lanbulu rak la agan mun an. Agat kis tintiding aleng ukopok la agang sing tinedi; ¹⁴i ngan ta dola nia a ngising ti lentangas tarak koplak netak. Nia agat pas tangtagap eburu mi langangan lanbulu, ngan ta do a bulu mu ne naga.

¹⁵Ketla do nia aga ekip tangarang mi levenmumuat, diga lok momo; diga tu xangkan ia, la diga paase aksaksa ria. Limixin kadiiong bok digak lox asongor ia; amisik digap sev ia. ¹⁶Diga lok ngan limixin di lok sese laradi luxangkedek teren i molo, la diga reven angtungun bok tia.

¹⁷Leeme Silok. Kereva ura reven kepe amisik di? Una lox asepsu ia basinge leveloklok asongot atdi. Lox asepsu ia basinge na lubung laion! ¹⁸Do kuren, nia anaba tong loklok avukat tu ro melamgo at lovtopot buru at limixin taram. Nia anaba emi asu minu ro melamgo atnedi axap.

¹⁹Mo limixin di munepen minia, nedi limixin kaxarang. Nemen gat uta ke avolo di, dina momo mu levenmumuat tarak. Nemen gat uta ke avolo nedi dina lok sese ia. La nemen gat uta ke avolo nedi dik lox angtungun parang gamasa ria la dina momo mu lanbulu rak.

²⁰Kopmen dina paase atnasan, dim doma xaka levelinga xaxarang kusu dina bala raba limixin loklok mulus min. ²¹Dik sok taba ia mi levelinga, la dip kup keretna, “Maga ven u, uga lok nom levempanga xapmek!” ²²Ketla nenu, Leeme Silok, ugara ven pam i do nenia ap sepsen. O Leeme Silok, nemen bok ba uta vamngus. Nemen uta nemen paxalom!

²³O Leeme Silok, una xatu la una paase tooro ia. O Moroa rak, una xatu kaxat upana la una ru ria at na levelinga. ²⁴O Leeme Silok, loklok taram ik mokso. Kuren la una tong atkatla li rak do nia ap sepse. Nemen uta ke avolo limixin munepen minia dina momo mu na levenmumuat tarak. ²⁵Nemen gat uta ke avolo di, dina lok keretna, “I lox avukat tinotno, dik tara lok pes pam i la ta lox epovo ba lavavara atnedik kuren.”

²⁶Nedi nom di lok momo at levenmumuat i vot saporav ia, una lox ekarakterat levelinga atdi la una lox amangan di; nedi nom di lok do dik mokso polo ia, una lox abaava di la una lox amangan di. ²⁷Naba lox auvkat do nedi nom di vara i do ana sepse, dinap kup momo atla nenia a sepmus pam. La dina tong amu amgo ba i do, “Leeme Silok i silok aleng. Neni ik lok momo mi lasaxaruki ren na nemen avukat.” ²⁸La kerepmo nia anaba tong asu lomokmokso ram, la anaba emi asu minu at levenaleng axap.

Salmo 36

Laxapmek At Laradi

¹Laxakapmek ik lok atdan laradi xapmek keneng at lebelen; ik sok sisixe ne Moroa, la i xo ngangao ren. ²Im doma asilox axa i, kuren la i doma i do ne Moroa ixo epovo na ven lenget ka libilinga ren la noxo vaase asi rino i. ³Lavapaase ren i lok kapmek la i umsu mi laxaxarang. I ke xepe lodoxoma avukat la leveloklok i nunuan. ⁴Im doma agagas li levempanga xakapmek do ik midi ro at loora ren; kopmen nak lok tevempanga avukat, la kopmen tinotno nak sok sisixe lempanga xapmek.

Luvukat At Ne Moroa

⁵O Leeme Silok, labalamu lexen taram i silok aleng tinotno la i urut se rovana se rovana at laxalibet. La uk lox epovo amisik levengkakaape ram nade xopok la i se tu at lamavangkap. ⁶Loklok mokmokso ram i tu tuxuruxun ngan lempatkaana; lempapaase ramtaba ina ram i lolos aleng ngan laras i ekapus. Limixin axap mi levempanga mi lavanuet kangkedek di nemen maxopok at loklok tatao ram.

⁷O Moroa, labalamu lexen taram i lox avukat tinotno! Ma ven kaka loxokok taram tinema maxopok at luvapa ram. ⁸Ma anan mais avukat mi laxaluxa solo um taba nema min, la u ke nema ma ruuna ka lorooro nunuan i sesen su ram ngan ladan sen. ⁹Nenu lavasuun at lorooro at lempanga axap, la mumu mun lodoxoma xasep taram, nema ma ruuna ka laxakasep.

¹⁰Labalamu ram na tu epasum tinedi dikleklen u. La una lok luvukat tinedi di ruuna loklok ik mokso. ¹¹Nemen uta ke avolo limixin loklok

aaso dina esep minia, kopla limixin kapmek dina lox amaran ia la ana sixiro.

¹²Nema ma ven ba no loxot limixin kakapmek di saksubu e. Mo dik midi, la ixo epovo do dina xatu kaxat.

Salmo 37

Laxavaxap at Limixin Avukat La Limixin Kapmek

¹Nemen gat mita doma mu solo loklok at limixin kapmek, la nemen mita ngaongao ri loklok atnedi di lok libilinga. ²La ma lixilik mun dinaba sonao axap ngan levempivilis i mamang, dinabap sopo ngan larauna.

³Ketla nemi mina nuunu saga at Leeme Silok la mina lok luvukat mun, kusu minaba nemen at lenep kangka aulis atnimi la minaba rooro avukat. ⁴Mina puse ri lomomo rinimi keneng at Leeme Silok, kusu ni naba raba nimi mi levempanga no lebelen nimi i tu solo i.

⁵Mina ke raba Leeme Silok mi lorooro ram; mina nuunu saga ren la ni naba lok tooro nimi, ⁶la ni naba lox asaxaven loklok sepse atnimi ri limixin la naba xasep ngan labaranan; la loklok mokmokso atnimi naba tu asaxaven ngan laxangking tubu.

⁷Mina mulus mun, la mina nemen tangais Leeme Silok na lok tooro nimi; nemen mita doma mu solo nedid di ngasang kobot, kopla nedid di lox asoorun leventaangas kakapmek atnedid diga vit li i.

⁸Nemen gat mita musak, andla mina ke xepe lebelemamao atla i sasat ka limixin ukeneng at laxakapmek. ⁹Nedid di nuunu saga at Leeme Silok, dinaba ruuna ka lenep kangka aulis atdi, ketla Leeme Silok naba sak su limixin bilinga.

¹⁰Soso mun limixin bilinga dinaba xav asonao; minaba reven tidi, ketla mi noxo vuse ka di. ¹¹Ketla nedid di lox alixilik nedid; dinaba ruuna ka lenep kangka aulis atdi, la dinaba ngasang kobot la dinaba momo rino mi limila.

¹²Limixin kapmek di sevut li levelinga ti sev asi limixin avukat la dik milix angtungun tino rinedid. ¹³Ketla Leeme Silok ing longon arup limixin kapmek, atla ni iklen i do ni naba sele utut kepe di.

¹⁴Limixin kakapmek di gagas li levenise esep atnedid mi levesoosoo, ti sev asi limixin banbalo eburu mi limixin dik pakes, ti sep amet nedid di lok leveloklok ik mokso, ¹⁵ketla nedid xa dinaba uu at levenise esep atnedid xa, la levesoosoo atnedid naba repirivit.

¹⁶I lox avukat do laradi nunuan i ruuna lempanga xakalik mene, ketla i lok kapmek do laradi i ruuna lapnovos silok la ik lok keneng at laxakapmek; ¹⁷atla Leeme Silok naba lok kepe lolos at limixin kapmek, la ni naba kok avukat nedid loklok atdi i lox avukat.

¹⁸Leeme Silok ik lok tatao nedi ding tonga res teren la dinaba ruuna amisik lenep kangka aulis atdi. ¹⁹Di noxo suma losongsongot at levenaleng kapmek. Dinaba ruuna epovo leveluxa at levenaleng at loroxo. ²⁰Ketla limixin kapmek dinaba seeve, limixin munepen mi Leeme Silok dinaba xap ngan levempusuvus to laxairing, dinaba sonao ngan lusuxa.

²¹Laradi xapmek i ngising panga ketla kopmen na porang amlong i. Ketla laradi avukat ik lok momo rim taba mi leventamtaba ren. ²²Nedi nom Leeme Silok i lox anarong di, dinaba ruuna ka lenep kangka aulis atdi. Ketla nedi nom Leeme Silok ira lok li vam lasaxaek mavana atdi, ni naba saksu di basinge mo lenep kangka.

²³Leeme Silok im gongonga laradi at langas i lox avukat kusu ni nat pas teren. La ik lok tatao avukat nedi dik lox amomo i. ²⁴Dola dina subu, di noxok midi ro xopok, atla Leeme Silok naba rebeng axatu di upana.

²⁵Nia lasioxo nga na, nia gara rooro aba vam, ketla nia agoxovisi ven taradi avukat Leeme Silok gita raba arulu i, koplaxaxam mi laxaalik teren gita ngising panga anan. ²⁶At levenaleng axap laradi avukat im taba gamasa la i sisiam taba limixin mi levempanga ren; laxaxam mi laxaalik teren di lok ngan leveloklok anarong ti limixin axap.

²⁷Mina repukus basinge laxaxam la minak lok lununuan. La kerepmo livipisik li atnimi dinaba nemen amisik at lenep kangka aulis atdi; ²⁸atla Leeme Silok, i vavara ri loklok i lox avukat, la kopmen ni na raba arulu luvuttadi di nemen turuturun teren, i kok avukat amisik di. Ketla livipisik li at limixin kakapmek ni naba saksu di basinge mo lenep kangka aulis atdi. ²⁹Limixin mokmokso dinaba ruuna xaka lenep kangka aulis atdi la dinaba nemen amisik teren.

³⁰Levelinga at laradi avukat i ngan levelinga at laradi dokdodoxoma, la amisik levelinga ren ik mokso. ³¹Lenavolo at ne Moroa i nemen keneng at lebelen la i mumu asu amisix i, la kopmen na on basinge i.

³²Laradi xapmek i kuxut tangais ti laradi avukat kusu na sev amer i, ³³ketla Leeme Silok noxo raba arulu taradi mokmokso ri limixin munepen min kusu ni na subu tup at levengikngan di, koplaxaxam ni noxo ke avolo i xusu ni na subu at loxonaleng at lavapaase. ³⁴Mina doma lolos ngangais ti Leeme Silok la minang tonga res at levelinga ren. Dola mina lox i xuren, ni naba lox anarong nimi mi laramtaba; neni lenep kangka aulis atnimi. La minaba ven limixin kakapmek, Leeme Silok naba saksu di basinge lenep kangka aulis atdi.

³⁵Nia agaklen laradi xapmek, ni laradi vapavas. Ni ga ru polo limixin axap ngan ta luuna seda (Cedar) boro Lebanon i ru polo larauna axap; ³⁶ketla melemu nia aga volo go, la kopmen ta i go, nia aga reven tin, ketla agoxo vuse xaka i.

³⁷Mina ven mu asu loklok at laradi nunuan eburu mi laradi mokmokso; laradi lorooro ren i umsu mi limila naba ruuna luvuttubuno avolo,

³⁸ketla limixin kapmek dinaba ekip tangarang mi leeteke; la Leeme Silok naba xobo pes axap livipisik li atdi.

³⁹Leeme Silok i lox asepsu limixin mokmokso, la i kok avukat di at levenaleng kapmek. ⁴⁰Ik lok tooro di la ik lox aroo di basinge limixin kakapmek, atla di vot pasa i xusu ni nak lok see atdi.

Salmo 38

Lising At Laradi I Suma Losongsongot

¹O Leeme Silok, nemen uta lox asongor ia mi lebelemamao ram! ²Ura so abi vam ia mi levesoosoo ram, la ura sev asubu vam ia ukopok.

³Nia a xip tutu mi langsgangan losongsongot mumu lebelemamao ram tia; la labantuxu axap tarak iram suma lanmeres mumu libilinga rak.

⁴Laxakapmek tarak i umsu ngan ladan kam la i epovo ana xong keneng teren; i lok ngan laknixip silok i mumuat aleng tia rip kiv i.

⁵Nia lavanga rangtangu mun mumu laxakapmek tarak la kerepmo nia a meres la levenabi rak i so mau, la ip sopso. ⁶Lantuk iran baloolo, la laxakapmek tarak ik sak palaga rino ia; ara duudu at levenaleng axap.

⁷Liplivi ro xeneng at labantuxu rak i lok ngan laxao la i auret kusu ana met.

⁸Labantuxu rak ira molos axap, i lok ngan ta lavatpanga mumuat mo ik sak palaga ia; labalak i lok kapmek tino, la at mes mi labaava at losongsongot.

⁹O Leeme Silok, uklen lavanga sala nia a vara aleng tin, nenu uklen losongsongot tarak. U ronga ia at mes silok. ¹⁰Leveeve rak itlos etitit, lolos tarak ira xap pam, luxatli rak kopmen bok ba na reven avukat. ¹¹Larapentangas tarak mi leventaba aurer ia di noxot pas saparav ia, atla a ruuna laxanabi solo, la leventaba bok tarak di noxo nemen eburu minia. ¹²Mo limixin di vara na sev amer ia di lili larapelixo ria, la nedi di vara na lox asongor ia, di lok do dina lok kakapmek axav ia. Dixo vaxap ti vengit ia, kusu dina lok kapmex ia.

¹³Nia a lok ngan laradi baulang, kopmen nang tonga, la kopmen na paase. ¹⁴Nia xopmen ana paase porang, atla a lok ngan laradi lubaalung teren i rebonot. ¹⁵Ketla a nuunu saga ram, Leeme Silok. La nenu Leeme Silok, unaba vaase porang ia. ¹⁶Nemen uta ke avolo limixin munepen minia dina paase aksaksa ria mumu lusumsubu rak la dina lok momo mumu lumumuat tarak. ¹⁷Nia na ana subu nga, la a suma amisik langsgangan losongsongot silok.

¹⁸Nia a tong asu laxakapmek tarak, atla mo laxakapmek ik lox abulu amisix ia. ¹⁹Limixin di munepen minia di ruuna lorooro avukat mi lolos; buaang nedi dik lox angtungun parang gamasa mun tia. ²⁰Nedi di sepo lununuan mi laxakapmek; kopmen dina etaba belen minia atla nia a mumu asu langas mokmokso.

²¹O Leeme Silok, nemen uta raba arulu ia. Moroa rak, nemen uta nemen paxalom basinge ia! ²²O Leeme Silok, nu Lanato rak! Soso mun! Una lox tooro ia.

Salmo 39

Lelengeleng At Laradi I Suma Losongsongot

¹Nia ara tong pam i, “Nia anaba lok tatao avukat langasuk mi levempanga anaba lox i, kusu noxo sar asoogong ia. Nia anoxo tong tepanga xerepmo mo do luvuttadi xapmek dik lok auret. ²Nia agak lox atnaasan, la agoxo tong toxolinga. I ruturun tinotno, nia agoxo tong tepanga mumu levempanga nunuan! Ketla lumumuat tarak ga sisilok amisik, ³la lodoxoma saasaa ga suxuna lorooro axap tarak. Nia agam doma solo i, la kerepmo labalak gan tun aleng. La nia agoxo epovo na lok pilo mun. La aga ruka i xusu ana sing keretna, ⁴“Leeme Silok, lavanisa levenmaares nia ana rooro amisik teren? Ningisa ba ia anaba met? Una tong i ria, do ningisa lorooro rak naba xap.”

⁵Nu uga lok lorooro rak kopmen na baalom solo! At levereven taram levenaleng ti lorooro rak ni i lok ngan lavanga gamasa. I ruturen tinotno do, limixin axap di rooro, di lok ngan mene legesa mamas silok; ⁶di lok ngan mun lamamaau. Levempanga axap, limixin dik lox i, naba ravasu gamasa mun; dipnovos li lempanga, ketla di xoklen i do nege naba ruuna ka i.

⁷Lavanga sala bok ba i mo xusu nia anam doma ngangais tin, Leeme Silok? Nia a nuunu saga ram. ⁸Una lox asepsu ia basinge laxaloklok kakapmek axap tarak, la nemen gat nu uta ke xepe limixin baulang dina vaase aksaksa ria. ⁹Nia anaba lok pilo la a noxo tong toxolinga, atla nenu mun uga raba ia mi na levesongsongot. ¹⁰Nemen bok ba uta sev aleeng solo ia! La ma lixilik kusu ana met at leven akpiksa mun taram. ¹¹Uk lox asongot laradi mumu laxakapmek teren mi lavapaase kuxurung taram, la u lox asonao axap levempanga neni ing kongkat min ngan levempide ip sep larauna. Laradi i lok ngan mene legesa mamas ip tava su at lungusno!

¹²Leeme Silok, una ronga lising tarak. Una ronga ri lanteng tarak; una lok tooro ia do nia anang teng tuntun. Nia a lok ngan lavalabat tarak diga nemen ngan lavaose ram nade xopok at na lavatbung menemen atla di goxo rooro abao. ¹³Una ke xepe mulus ia kusu anaba momo avot ti loonon tarak la di noxo ven tu bok ba rak.

Salmo 40

Loxompixan Emi Asu

¹Nia aga ngangais atnaasan ti loklok tooro at Leeme Silok tia; la ni ga ronga bok lanteng tarak la ga ronga res tarak. ²Ni ga sar asu ka ia at

lemeron kapmek, la ga sar asu xaka box ia at lububura. Ni ga vaxaru li avukar ia ro vana at luuat kis silok kusu anat pas avukat la anoxo marat at tempanga. ³Ga lox ase ia rik pixan loxompixan maxat, loxompixan emi asu ri ne Moroa atnedik. Buaang nedi limixin dinaba ven kibis lolos teren, dina sangu aleng la dina ii doxoma la dinaba nuunu saga at Leeme Silok.

⁴Lomomo rinedi di nuunu saga at Leeme Silok, la rinedi bok kopmen dina repukus mu laxampoovo moroa, kopla dina nemen eburu minedi di lotu saparap laxanmoroa xaxarang. ⁵O Leeme Silok, nenu ne Moroa atnema. Buaang laxampanga avukat ugara lok pam i rinema; kopmen tara i nunuan polo u! Ugara lox asuusu vam buaang lempanga sangsangu nunuan tinema. Ixo epovo xusu nia ana tong ampana leexes atdi atla mo levempanga i umsu aleng!

⁶Nenu uxu vavara solo ri levelaplavang mi leventamtaba, nenu uxu ngising ti levempanga mi lavanuet kangkedek kusu mana kotos asonao i ro vana at loxonin laplavang, kopla ri levelaplavang ti lok kepe laxakapmek. Ketla uga raba ia mi lubaalung ting tonga res taram. ⁷Kuren la nia aga lok tu xeretna, “Nenia nga na, levenanasa ram tia i nemen keneng at Lenavolo.” ⁸Morua rak, a vavara mene i xusu ana gugu mu asu mun lavavara ram! Levempanga axap uga lox ase ia min, i nemen keneng at labalak.

⁹O Leeme Silok, to melango at lovtopot buru at limixin axap taram, nia aga vaase asu lagale lavavang dola uk lox arooro nema limixin taram. Nu uklen i do nia anoxo vamngus ti tong asu i. ¹⁰Agoxo vam luxun kaka lagale lavavang ti loklok arooro ria xusuk; nia ara tong asu amisik pam i do uk lok tooro limixin la uk lox asoorun levelinga ram tidi. Kopmen agoxo vamngus ti tong asu lixitkis esogo mi labalamu lexen taram to melango at lovtopot buru at limixin taram ¹¹Leeme Silok, nia aklen i do lebelemumu ram tia noxo xap. Labalamu mi loklok tatao tuturun taram naba kok avukat amisix ia.

Lisingising Ti Loklok Tooro

¹²Laxanmumuat solo i tu xangkan ia la nia xo epovo xusu ana exes ampana di! Laxaloklok kakapmek tarak i sak pava rino ia, la axo epovo nga ri milik kadas; di volo aleng ti leexes at levengkabinim at lavatlak tarak, la labalak i doma abulubun. ¹³Leeme Silok, una lox asepsu ia! Lok tooro nga ia na! ¹⁴Nedi nom di lok do dina sev amer ia, nia a vara i do una sak tup midi, la una lox ekarakat tinotno di. Nedi nom di momo atla laxanmumuat i sak pava ia; a vara i do una xala xepe di la una lox amangan di. ¹⁵Nedi nom di lok kalise ia, una lox amangan tino di mumu loklok di lox i ria.

¹⁶Nia a vara i do nedi di repukus taba u, dina momo la dina sosoro. La nedi nom di tong loklok avukat ti loklok arooro amisik, dina tong i do, “Leeme Silok i silok aleng.”

¹⁷O Leeme Silok, labantuxu rak ira xat molos axap la arat kis banbalo nga, ketla kopmen una doxomampe ia. Nenu Lanatoo rak, la nenu ne Moroa rak, una lok tooro soso mun ia!

Salmo 41

Lisingising at Laradi Anmeres

¹Nedi di doma mu solo limixin banbalo, dina momo; Leeme Silok naba lok tooro di mo do dina ekip tangarang mi levenmumuat. ²Leeme Silok naba lok tatao di la naba xok avukat lorooro atnedi; la ni naba sinang di mi lorooro avukat at lenep kangka me Israel; la ni noxo raba arulu di kusu limixin munepen minedi dina lok kapmek di. ³Dola dina meres, Leeme Silok naba lok tooro di. La ni naba lok kepe levenanmeres basinge di, la na lox alolos manga nedi.

⁴Nia aga tong i do, “Nia ara lok pam libilinga ru, Leeme Silok ne Moroa; una belemumu ia la una lox aroo ia.” ⁵Limixin munepen minia di vaase kuxurung mumu ia. Di vara i do nia ana met kusu limixin axap dinaba domampe ia. ⁶Nedi dit pot pasa ia, di sosolo asu linga rak; la ding senge ka levelinga xapmek mumu ia la dira tere mumu ia at levengkot axap. ⁷Nedi ding long angtungun tia, di epaase nemnem mu ia, di nunua i do levempanga xakapmek mo na lok kapmek tino nga ia. ⁸Di lok do, “Lanmeres lolos mo ira sogo xaka vam i la ixo epovo do naba roo xat basinge loora mekmeres teren.” ⁹Lentangas tino bok tarak, nia aga nunu saga ren; ni ga anan amisik eburu minia, la neni bok ira raba arulu ia.

¹⁰Leeme Silok, una belemumu ia, kusu ana ruuna ka amlong lorooro nunuan, kusu ana sepo amlong loklok atnedi di munepen minia. ¹¹Di noxo epovo ri sak tup minia, la kerepmo nia anabaklen i do uk lok momo minia. ¹²Unaba lok tooro ia, atla nia ak lok amisik levempanga ik mokso; unabat kis esogo eburu minia at levenaleng axap i tu melamgo.

¹³Leemi asu ri Leeme Silok, ne Moroa me Israel! Leemi asu rin na, la kopmen tekavaxap teren! Tuturun. Tuturun.

Salmo 42

Lisingising At Laradi Moroa Ga riki Xepe I Uto At Lenep Petpes

¹Nia ang kongkat mu u, O Moroa. kerekngan lavanga mi lavanuet kangkedek (deer) i minu aleng la ik sixit pupuse dan mumudut ti inin. ²Nu ne Moroa Luntoo, labalak i ngaongao amisik tu. Ningisa ba, uba siam ka ia xusu anat pas uto at loogu ram la ana lotu saparav u ro melamgo ram? ³Levenaleng kangking la kanimin nia ang teng, la

kopmen ana anan, amisik limixin munepen minia di susue ia do, “Ne Moroa ram ua?”

⁴Lainbulu i suxuna ia at loxonaleng am doma su at levenaleng migomgo. At nom levenaleng nia aga emu mi limixin solo uto at loogu at ne Moroa; la nia agam gomgo nga di at nom lavatpas. Buaang limixin digat pas mi lomomo, livikpixon mi luxupkup mi leemi asu saparap ne Moroa. ⁵Tila nia ak bulu amisik? Tila nia am doma saasa? Nia anam doma ngangais ti ne Moroa, kusu anaba emi asu amu bok min, ni Laradi Loklok Arooro la ne Moroa rak. ⁶⁻⁷Lanbulu i suxuna ia nade at loxokoxo nade xeneng at lemenemen xadiong; kuren la lodoxoma rak i repukus tin. Im taba ia mi lanbulu silok ngan leretepit paxanao i tepit pava ia. Lentaba ik sak pava ia ngan ladanut, la ngan ladan i tem sobang su ro at ladan Joridan mo i sesen boro vana at lukaana Emon la Misar. ⁸Leeme Silok na lox asuusu labalamu lexen teren at laaleng kangking, kusu nia anabak pixon at laxanimin, ni lisingising tarak ti ne Moroa mo im gomgonga lorooro rak. ⁹Ti ne Moroa, Lentupe rak, nia a vaase xeretna, “Tila u domampe ia? Tila nia anap kip tutu amisik mi losongsongot at na laxanmumuat at longlong kuxurung at limixin di munepen minia? ¹⁰Labantuxu rak ira meeloxot axap at loklok kalise atnedi di susue ulu amisix ia dola, “Moroa nga ua ram?”

¹¹Tila nia ak bulu amisik? Tila nia am doma saasa? Nia anam doma ngangais ti ne Moroa, kusu anaba emi asu amu bok min, ni Laradi Loklok Arooro rak la ne Moroa rak.

Salmo 43

Lisingising At Laradi I nemen At Lememen Kadiong

¹O Moroa, una tong atkatla li rak do nia ap sepse, la una ru at lenep tarak tinedi limixin dixo nuunu ram. Una lox asepsu ia basinge limixin kaxarang la limixin kapmek. ²Nenu Lurutu See Pe rak, tila u on taba arulu ia? Tila nia a ekip tangarang amisik mi laxaloklok asongot limixin munepen minia dik lok kuxurung ia min?

³Una lox asuusu laxasep taram eburu mi levelinga ruturun tia; dunam gomgonga ia la duna lam ka amlong ia uto Saion, lakaana xaala ram, la uto bok at loogu laplavang taram nenu u nemen teren. ⁴Melemu nia anabat pas uto at loxonin laplavang taram, O Moroa. Nenu mun lavasuun at lomomo rak. Nia anabak pixon eburu mi ligita ti emi asu minu. O Moroa, Moroa rak.

⁵Tila nia ak bulu amisik? Tila nia amdoma saasa? Nia anam doma ngangais ti ne Moroa, kusu anaba emi asu amu bok min; ni Laradi Loklok Arooro rak la ne Moroa rak.

Salmo 44

Lisingising Ti Ne Moroa Nak Lok See Atdi

¹O Moroa, nema maga rongga rinotno mo lempanga matmatkun. Lavalabat atnama diga ga ven i nom levempanga sangsangu ugak lox i at levenaleng atdi gano migomgo. ²Maga rongga i do nenu xa uga saksu mi lavamolon, la uga vaxaxis limixin taram at lenep kangka atnedi. Uga lox asongot bok limixin at levennep silok petpes la uga lox anarong lubangmixin taram la diga ngasang kobot. ³Lubungmixin taram di goxo ruuna xaka nom lenep kangka at teesep. Kopmen di goxo ruuna xaka box i mi lolos atnedi. Diga ruuna ka i mi lolos mun taram, la digaklen i do uga nemen eburu minedi; nom i ga lox asuusu i do uga balamu di.

⁴Nenu Loorong Silok tarak la ne Moroa rak, uk lok tooro limixin taram la dik sak tup mi limixin munepen midi, ⁵la mi lolos mun taram, nema ma sak tup mi limixin munepen minema; keneng at laasen taram ma sev asi di. ⁶Nia xopmen ana nuunu at losoosoo, kopla at lavarise rak ba lok tooro ia xusu na lox asepsu ia; ⁷ketla nenu, ne Moroa, uga lox asepsu nema basinge limixin munepen minema, la uga sak tup minedi digak lox angtungun tinema. ⁸Nema manaba emi asu amisik minu la manaba tong loklok avukat amisik tu la kopmen tekavaxap teren.

⁹Ketla nanga ura sok sisixe nema, kuren la limixin munepen minema diga sak tup minema; kopmen bok ba una emu buru mi limixin esep atnema. ¹⁰Uga lok nema la maga sixiro at limixin munepen minema, la diga lok kaka levempanga atnema. ¹¹Uga siam taba di minema xusu dina sep amet nema ngan lubang sipsip, uga lox epeseves nema uto ri levenep silok kadiong. ¹²I lok ngan ta do uga sesep mi limixin taram ti luunun lixilik mene. Maga lok ngan lempanga gamasa mun.

¹³Leven abungmixin petpes dik lok saparap nama, diga ven lavanga uga lox i rinema, di paase kalise la ding longon atnema. ¹⁴Uga ke aie xepe nema la limixin boro at lengkot petpes ding longon arup nema, di piripat patlak la ding longon sese nema at levempanga it pot saparap nama. ¹⁵Lainmangan i umsu at lorooro rak mumu mo levelinga atnedi ¹⁶dit kis munepen minia la atnedi bok ding long angtungun tia, di tong asu lavapaase aksaksa la levelinga kapmek mumu nama.

¹⁷Na lempanga axap ga vot saparap nama ketla ma goxo domampe u kopla nema gita los polo lekabus taram uga lox i rinema. ¹⁸Ma goxo raba sinta u, la kopmen ma goxo rongga xepe bok at levelinga ram. ¹⁹Ketla uga ke aie xepe nema kantubu at na limixin di lok ngan laxampanga sio; uga raba arulu nema keneng at lamain bonot.

²⁰Mo dola nema gita xap ti lotu saparav u, ne Moroa atnema, la do nema gita sing saparap lomoroa vetpes, ²¹nenu gitabak len i, atla nenu uk leklen levendoxoma nemnem atnema. ²²Nema limixin taram, kuren

la amisik dip sep amet nema. Amisik dip sep amet etaba nema ngan ta lubung sipsip, mo kopmen tara ri tupe di.

²³Leeme Silok, una aus! Una beleku kaxat! Una xatu upana! Nemen uta raba arulu rino axap ta nema! ²⁴Tila u lipe avolo nema? Nemen uta domampe levesongsongot mi levenmumuat atnema.

²⁵Diga vas amdanda nama, la maga subu midi xopok at laxangka; mak midi ngan ta luvuttadi met! ²⁶Ude, una lok tooro nema! U ruuna labalamu lexen tinama, kuren la una lox asepsu nema!

Salmo 45

Loklok Epot At Loorong at Leme Israel

¹Levelinga nunuan i umsu at lodoxoma rak, la nia ara rivit na loxompixan ti loorong at leme Israel, nenia a gagas ti tong asu i ngan laradi akleken ti malagan avukat mo i gagas lavanga mamalagan teren.

²Loorong, nenu lampeneves, kopmen tara na lok ngan u. Levelinga ram ik sixit nunuan amisik. Moroa ik lox anarong amisix u. ³Loorong lolos, una lox agagas lavarise esep taram. Lisisinang taram i umsu la laasen bok taram i silok aleng.

⁴Nenu loorong mi laasen silok, ut kis pana at la os (horse) ti esep. La uk sak tup mi lavamunepen taram ti lox alolos loklok mokmokso la levelinga ruturen. ⁵Levesoosoo ram i kasum, di soosoo beles at larapeve at limixin munepen minu. Limixin at leven abungmixin petpes di subu mi loklok ngangao ro saparap luxangedek taram. ⁶Mo lixitkis amgomgo ne Moroa ga raba u min, naba nemen amisik la kopmen noxo xap. Nu um gongonga limixin taram mi levelinga mokmokso. ⁷Uk lok momo mun mi leveloklok ik mokso la uk lox angtungun ti leveloklok ik lok kapmek. Ni lavasuun teren la ne Moroa, ni ne Moroa ram, ga soxolik ka u ngan loorong la ga raba u mi langsung lomomo i volo lomomo atnedi lentaba lavaorong. ⁸Levempanga singsiga ram i so mavak ngan la mea (myrrh) la alos (aloes); limixin diga sinang laraugu at loorong mi levempanga nunuan (ivory), la di lox amomo u go mi leveng kompixan nunuan. ⁹Kantubu at lavakin di ruuna levenasen silok, laxaalik at lavaorong mo di tu, la at lenep tino at loxot kitkis orong taram, loorong tixin mo i tu, diga sinang i mi levempanga diga lox i mi logol i nunuan aleng.

¹⁰Nenu loono ri loorong, una ronga na levelinga ana tong i ru; la uguta doma sola limixin taram mi libibinat taram. ¹¹Loorong naba veneves at levereven nunuan taram; neni laradi silok taram, la una mumu asu levelinga ren. ¹²Limixin boro Taia dinaba raba u mi leventamtaba; limixin nopnovos bok dinaba lok tong i xusu dina sat lodoxoma ram, kusu una lok tooro di.

¹³Loono ri loorong no i nemen keneng at loogu at loorong, neni loono maraanu rino! Ni i sigaraa mi lisingsiga diga sokgatga i mi leteret gol. ¹⁴Ni i sigaraa mi lisingsiga gigiliton teren, la di lam kaka i uto at loorong; ni i emu eburu mi lavakin pentangas teren, la di lam kaka bok di uto at loorong. ¹⁵Di vubeles at loogu at loorong mi lomomo la lososoro.

¹⁶Nenu loorong tarak, unaba ruuna laxanmadak temes solo, dinaba tu kun u eburu mi lavalabat taram ngan lavaorong, la unaba lok katling di lisi dina gomgonga mavana at limixin axap at na lavatbung menemen. ¹⁷Na loxompixan tarak naba tong asu laasen silok taram kusu nedi lavaola melemu dinabam tere avolo laasen taram, la limixin axap dinaba emi asu amisik minu la kopmen tekavaxap teren.

Salmo 46

Moroa Ik Lok Eburu Minedik

¹Moroa ni loogu matmatkun atnedik la lolos atnedik; i gagas amisik tik lok tooro dik at levenaleng nedik ta ekip tangaarang mi levenmumuat.

²Kuren la dik ta noxo marat, keke i do lavatkangka axap nangne, la levem pattaavut na subu tup utou xopok at lebelen laras. ³Keke i do laras na luulung aleng mi leretepit la lempattaavut nangne mumu leretepit at lara paxanao.

⁴Lara ladan mo i nemen, im taba lomomo ri limixin at lemenemen silok at ne Moroa, ti loogu xaala at Leeme Avolo. ⁵Moroa mo i nemen at mo lemenemen silok la kopmen tempanga noxo sele utut kepe i; atla ni naba rupot ti lok tooro mo limixin at larangubo, maxantamak suubu. ⁶Limixin boro at levenbung mixin petpes dinaba rakdu mi lanmarat, levengkot silok nabangne. Moroa naba vaase butbutki, la lavatbung menemen naba sonao.

⁷Leeme Silok, ni Lanaraavuk la i nemen eburu midik. Moroa at ne Jakop ni loxot loklok alipe atnedik. ⁸Nemi limixin axap. Ude nemi la mina ven leveloklok Leeme Silok irak lok pam i, mina ven levempanga sangsangu ira lok pam i nade xopok at lavatbung menemen. ⁹I lox axap levenesep to at levengkot axap at lavatbung menemen; im bapit levesoosoo eburu mi tevempanga sepsep, la i xotos asonao axap larapenban at laxao. ¹⁰Moroa i lok keretna, "Lumulum! Na xap ta leesep, la mina xasep do nia ne Moroa. Nia Loorong Avolo mavana at larabung mixin axap, nia Loorong Avolo mavana at lavatbung menemen axap."

¹¹Leeme Silok ni Lanaraavuk la i nemen eburu midik; Moroa at ne Jakop ni loogu matmatkun atdik.

Salmo 47

Lamgomgo Pana At Lempanga Axap

¹Nemi limixin axap at na lavatbung menemen, mina pasa tingen mi lomomo! Mina emi asu mi ne Moroa mi livikpixon lolos! ²Leeme Silok, ni Leeme Avolo. Dik atana lok ngangao aleng teren; neni Loorong Silok, im gomgonga na lavatbung menemen axap. ³Ni ga raba dik mi lolos ti sak tup mi limixin munepen minedik; ga lox asilok nedik kusu atam gomgonga leven abung mixin petpes. ⁴Neni ga lok katling ka na lenep kangka atnedik livipisik li at ne Jakop ua tana nemen teren, ni i balamu limixin teren mo di lok momo mi lenep kangka atnedi. ⁵Moroa i urut utoxun pana at lititkis orong teren. Limixin di ven i la dip kup lolos aleng mi lomomo la lerengteng silok at laratu. ⁶Mina vixan emi asu ri ne Moroa, mina vixan emi asu ri Loorong Silok atnedik! ⁷Moroa ni Loorong Silok ti limixin axap at na lavatbung menemen, mina emi asu min mi livikpixon!

⁸Moroa it kis to at loxot kitkis orong teren i melemelengan, la im gomgonga larabung mixin axap. ⁹Luvuttadi amgomgo atdi di vot eburu mi limixin at lo Moroa at ne Abaram. Lolos teren i volo lolos atnedi axap limixin esep at na lavatbung menemen; ni Loorong i silok aleng ti lavaorong axap.

Salmo 48

Saion Lemenemen Silok At Ne Moroa

¹Leeme Silok i silok aleng. La i lox avukat aleng do ata emi asu amisik min to xeneng at lemenemen silok at ne Moroa atnedik la to bok at loxongkaana kaala ren. ²Saion neni mo lakaana at ne Moroa, no xa it kis kasep pana la i maraanu aleng; ni lemenemen silok at Loorong Silok, ik lox amomo limixin axap at na lavatbung menemen. ³Moroa gara lox ase limixin do dinaba nemen avukat mene ro xeneng at laraugu matmatkun at na lemenemen silok.

⁴Lavaorong silok eburu mi limixin esep atdi diga vot buru la diga lok do dina esep polo limixin boro at lakaana Saion. ⁵Ketla diga ven mo lakaana la diga sangu aleng, diga marat la diga sixiro. ⁶Diga dede xapmek tino mi lanmarat, la diga lingun, ngan ta latkin i gagas kusu na visik. ⁷Lodoxoma atdi gak sixit saasa ngan lempattaaxup dik sixit ekarakat to at laras keneng at langsung lamanman.

⁸Nema magara ronga vam levelinga at levempanga sangsangu ne Moroa gak lox i, la mara ven pam i ro at lemenemen silok at ne Moroa atnema; ni Leeme Silok la ne Lanaraavuk, naba lok tatao amisik mo lemenemen silok at levenaleng axap i tu melamgo.

⁹O Moroa, to xeneng at loogu laplavang taram ma doma asu at langsgangan labalamu lexen taram. ¹⁰Limixin at levengkot axap di emi asu aleng minu, la limixin at levengkot axap at na lavatbung menemen dira ronga levelinga mumu u. Nenu um gomgonga limixin mi levelinga mokmokso ting tonga ina. ¹¹Kuren la limixin axap di nemen to at lakaana Saion dina momo! Nu ung tonga linga mi lodoxoma manmanton; kuren la limixin axap boro at levengkot silok Judaia dina momo.

¹²Nemi limixin at ne Moroa, mina vas kangkan lemenemen Saion, la mina exes laraugu likling i baalom upana. ¹³Mina ven katling axap larangas uat la mina reven anga bok laraugu matmatkun, kusu minaba tong avolo i rinedi lavaola melemu. ¹⁴Mina tong i ridi do na ne Moroa atnedik, neni ne Moroa atnedik at levenaleng axap i tu melango. Ni nabam gomgonga dik at levenaleng axap naba vot melemu.

Salmo 49

Larangtangu At Lunuunu Saga At Lapnovos

¹Nemi axap, mina ronga ka i na! Limixin at levengkot axap, mina ronga xaka i na. ²Nemi limixin amgomgo mi limixin gamasa, limixin apnovos eburu mi limixin banbalo, mina ronga xaka i na. ³Lodoxoma rak naba xasep tinimi, la nia anaba vaase asu levelinga ri raba nimi mi lodoxoma avukat. ⁴Nia anaba vaase asu levelinga voovo, la anaba soxomus bok lavasuun teren do anak pixan eburu mi ligita.

Lavapaase rak i lok keretna:

⁵Nia xopmen anak marat ti exip tangarang mi levenmumuat, at loxonaleng limixin munepen minia di ru kangkan ia. ⁶Mo limixin kakapmek di nunua i do dinaba ruuna ka lorooro nunuan mumu laxampanga solo atdi la dim simi xaka di at leven apnovos atdi la dik lox aru ka bok di. ⁷Ketla laradi ixo epovo ri ru korop ti lorooro axa ren, ixo epovo ri ru korop tin mi tuunun ti ne Moroa; ⁸atla luunun ti lorooro at laradi i silok aleng. Lavanga salai i vara na unun i min noxo epovo rinotno, ⁹ri lox aase i basinge lamaaut, la ni naba roo avolo.

¹⁰Limixin axap di reven i do luvuttadi akleklen bok di remet, ngan bok luvuttadi rangtangu mi luvuttadi baulang. Nedi axap dinaba met basinge levenapnovos atdi la levempipisik li atdi dinaba ruuna xaka i. ¹¹Levenmaaut atdi naba lok ngan levenmenemen avolo atnedi; dinaba nemen amisik di e, keke i do diga ruuna lengkongkangka. ¹²Lixitkis silok at laradi noxo lox asepsu i basinge lanmet; ni naba met bok ngan levempanga mi lavanuet kangkedek.

¹³Limixin di nuunu saga atnedi xa, diba ekip tangarang mi lavanga salai mo? Lanmet ni laxavaxap atnedi. Di momo gamasa mene mi leven

apnovos atdi. ¹⁴Lanmet naba mumu asu di, la dinaba met ngan lubung sipsip. Limixin mokmokso dinabat kis silok polo di, atla nedi limixin kapmek dinaba nemen to at lemenemen at labarongan, la levenbaaxin tadi atnedi nabap sopso soso ro vaxalom basinge lara menemen aulis atnedi. ¹⁵Ketla ne Moroa naba lox asepsu ia, ni naba lox asepsu ia basinge lolos at lanmet.

¹⁶Nemen gat uta doxoma mu solo i do tara napnovos, la dola lapnovos teren na sisilok; ¹⁷neni noxo xip kaka mo lapnovos eburu min dola ni na met. Lapnovos teren noxo emu min ti lorooro melemu. ¹⁸Keke i do tara i ruuna lomomo at na lorooro; la keke i do limixin di emi asu min dola ni laradi nopnovos; ¹⁹ni naba vot pasa lavalabat teren at lanmet, at mo loxot lamain bonot kopmen noxo xap, ketla naba nemen amisik. ²⁰Lixitkis silok at taradi noxo lox asepsu i basinge lanmet; neni naba met bok ngan levempanga mi lavanuet kangkedek.

Salmo 50

Laplavang Tuturun

¹Lanaraavuk, neni Leeme Silok ne Moroa i paase; ni i toro ri limixin axap at na lavatbung menemen i ruka i at loxot laxangking it losu e la i se ro at loxot laxangking it los tuv e. ²Lisisixam at ne Moroa i soosoo su boro Saion, lemenemen silok i nunuan axap la i milik maraanu rino. ³Moróa atnedik nom boro naba vot, ketla ni noxo vot atnaasan; laxao bokbolot nabam gomgo rin, eburu mi langangan lamanman bet nabak lok kangkan i. ⁴Ni naba ro ka laxalibet mi lavatbung menemen kusu dunaba ru rin la duna reven i na ila mumu loklok at limixin teren.

⁵Moróa i lok, “Muna lok bubua raba ia mi limixin tuturun tarak; nedi nom diga lok lekabus eburu minia at loxonaleng digaplavang tia.”

⁶Laxalibet i tong asuusu i do ne Moróa neni laradi mokmokso, la neni xa laradi rongtonga linga

⁷Moróa i lok keretna, “Limixin tarak, mina ronga ia ana vaase. Nia anaba ruuna tevelinga rinemi, limxin tarak me Israel. Nia ne Moróa, la Moróa atnemi. ⁸Nia anoxo vaase sok nimi mumu levelaplavang atnemi la leventamtaba bok mi katos asonao amisix i ria. ⁹Axok pakes bok ti mo leven bulumaxao temes boro at laraugu bulumaxao atnemi koplá mo levenme boro at levenmenemen atnemi; ¹⁰atla levempanga axap di ruuna lavanuet lengkangkedek di nemen at laxairing, atarak axap, eburu mi laxan bulumaxao at lasangaun larabin sangsangaun kobot (1000) kaana.

¹¹Lavapixa eburu mi levempanga axap di rooro ro xolonu, ni atarak kusuk.

¹²Dola nia gita roxo, nia gitoxo sing nimi ri toxompanga anan, atla lavatbung menemen mi levempanga axap keneng teren, ni atarak

kusuk. ¹³Nia xopmen ana anan levenuut bulumaxao temes kopla ana inin levenda meme. ¹⁴Loklok ti tong avukat, ni lagale laramtaba atnemi ria, ne Moroa; la mina raba nenia Lanaraavuk mi levempanga migara xaape vam i. ¹⁵Naba lox avukat do mina ro ke rak mo do mina ekip tangarang mi levenmumuat, la anaba lox asepsu nemi, la minaba emi asu minia.” ¹⁶Ketla ne Moroa i tong i ri limixin kakapmek keretna, “Kopmen tavasuun teren la nemi mi utus empampana axap lenavolo rak. La kopmen tavasuun teren la nemi mi vepaase mumu lekabus tarak, ¹⁷atla mi ven abulubun kepe lavapaase sok tarak la mik sok sisixe bok leventaangas tarak. ¹⁸Mi etangas mi luvuttadi xipkip pilo, la mi vemu eburu mi limixin longlongka.

¹⁹Amisik mi vavara na paase xapmek; la soso mun mi tong asu levelinga xaxarang. ²⁰Amisik mi gagas tik lok li luvutneton nimi at levempapaase, la mira tere asu linga mumu bok di. ²¹Miga lok na levempanga axap, ketla nia a goxo tong toxolinga, la miga doma i do nia a lok ngan nimi. Ketla nanga ana paase sok nimi la ana lox asuvos nemi at lavapaase.

²²Nemi mim taba sinta ia, mina rongga i na, naba lok kapmek do nia ana vaxat lalais nemi, la kopmen bok ba tara go naba lox asepsu nemi. ²³Loklok ti tong avukat, ni lagale laramtaba ip kip aurut laasen tarak, la nia anaba lox asepsu rinotno nedi di rongga res tarak.”

Salmo 51

Lisingising Ti Doxoma Xepe Libilinga

¹O Moroa, una lox asuusu lebelemulus taram tia, mumu nom labalamu lexen taram; una ves kepe leveloklok kakapmek tarak atla nenu u umsu mi langganan lebelemulus. ²Una gos kepe axap libilinga rak la una lox amaxar ia basinge leveloklok kakapmek tarak! ³Nia ara ven kisip pam i do lavasuun teren atarak; la aklen i do nenia lavanga bilinga. ⁴Nia agara lok pam libilinga ru, tu xusuk mun la aga lok lempanga ua nenu u tong i mi laxakapmek. Kuren la ik mokso do una ila mumu lorooro rak, la ik mokso bok do una tong i do nenia laradi xapmek. ⁵Nia aga xapmek, tu ka xa i at laaleng diga visix ia ren; kovisi ne naga ga visix ia nia agara xapmek pam. ⁶Nenu u vavara limixin kusu dina umsu mi lununuan mi levelinga raturun taram; una suxa aumsu lodoxoma rak mi lodoxoma nunuan taram. ⁷Una lok kepe libilinga rak, kusu nia aba dadat; una gos amaxar ia, kusu nia anaban bun tino ngan lusugao. ⁸Nia a vara i xusu ana rongga limixin dina lok momo mi leklek; keke i do ugara lox asi vam ia, la uga lox amenemen pam lodoxoma rak, nia anaba momo manga. ⁹Una vampe luxatli ram kusu unoxo ven libilinga rak, la una ves kepe

axap laxakapmek tarak. ¹⁰O Moroa, una lox amaxat labalak, la una lox aumsu lorooro rak mi lodoxoma maxat mo ik mokso. ¹¹Nemen gat uta sok gingin kepe ia, la nia ana nemen paxalom basinge u; nemen bok uta lok kepe Loroonan Kaala ram basinge ia. ¹²Una raba amlong manga ia mi nom lomomo at loklok arooro ram, la una lok lodoxoma rak kusu ana vavara ri rongga res taram. ¹³Melemu nia anaba lox ase limixin kapmek mi leventaangas taram, la dinaba rem gili bilong mu u. ¹⁴O Moroa, una lok tooro ia xusu nia a noxo met la una lox asepsu ia basinge laniu; la nia anaba tong asu ba loklok manmanton taram mi lomomo. ¹⁵Leeme Silok, una lok tooro ia ri paase asu levelinga ram, la nia anaba emi asu minu. ¹⁶Nenia aba lok amomo ba u xereva, atla nenu xopmen una vavara ri levelaplavang? La kopmen bok una lok momo mi levempanga di kotos asonao i ru. ¹⁷O Moroa, a lox akalik ia la a nemen maxopok taram; nom i ni laramtaba rak tu. Nia aklen i do, nenu uxu epovo una sok sisixe laradi i lox akalix i maxopok taram la i ven kibis libilinga ren. ¹⁸O Moroa, una balamu limixin me Saion la una lok tooro di; una ii aurut amu levenngas uat to Jerusalem. ¹⁹Kuren la unaba lok momo mi levelaplavang atnema manaba xotos axav i ru kerekngan uga tong i; la leven bulumaxao temes manabap lavang min tu rovana at loxonin laplavang.

Salmo 52

Loklok Amokso Mi Labalamu At Ne Moroa

¹Nu laradi silok, tila um simi u at laxapmek taram, la mumu bok mo lempanga xapmek uk lox i ri limixin at ne Moroa? ²U gagas li leventaangas ti lok kapmek leventaba vetpes; levelinga ram ing sengsen ngan loxonise. Nenu u puse ngas amisik ti xaxarang. ³Nenu u vavara aleng ti laxakapmek la u ke xepe luvukat; u vavara aleng ti levelinga xaxarang la u ke xepe levelinga ruturun. ⁴Nenu laradi xaxarang, u vavara aleng do unak lox asongot mene limixin mi laxalinga xaxarang taram! ⁵Kuren la ne Moroa noxo xap ti lok kapmek amisik tino u; ni ba ranga alis ka u la ni naba saksu minu basinge loogu ram; la ni naba lox axap tino lorooro ram la unoxo nemen bok ba at lemenemen at limixin di rooro. ⁶Limixin mokmokso dinaba ven i na la dinaba lingun; la dinabang longon arup u la diba lok do, ⁷“Mina ven ba na laradi goxo vara i do ne Moroa na lok tatao i. Ketla ni ga nuunu saga at lapnovos silok teren, la ga nunua i do loklok kakapmek naba lox aulis i.” ⁸Ketla nenia a lok ngan luuna Olip i susu avukat to xeneng at loogu at ne Moroa; nia a nuunu saga at labalamu lexen teren naba nemen amisik la noxo xap. ⁹Nia anaba tong loklok avukat amisik tu, ne Moroa, ti nom lavanga ugara lok pam i; nia anaba tong asu i do nenu u lox avukat to melamgo at limixin taram.

Salmo 53

Laxapmek At Limixin

¹Mo limixin di doma i do, “Kopmen tomoroa go i rooro, nedi limixin tangtangu.” Lodoxoma atnedi i bilingot axap tino mi laxapmek; la dira lok pam levempanga ik lok kapmek aleng tinotno, kopmen tara atdi na lok levempanga i nunuan. ²Moroa i nemen tovana at laxalibet la ik milik asi ri limixin axap; i vara na ven i do teventaba go di ruuna tevendoxoma avukat, kopla teventaba di belengaongao rin. ³Ketla nedi axap dira repukus su vam basinge ne Moroa; nedi axap dira lok kapmek pam. Kopmen tino tara atdi na mu asu langas mokmokso. Kopmen tino tegesara, atla loklok atnedi axap i epovo mun. ⁴Moroa i sue xeretna, “Kereva, kopmen dinaklen i do di lok levempanga xapmek? Dik lok kakapmek amisik limixin tarak la kopmen tino dina ngising tia.” ⁵Ketla dinaba lingun aleng tino, at nom lanmarat kovisi di goxo suma i gano, atla ne Moroa naba sax epeseves levesi at limixin di munepen mi limixin teren. Moroa ira sok sisixe kepe vam di. Kuren la limixin me Israel dinaba sak tup tino midi. ⁶Nia a vara aleng tinotno i do ne Moroa naba sak tiki tara boro Saion, kusu ni na lox asepsu limixin me Israel basinge lavamunepen atdi. La kerepmo dinaba lok momo do ne Moroa naba lox asang kobot amu manga di!

Salmo 54

Lisingising Ti Loxokok Basinge Lavamunepen

¹O Moroa, una lox asepsu ia mi lolos taram, una lox asepmus ia mi lolos taram. ²O Moroa, una ronga lising tarak, una ronga ka levelinga rak. ³Limixin loklok papavas di lok do dina esep minia; limixin belemamao di lok tong pen i do dina sep amer ia. Nedi mo limixin, kopmen dina doma solo ne Moroa. ⁴Ketla i ruturun tinotno do ne Moroa ni loklok tooro rak. Leeme silok, ni Lentupe rak. ⁵Lisingising tarak keretna, Moroa na vorang taba amlong di mi laxakapmek diga lox i ria. La ni naba sele utut kepe axap di; atla neni laradi ik lox asoorun levengkakaape ren. ⁶O Leeme Silok, nia anaba lok letaba ru mi lomomo. Nia anaba tong loklok avukat tu atla nenu u lox avukat tinotno. ⁷Uga lox asepsu ia basinge laxanmumuat axap tarak; la nia aga reven u, ugak sak tup tino mi limixin munepen minia.

Salmo 55

Lisingising At laradi Ua Lentangas Teren Ga Lok Laxaurup Tin

¹O Moroa, una ronga na levelinga rak; nemen uta ronga aie xepe lisingising tarak. ²Una ronga lising tarak la una vaase porang ia;

levenmumuat i lok kapmek tino lorooro rak. ³Labantuxu rak i lingun tinotno atla limixin munepen minia di kiilu ia. Na limixin kapmek di lok do dina sev amdanda ia mi levenmumuat. Di belemamao ia la dik lox angtungun bok tia. ⁴Kuren la nia a marat kapmek tinotno, la lanmarat at lanmet i suxuna ia. ⁵Nia a suma rino langsung lanmarat la a dede; lanmarat i suxa aumsu lorooro rak. ⁶A vara rino i do nia gi ruuna tuvapan ngan at lamno; nia giba rava kaxat uto at loxot petpes, la lodoxoma rak gira lok mamana. ⁷Nia giba rava uto vaxalom kusu ana nemen mimila ro at lamatbin. ⁸Nia giba lok soso ri vuse ka toxot ti lipe, at langsung lasaii mi lamanman bet. ⁹O Leeme Silok, una lox ekarakat levelinga axa atnedi limixin munepen minia. Nia a reven limixin di esep keneng at lemenemen silok, la di lok kapmek tino limixin. ¹⁰At levenaleng kangking la kanimin nia a reven di, dit pas saasa la dik lok leveloklok mamangan la dik paxaru kaxat buaang laxan ekarakat. ¹¹Leeteke ik lok at levengkot axap; larangas axap i umsu mi lixipkip paxat panga mi laxaxarang ka levempanga at leventaba vetpes.

Laradi Mamalagan Ga Paase Ri Lentangas Teren

¹²Dola tara at limixin munepen minia na lok kalise ia, keke i anaba xip tutu mi lumumuat teren; dola ni natlas i mavana rak, anabak lox alipe basinge i. ¹³Ketla nenu mun, lentangas tarak, nenu xa uga lok na leveloklok kakapmek tia; la uga emu minia. ¹⁴Amisik neda taga etangas mi lavapaase la taga lotu buru vam to at loogu laplavang. ¹⁵Lisingising tarak keretna; limixin munepen minia dinaba mer avot ti loxonaleng meremet, no ne Moroa ga vit li i ridi. Nia a vara i do dinak mit tooro mene di la dinat pas uto at lemenemen at labarongan, atla laxakapmek i umsu rino xeneng at lebelen di la keneng bok at laraugu bok atnedi. ¹⁶Ketla nenia a ro ke at Leeme Silok ne Moroa ri loklok tooro, la ni naba lox asepsu ia. ¹⁷At lenmaxantamak suubu, at levenaleng kangking la at levenaleng kanimin, nia a velevanga mi levesingising lolos tarak mo i turut saparav i, la ni naba ronga ia. ¹⁸Ni naba lox amlong avukar ia ap mo levenesep nia a vesep teren, la kopmen tepanga naba sep kapmex ia, kantubu atnedi buaang limixin munepen minia. ¹⁹Moraa gam gomgonga na lavatbung menemen, ga ruka axa i ganoxa at lereot, la ni naba ronga ia la ni naba sak tup midi; atla di xopara na repukus, la kopmen dina marat teren. ²⁰Mo laradi nia aga vemu min, ga esep eburu mi larapentangas teren, ga los polo levengkakaape ren. ²¹Levelinga ren ga nunuan aleng, ketla longlong angtungun ga umsu at lebelen, levelinga ren gang sengsen ngan lavarise sepsep. ²²Una ke raba Leeme Silok mi laxanmumuat taram, ni naba tupe u; ni xopmen na ke xepe limixin mokmokso kusu limixin petpes dina sak tup midi. ²³Ketla nenu, O Moroa, unaba lam bubua ka limixin sepsep amet mi limixin kaxarang uto

xopok at levenmaaut atnedi at loxonaleng move di aau, la kovisi na epovo rinedi ri met. Ketla nenia, ana nuunu saga ram.

Salmo 56

Lisingising At Lunuunu Saga At Ne Moroa

¹O Moroa, una belemumu ia, atla nia na a nemen at leese; limixin munepen minia dik lox asongot amisix ia. ²At levenaleng kudun axap limixin munepen tarak di vesepe eburu minia. Buaang nedi di esep tangarang minia.

³Nu Leeme Silok, nu Lanaraavuk. Do nia ana marat, nia anaba nuunu saga mun taram. ⁴Nia a nuunu saga at ne Moroa la axok marat. Nia a emi asu min atla ni naba lok epovo mo levempanga ni ga xaape min. Ixo epovo rinotno xusu limixin mun diba lok tavanga xapmek tia.

⁵Limixin munepen minia dik lok kakapmek ia at levenaleng kudun axap; dim doma agagas li amisik leventaangas kusu dina lox asongor ia. ⁶Dit pot buru ri kuxut tangais ia at levengkot lipe, la di reven levempanga axap nia ak lox i, la dit kis tangais ia do dina sev amer ia. ⁷O Moroa, una lox asongot di, mumu loklok kakapmek atnedi; una lox asuusu lebelemamao ram la una sak tup midi mi lolos taram. ⁸Ukleklen i do nia a xip tutu mi levenmumuat; nenu ugak lok katling leveng kamkabili dan ga sesen su at luxatli rak. A doma i do uga malagan li i at lubuk taram.

⁹At laaleng nia ana xup tu, limixin munepen minia dinaba o bilong. Legesa vanga mun nia akleklen i, Moroa i tu tooro ia. ¹⁰Nia a emi asu mi Leeme Silok mumu leveng kakaape ren. ¹¹Nia a nuunu saga mun teren, la nia a noxo marat at tempanga. Ixo epovo rinotno xusu limixin mun at na lavatbung menemen diba lok tavanga xapmek tia.

¹²O Moroa, nia anabam taba u mi levempanga aga xaape min tu; nia anaba raba u mi laramtaba ti lox asuusu lorotong avukat tu, ¹³atla uga lox asepsu ia basinge lanmet, la uga lok tooro ia la limixin munepen minia di goxo sak tup minia.

Kuren la nia anabat pas ma xopok at loklok tatao at ne Moroa; neni ik lox axasep lodoxoma at limixin kusu dina rooro.

Salmo 57

Lisingising Ti Loklok Tooro

¹O Moroa, una belemumu ia. Una lox asuusu lebelemumu ria, atla nia a vot pasa u xusu una kubak pe ia. Una kox avukar ia maxopok at

lamamau at luvapa ram. Una lok ngan lavatban tia, se at nom laaleng na levenmumuat axap na on basinge ia.

²Nia a toro ri ne Moroa, ni Leeme Avolo, mo im taba ia mi lempanga axap nia ak pakes tin. ³Ni naba vaase porang ia boro vana at laxalibet la naba lox asepsu ia; ni naba sev asi axap limixin di esep minia. Moroa naba lox asuusu mo labalamu lexen la naba lox epovo levengkakaape ren tia.

⁴Nia ak lok kantubu at limixin munepen minia di lok ngan lubang laion; di lok gagas kusu dina sev amet limixin la dina anan di. Leven gisangsa atnedi i anan ngan ta lempatsoosoo, la leven gam atnedi i anan ngan ta lemparise esep.

⁵O Moroa, una lox asuusu lolos silok taram to vana at lamavangkap, mi lisisixam taram at lengkot axap at na lavatbung menemen.

⁶Limixin munepen minia dira sat pam laxatkat kusu dina rebeng alis kaka ia; lorooro rak i umsu mi levenmumuat i sak pava ia. Diga sep pe langas patpas tarak mi lavatmet i si aleng, ketla ned i xa diga subu tup teren.

⁷O Moroa, nia a nuunu saga rinotno ram; nia anabak pixan la ana emi asu minu. ⁸Lodoxoma rak, una xatu kaxat. Loxontaaleng tarak mi ligita, muna gagas. Nia anaba sak aus laxangking at labara koxot mi loxompixan. ⁹O Leeme Silok, nia anaba tong loklok avukat tu ro melamgo at limixin at levenep silok. Nia anabak pixan emi asu minu ro melamgo at limixin axap. ¹⁰Labalamu lexen taram i umsu aleng upana i se axa ro at laxalibet. Loklok tuturun taram i se tu at lamavangkap.

¹¹O Moroa, una lox asuusu leven gugu silok taram upana at lamavangkap, la una lox asuusu lisisixam taram at levengkot axap at na lavatbung menemen.

Salmo 58

Lisingising Ti Ne Moroa Na Lox Asongot Limixin Kapmek

¹Nemi luvuttadi amgomgo, kereva, mi lox akmokso levelinga at limixin mi loklok i nunuan? Kereva, mi ronga avukat levelinga atnedi la mi tu xantubu? ²Kopmen tino. Mi doxoma mene ri leveloklok kakapmek mi lok do mina lox i, la mik lox asongot limixin at levengkot axap. ³Limixin kakapmek dik lok laxakapmek at levenaleng axap at lorooro atdi; di paase asu amisik levelinga xaxarang, ga ru ka axa i at levenaleng diga visik di ren. ⁴Loklok atnedi i umsu mi losomamao, di lok ngan laxasii xapmek, di song pe levenbaalung atnedi ngan ta lisii di so asen i mi la Kobra, levenbaalung atnedi i baa; ⁵no xopmen nang tonga laxaka at laradi leklen at laxasii ik pixan kusu lisii naba ti, kopl a at laradi ikleklen

aleng levesangsanga. ⁶O Moroa, una sak pirivit kepe leven gisangsa atnedi di lok ngan lubung laion. ⁷Ba lox avukat do dina sonao ngan laxadan i sesen su axap, la dina lok ngan levempivilis dit pas amling i ro at langas. ⁸Na ba lox avukat dina lok ngan levendemdem i remet la i rap sopro; la ngan lamdak mumulum nenen i visix amer i la kopmen bok ba na ven laxasep at laxangking.

⁹Kovisi dinaklen i, la una lok kepe di ngan lempivilis di vixis asi i. Moroa, una mas kepe di mi lolos at lebelemamao ram do nedo move dina rooro. ¹⁰Limixin mokmokso dinaba momo dola dina ven ne Moroa na lox asongot limixin kakapmek; la dinabat pas beles mi leveng kangkedek atdi ro xeneng at lada at limixin kakapmek, mo ne Moroa naba sev amet di. ¹¹La melemu limixin dinaba tong i do, "I ruturun do limixin mokmokso dik lok kaka luunun boro at ne Moroa; la i ruturun tinotno do ne Moroa mo i nemen la i viila mumu loklok at limixin at na lavatbung menemen.

Salmo 59

Lisingising Ti Loklok Aratao

¹O Moroa, nenu ne Moroa rak. Una lox asepsu ia basinge limixin di munepen minia; una rupe ia at mo limixin di lok do na sep amer ia. ²Una lox asepsu ia basinge di nom limixin kakapmek, la una lok kaka amlong ia at leven tikngen di nom limixin sepsev amet.

³Pen ba i, di kuxut ngais ia kusu dina sev amer ia; na limixin esep di vot buru kusu dina esep eburu minia. Kopmen dola nia aga lok taxakapmek koplaga aga lok tavanga goxo nunuan, ⁴la kopmen bok do at tosoogong tarak. O Leeme Silok, dit pas soso uto at levengkot alipe kusu dina kuxut tia. ⁵Leeme Silok, nu Lanaraavuk. Una ronga ia; ude u la una lok tooro ia; Moroa at limixin me Israel, nenu xa una ven ba loklok at lavamolon. Una beleku kaxat la una lox asongot di; nemen gat uta belemumu nedo di raba arulu limixin axa atdi.

⁶Dimlomlong at levengkantino bungbung main uto at lemenemen silok, la dip kup saasa ngan lubungman, do dit pas saasa go. ⁷Una ronga ba lavapaase aksaksa la levelinga xikiilu atdi. Leven gam atnedi i lok ngan lemparise esep keneng at levenngusno atnedi; ketla dim doma i do ne Moroa kopmen nang tonga di." ⁸Ketla Leeme Silok, nenu ung longon atnedi, u lok kalise mun di lavamolon.

⁹O Moroa, nu Lanaraavuk tarak; nia a nuunu saga at lolos taram. Nenu mun loxot loklok alipe rak. ¹⁰Moroka rak i balamu ia, la naba lox asepsu ia basinge limixin munepen minia. La ni naba keke ia kusu anaba ven i na sak tup midi. ¹¹O Moroka, nemen gat uta sev amet di, kusu limixin tarak dina ven mo levesongsongot dinap kiv i la di noxo domampe nom

levempanga. Una sak epeseves di mi lolos taram la una sak tup midi. O Leeme Silok, nenu Lurutu See Pe atnema. ¹²Laxakapmek i nemen mene at levenngusno di; levelinga axap atnedi i lok kapmek. I lox avukat do dina onon at larapelixo mumu latlas atnedi. Di paase xapmek la di xaxarang; ¹³kuren la una sele utut kepe di mi lebelemamao ram, una sele utut kepe axap di, kusu limixin axap dinabaklen i do ne Moroa ni lamgomgo at leme Israel. La im gomgonga limixin axap at na lavatbung menemen.

¹⁴Limixin munepen minia dimlomlong at levengkantinao bungbung main la dip kup saasa ngan lubungman; la dit pas saasa ro at lemenemen silok. ¹⁵Di lok ngan lubungman dik sixit pupuse panga anan, la di booro do kopmen dina anan mais. ¹⁶Ketla nia anaba vixan loxompixan i tong asu lolos taram; amisik at leven maxantamak suubu anabak pixan asu labalamu lexen taram. Nenu u lok ngan loxot loklok alipe rak, la u kua pe ia at levenaleng mo do nia a ekip tangarang mi levenmumuat.

¹⁷Nia anaba emi asu minu, nenu lentupe rak.

Ne Moroa, neni loxot loklok alipe rak, ni ne Moroa i balamu ia.

Salmo 60

Lisingising Ti Loklok Asu

¹O Moroa, ugara sox sisixe xepe vam nama, la uga sev asubu vam nama; ugara musak kepe vam nama, ketla na manga una repukus bilong mu nama. ²Kuren la nanga ura lox angnengne vam na lenep silok la ugara lox arem kuang pam i; una i axatu mo levenmenemen teren atla i lok do na subu epeseves. ³Ura lok pam limixin taram kusu dina ekip tangarang mi laxanmumuat solo la lalaloklok asongot silok. Ma saaban ngan ta do ma inin laxangkadan lolos. ⁴Nu ugara vaase aronga vam nedi nom di lok ngangao ram, kusu dinaba sepsu basinge mo loklok asongot.

⁵Una lox asepsu nama mi lolos taram; una siam at levesingising atnema, kusu mo limixin u kok nedi dinaba roo suu. ⁶To at loogu xaala ren Moroa ga tong i xeretna, “Nia anaba sak tup mi lavamunepen tarak la ana sak epeseves di basinge lenep kanga rak. Nia anabapdo epes nom lemenemen Sekem ti limixin tarak, la anapdo episa mo lasa ro Sukot. ⁷Nia a ruuna mo lenep Gileat, la Manase; la lenep Epraem bok ni lavatkiam tarak i tu pe ia at leesepe. La lenep Juda ik lox asuusu lubung amgomgo ri limixin tarak. ⁸Ketla lenep Moab naba lok ngan lavattingtigon gosogos panga; nia anaba lu mi luxompanga vatpas tarak uto at lenep Edom, ngan loklok katling do nia a ruuna i. Limixin me Pilstia diga lok do dinaba sak tup minia, ketla digoxo epovo.”

⁹O Moroa, nege bamgo ria ti lok tooro ia keneng at leesepe eburu mi leme Edom? Nege ba lok tooro ia xusu ana sak tup midi ro at lemenemen

silok atdi, mo diga bos kangkan i mi larangas uat. ¹⁰Kereva, ura sok sisixe xepe rino vam nema? Kereva, ixo epovo bok ba xusu una vas su eburu bok ba mi limixin esep atnema? ¹¹Una lok tooro nema kusu mana sep lavamunepen, atla lolos at limixin noxo lok epovo tavanga. ¹²Do ne Moroa na ru eburu minema, manaba sak tup mi lavamunepen, neni naba sev asubu di.

Salmo 61

Lisingising Ti Loklok Aratao

¹O Moroa, una ronga lanteng tarak, una ronga lising tarak.

²Nia a bulu aleng la ak lok to vaxalom basinge lemenemen tarak, la a ngising tu. Una lok kaka ia uto at loxot loklox alipe, ³atla nenu Lurutu See Pe rak; nenu u tu lolos pe ia at limixin munepen minia.

⁴Una ke avolo ia kusu ana nemen amisik to at loogu kaala ram at lorooro axap tarak. Una kubak pe ia maxopak at luvapa ram, kusu ana nemen matmatkun.

⁵O Moroa, uga ronga vam levengkakaape rak, la uga raba ia mi mo leveloklok anarong mo u gagas min tinedi dik lok ngangao ram.

⁶Nia a sing u do una lox epasum levenmaares at loorong; una ke avolo i xusu ni na rooro bok be at taxanmaares solo. ⁷O Moroa, lixitkis angomgo ren na nemen amisik at laxasep taram; una lox aumsu i mi labalamu lexen la luruturun taram.

⁸Kuren la anabak pixan emi asu amisik tu, do at levenaleng getgesera anam taba u mi leventamtaba nia aga xaape min.

Salmo 62

Lunuunu Saga At Loklok Aratao At Ne Moroa

¹Nia a tu atnaasan to melamgo at ne Moroa, la a ngangais i xusu na lox asepsu ia, atla nenia a nuunu saga ren, la kopmen tara bok. ²Neni xusuk ik kok avukar ia la ik lox asepsu ia; neni lentupe rak, la kopmen tara naba sev asubu ia.

³Lavanisa aleng nemi lavamunepen mi vara i do mina esep eburu mi laradi kopmen tololos teren ngan loroboro i rem tereve si? ⁴Mi vara mene i do mina lox asi i basinge nom loxot kitkis silok teren; mi lok momo rik lox asuusu levelinga xaxarang. Mi paase asu levelinga loklox anarong, ketla keneng at lebelen nimi mim doma ali nemnem saxaek tin.

⁵Nia ak lok sogo xusuk mun at ne Moroa la nia amdoma ngangais tin. ⁶Neni xusuk ik lok tatao ia la ik lox asepsu ia; neni i tupe ia la

kopmen tinotno tara noxo sev asubu ia. ⁷Nia a nuunu saga mun at ne Moroa, atla ik lox asepsu ia la i lox asilox ia; neni i ruuna lolos ngan Lurutu See Pe rak; neni i lok ngan Loogu Matmatkun i kubak pe ia. ⁸Nemi limixin tarak. At levenaleng axap mina nuunu saga at ne Moroa. Mina tong asu levenmumuat atnemi rin, atla neni loxot loklox alipe atnedik.

⁹Nemen gat mita nuunu saga at limixin atla di lok ngan mene legesa mamas silok laradi i mas abeles ka i. Limixin silok la lixilik di lok ngan levempanga gamasa mun. Do mina lok li di at lisikel, kopmen tumumuat atnedi; di balalak ngan mene lamamas gamasa. ¹⁰Nemen gat mita doma i do mina sak paxat ka tempanga, la nemen gat mita doma i do mina ruuna ka tavanga at loklok tip kip pilo. Keke i dola lapnovos atnemi na sisilok; nemen mita doma saga solo ren.

¹¹Buaang levenaleng nia agara ronga vam ne Moroa ga tong i do, lolos axap, ateren mene, ¹²la labalamu ren i tu amisik.

O Leeme Silok, nenu xusuk mun, um taba luunun ti legetgesa radi i epovo xa at leven gugu mi leveloklok teren.

Salmo 63

Lavavara Ti Ne Moroa

¹O Moroa, nenu ne Moroa rak. Labalak i ngaongao ru. Lorooro axap tarak i vavara ru, ngan laxangka i vat dexes, la i soso vavagam ngan lasa mes. Lorooro rak ik minu ru.

²A vara i do anaba ven u ro at loogu xaala, a vara i do ana ven lolos la lisisixam taram. ³Labalamu lexen taram i lox avukat ti lorooro rak, kuren la anaba emi asu minu. ⁴Nia anaba tong loklok avukat tu at levenmaares nia ana rooro ren, la anaba xip aurut lukngak do ana sing u. ⁵Kerepmo nia anaba lok momo i ngan nia, a lok leluxa la a an mais; la anaba vixan leveng kompixan momo ri leemi asu ru.

⁶Dola nia ak midi ro at loora rak, am doma su ram; at laxanimin axap nia am doma u, ⁷atla nenu uga lok tooro amisix ia, kuren la nia ak pixan mi lomomo ro maxopok at luvapa ram. ⁸Nia at kis pepeve ram la lakngam tino i kubak pe ia basinge lavamunepen tarak. ⁹Nedi mo dik lok tong pen i do dina sev amer ia, dinaba rava si axap uto xopok Katimun. ¹⁰Dinaba met keneng at leesep, la lubungman sio dinaba anan levenbaaxin tadi atnedi.

¹¹Loorong naba momo mi ne Moroa atla ne Moroa naba raba i mi lolos kusu na sak tup mi lavamunepen teren. Nedi nom diga lok levengkakaape mi laasen at ne Moroa, dinaba emi asu min, ketla ne Moroa naba vamngus luvuttadi xaxarang.

Salmo 64

Lisingising Ti Loklok Aratao

¹Nia na a nemen keneng at lumumuat; Moroa una ronga lising tarak! Nia a marat at limixin munepen minia, una lox asepsu ia basinge di.

²Una rupe ia at lenngitngit at limixin kakapmek, basinge bok nedi buaang limixin kakapmek.

³Levelinga atnedi ip sep ngan ta lemparise sepsep ing sengsen, la levelinga xakapmek atnedi ik sixit mokmokso ngan levesoosoo. ⁴Kopmen di marat kusu dina paase palas asu soso laxalinga xaxarang atnedi, dik lok kapmek tinotno lorooro at limixin avukat mi levelinga xaxarang la dik lox askosko limixin.

⁵Nedi xa di epang aru kusu dina lok laxakapmek; di epaase do dinaba li lara pelixo atnedi ua. La di tong i do, “Kopmen tara naba ven dik.” ⁶Di seput li leventaangas kakapmek la di tong i do, “Dik tara gagas li vam langas i nunuan aleng.” Lebelen mi lodoxoma at limixin kerepmo ing tangku axap.

⁷Ketla ne Moroa naba soosoo di mi levesoosoo ren, la soso mun dinaba ruuna ka levenin kooxing. ⁸Ni naba sele utut kepe di mumu mo levelinga xapmek atdi; la limixin petpes diba ven di, diba piriapat lempatlak atnedi.

⁹La nedi axap dinaba marat, atla dinaba domasu at levempanga ne Moroa ga lox i, la dinaba tong asu mo leveloklok aleeng teren. ¹⁰Nedi axap limixin mokmokso dinaba momo ap mo levempanga Leeme Silok ga lox i. Dinaba nemen matmatkun maxopok at loklok tatao ren; limixin axap di nunuan, dinaba emi asu min.

Salmo 65

Leemi Asu Mi Laramtaba Rotong Avukat

¹O Moroa, ik mokso xusu mana emi asu minu ro Saion, la mana doma xatling levengkakaape atnema ru, ²atla ung tonga res at levesing atnema. Limixin at levengkot axap dinaba vot pasa u, ³mumu leveloklok kakapmek atnedi. Loklok kakapmek atnema i sev asubu nema, ketla nenu u doxoma xepe i. ⁴Nedi nom una soxolik ka di, dina momo; u lok kaka nedi xusu dina nemen to at loogu xaala ram. Manabat kis mimila at levempanga nunuan keneng at loogu ram eburu mi leveloklok anarong at loogu laplavang taram i xaala. Mo naba lok epovo lavavara atnema.

⁵Ung tonga res atnama mo do um taba nema mi lolos ti sak tup mi limixin munepen minema. La uk lok bok levempanga nunuan ti lox asepsu nema. Limixin at levengkot axap at na lavatbung menemen la at levenep tas paxalom bok di nuunu saga ram. ⁶Uga vaxaxis lempattavut

mi lolos taram, la kerepmo uga lox asuusu lolos silok taram. ⁷Uk lox amila leretepit at laras la lulung at levempo paxanao, la uk lox axap bok levenekarakat at limixin. ⁸Limixin at lavatbung menemen axap ding sangu aleng mumu levempanga ugak lox i. Leven gugu ram i lox asu luxupkup momo boro at lara lenep kavaxap at lavatbung menemen uto at lara lenep.

⁹Nenu uk lox asuusu loklok tatao ram ti laxangka, uk lox asi larabet tik lox ababaum laxangka kusu larauna na pisik avukat. Nenu uk suxa aumsu laradan sen mi levengktan la um taba lavatbung menemen mi levempanga anan. Uk lox i xeretna; ¹⁰up sep bet avukat ti leventaamang, la uk lox amlu laxangka mi levendan bet; u lox amumulum laxangka mi limisimisi bet la i lox asuusu larauna maxat. ¹¹Loklok taram i nunuan kuren la um taba aleng levempanga anan mukun avukat. At levengkot axap ut pas teren, i umsu mi laxampanga anan. ¹²Ap mo levengkot laxampanga mi lavanuet kangkedek, di umsu ro at levengkot anan atdi, la limixin di nemen at laxasigege kaana di umsu mi lososoro. ¹³Levengkot loklok tatao levempanga mi lavanuet kangkedek i umsu mi laxasipsip; to at lara sa i umsu mi laxam piao. Levempanga axap i nunuan aleng la limixin dip kup la dik pixan momo.

Salmo 66

Loxompixan Emi Asu Mi Lorotong Avukat

¹Nemi axap limixin, mina emi asu mi ne Moroa mi luxupkup momo!
²Minak pixan ti lox aurut laasen teren la mina tong asu leemi asu i nunuan aleng tin! ³Mina tong i ri ne Moroa xeretna, “Levempanga uk lox i, i nunuan aleng! Lolos taram i silok aleng, kuren la limixin munepen minu di xis tintiding to melamgo ram mi lanmarat. ⁴Limixin axap at lavatbung menemen di lotu saparav u; dik pixan emi asu saparav u, dik pixan emi asu ri laasen taram.”

⁵Ude nimi, la mina ven levempanga ne Moroa gak lox i; ni gak lok leveloklok sangsangu ren kantubu at limixin. ⁶Ni ga lox arepukus laras i ngan ta laxangka mesemes; lavalabat atnedik diga vas korop lavatdan sen silok mi lengkangkedek mene. Ap mo loxot maga lok momo mi mo lavanga ni ga lox i. ⁷Lixitkis amgomgo ren naba nemen amisik mi lolos teren, la ni i reven tatao levenep silok. La nemen uta ke xepe limixin tongtonga xepe dina lox asilok di mavana ren.

⁸Limixin at levennep silok axap, mina emi asu mi ne Moroa atnedik, la limixin dinang tonga leemi asu atnemi. ⁹Neni ga lok tatao lorooro atdik basinge lanu, la ni xopmen goxo ke limixin munepen midik gita sak tup midik. ¹⁰O Moroa, uga lok li nema at loklok tongpen; i ngan lisiliva laxao i an adatdar i; kerepmo ura lok

tong pen pam nema. ¹¹Uga ke nema la maga subu tup at lemet diga sep li rangais nama min la uga lok li levenaknixip mumuat pana at levenantuno nama. ¹²Uga ke xepe limixin munepen minema diga vas asi nama; magat pas keneng at laxao mi ladanut. Ketla nanga ura lok kaka nema uto at loxot loklox alipe ram.

¹³Nia anaba lok kaka levelaplavang ti kotos uto at loogu ram; anabam taba u mi levempanga nia aga xaape min tu. ¹⁴Nia anaba raba u mi levempanga nia aga tong i do anaba raba u min, at levenaleng nia aga nemen keneng at lumumuat. ¹⁵Anabam taba ru mi levesipsip, kusu ri xotos i ro at loxonin; anabaplavang mi levenbulumaxao remes la levenme, la losobu ren naba urut uto vana at lamavangkap.

¹⁶Nemi mi lok ngangao at ne Moroa, ude nimi, la mina ronga i na, la nia ana tong asu axap nom levempanga ni gak lox i ria. ¹⁷Agang teng tin ti loklok tooro; nia agak pixan emi asu min. ¹⁸Dola lorooro rak gi umsu mi laxakapmek, Leeme Silok gixo ronga rak. ¹⁹Ketla i ruturun tinotno do ne Moroa ira ronga vam ia; ira ronga res pam at lisingising tarak. ²⁰Nia a emi asu mi ne Moroa, atla ni xopmen nak sox sisixe lisingising tarak, kopla ni na rebeng alis labalamu lexen teren tia.

Salmo 67

Loxompixan Totong Avukat

¹Moróa, una belemumu nema la una lox anarong bok nema; una lox asuusu labalamu ram tinema, ²kusu limixin at lavatbung menemen axap dinabaklen lodoxoma ram, la kusu limixin at levenep silok dinabaklen i do u lox avukat la uk lox arooro limixin.

³O Moróa, naba lox avukat do limixin at levengkot axap dina emi asu minu; la i epovo rinotno do larabung mixin axap dina emi asu minu! ⁴Naba lox avukat do limixin at levenep silok axap dina sosoro la dinak pixan mi lomomo, atla nu u viila mumu loklok at limixin mi lodoxoma mokmokso la levelinga ruturun, la um gomgonga limixin at levenep silok at lavatbung menemen. ⁵O Moróa, naba lox avukat bok do limixin dina emi asu minu; i epovo rinotno do larabung mixin axap dina emi asu minu! ⁶Laxangka ira lox asu vam leventaamang mukun teren; Moróa, ni ne Moróa atnedik ira lox anarong pam dik. ⁷Moróa ira lox anarong pam dik, la naba lox avukat do limixin at levengkot axap dina xip aurut laasen teren.

Salmo 68

Loxompixan Ti Lox Asilok Laasen At Ne Moróa

¹Moróa i katu kaxat la ik sax epeseves limixin munepen min. Nedi dik lox angtungun tin, dik sixiro atla ik sak tup midi. ²I lok ngan lamanman

it mas kepe lusuxa, la i xala xepe di; i lok ngan levelumlut misiu i sonao at liplivi kao. Kerepmo la limixin kapmek di seeve ro melamgo at ne Moroa. ³Ketla limixin mokmokso dik lek la di momo at lemeren ne Moroa; dik lok momo la dip kup mi lososoro.

⁴Minak pixan ti ne Moroa, minak pixan emi asu mi laasen teren; mina gagas li langas tin mo it kis pana at loxontakabu. Laasen teren ne Leeme Silok. Mina lok momo ro melamgo ren! ⁵Morua i nemen to xeneng at loogu laplavang teren i xaala; ni i kok lubangkurun la ik lok tatao lubang naa rixin, lavatlok atdi diga met pam. ⁶Ni im taba lavanat mangan mi limixin kusu dina nemen eburu min, la i sasar asepmus asu nedi limixin di nemen at loxokoxo xusu dina momo; ketla nedi dixo etu ebelen min, dinaba nemen at lenep kangka i vat dexes.

⁷O Moroa, at levenaleng ugam gomgo ri limixin taram, la migat pas korop lamatbin, ⁸lavatbung menemen axap gangnengne, la lamavangkap ga sobang asu lebet, mumu lovtopot at ne Moroa boro at lakaana Sinai, lovtopot at ne Moroa me Israel. ⁹Nenu uga lox asu larabet nunuan ti lox amonok amu laxangka i vat dexes. ¹⁰Limixin taram diga lok lemenemen atnedi go, la keneng at luvukat taram uga lox epovo lavakpakes at limixin banbalo.

¹¹Leeme Silok ga raba asu levelinga, la buaang lavakin diga etong aonon na levelinga xeretna, ¹²“Lavaorong mi limixin esep atnedi dira sixiro!” Lavakin to xolonu diga episa levempanga, limixin esep diga esep kaka i. ¹³Mo levempanga ga ngan ta levempoovo amno, diga moi di mi lisiliva, lempapa atdi gam games aleng mi leven gol avukat. (Tila leventaba atnemi diga lipe ro xeneng at loroboro at lubangtipsip at laaleng esep?) ¹⁴Ap mo laaleng, Lanaraavuk ne Moroa ga sax epeseves lavaorong to at lavattaavut Salmon, ni ga lox asi lusugao mumudut (snow) ri subu ap mo loxot.

¹⁵Nu lavattavut Basan u silok aleng tino, nu lavattaavut mi laxampatlak solo ram! ¹⁶Nu lavattaavut mi laxampatlak solo, tila uk milik angtungun lavattaavut ne Moroa ga lok katling i do rin ti nemen, la u doma i do ni lavanga gamasa? Leeme Silok naba nemen amisik ap mo lavattaavut. ¹⁷Leeme Silok ga rupert boro Sinai eburu mi laxanabin sangsangaun kobot laxang karis esep lolos teren, la ni ga vubeles at loxot kaala ren. ¹⁸Ni ga lam kaka buaang limixin kokoxo la ga urut eburu midi uto vana at lakaana Saion. Ni ga ruuna ka leventamtaba atdi mo limixin tongtonga xepe diga esev eburu min. Leeme silok ne Moroa naba nemen go.

¹⁹Leemi asu ri Leeme Silok, neni ip kip levenmumuat atnedik at levenaleng getgesara. Neni ne Moroa ik lox asepsu dik. ²⁰Morua atnedik ni ne Moroa ik lox asepsu limixin; ni Leeme Silok, Leeme Silok atnedik la ni ik lox asepsu dik basenge lanmet.

²¹Moroa naba rit povorok tuturun tinotno levempatlak at limixin munepen min; lempatlak atnedi di xopara na xap at leveloklok i bilinga. ²²Leeme Silok ga tong i xeretna, “Nia anaba lok kaka amlong limixin munepen minemi boro at lengkot axap; keke i do di nemen to at lempat kaana Basan kopla to xa maxopok at lisimaramain, nia anaba lok kaka amlong nedu, ²³kusu minabat pas keneng at lada atnedi la lubungman atnemi dinaba dem ka solo laxanda ri lox axap lavavara atdi.

²⁴O Moroa, limixin axap di reven u, ut pas to melamgo at limixin taram melemu at loxonaleng u sak tup mi limixin munepen taram ap mo leesep. O Moroa, nenu Loorong Silok ut pas beles uto xeneng at loogu xaala ram. ²⁵Nedi dik pixan, dit pas to melamgo; nedi dik sak gita, dit pas to melemu; la laxaalik dit pas to xantubu, dik sak leven tambarin. ²⁶Ata emi asu mi ne Moroa ro xeneng at lovtopot buru at limixin teren; nemi livipisik li at ne Jakop, mina emi asu mi Leeme Silok! ²⁷Loxon abungmixin at ne Benjamin dimgomgo, nedi di xakalik ti levenabung mixelin axap; melemu ren lubung amgomgo at leme Juda eburu mi loxon binam tadi atnedi, la lubung amgomgo me Sebulon la Napitali di mumupit to melemu.

²⁸O Moroa, una lox asuusu lolos taram, nom lolos uga ru min tinema, ²⁹una lox asuusu lolos taram boro xa at loogu laplavang taram to Jerusalem, ap mo loxot lavaorong silok dim taba u mi leventamtaba ve. ³⁰Una vaase sok leme Isip; nedi di lok ngan lavatpanga sio mi lavanuet kangkedek i nemen to at lisigege dan; una vaase sok limixin at levenep silok di lok ngan laxanbulumaxao remes mi laxannat bulumaxao, se dinaba xis tiktikbu ro malmgo ram la dina lok letaba ru mi levesiliva. Una sak epeseves mo limixin di vavara esep amisik! ³¹Luvuttadi rutu katling dinaba vot boro Isip; leme Itiopia dinaba xip aurut tikngen mi levesingising atnedi ri ne Moroa. ³²Nemi leventaba boro at levenep silok petpes at lavatbung menemen, mina vixan mi leemi asu saparap ne Moroa. Mina vixan emi asu saparap Leeme Silok,

³³mo it pas tangtagap de vana at lamavangkap, mo lamavangkap me ganoxa at lereot. Mina ronga levelinga ren i lulung silok boro vana at laxalibet. ³⁴Tong asu lolos at ne Moroa i silok aleng, la im gomgonga mavana leme Israel. I lox asuusu lolos teren tovana at lamavangkap. ³⁵Moroa me Israel i vas su boro xeneng at loogu xaala ren, la limixin dinaba lingun teren! Neni im taba lolos ti limixin teren. Leemi asu ri ne Moroa!

Salmo 69

Lerengteng Ti Loklok Tooro

¹O Moroa, una lox asepsu ia! Ladan na ira urut pam ti laxaka rak. ²Nia na ara dong tup silatla nga at lapke, la kopmen toxongkangka lolos ti tu

ren; nia nga na xeneng at ladan i si aleng, la larapaxanao i lok do nak mir axong ia. ³Laxaka rak ira xo axap mi luxupkup ti loklok tooro, luxukung tarak ira songot. Luxatli rak ira ung mi lerengteng, nia a ngangais ti loklok tooro ram. ⁴Nedi nom dik lox angtungun gamasa ria, di umsu aleng tino polo leexes at levengkabinim at lavatlak tarak. Limixin munepen minia di xaxarang taba ia; di lolos aleng la di lok do dina sev amer ia. Di xaxarang taba ia do aga xip pilo xaka lempanga nia agoxo xip pilo xaka i; la di tong i ria do ana raba amlong i. ⁵O Moroa, libilinga rak kopmen na nemen alipe ram, nu uklen larangtangu rak.

⁶O Leeme Silok, nenu Loorong Avolo la Lanaraavuk. Nemen gat uta ke xepe limixin nuunu ram dina mangan mu loklok tarak. Moroa me Israel, nemen gat uta ke mo loklok tarak na sox asu lainmangan tinedi di lotu ruturun saparav u. ⁷Limixin munepen minia di paase aksaksa ria mumu mun u la ara umsu mi lainmangan. ⁸Luvutnetak di reven ia ngan laradi votpot mun, la a lok ngan laradi me xadiong keneng at lixitkis koetemen atnema. ⁹Lodoxoma rak i tu at loogu laplavang taram; i anan tos keneng tarak ngan ta laxao; levempapaase aksaksa dik lox i ru, im subu mavana rak. ¹⁰Ak lox asi mun ia la aran mun an, la limixin dirak lox aksaksa ria. ¹¹Ang sigaara mi levesingsigaara rik saxaanu, la ding longon tarak. ¹²Di paase mumu ia ro xeneng at larangas silok, la limixin inin tangtangu di voovo lengkompixan mumu ia.

¹³Ketla nenia, Leeme Silok, anaba ngising parav u; Moroa, unaba ronga ia at loxonaleng axa nenu una soxolik ka i. Una vaase porang ia atla labalamu lexen taram i silok aleng la unaba lox epovo laxakaape ram tik lox asepsu limixin taram. ¹⁴Una lox asepsu ia kusu anoxo dong si rino ukopok at lapke; una kubak pe ia basinge lavamunepen tarak, la una lox asepsu ia basinge lisimaramain. ¹⁵Uguta ke xepe gat ladanut na vaxat ka ia; uguta ke xepe ia la ana xong to xeneng at lisimaramain, kopla ana dong tup to xeneng at lamaut. ¹⁶Leeme Silok, una ronga res tarak mi luvukat at labalamu lexen taram; una repukus mu ia mi lebelemulus silok taram! ¹⁷Uguta lipe axa u basinge ia lasaxaruki ram; nia na ak lok at langsung lumumuat, la una ronga res tarak! ¹⁸Una vot parav ia la una lox asepsu ia; una lox asepmus ia basinge lavamunepen tarak.

¹⁹Uklen i do di paase aksaksa ria, la dixok lok ngangao rak la dirak lox abaava ia; u ven axap di na lavamunepen tarak. ²⁰Levempapaase aksaksa atnedi ira ba koxorop pam leveeve rak; lavarampen abulubun ta ia na. Aga vara tara xusu ri loklok amenemen ia, ketla goxopmen tara go ga lox amenemen ia. ²¹At loxonaleng aga roxo, diga raba ia mi lasak; at loxonaleng aga minu, diga raba ia mi laxadan mamao.

²²Keke levenanan atdi nabak paxaru kaxat lasaxaek; la keke levempeluxa kaala atnedi naba lox ekarakat di kusu dina subu tup at leeteke. ²³Una sep di mi lemeramain! Unak lox amolos amisik lempat sintun atdi! ²⁴Una soobang asu

lebelemamao ram mavana atnedi; keke lebelemamao mokmokso ram na sak pava di. ²⁵Keke lara menemen atnedi nak midi kixinak tino; la teta noxo roo su go xeneng at laraugu kadis atdi. ²⁶Di lox asongot nedi no nenu uga lox aleeng nedi; la di paase mumu nedi no nenu uga sev abi nedi. ²⁷Una malagan li xatling leveloklok kakapmek axap atnedi la uguta ke avolo di xusu dina ruuna xaka toxot at loklok arooro ram. ²⁸Una lok pes levenasen atnedi ro at lubuk at lorooro; uguta malagan li gat levenasen atdi eburu mi levenasen at limixin taram.

²⁹Ketla nia lampen abulubun, ak lok keneng at losongsongot. O Moroa, una lox aurut ia la una lox asepsu ia basinge na levenmumuat!

³⁰Anaba emi asu mi ne Moroa mi loxompixan; anaba paase asu laasen silok teren at loxonaleng ana tong avukat tin.

³¹Neni na, naba lox amomo rinotno Leeme Silok la naba volo mo loklok tim taba mi levenbulumaxao, la naba volo bok laplavang tin mi lavat bulumaxao temes. ³²At loxonaleng limixin baava dina ven i na, dinabak lek aleng; la nedi di ngising parap ne Moroa, dinaba epang aru kantubu atnedi xa. ³³Leeme Silok ing tonga res atnedi dik pakes la ixom domampe limixin teren dik lok at loxokoxo.

³⁴O laxalibet mi lavatbung menemen, mina emi asu mi ne Moroa, la laras bok mi lempanga xeneng teren, mina emi asu min. ³⁵Neni naba lox asepsu leme Jerusalem basinge lavamunepen atdi la na vaxaru amlong levenmenemen silok at lenep Juda. Limixin teren dinaba ruuna ka mo lenep kangka la dinaba nemen amisik go. ³⁶Livipisik li at limixin axa ren dinaba vesoxun mun teren, la nedi ua di balamu i, dinaba nemen amisik go.

Salmo 70

Lisingising Ti Loklok Tooro

¹Moraa, lox asepsu ia! Leeme Silok, lok tooro soso nga ia! ²Keke lodoxoma ekarakat na suxuna nedi di lok do dina sev amer ia; la una sak tup midi. Keke leklek atnedi dik lek mumu levenmumuat tarak, na repukus ti lainmangan.

³Una xal xepe nedi di lok kalise ia, kusu dinaba mangan. ⁴Naba lox avukat do nedi di vot parav u, dina momo la dinaklek. Naba lox avukat do nedi di tong avukat ti loklox arooro ram, dina paase amisik keretna, “Moraa i silok aleng!”

⁵O Moroa, nenia na ara molos ta la arat kis banbalo de. Soso mun, una vot pasa ia. Nenu laradi loklox arooro la Leeme Silok tarak. Lox asepsu soso ia!

Salmo 71

Lisingising At Laradi Amgomgo

¹Leeme Silok, a vot parav u mi lisingising kusu una lox aratao ia basinge lavamunepen tarak; uguta ke xepe di, dina sak tup minia!

²Nenu laradi mokmokso, kuren la una lok tooro ia la una lox asu ia at na lumumuat. Una rongga ia la una lox asepsu ia basinge di! ³Una lok ngan lomoo vungpung tia, la loogu lolos la matmatkun ti lok tatao ia. Nenu loroboro rak la nenia ak lok alipe ro xeneng taram. ⁴Lomoroa rak, una lox asepsu ia basinge limixin kapmek, la basinge lolos at limixin kapmek dik lok metarauat.

⁵Leeme Silok. Nenu Loorong Avolo. Una rongga res tarak atla a doma sogo nga na ram. Ga ruka i at laau rak, agara nuunu saga vam taram. ⁶Agara sep sogo vam taram at mo axap laxanmaares nia aga rooro ren; la tuka i at laaleng ne naga ga visix ia, uga kok avukar ia. Anaba emi asu amisik minu. ⁷Lorooro rak ga lok ngan lampoovo avukat ti buang nedi limixin diga mu asu i, atla nenu uga lok ngan loroboro lolos ga tu xangkan ia. ⁸Kuren la a emi asu amisik minu at levenaleng axap, la a paase asu lununuan taram. ⁹Uguta ven abulubun kepe ia at na loxonaleng nenia a sioxo nga; la uguta doxoma xepe ia mumu i do ara ventaae nga. ¹⁰Lavamunepen tarak di vara i do dina sev amer ia; di vepaase nemnem levendoxoma ri levempanga diba lox i ria. ¹¹Di paase xeretna do, “Moroa ira doxoma xepe vam i; ata mu arup ta i la ata lox epovo lodoxoma atnedik; kopmen bok ba teta go xusu naba lok tooro i.” ¹²O Moroa. Uguta nemen paxalom basinge ia. Lomoroa rak, una lok kepe soso na lumumuat tarak! ¹³Una sak tup midi, la una sele utut nedi ua di lok do dina sev ia. La keke nedi di lok do dina lox asongor ia, dina mangan la dina baava.

¹⁴Anabam doma saga amisik taram. Anaba emi asu amisik minu la leemi asu rak tu naba nemen epasum. ¹⁵Anaba tonga asu luvukat taram. La at levenaleng axap, anaba paase mumu loklox arooro ram, la keke i do axoklen ausuv i. ¹⁶Anabat pas keneng at lolos at Leeme Silok ne Moroa. Anaba paase asu kusuk mun mo luvukat taram to at lemeren limixin axap. ¹⁷Ugarak lox ase vam ia, tuka axa i at levenmaares nia aga aau ren, la nia move a paase mumu leveloklok maraanu ram. ¹⁸Ana nga ara sioxo la levengkabinim at lavatlak tarak irak sokso. O Moroa, uguta doxoma xepe ia. Una su aru ia at levenaleng ana paase asu lolos silok taram tinedi lavaola axap mo dibap tavasu.

¹⁹O Moroa. Lempanga axap at na lavatbung menemen kopok la lempanga axap toxun pana at laxalibet, ik lox asuusu loklok taram in manton tino. Ugara lok pam levempanga silok; kuren la kopmen teta go na lok ngan u. ²⁰Ugara li vam levenekarakat mi levesongsongot mavana rak, ketla unaba suxa kun ia mi lolos taram; unaba lox asepsu ia basinge lamaut. ²¹Unaba lox asilox ia polo mo levenmaares avot tarak; unaba lox amamana bok ba lodoxoma rak.

²²Anaba emi asu ruturun minu mi loxontaaleng; Moroa rak, anaba emi asu mi luruturun taram. Anabap sep levengkom pixan tu ro at loxontaaleng tarak. Nenu Leeme Melemelengan me Israel. ²³Anabap kup

mi lososoro ru at loxonaleng anak sak loxontaaleng; anabak pixan mi lorooro axap tarak, atla ugara lox asepsu vam ia. ²⁴At levenaleng axap anaba paase asu loklok manmanton taram, atla ugara sev asi vam nedi ua diga vara i do dina lok kapmex ia; uga sak tup midi la nanga dira baava.

Salmo 72

Lisingising ti Loorong

¹O Moroa, una anasa loorong kusu ni naba viila mumu loklok at limixin mi lodoxoma mokmokso i ngan mun taram. Una lox ase i mi levelinga loklox akmokso ram, ²kusu neni naba viila mumu avukat limixin taram at levenaleng neni naba nemen ngan lamgomgo atnedi; la neni nabam gongonga nedi luvuttadi ua di baava. Neni naba lox i na mi levelinga mokmokso. ³La limixin at lenep kangka ren naba ngasang kobot; lemenemen teren naba umsu mi loklok manmanton. ⁴Loorong naba ila leveloklok at luvuttadi banbalo mi lodoxoma raturun. Neni naba lok tooro luvuttadi vakpakes la nat pas asi luvuttadi loklok papavas.

⁵Limixin taram dinaba lotu saparap amisix u at levenaleng laxangking i soso, la at levenaleng lagaaling im taba asu lososo ren ti na loola la ti mo bok lavaola dibap tavas. ⁶Loorong naba lok ngan larakabu ri leven taamang la naba ngan bok levengkaramis dan im subu ro vana at laxangka. ⁷Loklok manmanton naba sisilok lolos kantubu at limixin at ne Moroa keneng at levenaleng axap at lorooro ren; la dinaba ngasang kobot amisik kerekngan lagaaling im taba amixik laxasep.

⁸Lixitkis amgomgo ren naba ruka i ro at lenep tas meo, la naba se ro at lenep tas meo, ruka i ro Euprates la naba se at latnese at lavatbung menemen. ⁹Limixin boro at lamatbin dinaba tu tiktikbu mi lempatgulom atdi ro melamgo ren; la lavamunepen teren dinaba subu midi gamasa mi lenbantuxu atnedi uto xopok at laxangka ri lok ngangao ren. ¹⁰Lavaorong me Spein la boro at levesoxan bok, dinabak lok leventamtaba rin.

Lavaorong me Sheba la Seba dinabam taba i mi leventamtaba. ¹¹Lavaorong axap dinabat kis tiktikbu ro melamgo ren. Limixin at laranep silok axap dinaba gugu taba i.

¹²Neni naba lox asepsu luvuttadi banbalo ua di lotu saparav i basinge lorooro etaba, la nedi bok ua dik pakes la lavapen abulubun. ¹³Neni naba belemumu nedi dixo ruuna lolos la di banbalo. Neni naba lox asepsu limixin pakpakes basinge lanmet. ¹⁴Neni naba lox asepsu di basinge limixin loklok papavas, limixin mukmusak, la limixin sepsep tadi. Lorooro atnedi i lok ngan lavanga matmatkun tin. ¹⁵Naba lox avukat do loorong na rooro amisik! Keke limixin dibam taba i mi levengol boro

Sheba; la keneng at levesingising at limixin, dinaba tong ke amisik teren at levenaleng axap. La loklox anarong at ne Moroa naba nemen amisik pana ren! ¹⁶Keke na laxangka na umsu mi laxam piao; la lengkong kaana nam tebonot pe mi levempieve anan, la dinaba pisik solo ngan leventauna ro Lebanon. Keke mo laramenemen silok teren na umsu mi limixin, la naba lok ngan laxangka i umsu mi levempivilis. ¹⁷Limixin di noxo domampe laasen at loorong at levenaleng axap i tu melamgo; la keke mo lakleklen at limixin mumu i naba nemen amisik ngan laxangking. La limixin at lanep silok bok dinaba ngising ne Moroa ri lox anarong nedi ngan ni gara lox anarong pam loorong.

¹⁸Leemi asu ri Leeme Silok ne Moroa me Israel! Neni xusuk mun ik lok mo levempanga maraanu. ¹⁹Leemi asu amisik la kopmen tekavaxap teren ti laasen melemelengan teren! Keke lisisinang teren na suxuna axap lavatbung menemen. Tuturun! Tuturun! ²⁰Neni na laxavaxap at levesingising at ne Devit, lamdak at ne Jesi.

Salmo 73

Levelinga Mokmokso At Ne Moroa

¹Morua ga vukat tuturun tinotno ri leme Israel, la tinedi ua levempieve atnedi i kasep.

²Ketla nenia, aga auret tinotno xusu lesepep sogo rak at ne Moroa gita xap; la lunuunu rak gita subu; ³atla nenia ga bele mumuat tinedi digak lox aso, la at levenaleng aga reven levempanga gak sixit avukat tinedi limixin kapmek.

⁴Dixo suma levesongsongot; ketla di lolos la dixok meres. ⁵Dixong songot ngan lentaba luvuttadi ding songot kuren; Dixon tuuna bok tevenekarakat ngan leventa vetpes din tuuna i. ⁶Kuren la ding sigaara mi loklox aso i ngan levenonga di vonga i at lengkaka atdi, la ding siga bok leemusak mi leesep i ngan lengkontamon babaalom di vitis korop di min; ⁷lempatpeeve atnedi ip kip soobang asu laxapmek, la levendoxoma atnedi ik lox angtang tinotno mi levendoxoma alipe xapmek. ⁸Ding longon aksaksa ri limixin la di paase mumu levempanga xapmek. Dik lox aso la dik lox agagas li leventaangas kusu rik lox abaava lentaba vetpes. ⁹Di paase vupu ri ne Moroa mo at lemenemen teren, la di paase asu avut lemet ti limixin at lavatbung menemen. ¹⁰Kuren la limixin dinaba repukus ti mu asu di la di nuunu lolos tinotno at lempanga di paase i. ¹¹Mo limixin kapmek di tong i do, "Ne Moroa noxoklen i; la Leeme Avolo noxo long terek nedik."

¹²Limixin kapmek dik lok kerepmo. Di ruuna laxampanga solo la move dirak lok ka panga bok. ¹³Kereva ba nenia, aga kok avukat gamasa mene

lorooro rak, la agoxo lok laxapmek? ¹⁴O Moroa, uga lox asongot solo ia at laxanaleng axap. At leven maxantamak amisik ugap sev asongor ia. ¹⁵Do nia agita paase asu tevelinga vetpes kerekngan mo limixin kapmek, agitaba lox asuusu i do nenia xopmen lara atnedi limixin taram. ¹⁶Aga lok tong pen i do ana doxoma mumu na lumumuat, ketla ga lolos tinotno ria ri lox akmokso i, ¹⁷ga se at loxonaleng aga beles uto at loogu laplavang taram. Go ba i, aga long lenget ka ba i do lavanga salai mo naba vot atnedi limixin kapmek.

¹⁸Unaba lok li di ro at lenep i gagai, la unaba lok neddi diba subu tup at leeteke! ¹⁹Di naba pubeles soso mun at lesorexoles; la laxavaxap atnedi, dinabap tava si rinotno uto xopok at loxot pis. ²⁰Dinabak lok ngan lapnobo i xap basinge lodoxoma at laradi at len maxantamak. La kerepmo bok at loxonaleng nenu, Leeme Silok, una beleku kaxat, dinaba sonao.

²¹At levenaleng levendoxoma rak ga soogong tu la labalak ga mamao ru; ²²agang tangku ngan lavanga mi lavanuet kangkedek. A goxo xasep at lodoxoma ram.

²³Ketla nanga a nemen saparap amisix u, la um tebeng lakngak tino. ²⁴Um lam ase ia mi levenanasa ram la at laxavaxap teren, unaba siam ka ia mi leemi asu ram tia. ²⁵Nege bok ba nia a ruuna ka i ro at laxalibet? Nenu xusuk mun. At na levenaleng nenia a ruuna u, a vara bok ba tavanga sala i de at lavatbung menemen? ²⁶Do lodoxoma rak la labantuxu rak na molos, ne Moroa neni lolos tarak. Neni xusuk mun nia ak pakes tin.

²⁷Nedi di doxoma xepe u, ne Moroa, dinaba seeve. Unaba sele utut neddi di babala vukpux u mi lorooro atnedi. ²⁸Ketla nenia, i lox avukat tinotno atla a nemen saparap ne Moroa, ni Lurutu See Pa rak. Neni Leme Silok, Loorong Avolo. La i lox avukat tinotno bok mo do a paase asu lempanga axap neni gara lok pam i!

Salmo 74

Lisingising Ti Lox Asepmus Leme Israel

¹O Moroa. Ua lavasuun teren la u doxoma xepe nema xeretna? Kereva, lebelemamao ram ti limixin akmokso ram naba nemen amisik ta, la noxo xap? ²Una doma limixin taram mo nenu uga soxolik ka axa di gano xusu neddi ataram, la neddi ua uga lam asu ka di at loxokoxo kusu diba ravasu ngan lubangmixin akmokso ram. Una doxoma lakaana Saion, no nenu uga nemen bok be ve. ³Una vas mavana at loogu laplavang taram ga rem utut; lavamunepen atnema digara sele utut axap pam lempanga ro xeneng teren.

⁴Lavamunepen taram digap kup silok tinotno mi lomomo ro xeneng at loogu laplavang taram. Diga lox aurut leven tamon i ru katling lenep

silok atnedi, i ngan lampoovo do, nedi diga sak tup minema la diga ruuna ka loogu laplavang.

⁵Diga esep ngan luvuttadi ratara una diga tara asi laxanuna mi levenmatao atdi. ⁶Diga tit povorok levengkon una diga xovok i at levengkot kitkis, levenora anan, la at laramusaragu mi levenasop la lempatmatao silok atdi. ⁷Diga ut tereve xepe loogu laplavang taram la diga song arup laxao ren. Diga lox amexexe rinotno loxot kaala ua limixin diga lotu saporav u. ⁸Diga lok do dina vas amdamda axap nema; la diga kotos asi lengkot axap i xaala at na lenep kangka. ⁹Ma xopmen na ven bok ba tempanga abis. Kopmen ta teputadi vapaase ali go dik lok, la kopmen teta naklen i do na lumumuat naba nemen at lavanisa maares axap.

¹⁰O Moroa, naba vanisa maares mo na lavamunepen atnema dibang longon sese u? Kereva, diba paase vupu amisik ta ri laasen taram la kopmen tekavaxap teren? ¹¹Ua lavasuun teren la u ronga xepe ri lok tooro nema? Tila ba uk lok li lukngam to melemu ram?

¹²O Moroa, ugarat kis orong silok pam tinema, tu ka axa i at lurutu kaxat at lubung mixin me Israel, la buaang laxanaleng ugak lox asepsu vam nema at levenmumuat. ¹³Uga lok langas to at laras mi lolos silok taram, la uga tit povorok lempatlak at laxampanga silok boro xeneng at laras. ¹⁴Uga rit povorok lempatlak at lavatpanga silok ne Levietan, la uga raba lempanga mi lavanuet kangkedek no at lamatbin mi labantuxu ren, tidi ri anan. ¹⁵Uga lok levempuuvut dan mi levendan lixilik digara sen bok ba; la uga lox ames lempatdan sen silok. ¹⁶Uga rudum li laaleng kangking, la laxanimin; uga vaxaxis li laxangking mi lagaaling at luxot atdu. ¹⁷Uga lok li latnese at na lavatbung menemen; uga lok lamaares mi laavat.

¹⁸Ketla, Leeme Silok tarak, unaklen i do lavamunepen taram ding longon sese u, atla diplavang ti levenmoroa xaxarang, kuren la dik sok tixirixes u. ¹⁹Uguta doxoma xepe limixin axap taram; di lok ngan mun limixin pentaae; la uguta ke xepe di kusu dina vubeles at longlong kuxurung at lavamunepen atdi. Uguta domampe limixin taram mo dim suma leveloklok asongot. ²⁰Una doma laxakaape uga lox i eburu minema kusu una lok tatao nama. Levenekarakat mo ik lok at lengkon meseluk main axap at na lavatkangka. ²¹Uguta ke xepe luvuttadi baava kusu dina mangan; una lok tooro mo luvuttadi banbalo mi lavamun panga xusu diba emi asu minu.

²²O Moroa, una beleku kaxat, la una tu xa at lenep taram mumu na levenmumuat atnema. Una doxoma box i do limixin tongtonga xepe ding longon sese amisix u at laxanaleng axap. ²³La uguta domampe leven aknuxup belemamao at lavamunepen taram; mo di ganggang linga amisik taram.

Salmo 75

Moroa Neni Laradi Rongtonga Linga

¹O Moroa, ma tong avukat tu, ma tong avukat tu! Ma tong aonon lisisilok taram atla u silok aleng, la ma tong aonon bok levempanga avukat ugara lok pam i.

²Moroa ga vaase xeretna, “Ara vit li vam laaleng ti leete, kusu anaba ila loklok at limixin la a noxo bala vukpuk di. ³Keke i do levempanga axap di ruuna lorooro, dina dede mi lanmarat, la lavatbung menemen nang nengne, ketla anabak lox aru lolos laamkumkun at na lavatkangka. ⁴A paase limixin tongtonga xepe xusu dinak lok ngangao la di noxo simi aurut di. ⁵A paase di do, “Na xap ta di rik lox aru axa di la na xap bok tit las di.”

⁶Mo laradi rim gonga leete, noxo ravasu do boronak kopla borois, la noxo ravasu do borou xopla boroxun. ⁷Neni axa ne Moroa naba ila loklok at limixin la ni naba riki xepe lentaba la na vuxaxis avukat lentaba. ⁸Leeme Silok im tebeng lavanga runtu dan to at lekngen, la i umsu mi laxadan vaen at lebelemamao ren. Neni i sobang asu i, la limixin kapmek di inin i. Di inin asi rinotno i se at lengkootu avit. ⁹Ketla nenia noxo xap at lavapaase asu levelinga mumu Lomoroa at ne Jakop kopla anak pixan emi asu rin. ¹⁰Neni naba ba koxorop lolos at limixin kapmek, ketla lolos atnedi di ruuna loklok mokmokso naba sisilok.

Salmo 76

Moroa Laradi Vatpas Asi

¹Limixin to Juda dikleklen ne Moroa; la dik lok ngangao aleng at laasen teren to Israel. ²I ruuna langkolonu ro Jerusalem; la neni i nemen to at loxongkaana Saion. ³Neni ga sak pirivit levesoosoo at laradi munepen teren ap mo loxot, la ga sak pirivit bok larapenban mi lemparise esep, lempanga esep axap bok. Na levelinga i raturun tinotno.

⁴O Moroa, u sisixam aleng. Laasen silok, neni ataram kusuk mun, at loxonaleng ugamlong boro vana at levengkaana, ap mo loxot ua uga sev asi lavamunepen taram. ⁵Mo limixin esep lolos, limixin taram diga sak paxat ka axap lempanga atdi, la monga dira vunga ngan luvuttadi met; levelolos atnedi mi lakleklen atdi ri vesep ga ravasu ngan lempanga gamasa. ⁶O Moroa at ne Jakop, at loxonaleng uga paase lolos tinedi, lempaaros eburu mi luvuttadi ro vana ren digam subu ri lanmet. ⁷Ketla nenu Leeme Silok, limixin axap dik marat taram. Teta ixo epovo xusu na ru tangarang u at loxonaleng u belemamao. ⁸To vana at laxalibet uga tong axasep limixin axap mi levelinga loklox akmokso ram; la limixin at

lavatbung menemen diga marat, kuren la mo digat kis sixim mun; ⁹atla uga ru kaxat kusu ri vaase asu lempapaase ramtaba ina ram, la kusu ri lox aroo limixin baava de at lavatbung menemen. ¹⁰Lebelemamao at limixin at lavatbung menemen ik lox asuusu mun leemi asu silok tu. Nedi di roo su at levenesep, dik lok katling amisik levenaleng silok taram.

¹¹Nemi mina raba Leeme Silok, neni ne Moroa atnemi mi levempanga no migapliplis i min; nemi levenabung mixin petpes mik lok auret leme Israel, minaba taba i mi leventamtaba atnemi. Moroa ik lok limixin axap kusu dinak marat teren. ¹²Neni ik lox asi laxamdak at lavaorong silok dit las di, la lebelemamao ren ik lox amarat aleng tinotno lavaorong.

Salmo 77

Loklox Amamana Xeneng At Levenaleng Songsongot

¹Ang teng silok ti ne Moroa; ang teng silok kusu neni nang tonga ia. ²Angising ti Leeme Silok keneng at levenaleng at levenmumuat; la at levenaleng kanimin axap, angosong aurut mi lukngak keneng at levesingising tarak, ketla lodoxoma rak kopmen nat kis bus.

³At lengkonalleng amdoma mumu ne Moroa, lamamas tarak ixot lottu saga la arat mas gaaga. La mo do anam doma mumu levelinga ren, arak lox abulubun bok tarak. ⁴Neni ik lox ia ara tuang aan at lengkanimin. Ak lok bukbulu aleng, kuren la axo epovo ri vaase tekolanga. ⁵Am doma levenaleng ira vovolo vam la aram doma su bok at levenmaares me gano axa. ⁶At laaleng kanimin axap, a pubeles at levendoxoma lolos aleng; am doma mumu u ne Moroa, la ara susue bok axa ia xeretna;

⁷“Kereva, Leeme Silok naba lox abulubun kepe amisik ta nema? Kopla neni noxo momo bok ba minema? ⁸Kereva, labalamu ren tinema ira xap ta kopla ira los polo vam laxakaape ren? ⁹Kereva, Moroa ira domampe vam i xusu neni na belemumu limixin teren? Kopla lebelemamao ren na ira soxun asu vam lebelemumu ren?”

¹⁰Melemu aga vaase xeretna, “Lara lavanga i lox abulu ia xeretna, neni na ne Moroa ixo lok tatao bok ba nedik.” ¹¹Ketla nenia anabam doma amisik leven gugu silok taram ugak lox i, Leeme Silok. Anabam doma su la ana paase asu levempanga avukat no nenu ugarak lok pam i ga migomgo. ¹²Anabam doma mumu mo levempanga axap nenu ugarak lok pam i. Anaba paase eburu minu mumu na levempanga lolos nenu uga lox i.

¹³O Moroa, leven gugu axap nenu uk lox i, ik mokso aleng tinotno. Kopmen bok ba temoroa go i silok ngan u. ¹⁴Nenu vam nom ne Moroa uk lok lempanga sangsangu; la ugak lox asuusu lolos silok taram keneng at laranep silok axap. ¹⁵La mumu mun mo lolos taram, uga lox epovo i

xusu una lox asepmus limixin taram, nedi livipisik li at ne Jakop la at ne Josep.

¹⁶At loxonaleng laradan mi laras diga reven u, ne Moroa, digak marat; la lisimaramain at laras ga dede. ¹⁷Lempat main bet ga soobang asu larakabu; la leretepaavat boro vana at laxalibet, la lavanga ga mam su boro at lara meramanman axap. ¹⁸Lerete paavat at lengkon takabu ram ga teposok su, la lososo at lavanga ga mam ga soso axasep lavatbung menemen; la lavatbung menemen ga dede la gangne. ¹⁹Ugat pas kantubu at loxontas; la uga xoxorop loxontas main, ketla maxo epovo ri ven kaka lenain at luxangkedek taram. ²⁰Ugam lam limixin taram ga ngan laradi loklok tatao sipsip, la uga lok li ne Moses mi ne Aron kusu dunam gomgonga limixin taram.

Salmo 78

Morua Eburu Mi Limixin Teren

¹Limixin tarak, minang tonga ka i na levenanasa rak, la minam doma mumu lempanga nia ana paase i. ²Anaba paase mi levempapaase dokdoxoma kusu ana re musumus levempanga megano ua gak lox alipe. ³Levelinga ua tagara ronga vam i la tagaklen i, mo levelinga ua luvuttemen dik diga tong i ridik. ⁴Atoxo lok pepe i na at laxamdak mi laxaalik atnedik; ataba tere i ri mo lavaola dibap tavasuu melemu mumu mo lolos at Leeme Silok, la leven guguu silok teren la levempanga maraanu ua neni gara lok pam i. ⁵Neni ga raba leventaangas mokmokso ri limixin me Israel la Lenavolo ri livipisik li at ne Jakop. Neni ga paase alolos i ri lavalabat atnedik kusu dinaba anasa laxamdak mi laxaalik atnedi mi Lenavolo, ⁶kusu mo lavaola melemu dinabakleklen i la dinaba tere avolo box i ri luvutnitna di. ⁷La mumu mun na langas, dinaba nuunu saga rinotno at ne Moroa la dinoxom domampe lempanga neni garak lok pam i, ketla diba mumu asu amisik Lenavolo ren. ⁸Dinoxok lok ngan lavalabat atnedi ua diga ganggang linga, la digang tonga xepe amisik teren; la lesepep sogo atnedi ri ne Moroa goxo lolos la di goxo mumu asu amisix i.

⁹Leme Epraem, diga ruuna laxanbonara eburu mi levesoso, diga sixiro at laaleng at leesepe. ¹⁰Diga los polo lekabus atnedi mi ne Moroa; la di goxopara na ronga res at Lenavolo ren. ¹¹Diga domampe lempanga neni ga lok pam i, i ngan mo lempanga sangsangu ni ga lox i ro melamgo ¹²Ap mo levenaleng lavalabat atnedi diga reven tinotno ne Moroa gak lok lempanga sangsangu ro at lemelubu ro Soan ua ik lok keneng at lenep silok Isip. ¹³Neni ga lox epeseves laras la ga lam avolo di ren; la ni ga lok mo lunep tas ga tu ngan luvat kapkapla. ¹⁴At levenaleng kangking, neni gam lam di mi lovotakabu la at lengkanimin ni gam lam di mi langangao

at laxao. ¹⁵Neni gak lok pagam lemparuat to at lamatbin la gam taba di mi levendan boro xa xopok at lebelen laxangka. ¹⁶Neni ga lok ladan kusu na sen su boro xeneng at lavaruat la ga lok mo ladan ga sesen ngan lavatdan silok.

¹⁷Ketla di goxo xap tik lok leveloklok kakapmek ti ne Moroa, la digang tonga viribang at Leeme Avolo ro at lamatbin. ¹⁸Diga lox asusu rinotno i xusu dina lok tong ne Moroa keneng at levempapaase lolos atnedi ri leveluxa salai diga vavara rin. ¹⁹Diga tere asu at ne Moroa xeretna, “Kereva, i epovo ne Moroa naba raba dik mi teveluxa de at na lamatbin? ²⁰I ruturun do neni ga viksa lavaruat, la ladan ga rem soobang su ngan ladanut; ketla kereva, i epovo bok do neni na raba bok mi lengkongkide la na raba limixin teren mi tempanga lomlomom?” ²¹Kuren la Leeme Silok ga rongga di la ga belemamao aleng di; la neni ga lox asongot di mi laxao, la lebelemamao ren tinedi ga sisilok, ²²atla di goxo nuunu saga ren la di goxo nuunu bok do neni naba lox asepsu di. ²³Ketla neni ga vaase ri laxalibet no vana la ga tong i ri laramusaragu ren kusu na rem suang. ²⁴Ap mo levenaleng neni ga raba di mi lamaana boro vana at laxalibet. At na mun langas ni ga lox asu lempanga anan tinedi ri anan. ²⁵Kuren la diga anan leveluxa at lubang angelo, la ne Moroa ga lox epovo axap lavavara atnedi. ²⁶Neni ga lok bok lemere manman boronak kusu nat mas la ga ba pukus lamatmas at lemere manman boroxun, ²⁷la ni ga raba asu laxampixa ukopok ti limixin la diga buaang aleng ngan laxaniit kapulang nou loxon; ²⁸la digam subu ro xantubu at mo enemen la kangkan laraugu kadis. ²⁹Kuren la limixin diga vanan la diga anan mais; ne Moroa ga raba nedi mi lempanga ua nedi diga vavara i. ³⁰Ketla di goxok lox axap ba langaongao anan atnedi, kuren la move digara vanan. ³¹At mo levenaleng ne Moroa ga belemamao di la ga sev amet nedi luvurau lolos avukat at leme Israel.

³²Ketla limixin di goxo doma mu i na levempanga la move digak lok leveloklok kakapmek, la lempanga sangsangu bok di goxo doxoma mu i la diga ke xepe lunuunu saga ren. ³³Kuren la neni goxo raba di mi lorooro avukat i lox abao, ketla ga lox axap leventooro atnedi mi langsung lumumuat. ³⁴At lengkonalleng neni gap sev amet lentaba atnedi, nedi mo lentaba diga ba tepukus taba i; diga ngaleng la diga ngising tin mi lorooro axap atnedi. ³⁵Diga doma ka i do ne Moroa neni Lurutu See Pe at lorooro atnedi, la do mo Lanaraavuk ga vot kusu na lox asepsu di basinge levesongsongot. ³⁶Ketla levelinga atnedi ga umsu mi laxaxarang la goxopmen teruturun at levelinga atdi. ³⁷Di goxo ruturun tin; la di goxo mumu asu lekabus diga lox i eburu min. ³⁸Ketla ne Moroa ga belemumu di atla nedi limixin teren. Neni ga doxoma xepe leveng kakapmek atnedi la ni goxo sev amet nedi. Buaang laxanaleng neni gam tebeng amlong lumukmusak teren la gak lox asi mo lolos ap mo lebelemamao silok

teren. ³⁹Neni gakleklen i do nedi limixin mun ua neni ga rudum nedi mi laxangka, la lorooro atnedi ixo babaalom, di lok ngan mun lamanman it mas polo la ira onon tino nga.

⁴⁰Digang tonga viribang solo ren to at lamatbin; la buaang mene nga laxanaleng digak lox antun i. ⁴¹La digak lok tong pen amu amgo ne Moroa la digak lox abulu i, keke i do neni Leeme Melemelengan me Israel. ⁴²Diga domampe lolos silok teren, la mo bok laaleng ua neni ga lox aroo suu di basinge lavamunepen atnedi, ⁴³la ga lok bok levempanga sangsangu silok to at lemelubu ro Soan keneng at lenep silok Isip. ⁴⁴Neni ga vuk gili laradan ti lok ngan lada, la leme Isip di goxo ruuna tevendan ti inin. ⁴⁵Neni ga riki abeles laxanulang ukeneng tidi ua ga raba nedi mi losongsongot silok, la laxangkoak ua ga lok kapmek levenmenemen atdi. ⁴⁶Neni ga riki asu laxasixu ri anan levempavee atnedi la ga lok kapmek axap leventaamang atnedi. ⁴⁷Neni ga sev amet larauna vaen mi lavatbet uat, la ga sev amet bok larauna angnu mi langangan lumudut. ⁴⁸Neni ga sev amet laxanbulumaxao atnedi, mi lavatbet uat, la ga sev amet laxasipsip atnedi mi lavanga ga mam. ⁴⁹Ni ga lox abaava rinotno di at loxonaleng ni ga soobang asu lebelemamao sepsep teren, mo gat pot ngan ta luvuttadi vapaase axasep ti lanmet naba vot. ⁵⁰Neni goxo ranga alis lebelemamao ren koplaga gita lox aroo nedi leme Isip, ketla ga sev amet di mi levenanmeres sepsep amet. ⁵¹Neni ga sev amet laxamdak avot at lara koenasun axap me Isip.

⁵²Melemu neni ga lam asu limixin teren me Israel ngan laradi loklok tatao sipsip la ga lam avolo di ro lamatbin. ⁵³Neni gam lam aratao avukat di la di goxok marat; ketla laras ga repit pava lavamunepen atnedi la diga met axap pam. ⁵⁴Neni ga lam li di ro at lenep kangka xaala ren la uto at levengkaana no neni ga los kaka i. ⁵⁵Neni ga saksu mi limixin mego at levenaleng limixin teren diga pubeles; la ga vesinga laxangka atnedi xantubu at levenabung mixin me Israel, la gam taba limixin teren mi laramenemen atnedi limixin mego. ⁵⁶Ketla leme Israel diga ronga viribang at Lanaraavuk ne Moroa, la diga lok tong pen i mi leveloklok atnedi. Digoxo ronga res at Lenavolo ren, ⁵⁷ketla diga ronga viribang la di goxo ruturun tin ngan luvuttemen di, la digak lok ngan lososo xakauk ixo sixit akmokso. ⁵⁸Digak lox abelemamao i atla diga lotu saparap levemoroo xaxarang, la digak lox abelengatngas tinotno i mi laxampoovo moroa atnedi. ⁵⁹Moroo ga belemamao at loxonaleng ni ga ven mo lempanga; kuren la ni ga sok sisixe axap tino limixin teren. ⁶⁰Neni ga on basinge rino loogu kadis teren to Silo, ni lanemen ua neni gak lok teren kantubu at limixin teren. ⁶¹Neni ga siam avolo lavamunepen atnedi xusu dina sak paxat ka lobokis at lekabus, neni mo loklok poovo at lolos la lisisinang teren. ⁶²Neni ga belemamao limixin akmokso ren la ga ke xepe di xusu lavamunepen atdi nabap sev amet di. ⁶³Luvurau atlok diga

remet at levenesep, la luvurau rixin di goxo ruuna bok ba tavatlok kusu ridi ri vepot atdi. ⁶⁴Lavamaasa diga remet keneng at leveloklok asongot, la lavamunepen digap sep pepe lavakin atnedi lavamaasa xusu dinoxok saxaanu.

⁶⁵La soso mun, Leeme Silok ga beleku kaxat, ga lok ngan ta do ni ga rakdu tuang ngan boro at lanunga; neni ga lox agagas lodoxoma ren ngan leeme lolos i inin laxadan vaen kusu ri gagas ti esep. ⁶⁶La neni ga sak tup tinotno mi lavamunepen teren la digak lok mamangan aleng amisik. ⁶⁷Ketla neni ga lox abulubun kepe livipisik li at ne Josep; la ni goxo soxolik ka lubang mixin me Epraem. ⁶⁸Ketla ni ga soxolik ka manga lubang mixin me Juda mi lakaana Saion, mo loxot ua lebelen ga tu rinotno i. ⁶⁹La neni ga vaxaru loogu laplavang tin go, i ngan lemenemen aulis teren noxun pana; neni ga lox atmatkun tinotno i ngan at na xa lavatkangka axap, la gak lok alolos i kusu naba nemen amisik kuren. ⁷⁰Neni ga soxolik ka lasaxaruki ren ne Devit ngan loorong; ni ga lam asu xaka i ro at loxot anan at laxasipsip, ⁷¹ap mo loxot ua neni ne Devit gak lok tatao laxasipsip teren. La ne Moroa ga vaxaxis li i ngan loorong me Israel, ga neni laradi loklok aratao at limixin at ne Moroa. ⁷²Devit gak lok tatao neddi la goxo reven kepe tepentaba la neni gam gomgonga neddi mi lodoxoma avukat teren.

Salmo 79

Lisingising Ti Lox Asepmus Leme Israel

¹O Moroa, lavamolon digara buxup beles pam at lenep kangka ram. Digara lox amexexe vam loogu laplavang kaala ram la ira lok kapmek axap. La diga sele utut kepe lemenemen silok Jerusalem. ²Diga ke xepe lenbantuxu at limixin taram kusu ri lempatpixa silok; diga ke xepe lenbantuxu at limixin akmokso ram kusu ri laxampanga sio mi lavanuet kangkedek atdi ri anan. ³Digap sev asu ladaada at limixin taram ngan ta ladan, la ladaada ga sesen ngan ladan to at lengkot axap keneng Jerusalem, la goxopmen tara ga roo su xusu rik mikmit avukat limixin diga remet. ⁴Limixin at laranep silok dik lok kangkan nema diga paase mumu parang nama; digang longon sese nama la diga paase aksaksa rinama.

⁵Leeme Silok. Kereva, lebelemamao ram tinema noxo xap ta? Kereva, mo lebelemamao ram nabak lok amisik ta la naba babao ngan laxao? ⁶Una lok pukus mo lebelemamao ram kusu na subu mavana at levennep silok no dixo lotu saparav u, la pana atnedi no dixo ngising saparav u; ⁷atla diga sev amet pam limixin taram; digara lok kapmek lengkot axap at lenep Israel, ni lenep kangka ram. ⁸Uguta lox asongot nema mumu

laxakapmek at lavalabat atnema. Una belemumu nga nema mo; atla ma baava rino.

⁹O Moroa, una lok tooro nema la una lox aroo nema; una lox asepsu nema basinge na lumumuat la una doma xepe laxapmek atnema xusu levenabung mixin petpes diba lok ngangao ram. ¹⁰I lok kapmek do limixin at levenabung mixin petpes diba lok tinema dola, “Ne Moroa nga ua atnemi?” Ma vara i do una lox asongot levenabung mixin petpes atla digap sep amet buaang atnema limixin axa ram. ¹¹Una ronga lerengteng at limixin dik lok at loxokoxo, la mi mo lolos taram una lox asepmus nedi mo di gagas kusu dina met.

¹²Leeme Silok, una vorang i ridi laranep silok, mi tavanuti teveloklok asongot axap, mumu mo laxaloklok aksaksa digak lox i ru. ¹³Kuren la nema limixin taram, ma ngan laxasipsip taram, manaba tong avukat amisik tu la manaba emi asu amisik minu at levenaleng axap i tu melango atnema.

Salmo 80

Lisingising Ti Vaxaru Amlong Lenep Silok Israel

¹O laradi loklok tatao sipsip me Israel; una ronga atnema lubang amgomgo at limixin taram. Ut kis at loxot kitkis orong taram ik lok mavana at lempanga raptava; ²una ru asuvos ti levenabung mixin taram me Epraem, Benjamin, la Manase. Una lox ase nema mi lolos taram; la ude u la una lox asepsu nema!

³O Moroa, una siam ka amlong nema! Una lox asuusu lebelemumu ram tinema, kusu manaba roo su.

⁴Leeme Silok, nu Lanaraavuk ne Moroa. Naba se ba ua mo lebelemamao ram ti levesingising at limixin taram? ⁵Ugara raba vam nema mi levenanbulu ua ga lok an mais nema ngan lempanga anan, la magara inin pam lempatbuxom kamkabili dan at lengkatli atnema. ⁶Uga lox avolo limixin at laranep silok dik lok kangkan nema xusu dina vesep kaka mo laxangka atnama; la monga lavamunepen atnema di paase vupu rinema.

⁷Lanaraavuk ne Moroa, una lok ka amlong nema basinge na lumumuat. Una lox ase nema mi lebelemumu ram, kusu manaba roo suu. ⁸Uga xip ka nema limixin taram boro Isip ngan labanoos vaen; la uga saksu mi limixin at laranep silok petpes la ugatlo mo labanoos vaen to at lenep kangka atnedi. ⁹Uga lox axasep lenep tin kusu rin ti susu; la levenixe ren ga si rinotno uto xopok tubu, la levenoos teren gat las to mavana ap mo lenep kangka axap. ¹⁰Ni gang pung kimit lengkongkaana mi lamamau ren la levengakan teren ga engeng urut at lemparuna keda

(Cedar) la ga kua abuxumin axav i. ¹¹Ni ga lox asu levengkakan teren uto saparap laras Mediterenian la uto bok at ladan sen Euparates.

¹²Tila ba la uga ut asi loroboro no gak lok kangkan i? La mo nga limixin dit pas polo go, i epovo mene dinam nem kaka lempeven teren; ¹³la laxanbo sio dirat pas axangka i, la laxampanga vetpes bok mi lavanuet kangkedek atdi, dira vanan levempeven teren. ¹⁴Lanaraavuk ne Moroa, una repukus tinema! Una ven asi boroxun pana at laxalibet tinema; ude u la una lox asepsu limixin taram! ¹⁵Ude u la una lox asepsu na labanoos vaen no nenu ugatlo li i; na labanoos vaen tamaxat ba mo, nu uga lox asuusu dangdangun la alolos box i.

¹⁶Lavamunepen atnema digara ra koxorop asi vam i la digara song arup laxao ren; una sep di mi lebelemamao ram la una sev amet asonao rino di! ¹⁷Una xok avukat nema limixin no nenu uga soxolik ka vam nama; nema lubang mixin ua nenu uga lox alolos nema. ¹⁸Ma noxo repukus basinge bok ba u; una kox arooro nema, kusu manaba vemi asu minu. ¹⁹Leeme Silok, Lanaraavuk ne Moroa. Una siam ka amlong nema, una lox asuusu lebelemumu ram tinema, kusu manaba roo su.

Salmo 81

Loxompixan Ti Lok Katling Laaleng Silok

¹Nemi minap kup mi leklek ti ne Moroa, neni lentupe atnedik; minak pixan mi leemi asu ri ne Moroa at ne Jakop! ²Mina vaxaru kaxat laxaka at livixan la minak sak leventabarin; minak sak lengkaka pixan avukat to at lempat taaleng mi lempat gita.

³Minat mas lempat tu ap mo levenaleng silok, at laaleng at lagaaling maxat la at laaleng at lagaaling i re kobot. ⁴Neni na lere avolo at leme Israel, la neni langas ne Moroa at ne Jakop ga tong taba di min. ⁵Neni ga raba i ri limixin me Israel at loxonaleng neni ga lox asongot limixin at lenep kangka me Isip.

Nenia aga ronga laxaka at laradi ua nia a goxo ronga xibis i, ga lok keretna, ⁶“Aga lok kepe levenmumuat boro at levenantuno atnemi; aga lok nemi xusu miba soxope asi lempat aknixip uat (birikis). ⁷At levenaleng migak lok keneng at levenmumuat to Isip, miga toro ria, la nia aga lox asepsu nemi. Aga lox epovo leventotoro atnemi at loxonaleng agak lok to xeneng at loxot alipe rak no xeneng at lamanman takabu. Aga lok tong pen nemi ro at levem puuvut dan to Meriba.

⁸Limixin tarak, mina ronga i na levempapaase aronga rak; Leme Israel, a vara rinotno i xusu minang tonga res tarak! ⁹Nemen tinotno nemi guta lotu saparap teven moroa vetpes. ¹⁰Nenia mun Leeme Silok ne Moroa atnemi, la nenia mun aga lam asu nemi boro Isip. Mina vangangba, la anaba raba luxa nemi.”

¹¹Ketla limixin tarak me Israel di goxo rongga ia, gita goxo rongga res tarak. ¹²Kuren la aga ke aie di mila lodoxoma atdi ga vatken mi lorongtonga rubu linga; la diga mumu asu lavavara atnedi keneng at leveloklok diga vavara i. ¹³Nia aga vavara rinotno i xusu limixin tarak dinang tonga ia; la a vara rinotno i xusu dinang tonga res tarak! ¹⁴Mo do kuren, nia gitaba sak tup soso mun mi lavamunepen atnedi la gira vas asi nedi diga tu tangarang di. ¹⁵Nedi ua digang long angtungun tia, dinabak milik tiding mi lanmarat to melamgo rak; la mo loklox asongot tinedi naba nemen amisik noxo xap. ¹⁶Ketla anbak lox anan nemi mi levempiao i so misigisigis la anbak lox axap lavavara atnemi mi levendan misiu boro xanubuan.”

Salmo 82

Moroa Neni Lamgomgo Me Vana Axap

¹Moroa it kis silok keneng at lixitkis buru roxun at laxalibet; neni i sevut li levendoxoma avit keneng at lixitkis buru at leven moroa; mo levelinga ren i lok keretna, ²“Mina xap tinotno nga at liila gese nep at levenaleng mik lok levenete; mi gutak tu taba limixin kapmek! ³Mina viila mumu avukat loklok atnedi limixin banbalo la lubungkarun mi lodoxoma mokmokso; mina paase mi luruturun tinedi dik pakes la dixo ruuna tevelolos. ⁴Minak lox asepmus di boro at lolos at limixin kapmek.

⁵Laxampanga vereven aie nemi! Langas panga rangtangu! Nemi laxampanga main! La kopmen tara atnemi i lok tempanga mokmokso at lavatbung menemen.”

⁶La nia aga lok bok tidi, “Nemi lavanat moroa; la nemi axap luvutnitna Leeme Avolo. ⁷Ketla minaba remet ngan luvuttadi at na laxangka; lorooro atnemi naba vaxap ngan bok lorooro at luvutnitna lavaorong. ⁸O Moroa, ude u la unamgomgonga lavatbung menemen; laranep silok axap, ni ataram.

Salmo 83

Lisingising Ti Sak Tup Mi Lavamunepen Me Israel

¹O Moroa, ugutak lok sixim, ugatang longivilo, la ugatam pamngus! ²Una ven ba lavamunepen taram di lolos kusu diba remkaa su, la nedi no dik lox angtungun tu dirang tonga viribang. ³Di vetong li leven taangas alipe xusu dibak lox i ri limixin taram; dik lok leven taangas kusu ri sosolo arup nedi ua dik lok maxopok at loxokok taram. ⁴Di paase xeretna, “Ude nemi, ata sele utut lenep silok Israel eburu mi limixin di nemen go, kusu ataba domampe axap tino di.”

⁵Di sisiam mu mo levempapaase li atdi la dik lok momo ri tu buru xusu ri vekini minu; ⁶nedi limixin me Edom la me Isimael, leme Moap mi leme Agirit; ⁷limixin me Gebal mi leme Amalek, leme Pislistia la leme Taia. ⁸Leme Asiria di ru buru bok midi atla di vara i xusu dina lok tooro leme Amon la Moap, nedli livipisik li at ne Lot.

⁹Unap sep kapmek bok di ngan ugap sep kapmek leme Midien, Sisera, la Jabin to at ladan Kison. ¹⁰Uga sak tup midi ro Endo, la lenbantuxu atnedi garap sopso ro at laxangka. ¹¹Una sev asi bok lubang amgomgo atnedi ngan uga lox i ri ne Orep mi ne Seep, la una sak tup mi lavaeme silok atnedi ngan i mo uga lox i ri ne Zebah mi ne Salmona xuren, ¹²atla nedli diga vaase xeretna, “Ataba lok kaka amlong mo laxangka at ne Moroa ridik.”

¹³O Moroa, una sax epeseves di ngan laxakup, la ngan leventuxu piao no lamanman it mas kepe i. ¹⁴Naba lok ngan laxao i kavat lavatbuan, la ngan langangao at laxao i kavat lengkongkaana. ¹⁵Una xala xepe di mi lamanman takabu ram la una lox amarat di mi lavatmanman silok taram. ¹⁶O Leeme Silok, una suxuna di mi lainmangan, la una lok nedli xusu dinaba ven kibis lolos taram. ¹⁷Naba lox avukat do una sak tup midi la lainmarat atnedi nabak lok amisik la noxo xap; keke di dina remet eburu mi lainmangan. ¹⁸Naba lox avukat do dina xasep do nenu xusuk mun Leeme Silok, la Lamgomgo silok tinotno; u lolos aleng pana axap at lavatbung menemen.

Salmo 84

Lavavara Ri Loogu At Ne Moroa

¹Leeme Silok, nu Lanaraavuk, a vara aleng loogu laplavang taram! ²A vavara aleng i xusu ana nemen go! Am doma onon amisik uto at loogu laplavang at Leeme Silok. La anabak pixan momo mi lorooro axap tarak ti ne Moroa ni Luntoo Avolo.

³Leveng kamkabilin bok dip kip levempotpos atdi ro xeneng at loogu laplavang, la larapixa lixilik (sparrow) bok din tuuna laraugu axa atdi go; la dik lok tatao luvutnitna di ro saparap larapenbon taram, nu Leeme Silok la Lanaraavuk, nu Loorong Silok la ne Moroa rak. ⁴Lomomo silok atnedi dik lok to at loogu laplavang taram dim suma i, atla dik pixan emi asu amisik tu.

⁵Lomomo silok atnedi ua nenu um taba di mi lolos dim suma i, la nedli di vavara rinotno i xusu dinat pas ngan lavaose uto lakaana Saion at loogu laplavang. ⁶Kuren la at loxonaleng dit pas polo lemelebu vatmang no at lasa Baka, di reven mo lenep na ravasu ngan lenep at levempuuvut dan, la leventakabu avot ik suxa i mi levempat tibung dan. ⁷At mo

lavatpas di ruuna ka lolos maxat; la dinaba rupot to vana at loxongkaana Saion la nedu getgesara dinaba tu ro melango at ne Moroa.

⁸O Leeme Silok nu Lanaraavuk, una ronga res at lisingising tarak. O Moroa at ne Jakop, tonga ia! ⁹O Moroa, una lox anarong loorong atnema, mo loorong ua nenu ugara soxolik ka vam i. ¹⁰Mo legesa aleng mak lok teren to xeneng at loogu laplavang, i silok aleng ti mo legesa abin sangaun kobot aleng mak lok teren to vetpes; naba lox avukat do ana tu mun amisik to maxamang saparap lumusaragu at loogu at ne Moroa rak la nemen gat ana nemen avukat amisik to at laraugu at luvuttadi dik lok laxapmek. ¹¹Leeme Silok neni Lurutu See Pe atnedik la ni Loorong Silok i ruuna lisisinang, la ik lox anarong dik mi lebelemumu la ik lox asilok dik kusu limixin dina lok ngangao atnedik. Neni ixom tebeng alis lempanga avukat basinge nedu dik lok luvukat.

¹²Leeme Silok nu Lanaraavuk, nedu di nuunu saga ram din tuuna xaka i lomomo silok!

Salmo 85

Lisingising Ti Loklox Akmokso At Lenep Silok

¹Leeme Silok, ugara belemumu vam lenep kangka ram Israel; ugara lok pam nema leme Israel la uga lox asang kobot amu manga nama. ²Ugara doxoma xepe vam lengkakapmek at limixin taram la ugara gos kepe vam levesoogong atdi.

³Lebelemamao ram tidi ga xap tino la uga rebeng alis amlong mo lebelemamao sesele utut taram.

⁴O Moroa, laradi loklox arooro atnema, una rebeng ka amlong nema basinge levenmumuat, la na xap ta u ri belangatngas amisik tinema!

⁵Kereva, unabak belemamao amisik ta nema? Kereva, mo lebelemamao ram noxo xap ta? ⁶Una lox alolos amu manga nema, kusu nema limixin taram manaba emi asu minu. ⁷O Leeme Silok, una lox asusu mo labalamu lexen taram, la una lok tooro nema xusu manaba sepmus.

⁸Nenia ang tonga lempanga Leeme Silok ne Moroa i paase i; neni i xaape mi lenmila ridik limixin akmokso ren, mo do atoxomlong ti loklok tangtangu atnedik. ⁹Tuturun tinotno do neni i gagas kusu tik lox asepsu nedu dik lok ngangao ren, la mo loklok tooro ren naba nemen amisik eburu minedik at na lenep kangka atnedik.

¹⁰Labalamu eburu mi luruturun at ne Moroa dunaba etang; la lomokmokso eburu mi lenmila ren la dunaba esu auru. ¹¹Limixin mede xopok dinaba ruturun ti ne Moroa, la ne Moroa naba lox asusu loklok mokmokso ren boro vana at laxalibet ti limixin mede xopok. ¹²Leeme Silok naba lox asang kobot amu manga dik, la lenep kangka atnedik naba

lox asuusu leveluxa dangdangun avukat. ¹³At lengkot axap Leeme Silok it pas teren, loklok mokmokso naba umsu la kerepmo langas i gagas tin.

Salmo 86

Lisingising Ti Loklok Tooro

¹Leeme Silok, una ronga ia; una sep siam mu ia, atla ara molos axap la axo epovo ri lok tooro axa ia. ²Una lox asepsu ia basinge lanmet, atla nia a ruturun amisik tu; una lox aroo ia, atla nia lasaxaruki ram la a nuunu saga ram. ³Nenu ne Moroa rak, kuren la una belemumu ia; at levenaleng axap, a ngising tu. ⁴O Leeme Silok, una lox aklek ia, lasaxaruki ram, mila levesingising tarak i ruturun amisik tu.

⁵Uk lok luvukat tinema la um doxoma xepe laxapmek atnema, la u umsu mi labalamu lexen tinedi axap no di ngising parav u. ⁶Leeme Silok, una ronga i na levesingising tarak; una ronga na lerengteng tarak ti loklok tooro. ⁷A toro ru xeneng at levenaleng at levenmumuat, atla up sep siam at levesingising tarak.

⁸O Leeme Silok, kopmen bok ba temoroa go i lok ngan u, la xopmen tino teta go ga lok tavanga silok ngan mo lempanga nenu ga lox i. ⁹Mo laranep silok ua nenu uga rudum li di, dinaba xis tintiding to melamgo ram; la dinaba emi asu mi laasen taram. ¹⁰Nenu Lanaraavuk la uk lok lempanga maraanu; nenu xusuk mun ne Moroa.

¹¹Leeme Silok, una anasa ia mi lempanga u vara i xusu ana lox i, la anaba ronga res amisik taram; una anasa ia xusu anaba gugu taba u mi lorooro axap tarak. ¹²O Leeme Silok ne Moroa rak, anaba emi asu minu mi lavatpeeve axap tarak. Anaba vavang asu lununuan taram at levenaleng amisik la noxo xap. ¹³Labalamu lexen taram tia i silok aleng! Ugara lox asepsu vam ia basinge lamaut.

¹⁴O Moroa, limixin loklok papavas nga mo dit pas tangarang ia; la libinam tadi longlong kuxurung mo di lok do dina sev amer ia, nedi limixin ua dixok mulus ka levelinga ram. ¹⁵Ketla nenu ne Moroa la Leeme Silok tarak, u ruuna lebelemumu la labalamu lexen, uk lox atnaasan, uk belen tuntun, la u ruturun amisik ti limixin taram. ¹⁶Una repukus mu ia la una belemumu ia; lox alolos ia la una lox aroo ia, atla nia a gugu taba u ngan lasaxaruki rinotno ram. ¹⁷Leeme Silok, una lox asuusu mo luvukat taram tia, kusu nedi ua dingolong angtungun tia, dinaba mangan at loxonaleng dina ven i do ura lox aratao xaka ia la ura lok tooro ia.

Salmo 87

Leemi Asu Mumu Ne Jerusalem

¹Leeme Silok ga vaxaru lemenemen silok teren to vana at loxongkaana Saion, mo loxongkaana i xaala. ²la lavavara ren ti mo lemenemen silok Jerusalem i

volo axap mo levenmenemen petpes bok keneng at lenep silok Israel. ³Nemi limixin bor at lemenemen silok at ne Moroa, mina ronga i mo levempanga maraanu neni i tong asu nom lemenemen mumu u xeretna; ⁴“Anaba lox abeles bok leme Isip mi leme Babilon at loxonalleng ana siam ka nedi limixin at levennep silok no ding tonga res tarak; anaba siam abeles ka bok nedi leme Pilistia, Taia, la Saidon ukeneng eburu mi limixin bus tinotno me Jerusalem.”

⁵Dinaba epaase mumu mo loxot Saion do, larabung mixin axap, nedi mego di, la mo Lanaraavuk naba vaxaxis atmatkun mo loxot. ⁶Leeme Silok naba malagan levenasen at mo limixin me xadiong la naba lox abeles axap di kusu dina ravasu ngan leme Jerusalem tino nga. ⁷Dinabak pixan la dinaba tii. Mo loxompixan atdi naba lok keretna, “Lemenemen Saion neni xusuk mun laamkumkun at leveloklok anarong atnedik.”

Salmo 88

Lerengteng Ti Loklok Tooro

¹Leeme Silok ne Moroa, nu laradi loklox arooro rak, ang teng tu at levenaleng kangking la at lengkanimin at pas parav u mi lisingising. ²Lox epovo lisingising tarak; tonga ia na ang teng kusu una lok tooro ia! ³Laxanmumuat solo na ira subu vam mavana rak la i auret kusu ana met. ⁴A lok ngan mun nedi ua di auret kusu dina met; levelolos axap tarak ira xap pam. ⁵Ak lok ngan laradi diga ke xepe i ro at lanmet eburu mi labarongan; a lok ngan lau ik midi ro xeneng at lamaut at labarongan, la nenu ugara domampe axap pam nedi, la ixo epovo bok ba xusu una lok tooro nedi.

⁶Ugara lu arup pam minia uto xopok tubu at lamaut, uto rinotno at lemeron ua i buxumin aleng. ⁷Lebelemamao ram ik midi mavana rak la i lolos aleng; i lok ngan ta do ara dong si axap pam uto at larapopaxano.

⁸Uga lok larapentangas tarak la digara raba arulu ia; uga lox ia la limixin di milingot tarak. Ak lok keneng at loxokoxo at lanmeres, kuren la axo epovo na sepsu; ⁹luxatli rak na ira molos ta mumu laxasongsongot. Leeme Silok, a toro amisik tu at levenaleng axap, la ara ngosong aurut mi lukngak keneng at levesingising tarak.

¹⁰Kereva, uk lok lempanga sangsangu ri labarongan? Kopla di rooro xat la dira vemi asu minu? ¹¹Kereva, di paase asu labalamu lexen taram to xeneng at lamaut kopla di paase asu luruturun taram to at lenep i umsu mi leeteke? ¹²Kereva, di ven levempanga sangsangu ram to xeneng at lenep i main bonot kopla di ven luvukat taram to Katimun at lemenemen atnedi, ua limixin diga domampe di? Kopmen tinotno.

¹³Leeme Silok, a toro ru xusu una lok tooro ia; a ngising amisik tu at levenmaxantamak, kusu una lox asepsu ia basege lanmet. ¹⁴Leeme Silok, tila la u sok tixirixes kepe ia? Ua lavasuun teren la u raba arulu ia?

¹⁵Ga ru ka axa i at levenmaares nia aga aau, agam suma levesongsongot la aga auret kusu ana met. Nia na ara soklu axap at laxanmumuat at leveloklok asongot taram. ¹⁶Laxan belemamao silok taram ik lok amdanda ia; la lesepep taram ik lox abaava rino ia. ¹⁷At levenaleng amisik duk lok kangkan ia ngan ladanut; la dura si etang amisik tarak to at lengkot axap. ¹⁸Ugara lok pam larapentangas tinotno rak la digara raba arulu vam ia, la lubuxumin ta mo i lok ngan laradi i vemu minia la kopmen tara bok.

Salmo 89

Loxompixan Keneng At Levenaleng Mumuat

¹O Leeme Silok, anabak pixan amisik mumu mo labalamu lexen taram; anaba paase asu i do nenu uk lox epovo amisik levelinga ram. ²Aklen i do labalamu la loklok tatao ram naba nemen amisik, la noxo xap ngan laxalibet.

³Uga vaase xeretna, “Agara lok pam lekabus mi mo laradi nia aga soxolik kaka i; agara xaape vam ti lasaxaruki rak ne Devit, keretna, ⁴“Lavaorong nabap tavasus amisik keneng at livipisik li ram la mo lugugu ti lavaorong nabak lok at livipisik li ram amisik la noxo xap basinge nedi.”

⁵Leeme Silok. Lempixan ip tavasus boro vana laxalibet mumu mo lempanga maraanu uk lox i. Luvuttadi xaala dik pixan do u ruturun amisik ti limixin taram. ⁶Leeme Silok, kopmen teta roxun pana at laxalibet i lok ngan u; kopmen teta at lempanga rooro no vana at laxalibet i epovo eburu minu. ⁷Keneng at lixitkis buru at limixin kaala, dik marat taram; la nedi axap di tu eburu mi loklok ngangao silok aleng tu. ⁸Leeme Silok ne Moroa nu Lanaraavuk, kopmen teta go, lolos teren i volo aleng ngan u. O Leeme Silok, nenu u ruturun at lempanga axap.

⁹Um gomgo nga mavana ap mo laras lolos; la uk lox amila lolos lempat popaxanao. ¹⁰Uga rit amdanda mo lavatpanga sio ne Raap la uga sev amer i; la uga sak tup mi lavamunepen taram mi mo lolos silok taram. ¹¹Laxalibet neni ataram, la lavatbung menemen bok; uga rudum lavatbung menemen la lempanga axap bok di nemen keneng teren. ¹²Uga rudum li lunep borou la boroxun. Lakaana Tabor mi lakaana Eremon dik pixan mi lomomo ru. ¹³U lolos pologat! Lolos taram i silok la i volo aleng!

¹⁴Lininto ram it kis mavana at levelinga mokmokso mi lodoxoma avukat; labalamu eburu mi luruturun dip tavasus asaxaven keneng at lempanga nenu uk lox i. ¹⁵Luvukat mo ik lok tinedi di lotu saparav u mi levempixan, la dik lok maxopok at lebelen tuntun taram! ¹⁶La di momo amisik at levenaleng axap mumu mun u, la di vemi asu minu mumu

lulukat taram. ¹⁷Uga lok nema la maga sak tup mi lavamunepen atnema; uga lok nema xusu mana sak tup midi atla, mumu mun labalamu ram. ¹⁸O Leeme Silok, nenu xa uga soxolik ka lurut see pe rinema; nenu xa ne Moroa melemelengan me Israel, uga raba nema mi loorong.

Laxakaape At Ne Moroa Ri Ne Devit

¹⁹Keneng at lara lisilimet gano, uga paase ri lavaeme vapaase ali ram ua diga umsu mi luruturun at lamaram, uga lok keretna, “Ara raba vam loklok tooro ri mo lasesep doxodok; ara raba vam lugugu at loorong ti mo lara nia a soxolik kaka i ro xeneng at limixin. ²⁰Ara vaxaxis pam lasaxaruki rak ne Devit ngan loorong at loxonaleng aga lox anarong i mi ladan momonok i xaala. ²¹Lolos tarak nabak lok amisik eburu min, lolos tarak naba lox alolos i. ²²Lavamunepen teren di boxo epovo ri vas asi i; limixin kapmek di boxo epovo ri sak tup min. ²³Anaba sax amdanda nedi di esep tangarang min, la anaba sev amet nedi axap ua dingolong angtungun tin. ²⁴Anaba balamu i la ana lok tatao amisix i; anaba lox i xusu lavamunepen teren di noxo sak tup min. ²⁵Anaba lox epasum lixitkis orong teren, tuka i ro at laras Mediterenian la uto epopolo at ladan Euparates. ²⁶La neni naba vaase ria xeretna, “Nenu ne Tamak la ne Moroa rak. Nenu Lurutu See Pe rak la Laradi Loklox Arooro rak.” ²⁷Anaba lox asilox i ngan lamdak avot tarak, la neni naba silok axap ti lavaorong axap at na lavatbung menemen. ²⁸Anaba lox epovo amisik levengkakaape rak tin, la lekabus tarak eburu min naba nemen amisik la noxo xap. ²⁹La mo leesooxun ngan lubang amgomgo keneng at livipisik li ren, naba nemen amisik ngan laxalibet; tavaorong nabap tavasu amisik boro at livipisik li ren.

³⁰Ketla do livipisik li ren dina ronga xepe at Lenavolo rak la di noxo rooro mu asu levelinga rak, ³¹la do di noxo doxoma mu levempapaase axasep tarak, la dixo mu asu Lenavolo rak, ³²anaba lox asongot di mumu laxakapmek atnedi; anaba lok nedi dina baava mu mo laxapmek atdi. ³³Ketla labalamu rak ti ne Devit noxo xap koplana ana subu kot at laxakaape rak tin. ³⁴A noxo los polo lekabus tarak eburu min koplana ke xepe tara taxakaape go agara lox pam i eburu min. ³⁵Aga xaape gesara mene nga keneng at laasen kaala rak la noxo lox ekun bok ba i; la mo laxakaape naba nemen amisik. A noxo xarang tinotno ne Devit. ³⁶Neni naban tuuna amisik taxampisik li, la anaba reven aratao lixitkis orong teren at levenaleng i rooro ren. ³⁷Na loklok tatao rak tinimi naba nemen amisik ngan lagaaling, ua neni i soso axasep amisik to vana at laxalibet.”

Lanteng Ti Loorong Diga Sak Tup Min

³⁸Ketla nenu ne Moroa, u belemamao mo loorong nenu uga soxolik ka i; ugara lox abulubun pam i la uga sok sisixe i. ³⁹Ugara los polo vam

lekabus taram eburu mi ne Devit, lasaxaruki ram, la ura lox asi aleng i basinge lixitkis teren ngan loorong. ⁴⁰Ura ut tereve asi vam larangas uat ik lok kangkan lemenemen silok teren, la ura lok kapmek pam laraugu esep matmatkun teren. ⁴¹La nedi limixin ua dit pas polo go, dim nem kaka lempanga ren; la nedi dik lok saparav i, ding longon sese i. ⁴²Ura lok tooro vam lavamunepen teren kusu dina sak tup mi limixin taram; ura lok pam lavamunepen la dira momo. ⁴³U lok lempanga esep teren i lok ngan lempanga gamasa nga la lavamunepen taram dirak sak tup etaba nga midi keneng at levenesep. ⁴⁴Ura lok kepe vam laasen silok teren la ura lok pes pam i basinge lixitkis orong teren. ⁴⁵Ura lox asioxo vemput ta i la ura vung kimir i mi lainmangan.

Lisingising ti Loklok Asu

⁴⁶Leeme Silok, kereva, unak lox alipe rino nga basinge nema? Mo lebelemamao ram na babao ngan laxao la naba se ba ua? ⁴⁷Una doma mumu be na lorooro rak it mut tinotno; la unaklen box i do nenu uga rudum li nema mi lenbantuanu gamasa mun! ⁴⁸Nege ba naba rooro amisik la noxo met? Taradi naba lok ba xereva xusu ni noxo beles at lamaut?

⁴⁹Leeme Silok, ua nga no lempanga nenu uga lox asusu i ri lox asaxaven mo labalamu ram? Ua nga no lengkakaape nenu uga lox i ri ne Devit? ⁵⁰Uguta domampe i do limixin diga paase aksaksa la vupu xapmek tinotno ria lasaxaruki ram, la aga vekip mi mo lempapaase vupu at lavamolon. ⁵¹O Leeme Silok. Lavamunepen taram diga paase xapmek ti loorong soksoxolik taram. Di paase xapmek tin ap mo axap lengkot neni it pas teren.

⁵²Leemi asu amisik ti Leeme Silok la kopmen tekavaxap teren! Tuturun! Tuturun tinotno!

Salmo 90

Levelinga Mumu Ne Moroa La Limixin

¹O Leeme Silok, nenu ugak lok ngan amisik loogu aulis atnema lavaola axap. ²Avot ti laaleng uga rudum li levengkaana la lempanga di rooro xeneng at lavatbung menemen, nenu ugak lox axa ngan ne Moroa i rooro lexen, la unabat kis Moroa amisik la kopmen tekavaxap taram.

³U tong i ri luvuttadi axap kusu dinabamlong ti mo loxot nedi diga ravasu ren; u baba gili amlong di xusu dina repukus ti laxakup. ⁴Nenu u ven legesa abin sangaun kobot maares di lok ngan mun legesa aleng; di lok ngan mun laaleng itinongo, ira onon pam, i lok ngan mun legesa xonatat aleng at laxanimin. ⁵Uga xip pes kaka nema ngan ladanut; maxo rooro abao bok ma ngan lapnobo i sonao. Ma lok ngan levenang i suu

valas maxantamak suubu, ⁶di suu la di repalas asu lamaraanu, la melemu dira molos la dira met manga ukantinao.

⁷U sesele utut nema mi mo lebelemamao ram; ma emilik sak mumu lebelemamao ram. ⁸U saali leveloklok kakapmek atnema ro melango ram, mo leveloklok alipe atnema ik lok go ap mo loxot nenu u epovo ri reven kaka di. ⁹La lorooro atnema, nenu u tara korop atmur i mi mo lebelemamao ram; la i sonao ngan lavapaase siksikma. ¹⁰Lorooro atnema it pot mun at lavanuti sangaun maares la do ma lolos, maba se ka lavanuan sangaun maares; ketla ana levenmaares move im taba nema mi leven ekarakat la lainbulu; la soso mun lorooro atnema i vaxap kot, la mara onon tino nga.

¹¹Kopmen tara go gata suma vam lolos silok at lebelemamao ram. Kopmen bok teta iklen ka ba lanmarat silok, mo lebelemamao silok taram i epovo ri lox asuusu i xeneng atnema. ¹²Una anasa nema do lorooro atnema it mut mun kusu manaba ruuna ka lodoxoma avukat.

¹³O Leeme Silok, lebelemamao ram naba xap ba lingisa? Una belen tuntun mu nema, limixin me Israel, atla nema limixin tinotno ram!
¹⁴Una suxa amisik nema at leven maxantamak mi labalamu lexen taram, kusu manabak pixan la mana sosoro keneng at lorooro axap atnema at na lavatbung menemen. ¹⁵Una raba nema mi lomomo silok ngan bok pam mo lanbulu silok uga raba nema min ap mo levenmaares magak lok at lasaxaek. ¹⁶Una lox avolo nema lavasaxaruki ram kusu mana ven leven gugu lolos taram; una lok bok livipisik li atnema xusu dina ven mo lolos silok taram.

¹⁷Leeme Silok ne Moroa atnema, una ke mo loklox anarong taram nak lok keneng atnema. Una lox epovo levendoxoma atnema keneng at leven gugu axap nema ma lox i!

Salmo 91

Morua Lentupe Atnedik

¹Nege di do dit kis sogo at Leeme Silok, dik lox asepsu at levenaniu, la nedi do dik lok maxopok at loklox aratao at Lanaraavuk, ²di epovo xusu dina tong i rin keretna, “Nenu lentupe atnema la Lurutu See Pe atnema. Nenu ne Morua atnema; la ma nuunu saga ram.” ³Neni naba lox asepsu nimi basinge levempanga sepsep mo ik lox alipe la basinge bok levenanmeres sepsev amet. ⁴Neni naba kok nimi mi luvapa ren; la minabak lox avukat keneng at loklok tatao ren; luruturun teren naba lok tatao la na tu banpe nimi. ⁵Mi noxo marat at tepanga sepsep at laxanimin koplata tepanga longlong arakdu ru at laxangking, ⁶koplata tevenanmeres kapmek na lutpot at laxanimin koplata mo lubunggas kapmek ip sep at lengkangking.

⁷Tegesa abin sangaun kobot giba met mun go saparap nimi, la legesa sangaun larabin sangaun kobot go xangkan nimi, ketla dixo epovo ba ri lok kapmek tekot atnimi. ⁸Minabak milik kaxat la mina reven ba i mo limixin kapmek dik lok ka levesongsongot kuren.

⁹Mira siam ka vam Leeme Silok i ngan Lentupe rinimi. Mo Leeme Avolo i ngan Lurutu See Pe rinimi; ¹⁰kuren la ba xopmen bok ba tumumuat naba sak pava nimi, la tempanga loklox asongot nat pot saparap laraugu aulis atnimi. ¹¹Moroa naba lok li lubungangelo ren kusu dinabak lok tatao nimi, la kusu dinaba kok nimi at levengkot axap minat pas teren. ¹²Dinaba rebeng aurut nimi mi lengkikngen di xusu mi noxo lox asongot lengkangkedek atnimi ro at laxanuat. ¹³Minabat pas povorok asi lempat laion mi lempat sii, mo lempat laion atat la lempat sii mamao.

¹⁴Moroa i vaase xeretna, “Anaba lox asepsu nedi di balamu ia la anaba xok nedi ua di ven kibis ia do nenia Leeme Silok. ¹⁵At loxonalleng dina ngising tia, anaba ronga res atnedi. Do dina ekip tangarang mi levenmumuat, anbak lok eburu midi kusu ri lok tooro di; anaba lox asepmus nedi basinge mo levenmumuatla ana xip aurut levenasen atdi. ¹⁶Anaba un di mi lorooro abao; la anabak lox asepmus nedi at levenmumuat.”

Salmo 92

Loxompixan Emi Asu

¹O Leeme Silok, loklox avukat tinotno mo do mana tong avukat tu, la manak pixan tik lok ngangao ram. O Moroa Avolo. ²At lenmaxantamak axap, mana vavang asu mo labalamu lexen taram la loklok tuturun taram tinema. Mana vavang min at lengkanimin axap, ³mana lox i na mi lerengteng at leven gita la mi lenaon at levengkon taaleng. ⁴O Leeme Silok, leven gugu lolos taram ik lox aklek ia; la ak pixan momo mumu mun mo lempanga ugara lok pam i.

⁵Leeme Silok, mo leven gugu uga lox asusu i, i silok aleng! La levendoxoma ram i si aleng! ⁶La ixo epovo xusu taradi baulang naklen mo lempanga; taradi rangtangu bok ixo epovo ri xasep teren. ⁷Keke i do limixin kapmek dina posok aleng ngan levempivilis, la nedi dik lok leveloklok bilinga diba ngasang kobot; ketla ne Moroa naba sele utut axap tino bok di; ⁸atla nenu Leeme Silok u ruuna lolos lexen la kopmen tekavaxap teren.

⁹Makleklen i do lavamunepen taram dinaba remet kot, la unaba sak tup midi axap limixin dik lok laxapmek. ¹⁰Ugara lox alolos pam ia ngan lavatbulumaxao aaxa; ugara lox anarong pam ia mi lomomo. ¹¹Agara ven pam u, uga sak tup mi lavamunepen tarak la aga ronga lerengteng at limixin dik lok laxapmek.

¹²Limixin mokmokso dinaba susu dangdangun ngan lempar iivin; dinaba susu nunuan ngan levenuna keda (Cedar) boro Lebanon. ¹³Di lok ngan larauna i susu ro xeneng at loogu at Leeme Silok, i susu dangdangun to xeneng at loogu laplavang at ne Moroa atnedik, ¹⁴mo larauna me gaxatdo nga la ira mukun ta, ketla move ira pisik peeve la lempavaxan move ren i mamaxa la i lolos. ¹⁵Ana i, i lox asusu i do Leeme Silok neni i raturun, la kopmen tesoogong keneng at Lurutu See Pe rak.

Salmo 93

Morua Ni Loorong Silok

¹Leeme Silok ni Loorong Silok. Neni i ruuna laasen silok la lolos. La lavatbung menemen mo it kis atmatkun at loxot teren la ixo epovo ri repes meeve. ²O Leeme Silok, lixitkis taram ngan Loorong Silok ga tu tuxuruxun ka axa at lurutu kaxat, la nenu uga rooro avot ti levenaleng ga ru kaxat.

³O Leeme Silok, laaknuxup silok ip tava su boro xopok tubu at laras main; dik lox areng silok lengkaka atnedi mi laaknuxup silok. ⁴Leeme Silok it kis amgomgo toxun pana at laxalibet, la lolos teren i volo aleng, la i silok ti mo laaknuxup boro at laras main, la i lolos polo larapo paxanao at laras.

⁵Leeme Silok, Lenavolo ram i nemen amisik, la loogu laplavang taram i xaala rinotno amisik la kopmen tekavaxap teren.

Salmo 94

Morua Ni Laradi Naba Ila Limixin Axap

¹Leeme Silok, nenu ne Moroa uk lox asongot limixin kapmek; una lox asusu lebelemamao ram tidi! ²Nenu laradi ila mumu lorooro at limixin axap; una xatu kaxat la una raba nedi luvuttadi loklox aaso mi luunun ti laxakapmek atdi! ³Mo leklek ap mo limixin dik lok laxapmek naba se ba ua? Naba se ba ua, Leeme Silok? ⁴Mo loklox aaso at luvuttadi dit los polo Lenavolo naba xap ba lingisa la dirak lox aru di mumu leveloklok kakapmek atnedi?

⁵O Leeme Silok, di rubut puuvus limixin taram, la dik lok li levenmumuat mavana atnedi no nenu u ruuna di. ⁶Dip sev amet lempatnaa mi lubangkarun, la dip sev amet bok lavaose mo dik lok at na lenep kangka atnema. ⁷La di paase xeretna do, “Leeme Silok ni kopmen na reven nedik; ne Moroa me Israel ixo ven lenget ka na loklok tak lox i.”

⁸Limixin tarak, kereva rinotno la mik lok sorova baulang gamasa? Minabaklen ba lingisa? ⁹Moroa ga lok levenbaalung atnedik; kereva, neni ixo epovo na ronga? Neni ga lok lengkatli atdik; kopla ni noxo reven? ¹⁰Neni i metlaat ti laranep silok petpes, kereva ni noxo lox asongot di? Neni laradi anasa at limixin axap, kereva, kopmen takleklen teren? ¹¹Leeme Silok iklen axap levendoxoma atnedi; la iklen latnese at levendoxoma etaba atdi.

¹²Leeme Silok, lomomo silok mene i mo ik lok ap mo laradi ua nenu u paase aru amisix i, mo laradi ua nenu u anasa amisix i mi Lenavolo ram! ¹³Uk lox amamana i basinge levenaleng at levenmumuat, ise at laaleng di xe lavatmet tik lixo luvuttadi dik lok laxapmek. ¹⁴Leeme Silok noxo raba aralu limixin teren; neni noxo lox abulubun nedi ua neni i ruuna di. ¹⁵Levendoxoma mokmokso naba ravasu xeneng at levenaleng dina tu at lavapaase. La limixin mokmokso axap diba su auru rino mo levendoxoma.

¹⁶Nege ga ru katling ia ri ru tangarang mo limixin kapmek? Nege ga lok ka loxot tarak kusu ri ru tangarang mo limixin bilinga? ¹⁷Mo do Leeme Silok gitoxo lok tooro ia, nia ro agita onon soso vam uto Katimun at lenep kangka at lavaanat pamngus. ¹⁸Aga vaase xeretna, “Am subu si na ukopok.” Ketla, labalamu lexen taram, Leeme Silok, im tebeng ama aurut ia. ¹⁹At levenaleng nia a suma levenmumuat la arak lok tuntun, nenu uk lox amenemen ia la urak lox aklek ia.

²⁰Nenu kopmen nak lok momo mi luvuttadi rongtonga linga gesenep ua di xaxarang pepe lolos tinotno luvukat at levenaleng ete, la di sisiam ka laxakapmek. ²¹Dik lok li levenmumuat mavana at luvuttadi avukat, la di tong aurut liina ti luvuttadi sepsen. ²²Ketla Leeme Silok ik lok ngan lentupe rak; ne Moroa rak i kox ia basinge di. ²³Neni naba lox asongot di mumu mo leveloklok kakapmek atnedi. La ni naba sele utut di mumu mo libilinga atnedi; Leeme Silok ne Moroa atnedik naba lok pes axap tino di.

Salmo 95

Loxompixan Emi Asu

¹Ude nimi, ata emi asu mi Leeme Silok! Atak pixan mi leklek ti ne Moroa, neni ua i kok nedik! ²Ata vot saparav i mi levelinga rotong avukat la atak pixan lengkompixan leklek la emi asu rin. ³Atla Leeme Silok neni Lanaraavuk ne Moroa, neni Loorong Silok i lolos kimit axap levenmoroa xaxarang. ⁴Neni im gomgonga mavana axap at lavatbung menemen, tuka i ro xeneng tubu at lempatbuang, la uto xa vana at lempatkaana babaalom. ⁵Neni im gomgonga mavana at laras no neni ga lox i; la laxangka bok no neni axa ga rudum i.

⁶Ude nimi, la ata xis tintiding la ata ngising tin; ata xis mi lempatgulom atdik at lemeren Leeme Silok, neni laradi runtudum li atdik! ⁷Neni ne Moroa atnedik; la neni ik lok tatao nedik limixin, ta ngan levesipsip no neni im taba luxa di.

Ningina mina rongga i na levelinga i vaase i, i lok keretna. ⁸“Mi gutak lox ametarauat lebelen nimi, ngan lavalabat atnemi digak lox i ro Meriba, la kerekngan bok mo laaleng digak lok to at lamatbin Masa. ⁹Diga sosolo asu rak go, la diga lok tong ia, keke i do digara ven pam lempanga silok agak lox i ridi. ¹⁰At lavanuet sangaun maares axap, aga bele songsongot tinotno mi mo limixin. Aga lok keretna, “Dixo ruturun tinotno xereva na! Di xopara dina rongga res at levelinga rak.” ¹¹Aga belemamao nedi la aga lok laxakaape matmatkun tinotno xeretna; mixo epovo rinotno xusu mina beles ap mo lenep kangka aulis atnimi, mo nia aga lok do ana lox amamana nemi ren.’ ”

Salmo 96

Morua Ni Loorong Silok Ik Lok Mavana Axap

¹Mina vixan toxompixan maxat ti Leeme Silok! Lavatbung menemen axap, minak pixan ti Leeme Silok! ²Minak pixan ti Leeme Silok, la mina emi asu min! At levenaleng axap mina vavang mi lagale lavavang do neni ga lox asepmus nedik. ³Mina vavang asu lisisinang teren uto at laranep silok, la mina tere limixin mi mo lempanga lolos neni gak lox i.

⁴Leeme Silok, neni i silok aleng; kuren la i epovo rinotno do leemi asu atdik tin naba silok aleng; loklok ngangao atnedik tin naba volo axap levenmorua xaxarang at na lavatbung menemen. ⁵Leven morua ap mo levenabung mixin petpes, nedi levempoovo vanga mun. Ketla mo Leeme Silok, neni ga rudum li laxalibet. ⁶Lisisinang mi laasen silok duk lok kangkan i; lolos eburu mi lempanga maraanu du umsu xeneng at loogu laplavang teren. ⁷Limixin axap at lavatbung menemen. Mina emi asu mi Leeme Silok; mina emi asu mi lisisinang la lolos teren. ⁸Leemi asu ri laasen melemlengan at Leeme Silok; mina emu eburu mi teventamtaba la mina beles de at loogu laplavang teren. ⁹At loxonaleng mo laradi melemlengan na vor asuvos, mina xis tintiding to melamgo ren; lavatbung menemen axap, mina lok ngangao aleng to melamgo ren.

¹⁰Mina paase i ri larabung mixin axap do, Leeme Silok, neni Loroong Silok!” Lavatbung menemen it kis tuxuruxun to at loxot teren la teta noxo vuk gili i. Neni naba ila mumu limixin mi lodoxoma mokmokso.

¹¹Lavatbung menemen eburu mi laxalibet, munak lek! Laras una luulung mi lomomo! Lempanga dik lok keneng taram, dinap kup momo.

¹²Levennep kangka eburu mi levempanga dik lok keneng atnimi, minak

lek! La larauna ro xeneng at laxairing, dinabap kup mi leklek, ¹³at loxonaling Leeme Silok na vot kusu rim gomgonga lavatbung menemen. Neni nabam gomgonga limixin at lavatbung menemen mi lodoxoma mokmokso la levelinga ruturun.

Salmo 97

Moroa Neni Lamgomgo Ik Lok Mavana Axap

¹Leeme Silok neni Loorong Silok! Lavatbung menemen, unak lek! Nemi levesoxan kantubu at laras, mina sosoro! ²Lengkon takabu mi lubuxumin dung kan i; neni im gomgonga limixin mi levelinga mokmokso la lodoxoma avukat. ³Laxao im gomgonga i la i kotos kepe lavamunepen teren mo dik lok kangkan i. ⁴Neni ik lox asu lavanga i mam la i soso axasep lavatbung menemen; la lavatkangka i reven i la ira deede. ⁵Lengkongkaana di kadan ngan levelumlut misiu ro melambo at Leeme Silok, go melambo at Leeme Silok at lavatbung menemen axap. ⁶La laxalibet i lox asusu i do Leeme Silok ni laradi manmanton la larabung mixin axap di reven lisisinang teren.

⁷Ik lox amangan nedi axap no diplavang ti laxampoovo vanga; laxanmoroa xaxarang axap dit kis tintiding to melambo at Leeme Silok. ⁸O Leeme Silok, limixin me Saion dik lek, la laramenemen silok at leme Juda di sosoro mumu lodoxoma mokmokso ram. ⁹Leeme Silok ne Lanaraavuk, nenu lamgomgo at lavatbung menemen axap; nenu u silok tinotno rinedi axap levenmoroa xaxarang.

¹⁰Leeme Silok i balamu nedi ding tungun ti laxapmek; neni ik lok tatao lороoro at limixin teren. Neni ik lox asepmus di basinge lolos at limixin dik lok lengkakapmek. ¹¹Leveloklok anarong i ngan laxasep i soosoo mavana atnedi limixin manmanton; la leklek ik lok atnedi luvuttadi avukat. ¹²Nemi limixin mokmokso minak lek ap mo lempanga Leeme Silok gara lok pam i! Mina doxoma aklen ti mo lempanga ne Moroa melemelelangan gara lok pam i rinimi, la mina tong avukat tin.

Salmo 98

Moroa Ni Lamgomgo At Lavatbung Menemen

¹Mina vixan toxompixan maxat ti Leeme Silok; neni gara lok pam lempanga maraanu! Neni gara sak tup mi lavamunepen teren mi lolos kaala axa ren. ²Leeme Silok ga vaase asu i do ni ga sak tup mi lavamunepen teren; la neni ga vaase aronga larabung mixin axap mi mo lolos teren ti lox asepmus limixin. ³Neni ga lox epovo laxakaape ren ti

limixin me Israel la i ruturun amisik tidi la ik lox asuusu labalamu lexen tidi. Limixin axap at lengkot axap digara ven pam ne Moroa atnedi ga sak tup mi lavamunepen teren.

⁴Lavabung menemen axap, minak pixan sosoro ri Leeme Silok. Mina emi asu rin mi lempixan la luxupkup sosoro! ⁵Minak pixan mi lengkompixan emi asu ri Leeme Silok! Minak sak lerengteng maraanu ro at lempat taaleng! ⁶Minat mas lempat tu mi lengkong kidi, la minap kup mi lososoro ri Leeme Silok, ni Loorong Silok atdik.

⁷Laras eburu mi lempanga dik lok keneng taram, mina vaas mi luxupkup; lavabung menemen mi lempanga axap dik lok mavana ram, minak pixan! ⁸Laradan sen, mina pasa leventingen nimi; nemi lengkongkaana, minak pixan eburu mi lososoro at lemeren Leeme Silok, ⁹atla i vot kusu nam gomgonga lavabung menemen. Neni nabam gomgonga limixin at lavabung menemen mi lodoxoma mokmokso la levelinga ruturun.

Salmo 99

Moróa Ni Loorong Silok Ik Lok Pana Axap

¹Leeme Silok, neni Loorong Silok; la limixin di deede. Neni it kis at linin orong teren mavana at lempanga raptava (cherubim) la lavabung menemen ing nengne. ²Leeme Silok neni Lanaraavuk to xeneng Saion, neni ik lok mavana xasep tinotno ri larabung mixin axap. ³Limixin axap dinaba emi asu mi mo laasen silok teren la dinaba tong i do, neni i melemelengan!

⁴Loorong Silok nenu Lanaraavuk, u vavara aleng leveloklok in manton; ugara vaxaru vam leventaangas manmanton kusu limixin diba mumu asu i ro xeneng Israel; ugara xip pot pam mi loklok mokmokso la levelinga rurutun. ⁵Leemi asu ri Leeme Silok ne Moroa atnedik. Mina ngising tin to melamgo at loxot kitkis teren! Neni i melemelengan!

⁶Moses mi ne Aron duga gugu ngan lumaasa ren, la ne Samuel neni ga ngising tin. Diga ngising ti Leeme Silok la neni ga lox epovo levesingising atnedi. ⁷Neni ga paase ridi boro xeneng at lovotakabu; digang tonga res at Lenavolo la levelinga neni gam taba nedi min. ⁸O Leeme Silok, nenu ne Moroa atnema, uga lox epovo lodoxoma at limixin taram; uga lox asuusu i ridi do nenu ne Moroa umdoma xepe lengkakapmek, la uga lox asongot nedi mumu levengkakapmek atdi, ketla melemu uga doxoma xepe laxakapmek atnedi. ⁹Leemi asu ri Leeme Silok ne Moroa atnedik, la ata ngising tin to at loxongkaana xaala Saion! Leeme Silok ne Moroa atnedik i melemelengan.

Salmo 100

Loxompixan Emi Asu

¹Limixin at lavatbung menemen axap, minak pixan ti Leeme Silok!

²Mina lotu saparap Leeme Silok mi lososoro; minat pot parav i mi lempixan loklok momo!

³La mina ven kibis i do Leeme Silok neni ne Moroa. Neni ga rudum dik, la nedik ateren akmokso; nedik limixin teren, nedik laxasipsip teren. ⁴Minak beles at langas povolo ukeneng at loogu laplavang mi leventamtaba ri tong avukat tin; minak beles eburu mi leemi asu rin uto xeneng at lenep tongtonga linga ren. Mina tong avukat tin la mina vemi asu min. ⁵Leeme Silok, neni i lox avukat; labalamu ren ik lok amisik la luruturun teren ti limixin naba nemen amisik la noxo xap.

Salmo 101

Laxakaape At Loorong

¹O Leeme Silok. Loxompixan tarak i paase mumu loxokok la levelinga mokmokso ram la ana vixan i ru. ²Loklok tarak nabap sepse. Ningisa ba unaba vot posiga ia? Lorooro rak naba dadat to xeneng at loogu rak, ³la a noxo esuuxun mi laxapmek. Nia ak lox angtungun ti leveloklok atnedi dim taba arulu ne Moroa; nia a noxot kis esogo rinotno eburu minedi.

⁴A noxo babala vukpuk, la a noxo emu mi limixin kapmek. ⁵Anaba riki xepe nege di, di vepaase siksikma xapmek mumu lentaba vetpes. A noxo esuuxun mi taradi loklox aaso la im simi aurur i.

⁶Anaba lox asuusu i at laxasep tinedi di ruturun amisik ti ne Moroa la anaba siam abeles nedi xusu dinabak lok eburu minia ro xeneng at loogu at loorong. La nedi ua dixo babala vukpuk, anaba siam ka di xusu dina gugu ria.

⁷Naba xopmen tetadi xaxarang naba nemen eburu minia ro xeneng at loogu at loorong; ba xopmen tintotno tetadi aatu naba nemen saparav ia. ⁸At levenaleng amisik anaba sesele utut limixin ua dik lok leveloklok kapmek keneng at lenep kangka atnedik. Anaba saksu minedi lorooro atdi i bilinga rino uto xamang basinge lemenemen silok at Leeme Silok.

Salmo 102

Lisingising At Laau Mi Lumumuat Teren

¹O Leeme Silok, una ronga lerengteng tarak la una lox epovo lisingising tarak ti loklok tooro ram tia. ²Uguta raba arulu ia at

loxonaleng ak lok at lumumuat. Una ronga res tarak la una lox epovo soso levesingising tarak!

³Lorooro rak na i sonao ngan lusuxa; la lanmet tarak i anan labantuxu rak ngan laxao. ⁴Dip sev asi ia ngan levempivilis mang; la lavavara anan tarak ira xap pam. ⁵At mes silok tinotno; labaaxin tarak ira gelegen axap la labantuxu rak na ira vaa nga at laxasi. ⁶A lok ngan lavatpixa aaxa no xeneng at amatbin, a lok ngan bok lavatdudu i nemen kusuk to at lemenemen ira bin pam. ⁷Axo vunga at lengkanimin; ak lok ngan tinotno lapka ik lok tutulu kap to vana at loogu. ⁸At laxanaleng axap lavamunepen tarak di paase vupu ria; la nedi ua dik lok kalise ia, di tong laasen tarak at loxonaleng di paase asi lentaba vetpes.

⁹⁻¹⁰La mumu i mo lebelemamao silok taram, laxakup i lok ngan ta leveluxa rak, la a inin elong levendan inin mi levengkabili dan at luxatli rak. Uga rebeng kaka ia la uga lu xepe minia. ¹¹Lorooro rak i lok ngan ta lamamau ukantinao; la a lok ngan tinotno levempivilis mang.

¹²Ketla nenu Leeme Silok, unaba nemen amisik ngan Loorong Lexen; lavaola axap dinabam domasu ram. ¹³Unaba ravasu la una lox aru amu lemenemen Saion; loxonaleng ira vot pam kusu tu ri belemumu i; loxonaleng mokmokso nga na ren. ¹⁴Lavasaxaruki ram di vavara aleng i, keke i do limixin petpes diga sele utur i la ira bin ta; la keke i do mo lemenemen ira lok kapmek axap pam, ketla move di balamu aleng i.

¹⁵Larabung mixin axap dinaba marat at Leeme Silok; la lavaorong at lavatbung menemen dinaba marat at lolos teren. ¹⁶Leeme Silok naba vaxaru amlong lemenemen Saion, kerepmo neni naba lox asaxaven lolos teren. ¹⁷Neni naba ronga nedi limixin teren di baava, la ni naba lox epovo levesingising atnedi.

¹⁸I epovo do tara na malagan li mo lempanga Leeme Silok ga lox i xusu mo lavaola melemu diba utus i, la dinaba emi asu min. ¹⁹Leeme Silok ga reven su boro vana at lenep kaala ren no vana; ga reven su boro vana at lemenemen teren ude xopok at lavatbung menemen. ²⁰Ni ga ronga lanteng atdi digak lok at loxokoxo la ga lox asepmus nedi ua ga auret kusu dina sev amet nedi. ²¹Kuren la dinaba vavang mi laasen teren to Saion, la dinaba emi asu min to xeneng Jerusalem. ²²At mo loxonaleng levenabung mixin axap eburu mi levengkitkis orong dinaba etu buru la dina lotu saparap Leeme Silok.

²³Laau ia nave la Leeme Silok ira lox amolos pam ia; ira lox atmut pam lorooro rak. ²⁴O Moroa, laau ia nave la uguta lok kepe soso ia. O Leeme Silok, nenu u rooro amisik.

²⁵Uga rudum li lavatbung menemen ganoxa, la uga lok laxalibet mi lukngam akmokso. ²⁶Dinaba sonao, ketla nenu unaba nemen amisik; dinaba maut ngan lenbantamon. Unaba lu asu midi ngan lenbantamon, la dina sonao. ²⁷Ketla levereven taram kopmen nak lox ekun, la lorooro ram

noxo xap. ²⁸Laxamdak mi laxaalik atnema dinabak lok keneng at loklok tatao maxopok at loxokok taram; levempipisik li atnedi dinaba rooro avukat mun.

Salmo 103

Labalamu At Ne Moroa

¹Labalak, una emi asu mi Leeme Silok! Lorooro axap tarak, una emi asu mi laasen kaala ren! ²Labalak, una emi asu mi Leeme Silok, la uguta domampe mo lebelemumu ren. ³Neni ga doxoma xepe lengkakapmek tarak la ni ga lok kepe levenanmeres axap tarak. ⁴Ik lox asepsu ia basinge lamaut la ik lox anarong ia mi labalamu la lebelemumu. ⁵Ik suxa lorooro rak mi lempanga avukat, kusu anaba nemen ngan laau la ana lolos ngan lamaalom.

⁶Leeme Silok i tu at lenep at limixin baava la ik lox asepmus nedi ua limixin di lox asi di. ⁷Neni ga lox asuusu leven doxoma ali ren ti ne Moses la ni ga lok leme Israel kusu dina ven leven gugu lolos teren. ⁸Leeme Silok neni laradi at lebelemumu la labalamu, la ixok belemamao soso ketla i umsu mi labalamu lexen. ⁹Ni xopmen nak musak amisik; la lebelemamao ren kopmen na nemen amisik. ¹⁰I epovo xusu atap kip ka leveloklok asongot teren, ketla neni xopmen nak lox asongot nedik na epovo mi levengkakapmek atnedik; la ixo poorang leveng kakapmek la leveloklok bilinga atdik. ¹¹La labalamu ren i silok aleng tinedi ua dik lok ngangao ren, la mo labalamu ren i urut aleng upana at laxalibet mavana at lavatbung menemen. ¹²La ik lok kepe leveloklok bilinga atdik uto vaxalom tino, i ngan utonak at lemeren laxangking la utois kopok tino. ¹³I ngan ne temen laxamdak i belemumu luvutnitna, kuren la Leeme Silok i belemumu nedi ua dik lok ngangao ren. ¹⁴Neni iklen i do ga rudum dik mi lavanga salai; iklen i do nedik laxakup mene nga.

¹⁵Kuren la nedik, lorooro atnedik i lok ngan mun lempivilis. Nedik ta susu la ta tepoposok ngan levempusuvus aaxa; ¹⁶la lamanman it mas i la ira vaxap manga, la ata baxo ven ka bok ba i. ¹⁷Ketla nedi dik lok ngangao at Leeme Silok, labalamu ren ik lok amisik mavana atnedi, la luvukat teren ik lok amisik tinedi lavaola axap, ¹⁸la tinedi bok di ruturun ti lekabus teren la ding tonga res tuturun at levelinga ren.

¹⁹Leeme Silok ga vuxaxis li loxot kitkis teren to vana at laxalibet; la neni i ngan Loorong Silok mavana at lempanga axap. ²⁰Mina emi asu mi Leeme Silok, nemi lubung angelo lolos, nemi ua ming tonga res at levelinga ren, la ming tonga lempanga neni i tong i. ²¹Nemi limixin lolos axap to vana at laxalibet, mina emi asu mi Leeme Silok, nemi lavasaxaruki ren no mik lok leven gugu mu asu lavavara ren. ²²Nemi

lempanga vipis axap teren at lengkot axap neni ik lok gomgo ren, mina emi asu mi Leeme Silok.

Labalak, una emi asu mi Leeme Silok!

Salmo 104

Leemi Asu Ri Laradi Runtudum Li

¹Labalak, una emi asu mi Leeme Silok! O Leeme Silok, Moroa rak, u silok aleng! Ung sigaara mi lolos la lisisinang. ²U bom u mi laxasep. Uga rep asala laxalibet ngan ta loogu kadis ³la uga vaxaru loogu silok tu ro mavana at ladan ik lok tovana. La ut kis to mavana at lengkon takabu ngan lagengen taram la lamanman it mas aonon u. ⁴Uk lok laramera manman di ngan luvuttadi loklok ka linga ram la laxao at lavanga i mam i lok ngan lavasaxaruki ram.

⁵Ugara vaxaxis li atmatkun pam lavatkangka to vana at lamkumkun teren, la ixo epovo do tara na ut asi bok ba i. ⁶Uga lok li laras to mavana ren ngan labantamon, la ladan gak mit lempat kaana. ⁷At loxonaleng uga musak laradan, diga sixiro; diga ekakala oo at loxonaleng diga ronga levelinga lolos taram. ⁸Digam tem soobang su boro vana at lempat kaana la uto xopok at larasa, ugo ap mo loxot nenu uga lok li i xusu ridi. ⁹Uga lok li lapdopdo mo nedi di noxo los polo i, tik lok pe di xusu di noxo sak pava bok ba lavatkangka.

¹⁰Uga lok levempuuvut dan i sesen to at larasa, la lempat dan silok ik sixit (i sesen) kantubu at levengkaana. ¹¹Dik lox asuusu levendan ti levempanga sio mi lavanuet kangkedek atdi; laxan dongki sio dik lox axap lanminu atdi go. ¹²La lavapixa dip kip levempotpos atdi, go at larauna at larasigege dan la dirak piban.

¹³La uk lox asu larakabu boro vana at laxalibet uto vana at lengkong kaana, la lavatkangka i unumsu mi leveloklox anarong taram. ¹⁴Uk lox asuusu levempivilis ti laxan bulumaxao la levenuna ri luvuttadi rik lok lempanga, la kusu luvuttadi dibat lotlo bok leveluxa ridi, ¹⁵la dinak lox asuusu leven vaen tik lox amomo di, la levenmonok dan olip nabak lox aklek di, la lengkong kide nabam taba di mi lolos.

¹⁶Laxanbet it pot solo at lempar una sida ro Lebanon, mo laxanuna at Leeme Silok axa gatlo li di. ¹⁷La lavapixa dik lok laraugu atnedi go; la lempatboxon dip kip levempotpos atdi ro at larauna kaa (fir tree). ¹⁸Laxanme sio dik lok to vana rubu at lempatkaana, la lempat pusi sio di lipe ro xeneng at lempat buang.

¹⁹Uga rudum li lagaaling kusu rik lok katling leven gaaling; la laxangking ikleklen loxonaleng teren ti lotup. ²⁰Uga lok laxanimin, la keneng ap mo lamain, laxampanga sio axap dip tava su. ²¹Leven laion

maxat di booro at loxonaleng di puse luxa, di puse ri mo levempanga anan no ne Moroa im taba i. ²²La do laxangking na rip su, dimlomlong la dirak midi ro at lempatmamara atdi. ²³Melemu limixin dip tavasusu rik lok leven gugu atdi la dira gugu abung tino.

²⁴O Leeme Silok; ugara lok pam laxampanga solo! La uga lok di mi lakleklen, do! Lavatbung menemen i umsu mi laxampanga vipis axap taram. ²⁵Pen ba mo laras, i silok tinotno la ip tepas, mo lara met panga vipis silok la lixilik ua ataxo epovo ri exes i, di nemen teren. ²⁶La lempattaaxup di sesen to vana ren, la mo lavatpanga sio boro at laras, ne Levietan no nenu uga lox i, i gosogoso go xeneng ap mo laras.

²⁷Nedi axap na di nuunu li ram kusu unabam taba luxa di mo do dinak toxo. ²⁸Nu um taba luxa di la di vanan i; nenu um taba leveluxa xusu rik lox axap lavavara atdi. ²⁹Mo do u raba arulu di, dik marat; mo do una lok pes lamamas taram atdi, di remet la diramlomlong ti laxakup no nedi diga ravasu ren. ³⁰Ketla do u rudum nedi mi lamamas, u raba di mi lamamas; la u raba lorooro maxat ti limixin at na lavatbung menemen.

³¹Keke lisisinang at Leeme Silok naba nemen amisik! Keke Leeme Silok na momo mi lempanga neni ga rudum pam i! ³²Neni i reven tooro lavatbung menemen la lavatbung menemen ing nengne; neni inglong tu at lempat kaana, la dirap kip soobang asu lusuxa.

³³Anabak pixan ti Leeme Silok keneng at lorooro axap tarak; at levenaleng nia ana rooro ren, anabak pixan emi asu ri ne Moroa rak. ³⁴A vara i do ni naba momo at lengkom pixan tarak, atla leklek tarak i laala boro ren. ³⁵A vara i xusu diba sele utut kepe luvuttadi dik lok laxapmek uto basinge lavatbung menemen; la boxopmen bok ba timixin kapmek.

Labalak, una emi asu mi Leeme Silok!

Una emi asu mi Leeme Silok!

Salmo 105

Moroo Ga Lok Tatao Limixin Teren Me Israel

¹Nedik ata tong avukat ti Leeme Silok, ata tong asu lolos teren; ata tong axasev i ri levenabung mixin buaang, mumu lempanga sangsangu neni ira lok pam i. ²Atak pixan emi asu ri Leeme Silok; ata tong asu lempanga nunuan neni ira lok pam i. ³Ata momo mila nedik ateren, la nedi di lotu parav i mi lebelen di axap dina sosoro. ⁴Atat pas parap Leeme Silok atdik kusu ri lok ka leveloklok tooro, la ata lotu parap (singising, lok ngangao) amisix i. ⁵⁻⁶Nemi livipisik li at ne Abaram, laradi gugu at ne Moroa, la nemi livipisik li at ne Jakop, mo laradi ne Moroa ga soxolik ka i. Minam doma aklen ti lempanga sangsangu ne Moroa ga lox i, la mo levesongsongot neni ga raba limixin munepen min.

⁷Leeme Silok neni ne Moroa atdik; la mo levempapaase matmatkun teren ti limixin axap at na lavatbung menemen. ⁸Neni naba tu amisik at lekabus teren, la naba lox epovo mo laxakaape ren tinedi larabin sangaun kobot laraola. ⁹Neni naba doma amisik livirivit li ni ga lox i mi ne Abaram la mo laxakaape ren ti ne Isak. ¹⁰Leeme Silok ga lok lekabus mi ne Jakop, mo lekabus ua naba nemen amisik. ¹¹Ni ga lok ti ne Jakop keretna, “Anaba raba u mi na lenep silok Kanan, la na laxangka naba nemen ngan ataram axa.

¹²Limixin at ne Moroa di goxo buaang, la diga nemen kadiiong ngan lavaose to at lenep silok Kanan. ¹³Diga vovo saasaa onon mun at levenep silok uto at levenep silok petpes, la at lara kitkis orong silok uto at lara kitkis orong silok petpes. ¹⁴Ketla ne Moroa goxo ke xepe ba tara gita lox abaava nedi; neni ga xok nedi, la ga sak pinak lavaorong silok mi levelinga i lok keretna, ¹⁵“Nemen gat mita lox asongot limixin soksoxolik tarak; la nemen gat bok mita lox asongot lavaeme vapaase ali rak.”

¹⁶Leeme Silok ga riki asi lean kangking ti lenep kangka atdi, la leveluxa atdi gara xap pam. ¹⁷Ketla neni ga riki amgo lara laradi ri limixin teren, laasen teren ne Josep, mo diga sesep min kusu naba ravasu ngan lasaxaruki ro Isip. ¹⁸Diga xoxo alis luxangkedek teren mi lemparoos sen, la diga vaxa onga i mi loxon aen. ¹⁹Josep ga nemen ngan laradi xoxoxo, ga se at mo laaleng lavapaase ali ren ga soorun; levelinga at Leeme Silok ti ne Josep ga lox asuusu i do neni goxo raba arulu i. ²⁰Loorong me Isip ga soxomus asu i, ni lamgomgo at levenabung mixin buaang la ga lox asepmus i. ²¹Neni ga lok li ne Josep kusu nam gomgonga lagavaman teren; la ga lok li box i ri lok tatao mavana ap mo lenep silok Isip. ²²Ni ga ruuna lolos mavana atdi lentaba luvuttadi amgomgo at loorong la gak lok ka bok levelinga ren kusu ri anasa luvuttadi mukun.

²³Melemu ne Jakop eburu mi limixin teren diga beles ukeneng Isip, la digara nemen ta go ap mo lenep silok. ²⁴La Leeme Silok ga lox avosok aleng nedi go, la ga lok nedi diga lolos aleng tinotno ri lavamunepen atdi. ²⁵Neni ga lok limixin me Isip diga bele mumuat ti limixin teren, la lebelen di ga xapmek aleng tidi. ²⁶Melemu Leeme Silok ga riki ne Moses laradi gugu ren uto ri limixin teren, la ga riki bok ne Aron mo neni ga soxolik ka i. ²⁷Duga lok leveloklok katling at ne Moroa kantubu atdi, la lempanga sangsangu bok teren keneng at lenep silok Isip. ²⁸Neni ga riki lamain bonot la ga lox amain axap mo lenep kangka; ketla leme Isip move diga ronga xepe levelinga ren. ²⁹Neni ga vuk gili laradan atdi ri lada, la laxanmat axap digara met. ³⁰La lenep kangka atdi ga umsu mi laxangkoak, mo digat los beles bok uto xeneng at lengkot mikmidi at lubang amgomgo. ³¹La ne Moroa ga tong i, la laxanulang mi laxan ngi robo diga umsu aleng at mo lenep silok axap.

³²La ni ga riki lavatbet uat eburu mi lavanga ga mam, ukeneng ap mo lenep silok atdi. ³³La dugak paksa asi larauna vaen atdi, eburu mi larauna pik bok la ga lox asubu bok larauna axap. ³⁴Neni ga tong mun i la, laxasixu diga vot, ga buaang aleng la di goxo epovo rinotno kusu ri exes di, ³⁵diga van axap lempanga ga susu at laxangka; la diga van axap bok lempanga digat lotlo i. ³⁶Neni ga sev amet axap laxamdak temes avot keneng at lara kitkis koetemen to Isip.

³⁷Melemu neni ga lam asu limixin me Israel, digap kip ka laxa siliva la gol at leme Isip, la nedi axap diga rooro nunuan la diga lolos. ³⁸Limixin me Isip diga momo aleng at limixin me Israel diga vas kaxat basinge di, mila diga marat aleng atdi. ³⁹Moroa ga vung pava nedi mi loxontakabu kusu ri lok tatao di, la lababao at laxao ti raba nedi mi laxasep at lengkanimin. ⁴⁰Diga sing ne Moroa, la neni ga raba nedi mi levempixa (quail) kusu ridi ri anan, la ga raba avan mais nedi mi lengkide boro vana at laxalibet. ⁴¹Neni ga lox arem suang lara lavaruat, la ladan ga rem soobang su ukamang; ga ngan lavatdan sen la ga sesen go xeneng at lamatbin; ⁴²mila neni gam doma mo laxakaape xaala ren, ga raba i ri ne Abaram laradi gugu ren.

⁴³Kerepmo neni ga lam asu limixin soksoxolik teren basinge lenep silok Isip, mi langsung lososoro, la digak pixan la digap kup momo. ⁴⁴Neni ga raba nedi mi lenep kangka at lentaba levenabung mixin petpes: la digara ruuna ka nga leventaamang atdi, ⁴⁵kusu limixin teren diba rongga res at levelinga ren, la dina mumu asu mo lodoxoma ren. Ata emi asu mi Leeme Silok

Salmo 106

Leveloklok Anarong At Leeme Silok Ti Limixin Teren.

¹Nedik ata emi asu mi Leeme Silok. Ata tong avukat ti Leeme Silok, mila neni mun i lox avukat aleng, la labalamu ren naba nemen amisik. ²Kopmen tara i epovo na tong axap leven angsangan lempanga silok neni gara lok pam i. Kopmen tara i epovo xusu naba lox epovo lodoxoma ren mi leemi asu rin. ³Nedi dinang tonga res at levelinga at ne Moroa la di lok amisik lempanga ik mokso, dina momo.

⁴O Leeme Silok. Uguta domampe rak, mo do una lok tooro limixin taram. Una us abeles box ia ukeneng at limixin taram, mo do una lox asepsu di. ⁵Una ke ia aba ven limixin taram dinaba ngasang kobot, la ana ruuna bok tomomo eburu minedi; la anak lok eburu bok midi xusu ri emi asu minu.

⁶Marak lok pam laxakapmek kerekngan lavalabat atnama diga lox i, mara soogong pam la mara bixurun. ⁷Lavalabat atnama di goxo xasep

nunuan at lempanga sangsangu neni ga lox i ro Isip. Diga domampe mo levenaleng buaang neni ga lox asuusu labalamu ren tidi. La digang tonga viribang tin, ne Lanaraavuk to at Loxontas Memele ⁸Ketla neni ga lox epovo laxakaape rentidi la ga lox arooro avolo di go, la kerepmo ni ga lox asuusu mo langsangan lolos teren. ⁹Neni ga tong mun i ri Loxontas Memele, la laras gara mes ta, la neni ga lam avolo limixin teren at laxangka mesemes. ¹⁰Neni ga lox aroo di basinge lavamunepen atdi, la ga lox asepmus di basinge limixin esep boro Isip. ¹¹Laras ga vula pe axap di, la kopmen tinotno tara ga sepsu basinge laniau. ¹²Melemu limixin teren diga nuunu at levengkakaape ren, la digak pixan emi asu min.

¹³Ketla diga domampe soso mun lempanga silok ne Moroa ga lox i, la di goxo ngangais ba ri tevelinga axasep teren. ¹⁴To at lamatbin diga umsu aleng mi langaongao anan, la diga lok tong pen ne Moroa. ¹⁵Kuren la neni ga raba nedi mi levempanga nedi diga sing tin, ketla neni ga sep bok nedi mi lanmeres kapmek.

¹⁶Diga tere mumu aleng ne Moses, la ne Aron to at lamatbin, nedu luradi gugu at Leeme Silok. ¹⁷Melemu lavatkangka ga rem suang la ga xonom ne Datan, la garak mit bok ne Abiram midi loxoetemen. ¹⁸La laxao ga si boro vana la ukopok tinedi diga mumu asu du, la ga rin asonao axap mo luvuttadi.

¹⁹Melemu leme Israel diga lok lovovo bulumaxao ro Sinai, la digara lotu parav i ngan mo lomoroa xaxarang. ²⁰Diga sok sisixe ne Moroa mo i silok aleng la diga lok ekun lamakmaran teren, la diga lotu parap mo lovovo at lubulumaxao, mo i anan pivilis. ²¹Diga domampe rinotno ne Moroa mo ga lox aroo di, mi langsangan lolos teren to Isip. ²²Diga domampe mo lempanga lolos, neni ga lox i go, la lempanga sangsangu neni ga lox i ro at Loxontas Memele. ²³La ne Moroa ga lok do naba sele ut kepe limixin teren, ketla laradi gugu ren ne Moses, ga vaase pe ne Moroa xusu noxo lox asuusu lebelemamao ren tidi.

²⁴Melemu diga sok tixirixes kepe mo lenep kangka ramtaba, mila di goxo nuunu at laxakaape at ne Moroa. ²⁵Digak lok to xeneng at laraugu kadis atdi la digara gagalinga amisik la di goxo ronga ba levelinga at Leeme Silok. ²⁶Kuren la neni ga xaape rinedi mi luruturun do ni naba lok nedi dina remet to at lamatbin; ²⁷la na lok livipisik li atdi, dina epeseves ti levenabung mixin petpes la na ke xepe nedi, dina remet etaba onon to at levenep silok petpes.

²⁸Melemu nedi limixin at ne Moroa digak lok to Pior, diga lotu saparap lomoroa xaxarang ne Baal la digara anan leventamtaba digap lavang min ti lenmoroa kopmen torooro atdi. ²⁹Kuren la diga lox axatu lebelemamao at Leeme Silok mi leventuptuvuk kapmek atdi, la langsangan lanmeres kapmek ga vot kantubu atdi. ³⁰Ketla ne Penias ga ru upana la ga sep amet mo luradi xapmek la mo lanmeres ga xap ta. ³¹Na lavanga avukat,

ne Penias ga lox i, move limixin at ne Moroa dim doma i; la dinabam doma su bok teren at na levenaleng i tu umelamgo.

³²Melemu diga lox amusak Leeme Silok to Meriba at levempuuvut dan; la ne Moses ga xip tutu mi mo lumumuat mumu laxakapmek atdi. ³³Diga lox abelemamao i, la ni ga paase solo la ga paase tupgat ta.

Leme Israel Diga Rupot To At Lenep Kangka Ramtaba

³⁴Leme Israel di goxo sev amet lavamolon ap mo lenep kangka kerekngan Leeme Silok ga tong taba di min ti lox i; ³⁵ketla diga epot ka di, la diga reven seo ka loklok benben atdi. ³⁶Limixin at ne Moroa diga lotu parap laxampoovo vanga, kuren la diga oon at levesin mumu mo loklok atdi. ³⁷Digam taba mi laxamdak mi laxaalik atdi, ngan laplavang atdi ri levenmoroa xaxarang me Kanan. ³⁸Diga sev amet mo laxamdak mi laxaalik ua kopmen taxakapmek atdi, la mumu mun mo langas diga lox abilinga mo lenep kangka ramtaba. ³⁹La kerepmo bok diga lox abilinga nedi xa; diga ke xepe rinotno levelinga at ne Moroa.

⁴⁰Kuren la Leeme Silok ga belemamao aleng limixin teren, neni ga musak teng tinotno midi. ⁴¹La neni ga raba arulu di kusu nedi lavamolon la lavamunepen atdi dinabam gomgonga di. ⁴²Diga baava aleng mi levenaknixip, mo lavamunepen atdi diga raba nedi min. La diga nemen aleng maxopok at lolos at levendoxoma atnedi lavamunepen. ⁴³Buaang levenaleng Leeme Silok ga rebeng asu ka limixin teren basinge di, ketla move di goxo mumu asu levelinga ren, kuren la digam subu tup tino ukeneng at laxakapmek silok. ⁴⁴Ketla Leeme Silok ga ronga nedi, at loxonaleng digang teng tin, la neni ga ronga xibis lumumuat atdi. ⁴⁵Mumu mo lumumuat atdi, neni ga doma mo lekabus teren; la mumu langsung labalamu ren. neni ga lox ekun lodoxoma ren. ⁴⁶La neni ga lok lavamunepen atdi, diga suma xapmek mumu loklok diga lox i ridi.

⁴⁷O Leeme Silok ne Moroa atnama. Lox aroo nama, la una lam asu nama boro xantubu at na larabung mixin, kusu maba tong avukat tu la mana emi asu mi laasen kaala ram. ⁴⁸Ata emi asu mi Leeme Silok, Moroa me Israel; ata emi asu min monga la amisik. La limixin axap dina vaase xeretna, "Tuturun!" Ata emi asu mi Leeme Silok!

Salmo 107

Leemi Asu Ri Ne Moroa Mumu Labalamu Ren

¹Nedik ata tong avukat ti ne Moroa mila neni axa i lok nunuan; labalamu ren naba tu lexen! ²Nemi axap ua neni ga lox asepsu nimi, mina tong amisik na levelinga ti emi asu mi Leeme Silok i lok keretna, "Labalamu ren naba tu lexen!" Neni ga lox asu ka nimi basinge

lavamunepen atnimi, ³la gara lam amlong nimi ude boro at levenep silok petpes, at lenep meso la mesi la boro bok at lenep mero la mexun. ⁴Lentaba diga soronga ro at lamatbin aaxa la di goxo epovo xusu dina vuse ka tangas tidi uto at temenemen silok kusu diba nemen e. ⁵Nedi digak toxo la digak minu, la diga doma i do, di mo dina seeve nga. ⁶Melemu diga reng ti at Leeme Silok mumu lumumuat atdi, la neni ga lox asu di basinge lixitkis etaba. ⁷La neni ga lam nedi at langas manmanton uto at lemenemen silok, la diga nemen e. ⁸Kuren la ik mokso do dina tong avukat ti Leeme Silok mumu mo labalamu lexen teren, la ri lempanga nunuan neni gara lok pam i ridi; ⁹atla Leeme Silok im taba dan limixin dik minu, la im taba nedi dik toxo mi lempanga anan avukat.

¹⁰Lentaba digang songot keneng at lamain bonot ngan luvuttadi xokoxo, mo diga xoxo nedi mi levenoos sen. ¹¹Digak lok go mila diga ronga viribang at levelinga ren, ne Moroa, ni Lanaraavuk. La diga sok tixirixes xepe levenanasa ren. ¹²Diga baava rinotno mi laxan gugu solo, la digak sak saaban, la goxopmen tara go ri lok tooro di. ¹³La melemu diga ro ke at Leeme Silok at levenaleng at levenmumuat la neni ga lox asepmus di basinge mo labaava. ¹⁴Neni ga lam asu nedi basinge lamain la loxokoxo, la ga ba koxorop pes levenoos sen basinge di. ¹⁵Kuren la i epovo do dina tong avukat ti Leeme Silok mumu mo langsung labalamu ren, la lempanga nunuan neni gara lok pam i ridi. ¹⁶Mila neni i tit dadas asi laramusaragu dik lox i mi loborons, la i tit amdanda lengkompanga soksoxoba matmatkun dik lox i mi la aen.

¹⁷Lentaba diga lok ngan ta luvuttadi baulang, la diga xip levesongsongot mumu leveloklok kakapmek la leventaangas kapmek atdi. ¹⁸Digak bulunga levempanga anan, la ma lixilik diga lok do dina met. ¹⁹Melemu diga reng ti Leeme Silok mumu levenmumuat digap kiv i, la neni ga lox asepmus di basinge mo levenaknixip. ²⁰Neni ga tong asu levelinga ren ti lok pes leven anmeres atdi, la neni ga lox asepsu di basinge lanmet. ²¹I epovo do nedi dina tong avukat ti Leeme Silok, mumu mo langsung labalamu ren, la mo lempanga nunuan neni ga lox pam i ridi. ²²I epovo do dina tong avukat ti Leeme Silok la dina raba i mi leventamtaba eburu mi livikpixon ti emi asu, kusu ri tong asu mo lempanga neni ga lok pam i.

²³Lentaba diga sen tangtagap mi lempattaaxup to at laras axa, kusu dina ruuna kaka lempilas at mo lugugu atdi rovana at lempattaaxup. ²⁴Diga ven lempanga sangsangu Leeme Silok ga lox i mi mo lolos teren to at laras. Mo lempanga ga nunuan aleng. ²⁵Neni ga vaase, la ga lok kaxat mo langsung lamanman silok, mo ga lox axatu kaxat lempopaxanao. ²⁶Lempopaxanao ga xip kaxat mo lempattaaxup upana xasep la ukopok la mumu mo laniu di goxo doma abelemes bok ba do diba roo. ²⁷Diga saaban onon la digat pas tangtangu ngan diga inin lengkadan lolos, la di

goxok len i do diba lok lavanga salai. ²⁸Melemu diga ro ke at Leeme Silok mumu mo levenmumuat atdi, la neni ga lox asu nedi basinge mo laniu. ²⁹Neni ga lox amila lamanman bet la garak lox atnaasan ta, la lempotas at laras bok digak midi mila. ³⁰Diga momo aleng at lavanga ga mila, la neni ga mu asu lavavara atdi diga oso avukat to at losoolom. ³¹I epovo do dina emi asu mi Leeme Silok, mumu labalamu lexen teren la lempanga nunuan neni ga lok pam i ridi. ³²I epovo do dina tong asu lolos teren keneng at lempotpot buru at limixin, la dina emi asu min kantubu at lovotpot buru at luvuttadi amgomgo.

³³Leeme Silok ga vuk gili leven menemen dan ga ngan ta lamatbin patmang, la lengkondan i puuvut su, neni ga lox amesemes i, ³⁴la laxangka liliun neni ga lox i ga ngan ta lomom tep; neni ga lok na lempanga mumu laxapmek atnedi diga nemen go ap mo leven menemen dan.

³⁵Melemu neni ga ba gili amlong mo lamatbin patmang, ga ngan manga lengkondan i puuvut su, la neni ga lox asen amu laradan sen go at lenep kangka vatmang. ³⁶Neni ga siam avolo limixin digak pakes ti lempanga anan kusu dina nemen go, la diga xip lemenemen silok tidi ri nemen e. ³⁷Digat lotlo leventaamang la laxanoos vaen, la digap sepkin aleng. ³⁸Neni ga lox anarong di, la diga vosok aleng, la neni goxo ke xepe ba levesipsip mi levenbulumaxao atdi gita mun pipisik.

³⁹Melemu lavamunepen diga sak tup mi limixin at ne Moroa, la diga raba nedi mi leven aknixip la levesongsongot silok. ⁴⁰Ketla ne Moroa ga lox asongot nedi limixin munepen, ni ga riki di uto at lamatbin aaxa kusu dina soronga go. ⁴¹Ketla neni ga lam aase limixin pakpakes teren, basinge levenmumuat atdi; la ga lox anarong di kusu dina vosok aleng ngan laxasipsip. ⁴²Do limixin mokmokso dina ven i na, dina momo, ketla nedi limixin kapmek dinaba vamus levenngusno atdi. ⁴³Do nege lodoxoma ren i xasep nunuan, ni na doma mumu i na lempanga, la na doma mumu avukat bok labalamu lexen at Leeme Silok.

Salmo 108

¹O Moroa. Labalak it kis saga ram. Anak pixan tu, la ana emi asu minu mi lorooro axap tarak. Labalak, una aus! ²Loxontaaleng tarak mi ligita, muna gagas. Nia anaba sak aus laxangking at labarakoxot mi loxompixan. ³O Leeme Silok. Ana tong avukat tu kantubu at larabung mixin axap, la abak pixan emi asu minu kantubu at limixin; ⁴mila labalamu lexen taram i silok aleng tinotno, la i umsu bok to mavana at laxalibet; la luruturun taram i suxuna axap lamavangkap. ⁵O Moroa, una lox asuusu lolos taram tovana at lamvangkap, la una lox asuusu bok lisisixam taram to at lengkot axap at na lavatbung menemen.

⁶Una rebeng nama mi lolos taram la una lox asepsu nama basinge lavamunepen atnama; la una ronga res at lisingising tarak, kusu una lox asu ka limixin taram, mo u balamu nedi, basinge lavamunepen atdi. ⁷To at loogu xaala ren Moroa ga tong i xeretna, “Nia anaba sak tup mi lavamunepen tarak la ana sak epeseves di basinge lenep kanga rak. Nia anapdo epes nom lemenemen Sekem ti limixin tarak, la anapdo episa mo lasa ro Sukot tidi. ⁸Nia a ruuna mo lenep Gileat, la Manase; la lenep Epraem bok ni lavatkiam tarak i tu katling ia at leesep. La lenep Juda ik lox asuusu lubang amgomgo ri limixin tarak. ⁹Ketla lenep Moab naba lok ngan lavattingtigon gosogos panga; nia anaba lu mi luxompanga vatpas tarak uto at lenep Edom, ngan loklok katling do nia a ruuna i. Limixin me Pilstia diga lok do dinaba sak tup minia, ketla digoxo epovo.”

¹⁰O Moroa, nege bamgo ria uto at lenep silok Edom? Nege ba lok tooro ia xusu ana sak tup midi ro at lemenemen silok atdi, mo diga bos kangkan i mi larangas uat. ¹¹Kereva, ura sok sisixe xepe rino vam nema? Kereva, ixo epovo bok ba xusu una vas su eburu bok ba mi limixin esep atnema? ¹²Una lok tooro nema kusu mana sep lavamunepen, atla lolos at limixin noxo lok epovo tavanga.

¹³Do ne Moroa na ru eburu minema, manaba sak tup mi lavamunepen, neni naba sev asubu di.

Salmo 109

¹Moróa, nenu xusuk mun, nia a emi asu minu, la nemen gat utam pamngus, ²mila limixin kapmek la limixin sosolo arup, mo nga di paase sox ia, la dira li laxaxarang mavana rak. ³Di xarang taba ia, mi laxalinga bele ngatngas atdi; dik sok taba parang mun ia mi levelinga la kopmen tavasuun teren. ⁴Nia agat kis etangas eburu midi la aga ngising tidi, ketla dixo tu tooro ba ia. ⁵Di vorang amlong lununuan tarak tidi mi laxakapmek, la lixitkis etangas tarak tidi di vorang i mi lebele ngatngas atdi.

⁶O Moróa, una lok katling ka taradi sosolo arup, kusu ri lok li laradi munepen minia at lavapaase, la mo laradi sosolo arup naba sok taba i mi levelinga. ⁷La do dina ronga linga ren, a vara i xusu diba vuse ka laxapmek teren; la i epovo do limixin dina ronga levesingising teren la dinaba ronga xibis i do ni laradi xapmek. ⁸A vara i xusu levenaleng at lorooro ren na xap kot; a vara i do tara vetpes na lok ka lixitkis amgomgo ren. ⁹A vara i do laxamdak mi laxaalik teren dina ravasu ngan lubangkarun, la latkin teren nak lok naa. ¹⁰A vara i do laxamdak mi laxaalik teren dina lok ngan luvuttadi singising panga; a vara i xusu dina sakala su midi boro at loogu tem dadas atdi. ¹¹A vara i do na laradi xapmek, do tevendinau go ren, mo luvuttadi na laradi xapmek ga dinau

atdi, dina vot la dina lok ka axap lempanga ren; a vara i do limixin petpes bok dina lok ka mo lempanga ni ga gugu ka i. ¹²A xopara tara na lox asu loklox anare rin, kopla na balamu mo laxamdak mi laxaalik teren melemu at lanmet at ne temen di. ¹³A vara mo livipisik li ren dina met ut, la levenasen atdi dina sakpun kepe i ap mo laraola melemu. ¹⁴A vara i do laxakapmek at lavalabat teren nak lok amisik at lodoxoma at Leeme Silok, la mo laxapmek at nenen, na nemen amisik la nemen gat di guta lok pes kepe i. ¹⁵A vara mo laxapmek atdi nak lok amisik to melamgo at Leeme Silok la neni naba ra korop asu xepe nedi basinge lodoxoma at limixin.

¹⁶Mo laradi xapmek goxom doma i do nak lok toloklox anare, ketla gak lox asongot limixin banbalo la gap sep amet di eburu mi limixin pakpakes la baava. ¹⁷Neni ga vavara solo i xusu na lili lasaxaek; a vara i do mo laxasaxaek namlong mu i; neni goxopara i xusu nak lox anarong limixin; a vara i do teta noxo lox anarong i. ¹⁸Neni gak lok momo rik lox asaxaek limixin, ngan lasakula ren; la a vara i do mo loklok asaxaek teren na suxuna amlong i ngan ladan la ngan bok ladan momonok i beles ukeneng at levesi ren. ¹⁹A vara i do lasaxaek na nemen amisik eburu min ngan lavanga singsiga ren, la na ngan labanbaane diga sevut li i ren.

²⁰O Leeme Silok. A vara i do una mu asu mo langas la una lox asongot lavamunepen tarak, atla di xaxarang taba ia do nia laradi xapmek. ²¹Ketla nenu Leeme Silok la Loorong Avolo. Una lok tooro ia kerekngan uga xaape min, la una lox asu ka ia basinge di mumu labalamu nunuan taram. ²²Nenia mun laradi banbalo la pakpakes, la no xeneng at lavatpeeve rak ing songot aleng tinotno. ²³La i auret do ana sonao mun ngan lovovo at laradi laxangking i soso rin ukantinao, la a lok ngan mun lasku lamanman i mas kepe i. ²⁴Luvatgulom tarak irang songot axap ta mila an mun an; la labantuxu rak ira gelegen ta la ira molobe nga. ²⁵Do limixin di ven ia, dik lok kalise ia; la do di ven kora ia, dira piriapat patlak ta.

²⁶Leeme Silok ne Moroa rak. U ruuna labalamu lexen, kuren la una lok tooro ia la una lox asepsu ia basinge di. ²⁷Una lok lavamunepen tarak dinaklen i do nenu Leeme Silok, unaba lox asepsu ia basinge di. ²⁸Diba li lasaxaek tarak, ketla nenu uba lox anarong ia; a vara i do una lox amangan nedi limixin loklok asongot kusu nenia, lasaxaruki ram anaba lok momo. ²⁹A vara i do lavamunepen tarak dinaba ruuna ka lainmangan, la mo lainmangan naba suxuna di ngan lempanga singsiga atdi.

³⁰Nia anaba tong avukat amisik ti Leeme Silok la ana emi asu min kantubu at lovtopot buru at limixin. ³¹Mila Leeme Silok i gagas amisik ti lok tooro limixin pakpakes; la ik lox asepsu nedi basinge limixin sepsep amet.

Salmo 110

Leeme Silok Mi Loorong Soksoxolik Silok

¹Leeme Silok ne Moroa ga vaase ri leeme silok tarak keretna, “Unat kis de at lakngak tino, se ana lok li lavamunepen taram na ngan loxot burubut ti luxangkedek taram. ²Leeme Silok naba lox asilok mo lixitkis amgomgo ram naba ruka i ro Saion; la unabam gomgonga nedi lavamunepen taram. ³At levenaleng at leesep limixin esep taram diba xulubi aleng kusu ri esep. La no mun at lenmaxantamak suubu, luvurau radi ram dibat pas posiga u ro vana at lakaana i xaala.

⁴La Leeme Silok gara xaape vam la kopmen noxo lox ekun bok ba lodoxoma ren. Neni ga lok keretna, “Nenu naba nemen amisik ngan lamaasa kerekngan ne Melkisedek.”

⁵Leeme Silok mo i tu at lenep taram, la neni naba vas adamda lavaorong silok ap mo laaleng neni naba lox asuusu lebelemamao ren. ⁶Neni naba viila mumu loklok at larabungmixin axap, la naba lili bubua lenbantuxu at limixin ni ga sep amet pam di, la na sak tup mi limixin amgomgo at lavatbung menemen axap. ⁷Loorong naba in dan to at ladan sen saparap langas ti lox alolos amu i; kuren la neni naba sak tup mi lavamunepen axap teren.

Salmo 111

Leemi Asu ri Leeme Silok

¹Nedik ata emi asu mi Leeme Silok.

Anaba tong avukat ti Leeme Silok mi labalak axap kantubu at lovtopot buru at limixin mokmokso ren. ²Leven gugu at Leeme Silok i nunuan aleng, la limixin di ven peves teren dim doma solo i. ³La lempanga neni i lox i, i lox asuusu lisisixam la lolos teren; la loklok mokmokso ren naba nemen lexen.

⁴Neni ira lok pam nedik kusu atabam doma amisik mo lempanga nunuan neni ik lox i; Leeme Silok neni ik lox anare ka limixin la i umsu mi lebelemumu ridi. ⁵Neni mun im taba leveluxa, tinedi dik lok ngangao ren; la neni im doma amisik lekabus neni ga lok pam i eburu mi limixin teren. ⁶Neni ira vaxase vam limixin teren mi lolos at leven gugu ren; la ga raba nedi limixin teren mi laxangka at levenabung mixin petpes.

⁷Leven gugu axap at lukngen i nunuan la ik mokso; la mo levelinga axap teren i epovo xusu nedik ata mumu asu i. ⁸Mo levelinga ren naba nemen lexen, mila mo levelinga ga la boro at ne Moroa mo i ruturun la ik mokso. ⁹Neni xusuk mun laradi loklok asepmus ti limixin teren, la ga vaxaxis aulis mo lekabus teren kusu naba nemen amisik; la laasen mun

teren i melemelengan la dira pavanga i. ¹⁰Loklok ti lok ngangao at Leeme Silok, neni lurutu kaxat ti levendomdoma nunuan. La im taba lodoxoma mokmokso rinedi ding tonga res teren.

Leeme asu rin naba nemen amisik la noxo xap.

Salmo 112

Lomomo at Laradi Nunuan

¹Ata emi asu mi Leeme Silok.

Luvukat ti mo laradi i lok ngangao at Leeme Silok, la i lok momo aleng ting tonga res at levelinga at ne Moroa. ²Laxamdak mi laxaalik teren dinaba ruuna levenasen silok go at lenep kangka ramtaba la Leeme Silok naba lox anarong livipisik li ren. ³Laxankoenasun teren dinaba ngasang kobot at laxampanga solo la dinap novos aleng; la neni noxok pakes bok ba ti tempanga.

⁴Limixin avukat di lok ngan laxasep ik lok kantubu at lamain; la dik lox asuusu lebelemumu, loklok anare, la loklok ik mokso. ⁵Luvukat nabat pas ti mo lara im taba gamasa, la ik lok momo mun do limixin dinang sing panga i, la ik lok mo lugugu pilas teren mi lomokmokso. ⁶Lugugu at mo laradi avukat noxo subu, la limixin bok di noxo domampe i.

⁷Neni noxo marat ba at tevelinga mumu tumumuat boro vetpes neni i ronga i, mila lunnunu ren i lolos la i nuunu saga at Leeme Silok. ⁸Leveeve ren ira xus pam, la neni kopmen na marat at tempanga, i nuunu do ne Moroa naba sak tup mi lavamunepen teren. ⁹Neni im taba leventamtaba solo mi lebelemulus ti limixin banbalo; la amisik ik lox asuusu labalamu ren ti limixin; la naba ruuna laasen silok la limixin diba xip aurut laasen teren. ¹⁰La limixin kapmek diba ven i la dina musak, la dinabak milik angtungun tin; ketla levenasen silok atdi ba si aleng tino la mo levendoxoma agagas atdi kopmen noxo soorun.

Salmo 113

Leemi Asu Ri Lununuan At Leeme Silok

¹Nedik ata emi asu mi Leeme Silok.

Nemi luvuttadi gugu at Leeme Silok, mina emi asu mi laasen teren. ²I lox avukat do limixin dina emi asu min mo la at levenaleng axap i tu melamgo. ³Limixin axap boro at lavanuet mera manman at na lavatbung menemen, mina emi asu mi Leeme Silok. ⁴Leeme Silok mun im gomgonga mavana at larabung mixin axap, la lisisixam teren i umsu rovana at laxalibet.

⁵Kopmen tara i lok ngan Leeme Silok ne Moroa atdik, neni mo it kis at loxonin orong teren pana. ⁶La mo ik milik si ukopok ti reven lamavangkap mi lavatkangka. ⁷Neni ik lox axatu nedu luvuttadi banbalo basinge laxakup la iram tebeng luvuttadi pakpakes basinge laxakup at lempat balangkao, ⁸la irak lox asilok nedu kusu dina etangas eburu mi lavanarong at loorong, nedu di silok kantubu at limixin teren. ⁹Neni ik lox amenemen lodoxoma at lavakin kopmen dina pisik, la im taba nedu mi laxamdak mi laxaalik.

Ata emi asu mi Leeme Silok.

Salmo 114

Loxompixan At Lovovolo Pe

¹Ga se limixin me Israel diga vas kaxat boro Isip, nedu livipisik li at ne Jakop diga on basinge lara lubang mixin at lavapaase vetpes. ²Nedu leme Juda diga ravasu ngan limixin kaala at ne Moroa, la nedu leme Israel diga ravasu bok ngan limixin tinotno ren.

³At lavatpas atdi boro Isip, Loxontas Memele ga ven tangarang di la gara oo nga, la ladan sen Joridan ga sen korop, ⁴la lempat taavut digat los ngan lempatme, la lengkong kaana digat los ngan levenat sipsip.

⁵Tila ba la nenu loxontas uga oo, la tila ba la nenu ladan sen Joridan uga sen korop? ⁶La tila nemi bok lempat taavut migat los ngan laxanme, la nemi lengkongkaana migat los ngan levenat sipsip?

⁷Lavatbung menemen lavatkangka axap, una dede at lovtopot at Leeme Silok; atla ne Moroa at ne Jakop naba ru asaxaven. ⁸Ni ga lok das asu ladan sen boro xeneng at lavaruat, la lengkodan ga puuvut das su at lempat buang uat.

Salmo 115

Legesa Moroa Ruturun Mene

¹O Leeme Silok, ik mokso do limixin dina xip aurut laasen taram, la ixok mokso do dina xip aurut levenasen atnama, ketla nenu xusuk mun u epovo ri lok ka leemi asu, mumu labalamu lexen taram la uk lox epovo amisik levelinga ram.

²Tila ba la larabung mixin di sue nama do, “Ua nga no ne Moroa atnimi?” ³Moroo atdik ik lok toxun pana at laxalibet, la neni ik lok lempanga sala i neni i momo min. ⁴Levenmoroo atdi di lox i mi lisiliva la gol, la di lok mun i mi levengikngen di. ⁵Levenngusno mo atdi, ketla dixo epovo na paase; lengkatli mo atdi, ketla dixo epovo ti reven.

⁶Levenbaalung mo atdi, ketla dixo epovo nang tonga; levenisna mo atdi, ketla dixo epovo nam sumak. ⁷Levengkiknggen mo atdi, ketla dixo epovo na suma xisip; lengkangkedek mo atdi, ketla dixo epovo nat pas kopla dina lok gusugus. ⁸Naba lox avukat do nedi di vop na laxampoovo vanga eburu bok minedi di nuunu saga atdi, dinaba vee voovo vanga bok.

⁹Nemi limixin me Israel, mina nuunu saga mun at Leeme Silok; neni mun laradi loklok tooro la lenban bok atnimi. ¹⁰Nemi bok lavamaasa at ne Moroa, mina nuunu saga at Leeme Silok; neni mun laradi loklok tooro la lenban bok atnimi. ¹¹La nemi mi lotu saparap Leeme Silok, mina nuunu saga ren; neni laradi loklok tooro la neni bok lenban atnimi.

¹²Leeme Silok im doma dik, la neni xa naba lox anarong dik. Neni naba lox anarong limixin me Israel, la naba lox anarong bok nedi lavamaasa at ne Moroa. ¹³Neni naba lox anarong bok nedi di lok ngangao aleng teren, nedi limixin amgomgo la nedi limixin gamasa.

¹⁴A sing Leeme Silok do na raba nemi mi taxamdak mi taxaalik, tinemi eburu bok mi livipisik li atnimi. ¹⁵A sing Leeme Silok kusu na lox anarong nemi; neni Laradi Runtudum Li at laxalibet mi lavatkangka.

¹⁶Laxalibet, neni at Leeme Silok kusuk mun, ketla neni ga raba lavatkangka ri limixin. ¹⁷Luvuttadi dira met pam, dixo epovo kusu dina emi asu mi Leeme Silok, kopla nedi dirat pas pam uto Katimun. ¹⁸Ketla nedik limixin, move ata rooro, ata tong aorong ti Leeme Silok, mo nga la amisik kopmen taxavaxap teren.

Ata emi asu mi Leeme Silok.

Salmo 116

Laradi Ne Moroa Ga Lox Asepsu i Basinge Lanmet

¹Labalak i tu aleng Leeme Silok, mila neni ing tonga ia, neni i rongga lisingising tarak; ²neni ing tonga ia at levenaleng axap a toro ke ren.

³Loxoxo uu ga suxuna ia, la lainmarat at lamaut ga suxa aumsu ia, la lainbulu eburu mi lodoxoma saasaa ga suxuna axap lorooro rak.

⁴Melemu aga ro ke at Leeme Silok, "O Leeme Silok, lox asepsu ia."

⁵Leeme Silok i umsu mi lebelemumu la luvukat; Moroa atdik neni laradi balamu. ⁶Leeme Silok ik lok tatao nunuan nedi kopmen tevelolos atdi; at laaleng nenia aga ekip tangarang mi laniu, neni ga lox asepsu ia.

⁷Labalak, una nuunu saga at Leeme Silok, mila Leeme Silok irak lok pam lempanga nunuan tia; ⁸la neni ga lox asepsu ia basinge lanmet, la luxatli rak basinge lanteng, la luxangkedek tarak basinge laksak saaban; ⁹kusu abat pas to melamgo at Leeme Silok, to xeneng at lemenemen atnedi di rooro dik lox e. ¹⁰Nia aga nuunu saga at Leeme Silok, keke i do aga lox abulubun mumu levenmumuat ga lok do na sep amer ia; ¹¹la keke

i do aga marat aleng, la aga lok keretna, “Nia axo epovo kusu ana nuunu saga at teta atla limixin axap di luvuttadi xaxarang.”

¹²Anaba vorang amlong lununuan at Leeme Silok ik lox i ria xereva?
¹³Anaba song aurut mo lisintua dan vaen ngan laramtaba ri Leeme Silok, kusu ri tong avukat tin mumu neni ga lox arooro ia. ¹⁴Aba lox epovo mo laxakaape rak ti Leeme Silok, to melamgo at lovtopot buru at limixin teren.

¹⁵Leeme Silok giba bulu aleng mo do tara at limixin axa ren gi met.
¹⁶O Leeme Silok, nenia laradi gugu ram. Nenia anaba lok lugugu ram kerekngan ne naga ga lok lugugu ram. Ugara lox asepsu vam ia basinge lanmet. ¹⁷Anaba lok tetaba ti tong avukat tu la ana ro ke at laasen taram.
¹⁸Anaba lox epovo laxakaape rak tu ro melamgo at lovtopot buru at limixin taram. ¹⁹Anaba lox i na ro at lemelia saparap loogu xaala ram, keneng tinotno at lemenemen Jerusalem.

Ata emi asu mi Leeme Silok.

Salmo 117

Leemi Asu Ri Leeme Silok

¹Larabung mixin axap, mina emi asu mi Leeme Silok. Limixin at lengkot axap, mina xip aurut laasen teren; ²mila mo labalamu ren tidik i silok aleng, la Leeme Silok naba ruturun amisik.

Ata emi asu mi Leeme Silok.

Salmo 118

Lisingising Ti Tong Avukat Ti Leeme Silok

¹Ata tong avukat ti Leeme Silok, mila neni mun i lox avukat la labalamu ren i tu lexen. ²Limixin me Israel, mina tong i do, labalamu ren i tu lexen. ³Nemi lavamaasa, livipisik li at ne Aron, mina tong box i do, labalamu ren i tu lexen. ⁴Nedi bok limixin di lok linglingun at Leeme Silok, dina tong i do, labalamu ren i tu lexen.

⁵Keneng at levenaleng at levenmumuat, aga toro ke at Leeme Silok la ni ga ronga ia la ga lox asepsu ia basinge levenmumuat. ⁶Leeme Silok ik lok eburu minia, la nia xopmen a noxo marat at lempanga limixin kapmek diba lox i ria. ⁷Leeme Silok ik lok eburu minia; neni mun laradi loklok tooro rak. La nenia anaba ven Leeme Silok na sak tup mi lavamunepen tarak. ⁸Naba lox avukat do nedik ata nuunu saga at Leeme Silok, la nemen gat dik guta nuunu saga at limixin. ⁹Naba lox avukat do ata doxoma saga at Leeme Silok, la nemen gat dik guta doxoma saga at lubang amgomgo at limixin.

¹⁰Lavamunepen buaang diga tu kangkan ia, ketla aga sep amet axap di mi lolos at Leeme Silok. ¹¹Diga tu kangkan ia at lengkot axap, ketla aga sep amet axap di mi lolos at Leeme Silok. ¹²Diga tu kangkan mu ia ngan laxampo masum, ketla soso mun di met axap ngan ta laxao i anan levempivilis mang. Ara sele utut kepe axap di mi lolos at Leeme Silok. ¹³Diga esep tangarang minia la diga sev asi ia, ketla Leeme Silok ga lok tooro ia. ¹⁴Leeme Silok ga lox alolos ia la neni laradi loklok arooro rak.”

¹⁵Limixin mo dip kup mi lomomo keneng at laraugu kadis at limixin mokmokso; mila dira sak tup pam mi limixin munepen atdi. La lolos mun at Leeme Silok ik lox i na lempanga. ¹⁶Lolos at Leeme Silok ga lok tooro dik kusu ri sak tup mi lavamunepen atdik; lolos teren ga lok tooro dik keneng at leesep.

¹⁷Nenia a noxo met, ketla aba rooro, la anaba paase asu lempanga Leeme Silok ga lok pam i. ¹⁸Leeme Silok ira lox asongot kapmek tinotno vam ia, ketla neni ixo ke xepe ba ia xusu ana met.

¹⁹Mina suang lumusmaragu at loogu laplavang, kusu aba beles la ana emi asu mi Leeme Silok.

²⁰Anai ni lumusmaragu at Leeme Silok; limxim mokmokso kusuk mun di epovo kusu dina beles teren.

²¹Leeme Silok, nia a emi asu minu, mila uga ronga lisingising tarak; la uga lok tooro ia xusu ana sak tup mi lavamunepen tarak.

²²Mo luuat limixin kipkip gu diga sok tixirixes kepe i, ga ravasu ngan luuat kis la lugugu ren i silok aleng. ²³Leeme Silok axa ga lox i na, la i lox avukat aleng at levereven atdik. ²⁴Na xa laaleng ni laaleng ti lok katling loklok tooro at Leeme Silok; ata sosoro la ata momo aleng min. ²⁵Leeme Silok, una lox asepsu nama basinge lavamunepen atnama. O Leeme Silok, una lok nema xusu lorooro atnama naban manton aleng.

²⁶Luvukat ti mo lara i vubeles uto xeneng at loogu laplavang mumu laasen at Leeme Silok. Manaba lox anarong nemi axap mira vubeles pam to xeneng at loogu laplavang at Leeme Silok. ²⁷Leeme Silok, neni ne Moroa, la neni ira lox anarong pam dik; ataba tu eburu mi lengkakan bisi at lentingen dik at na laaleng momo la atap tii ben kangkan mo loxonin orong.

²⁸Nenu mun ne Moroa rak, la a tong aorong tu; la a xip aurut laasen taram mumu lolos silok taram.

²⁹Ata tong avukat ti ne Moroa, mila neni mun i lok nunuan. Mo labalamu ren naba nemen lexen.

Salmo 119

Lenavolo At Leeme Silok

¹Luvukat mo ik lok tinedi lorooro atdi kopmen tosoogong teren, la di rooro mumu asu Lenavolo at Leeme Silok. ²Luvukat mo ik lok tinedi di

mumu asu lempapaase matmatkun at Leeme Silok la ding tonga res teren mi lebelen di axap. ³Dixo lok tempanga i bilinga, ketla dit pas mu asu leveloklok at Leeme Silok. ⁴Leeme Silok, nenu ura li vam levempapaase auru ram, kusu nema manang tonga res mu nunuan tino i. ⁵Naba lox avukat aleng mo do nenia a ruturun tim tebeng atmatkun leventetere avolo ram. ⁶Do nia anam doma aklen amisik ti mo levempapase ali ram, nia noxo ruuna ka lainmangan. ⁷Aba emi asu minu mi labalak i xasep, mo do nenia anaklen avukat leventaangas mokmokso ram. ⁸Aba ronga res mu axap leventetere avolo ram, kuren la nemen uta rexes kepe ia.

Lorongtonga Res Mu Lenavolo At Leeme Silok

⁹Tamdak aau naba lok lorooro ren kereva xusu na nemen manmanton? Neni na rooro mu mun levelinga ram. ¹⁰Nia a lolos kusu ana gugu taba u mi labalak axap, la una lok tooro ia xusu nia a noxo ronga xepe mo levempapaase ali ram. ¹¹Ara xonom ka axap pam levelinga ram mi leveeve rak, kusu nenia a noxo lok taxakapmek tu. ¹²O Leeme Silok, leemi asu mun tu; una anasa ia mi leventetere avolo ram. ¹³Nenia anaba paase asu amisik mo leventaangas nenu uga raba nema min. ¹⁴A momo ri mumu asu levempapaase matmatkun taram, i ngan lara i momo mi langsgangan lapnovos. ¹⁵A viilla mumu levempapaase auru ram la aram doma mumu avukat levenanasa ram. ¹⁶A momo aleng at leventetere avolo ram, kuren la a noxo doma aie xepe ba levelinga ram.

Lomomo Keneng At Leventaangas Linga At Leeme Silok

¹⁷Leeme Silok, una lok lununuan tia, laradi gugu ram, kusu nia aba rooro, la abang tonga res at levelinga ram. ¹⁸Una valas luxatli rak kusu aba ven kibis levenanasa nunuan keneng at Lenavolo ram. ¹⁹A nemen ngan loose at na lavatkangka, la nemen gat uta lipe levempapaase ali ram basinge ia. ²⁰Lorooro axap tarak, mo i ngaongao mu leventaangas taram at levenaleng amisik. ²¹U paase sok luvuttadi loklok aru, la lasaxaek ik lok mavana atnedi dit pas taba arulu mo levempapaase ali ram. ²²Una sep pinak di kusu di noxo paase aksaksa ria la dinoxo paase kapmek bok tia, mila nenia a mumu asu lempapaase matmatkun taram. ²³Keke i do luvuttadi amgomgo dina xis buru, la dina puse ngas ti sev amer ia; ketla nenia laradi gugu ram, abam doma mumu amisik leventetere avolo ram. ²⁴Lempapaase matmatkun taram i so misigisigis, ni mun ik lok tooro ia xusu ana ruuna ka lodoxoma avukat.

Laradi I Lolos Kusu Na Mumu Asu Lenavolo At Leeme Silok

²⁵Nia mo ak midi rinotno ro xeneng at laxakup; una lox aroo ia kerekngan levelinga ram. ²⁶Aga tong asu axap lorooro rak, la uga ronga ia; una anasa ia mi leventetere avolo ram. ²⁷Una lok tooro ia xusu ana

xasep at levenanasa at levempapaase auru ram, kusu abam doma mumu mo leven gugu nunuan taram. ²⁸Lorooro rak mo i umsu mi lainbulu, kuren la una lox alolos ia kerekngan levelinga ram. ²⁹Una tupe ia xusu a noxo beles at leveloklok i lok kapmek; la una lox ase ia mi Lenavolo ram atla u balamu ia. ³⁰Ara soxolik ka vam langas ti mumu asu levelinga ruturun taram; ara ronga avukat pam leventaangas linga ram. ³¹O Leeme Silok, am tebeng lolos lempapaase matmatkun taram; nemen uta ke xepe ia la limixin dina lox amangan ia. ³²A lolos aleng kusu ana mumu asu mo levempapaase ali ram, mila uba suxa amu manga ia mi lodoxoma avukat.

Lisingising Ti Lok Ka Lakleken

³³O Leeme Silok, una lox ase ia kusu ana xasep at leventetere avolo ram, la anabang tonga res teren at levenaleng axap. ³⁴Una soxomus asu Lenavolo ram tia la abam tebeng atmatkun teren; la anang tonga res teren mi labalak axap. ³⁵Una lam ia xusu ana mumu asu mo levempapaase ali ram, mila ik lox asuusu lomomo ria. ³⁶Una lok labalak kusu ana mumu asu lempapaase matmatkun taram, la kopmen nia a noxo vara solo lapnovos silok mede xopak. ³⁷Una lok luxatli rak kusu a noxo veneves at laxampanga gamasa la una lox anunuan lorooro rak kerekngan levelinga ram. ³⁸Una lox epovo laxakaape ram tia, laradi gugu ram, i ngan uk lox epovo i rinedi ding tonga res taram. ³⁹Una ru pepe mo lempapaase aksaksa, ua ik lox amamar ia; leventaangas taram i lox avukat. ⁴⁰A vara rinotno i xusu ana mumu asu levempapaase auru ram; una lox amaxat lorooro rak mila loklok taram ik mokso.

Tanam Tebeng Atmatkun At Lenavolo At Leeme Silok

⁴¹Leeme Silok, una lox asuusu labalamu ram tia, la una lox arooro ia kerekngan laxakaape ram tia, ⁴²kuren la aba epovo na vaase poorang levelinga at mo luvuttadi di lok kalise ia, mila nia a nuunu saga at levelinga ram. ⁴³Nemen uta lok pes mo levelinga ruturun taram basinge ia, mila nia aga lok li lodomdoma voovo rak at leventaangas taram. ⁴⁴Abang tonga res amisik at Lenavolo ram at levenaleng axap i tu melango. ⁴⁵Aba nemen sepmus basinge levenmumuat, mila nia a mumu asu levempapaase auru ram. ⁴⁶Aba paase asu levempapaase matmatkun taram ti lavaorong silok, la nia a noxo mangan. ⁴⁷Nia a momo mi levempapaase ali ram, mila labalak i tu i. ⁴⁸A lok ngangao aleng ap mo levempapaase ali ram la labalak i tu mun i, la abam doma mumu amisik mo leventetere avolo ram.

Laradi I Nuunu Ruturun At Lenavolo At Leeme Silok

⁴⁹Leeme Silok, una doxoma mo levelinga ram tia, laradi gugu ram, mila i lox alolos ia xusu ana nuunu saga ram. ⁵⁰Uga lox amenemen ia at

laaleng aga nemen keneng at losongsongot, mila uga lox epovo laxakaape ram tia la uga lox arooro ia. ⁵¹Limixin loklok keexee dik lok kalise amisix ia, ketla nia axo vas basinge ba Lenavolo ram. ⁵²O Leeme Silok, a doma mo leventaangas taram me gaxatnak, la im taba ia mi loklok amenemen. ⁵³Dola nia a ven limixin kapmek di los polo Lenavolo ram, lebelemamao i suxuna lorooro rak. ⁵⁴At lorooro rak at na lavatkangka, a vo lengkompixan mi leventetere avolo ram. ⁵⁵Leeme Silok, am doma u at lengkanimin, la am doma mumu bok Lenavolo ram. ⁵⁶Lomomo it pot tarak mumu mun levempapaase auru ram, la nia ang tonga res mu i.

Laradi I Raba Axap Lorooro Ren Ti Lenavolo At Leeme Silok

⁵⁷O Leeme Silok, labalak i tu xusuk mun u; a xaape do anabang tonga res mu amisik levelinga ram. ⁵⁸A sing u mi labalak axap do una lox asuusu lebelemumu ram tia, ngan ugara xaape vam min. ⁵⁹Ara ila mumu vam lorooro rak, la ara ba gili lorooro rak kusu ana mumu asu levempapaase matmatkun taram. ⁶⁰Aba lok soso mun la anoxok lok sila kusu ri mumu asu mo levempapaase ali ram. ⁶¹Keke i do limixin kapmek dinam kobot ia mi laxalinga xaxarang, a noxo ke xepe ba Lenavolo ram. ⁶²At lengkanimin tubu a katu kaxat kusu ana tong avukat tu ri nom leventaangas mokmokso ram. ⁶³Nenia lentangas atnedi limixin di gugu ru la atnedi bok di mumu asu levempapaase auru ram. ⁶⁴O Leeme Silok, lavatbung menemen i umsu aleng mi labalamu lexen taram. Una anasa ia mi leventetere avolo ram.

Lenavolo At Leeme Silok I Nunuan Aleng

⁶⁵O Leeme Silok, urak lok anarong pam ia, laradi gugu ram, kerekngan levelinga ram. ⁶⁶Una anasa ia mi levendoxoma nunuan la lakleklen, mila nia a nuunu saga at levempapaase ali ram. ⁶⁷Nia aga vas soogong, la uga sev asongor ia; ketla ana nga nia ang tonga res at levelinga ram. ⁶⁸Nenu u umsu mi lununuan, la uk lox asuusu loklok anare ri limixin. Una anasa ia mi leventetere avolo ram. ⁶⁹Limixin loklok aaru di paase xaxarang mumu ia, ketla mi labalak axap ang tonga res at levempapaase auru ram. ⁷⁰Mo luvuttadi kopmen tevendoxoma nunuan atdi, ketla nia an tuuna ka lomomo boro at Lenavolo ram. ⁷¹Mo levesongsongot uga raba ia min ga lox avukat, kuren la abaklen avukat leventetere avolo ram. ⁷²Mo levelinga nenu uga raba ia min, ni i lok nunuan aleng ti lempilas axap at na lavatbung menemen.

Lenavolo At Leeme Silok Ni Inmanton

⁷³Uga rudum ia mi lukngam la uk lox aliye ia basinge laniu; um taba ia mi levendoxoma nunuan kusu ri lox ase at levempapaase ali ram. ⁷⁴Nedi dik lok ngangao ram, dik lok momo do dina reven tarak; mila nia

a nuunu saga at levelinga ram. ⁷⁵O Leeme Silok, aklen i do leventaangas taram ik mokso aleng, la uk lox aleeng ia mila nenu u ruturun at laxakaape ram. ⁷⁶Una lox asuusu mo labalamu lexen taram kusu na lox amenemen ia, kerekngan uga xaape vam min tia, laradi gugu ram. ⁷⁷Una lox asuusu lebelemumu ram tia xusu lorooro rak naba nemen avukat mila an tuuna ka lomomo boro at Lenavolo ram. ⁷⁸Naba lox avukat do una lox amangan nedo limixin loklok aaru, mila di lili laxalinga xaxarang mumu ia; ketla nenia, anabam doma mumu levempapaase auru ram. ⁷⁹Naba lox avukat do nedo dik lok ngangao ram, dina vot pasa ia; nedo bok di xasep at lempapaase matmatkun taram. ⁸⁰Naba lox avukat do labalak nang tonga res mu avukat leventetere avolo ram, kusu naba lox asepsu ia basinge lainmangan atdi mo dik lox asi ia.

Lisingising Ti Lox Asu Lara At Loxokoxo

⁸¹O Leeme Silok, lengkot tarak ira meleexot axap la a ngangais tu xusu una lox aroo ia. Nia a nuunu saga at levelinga ram. ⁸²Luxatli rak ira molo nga ri reven pupuke ri levengkakaape ram. La ara lok, “Lingisa ba uba lok tooro ia?” ⁸³Nenia a lok ngan mun labantamon tem dadas; ketla axo ke xepe ba leventetere avolo ram. ⁸⁴Nenia laradi gugu ram, anaba ngais alika ba? Lingisa ba uba sev asongot nedo dik lox asongor ia? ⁸⁵Limixin loklok aaru di ke xepe Lenavolo ram, dira lok pam lenngitngit tia. ⁸⁶I epovo rinotno xusu mana mumu asu mo levempapaase ali ram; una lok tooro ia, mila limixin dik lox asongot gamasa mun ia la kopmen tavasuun teren. ⁸⁷Ma lixilik di lok do, dina sep amer ia; ketla nia axo raba arulu ba levempapaase auru ram. ⁸⁸Mumu labalamu lexen taram, una lok lempanga nunuan tia, kusu abang tonga res at levempapaase matmatkun taram.

Laradi I Nuunu At Lenavolo At Leeme Silok

⁸⁹Leeme silok, levelinga ram nabak lok at levenaleng axap i tu melango, la mo levelinga i tu tuxuruxun kerekngan laxalibet. ⁹⁰Nenu unaba ruturun amisik kantubu at lavaola axap mo dibap tavasu melemu; uga vaxaxis aulis na lavatkangka la mo it kis tuxuruxun kuren. ⁹¹Leventaangas taram mo i nemen amisik se at na levenaleng, mila lempanga axap i nemen maxopok at loklok tatao ram. ⁹²Mo do Lenavolo gixo lox amomo ia, nia ro gira met pam mumu laxasongsongot tarak. ⁹³A noxo rongga xepe levempapaase auru ram, mila mumu mun i na levelinga loklok tooro ram, nenu urak lok tatao lorooro rak basinge lanmet. ⁹⁴Una lox asepsu ia mila nenia ataram; la nia ara lolos amisik kusu ana mumu asu levempapaase auru ram. ⁹⁵Limixin kapmek mo di kuxut tangais ia xusu dina sev amer ia; ketla nenia abam doma mumu levempapaase matmatkun taram. ⁹⁶Araklen ba i do lempanga axap noxo nemen abao, ketla mo levempapaase ali ram in manton axap.

Labalamu At Laradi Ri Levelinga At Leeme Silok

⁹⁷Labalak i tu munLenavolo ram, la am doma mumu amisix i at levenaleng kangking la kanimin. ⁹⁸Mo levempapaase ali ram, ik lok amisik keneng at lodoxoma rak, la i lox ia, a xasep nunuan aleng polo ned i lavamunepen tarak. ⁹⁹Aklen aleng polo ned i axap luvuttadi loklok ase rak, mila am doma mumu amisik levempapaase matmatkun taram. ¹⁰⁰Aklen aleng polo ned i loxongkulao mukun, mila ang tonga res at levempapaase auru ram. ¹⁰¹Aga lok tatao alabat lavatpas tarak basinge lempatpas ua ga xapmek, kusu aba ronga res mu levelinga ram. ¹⁰²Axo ke xepe leventaangas taram, mila nenu axa uga anasa ia min. ¹⁰³Levelinga ram i so misigisigis aleng, la i volo loso at ladan misiu. ¹⁰⁴Lempapaase auru mun taram im taba ia mi levendoxoma nunuan; kuren la nia axo esuxun mi limixin sosolo arup.

Laxasep Boro At Lenavolo At Leeme Silok

¹⁰⁵Levelinga ram i lok ngan lababao rim lam ia, la i lok ngan bok laxasep ti langas tarak. ¹⁰⁶Anaba lox epovo laxakaape lolos tarak do, anaba mumu asu amisik mo leventaangas mokmokso ram. ¹⁰⁷O Leeme Silok, levesongsongot tarak i silok aleng kapmek, una lok tatao nunuan lorooro rak, kerekngan levelinga ram. ¹⁰⁸O Leeme Silok, una mulus ka lisingising emi asu rak, la una anasa ia mi leventaangas taram. ¹⁰⁹Laniu i tu saparap amisix ia xusu na lok korop kepe lorooro rak, ketla nia axo ke xepe gamasa ba Lenavolo ram. ¹¹⁰Limixin kapmek di lili larapelixo ria, ketla nia axo ronga xepe lempapaase auru ram. ¹¹¹Lempapaase matmatkun taram i lok ngan loxom pulus nunuan naba nemen amisik eburu minia, la i lox aumsu labalak mi lomomo. ¹¹²Leveeve axap tarak i tu mun pana at leventetere avolo ram, naba se at laaleng lorooro rak naba xap.

Mina Tu Tuxuruxun At Lenavolo At Leeme Silok

¹¹³Axo esuxun minedi dixo ruturun tinotno ru; ketla labalak i tu mun Lenavolo ram. ¹¹⁴Nenu Lentupe la Lurutu See Pe rak, a nuunu saga at levelinga ram. ¹¹⁵Nemi luvuttadi loklok kakapmek, uto nimi basinge ia, kusu nenia aba mumu asu levempapaase ali at ne Moroa rak. ¹¹⁶Una lox alolos ia kerekngan laxakaape ram, kusu nenia aba rooro; la nemen uta ke xepe ia xusu ana vubeles at laniu. ¹¹⁷Unam tebeng ia mi lukngam, kusu nia a noxo ekip tangarang mi lumumuat; la abam doma mumu amisik leventetere avolo ram. ¹¹⁸Uk sok tixirixes ned i luvuttadi di ronga xepe leventetere avolo ram; mo levendoxoma alipe kapmek atdi, ni lavanga gamasa. ¹¹⁹Nenu u ven limixin kapmek ngan laxanboobong, ketla labalak i tu lempapaase matmatkun taram. ¹²⁰Nenia a dede aleng atla a marat taram, la a lingun aleng mumu leventaangas taram.

Lorongtonga Res At Lenavolo At Leeme Silok

¹²¹Ara lok pam lempanga ik mokso la i nunuan, kuren la nemen uta ke avolo ia ri lavamunepen tarak. ¹²²Una xaape ria, laradi gugu ram do, unaba lok tooro ia, la nemen uta ke xepe luvuttadi loklok aaru dina lox asongor ia. ¹²³Luxatli rak ira molo nga ri reven tangarang ti nom loklok tooro la kusu ri lox asepsu ia basinge di kerekngan ugara xaape vam min. ¹²⁴Una reven tatao ia, laradi gugu ram, kusu naba epovo rinotno mi labalamu lexen taram, la una anasa ia mi leventetere avolo ram. ¹²⁵Nenia laradi gugu ram; una lox axasep lodoxoma rak, kusu aba xasep at lempapaase matmatkun taram. ¹²⁶Leeme Silok, limixin dirat los polo amisik pam Lenavolo ram; kuren la levenaleng ira vot pam, kusu una sep pepe di. ¹²⁷Labalak i tu aleng levempapaase ali ram i volo lavavara ri leven gol, la mo leven gol i nunuan aleng. ¹²⁸Kuren la ara mumu asu lempapaase auru ram; la ak sok sisixe leveloklok axap i lok kapmek.

Langaongao Kusu Ring Tonga Res At Lenavolo

¹²⁹Lempapaase matmatkun taram i lok nunuan aleng, kuren la nia arang tonga res mu i mi labalak axap. ¹³⁰Losoksoxomus at levelinga ram im taba ia mi laxasep, la im taba bok lakleklen avukat tinedi kopmen takleklen atdi. ¹³¹A mamao etitit mi langaongao rinotno ri levempapaase ali ram. ¹³²Una repukus mu ia la una belemumu ia, kerekngan pam uk lox i rinedi axap di vavara aleng u. ¹³³Unam lam aratao ia at lavatpas tarak, kerekngan levelinga ram; nemen uta ke xepe libilinga nak sak tup minia. ¹³⁴Una rebeng asu ia basinge levenmumuat at luvuttadi xapmek dim taba ia min, kusu nenia anabang tonga res at levempapaase auru ram. ¹³⁵Unak lok amisik eburu minia ngan loklok anarong tia, laradi gugu ram, la una anasa ia mi leventetere avolo ram. ¹³⁶Lengkabili dan ing pengkos su aleng at lamarak, mila limixin dixong tonga res at Lenavolo ram.

Lenavolo At Leeme Silok Ik Mokso

¹³⁷O Leeme Silok, loklok taram ik mokso aleng, la leventaangas bok taram ik mokso. ¹³⁸La mo lempapaase matmatkun uga li i, ik mokso la i epovo rinotno do nema manat mas saga ren. ¹³⁹Mo lebelemamao keneng tarak i lok ngan laxao, mila limixin munepen minia dik lox abulubun levelinga ram. ¹⁴⁰Mo levengkakaape ram agara lok tong pen pam i, kuren la nenia laradi gugu ram, a vara aleng i. ¹⁴¹Nenia mun laradi gamasa la limixin di lele abulubun ia, ketla axo ke xepe ba levempapaase auru ram. ¹⁴²Loklok taram naba nemen mokmokso amisik, la Lenavolo ram naba ruturun amisik. ¹⁴³Levenmumuat mi lodoxoma saasaa mo ira ebosa mavana rak, ketla levempapaase ali ram ik lox amomo ia. ¹⁴⁴Mo

lempapaase matmatkun taram ik mokso aleng tino; una raba ia mi lodoxoma avukat kusu nia aba rooro.

Lisingising Ti Loklok Asepsu Basinge Laniu

¹⁴⁵O Leeme Silok, nia a ro ke ram; una ronga res tarak kusu abang tonga res at leventetere avolo ram. ¹⁴⁶A ro ke ram kusu una lox asepsu ia basinge laniu; la nia abam tebeng avarang at lempapaase matmatkun taram. ¹⁴⁷A aus kaxat no mene maxantamak suubu la ang teng tu xusu una lok tooro ia; atla a nuunu saga at levelinga ram. ¹⁴⁸A tuuang aan amisik, kusu ana i doxoma mu lengkakaape ram. ¹⁴⁹O Leeme Silok, labalamu ram i nemen lexen; kuren la una ronga ia; una lok tatao lorooro rak kerekngan leventaangas taram. ¹⁵⁰Nedi mo dim doma xapmek tia mo nga dit pas auret ia, la dik lok paxalom tinotno basinge Lenavolo ram. ¹⁵¹Ketla nenu Leeme Silok uk lok auret mun ia, la nom axap levempapaase ali ram i ruturun. ¹⁵²Ga ruka xa i gano, aga lox ase boro at lempapaase matmatkun taram, ua nenu uga vaxaxis i la naba nemen lexen.

Lorotoro Ri Loklok Tooro

¹⁵³Una ven mumu laxasongsongot tarak la una lox asepsu ia basinge i, mila xovisi toxonaleng go nia ara ke xepe vam Lenavolo ram. ¹⁵⁴Una ru at lenep tarak la una lox asepmus ia; una lok tatao lorooro rak kerekngan lengkakaape ram. ¹⁵⁵Nenu u noxo lox arooro limixin kapmek, mila dixo mumu asu leventetere avolo ram. ¹⁵⁶O Leeme Silok, labalamu ram i silok aleng; una lok tatao lorooro rak kerekngan leventaangas taram. ¹⁵⁷Buaang nedi lavamunepen dik lox asongor ia, ketla nia axo raba arulu ba lempapaase matmatkun taram. ¹⁵⁸A ven tinedi limixin tongtonga viribang, la a bele mumuat mila dixo mumu asu levelinga ram. ¹⁵⁹Leeme Silok. Pen ba ia, a vara aleng levempapaase auru ram; una lok tatao lorooro rak mila nenu laradi balamu. ¹⁶⁰Levelinga axap taram i ruturun la nom axap leventaangas taram ik mokso la naba nemen amisik.

Lavavara Ri Mu Asu Lenavolo

¹⁶¹Luvuttadi amgomgo dik lox asongot parang ia, la kopmen tavasuun teren. Ketla leveeve rak it kat tava mu levelinga ram. ¹⁶²Levengkakaape ram ik lox amomo ia, kerekngan laradi i ruuna laplus i silok aleng. ¹⁶³Ak sok tixirixes laxaxarang la labalak i xapmek tin, ketla labalak i tu aleng Lenavolo ram. ¹⁶⁴Keneng at leges aleng, a tong avukat tu i vanuti mumu leventaangas taram ik mokso. ¹⁶⁵Nedi di vavara aleng Lenavolo ram, dinaba nemen matmatkun la kopmen ba tavanga naba lox angtang nedi kusu dinak sak saaban. ¹⁶⁶O Leeme Silok, a ngangais ti loklox arooro ram, la a mumu asu levempapaase ali ram. ¹⁶⁷Ang tonga res at

lempapaase matmatkun taram, mila a vara aleng tinotno i. ¹⁶⁸Ang tonga res at levempapaase auru ram la nom lempapaase matmatkun bok taram, atla ukleklen axap leveloklok tarak.

Lisingising Ti Loklok Tooro

¹⁶⁹Leeme Silok, una ronga lanteng tarak saparav u ri loklok tooro. Una lox asusu lodoxoma aklen taram tia kerekngan laxakaape ram. ¹⁷⁰Una ronga res at lisingising tarak, la una lox asepsu ia basinge levesongsongot kerekngan lengkakaape ram tia. ¹⁷¹Ana emi asu amisik minu, mila nenu u anasa ia mi leventetere avolo ram. ¹⁷²Abak pixan mumu levelinga ram, mila levempapaase ali ram ik mokso. ¹⁷³Una gagas amisik ti lok tooro ia, mila nia a mumu asu levempapaase auru ram. ¹⁷⁴O Leeme Silok, labalak ing teng aleng ti loklox arooro ram; ketla Lenavolo ram ik lox amomo ia. ¹⁷⁵Una lok tatao lorooro rak kusu aba emi asu minu; la una ke mo leventaangas taram na su auru ia. ¹⁷⁶Ara vas soronga nga ngan lisipsip i soronga. Una puse ria, laradi gugu ram, mila nia axok lox aie xepe levempapaase ali ram.

Salmo 120

Lisingising Ti Loklok Tooro

¹Aga ngising ti Leeme Silok keneng at levenmumuat tarak, la neni ga lok tooro ia. ²Leeme Silok, una lox asepsu ia basinge luvuttadi xaxarang la sosolo arup. p ³Nemi limixin kaxarang, lavanga salai mo ne Moroa naba lox i rinimi? La neni naba lox asongot nimi xereva? ⁴Neni naba lox asongot nimi mi levesoosoo ing sengsen at luvuttadi esep la mi laxangkali kao iplivi aleng.

⁵Axot kis avukat kantubu atnemi limixin kapmek; nemi mi lok ngan limixin tongtonga viribang di nemen to Mesek la to Kedar. ⁶Agarak lok eburu amisik pam minedi limixin ua dixo sisiam ka limila. ⁷La do a paase rinedi mi limila, di vavara na vesep mun.

Salmo 121

Leeme Silok Neni Lurutu See Pe Atdik

¹A milik aurut at lempatkaana, la a lok keretna, “Loklok tooro ria naba laa meava?” ²Loklok tooro naba susu xusuk boro at Leeme Silok, neni ga rudum li laxalibet mi lavatkangka.

³Neni noxo ke xepe ba u la una subu; atla neni mo Lurutu See Pe ram kopmen na vunga.

⁴Mo Lurutu See Pe at leme Israel neni xopmen na vunga xis kopla na vunga met. ⁵Leeme Silok naba reven tatao u; neni naba nemen saparav u kusu nak lok see ram. ⁶Laxangking noxo sev asongot ba u at levenaleng kangking la lagaaling noxo sev asongor u at lengkanimin.

⁷Leeme Silok axa nabak lox asepsu amisix u basinge levenaniu; la ni naba kok avukar u. ⁸Ni nabak lok see ram at levempatpas taram at nai levenaleng la ap mo bok levenaleng i tu melamgo.

Salmo 122

Leemi Asu Ri Lemenemen Jerusalem

¹Aga momo aleng atla diga lok tia, “Uto dik at loogu at Leeme Silok.” ²La ana nga mara vubeles pam at langas povolo la mara tu nga ro xeneng at lemenemen Jerusalem.

³Diga vaxaru li amu na lemenemen ngan lemenemen silok la diga penbixa avukat tinotno i. ⁴La nedi larabibinat me Israel dit pas pot de; nedi dit pas kusu dina emi asu mi laasen at Leeme Silok, kerekngan mo levempapaase matmatkun Leeme Silok ga raba limixin me Israel min. ⁵Na de Lavaorong Silok boro Israel digat kis at lengkonin atdi xusu dinang tonga linga at limixin.

⁶Mina sing kusu limila nak lok to lemenemen Jerusalem; i epovo do nedi di vavara aleng na lemenemen, dinaba ngasang kobot. ⁷I epovo bok do limila nak lok keneng at na lemenemen la Leeme Silok na lok tatao avukat limixin keneng at laraugu silok atdi. ⁸Nia a lok lisingising mumu lemenemen Jerusalem keretna, “Limila nak lok keneng teren.” Ak lox i xerepmo kusu lentaba rak la larapentangas tarak dinaban tuuna lorooro nunuan. ⁹Nia a sing bok Leeme Silok kusu nemi limixin mego mina sang kobot avukat atla loogu at Leeme Silok ne Moroa atdik ik lok go.

Salmo 123

Lisingising Ti Labalamu

¹O Leeme Silok, a milik aurut tu, toxun pana at laxalibet at loxot nenu ut kis teren la um gomgonga limixin na de xopok. ²O Leeme Silok, nenu ne Moroa atnama. Lavasaxaruki di nuunu saga at lubung amgomgo atdi, la lavasaxaruki rixin di nuunu saga at lavakin amgomgo atdi, la kerepmo bok nema manaba nuunu saga amisik taram, se at loxonaleng una lox asuusu lebelemumu ram tinama.

³O Leeme Silok, una lox asuusu lebelemumu rinema. Una lox asuusu lebelemumu rinema, mila mara baava nga na mi laxanmumuat dik lok li i

mavana atnama. ⁴Mara baava nga na mumu laxalinga sese limixin loklok aaru dik lox i rinama; la limixin apnovos bok di lele abulubun nama.

Salmo 124

Moroa Neni Lurutu See Pe At Limixin Teren

¹Mo do Leeme Silok gixo tu at lenep atdik, nedik limixin axap me Israel giba exip tangarang mi lempanga salai?

²Mo do Leeme Silok gixo tu at lenep atdik, lavamunepen giba esep tangarang midik; ³la lebelemamao atdi giba lok kapmek aleng tidik, la nedik giba linge bintoo nedik ⁴la ladanut giba vula pe nedik, la na vaxat ka nedik uto vetpes, ⁵la laaran silok gibak mir axong nedik.

⁶Ata tong avukat ti Leeme Silok mo ga lox asepsu dik basinge lavamunepen atdik. ⁷Nedik tara sixiroo vam kerekngan lapka i sixiroo basinge lelixo, nai lelixo ira rexorop pam, la nedik na tara sepmus ta. ⁸Loklok tooro atdik ip tavasu boro at Leeme Silok, neni ga rudum li laxalibet mi lavatbung menemen.

Salmo 125

Lixitkis Nunuan Ti Limixin At Ne Moroa

¹Nedi di nuunu saga at Leeme Silok, di lok ngan Lakaana Saion ua ixo epovo do tara nakma asubu i, ketla naba tu atmatkun lexen tino. ²Larakaana dit kis kangkan lemenemen Jerusalem, la kerepmo bok Leeme Silok nabang kan pe axap limixin teren monga la at levenaleng axap i tu melango.

³Limixin kapmek di noxom gomgonga amisik laxangka at limixin mokmokso. Mo do dina lox i xuren, limixin mokmokso bok giba vubeles at laxapmek. ⁴O Leeme Silok, una lok lununuan tinedi dik lok nunuan, la tinedi bok ding tonga res at levelinga ram. ⁵Ketla una lox asongot nedik dit pas at leventaangas i xakauk, la una lox asongot nedik bok di sok tixirixes kepe leventaangas taram.

Limila nak lok maxeneng at limixin me Israel.

Salmo 126

Lisingising Ti Leeme Silok Kusu Ri Lox Asu Limixin

¹Gase Leeme Silok ga lam asu amlong nema limixin kokoxo uto Saion, maga nunua i do magam tobo mun. ²Kuren la magang longon aleng mi

leklek, la magak pixan momo aleng. La levenabung mixin petpes diga lok keretna, “Leeme Silok ga lox anarong solo vam nedu.” ³I ruturun do Leeme Silok ga lok lempanga silok tinama, kuren la maga umsu mi lomomo.

⁴O Leeme Silok, una lox asang kobot amu manga nama kerekngan larakabu ik lox aumsu laradan to at lamatbin Negev. ⁵Ma vara xusu mana lok ngan mun nedu digat pas titlotlo la digang teng, ketla uga lok tooro di kusu dinak lok momo at levenaleng dina sepkin. ⁶Nedu digat pas la digap kip levennit piao titlotlo i la digang teng, melemu diga laa boro at leventaamang la digak pixan momo mi lempanga anan atnedu.

Salmo 127

Leemi Asu Ri Leeme Silok Mumu Lununuan Teren

¹Mo do Leeme Silok noxo vaxaru loogu, limixin kipkip gu di noxo lox adak toxot. La do Leeme Silok noxo ven tatao bok temenemen silok, luvuttadi pereven tatao di noxo lox adak toxot. ²Kopmen tavasuun teren kusu limixin dina gugu lolos to at leventaamang atdi at laxanaleng axap, tu ka i at lenmaxantamak suubu la naba se ukantinao bungbung main, mila Leeme Silok nabam taba nedu mo neni i balamu di, la i gagas li i at lengkanimin, keke i do nedu mo di unga.

³Laxamdak mi laxaalik di lok ngan leventamtaba boro at Leeme Silok, di lok ngan loklok anarong ti luvuttemen di mi luvutnen di. ⁴Laxamdak mi laxaalik at latlok maxat, di lok ngan levesoosoo ro at lekngen lasesep.

⁵Luvukat ti mo laradi i visik buaang laxamdak mi laxaalik la dik lok kangkan i ngan lempat sili un. Lavamunepen teren di noxo vas asi ba mo laradi mo do neni na ekip tangarang midu ro at loxot tongtonga linga.

Salmo 128

Luunun Ti Lorongtonga Res At Leeme Silok

¹Luvukat tinedu mo ding tonga res at Leeme Silok, la lavatpas atdi i mumu asu leventaangas teren.

²Do nemi bok mina rongga res teren, mo lugugu atnemi naba lox suusu lempanga ri lox epovo lavakpakes atnemi, la minabak lok momo la minaba ngasang kobot at lempanga axap. ³La lavakin atnemi dinaba lok ngan loos vaen to xolonu ua i pisik aleng; laxamdak mi laxaalik atnemi dinaba rooro avukat ngan larauna olip maxat to xeneng at leven angkolonu atnemi. ⁴Do laradi nang tonga res at Leeme Silok, neni naba lok kaka ruturun leveloklox anarong kerepmo.

⁵Naba lox avukat do Leeme Silok boro Saion, naba lox anarong nimi at levenaleng axap at lorooro atnimi. Naba lox avukat bok do minaba ven lemenemen Jerusalem na vosok, ⁶la naba lox avukat bok do minaba ven luvutubuno nimi.

Limila nak lok keneng at limixin me Israel.

Salmo 129

Lisingising Ti Lok Pe Lavamunepen At Limixin Me Israel

¹Limixin me Israel, mina tong asu mo levenngas ua lavamunepen atnemi diga lox asongot nemi min, ga ru ka i at levenaleng nemi miga aau ren.

²At mo levenmaares lavamunepen atnema digak lox asongot kapmek tinotno nema, ketla di goxo epovo ri vas asi nema. ³Ga lok ngan ta do diga tara lempat nin kooxing at leven antuno atnema, la gak milik ngan ta laxangka ding kin li i ritlotlo vanga anan. ⁴Ketla Leeme Silok, ni Laradi Manmanton, gara lox asepmus pam nema basinge lasaksaxango at limixin munepen.

⁵A sing Leeme Silok do, neni naba sep aoo nedi limixin ua ding long angtungun ti limixin me Saion. ⁶A vara i do dinaba lok ngan levempivilis i suusu ro vana at lavatlak gu, ua naba met (mang) soso mun; ⁷la teta noxo dik kaka tempanga ren koplak nap kos eburu i la na xip kaka i uto at loogu ren. ⁸La do tara na ekip tangarang midi ro at langa neni noxo tong i ridi do, “A sing Leeme Silok kusu na lox anarong nimi. A lox anarong nimi mi laasen at Leeme Silok.”

Salmo 130

Lisingising Ti Doxoma Xepe Laxapmek

¹Nenia at kis keneng tubu at lamain bonot at lanbulu silok i vung kimit ia, la a ro ke ram, Leeme Silok. ²O Leeme Silok, una ronga lanteng tarak; una ronga res at lisingising tarak la una doxoma xepe laxapmek tarak! ³Nege giba sixiroo at loklok asongot taram mo do nenu gitak lok katling leveloklok kakapmek atnema? Kopmen tinotno tara giba sixiro. ⁴Ketla u doxoma xepe laxapmek atnema limixin taram, kuren la ma pavanga u mi loklok ngangao.

⁵Nia a xulubi aleng ti loklok tooro at Leeme Silok, la a nuunu saga at levelinga ren. ⁶A xulubi aleng ti loklok tooro at Leeme Silok, la axo lok ngan luvuttadi xukuxut di xulubi ri labara kooxot; lavavara rak ti xulubi ri Leeme Silok i volo mo lavavara at luvuttadi xukuxut di ngangais ti labara kooxot.

⁷Leme Israel, mina nuunu saga at Leeme Silok atla, labalamu ren naba nemen lexen, la neni i vavara amisik i xusu nak lox aroo su limixin basinge leveloklok kakapmek. ⁸Neni naba lox aroo su limixin teren me Israel basinge leveloklok kakapmek atnedi.

Salmo 131

Lisingising At laradi Nuunu Ik Lok Atnaasan

¹Leeme Silok, ara sokape vam loklok tik loklox aaso, la ara vas gasinge laxa loklok ti pavanga xa ia. Axo doma mumu bok ba mo leevenekarakat ua i silok aleng tia. ²Ketla at kis atnaasan mi limila xeneng tarak. Ak lok ngan laxadede ik midi pilo ro at lukngen nenen, la no xeneng at labalak i xis saga. ³Kuren la, Leme Israel, mina nuunu saga at Leeme Silok, mo nga la amisik, kopmen tekavaxap teren!

Salmo 132

Leemi Asu Ri Loogu Laplavang

¹Leeme Silok, nemen uta domampe ne Devit mumu mo levenmumuat neni ga vekini min. ²Leeme Silok, una doxoma aklen ti mo laxakaape ren gara lok pam i ru; nenu ne Lanaraavuk ne Moroa at ne Jakop. Devit ga lok keretna, ³“A noxo onon uto xolonu xopla ana midi ro at loora rak; ⁴a noxo lok mamana xopla ana unga, ⁵naba se rinotno at loxonaleng anaba raba tenep kangka ri Leeme Silok ngan ta lang kolonu ri Lanaraavuk ne Moroa at ne Jakop.”

⁶Nema leme Betilem maga ronga levelinga mumu lobokis at lekabus la maga long lenget kaka i ro laraamang gak lok saparap lemenemen Jearim. ⁷La maga lok keretna, “Atat pas uto loogu laplavang at Leeme Silok, la atap lavang to melamgo at loxot kitkis teren.”

⁸Leeme Silok, una beles eburu mi lobokis at lekabus uto xeneng at loogu laplavang, neni lampoovo at lolos taram, la una nemen lexen ta de xeneng. ⁹A vara i do lavamaasa ram dinak lok amisik lempanga ik mokso; la a vara i do limixin taram dinap kup mi lomomo!

¹⁰Uga lok laxakaape ri lasaxaruki ram ne Devit; kuren la Leeme Silok, uguta lox abulubun loorong soksoxolik taram. ¹¹Uga lok laxakaape lolos ti ne Devit la ni laxakaape ua u noxo lok ka amlong i, la i lok keretna, “Nenia anaba soxolik tara tamdak taram kusu naba ravasu ngan loorong, la naba rukun u rim gomgonga limixin. ¹²La mo do luvutnurum dina ruturun ti lekabus tarak, la ti levelinga nia anam taba di min, luvutnitna di bok dinaba tu kun u ngan lavaorong at mo bok leven maares melemu.”

¹³Leeme Silok ira soxolik ka vam lemenemen Saion; la i vara i xusu na lox i ngan langkolonu aulis teren, i lok keretna, ¹⁴“Anaba nemen amisik ba ia de; la nia a vara i xusu anabat kis ngan Loorong Silok de at na loxot. ¹⁵Anaba lox apnovos lemenemen Saion mi mo lempanga neni ik pakes tin; la anaba lox epovo lavakpakes at luvuttadi banbalo mego mi lempanga anan tidi. ¹⁶Anaba lox anarong lavamaasa mego keneng at leven gugu axap nedi dinak lox i; la limixin dik lok keneng teren, dinak pixan la dinap kup mi lomomo. ¹⁷Anaba soxolik kaka tara at livisik li at ne Devit go xeneng kusu nabat kis ngan loorong mi laasen silok teren; la anaba lok tatao avukat lixitkis orong at loorong soxolik tarak de xeneng at na lemenemen Saion. ¹⁸Anaba sak pava lavamunepen teren mi lainmangan, ketla limixin at lixitkis orong teren dinaba ngasang kobot la dinap novos.”

Salmo 133

I Lox Avukat At Lebalamu Ela At Leeton

¹I milik maraanu la i nunuan aleng at loxonaleng limixin at ne Moroa di nemen buru xeneng at lenmila oon. ²I milik ngan ta ladan momonok maraanu ua gano diga lox anarong laradi min la ga sesen su boro at laraes at lamaasa ne Aron, la ga sesen si uto at laxaka at lavanga singsiga ren. ³I lok ngan leedemi boro at lakaana Eremon i sesen su boro vana at lengkon kaana lixilik to Saion. La ni mo lenep ua ne Moroa ga xaape min kusu naba lox anarong limixin mi lороoro lexen.

Salmo 134

Lorotoro Ri Emi Asu Mi Leeme Silok

¹Lavanat saxaruki at Leeme Silok, ude nimi la mina emi asu min; nemi ua mi gugu ro xeneng at loogu laplavang at lengkanimin, mina emi asu min. ²Mina xip aurut kikngen keneng at lisingising to xeneng at loogu laplavang, la mina emi asu mi Leeme Silok.

³A vara i do Leeme Silok i nemen de Saion la ga rudum li laxalibet mi lavatbung menemen naba lox anarong nemi!

Salmo 135

Loxompixan Ti Emi Asu

¹Leemi asu ri Leeme Silok.

Nemi lavasaxaruki at Leeme Silok, mina emi asu mi laasen teren;
²la nemi mo mi gugu ro at loogu at Leeme Silok, la to xeneng at loogu

laplavang at ne Moroa atnedik. ³Mina emi asu mi Leeme Silok atla neni i vukat; minak pixan emi asu ri laasen teren, atla mo loklok i nunuan aleng. ⁴Neni ga soxolik kaka leme Jakop kusu tin; neni ga soxolik ka limixin me Israel kusu ateran akmokso.

⁵Aklen i do Leeme Silok atnedik i silok, la i silok polo mo leven moroa vetpes. ⁶Neni i epovo na lok lempanga salai neni i vara i to vana at laxalibet, la de at lavatbung menemen, to xeneng at laras la to xopok tubu at lisimaramain. ⁷Neni ik lox asusu lamanman takabu boro axa at latnese at lavatbung menemen; la ik lok lavanga i mam su boro at lamanman takabu, la i susuang asu lamanman boro at loogu lili ren.

⁸Neni ga sep amet laxamdak temes avot at limixin me Isip, la lempanga bok mi lavanuet kangkedek atdi. ⁹Neni ga lox asusu bok lempanga lolos la sangsangu xusu ri lox asongot loorong eburu mi luvuttadi silok ua diga gugu maxopok teren. ¹⁰Neni ga sele utut buaang levenabung mixin, la ga sep amet lavaorong lolos, nedi ne ¹¹Sion loorong at leme Amor, Ok loorong at leme Basan, la nedi lavaorong axap me Kaanan. ¹²Neni ga lok ka leveng kangka atnedi na lavaorong la ga raba limixin teren min; neni ga raba leme Israel min.

¹³Leeme Silok. Dinaba tong asusu amisix i do nenu ne Moroa; la laxam pipisik li melemu dinabam domasu ram. ¹⁴Leeme Silok nabak lok see at limixin teren; neni naba belemumu lavaanat soxolik teren.

¹⁵Limixin boro at levenabung mixin petpes di lok levenmoroa atdi mi la siliva la gol, luvuttadi mun mede xopok di vop di mi leventingen di. ¹⁶Di ruuna leven ngusno ketla dixo epovo ri paase la levengkatli bok mo, ketla dixo epovo ri reven. ¹⁷Levenbaalung mo atdi, ketla dixo epovo ring tonga; la dixo epovo rinotno bok tik lok ka mamas. ¹⁸A vara i do mo luvuttadi ga vop mo lempoovo vanga la dira nuunu saga atdi, dinaba vee voovo vanga nga mo lentaba diga vop di!

¹⁹Limixin me Israel, mina emi asu mi Leeme Silok; nemi lavamaasa at ne Moroa, mina emi asu min. ²⁰Nemi lubang mixin me Levi, mina emi asu mi Leeme Silok, la nemi axap mo mi lotu saparav i, mina emi asu min. ²¹Mina emi asu mi Leeme Silok to xeneng Saion, ik lok to xeneng at langkolonu aulis teren Jerusalem.

Leemi asu ri Leeme Silok!

Salmo 136

Loxompixan Ti Tong Avukat

¹Ata tong avukat ti Leeme Silok, atla neni i lox avukat; kopmen tekavaxap at labalamu ren. ²Ata tong avukat ti ne Moroa mo i silok ti leven moroa axap; kopmen tekavaxap at labalamu ren. ³Ata tong avukat ti Lanaraavuk i lolos silok polo nedi lavaeme silok axap; kopmen tekavaxap at labalamu ren.

⁴Neni xusuk mun ik lok lempanga sangsangu i silok aleng; kopmen tekavaxap at labalamu ren. ⁵Neni ga rudum li laxalibet mi mo lakleklen teren; kopmen tekavaxap at labalamu ren. ⁶Neni ga vaxaxis li laxangka to mavana at laras; kopmen tekavaxap at labalamu ren. ⁷Neni ga rudum laxangking mi lagaaling; kopmen tekavaxap at labalamu ren. ⁸La mo laxangking ti lok tatao levenaleng kangking; kopmen tekavaxap at labalamu ren. ⁹La lagaaling mi laxam penti rik lok tatao levenaleng kanimin; kopmen tekavaxap at labalamu ren.

¹⁰Neni ga sev amet laxamdak temes avot at leme Isip; kopmen tekavaxap at labalamu ren. ¹¹Neni ga lam asu limixin me Israel basinge lenep silok Isip; kopmen tekavaxap at labalamu ren. ¹²Neni ga lox i mo mi lolos silok teren atla lekngen i lolos aleng; kopmen tekavaxap at labalamu ren. ¹³Neni ga lok langas to xantubu at loxontas memele; kopmen tekavaxap at labalamu ren. ¹⁴Neni ga lam avolo limixin teren go xantubu at laras; kopmen tekavaxap at labalamu ren. ¹⁵Ketla ni gak mit axong loorong mi luvuttadi esep me Isip; kopmen tekavaxap at labalamu ren.

¹⁶Neni ga lam avolo limixin teren to at amatbin; kopmen tekavaxap at labalamu ren. ¹⁷Neni ga sev amet lavaorong lolos; kopmen tekavaxap at labalamu ren. ¹⁸Neni ga sev amet bok mo lavaorong ua limixin axap digak leklen di (mi levenasen silok); kopmen tekavaxap at labalamu ren; ¹⁹ngan ne Sion bok loorong at leme Amor; kopmen tekavaxap at labalamu at ne Moroa. ²⁰Ga sep bok ne Ok loorong me Basan; kopmen tekavaxap at labalamu at ne Moroa. ²¹Neni ga raba limixin akmokso ren mi levennep kangka atnedi na lavaorong; kopmen tekavaxap at labalamu ren. ²²Neni ga raba levennep kangka ri limixin akmokso ren me Israel; kopmen tekavaxap at labalamu ren.

²³Neni goxo domampe nama at levenaleng limixin munepen digap sep nama; kopmen tekavaxap at labalamu ren. ²⁴Neni ga lox asepmus nema basinge lavamunepen atnama; kopmen tekavaxap at labalamu ren. ²⁵Im taba luxa lempanga axap di rooro; kopmen tekavaxap at labalamu ren.

²⁶Ata tong avukat amisik ti ne Moroa boro vana at laxalibet; kopmen tekavaxap at labalamu ren.

Salmo 137

Lanteng At Leme Israel Keneng At Loxokoxo

¹Nema magat kis saparap levendan sen to Babilon; la magak saxaanu go at loxonaleng magam doma lemenemen Saion. ²La magak paxa suke leven gita atnema ro at levenuna vilou mo ga tu auret laradan sen. ³Nedi mo diga vaxat kaka nema, diga tong i rinema do manak pixan; diga tong rinema do manak pixan kusu rik lox amomo nedi; digak lok keretna, “Minak pixan tinema mi tengkom pixan mumu lemenemen Saion.”

⁴I lolos aleng tinama xusu mana vixan toxompixan ti Leeme Silok nade at na lenep at limixin petpes. ⁵Do ana domampe lemenemen aulis tarak Jerusalem, ba lox avukat a noxo epovo xusu ana sak bok ba ligita rak mo! ⁶Do ana domampe Jerusalem la a noxo doma bok ba u ngan nenu lavanga loklox amomo rinotno rak, ba lox avukat do a noxo epovo xusu ana vixan bok ba.

⁷Leeme Silok, una vorang mo levelinga xapmek leme Edom diga lox i gano. At mo laaleng leme Babilon diga sele utut lemenemen Jerusalem la digara vaxat kaka nema. Una vorang mo levelinga atnedi leme Edom diga tong amisik i do, “Mina sele utut asi Jerusalem ukopok at laxangka!”

⁸Melemu limixin esep dinaba sele utut lemenemen silok Babilon mumu mo loklok diga lox i rinema. La mo limixin ua dinaba vorang mo loklok ti leme Babilon, luvukat tidi; ⁹la dinaba lok kaka levenkadede atnemi leme Babilon la na saava amdanda di ro at lavaruat.

Salmo 138

Lisingising Ti Tong Avukat

¹Nenia a tong avukat tu Leeme Silok mi lorooro axap tarak; a vixan emi asu ru ro melamgo at leven moroa axap. ²A ru gili ri loogu laplavang kaala ram a rikbu la a emi asu mi laasen taram mumu labalamu lexen la loklok tuturun taram tinama. La a emi asu minu atla uga lox asuusu i do laasen taram i silok pologat la Lenavolo ram i silok aleng la duk lok mavana at lempanga axap at na lavatbung menemen. ³Uga ronga res tarak at loxonaleng aga ro ke ram; la uga lox alolos ia mi lolos taram.

⁴Leeme Silok, lavaorong axap at lavatbung menemen dinaba emi asu minu, atla digara ronga vam leveng kakaape ram. ⁵Dinabak pixan mumu lempanga ugara lok pam i la mumu laasen silok taram. ⁶Keke i do nenu u silok polo lempanga axap, ketla uk lok tatao luvuttadi gamasa de xopok, la limixin loklox aaso dixo epovo na lox alipe laxakapmek atdi basinge u.

⁷At levenaleng levenmumuat i tu kangkan ia, nenu uk lok tatao ia. Nenu up sep tangarang lavamunepen belemamao rak, la uk lox asepsu ia mi lolos taram. ⁸Nenu naba lox epovo lempanga uga xaape min; Leeme Silok, labalamu ram naba nemen lexen. Una lox epovo axap ta mo lugugu ua ugara vaxaru kaxat pam i.

Salmo 139

Lakleklen Axap Mi Loklok Tatao At Ne Moroa

¹Leeme Silok, ugara ila mumu avukat pam ia, kuren la uklen avukat tinotno ia. ²Ukleklen axap mo lempanga nia ak lox i; uk

lok paxalom tino, ketla ukleklen axap levendoxoma rak. ³U reven ia at levenaleng nia a gugu xopla ak lok mamana; nenu uklen axap leveloklok tarak. ⁴Keke i do a xovisi ana vaase, uraklen pam levelinga salai anaba vaase i. ⁵U turu too rak at lengkot axap; la u reven aratao ia mi lolos silok taram. ⁶Lakleklen taram tia i si aleng; la i volo bok lakleklen tarak.

⁷Anaba sixiro ia ua basinge u? Anaba vas taba ia ua basinge levereven taram? ⁸Mo do anat pas uto vana at laxalibet, nenu uk lok go; la do ana midi ro at lemenemen at labarongan, nenu uk lok go.

⁹La mo do ana rava kaxat uto at lenep, laxangking i losu ve xopla anak lok to vaxalom at lenep laxangking i lotup e, ¹⁰nenu mo ubak lok go xusu tim gomgonga ia la unaba nemen go rik lok tooro ia. ¹¹Mo do a epovo ri tong i ri lamain kusu na lipe ia, koplaxasep mo ik lok kangkan ia na repukus ngan laxanimin, nenu naba epovo na ven ia. ¹²Ketla lamain bok kopmen na lok ngan lamain tu, la laxanimin i kasep ngan ta laaleng kangking. Lamain eburu mi laxasep, nedu du epovo mun at levereven taram.

¹³Uga rudum lengkot axap at labantuxu rak; uga vop etang ia ro xeneng at latnenat at ne naga. ¹⁴A emi asu minu atla nenu xusuk mun limixin axap dina marat (sangu, lungun) taram; la lempanga nenu uk lox i, i lok petpes la i nunuan aleng. Akleklen tino i mi lodoxoma axap tarak. ¹⁵At levenaleng levesi rak ga taut etang avukat tinotno ro xeneng at latnenat at ne naga; la at mo levenaleng nia aga sisilok nemnem go xeneng, nenu ugaraklen pam i do nenia mo agak lok, ¹⁶la uga reven ia avot ti laaleng ne naga ga visik ia. Levenaleng at lorooro rak uga rivit li i ria, ugara malagan li xatling pam i at lubuk taram, avot ti mo levenaleng nat pot saparap ia.

¹⁷O Moroa, i lolos aleng tia xusu ana xasep at leven doxoma ram; la lavanisa axap mo leven doxoma ram ik lok! ¹⁸La amo do ana us di, diba buaang polo laxanit kangkeneng. At loxonaleng nia a rakdu tuang, nenu move uk lok buru minia. ¹⁹O Moroa, a vara i do una sev amet luvuttadi xapmek! A vara i do luvuttadi sepsep dinaba ke xepe mulus ia! ²⁰Di paase leveloklok kakapmek mumu u; la di paase asu loklok bilinga rik lok kapmek laasen taram. ²¹O Leeme Silok, a bele ngatngas tino rinedi mo di belangatngas tu! Ak lox abulubun tinotno nedi ua di paase pupu ru! ²²A belangatngas tinedi mi langsung lebelemamao; a tong di do lavamunepen taram.

²³O Moroa, una ila mumu ia la unaklen lodoxoma rak; una lok tong pen ia, la unaba long terek ka leven doxoma rak. ²⁴Una ila mumu ia do teveloklok kakapmek tarak, la unam gomgonga amisik ia at levenaleng axap se at lanmet tarak.

Salmo 140

Lisingising Ti Loklok Tatao

¹Leeme Silok, una lox asepsu ia basinge limixin kapmek; una lok tatao avukat ia basinge limixin sepsep. ²Nedi di rivit li nemnem amisik leveloklok kakapmek, la dik paxaru kaxat amisik leegang. ³Leven gam atdi ik lok ngan lempat sii angkang la levelinga atdi ik lok ngan lasak at lavatmoora.

⁴Leeme Silok, una xok ia basinge lolos at limixin kapmek; una lok tatao ia basinge limixin sepsep ua digam nem mu ia xusu dina lox asubu ia. ⁵Limixin loklok aaso dira li vam lelixo ria, dira saga vam lengkutkut atdi, la dira lii laxam pelixo ro at langas kusu ri lixo xaka ia.

⁶Na a vaase ru Leeme Silok keretna, “Nenu ne Moroa rak. Leeme Silok, una ronga lerengteng tarak kusu ri loklok tooro ram! ⁷Loorong Avolo, nenu Leeme Silok tarak, la nenu lentupe lolos tarak. Ugarak lok tatao avukat pam ia keneng at leven esep. ⁸Leeme Silok, nemen gat utam taba nedi limixin kapmek mi mo lempanga ua nedi di vavara rin; la nemen uta ke avolo mo leven doxoma nemnem atnedi xusu na soorun.

⁹Uguta ke mo lavamunepen tarak dinak sak tup minia; ketla una see antan mo loklok dik lox i ria, nabamlong mu di. ¹⁰A vara i do una lox asu laxali kao bokbolot na subu mavana atdi; la una lu arup midi ro xeneng at lemeroon kusu dinoxo eng su bok ba. ¹¹A vara i do nedi mo dik sok taba lentaba vetpes mi levelinga xaxarang, di noxo lox epovo tekot; la a vara i do laxapmek na suxuna limixin sepsep, la na sev amet di.

¹²Leeme Silok, aklen i do nenu u tu see at limixin banbalo, la u tu ri luvukat atnedi dik pakes. ¹³I ruturun tinotno do limixin mokmokso dinaba emi asu minu, la dinaba nemen maxopok at loklok tatao ram.

Salmo 141

Lisingising Ti Leng Kantinao

¹Leeme Silok, a ro ke ram at na loxonaleng kusu una lok tooro nga ia! Una ronga ia at loxonaleng a ro ke ram. ²Una siam ka lisingising tarak ngan ta lusuxa i so mavak, la una siam ka lukngak angosong aurut min naba lok ngan ta laplavang tu ukantinao.

³Leeme Silok, una lok li taradi rutu mu ram nade at lungusno rak, la naba reven tatao bok levelinga at lubulubun tarak. ⁴Una beng ia basinge lavavara rik lok laxapmek, la basinge lentangas eburu mi luvuttadi loklok kakapmek. A vara i do a noxo anan eburu midi at lara peluxa atdi.

⁵I lox avukat do laradi nunuan na vaase sox ia mumu laxakapmek kopla na sep aleeng ia, ketla a noxo siam kaka loklox asinorong at

luvuttadi xapmek; a ngising amisik kusu Leeme Silok na lok kepe mo leveloklok kakapmek atnedi. ⁶La amo do dina so gingin suu mi lubung amgomgo atnedi boro vana at labarabaras buang uat, limixin diba tong asu ba i dola lavapaase aronga rak ga ruturun. ⁷Naba ngan loxonuna di vagam i, la dira ra koxorop axakalik i, kuren la laxan si atdi bak midi ekarakat go at lisigege at lamaut (larabuang).

⁸Ketla nia move a nuunu saga ram, Leeme Silok, Loorong Avolo rak; a vara i do unak lok see rak, la uguta ke xepe ia ana met! ⁹Una lox asepsu ia basinge laxampelixo mo di liili pe ia min, la basinge mo lempang kutkut at luvuttadi xapmek. ¹⁰A vara i do limixin kapmek dinaba oon tubun axa at lara pelixo atdi kusu nia nabat pas sepsu la a noxo ruuna ka taniu.

Salmo 142

Lisingising Ti Loklok Tooro

¹Nenia a ro ke at Leeme Silok ti loklok tooro ren; la a sing lolos tinotno i. ²A tong taba i mi leven doxoma rak; la a tong axasep axap i mi leven mumuat tarak. ³At loxonaleng a gagas kusu ana doma abulubun, neni iraklen pam langas salai ana mumu asu i; atla lavamunepen tarak dira li pe vam ia mi lara pelixo at mo langas nia at pas teren. ⁴Amo do a reven tangtagap kangkan ia, axo ven tara go xusu naba lok tooro ia. Kopmen teta go nam doma mu ia mi lumumuat tarak.

⁵Leeme Silok, a reng taba u xusu una lok tooro ia; nenu axa Leeme Silok nu Lurutu See Pe rak; la a vavara xusuk mun u keneng at na lorooro. ⁶Una ronga ia, ang teng ti loklok tooro ram atla lodoxoma abulubun i suxuna axap ia. Una lox asepsu ia basinge lavamunepen tarak atla di lolos aleng polo lolos tarak. ⁷Una lox asepmus ia basinge levenmumuat tarak, kusu anaba emi asu minu ro at lovtotpot buru at limixin taram, atla uga lok luvukat tia.

Salmo 143

Lisingising Ti Loklok Tooro

¹Leeme Silok, una ronga lisingising tarak! Una ronga i na lisingising lolos tinotno rak atla loklok taram ik mokso aleng; la uk lok epovo epovo leveng kakaape ram, kuren la una ronga ia! ²Nenia lasaxaruki ram, kuren la uguta lok li ia at loklok tongpen; atla kopmen teta ip sepsen at lamaram.

³Lavamunepen tarak digara vuse ka vam ia la dira sep kapmek tinotno ia. Dira lok li vam ia at loogu xokoxo i main bonot, la a lok ngan tino

nga nedi ua diga met axa gano at lereot. ⁴Kuren la a gagas kusu ana raba xepe nga lorooro rak; atla lodoxoma abulubun na i suxuna rinotno nga ia.

⁵A doxoma su ap mo levenaleng gara oon pam; la a doma mo lempanga nenu ugara lok pam i, la mo leven gugu ram i vot manga at lodoxoma rak. ⁶A song aurut mi lukngak tu keneng at lisingising tarak; la labalak ik minu ru ngan ta loxongkangka vatmang.

⁷Leeme Silok, una ronga res tarak! Nia ara doma abulubun tino. Uguta lok alipe u basinge ia, lavanga ana emu buru minedi ua di si uto xopok at lemenemen at labarongan. ⁸Unak lox adoxoma ia at leven maxantamak axap mi mo labalamu lexen taram, atla lunuunu rak i tu saga ram. Leve singising tarak i uturut upana ru, kusu una lox ase ia mi langas nia anaba mumu asu i.

⁹Leeme Silok, a vot saporap u xusu unak lok see rak; la una vaxat asu ia basinge lavamunepen tarak. ¹⁰Nenu ne Moroa rak; una lox ase ia mi langas ti mumu asu lavavara ram. Unak lok luvukat tia, la una sasat ia pana at langas manmanton.

¹¹Leeme Silok, una sat asu ia basinge lavamunepen tarak ngan uga xaape vam min; una lok luvukat tia la una lox asepmus ia basinge na leven mumuat tarak! ¹²Una sev amet lavamunepen tarak, atla nenu u balamu ia; la una lox abaava tino di mo dik lox asongot ia, atla nenia lasaxaruki ram.

Salmo 144

Lorotong Avukat At Loorong Ti Ne Moroa

¹Nia a emi asu mi Leeme Silok ni Lurutu See Pe rak! Neni i arala ia mi loklok ti esep, la ik lox agagas ia ri leesepe silok. ²Neni Lurutu See Pe la Lentupe rak, neni Lurutu See Pe rak, la Loogu Matmatkun la Laradi Loklok Arooro rak; neni laradi ua a nuunu saga ren kusu naba kubak pe ia. La neni ik sak tup mi levenabung mixin petpes la ik lok li di maxopok at loklok tatao rak.

³Leeme Silok, limixin nedi lempanga salai, la uram domamu solo di; nedi lempanga gamasa mun ketla ung tonga levelinga atdi? ⁴Nedi di lok ngan mun lamanman i rava polo; la levenaleng atdi i lok ngan mun lamamau i sonao.

⁵O Leeme Silok, una vaxat das laxalibet la una vas si ude xopok; una long tu at lempatkaana la dinaba soobang asu lusuxa. ⁶Una riki asu lamam (lavanga i mam) la una sak epeseves lavamunepen taram. Una so asu mi levesoosoo ram kusu naba lox amarat di la dina sixiro. ⁷Una song asi boro vana, la una sat asu ka ia boro xeneng tubu at lamaxat dan, la una lok li asepsu ia; una lox aroo su ia basinge lolos at limixin me xadiong, ⁸ua dixo tong asu rinotno luruturun, ketla di xaxarang la

dirat los polo laxakaape atnedi, mo diga tong i do diba tong asu levelinga ruturun.

⁹O Moroa, anaba vixan loxompixan maxat tu. Anabak sak ligita rak la anak pixan tu. ¹⁰Uk lox alolos lavaorong kusu dinak sak tup mi lavamunepen atdi, la uk lox (paxat) asepsu lasaxaruki ram ne Devit. ¹¹Una lox asepmus ia basinge lebelemamao at lavamunepen tarak; la una lox asepsu ia basinge lolos at limixin boro vetpes ua dixo tong asu luruturun ketla di xaxarang la dirat los polo laxakaape atdi.

¹²A vara i do laxamdak puraau atnema dinaba lok ngan larauna i suusu urut, la i lolos. La a vara box i do laxamposono maxat atnema dinaba milik maaranu (ngan levempos diga malagan i) la dinaba nganang levenmesuluk axap at loogu at loorong. ¹³A vara i do laraugu liili atnema naba unumsu mi lara met luxa axap. La a vara i do leve sipsip to at lenep atnema, dina pisik aleng ngan lasangaun larabin sangsangaun kobot. ¹⁴A vara i do laxan bulumaxao atnema, dina pisik aleng la di noxo pisik amet kopla dina seeve. A vara i do xopmen tanbulu xopla tanteng to at larangas atnema.

¹⁵La lomomo naba vot parap mo lubungmixin mo do na lempanga na ravasu ruturun tidi; la lomomo naba vot parap nedi ua Leeme Silok, neni ne Moroa atnedi!

Salmo 145

Loxompixan Emi Asu

¹Morua, nenu Loorong Silok tarak. Anaba tong asuusu laasen silok taram atla nenu Loorong Silok la ne Morua rak; anaba tong avukat amisik tu la a noxo xap tintotno ri tong avukat. ²Anaba tong avukat tu at levenaleng axap; anaba emi asu amisik minu la a noxo xap ti emi asu minu. ³Leeme Silok neni i nunuan aleng pologat, la i epovo rinotno do limixin dina emi asu min; atla ixo epovo xusu anaba re sa at lununuan teren ua i volo lakleklen tarak.

⁴Limixin dinaba emi asu minu ri levempanga ugara lok pam i, tuka i at lara loola vetpes la ti lara loola melemu; la dinaba tong asuusu levempanga lolos ugarak lok pam i. ⁵Anaba paase asu lixitkis orong eburu mi laasen silok taram, la anabam doma mumu leven gugu maraanu nenu ugak lox i. ⁶Limixin dinaba paase mumu leven gugu lolos nenu ugak lox i, la nia anaba paase asu luvukat taram. ⁷Dinaba tere mo luvukat taram la dinak pixan mumu lebelemulus taram. ⁸Leeme Silok i ruuna labalamu mi lebelemumu, la kopmen nak belemamao soso ketla i umsu mi labalamu lexen. ⁹Neni i vukat ti limixin axap la i ruuna lebelemulus tinedi limixin axap ni ga rudum di.

¹⁰Leeme Silok, lempanga rooro axap nenu uga rudum li di, dinaba emi asu minu, la limixin axap taram dinaba tong avukat tu. ¹¹Dinaba paase mumu lisisinang la lolos at lixitkis orong taram, la dina tong axasep limixin mi lolos taram, ¹²kusu limixin axap dinabak leklen leven gugu lolos taram la lisisinang orong at lixitkis orong taram. ¹³Lixitkis amgomgo ram naba nemen lexen, la kopmen tekavaxap at lixitkis orong taram.

Leeme Silok ik lok asoorun amisik leveng kakaape ren; la ik lox asuusu lebelemumu ren keneng at leven gugu axap teren. ¹⁴Ik lok tooro nedi di vekip tangarang mi levenmumuat; la im tebeng aonon nedi ua diga subu.

¹⁵Leeme Silok, levempanga rooro axap di reven tu mi leven doxoma voovo atdi, la um taba nedi mi leveluxa ua dik pakes tin. ¹⁶Um taba epovo rinotno nedi, la uk lox epovo rinotno levem pakpakes atnedi axap.

¹⁷Loklok at Leeme Silok in manton tinotno keneng at levempanga axap neni ik lox i, leven gugu ren ik lox i, ik lox i eburu mi lebelemumu ren. ¹⁸Neni ik lok saparap nedi mo di ngising tin, nedi mo di ngising tin mi luruturun. ¹⁹Neni im taba epovo ri levem pakpakes atnedi ua dik lok ngangao ren; ing tonga leven anteng atnedi la irak lox asepmus nedi. ²⁰Neni ik lok tatao nedi ua di vavara aleng tin, ketla neni naba sev amet nedi limixin dik lok laxapmek.

²¹Anaba emi asu amisik mi Leeme Silok la mo lempanga axap ua neni ga rudum i, dina emi asu amisik mi laasen melemelengan teren.

Salmo 146

Leemi Asu Ri Ne Moroa Luuntoo

¹Leemi asu ri Leeme Silok! Labalak, una emi asu mi Leeme Silok!

²Anaba emi asu min at levenaleng axap, nenia ana rooro ren; la anabak pixan ti ne Moroa rak keneng at lorooro axap tarak.

³Mi guta nuunu saga at lubung amgomgo mede at lavatbung menemen ti loklok tooro, atla kopmen teta mede xopok i epovo na lox asepmus nemi. ⁴Mo do dina met, dinabam long ti laxangka; la ap mo laaleng, leven doxoma ali atdi naba xap.

⁵Laradi naba ruuna xaka lomomo mo do neni na siam kaka ne Moroa at ne Jakop kusu rik lok tooro i, la neni i nuunu saga at Leeme Silok ne Moroa ren, ⁶atla neni laradi runtudum li at laxalibet mi lavatangka la laras, la mo lempanga axap bok di nemen keneng at na lengkot axap. Neni ik lox epovo amisik leven kakaape ren. ⁷Ing tonga linga avukat at lava baava, la im taba luxa nedi dik toxo.

Leeme Silok ik lox asepmus luvuttadi xokoxo, ⁸la irak lox arepalas lengkatli atnedi ua dixo reven. Neni im tebeng aonon nedi ua diga subu;

neni i vavara aleng tinotno nedi limixin mokmokso ren. ⁹Neni i reven aratao nedi limixin me xadiong ua di nemen keneng at lenep kangka atnedik; ik lok tooro lempat naa rixin eburu mi lubang karun, ketla ik lox asaxaek (tino) nedi luvuttadi loklok kakapmek.

¹⁰Leeme Silok neni Loorong Avolo. O leme Saion, ne Moroa atnimi nabat kis amgomgo lexen tinotno.

Leemi asu ri Leeme Silok!

Salmo 147

Leemi Asu Ri Ne Moroa Lanaraavuk

¹Leemi asu ri Leeme Silok!

I lox avukat kusu atak pixan emi asu ri ne Moroa atnedik; ik mokso rinotno la ik lox asuusu lomomo tinedi dina emi asu mi Leeme Silok.

²Leeme Silok ga (ira) vaxaru li amu lemenemen Jerusalem; neni ga (ira) lam kaka amlong limixin kokoxo. ³Neni ga (ik) lox aroo nedi ua lempeeve atnedi ga te povorok la ga koxo pe levennin kooxing atdi.

⁴Neni gara doma vam i do naba rudum lavanisa laxampenti, la ikleklen leven asen atnedi getgesara. ⁵Leeme Silok atnedik i silok la i lolos aleng; la ixo epovo xusu ataba us sa mo lakleklen teren mi tepanga xopla tetadi vetpes. ⁶Neni ip kip aurut nedi ua dik lox asi di, ketla it pas puuvus nedi luvuttadi loklok kakapmek uto xopok at laxangka.

⁷Atak pixan lengkom pixan emi asu ri Leeme Silok; atak sak lerengteng avukat mi lempat gita ri ne Moroa atdik. ⁸Neni ik lok li lemngkon takabu ro vana at laxalibet; neni ik lox asuusu larakabu ude ri laxangka, la irak lox asuusu levem pivilis to vana at lengkongkaana. ⁹Neni im taba luxa lempanga mi lavanuet kangkadek atdi, la im taba bok leven natnat kooxo mo do dina sing panga ri anan.

¹⁰Lomomo ren kopmen na tu at lempat paaros lolos, la ixo momo solo mi luvuttadi esep lolos; ¹¹ketla in tuuna xaka lomomo atla limixin di nuunu saga at labalamu lexen teren.

¹²O leme Jerusalem, mina emi asu mi Leeme Silok! O leme Saion, mina emi asu mi ne Moroa atnimi! ¹³Neni ik lox aru lolos lara musarakom atnimi; neni ik lox anarong limixin go. ¹⁴Neni ik lok tatao leven apdopdo atnimi basinge lavamunepen atnimi, la irak lox aan mais nimi mi leven uit maraanu.

¹⁵Neni i paase levelinga ri (lempanga at na lavatkangka), la ik lok epovo soso mun mo levelinga neni i tong i. ¹⁶Neni i vavaxat palas asu lusugao (mumudut - snow) ngan ta lavat tamon bukburu, la ira tereve ledeemi (mumudut - frost) ngan ta laxakup. ¹⁷Neni ik lox asu lempat betlom ngan ta laxariri uat; la ixo epovo xusu tara na ekini mi mo lumudut silok ua neni ik lox asuusu i! ¹⁸Melemu

neni i paase asu levelinga ren, la mo ladan uat ira kadan amu; neni im taba asu lamanman la mo ladan ira sesen ta.

¹⁹Neni ga raba limixin teren me Israel mi mo levelinga ren, ni laulis linga ren (ridi). ²⁰Neni goxovisi raba i ri lubangmixin petpes; kuren la dixok leklen leventaangas teren.

Leemi asu ri Leeme Silok!

Salmo 148

Langavang Axap Na Emi Asu Mi Ne Moroa

¹Leemi asu ri Leeme Silok.

Nemi mi nemen to vana rubu rino, mina emi asu mi Leeme Silok ik lok to vana at laxalibet. ²Nemi lubangangelo eburu mi limixin esep teren, mina emi asu min.

³Laxangking mi lagaaling, muna emi asu min, la laxampenti sosoo, mina emi asu min. ⁴Laxalibet pana xasep la ladan ik lok ma vana at laxalibet, mina emi asu min.

⁵Nedi axap mina emi asu mi laasen at Leeme Silok! Neni ga tong mun i la nedi na lempanga ga raut. ⁶Neni ga tong mun i la mo lempanga ga xis bus at mo lengkot atdi la dinaba nemen lexen go la di noxo ronga xepe levelinga ren.

⁷Laras main tubu, la lempat konomus la lempanga axap ik lok at na lavatbung menemen, mina emi asu min; ⁸la lamam mi lebetlom uat, lusugao mumdut (snow) mi lengkon takabu, la lara manman lolos ua ding tonga res at levelinga ren, mina emi asu min.

⁹Nemi lengkon kaana mi lempat taavut, la larauna vipisik peeve eburu mi lempatbuan, mina emi asu min. ¹⁰Nemi bok lempanga mi lavanuet kangkedek, lentaba sio la lentaba ronu, la laxa siisi mi lavapixa, mina emi asu min.

¹¹Nemi axap lavaorong mi limixin axap, lavanarong eburu mi lubang amgomgo vetpes bok, mina emi asu min; ¹²Nemi bok laxamposono mi luvurau atlok, la limixin asioxo mi laxaalik kakalik bok, mina emi asu min.

¹³Naba lox avukat do nedi axap dina emi asu mi laasen at Leeme Silok! Laasen teren i silok ti limixin axap; la lolos teren i volo lolos at lempanga axap at lavatbung menemen eburu mi laxalibet. ¹⁴Neni ga lox alolos lubangmixn teren, kusu limixin axap teren dinaba emi asu min; limixin me Israel di silok tinotno at lodoxoma ren.

Leemi asu ri Leeme Silok!

Salmo 149

Loxompixan Emi Asu

¹Leemi asu ri Leeme Silok!

Mina vixan loxom pixan maxat ti emi asu mi Leeme Silok; mina emi asu min to at lovtotpot buru atnedi limixin ua di ruturun tin! ²Nemi leme Israel, minak lek mumu laradi runtudum li atnemi; nemi limixin me Saion mina momo mumu mo Loorong Silok atnemi! ³Mina tii momo ri emi asu mi laasen teren; mina pasa levengkuvu eburu mi leven gita ri emi asu min.

⁴Leeme Silok in tuuna ka lomomo mumu limixin teren; im taba asen silok tinedi ua dik lok atnaasan la imtaba di mi lolos ti sak tup mi lavamunepen atdi. ⁵Limixin at ne Moroa dina momo mi leepang silok atla diga sev asi nedi, la dinak pixan momo maraanu rinotno at lengkanimin axap. ⁶Naba lox avukat do dinap kup silok at loxonaleng dina emi asu mi ne Moroa, la dinam tebeng levenise esep sengsen atnedi, ⁷kusu tik sak tup mi levenabung mixin petpes, la rik lox asongot di, ⁸la kusu ri koxo lavaorong atnedi mi lempat sen, la mo lubung amgomgo atnedi bok mi lempat sen aen. ⁹Na lempanga naba ravasu kusu ri lok li liina mavana at levenabung mixin petpes ngan ne Moroa gara vit li vam i. Nai i ngan lugugu at limixin at ne Moroa kuren la dinaba lok kaka laasen silok (lokok asinorong) teren.

Leemi asu ri Leeme Silok!

Salmo 150

Leemi Asu Ri Leeme Silok

¹Leemi asu ri Leeme Silok!

Mina emi asu mi Leeme Silok to xeneng at loogu laplavang teren! Mina emi asu mi lolos teren toxun pana at laxalibet! ²Mina emi asu min mumu levempanga lolos neni gara lok pam i. Mina emi asu mi lempanga silok doxodok teren (atla neni ne Lenaravolo).

³Mina emi asu min mi lara tu. Mina emi asu min mi leven gita la leven taaleng. ⁴Mina tii la minak sak gaamit ti emi asu min. Mina emi asu min mi lempat gita la leveng kaatu. ⁵Mina emi asu min mi lasaksak lempat tingtigon aen. Minak sak silok lempat tingtigon aen ti emi asu min.

⁶Levempanga rooro axap, mina emi asu min.

Leemi asu ri Leeme Silok!

Metiu

Lagale Lavavang At Ne Iesu Karisito Metiu Ga Malagan I

Levelinga Loklox Axasep

Lamaares 58 A.D.

Metiu neni lara atnedi lasangaun mi legepura luvuttadi loklok ka anasa at ne Iesu, lara laasen bok teren ne Levi. Neni laradi loklok ka pilas at lagavaman boro Rom. Melemu ne Iesu ga soxolik ka i la ni ga ravasu ngan laradi loklok ka anasa ren. Metiu ga malagan i na lubuk ti lubungmixin mokmokso ren me Judaia. At laaleng ne Metiu ga malagan na lubuk limixin me Judaia diga doma i do ne Moroa na soxolik ka soso mun laradi naba vot kusu neni ba lok ngan Loorong Silok atdi. At lavapaase Ibru diga so asen i mi la Mesaia (Lanarong), la at lavapaase Grik diga so asen i mi ne Karisito. Luvuttadi amgomgo at limixin me Judaia di goxoklen i do ne Iesu ga vot ngan Lanarong. Metiu ga vara i xusu na lox asuusu i ridi do ne Iesu neni Lanarong tuturun la Loorong Silok at leme Judaia, kuren la neni ga paase mumu ne Iesu ga vot kerepmo, i ngan Loorong Silok. Ne Metiu ga malagan li bok lentaba levelinga boro at Lovoang Kaala migomgo atdi mumu Lanarong at ne Moroa. At na levelinga ga sooxos at lovtopot at Lanarong.

p Lengkot Silok Keneng at na lubuk.

1:1–2:23 Diga visik ne Iesu.

3:1-12 Jon laradi sep susu ga gugu.

3:13–4:11 Satan ga lok tong pen ne Iesu.

4:12–18:35 Iesu gat pas tangtagap la ga vavang to Galili.

19:1–20:34 Iesu gat pas uto Jerusalem.

21:1–25:46 Lempanga salai ne Iesu ga lox i ro Jerusalem.

26:1–27:66 Larangtanga alis la lanmet at ne Iesu.

28:1-20 Iesu ga roo xat basinge lanmet.

Leretere Ri Lavalabat At Ne Iesu

(Lu 3:23-38)

1 ¹Anai ni leretere ri levenasen at lavalabat at ne Iesu Karisito, neni livisik li at ne Devit, la ne Devit neni livisik li at ne Abaram. ²Abaram neni ne temen ne Aisak; Aisak neni ne temen ne Jakop; Jakop neni ne temen ne Juda eburu mi luvutneton; ³Juda neni ne temen ne Peres mi ne Sara. (Nenen du laasen teren ne Tema); Peres neni ne temen ne Esron; Esron neni ne temen ne Ram; ⁴Ram neni ne temen ne Aminadap; Aminadap neni ne temen ne Nason; Nason neni ne temen ne Salmon; ⁵Salmon neni ne temen ne Boas (Raap neni nenen); Boas neni ne temen ne Obet (Rut neni nenen); Obet neni ne temen ne Jesi. ⁶Jesi neni ne temen ne Devit, loorong silok.

Devit neni ne temen ne Solomon (nenen ni latkin at ne Uraia); ⁷Solomon neni ne temen ne Roboam; Roboam neni ne temen ne Abaisa; Abaisa neni ne temen ne Asa; ⁸Asa neni ne temen ne Josepat; Josepat neni ne temen ne Jonam; Jonam neni ne temen ne Usaia; ⁹Usaia neni ne temen ne Jotam; Jotam neni ne temen ne Eas; Eas neni ne temen ne Esekia; ¹⁰Esekia neni ne temen ne Manase; Manase neni ne temen ne Amon; Amon neni ne temen ne Josaia; ¹¹Josaia neni ne temen ne Jekonia eburu mi luvutneton. Ap mo levenaleng limixin esep boro Babilon diga lok ka limixin me Israel uto Babilon ti loxokoxo.

¹²Melemu at nai, ne Jekonia neni ne temen ne Salatiel; Salatiel neni ne temen ne Serababel; ¹³Serababel neni ne temen ne Abiut; Abiut neni ne temen ne Eliakim; Eliakim neni ne temen ne Aso; ¹⁴Aso neni ne temen ne Sadok; Sadok neni ne temen ne Akim; Akim neni ne temen ne Eliuda. ¹⁵Eliuda neni ne temen ne Eliasa; Eliasa neni ne temen ne Matan; Matan neni ne temen ne Jakop; ¹⁶Jakop neni ne temen ne Josep, latlok at ne Maria, nenen ne Iesu, ga ruuna ka laasen do Lanarong.

¹⁷Kuren la i ru ka i at ne Abaram la uto at ne Devit ga epovo at lasangaun mi lavanuet lavaola. La i ru ka i at ne Devit i se leme Babilon diga lok ka limixin me Israel uto Babilon ga epovo at lasangaun mi lavanuet lavaola. La i ru ka i melemu at loxokoxo at limixin me Israel to Babilon la i se at livipisik at Lanarong ga epovo at lasangaun mi lavanuet lavaola.

Livipisik At Ne Iesu Karisito

(Lu 2:1-7)

¹⁸Anai ni leretere ri livipisik at ne Iesu Karisito. Maria, nenen ne Iesu diga ora ka i xusu latkin ti ne Josep, ketla kovisi du goxo epot, Maria ga long lenget ka i do neni mo ga balan madak mi lololos at Loroonan Kaala. ¹⁹Ne Josep, latlok teren, neni lagale laradi la ga mumu asu avukat

Lenavolo at ne Moses; ga lok lodoxoma ren kusu na ke xepe ne Maria. Ketla neni goxo vara i xusu na lox amangan i ro at lemeren limixin axap. Neni ga lok do na lok kepe nemnem mene i.

²⁰Josep gam doma mumu i na la at lara laxanimin laangelo at ne Moroa ga vot saparav i at loromtobo la ga lok, “Josep. Livisik li at ne Devit. Nemen gat uta marat kusu una lok ka ne Maria ngan latkin tu, mila mo labalan madak neni i ruuna i, neni at Loroonan Kaala. ²¹Neni naba visik lamdak temes la uba so asen i mi ne Iesu, (Lavasuun teren do laradi loklox arooro) mila neni naba lox arooro limixin teren basinge laxakapmek atdi.”

²²Ana lempanga axap ga vot kusu ri lox asorun levelinga at ne Moroa ga ravasu at lungusno at leeme vapaase alii ren, ga lok keretna,

²³‘Tatkin maxat naba balan madak la naba visik tamdak temes la limixin diba so asen i mi ne Emanuel.’ *Ais 7:14*
Lavasuun teren do, ‘Moroa eburu midik.’

²⁴La ne Josep ga xatu kaxat ap mo laaleng petpes la ga mu asu levelinga at laangelo at Leeme Silok ne Moroa, la ni ga epot ka ne Maria. ²⁵Ketla neni goxo midi eburu mi ne Maria, se neni ga visik lamdak teren. La ne Josep ga so asen i mi ne Iesu.

Lovotpot At Luvuttadi Leklen

2 ¹Maria ga visik ne Iesu ro Betilem, at lenep silok Judaia. Ap mo levenaleng ne Erodes ga nemen ngan loorong silok. Melemu lentaba luvuttadi leklen at larapenti digat pas boro at lenep laxangking it losu e uto Jerusalem ²la diga sue limixin go, “Lumumulum ua diga visix i kusu na lok ngan loorong silok ti limixin me Judaia? Maga ven lenti ren to at lenep laxangking it losu e, la marat pas ude xusu mana lotu saparav i.”

³Erodes ga ronga i na, la lebelen ga xatu, la limixin axap go Jerusalem lebelen di ga xatu bok. ⁴Erodes ga ro bubua ka nedi axap luvuttadi amgomgo at lubangmaasa la luvuttadi loklox ase at Lenavolo la ga sue di xeretna, “Lanarong diba visix i ua?” ⁵La diga vorang i rin keretna, “To at lemenemen Betilem at lenep Judaia, mila leeme vapaase alii ga malagan i xeretna,

⁶‘Lemenemen Betilem at lenep Juda, neni i silok aleng ti levenmenemen petpes to Juda. Tara me dom naba vot ngan laradi gomgo la naba lok tatao limixin tarak mede Israel kerekngan laradi loklok tatao sipsip.” *Mai 5:2*

⁷La ne Erodes ga ro bubua nemnem ka mo luvuttadi leklen la ga sue di mi laaleng salai mo lenti ga so su ren. ⁸Melemu neni ga riki di uto Betilem mi levelinga xeretna, “Minat pas la mina puse avukat ti mo lamdak; la do mina vuse sa ren, miba tong axasep box ia min, kusu nenia bok aba vosiga i la ana lotu saparav i.”

⁹⁻¹⁰Melemu at na levelinga at Loorong Silok, diga vas kaxat, la at lavatpas atdi ro at langas diga ven manga mo lenti, no diga ven avot pam i ro at lenep laxangking it losu e. At loxonaleng diga ven i, lomomo atdi ga silok aleng. Mo lenti gam gomgo ridi se ga ru ro mavana ap mo loogu ne Iesu gak midi ren. ¹¹Diga beles ukeneng la diga ven lamdak eburu mi ne Maria, nenen. Diga xis tiktikbu mi lempatgulom atdi la diga milik tiding si ukopok la diga lotu saparav i. La diga suang lengkontonom atdi la diga lok letaba rin mi logol, laxadan somavak, la laxadan mi luunun silok. ¹²Melemu at nai Moroa ga vaase di xeneng at loromtobo do nemen gat ditamlong uto saparap ne Erodes. Kuren la diga vas bilong uto at lenep kangka atdi at lara langas petpes.

Josep Ga Oo Mi Ne Maria Du Lenan Uto Isip

¹³Se mo luvuttadi leklen diga vas kaxat pam, laangelo at Leeme Silok ne Moroa ga vot parap ne Josep keneng at loromtobo la ga lok, “Una xatu kaxat la una lok kaka lamdak eburu mi nenen la mina sixiro uto Isip, la mina nemen go se nenia aba tong i rinimi do mina on basinge mo lenep, mila ne Erodes mo naba reven pupuke ri lamdak kusu na sev amer i.”

¹⁴Kuren la ne Josep ga xatu kaxat, la ga lok kaka lamdak eburu mi nenen, la ap mo mene laxanimin diga vas kaxat basinge mo lemenemen Betilem la uto Isip. ¹⁵La diga nemen go se ne Erodes ga met. Nai lempanga ga vot kusu ri lox asorun levelinga at ne Moroa ga vaase asu i at lungusno leeme vapaase alii ren keretna,

‘Aga xup kaka lamdak tarak boro Isip.’

Ose 11:1

Diga Sev Amet Laxamdak Temes To Betilem

¹⁶Se ne Erodes ga long lenget ka i do luvuttadi leklen diga bala vukpux i, neni ga musak aleng. Neni ga raba linga limixin esep teren kusu dina sev amet laxamdak temes, lenmaares atdi ga epovo at legepura la maxopok, to Betilem la at levenmenemen bok gak lox auret, mumu levelinga neni gara ronga vam i boro at luvuttadi leklen, mumu laaleng lenti ga so suu. ¹⁷La mo levelinga, ne Moroa ga vaase i at lungusno at leeme vapaase alii ren ne Jeremia ga sorun, la ga lok keretna,

¹⁸‘Lerengteng at lara mo diga ronga i ro Rama, ni lanteng silok. Rakel mo ik saxaanu at laxamdak teren. La kopmen tara i epovo do na lox amenemen i mila laxamdak axap teren mo dira met pam.’

Jer 31:15

Josep Mi Ne Maria La Ne Iesu Digamlong Boro Isip

¹⁹Melemu at lanmet at ne Erodes, laangelo at Leeme Silok ne Moroa ga vot saparap ne Josep keneng at loromtobo to Isip. ²⁰La ga lok, “Una xatu kaxat, la una lok ka lamdak eburu mi nenen, la minamlong uto at lenep silok Israel; mila mo luvuttadi diga lok do dina sev amet nom lamdak, dira met pam.”

²¹Kuren la ne Josep ga xatu kaxat, la ga lok ka lamdak eburu mi nenen la digamlong uto Israel. ²²Se ne Josep ga ronga i do Akeleas mo ga lok ka lixitkis at ne temen, ne Erodes, ngan loorong silok boro Judaia, neni ga marat kusu ri nemen go. La laangelo ga raba linga manga i xeneng at loromtobo, kuren la digat pas uto at lenep silok Galili. ²³La diga nemen to Nasaret. La levelinga at lavaeme vapaase alii ga sorun. Mo levelinga ga lok keretna, ‘Diba so asen i do neni lanat me Nasaret.’

Jon Laradi Sep Susu Ga Vavang Ti Limixin

(Mk 1:1-8; Lu 2:1-18; Jo 1:19-28)

3 ¹Buaang levenmaares gara volo, la ne Jon, laradi sep susu ga ru asuvos to at lamatbin at lenep silok Judaia la ga ru ka lugugu teren. ²Neni ga vavang keretna, “Mina leeng basinge leveloklok kakapmek atnimi, mila langas ti Linintoo no vana at laxalibet mo nga ira auret!” ³Leeme vapaase alii ne Aisaia ga paase mumu ne Jon mi levelinga xeretna,

‘Lara mo ip kup to at lamatbin keretna, mina lox agagas li langas ti Leeme Silok; mina lox akmokso langas tin!’ *Ais 40:3*

⁴Jon ga siga labantamon diga lox i mi lengkabinim at lakamel; neni ga dodos i mi labanbaane diga lox i mi labantuxu at lavanga mi lavanuet kangkedek teren. La neni ga anan levenasku mi laxanmisiu boro at laxairing. ⁵Limixin digat pot saparav i boro Jerusalem, boro at levenep axap Judaia, la boro bok at levenep saparap ladan sen Joridan kusu dinang tonga levelinga ren. ⁶Diga tong asu leveloklok kakapmek atdi la ne Jon ga sep susu nedi ro at ladan sen Joridan.

⁷At loxonaleng ne Jon ga ven buaang nedi lubung Parisi mi lubung Sadiusi diga vosiga i kusu neni na sep susu nedi, neni ga lok tidi xeretna, “Nemi laxamdak at lempasii. Kereva, mi lok do mina sixiro at lebelemamao at ne Moroa mo naba vot saparap limixin kakapmek?” ⁸Minak lok lempanga i nunuan kusu naba lox asuusu i do mira leeng basinge vam leveloklok kakapmek atnimi. ⁹Ketla mi guta nua i do miba sixiro at lebelemamao at ne Moroa mumu nga i do ne Abaram, neni lurubuno avolo atnimi. A tong i rinimi do Moroa i epovo na ba gili na laxanuat la dina vee ngan livipisik li avolo ri ne Abaram. ¹⁰Morua mo i gagas kusu ri tara asi larauna ro xa at laraixe atdi. Larauna do kopmen dina pisik asu lempeven una nunuan, neni naba ra asi di la na lu arup midi ro at laxao.”

¹¹La ne Jon ga lok bok, “A sep susu nemi mi ladan kusu mina lox asuusu i do mira leeng pam basinge leveloklok kakapmek atnimi; ketla lara mo naba mumu bok ba rak. Neni naba sep susu nemi mi Loroonan Kaala la laxao ri limixin tongtonga xepe. Lololos teren i volo lololos tarak. Axo epovo kusu anap kip luvanga vatpas teren mila i silok aleng

tia.^a ¹²Neni naba rongga linga at limixin axap, la naba lok pes mun limixin avukat basinge limixin kapmek, kerekngan laradi loklok tatao laraamang i epes lenbolo avukat basinge lenbolo i gu; limixin avukat, neni naba lox arooro di uto vana at laxalibet i ngan lenbolo avukat; la limixin kapmek, neni naba lok li di at lemenemen songsongot, i ngan lenbolo gu di tara kutkut di.”

Jon Ga Sep Susu Ne Iesu

(Mk 1:9-11; Lu 3:21-22)

¹³Goxo lox abao la ne Iesu ga vas kaxat boro Galili la uto Joridan, la ga vot pasa ne Jon kusu neni na sep susu i. ¹⁴Ketla ne Jon ga lok tin, “Ixo epovo xusu una mu asu i na. I epovo do nenu una sep susu ia. La tila xa la ura sing ia do ana sep susu u?”

¹⁵Ketla ne Iesu ga vorang i rin keretna, “Una lok lavanga salai nia ara tong pam i, mila at na mun i langas la neda ata ba lox asorun lempanga sai ik mokso ne Moroa i vara i.” Kuren la ne Jon ga mu asu lodoxoma at ne Iesu.

¹⁶Melemu at ne Jon ga sep susu ne Iesu, neni ga vas urut basinge ladan la uto at lisigege dan. La ne Moroa ga suang laxalibet ti ne Iesu, la neni ga ven Loroonan at ne Moroa ga si boro vana la ukopok; ga ven ngan ta lamno la gasga ne Iesu. ¹⁷La laxaka at ne Moroa boro vana at laxalibet ga lok, “Nena ne Nuruk. Nia a balamu i la a momo aleng min.”

Satan Ga Lok Tong Ne Iesu

(Mk 1:12-13; Lu 4:1-13)

4 ¹Melemu Loroonan Kaala ga lam ka ne Iesu uto at lamatbin kusu ne Satan na lok tong i. ²Melemu at lumun an teren at lavanuet sangaun aleng la kanimin, neni ga roxo ba. ³Satan ga vot pasa i la ga lok tin, “Mo do nenu ne Nitna ne Moroa, una tong i ri na laxanuut la dina vee xongkide.”

⁴La ne Iesu ga vorang i rin keretna, “Lovoang Kaala i tong i do, ‘Laradi kopmen na rooro xusuk mun at loxongkide, ketla neni i rooro at levelinga axap at ne Moroa ik lok keneng at Lovoang Kaala.’” *Len 8:3*

⁵Melemu ne Satan ga lok ka ne Iesu uto at lemenemen kaala, Jerusalem la ga vaxaru li i ro vana at langkut at loogu laplavang, ⁶la ga lok tin, “Mo do nenu ne Nitna ne Moroa, una los si ukopok, mila Lovoang Kaala i tong i do,

‘Moroa naba tong i ri lubang angelo ren, la dinaba ranga tu ram mi levengikngan di, kusu tuat noxo sev asongot toxot at laxangkedek taram.’”

Sam 91:11-12

^a **3:11** Anai na lavapaase poovo ri lox asuusu i do ne Jon ga lox asu langsung loklok ngangao ren ti ne Iesu.

7Iesu ga lok tin keretna, “Lovoang Kaala i tong box i do;
 ‘Nemen uta lok li ne Moroa, Leeme Silok taram at loklok tong.” *Len 6:16*
 8Melemu ne Satan ga lok ka ne Iesu uto vana at lakaana ga nemen
 kasep pana la ga lox ase i mi laramenemen axap at na lavatbung
 menemen la lisisinang atdi. 9La ne Satan ga lok tin, “Ana axap lempanga
 aba raba u min mo do una xis tiktikbu mi luvatgulom taram de melamgo
 rak la una lotu saparav ia.” 10La ne Iesu ga lok tin, “Satan! Pas kaxat
 basinge ia. Lovoang Kaala i tong i do,
 ‘Una lotu saparap ne Moroa, Leeme Silok taram la neni xusuk mun una
 mumu asu i.” *Len 6:13*
 11La ne Satan ga on basinge i, la lubang angelo diga vot la diga lox
 alolos i.

Iesu Ga Vaxaru Kaxat Lugugu Ren To Galili

(Mk 1:14-15; Lu 4:14-15)

12Se ne Iesu ga rongga i do ne Jon mo diga lok li i at loxokoxo, neni ga
 vas kaxat bilong uto Galili. 13Neni goxo nemen to Nasaret, ketla gat pas
 la ga nemen to Kaprnaum, lemenemen gak lok saparap lavatdan kis
 Galili at lapdopdo at lunep kangka Sebulon la Napitali. 14Neni ga nemen
 to Kaprnaum kusu ri lox asorun levelinga ne Moroa ga vaase asu i at
 leeme vapaase alii ne Aisaia ga tong i do,

15‘At lenep kangka Sebulon, la lenep kangka Napitali, langas uto at
 laras mo ik lok, la neni bok lenep kangka saparap Joridan, la lenep silok
 Galili, na ik lok la limixin kopmen me Judaia di nemen go. 16La limixin
 at na levennep mo dik lok at lamain, dinaba ven langsung laxasep at
 ne Moroa. La tinedi limixin labaroonan atdi gara met pam laxasep naba
 soso.’ *Ais 9:1-2*

17Ga ru ka i ap mo levenaleng ne Iesu ga vavang ti limixin keretna,
 “Mina leeng basinge leveloklok kakapmek atnimi, mila langas ti Linintoo
 no vana at laxalibet mo nga ira auret!”

Iesu Ga Ro Xaka Lavanuet Luvuttadi Sepsep Mat

(Mk 1:16-20; Lu 5:1-11)

18At lara laaleng Iesu gat pas saparap lavatdan kis Galili, neni ga ven
 lueton; nedu luradi sepsep mat, Simon (laasen bok teren ne Pita) la neton
 laasen teren ne Endru; duga loloa mi laxatkat to at lavatdan kis. 19La ne
 Iesu ga lok tidu, “Ude numu, muna emu minia la nia anaba lox ase numu
 mi langas ti sat kaka limixin i ngan tai mo, nemu mu loloa ka lenmat.”
 20La soso mun duga on basinge laxatkat la duga emu mi ne Iesu.

21Neni ga vas mu manga loloxon la ga ven manga lara lueton petpes,
 Jems mi ne Jon, lunitna ne Sebedi. Dugak lok go at lese pang eburu mi ne
 temen du ne Sebedi. Digak lox agagas li levengkatkat atdi. La ne Iesu ga

ro xaka du. ²²La soso mun duga on basinge lese pang eburu mi ne temen du, la duga emu mi ne Iesu.

Iesu Ga Anasa Ga Vavang La Ga Lox Aroo Limixin

(Lu 6:17-19)

²³Iesu gat pas at lengkot axap Galili, ga anasa limixin mi levenanasa at ne Moroa ro xeneng at laraugu singising atdi; la ga vavang mi Lagale Lavavang mumu Linintoo, la gak lox aroo limixin basinge laksanakan anmeres axap. ²⁴Levelinga mumu ne Iesu ga epeseves keneng at lenep silok axap Siria. Kuren la limixin diga lok kaka nedi luvuttadi digak meres mi levenasen anmeres axap, la nedi bok diga suma levesongsongot silok, la nedi luvuttadi mi lubunggas ga suxuna di, la nedi diga ruuna lanmeres diga so asen i do lobomet, la nedi labantuxu atdi ga molo axap. La ne Iesu ga lox aroo nedi axap. ²⁵Buaang nedi limixin diga mumu asu i, nedi boro Galili la boro bok Dekapolis, la boro Jerusalem, la Judaia, la boro bok at lenep silok Perea.

Iesu Ga Vavang Ti Limixin To Vana At Lakaana

(Lu 6:20-23)

5 ¹Iesu ga ven nedi buaang limixin la ni ga urut upana at lakaana, ni ga xis kopok, la diga xis to melango ren, ²la neni ga ru ka i do na anasa di.

³Iesu ga lok keretna, “Luvukat mo ik lok tinedi dikleklen i do labaroonan atdi ik pakes ti ne Moroa, mila limixin erepmo dinaba vubeles at Linintoo no vana at laxalibet. ⁴Luvukat mo ik lok tinedi mo dik lok bukbulu mila laxakapmek i umsu at na lavatbung menemen, ketla ne Moroa naba lox amenemen nedi! ⁵Luvukat mo ik lok tinedi dik lox asi di, mila ne Moroa naba raba di mi lixitkis to xeneng at Linintoo ren. ⁶Luvukat mo ik lok tinedi di ngaongao ri loklok mokmokso, mila ne Moroa naba lox epovo mo lavavara atdi. ⁷Luvukat mo ik lok tinedi di lox asusu lebelemumu ri limixin, mila ne Moroa naba lox asusu lebelemumu rinedi. ⁸Luvukat mo ik lok tinedi lebelen nedi i dadat aleng mila dinaba ven ne Moroa. ⁹Luvukat mo ik lok tinedi, di lok lumulum kantubu atnedi dit kis munepen, Moroa naba so asen nedi do luvutnitna. ¹⁰Luvukat mo ik lok tinedi dip kip levesongsongot mumu loklok mokmokso at ne Moroa, mila diba ruuna ka lixitkis to xeneng at Linintoo no vana at laxalibet.

¹¹Luvukat mo ik lok tinemi do limixin diba vaase aksaksa rinimi la diba sev asongot nemi la diba paase mumu nemi mi levelinga xaxarang mila nemi limixin tarak. ¹²Do dina lox i xuren, mina momo la mina sosoro, mila langsung luunun miba ruuna ka i ro vana at laxalibet. Limixin kakapmek me gano diga lox asongot lavaeme vapaase alii no

diga rooro gano. La kerepmo limixin kakapmek diba lox asongot bok nimi.”

Limixin At Ne Iesu Di Lok Ngan Laxakures La Laxasep
(*Mk 9:50; Lu 14:34-35*)

¹³La ne Iesu ga lok bok tidi, “Nemi mi ngan laxakures ti limixin axap. Ket do lololos at laxakures na xap, kopmen bok ba tangas kusu naba so kakures manga. Kopmen bok ba na epovo xusu dina lok li i at teveluxa, kuren la diba lu xape mun min la limixin dibat pas abilinga i.

¹⁴Nemi mi ngan laxasep ti limixin at na lavatbung menemen. Lemenemen silok do it kis to mavana at lakaana kopmen na epovo do na lipe. ¹⁵Kopmen teta na sox aros lababao xusu na lok li i ro maxopok at lavatbaaket; ketla neni i lok li i ro at lenep kasep, kusu laxasep teren naba so epeseves tinedi axap go xeneng at loogu. ¹⁶La kerepmo bok laxasep atnemi na soso ro melamgo at limixin, kusu diba reven leveloklok nunuan mik lox i, la diba emi asu mi ne Moroa ne Temen nimi boro vana at laxalibet.”

Iesu Ga Paase Mi Lenavolo At Ne Moses

¹⁷La ne Iesu ga lok bok tidi, “Nemen gat mita nua i do aga vot kusu ana lok pes Lenavolo at ne Moses la levenanasa at lavaeme vapaase alii. A goxo vot kusu ana lok pes i, ketla aga vot ti lox epovo levelinga ren. ¹⁸A tong tuturun i rinimi. Laxalibet mi lavatbung menemen naba nemen at laxanaleng solo, la ap mo levenaleng kopmen tamangkot lixilik at levelinga keneng at Lenavolo naba xap asonao, i se ap mo laaleng levelinga ren naba sorun. ¹⁹Kuren la, do tara i los polo tamangkot lixilik at Lenavolo, la ia lox ase lentaba vetpes do dina los polo box i, neni naba lixilik tinotno at Linintoo no vana at laxalibet. Do tara i ronga res at Lenavolo, la ira lox ase bok lentaba vetpes kusu dina ronga res teren, neni naba silok to at Linintoo no vana at laxalibet. ²⁰A tong i rinimi. Mo do luruptuvuk atnimi noxo lox avukat ti luruptuvuk at luvuttadi loklox ase at Lenavolo la lubung Parisi, kopmen mi noxo vubeles at Linintoo, no vana at laxalibet.”

Iesu Ga Paase Mumu Lumukmusak

²¹La ne Iesu ga lok bok, “Miga ronga i do lavalabat atdik gano migomgo diga tong i do, ‘Nemen gat mitap sev amet tadi; la do nege i sev amet taradi, neni naba tu at lavapaase ro melamgo at laradi rongtonga linga.’ ²²Ketla mo nga ana tong i rinimi do, nege i musak mene neton, neni naba tu at lavapaase ro melamgo at laradi rongtonga linga; la do nege i tong i ri neton do ‘Nenu laradi pis,’ neni naba tu at lavapaase ro melamgo at lixitkis buru at lavanuti sangaun nedi loxongkulao silok at

limixin me Israel; la do nege i lok ti neton do ‘nenu lavanga baulang’, i auret do ne Moroa naba riki i uto xeneng at laxao at lemenemen songsongot.

²³Kuren la, do unat pas kusu una raba letaba ram ti ne Moroa ro at loxonin laplavang, la go ura doma su at netam i emusak minu, ²⁴una ke xepe be letaba ram go melango at loxonin laplavang; la unat pas avot be xusu una lok lumulum eburu mi netam; la melemu ba unamlong la una raba letaba ram ti ne Moroa.

²⁵Mo do tara na lok ka u ri lavapaase kusu na lok li lumumuat taram, una etangas nunuan min at langa kusu una lok lumulum eburu min. Do kopmen, neni naba lok ka u uto at laradi rongtonga linga, la laradi rongtonga linga naba lok li u at laradi rutu mu; la ni naba lok li u at loxokoxo. ²⁶Nia a tong tuturun i do ubak lok go, naba se rinotno do una un axap lempilas at nom lavapaase.”

Loklok Ti Elongka Mi Latkin At Lara Vetpes

²⁷La ne Iesu ga lok bok tidi, “Miga ronga vam lavapaase diga tong i do, ‘Nemen gat mita elongka mi lavakin at lentaba vetpes.’ ²⁸Ketla mo nga ana tong i rinimi, do tara na ven peves at tatkin petpes, i lok ngan neni ia longka vam mi nom latkin to xeneng at lebelen. ²⁹Do laxatli tino ram na lox u la una subu, una lik gogo su min. I lox avukat tu do una lok pes tenep at labantuxu ram; lavanga labantuxu axap taram nat pas ti lemenemen songsongot. ³⁰Mo do lakngam tino na lox u la una lok laxakapmek, una ra korop pes i la una lu min! I lox avukat tu do una lok pes lara lakngam; lavanga labantuxu axap taram nat pas ti lemenemen songsongot.”

Loklok Ti Ba Korop Epot

(Mt 19:9; Mk 10:11-12; Lu 16:18)

³¹La ne Iesu ga lok bok tidi, “Gano diga lox ase bok limixin keretna; taradi do na soxope latkin teren, ni na malagan taba i mi tevelinga axasep do neni mo na ba korop ta leepot atdu. ³²Ketla mo nga ana tong i rinimi do; mo do taradi na soxope latkin teren, ketla mo latkin goxo longka, mo laradi i lok latkin teren ira longka, mo do neni ira epot manga at taradi vetpes; la mo laradi bok i epot ka mo latkin, i longka vam mila ik midi eburu mi latkin at laradi vetpes.”

Lavapaase Mumu Loklok Ting Pangpe

³³La ne Iesu ga lok bok tidi, “Miga ronga bok pam i do diga tong i ri limixin gano do, ‘Nemen mita los polo lavangpangpe atnemi saparap ne Moroa, ketla mina lox epovo lempanga salai mira xaape vam min.’ ³⁴Ketla mo nga ana tong i rinimi do; nemen gat mita lok lavangpangpe

mi laasen at ne Moroa; nemen mita lox amuat tevelinga mi lavangpangpe atnimi la mina tong laxalibet, mila neni loxonin orong at ne Moroa.

³⁵La nemen mita lox amuat tevelinga atnimi mi lavangpangpe mi lavatbung menemen, mila neni loxot burubut at luxangkedek teren; la nemen mita lox amuat tevelinga mi lavangpangpe mi ne Jerusalem, mila neni lemenemen silok at ne Moroa. ³⁶Nemen mita lox amuat tevelinga vangpangpe mi lengkabinim at lempatlak atnimi mila nemi xa mixo epovo xusu miba lok tamang kabinim at lempatlak atnimi nan bun kopla na bibi. ³⁷Mina tong mene i do, 'I ruturun!' kopla 'Kopmen!' Toxolinga bok tara na tong i mavana at nai, i laa boro at ne Satan."

Loklok Ti Porang Amlong Leveloklok At Taradi

(Lu 6:29-30)

³⁸La ne Iesu ga lok bok tidi, "Miga ronga bok pam i diga tong i do, 'Mo do una lik su mi laxatli at tara, laxatli bok taram diba lik su min; la do una sep pit tasangsa at tara, lasangsa bok taram diba rit pir i.' ³⁹Ketla mo nga ana tong i rinimi do; nemen mita vorang amlong laxakapmek at tara do i lox i ru. Mo do tara na vasa lavapaales tino ram, una ke box i na vasa lavapaales piang taram. ⁴⁰La do tara na lok ka u ri lavapaase kusu na li levelinga mumuat mavana ram mumu lavanga singsiga ram, una ke raba box i mi lavanga singsiga silok taram. ⁴¹La do tara at limixin esep na pu soso u do una xip laknixip teren uto vaxalom, unap kiv i uto vaxalom axa. ⁴²Mo do tara na sing u mi tavanga, una raba i min; la mo do tara i vara i do na lok ka be tavanga ram kusu na gugu min, una siam taba i min."

Iesu Ga Anasa Limixin Mi Langas Ti Balamu Lavamunepen

(Lu 6:27-28, 32-36)

⁴³La ne Iesu ga lok bok tidi, "Miga ronga bok pam i, diga tong i do, 'Mina balamu larapen tangas atnimi, la mina lox angtungun tidi di munepen minimi.' ⁴⁴Ketla mo nga ana tong i rinimi do; mina balamu nedi di munepen minimi, la mina ngising tinedi dik lox asongot nimi, ⁴⁵kusu miba ravasu ngan luvutnitna rinotno at ne Temen nemi ne Moroa no vana at laxalibet, mila neni ga lok laxangking kusu na soso mavana at limixin kapmek i ngan mun tinedi bok limixin nunuan; la im taba bok lentakabu ridi dik lok lununuan la tidi bok dik lok laxakapmek. ⁴⁶Mo do nemi xa mi balamu xusuk mun nedi di balamu nemi, ne Moroa xopmen noxo raba nemi mi luunun. Limixin kapmek kerekngan luvuttadi loklok ka pilas bok dik lox i na. ⁴⁷La mo do mi paase momo mun ti luvutneton nemi, na loklok kopmen lavanga silok, mila luvuttadi dixo nuunu at ne Moroa di mumu asu box i na. ⁴⁸Kuren la mina nemen manmanton kerekngan mun ne Temen nemi no vana at laxalibet in manton."

Langas Ti Lok Tooro Limixin Banbalo

6 ¹La ne Iesu ga lok bok tidi, “Mina lok tatao alabat nemi, la nemen mita lok leveloklok nunuan to melamgo at limixin kusu limixin dina ven i la diba emi asu minimi. Mo do mina mu asu na loklok, mi noxo lok ka luunun tinimi boro at ne Temen nimi no vana at laxalibet.

²Kuren la, do mina raba tavanga ri taradi banbalo, nemen mita tong asu i na ro melamgo at limixin axap kerekngan lavapen aala, dik lox i ro xeneng at laraugu singising la to at larangas. Dik lox i xusu limixin diba emi asu midi. A tong tuturun i rinimi do luunun atdi dira lok ka axap pam i. ³Ket do mina lok tooro taradi banbalo, mina lox i at langas, nemi xusuk mun miklen i, la nedi dik lox auret nimi di noxoklen i. ⁴La kerepmo kopmen tara noxoklen i, ketla ne Temen nimi mene, mo i reven mo leveloklok ik lox alipe, naba raba nimi mi luunun.

Lisingising Saparap ne Moroa

(Lu 11:2-4)

⁵Do mina ngising, nemen mitak lok ngan luvuttadi vempen aala. Di vavara aleng i do dina tu la dina ngising to xeneng at laraugu lotu la to bok at larangas etang kusu limixin diba reven di. A tong tuturun i rinimi do dira lok ka axap pam luunun atdi. ⁶Ket do mina vara sing, mina beles uto at leventaugu atnimi la mina sat pe lempatban la mina sing ti ne Temen nimi, mixo epovo mina ven i. La ne Temen nimi i reven lempanga salai i nemen alipe at lemeren limixin, naba raba nimi mi luunun.

⁷Keneng at levesingising atnimi, nemen mita tong lengkolinga xopmen tempasuun teren, kerekngan lavamolon di mumu asu i; di doxoma i do ne Moroa mo naba rongga di mumu levesingising babaalom atdi. ⁸Nemen mita mu asu na loklok atdi mila ne Temen nimi ne Moroa iraklen avot pam levenai mik pakes tin, avot ti levesingising atnimi.

⁹Do mina sing, mina mu asu i xeretna,

‘Temen nama no vana at laxalibet, mana lok ngangao at laasen

taram. ¹⁰Linintoo ram na vot, lavavara ram limixin dina mu asu i nade xopok at na lavatbung menemen, i ngan mun di mu asu i ro vana at laxalibet. ¹¹Una raba nema mi leveluxa lingina.

¹²Doxoma xepe laxakapmek atnema, kerekngan nema ma doxoma xepe laxakapmek atnedi di lox i rinema. ¹³Nemen uta lok li nema ri leveloklok tong pen i lolos, ketla unang tanga amlong ka nema basinge ne Satan.’

¹⁴Mo do mina doxoma xepe laxakapmek limixin di lox i rinimi, ne Temen nimi no vana at laxalibet naba doxoma xepe bok laxakapmek atnimi.

¹⁵Ket do mixo doxoma xepe laxakapmek at limixin petpes, ne Temen nimi ro vana at laxalibet noxo doxoma xepe laxakapmek atnimi.”

Iesu Ga Paase Mi Lumun An

¹⁶La ne Iesu ga lok bok tidi, “La do mina mun an, nemen gat mita ven bukbulu, i ngan lavapen aala di mumu asu i. Dit pas saasaa ro xantubu at limixin kusu limixin diba reven lemeren di do nedi mo di mun an. A tong tuturun i rinimi do luunun atdi, dira lok ka axap pam i. ¹⁷Do mina mun an, mina saba nunuan lempatlak atnimi mi ladan momonok at la olip la mina gos avukat lenmeren nimi, ¹⁸kusu nedi vetpes di noxoklen i do nemi mo mi mun an; ketla ne Temen nimi, kopmen mina epovo na ven i, neni xusuk mun baklen i. La ne Temen nimi, mo i reven lempanga salai i nemen alipe at lemeren limixin, naba raba nimi mi luunun.”

Iesu Ga Paase Mi Lapnovos To Vana At Laxalibet

(Lu 12:33-34)

¹⁹La ne Iesu ga lok bok tidi, “Nemen mita lili gat lapnovos tinemi nade xopok at laxangka, mila i epovo do laxanuvis naba an asonao mun i, la lamamao tas na long i la ba lok kapmek, la luvuttadi xipkip pilo dinaba das beles ukeneng at leventaugu atnimi la dina xip pilo ka i. ²⁰Ketla mina lok leveloklok nunuan ba lok ngan lapnovos tinimi ro vana at laxalibet, mo go laxanuvis mi lamamao tas noxo lok kapmek i, la luvuttadi xipkip pilo di noxo das beles ukeneng la dina xip pilo xaka i. ²¹Mina lox i xuren mila lebelen nimi nabaplivi mu mo lapnovos atnimi.”

Iesu Ga Paase Mi Laxasep At Labantuxu

(Lu 11:34-36)

²²La ne Iesu ga lok bok keretna, “Lengkatli atnimi i ngan laxasep ti lorooro atnimi. Dola lengkatli atnimi na reven pupuse ri lempanga avukat, lorooro atnimi ba umsu mi laxasep. ²³Ket do lengkatli atnimi na reven pupuse ri lempanga xapmek, lorooro atnimi naba umsu mi lamain. Kuren la, mo do laxasep kopmen nak lok keneng at lorooro atnimi, lamain i silok aleng bak lok keneng teren.

Limixin Kopmen Dina Epovo Na Gugu Ri Legepu Radi

(Lu 16:13; 12:22-31)

²⁴Kopmen tara i epovo na nemen ngan lasaxaruki at legepu radi; neni naba ke xepe lara la na balamu mo lara; neni naba ruturun ti lara, la ni na sok tixirixes mo lara. Kopmen na epovo do tara na nemen ngan lasaxaruki at ne Moroa la lebelen na ngaongao mu lempilas.

²⁵Kuren la a tong i rinimi do nemen gat mita bulu mu lempanga anan mi lengkadan mik pakes tin, kopla lempanga singsiga kusu ri labantuxu atnimi. Kereva, lempanga anan i silok ti lorooro la lempanga singsiga i silok ti labantuxu? ²⁶Mina ven lavapixa dip tava saasaa, dixotlotlo

tevenit panga, la dixo lili buru levempeven una do ik mukun, la dixo lili i ro at larapos atdi; ketla ne Temen nemi no vana at laxalibet i reven tatao nedi. La nemi mi silok aleng ti lavapixa. ²⁷Kopmen tara na epovo do na lox epasum toxot ti lorooro ren mo do neni na bulu mu i.

²⁸La tila mik bulu mu amisik lempanga singsiga? Mina ven be lempusuvus aaxa di susu; kopmen dina gugu la dinak sok etang lempanga singsiga ridi. ²⁹Ketla a tong i do loorong silok ne Solomon mi langangan lapnovos teren ga ruuna lempanga singsiga kopmen goxo nunuan aleng ti nom lempusuvus. ³⁰Ne Moroa xa ik paxasiga lempivilis aaxa, mo lempivilis i rooro mun lingina la kantamak manga ira mada si, la dira kotos i ro at laxao. Ketla neni naba lox angtang mu aleng nimi kusu na vaxasiga nimi. Lunuunu atnemi saparap ne Moroa i lixilik mun. ³¹Kuren la nemen mita bulu la mina lok do, 'Leveluxa ridik naba laa meva?' koplá 'Lengkadan tidik naba laa meva?' koplá 'Lempanga singsiga ridik naba laa meva?' ³²Nedi xopmen dina nuunu at ne Moroa dik bulu mu lempanga xeretna. Ne Temen nemi no vana at laxalibet ikleklen i do mik pakes ti na lempanga. ³³Ketla mavana at lempanga axap, mina lolos avot be ri puse ka Linintoo at ne Moroa la leveloklok mokmokso ren, la neni naba raba bok nemi mi nom lempanga mik pakes tin. ³⁴Kuren la nemen mita bulu mu mo lempanga ba ravasu at mo laaleng kantamak, mila levenainbulu mo bak lok ti laaleng kantamak. La levenainbulu at leges aleng i epovo ri mo laaleng."

Nemen Mita Ila Mumu Loklok At Tentaba Vetpes

(Lu 6:37-38, 41-42)

7 ¹La ne Iesu ga lok bok keretna, "Nemen mita ila mumu loklok at tentaba vetpes, kusu ne Moroa noxo ila mumu loklok atnemi. ²Mo do mina ila mumu loklok at tentaba vetpes, ne Moroa naba ila mumu nemi ap mo mun langas; la lumumuat mi lok li mavana atnedi lentaba vetpes, neni mun i nom ne Moroa naba raba nemi min."

³La ne Iesu ga paase poovo bok keretna, "Nemen mita reven ti nom levendon i nemen at laxatli at neton nemi, la nemi xa kopmen mina long lenget ka levengkonuna ik lok pe lengkatli atnemi. ⁴Miba tong i ri neton nemi keretna, 'Netak, una mulus tia kusu ana lok pes nom levendon at laxatli ram,' ketla nemi xa xopmen mina ven kibis levengkonuna ik lok pe lengkatli atnemi getgesara. ⁵Nemi lavapen aala. Mina lok pes avot nom levengkonuna ik lok pe lengkatli atnemi, la melemu ba miba ven avukat ba i xusu mina lok pes ba levendon no at laxatli at neton nemi.

⁶Nemen gat mita raba lubangman mi lempanga i xaala. Mo do mina lox i xuren, dinaba rem gili mu nemi la diba at koxorop nemi. La nemen mita lu raba lababo mi leven peal atnemi; mo do mina lox i xuren, diba but axangka i mi lengkangedek atdi."

Moroa Im Taba Lempanga Nunuan Tinedi Di Ngising Parav I
(Lu 11:9-13)

⁷La ne Iesu ga lok bok keretna, “Mina ngising, la miba ruuna xaka i; mina puse, la miba vuse xaka i; minap dipdi, la lumusaragu naba rem suang tinimi; ⁸mila do mina ngising ne Moroa, miba lok kaka i; la do nemi mina puse, minaba vuse ka i; la lumusaragu naba rem suang tinemi mi dipdi.

⁹Kereva, i epovo do ne temen tamdak na raba ne nitna mi toxonuat, modo neni na sing ti toxongkide? ¹⁰Kopla i epovo kusu neni na raba i mi tisii mo do neni na sing ti temat? ¹¹Keke i do nemi limixin bilinga, ketla mikleklen i do mim taba laxamdak mi laxaalik atnemi mi lempanga nunuan. La kerepmo i epovo rinotno do ne Temen nemi ro vana at laxalibet naba lok momo aleng ti raba bok lempanga nunuan tinedi di ngising tin. ¹²Leveloklok axap mina lox i ri lentaba vetpes, na lok ngan mun leveloklok mi vara i do dina lox i rinimi. Anai ni lavasuun tinotno at Lenavolo at ne Moses la levelinga at lavaeme vapaase alii.”

Lumusaragu I Veleot
(Lu 13:24)

¹³La ne Iesu ga lok bok, “Mina beles keneng at lumusaragu i veleot kusu ri lok ka lorooro, mila lumusaragu uto at lemenemen songsongot i repalas la langas ugo at lemenemen songsongot kopmen na lolos, la buaang nedii limixin di pubeles teren. ¹⁴Lumusaragu uto at lorooro ni i veleot mun la langas tin i lolos aleng tino la ixo buaang nedii luvuttadi di pubeles teren.”

Luuna Mi Lempeven Teren
(Lu 6:43-44)

¹⁵La ne Iesu ga lok bok, “Mina lok tatao nemi mumu loklok atnedi lavaeme vapaase alii xaxarang; di vosiga nemi mi levelinga xaxarang la diba tong i do nedii luvuttadi at ne Moroa. Ketla di lok ngan lempatman atat, di siga lempanga singsiga diga lox i mi lengkabinim at levesipsip kusu dina xarang limixin. ¹⁶Miba ven kibis nedii mi levempipisik at lorooro atnedi. Ixo epovo do mina dik ka tempeven una nunuan boro at taban gagas, la ixo epovo do miba dik ka tempeven una at looxo boro at tabaniles. ¹⁷La kerepmo luuna nunuan i pisik lempeven una nunuan, ketla luuna mamao i pisik lempeven una mamao. ¹⁸Luuna nunuan ixo epovo do na visik tempeven una mamao, la luuna mamao ixo epovo do na visik tempeven una nunuan. ¹⁹Larauna axap do dixo pisik nunuan, di tara korop asi nedii la di lulu arup midii ro at laxao. ²⁰Kuren la miba ven kisip lavaeme vapaase alii xaxarang mi levempipisik at lorooro atdi.”

Laaleng Ete
(Lu 13:25-27)

²¹La ne Iesu ga lok bok tidi, “Limixin diba tong ia do Leeme Silok, Leeme Silok; ketla kopmen nedi axap diba beles at Linintoo no vana at laxalibet; nedi xusuk mun di mumu asu lavavara at ne Tamak, diba vubeles teren. ²²At laaleng ete buaang nedi limixin diba lok tia, ‘Leeme Silok, Leeme Silok; maga paase alii ri limixin mi laasen taram, la maga riki asu lubanggas basinge limixin mi laasen taram, la maga lok buaang laxampanga sangsangu mi laasen taram.’ ²³Melemu aba vaase ridi xeretna, ‘Nia xopmen tinotno anaklen nimi. Uto nimi basinge ia, nemi limixin kapmek.”

Luradi Xipkip Gu
(Lu 6:47-49)

²⁴La ne Iesu ga lok bok tidi, “Kuren la, do tara i ronga na lempapaase rak la i ronga res mu i, neni i lok ngan laradi leklen ga xip loogu ren la ga sev asi lemet ukopok tinotno la ga lok nom loogu ren pana at laxanuut. ²⁵Larakabu ga vot, la ladanut ga sen, la lamanman gat mas lolos mo loogu, ketla loogu goxo rem sup, mila ni gasbo i mi laxanuut. ²⁶Ket do lara i ronga na levelinga rak la kopmen ni na mu asu i, neni i lok ngan laradi tangtangu, ga xip loogu ren la gasbo pe i mi laxapulang. ²⁷Larakabu ga vot, la ladanut ga sen at laradan, la lamanman ga vot lolos at nom loogu, la loogu ga rem sup la ga rem utut axap.”

Levenanasa At Ne Iesu Ga Mumuat

²⁸Se ne Iesu ga vaase axap na lempapaase, buaang nedi limixin diga sangu aleng at levenanasa ren, ²⁹mila neni ga anasa di, la levelinga ren ga mumuat, neni xopmen goxo anasa ngan luvuttadi loklox ase at Lenavolo.

Iesu Ga Lox Aroo Laradi
(Mk 1:40-45; Lu 5:12-16)

8 ¹Iesu ga si boro vana at lakaana la buaang limixin diga emu min. ²La lara laradi ga meres mi lanmeres gu ga vot posiga ne Iesu la ga xis tiktikbu mi luvatgulom teren la ga sing i, “Leeme Silok. Mo do u vara i, una lox aroo ia.”

³Iesu ga song su mi lekngen la ga long tu ren, la ga lok tin, “A vara i. Lanmeres taram na xap ta.” La soso mun mo lanmeres ga xap basinge mo laradi. ⁴La ne Iesu ga lok tin, “Nemen uta tong box i na ri tara, ketla unat pas uto at lamaasa, la neni na ven mumu u; melemu una lok laramtaba ram ti ne Moroa ngan ne Moses ga tong i, kusu ri lox asuusu i ri limixin axap do nenu mo ura lox avukat ta.”

Iesu Ga Lox Aroo Lasaxaruki At Laasesep Boro Rom

(Lu 7:1-10)

⁵Iesu ga vubeles at lemenemen Kaprenaum, la lara laasesep at limixin esep boro Rom ga vot posiga i la ga sing i ri loklok tooro xeretna, ⁶“Leeme Silok. Lasaxaruki rak no ik midi ro at loogu rak. Lengkot axap teren i molo la ing songot aleng.”

⁷La ne Iesu ga lok tin, “Nia abat pas ti lox aroo i.” ⁸La mo laasesep ga lok tin keretna, “Leeme Silok, nenu leeme silok la ixo lox avukat do una beles at loogu rak. Ketla una tong mun i la lasaxaruki rak naba lox avukat. ⁹Nenia aklen i do nenu u epovo ri lox i na mila nenia bok a nemen maxopok at lentaba amgomgo rak la lentaba bok di nemen maxopok tarak. La mo do a lok ti tara, ‘Unat pas,’ neni bat pas. Do a lok ti tara, ‘Ude u,’ neni bat pas saparav ia; la do a lok ti lasaxaruki rak, ‘Una lox i na,’ la neni naba lox i.” ¹⁰Se ne Iesu ga ronga i na, ni ga sangu aleng la ga lok tinedi diga emu min, “Nia a tong tuturun i. Keneng at lengkot axap Israel, a goxo long lenget ka tara, lunuunu ren i silok ngan i na. ¹¹Nia a tong i rinimi do buaang limixin diba laa boro at lengkot axap at na lavatbung menemen la diba xis kopok eburu mi ne Abaram, Aisak la ne Jakop at laanan tarak to xeneng at Linintoo no vana at laxalibet. ¹²Ketla limixin me Judaia, avot be diga nemen ngan lavaanat at Linintoo, Moroa naba lu asu midi uto at lamain bonot la mo go dibang teng aleng la diba rungur ivivilis.” ¹³La ne Iesu ga lok ti mo laasesep, “Unamlong uto xolonu ram; lasaxaruki ram ba lox avukat kerekngan lunuunu ram.” La lasaxaruki ren ga lox avukat ap mo mun loxonaleng.

Iesu Ga Lox Aroo Buaang Limixin

(Mk 1:29-34; Lu 4:38-41)

¹⁴Iesu ga rupot to at loogu at ne Pita, la ni ga ven luvutulom at ne Pita gak midi at loora, ga meres mi liplivi. ¹⁵Neni ga long tu at lekngen la liplivi ga on basinge i, la ni ga xatu kaxat upana la ga lox agagas leveluxa ridi.

¹⁶Ga ukantinao, limixin diga lam ka larapen tangas atdi uto at ne Iesu, nedi lubunggas ga suxuna di. La ne Iesu ga paase lengkolinga, kuren la ni ga riki asu lubunggas basinge di. La neni ga lox aroo limixin axap digak meres. ¹⁷Kerepmo ne Iesu ga lox asorun levelinga at leeme vapaase alii ne Aisaia, i lok keretna;

‘Neni ga lox alolos nama basinge levenainmolo la ga lox aroo nama basinge levenanmeres.’

Ais 53:4

Loklok Atnedi Di Mumu Asu Ne Iesu

(Lu 9:57-62)

¹⁸Se ne Iesu ga ven buaang limixin digak lok saparav i, ni ga tong i ri luvuttadi loklok ka anasa ren do dina sen polo lavatdan kis uto at lenep

meo. ¹⁹La lara laradi loklox ase at Lenavolo ga vosiga i la ga lok tin, “Leeme loklox ase, nia aba emu minu uto at lengkot axap ut pas uve.”

²⁰La ne Iesu ga lok tin, “Lubungman sio di ruuna lengkot mikmidi atdi, la lavapixa di ruuna levempotpos atdi, ketla nenia, Laradi Mevana, axo ruuna temenemen kusu ria rik midi la na lok mamana ren.” ²¹La lara laradi vetpes, lara at luvuttadi loklok ka anasa ren ga lok tin, “Leeme Silok. Una ke xepe be ia, kusu anat pas la anak mit ne tamak.” ²²Ketla ne Iesu ga lok tin, “Una mumu asu ia, la una ke laxampanga met dinak mikmit luvuttadi met.”

Iesu Ga Lox Amila Lamanman

(Mk 4:35-41; Lu 8:22-25)

²³La ne Iesu ga los kas at lese pang eburu mi luvuttadi loklok ka anasa ren la diga sen kaxat. ²⁴La soso mun langsgangan lamanman ga mas lolos mo lavatdan kis, la ga auret do lese pang gita dong si. Ketla ne Iesu mo ga unga. ²⁵La luvuttadi loklok ka anasa diga vosiga ne Iesu la diga lox aus i la diga lok, “Leeme Silok, una lox aroo dik, ata seeve nga na.”

²⁶La ni ga lok tidi, “Kereva, kopmen tunuunu atnimi? Mi marat tila?” La ni ga xatu kaxat la ga vaase lolos pe lamanman mi lavatdan kis la duga lox atnaasan la langsgangan lenmila ga men ta.

²⁷La mo luvuttadi diga sangu aleng la diga lok, “Laradi salai na? I vaase sok lamanman mi lavatdan kis la dira rongga res teren.”

Iesu Ga Riki Asu Lubunggas Basinge Legepu Radi

(Mk 5:1-20; Lu 8:26-39)

²⁸Se ne Iesu eburu mi luvuttadi loklok ka anasa ren diga vot to at lenep meo, diga oso ro at lenep silok Gadarin, la legepu radi duga laa boro at larabuang, limixin me go digak mikmit labarongan e, lubunggas ga nemen atdu. La duga ekip tangarang mi ne Iesu. Nedu luradi sepsep la limixin ap mo lenep silok di goxot pas ti mo lenep. ²⁹La duga xup ti ne Iesu xeretna, “Nitna ne Moroa. Lavanga salai u vara na lox i rinama? Kereva, u vot de xusu una lox asongot nama avot ti laaleng ete?”

³⁰Buaang laxanbo mo diga nemen to vaxalom lixilik, diga anan. ³¹La lubunggas diga sing ne Iesu, “Do una riki asu nama basinge na luradi, una riki abeles nama ri nom laxanbo.”

³²La ni ga lok tidi, “Mina vas su uto.” La diga sixisu ap mo luradi la diga vubeles ap mo laxanbo la nedi axap nom laxanbo diga sixisi at lakaana la diga los tup ukopok at lavatdan kis la diga xong axap. ³³La nedi mo digak lok tatao laxanbo, diga ven i na; la diga sixit kaxat uto ap mo lemenemen. La diga tong na lavanga ri mo limixin, la diga tong bok mo lavanga ne Iesu ga lox i ri mo luradi. ³⁴La limixin axap ap mo lemenemen diga vas su la diga vosiga ne Iesu. Se diga ven i, diga sing i do ni na on basinge mo lenep silok atdi.

Iesu Ga Lox Aroo Laradi Labantuxu Ren Ga Molo Axap

(Mk 2:1-12; Lu 5:17-26)

9 ¹La ne Iesu mi luvuttadi loklok ka anasa ren diga los kas at lese pang la diga sen kaxat la diga rupot to at lemenemen at ne Iesu. ²Lentaba luvuttadi digap kip lara laradi mi loora, labantuxu ren ga molo axap la diga vosiga ne Iesu. Se ne Iesu ga ven kibis lunuunu atdi, ni ga lok ti mo laradi mekmeres keretna, “Nuruk, una lolos. Leveloklok kakapmek axap taram, a doxoma xepe i.”

³Lentaba luvuttadi loklox ase at Lenavolo diga ronga i na la diga epaase xantubu atdi xeretna, “Na laradi i paase vupu ri ne Moroa.”

⁴Iesu gaklen levendoxoma atdi la ga lok tidi xeretna, “Tila levendoxoma atnimi i umsu mi laxapmek mumu na lavanga? ⁵Ua levelinga kopmen na lolos ti tong i; leveloklok kakapmek taram ara doxoma xepe vam i, kopla ana tong i do, katu kaxat la unat pas? ⁶Ketla a vara minaklen i do nenia, Laradi Mevana, a ruuna lololos at na lavatbung menemen kusu ri doxoma xepe leveloklok kakapmek.” La ne Iesu ga vaase bok ti mo laradi xeretna, “A tong i ru, una xatu upana la una xip kaka loora ram la una vas kaxat uto xolonu.” ⁷La mo laradi ga xatu kaxat la gat pas uto xolonu. ⁸Se mo limixin axap diga ven i na, diga lingun, la diga emi asu mi ne Moroa, mo ga raba lololos kerepmo ti limixin.

Iesu Ga Ro Ka Ne Levi

(Mk 2:13-17; Lu 5:27-32)

⁹Iesu ga vas kaxat basinge mo lenep la neni ga ven lara laradi, laasen teren ne Metiu, mo gat kis at loogu xekepe pilas. La ne Iesu ga lok tin, “Una mumu asu ia.” La ne Metiu ga xatu upana la ga mumu asu i.

¹⁰La ne Iesu gat kis at laanan to xeneng at loogu at ne Metiu la buaang atnedi luvuttadi loklok ka pilas, la lentaba limixin kapmek bok diga rupot la diga anan eburu mi ne Iesu mi luvuttadi loklok ka anasa ren. ¹¹Se lubung Parisi diga ven i na, diga sue luvuttadi loklok ka anasa ren keretna, “Tila leeme loklox ase atnimi i anan eburu mi limixin loklok ka pilas mi limixin kapmek?”

¹²Iesu ga ronga i nom la ga lok tidi xeretna, “Limixin di lox avukat, kopmen dinak pakes ti loklok tooro, ketla nedi xusuk mun dik meres. ¹³La minat pas la minaklen ka lavasuun at na levelinga keneng at Lovoang Kaala i lok keretna,

‘Nia axopara levelaplavang, a vara i xusu mina lox asuusu lebelemumu.’ Ose 6:6
Nia aga rupot kusu ri ro xaka limixin bilinga kusu dina leeng, la kopmen nia a goxo rupot kusu rinedi limixin mokmokso.”

Iesu Ga Paase Mumu Loklok At Lumun An

(Mk 2:8-22; Lu 5:33-39)

¹⁴Luvuttadi loklok ka anasa at ne Jon, laradi sep susu, diga vosiga ne Iesu la diga sue i, “Nema mi lubung Parisi ma mun anan amisik, ketla luvuttadi loklok ka anasa ram kopmen dina mun an. Ua lavasuun teren?”

¹⁵Iesu ga vorang i ridi mi lavapaase poovo xeretna, “At loklox anarong at leepot, lentaba at laradi epot di noxo bulu mila laradi epot move ik lox eburu midi. Ketla laaleng mo naba rupot la limixin petpes diba lam ka laradi epot basinge lentaba ren, la dina mun anan ba ap mo levenaleng.”

Lempapaase Poovo Mumu Levenanasa Maxat At Ne Iesu

¹⁶La ne Iesu ga vaase bok tidi mi lavapaase poovo xeretna, “Kopmen teta na balais ka loxontamon maxat kusu na sok gatgat pe lamamara at labantamon maut min; mo do neni na lox i xuren, labantamon maxat ira lok kapmek pam la kopmen na epovo bok ba kusu na lok tavanga min; la nom loxontamon maxat noxo epovo xusu na lok pe avukat lamamara at loxontamon maut.”

¹⁷La ne Iesu ga vaase bok tidi mi lavapaase poovo. Ni ga lok keretna, “Kopmen tara na soli li laxadan vaen maxat uto xeneng ti labantuxu at lavatme i maut pam. Mo do neni na lox i xuren, mo labantuxu ba remdas la laxadan vaen naba soli su axap, la labantuxu maut naba lok kapmek. Laxadan vaen maxat mina soli li i at labantuxu maxat, la kopmen tempanga ba lok kapmek.”

Iesu Ga Lox Aroo Loolik At Laradi Gomgo

(Mk 5:21-43; Lu 8:40-56)

¹⁸Ap mo mun loxonaleng ne Iesu ga tong i na, lara laradi ga vot, neni lara atnedi luvuttadi amgomgo at loogu singising ap mo lemenemen. Ni ga xis tiktikbu mi luvatgulom teren saparap luxangkedek at ne Iesu la ga lok tin, “Ana vam, loolik tarak i met. Ketla una ven be i la una long tu ren la ni naba roo.” ¹⁹La ne Iesu ga xatu kaxat la ga emu min, la luvuttadi loklok ka anasa bok teren.

²⁰La lara latkin mo ga nemen; lanmeres gaaling gak lok teren at levenaleng amisik, ni ga ruuna nom lanmeres at lasangaun mi legepu maares; ni ga vas mu ne Iesu ro melemu la ga long tu at lungusungus at lavanga singsiga ren. ²¹Ni ga doma i do neni na long tu at lavanga singsiga ren, neni ba lox avukat.

²²La ne Iesu ga rem gili la ga ven kora ka i. La ga lok tin, “Latkin. Una lolos. Lunuunu ram ira lox avukat pam u.” La ap mo mun loxonaleng mo latkin ga lox avukat ta.

²³Se ne Iesu ga vubeles at loogu ap mo laradi gomgo, ni ga ven buang limixin, lentaba diga mas lengkaatu atdi, la lentaba digang teng la diga saxaanu mumu mo loolik. ²⁴Ni ga lok tidi, “Uto nimi. Loolik kopmen na met, neni i unga mun.” Ketla diga lok sese i. ²⁵La diga vas su ukamang, la ne Iesu ga vubeles la ga ranga aru lekngen loolik la ga lox axatu kaxar i. ²⁶La levelinga mumu i na ga epeseves at lengkot axap ap mo lenep silok.

Iesu Ga Lox Aroo Luradi Levengkatli Atdu Ga Main

²⁷La ne Iesu ga vas kaxat la at lavatpas teren, legepu radi levengkatli atdu ga main, duga mumu i la duga toro keretna, “Livisik li at ne Devit. Una balamu nama’.”

²⁸La ne Iesu ga vubeles at lara loogu la mo luradi ga vot pasa i, la ni ga lok tidu xeretna, “Kereva, mu nuunu do nenia a epovo na lox avukat levengkatli atnumu?”

Duga vorang i rin keretna, “Laaba, Leeme Silok.”

²⁹La ne Iesu ga long tu at levengkatli atdu la ga lok tidu, “Nemu mu nuunu rak la kerepmo levengkatli atnumu na lox avukat.” ³⁰La levengkatli atdu ga lox avukat ta. La ne Iesu ga paase lolos tidu xeretna, “Nemen muta tong i na ri teta.” ³¹Ketla duga vas kaxat basinge mo loogu la duga tong i ri limixin at lengkot axap ap mo lenep silok.

Iesu Ga Riki Asu Lagas Kapmek Basinge Laradi

³²Melemu atnedu duga on basinge ne Iesu, limixin diga lam ka lara laradi uto saparap ne Iesu. Lagas kapmek ga nemen ap mo laradi la goxo epovo na paase. ³³Se ne Iesu ga riki asu mo lagas, mo laradi ga epovo ba xusu na paase. Mo limixin diga sangu la diga lok, “Kopmen tempanga kerepmo maga ven i nade Israel.”

³⁴Ketla lubang Parisi diga lok keretna, “Neni i riki asu lubanggas mi lololos at laradi gomgo at lubanggas.”

Limixin Gugu At Ne Moroa Kopmen Dina Buaang

³⁵Iesu gat pas kantubu at levenmenemen silok axap, eburu mi lengkonmenemen kakalik, ga anasa limixin to at laraugu singising atdi la ga vavang mi Lagale Lavavang mumu Linintoo at ne Moroa. La ne Iesu ga lox avukat limixin basinge levenasen anmeres axap. ³⁶Kuren la ne Iesu ga ven nedi buaang limixin la ga balamu di mila diga baava mi levenaknixip la digak pakes aleng, kerekngan levesipsip kopmen taradi loklok tatao atdi. ³⁷La ne Iesu ga lok ti luvuttadi loklok ka anasa ren, “Laraamang mo ira mukun pam, ketla ixo buaang nedi luvuttadi kusu ri lox abeles leveluxa ukeneng at laraugu. ³⁸Kuren la mina sing ti laradi loklok tatao at laraamang kusu neni naba riki asu tuvuttadi kusu ri lox abeles leveluxa.”

Iesu Ga Riki Asu Lasangaun Mi Legepura

(Mk 3:13-19; Lu 6:12-16)

10 ¹Iesu ga xup buru ka nedi lasangaun legepura luvuttadi loklok ka anasa ren saparav i la ni ga raba di mi lololos kusu dina riki asu lubanggas basinge limixin la dina lox aroo luvuttadi mi levenanmeres ga lox abinis labantuxu atdi, la levenasen anmeres bok basinge limixin.

²Ni levenasen atnedi na lasangaun legepura luvuttadi vavang; avot tinotno ne Simon (laasen bok teren ne Pita), la ne Endru neni neton; la ne Jems eburu mi neton laasen teren ne Jon, nedu lumdak at ne Sebedi;

³Pilip la ne Batolomiu; Tomas la ne Metiu, neni laradi loklok ka pilas;

Jems, nitna ne Alpias, la ne Tadius; ⁴Simon, neni at libinam tadi me Selot, la ne Judas Iskariot, neni mo laradi ga song araba ne Iesu ri limixin bilinga.

Iesu Ga Vaase Asu Lempanga Luvuttadi Vavang Dinaba Lox I
(*Mk 6:7-13; Lu 9:1-6*)

⁵Iesu ga riki asu na lasangaun legepura luvuttadi mi levelinga xeretna; “Nemen gat nimi gutat pas uto at tenep at limixin kopmen di me Judaia kopla uto at temenemen at leme Samaria. ⁶Mina vosiga mene limixin boro Israel, di lok ngan laxasipsip di soogong. ⁷At lavatpas atnimi, mina vavang ti limixin do Linintoo boro vana at laxalibet monga ira auret! ⁸Mina lox avukat levenanmeres, la mina lox arooro amlong luvuttadi met, la mina lox avukat nedi levenanmeres gu ik lok atdi, la mina riki asu lubunggas basinge limixin. Nia ara raba gamasa vam nimi mi lololos ti lok na leven gugu; kuren la mina gugu min la nemen gat mita ro unun tin. ⁹Nemen gat mita xip ka tempilas eburu minimi. ¹⁰Nemen mita xip kaka teventat eburu minimi at lavatpas atnimi, kopla tavanga singsiga ri vetara xun; kopla tuvanga vatpas, kopla takdak tit pas, mila laradi gugu at ne Moroa i epovo na lok ka lempanga anan tin boro at limixin neni i vavang tidi.”

¹¹La ne Iesu ga lok bok tidi xeretna, “La do mina vas pot at temenemen silok kopla temenemen lixilik, mina puse ri taradi avukat la mina nemen eburu min se mina vas kaxat basinge mo lemenemen. ¹²Do mina vubeles ukeneng at tara toogu, mina lok tidi xeretna, ‘Limila nak lox eburu minimi.’ ¹³Do limixin ap mo loogu di siam ka nimi, mina ke limila atnimi nak lox eburu midi. Ket do dixo siam ka nimi, mina ke limila namlong mu nimi. ¹⁴La do tara ixo siam ka nimi kusu na ronga ka levelinga atnimi, mina semla xepe laxakup basinge lengkangkedek atnimi at loxonaleng mina vas kaxat basinge mo loogu kopla mo lemenemen silok.^b ¹⁵A tong tuturun i rinimi do at laaleng ete, ne Moroa naba lox asuusu lumumuat ti limixin boro Sodom la Gomora, ketla neni naba lox asuusu lumumuat silok tinotno ri limixin ap mo lemenemen tongtonga xepe!”

Levenmumuat La Levesongsongot Naba Vot
(*Mk 13:9-13; Lu 21:12-17*)

¹⁶La ne Iesu ga lok tidi, “Mina ronga i na! Ana riki aonon nimi ngan laxasipsip kantubu at laxanman sio. Mina lok tatao avukat nimi i ngan lisii neni ikleklen solo la minak lox atnaasan ngan levenamno. ¹⁷Mina

^b **10:14** Na loklok i lox asuusu i do ne Moroa naba raba lumumuat ti limixin ap mo lemenemen.

reven avukat, mila lentaba luvuttadi mo diba ranga alis nimi la dina lok ka nimi ri lavapaase; la dibak pixis nimi ro xeneng at laraugu singising atdi. ¹⁸Diba vaxaru nimi ro melamgo at luvuttadi amgomgo la to bok melamgo at lavaorong silok mila mi mumu asu ia, la miba tong asu Lagale Lavavang tidi la ti limixin kopmen di me Judaia. ¹⁹Do dina lok li nimi at lavapaase, nemen gat mita bulu do miba tong lavanga salai la mina vaase xereva. Se at loxonaleng na vot tinimi do ri vaase, ne Moroa axa naba raba nimi mi levelinga kusu mina vaase asu i, ²⁰mila levelinga mina vaase i kopmen atnimi axa; ketla Loroonan Kaala at ne Moroa, ne Temen nimi naba paase asusu i at levenngusno atnimi.

²¹Lara koeton axa diba etaba tuntuna mi luvutneton di ri lanmet; la luvuttemen laxamdak diba etaba tuntuna mi laxamdak la laxaalik atdi; la laxamdak mi laxaalik dibang tonga xepe levelinga at luvuttemen di mi luvutnen di la diba lok li di at lanmet. ²²Limixin axap diba belemamao nimi mila mi mumu asu ia. Ketla lara do i tu lolos keneng at levesongsongot ise at laxavaxap ap mo levenaleng, ne Moroa naba lox arooro i. ²³Do dina lox asongot nimi at tara temenemen, mina sixiro uto at tara temenemen petpes. A tong tuturun i rinimi do nenia, Laradi Mevana, anaba vot la kovisi mi noxo lok axap lugugu atnimi ap mo laramenemen at lenep silok Israel.

²⁴Kopmen tamdak loklox ase na silok ti leeme loklox ase ren; koplata saxaruki na silok ti laradi gomgo ren. ²⁵I epovo do lamdak loklox ase na ngan mun leeme loklox ase ren; la lasaxaruki na ngan mun laradi gomgo ren. Mo do limixin dina so asen laamgomgo at lixitkis koetemen mi ne Belsebul, diba so asen gilipu levenasen atdi axap di nemen keneng ap mo loogu mi levenasen kapmek!”

Nemen Mita Marat At Limixin

(Lu 12:2-7)

²⁶La ne Iesu ga lok bok keretna, “Nemen gat mita marat at limixin di munepen minimi; mila levenai mo nga di se bopbop li i, naba men at lasaxaven, la lempanga sai mo dik lox alipe, naba ravasu at lasaxaven la limixin axap dibaklen i at laaleng ete. ²⁷Levenai nia a paase xusuk nimi min at lamain, mina vaase i at lemeren limixin axap. La levenai miga ronga i, aga vaase nemnem i rinimi, mina tu ro vana at lempatlak gu la mina tong asu i ri limixin axap. ²⁸Nemen mita marat atnedi dip sev amet labantuxu, ketla kopmen dina epovo ri sev amet loroonan; kusuk mun minak marat at ne Moroa, neni i ruuna lolos kusu ri sev amet labantuxu la na riki loroonan at laradi uto at lemenemen songsongot. ²⁹I epovo do mina un kaka tegepu natdik mi tegesuxuven peni mene; ketla kopmen tara atdu noxo met gamasa la ne Moroa xopmen naklen i. ³⁰La tinimi, lengkabinim at lempatlak atnimi ne Moroa iraklen axap pam i. ³¹Kuren

la nemen gat nemi mita marat; nemi mi nunuan aleng at lemeren ne Moroa!”

³²La ne Iesu ga lok bok tidi, “Nege do i tong asu i do neni laradi mumu asu ia, ro melango at limixin axap; at laaleng ete, anaba tong asu bok neni ro melango at lemeren ne Moroa to vana at laxalibet do neni na vaxaru limixin at leete. ³³Ket do tara na sok tixirixes ia ro melango at limixin axap, aba sok tixirixes kepe box i ro melango at ne Tamak to vana at laxalibet.”

Kopmen Luruburu, Ketla Leepeseves

(Lu 12:51-53; 14:26-27)

³⁴La ne Iesu ga lok bok tidi, “Nemen mita nua i do nia aga vot kusu ana raba limila ri na lavatbung menemen; kopmen, a goxo vot kusu ana raba limila; ketla aga vot kusu ri lox aepeseves limixin. ³⁵Aga vot kusu ana lok, ‘Laxamdak temes dina munepen mi luvuttemen di, la laxaalik diba munepen mi luvutnen di. La loxoenenen diba emunepen eburu. ³⁶La laradi naba munepen tinotno minedi di nemen at loogu ren.’ *Mai 7:6*

³⁷Do nege i balamu aleng ne temen kopla nenen la ixo balamu aleng ia, neni xopmen na epovo do na ravasu ngan laradi rak. Do nege i balamu aleng ne nitna xopla ne nitnono, la ixo balamu aleng ia, neni xopmen na epovo do na lok ngan laradi rak. ³⁸Do nege i xopara na xip ka levenmumuat, i lok ngan laradi na solok ka laxaba ren la ira mumu asu ia, neni xopmen na epovo do na nemen ngan laradi rak. ³⁹Do nege i vara i do na ranga alis lorooro ren, neni naba sang apkav i; ket do nege i soxope lorooro ren ti lok luvukat tarak, neni naba lok kaka lorooro avolo.”

Luunun Tinedi Di Momo Ka Luvuttadi Mumu Asu At Ne Iesu

(Mk 9:41)

⁴⁰La ne Iesu ga lok bok tidi, “Do nege i seega rangarang nemi, neni i seega rangarang ia; la do nege i seega rangarang ia, neni i seega rangarang ne Moroa mo ga riki ia ude at na lavatbung menemen. ⁴¹Do nege i seega rangarang leeme vapaase alii mila neni leeme vapaase at ne Moroa, neni naba lok ka luunun ngan at leeme vapaase alii; la do nege i seega rangarang ka laradi nunuan, neni naba lok ka luunun ngan at laradi nunuan. ⁴²A tong tuturun i rinimi; do nege i raba ladan mumudut ti tara atdi na limixin tarak, mila neni laradi loklok ka anasa rak, neni naba lok kaka kobot luunun teren.”

Iesu La Ne Jon Laradi Sep Susu

(Lu 7:18-35)

11 ¹Se ne Iesu ga raba linga axap ti lasangaun mi legepura luvuttadi loklok ka anasa ren, neni ga vas basinge mo loxot la gat pas uto Galili kusu na lox ase limixin la na vavang to at laramenemen atdi.

²Ap mo levenaleng ne Jon laradi sep susu ga nemen at loxokoxo, neni ga ronga lempanga ne Karisito ga lox i, la neni ga riki lentaba luvuttadi loklok anasa ren uto saparap ne Iesu mi levelinga xeretna, ³“Tong axasev i rinama do xereva, nenu vam Lanarong, kopla tara gove manaba ngangais i?”

⁴La ne Iesu ga vorang i ridi, “Minamlong la mina tong i ri ne Jon mumu lempanga mi ronga i la mi ven i. ⁵Nedi limixin mi lengkatli main, mo di reven manga; nedi lengkangkedek atdi ga lok kapmek, mo dit pas avukat; la nedi dik meres mi lanmeres gu, di lox avukat pam; la nedi levenbaalung atdi i repe, ding tonga manga; la nedi diga met pam mo di roo xat amlong pam; la limixin banbalo, mo ding tonga Lagale Lavavang. ⁶Luvukat ti neni laradi kopmen noxo subu basinge ia la lebelen ixo lok kapmek ti na lugugu rak.”

⁷Se luvuttadi loklok ka anasa at ne Jon diga vas kaxat pam, Iesu ga tong levelinga mumu ne Jon tinedi limixin keretna, “At levenaleng migat pas do mina ronga linga at ne Jon to at lamatbin, laradi salai nemi miga lok do miba ven i? Kereva, miga nua i do miba ven taradi naba lok ngan lovobeo, lamanman it mas amdi i? ⁸Lavanga salai migat pas do mina ven i? Kereva, miga ven laradi ga siga lavanga singsiga avukat? Kopmen. Limixin di siga lempanga singsiga avukat la di ruuna lapnovos silok, nedi dina nemen keneng at laraugu ngan loogu at loorong silok. ⁹Mina tong i ria, lavanga salai migat pas do mina ven i? Taradi vapaase alii? I ruturun tinotno. A tong i rinimi, do nemi miga ven laradi ga silok aleng ti lavaeme vapaase alii. ¹⁰Jon neni laradi mo Lovoang Kaala ga paase mumu i. Moroa ga lok keretna,

“Laradi vapaase rak, anaba riki amgo i ru kusu na lox agagas li langas tu.”

Mal 3:1

¹¹La ne Iesu ga lok bok, “Nia a tong tuturun i rinimi, Jon laradi sep susu, neni i silok aleng tinedi limixin axap at na lavatbung menemen; ketla do tara i lok ngan laradi gamasa la neni lanat at Linintoo no vana at laxalibet, ni i silok ti ne Jon. ¹²Ga ru ka i at laaleng ne Jon ga vavang kaxat, i se at na laaleng lingina, Linintoo no vana at laxalibet gat pot mi lololos, ketla i ekip tangarang mi limixin kapmek di lolos kusu dina ru pe i. ¹³Levelinga at lavaeme vapaase alii, la Lenavolo, limixin diga mumu asu i, se at lovtopot at ne Jon. ¹⁴La mo do mi epovo do mina siam ka lempapaase atdi, mina nuunu do neni ne Elaisa, mo diga tong i do neni nabamlong. ¹⁵Do mi ruuna levenbaalung, mina ronga avukat na levelinga.”

¹⁶La ne Iesu ga lok bok keretna, “Limixin at na levenaleng, ana vaase poovo midi mi lavanga sala? Nedi di lok ngan laxamdak mi laxaalik kakalik dit kis to at loxot etang. Lara libinam atdi dip kup ti mo lara libinam,

¹⁷ ‘Magak pixan lengkompixan epot tinimi, ketla mi goxopara na tii momo; magak pixan lengkompixan bukbulu, ketla mi goxopara nang teng.’

¹⁸ Jon ga vot, la ni ga mun anan la goxo inin vaen, la limixin diga lok do, ‘Lagas i nemen teren!’ ¹⁹ Ketla nenia, Laradi Mevana, aga vot, la nia a anan la a inin, la limixin di lok, ‘Mina ven ba i na laradi! Neni laradi xoxo anan la laradi inin, la i etangas mi luvuttadi loklok ka pilas eburu mi limixin kapmek!’ Ketla lugugu at ne Moroa i pisik avukat la kerepmo i lox asuusu i do lodomdoma alii at ne Moroa i lox avukat.”

Laramenemen Ua Kopmen Di Goxo Nuunu At Ne Iesu

(Lu 10:13-15)

²⁰ Melemu Iesu ga ru ka i xusu na vaase mukmusak ti limixin ap mo laramenemen ua neni ga lok buaang lempanga sangsangu e, mila limixin ap mo laramenemen kopmen di goxo leeng basinge laxakapmek atdi. ²¹ Iesu ga lok keretna, “Naba lok kapmek aleng tinemi limixin me Korasin. La naba lok kapmek aleng bok tinemi limixin me Betsaida. Mo levempanga sangsangu nia aga lox i ro xantubu atnimi, mo do nia gita lox i ro Taia la Sidon, soso mun limixin me go, nedi gita leeng pam la gita etara mun lengkontamon kapmek, la gita reeve vam laxakup at lengkot atdi. ²² Ketla ana tong i rinimi do at laaleng ete, ne Moroa naba lox asuusu lumumuat uto ri limixin at lumenemen Taia la Sidon, ketla langangan lumumuat naba nemen mavana atnimi. ²³ La nemi limixin me Kaprenaum. Mi vavara i do mina silok ti limixin axap, ketla ne Moroa ba sok gingin asi minimi uto at lemenemen songsongot. Mo lempanga sangsangu, aga lox i dom kantubu atnimi, mo do nia gita lox i ro Sodom, nedi gitaba leeng basinge laxakapmek atdi la ne Moroa gitoxo sele utut kape mo lemenemen. ²⁴ A tong i rinimi do at laaleng ete, Moroa naba lox asu lumumuat ti limixin kapmek to Sodom, ketla tinemi limixin, lumumuat naba silok aleng tinimi.”

Iesu Ga Emi Asu Mi Ne Moroa

(Lu 10:21-22)

²⁵ Ap mo laaleng ne Iesu ga lok ti ne Moroa, “Nia a emi asu minu, Tamak; nenu Leeme Silok at laxalibet mi lavatangka. Nia a emi asu minu mila ugara lox ase vam nedi limixin gamasa mi levelinga mumu Linintoo; la uga lipe i basinge limixin leklen la limixin diga lox ase. ²⁶ I ruturun, Tamak. Anai uga lox i mi lodoxoma la lomomo ram.”

²⁷ La ne Iesu ga lok ti mo limixin, “Tamak, ira raba vam ia mi lempanga axap. Kopmen teta naklen ia, ketla ne Tamak kusuk mun; la kopmen teta naklen ne Tamak, ketla nenia ne Nitna xusuk mun, la tinedi mun nenia a vara i kusu ana lox ase di min. ²⁸ Nemi axap mik sak saaban mi

laxanaknixip keneng at lorooro atnimi, mina vosiga ia, la aba raba nimi mi loklox amas. ²⁹Mina siam ka loklok tarak la mina rongka ka levenanasa rak; mila lorooro rak i umsu mi loklok mulus mene, kuren la miba lok ka loklox amas ti labaroonan atnimi. ³⁰Mina siam ka ia mila levenanasa rak kopmen na lolos la loklok tarak noxo lok ngan lavanga mumuat tinimi.”

Iesu Ga Paase Mumu Laaleng Kaala

(Mk 2:23-28; Lu 6:1-5)

12 ¹Ap mo levenaleng, ne Iesu gat pas kantubu at leventaamang at laaleng kaala. La luvuttadi loklok ka anasa ren diga roxo la diga xidik kaka lempeven at lempiao, la diga anan i. ²Se lubang Parisi diga ven i, diga lok ti ne Iesu, “Pen ba i. Luvuttadi loklok ka anasa ram dira los polo vam Lenavolo, i tong i do nemen mitak lok lempanga xeretnom at laaleng kaala.”

³La ne Iesu ga sue di xeretna, “Mi doma bok levelinga at Lovoang Kaala mumu ne Devit? At lara laaleng neni eburu mi limixin teren diga roxo. ⁴Neni ga vubeles at loogu at ne Moroa la ga lok ka lengkongkide digam taba min ti ne Moroa, la neni eburu mi limixin teren diga anan i. La kerepmo diga los polo Lenavolo mila lavamaasa xusuk mun diga anan mo lengkongkide. ⁵Mina domangke at levelinga at Lenavolo i tong i do at laaleng kaala lavamaasa di los polo Lenavolo mila di gugu ro xeneng at loogu laplavang ap mo laaleng. Ketla kopmen taxapmek atdi mumu i nom. ⁶Nia a tong i rinimi do lara i silok ti loogu laplavang ira vot pam. ⁷Nemi xopmen mina xasep at levelinga at Lovoang Kaala mo i lok keretna, ‘A vara i do lebelemumu na umsu atnimi, a xopara loklok tiplavang.’

Ose 6:6

Do nemi gitaklen lavasuun at nai, nemi gitoxo lok li lumumuat atnedi kopmen taxapmek atdi.” ⁸La ne Iesu ga lok bok, “Nenia Laradi Mevana. La nenia leeme silok at laaleng kaala la a lok tatao mo laaleng.”

Iesu Ga Lox Aroo Laradi Lekngen Ga Molo

(Mk 3:1-6; Lu 6:6-11)

⁹Iesu ga vas kaxat basinge mo loxot la ga vubeles uto at loogu singising atdi. ¹⁰Lara laradi mo ga nemen lekngen ga molo. La mo lubang Parisi diga doma i do dina bala raba ne Iesu, kuren la diga sue i, “Ik mokso do tara na lox aroo taradi at laaleng kaala?”

¹¹Iesu ga lok tidi, “Do tara atnimi i ruuna lisipsip la mo lisipsip na subu uto at tamamara silok at laaleng kaala, neni ba rebeng ka i la ba xiv asu ka i. ¹²La laradi i silok aleng ti lisipsip. Kuren la ik mokso do ata lok lempanga avukat at laaleng kaala.”

¹³La ni ga lok ti mo laradi, “Una song asu mi lakngam.” La mo laradi ga song asu mi lekngen, la lekngen ga lox avukat axap ta kerekngan mo

lara lekngen. ¹⁴Ketla lubung Parisi diga sixisu la diga puse ngas kusu dina sev amet ne Iesu.

Iesu Neni Lasaxaruki At Ne Moroa

¹⁵Iesu gaklen mo levendoxoma atdi la ga vas kaxat basinge mo lemenemen. Buaang limixin diga mumu asu i la neni ga lox aroo nedi diga meres. ¹⁶Neni ga tong lolos i ridi do di noxo tong asu i do neni nege. ¹⁷Iesu ga lox i na kusu na lox asorun levelinga at leeme vappaase alii ne Aisaia keneng at Lovoang Kaala, i lok keretna,

¹⁸‘Neni na lasaxaruki rak, mo nia aga soxolik ka i; nenia a balamu i la a lok momo aleng min. Nenia aba suxa aumsu i mi Loroonan tarak at na lavatbung menemen. La neni naba paase axasep loklok mokmokso ri limixin axap. ¹⁹Neni noxo etep mi levelinga koplā nap kup mukmusak; neni noxo ru asuvos i ro melamgo at limixin axap. ²⁰Neni noxo ru mi loboat tinedi limixin molobe koplā na lok kapmek nedi limixin pakpakes. Neni naba gugu se limixin diba siam kaka leveloklok ik mokso. ²¹La levenabung mixin axap diba nuunu at laasen teren.’

Ais 42:1-4

Iesu Ga Paase Mumu Ne Belsebul

(Mk 3:20-30; Lu 11:14-23)

²²La limixin diga lam ka lara laradi uto at ne Iesu. Lagas kapmek ga suxuna i la goxo epovo na paase la luxatli ren ga main; la ne Iesu ga riki asu lagas basinge mo laradi la ni ga lox epovo i xusu na paase la na reven. ²³La limixin axap diga sanganu la diga esue, “Kereva, na laradi neni Lanarong, la livisik li at ne Devit?”

²⁴La lubung Parisi diga rongā i na la diga lok ti mo limixin, “Neni i riki asu lubunggas mi lololos at ne Belsebul, leeme gomgo at lubunggas.”

²⁵Ketla ne Iesu gaklen levendoxoma atdi la ni ga tong lavappaase poovo ridi xeretna, “Dola tubungmixin di epes di ri lengkon binam tadi, la dia esep eburu minedi xa, letuna atdi kopmen noxo lok nunuan; la limixin at legese menemen koplā loxoetemen do di epes di kusu ri esep, dinabat kis epeseves. ²⁶Kuren la mo do ne Satan eburu mi limixin teren dina epeseves ti legepu binam tadi la dina esep, lololos teren naba nemen atmatkun kereva? ²⁷Mo do nia a lox asu di mi lololos at ne Belsebul, limixin sangsanga atnimi di lox asu di xereva? Nedi di lok asusu i do levelinga atnimi kopmen nak mokso. ²⁸Ket do a lox asu di mi lololos at Loroonan Kaala at ne Moroa, Linintoo at ne Moroa mo nga ira vot pam saparap nimi.

²⁹Do tara i vara na xip pilo xaka lempanga at loogu at taradi lolos, neni na xoxo alis be mo laradi la melemu na xip kaka ba mo lempanga ren.

³⁰Do taradi kopmen na xis esogo eburu minia, neni i munepen minia; la do tara kopmen nak lok tooro ia rip kup bubua ka laxasipsip, neni mo laradi ik sak

teteles laxasipsip. ³¹La a tong i rinimi; Moroa naba doxoma xepe laxakapmek axap la lavapaase vupu; ket do tara na vaase vupu ri Loroonan Kaala, ne Moroa noxo doxoma xepe mo laxakapmek. ³²La ne Moroa naba doxoma xepe tara i paase kapmek mumu ia, Laradi Mevana, ketla neni noxo doxoma xepe tara i paase kapmek mumu Loroonan Kaala, at na levenaleng la at lorooro melemu bok.

Luuna Avukat Naba Pisik Larapeven Una Avukat
(Lu 6:43-45)

³³Luuna avukat, ni i pisik larapeven una avukat. Luuna xapmek, ni i pisik mun larapeven una kapmek; limixin di ven kibis luuna at larapeven teren i pisik asu i. ³⁴Nemi laxamdak at lempasii. Nemi xopmen mina epovo na tong asu levelinga avukat mila nemi mi umsu mi laxakapmek. Levenngusno nimi i paase asuusu lempanga lebelen nimi i umsu min. ³⁵Laradi avukat ik lox asuusu lempanga nunuan ik lok at lorooro ren, ketla laradi xapmek ik lox asuusu mun lempanga xapmek ik lok at lorooro ren. ³⁶Nia a tong i rinimi. Limixin diba tu at lavapaase ro melango at ne Moroa at laaleng ete mumu levelinga xapmek axap diga tong pam i. ³⁷Mo do levelinga at tara ga lox avukat, Moroa naba lox asepmus i. Mo do levelinga at tara ga lok kapmek, Moroa naba lok li lumumuat teren.”

Limixin Diga Sing Ne Iesu Kusu Na Lok Tavanga Sangsangu
(Mk 8:11-12; Lu 11:29-32)

³⁸Melemu lentaba at lubung Parisi la luvuttadi loklox ase at Lenavolo diga lok ti ne Iesu, “Leeme loklox ase. Ma vara i do una lok tavanga sangsangu.”

³⁹La ne Iesu ga lok tidi xeretna, “Limixin at na levenaleng nedi limixin kakapmek tinotno. Di sue ri tavanga sangsangu, ketla kopmen a noxo lok tara ridi, ketla diba doma mumu mun leretere at leeme vapaase alii, ne Jona. ⁴⁰Jona ga nemen to xeneng at lebelen lavatmat silok at lavantun aleng kangking la lavantun aleng kanimin, la kerepmo nenia, Laradi Mevana, aba nemen to xeneng tubu at lavatkangka at lavantun aleng kangking la lavantun aleng kanimin. ⁴¹At laaleng ete limixin boro Nineve dinaba xatu kaxat upana la dina tong asu laxakapmek atnimi, mila diga leeng basinge laxakapmek atdi at nom laaleng diga ronga ne Jona ga vavang tidi; la lara laradi ik lok kantubu atnimi, neni i silok ti ne Jona. ⁴²At laaleng ete latkin gomgo boro Seba naba xatu kaxat la na tong asu laxakapmek atnimi limixin at na levenaleng, mila neni gat pas at lavatpas babaalom aleng kusu na ronga lakleklen at ne Solomon; la lara laradi ik lok pam kantubu atnimi, neni i silok ti ne Solomon.”

Lomlong At Lagas Kapmek
(Lu 11:24-26)

⁴³La ne Iesu ga lok bok, “Do lagas kapmek na oo su basinge laradi, bat pas saasaa at lengkot kopmen tadan teren, la ba reven ti toxot kusu

rin ti lok mamana. Mo do noxo vuse ka toxot, ⁴⁴naba doma i xeretna, ‘Anamlong uto at no laradi, nenia aga on basinge i.’

La neni bamlong la na long lenget ka i do mo loxot imgames la ira lox avukat pam la kopmen tara ro xeneng teren. ⁴⁵La neni bat pas la na lok ka bok lavanuti lubanggas, laxakapmek atdi i volo aleng i, la dibat pas la diba vubeles ap mo laradi. Kuren la mo laradi ba nemen kakapmek tino. Limixin kakapmek at na levenaleng dibak lok kuren.”

Luvutneton Mi Nenen Ne Iesu

(Mk 3:31-35; Lu 8:19-21)

⁴⁶Iesu move ga paase ri limixin la nenen mi luvutneton diga tu ro xamang, diga vara i do dina epaase min. ⁴⁷[Lara laradi ga lok ti ne Iesu, “Nenam eburu mi luvutnetam no di tu xamang la di vara i do dina ven u.”]

⁴⁸La ne Iesu ga lok, “Nege ne naga, la nege di luvutnetak?” ⁴⁹La ne Iesu ga song ti luvuttadi loklok ka anasa ren la ga lok, “Na luvuttadi nedi di lok ngan ne naga mi luvutnetak. ⁵⁰Neni mun i mu asu lavavara at ne Tamak no vana at laxalibet, neni netak, kopla neinuk, kopla ne naga.”

Lavapaase Poovo Ri Laradi Lotlo

(Mk 4:1-9; Lu 8:4-8)

13 ¹Ap mo mun laaleng Iesu ga vas kaxat basinge mo loogu la gat pas uto at lisigege at lavat dan kis, la ni ga xis kopok la ga anasa limixin. ²Ketla limixin diga umsu xangkan i, diga buaang aleng; kuren la ni ga los kas at lese pang lixilik la ni ga xis teren, la limixin diga tu ro loxon. ³Neni ga paase poovo ridi mi lempanga buaang. Ni ga lok keretna, “Lara laradi lotlo ga vas su kusu natlotlo piao. ⁴Se neni gatlotlo levenit piao ro at laraamang, lentaba levenit ga subu ro at langas la lavapixa diga vot la diga rok axav i. ⁵Lentaba atdi ga subu ro at laxanuat la lengkongkangka lixilik mene gak lok teren. Levenit piao ga su xat soso mun mila goxopmen taxangka solo. ⁶Ga se laxangking ga los su upana, ga sev amolos axap nom lempiao, mila levenixe atdi goxo si aleng ukopok la nom lempiao susu diga met axap. ⁷Lentaba at nom levenit piao ga subu ro at livin gagas la livin gagas ga su xat la ga is nom lempiao la di goxo epovo bok ba ri su. ⁸Ketla lentaba levenit piao ga subu ro at laxangka nunuan, la diga visik; lentaba ga visik legesa sangaun kobot (100), lentaba lavanna sangaun, la lentaba lavantun sangaun.” ⁹La ne Iesu ga lok, “Mo do levenbaalung go atnimi, mina rongga avukat na levelinga.”

Lempasuun At Lempapaase Poovo

(Mk 4:10-12; Lu 8:9-10)

¹⁰Melemu luvuttadi loklok ka anasa ren diga vot pasa ne Iesu la diga sue i xeretna, “Tila uk lok lempapaase poovo ri limixin mo do u paase ridi?”

¹¹La ne Iesu ga vorang i ridi xeretna, “Moroa ira raba vam nimi mi lakleklen at Linintoo no vana at laxalibet; gano ga nemen alipe; ketla tinedi limixin petpes kopmen. ¹²La mo do taradi i ruuna lakleklen kerepmo, Moroa ba raba box i kusu neni naba ruuna lakleklen solo; ketla ti laradi, kopmen takleklen solo ren, Moroa ba lox asu axap mo lakleklen basinge i, keke i do neni i ruuna lamanakleklen lixilik mun. ¹³Lavasuun teren do nenia a paase ridi mi lempapaase poovo i lok keretna;

‘Nedi di reven lugugu, ketla di noxo ven kibis i; ding tonga mo levelinga, ketla di noxo xasep teren.’

¹⁴Kuren la na lavapaase alii at ne Aisaia ira sorun pam. Moroa ga lok keretna,

‘Mibang tonga amisik, ketla mi noxo xasep; miba reven amisik, ketla mi noxo ven kibis. ¹⁵Lavasuun teren do levendoxoma at na limixin ira rebonot pam, la dira bong pe vam lenbaalung atdi la dira vam pe bok pam lengkatli atdi. Do kopmen, lengkatli atdi ba reven la lenbaalung atdi nang tonga la levendoxoma atdi na xasep la dina leeng la ana lox avukat nedi. *Ais 6:9-10* ¹⁶Ketla Moroa ik lox anarong nemi luvuttadi loklok ka anasa mila lengkatli atnimi i reven la lenbaalung atnimi ing tonga. ¹⁷A tong tuturun i rinimi! Buaang nedi lavaeme vapaase alii la buaang bok nedi limixin at ne Moroa diga vavara aleng i do dina reven na lugugu mi reven i; ketla di goxo epovo, la diga vavara box i do dina ronga levelinga rak ming tonga i, ketla di goxo epovo.”

Iesu Ga Soxomus Lavasuun At Laradi Gatlotlo Piao

(Mk 4:13-20; Lu 8:11-15)

¹⁸La ne Iesu ga lok bok keretna, “Mina ronga avukar i na, la mina xasep avukat at lavasuun at na lavapaase poovo at laradi gatlotlo levenit piao. ¹⁹Tinedi di ronga lempapaase mumu Linintoo, ketla dixo xasep teren, nedi di lok ngan levenit piao ga subu ro mun at langas. Satan i vot la i lok pes nom levelinga basinge lorooro atdi. ²⁰Ti levenit piao ga subu ro at laxanuut, lengkongkangka lixilik gak lok teren, ni i ru katling nedi limixin di ronga levelinga la soso mun di siam ka i mi lomomo. ²¹Ketla ixo vubeles ukeneng at lorooro atdi; la lunuunu atdi ixo nemen abao solo. Kuren la ise do levenmumuat i vot eburu mi levesongsongot mumu levelinga at ne Moroa, lunuunu atnedi i subu soso mun. ²²Ti levenit piao ga subu ro at livin gagas, ni i ru katling nedi limixin di ronga levelinga, ketla dik bulu mu solo laxampanga at na lorooro, la nom labalamu atnedi ri lapnovos i itis nom levelinga la dixo pisik tempeven una. ²³La ti levenit piao ga subu at laxangka nunuan, ni i ru katling nedi limixin di ronga levelinga at ne Moroa la di xasep teren, la di pisik lempeven una, lentaba di visik lempeven una i epovo at legesa sangaun kobot (100) la lentaba lavanna sangaun la lentaba lavantun sangaun.”

Lavapaase Poovo Ri Lempivilis Kapmek

²⁴Iesu ga tong bok lara lavapaase poovo ridi, ni ga lok, “Linintoo no vana at laxalibet i lok ngan laradi gatlotlo levenit piao avukat to at laraamang teren. ²⁵At laxanimin limixin axap diga unga, la lara lumunepen teren ga vot la gatlo lempivilis kapmek to xeneng at nom laraamang piao, la no nga i gara onon. ²⁶Ise levenit ga su xat la ga lok do na visik, lempivilis kapmek bok ga su xat. ²⁷Lavasaxaruki ap mo laradi at laraamang diga vosiga i la diga lok, ‘Leeme silok. Levenit piao avukat ugatlotlo i. I lok kereva la lempivilis kapmek ta mo ira su kantubu at lempiao?’

²⁸La ni ga vorang i ridi, ‘Taradi i munepen minia ga lox i nom.’

La diga lok tin, ‘Kereva, u vara i do manat pas la mana xat kape i?’

²⁹La ni ga lok, ‘Kopmen, mila lavanga mina xat kape lempiao eburu mi lempivilis kapmek. ³⁰Keke lempiao eburu mi levempivilis kapmek dina susu eburu se at laaleng ti sep kin. Ap mo laaleng aba tong i ri luvuttadi gugu rak keretna; mina rep asu ka avot levempivilis kapmek la minap kos ka di la mina lu arup midi ro at laxao; la mina lok bubua ka lempiao la mina lok li di ro at loogu lili rak.”

Lavapaase Poovo Ri Liit At Luuna Mastet

(Mk 4:30-32; Lu 13:18-19)

³¹Iesu ga vaase bok tidi mi lara lavapaase poovo xeretna, “Linintoo no vana at laxalibet i lok ngan lara laradi ga lok ka levenit mastet la gatlotlo i ro xataamang teren. ³²Nom levenit i lixilik aleng ti levenit axap, ketla do ira su xat, neni i silok aleng ti lempanga axap i susu ro xataamang. La ira lok ngan ta luuna, la lavapixa dit pot, la dirap kip gu go at lengkakan una ren.”

Lavapaase Poovo Mumu Laiis

(Lu 13:20-21)

³³Melemu ne Iesu ga vaase bok di mi lara lavapaase poovo xeretna, “Linintoo no vana at laxalibet i ngan laiis. Latkin i lok ka i la i lox eburu i mi loxompalava solo kusu na lok lengkongkide min. Laiis i vubeles axap uto xeneng at loxompalava xusu na so xat.”

Ua Lavasuun Teren La Ne Iesu Ga Lok Lempapaase Poovo

(Mk 4:33-34)

³⁴Iesu gak lok lempapaase poovo ri tong i na lempanga ri limixin; ni goxo tong tavanga ridi la kopmen tavapaase poovo. ³⁵La kerepmo ne Iesu ga lox asorun levelinga at leeme vapaase alii ga vaase i xeretna, ‘Aba tong asu lempapaase poovo ridi; la aba tong asu levelinga ga nemen alipe, ga ru ka i at luruntudum li at na lavatbung menemen.’

Lavasuun At Lavapaase Poovo Mumu Lempivilis Kapmek

³⁶Iesu ga on basinge limixin la ga beles ukeneng at lara loogu, la luvuttadi loklok ka anasa ren diga vot pasa i la diga lok tin, “Una tong asu lavasuun at lavapaase poovo mumu lempivilis kapmek ga su ro xataamang.”

³⁷La ne Iesu ga lok tidi xeretna, “Laradi itlotlo levenit piao avukat, ni nenia vam, Laradi Mevana. ³⁸Nom laraamang i ru katling na lavatbung menemen; levenit piao avukat, ni limixin dinaba vubeles ti Linintoo; la lempivilis kapmek, ni limixin di mumu asu ne Satan. ³⁹La laradi munepen itlotlo lempivilis kapmek, neni ne Satan. Laaleng ti lok bubua limixin, i ru katling laaleng kavaxap at na lavatbung menemen; la luvuttadi gugu, nedi lubungangelo.

⁴⁰Lempivilis kapmek di lok bubua di la dira xotos di ro at laxao, naba lok mun kuren tinedi limixin kapmek at laaleng kavaxap at na lavatbung menemen. ⁴¹Nenia, Laradi Mevana, anaba riki asu lubungangelo tarak ti lok ka nedi di lox asubu limixin eburu mi limixin kapmek uto basinge limixin nuunu. ⁴²La lubungangelo diba lu arup midi ro at lemenemen songsongot; ap mo loxot dibang teng la dina rungur ivivilis. ⁴³La limixin mokmokso diba soosoo ngan laxangking to at Linintoo at ne Temen di. Do lenbaalung mo atnimi, minang tonga avukat!”

Lavapaase Poovo Ri Lapnovos Diga Lipe I

⁴⁴La ne Iesu ga lok bok tidi, “Linintoo no vana at laxalibet i lok ngan lapnovos di lipe i ro at laxangka. La lara laradi i ven terek ka i la ni ia lipe manga i, la ni i lok momo aleng la ni ia sesep mi lempanga axap teren la neni imlong la ia un kaka mo lenep kangka axap la ia ruuna ka mo lapnovos.”

Lavapaase Poovo Ri Luat Gamgames

⁴⁵La ne Iesu ga lok bok tidi, “Linintoo no vana at laxalibet i lok ngan laradi sesep i puse ri laxanuat gamgames. ⁴⁶La do ira vuse ka lara, langsung luunun teren, neni it pas la ira sesep mi lempanga axap teren, la ni iramlong ba la ira un ka ba mo luat.”

Lavapaase Poovo Ri Laxatkat

⁴⁷La ne Iesu ga lok bok tidi, “Linintoo no vana at laxalibet i lok ngan laxatkat; limixin sepsep mat di loloa min to at laras la dira sao ka laxanasen mat solo min. ⁴⁸Se mo laxatkat i umsu mi laxanmat, di rep ka i uto loxon la dira xis be xusu dina episa lenmat. Lentaba nunuan di lok li di ro at lengkaxi atdi la lentaba xapmek di lu xape midi. ⁴⁹Naba lok mun kuren at laaleng kavaxap at na lavatbung menemen. Lubungangelo

diba vot la dina lok ka limixin kapmek basinge limixin avukat; ⁵⁰la diba lu midi ro at lemenemen songsongot. Mo go dibang teng la dina rungur ivivilis.”

Lempanga Maxat La Lempanga Megano

⁵¹Iesu ga sue di xeretna, “Mi xasep at na lempapaase poovo?”

La diga vorang i rin keretna, “Laaba.”

⁵²La ni ga lok, “Kuren la nedi axap luvuttadi loklox ase at Lenavolo do dina mumu asu levelinga at Linintoo no vana at laxalibet, nedi di lok ngan laradi at loogu i xip asu lempanga maxat mi lempanga maut boro xeneng at loogu lili ren kusu na raba limixin min.”

Limixin Boro Nasaret Diga Sok Tixirixes Ne Iesu

(Mk 6:1-6; Lu 4:16-30)

⁵³Ise ne Iesu ga vaase axap na lempapaase poovo, neni ga on basinge mo lenep, ⁵⁴la gamlong uto at lemenemen aulis teren. Ni ga anasa ro at loogu singising atdi. La limixin diga ronga i la diga sangu. Diga esue xeretna, “Ni ga lok ka na lakleklen solo meva? La ga lok ka lololos meva xusu ri lok na lempanga sangsangu? ⁵⁵Neni mun lamdak at ne Josep laradi xipkip gu! La ne Maria neni nenen, la ne Jems, la ne Josep, la ne Simon, la ne Judas di mun luvutneton; ⁵⁶la luvurinen dik lok bok de. Ni ga lok ka na lakleklen meva?” ⁵⁷Kerepmo la diga sok tixirixes kepe i.

La ne Iesu ga lok tidi, “Leeme vapaase alii di lok ngangao ren at lengkot axap, ketla to at lemenemen teren, limixin eburu mi libibinat teren, kopmen dina lok ngangao ren.”

⁵⁸Iesu goxo lok solo tempanga sangsangu go mila di goxo ruuna epovo lununu.

Lanmet At Ne Jon Laradi Sep Susu

(Mk 6:14-29; Lu 9:7-9)

14 ¹Ap mo levenaleng Erodes laradi gomgo boro Galili ga ronga lempanga ne Iesu ga lox i. ²La ni ga lok ti luvuttadi gugu ren, “Agut neni ne Jon to ga roo xat amlong, kuren la neni ira lok nom lempanga sangsangu mi mo lololos.”

³⁻⁴Avot at na ne Erodes ga sak paxat ka latkin at neton, laasen teren ne Pilip. Laasen ap mo latkin ne Erodias. La ne Jon laradi sep susu ga vaase sok ne Erodes mumu na loklok. La neni ga lok ti ne Erodes, “Ixok mokso do uga epot ka ne Erodias.”

Kuren la ne Erodes ga riki luvuttadi gugu ren kusu dina ranga alis ne Jon la diga xoxo i la diga lok li i at loogu xokoxo. ⁵Erodes ga lok do na sev amer i, ketla neni ga marat bok at limixin me Judaia; mila diga lok do ne Jon leeme vapaase alii.

⁶At laaleng loklok katling at livipisik at ne Erodes, ne nitnono ne Erodias ga tii ro melango at limixin. La ne Erodes ga lok momo aleng min, ⁷la ga lok laxakaape do neni naba raba mo loono mi tavanga neni na sing tin. ⁸Neni ga mu asu lodoxoma xa at nenen la ga lok, “Una raba nga ia mo mi lavatlak at ne Jon, laradi sep susu, to at tavattingtigon silok.” ⁹Loorong silok ga ronga i la ga bulu aleng. Ketla neni goxo epovo na los polo mo laxakaape neni ga lok pam i ro melango at limixin; kuren la neni ga raba linga luvuttadi gugu ren kusu dina sev amet ne Jon kerekngan mo loono ga sing tin. ¹⁰Kuren la diga ra korop ka lavatlak at ne Jon to at loogu xokoxo. ¹¹La diga lok li mo lavatlak to at lavattingtigon silok la diga raba loono min; la ga raba nenen min. ¹²La luvuttadi loklok ka anasa at ne Jon digat pas la diga lok ka labantuxu ren la digak mir i; melemu digat pas la diga tong i na ri ne Iesu.

Iesu Ga Raba Luxa Luvuttadi
(*Mk 6:30-44; Lu 9:10-17; Jo 6:1-14*)

¹³Iesu ga ronga lanmet at ne Jon la neni xusuk mun ga mu lese pang uto at loxot mimila. La buaang limixin diga ronga levelinga mumu i na la diga mumu asu i uto loxon boro at levenmenemen atdi. ¹⁴Se ne Iesu ga oso la ga ven nedi buaang limixin, ni ga balamu aleng di la ga lox aroo nedi, diga meres.

¹⁵Ga ukantinao nga, luvuttadi loklok ka anasa ren diga vot pasa i la diga lok tin, “Ukantinao nga na la na loxot, ni loxot mimila rino, la loxonaleng ti anan ira volo vam. Una riki aonon limixin kusu dibat pas uto at levenmenemen la dina un ka tempanga anan tidi.”

¹⁶La ne Iesu ga lok tidi, “Ixo epovo do dina on basinge na loxot. Nemi xa mina raba nedi mi teveluxa kusu ri anan.”

¹⁷La diga lok tin keretna, “Ma ruuna mun lavalimo lengkongkide la legepu venmat.”

¹⁸La ne Iesu ga lok tidi, “Mina raba ia mi nom leveluxa.” ¹⁹La neni ga tong i ri mo limixin kusu dina xis kopok at mo levempivilis avukat. La ni ga lok ka mo levengkongkide la legepu venmat, la ga milik aurut uto vana at laxalibet, la ga tong avukat ti ne Moroa. La neni ga sebek mo lengkongkide la ga raba i ri luvuttadi loklok ka anasa ren, la diga raba limixin min. ²⁰La limixin axap diga anan la diga an mais. La luvuttadi loklok ka anasa diga luxa lasangaun mi legepura leventat silok mi leveluxa mo limixin diga an ake ren. ²¹La nedi luvuttadi diga anan, diga epovo at lavalimo larabin sangsangaun kobot. (5000) La lentaba bok lavakin la laxamdak mi laxaalik kakalik bok diga anan.

Iesu Gat Pas To Mavana At Lavatdan Kis Galili
(*Mk 6:45-52; Jo 6:15-21*)

²²La soso mun ne Iesu ga tong i ri luvuttadi loklok ka anasa ren kusu dina los kas at lese pang, la dinamgo rin uto at lenep meo. La neni ga

riki aonon limixin. ²³Se neni ga riki aonon kepe vam di, neni xusuk ga vas urut to vana at loxongkaana kusu na ngising. Neni gak lok go se at laxanimin. ²⁴La ap mo loxonaleng lese pang no garak lox atbutbu nga. La lempopaxanao gak paksa ekakat lese pang mila lamanman gat mas lolos tangarang i.

²⁵Kantubu at lavantun mi lavanna konaleng at laxanimin, Iesu ga vas posiga luvuttadi loklok ka anasa ren to kantubu at lavatdan kis, neni gat pas mun to mavana at lavatdan kis. ²⁶Se diga ven i gat pas to mavana at ladan, diga marat aleng tinotno la diga lok, “Loroonan panga nom!” La digap kup aleng mi lainmarat.

²⁷La soso mun ne Iesu ga lok tidi, “Nemen gat mita marat; mina lolos. Nenia mun na.”

²⁸La ne Pita ga lok, “Leeme Silok. Do nenu ruturun pam nom, una tong box i ria kusu anat pas mavana at ladan la u dom saparav u.”

²⁹La ne Iesu ga vorang i rin keretna, “Ude u.”

Kuren la ne Pita ga xatu kaxat boro at lese pang la gat pas to mavana at lavatdan kis uto at ne Iesu. ³⁰Ketla se neni ga ven lamanman, neni ga marat la gara dong si silatla nga ukopok at ladan. La neni ga xup keretna, “Leeme Silok, una lox aroo ia!”

³¹Soso mun Iesu ga song asu mi lekngen la ga ranga ka i la ga lok, “Nenu u ruuna lunuunu i xakalik mun. Tila uxo nuunu do nenia a epovo ana lox u xusu unat pas to mavana at ladan ude saparav ia?”

³²La nedu eburu diga los kas at lese pang, la lamanman gara xap matmas nga. ³³La luvuttadi loklok ka anasa ro xeneng at lese pang diga lok, “I ruturun aleng do nenu ne Nitna ne Moroa.” La diga lotu saparav i la diga emi asu min.

Iesu Ga Lox Aroo Limixin Mekmeres To Genesaret

(Mk 6:53-56)

³⁴Diga xan polo lavatdan kis la diga oso ro Genesaret. ³⁵Limixin go diga ven kisip ne Iesu, la diga lox aonon levelinga ri limixin diga ruuna levenanmeres ap mo lengkot axap do ne Iesu mo ga vot. La limixin diga lok ka di uto saparap ne Iesu. ³⁶La diga sing i xusu na ke limixin mekmeres dina long tu at lungusungus at lavanga singsiga ren. La nedi axap diga long tu ren, diga lox avukat ta.

Levenanasa At Lubung Parisi La Lubung Sadiusi

(Mk 7:1-13)

15 ¹Lentaba lubung Parisi mi luvuttadi loklox ase at Lenavolo diga vas kaxat boro Jerusalem la diga vosiga ne Iesu la diga sue i, ²“Tila ba luvuttadi loklok ka anasa ram di rongga xepe leveloklox ase at lavalabat atdik? Dixo sogos avot be levengkikngen di la melemu dina anan.”

³La ne Iesu ga vorang i ridi xeretna, “La tila ba ming tonga xepe levelinga at ne Moroa xusu mi epovo do mina mumu asu xa levenanasa atnimi? ⁴Levelinga at ne Moroa i lok keretna,

‘Mina lok ngangao at luvuttemen nimi mi luvutnen nimi, la do tara i paase kapmek ti ne temen mi nenen, limixin dina sev amer i.’

Pas 20:12, 21:17

⁵⁻⁶Ketla nemi mi lok keretna; mo do tara na ruuna tempanga do ri lox epovo lavakpakes at ne temen kopla nenen, nemi mi tong i rin do neni na mumu asu leveloklok at lavalabat la na raba ne Moroa min la neni na ke loklok ti lok tooro du. At na mun langas nemi ming tonga xepe levenanasa at ne Moroa la mira mumu asu nga leveloklok atnimi. ⁷Nemi lavapen aala. Aisaia ga paase alii nunuan mumu nimi. Ni ga tong asu levelinga at ne Moroa keretna,

⁸‘Na limixin di lok ngangao rak mi levelinga mun atdi, ketla lebelen di i vaxalom tino basinge ia. ⁹Dixo lotu saparav ia mi luruturun, la di lox ase mi levelinga at limixin mun!’

Ais 29:13

Lempanga I Lox Abilinga Lorooro At Laradi

(Mk 7:14-23)

¹⁰Melemu Iesu ga ro xaka limixin saparav i la ga lok tidi, “Mina rongka ka nunuan lempapaase rak la mina xasep teren. ¹¹Lempanga i vubeles keneng at lungusno laradi, anai xopmen na lox abilinga i; ketla levelinga laradi i vaase asu i at lungusno, ana i lox abilinga i.”

¹²Melemu luvuttadi loklok ka anasa diga vosiga i la diga lok, “Uklen pam i do lubung Parisi di suma xapmek ti levelinga ram?”

¹³La ni ga lok tidi, “Larauna axap ne Tamak goxotlo li di, neni ba xat pes di. ¹⁴Mina ke xepe di mi levenanasa atdi. Nedi di lok ngan lengkatli main la di lok do nedi luvuttadi loklok tooro at limixin; do laxatli main im lam lara laxatli main, nedu buru duba subu tup at lemet.”

¹⁵Pita ga lok ti ne Iesu, “Una soxomus be lavasuun at nom lavapaase poovo rinama.”

¹⁶La ne Iesu ga sue di, “Nemi bok luvuttadi loklok ka anasa rak kopmen mina xasep? ¹⁷Mina xasep do lempanga anan laradi i anan i la i beles keneng at lebelen, nom i neni i lox asu box i. ¹⁸Ketla lempapaase laradi i vaase asu i at lungusno ren, nom i, i ravasu boro xeneng at lorooro ren; la na mun levelinga, ni i epovo na lox abilinga i. ¹⁹Na levempanga xapmek i ravasu boro at lorooro at laradi i lok keretna; levendoxoma xapmek, la loklok tip sep amet tadi, loklok ting longka, la leveloklok kakapmek maxamang at lixitkis epot, loklok tip kip pilo, la lavapaase xaxarang mu tara, la loklok ti lox asi tara. ²⁰La nai lempanga i lox abilinga laradi. Ketla do tara na anan la kopmen na gos avot be lukngen, nom kopmen na lox abilinga i.”

Iesu Ga Lox Aroo Loolik At Latkin Kopmen Boro Israel
(Mk 7:24-30)

²¹Iesu ga on basinge mo lemenemen la gat pas uto at lengkot saparap Taia la Sidon. ²²Lara latkin me Kanan mo ga nemen ap mo lenep ga vosiga ne Iesu, la ga xup lolos tin keretna, “Leeme Silok! Livisik li at ne Devit. Una balamu ia la una lok mumu be loolik tarak. Lagas i suxuna i la i lox atpospa rino i.”

²³Ketla Iesu goxo tong tekolonga rin. La luvuttadi loklok ka anasa ren diga vosiga ne Iesu la diga lok tin, “Una riki aonon i! Ia mumu asu dik la irak lox avurupit amisik dik.”

²⁴La ne Iesu ga lok ti mo latkin keretna, “Moroa ga riki ia xusu rinedi mene limixin me Israel diga on soogong.”

²⁵Nom latkin ga rongga i na la ga xis tiktikbu mi luvatgulom teren la ga lok, “Leeme Silok. Una lok tooro ia.”

²⁶La ne Iesu ga lok tin keretna, “Ixok mokso do ana lok ka lempangan anan at laxamdak la ana lu raba lubangman min.”^c

²⁷Ketla nom latkin ga lok, “Leeme Silok. I ruturun, ketla lubangman di anan bok lengkon mumus luxa im subu su boro vana at loxonin anan at luvuttadi atdi.”

²⁸La ne Iesu ga lok tin, “Latkin. Lunuunu ram i silok aleng. Aba lox epovo lisingising taram.” La ap mo mun loxonaleng loolik teren ga lox avukat ta.

Iesu Ga Lox Aroo Buaang Limixin

²⁹La ne Iesu ga vas kaxat mego la gat pas to loxon at lavatdan kis Galili. La ni ga vas urut at lakaana la gat kis go. ³⁰La buaang ned i limixin, diga vosiga i la diga lam ka limixin, lengkot atdi ga molo, la lengkatli main, la lentaba levengkikngen di la lengkangedek atdi ga lok kapmek; la lenbaalung baa la buaang bok ned i luvuttadi mi levenanmeres kerepmo, la diga lok ka di uto saparap ne Iesu la ni ga lox aroo di.

³¹Limixin diga sangu aleng atla diga ven lenbaalung baa diga paase; la luvuttadi mi levengkikngen di mi lengkangedek ga lok kapmek, diga lox avukat; la ned i di goxot pas gano, digat pas ta; la lengkatli main, diga reven; la diga emi asu aleng mi ne Moroa me Israel.

Iesu Ga Raba Luxa Buaang Limixin
(Mk 8:1-10)

³²Iesu ga ro xaka luvuttadi loklok ka anasa ren saparav i la ga lok, “A balamu aleng na limixin, mila ira vantun ta levenaleng ned i dik lox

^c 15:26 Limixin me Judaia diga so asen limixin petpes mi lubangman.

eburu minia, la kopmen ta tempanga anan kusu ridi ri anan. Axo para i do ana riki aonon gamasa nedi mi lantoxo atdi; lavanga dina meroxon mu langas uto at laramenemen atnedi.”

³³La luvuttadi loklok ka anasa diga sue i, “Ata ba lok ka tempanga anan ua at na lenep gamasa kusu naba epovo at na limixin solo?”

³⁴La ne Iesu ga sue di xeretna, “Lavanisa lengkongkide nemi mi ruuna i?”

La diga vorang i, “Lavanuti lengkongkide la lutpen mat lixilik bok.”

³⁵La ne Iesu ga tong i ri limixin kusu dina xis kopok at laxangka. ³⁶La ni ga lok ka lavanuti lengkongkide la lutpen mat la ni ga tong aorong ti ne Moroa, la ga sebeb i, la ga raba luvuttadi loklok ka anasa ren min; la diga raba limixin min. ³⁷La limixin axap diga anan la diga an mais. La melemu luvuttadi loklok ka anasa diga lok ka lavanuti leventat silok la diga suxa aumsu di mi lempanga anan limixin diga an ake ren. ³⁸Luutus atdi na lavatlok ga epovo at lavanuet larabin sangsangaun kobot (4000). Lavakin mi laxamdak la laxaalik lixilik kopmen di goxo nemen at na luutus. ³⁹Melemu Iesu ga riki aonon limixin uto at laramenemen atdi la ga los kas at lesebang la ga sen uto at lenep Magdala.

Diga Sing Ne Iesu Kusu Na Lok Tavanga Sangsangu

(Mk 8:11-13; Lu 12:54-56)

16 ¹Lubung Parisi mi lubung Sadiusi diga vosiga ne Iesu la diga vara i do neni na lok tavanga sangsangu xusu dina lok tong pen i. ²La ne Iesu ga lok tidi xeretna, “Do mi ven laxalibet i memele ukantinao, mi lok, ‘Laaleng naba lox avukat kantamak.’ ³La do maxantamak, mi lok, ‘Larakabu mo naba vot mila laxalibet i memele la lengkontakabu bok mo.’ Mi reven lavatbung menemen la laxalibet; la mi epovo ri tong asu lavasuun at na lempanga, ketla xopmen mina xasep at leveloklok katling ne Moroa im taba nimi min at na levenaleng. ⁴Limixin kapmek mo di on basinge vam ne Moroa, di vara tavanga sangsangu, ketla nia noxo lox ase di mi tara, ketla mina doma mumu loklok katling at ne Jona, no ga nemen at lavantun aleng kangking la lavantun aleng kanimin to xeneng at lebelen leemat.” La ne Iesu ga vas kaxat basinge di.

Levenanasa At Lubung Parisi Mi Lubung Sadiusi

(Mk 8:14-21)

⁵Iesu mi luvuttadi loklok ka anasa ren, diga los kas at lesebang la diga sen kaxat uto at lenep meo ap mo lavatdan kis. La luvuttadi loklok ka anasa diga domampe i xusu dina lok ka tengkongkide eburu midi. ⁶La ne Iesu ga lok tidi, “Mina lok tatao avukat nimi mumu laiis at lubung Parisi mi lubung Sadiusi.”^d

^d 16:6 Laiis i ru katling leveloklox ase at lubung Parisi mi lubung Sadiusi.

⁷La luvuttadi loklok ka anasa ren diga epaase kantubu atdi xeretna, “I vaase mo levelinga mila nedik kopmen ta lok ka tengkongkide.”

⁸Iesu ga xasep pam at levelinga atdi, kuren la ni ga sue di, “Tila mi emaangun pilo min kantubu atnimi, mumu lengkongkide xopmen mina lok ka i? Lunuunu atnimi i lixilik. ⁹Kovisi mina xasep. Kereva, mira domampe vam lavalimo lengkongkide aga sebex i ri lavalimo larabin sangsangaun kobot (5000) limixin? La lavanisa leventat nemi miga suxa i? ¹⁰Kereva, mira domampe vam lavanuet larabin sangsangaun kobot (4000) limixin aga raba di mi lavanuti lengkongkide? La lavanisa leventat miga suxa i? ¹¹Tila la mixo xasep do nenia xopmen ana paase rinimi mumu lengkongkide? Mina lok tatao avukat nimi mumu laiis at lubang Parisi mi lubang Sadiusi.” ¹²Melemu levendoxoma atdi ga xasep ba do, Iesu xopmen goxo paase ridi mumu laiis dik lox eburu i mi lengkongkide; ketla mumu levenanasa^e at lubang Parisi la lubang Sadiusi.

Pita Ga Tong Asu Lorooro At Ne Iesu

(Mk 8:27-30; Lu 9:18-21)

¹³Ap mo laaleng ne Iesu ga vot to at lenep kangka saparap lemenemen, Sisaria Pilipai, la ni ga sue luvuttadi loklok ka anasa ren, “Limixin di lok do nenia, Laradi Mevana, nege?”

¹⁴La diga vorang i rin keretna, “Lentaba di lok do nenu ne Jon laradi sep susu. Lentaba di tong i do nenu ne Elaia, la lentaba di tong i do nenu ne Jeremia kopla lara leeme vapaase alii me gano.” ¹⁵La ne Iesu ga sue di, “Kereva ba nimi? Nemi mi lok do nenia nege?” ¹⁶Simon Pita ga vorang i xeretna, “Nenu Lanarong, Nitna ne Moroa, Loro Avolo.”

¹⁷Iesu ga lok tin, “Luvukat tu, ne Simon lamdak at ne Jona, mila kopmen taradi ga tong asu i na ru, ketla ne Tamak no vana at laxalibet. ¹⁸Nia a tong i ru do, nenu ne Pita la nenu Luat Kis la nia aba vaxaru ka lotu rak to mavana ram, la limixin lolos at ne Satan diba lok tong i kusu dina sele utut kepe i, ketla di noxo epovo. ¹⁹Nia aba raba u mi lengki ri suang lumusaragu at Linintoo no vana at laxalibet. La mo leveloklok nenu u siam min kopla u sep pepe i nade xopok at na lavatbung menemen, ne Moroa naba siam min to vana at laxalibet.” ²⁰La neni ga vaase lolos ti luvuttadi loklok ka anasa ren do di noxo tong asu i na ri teta.

Iesu Ga Paase Mumu Lanmet Teren

(Mk 8:31-9:1; Lu 9:22-27)

²¹Ga se ap mo laaleng ne Iesu ga ru ka i xusu na tong i ri luvuttadi loklok ka anasa ren do neni na onon uto Jerusalem; la mo go loxongkulao

^e 16:12 Di goxo xasep do digak pakes kusu dina ru asepsu at levenanasa at lubang Parisi.

silok, lavamaasa silok la luvuttadi loklox ase at Lenavolo diba lox asongot aleng i la diba sev amer i la at laaleng sepsev avantun neni naba roo xat amlong.

²²Pita ga lam ka ne Iesu basinge luvuttadi loklok ka anasa la ga vaase sox i xeretna, “Leeme Silok. Nemen uta paase xeretnom. Na lempanga xapmek kopmen noxo vot saparav u.”

²³Iesu ga rem gili ri ne Pita la ga lok tin, “Uto u basinge ia. Nenu u lok ngan ne Satan. U vara i do una lok pe ia. U xopara na mu asu lavavara at ne Moroa, ketla u vara mun levendoxoma at limixin.”

²⁴La ne Iesu ga lok ti luvuttadi loklok ka anasa ren, “Mo do tara i vara i do na emu eburu minia, neni na domampe lorooro axap teren, la na gagas li i xusu nap kip losongsongot at levenaleng axap, la neni na mumu asu ba ia. ²⁵Do nege i vara i do na ranga alis lorooro ren, neni naba sang apkav i; ket do nege i soxope lorooro ren ti mumu asu ia, neni naba lok kaka lorooro avolo. ²⁶I lok kapmek do taradi na ruuna ka lempanga axap at na lavatbung menemen, ketla neni i subu basinge lorooro at ne Moroa. Laradi ixo epovo na un ka lorooro avolo. ²⁷Nenia, Laradi Mevana, mo anaba vot mi lisisixam silok at ne Tamak la eburu mi lubungangelo, la ap mo laaleng limixin axap dinaba lok kaka luunun i epovo mi leveloklok diga lox i. ²⁸La a tong tuturun i rinimi do lentaba atdi di tu de, di noxo met avot ti lovotpot tarak at laaleng nenia, Laradi Mevana, anaba vot ngan Loorong Silok.”

Moróa Ga Lox Arepukus Ne Iesu

(Mk 9:2-13; Lu 9:28-36)

17 ¹Melemu at lavanna levenaleng Iesu ga sat kaka ne Pita, Jems du lueton mi ne Jon, la diga urut uto vana xasep at lakaana. Nedi lavanuet kusuk mun digak lok. ²Ap mo loxot Moroa ga lox arepukus ne Iesu to melamgo at lavantun luvuttadi loklok ka anasa ren. Lemeran ga soosoo ngan laxangking la lempanga singsiga ren gan bun kerekngan lovottas i sovosok. ³La soso mun ne Moses la ne Elaisa duga rupot to melamgo atdi la duga epaase eburu mi ne Iesu.

⁴La ne Pita ga lok ti ne Iesu, “Leeme Silok. I lox avukat tinotno do mak lok de. Do u vara i, nia anaba xip tavantun taraugu kukuxut, tara ru, tara ri ne Moses la tara ri ne Elaisa.”

⁵Pita move ga paase la lusugao gamgames ga ravasi la ga vaa di; la diga ronga laxaka at lara boro at lusugao ga lok, “Ana ne Nuruk, mo a balamu i la a lok momo aleng min. Mina mumu asu levelinga ren.”

⁶Ga se luvuttadi loklok ka anasa diga ronga i na, diga subu tiding ti laxangka, la diga marat aleng. ⁷Ketla ne Iesu ga vosiga di la ga long tu atdi la ga lok tidi, “Mina xatu upana. Nemen mita marat.” ⁸La diga milik aurut upana la di goxo ven tara, Iesu xusuk mun mo gak lok.

⁹Diga si at lakaana la ne Iesu ga tong lolos i ridi do, “Nemen mita tong i na ri teta, se nenia, Laradi Mevana, anaba roo xat amlong basinge lanmet.”

¹⁰La luvuttadi loklok ka anasa ren diga sue i, “Ua lavasuun teren la luvuttadi loklox ase at Lenavolo di tong i do ne Elaisa ba rupot avot ti Lanarong?”

¹¹La ne Iesu ga vorang i ridi, “I ruturun tino. Elaisa ba rupot avot la ba lox amokso lempanga axap. ¹²Ketla a tong i rinimi do ne Elaisa ga vot pam la limixin di goxo ven kibis i, la diga lok lempanga xapmek tin kerekngan diga vara i. La kuren mun diba lox asongor ia, Laradi Mevana.” ¹³La luvuttadi loklok ka anasa diga xasep ba do ne Iesu ga paase mumu ne Jon, laradi sep susu.

Iesu Ga Riki Asu Lagas Basinge Lara Lamdak

(Mk 9:14-29; Lu 9:37-43a)

¹⁴Iesu mi luvuttadi loklok ka anasa ren digat pas la diga ekip tangarang mi limixin buaang, la lara laradi ga vot pasa ne Iesu la ga xis tiktikbu mi luvatgulom teren. ¹⁵La ni ga lok, “Leeme Silok. Una balamu lamdak tarak. Ing kanovot amisik mi lobomet la i ekip tangarang aleng mi laxasongsongot. La im subu tup amisik at laxao la at ladan. ¹⁶Nia a lam ka i saparap luvuttadi loklok ka anasa ram kusu dina lox aroo i, ketla dixo epovo.”

¹⁷La ne Iesu ga lok, “Limixin at na levenaleng kopmen tunuunu atnimi la levendoxoma atnimi i onon soogong. Lavanisa aleng tinotno nenia aba xip tutu mi levenmumuat atnimi? Nemi mi lox amolo ia. Una lam ka lamdak ude.” ¹⁸La ne Iesu ga vaase lolos ti mo lagas, la lagas ga sixisu basinge nom lamdak. La ap mo mun loxonaleng lamdak ga lox avukat ta.

¹⁹Melemu luvuttadi loklok ka anasa xusuk mun diga vosiga ne Iesu la diga sue i, “Ua lavasuun teren la nema ma xo epovo xusu mana riki kepe nom lagas?”

²⁰La ne Iesu ga vorang i ridi xeretna, “Lunuunu atnimi i lixilik aleng. Do mi ruuna lunuunu i xakalik kerekngan liit mastet, nemi miba epovo na lok ti na lakaana, ‘Una vas kaxat mede la uto at toxot petpes,’ la ni ba rongga res. La miba epovo na lok lempanga axap bok. ²¹[Lisingising kusuk mene impana ri riki xepe lagas kapmek keretnom.]”

Iesu Ga Paase Manga Mumu Lanmet Teren

(Mk 9:30-32; Lk 9:43b-45)

²²Gase ne Iesu eburu mi luvuttadi loklok ka anasa diga vot eburu ro Galili, Iesu ga lok tidi, “I auret kusu limixin diba ranga alis ia, Laradi Mevana la diba song araba ia ri limixin esep. ²³La diba sev amer ia; ketla melemu nenia anaba roo xat amlong bok at laaleng sepsev avantun.” La luvuttadi loklok ka anasa diga bulu aleng.

Lexekepe Pilas Ti Loogu Laplavang

²⁴Iesu eburu mi luvuttadi loklok ka anasa ren diga rupot to Kaprnaum, la luvuttadi loklok ka pilas diga vosiga ne Pita la diga sue i, “Kereva, laradi loklox ase ram i kepe pilas bok ti loogu laplavang?”

²⁵La ne Pita ga vorang i, “Laaba.”

Pita ga vot to at loogu ne Iesu gak lok teren, la ne Iesu ga vaase avot tin, la ga lok, “Simon. Kereva lodoxoma ram? Lavaorong silok at na lavatbung menemen di lok ka pilas meva? At limixin at lenep silok atdi kopla at limixin boro vetpes?”

²⁶Pita ga lok, “At limixin boro vetpes.”

La ne Iesu ga lok, “I ven ngan ta do limixin mede kopmen di noxo kepe pilas. Kuren la ixo epovo do neda ta kepe pilas. ²⁷Ketla ta noxo lox amusak nedi na limixin. Kuren la unat pas uto at lavatdan kis la una xanom. La leemat avot una rep ka i, uba long lenget ka legesa derakma silok to xeneng at lungusno la mo legesa derakma silok naba epovo rida kusu ri kepe pilas ti loogu laplavang.”

Nege I Silok At Linintoo At Ne Moroa

(Mk 9:33-37; Lu 9:46-48)

18 ¹Ap mo mene loxonaleng luvuttadi loklok ka anasa at ne Iesu diga vot pasa i la diga sue i, “Nege i silok at Linintoo boro vana at laxalibet?”

²La ne Iesu ga ro ka lara lamdak, la ga vaxaru i ro melamgo atdi, ³la ga lok, “A tong tuturun i rinimi, tara do ixo leeng basinge laxakapmek teren la ixo lok ka luruptuvuk at laxamdak kakalik, neni xopmen na epovo do na vubeles at Linintoo no vana at laxalibet. ⁴Laradi do i lox asi i se luruptuvuk teren i lok ngan luruptuvuk at lamdak livilik, mo laradi naba ruuna ka laasen i silok aleng at Linintoo no vana at laxalibet. ⁵La do nege i seega rangarang tamdak keretna at laasen tarak, i lok ngan ta do neni i seega rangarang ia.”

Leveloklok Tong Pen Mo Naba Vot

(Mk 9:42-48; Lu 17:1-2)

⁶La ne Iesu ga lok bok, “Naba lok kapmek aleng ti tara do na lox asubu tara atdi na laxamdak kakalik di nuunu rak. Ba lox avukat tin do dina xoxo li tangsangan tuat to at laxaka ren la dina dong asi i min uto xopok at lisimaramain. ⁷I lok kapmek aleng ti limixin do lentaba lempanga mo i lox asubu lunuunu atdi basinge ia. Lempanga xerepmo naba vot, ketla naba lok kapmek ti lara i lok kaxar i! ⁸Mo do lakngam mi laxangkedek taram na lox asubu lunuunu ram, una ra korop pes i la una lu xepe min. I lox avukat do una beles at lorooro avolo mi tenep mene at luxangkedek mi lukngam; lavanga ne

Moroa na lu arup minu at laxao at lemenemen songsongot i nemen amisik. ⁹La do laxatli ram na lox u la lunuunu ram na subu, una lik gogo su min la una lu xepe min. I lox avukat do una beles at Linintoo mi tegesa xatli mun; lavanga ne Moroa na lu arup minu ro at laxao mo do u ruuna legepu xatli.”

Lisipsip Ga Soogong

(Lu 15:3-7)

¹⁰La ne Iesu ga lok bok tidi, “Nemen mita sok tixirixes kepe tara at na laxamdak kakalik mila lubang angelo atdi dit pot pasa amisik ne Tamak to vana at laxalibet. Nia a tong tuturun i. ¹¹[La nenia, Laradi Mevana, aga vot kusu ana puse rinedi diga soogong la ana lox arooro di.]”

¹²La ne Iesu ga tong lavapaase poovo ridi, “Dola tara atnimi i ruuna legesa sangaun kobot (100) laxasipsip la legesara atdi na soogong, neni ba lok lavanga salai? Neni ba on basinge lavasik sangaun mi lavasik laxasipsip to at lenep avukat, la ni nabat pas kusu na ven ti mo legesara no ga on soogong, i se ni naba long lenget ka i. ¹³Nia a tong tuturun i do, mo neni na vuse ka i, neni ba lok momo aleng; lomomo ren ba volo lomomo ri mo lavasik sangaun mi lavasik di goxo soogong. ¹⁴La kuren mun ne Temen nimi no vana at laxalibet i xopara i do legesara atdi na laxamdak lixilik na soogong basinge i.”

Uba Lok Tooro Netam Mo Do I Subu At Laxakapmek

¹⁵La ne Iesu ga lok bok tidi, “Mo do netam i lok tavanga i lok kapmek tu, una vosiga i la una vaxase i mi mo losoogong teren, ketla mo lavanga nak lok kantubu xusuk mene atnumu. Mo do ni i ronga res at levelinga ram, ura lok kaka amlong pam i ri langas in manton. ¹⁶Ket do ixo ronga res at levelinga ram, una lok ka bok tegesara xopla tegepu radi eburu minu xusu miba epen mi levelinga atnimi lavantun; kerekngan lovoang kaala i tong i do, ‘Levenekarakat bak mokso mo do tegepura xopla tavantun dina epen mi levelinga.’ ¹⁷Ket do ixo ronga di, una tong i ri limixin axap di nuunu. La do ixo ronga res at limixin nuunu, mina sok tixirixes kepe i ngan lavamolon kopla laradi loklok ka pilas.”

¹⁸La ne Iesu ga lok bok tidi, “Nia tong i rinimi do; mo levelinga u siam min kopla u sep pepe i nade xopok at na lavatbung menemen, Moroa naba siam min to vana at laxalibet.

¹⁹Ana tong box i rinimi do tegepura du mulus do duna sing ti tavanga du vara rin, ne Tamak no vana at laxalibet naba raba du min, ²⁰mila do legepura xopla lavantun di vot buru xusu dina sing ia xeneng at laasen tarak, nenia mo ak lox eburu midi.”

Mina Doxoma Xepe Laxakapmek At Luvutneton Nimi

²¹Melemu Pita ga vot posiga ne Iesu la ga sue i, “Leeme Silok. Nenia aba domampe xepe laxakapmek at netak i lox i ria naba vanisa? Ba vanuti?”

²²La ne Iesu ga vorang i xeretna, “Nia a tong i ru. Kopmen do una doxoma xepe laxakapmek teren na vanuti mene, ketla lavanuti sangaun mi lavanuti.

²³Ana vaase u mi na, mila Linintoo no vana at laxalibet i lok keretna. Lara loorong silok mo ga doxoma i do nakling lugugu pilas ap mo luvuttadi gugu ren. ²⁴Se neni ga vaxaru kaxat ka lugugu ren, lara ap mo luvuttadi gugu ren diga lox abeles i, ga lok ka legesa sangaun larabin sangaun kobot talen. ²⁵Ketla neni goxo epovo na vorang mo lempilas; kuren la loorong silok ga tong lolos i ri mo laradi gugu kusu neni mo diba sesep min eburu mi latkin teren la laxamdak kakalik atdu, la lempanga axap neni ga ruuna i kusu ri vorang mo lempilas.

²⁶Laradi gugu ga xis tiktikbu mi luvatgulom teren la ga lok ngangao ro melango at loorong silok la ga sing aleng i, ‘Una balamu ia, la aba sepo axap ba lempilas taram melemu.’ ²⁷Loorong silok ga balamu i, kuren la neni ga doma xape axap mo langangan lempilas na laradi gugu ga lok ka i la loorong silok ga soxomus asu i.

²⁸Melemu mo laradi gugu ga vas su la ga ekip tangarang mi lara laradi gugu bok mo neni ga raba vam i mi legesa sangaun kobot denarias. Neni ga ranga alis i la ga long kukung kaka i la ga lok, ‘Una sepo lempilas tarak.’ ²⁹La mo laradi ga xis tiktikbu mi luvatgulom teren la ga sing i xeretna, ‘Una balamu ia la melemu aba vorang i!’

³⁰Ketla neni goxopara, la ga lok ka mo laradi la ga lox abeles i ro at loxokoxo kusu na nemen go se at laaleng neni naba vorang amlong mo lempilas teren. ³¹Se lentaba luvuttadi gugu diga ven na lavanga, diga bulu aleng. La digat pas uto at loorong silok la diga tong asu mo lempanga axap tin.

³²La neni ga ro xaka mo laradi gugu ukeneng la ga lok tin, ‘Nenu laradi xapmek; aga doma xape axap lempilas nenu uga lok ka i rak, mila uga sing ia. ³³Kereva, uxo epovo na balamu mo laradi xerekngan nia aga balamu u?’ ³⁴Loorong silok ga musak, la ga lox abeles mo laradi gugu uto at loxokoxo, kusu na nemen at losongsongot naba se at laaleng neni naba vorang axap mo lempilas.”

³⁵La ne Iesu ga lok, “Ne Tamak no vana at laxalibet naba lok mun nimi xuren do nemi mi noxo domampe laxakapmek tara i lox i rinimi.”

Iesu Ga Paase Mumu Loklok Ti Tara Korop Epot

(Mk 10:1-12)

19 ¹Iesu ga vaase axap mo levelinga, la ni ga vas kaxat mego Galili la gat pas uto at lenep Judaia at lenep dan meso at ladan sen Joridan.

²La buaang nedi limixin diga mumu asu i la neni ga lok aroo nedi go.

³Lentaba lubang Parisi diga vot pasa ne Iesu la diga lok tong i mi lara lususue xeretna, “Kereva, Lenavolo atdik i mulus bok kusu tara na soxope latkin teren mumu mene tepanga gamasa mun?”

⁴La ne Iesu ga vorang di xeretna, “Nemi mina xasep do Lovoang Kaala i tong i do ganoxa at lurutu kaxat Moroa ga rudum li lavatlok la lavakin.

⁵La ni mun lavasuun at nai la ne Moroa ga lok do laradi remes naba on basinge ne temen mi nenen la nak lox eburu mi latkin teren la nedu dunak lox eburu ngan mun legesara. ⁶La nedu du noxo lok ngan bok ba legepura, ketla legesara. Kuren la kopmen tara noxo ra korop leepot at leremes mi latkin teren, mila ne Moroa axa ga ven etang du.”

⁷La lubung Parisi diga sue i, “Tila ba ne Moses ga raba nama mi levelinga, do tara na malagan tevelinga axasep ti latkin teren do neni mo i xopara na epot ta ren la na riki xepe i?”

⁸La ne Iesu ga lok, “Moses ga raba nemi mi nom mila lebelen at lavalabat atnimi ga vat ken, ketla at lurutu kaxat kopmen goxo lok kuren. ⁹A tong tuturun i rinimi; do laradi i soxope latkin teren la kopmen goxo lok loklok ti longka, mo laradi ira longka vam mo do i epot at lara latkin petpes manga.”

¹⁰La luvuttadi loklok ka anasa ren diga lok tin, “Mo do i lok kuren kantubu at leremes mi latkin, i lox avukat do keke leepot.”

¹¹La ne Iesu ga lok, “Na laanasa rik lok naa kopmen na vung pavaa limixin axap, ketla tinedi xusuk mun ne Moroa i raba nedi min. ¹²Buaang levempasuun mo ik lok, tila la lavatlok kopmen dina epot; lentaba mumu i do diga visik axa di xuren; lentaba mumu nga i do limixin diga lok di xuren kusu di noxo epot; la lentaba dixo epot mila, di raba lorooro atdi kusu dina gugu ngan nedi lavaanat at ne Moroa. Nege do i epovo na siam ka na laanasa ti ke leepot, i vukat do neni na mumu asu i.”

Iesu Ga Lox Anarong Laxamdak Mi Laxaalik Kakalik

(Mk 10:13-16; Lu 18:15-17)

¹³Lentaba limixin diga lok kaka laxamdak mi laxaalik kakalik atdi uto at ne Iesu kusu neni na lok li lukngen mavana atdi la na sing tidi; ketla luvuttadi loklok ka anasa ren diga ven di la diga sep pepe di.

¹⁴La ne Iesu ga lok, “Mina ke laxamdak mi laxaalik kakalik dina vot pasa ia; la nemen mita sep pepe di, mila Linintoo no vana at laxalibet i epovo ridi na.” ¹⁵Iesu ga lok li vam lukngen mavana atdi, la ni ga vas kaxat ta.

Laradi Gapnovos

(Mk 10:17-31; Lu 18:18-30)

¹⁶Lara laradi ga vosiga ne Iesu la ga sue i, “Laradi loklox ase. Anaba lok lavanga avukat salai kusu anaba lok ka lorooro avolo?”

¹⁷La ne Iesu ga vorang i xeretna, “Ua lavasuun teren la u sue ia mi lavanga salai i lox avukat? Legesara mun i lok avukat la neni ne Moroa. Do u vara na vubeles ti lorooro, una ronga res at lasangaun lenavolo.”

¹⁸La nom laradi ga sue, “Ua lentaba?”

La ne Iesu ga lok,

‘Nemen uta sev amet tara, nemen utang longka tixin, nemen uta xip pilo, nemen uta xarang taba mumu tara mi levelinga xaxarang, ¹⁹una lok ngangao at ne tamam mi nenam, la una balamu nedi di nemen saparav u xerekngan u balamu xa u.” *Pas 20:12-16*

²⁰La nom laradi ga lok, “Nia aga mumu asu na levelinga axap. Lavanga salai bok move nia ak pakes tin?”

²¹Iesu ga vorang i rin keretna, “Do u vara loklok taram nak mokso aleng, una sesep mi lempanga axap taram, la una raba lempilas at nom lempanga ri limixin banbalo la unaba ruuna ka lapnovos silok to vana at laxalibet. La una mumu asu ba ia.”

²²Nom laradi ga ronga i na, la ni ga vas kaxat mi lainbulu silok mila neni gapnovos aleng. La ni ga vas kaxat ta.

²³La ne Iesu ga lok ti luvuttadi loklok ka anasa ren, “A tong tuturun i rinimi. I lolos aleng do laradi nopnovos na vubeles at Linintoo no vana at laxalibet. ²⁴Ana tong box i xeretna. I lolos aleng do lavatkamel na vubeles at lamamara at linil, la kerepmo i lolos aleng bok ti laradi nopnovos kusu ri beles at Linintoo at ne Moroa.”

²⁵Luvuttadi loklok ka anasa diga ronga i na, la diga sanganu aleng la diga sue ne Iesu, “Nege ba naba lok kaka lorooro avolo?”

²⁶La ne Iesu ga ven tooro di la ga lok, “Kopmen na epovo do taradi na lox i na, ketla i epovo do ne Moroa na lok lempanga axap.”

²⁷La ne Pita ga lok tin, “Kereva ba nama, maga on basinge vam lempanga axap atnama kusu mana mumu asu u. Lempanga salai mo ne Moroa ba raba nama min?”

²⁸La ne Iesu ga vorang i ridi, “Nia a tong tuturun i rinimi. At laaleng ne Moroa na lox amaxat lempanga axap, ap mo laaleng nenia, Laradi Mevana, anabat kis at loxonin orong tarak mi lisisixam silok tarak, la nemi mi mumu asu ia, mibat kis bok at lasangaun mi legepura lengkot kitkis orong la mibang tonga linga at lasangaun mi legepura levenbibinat at limixin me Israel. ²⁹La nedi axap diga on basinge laraugu atdi, luvutneton di, luvurinen di, luvuttemen di, luvutnen di, laxamdak mi laxaalik kakalik atdi, la leventaamang atdi kusu dina lok lugugu rak, nedi dinaba ruuna ka laxampanga solo la dinaba rooro amisik at lorooro melemu. ³⁰Ketla buaang limixin di ruuna laasen silok at na lorooro, di noxo silok at lorooro melemu; la nedi kopmen dina silok at na lorooro, dinaba silok at lorooro melemu.”

Luunun Ti Luvuttadi Diga Gugu

20 ¹La ne Iesu ga lok bok ti luvuttadi loklok ka anasa ren, “Linintoo no vana at laxalibet i lok keretna. Lara laradi mo ga suubu suu maxantamak, kusu na lok ka tuvuttadi kusu dina gugu ro at laraamang

vaen teren. ²Mo laradi ga mulus kusu na un nedi mi legesa denarias at leges aleng, la neni ga riki aonon ta di uto at laraamang vaen.

³At lavasik konaleng neni gat pas manga uto at loxot etang, la ga ven manga lentaba luvuttadi mo diga tu onon nava mun go. ⁴La neni ga lok tidi, ‘Nemi bok minat pas la mina gugu ro at laraamang vaen tarak, la nia aba un nimi mi luunun i epovo at lugugu.’ ⁵La diga vas kaxat.

At lasangaun mi legepu xonaleng la at lavantun konaleng neni ga lok box i xuren. ⁶Ga auret kusu na valimo konaleng la ni gat pas manga uto at loxot etang la neni ga ven manga lentaba luvuttadi mo diga tu go, la ni ga sue di, ‘Kereva, mia tu gamasa mun nade at na laaleng axap la kopmen mina lok tepanga?’

⁷La diga lok tin, ‘Kopmen tara na lok kaka nama ri gugu.’

La ni ga lok, ‘Minat pas la mina gugu bok to at laraamang vaen tarak.’

⁸Ukantinao at lavanna konaleng temen laraamang vaen ga lok ti laradi loklok tatao at luvuttadi gugu, ‘Una xup kaka luvuttadi gugu la una un nedi mi luunun atnedi; una ru ka i atnedi nia a lok ka nedi ri lugugu na ukantinao at lavalimo konaleng la naba xap atnedi, nia a xup ka avot di maxantamak suubu.’

⁹Luvuttadi diga gugu kaxat at lavalimo konaleng diga lok ka legesa denarias ti legetgesa radi. ¹⁰La nedi mo laradi gomgo ga xup kaka avot nedi, diga vot la diga nua i do dinaba xip ka mavana lixilik ap mo luunun, ketla nedi getgesara diga lok ka bok legesa denarias. ¹¹Diga lok ka mo lempilas la diga ru ka i xusu dina paase mukmusak ti ne temen mo laraamang. ¹²Diga lok, ‘Na luvuttadi nenu ua xup kaka amupit di, la di gugu at loxonaleng lixilik mun; la nema ma gugu at na laaleng axap maxopok at na liplivi at laxangking, ketla luunun atdi i lok ngan bok atnama.’

¹³Ketla temen laraamang ga lok ti legesara atdi, ‘Lentangas tarak, axo bala vukpux u. Nenu xa u siam do aba un u mi legesa denarias at leges aleng. ¹⁴Una lok ka lempilas taram la una onon uto xolonu. A vara i do ana un na luvuttadi di mupit mi lempilas buaang kerekngan mun a un u min. ¹⁵Ik mokso ria do ana lok lavanga salai mi lempilas tarak. La nenu u paase mumu parang ia mila nenia laradi ramtaba.”

¹⁶La ne Iesu ga lok, “La kerepmo bok nedi di mumupit at na lorooro, dibam gomgo at lorooro melemu la nedi dim gomgo, diba mumupit.”

Iesu Ga Tong Asu Lanmet Teren
(*Mk 10:32-34; Lu 18:31-34*)

¹⁷At lavatpas at ne Iesu uto Jerusalem, ni ga lam ka lasangaun mi legepura luvuttadi loklok ka anasa ren to basinge limixin la ga lok tidi, ¹⁸“Nedik taba onon uto Jerusalem la lara laradi naba song araba ia, Laradi Mevana, ri lavamaasa silok eburu mi luvuttadi loklox ase at

Lenavolo. Nedi diba lok li ia at lavapaase la diba lok li lumumuat tarak do nenia aba met. ¹⁹La diba song araba ia ri limixin esep boro Rom kusu dina lok sese kapmex ia la dibak pixis ia la diba vaxarem ia at laxaba. Melemu at laaleng sepev avantun nenia anaba roo xat amlong.”

Nenen Ne Jon Mi Ne Jems Ga Lok Lising Ti Ne Iesu

(Mk 10:35-45)

²⁰Melemu latkin at ne Sebedi ga vot parap ne Iesu mi lumdak teren; la ni ga xis tiktikbu mi luvatgulom teren to melamgo at ne Iesu, la ga vara sing i mi tara tavanga.

²¹La ne Iesu ga sue i, “U vara lavanga salai?”

La ni ga lok, “Una siam do na lumdak tarak dubat kis saparav u at Linintoo ram, lara ro at latno la lara at liviang taram.”

²²Ketla ne Iesu ga lok, “Mixoklen lai nemi mi sing tin.”

La ni ga lok ti mo luradi loklok ka anasa ren, “Kereva, mu epovo do muna suma losongsongot silok eburu minia mo a gagas kusu aba xip tutu min?”

La duga vorang i rin keretna, “Ma epovo.”

²³La ne Iesu ga lok, “I ruturun do nemu muba suma levesongsongot silok; ketla kopmen lugugu rak do nia aba tong i do nege bat kis to at lakngak tino la at lakngak kia. Mo luxot ik lok mun tinedi ne Tamak gara soxolik ka vam di.”

²⁴Se lasangaun luvuttadi loklok ka anasa diga ronga i na, diga edak du.

²⁵La ne Iesu ga ro bubua ka di la ga lok, “Miklen i do luvuttadi amgomgo at limixin kopmen di me Judaia, di ruuna lololos mavana at limixin atdi.

²⁶Ketla nemen gat na loklok nak lok kantubu atnimi. Mo do tara atnimi i vara i do na silok, neni na lok ngan lasaxaruki atnemi axap. ²⁷La do tara atnimi i vara i do nam gomgo, neni na lok ngan lasaxaruki gamasa atnimi. ²⁸Nenia Laradi Mevana la loklok tarak ik lok bok kuren. Nia xopmen a goxo vot kusu limixin dina ba lok ngan lavasaxaruki rak. Ketla nia aga vot kusu ana lok ngan lasaxaruki ridi, la kusu ana raba lorooro rak ngan laxaavuk tidi buaang limixin.”

Iesu Ga Lox Aroo Luradi Lengkatli Atdu Ga Main

(Mk 10:46-52; Lu 18:35-43)

²⁹Iesu eburu mi luvuttadi loklok ka anasa ren, diga vas kaxat basinge lemenemen Jeriko, la buaang limixin diga emu eburu midi. ³⁰La legepu radi, lengkatli atdu ga main, mo dugat kis at lisigege ngas. Se duga ronga i do ne Iesu ga vas polo du, duga xup keretna, “Leeme Silok. Livisik li at ne Devit. Una balamu nama’.”

³¹La mo limixin diga tong i ridu do duna lok pilo, ketla dugap kup aleng, “Leeme Silok. Livisik li at ne Devit. Una balamu nama’.”

³²La ne Iesu ga ru la ga ro xaka du la ga sue du, “Lavanga salai mu vara i do ana lox i rinumu?”

³³Duga vorang i xeretna, “Leeme Silok. Ma vara i do lengkatli atnama’ na xasep.”

³⁴Iesu ga balamu du la ga long tu at lengkatli atdu. La soso mun lengkatli atdu ga xasep la duga mumu asu ne Iesu.

Iesu Ga Beles To Jerusalem Ngan Loorong Silok

(Mk 11:1-11; Lu 19:28-40; Jo 12:12-19)

21 ¹Iesu mi mo limixin buaang diga vas auret lemenemen silok Jerusalem, la diga rupot to at lemenemen Betpage gak lok at Lakaana Olip. La ne Iesu ga riki amgo legepu radi loklok ka anasa ren. ²Avot be ni ga lok tidu xeretna, “Munat pas uto at nom lemenemen ik lok to melamgo atnumu; la soso mun munaba long lenget ka lodongki eburu mi lodongki maxat teren, mo diga xoxo li du go. Muna soxomus ka du la muna lok ka du ude. ³Mo do tara na sue numu do, “Tila nemu mu soxomus ka i nom ludongki,’ muba lok tin do Leeme Silok i vara du la soso mun neni ba raba numu midu.”

⁴Anai ga ravasu xusu na lox asorun levelinga at ne Moroa lara leeme vapaase alii ga tong asu i,

⁵“Una tong i ri limixin to Jerusalem do, ‘Pen ba i. Loorong Silok atnimi it pas saparap nimi, neni laradi loklok mulus mene la it kis at lodongki, ni lodongki maxat.” *Sak 9:9*

⁶La mo luradi loklok ka anasa duga mumu asu levelinga at ne Iesu. ⁷Dugat pas la duga lok ka nom lodongki eburu mi lodongki maxat teren; duga lok li levempanga singsiga atdu teren la ne Iesu ga xis teren. ⁸La buaang limixin diga sa li levempanga singsiga atdi ro at langas. La lentaba vetpes diga ra ka lengkakan bisi la diga lok li mu langas min. ⁹La nedi buaang limixin digat pas to melamgo la nedi axap digat pas melemu digap kup keretna,

“Ata emi asu mi livisik li at ne Devit. Luvukat ti na laradi it pas mi laasen at Leeme Silok. Ata emi asu aleng min.” *Sam 118:26*

¹⁰Se ne Iesu ga beles at lemenemen silok Jerusalem, limixin axap diga sangu la diga esue xeretna, “Nege mo?”

¹¹La mo buaang limixin diga emu mi ne Iesu diga vorang i ridi xeretna, “Na ne Iesu, leeme vapaase alii boro Galili at lemenemen Nasaret.”

Iesu Ga Beles To Xeneng At Loogu Laplavang

(Mk 11:15-19; Lu 19:45-48; Jo 2:13-22)

¹²La ne Iesu ga beles ukeneng at loogu laplavang la ga xala su mi limixin diga unun panga la limixin diga sesep mi lempanga atdi. La ni ga ba gili levenora lili atnedi digak lox ekun lempilas la ga ba gili

levengkonin kitkis atnedi diga sesep mi levenamno. ¹³La ni ga lok tidi, “Levelinga at ne Moroa ik lok keneng at Lovoang Kaala i lok keretna, ‘Loogu rak diba so asen i mi loogu singising.’” *Ais 56:7*
Ketla nemi mira lok pam i, i ngan loogu loklox alipe at luvuttadi dip sep paxat ka panga.”

¹⁴Limixin mi lengkatli atdi ga main digat posiga i la nedi bok lengkangedek atdi ga lok kapmek digat posiga i la ni ga lox aroo di. ¹⁵Ket lavamaasa silok la luvuttadi loklox ase at Lenavolo diga ven mo lagale lempanga sangsangu ren, la diga rongga levelinga at laxamdak mi laxaalik kakalik digap kup keretna, “Ata emi asu mi livipisik li at ne Devit.” La nedi diga musak. ¹⁶La diga lok tin, “Kopmen nak mokso na levelinga at na laxamdak mi laxaalik.”

La ne Iesu ga lok tidi, “Mina domangke at na levelinga ik lok at Lovoang Kaala i lok keretna, ‘Nenu ne Moroa ura lox ase vam laxamdak mi laxaalik kakalik eburu mi lengkadede kusu dina emi asu minu.’” *Sam 8:2*

¹⁷La ne Iesu ga vas kaxat basinge di la ga vas su at lemenemen silok Jerusalem la uto Beteni, la ga midi go at laxanimin.

Iesu Ga Vaase Sok Luuna Pik

(Mk 11:12-14, 20-24)

¹⁸Ga maxantamak suubu at lomlong teren uto at lemenemen silok, Iesu ga roxo. ¹⁹La ni ga ven luuna pik go at lisigege ap mo langas la ni ga vas li ren kusu na dik ka teveven una, ketla ni goxo ven lenget ka tempeven teren, ga vavaxan gamasa mene. La ni ga lok ti mo luuna pik, “U noxo visik bok ba tempeven una!” La soso mun luuna pik ga mang ta.^f

²⁰Luvuttadi loklok ka anasa diga ven i na la diga rakdu aleng, la diga sue i, “I lok kereva na la ira mang soso?”

²¹La ne Iesu ga lok tidi, “A tong tuturun i rinimi; mo do mina nuunu ruturun at ne Moroa la kopmen lodoxoma atnimi na sixit ekarakat at levelinga ren, miba epovo do mina lok mun lempanga xerekngan nia a lox i ri na luuna pik. La kopmen na xusuk mun i, ketla miba epovo bok do miba vaase lolos ti na lakaana, la ni na xatu kaxat la na subu tup ti laras. ²²Do mi ruuna lunuunu ruturun, ne Moroa naba raba lovoporang ti mo lempanga mi sing tin.”

Lususue Mumu Lololos Ne Iesu Ga Gugu Min

(Mk 11:27-33; Lu 20:1-8)

²³Iesu ga vubeles uto at loogu laplavang, la neni ga anasa limixin, la lavamaasa silok mi loxongkulao silok at lubungmixin me Judaia

^f **21:19** Na lavapaase poovo rinedi limixin me Judaia la lavanga salai naba vot parap di do di noxo visik asu teveloklok nunuan.

diga vosiga i la diga lok, “Lololos salai nenu u ruuna i xusu ri lox i na lempanga? La nege ga raba u mi nom lololos?”

²⁴La ne Iesu ga vorang i ridi xeretna, “Ana sue bok nimi mi lara lususue, la do mina vorang avukat taba ia min, aba vaase axasep ba nimi, do nenia a lok na lempanga mi lololos salai. ²⁵Lesep susu at ne Jon ga laa meva, boro at ne Moroa kopla boro mun at limixin?”

La diga epaase xantubu atdi, la diga lok, “Mo do ata lok ‘Boro at ne Moroa,’ neni naba lok tidik keretna, ‘Tila ba mi goxo nuunu at levelinga at ne Jon?’ ²⁶La mo do ata lok, ‘Boro at limixin,’ ata marat bok at limixin, mila di nuunu do ne Jon neni leeme vapaase alii.”

²⁷Kuren la diga lok ti ne Iesu, “Maxoklen i.”

La ne Iesu ga lok tidi, “Nia bok a noxo tong i rinimi do, nenia a lox i na lempanga mi lololos salai.”

Iesu Ga Vaase Asu Leretere Mumu Lumdak La Ne Temen Du

²⁸La ne Iesu ga lok bok tidi, “Mina doxoma avukat i na. Lara laradi ga ruuna lumdak; la ni ga vot pasa mo lamdak avot la ga lok, ‘Nuruk, a vara i do unat pas uto at laraamang vaen mo lingina la una gugu.’

²⁹La ne nitna ga lok, ‘Nia a noxot pas.’ Ketla melemu neni ga lox ekun lodoxoma ren la gat pas.

³⁰La neni ga vot pasa manga lamdak sepsev agepura la ga vaase manga rin mi lempapaase kerekngan neni ga vaase avot pam min ti lamdak avot; la mo lamdak ga lok, ‘Tamak, nia anaba lox i.’ Ketla neni goxot pas.

³¹Ua lara atdu na ga lok lugugu ne temen du ga tong i?”

La diga lok, “Mo lara avot.”

Kuren la ne Iesu ga lok tidi, “A tong tuturun i rinimi do; luvuttadi loklok ka pilas la lavakin ngarangat mo dibam gomgo avot tinimi uto at Linintoo at ne Moroa. ³²Lavasuun teren keretna; Jon, laradi sep susu, ga vosiga nimi la ga vavang tinimi mi loklok mokmokso kusu mina mumu i, ketla mi goxo nuunu ren; ketla luvuttadi loklok ka pilas mi lavakin ngarangat diga nuunu ren; miga ven nedi diga leeng, ketla nemi mi goxo leeng la mi gita nuunu ren.”

Lavapaase Poovo Ti Luvuttadi Kapmek Diga Lok Tatao Laraamang

(Mk 12:1-12; Lu 20:9-19)

³³La ne Iesu ga lok bok tidi, “Mina ronga bok na lara lavapaase poovo. Lara laradi ga ruuna loxongangka la gatlo laraamang vaen teren. La ni ga bos kangkan i la ga xe lamamara kusu ri loplok li levendan vaen teren; la melemu ga lok loogu xukuxut. La ni ga raba lentaba luvuttadi min kusu dina lok tatao i la neni ga vas kaxat uto at lenep petpes. ³⁴Laaleng ga vot kusu dina dik ka lempeven una at nom laraamang, laradi at laraamang ga riki lentaba lavasaxaruki ren kusu dina lok ka mo levempeven una.

³⁵Ketla nom luvuttadi loklok tatao at laraamang diga ranga alis di la diga tit pupu lara, diga sev amet lara la diga lu amet lara sepsev avantun. ³⁶La neni ga riki lavasaxaruki vetpes bok uto saparap di, buaang atdi digat pas ugo; ketla luvuttadi loklok tatao diga lok kapmek di kerekngan nedi no avot. ³⁷La at laxavaxap neni ga riki ne nitna. Neni ga lok, 'Nedi diba lok ngangao at lamdak tarak.'

³⁸Ketla luvuttadi loklok tatao diga ven ne nitna gat pas go boro, la diga lok, 'Lamdak akmokso at laradi at na laraamang nom it pas boro. Ata sev amer i, la ataba ruuna ka na laraamang.' ³⁹La diga ranga alis i la diga lu asu min ukamang ap mo laraamang la diga sev amer i."

⁴⁰La ne Iesu ga sue di, "At laaleng laradi at nom laraamang naba vosiga nom luvuttadi loklok tatao, neni naba lok lavanga salai ridi?"

⁴¹Diga vorang i rin keretna, "Neni naba sev amet di la naba raba nom laraamang ti luvuttadi vetpes kusu dina lok tatao i la at laaleng ti sep kin dinaba raba i mi loxot teren at lempeven una at nom laraamang."

⁴²La ne Iesu ga lok tidi, "Mina domangke at levelinga at Lovoang Kaala i lok keretna,

'Nom luat luvuttadi xipkip gu diga sok tixirixes kepe i, ga ravasu ngan luat kis la lugugu ren i silok aleng. Leeme Silok ne Moroa ga lox i na la i lox avukat aleng at lemeren dik.' *Sam 118:22-23*

⁴³Kuren la a tong i rinimi; Moroa naba lok kepe Linintoo basinge nemi limixin me Judaia la naba raba i ri limixin mo diba lox asuusu levempeven una nunuan. ⁴⁴[Do tara na subu at nom luat, neni naba rekoxorop axakalik; la do, mo luat na subu ro mavana at tara, neni nabam remumus axap."']

⁴⁵Lavamaasa silok la lubung Parisi diga ronga na lempapaase poovo at ne Iesu la digaklen i do neni ga paase poovo mumu di. ⁴⁶La diga puse ngas kusu dina ranga alis i, ketla di goxo epovo mila diga marat at limixin mo diga lok do ne Iesu neni leeme vapaase alii at ne Moroa.

Lavapaase Poovo Ri Leluxa

(Lu 14:15-24)

22 ¹Iesu ga paase manga ridi mi lavapaase poovo, ni ga lok, ²"Linintoo no vana at laxalibet i lok ngan loorong silok ga gagas li leluxa ri loklox epot at lamdak teren. ³Neni ga riki lavasaxaruki ren ti mo limixin ni gara tong li vam atdi ri mo leluxa kusu dina tong i ridi do laaleng ti leluxa ga vot pam, ketla diga ronga xepe mo levelinga.

⁴La ni ga riki manga lentaba lavasaxaruki mi levelinga xeretna, 'Mina tong i rinedi no nenia aga tong li vam atdi do ara gagas li vam leluxa. Nia ara sep pam laxonbulumaxao, la lempanga axap ara gagas li vam i. Mina tong i ridi do dina vas kaxat ta ri leluxa at loklox epot.'

⁵Ketla nedi diga ronga xape mo levelinga la digak lox angtang mene at leven gugu atdi xa. Lara avot ga vas kaxat uto at laraamang teren. Lara

bok ga lok lugugu ti sesep mi lempanga. ⁶La nedi lentaba vetpes diga ranga alis lavasaxaruki la diga lok kapmek di la diga sev amet di. ⁷La mo loorong silok ga musak teng. Ni ga riki limixin esep teren la diga sev amet di la diga xotos axap lemenemen silok atdi.

⁸La neni ga lok ti lavasaxaruki ren, ‘Leluxa i gagas pam, ketla mo luvuttadi nia aga ro ka di ti na leluxa nedi limixin kapmek mun la ixo epovo do limixin kapmek dinat kis at na laanan. ⁹Minat pas uto at levenngas la mina ro xaka limixin, mi ekip etangarang midi go kusu dina rupot ti leluxa rak.’ ¹⁰La lavasaxaruki ren diga epeseves uto at levenngas la diga ro xaka limixin axap diga ekip tangarang midi, nedi limixin avukat eburu mi limixin kapmek. La loogu ri loklok epot ga umsu mi mo limixin.

¹¹Ketla loorong silok ga vubeles ti ven mo limixin, la ni ga ven lara laradi goxopmen tevempanga singsiga ren ti loklox epot. ¹²La ni ga sue nom laradi, ‘Lentangas tarak. Nenu u beles ude xereva la kopmen tevempanga singsiga ram ti loklox epot?’ Ketla mo laradi goxo tong toxolinga.

¹³La loorong silok ga tong i ri luvuttadi gugugu ren keretna, ‘Mina xoxo lukngen mi luxangkedek teren la mina lu asu min uto xamang kusu neni na vubeles at lamain bonot no limixin dibang teng boron la diba rungur ivivilis.”

¹⁴La ne Iesu ga lok bok, “Limixin diba lok kuren mila ne Moroa i toro rinedi buaang limixin, ketla lentaba mene atdi di epovo kusu ne Moroa na soxolik ka di.”

Laxakaape Pilas Ti Ne Kaisar

(Mk 12:13-17; Lu 20:20-26)

¹⁵La lubung Parisi diga vas kaxat basinge mo lenep la diga gagas kusu dina bala arup ne Iesu mi levelinga. ¹⁶La diga riki luvuttadi loklok ka anasa atdi eburu mi limixin diga mumu asu ne Erodes uto saparap ne Iesu. Diga lok tin keretna, “Leeme loklox ase. Maklen i do nenu laradi ruturun la u anasa limixin mi leveloklok at ne Moroa la mo levelinga ram ik mokso. Uxo lok tooro legesa binam tadi xusuk mun mila uxu doxoma solo i do tara i ruuna laasen silok koplakopmen. ¹⁷Una tong i rinama do ua lusumsuma ram. Kereva, ik mokso do mana xepe pilas ti ne Kaisar koplakopmen?”

¹⁸Iesu ga ven kibis laxaxarang atdi la ga lok tidi, “Nemi lavapen aala. Tila mi lok do mina lixo ia? ¹⁹Mina lox ase ia mi tuxuven denarias mo mi kepe min.” La diga raba i mi legesa denarias. ²⁰La ni ga sue di, “Lamang la laasen atnege i nemen teren?”

²¹La diga vorang i, “At ne Kaisar.”

La ni ga lok tidi, “Mina raba ne Kaisar mi lempanga i epovo at ne Kaisar, la mina raba ne Moroa mi lempanga i epovo at ne Moroa.”

²²Diga rongga lovoporang teren, la diga sangu, la diga on basinge i.

Lususue Mumu Laxakatu Kaxat Amlong

(Mk 12:18-27; Lu 20:27-40)

²³Ap mo mun laaleng lentaba at lubang Sadiusi diga vosiga ne Iesu, diga lok do limixin diga met pam, di noxo roo xat amlong. Diga lok tong pen ne Iesu xeretna, ²⁴“Leeme loklox ase. Moses ga tong i rinama do taradi na met la kopmen tamdak teren, neton nom laradi naba epot at mo lanaa rixin, kusu duba visik tamdak ti ruuna ka lempanga ap mo laradi ga met. ²⁵Ga lavanuti loxoeton diga nemen kantubu atnama. Lara gomgo ga epot la ga met, kopmen ni goxo visik taxamdak, kuren la lara sepsev agepura ga epot manga at nom latkin. ²⁶La lara sepsev agepura ga met bok la lara sepsev avantun bok ga met; la nedi loxoeton axap diga epot at nom latkin diga met. ²⁷La melemu nom latkin ga met. ²⁸At laaleng dola limixin dina xatu kaxat amlong, ti nege rinotno nom latkin, mila nedi axap diga epot teren?”

²⁹La ne Iesu ga vorang i ridi xeretna, “Nemi mi soogong at na lavanga mila nemi xopmen minaklen levelinga at Lovoang Kaala la lololos at ne Moroa. ³⁰Ap mo laaleng limixin diba xatu kaxat amlong, di noxo epot; diba nemen naa ngan lubangangelo ro vana at laxalibet. ³¹Ketla a vara i do ana lox axasep nemi mumu laxakatu kaxat amlong at limixin basinge lanmet. Nemi mixo xasep at levelinga at ne Moroa ga raba nemi min. ³²Mo levelinga i lok keretna,

‘Nia ne Moroa at ne Abaram, Moroa at ne Aisak, la Moroa at ne Jakop.’

Pas 3:6

Ap mo laaleng ne Moroa ga tong i na, nedi lavantun diga met pam. La neni ne Moroa atnedi limixin di rooro, la kopmen atnedi luvuttadi met.”

³³Limixin diga rongga i na, la diga sangu aleng at levenanasa ren.

Ua Levelinga At Ne Moroa I Silok Aleng

(Mk 12:28-34; Lu 10:25-28)

³⁴Lubung Parisi diga rongga i do ne Iesu ga vaase pe lubang Sadiusi, la nedi diga vot eburu la diga vot pasa ne Iesu. ³⁵Legesara atdi, neni gaklen avukat Lenavolo, ga lok tong pen ne Iesu. Ni ga sue i, ³⁶“Leeme loklox ase. Ua levelinga at Lenavolo i silok ti levelinga axap teren?”

³⁷La ne Iesu ga vorang i rin,

“Mina balamu Leeme Silok, ne Moroa atnemi mi lebelen nemi axap, la mi lороonan axap atnemi, la mi levendoxoma axap atnemi.” *Len 6:5*

³⁸Na loxot neni imgomgo la i silok ti levelinga axap teren. ³⁹La lara bok sepsev agepura i lok ngan lara gomgo, i lok keretna.

‘Mina balamu mo limixin di nemen saparap nemi kerekngan pam mi balamu nemi.’

Mas 19:18

⁴⁰Lenavolo eburu mi levenmamalagan at lavaeme vapaase alii i nemen maxopok at na levelinga.”

Lususue Mumu Lanarong
(Mk 12:35-37; Lu 20:41-44)

⁴¹Lubung Parisi digak lox eburu la ne Iesu ga sue di, ⁴²“Lanarong, neni lurubuno avolo atnege mo?”

La diga vorang i xeretna, “Neni lurubuno avolo at ne Devit.” ⁴³La ni ga lok tidi, “Do kuren, tila ba ne Devit mi lodoxoma at Loroonan Kaala ga soxor i do Leeme Silok teren? Mila levelinga ren at Lovoang Kaala i lok keretna,

⁴⁴‘Leeme Silok ne Moroa ga lok ti Leeme Silok tarak. Una xis de at lakngak tino se nenia ana lok li limixin munepen taram i ngan loxot burubut ti luxangkedek taram.’ *Sam 110:1*

⁴⁵Mo do ne Devit ga so asen i do Leeme Silok, i lok kereva la Lanarong neni lurubuno avolo at ne Devit?” ⁴⁶Kopmen teta atdi gita epovo na vorang levelinga ren, la ga ru ka i ap mo laaleng, kopmen tara gita sue i mi tususue.

Iesu Ga Paase Asi Limixin Silok
(Mk 12:38-39; Lu 11:43, 46; 20:45-46)

23 ¹Melemu ne Iesu ga vaase ri limixin eburu mi luvuttadi loklok ka anasa ren. Ni ga lok keretna, ²“Luvuttadi loklox ase at Lenavolo la lubung Parisi di ruuna lixitkis silok ngan ne Moses, mo gam gomgo ri leme Israel. ³Kuren la mina rongga res axap at lempanga di tong i rinimi la mina mumu asu rinotno i; ketla nemen gat mita mu asu luruptuvuk atdi, mila dixok lok lempanga nedi di vavang min. ⁴Dim taba limixin mi laxantaangas solo, i lok ngan di koxo li lara aknixip doxodok at limixin, la i mumuat aleng kusu dinap kiv i, ketla nedi xa kopmen dinak lok tooro limixin kusu rip kip mo levenaknixip.

⁵Lempanga axap dik lox i xusu limixin diba reven di la dina emi asu midi. Lavasuun mun at nai dik lok lengkonbokis lixilik tik lok li levelinga at ne Moroa ro xeneng teren; la mo lengkonbokis i silok ti mo lengkonbokis at limixin. La ding siga levempanga singsiga ri loxonaleng singising la dik lox asuusu i do di baalom aleng kusu dina lox ase limixin do nedi limixin tuturun. ⁶Di vavara aleng lengkot kitkis nunuan to at lara peluxa; la dik lok ka lengkot avukat tit kis to xeneng at laraugu singising. ⁷La di vavara aleng box i do limixin dibak lok ngangao atdi ro at lengkot etang, la dinap kup tidi do ‘Rabai.’

⁸La ne Iesu ga lok bok tidi, “Ixo lox avukat do tara na soxot nimi do Rabai, mila mi ruuna leges ‘Eme Silok’ la nemi mina epovo ngan mun loxoeton. ⁹La nemen gat nimi guta tong tara at na lavatbung menemen

do ne Temen nimi, mila legesara mun neni ne Temen nimi mo ik lok to vana at laxalibet. ¹⁰La nemen gat limixin dina so asen nimi do ‘luvuttadi amgomgo’ mila legesa radi gomgo atnimi la neni Lanarong. ¹¹Neni do i silok kantubu atnimi neni na ngan mun lasaxaruki atnimi. ¹²La do nege i lox asilox i, ne Moroa naba lox alixilix i; la nege do i lox alixilix i, ne Moroa naba lox asilox i.”

Iesu Ga Vaase Sok Luvuttadi Amgomgo
(*Mk 12:40; Lu 11:39-42, 44, 52; 20:47*)

¹³Naba lok kapmek aleng tinimi, luvuttadi loklox ase at Lenavolo eburu minemi lubang Parisi. Nemi lavapen aala. Mik soxoba pe lumusaragu ri Linintoo no vana at laxalibet kusu limixin kopmen dina epovo dina beles teren. Ketla nemi xa xopmen minoxo beles teren la mi tu pe mo lumusaragu ri limixin dik lok tong i xusu dina beles. ¹⁴[Naba lok kapmek aleng tinimi, luvuttadi loklox ase at Lenavolo eburu minemi lubang Parisi. Nemi lavapen aala. Mip kip pilo lempanga at lempatnaa sioxo rixin, la melemu at na mik lok levesingising to melamgo at limixin kusu rik lox ase di do loklok atnimi i nunuan axap. Kuren la ne Moroa naba lok li lumumuat silok atnimi.]

¹⁵Naba lok kapmek aleng tinimi luvuttadi loklox ase at Lenavolo eburu minemi lubang Parisi. Nemi lavapen aala. Mit pas tangtagap at laxangka la miang kan bok at laras kusu minak lok ka tara xusu ni na ruuna ka lunuunu kerekngan lunuunu atnimi; la do tara ira ruuna ka vam mo lunuunu, mi gagas li i xusu neni naba epovo rinotno kusu nat pas epopolo uto at lemenemen songsongot.

¹⁶Naba lok kapmek aleng mun tinimi, mila nemi limixin lengkatli atnimi i main la nemi xa xopmen mina epovo kusu mina lok tooro limixin. Mi tong i do lavangpangpe at tara i ngan lavanga gamasa, mo do i vangpe mi loogu laplavang; ket do ni i vangpe mi logol i nemen keneng at loogu laplavang, nemi miba doxoma atmatkun mo laxakaape ren. ¹⁷Nemi luvuttadi rangtangu la lengkatli at labaroonan atnimi i main. Loogu laplavang neni i lox axaala mo logol; la loogu laplavang i silok ti logol; la i xaala aleng, kopmen logol. ¹⁸Mi tong box i do lavangpangpe at tara ni lavanga gamasa mun, mo do i vangpe mi loxonin laplavang to at loogu laplavang; ket do ni na vangpe mavana at leventamtaba mo ik lok pana at nom loxonin laplavang, nemi mi lox amuat mo lavangpangpe ren. ¹⁹Nemi laxangkatli main. Loxonin laplavang i silok ti mo leventamtaba la i lox axaala mo leventamtaba. ²⁰Kuren la do tara na vangpe mi loxonin laplavang, neni i lok lavangpangpe min eburu mi leventamtaba mo ik lok teren; ²¹la do i vangpe mi loogu laplavang, neni i vangpe min eburu mi ne Moroa mo ik lok keneng teren; ²²la do i vangpe mi laxalibet, neni i vangpe mi loxonin orong at ne Moroa eburu mi ne Moroa mo it kis teren.

²³Naba lok kapmek aleng tinimi luvuttadi loklox ase at Lenavolo eburu minemi lubang Parisi. Nemi lavapen aala! Mim taba ne Moroa mi loxot i sev asangaun ap mo levempanga ik lok at laraamang, ketla mixo mumu asu leveloklok silok at Lenavolo, i ngan loklok mokmokso, lebelemumu, loklok nunuan ti lentaba vetpes, la loklok tuturun ti lentaba vetpes. Na leveloklok i epovo do mina lox asuusu i eburu mi mo loklok ti raba ne Moroa mi loxot i sev asangaun. ²⁴Nemi laxangkatli main. Mi mumu asu lengkot at Lenavolo kopmen na mumuat, ketla mixo mumu asu solo mo leveloklok i mumuat. I ngan ta do mi lox asu levenulang kakalik basinge lengkadan vaen atnimi la mi ke lavatkamel nak lok teren.

²⁵Naba lok kapmek aleng tinimi luvuttadi loklox ase at Lenavolo eburu minemi lubang Parisi! Nemi lavapen aala. Mi sogos anunuan i no ma xamang at leveng kap la leventingtigon, ketla no ma xeneng i umsu aleng mi loklok ti sak paxat ka panga la loklok ti belegaao. ²⁶Nemi lubang Parisi. Nemi lengkatli main. Mina gos anunuan avot be i no ma xeneng at lakap, la melemu no ma xamang ba lok nunuan ba.

²⁷Naba lok kapmek aleng tinimi luvuttadi loklox ase at Lenavolo eburu minemi lubang Parisi. Nemi lavapen aala. Mi ven ngan tinotno lempat maaut diga mo an bun i, i ven avukat to ma xamang, ketla no ma xeneng i umsu mi laxasi tongan la laxanorang. ²⁸Kuren la nemi bok mi lok ngan i nom, ma xamang atnimi, limixin di ven nimi ngan luvuttadi mokmokso la mi mumu asu Lenavolo, ketla ma xeneng at lebelen nimi mi umsu mi loklok at lavapen aala la loklok kakapmek aleng tino bok.

²⁹Naba lok kapmek aleng tinimi luvuttadi loklox ase at Lenavolo eburu minemi lubang Parisi. Nemi lavapen aala. Mira vaxaru ka vam levenmaaut avukat ti lavaeme vapaase alii; la mi sisinang avukat levenmaaut at limixin mokmokso; ³⁰la mi lok keretna, 'Mo do nedik gita nemen ap mo levenaleng lavalabat atdik diga rooro ren, nedik gitoxo sev amet lavaeme vapaase alii.' ³¹La kerepmo mi tong asu i do nemi livipisik li ap mo limixin sepsep tadi, diga sev amet lavaeme vapaase alii. ³²Nemi bok limixin sepsep tadi, mi epovo do mina lox epasum na laxakapmek ti laxakapmek atnedi.

³³Nemi laxasii xapmek. Nemi laxamdak at lempasii. Ixo epovo do mina sixiro basinge lebelemamao at ne Moroa mo naba riki nimi uto at lemenemen songsongot. ³⁴Kuren la aba riki lavaeme vapaase alii eburu mi luvuttadi leklen la luvuttadi loklox ase saparap nimi. Lentaba atdi miba vaxarem di at larakaba la mibap sev amet di. La lentaba atdi mibak pixis di ro xeneng at laraugu singising la miba xala su mi lentaba atdi basinge levenmenemen atdi la uto at levenmenemen petpes. ³⁵Kuren la minaba xip tutu mi lanmet at limixin mokmokso at na lavatbung menemen, ga ru ka i mi lanmet at ne Abel ga se at lanmet at ne Sakaria, nitna ne Berakaia, mo lavalabat atnimi diga sev amer i ro xantubu at

loogu laplavang la loxonin laplavang. ³⁶Nia a tong tuturun i dola na loola di rooro lingina dinaba xip tutu mi na laxakapmek axap atnedi luvuttadi sepsep tadi.”

Iesu Ga Tong Asu Labalamu Ren Ti Limixin Me Israel

(Lu 13:34-35)

³⁷La ne Iesu ga bulu aleng la ga lok, “Nemi limixin me Jerusalem. Lavalabat atnimi digap sev amet lavaeeme vapaase alii at ne Moroa la diga lu amet nedi ne Moroa ga riki di. Buaang levenaleng a lok do ana kok nimi mi lukngak, i ngan lavatpalak kaxak i kok laxan natnat kaxak teren, ketla mixo siam ka ia. ³⁸I ruturun. Monga Moroa i lox axap loklok tatao ren tinimi. ³⁹A tong tuturun i rinimi do mi noxo ven bok ba ia, se at nom laaleng naba vot la miba lok keretna,

‘Luvukat ti mo laradi it pas mi laasen at Leeme Silok.” *Sam 118:26*

Leveloklok Katling Ti Laxavaxap At Na Lavatbung Menemen

(Mk 13:1-2; Lu 21:5-6)

24 ¹Iesu ga vas kaxat basinge loogu laplavang la at lavatpas teren, luvuttadi loklok ka anasa ren diga vosiga i la diga paase mumu loogu laplavang la laraugu at ne Moroa ga tu saparav i. ²La ni ga lok tidi, “Mina ven avukat nom laraugu. A tong tuturun i rinimi. Taaleng naba vot la kopmen toxonuat at nom laraugu naba nemen at loxot teren; limixin diba vot la diba ut tereve axav i ukopok.”

³Melemu ne Iesu gat kis to at Lakaana Olip la luvuttadi loklok ka anasa xusuk teren diga vosiga i la diga sue i xeretna, “Una tong i rinama. Lingisa nom lempanga naba vot la loklok katling salai naba lok katling lovotpot taram eburu mi laxavaxap at na levenaleng?”

⁴La ne Iesu ga vorang i ridi xeretna, “Mina lok tatao avukat nimi kusu tara noxo xarang arup nimi mumu i na lempanga; ⁵mila buaang luvuttadi diba rupert mi laasen tarak la diba lok, ‘Nenia Lanarong!’ La diba sar asoogong buaang limixin mi laxalinga xaxarang atdi. ⁶Miba ronga i do lara esep mo ik lok la lara esep bok ba vot, ketla nemen mita marat teren. Lempanga xerepmo naba vot ketla laxavaxap at na lavatbung menemen noxo vot ap mo levenaleng. ⁷Limixin at levennep silok diba esep eburu mi limixin at levennep silok petpes; lavaorong silok at levennep diba esep mi lavaorong silok at levennep petpes. Lean kangking la levenangne naba vot at tengkot. ⁸Ana axav i naba ru katling lavakpaxaru kaxat ap mo levenmaares lolos.

⁹Melemu limixin diba ranga alis nimi la dina lox asongot nimi la lentaba atnimi diba sev amet di la limixin at lengkot axap diba belemamao nimi mila nemi limixin tarak. ¹⁰Ap mo laaleng buaang limixin diba ke xepe lunuunu atdi la di noxo ebalamu ela la diba song

araba di ri limixin kapmek; ¹¹la buaang lavaeme vapaase alii xaxarang dinaba vot la diba sar asoogong buaang limixin. ¹²Laxakapmek naba umsu, kuren la labalamu noxo nemen kantubu at limixin; ¹³ketla do tara na tu tuxuruxun at lunuunu ren se at laxavaxap ap mo levenmaares lolos, Moroa naba lox arooro i. ¹⁴La dinaba tong asu Lagale Lavavang mumu Linintoo ngan lavapaase asu ri limixin at lengkot axap, la melemu ba ren laxavaxap at na lavatbung menemen naba vot.”

Lavanga Xapmek

(*Mk 13:14-23; Lu 21:20-24*)

¹⁵La ne Iesu ga lok bok tidi, “Miba ven lavanga ba lok kapmek aleng, kerekngan leeme vapaase alii ne Daniel ga paase mumu i. Na lavanga xapmek naba tu ro xeneng at loxot kaala aleng at loogu laplavang la kerepmo naba lox amulao mo loxot.”

Nege do na us i na, neni na xasep avukat at lavasuun at na levelinga. ¹⁶La ne Iesu ga lok bok, “Ap mo laaleng nedi limixin do dina nemen to Judaia, diba sixiro uto at lempatkaana. ¹⁷Laradi do nak lok to mavana at loogu ren, ni noxo si kusu na lok ka lempanga ren boro xeneng ap mo loogu ren. ¹⁸La laradi do nak lok to xataamang, ni noxomlong bok ba uto at loogu ren kusu na lok ka lavanga singsiga ren. ¹⁹Mo laaleng naba lok kapmek aleng ti lavakin teenan eburu mi lavakin mi levengkadede atdi! ²⁰Mina ngising ne Moroa do mo laaleng noxo vot saparap nimi edompo mi taaleng kabu koplal taaleng kaala. ²¹Levenmumuat ap mo levenaleng naba lok kapmek aleng tinotno. Ga ru ka i at lurutu kaxat at na lavatbung menemen ise nga na lingina, kovisi taaleng kerepmo ga vot, la kopmen bok tara tumumuat kerepmo naba vot melemu. ²²La mo levenaleng ti mo levenmumuat do ne Moroa noxo lox atmur i, kopmen teta naba roo suu; ketla ne Moroa naba lox asuusu labalamu ren ti mo limixin neni gara soxolik ka vam di, la ni naba lox atmut mo levenaleng. ²³Ap mo levenaleng nemen gat mita nuunu at levelinga at tara na lok tinimi xeretna, ‘Mina ven ba i, neni nga na Lanarong!’ Koplal na lok, ‘Neni nga no!’ Nemen mita nuunu at nom levelinga atdi. ²⁴Mila buaang nedi limixin babala diba lok do nedi mo lavanarong at ne Moroa la lavaeme vapaase alii ren; diba lok tempanga sangsangu kusu diba sar asoogong lavaanat soxolik at ne Moroa, mo do di epovo. ²⁵Mina rongal avukar i na. A tong alii avot ta i rinimi.

²⁶La mo do tentaba dina lok tinimi, ‘Mina ven ba Lanarong, no nga i at lamatbin!’ Nemen gat nimi guta vas kaxat ugo; la do dina lok tinimi, ‘Mina ven ba i, na nga i lipe de at na loogu!’ Nemen gat nimi guta nuunu atdi; ²⁷mila nenia, Laradi Mevana, anaba vot soso ngan lavanga i mam to at levengkot axap, i tara koxorop lara takabu de vana at laxalibet. ²⁸Ap mo loxot limixin diba met teren, lempatmaalom diba vot buru ve kusu ri anan levenbaaxin tadi.”

Lovotpot At Laradi Mevana
(*Mk 13:24-27; Lu 21:25-28*)

²⁹La ne Iesu ga lok bok, “La soso mun melemu at levenmumuat ap mo levenmaares, leveloklok katling naba vot;

‘Losoosoo at laxangking naba xap, la lagaaling noxo soosoo. Larapenti naba subu si boro vana at laxalibet eburu mi lempanga axap meve diba sixit ekarakat la kopmen di noxo sixit mu larangas atdi.’ *Ais 13:10, 34:4*

³⁰Ap mo laaleng loklok katling tarak, Laradi Mevana naba vot asuvos to vana at laxalibet, la limixin at levennep axap at na lavatbung menemen dinabak saxaanu. Dinaba ven ia, Laradi Mevana, anaba vot at loxontakabu mi langsung lololos la lisisixam silok. ³¹La lubung angelo diba rongga lerengteng at lurus la nia aba riki di uto at lengkot axap kusu dina lam kaka lavaanat soxolik at ne Moroa boro at lavanuet laramesuluk at lavanuet laramera manman at na lavatbung menemen.”

Laanasa Mumu Luuna Pik
(*Mk 13:28-31; Lu 21:29-33*)

³²La ne Iesu ga tong lara lavapaase poovo ridi xeretna, “Mina rongga na laanasa mumu luuna pik. Dola levesiliklik at larauna pik di mumulum la levenang i su xat, nemi miklen i do lamaares i auret ta. ³³La kerepmo do mina ven na lempanga loklok katling na vot, mina xasep do lovotpot tarak, Laradi Mevana i auret, i ngan laradi i tu at lumusaragu at loogu la i gagas kusu na beles teren. ³⁴Nia a tong tuturun i rinimi. Limixin at na loola di rooro lingina di noxo met se na lempanga na ravasu. ³⁵Laxalibet mi lavatbung menemen naba sonao, ketla levelinga rak noxo xap.”

Kopmen Tara Iklen Laaleng Laradi Mevana Naba Vot
(*Mk 13:32-37; Lu 17:26-30, 34-36*)

³⁶La ne Iesu ga lok bok, “Kopmen tara naklen laaleng at lovotpot tarak; lubung angelo bok kopmen dinaklen i la nenia, ne Nitna bok kopmen anaklen i. Tamak kusuk mun iklen i. ³⁷At lovotpot at Laradi Mevana, loklok at limixin naba lok ngan loklok at limixin ap mo levenaleng at ne Noa. ³⁸Ap mo levenaleng avot ti mo laran limixin diga anan la diga inin, lavatlok la lavakin diga vepot ga se at nom laaleng ne Noa ga beles ti lavattaaxup. ³⁹Mo limixin kopmen di goxoklen i do laran mo naba vot, ketla ga rupot la ga sev amet axap nedu. Laaleng at lovotpot tarak, Laradi Mevana naba lok kuren. ⁴⁰Ap mo laaleng tegepu radi duba gugu ro xataamang; lubung angelo diba lok ka legesara la lara naba nemen alu. ⁴¹Tegeputkin duba sep povorok levempiao; lubung angelo diba lok ka legesara la lara naba nemen alu.

⁴²Kuren la mina lok tatao avukat nimi mila kopmen minaklen i do at ua laaleng nenia, Leeme Silok atnimi, anabamlong teren. ⁴³Ketla mina

xasep at na lavapaase poovo. Mo do laradi at loogu iklen i do at ua loxonaleng laradi xipkip pilo ba vot teren, neni ba kuxut avukat la laradi xipkip pilo noxo das beles at loogu ren. ⁴⁴Kuren la mina gagas avukat mila nenia, Laradi Mevana, anaba vot ap mo laaleng limixin di doxoma i do nenia a noxo vot teren.

⁴⁵Mo laradi ruturun la lasaxaruki avukat, neni mo, leeme silok teren ba lok katling i xusu na lok tatao lavasaxaruki ren la nam taba di mi levempanga anan at levengkonalleng mokmokso. ⁴⁶Naba lox avukat ti mo laradi mo do leeme silok teren nabamlong la na long lenget ka i do i lox epovo lugugu ren. ⁴⁷Nia a tong tuturun i do mo leeme silok naba lok li mo laradi kusu na lok tatao levempanga axap teren. ⁴⁸Ket do nom laradi neni laradi xapmek la i lok, ‘Leeme silok tarak noxomlong soso.’ ⁴⁹La ip sev asongot lentaba lavasaxaruki la i anan la ira inin tangtangu eburu mi limixin di inin tangtangu amisik. ⁵⁰Leeme silok teren nabamlong at tara taaleng lasaxaruki ren ixo doxoma i do ni naba vot teren la at loxonaleng neni kopmen naklen i. ⁵¹Nom leeme silok naba sev asongot aleng nom lasaxaruki ren la ni naba riki i uto at lemenemen songsongot kusu na nemen eburu minedi lavapen aala. Mo go dibang teng la dina rungur ivivilis.”

Lavapaase Poovo Ri Lasangaun Lovosono Maxat

25 ¹La ne Iesu ga tong bok lavapaase poovo. Ni ga lok keretna, “At laaleng at lovtopot tarak, Linintoo no vana at laxalibet ba lok ngan lasangaun lovosono maxat diga lok ka levenbabao atdi la digat pas kusu dina ekip tangarang mi laradi ga gagas kusu na epot. ²Lavalimo atdi diga baulang, la lavalimo digakleklen. ³Lovosono rangtangu diga lok ka levenbabao atdi, ketla di goxo lok ka tengkondan loklox antos ti mo levenbabao atdi. ⁴Ketla lavalimo lovosono leklen diga lok ka levengkondan loklox antos babao eburu mi levenbabao atdi. ⁵Nedi axap lovosono maxat diga ngangais abao rino, ketla mo laradi ga gagas ti epot kopmen goxo vot soso. Kuren la lemeren di ga unga la nedi axap diga unga nga.

⁶At laxanimin tubu limixin diga xup aoon min keretna, ‘Laradi i gagas ti epot nom ta i boro! Minat pas la mina ekip tangarang min!’

⁷La nedi lasangaun lovosono maxat diga aus kaxat la diga lox agagas levenbabao atdi. ⁸La lavalimo lovosono rangtangu diga lok ti mo lovosono leklen, ‘Mina raba nama mi tengkondan soksox antos babao, mila levenbabao atnama i xapkap tino.’

⁹Ketla lavalimo lovosono leklen diga vorang i ridi xeretna, ‘Kopmen. Agut lengkondan soksox antos babao xopmen na epovo do ridik axap. Minat pas uto at luvuttadi sesep la mina un kaka tengkot tinimi.’

¹⁰La lovosono rangtangu digat pas kusu ri un kaka tengkondan soksox antos babao; la ise diga onon, laradi ga gagas ti epot ga vot, la nedi

lavalimo lovosono leklen diga vubeles eburu min ukeneng at leluxa at loklox aepot, la lumusaragu ga repe nga.

¹¹Melemu lavalimo lovosono rangtangu diga vot la diga lok, 'Leeme silok. Leeme silok. Una suang abeles nama.'

¹²Ketla ni ga vorang i ridi xeretna, 'Nia a tong tuturun i. Axoklen nimi!'

¹³La ne Iesu ga lok tidi, "Mina gagas avukat, mila mi xoklen laaleng kopla loxonatat aleng at lovotpot tarak, Leeme Silok atnimi."

Lavapaase Poovo Ri Levempilas

(Lu 19:11-27)

¹⁴La ne Iesu ga tong bok lavapaase poovo. Ni ga lok, "Ap mo laaleng Linintoo no vana at laxalibet naba lok keretna. Lara leeme silok gat pas uto vaxalom. Avot at lavatpas kaxat teren, neni ga xup kaka lavasaxaruki ren la ga lok taba di mi levempanga ren kusu dinak lok tatao i. ¹⁵Ti lasaxaruki avot teren neni ga raba i mi lavalimo talen; ti lara sepsev agepura neni ga raba i mi legepu talen; la ti lara sepsev avantun neni ga raba i mi legesa talen. Neni ga raba di min kuren, ga epovo mi lakleklen atdi. La ni ga vas kaxat basinge di. ¹⁶Mo lara ga lok ka lavalimo talen, soso mun neni gat pas la ga gugu mi mo leventalen la ga ruuna ka bok lavalimo talen. ¹⁷La mo bok lara ga lok ka legepu talen, neni bok ga gugu min la ga ruuna ka bok legepu talen. ¹⁸Ketla mo lara ga lok ka legesa talen, neni gat pas, ga xe lamamara la ga lox alipe mo legesa talen at leeme silok teren.

¹⁹Melemu at lentaba leven gaaling ga volo, leeme silok ap mo lavasaxaruki gamlong la ga xup kaka di kusu dina paase mumu lempilas digara lok ka vam i. ²⁰Mo lasaxaruki avot ga lok ka vam lavalimo talen, ga vosiga mo leeme silok la ga lok tin, 'Leeme silok. Nenu ga raba ia mi lavalimo talen la nia agara gu asu vam lara lavalimo talen bok.'

²¹La mo leeme silok ga lok tin, 'I lox avukat aleng. Nenu lagale lasaxaruki rak. Nenu ga lok tatao avukat levempanga lixilik. Kuren la nia aba raba u mi laxampanga solo kusu una lok tatao i. Ude u ri leluxa rak. Ata lok momo eburu.'

²²La mo lasaxaruki ga lok ka legepu talen, ga vosiga nom leeme silok la ga lok tin, 'Leeme silok. Nenu ga raba ia mi legepu talen la nia agara gu asu vam legepu talen bok.'

²³Leeme silok ga lok tin, 'I lox avukat aleng. Nenu lagale lasaxaruki rak. Nenu ga lok tatao avukat levempanga lixilik. Kuren la nia aba raba u mi laxampanga solo kusu una lok tatao i. Ude u ri leluxa rak. Ata lok momo eburu.'

²⁴La mo lasaxaruki ga lok ka legesa talen, ga vosiga nom leeme silok la ga lok tin, 'Leeme silok. Nia agaklen i do nenu laradi lolos; uk lok

kaka levempanga kopmen ataram, la u kaxat ka levempanga anan at leventaamang, nenu goxotlotlo i. ²⁵Kuren la nia ga marat taram la agat pas la aga lok alipe na legesa talen taram to xopok at laxangka. Legesa talen taram na.'

²⁶La leeme silok ga lok tin, 'Nenu lasaxaruki kapmek la lavatpanga molo. Nenu ugaklen i do ak lok kaka levempanga kopmen atarak, la a kaxat ka levempanga anan, nenia goxotlotlo i. ²⁷Tila ba nenu u goxo lok li latalen tarak to at loogu loklok li pilas kusu dina gugu min ti lox asilox i.' ²⁸La leeme silok ga lok ti lasaxaruki vetpes teren, 'Una lok ka latalen teren la una raba i ri mo lasaxaruki ira ruuna ka vam lasangaun talen. ²⁹A tong i rinimi do nedi di ruuna levempanga la di lok lugugu at ne Moroa min, aba raba bok di mi laxampanga solo; ket do tara na ruuna levempanga lixilik la kopmen na lok lugugu min, nia aba lok kaka amlong mo levempanga ren. ³⁰La nia aba lu asu mi mo lasaxaruki molos uto at lamain bonot; limixin go dibak saxaanu la diba rungur ivivilis."

Laradi Mevana Naba Ronga Linga At Limixin Axap

³¹La ne Iesu ga lok bok, "Do nenia, Laradi Mevana, ana vot mi lisisixam, eburu mi lubang angelo, nenia anabat kis at loxonin orong tarak mi lisisixam silok boro vana at laxalibet. ³²La limixin axap at na lavatbung menemen diba tu ro melango rak. La nenia anaba epes di ri legepu binam tadi, kerekngan laradi loklok tatao sipsip ik lox epeseves laxasipsip basinge laxanme. ³³Nenia anaba lok li laxasipsip uto saparap lakngak tino la laxanme uto saparap lakngak kia.

³⁴La nenia, Loorong Silok, anaba lok ti limixin to saparap lakngak tino xeretna, 'Ude nimi, limixin ne Tamak ira lox anarong pam nimi. Minat pas ude la mina ruuna ka leveloklox anarong at Linintoo, ne Moroa ga gagas pam min tinimi at lurutu kaxat at lavatbung menemen, ³⁵mila agak toxo la migam taba luxa ia; agak minu la migam taba dan ia; aga nemen ngan laradi xadiong la migak lok maraose minia. ³⁶Agak pakes ti levempanga singsiga la migam taba ia mi levempanga singsiga; agak meres la migak lok tatao avukar ia; agak lok at loogu xokoxo la migat posiga ia xusu minak lok tooro ia.'

³⁷La melemu mo limixin mokmokso diba sue ia, 'Leeme Silok. Lingisa nema maga ven u, ugak toxo la magam taba luxa u, la ugak minu la maga vaxain u? ³⁸Lingisa nema maga ven u ngan laradi xadiong la magak lok maraose minu, koplaga uga nemen goxopmen tempanga singsiga ram, la magam taba u mi levempanga singsiga? ³⁹Lingisa nema maga ven u, ugak meres, koplaga uga nemen at loogu xokoxo la magat posiga u xusu manak lok tooro u?'

⁴⁰La nenia, Loorong Silok, anaba vorang i ridi xeretna, 'A tong tuturun i rinimi. Do migalox i na ri tara atdi limixin banbalo rak, i lok ngan mun migalox i ria!'

⁴¹Melemu nenia anaba lok tidi limixin to saparap lakngak kia, ‘Uto nimi basinge ia, nemi limixin, lasaxaek naba suxuna nimi; uto nimi at laxao i anan tos amisik, ne Moroa ga gagas min ti ne Satan la lubang angelo ren! ⁴²Agak toxo ketla mi goxo raba luxa ia; agak minu ketla mi goxo vaxain ia. ⁴³Aga nemen ngan laradi xadiong, ketla mi goxo lok maraose minia, agak lok goxopmen tempanga singsiga rak, ketla mi goxo raba ia mi tempanga singsiga; agak meres la agak lok bok at loogu xokoxo ketla mi goxo vosiga ia xusu migita lok tooro ia.’

⁴⁴La diba lok bok tia xeretna, ‘Leeme Silok. Lingisa maga ven u, uga roxo, la uga minu, la uga nemen ngan laradi xadiong la ugak lok goxopmen tempanga singsiga ram la uga meres la ugak lok at loogu xokoxo, la ma goxo lok tooro u?’

⁴⁵La nenia anaba vorang i ridi xeretna, ‘A tong tuturun i rinimi. Do mi goxo lox i na ri tara atdi limixin banbalo, mi goxo lox i ria.’

⁴⁶La ne Iesu ga lok bok, “Na limixin Moroa ba riki aonon di ri losongsongot i nemen amisik, ketla limixin mokmokso dinaba lok ka lorrooro avolo.”

Diga Sevut Li Levelinga Ri Sev Amet Ne Iesu

(Mk 14:1-2; Lu 22:1-2; Jo 11:45-53)

26 ¹Se ne Iesu ga vaase axap na levempapaase, neni ga lok ti luvuttadi loklok ka anasa ren keretna, ²“Miklen i do legepu aleng move ik lok ti leluxa at Lovovolo Pe. Laaleng i auret do limixin diba song araba ia, Laradi Mevana, ri limixin esep kusu diba vaxarem ia at laxaba.”

³Ap mo mun laaleng lavamaasa silok, la loxongkulao silok at limixin me Israel diga vot eburu to at loogu silok at lamaasa gomgo, laasen teren ne Kaiapas. ⁴La diga sevut li levelinga xusu ri ranga alis ka nemnem ne Iesu la dina sev amer i. ⁵Diga lok, “Ata noxo lox i na at laaleng at leluxa; lavanga limixin dina lok kaxat turube.”

Latkin Ga Soli Li Ladan Mavak To At Ne Iesu Ro Beteni

(Mk 14:3-9; Jo 12:1-8)

⁶Iesu gak lok to Beteni at loogu at ne Simon; gano lanmeres gu gak lok teren. ⁷La ne Iesu gat kis ti anan, la lara latkin ga vot pasa i, gap kip lubuxom avukat⁸ ga umsu mi laxadan mavak, luunun teren ga urut aleng, la ni ga soli i ro at lavatlak at ne Iesu.

⁸La luvuttadi loklok ka anasa ren diga ven i na, la diga musak, diga lok, “Tila i soli xepe gamasa i na? ⁹Ni i epovo ri sesep mi na laxadan mavak kusu ni ba lok ka tuunun silok teren, la na lok tooro limixin banbalo min.”

⁸ 26:7 Na lubuxom tuntu diga lox i mi luat bunbun.

¹⁰Iesu gaklen pam levendoxoma atdi, kuren la ni ga lok tidi, “Nemen mita lox angtang na latkin, mila neni i lok lavanga nunuan tia. ¹¹Limixin banbalo mo dibat pot pasa amisik nimi xusu mibak lok tooro di, ketla nenia noxo nemen eburu amisik minimi. ¹²Ni i soli na laxadan mavak at labantuxu rak kusu ri lox agagas li labantuxu rak ti lamaaut. ¹³Nia a tong tuturun i rinimi do, at ua loxot at na lavatbung menemen axap limixin diba tong asu Lagale Lavavang, na lavanga neni i lox i, diba tong box i xusu limixin dibaklen i.”

Judas Ga Siam Kusu Na Song Araba Ne Iesu

(Mk 14:10-11; Lu 22:3-6)

¹⁴Lara atnedi lasangaun mi legepura luvuttadi loklok ka anasa, laasen teren ne Judas Iskariot ga vosiga lavamaasa silok. ¹⁵La ni ga sue di, “Do nenia na song araba ne Iesu rinimi, miba raba ia mi tavanga salai?” La diga siam do diba raba i mi lavantun sangaun pilas gamgames. ¹⁶Ga ru ka i ap mo laaleng ne Judas ga reven ti taaleng kusu na song araba ne Iesu ridi.

Iesu Ga Anan Eburu Mi Luvuttadi Loklok Ka Anasa

(Mk 14:12-21; Lu 22:7-13, 21-23; Jo 13:21-30)

¹⁷At laaleng avot at leluxa ua diga ove vetpes lengkongkide,^h luvuttadi loklok ka anasa at ne Iesu diga vosiga i la diga sue i, “U vara i do mana lox agagas li laanan tidik ua?”

¹⁸La ni ga vorang i ridi xeretna, “Mina vubeles at lemenemen silok la mina vosiga lara laradi; la mina lok tin keretna, ‘Leeme loklox ase atnama i tong i do laaleng meremet teren i auret la neni eburu mi luvuttadi loklok ka anasa ren diba lok katling Lovovolo Pe ro at loogu ram.” ¹⁹La luvuttadi loklok ka anasa ren diga mumu asu levelinga at ne Iesu la diga lox agagas li leveluxa ri Lovovolo Pe.

²⁰Ga ukantinao Iesu gat kis kusu ri anan eburu mi lasangaun mi legepura luvuttadi loklok ka anasa ren. ²¹Nedi diga anan la ni ga lok tidi, “Nia a tong tuturun i na rinimi. Legesara mo atnimi naba song araba ia ri limixin kapmek.”

²²La diga bulu aleng la nedi getgesara diga sue i, “Leeme Silok. Kopmen nenia, do?”

²³La ne Iesu ga vorang i ridi, “Mo lara na song arup mi lekngen eburu minia ri levempanga anan, neni naba song araba ia ri limixin kapmek. ²⁴Nenia, Laradi Mevana, anaba met kerekngan Lovoang Kaala i tong i, ketla naba lok kapmek aleng ti mo laradi naba song araba ia ri limixin kapmek. Giba lox avukat do nenen gitoxo visik ka i.”

^h **26:17** Leluxa limixin me Judaia diga lok katling laaleng, diga vas kaxat boro Isip. La di goxo lok li laais at lengkongkide atdi.

²⁵La ne Judas, mo ga gagas kusu na song araba i, ga lok, “Rabai. Kopmen nenia, do?”

La ne Iesu ga vorang i, “Nenu vam.”

Laanan Kaala at Leeme Silok

(Mk 14:22-26; Lu 22:14-20; 1 Ko 11:23-25)

²⁶Move diga anan la ne Iesu ga lok kaka loxongkide, ga tong avukat ti ne Moroa, ga sebex i la ga raba luvuttadi loklok ka anasa ren min la ga lok, “Mina lok kaka i na la mina anan i; labantuxu rak na.”

²⁷La neni ga lok kaka lakap inin, ga tong avukat ti ne Moroa, la ga raba di min la ga lok, “Nemi axap mina in at na. ²⁸Lada rak na la i lok katling lekabus maxat. Lada rak ba sen su xusu ri limixin buaang, ne Moroa naba doxoma xepe leveloklok kakapmek atdi. ²⁹Nia a tong i rinimi do nia noxo in at lavaen i ru ka i lingina se ap mo laaleng nia aba in lavaen maxat eburu minimi ro xeneng at Linintoo at ne Tamak.”

³⁰Digak pixan mi loxompixan, la diga vas su la diga vas kaxat uto at Lakaana Olip.

Iesu Ga Vaase Alii Do Ne Pita Naba Sok Tixirixes I

(Mk 14:27-31; Lu 22:31-34; Jo 13:36-38)

³¹Melemu ne Iesu ga lok tidi, “Lingina at laxanimin, nemi axap minaba subu basinge ia; i lok ngan Lovoang Kaala i tong i xeretna,

‘Nia ne Moroa, anaba sep laradi loklok tatao at levesipsip la levesipsip at loxonbinam sipsip dinaba epeseves.’ *Sak 13:7*

³²Ketla melemu at laxakatu kaxat amlong tarak, nia abamgo rinimi uto Galili.”

³³La ne Pita ga lok tin, “Keke i do nedi axap dina subu basinge u, nenia xopmen tinotno noxo subu.”

³⁴La ne Iesu ga lok tin, “Nia a tong tuturun i ru; lingina at laxanimin laxaxak noxovisi na reng, la nenu unaba sev apkap naba vantun do uxoklen ia.”

³⁵La ne Pita ga vaase lolos tin keretna, “Do dina lok do dina sev amer ia, nenia noxo sok tixirixes u.” La luvuttadi loklok ka anasa axap diga tong box i xuren.

Iesu Ga Ngising To Getesemane

(Mk 14:32-42; Lu 22:39-46)

³⁶Melemu ne Iesu gat pas uto at lara loxot, laasen teren Getesemane. Luvuttadi loklok ka anasa ren diga emu min, diga rupot la ni ga lok tidi, “Mina xis de. Anat pas lixilik uto xusu ana lok lising.” ³⁷La ni ga lam ka ne Pita mi lumdak at ne Sebedi, la lainbulu silok ga suxuna lorooro ren.

³⁸La ni ga lok tidi, “Lorooro rak i umsu mi lainbulu silok mo na lox amer ia. Minak lok de la mina kuxut tooro ia.”

³⁹La ne Iesu ga vas silatla xakalik, la ni ga subu midi mi lumeren uto xopok at laxangka la ga sing ne Moroa xeretna, “Tamak. Kereva, i epovo do una lok pes na lumumuat basinge ia? Ketla nemen gat uta mumu asu lavavara rak, una mu asu lavavara ram.”

⁴⁰La ne Iesu gamlong saparap luvuttadi loklok ka anasa ren la ga long lenget ka di, diga unga. La ni ga lok ti ne Pita, “Kereva, mixo epovo nap kip na lumumuat eburu minia at loxonaleng lixilik mun? ⁴¹Mina reven tatao la mina ngising kusu mi noxo subu at loklok tong pen. Loroonan at laradi i epovo ri rongga res, ketla labantuxu ren i molos.”

⁴²La ne Iesu ga vas silatla xakalik ga sev agepura la ga sing, “Tamak. Do ixo epovo una lok pes na lumumuat basinge ia se nia ana lox epovo i, i lox avukat; ana mu asu mun lavavara ram.”

⁴³Iesu gamlong uto at luvuttadi loklok ka anasa ren la ga long lenget ka di, diga unga manga, mila lemeren di ga unga. ⁴⁴La ni ga ke di la ga vas kaxat basinge di ga sev avantun kusu na sing; la ga sing amu mi nom levelinga ni ga ngising pam min.

⁴⁵Melemu ni gamlong uto at luvuttadi loklok ka anasa ren la ga lok tidi, “Kereva, move mi unga? Pen ba i nom. Loxonaleng i auret do lara laradi na song araba ia, Laradi Mevana, ri limixin bilinga. ⁴⁶Mina xatu. Ata vas tangarang na laradi boro it pas kusu nam taba minia ri limixin kapmek.”

Diga Ranga Alis Ne Iesu

(Mk 14:43-50; Lu 22:47-53; Jo 18:3-12)

⁴⁷Iesu move ga paase la ne Judas ga rupot. Neni lara at lasangaun mi legepura luvuttadi loklok ka anasa at ne Iesu. Buaang limixin diga emu min, digap kip levemparise sepsep la levempukup sepsep. Lavamaasa silok la loxongkulao silok at limixin me Israel diga riki di. ⁴⁸Avot ti na, ne Judas ga tong li loklok katling kusu diba ven kibis ne Iesu. Judas ga lok tidi, “Mo lara, nia aba nes i, neni vam ne Iesu. Mina ranga alis i.”

⁴⁹La soso mun ne Judas ga vas saparap ne Iesu la ga lok, “Laxanimin avukat, Rabai.” La ni ga nes i.

⁵⁰La ne Iesu ga lok tin, “Lentangas tarak. Una lok soso nom lavanga u vara i do una lox i.”

La mo limixin diga vosiga ne Iesu la diga ranga alis i. ⁵¹Lara at luvuttadi loklok ka anasa ren ga ven i na la ga rev asu lavarise sepsep teren la ga sep korop kepe labaalung at lasaxaruki at lamaasa gomgo.

⁵²La ne Iesu ga lok tin, “Lok li amlong lavarise sepsep taram mila nedi di sep limixin mi lemparise, diba met kuren. ⁵³Nenia a epovo ana ro ri ne Tamak la neni ba raba ia mi lubang angelo, luutus atdi ba volo lavanuti sangaun mi legepura larabin sangsangaun kobot (72,000) lubang angelo. ⁵⁴Ketla keke nga di mila nia aba lox asorun mo levengkot at Lovoang Kaala i tong asu i do na lavanga naba vot.”

⁵⁵Ap mo loxonaleng ne Iesu ga lok ti mo limixin, “Tila mi vot de mi levemparise sepsep la levempukup sepsep kusu mina ranga alis ia? Nenia xopmen ana vaxaru kaxat ka teesep. Buaang levenaleng nia agat kis to xeneng at loogu laplavang kusu ana anasa limixin, ketla nemi xopmen mi goxo ranga alis ka be ia go. ⁵⁶Na levempanga i ravasu keretna xusu na lox asorun levenmamalagan at lavaeme vapaase alii.” La luvuttadi loklok ka anasa ren diga sixiro axap.

Iesu Ga Tu Ro Melamgo At Luvuttadi Amgomgo at Leme Israel
(*Mk 14:53-65; Lu 22:54-55, 63-71; Jo 18:13-14, 19-24*)

⁵⁷Nedi diga ranga alis ne Iesu, diga lam ka i uto at ne Kaiapas, lamaasa gomgo; go luvuttadi loklox ase at Lenavolo la loxongkulao silok diga rupot pam. ⁵⁸Pita ga mumu asu ne Iesu ro xa vaxalom la ga rupot saparap loogu at lamaasa gomgo la ga vubeles at lemelua. Ni ga xis kopok eburu mi luvuttadi rutu mu xusu na ven lavanga salai naba vot saparap ne Iesu.

⁵⁹Nedi axap luvuttadi amgomgo eburu mi lavamaasa silok ap mo lixitkis buru diga puse ri tevelinga xaxarang kusu dina so raba ne Iesu min la diba epovo na sev amer i. ⁶⁰Ketla di goxo epovo, keke do buaang luvuttadi diga vot kusu dina tong asu tevelinga xaxarang.

At laxavaxap, legepu radi duga vot, ⁶¹la duga lok, “Na laradi ga lok keretna, ‘Nenia a epovo na sele utut kepe na loogu laplavang at ne Moroa la anaba vaxaru amu box i xeneng at lavantun aleng.’ ”

⁶²La lamaasa gomgo ga xatu la ga lok ti ne Iesu, “Ua lavasuun teren la uxu vaase? Kereva, u xopara na vorang na levelinga di sok taba u min.” ⁶³Ketla ne Iesu kopmen goxo tong toxolinga.

La lamaasa gomgo ga lok tin, “At laasen at ne Moroa i rooro amisik, una tong i rinama. Kereva, nenu Lanarong, Nitna ne Moroa?”

⁶⁴La ne Iesu ga lok, “I ruturun, nenia vam. Ketla nia a tong i rinimi. Melemu minaba ven ia, Laradi Mevana, anabat kis saparap lekngen tino ne Moroa i lolos aleng, la anaba vot at loxontakabu boro vana at laxalibet.”

⁶⁵La lamaasa gomgo ga lais korop lavanga singsiga ren la ga lok, “I paase vupu ri ne Moroa. I xap ta lavapaase. Mira ronga vam levelinga ren. ⁶⁶Kereva levendoxoma atnimi?”

La diga vorang i xeretna, “I epovo do neni na met.”

⁶⁷La diga vubis abuxumin lemeren la diga tit pupu i, la lentaba diga pasa i mi levengkikngen di. ⁶⁸Digak lok, “Do nenu Lanarong, una tong kisip ka i do nege i sev u.”

Pita Ga Sev Apkak At Ne Iesu
(*Mk 14:66-72; Lu 22:56-62; Jo 18:15-18, 25-27*)

⁶⁹Pita gat kis to xamang at lemelua la lara loolik, neni lasaxaruki ga vosiga ne Pita la ga lok, “Nenu bok gak lox eburu mi ne Iesu boro Galili.”

⁷⁰Ketla neni ga sev apkap to melamgo atnedi axap, ni ga lok, “Nia xopmen naklen lavanga salai u paase min.”

⁷¹La ni gat pas uto at langas povolo la lara loolik bok ga ven i la ga vaase ri limixin diga tu go. Neni ga lok keretna, “Na laradi gak lox eburu mi ne Iesu boro Nasaret.”

⁷²La ne Pita ga sev apkap manga la ga vangpe, ni ga lok, “Nia xopmen anaklen nom laradi.”

⁷³Melemu lixilik mo limixin diga tu go, diga vosiga ne Pita la diga lok, “I ruturun do nenu lara atdi mila lavapaase ram i lok ngan laradi boro Galili.”

⁷⁴La ni ga vangpe mi levelinga vangpangpe xeretna, “Levelinga rak i ruturun; do xopmen, ne Moroa naba lox asongor ia. Nia axoklen mo laradi.”

La soso mun laxaxak ga reng. ⁷⁵La ne Pita ga doma su at levelinga at ne Iesu ga lok keretna, “Laxaxak kovisi noxo reng, la nenu uba sev apkap naba vantun do uxoklen ia.” La neni ga vas su ukamang la gang teng aleng.

Diga Lok Ka Ne Iesu Uto At Ne Paelat

(Mk 15:1; Lu 23:1-2; Jo 18:28-32)

27 ¹Ga maxantamak suubu nedi axap lavamaasa silok eburu mi loxongkulao silok at lubungmixin me Judaia diga li levendoxoma atdi mumu ne Iesu do diba sev amer i. ²Diga xoxo alis lukngen la diga sat ka i uto at ne Paelat, ni laradi gomgo boro Rom.

Lanmet At Ne Judas

(Gu 1:18-19)

³La ne Judas, laradi ga song araba ne Iesu, ga ven i do diga gagas kusu dina sev amet ne Iesu, la neni ga umsu mi lainbulu silok la ga lox ekun lodoxoma ren la ga raba amlong lavantun sangaun levempilas gamgames ti lavamaasa eburu mi loxongkulao silok. ⁴Ni ga lok, “Nia ara lok pam laxakapmek silok, la ara raba vam limixin esep mi laradi xopmen taxakapmek teren, la i auret ta loxonaleng kusu dina sev amer i.”

La diga lok tin, “Kopmen tekot at nom atnama. Lavanga nga nom taram!”

⁵Kuren la ne Judas ga lu abeles mi mo levempilas gamgames to at loogu laplavang la ga onon; melemu neni gat pas la ga xut amer i.

⁶Lavamaasa silok diga lok ka mo levempilas gamgames la diga lok, “Anai levempilas i ru katling luunun ti lorooro at laradi la Lenavolo i tong i do ixo epovo bok ba xusu ataba lok li i ro at loxot lili pilas.” ⁷La diga epaase mumu i la diga un kaka loxongkangka, laasen teren Laraamang Pota, kusu rik mitmit limixin kading. ⁸Kuren la diga so asen mo loxot

do ‘Loxongkangka at Lada,’ ise at na levenaleng mo laasen ik lok. ⁹At na mun levempanga la levelinga at leeme vapaase alii ne Jeremia ga sorun, ni ga lok,

‘Diga lok ka lavantun sangaun levempilas gamgames, ni luutus limixin me Israel diga siam min do ri un i, ¹⁰la diga lok ka mo levempilas kusu ri un Laraamang Pota kerekngan ne Moroa ga tong i ria.’

Sak 11:12-13; Jer 32:6-9

Iesu Ga Tu At Lavapaase To Melamgo At Ne Paelat

(Mk 15:2-5; Lu 23:3-5; Jo 18:33-38)

¹¹Ap mo mun loxonaleng ne Iesu ga tu ro melamgo at laradi gomgo ne Paelat la ne Paelat ga sue i, “Kereva, nenu loorong silok at limixin me Judaia?”

La ne Iesu ga vorang i, “I ruturun. Nenu xa ura tong pam i.”

¹²Lavamaasa silok eburu mi loxongkulao silok diga sok taba i mi levelinga, ketla neni xopmen goxo vaase porang di. ¹³La ne Paelat ga sue i, “Kereva, u xopara na vorang levelinga atdi?” ¹⁴Ketla ne Iesu xopmen goxo vorang mo levelinga, ni goxo vaase asu tekolonga kusu ri vorang mo levelinga atdi; laradi gomgo ga sangu aleng. ¹⁵At levenmaares axap laradi gomgo boro Rom ga mu asu lara loklok keneng at leluxa silok, laasen teren Lovovolo Pe. Neni gak soxomus asu lara laradi xokoxo do limixin diga lok katling i. ¹⁶Ap mo laaleng lara laradi, laasen teren ne Barabas gak lok at loxokoxo, neni laradi xapmek tinotno. ¹⁷Buaang limixin diga vot eburu xusu ri lok katling laradi xokoxo la ne Paelat ga sue di, “Ua lara mi vara i do nia ana soxomus asu raba nimi min, Barabas koplā ne Iesu di tong i do neni Lanarong?” ¹⁸Paelat gaklen i do lavamaasa silok la loxongkulao silok diga reven peves at ne Iesu la ni lavasuun teren la diga vara i do dina sev amer i.

¹⁹Ap mo loxonaleng Paelat gat kis at loxot kitkis at laradi rongtonga linga; la latkin teren ga lox aonon na levelinga rin, ga lok keretna, “Nemen gat uta lok tavanga ri na laradi kopmen taxakapmek teren, mila itinongo at laxanimin nia ata robo i la labalak ixo xis aulis tino.”

²⁰Ketla lavamaasa silok eburu mi loxongkulao silok diga vaase lolos ti limixin do dina lok katling ne Barabas la dina sev amet ne Iesu.

²¹Paelat ga sue di, “Ua lara atdu nia ana soxomus asu raba nimi min?” La diga vorang i rin, “Barabas.”

²²La ne Paelat ga sue di, “La nenia aba lok lavanga sala ri ne Iesu, di tong i do Lanarong?”

La nedi axap diga vorang i xeretna, “Una vaxarem i at laxaba.”

²³La ne Paelat ga sue di, “Tila mo? Neni ixo lok tavanga xapmek.”

Ketla digap kup lolos keretna, “Paxarem i at laxaba.” ²⁴Paelat ga ven kibis i do limixin di goxopara na ronga levelinga ren, la diga lok do dina

ru kaxat ka leesep. Kuren la neni ga lok ka loxodan la ga gos lukngen to melango at limixin la ga lok tidi, “Kopmen tekot tarak at na. Lavanga mun atnimi.”

²⁵La mo limixin diga lok, “Keke lumumuat at lanmet teren naba nemen pana atnema eburu mi laxamdak mi laxaalik atnama.”

²⁶La ne Paelat ga soxomus asu ne Barabas tidi. Ketla neni ga raba ne Iesu ri luvuttadi esep kusu dinak pixis i la dina vaxarem i at laxaba.

Limixin Esep Diga Lok Kalise Ne Iesu

(Mk 15:16-20; Jo 19:2-3)

²⁷Melemu limixin esep at ne Paelat diga lok ka ne Iesu uto at loogu silok at laradi gomgo, la limixin esep axap go diga ru xangkan i. ²⁸Diga lok kepe levesingsiga ren la diga vaxasiga i mi lavanga singsigaara at loorong silok. ²⁹La diga lok lixiam tin mi livin gagas la diga vaxaxua lavatlak teren min, la diga vaxarebeng i mi lakdak at loorong silok to at lekngen tino. Melemu diga xis tiktikbu ro melango ren la diga lok kalise i. Diga lok, “Ma lok ngangao aleng taram, loorong silok at limixin me Judaia.” ³⁰La diga vubis sanga i, la diga lok ka mo lakdak la digak pixis patlax i min. ³¹Diga lok kalise axav i, la diga lok pes manga nom lavanga singsigaara basinge i la diga vaxasiga manga i mi lavanga singsiga ren. La diga sat ka nga i basinge loogu silok kusu dina vaxarem i at laxaba.

Diga Vaxarem Ne Iesu At Laxaba

(Mk 15:21-32; Lu 23:26-43; Jo 19:17-27)

³²Luvuttadi esep mi ne Iesu diga sixisu ap mo loogu la diga ekip tangarang mi lara laradi boro Sairini, laasen teren ne Simon, la luvuttadi esep diga sox aruru parang i xusu na xip ka laxaba at ne Iesu. ³³Diga rupot to at loxot, loxonasen kot go do Golgata. Lavasuun at na loxolinga do “Lavatlak Tongan.” ³⁴Diga raba ne Iesu mi ladan vaen kusu neni na inin i. Diga lok li vam lara lamarasin teren kusu na lok kepe losongsongot teren. Iesu ga in tong pen i, ketla goxopara i. ³⁵Diga vaxarem i at laxaba la melemu diga lu buru mi lengkonuat kusu ri lok kisip ka nege ba lok kaka levempanga singsiga ren. ³⁶Melemu at nom, digat kis la diga reven ne Iesu. ³⁷To mavana at lavatlak teren diga lok li levelinga, mo ga tong asu lavasuun at lumumuat teren. Nom levelinga ga lok keretna, “Neni ne Iesu, Loorong Silok at limixin me Judaia.” ³⁸La limixin esep diga vaxarem bok legepu radi xapmek saparap ne Iesu, lara saparap lekngen tino la lara saparap lekngen kia. ³⁹Limixin digat pas polo go la diga pirapat lempatlak atdi la diga lok kalise ne Iesu. ⁴⁰La diga lok keretna, “Nenu uga lok do unaba sele utut kepe loogu laplavang la unaba vaxaru amu box i at lavantun aleng. Una lox aroo nga u, mo do nenu ne nitna ne Moroa la una vasi basinge nom laxaba.”

⁴¹La kerepmo bok lavamaasa silok eburu mi luvuttadi loklox ase at Lenavolo la loxongkulao silok diga paase aksaksa rin mi levelinga lolos. Diga lok, ⁴²“Neni ga lox aroo lentaba vetpes, ketla neni ixo epovo do na lox aroo axa i. Kereva, neni loorong tuturun pam na me Israel? Do neni na eng si basinge laxaba, dik ataba nuunu ba ren. ⁴³Ni i nuunu at ne Moroa la i lok do neni ne nitna ne Moroa. Teren, ata ven be i do ne Moroa go naba lox aroo ba i.” ⁴⁴La kerepmo bok luradi xapmek duga merem saparav i, nedu bok duga lok kalise i.

Lanmet At Ne Iesu

(Mk 15:33-41; Lu 23:44-49; Jo 19:28-30)

⁴⁵At lasangaun mi legepu xonaleng, lamain ga vung pavaa mo lenep silok axap, la gak lok se at lavantun konaleng. ⁴⁶At lavantun konaleng ne Iesu ga xup lolos keretna, “Eloi, Eloi lama sabaktani?” Lavasuun at na levelinga xeretna, “Moroa rak, Moroa rak, tila u raba arulu ia?”

⁴⁷Lentaba luvuttadi diga tu go, diga ronga i la diga lok, “I toro ri ne Elaisa.”

⁴⁸La lara laradi ga sixit la ga lok ka loxontamon la ga lox amlu xaka i ro xeneng at lavaen mamao la ga xoxo li i ro at loxonuna la ga lok do na vaxain ne Iesu min. ⁴⁹Ketla lentaba luvuttadi diga lok, “Una tu be, ata ven be i do ne Elaisa go naba rupot ti lok tooro i.”

⁵⁰La ne Iesu ga xup kaxat silok manga la lamamas teren ga rekorop, la ni ga met ta.

⁵¹Ap mo loxonaleng lavatamon silok ga merem to xeneng at loogu laplavang ga rem lais ka ro vana, ga su ro xopok la ga ra ngan ta legepu ban, la laxangka gangne la lemparuat ga tepavagam. ⁵²Laramaaut ga rem bang la buaang limixin at ne Moroa, no diga met ganoxa, diga roo xat amlong. ⁵³Diga onon basinge laramaaut atdi la melemu at laaleng ne Iesu ga roo xat amlong, nedi diga vubeles to xeneng at lemenemen kaala la buaang limixin diga ven di.

⁵⁴Ap mo loxonaleng laasesep at luvuttadi esep eburu mi limixin esep teren diga tu la diga suma langne la levempanga axap ga vot ap mo loxonaleng, diga marat aleng la diga lok, “Neni lamdak tuturun pam at ne Moroa.”

⁵⁵Buaang lavakin bok mo diga tu vaxalom lixilik la diga reven mo levempanga ga vot. Nedi nom lavakin diga mumu asu ne Iesu boro Galili la digak lok tooro box i. ⁵⁶Ne Maria Magdalene eburu mi ne Maria, nenen ne Jems mi ne Josep; la nenen bok at lumdak at ne Sebedi.

Limixin Digak Mit Ne Iesu

(Mk 15:42-47; Lu 23:50-56; Jo 19:38-42)

⁵⁷Taba nga ukantinao lara laradi nopnovos boro Arimatia, laasen teren ne Josep, ga vot la neni bok lara atnedi luvuttadi loklok ka anasa

at ne Iesu. ⁵⁸Neni ga vot parap ne Paelat la ga sing i do neni na raba i mi labantuxu at ne Iesu. La ne Paelat ga siam dola na raba ne Josep mi labantuxu at ne Iesu. ⁵⁹La ne Josep ga lok ka i la ga bom i mi labantamon maxat, ⁶⁰la ga lok li i ro xeneng at lamaaut maxat teren, limixin diga ke i ro xeneng at lavaruat. La melemu neni ga xavun pe lumusaragu at lamaaut mi lavaruat la ga onon. ⁶¹Maria Magdalene eburu mi lara ne Maria vetpes bok mo dugat kis to melango at lamaaut.

Luvuttadi Rutu Mu Diga Kuxut Mi Lamaaut At Ne Iesu

⁶²Ap mo laaleng melemu, ni laaleng kaala, lavamaasa eburu mi lubung Parisi diga vot pasa ne Paelat. ⁶³La diga lok tin keretna, “Leeme Silok, nema ma doma mumu levelinga ap mo laradi xaxarang at laaleng neni move ga rooro la ga lok keretna, ‘Anaba roo xat amlong basinge lanmet melemu at lavantun aleng.’ ⁶⁴Kuren la, nema ma vara i do una tong i ri luvuttadi rutu mu la dinaba kuxut mi lamaaut teren naba se at laaleng sev avantun kusu luvuttadi loklok ka anasa ren di noxo epovo rit pas ti nem kaka labantuxu ren, la melemu dina tong i ri limixin dola neni ira roo xat amlong pam basinge lanmet; la na laxaxarang melemu, ni naba lok kapmek tinotno ri lara avot.”

⁶⁵La ne Paelat ga tong i ridi xeretna, “Mina lam kaka tuvuttadi rutu mu la minat pas la mina soxoba avukat lamaaut kerekngan miklen i.”

⁶⁶Kuren la diga vas kaxat la diga soxoba avukat lamaaut mi levempanga soksoxoba ren, la diga on basinge luvuttadi rutu mu e ri reven tatao lamaaut.

Lorooro Xat Amlong At Ne Iesu

(*Mk 16:1-10; Lu 24:1-12; Jo 20:1-10*)

28 ¹Melemu at laaleng kaala, taba umaxantamak at laaleng avot ap mo luik, ne Maria Magdalene nedu mi lara ne Maria vetpes bok dugat pas ti ven lamaaut.

²La soso mene nga langne lolos ga vot, la laangelo at Leeme Silok ga vas si boro vana at laxalibet, gat pas ti lamaaut, la ga xavun kepe lavaruat at lamaaut la garat kis to mavana ren. ³Levereven teren ga lok ngan lavanga i mam, la levesingsigaara ren gan bun aleng ngan lusugao. ⁴Luvuttadi rutu mu diga marat aleng la diga dede la diga mer aroo.

⁵La laangelo ga vaase ri lutkin keretna, “Nemen gat muta marat, aklen i dola nemu mu reven pupuse ri ne Iesu, no ga rem to at laxaba. ⁶Ketla kopmen ta i de, no ira roo xat pam kerekngan levelinga ni ga tong i. Ude numu la muna ven loxot diga vaxamdi i ren. ⁷Muna vas kaxat soso la muna tong i ri luvuttadi loklok ka anasa ren dola neni ira roo xat amlong pam basinge lanmet la no nga iramgo vam tidi uto Galili la dinaba ven ba i ve. La mo nga nia a tong pam i rinumu.”

⁸Kuren la duga vas kaxat soso basinge lamaaut la duga umsu mi lanmarat, ketla duga umsu bok mi lomomo. Duga sixit soso ri tong i ri luvuttadi loklok ka anasa at ne Iesu. ⁹La soso mun ne Iesu ga ru tangarang du la ga lok tidu, “Lenmila nak lok buru minumu.” La nedu duga vas li ren la duga rebeng tu at luxangkedek teren la duga lotu saparav i. ¹⁰La ne Iesu ga lok tidu xeretna, “Nemen gat muta marat. Munat pas la muna tong i ri luvuttadi loklok ka anasa rak dola dinat pas uto Galili la dinaba ven ia ve.”

Lavapaase Asu At Luvuttadi Rutu Mu

¹¹At loxonaleng lutkin duga vas kaxat basinge lamaaut, mo luvuttadi esep diga reven tatao lamaaut, digamlong uto at lemenemen silok la diga tong asu levempanga axap diga ven i ri lavamaasa silok. ¹²Lavamaasa silok diga vot buru mi loxongkulao silok la diga vit li lodoxoma la diga raba laxampilas solo ri nom luvuttadi esep. ¹³La diga lok tidi, “Minaba tong i dola luvuttadi loklok ka anasa ren diga vot at laxanimin la diga nem kaka labantuxu ren at loxonaleng nemi miga unga. ¹⁴Dola laradi gomgo, ne Paelat na ronga i na, nema maba vaase arepukus lodoxoma ren dola nemi mixo lok taxapmek at nai, la nemi guta doxoma mu solo i nom.” ¹⁵Kuren la luvuttadi rutu mu diga lok ka nom levempilas la diga lox epovo levelinga diga tong taba di min. Kuren la ana lavapaase asu ira peseves keneng at leme Judaia i se at na levenaleng.

(Mk 16:14-18; Lu 24:36-49; Jo 20:19-23; Gu 1:6-8)

¹⁶Melemu lasangaun mi legesara luvuttadi loklok ka anasa ren digat pas uto at loxongkaana ro Galili no ne Iesu ga tong li i ridi. ¹⁷La at loxonaleng diga ven i, diga lotu saparav i, ketla lentaba atdi levendoxoma atdi ga sixit ekarakat. ¹⁸La ne Iesu ga vas saparap nedi la ga lok tidi xeretna, “Moroa gara raba vam ia mi lololos axap to vana laxalibet la de xopok at lavatbung menemen. ¹⁹Kuren la mina onon la mina lox ase limixin at lengkot axap kusu diba ravasu ngan luvuttadi loklok ka anasa rak; la mina sep susu di mi laasen at ne Temen dik la ne Nitna eburu bok mi Loroonan Kaala. ²⁰La mina lox ase di xusu dinang tonga res at levelinga axap nenia agara tong pam i rinimi. La nenia anabak lox eburu amisik minemi naba se at laxavaxap at na lavatbung menemen.”

Mak

Lagale Lavavang At Ne Iesu Karisito Mak Ga Malagan I

Levelinga Loklox Axasep

Levenmaares 55-65 A.D.

Mak neni ga malagan levelinga mumu ne Iesu, Nitna ne Moroa. Laasen at ne Mak neni ne Jon Mak, neni ga silok to Jerusalem la neni ga lok tooro ne Pita, Pol, la ne Banabas mi lugugu. Neni lamdak at neton ne Banabas, lentangas at ne Pol. Loxongkulao silok at lotu diga nua i do ne Mak nat pas uto Rom, la neni gak lox eburu mi ne Pita. Pita ga tere la ga paase la ne Mak ga malagan li levelinga at na lubuk. Neni ga malagan i xusu limixin boro Rom diba xasep at lempapaase at ne Iesu. Limixin boro Rom diga vavara aleng levenasen silok; kuren la neni ga malagan na lubuk mi levelinga xeretna. Iesu ga silok aleng la ga ruuna lolos kusu ni na lox aroo limixin la na riki pes lubunggas basinge limixin, la na soxomus nedi basinge loxokoxo at mo laxapmek digak lok keneng teren.

Lengkot silok keneng at na lubuk:

1:1-13 Lovotpot at ne Jon, laradi sep susu, la ne Iesu.

1:14-9:50 Leven gugu at ne Iesu ro Galili.

10:1-52 Lavatpas at ne Iesu uto Jerusalem.

11:1-14:3 Levenanasa at ne Iesu ro Jerusalem.

14:4-14:47 Larangtanga alis la lanmet at ne Iesu.

16:1-20 Iesu ga ro xat amlong basinge lanmet.

Lavavang At Ne Jon Laradi Sep Susu Limixin

(Mt 3:1-12; Lu 3:1-18; Jo 1:19-28)

1 ¹Na Lagale Lavavang mumu ne Iesu Karisito, Nitna ne Moroa. ²Ga ru ka i kerekngan ne Aisaia leeme vapaase alii at ne Moroa ga

malagan alii at Lovoang Kaala xeretna,

‘Nenia naba riki laradi vapaase rak nabamgo ru la na gagas li langas tu. ³Lara mo ip kup to at lamatbin keretna, mina gagas li langas ti Leeme Silok kusu rin tit pas; mina lox akmokso larangas tin.’ *Mal 3:1; Ais 40:3*

⁴La ne Jon, laradi sep susu ga rupot to at lamatbin la ga sep susu limixin la ga vavang keretna, “Mina leeng basinge laxakapmek atnimi la mina lok ka lesep susu, la ne Moroa naba doxoma xepe leveloklok kakapmek atnimi.” ⁵La buaang limixin digat pot pasa amisik ne Jon to at lamatbin. Digat pas boro at lemenemen silok Jerusalem la levengkot axap at lenep silok Judaia. La diga tong asu leveloklok kakapmek atdi la ne Jon ga sep susu ba di ro at ladan sen Joridan. ⁶Jon ga siga lavanga singsiga diga lox i mi laxabinim at lakamel; neni ga etara avarang lavanga singsiga ren mi labanbaane diga lox i mi labantuxu at lavanga mi lavanuet kangkedek teren. La neni ga anan levenasku mi laxanmisiu boro at laxairing. ⁷La neni ga vavang bok keretna, “Melemu rak lara ba rupot. Lololos teren i volo lololos tarak. Axo epovo xusu ana soxomus luvanga vatpas teren mila neni is silok aleng tia.” ⁸Nenia a sep susu nimi mi ladan mene nga, ketla neni naba sep susu nimi mi Loroonan Kaala.”

Jon Ga Sep Susu Ne Iesu

(Mt 3:13–4:11; Lu 3:21-22; 4:1-13)

⁹Ap mo levenaleng, ne Iesu ga la boro at lenep Galili at lemenemen teren Nasaret la ga vot pasa ne Jon; la ne Jon ga sep susu i ro ladan sen Joridan. ¹⁰La ne Iesu ga vas basinge ladan la soso mun neni ga ven laxalibet ga rem suang, ga ven bok Loroonan Kaala ga lok ngan lamno ga rava si, la gasga i. ¹¹La laxaka at lara ga laa boro vana at laxalibet ga lok keretna, “Nena ne nuruk. A balamu i la a lok momo min.”

Satan Ga Lok Tong Pen Ne Iesu

¹²La soso mun Loroonan Kaala ga riki ne Iesu uto at lamatbin. ¹³La neni ga nemen e at lavanuet sangaun aleng. La ne Satan gak lok tong i. La ap mo lenep lempanga sio mi lavanuet kangkedek atdi diga nemen box e la lubungangelo digak lok tatao ne Iesu.

Iesu Ga Ro Xaka Lavanuet Luvuttadi Sepsep Mat

(Mt 4:12-22; Lu 4:14-15; 5:1-11)

¹⁴At lara laaleng diga ranga alis ne Jon la diga lok li i ro at loogu xokoxo, la melemu ren ne Iesu gamlong uto at lenep Galili la ga tong asu Lagale Lavavang at ne Moroa. ¹⁵Neni ga vavang keretna, “Levenaleng

^a **1:7** Anai ni lavaapaase poovo ri lox asuusu i do ne Jon ga lox asu langsung loklok ngangao ren ti ne Iesu.

ngangais ira xap ta. Langas ti Linintoo at ne Moroa mo nga i auret. Mina leeng basinge leveloklok kakapmek atnimi la mina nuunu at Lagale Lavavang.”

¹⁶La ne Iesu gat pas saparap lavatdan kis Galili la ni ga ven legepu radi sepsep mat, ne Simon mi ne Endru; nedu leeton duga loloa mi laxatkat to at lavatdan kis. ¹⁷La ne Iesu ga lok tidu xeretna, “Ude numu, muna mumu asu ia, nenia anaba lox ase numu mi langas ti sat kaka limixin i ngan tai mo, nemu mu loloa ka lenmat.” ¹⁸La soso mun nedu duga on basinge laxatkat atdu la duga mumu asu i.

¹⁹La ne Iesu gat pas uto lixilik la ga ven ne Jems, nitna ne Sebedi la ga ven bok neton, ne Jon; nedi digat kis at lese pang la diga lox agagas li lengkatkat. ²⁰La soso mun ni ga ro xaka du la duga vas kaxat, duga on basinge ne temen du mi luvuttadi gugu ro at lese pang la duga mumu asu i.

Iesu Ga Riki Xepe Lagas Basinge Laradi

(Lu 4:31-37)

²¹La ne Iesu eburu mi luvuttadi loklok ka anasa ren diga onon uto at lemenemen Kapre naum la at laaleng kaala diga vubeles at loogu singising la ne Iesu ga anasa limixin. ²²La nom limixin diga sangu mila levelinga ren ga mumuat, neni xopmen goxo anasa ngan luvuttadi loklox ase at Lenavolo. ²³La soso mun lara laradi ga xatu upana ro xeneng at loogu singising, lagas ga suxuna i la ni gap kup keretna, ²⁴“Iesu me Nasaret, unaba lok lavanga salai rinama? Uga rupot kusu unaba sep kepe axap nema, do? Aklen u. Nenu ne Nitna ne Moroa.”

²⁵La ne Iesu ga vaase lolos tin, “Una lok pilo. Una sixisu basinge na laradi.” ²⁶La nom lagas ga lox adede lolos nom laradi, la gap kup lolos, la ga sixisu basinge ba i.

²⁷La limixin axap diga sangu aleng la diga epaase xeretna, “Loklok salai mo? Laanasa maxat mo, do? Lololos teren i silok. Iesu i tong asu levelinga ti lubanggas la di mu asu i.” ²⁸La nom limixin diga onon la diga tong nom lavanga ne Iesu ga lox i la limixin axap to at lenep Galili diga rong a i.

Iesu Ga Lox Aroo Buaang Limixin

(Mt 8:14-17; Lu 4:38-41)

²⁹La ne Iesu ga vas su at loogu singising la soso mun nedi mi ne Jems la ne Jon diga vubeles at loogu at ne Simon la ne Endru. ³⁰La luvutulom at ne Simon ga meres mi liplivi la gak midi ro at loora ren. Diga tong i nom ti ne Iesu, ³¹la soso mun ne Iesu ga vot pasa i, ga rebeng axatu i la liplivi ga xap basinge i; la ni ga lox agagas lempanga anan tinedi.

³²Ga ukantinao laxangking ga lotup, limixin me go diga vot pasa ne Iesu, diga lam kaka limixin mi laxanasen anmeres la limixin lubanggas

ga suxuna di. ³³Buaang limixin ap mo lemenemen diga vot saparap ne Iesu ap mo loogu. ³⁴La ne Iesu ga lox aroo limixin mekmeres la ga riki xepe lubunggas basinge limixin; lubunggas digaklen i do ne Iesu nitna ne Moroa, ketla ne Iesu goxo siam do dina tong asu i ri limixin.

Iesu Ga Vavang To Galili

(Lu 4:42-44)

³⁵Taba umaxantamak suubu gak lok main kakalik move, Iesu ga aus la ga vas su la gat pas uto at lenep mimila la neni ga lok lising. ³⁶La ne Simon eburu mi larapen tangas diga puse rin ³⁷se diga vuse ka i, la diga lok tin keretna, “Limixin axap di puse u.”

³⁸La ne Iesu ga lok tidi xeretna, “Ata onon uto at levenmenemen petpes kusu ana vavang bok go. Ni lavasuun teren la nenia aga si ude xopok at lavatbung menemen.” ³⁹La ne Iesu gat pas tangtagap at levengkot axap at lenep Galili. La ni ga vavang to at laraugu singising atdi la ni ga riki xepe lubunggas basinge limixin.

Iesu Ga Lox Aroo Laradi

(Mt 8:1-4; Lu 5:12-16)

⁴⁰At lara laaleng lara laradi ga vot pasa ne Iesu. Lanmeres gak lok teren, diga tong i mila lanmeres gu; la neni ga sing ne Iesu kusu ne Iesu na lox aroo i. La neni ga xis tiktikbu mi luvatgulom teren ti lok ngangao at ne Iesu la ga lok tin, “Do u vara i, una lox aroo ia.”

⁴¹La ne Iesu ga balamu i la ga song asu mi lekngen la ga long tu ren la ga lok tin keretna, “A vara i, lanmeres taram na xap ta.” ⁴²La soso mun nom lanmeres ga xap la nom laradi ga lox avukat.

⁴³La ne Iesu ga paase lolos tin la ga riki aonon i, ⁴⁴ni ga vaase rin keretna, “Nemen uta tong asu i na ri teta, ketla unat pas uto at lamaasa la neni na ven mumu u; melemu una lok laramtaba ram ti ne Moroa ngan ne Moses ga tong i xusu ri lox asuusu i ri limixin axap do nenu mo ura lox avukat ta.” ⁴⁵Ketla nom laradi ga vas kaxat la ga tong asu i ri limixin axap; kuren la ne Iesu gat pas lipe mene ro at levenmenemen, mila buaang limixin diga lox angtang amisix i. La ni ga nemen to at lamatbin, ketla buaang limixin move diga tupot pasa i, diga laala boro at levengkot axap.

Iesu Ga Lox Aroo Laradi Labantuxu Ren Ga Molo Axap

(Mt 9:1-8; Lu 5:17-26)

2 ¹Lentaba levenaleng ga xap la ne Iesu gamlong uto Kaprenaum la limixin diga rongga levelinga do ne Iesu ga rupot to at loogu ren. ²La buaang limixin diga vot eburu go la nom loogu ga umsu la no ma xamang bok saparap lumusaragu ga umsu bok. La ne Iesu ga vavang tidi.

³La lentaba limixin diga rupot to at nom loogu la lavanuet atdi digap kip lara laradi mi loora ren. Nom laradi ga meres, labantuxu ren ga molo axap. ⁴La nedi di goxo epovo dina vot saparap ne Iesu min mila buaang limixin diga ru pe lumusaragu. Kuren la nedi diga eng urut at nom loogu la diga das avolo loxot to mavana saparap ne Iesu la diga lox asi nom laradi mekmeres mi loora ren. ⁵La ne Iesu ga ven kibis lunuunu atdi la ga lok ti laradi mekmeres keretna, “Lentangas tarak. Leveloklok kakapmek axap taram, a doxoma xepe i.”

⁶La lentaba luvuttadi mamalagan digat kis go, diga rongga nom levelinga at ne Iesu la diga esue at levendoxoma atdi xeretna, ⁷“Na laradi i paase kereva? I paase vupu ri ne Moroa. Nege i epovo ti doxoma xepe leveloklok kakapmek? Moroa xusuk i epovo.”

⁸La soso mun ne Iesu ga doxoma xisip nom levendoxoma atdi la ga lok tidi xeretna, “Tila nemi mi doxoma ekarakat mumu i na levelinga rak? ⁹Ua levelinga xopmen na lolos ti tong i; leveloklok taram ara doxoma xepe vam i, kopla ana tong i do, katu kaxat la unat pas? ¹⁰Ketla a vara i do minaklen i do, nenia, Laradi Mevana, a ruuna lololos at na lavatbung menemen ti doxoma xepe leveloklok kakapmek.” La ni ga lok ti mo laradi mekmeres keretna, ¹¹“A tong i ru, una xatu upana, la una xip kaka loora ram, la una vas kaxat ukolonu.” ¹²La nom laradi ga xatu kaxat, la ga xip kaka loora ren la ga vas kaxat. La nedi axap diga ven i, diga sangu aleng la diga emi asu mi ne Moroa la diga epaase xeretna, “Nedik goxovisi ven tempanga xeretnom.”

Iesu Ga Ro Xaka Ne Levi

(Mt 9:9-13; Lu 5:27-32)

¹³La melemu ne Iesu ga on basinge manga lemenemen Kaprenaum la gat pas saparap lavatdan kis Galili. La buaang limixin diga vot pasa i la neni ga anasa di. ¹⁴La melemu ni gat pas uto lixilik la ga ven ne Levi nitna ne Alpias, gat kis to at loogu xekepe pilas. La ne Iesu ga lok tin keretna, “Una mumu asu ia.” La ne Levi ga xatu la ga mumu asu i.

¹⁵Melemu ne Iesu gat kis la ga anan to at loogu at ne Levi. Luvuttadi xekepe pilas la limixin kapmek^b diga anan eburu mi ne Iesu. Buaang limixin kerepmo diga mumu asu ne Iesu. ¹⁶La luvuttadi mamalagan mi lubung Parisi diga ven i do ne Iesu ga anan eburu mi nom limixin kapmek la diga lok ti luvuttadi loklok ka anasa at ne Iesu xeretna, “Tila ne Iesu i anan eburu mi nom luvuttadi loklok ka pilas la limixin kapmek?”

¹⁷La ne Iesu ga rongga i nom la ga lok tidi xeretna, “Limixin di lox avukat, kopmen dinak pakes ti loklok tooro, ketla nedi xusuk mun dik

^b 2:15 Anai, nedi luvuttadi me Judaia ua kopmen di goxo mumu asu avukat lenavolo mi loklok atdi limixin me Judaia.

meres. Aga rupot kusu ri ro xaka limixin kapmek dikpakes kusu dina leeng, la nia goxo rupot kusu rinedi limixin mokmokso.”

Iesu Ga Paase Mumu Loklok Ti Mun An

(Mt 9:14-17; Lu 5:33-39)

¹⁸At lara laaleng luvuttadi loklok ka anasa at ne Jon, laradi sep susu limixin, diga mun anan la lubung Parisi bok diga mun anan. La lentaba limixin diga vot pasa ne Iesu la diga sue i xeretna, “Luvuttadi loklok ka anasa at ne Jon di mun anan la lubung Parisi bok di mun anan; tila ba luvuttadi loklok ka anasa ram kopmen dina mun anan?”

¹⁹La ne Iesu ga vorang i ridi mi lavapaase poovo xeretna, “At loklox anarong ti leepot, lentaba at laradi epot di noxo mun anan mila laradi epot ik lox eburu midi. ²⁰Ketla laaleng move naba rupot la limixin petpes diba lam ka laradi epot basing leentaba ren la dina mun anan ba ap mo laaleng.”

Lempapaase Poovo Mumu Levenanasa Maxat At Ne Iesu

²¹La ne Iesu ga tong asu lavapaase poovo ridi xeretna, “Kopmen teta na balais ka loxontamon maxat kusu na sok gatgat pe lamamara at labantamon maut; mo do neni na lox i xuren, loxontamon maxat ira lok kapmek pam la kopmen na epovo bok ba kusu ata ba lok tavanga min; la nom loxontamon maxat noxo epovo kusu na lok pe avukat lamamara at loxontamon maut.”

²²La ne Iesu ga vaase bok tidi mi lavapaase poovo. Ni ga lok keretna, “Kopmen tara na soli li laxadan vaen maxat uto xeneng ti labantuxu at lavatme i maut pam. Mo do neni na lox i xuren, mo labantuxu maut ba repagam la laxadan vaen naba soli su ukamang, la labantuxu maut naba lok kapmek. Laxadan vaen maxat mina soli li i at labantuxu maxat.”

Iesu Ga Paase Mumu Laaleng Kaala

(Mt 12:1-8; Lu 6:1-5)

²³At lara laaleng kaala Iesu mi luvuttadi loklok ka anasa ren diga vas polo lentaamang piao la luvuttadi loklok ka anasa ren diga dik ka levempeven piao la diga anan i. ²⁴La lubung Parisi diga ven i nom la diga lok ti ne Iesu xeretna, “Pen ba i nom. Dira los polo vam Lenavolo, i tong i do nemen mitak lok lempanga keretnom at laaleng kaala.”

²⁵La ne Iesu ga lok tidi xeretna, “Mina doma su ap mo lempanga ne Devit, ga lox i at laaleng neni eburu mi limixin teren digak pakes la diga roxo. ²⁶Neni ga vubeles at loogu at ne Moroa ap mo lamaares ne Abaita neni laradi gomgo at lavamaasa. La ne Devit ga lok ka mo lengkongkide digam taba min ti ne Moroa, la ni ga anan teren la ga raba bok loxot teren ti limixin teren. La kerepmo diga los polo Lenavolo, mila lavamaasa kusuk mun diga anan mo lengkongkide.”

²⁷La ne Iesu ga lok bok tidi xeretna, “Moroa ga lok li laaleng kaala ri lok tooro limixin. Neni goxo rudum li limixin kusu ri lok tooro laaleng kaala. ²⁸La nenia, Laradi Mevana. Nenia leeme silok at laaleng kaala la a lok tatao mo laaleng.”

Iesu Ga Lok Tooro Laradi Lekngen Ga Molo

(Mt 12:9-14; Lu 6:6-11)

3 ¹La melemu ne Iesu ga vubeles manga to at loogu singising. Lara laradi mi lekngen ga molo gat kis go. ²Lubung Parisi diga reven pilo ne Iesu do neni naba lox aroo nom laradi at laaleng kaala. Diga vara i do nedi dina sok taba ne Iesu mi tevelinga. ³La ne Iesu ga tong i ri nom laradi mi lekngen ga molo keretna, “Una xatu kaxat ude melamgo at limixin axap.”

⁴La ne Iesu ga sue lubang Parisi xeretna, “Lavanga salai Lenavolo i siam min kusu ata lox i at laaleng kaala? Ti lok tooro laradi kopla ti lox asongor i? Ti lox arooro laradi kopla ti lok kapmex i?” Ketla di goxo vorang i.

⁵La ni ga ven tangtagap tinedi la ga musak di la ga lok bukbulu aleng bok atla lebelen di ga lolos aleng. La ni ga lok ti nom laradi xeretna, “Una song asu mi lakngam.” La nom laradi ga song asu mi lekngen la lekngen ga lox avukat. ⁶La lubang Parisi diga on basinge loogu singising la soso mun diga vot pasa luvuttadi diga etangas mi ne Erodes. La nedi diga puse ngas kusu dina sev amet ne Iesu.

Buaang Limixin Diga Mumu Asu Ne Iesu

⁷La ne Iesu mi luvuttadi loklok ka anasa ren diga on basinge loogu singising la diga vas si uto at lavatdan kis Galili. La buaang limixin diga mumu asu i. Nedi limixin diga laa boro at lengkot axap, lentaba boro at lenep silok Galili, ⁸lentaba boro at lenep silok Judaia, lentaba boro at lemenemen silok Jerusalem, lentaba boro at lenep silok Idumia, lentaba boro Joridan at lenep dan meso, lentaba boro at lenep silok at lumenemen Taia la Sidon. Nedi axap diga vot pasa ne Iesu mila diga rongga nom lempanga neni ga lox i. ⁹La ne Iesu ga tong i ri luvuttadi loklok ka anasa ren dola dina lok ka lese pang lixilik tin ti ru ren; la neni ga vavang ti limixin to at nom lese pang mila buaang limixin diga vot saparav i la diga umsu aleng. ¹⁰Diga vot saparav i mila neni ga lox aroo buaang limixin. La limixin mi levenasen anmeres diga esi xakape ti long tu ren kusu levenanmeres atdi na xap. ¹¹La lentaba limixin lubanggas ga suxuna di, diga rupot saparap ne Iesu la diga xis tiktikbu mi lempatgulom atdi. Ga se diga ven i, digap kup lolos keretna, “Nenu Nitna ne Moroa.” ¹²La ne Iesu ga vaase pe lubanggas dola di noxo tong asu i ri limixin dola neni Nitna ne Moroa.

Iesu Ga Lok Katling Lasangaun Mi Legepu Radi

(Mt 10:1-4; Lu 6:12-16)

¹³La melemu ne Iesu ga urut at lavatkaana la ga ro xaka mo luvuttadi neni ga vara i do dina gugu eburu min. La nedi diga vot pasa i. ¹⁴La ni ga lok katling lasangaun mi legepu radi la ga so asen di mi luvuttadi vavang. Ni ga soxolik kaka di xusu dina nemen eburu min la kusu neni naba riki di ti vavang ¹⁵la ti riki xepe lubunggas basinge limixin. ¹⁶Levenasen at nom luvuttadi, ne Simon; Iesu ga raba box i mi lara laasen, ne Pita, ¹⁷la ne Jems du lueton mi ne Jon, lumdak at ne Sebedi; Iesu ga raba bok du mi lara laasen, ne Boaneges, lavasuun at nom loxolinga xeretna, di paase mukmusak ngan lavanga i mam. ¹⁸La bok ne Endru la ne Pilip, la ne Batolomiu, la ne Metiu, la ne Tomas, la ne Jems nitna ne Alpias, la ne Tadius, la ne Simon, neni lara at libinam tadi me Selot, ¹⁹la ne Judas Iskariot, neni nom laradi ga song araba ne Iesu ri limixin kapmek.

Iesu Ga Paase Mumu Ne Satan

(Mt 12:22-32; Lu 11:14-23; 12:10)

²⁰Melemu ne Iesu midi diga vubeles uto at loogu la buaang limixin diga vot pasa manga di. La ne Iesu mi luvuttadi loklok ka anasa di goxo epovo na anan mila buaang limixin digak lox angtang i. ²¹Se lentaba at ne Iesu diga rongga i nom, diga lok do dina rupot ti lam kaka i mila diga lok do ne Iesu gang tangku.

²²La luvuttadi loklox ase at Lenavolo diga la boro Jerusalem la diga lok keretna, “Belsebul i suxuna i mi lololos teren la neni leeme gomgo at lubunggas la neni ira riki xepe lubunggas.”

²³La ne Iesu ga ro xaka luvuttadi loklox ase at Lenavolo la ga lok tidi xeretna, “Lavapaase atnimi xopmen nak mokso mila ne Satan noxo riki xepe lubunggas teren.” ²⁴La ne Iesu ga paase poovo ridi xeretna, “Dola tubungmixin di epes di ri lengkon binam tadi, la dia esep eburu minedi xa, kopmen noxo lok nunuan letuna atdi. ²⁵Loxoetemen do di epes ti esep, dinaba xis epeseves. ²⁶La kerepmo bok do ne Satan mi lubunggas dina esep, dinaba epeseves la lololos at ne Satan naba xap.

²⁷Do tara i vara na xip pilo xaka lempanga at loogu at taradi lolos, neni na xoxo alis be mo laradi la melemu na xip kaka ba lempanga ren. ²⁸Nia a tong tuturun i rinimi. Moroa ba doxoma xepe leveloklok kakapmek at limixin axap la neni ba doxoma xepe levelinga kapmek limixin dina paase mumu i min. ²⁹Ket do tara na vaase vupu ri Loroonan Kaala, ne Moroa noxo doxoma xepe rinotno i; neni i bixurun mi laxakapmek ua ixo epovo do ne Moroa na doxoma xepe i.”

³⁰Iesu ga tong i na atla luvuttadi loklox ase at Lenavolo diga lok do lagas ga suxuna ne Iesu.

Nege Libibinat Tuturun At Ne Iesu?

(Mt 12:46-50; Lu 8:19-21)

³¹La nenen mi luvutneton ne Iesu diga rupot. Diga tu to xamang la diga riki lara ri ro xaka i. ³²Buaang limixin diga xis kangkan i la diga tong i rin dola nenen mi luvutneton di puse i.

³³La ne Iesu ga lok, “Nege mo ne naga la nege di luvutnetak?”

³⁴La ne Iesu ga ven tinedi digat kis kangkan i la neni ga lok ti limixin axap keretna, “Na luvuttadi nedi di lok ngan ne naga mi luvutnetak. ³⁵Neni mun i mu asu lavavara at ne Moroa, neni netak kopla neinuk kopla ne naga.”

Lavapaase Poovo At Laradi Gatlotlo Piao

(Mt 13:1-9; Lu 8:4-8)

4 ¹La melemu ne Iesu ga anasa manga limixin saparap lavatdan kis Galili. Buaang limixin diga umsu la diga esi aleng; kuren la ne Iesu ga vubeles to xeneng at lese pang la gat kis teren to at lavatdan kis la limixin axap digat kis to loxon la digang tonga i. ²La ne Iesu ga tong asu laxampanga solo mi lempapaase poovo, la neni ga tong lavapaase poovo xeretna, ³“Mina ronga avukar i na. Lara laradi gat pas uto xataamang, la gatlotlo levennit piao, ga lu gamasa min. ⁴La lentaba levennit piao ga subu at langa. Lavapixa diga vot la diga rok axav i. ⁵La lentaba levennit piao ga subu ro at laxanuat la lengkongkangka lixilik mene gak lok teren. Levenit piao ga su xat soso mun mila goxopmen taxangka solo. ⁶Ise laxangking ga losu upana, ga sev amolos axap nom lempiao, mila levenixe atdi goxo si aleng ukopok la nom lempiao susu diga met axap. ⁷La lentaba ga subu ro at livin gagas. La nom livin gagas ga su xat la ga is nom lempiao la levempiao goxo visik. ⁸La lentaba ga subu ro at loxongkangka avukat la ga su xat, la ga susu avukat, la melemu ga visik laxampeven teren. Lentaba ga visik lavantun sangaun, lentaba ga visik lavanna sangaun, lentaba ga visik legesa sangaun kobot (100).”

⁹La ne Iesu ga lok bok tidi xeretna, “Mina doxoma avukat nom levelinga rak kusu mina xasep teren.”

Iesu Ga Paase Mumu Lempasuun At Lempapaase Poovo

(Mt 13:10-17; Lu 8:9-10)

¹⁰Melemu ne Iesu gak lok mi luvuttadi loklok ka anasa ren la limixin petpes bok la nedi xusuk digak lok min la diga sue i mi lempapaase poovo. ¹¹La ne Iesu ga vorang i ridi xeretna, “Moroa ira raba vam nimi mi lakleklen at Linintoo at ne Moroa, gano ga nemen alipe. Ketla tinedi maxamang, di ronga mene lempapaase poovo; ¹²ni ga lox i xuren kusu,

“Nedi di reven lugugu, ketla di noxo ven kibis i. Ding tonga mo levelinga, ketla di noxo xasep teren; do dina xasep, diba leeng la ne Moroa na doxoma xepe leveloklok kakapmek atdi.”

Ais 6:9-10

Iesu Ga Tong Asu Lavasuun At Lavapaase Poovo
(*Mt 13:8-23; Lu 8:11-15*)

¹³La ne Iesu ga lok bok tidi xeretna, “Kereva, kopmen mina xasep at na lavapaase poovo. Do mixo xasep at na lavapaase poovo, i lolos do mina xasep at lempapaase poovo vetpes bok, ketla ana tong axasev i nom tinimi. ¹⁴At na lavapaase poovo mo laradi lotlo i ru katling laradi i tong asu levelinga at ne Moroa. ¹⁵Lentaba levennit piao ga subu ro at langa i ru katling limixin di ronga levelinga at ne Moroa, ketla ne Satan i tupot soso la ik lok pes i. ¹⁶Ti levenit piao ga subu ro at laxanuat, lengkongkangka lixilik gak lok teren, ni i ru katling nedi limixin di ronga levelinga la soso mun di siam ka i mi lomomo. ¹⁷Ketla ixo vubeles ukeneng at lorooro atdi, la lunuunu atdi ixo nemen abao solo. Kuren la ise do levenmumuat i vot eburu mi levesongsongot mumu levelinga at ne Moroa, lunuunu atnedi i subu soso mun. ¹⁸Ti levenit piao ga subu ro at livin gagas, ni i ru katling nedi limixin di ronga levelinga, ¹⁹ketla di bulu mu solo laxampanga at na lorooro la nom labalamu atnedi ri lapnovos, la levereven peves ti lempanga at na lavatkangka i vubeles at lorooro atdi la di itis nom levelinga la dixo visik tempeven una. ²⁰La ti levennit piao ga subu at laxangka nunuan, ni i ru katling limixin di ronga levelinga at ne Moroa la di siam kaka i la lempanga avukat i ravasu at lorooro atdi. Lentaba di visik lempeven una i epovo at lavantun sangaun la lentaba lavanna sangaun la lentaba legesa sangaun kobot (100).”

Lavapaase Poovo At Lababao
(*Lu 8:16-18*)

²¹La ne Iesu ga tong bok lavapaase poovo ridi xeretna, “Kereva, mi sox aros lababao la mi vung pavaa i mi lavatbaaket koplama mina lok li maxopok at loora? Kopmen. Mi lok li i ro at loxot kasep. ²²Lempanga no ga nemen alipe rinotno, naba ravasu ri lasaxaven; la levelinga, lavasuun teren no i nemen alipe, melemu ba xasep. ²³Do tara i ruuna lubaalung ting tonga, neni na ronga avukat na levelinga.”

²⁴La ne Iesu ga lok bok tidi xeretna, “Minang tonga avukat na levelinga. La lempanga mi lox i rinedi vetpes, neni mun i nom ne Moroa naba raba nimi min, la loxot bok mavana ren. ²⁵Do tara na siam ka mo levelinga ne Moroa i raba i min, Moroa naba raba box i mi laxasep avukat at levelinga ren; dola tara noxo siam ka levelinga at ne Moroa, Moroa naba lok pes bok laxasep kakalik teren, keke i do neni i doxoma i do im tebeng i.”

Lavapaase Poovo At Levennit I Susu

²⁶La ne Iesu ga tong asu bok lavapaase poovo tidi xeretna, “Linintoo at ne Moroa i lok keretna. Lara laradi gatlotlo levennit piao ro

xataamang, ²⁷la ni gak midi la ga aus at levenaleng axap. Mo levennit piao ga raut la ga susu la nom laradi goxoklen i do mo levempiao ga su kereva. ²⁸La laxangka axa ga lox asuusu mo levempiao. Levempiao ga raut avot, melemu ren levempavaxan teren ga su xat la melemu nom levennit piao ga visik. ²⁹Se mo lempeven teren ga mukun, mo laradi ga riki luvuttadi gugu ren mi lemparise atdi ti sep kin ap mo lempeven piao.”

Lavapaase Poovo At Levennit Mastet

(Mt 13:31-32, 34; Lu 13:18-19)

³⁰La ne Iesu ga tong asu bok lavapaase poovo tidi xeretna, “Nenia ana tong asu lavapaase poovo rinimi xusu mina xasep at Linintoo at ne Moroa i lok kereva. ³¹Linintoo at ne Moroa i lok ngan lara laradi ga lok ka levennit mastet la gatlotlo i ro xataamang teren. Nom levennit i xakalik tinotno ti levenit axap at na lavatbung menemen. ³²Do tara natlotlo i, nom levennit ba su xat silok, la ba silok polo levenuna axap to xataamang. Lengkakan teren ba silok kusu lavapixa bat kis to xeneng at lamamau ren.”

³³Laxampapaase poovo keretnom ni ga vaase asu i ri limixin axap at nom laaleng. Se diga epovo kusu dibaklen ka levelinga ren, ni ga vaase asu i ridi. ³⁴Neni ga vavang mi lempapaase poovo xusuk la ni ga tong asu lavasuun at nai ri luvuttadi loklok ka anasa xusuk mene ren.

Iesu Ga Lox Amila Lavatdan Kis

(Mt 8:23-27; Lu 8:22-25)

³⁵Ap mo laaleng ga ukantinao ne Iesu ga lok ti luvuttadi loklok ka anasa ren keretna, “Ata sen polo lavatdan kis uto at lenep meo.” ³⁶La luvuttadi loklok ka anasa diga on basinge buaang limixin la diga vubeles at lese pang Iesu gat kis teren la diga sen kaxat. Lentaba bok diga sen kaxat mi levesepang atdi. ³⁷La mo langsung lamanman ga mas lolos la lavatdan kis ga repit aleng la ladan ga vubeles uto xeneng at lese pang, la ma lixilik lese pang ga lok do na dong si. ³⁸La ne Iesu gak midi ro melemu at lese pang la ga liingun at lavatliingun. La diga ro aus i la diga xup lolos tin keretna, “Leeme loklox ase. Tila u unga? U xopara na lok tooro nama? I auret kusu ata seeve.”

³⁹La ne Iesu ga xatu kaxat la ga vaase lolos pe lamanman la ga lok ti lavatdan kis keretna, “Unak lok pilo. Una mila.” La lamanman ga xap la lavatdan kis ga mila.

⁴⁰La ni ga lok tidi xeretna, “Tila nemi mi marat? Kereva, kopmen tunuunu atnimi?”

⁴¹La nedi diga sangu aleng la diga epaase xeretna, “Laradi salai na? Lamanman la lavatdan kis dira rongga res at levelinga ren.”

Iesu Ga Riki Xepe Lubunggas Basinge Laradi

(Mt 8:28-34; Lu 8:26-39)

5 ¹La ne Iesu mi luvuttadi loklok ka anasa ren diga rupot to loxon ap mo lavatdan kis to at lenep Gerasa. ²La ne Iesu ga vas su at lese pang la soso mun lara laradi ga vot pasa i. Neni ga laa boro at lenep at larabuang digak mikmit labarongan to xeneng teren. Lagas ga suxuna nom laradi. ³Neni ga nemen to ap mo larabuang la limixin at nom lenep di goxo epovo ri xoxo alis i mi lavaroos sen. ⁴Gano digak lok tong pen i do dina xoxo alis i mi lavaroos sen, ketla neni ga ba korop nom lavaroos sen diga lok li i at lukngen la luxangkedek teren. La tara goxo epovo lolos kusu na ranga alis i. ⁵At levenaleng axap at levenaleng kangking la at lengkanimin neni gat pas tangtagap to xeneng at larabuang la to at lempatkaana la ni gap kup lolos la ga kot labantuxu ren mi lengkonuat.

⁶Se ni ga ven ne Iesu ro vaxalom, ni ga sixit pasa i la ga xis tiktikbu mi luvatgulom teren saparap luxangkedek at ne Iesu. ⁷⁻⁸La ne Iesu ga lok tin keretna, “Mina on basinge na laradi, nenu lagas kapmek.” La nom laradi gap kup lolos ti ne Iesu xeretna, “Iesu, Nitna ne Moroa i silok aleng. U rupot de ri lok lavanga sala ria? Una xaape ri ne Moroa dola u noxo sev asongor ia.”

⁹La ne Iesu ga sue i, “Nege laasen taram?”

Lagas ga vorang i xeretna, “Laasen tarak ne Limixin Buaang, mila nema buaang lubunggas ma suxuna na laradi.” ¹⁰La ni ga sing lolos ne Iesu xusu neni noxo riki xepe di uto at lenep kangka vetpes.

¹¹Buaang laxanbo mo diga nemen auret, diga anan to at lakaana. ¹²La lubunggas diga sing ne Iesu xeretna, “Una riki nema uto ap mo laxanbo la una siam do mana vubeles atdi.” ¹³La ne Iesu ga ke aonon di la lubunggas diga sixisu basinge mo laradi la diga vubeles at laxanbo. La mo laxanbo diga sixit kaxat la diga sixisi ukopok at lakaana la diga los tup to at lavatdan kis la laxanbo diga xong axap. Nom laxanbo ga epovo at legepu abin sangsangaun kobot (2000).

¹⁴La nedi diga lok tatao laxanbo diga sixit kaxat uto at lemenemen atdi la diga tong i na lavanga ri limixin mego la to bok at lengkot petpes. La nom limixin diga laa boro at levenmenemen atdi xusu dina ven mo lavanga ne Iesu ga lox i. ¹⁵Diga vot pasa ne Iesu la diga ven laradi, laxan gas ga suxuna i gano, mo gat kis, la ga siga lempanga singsiga la lodoxoma ren ga lox avukat axap la nedi limixin diga marat. ¹⁶La mo limixin diga vaase asu nom lavanga ne Iesu ga lox i ri nom laradi mi laxanbo. ¹⁷La nom limixin diga sing lolos ne Iesu dola neni na on basinge mo lenep kangka.

¹⁸La ne Iesu ga vubeles at lese pang la mo laradi ga sing ne Iesu xeretna, “I epovo do ana emu minu?” ¹⁹Ketla ne Iesu goxo siam la ga lok

tin keretna, “Una onon uto xolonu ram la una tong lavanga salai Leeme Silok i lox i ru, la i lox asuusu lebelemumu ren tu.” ²⁰La nom laradi ga on basinge ne Iesu la gat pas tangtagap to at lenep silok Sangaun Menemen la ga tong nom lavanga ri limixin axap. La nedi limixin diga sangu aleng ap mo lavanga ne Iesu ga lox i ri nom laradi.

Iesu Ga Lox Aroo Latkin

(Mt 9:18-26; Lu 8:40-56)

²¹La ne Iesu gamlong bok polo ro at lavatdan kis mi lese pang. La buaang limixin diga vot pasa ne Iesu to loxon. ²²Lara laradi ga rupot, neni laradi gomgo at loogu singising; laasen at nom laradi ne Jairas. Ni ga ven ne Iesu la ga xis tiktikbu mi luvatgulom teren saparap luxangkedek at ne Iesu. ²³La ni ga sing lolos ne Iesu xeretna, “Loolik tarak i auret do na met. A vara i dola una vot pasa i la una lok li lukngam teren kusu una lox aroo i la neni noxo met.” ²⁴La ne Iesu ga emu min.

La buaang limixin bok diga emu min la digat pas esi xakape. ²⁵La lara latkin mo ga nemen; lanmeres gaaling gak lok amisik teren at levenaleng axap, ga epovo at lasangaun mi legepu maares. ²⁶Ni gat pot pasa amisik luvuttadi sangsanga ketla diga raba mene i mi levesongsongot la di goxo lok tooro i. Lempilas teren ga xap la mo lanmeres ga sisilok. ²⁷La ni ga ronga i dola ne Iesu ga lox aroo limixin la neni gat pas to melemu saparap ne Iesu eburu mi limixin la ga rebeng tu at lavanga singsiga ren, ²⁸mila ni ga lok do na long tu at lavanga singsiga ren, la ni ba lox avukat ba. ²⁹La soso mun lanmeres teren ga xap la ni ga suma i do ga lox avukat ta.

³⁰La soso mun Iesu ga suma i do lenep at lololos teren ti lox aroo limixin ga ravasu. La neni ga rem gili la ga sue, “Nege i long tu at lavanga singsiga rak?”

³¹La lara at luvuttadi loklok ka anasa ren ga vorang i xeretna, “Buaang limixin dit pas eburu minu. Tila u sue do, ‘Nege i long tu at lavanga singsiga rak’, mila a lok do buaang limixin di long tu at lavanga singsiga ram.”

³²La ne Iesu ga milik tangtagap la ga ven pupuse ti nom lara ga long tu at lavanga singsiga ren. ³³La nom latkin ga umsu mi lanmarat silok, ni ga xasep do lanmeres teren ga xap la ni ga xis tiktikbu mi luvatgulom teren saparap luxangkedek at ne Iesu la ga tong asu lorooro ren tin. ³⁴Ketla ne Iesu ga lok tin, “Latkin, lunuunu ram i lox avukar u. Unat pas at lenmila la lanmeres ira xap tinotno nga.”

Iesu Ga Lox Aroo Loolik

³⁵La ne Iesu move ga paase mi nom latkin la lentaba luvuttadi diga rupot pasa ne Jairas, laradi gomgo at loogu singising. La diga lok ti ne

Jairas keretna, “Loolik taram ira met pam, la nemen uta lox angtang bok ba laradi loklox ase.”

³⁶Ketla ne Iesu goxo ronga res at levelinga atdi la ga lok ti laradi gomgo at loogu singising keretna, “Nemen uta marat. Una nuunu mun tarak.”

³⁷La ni goxo ke tara xusu na emu min, kusus mun ne Pita, ne Jems, du leeton mi ne Jon diga emu min uto at loogu at ne Jairas. ³⁸La diga rupot to at loogu ren la ne Iesu ga ronga limixin diga velas solo, lentaba digang teng silok, lentaba diga saxaanu aleng. ³⁹La ne Iesu ga vubeles at nom loogu la ga lok tidi, “Nemen mitang teng. Loolik kopmen na met, neni i unga mene nga.” ⁴⁰La diga lok kalise i.

La ne Iesu ga riki asu di basinge loogu la ni ga lam ka ne temen mi ne nenen nom loolik eburu mi lavantun luvuttadi loklok ka anasa ren la diga vubeles uto at loxot loolik gak midi ren. ⁴¹La ni ga ranga axatu i mi lekngen la ga lok tin keretna, “Talita kumi.” Lavasuun teren keretna; loolik, a tong i ru, una xatu upana. ⁴²La soso mun mo loolik ga xatu upana la gat pas tangtagap ap mo lenep. Levenmaares teren ga epovo at lasangaun mi legepura. La nedi digak lok go, diga sangu aleng tinotno. ⁴³La ne Iesu ga tong lolos i ridi dola di noxo tong asu nom lavanga ri teta, la ni ga tong i ri ne temen mi ne nenen loolik dola duna raba i mi lempanga anan.

La ne Iesu gat pas tangtagap ti levenmenemen kusu na anasa limixin.

Limixin Me Nasaret Diga Raba Arulu Ne Iesu

(Mt 13:53-58; Lu 4:16-30)

6 ¹La ne Iesu eburu mi luvuttadi loklok ka anasa ren diga vas kaxat basinge mo lemenemen la diga rupot to at lemenemen aulis teren. ²At laaleng kaala Iesu ga anasa ro at loogu singising la buaang limixin diga ronga i la diga sangu.

La diga esue xeretna, “Na laradi ga lok ka na lakleklen solo meva? La neni ga lok ka lodoxoma nunuan meva xusu neni i epovo na lok lempanga sangsangu? ³Neni laradi gugu gu mene la neni ne nitna ne Maria la neni neton ne Jems, ne Joses, ne Judas, la ne Simon, nedi di nemen de la luvurinen bok di nemen de at na lemenemen.” La kerepmo limixin diga raba arulu ne Iesu.

⁴La ne Iesu ga lok tidi xeretna, “Leeme vapaase alii, limixin di lok ngangao ren at lengkot axap, ket to at lemenemen teren, la kantubu at limixin teren la libibinat teren, kopmen dina lok ngangao ren.” ⁵La ne Iesu goxo epovo na lok lempanga sangsangu go, ketla neni ga lok li lukngen mavana at lentaba mun kusu na lox aroo di. ⁶La neni ga sangu aleng mila di goxo nuunu.

Iesu Ga Riki Luvuttadi Loklok Ka Anasa Ren Ti Vavang

(Mt 10:5-15; Lu 9:1-6)

⁷La ne Iesu ga ro xaka lasangaun mi legepura luvuttadi loklok ka anasa ren la neni ga riki gepgepura di uto at levenmenemen petpes. La neni ga raba di mi lololos kusu dina riki xepe lubunggas basinge limixin.

⁸La neni ga vaase pe di xeretna, “Mina lok kaka levengkidak atnimi, ketla nemen mita xip kaka tempanga vetpes bok. Nemen teveluxa, nemen teventat, nemen tevempilas at lempanga lukluxa. ⁹Mina siga luvanga vatpas, ketla nemen mita xip kaka tempanga singsiga ri etara xun.” ¹⁰La neni ga lok bok tidi, “Do mina vubeles at tara temenemen miba nemen at legesa gu, se miba on basinge mo lemenemen. ¹¹Do limixin di noxo siam ka nemi la di noxo ronga levelinga atnimi, mina on basinge mo lemenemen la mina semla xepe lengkakup at lengkangkedek atnimi, i ngan loklok katling tidi xusu ri lox asuusu levenmukmusak at ne Moroa.”^c

¹²La luvuttadi loklok ka anasa ren diga vas kaxat uto at levenmenemen la diga vavang do limixin dina leeng. ¹³La diga riki xepe lubunggas basinge limixin la diga so li ladan avukat at limixin mekmeres ngan loklok at lubungmixin me Judaia la diga lox aroo di.

Jon Laradi Sep Susu Limixin Ga Met

(Mt 14:1-12; Lu 9:7-9)

¹⁴La ne Erodes, loorong silok at lenep silok Galili ga ronga levelinga at lugugu at ne Iesu, mila laasen at ne Iesu ga onon at levengkot axap. Lentaba diga lok do ne Iesu neni ne Jon, laradi sep susu limixin. Diga lok bok dola ne Jon ga roo xat amlong at lanmet, kuren la neni i epovo na lok lempanga sangsangu.

¹⁵Lentaba vetpes diga lok keretna, “Neni ne Elaisa leeme vapaase alii.”

Lentaba diga lok keretna, “Neni lara me gano atnedi lavaeme vapaase alii at ne Moroa.”

¹⁶Ketla ne Erodes ga lok keretna, “Neni ne Jon. Nia agara ra korop pam laxaka ren la ni ga roo xat manga.”

¹⁷Leretere at lanmet at ne Jon keretna. Erodes ga tong i ri luvuttadi esep teren ti ranga alis ne Jon la diga xoxo i la diga lok li i ro at loogu xokoxo. Erodes ga lox i na mila latkin teren ne Erodias ga musak ne Jon. ¹⁸Lavasuun at lumukmusak at nom latkin keretna; ganoxa ne Jon ga vaase sok ne Erodes mila neni ga sak paxat ka ne Erodias, latkin at neton ne Pilip la ga epot teren. ¹⁹Kuren la ne Erodias ga musak ne Jon la ga vara na sev amer i ketla neni goxo epovo, ²⁰mila ne Erodes ga marat at

^c 6:11 Na loklok i lox asuusu i do ne Moroa naba raba lumumuat ti limixin ap mo lemenemen.

ne Jon la ga lok tata i. Erodes gaklen i do ne Jon lagale laradi mokmokso la gang tonga levelinga ren. Neni ga doma solo mumu i nom levelinga at ne Jon, ketla ni ga lok momo ring tonga i.

²¹Ketla ne Erodias ga vuse ka langas ti sev amet ne Jon keretna. At lara laaleng ne Erodes ga lok laanan ti lok katling mo laaleng nenen ga visix i ren. Lavaeme silok at lugugu at ne Erodes mi luvuttadi esep amgomgo ren mi loxongkulao amgomgo bok at lenep Galili digak lok at nom laanan. ²²La lara loono maxat, neni loolik at ne Erodias ga tii, la ne Erodes eburu minedi diga anan diga lok momo ren la ne Erodes ga lok ti nom loono keretna, “Una tong asu lavavara ram ti tavanga la nia ba raba u min.” ²³La neni ga lok lavangpangpe rin keretna, “A paase tuturun at lemeren ne Moroa. Nia aba raba u mi tevempanga u vara i, i epovo at loxonatat at lempanga axap tarak.”

²⁴La mo loono ga sixisu la ga sue nenen keretna, “Lavanga sala nia ba sing ka i ren?”

La ne Erodias ga vorang i xeretna, “Una sing ti lavatlak at ne Jon.”

²⁵La soso mun nom loono gamlong parap ne Erodes la ga lok, “Una raba ia mi lavatlak at ne Jon laradi sep susu limixin. Una lok li at tavattingtigon silok.”

²⁶La ne Erodes ga lok bukbulu aleng mila neni goxo para i do ne Jon na met; ketla neni goxo epovo xusu ri lox ekun levelinga ren mila nom luvuttadi silok diga ronga vam nom lavangpangpe. ²⁷La soso mun Erodes ga lox aonon lavapaase ri laradi esep teren do neni na sep korop laxaka at ne Jon la na xip kaka lavatlak teren uto saparav i. La nom laradi ga vas kaxat la ga sep korop laxaka at ne Jon to at loogu xokoxo. ²⁸La neni ga lok li nom lavatlak to at lavattingtigon silok la ga rupot min la ga raba mo loono min la loono ga raba nenen min. ²⁹La luvuttadi loklok ka anasa at ne Jon diga ronga i dola ne Jon ga uu la diga rupot la diga lok ka labantuxu ren la digak mir i ro at lubuang mikmit tongan.

Iesu Ga Raba Buaang Limixin Mi Lempanga Anan
(*Mt 14:13-21; Lu 9:10-17; Jo 6:1-14*)

³⁰La luvuttadi vavang at ne Iesu digamlong ta la diga tong asu lempanga axap diga lox i la levelinga diga anasa limixin min. ³¹La ne Iesu ga lok tidi xeretna, “Ude nimi, nedik kusuk ata onon uto at lamatbin kusu mina lok mamana lixilik be.” Mila buaang limixin diga rupot pasa amisik ne Iesu mi luvuttadi loklok ka anasa ren la di goxo epovo kusu dina anan.

³²La diga sen kaxat mi lese pang uto at loxot petpes, ua limixin di goxo nemen teren. ³³Ketla buaang limixin diga ven nedi diga sen mi lese pang la diga ven kibis di la digat pas baseinge levenmenemen atdi la diga mumu loxon la diga rupot avot to ap mo loxot ti ne Iesu mi luvuttadi loklok ka

anasa ren. ³⁴La ne Iesu midu digu oso mi lesepanu la ni ga ven buaang limixin solo; neni ga balamu di milu digu lok ngan laxasipsip kopmen taradi loklok tata atnedi. Kuren la ni ga anasa di mi laxampapaase solo.

³⁵Ga ukantinao luvuttadi loklok ka anasa at ne Iesu digu rupot pasa ne Iesu la lara atdi ga lok tin keretna, “Ukantinao nga na la na loxot, ni loxot mimila rino. ³⁶Una riki aonon limixin kusu dibat pas uto at levenmenemen kusu dina un ka tempanga anan tidi.”

³⁷Ketla ne Iesu ga lok tidi xeretna, “Nemi xa mina raba nedi mi teveluxa xusu dina anan i.”

La digu lok tin keretna, “Kereva, u vara i dola manat pas ti un kaka tevengkongkide mi legepu sangaun kobot (200) denarias atdik la mana un panga anan min tidi?” Mo lempilas ga epovo dola tara na gugu at lavanuti gaaling ti lok kaka i nom.

³⁸La ne Iesu ga lok tidi xeretna, “Minat pas la mina ven lavanisa lengkongkide mo atnemi ik lok.”

La digaklen ka i la digu lok tin keretna, “Lavalimo lengkongkide la legepu venmat kakalik na.”

³⁹La ne Iesu ga lok tidi xeretna, “Mina lox axis limixin axap at levenbinam tadi at levennep mi lempivilis avukat teren.” ⁴⁰La nedi digu xis kopok ap mo lenep, lepentaba legesa sangaun kobot (100) digu xis eburu, lentaba lavalimo sangaun limixin digu xis eburu, nedi axap digat kis kerepmo. ⁴¹La ne Iesu ga lok kaka levengkongkide mi luemat, la ga milik aurut uto at laxalibet la ga tong avukat ti ne Moroa, la ga sebek nom levengkongkide la ga raba luvuttadi loklok ka anasa ren min la digu raba limixin min. La ni ga raba bok luemat tidi. ⁴²La limixin axap digu anan la digu an mais. ⁴³La luvuttadi loklok ka anasa digu luxa lasangaun mi legepura leventat mi leveluxa mo digu an ake i ren. ⁴⁴La nedi luvuttadi remes digu anan, digu epovo at lavalimo larabin sangsangaun kobot (5000).

Iesu Gat Pas To Mavana At Lavatdan Kis

(Mt 14:22-36; Jo 6:15-21)

⁴⁵La soso mun ne Iesu ga tong i ri luvuttadi loklok ka anasa ren do dina los kas at lesepanu la dinamgo rin uto at lemenemen Betsaida. La ne Iesu ga riki aonon limixin. ⁴⁶La neni ga vas kaxat basinge di la ga urut uto vana at lakaana xusu na ngising.

⁴⁷At laxanimin lesepanu at luvuttadi loklok ka anasa gak sixit kantubu at lavatdan kis la ne Iesu xusuk gak lok to loxon. ⁴⁸La ne Iesu ga ven digatlatla lolos milu lamanman gat mas lolos tangarang di. Kantubu at lavantun konaleng la lavanna konaleng at laxanimin ne Iesu ga vas kaxat to mavana mun at lavatdan kis. La ni ga rupot saparap di la ga doma i do na vas polo di. ⁴⁹Ketla at loxonaleng digu ven ne Iesu gat pas to mavana

at lavatdan kis, diga lok do neni lороonan panga la diga xup lolos, ⁵⁰mila diga ven i la diga marat aleng.

La soso mun ne Iesu ga lok tidi xeretna, “Nemen gat mita marat. Mina lolos. Nenia mun na.” ⁵¹La neni ga los kas at lese pang la lamanman gara xap matmas ta. La luvuttadi loklok ka anasa ren diga sango aleng. ⁵²Levendoxoma atdi ga repe. Di goxoklen lavasuun at lempanga sangsango ne Iesu ga lox i mi mo lempanga anan.

⁵³La diga xan polo lavatdan kis la diga oso to at lenep kangka Genesaret. ⁵⁴La diga vas su at lese pang, la limixin ap mo loxot diga ven kibis ne Iesu. ⁵⁵La digak sixit uto at lengkot axap ap mo lenep la digamlong mi luvuttadi mekmeres, lentaba atdi diga xip di mi levenora uto at lengkot no ne Iesu gat pas ue. ⁵⁶La ne Iesu gat pas tangtagap at lengkot axap, levenmenemen kakalik, levenmenemen silok, laxairing bok la diga lok li limixin mekmeres to at lengkot etang. La diga sing ne Iesu do dina long tu at lavanga singsiga ren. La nedi axap diga long tu ren, diga lox avukat axap.

Iesu Ga Paase Mumu Leveloklok At Lubung Parisi

(Mt 15:1-9)

7 ¹Lentaba lubung Parisi mi luvuttadi loklox ase at Lenavolo diga vot eburu boro Jerusalem la diga vot pasa ne Iesu. ²La diga ven i dola lentaba at luvuttadi loklok ka anasa at ne Iesu diga anan mi levengikngn di, ua di goxo gos avot mun be lengkikngn di; la kerepmo lubung Parisi diga lok do luvuttadi loklok ka anasa diga lox abilinga lороoro atdi. ³Lubung Parisi mi limixin axap me Judaia diga sogos avot be levengikngn di la melemu diga anan ba, la kerepmo diga mumu asu loklok at lavalabat atdi. ⁴Loklok bok at lavalabat atdi xeretna; se digamlong boro at leetang, kopmen di goxo anan se digak lox adadat avot be di. Leveloklok petpes bok diga mumu asu i xeretna; diga sogos amisik levengkap inin atdi, leventingtigon, la levesosopen.

⁵La lubung Parisi mi luvuttadi loklox ase at Lenavolo diga sue ne Iesu xeretna, “Ua lavasuun teren la luvuttadi loklok ka anasa ram kopmen dina mumu asu leveloklok at lavalabat atdik, di anan lempanga anan mi levengikngn di xopmen na dadat?”

⁶La ne Iesu ga vorang i ridi xeretna, “Leeme vapaase at ne Moroa, ne Aisaia ga paase alii mi nom, neni ga paase ruturun dola nemi lavapen aala. Ni ga tong li levelinga xeretna,

‘Na limixin di lok ngangao rak mi levelinga mun atdi, ketla lebelen di i vaxalom tino basinge ia; ⁷dixo lotu saparav ia mi luruturun la di lox ase mi levelinga at limixin mun.”

Ais 29:13

⁸La ne Iesu ga lok tidi xeretna, “Mi onon basinge levelinga mumuat at ne Moroa, ketla mim tebeng lolos leveloklok at limixin.”

⁹La ne Iesu ga vaase axalat tidi xeretna, “Mi gugu lolos ti vuse ka tangas ting tonga xepe levelinga at ne Moroa xusu mina mumu asu leveloklok at lavalabat atnimi. ¹⁰Gano ne Moses ga lok bok keretna, ‘Mina lok ngangao at luvuttemen nimi mi luvutnen nimi; do tara na paase xapmek ti ne temen kopla nenen, limixin dinaba sev amer i.’ *Pas 20:12* ¹¹Ketla nemi xopmen mina mumu asu nom levelinga at ne Moses, mi mumu asu na levelinga; mo do tara i ruuna lempanga do ri lok tooro ne temen kopla nenen, nemi mi tong i rin kusu neni na mumu asu leveloklok at lavalabat la na raba ne Moroa min la na ke loklok tooro ridu. ¹²Kuren la mi lok pe i xusu neni ixo epovo na lok tooro lavakpakes at ne temen mi nenen, ¹³la kerepmo mi mumu asu loklok miga lok ka i at lavalabat atnimi la mi lox abulubun kepe levelinga at ne Moroa. La nemi mi lox amisik laxampanga xapmek keretnom.”

Iesu Ga Paase Mumu Lempanga Ba Lox Abilinga Lorooro At Tara
(*Mt 15:10-20*)

¹⁴La ne Iesu ga ro xaka limixin uto saparav i la ga lok lavapaase poovo tidi xeretna, “Nemi axap mina ronga na levelinga rak la mina xasep teren. ¹⁵Kopmen tavanga ik lok to maxamang at laradi na lox abilinga i ketla levempanga, lorooro ren i lox asuusu i, naba lox abilinga i. ¹⁶[Do mi ruuna levenbaalung, mina ronga avukat na levelinga.]”

¹⁷La melemu ne Iesu ga on basinge nom limixin la ga vubeles at loogu ren la luvuttadi loklok ka anasa ren diga sue mu i mi mo lavapaase poovo. ¹⁸La ni ga sue di xeretna, “Kereva, kopmen mina xasep avukat teren? Mina ronga avukar i na; lempanga anan laradi i anan i, noxo lox abilinga i; ¹⁹nom lempanga noxo vubeles at lorooro ren, ketla i vubeles at leventine ren la melemu neni ba lok kepe ba i ukamang at labantuxu ren.” La kerepmo ne Iesu ga tong i do leveluxa axap i lox avukat kusu laradi na anan i.

²⁰La ni ga lok bok keretna, “Lentaba lempanga, laradi i lox asuusu i boro xeneng at lorooro ren, nom i epovo na lox abilinga lorooro ren. ²¹Mo lempanga xeretna; levendoxoma kapmek, leveloklok kakapmek maxamang at lixitkis epot, loklok tip kip pilo, loklok tip sev amet tara, loklok ti longka, ²²loklok ti belegao, leveloklok kakapmek petpes bok, loklok kaxarang, loklok mun mamangan, loklok ngaongao at lempanga at tara vetpes, loklok ti lox asi tara mi levelinga, loklox asilok, la loklok tangtangku. ²³Ana axap lempanga xapmek i ravasu boro xeneng at lebelen laradi la i lox abilinga i.”

Latkin Ga Nuunu At Ne Iesu
(*Mt 15:21-28*)

²⁴La ne Iesu ga vas kaxat basinge mo lemenemen la ga onon uto at lenep kangka saparap lemenemen Taia. La ni ga vubeles at loogu la ga

xopara i dola tara naklen i dola neni ira rupot pam; ketla neni goxo epovo xusu ri nemen lipe. ²⁵La lara latkin ga ronga levelinga dola ne Iesu ga rupot la soso mun neni ga vot pasa i la ga xis tiktikbu mi luvatgulom teren saparap luxangkedek teren. Loolik at nom latkin lagas ga suxuna i. ²⁶Nom latkin, neni me Grik ketla diga visix i ro at lenep Siropinisia. La neni ga sing ne Iesu dola neni na riki kepe lagas basinge loolik teren.

²⁷La ne Iesu ga lok lavapaase poovo rin keretna, “Nia ana raba panga anan avot mun be ri laxamdak mi laxaalik mila kopmen nak mokso ri lu raba lubungman^d mi lempanga anan at laxamdak.”

²⁸La nom latkin ga lok ti ne Iesu xeretna, “I ruturun pam, Leeme Silok; ketla lubungman di anan levenmumus panga anan im subu uto maxopok at loxot anan at laxamdak mi laxaalik.”

²⁹La ne Iesu ga lok tin, “Lavapaase ram i nunuan, kuren la nenia ara lok kepe vam lagas basinge loolik taram. Unamlong ta uto at loogu ram.”

³⁰La nom latkin gamlong uto xolonu ren la ga vot pasa loolik teren gak midi at loora ren la lagas ga on basinge vam i.

³¹La melemu ne Iesu ga vas kaxat basinge lenep kangka Taia, la ga vas polo lenep kangka Sidon uto at lavatdan kis Galili, la ga vubeles at lenep kangka Sangaun Menemen. ³²La lentaba luvuttadi diga lam kaka laradi lubaalung teren ga ba uto saparap ne Iesu, neni xopmen goxo paase avukat, la diga sing ne Iesu xusu na lok li lekngen teren la na lox avukar i.

³³La ne Iesu ga lam ka i la nedu xusuk duga vas basinge nom limixin la ne Iesu ga lok li lusivisip teren at lubaalung at nom laradi la ga xalaubis, la ga long tu at lagam teren, ³⁴la ga mas asu lamamas teren la ga lok tin keretna, “Epata.” Lavasuun teren keretna; una rem suang. ³⁵La lubaalung ap mo laradi ga xasep ba. La mo lavanga ga lok pe lagam teren ga repes la neni ga vaase alabat ba.

³⁶La ne Iesu ga tong alolos i ridi dola di noxo tong asu nom lavanga ri teta ketla di goxo ronga res teren, diga vaase asu i ri limixin axap. Amisik ne Iesu gap sep pepe limixin kerepmo, ketla amisik limixin diga tong asu lempanga sangsangu ne Iesu ga lox i. ³⁷La nom limixin diga sangu aleng la diga lok keretna, “Lempanga axap ne Iesu ik lox i, i nunuan aleng. Ni i lox aroo levenbaalung at luvuttadi ba la i lox aroo luvuttadi kopmen dina paase.”

Iesu Ga Raba Luxa Buaang Limixin

(Mt 15:32-39)

8 ¹Ap mo levenaleng buaang limixin diga vot eburu saparap ne Iesu la goxopmen tempanga anan atdi. La ne Iesu ga ro kaka luvuttadi

^d 7:27 Limixin me Judaia diga so asen limixin petpes mi lubungman.

loklok ka anasa ren la ga lok tidi xeretna, ²“Nenia a balamu na limixin atla digak lok saparav ia at lavantun aleng ta la kopmen tempanga anan atdi. ³Do ana riki aonon di uto at laramenemen atdi, tentaba diba meroxon to at langa e mi lantoxo atla lentaba diga rupot boro vaxalom.”

⁴La luvuttadi loklok ka anasa diga lok tin keretna, “Kopmen tempanga anan nade at na lenep gamasa, ataba lok ka tempanga anan ua ridi?”

⁵La ne Iesu ga sue di, “Lavanisa lengkongkide mi ruuna i?”

Diga vorang i, “Lavanuti na lengkongkide.”

⁶La ne Iesu ga tong i ri mo limixin do dina xis kopok at laxangka la neni ga lok kaka mo lengkongkide, ga tong avukat ti ne Moroa la ga sebex i la ga raba luvuttadi loklok ka anasa min kusu dina raba mo limixin min, la diga lox i xuren. ⁷Luvuttadi loklok ka anasa diga ruuna bok lutpen mat lixilik, Iesu ga lok ka i la ga tong avukat ti ne Moroa la ga tong i ri luvuttadi loklok ka anasa do dina raba limixin min. ⁸La limixin diga anan la nedi axap diga an mais. La luvuttadi loklok ka anasa diga lok ka lavanuti leventat silok la diga suxa aumsu di mi lempanga anan limixin diga an ake ren. ⁹La mo limixin axap ga epovo at lavanuet larabin sangsangaun kobot (4000), la ne Iesu ga riki aonon di. ¹⁰La soso mun ne Iesu mi luvuttadi loklok ka anasa ren diga los kas at lesebang la diga sen kaxat uto at lenep kangka Dalmanuta.

¹¹La lubung Parisi diga vot pasa ne Iesu la diga etep mi levelinga. Diga vara i dola ne Iesu na lok tempanga sangsangu ngan loklok katling boro vana at laxalibet ti lox asu ba i dola ne Moroa ga riki i. ¹²La ne Iesu ga lok bukbulu la ga lok tidi xeretna, “Ua lavasuun teren la limixin at na loola di vara lavanga sangsangu? Nenia a noxo lox ase nimi mi tempanga sangsangu.” ¹³La ne Iesu mi luvuttadi loklok ka anasa ren diga on basinge di la diga los kas manga at lesebang la diga sen polo lavatdan kis.

¹⁴La luvuttadi loklok ka anasa diga domampe lempanga anan atdi, ketla legeso xongkide mene mo gak lok tidi xeneng at lesebang. ¹⁵La ne Iesu ga lok tidi xeretna, “Mina lok tatao avukat nimi basinge laiiis^e at lubung Parisi mi ne Erodes.”

¹⁶La luvuttadi loklok ka anasa diga epaase kantubu atdi xeretna, “I vaase mo levelinga mila nedik kopmen ata lok ka tengkongkide.”

¹⁷La ne Iesu ga xasep at levelinga atdi la ga lok tidi xeretna, “Move mi paase mumu lengkongkide, mixoklen lavasuun at levelinga rak. Levendoxoma atnimi ira rebonot pam. ¹⁸Miga ven pam lugugu rak la miga ronga vam levelinga rak, ketla mixoklen lavasuun teren. Mina domangke at levempanga sangsangu rak. ¹⁹Nenia aga raba buaang limixin ga epovo at lavalimo larabin sangsangaun kobot (5000) mi lavalimo lengkongkide. Melemu lavanisa leventat miga suxa i mi levengkonatat panga anan?”

^e 8:15 Laiis i ru katling levenanasa at lubung Parisi mi ne Erodes.

La diga vorang i, “Sangaun mi legepura axap.”

²⁰La neni ga sue bok di, “Nenia aga raba buayang limixin ga epovo at lavanuet larabin sangsangaun kobot (4000) mi lavanuti xongkide la melemu lavanisa leventat silok miga suxa i mi levenmumus panga anan?”

La diga lok, “Lavanuti axap.”

²¹La neni ga lok tidi, “Kereva, nemi move mixo xasep at levelinga rak?”

Iesu Ga Lox Aroo Laradi Luxatli Ren Ga Main

²²La ne Iesu mi luvuttadi loklok ka anasa ren diga rupot to at lemenemen Betsaida. La limixin meve diga lam ka lara laradi luxatli ren ga main uto saparap ne Iesu, la diga sing i xusu neni na long tu ren kusu na lox avukar i. ²³La ne Iesu ga rebeng tu at lekngen la ga lam ka i ukamang basinge nom lemenemen; la ni ga xalaubis luxatli ren, la ga lok li lukngen teren la ga sue i xeretna, “U ven tempanga?”

²⁴La nom laradi ga milik urut la ga lok keretna, “A ven luvuttadi, ketla a ven di ngan larauna dit pas.”

²⁵La ne Iesu ga lok li amu lukngen at luxatli ap mo laradi. La ni ga milik lolos la luxatli ren ga lox avukat la ga ven axasep ba. ²⁶La ne Iesu ga riki aonon i uto at loogu ren la ga lok tin, “Nemen uta vubeles at na lemenemen.”

Pita Ga Tong I Do Ne Iesu Nitna Ne Moroa

(Mt 16:13-20; Lu 9:18-21)

²⁷La ne Iesu eburu mi luvuttadi loklok ka anasa ren diga vas kaxat uto at levenmenemen at lenep kangka Sisaria Pilipai. To at langa neni ga sue di xeretna, “Limixin di lok do nenia nege?”

²⁸La diga vorang i xeretna, “Lentaba di lok do nenu ne Jon laradi sep susu; lentaba di lok do nenu ne Elaia; lentaba di lok do nenu lara leeme vapaase alii me gano.”

²⁹La ni ga lok tidi, “Kereva ba nemi? Nemi mi lok do nenia nege?”

La ne Pita ga vorang i xeretna, “Nenu Lanarong at ne Moroa.”

³⁰La ne Iesu ga vaase lolos tidi dola di noxo tong asu i na ri teta.

Iesu Ga Paase Mumu Lanmet Teren

(Mt 16:21-28; Lu 9:22-27)

³¹Melemu ne Iesu ga ru xaka levelinga ren keretna, “Nenia, Laradi Mevana, anaba xip levesongsongot silok. La loxongkulao silok at limixin me Judaia, lavamaasa silok, luvuttadi loklox ase at Lenavolo diba sok tixirixes kepe ia la diba sep amer ia la melemu at lavantun aleng nenia ba roo xat amlong.” ³²La ne Iesu ga vaase axasep nom lavanga ridi la ne Pita ga lam kaka ne Iesu basinge luvuttadi loklok ka anasa la ga vaase sok ne Iesu.

³³La ne Iesu ga ru pukus la ga ven ti luvuttadi loklok ka anasa ren la ga vaase sok ne Pita; neni ga lok keretna, “Satan, uto basinge ia. U xopara na mu asu lodoxoma at ne Moroa, ketla u vara mun levendoxoma at limixin.”

³⁴La ni ga ro xaka limixin mi luvuttadi loklok ka anasa ren la ga lok tidi, “Mo do tara i vara na emu eburu minia, neni na domampe lorooro axap teren la na gagas li i xusu nap kip losongsongot at levenaleng axap la na mumu asu ba ia. ³⁵Do nege i vara na ranga alis lorooro ren, neni naba sang apkav i; ket do nege i soxope lorooro ren ti mumu asu ia la ti tong asu Lagale Lavavang, neni naba lok kaka lorooro avolo. ³⁶I lok kapmek do taradi na ruuna ka lempanga axap at na lavatbung menemen, la neni i subu basinge lorooro at ne Moroa. ³⁷Laradi xopmen na epovo na un ka lorooro avolo. ³⁸Mo do taradi na lok mamangan kepe ia eburu mi levelinga rak kantubu at limixin at na loola, nenia, Laradi Mevana, anaba sok tixirixes i ap mo laaleng nenia ana si ukopok mi lisisixam silok at ne Tamak la at lubungangelo ren.”

9 ¹La ne Iesu ga lok tidi xeretna, “Nenia a tong tuturun i rinemi, lentaba di tu de, di noxo met avot ti lovotpot at laaleng Linintoo at ne Moroa na vot mi lololos teren.”

Moroo Ga Lox Arepukus Ne Iesu

(Mt 17:1-13; Lu 9:28-36)

²La melemu at lavanna levenaleng ne Iesu ga lam kaka ne Pita, ne Jems, la ne Jon la diga urut uto vana at lavatkaana silok, nedi lavanuet mun digat pas. Ap mo loxot ne Moroa ga lox arepukus ne Iesu ro melamgo at luvuttadi loklok ka anasa ren; ³lempanga singsiga ren gan bun tinotno; limixin mede at lavatbung menemen kopmen na epovo ri lox abunbun tempanga singsiga xerepmo. ⁴La soso mun ne Elaisa mi ne Moses duga rupot to melamgo atdi la duga epaase eburu mi ne Iesu.

⁵La ne Pita ga lok ti ne Iesu xeretna, “Rabai, i lox avukat tinotno do mak lok de; ata lok tavantun taraugu xukuxut, tara ru, tara ri ne Moses la tara ri ne Elaisa.” ⁶Mo levelinga at ne Pita goxo sixit avukat mila neni la ne Jems la ne Jon diga marat aleng.

⁷La lusugao ga rava si la ga vung pavaa di la diga ronga laxaka boro at lusugao ga lok keretna, “Neni na ne nuruk, nenia a balamu i, mina mumu asu levelinga ren.”

⁸La soso mun diga ven ekula midi la di goxo ven ta ne Moses mi ne Elaisa, nedi mene nga lavantun diga nemen mi ne Iesu.

⁹La diga si ukopok at lavatkaana la ne Iesu ga sep pepe di do di noxo tong asu na lavanga ri teta se at laaleng Laradi Mevana naba roo xat amlong. ¹⁰La di goxo tong asu i nom, ketla diga esue amisik mi ua lavasuun at levelinga at lorooro amlong.

¹¹La diga sue ne Iesu xeretna, “Ua lavasuun teren la luvuttadi loklox ase at Lenavolo di tong i dola ne Elaisa ba rupot avot ti Lanarong?”

¹²La ne Iesu ga vorang i ridi xeretna, “I ruturun, levelinga at ne Moroa i tong i do ne Elaisa ba rupot avot tin la na lox amokso amlong lempanga axap. Ketla mina doma na levelinga ik lok at Lovoang Kaala, i lok dola Laradi Mevana naba xip laxasongsongot la limixin diba sok tixirixes i.”

¹³La ne Iesu ga lok keretna, “Ketla a tong i rinemi, Elaisa ga rupot pam; ketla limixin diga lok lempanga xapmek tin, kerekngan diga vara i, la Lovoang Kaala i tong asu i na.”

Iesu Ga Riki Xepe Lagas Basinge Lamdak

(Mt 17:14-21; Lu 9:37-43)

¹⁴La diga si posiga luvuttadi loklok ka anasa la diga ven buaang limixin diga tu kangkan di mi luvuttadi loklox ase at Lenavolo diga vetep mi levelinga eburu minedi. ¹⁵La soso mun nom limixin axap diga ven ne Iesu la diga sangu aleng la digak sixit la diga seega rangarang i.

¹⁶La ne Iesu ga sue di, “Mi epaase mu lavanga salai?”

¹⁷La lara laradi xantubu at nom limixin ga vorang i rin keretna, “Leeme loklox ase, ma paase mumu ne nuruk. A lam kaka i saparav u; lagas i suxuna i la nuruk kopmen na paase. ¹⁸I se mo lagas ip sev i, neni i sasava gamasa labantuxu ren at laxangka la lemeseng ip tavasus at lungusno, i rungur ivivilis, la labantuxu ren i tu tontodoslo amisik; la a sing luvuttadi loklok ka anasa ram dola dina riki xepe lagas basinge i, ketla dixo epovo.”

¹⁹La ne Iesu ga rongga nom levelinga la ni ga tong i ridi xeretna, “Nemi limixin at na levenaleng, kopmen tunuunu atnemi. Lavanisa aleng tinotno nenia aba xip tutu minemi? Nemi mi lox amolo ia. Mina lam ka lamdak ude.”

²⁰La diga lam ka nom lamdak saparap ne Iesu. At loxonaleng lagas ga ven ne Iesu, soso mun lagas ga lox adede nom lamdak la nom lamdak ga subu ukopok at laxangka la gap kuvun la lemeseng ga ravasu at lungusno ren.

²¹La ne Iesu ga sue ne temen keretna, “Lavanisa maares ni gak lok keretna?” La ne temen ga vorang i, “Ga lamdak lixilik axa i min.

²²Amisik axa lagas i soso aruv i at laxao la at laradan la ik lok dola nap sev amer i. Dola u epovo, una balamu nama la una lok tooro nama.”

²³La ne Iesu ga lok tin, “Nemen uta vaase mi na levelinga dola u epovo xeretnom. Moroa ba lok lempanga axap tu, mo do u nuunu ren.”

²⁴La soso mun temen mo lamdak ga xup keretna, “A nuunu ram, ketla lunuunu rak ixo epovo, una lok tooro lunuunu rak.”

²⁵La ne Iesu ga ven i dola buaang limixin digak sixit pot, la ni ga vaase lolos ti nom lagas keretna, “Nenu lagas, ugak lox angtangku na lamdak la

uga lox aba i; a tong i ru, una ravasu basinge na lamdak la nemen bok ba utamlong mu i.”

²⁶La mo lagas ga xup lolos la ga lox adede lamdak la ga sixisu basinge i. La lamdak ga lok ngan ta do ga met la buayang limixin diga lok do ira met pam. ²⁷Ketla ne Iesu ga ranga ka lekngen la ga rebeng axatu i; la lamdak ga xatu upana.

²⁸La melemu Iesu mi luvuttadi loklok ka anasa diga vubeles at loogu la nedi xusuk digak lok to xeneng. La nedi diga sue i xeretna, “Ua lavasuun teren la nema maxo epovo xusu mana riki kepe mo lagas?”

²⁹La ni ga lok tidi, “Lisingising kusus mene impana ri riki xepe lagas kapmek keretnom.”

Iesu Ga Paase Mumu Manga Lanmet Axa Ren

(Mt 17:22-23; Lu 9:43-45)

³⁰Iesu eburu mi luvuttadi loklok ka anasa ren diga vas kaxat basinge mo lenep la digat pas polo lenep silok Galili. La neni goxopara i xusu tara naklen i do neni ua; ³¹mila neni ga anasa luvuttadi loklok ka anasa ren. La neni ga lok tidi xeretna, “Nenia Laradi Mevana la lara laradi naba song araba ia ri limixin kapmek kusu diba sev amer ia. La melemu at lavantun aleng anaba roo xat amlong.” ³²Ketla luvuttadi loklok ka anasa ren di goxo xasep at levelinga ren la diga mangan kusu dina sue i mi lavasuun teren.

Luvuttadi Loklok Ka Anasa Diga Paase Mumu Nege I Silok Atdi

(Mt 18:1-5; Lu 9:46-48)

³³La ne Iesu eburu mi luvuttadi loklok ka anasa ren diga rupot to Kaprenaum la diga vubeles at loogu la ne Iesu ga sue di, “To at langa mi epaase mi la?” ³⁴Ketla digoxo vorang i mila diga epaase xantubu atdi do, nege lara i silok atdi.

³⁵La ni ga xis kopok, la ga ro ka di lasangaun mi legepura luvuttadi loklok ka anasa ren la ga lok tidi xeretna, “Dola tara i vara i xusu neni na silok, neni ba mumu pit la na lok ngan lasaxaruki at limixin axap.”

³⁶La neni ga lam ka lara lamdak kakalik, la ga vaxaru i kantubu atdi, la ga ot kongkodaan ka i la ga lok tidi xeretna, ³⁷“Do nege i seega rangarang tamdak keretna at laasen tarak, i lok ngan ta do neni i seega rangarang ia; la do nege i seega rangarang ia, i lok ngan ta do i seega rangarang mo lara ga riki ia ude.”

Do Tara Na Lok Tavanga At Laasen Tarak Ni Lentangas Tarak

(Lu 9:49-50)

³⁸La ne Jon ga lok tin, “Leeme loklox ase, nema maga ven laradi ga riki xepe lubunggas basinge limixin mi laasen taram. La neni kopmen na mumu asu nedik, la kerepmo nema maga sep pepe i.”

³⁹La ne Iesu ga lok tin, “Nemen mi guta sep pepe i; do tara taradi i lok tavanga sangsangu mi laasen tarak, neni noxompana ti paase xapmek soso mumu ia. ⁴⁰Do taradi ixo ru ebelen minedik, neni lentangas atdik. ⁴¹Nia a tong tuturun i rinimi. Do tara na raba nimi mi toxodan ti inin mila nemi at ne Karisito, neni noxo sang apkap luunun teren.”

Loklok Tong Pen Ti Laxapmek

(Mt 18:6-9; Lu 17:1-2)

⁴²La ne Iesu ga lok ti luvuttadi loklok ka anasa ren keretna, “Naba lok kapmek ti tara do na lox asubu tara atdi na laxamdak kakalik di nuunu rak. Ba lox avukat tin do dina xoxo li tangsangan tuat to at laxaka ren la dina dong asi i min uto xopok at lisimaramain. ⁴³Mo do lakngam na lox asubu lunuunu ram, una ra korop pes i. I lox avukat do una beles at lorooro avolo mi legesakngam mene nga. Lavanga ne Moroa na lu arup minu eburu mi lukngam uto at laxao at lemenemen songsongot, mo laxao i nemen amisik. ⁴⁴[Ap mo lenep leven got naba nemen amisik at labantuxu la noxo remet la laxao bok noxo xap.] ⁴⁵Mo do laxangkedek taram na lox asubu lunuunu ram, una ra korop pes i. I lox avukat do una beles at lorooro avolo mi legesa xangkedek mene nga. Lavanga ne Moroa na lu arup minu eburu mi luxangkedek taram uto xeneng at lemenemen songsongot. ⁴⁶[Ap mo lenep leven got naba nemen amisik at labantuxu la noxo remet la laxao bok noxo xap.] ⁴⁷Mo do legesa xatli ram na lox asubu lunuunu ram, una lik gogo su min la una lu xepe min. I lox avukat una vubeles to at Linintoo at ne Moroa mi legesa xatli mene nga. Lavanga ne Moroa na lu arup minu eburu mi luxatli ram uto xeneng at lemenemen songsongot. ⁴⁸Ap mo lenep leven got naba nemen amisik at labantuxu la noxo remet la laxao bok noxo xap.”

⁴⁹La ne Iesu ga lok lavapaase poovo ridi xeretna, “Limixin axap dinaba suma losongsongot ti lox alolos lunuunu atdi. I lok ngan laxakures di lok li i xusu leveluxa na so avukat.

⁵⁰Laxakures neni lavanga avukat. Ket do lololos teren na xap, kopmen bok ba tangas kusu diba lox i la na so xakures manga. Kuren la mina lox aumsu lorooro atnimi mi leven gugu nunuan kusu mibat kis eburu at limila.”

Iesu Ga Paase Mumu Lababa Korop Epot

(Mt 19:1-12; Lu 16:18)

10 ¹La ne Iesu mi luvuttadi loklok ka anasa ren diga on basinge nom lemenemen la digat pas uto at lenep silok Judaia la diga vas korop ladan sen Joridan. La buaang limixin diga vot pasa manga i la ni ga anasa di ngan loklok teren.

²La lentaba lubang Parisi diga rupot la diga lok tong pen i mi lususue xeretna, “Kereva, Lenavolo atdik i mulus bok kusu tara na soxope latkin teren?”

³La ne Iesu ga vorang i ridi mi lususue xeretna, “Mo lavapaase at ne Moses ga paase xereva at lababa korop epot?”

⁴La diga vorang i xeretna, “Moses ga raba nama mi levelinga do tara na malagan tevelinga axasep ti latkin teren do neni mo i xopara na epot ta ren la na riki xepe i.”

⁵La ne Iesu ga lok tidi xeretna, “Moses ga raba nimi mi nom mila lebelen at lavalabat atnimi ga metara vat. ⁶Ketla ganoxa at lurutu kaxat Moroa ga rudum lavatlok la lavakin, ⁷la ne Moroa ga lok keretna, ‘Lavasuun mun at nai la laradi remes naba on basinge ne temen mi nenen la nak lok eburu mi latkin teren, ⁸la nedu dunak lox eburu ngan mun legesara, la du noxo lok ngan bok ba legepura, ketla legesara.’ ⁹Kuren la tara noxo ba korop leepot at leremes mi latkin teren, mila ne Moroa axa ga ven etang du.”

¹⁰Melemu ne Iesu mi luvuttadi loklok ka anasa ren digak lok to at loogu, la diga sue i mi mo levelinga ren at loklok at leepot. ¹¹La ni ga lok tidi xeretna, “Do laradi i soxepe latkin teren, la i epot manga at lara latkin petpes, neni ira longka vam la i lok laxapmek ti latkin avot teren. ¹²Do tatkin na soxepe latlok teren la na epot ka taradi vetpes, neni ira longka vam mi nom laradi.”

Iesu Ga Lox Anarong Laxamdak Mi Laxaalik Kakalik

(Mt 19:13-15; Lu 18:15-17)

¹³At lara laaleng lentaba limixin diga lam kaka laxamdak mi laxaalik kakalik atdi uto saparap ne Iesu xusu ni na lok li lukngen mavana atdi la na lox anarong di. Ketla luvuttadi loklok ka anasa ren diga sep pepe di.

¹⁴La ne Iesu ga ven i nom la ga vaase sok luvuttadi loklok ka anasa ren la ga lok tidi xeretna, “Mina ke laxamdak mi laxaalik kakalik dina vot pasa ia; la nemen mita sep pepe di, mila Linintoo at ne Moroa i epovo ridi na.

¹⁵A tong tuturun i rinimi; do nege xopmen na siam kaka Linintoo at ne Moroa xerekngan lamdak kakalik, neni noxo beles teren.” ¹⁶La ne Iesu ga rebeng kaka nom laxamdak mi laxaalik getgesara la ga lok li lukngen mavana atdi la ga lox anarong di.

Iesu Ga Paase Mi Laradi Ga Ruuna Laxampanga Solo

(Mt 19:16-30; Lu 18:18-30)

¹⁷La ne Iesu ga vas kaxat uto at lenep petpes la lara laradi ga sixit pot, la ga xis tiktikbu mi luvatgulom teren to melamgo at ne Iesu la ga lok tin keretna, “Leeme loklox ase avukat. Nenia ba lok lavanga sala, kusu anaba lok kaka lorooro avolo?”

¹⁸La ne Iesu ga lok tin keretna, “Tila u tong ia do a lox avukat? Kopmen tara na lox avukat ketla ne Moroa xusuk mun. ¹⁹Uklen pam lasangaun Lenavolo i lok keretna;

‘Nemen uta sev amet tara, nemen utang longka tixin, nemen uta xip pilo, nemen uta vaase xaxarang mumu tara, nemen uta xarang kaka tempanga at tara vetpes, una lok ngangao at ne tamam mi ne nenam.’

Pas 20:12-16

²⁰La mo laradi ga lok ti ne Iesu xeretna, “Leeme loklox ase, ga ru ka i, laau ia, aga mumu asu vam na levelinga.”

²¹La ne Iesu ga ven tooro i la ga balamu i la ga lok tin keretna, “Nenu move uk pakes ti legesa vanga. Una sesep mi lempanga axap taram la una raba lempilas ti limixin banbalo la unaba ruuna ka lapnovos silok to vana at laxalibet. La melemu una mumu asu ba ia.”

²²La nom laradi ga milik angtungun la ni ga vas kaxat mi lainbulu silok mila neni gap novos aleng.

²³La ne Iesu ga ven tangtagap la ga lok ti luvuttadi loklok ka anasa ren keretna, “Naba lolos aleng ti luvuttadi dip novos aleng kusu dina vubeles at Linintoo at ne Moroa.”

²⁴La luvuttadi loklok ka anasa ren diga sangu at na levelinga ren. La ne Iesu ga lok bok tidi, “Loxongkulao, i lolos aleng do tara na vubeles at Linintoo at ne Moroa. ²⁵I lolos aleng ti lakamel kusu na beles at lamamara at linil, la kerepmo i lolos aleng bok ti laradi nopnovos kusu ri beles at Linintoo at ne Moroa.”

²⁶La luvuttadi loklok ka anasa ren diga sangu aleng at nom levelinga la diga epaase xeretna, “Nege i epovo ba do na roo suu?”

²⁷La ne Iesu ga ven tooro di la ga lok tidi xeretna, “Kopmen na epovo do laradi na lox i na, ketla i epovo do ne Moroa na lok lempanga axap.”

²⁸La ne Pita ga lok tin, “Kereva ba nema, maga on basinge vam lempanga axap atnama kusu mana mumu asu u.”

²⁹La ne Iesu ga lok tidi xeretna, “A tong tuturun i rinimi; do tara na on basinge lemenemen teren koplaluvutneton koplaluvurinen koplalunen koplalunen koplalaxamdak mi laxaalik teren koplalventaamang teren ti lok tooro ia la ri tong asu Lagale Lavavang at ne Moroa, ³⁰neni naba ruuna xaka luunun silok at na lorooro, i ngan buaang laraugu, buaang luvutneton, buaang luvurinen, buaang luvutnen, buaang laxamdak mi laxaalik, laxantaamang solo; la neni naba lok kaka bok levesongsongot mumu Lagale Lavavang la neni naba rooro amisik at lorooro melemu.

³¹Ketla buaang limixin di ruuna levenasen silok at na lorooro, di noxo silok at lorooro melemu; la nedi kopmen dina silok at na lorooro, dinaba silok at lorooro melemu.”

³²La melemu ne Iesu mi luvuttadi loklok ka anasa ren diga vas kaxat uto Jerusalem. Iesu gam gomgo ridi la diga sangu aleng mumu lavatpas teren. Limixin petpes bok diga mumu asu i, la nedi axap diga marat. La ne Iesu ga lam kaka lasangaun mi legepura luvuttadi loklok ka anasa ren uto vetpes la ga tong i ridi xeretna, ³³“Nedik taba onon uto Jerusalem

la lara laradi naba song araba ia, Laradi Mevana, ri lavamaasa silok eburu mi luvuttadi loklox ase at Lenavolo. La nedi dinaba lok li ia at lavapaase la dinaba lok li lumumuat tarak kusu nenia aba met. La dinaba song araba ia ri limixin esep boro Rom. ³⁴La dinaba paase aksaksa ria la dinaba vubis sanga ia la dinabak pixis ia la dinaba sev amer ia. Ketla melemu at lavantun aleng anaba roo xat amlong.”

Jems Mi Ne Jon Duga Sue Ne Iesu Mi Tavanga

(Mt 20:20-28)

³⁵La ne Jems mi ne Jon, lumdak at ne Sebedi, duga vot pasa ne Iesu la duga lok tin keretna, “Leeme loklox ase, lara lavanga mo ma lok do mana sue u min, la ma vara i do una vorang i rinama.”

³⁶La ne Iesu ga sue du xeretna, “Lavanga salai muna sing ia min?”

³⁷La duga vorang i xeretna, “Una siam do nema’ manat kis at luxot silok, lara saparap lakngam tino la lara saparap lakngam kia ap mo levenaleng ubat kis mi lisisixam taram.”

³⁸La ne Iesu ga lok tidu, “Nemu muxoklen lavanga nemu mu sing tin. Kereva, mu epovo munap kip levenmumuat ngan nenia abap kiv i? La mu epovo xusu muna vubeles at langangan losongsongot nenia aba vubeles teren?”

³⁹La duga vorang i xeretna, “Ma epovo.” La ne Iesu ga lok tidu xeretna, “Munabap kip levenmumuat tarak la munaba vubeles at losongsongot tarak, ⁴⁰ketla kopmen lugugu rak do nia aba tong i do nege bat kis saparap lakngak tino la saparap lakngak kia. Mo luxot ik lok mun tinedi no ne Tamak gara soxolik ka vam di.”

⁴¹La lasangaun luvuttadi loklok ka anasa ren diga ronga nom levelinga la diga musak ne Jems mi ne Jon. ⁴²La ne Iesu ga ro bubua ka nedi axap la ga lok tidi xeretna, “Miklen pam i dola luvuttadi amgomgo at limixin kopmen di me Judaia di ruuna lololos mavana at limixin atdi. ⁴³Ketla nemen gat na loklok nak lok kantubu atnimi. Mo do tara atnimi i vara i do na silok, neni na lok ngan lasaxaruki atnemi axap. ⁴⁴La do tara atnimi i vara i do nam gomgo, neni na lok ngan lasaxaruki gamasa atnimi.

⁴⁵Nenia Laradi Mevana la loklok tarak ik lok bok kuren. Nia xopmen a goxo vot kusu limixin dinaba lok ngan lavasaxaruki rak. Ketla nia aga vot kusu ana lok ngan lasaxaruki ridi, la kusu ana raba lorooro rak ngan laxaavuk ti limixin buaang.”

Iesu Ga Lox Arepalas Luxatli At Ne Batimias

(Mt 20:29-34; Lu 18:35-43)

⁴⁶La ne Iesu eburu mi luvuttadi loklok ka anasa ren diga rupot to at lemenemen Jeriko. La diga vas kaxat basinge nom lemenemen la buaang limixin diga emu midi. La lara laradi laasen teren ne Batimias, nitna ne

Timias, gat kis to at lisigege ngas la ga ngising panga mila luxatli ren ga main axap. ⁴⁷La neni ga ronga i dola ne Iesu me Nasaret gat pas at nom langa, neni gap kup keretna, “Livisik li at ne Devit. Una balamu ia.”

⁴⁸La buaang limixin diga tong i rin do na lok pilo, ketla neni gap kup aleng keretna, “Livisik li at ne Devit. Una balamu ia.”

⁴⁹La ne Iesu ga ru la ga lok, “Mina ro xaka i ude.”

La diga ro ka mo laradi la diga lok tin keretna, “Una lok momo la u na xatu upana. Iesu no i toro ru.” ⁵⁰La neni ga lok kepe lavanga singsiga me maxamang teren la ga xatu soso la ga vot pasa ne Iesu.

⁵¹La ne Iesu ga sue i xeretna, “U vara i do nenia na lok lavanga salai ru?”

La nom laradi ga vorang i xeretna, “Rabai. A vara i do luxatli rak na xasep.”

⁵²La ne Iesu ga lok tin keretna, “Una vas kaxat. Lunuunu ram ira lox avukat pam u.” La soso mun luxatli ren ga xasep la neni ga mumu asu ne Iesu ro at langa.

Iesu Ga Vubeles To Jerusalem

(Mt 21:1-11; Lu 19:28-40; Jo 12:12-19)

11 ¹La ne Iesu mi mo limixin buaang digat pas uto auret ta lemenemen Jerusalem, diga rupot to at lumenemen Betpage la Beteni at Lakaana Olip. Iesu ga riki amgo legepura at luvuttadi loklok ka anasa ren. ²Avot be ni ga lok tidu xeretna, “Munat pas uto at nom lemenemen ik lok to melamgo atnumu; la soso mun munaba long lenget ka lodongki maxat, kovisi tara goxo xis teren. La muna soxomus ka i ude. ³Dola tara na sue numu do, ‘Tila nemu mu soxomus ka nom lodongki?’ muba lok tin keretna, ‘Leeme Silok i vara i la maba lok li amlong soso bok ba i.’”

⁴La nedu duga vas kaxat la duga ven lenget ka lodongki at loogu gak lok saparap langa, diga xoxo li i go la duga soxomus ka i. ⁵Lentaba diga tu go diga sue du xeretna, “Mu lok lavanga sala, tila mu soxomus ka nom lodongki?” ⁶La duga vorang i ngan ne Iesu ga tong pam i ridu la nom limixin diga mulus taba du mi lodongki. ⁷La duga lok kaka lodongki uto saparap ne Iesu la duga lok li levempanga singsiga to vana ren la ne Iesu ga xis teren. ⁸La nedi axap diga vas kaxat uto Jerusalem. Buaang limixin diga lok li levempanga singsiga atdi ro at langa la lentaba diga ra ka lengkakan bisi boro at leventaamang atdi la diga lok li i at langa.

⁹Lentaba digat pas to melamgo at ne Iesu la lentaba digat pas to melemu ren. Nedi axap digap kup momo mi levelinga at Lovoang Kaala xeretna, “Ata emi asu mi ne Moroa. Luvukat ti mo laradi it pas mi laasen at Leeme Silok. ¹⁰I lox avukat ti lovotpot at Linintoo at lurubuno avolo atdik ne Devit. Ata emi asu aleng mi ne Moroa.”

Sam 118:25-26

¹¹La ne Iesu ga vubeles to Jerusalem la gat pas uto at loogu laplavang. Ni ga ven tangtagap at lempanga axap; ketla ukantinao ren neni eburu mi lasangaun mi legepura luvuttadi loklok ka anasa ren diga sixisu la digat pas uto Beteni.

Iesu Ga Vaase Poovo Mumu Lubungmixin Me Judaia

(Mt 21:18-19)

¹²Ap mo lara laaleng melemu ne Iesu eburu mi luvuttadi loklok ka anasa ren diga vas kaxat basinge lemenemen Beteni, la ne Iesu ga roxo. ¹³La ni ga ven lara luuna pik to vaxalom la mo luuna ga xo vavaxan mene nga. La ne Iesu gat pas kusu na dik ka tevempeven una ren. Ketla goxopmen tevempeven una ren, ga xo vavaxan mene nga, mila goxovisi lagaaling tin ti visik. ¹⁴La ne Iesu ga vaase lolos ti nom luuna xeretna, “Nenu u noxo visik bok ba tevempeven una.”^f La luvuttadi loklok ka anasa ren diga rong nom levelinga ren.

Iesu Ga Vubeles To At Loogu Laplavang

(Mt 21:12-17; Lu 19:45-48; 2:13-22)

¹⁵La diga rupot to Jerusalem la ne Iesu ga vubeles to at loogu laplavang la ni ga xala su mi limixin diga sesep mi lempanga ro xeneng la nedi bok diga unun panga. La ni ga ba gili levenora lili atnedi no digak lox ekun lempilas la ga ba gili levengkonin kitkis atnedi diga sesep mi levenamno. ¹⁶La neni ga ru pe bok lentaba vetpes kusu nedi di noxo vas polo ro xeneng at loogu laplavang mi lempanga atdi. ¹⁷La ne Iesu ga anasa di xeretna, “Levelinga at ne Moroa ik lok at Lovoang Kaala i lok keretna, ‘Loogu rak diba so asen i mi loogu singising ti limixin at levengkot axap’; *Ais 56:7* ketla nemi mira lok gili vam i, i ngan loogu loklox alipe at luvuttadi dip sep paxat ka panga.”

¹⁸La lavamaasa silok mi luvuttadi loklox ase at Lenavolo diga rong nom levelinga ne Iesu ga tong i; kuren la diga puse ngas ti sev amer i. Diga marat teren mila limixin axap diga sangu at levenanasa ren.

¹⁹Ga ukantinao nga la ne Iesu mi luvuttadi loklok ka anasa diga on basinge lemenemen Jerusalem.

Iesu Ga Paase Mumu Lunuunu

(Mt 21:20-22)

²⁰Ga maxantamak manga diga vas kaxat la diga ven nom luuna ga mang axap, levenixe bok teren ga mang axap. ²¹La ne Pita ga doma su at

^f 11:14 Na lavapaase poovo rinedi limixin me Judaia la lavanga salai naba vot parap di do di noxo visik asu teveloklok nunuan.

levelinga at ne Iesu la ga lok tin keretna, “Leeme Silok, una ven be nom luuna. Uta paase lolos tin itinongo la na i mang axap pam.”

²²La ne Iesu ga lok tidi xeretna, “Mina nuunu at ne Moroa. ²³A tong tuturun i rinimi; do tara na tong i ri na lavatkaana xeretna, ‘Una onon la una subu tup tou at laras,’ la do neni i nuunu ruturun keneng at lebelen la lodoxoma ren kopmen na sixit ekarakat, Moroa naba lox i xerepmo. ²⁴Kuren la a tong i rinimi; dola una sing ne Moroa ri tempanga u vara rin, una nuunu do ne Moroa ba raba u min la neni naba lox i xuren. ²⁵At loxonaleng una sing, una domampe leveloklok kakapmek limixin diga lox i ru, kusu ne Moroa ba doxoma xepe leveloklok kakapmek taram. ²⁶[Do u noxo domampe leveloklok kakapmek at tara, Moroa noxo doxoma xepe leveloklok kakapmek taram.]”

Lususue At Loxongkulao Silok At Lubungmixin Me Judaia

(Mt 21:23-27; Lu 20:1-8)

²⁷La ne Iesu eburu mi luvuttadi loklok ka anasa ren diga rupot to Jerusalem. La ne Iesu ga vubeles to xeneng at loogu laplavang la lavamaasa silok mi luvuttadi loklox ase at Lenavolo mi loxongkulao silok at lubungmixin me Judaia diga vot pasa i. ²⁸La diga sue i xeretna, “Lololos salai nenu u ruuna i xusu ri lox i na lempanga? La nege ga raba u mi nom lololos?”

²⁹La ne Iesu ga vorang i ridi xeretna, “Ana sue bok nimi mi lara lususue la do mina vorang avukat taba ia min, aba vaase axasep ba nimi, do nenia a lok na lempanga mi lololos salai. ³⁰Leesep susu at ne Jon ga laa meva, boro at ne Moroa xopla boro mun at limixin?”

³¹La diga epaase xantubu atdi xeretna, “Mo do ata lok do, ‘Boro at ne Moroa,’ neni naba lok tidik keretna, ‘Tila ba mi goxo nuunu at levelinga at ne Jon?’ ³²La mo do ata lok, ‘Boro at limixin,’ ata marat bok at limixin, mila di nuunu do ne Jon neni leeme vapaase alii.”

³³Kuren la diga vorang i ri ne Iesu xeretna, “Maxoklen i.” La ne Iesu ga lok tidi xeretna, “Nia bok a noxo tong i rinimi do, nenia a lox i na lempanga mi lololos salai.”

Lempapaase Poovo Mumu Limixin Silok Me Judaia

(Mt 21:33-46; Lu 20:9-19)

12 ¹La melemu ne Iesu ga tong lavapaase poovo ridi xeretna, “Lara laradi gatlotlo laraamang vaen, la neni ga bos kangkan i la ga xe lamamara xusu ri loplok li levendan vaen teren; la melemu ga lok loogu xukuxut. La neni ga raba lentaba luvuttadi min kusu dina lok tatao i la neni gat pas uto at lenep petpes. ²Laaleng ga vot kusu dina dik ka lempeven una at nom laraamang la laradi at laraamang ga riki lasaxaruki ren uto at nom laraamang ti lok kaka lenep at levempeven una. ³Ketla

nom luvuttadi loklok tatao at laraamang diga ranga alis nom lasaxaruki la diga rit pupu i la diga riki amlong kixinax i. ⁴La nom laradi ga riki manga lara lasaxaruki, ketla diga sep patlak ka i la diga lox amamangan tinotno i. ⁵La ni ga riki manga lara lasaxaruki la diga sev amer i. La ni ga riki buang lavasaxaruki vetpes teren. Ketla diga tit pupu lentaba la diga sev amet lentaba.

⁶La kopmen bok ba tavasaxaruki ren, ketla nitna xusuk ta mo gak lok, ni ga balamu i. La ni ga nua i dola nom luvuttadi dinaba lok ngangao at ne nitna la ni ga riki ba i.

⁷Ketla nom luvuttadi loklok tatao diga ven i la diga etong i xeretna, ‘Lamdak akmokso at laradi at na laraamang nom it pas boro. Ata sev amer i, la ataba ruuna ka na laraamang.’ ⁸La diga ranga alis i la diga sev amer i la diga lu asu min uto maxamang at nom laraamang.”

⁹La ne Iesu ga lok bok tidi xeretna, “La nom laradi i ruuna nom laraamang, neni ba lok lavanga salai ridi? Neni naba rupot la na sev amet nom luvuttadi, la na raba nom laraamang vaen ti tentaba tuvuttadi vetpes.” ¹⁰Nemi mi xasep at Lovoang Kaala i lok keretna,

‘Nom luat luvuttadi xipkip gu diga sok tixirixes kepe i, ga ravasu ngan luat kis la lugugu ren i silok aleng. ¹¹Leeme Silok ne Moroa ga lox i na la i lox avukat aleng at lemeren dik.’ *Sam 118:22-23*

¹²Lavamaasa silok mi luvuttadi loklox ase at Lenavolo diga puse ngas ti ranga alis i mila digaklen i dola ne Iesu ga paase poovo mumu di. Ketla diga marat at limixin la diga ke ne Iesu la diga vas kaxat basinge i.

Iesu Ga Paase Mumu Loklok Kekepe Pilas

(Mt 22:15-22; Lu 20:20-26)

¹³Melemu nedi lubang amgomgo diga riki lubang Parisi mi larapen tangas at ne Erodes kusu dina lok tong pen ne Iesu mi levelinga. ¹⁴La diga rupot la diga lok tin keretna, “Leeme loklox ase, maklen i do nenu laradi ruturun la u anasa limixin mi leveloklok at ne Moroa la mo levelinga ram ik mokso. Uxo lok tooro legesa binam tadi xusuk mun mila uxu doxoma solo do tara i ruuna laasen silok koplakopmen. Una tong i rinama do ua lusumsuma ram. Kereva, ik mokso do mana xepe pilas ti ne Kaisar koplakopmen? ¹⁵Maba lox i xopla xopmen?”

Ketla ne Iesu gaklen levendoxoma xapmek atnedi la ga lok tidi xeretna, “Nemi mi lok tong ia mi levelinga, do? Kaka tuxuven denarias ude. Ana ven be i.” ¹⁶La diga raba i mi luxuven denarias la ne Iesu ga sue di xeretna, “Lamang la laasen atnege i nemen teren?”

La diga vorang i xeretna, “At ne Kaisar.”

¹⁷La ne Iesu ga lok tidi xeretna, “Mina raba ne Kaisar mi levempanga i epovo at ne Kaisar la mina raba ne Moroa mi levempanga i epovo at ne Moroa.”

La diga sangu aleng at levelinga ren.

Iesu Ga Paase Mumu Lorooro Amlong

(Mt 22:23-33; Lu 20:27-40)

¹⁸La lubung Sadiusi diga vosiga ne Iesu diga lok do limixin diga met pam, di noxo roo xat amlong. Di ga lok tong pen ne Iesu xeretna, ¹⁹“Leeme loklox ase, Moses ga malagan na lenavolo rinama; mo do taradi na met la latkin teren mo i rooro, ketla kopmen taxamdak atdu, neton nom laradi naba epot ap mo lanaa rixin kusu duba visik tamdak ti ruuna ka lempanga ap mo laradi ga met. ²⁰Ga lavanuti loxoeton; lara gomgo ga epot, la ga met gamasa kopmen ni goxo visik taxamdak ²¹Lara sepsep agepura ga epot manga at nom latkin la neni ga met bok la goxo visik tamdak. La neton sepsep avantun ga lok box i xuren. ²²La nedi loxoeton axap diga epot at nom latkin la nedi axap diga met la di goxo visik tamdak la melemu mo latkin bok ga met.” ²³La diga sue ne Iesu xeretna, “At laaleng dola limixin dina xatu kaxat amlong, ti nege rinotno nom latkin, mila nedi axap diga epot teren?”

²⁴La ne Iesu ga vorang i ridi xeretna, “Nemi mi soogong at na lavanga mila mixo xasep at levelinga xeneng at Lovoang Kaala la mixo xasep at lololos at ne Moroa. ²⁵Ap mo laaleng limixin diba xatu kaxat amlong, di noxo epot; diba nemen naa ngan lubung angelo boro vana at laxalibet. ²⁶Mumu laxakatu kaxat amlong ne Moses ga vaase axasep tuturun i do luvuttadi met diba rooro xat amlong. Ni ga lox asuusu i at levelinga mumu luuna laxao gak lok teren. Moroa ga lok tin keretna,

‘Nenia ne Moroa at ne Abaram, Moroa at ne Aisak, la Moroa at ne Jakop.’

Pas 3:6

²⁷Ap mo laaleng ne Moroa ga tong i na, nedi lavantun diga met pam. La neni ne Moroa atnedi limixin di rooro, la kopmen atnedi luvuttadi met. Levendoxoma atnimi xopmen nak mokso.”

Levelinga Silok At Lovoang Kaala

(Mt 22:34-40; Lu 10:25-28)

²⁸Lara at luvuttadi loklox ase at Lenavolo ga rupot la ga rongga lavapaase atdi. Neni gaklen i do ne Iesu ga vorang avukat lususue atdi la neni bok ga sue ne Iesu xeretna, “Ua levelinga at Lenavolo i silok ti levelinga axap teren?”

²⁹La ne Iesu ga vorang i rin keretna, “Levelinga i silok i lok keretna; ‘Lubungmixin me Israel, mina rongga i na; Moroa neni Leeme Silok atnimi la legesa Moroa mene nga. ³⁰Mina balamu Leeme Silok, ne Moroa atnimi mi lebelen nimi axap, mi lороonan axap atnimi, mi levendoxoma axap atnimi, la levelolos axap atnimi.’

Len 6:4-5

³¹La lara bok sepsev agepura i lok ngan lara gomgo, i lok keretna,

‘Mina balamu mo limixin di nemen saparap nimi xerekngan pam mi balamu nimi.’ *Mas 19:18*

Kopmen tevelinga ro xeneng at Lovoang Kaala i silok ti na luxot.”

³²La nom laradi ga lok ti ne Iesu, “Lavapaase ram ik mokso, leeme loklox ase. U paase ruturun do legesa Moroa mene nga la kopmen tomoroa bok. ³³La i ruturun bok do na levelinga i silok; mina balamu ne Moroa mi lebelen nimi axap, mi levendoxoma atnimi axap, mi levelolos atnimi axap la mina balamu limixin di nemen saparap nimi ngan mi balamu nemi. Na loklok i silok ti mo loklok tim taba ne Moroa mi leventamtaba la levempanga laplavang.”

³⁴La ne Iesu ga rongga xisiv i do mo laradi ga paase mi lakleklen la ga lok tin keretna, “I auret kusu una vubeles at Linintoo at ne Moroa.” La melemu at na lubung amgomgo diga xopara i xusu dina sue ne Iesu mi tevesusue.

³⁵La ne Iesu ga anasa ro at loogu laplavang. Ni ga sue xeretna, ‘Luvuttadi loklox ase at Lenavolo dik lox ase limixin do Lanarong neni lurubuno ne Devit. I lok kereva na? ³⁶Mila ne Devit ga tong asu levelinga mi lodoxoma at Loroonan Kaala la nom levelinga ik lok to xeneng at Lovoang Kaala xeretna,

‘Leeme Silok ne Moroa ga lok ti Leeme Silok tarak keretna, una xis de at lakngak tino se nenia ana lok li limixin munepen taram i ngan loxot burubut ti luxangkedek taram.’ *Sam 110:1*

³⁷Mo do ne Devit ga so asen i do Leeme Silok, i lok kereva la Lanarong neni lurubuno at ne Devit?”

La buaang limixin diga lok momo ri rongga levelinga at ne Iesu.

Lempanga Xakapmek At Luvuttadi Loklox Ase At Lenavolo

(Mt 23:1-36; Lu 20:45-47)

³⁸La ne Iesu ga anasa bok keretna, “Mina lok tatao avukat nemi basinge loklok at luvuttadi loklox ase at Lenavolo, mo di vavara i xusu dinat pas tangtagap mi levesingsigaara babalom atdi la di vavara i xusu limixin diba seega rangarang di mi loklok ngangao ro at loxot etang; ³⁹la di vavara aleng i do dinat kis at lengkot kitkis avukat to at laraugu singising la lengkot avukat to at lara peluxa. ⁴⁰La dik lok kaka gamasa lempanga at lubungnaa rixin, la di ngising babaalom kusu limixin dibak lok ngangao atdi. Losongsongot tidi naba lok kapmek aleng tinotno!”

Laramtaba At Labannaa Rixin

(Lu 21:1-4)

⁴¹La ne Iesu gat kis to xeneng at loogu laplavang la ga reven limixin diga kepe lempilas atdi ro at loxot lili pilas. Buaang luvuttadi nopnovos diga kepe laxampilas solo. ⁴²Ketla ni ga ven lara labannaa rixin banbalo ga xepe legepu xonatat peni lixilik. Ni lempilas lixilik tinotno.

⁴³La ne Iesu ga ro xaka luvuttadi loklok ka anasa ren la ga lok tidi xeretna, “A tong tuturun i rinimi do at lemeren ne Moroa, na labannaa rixin banbalo i lok li lempilas i silok ti lempilas atnedi axap di xepe lempilas atdi. ⁴⁴Mila nedi di raba ne Moroa mi loxot lixilik mun at lapnovos silok atdi, ketla neni i raba ne Moroa mi lempilas axap teren.”

Iesu Ga Paase Mumu Lempanga Xakapmek Naba Ravasu

(Mt 24:1-2; Lu 21:5-6)

13 ¹La melemu ne Iesu ga on basinge loogu laplavang, lara at luvuttadi loklok ka anasa ren ga lok tin keretna, “Leeme loklox ase, pen ba lemparuat silok at loogu laplavang la laraugu avukat bok i tu saparav i.”

²La ne Iesu ga vorang i xeretna, “Una ven avukat na laraugu nunuan. Taaleng naba vot la kopmen toxonuat at nom laraugu naba nemen at loxot teren; limixin diba vot la diba ut tereve axav i ukopok.”

³La melemu ni gat kis eburu mi luvuttadi loklok ka anasa ren to at Lakaana Olip. Diga reven loogu laplavang ga tu ro at lakaana vetpes. Pita la ne Jems la ne Jon la ne Endru, nedi xusuk digak lok mi ne Iesu la diga sue ne Iesu xeretna, ⁴“Una tong i rinama. Lingisa nom lempanga naba vot la loklok katling salai naba lok katling lovotpot ap mo levenaleng do mo lempanga na ravasu?”

⁵La ne Iesu ga vorang i ridi xeretna, “Mina lok tatao avukat nimi xusu tara noxo xarang arup nimi mumu i na lempanga, ⁶mila buaang luvuttadi diba rupot mi laasen tarak la diba lok, ‘Nenia Lanarong!’ La diba sar asoogong buaang limixin mi laxalinga xaxarang atdi. ⁷La miba ronga i do laraesep mo ik lok la laraesep bok ba vot, ketla laxavaxap at na lavatbung menemen noxo vot ap mo levenaleng. ⁸Limixin at levennep silok diba esep eburu mi limixin at levennep silok petpes. Lavaorong silok at levennep diba esep mi lavaorong at levennep petpes. Levenangne ba rupot to at tevengkot axap eburu mi leean kangking. Nom levempanga ba ru katling lavakpaxaru kaxat ap mo levenaleng, ba lok ngan losongsongot i rupot at latkin mo i auret kusu na visik.

⁹Ketla mina lok tatao avukat nimi. Tentaba diba ranga alis nimi la miba tu at lavapaase ro melamgo at lavaeame silok la dibak pixis nimi ro at laraugu singising. La miba tu at lavapaase ro melamgo at lavaeame amgomgo mi lavaorong silok mila nemi mi nuunu rak, ketla miba tong asu Lagale Lavavang tidi. ¹⁰La limixin boro at levennep axap diba ronga be Lagale Lavavang tarak la melemu ren laaleng silok ba rupot. ¹¹Do dina ranga alis nimi la dina lam kaka nimi uto at lavapaase, nemen mita marat at levelinga salai miba tong asu i ridi. Miba tong asu mene mo levelinga nak lok at levendoxoma atnimi ap mo loxonaleng mila Loroonan Kaala naba raba nimi mi levelinga.

¹²Lara koeton axa diba etaba tuntuna mi luvutneton di ri lanmet; la luvuttemen laxamdak diba etaba tuntuna mi laxamdak la laxaalik atdi; la laxamdak mi laxaalik dibang tonga xepe levelinga at luvuttemen di mi luvutnen di la diba lok li di ri lanmet. ¹³La limixin axap diba belemamao nimi mila mi mumu asu ia. Ketla lara do i tu lolos keneng at levesongsongot ise at laxavaxap ap mo levenaleng, ne Moroa naba lox arooro i.”

Laradi Xapmek Naba Tu Ro At Loxot Kaala

(Mt 24:15-28; Lu 21:20-24)

¹⁴La ne Iesu ga lok bok tidi xeretna, “Do mina ven lavanga i lok kapmek aleng na tu ro at loxot i xaala aleng to xeneng at loogu laplavang, nemi miba nemen to at lenep Judaia, miba sixiro uto at lavatkaana. Mina xasep avukat at na. ¹⁵Laradi do ik lok to mavana at loogu ren, ni noxo si kusu na lok ka lempanga ren boro xeneng ap mo loogu ren. ¹⁶La laradi do nak lok to xataamang, noxomlong bok ba uto at loogu ren kusu na lok ka lavanga singsiga ren. ¹⁷Mo laaleng naba lok kapmek aleng ti lavakin teenan eburu mi lavakin mi levengkadede atdi! ¹⁸Mina ngising ne Moroa do mo laaleng noxo vot saparap nimi edompo mi taaleng kabu. ¹⁹Mila levenmumuat ap mo levenaleng naba lok kapmek tinotno. Ga ru ka i at lurutu kaxat at na lavatbung menemen mo ne Moroa ga rudum li i, ise nga na lingina; la kopmen bok tara tumumuat kerepmo naba vot melemu. ²⁰La mo levenaleng ti mo levenmumuat do ne Moroa noxo lox atmur i, kopmen teta naba roo suu; ketla ne Moroa ba lox asusu labalamu ren ti mo limixin neni gara soxolik ka vam di, la ni naba lox atmur mo levenaleng.

²¹Ap mo levenaleng nemen gat mita nuunu at levelinga at tara na lok tinimi xeretna, ‘Mina ven ba i, neni nga na Lanarong!’ Koplana lok, ‘Neni nga no!’ Nemen mita nuunu at nom levelinga atdi; ²²mila buaang nedi limixin babala diba lok do nedi mo lavanarong at ne Moroa la lavaeme vapaase alii ren; diba lok tempanga sangsangu xusu diba sar asoogong lavaanat soksoxolik at ne Moroa, mo do di epovo. ²³Kuren la mina doma mumu avukat na levelinga rak. A tong alii avot ta i rinimi.”

Laradi Mevana Naba Vot

(Mt 24:29-31; Lu 21:25-28)

²⁴La ne Iesu ga lok bok tidi xeretna, “Ketla ap mo levenaleng melemu at na levenmumuat leveloklok katling naba vot,

‘Losoooso at laxangking naba xap, la lagaaling noxo soosoo. ²⁵La larapenti naba subu si boro vana at laxalibet la lempanga mevana diba sixit ekarakat la kopmen di noxo sixit mu larangas atdi.’ *Ais 13:10, 34:4*

²⁶La ap mo levenaleng limixin dinaba ven ia, Laradi Mevana, to vana at loxontakabu. Nenia anaba rupot mi langsung lololos la lisisixam

silok. ²⁷La nenia anaba riki lubang angelo uto at levengkot axap la dinaba lam kaka lavaanat soksoxolik tarak boro at lavanuet lara mesuluk at lavanuet lara meramanman at na lavatbung menemen.”

Lavapaase Poovo At Luuna Pik

(Mt 24:32-35; Lu 21:29-33)

²⁸La ne Iesu ga tong lara lavapaase poovo ridi xeretna, “Mina ronga na laanasa mumu luuna pik. Dola levesiliklik at larauna pik di mumulum la levenang i su xat, nemi miklen i do lamaares i auret ta. ²⁹La kerepmo do mina ven i na lempanga loklok katling na vot, mina xasep do lovtopot tarak, Laradi Mevana i auret, i ngan laradi i tu at lumusaragu at loogu la i gagas kusu na beles teren. ³⁰Nia a tong tuturun i rinimi. Limixin at na loola di rooro lingina di noxo met se na lempanga na ravasu. ³¹Laxalibet mi lavatbung menemen naba sonao, ketla levelinga rak noxo xap.”

Kopmen Tara Iklen Laaleng Laradi Mevana Naba Vot

(Mt 24:36-44)

³²La ne Iesu ga lok bok, “Kopmen tara naklen laaleng at lovtopot tarak; lubang angelo bok kopmen dinaklen i la nenia, ne nitna bok kopmen anaklen i. Tamak kusus mun iklen i. ³³Kuren la nemi mina reven avukat mila mixoklen i do lingisa mo laaleng ba rupot. ³⁴I lok ngan lara leeme silok gat pas uto vaxalom la lavasaxaruki ren diga lok tatao loogu ren. Neni ga tong li leven gugu ridi getgesara la neni ga tong i ri legesara atdi dola neni na lok tatao lumusaragu la na reven ti lomlong teren.

³⁵La nemi mi lok ngan nom lasaxaruki ga lok tatao lumusaragu. Mina reven avukat amisik mila mixoklen mo laaleng Leeme Silok nabamlong teren. I epovo na rupot ukantinao kopla at laxanimin tubu kopla at nom loxonaleng lengkaxak ing teng kaxat teren, kopla at loxonaleng laxangking it losu ren. ³⁶Mina reven avukat, naba lok kapmek do mina unga ap mo loxonaleng neni na rupot teren. ³⁷Nom levelinga ara tong pam i rinimi, la aba tong box i ri limixin axap, mina reven avukat.”

Loxongkulao Silok Diga Puse Ngas Ti Sev Amet Ne Iesu

(Mt 26:1-5; Lu 22:1-2; Jo 11:45-53)

14 ¹At legepu aleng avot ti mo laaleng leluxa silok at Lovovolo Pe ga auret. La ap mo leluxa diga anan lengkongkide diga ove vetpes i. La lavamaasa silok la luvuttadi loklox ase at Lenavolo diga puse ngas kusu dina ranga alis nemnem ne Iesu la dina lok li i at lavapaase xusu dina sev amer i. ²Ketla diga epaase xeretna, “Ata noxo lox i na at laaleng at leluxa; lavanga limixin dina lok kaxat turube.”

Latkin Ga Lox Agagas Li Ne Iesu Ri Lanmet Teren

(Mt 26:6-13; Jo 12:1-8)

³Iesu gak lok to Beteni ro at loogu at ne Simon, gano lanmeres gu gak lok teren. La ne Iesu gat kis ti anan, la lara latkin ga vot pasa i, gap kip lubuxom avukat^g ga umsu mi laxadan mavak, mo loxodan laasen teren naat; i lox avukat la luunun teren ga urut aleng. La neni ga ba pit kepe laxatli at mo lubuxom dan mavak la ga soli i ro at lavatlak at ne Iesu.

⁴La lentaba digak lok go diga ven i, la diga musak aleng la diga epaase xeretna, “Tila i soli xepe gamasa i na? ⁵Ni i epovo ri sesep mi na laxadan mavak kusu ba lok ka lavantun sangaun kobot (300) denarias teren kusu ri lok tooro limixin banbalo.” La diga paase mukmusak ti mo latkin.

⁶Ketla ne Iesu ga lok tidi, “Keke i. Nemen mita lox angtang na latkin, mila neni i lok lavanga nunuan tia. ⁷Limixin banbalo mo dibat pot pasa amisik nimi xusu mibak lok tooro di, ketla nenia noxo nemen eburu amisik minimi. ⁸La na latkin i lok lavanga avukat tia. Ni i soli na laxadan mavak at labantuxu rak kusu ri lox agagas li labantuxu rak ti lamaaut. ⁹A tong tuturun i rinimi. At ua lengkot axap at na lavatbung menemen, limixin diba tong asu Lagale Lavavang, la na lavanga neni i lox i, diba tong box i xusu limixin dibaklen i.”

Judas Ga Siam Do Neni Na Song Araba Ne Iesu

(Mt 26:14-16; Lu 22:3-6)

¹⁰La ne Judas Iskariot, lara at lasangaun mi legepura luvuttadi loklok ka anasa at ne Iesu ga vot pasa lavamaasa silok kusu neni na song araba ne Iesu ridi. ¹¹La nedi diga lok momo aleng la diga tong i ri ne Judas do nedi diba raba i mi lempilas. La ne Judas ga ngangais ti toxonaleng kusu naba epovo rin ti song araba ne Iesu ri limixin kapmek.

Leluxa At Leeme Silok

(Mt 26:17-25; Lu 22:7-14, 21-23; Jo 13:21-30)

¹²At laaleng avot ap mo leluxa limixin me Judaia diga gagas li lengkongkide.^h Ap mo laaleng diga sep laxanat sipsip la diga ove i la diga anan i. Luvuttadi loklok ka anasa at ne Iesu diga sue i xeretna, “U vara i do mana lox agagas li laanan tidik ua?”

¹³La ne Iesu ga lok katling legepura atdi la ga lok tidu xeretna, “Mo do muna beles ukeneng at lemenemen silok, lara laradi nabap kip lubuxom dan naba xip tangarang ka numu. ¹⁴Muna mumu asu i uto at loogu ni na beles teren; la muna lok ti laradi at loogu xeretna, ‘Leeme loklox ase i sue

^g 14:3 Na lubuxom tuntu diga lox i mi luat bunbun. ^h 14:12 Leluxa limixin me Judaia diga lok katling laaleng, diga vas kaxat boro Isip. La di goxo lok li laais at lengkongkide atdi.

u do, loxot ua at na loogu ram, nenia eburu mi luvuttadi loklok ka anasa rak maba lok katling leluxa at Lovovolo Pe ve?' ¹⁵La neni naba lox ase numu mi loxot silok, diga gagas li vam i no i nemen to vana ap mo loogu. Muna gagas li lempanga anan tidik go."

¹⁶La nedu duga vas kaxat la dugat pas uto at nom lemenemen, la duga long lenget ka lempanga xerekngan ne Iesu gara tong pam i ridu, la duga lox agagas li leveluxa ri Lovovolo Pe.

¹⁷Ga ukantinao ne Iesu mi luvuttadi loklok ka anasa ren diga rupot. ¹⁸La diga xis la digara anan, la ne Iesu ga lok tidi xeretna, "A tong tuturun i rinimi, lara atnimi naba song araba ia ri lavamaasa silok. Mo it kis de la i anan eburu minia."

¹⁹La diga lok bukbulu la nedi getgesara diga sue i xeretna, "Kopmen nenia, do?"

²⁰La neni ga vorang i ridi xeretna, "Neni lara atnemi lasangaun mi legepura. Mo lara i lok kaka lengkompanga anan eburu minia at loxot lili panga anan. ²¹Nenia, Laradi Mevana, anaba met kerekngan Lovoang Kaala i tong i, ketla naba lok kapmek aleng ti mo laradi naba song araba ia ri lavamaasa silok. Gitaba lox avukat do nenen gitoxo visik ka i."

²²Move diga anan, la ne Iesu ga lok kaka loxongkide, ga tong avukat ti ne Moroa la ga sebex i la ga raba luvuttadi loklok ka anasa ren in la ga lok, "Mina lok kaka i na. Labantuxu rak na."

²³La neni ga lok kaka lakap inin, la ga tong avukat ti ne Moroa, la ga raba di min la nedi axap diga inin teren.

²⁴La ni ga lok, "Lada rak na; i lok katling lekabus maxat. Lada rak ba sen su kusu ri limixin buaang, ne Moroa naba doxoma xepe leveloklok kakapmek atnedi. ²⁵A tong tuturun i rinimi, nenia noxo in at lavaen i ru xaka i lingina se ap mo laaleng nia aba in lavaen maxat to xeneng at Linintoo at ne Moroa."

²⁶La digak pixan mi loxompixan la diga vas kaxat uto at Lakaana Olip.

Iesu Ga Tong I Ri Luvuttadi Loklok Ka Anasa Do Dina Sixiro

(Mt 26:31-35; Lu 22:31-34; Jo 13:36-38)

²⁷La ne Iesu ga lok tidi xeretna, "Nemi axap minaba subu basinge ia; i lok ngan Lovoang Kaala i lok keretna,

'Nia ne Moroa, anaba sep laradi loklok tatao at laxasipsip, la lubung sipsip dinaba epeseves."

Sak 13:7

²⁸La ne Iesu ga lok bok tidi, "Ketla melemu at laxakatu kaxat amlong tarak anabamgo rinimi uto Galili."

²⁹La ne Pita ga lok tin, "Keke i do nedi axap dina subu basinge u, nenia xopmen tinotno a noxo subu."

³⁰La ne Iesu ga lok tin keretna, "Nia a tong tuturun i ru, lingina at laxanimin laxaxak kovisi noxo reng gepura la nenu unaba sev apkab naba vantun do uxoklen ia."

³¹Ketla ne Pita ga paase lolos tin, “Do di lok do dina sev amer ia, nenia noxo sok tixirixes u.” La luvuttadi loklok ka anasa axap diga tong box i xuren.

Iesu Ga Sing To Getesemane

(Mt 26:36-46; Lu 22:39-46)

³²La diga rupot to at lara laraamang laasen teren Getesemane, la ne Iesu ga lok ti luvuttadi loklok ka anasa ren keretna, “Mina xis de la ana lok be lising.” ³³La ni ga lam ka ne Pita, ne Jems la ne Jon, la lainbulu silok ga suxuna lorooro ren. ³⁴La ni ga lok tidi, “Lorooro rak i umsu mi lainbulu silok la i auret kusu na lox amer ia. Minak lok de la mina kuxut tangais ia.”

³⁵La ni ga vas silatla xakalik la ni ga subu midu mi lumeren uto xopok at laxangka la ga sing ne Moroa do i epovo na lok kepe mo lavanga ba rupot saparav i ap mo laaleng. ³⁶Ni ga lok keretna, “Tamak, u epovo una lok lempanga axap. Kereva, i epovo do una lok pes na lumumuat basinge ia. Ketla nemen gat uta mumu asu lavavara rak, una mu asu mun lavavara ram.”

³⁷La ni gamlong saparap luvuttadi loklok ka anasa ren la ga ven lenget ka di, diga unga la ni ga lok ti ne Pita, “Simon, tila u unga? Uxo epovo unap kip na lumumuat eburu minia at loxonaleng lixilik mun? ³⁸Mina reven tatao la mina ngising kusu mi noxo subu at loklok tong pen. Loroonan at laradi i epovo na ronga res, ketla labantuxu ixo lolos.”

³⁹La ne Iesu ga vas silatla xakalik manga la ga sing ngan no avot. ⁴⁰La ne Iesu gamlong saparap di, la ga ven lenget ka di, diga unga manga, mila lemeren di ga muat. La di goxoklen i do dina tong toxolinga salai rin.

⁴¹La ne Iesu gat pas, la ga lok lising la gamlong sepsev avantun la ga lok tidi, “Kereva, move mi unga? I epovo vam. Loxonaleng ira rupot pam do dina song araba ia, Laradi Mevana, ti laradi xapmek. ⁴²Mina xatu. Ata vas tangarang mo laradi na song araba ia, nom boro it pas.”

Larantanga Alis At Ne Iesu

(Mt 26:47-56; Lu 22:47-53; Jo 18:3-12)

⁴³La ne Iesu move ga paase la soso mun ne Judas, lara at luvuttadi loklok ka anasa at ne Iesu ga rupot la buaang nedi luvuttadi diga emu min. Digap kip lemparise sepsep la levempukup sepsep. Lavamaasa silok la luvuttadi loklox ase at Lenavolo, loxongkulao silok diga riki di.

⁴⁴Avot ti na, ne Judas ga tong li loklok katling kusu diba ven kibis ne Iesu. Judas ga lok tidi, “Mo lara, nia aba nes i, neni vam ne Iesu. Mina ranga alis i.” ⁴⁵La soso mun ne Judas ga vot pasa ne Iesu la ga lok tin, “Rabai.” La neni ga nes ne Iesu. ⁴⁶La diga vas kaxat la diga ranga alis

ka ne Iesu. ⁴⁷La lara at luvuttadi loklok ka anasa ga tu auret la ga rev asu lavarise sepsep teren la ga sep korop kepe labaalung at lasaxaruki at lamaasa gomgo.

⁴⁸La ne Iesu ga lok tidi xeretna, “Tila nimi mi vot de mi levemparise sepsep la levengkonbom sepsep kusu mina ranga alis ia? Nenia xopmen ana vaxaru kaxat ka leesep. ⁴⁹Buaang levenaleng nia agat kis to xeneng at loogu laplavang kusu ana anasa limixin, ketla nemi mi goxo ranga alis ka be ia go. Ketla mi ranga alis ia xerekngan lavapaase at Lovoang Kaala i tong i.” ⁵⁰La luvuttadi loklok ka anasa ren diga sixiro axap.

⁵¹La lara laau maxat ga mumu asu ne Iesu, neni ga siga mene lavanga singsiga nunuan. Diga ranga alis i, ⁵²ketla neni ga sixiro beleben, ga ke lavanga singsiga ren mila diga rebeng alis ka i.

Loxongkulao Silok Diga Lok Li Ne Iesu At Lavapaase
(Mt 26:57-68; Lu 22:54-55, 63-71; Jo 18:13-14, 19-24)

⁵³La diga lam ka ne Iesu uto at lamaasa gomgo. La lavamaasa silok mi loxongkulao silok mi luvuttadi loklox ase at Lenavolo diga rupot bok. ⁵⁴La ne Pita ga mumu asu ne Iesu ro xa vaxalom lixilik la ga vubeles at lemelia saparap loogu at lamaasa gomgo. La neni gat kis mamain eburu mi luvuttadi rutu mu.

⁵⁵La lavamaasa silok la luvuttadi amgomgo axap diga puse ri tevelinga xaxarang kusu dina xarang taba ne Iesu min la diba epovo xusu dina sev amer i, ketla digoxo epovo. ⁵⁶La buaang limixin diga bala raba i, ketla lavapaase atdi goxo sixit eburu.

⁵⁷La melemu lentaba diga xatu kaxat la diga bala raba i xeretna, ⁵⁸“Maga ronga levelinga ren keretna, ‘Nenia anaba sele utut kepe na loogu laplavang, no luvuttadi diga vaxaru i; la keneng at lavantun aleng nenia anaba vaxaru kaxat bok tara, luvuttadi di noxo gugu i.” ⁵⁹La levempapaase atdi move goxo sixit emu.

⁶⁰La lamaasa gomgo ga lok li ne Iesu to kantubu atdi la ga sue i, “Ua lavasuun teren la uxu vaase? U xopara na vorang na levelinga di sok taba u min?” ⁶¹Ketla ne Iesu goxo vaase la goxo vorang i rin la lamaasa gomgo ga sue i, “Kereva, nenu Lanarong, Nitna ne Moroa?”

⁶²La ne Iesu ga vorang i rin keretna, “Nenia vam. La nemi minaba ven ia, Laradi Mevana, anabat kis saparap lekngen tino at ne Moroa i lolos aleng la anaba vot eburu mi lenbantakabu boro vana at laxalibet.”

⁶³La lamaasa gomgo ga lais korop lavanga singsiga ren, la ga lok, “I paase vupu ri ne Moroa. Keke tevelinga bok ba. ⁶⁴Mira ronga vam levelinga ren. Nemi mi doma xereva?”

La diga vorang i do i epovo ne Iesu na met. ⁶⁵La diga vubis lemeren la diga lok pe luxatli ren la diga tir i, la diga lok tin keretna, “Una tong kibis i do nege ip sev u?” La luvuttadi esep diga lam kaka i la diga pasa box i.

Pita Ga Sok Tixirixes Ne Iesu

(Mt 26:69-75; Lu 22:56-62; Jo 18:15-18, 25-27)

⁶⁶La ne Pita gak lok to xamang at lemelua la lara loono maxat ga rupot, neni lasaxaruki at lamaasa gomgo. ⁶⁷Neni ga ven ne Pita gat kis mamain la ga ven tooro i la ga lok, “Nenu bok ugak lox eburu mi ne Iesu me Nasaret.”

⁶⁸Ketla ne Pita ga lok, “Nia axoklen lavanga salai u paase min.” La ni gat pas uto at loxot povolo at lemelua.

⁶⁹La melemu nom loono ga ven manga ne Pita la ga lok ti luvuttadi diga tu go, “Neni nom, lara at luvuttadi loklok ka anasa at ne Iesu.” ⁷⁰La ne Pita ga sev apkap manga.

La melemu lentaba diga tu saparap ne Pita, diga lok tin keretna, “I ruturun, nenu lara atdi mila nenu bok boro Galili.”

⁷¹La ne Pita ga vangpe mi levelinga vangpangpe xeretna, “Levelinga rak i ruturun; do xopmen, ne Moroa ba lox asongor ia. Nia axoklen mo laradi.”

⁷²La soso mun laxaxak ga reng sepsev agepura. La ne Pita ga doma asu at lavapaase at ne Iesu ga lok keretna, “Laxaxak kovisi noxo reng gepura, la nenu uba sep apkap naba sev avantun do uxoklen ia.” La ne Pita gang teng.

Paelat Ga Susue Ne Iesu

(Mt 27:1-2, 11-14; Lu 23:1-5; Jo 18:28-38)

15 ¹Ga maxantamak suubu lavamaasa silok mi loxongkulao silok la luvuttadi loklox ase at Lenavolo, nedi lavaeme silok axap diga rupot eburu la diga epaase mumu ne Iesu. La diga xoxo alis lukngen la diga lam taba ne Paelat min.

²La ne Paelat ga sue ne Iesu xeretna, “Nenu loorong silok at limixin me Judaia?”

La ne Iesu ga vorang i rin keretna, “I ruturun. Nenu xa ura tong pam i.”

³La lavamaasa silok diga sok taba i mi laxalinga buaang. ⁴La ne Paelat ga sue box i xeretna, “Kereva, u xopara na vorang levelinga atdi? Una rongba di, di sok taba u mi laxalinga solo.”

⁵Ketla ne Iesu xopmen goxo vorang levelinga atdi la ne Paelat ga sanganu aleng.

Limixin Diga Lok, Paxarem I At Laxaba

(Mt 27:15-26; Lu 23:13-25; Jo 18:39–19:16)

⁶At levenmaares axap laradi gomgo boro Rom ga mu asu lara loklok. At leluxa silok at Lovovolo Pe, neni gak soxomus asu lara laradi xoxoxo do limixin diga lok katling i. ⁷La lara laradi, laasen teren ne Barabas gak

lok to at loogu xokoxo. Ganoxa neni mi luvuttadi vetpes diga esep eburu mi luvuttadi esep at lagavaman kusu dina lok kepe lagavaman, la neni ga sev amet lentaba. ⁸La limixin ap mo leluxa diga rupot pasa ne Paelat kusu neni na lox asu tara taradi gak lok to at loogu xokoxo.

⁹La ne Paelat ga sue di, “Mi vara i do nenia na lox asu loorong silok atnemi limixin me Judaia?” ¹⁰Paelat gaklen i do lavamaasa silok diga reven peves at ne Iesu la ni lavasuun teren la diga vara i do dina sev amer i. ¹¹Ketla lavamaasa silok diga lox axatu levendoxoma at limixin kusu dina sing ne Paelat do neni na lox asu ne Barabas.

¹²La ne Paelat ga sue di, “La ana lok lavanga salai mi na laradi mi so asen i mi loorong silok at limixin me Judaia?”

¹³La digap kup lolos tin xeretna, “Paxarem i at laxaba.”

¹⁴La ne Paelat ga sue bok, “Tila? Neni ga lok laxakapmek salai.”

Ketla digap kup lolos aleng keretna, “Paxarem i at laxaba.”

¹⁵Kuren la ne Paelat ga mu asu lavavara atdi la ga lox asu raba di mi ne Barabas. Ketla neni ga raba ne Iesu ti luvuttadi esep kusu dinak pixis i la dina vaxarem i at laxaba.

Luvuttadi Esep Diga Lok Kalise Ne Iesu

(Mt 27:27-31; Jo 19:2-3)

¹⁶La luvuttadi esep diga lam ka ne Iesu uto at loogu silok at laradi gomgo la diga ro bubua ka luvuttadi esep axap. ¹⁷La diga vaxasiga i mi lavanga singsigaara at loorong silok la diga lok lixiam tin mi laban gagas la diga vaxaxua lavatlak teren min. Diga lok mo lempanga xusu ri lok kalise i. ¹⁸La diga lok kalise i xeretna, “Ma lok ngangao ram loorong silok at limixin me Judaia.” ¹⁹La digak pixis patlax i mi lakdak la diga vubis sanga i. La diga xis tiktikbu mi lempatgulom atdi la diga emi asu sese min. ²⁰Diga lok kalise axav i la diga lok pes lavanga singsigaara basinge i la diga vaxasiga manga i mi lavanga singsiga xa ren. La diga sat ka i basinge mo loogu silok kusu dina vaxarem i at laxaba.

Diga Vaxarem Ne Iesu At Laxaba

(Mt 27:32-44; Lu 23:26-43; Jo 19:17-27)

²¹La lara laradi, laasen teren ne Simon me Sairini, neni temen ne Aleksanda mi ne Rupas, la neni gat pas boro at lemenemen petpes la luvuttadi esep diga sox aruru parang i xusu na xip ka laxaba at ne Iesu. ²²La diga lam ka ne Iesu uto at lenep, loxonasen kot go do Golgata. Lavasuun at na loxolinga do, “Lavatlak Tongan.” ²³La diga lok do dina raba i mi lavaen diga lox eburu mi lara laxadan mamao di tong i do mur,ⁱ ketla ne Iesu goxopara i. ²⁴La diga vaxarem i ro vana at laxaba la

ⁱ 15:23 Lentaba di lok do anai ni lara la marasin kusu ri lok pes losongsongot.

melemu diga lu buru mi lengkonuat kusu ri lok kisip ka nege ba lok kaka lempanga singsiga ren.

²⁵Diga vaxarem ne Iesu ga maxantamak at lavasik konaleng. ²⁶To mavana at lavatlak teren diga lok li levelinga, mo ga tong asu lavasuun at lumumuat teren. Nom levelinga ga lok keretna, “Loorong Silok at Limixin me Judaia.” ²⁷La diga vaxarem bok legepu radi xipkip pilo saparap ne Iesu, lara saparap lekngen tino la lara saparap lekngen kia. ²⁸[Levelinga at ne Aisaia, leeme vapaase alii at ne Moroa ga ravasu ruturun keretna, “Limixin diga doma i do neni bok laradi xapmek.”] ²⁹La limixin digat pas polo go la diga pirapat lempatlak atdi la diga lok kalise ne Iesu xeretna, “Nenu ga lok do unaba sele utut kepe loogu laplavang la unaba vaxaru amu box i at lavantun aleng, ³⁰una eng si ukopok la una lox aroo axa u.”

³¹La kerepmo bok lavamaasa silok mi luvuttadi loklox ase at Lenavolo diga paase aksaksa. Diga lok keretna, “Neni ga lox aroo lentaba vetpes, ketla neni ixo epovo do na lox aroo axa i. ³²Mo do neni Lanarong at ne Moroa la loorong silok at limixin me Israel, neni na eng si ukopok la nedik ataba nuunu ba ren.” Luradi duga merem saparav i, nedu bok duga paase rin mi laxalinga xapmek.

Lanmet At Ne Iesu

(Mt 27:45-56; Lu 23:44-49; Jo 19:28-30)

³³At lasangaun mi legepu xonaleng, laxangking ga xis tubu la lamain ga vung pavaa mo lenep silok axap la gak lok se at lavantun konaleng.

³⁴La at lavantun konaleng ne Iesu ga xup lolos keretna, “Eloi, Eloi. Lama sabaktani?” Lavasuun at na levelinga xeretna, “Moroa rak, Moroa rak, tila u raba arulu ia?”

³⁵Lentaba luvuttadi diga tu go, diga rongga i la diga lok, “Ata rongga i, neni i toro ri ne Elaia.”

³⁶La lara laradi ga sixit, la ga lok ka loxontamon la ga lox amlu xaka i ro xeneng at lavaen mamao la ga xoxo li i ro at loxonuna la ga lok do na vaxain ne Iesu min, la ga lok keretna, “Ata ven be i do ne Elaia go naba rupot ti lok tooro i.”

³⁷La ne Iesu ga xup lolos la ga met.

³⁸La ap mo loxonaleng lavatamon silok ga merem to xeneng at loogu laplavang ga rem lais ka ro vana, ga su ro xopok la ga ra ngan ta legepu ban. ³⁹La laasesep ga tu go xopok to melamgo at ne Iesu ga rongga luxupkup teren la ga ven lanmet teren. Kuren la neni ga lok, “Neni lamdak tuturun pam at ne Moroa.”

⁴⁰Lentaba lavakin mo diga tu ro vaxalom diga reven lanmet at ne Iesu. Levenasen atdi, Maria Magdalene, Maria nenen ne Jems kakalik mi ne Joses la ne Salomi. ⁴¹Ganoxa nedi diga mumu asu ne Iesu ap mo levenaleng neni ga nemen to Galili la diga lok tooro i. Lavakin petpes bok mo diga mumu asu ne Iesu uto Jerusalem.

Digak Mit Ne Iesu

(Mt 27:57-61; Lu 23:50-56; Jo 19:38-42)

⁴²Mo laaleng Iesu ga met teren, ni laaleng gagas, la laaleng avot ti laaleng kaala. ⁴³Ga ukantinao Josep me Arimatia neni lara at lavaeme silok at limixin me Judaia la neni ga ngangais ti Linintoo at ne Moroa. Neni goxo marat la ga vot pasa ne Paelat la ga sing i do neni na raba i mi labantuxu at ne Iesu. ⁴⁴La ne Paelat ga sangan do ne Iesu gara met pam. La neni ga ro ka laasesep teren la ga sue i dola ne Iesu ira met pam koplakopmen. ⁴⁵La mo laradi ga tong i rin do mo levelinga i ruturun. La ne Paelat ga siam ta do ne Josep na lok ka labantuxu at ne Iesu. ⁴⁶La ne Josep ga lok ka labantamon maxat la ga lox asi labantuxu at ne Iesu ukopok, la ga bom i mi nom labantamon. La diga lok li i ro xeneng at lamaaut, no diga xe i ro xeneng at lavaruat silok. La ne Josep ga xavun pe lumusaragu at lamaaut mi lavaruat. ⁴⁷La ne Maria Magdalene mi ne Maria nenen ne Joses duga ven mo loxot lamaaut at ne Iesu gak lok teren.

Lorooro Xat Amlong At Ne Iesu

(Mt 28:1-8; Lu 24:1-12; Jo 20:1-10)

16 ¹Se laaleng kaala ga xap, Maria Magdalene, Maria nenen ne Jems la ne Salomi diga un kaka laxadan somavak kusu dina lok li i at labantuxu at ne Iesu. ²Ga maxantamak suubu at laaleng avot ap mo luik, laxangking ga losu la nedi lavakin digat pas uto at lamaaut at ne Iesu; ³diga esue xeretna, “Nege naba xavun kepe lavaruat mo ik lok pe lungusungus ap mo lamaaut?”

⁴Se diga rupot go, diga milik upana la diga ven i do lara ga xavun kepe vam mo lavaruat silok basinge lamaaut. ⁵Diga vubeles at lamaaut, la diga ven lara laradi maxat, levesingsigaara ren ganbun aleng la neni gat kis at lenep tino la diga lingun teren.

⁶La neni ga lok tidi xeretna, “Nemen gat mita marat. Mi puse ri ne Iesu me Nasaret no ga rem at laxaba. Ketla neni ira roo xat pam. Mina ven loxot diga vaxamdi i ren, neni xopmen nak lok bok ba de. ⁷Mina onon la mina vot pasa ne Pita mi luvuttadi loklok ka anasa at ne Iesu la mina tong i ridi do ne Iesu iramgo vam tidi uto Galili la dina mumu asu i la dinaba ven i ngan neni ga tong pam i ridi.

⁸La nom lavakin diga dede la diga rangku mi lanmarat la diga sixisu boro xeneng at lamaaut la diga sixiro. La di goxo tong na lavanga ti tara mila diga marat.

Maria Magdalene Ga Ven Ne Iesu

(Mt 28:9-10; Jo 20:11-18)

⁹[La ne Iesu ga roo xat amlong at laaleng avot ap mo luik. La ne Maria Magdalene ga ven avor i, ganoxa ne Iesu ga riki xepe lavanuti lubunggas

basinge i. ¹⁰La ne Maria gamlong la ga vot pasa nedi diga mumu asu ne Iesu. Digak saxaanu la digang teng mumu ne Iesu la ne Maria ga tong i ridi do neni ga ven pam ne Iesu. ¹¹At loxonaleng diga rongga i nom, di goxo nuunu do ne Iesu mo ga roo xat pam la ne Maria ga ven i.

Luvuttadi Loklok Ka Anasa At Ne Iesu Diga Ven I

(Lu 24:13-35)

¹²La melemu legepura at luvuttadi loklok ka anasa at ne Iesu dugat pas uto at lara lemenemen la duga ven ne Iesu ga ruuna levereven petpes.

¹³La melemu dugamlong la duga tong i ri luvuttadi loklok ka anasa ren, ketla di goxo nuunu atdu.

¹⁴La melemu ne Iesu ga vot pasa lasangaun mi legesara luvuttadi loklok ka anasa ren at loxonaleng diga anan; la neni ga vaase lolos tidi mila lunuunu atdi goxo lolos la di goxo nuunu atnedi diga ven pam i.

¹⁵La neni ga lok tidi xeretna, “Mina onon uto at levengkot axap at na lavatbung menemen la mina tong asu Lagale Lavavang tarak ti limixin axap. ¹⁶Dola tara na nuunu at Lagale Lavavang tarak la mina sep susu i, neni naba roo suu. Dola tara noxo nuunu at Lagale Lavavang tarak, neni naba seeve. ¹⁷Nedi di nuunu at Lagale Lavavang tarak, Moroa naba raba di mi leveloklok katling keretna; at laasen tarak dinaba riki xepe lubanggas basinge limixin. La dinaba paase mi levempapaase vetpes. ¹⁸La dinaba rebeng kaka levesii xapmek la limixin dinaba sep sak di, ketla di noxo meres la di noxo met, la dinaba lok li levengkikngen di at limixin mekmeres la nom limixin dinaba lox avukat.”

Moroo Ga Lam Ka Ne Iesu

(Lu 24:50-53; Gu 1:9-11)

¹⁹Se Leeme Silok ne Iesu ga vaase axap, Moroa ga lam ka i uto vana at laxalibet la neni ga xis taba ro at lenep at lekngen tino at ne Moroa.

²⁰La luvuttadi loklok ka anasa ren diga vas kaxat la diga tong asu Lagale Lavavang to at levengkot axap la Leeme Silok ga gugu eburu midi la ga lox aruturun lavapaase atdi mi lempanga sangsangu.]

Luk

Lagale Lavavang At Ne Iesu Karisito Luk Ga Malagan i

Levelinga Loklox Axasep

Levenmaares 59-60 A.D.

Luk goxo ven leven gugu at ne Iesu mi luxatli ren, ketla neni ga puse lolos mumu lorooro at ne Iesu; kuren la neni ga lok ka lakleklen boro atnedi diga ven ne Iesu. Neni ga malagan na lubuk la Leven Gugu bok at luvuttadi vavang uto ri ne Tiopilas, neni lentangas atdi xeneng at lunuunu atdi parap ne Iesu. (Luk neni boro Grik). Neni ga vara i do ne Tiopilas na xasep nunuan mumu ne Iesu la leven gugu ren. Luk neni laradi loklok tooro at levenanmeres la ga nemen eburu mi ne Pol at lentaba levenaleng. Luk gaklen avukat la ga malagan mumu labalamu at ne Iesu tinedik getgesara. Neni ga malagan bok mumu levenanasa at ne Iesu, leemi asu at ne Moroa, la lolos at Loroonan Kaala, la lising la luvuttadi banbalo la luvuttadi apnovos.

Lengkot silok keneng at na lubuk:

- 1:1-4 Lavapaase Axasep
 - 1:5-2:51 Livipisik at ne Iesu
 - 3:1-22 Jon laradi sep susu limixin ga gugu.
 - 3:23-38 Leretere at lavalabat at ne Iesu.
 - 4:1-4:13 Satan ga lok tong pen ne Iesu.
 - 4:15-9:50 Iesu gat pas tangtagap la ga vavang to Galili.
 - 9:51-19:27 Iesu gat pas uto Jerusalem.
 - 19:28-22:38 Levenanasa at ne Iesu.
 - 22:39-23:56 Larangtanga alis la lanmet at ne Iesu.
 - 24:1-53 Laxakatu kaxat amlong at ne Iesu.
-

Lavapaase Axasep

1 ¹Saparap leeme silok, ne Tiopilas. Buaang nedu limixin diga lok tong i do dina malagan levelinga at lempanga ne Moroa ga lox i xantubu atnama at lukngen ne Iesu. ²Diga malagan alii lugugu at ne Iesu, mo maga ronga i boro atnedi diga ven na lempanga at lavakpaxaru kaxat teren, la diga tong asu na Lagale Lavavang. ³La nenia bok agara sue avukat ka vam levelinga mumu lorooro axap at ne Iesu; kuren la a doma i do i lox avukat kusu ana malagan akmokso lempanga ne Iesu ga lox i. ⁴Ak lox i na kusu unabaklen avukat mo levelinga uga ronga vam i mumu ne Iesu.

Laangelo Ga Vaase Asu Lovotpot At Ne Jon Laradi Sep Susu

⁵Ap mo levenaleng loorong silok ne Erodes gam gomgo [nga] to at lenep silok Judaia. Lara lamaasa, laasen teren ne Sakaria, neni lara atnedi lavamaasa diga nemen keneng at lara loxonbinam tadi, laasen ap mo loxonbinam tadi ne Abaisa. Latkin teren, laasen teren ne Elisabet; neni eburu mi ne Sakaria boro at livisik li at lamaasa me gano ne Aron. ⁶Nedu buru duga nemen mokmokso at lemeren ne Moroa, la duga mumu asu amisik levelinga at ne Moroa, la leventaangas bok teren. ⁷Ketla du goxo ruuna taxamdak, mila ne Elisabet goxo pisik, la nedu lenasun dugak sokso nga.

⁸At lara laaleng libinam tadi at ne Sakaria digak lok to at loogu laplavang kusu dina lok lugugu atdi at lemeren ne Moroa; la ne Sakaria bok ga gugu. ⁹La diga soxolik ka i xusu na xotos levempavaxan una i so mavak to xeneng at loxot kaala at loogu laplavang. Diga soxolik ka i mi lara loklok at leme Judaia; lavamaasa diga lu buru mi levenuat, la luat at ne Sakaria ga subu avot at laxangka. ¹⁰At loxonaleng ti xotos levempavaxan una i so mavak, neni ga beles uto xeneng at loxot kaala at loogu laplavang at ne Moroa ti lok mo lavanga to at loxonin laplavang. Limixin diga nemen to maxamang, diga ngising.

¹¹La lara laangelo at ne Moroa ga rupert saparav i, ga tu to at lenep tino ap mo loxonin aplavang, ni [Sakaria] ga xotos levempavaxan una mavak e. ¹²Sakaria ga ven i la ni ga lingun la ga umsu mi lanmarat. ¹³Ketla laangelo ga lok tin, "Sakaria, nemen uta marat, Moroa ira ronga vam levesingising taram, la latkin taram ne Elisabet naba visik tamdak tu. Uba so asen i mi ne Jon. ¹⁴Nenu uba momo la una sosoro aleng, la buaang bok nedu diba momo aleng mo do latkin taram na visik tamdak, ¹⁵mila neni naba silok tinotno at lemeren ne Moroa. Nemen mo lamdak guta inin taxadan vaen la taxadan lolos. Ap mo laaleng nenen na visix i, neni naba umsu mi Loroonan Kaala. ¹⁶Neni naba sat ka amlong buaang nedu limixin me Israel saparap ne Moroa, Leeme Silok atdi. ¹⁷Neni

nabamgo ri Leeme Silok, mi Loroonan Kaala la lololos, i ngan leeme vapaase alii ne Elaia; neni naba vaxaxis etangas avukat luvuttemen eburu mi laxamdak atdi kusu luvuttemen dinaba balamu laxamdak atdi; neni naba ba gili levendoxoma at limixin tongtonga xepe kusu dina rebeng kaka lodoxoma mokmokso; neni naba lox agagas limixin at ne Moroa kusu dinaba gagas tangais Leeme Silok.”

¹⁸Sakaria ga lok ti laangelo, “Abaklen i xereva do levelinga ram i ruturun? Mila nia laradi asioxo la latkin bok tarak neni iak sokso vam.”

¹⁹Laangelo ga lok tin, “Nenia ne Gabriel. A tu amisik to saparap ne Moroa, mo i sak tiki ia xusu ana vaase tu, la ana tong asu i na levelinga nunuan tu. ²⁰Ketla uxu nuunu at levelinga rak, mo naba sorun at loxonaleng ne Moroa ga vaase alii vam i ren. Kuren la na u noxo epovo una paase, se ap mo laaleng na lavapaase alii rak naba sorun.”

²¹Ap mo mene loxonaleng mo limixin diga ngangais ti ne Sakaria, digam doma mumu do lai mo ni ga lox angtang min to xeneng at loxot kaala at loogu laplavang. ²²Se neni ga vas su ukamang, ni goxo epovo na vaase rinedi; kuren la digaklen i do, ni mo ga ven pam lisilimet to xeneng at loxot kaala. Ni ga lok mun leveloklok poovo rinedi mi lukngen; move ni goxo epovo kusu na vaase.

²³Se neni ga lox axap mo lugugu teren to at loogu laplavang, neni gamlong uto xolonu. ²⁴Melemu latkin teren ne Elisabet ga renan, la ni ga nemen tino go at loogu ren at lavalimo gaaling. ²⁵Ni ga lok, “At naba la ne Moroa ira balamu ba ia at na langas. Nia aga lok mamangan mila a goxo pisik, ketla a renan ta la lainmangan tarak ira xap pam.”

Laangelo Ga Vaase Asu Livipisik At Ne Iesu

²⁶At lagaaling sepsev avanna at lereterenan at ne Elisabet, Moroa ga sak tiki laangelo ren, ne Gabriel uto Nasaret, lara lemenemen to at lenep silok Galili. ²⁷Ni gat pas mi levelinga ti lara loono maxat laasen teren ne Maria, mo diga lok katling i xusu naba epot at lara laradi laasen teren ne Josep, at livisik li at ne Devit, loorong silok me gano. ²⁸Laangelo ga rupot saparap ne Maria la ga lok tin, “Lenmila na nemen eburu minu! Moroa i nemen eburu minu, la i vara aleng u la ni naba lox anarong u.”

²⁹Maria ga lingun at levelinga at laangelo, la gam doma mumu lavasuun ap mo levelinga. ³⁰Ketla laangelo ga lok tin, “Maria, nemen uta marat, mila ne Moroa ira lok momo vam minu. ³¹Unaba renan la unaba visik tamdak, la uba so asen i mi ne Iesu. ³²Neni naba silok aleng la neni naba ruuna na laasen do lamdak at ne Moroa i silok aleng. Moroa naba lox i ngan loorong silok, i ngan [lara] ren ne Devit, neni loorong silok me gano; ³³la neni naba nemen amisik ngan loorong silok at livisik li at ne Jakop; lixitkis orong teren noxo xap!”

³⁴Maria ga lok ti laangelo, “Nenia kopmen ana epot! Naba lok kereva na?”

³⁵Laangelo ga lok tin, “Loroonan Kaala naba vot saparav u, la lololos at ne Moroa naba los kis taram; kuren la nom lamdak dadat diba so asen i do lamdak at ne Moroa. ³⁶Una doxoma lara ram ne Elisabet. Diga tong i do ni noxo visik; ketla neni xa i vanna nga leven gaaling teren, keke i do neni ira sioxo vam. ³⁷Kopmen tempanga na lolos saparap ne Moroa kusu ni na lox i.”

³⁸Maria ga lok, “Nia mun lasaxaruki at ne Moroa, i epovo do na lavanga na rupot saparav ia i ngan ura tong pam i.” La laangelo ga on basinge i.

Maria Ga Vot Pasa Ne Elisabet

³⁹Melemu at lentaba levenaleng Maria ga lox agagas, la ni gat pas soso uto at lempatkaana at lara lemenemen gak lok to at lenep kangka Juda. ⁴⁰Ni ga vubeles uto xeneng at loogu at ne Sakaria la ga vaase momo ri ne Elisabet. ⁴¹Ga se ne Elisabet ga ronga mo levelinga at ne Maria, lamdak ga xuluxut to xeneng at lebelen. La ne Elisabet ga umsu mi Loroonan Kaala, ⁴²la ni ga vaase silok keretna, “Nenu loono u umsu mi loklox anarong tinedi lavakin axap, la nom lamdak nenu uba visix i, Moroa naba lox anarong i! ⁴³Tila ba la nenen Leeme Silok ira vot pasa ia, nenia latkin gamasa mene? ⁴⁴Ap mo loxonaleng u paase ria, la lamdak na xeneng at labalak i xuluxut mi lososoro. ⁴⁵Moroa naba lox anarong u mila uga nuunu do levelinga at ne Moroa naba sorun!”

Livikpixon Emi Asu At Ne Maria

⁴⁶Maria ga lok,

“Nenia a emi asu mi ne Moroa; ⁴⁷lorooro axap tarak i umsu mi lomomo mila ne Moroa neni Laradi Loklox Arooro rak, ⁴⁸la neni ira doxoma su vam tarak, latkin gamasa mun. La nenia lasaxaruki ren. Limixin axap diba rupot melemu diba tong i do Moroa ga lox anarong ia, ⁴⁹mila ne Moroa Lolos ira lok pam na lavanga silok tia. Laasen teren i melemelengan.

⁵⁰I lox asuusu labalamu ren tinedi di lok ngangao ren at laraola axap.

⁵¹Neni ik lok lempanga lolos, la i utut tereve levendoxoma at limixin di lox asilok nedi. ⁵²Ni ik lox asi lavaorong silok basinge lixitkis orong atdi, la ik lox asilok limixin etaba. ⁵³I suxa umsu limixin dik pakes mi lempanga nunuan, la ik tiki limixin dip novos la dit pas la kopmen bok ba tempanga dina ruuna i. ⁵⁴Ni ga doxoma lavapaase alii ren ga lox i rinedi lavalabat atnama, la ira lok tooro lubangmixin teren me Israel, nedi lavasaxaruki ren. ⁵⁵La i lox asuusu amisik labalamu ren kerekngan ni ga lok lavapaase alii ren ti lavalabat atdik la ti ne Abaram, la ti livisik li bok teren.”

⁵⁶Maria ga nemen eburu mi ne Elisabet at lavantun gaaling axap la melemu neni gamlong bok ba uto xolonu ren.

Elisabet Ga Visik Ne Jon Laradi Sep Susu

⁵⁷Laaleng ga vot nga kusu ri ne Elisabet na ranga madak, la ni ga visik lamdak temes. ⁵⁸Lentaba no diga nemen saparav i la libibinat teren diga

ronga i do ne Moroa ga lok loklox avukat aleng tin; kuren la diga lok momo aleng eburu mi ne Elisabet.

⁵⁹Ga at laaleng sepsev avuanan digat pas kusu dina ven ne Sakaria na vit kepe loxontuxu at lamdak teren; diga lok do diba so asen i mi ne Sakaria, laasen at ne temen. ⁶⁰Ketla nenen ga lok, “Kopmen! Laasen tin ne Jon.”

⁶¹La diga lok tin, “Ketla kopmen tara at libibinat taram i ruuna nom laasen!”

⁶²Kuren la diga lok loklok poovo ti ne Sakaria, kusu dina sue i do ua laasen mo lamdak naba ruuna i. ⁶³Sakaria ga sing ti tovoang mamalagan la ni ga malagan keretna, “Laasen teren ne Jon.” La nedi axap diga sangu.

⁶⁴Ap mo mene loxonaleng Sakaria ga lox epovo manga i kusu na paase, la ni ga emi asu mi ne Moroa. ⁶⁵La mo limixin diga nemen saparav i diga sangu aleng, la lavapaase mumu i na lavanga ga epeseves keneng at lengkot axap at lempatkaana at lenep silok Judaia. ⁶⁶Nedi axap getgesara diga rongga i na, la digam doma mumu i la diga esue xeretna, “Ana lamdak naba lok kereva?” Diga paase xerepmo mila digaklen i do lololos at ne Moroa ga nemen eburu min.

Lavapaase Alii At Ne Sakaria

⁶⁷Temen ne Jon ga umsu mi Loroonan Kaala, la ni ga vaase mi levelinga at ne Moroa,

⁶⁸“Ata emi asu mi ne Moroa, Leeme Silok me Israel! Ga vot ti soxomus asu limixin me Israel at loxokoxo at ne Satan. ⁶⁹Ni ga gagas li laradi lolos i ngan Laradi Loklox Arooro ridik, neni livisik li at ne Devit, laradi gugu ren. ⁷⁰Gano migomgo at lavaeme vapaase alii ren, neni ga tong i na. ⁷¹Ga paase alii xusu na lox arooro dik basinge nedi dik lok munepen midik la basinge di, di belemamao dik. ⁷²Ni ga lox empana lavapaase alii ren ni ga lox i ri lavalabat atdik la kerepmo i lox asuusu labalamu ren tidi. ⁷³Ni ga lok lavapaase alii ruturun ti ne Abaram, leeme silok at lavalabat atdik, ⁷⁴la ga paase alii do ni naba lox arooro dik basinge limixin dik lok munepen midik, la na lok tooro dik kusu ataba epovo, la tanap kip mo lugugu ren la kopmen dik taxo marat. ⁷⁵At levenaleng axap at lorooro atdik, atap kip lugugu ren mi loklok i xaala la ik mokso. ⁷⁶La nenu lamdak tarak, uba ruuna na laasen, laradi vapaase alii at ne Moroa Silok Aleng Tinotno; mila ubam gomgo ri Leeme Silok kusu unaba gagas li langas tin, ⁷⁷la uba tong i ri limixin teren do neni ba lox arooro di la neni naba doxoma xepe laxakapmek atdi. ⁷⁸Neni ba lox i na mila ne Moroa atdik i umsu mi labalamu silok; kuren la ni naba riki asi Lanarong teren kusu na ravasu ude ri na lavatbung menemen ti

lox arooro limixin. ⁷⁹La ni naba lok ngan laxasep tinedi limixin di nemen keneng at lamain la tinedi bok dik lok maxopok at lamau at lanmet, la neni naba sat lavatpas atdik ti langas at lumulum.”

⁸⁰Jon ga silok la loklok teren ga nunuan aleng. Ni ga nemen to at lamatbin se at laaleng neni ga vot asuvos tinedi limixin me Israel.

Livipisik At Ne Iesu

(Mt 1:18-25)

2 ¹Jon move ga lixilik la ne Kaisar Ogastas ga lox aonon lavapaase axasep tinedi limixin digak lok maxopok at lagavaman boro Rom kusu dina malagan amaxat ka levenasen atdi. ²Kuirinias ga neni laradi gomgo ri lenep silok Siria, at mo laaleng na lugugu ti lok ka asen ga vot. ³Nedi limixin getgesara digat pas ti levenmenemen axa atdi kusu dina lok li levenasen atdi.

⁴La ne Josep ga nemen at lemenemen Nasaret at lenep silok Galili. Ni ga ronga na levelinga la at lara laaleng ni ga vas kaxat uto at lemenemen, laasen teren, Betilem mo gak lok at lenep silok Judaia; mo lemenemen at loorong silok ne Devit. Josep gat pas ugo, mila ga neni livisik li at ne Devit, ⁵la kusu ni na lok li laasen teren eburu mi ne Maria; neni diga lok katling i xusu naba epot at ne Josep. Neni ga balan madak. ⁶La nedu duga rupot to Betilem, la laaleng ga vot nga kusu ne Maria na visik lamdak teren. ⁷La ni ga visik lamdak temes avot teren, la ga bom i mi leventamon la ga vaxamdi i ro at loxot anan at laxanbulumaxao, mila goxopmen toxot tidu ri nemen to at loogu mikmidi.

Luvuttadi Loklok Tatao Sipsip Mi Lubung Angelo

⁸Ap mo laxanimin lentaba luvuttadi loklok tatao sipsip diga nemen ap mo lenep, digak lok tatao levesipsip atdi. ⁹La laangelo at ne Moroa ga vot saparap di, la lisisixam at ne Moroa ga so axasep nedi la ga vung kamit mo loxot axap. La diga marat aleng tinotno. ¹⁰Ketla laangelo ga lok tidi, “Nemen mita marat! Nenia ana tong levelinga avukat tinimi, kusu naba lox amomo limixin axap. ¹¹Lingina at na laaleng to at lemenemen at ne Devit, Laradi Loklox Arooro atnimi dira visik pam i; neni Lanarong la Leeme Silok! ¹²Loklok katling at na lavanga i lok keretna; miba long lenget ka lumulum di bom i mi leventamon la ik midi ro at loxot anan at laxanbulumaxao.”

¹³La soso mun, buaang nedi lubung angelo boro vana at laxalibet diga vot eburu mi mo laangelo, diga emi asu saparap ne Moroa; la diga lok keretna,

¹⁴“Ata emi asu mi ne Moroa ik lok to vana at laxalibet, la lumulum at ne Moroa bak lok at na lavatbung menemen tinedi ne Moroa i momo midi.”

¹⁵La lubung angelo diga on basinge di, la digamlong manga uto vana at laxalibet, la luvuttadi loklok tatao sipsip diga epaase minedi getgesara xeretna, “Atat pas uto Betilem la ata ven mo lumumulum, ne Moroa ira tong pam i ridik.”

¹⁶La diga vas kaxat soso mun, diga vot posiga ne Maria la ne Josep, la diga long lenget ka lumumulum gak midi to at loxot anan at laxanbulumaxao. ¹⁷Ga se mo luvuttadi loklok tatao sipsip diga ven lumumulum, diga on basinge i, la diga paase asu levelinga at laangelo ri limixin axap. ¹⁸La nedi mo diga ronga mo levelinga, diga sangu ren. ¹⁹Ketla ne Maria ga doxoma na levelinga, la gam doma mumu amisix i. ²⁰Luvuttadi loklok tatao sipsip digamlong, diga emi asu mi ne Moroa ti nom lempanga diga ronga i la diga ven pam i, kerekngan laangelo ga vaase di min.

Diga So Asen Ne Iesu

²¹At laaleng sepsev avanuan melemu at livipisik at ne Iesu, nedu lenasun duga lok ka ne Iesu xusu dina vit kepe loxontuxu ren; la diga so asen i mi ne Iesu, no laasen laangelo gara so asen avot pam i min ap mo loxonaleng nenen goxovisi renan min.

Diga Lok Ka Ne Iesu Uto At Loogu Laplavang

²²Laaleng ga vot nga kusu ne Josep mi ne Maria duna lok axap mo loklok ti lox adadat du kerekngan Lenavolo at ne Moses ga tong i. La duga lok ka lamdak uto Jerusalem kusu duna raba ne Moroa min, ²³kerekngan levelinga gak lok to xeneng at Lenavolo at ne Moroa i lok keretna, ‘Laxamdak temes avot, mina song araba di ri ne Moroa.’ *Pas 13:2,12,15* ²⁴Dugat pas bok kusu duna raba leventamtaba atdu. Lenavolo at ne Moroa ga tong i do limixin dinaba raba i mi legepu bino, kopla legepu bilis.

²⁵Lara laradi ga nemen to Jerusalem laasen teren ne Simion. Neni lagale laradi, la ga lok ngangao bok at ne Moroa la ni ga lotu ruturun saparap ne Moroa, la ni ga ngangais ti taradi kusu naba lox arooro limixin me Israel. Loroonan Kaala ga nemen teren. ²⁶La Loroonan Kaala ga tong pam i rin do ni noxo met se ni naba ven Lanarong at ne Moroa. ²⁷Ap mo laaleng Loroonan Kaala ga lam ka ne Simion uto at loogu laplavang. Ne temen mi nenen ne Iesu duga lox abeles lamdak ukeneng kusu dina lox epovo loklok at leme Judaia i ngan Lenavolo ga tong i. ²⁸La ne Simion ga lok kaka lamdak mi lukngen, la ga emi asu mi ne Moroa xeretna;

²⁹“Na, Moroa silok! Lavapaase alii ram ira sorun pam, la na nga una ke ia, lasaxaruki taram kusu ana met basinge lugugu ram la ana nemen at lenmila. ³⁰Ara ven pam langas ti lorooro mi luxatli axa

rak, ³¹mo uga gagas min kusu limixin axap diba ven i, ³²i ngan laxasep kusu naba lox axasep langas taram ti limixin kopmen di me Judaia, la na raba lisinorong ti limixin taram boro Israel.”

³³Temen mi nenen lamdak duga sangu aleng ap mo levelinga at ne Simion. ³⁴Simion ga lox anarong di la ga lok ti ne Maria xeretna, “Ana lamdak ne Moroa ga soxolik ka i xusu naba lok nedo limixin buaang me Israel diba subu la buaang bok nedo diba xatu at levelinga ren. Neni naba lok ngan loklok katling boro vana at ne Moroa la buaang nedo diba sok tixirixes i; ³⁵la ni naba lox asuvos levendoxoma nemnem at limixin. La lorrooro ram naba umsu mi lainbulu.”

³⁶Lara latkin papaase alii laasen teren ne Ana; loolik at ne Panuel, at libibinat at ne Asa. Neni lasioxo rixin, la ni ga epot mun at lavanuti maares. ³⁷La latlok teren ga met la melemu neni ga nemen naa; la levenmaares teren ga epovo at lavanuan sangaun mi lavanuet. Neni xopmen goxo onon basinge loogu laplavang; at lengkangkling la lengkanimin, ni ga lotu saparap ne Moroa la ni ga mun anan la ga ngising. ³⁸Ap mo mun loxonaleng neni ga vot pasa di la ga tong loklox avukat saparap ne Moroa, la ga vaase alii mumu ne Iesu tinedi mo limixin diga ngangais ne Moroa kusu naba lox arooro limixin me Israel.

³⁹Se ne Josep mi ne Maria duga lox axav i mo lempanga kerekngan Lenavolo at ne Moroa ga tong i, digamlong uto Nasaret lemenemen atdi gak lok at lenep silok Galili. ⁴⁰Lamdak ga sisilok la ga lolos; la ga umsu mi lakleklen, la letaba nabalamu at ne Moroa ga umsu at lorrooro ren.

Lamdak Lixilik Ne Iesu To Xeneng At Loogu Laplavang

⁴¹At levenmaares axap ne Josep eburu mi nenen ne Iesu dugat pas uto Jerusalem ti leluxa, laasen ap mo leluxa, Lovovolo Pe. ⁴²Se ne Iesu ga lasangaun legepura laramaares teren, nedo loxoetemen digat pas uto ap mo leluxa kerekngan loklok at limixin me Israel. ⁴³La levenaleng ap mo leluxa ga xap ta, la nedu lenasun duga vas kaxat uto xolonu, la ne Iesu ga nemen go Jerusalem, ketla du goxoklen i. ⁴⁴Duga nua i do neni mo gat pas eburu mi lentaba ren boro Nasaret; kuren la dugat pas ap mo laaleng se ukantinao, la melemu duga long lenget ka i do neni goxo emu mi limixin la duga vuse kaxat ba rin kantubu at lempat atdi la larapen tangas bok atdi. ⁴⁵Du goxo vuse ka i, la dugamlong uto Jerusalem kusu duna ven tin. ⁴⁶Melemu at laaleng sepsev avantun duga vuse ka i ro xeneng at loogu laplavang, gat kis eburu mi luvuttadi loklox ase at leme Judaia; ni gang tonga di la ga susue bok di mi levesusue. ⁴⁷Nedo mo digang tonga i, diga rakdu aleng at lakleklen teren la levempoporang teren. ⁴⁸Nedu lenasun duga vuse ka i, duga rakdu aleng la nenen ga lok tin, “Nuruk, tila u lok nom loklok tinama? Nema’ lenasun mara bulu aleng mu u.”

⁴⁹Ni ga vorang i ridu keretna, “Tila mu lok do muna puse ria? Kereva, muxoklen i do nia aba nemen to at loogu at ne Tamak?” ⁵⁰Ketla du goxo xasep at na levelinga ne Iesu ga tong i ridu.

⁵¹La ne Iesu gamlong eburu midu uto Nasaret, la neni gang tonga res amisik atdu. La nenen gam doma amisik na levelinga at ne Iesu la goxo domampe i. ⁵²La ne Iesu ga sisilok at labantuxu la at lakleklen bok; la ga lox avukat aleng at lemeren ne Moroa la limixin.

Jon Laradi Sep Susu Ga Vavang
(Mt 3:1-12; Mk 1:1-8; Jo 1:19-28)

3 ¹At lamaares lasangaun mi lavalimo at lititkis migomgo at ne Kaisar Taibirias; Pontias Paelat ga nemen ngan laradi gomgo to Judaia, la ne Erodes gam gomgo at lenep silok Galili, la neton, laasen teren ne Pilip gam gomgo at lunep silok Ituria la Tarakanitis; Lasinias gam gomgo at lenep silok Abilini. ²La ne Anas mi ne Kaiapas duga nemen ngan lumaasa gomgo.

Ap mo levenaleng levelinga at ne Moroa ga rupot saparap ne Jon lamdak at ne Sakaria to at lamatbin. ³La ni gat pas at lengkot axap saparap ladan sen Joridan la ga vavang tinedi diga vot pasa i. Ni ga lok keretna, “Mina leeng basinge laxakapmek atnimi la mina lok ka lesep susu, la ne Moroa ba doxoma xepe laxakapmek atnemi.” ⁴Ga lok ngan laradi vapaase alii ne Aisaia ga malagan i at lubuk teren keretna;

‘Lara mo ip kup to at lamatbin keretna, mina lox agagas li langas ti Leeme Silok kusu rin tit pas; mina lox akmokso larangas tin! ⁵Minas bosbo pe larasa upana, lempatkaana mi lengkongkaana xakalik mina lox amamana i. Larangas kakauk mina lox akmokso i la larangas i garasan mina lox amamasa i. ⁶La limixin axap diba ven ba lugugu loklox arooro at ne Moroa.’

Ais 40:3-5

⁷Buaang nedi limixin diga vot posiga ne Jon kusu neni na sep susu di. La ni ga paase lolos tidi xeretna, “Nemi mi lok ngan laxamdak at laxasii, mila loklok atnimi i lok kapmek aleng. Mi lok do mina lok kaka lesep susu kusu mina sepsu at lebelemamao at ne Moroa mo naba vot melemu, ketla xopmen mina epovo. ⁸Ketla mina lok lempanga kusu naba lox asuusu i do mira leeng basinge vam laxakapmek atnimi. La nemen nemi mita etong i kantubu atnimi do, ‘Maba nemen avukat mila nema luvuttubuno avolo at ne Abaram.’ A tong i rinimi do Moroa i epovo xusu na lok ka na laxanuut la na lok di laxamdak ti ne Abaram! ⁹Lamatao mo i nemen gagas kusu na tara asubu larauna; do larauna axap dixo pisik larapeven una avukat, Moroa ba ra asi di ukopok la na lu midi uto at laxao.”

¹⁰Limixin diga sue i, “Maba lok lavanga salai?”

¹¹La ni ga vorang i ridi xeretna, “Do nege i ruuna tegepu vanga singsiga, neni na raba tara ti mo laradi kopmen tara ren; la do nege i ruuna leveluxa, neni na raba box i ri mo laradi kopmen teveluxa ren.”

¹²Lentaba luvuttadi loklok ka pilas diga vot kusu ne Jon na sep susu di, la diga sue i, “Laradi loklox ase, manaba lok lavanga salai?”

¹³Ni ga lok tidi, “Nemen mita lok ka gamasa tempilas at limixin i volo lampoovo, luvuttadi amgomgo diga tong taba nedi min.”

¹⁴La lentaba luvuttadi esep bok diga sue i, “Kereva ba nama? Lavanga salai manaba lox i?”

La ni ga lok tidi, “Nemen mita pu soso ka tempilas at taradi la mina lox amamar i xopla mina bala raba tara. Levendoxoma atnimi na lox avukat ti luunun mik lok ka i.”

¹⁵Levendoxoma at limixin ga xatu kaxat la diga doxoma mumu ne Jon, diga nua i do neni mo Lanarong. ¹⁶Kuren la ne Jon ga lok tidi axap, “Nenia a sep susu nimi mi ladan, ketla lara naba vot. Lololos teren i volo lololos tarak. Axo epovo xusu ana soxomus luvanga vatpas teren mila neni i silok aleng tia. Neni naba sep susu nimi mi Loroonan Kaala la naba lok kepe laxakapmek atnimi kerekngan laxao i rin kepe levenboobong.

¹⁷Neni i gagas pam kusu ri lok pes larapeven piao basinge labantuxu ren la na lok li bubua larapeven piao uto xeneng at loogu ren; ketla neni naba xotos leventuxu at levempiao ro at laxao kopmen noxo remet.” ¹⁸Buaang leventaangas axap Jon ga vavang min ti limixin kusu na tong asu Lagale Lavavang tinedi.

¹⁹Ketla ne Jon ga sok katli ka laradi gomgo ne Erodes mila neni ga vaxat ka ne Erodias latkin at neton, la ga lok bok buaang lempanga xapmek. ²⁰Kuren la ne Erodes ga lok bok lara lavanga ga lok kapmek aleng. Ni ga ranga alis ne Jon la ga lok li i at loxokoxo.

Jon Ga Sep Susu Ne Iesu

(Mt 3:13-17; Mk 1:9-11)

²¹Avot ti loxokoxo at ne Jon, ni ga sep susu limixin. At lara laaleng ni ga sep susu bok ne Iesu. Laxalibet ga rem suang ap mo loxonaleng neni ga lok lising. ²²La Loroonan Kaala ga rava si ukopok, diga ven lovoovo ren ga ngan lamno la gasga ne Iesu. La laxaka at lara ga laa boro vana at laxalibet ga lok keretna, “Nenu ne nuruk. La nia a balamu u la a momo minu.”

Leretere At Lavalabat At Ne Iesu

(Mt 1:1-17)

²³Se ne Iesu ga vaxaru kaxat leven gugu ren, lenmaares teren ga epovo at lavantun sangaun. Limixin diga doma i do neni nitna ne Josep. La ne Josep neni nitna ne Eli, ²⁴Eli neni nitna ne Matat, Matat neni nitna ne Levi. Levi neni nitna ne Melkai, Melkai neni nitna ne Janai, Janai neni nitna ne Josep; ²⁵Josep neni nitna ne Matatias, Matatias neni nitna ne Amos, Amos neni nitna ne Naum, Naum neni nitna ne Esli, Esli neni nitna

ne Nagae; ²⁶Nagae neni nitna ne Maat, Maat neni nitna ne Matatias, Matatias neni nitna ne Semen, Semen neni nitna ne Josek, Josek neni nitna ne Joda; ²⁷Joda neni nitna ne Jonan, Jonan neni nitna ne Resa, Resa neni nitna ne Serababel, Serababel neni nitna ne Salatiel, Salatiel neni nitna ne Neri; ²⁸Neri neni nitna ne Melkai, Melkai neni nitna ne Adai, Adai neni nitna ne Kosam, Kosam neni nitna ne Elmadam, Elmadam neni nitna ne Era; ²⁹Era neni nitna ne Josua, Josua neni nitna ne Eliser, Eliser neni nitna ne Jorim, Jorim neni nitna ne Matat, Matat neni nitna ne Levi; ³⁰Levi neni nitna ne Simion, Simion neni nitna ne Juda, Juda neni nitna ne Josep, Josep neni nitna ne Jonam, Jonam neni nitna ne Eliakim; ³¹Eliakim neni nitna ne Melia, Melia neni nitna ne Mena, Mena neni nitna ne Matata, Matata neni nitna ne Natan, Natan neni nitna ne Devit; ³²Devit neni nitna ne Jesi, Jesi neni nitna ne Obet, Obet neni nitna ne Boas, Boas neni nitna ne Salmon, Salmon neni nitna ne Nason; ³³Nason neni nitna ne Aminadap, Aminadap neni nitna ne Amin, Amin neni nitna ne Aanai, Aanai neni nitna ne Esron, Esron neni nitna ne Peres, Peres neni nitna ne Juda; ³⁴Juda neni nitna ne Jakop, Jakop neni nitna ne Aisak, Aisak neni nitna ne Abaram, Abaram neni nitna ne Tera, Tera neni nitna ne Nao; ³⁵Nao neni nitna ne Serak, Serak neni nitna ne Reu, Reu neni nitna ne Pelek, Pelek neni nitna ne Iba, Iba neni nitna ne Sila; ³⁶Sila neni nitna ne Kenan, Kenan neni nitna ne Apaksat, Apaksat neni nitna ne Sem, Sem neni nitna ne Noa, Noa neni nitna ne Lamek; ³⁷Lamek neni nitna ne Matusala, Matusala neni nitna ne Enok, Enok neni nitna ne Jare, Jare neni nitna ne Malalil, Malalil neni nitna ne Kenan; ³⁸Kenan neni nitna ne Enos, Enos neni nitna ne Set, Set neni nitna ne Adam, la Adam neni nitna ne Moroa.

Satan Ga Lok Tong Pen Ne Iesu

(Mt 4:1-11; Mk 1:12-13)

4 ¹Iesu gamlong boro at ladan sen Joridan, neni ga umsu mi Loroonan Kaala; la Loroonan Kaala ga lam ka i uto at lamatbin. ²Ap mo levenaleng ne Iesu ga mun anan, la melemu ni ga roxo. La ne Satan ga vot posiga i la ni gak lok tong pen i at lavanuet sangaun aleng.

³Satan ga lok tin, “Do nenu nitna ne Moroa, una tong i ri na luat kusu na vee xongkide.”

⁴Iesu ga vorang i rin keretna, “Kopmen. Lovoang Kaala i tong i do, laradi ixo rooro xusuk mun at lakde.”

⁵La ne Satan ga lok ka i upana at lavatkaana la soso mene nga ga lox ase i mi levengkot axap at lavatbung menemen. ⁶La ne Satan ga lok, “Aba raba u mi na levengkot axap la lapnovos teren kusu unam gomgo ren. La na lempanga axap nia aga lok kaka i, la nia xa aba raba nege tara, do nia ana soxolik ka i. ⁷Ana axav i, aba raba u min, mo do una xis tiktikbu mi luvatgulom taram de melamgo rak la una lotu saparav ia.”

⁸Iesu ga vorang i rin keretna, “Kopmen. Lovoang Kaala i tong i do, una lotu saparap ne Moroa, Leeme Silok taram, la unam tebeng kusus mun lugugu ren.”

⁹La ne Satan ga lok ka i uto Jerusalem la ga vaxaru i ro vana at lavatlak gu at loogu laplavang; la ga lok tin, “Mo do nenu ne nitna ne Moroa, una los si basinge na loxot; ¹⁰mila Lovoang Kaala i tong i do, ‘Moroa naba tong i ri lubang angelo ren kusu diba lok tatao avukar u.’

Sam 91:11

¹¹La i tong box i do,

‘Diba ranga u mi levengikngen di, kusu tuat noxo sev asongot tekot at laxangkedek taram.’

Sam 91:12

¹²Iesu ga vorang i rin keretna, “Kopmen. Lovoang Kaala i tong i do, nemen uta lok li gat ne Moroa, Leeme Silok taram ti loklok tong pen.”

¹³At leventaangas axap ne Satan ga lok tong pen ne Iesu ren, la melemu ne Satan ga on basinge i la ga ngangais manga i kusu ri tara taaleng melemu.

Iesu Ga Vaxaru Kaxat Lugugu Ren To Galili

(Mt 4:12-17; Mk 1:14-15)

¹⁴Melemu, Iesu gamlong uto Galili, la lololos at Loroonan Kaala ga nemen teren la ga lok tooro i mi lugugu ren. Levelinga mumu ne Iesu, ga rem teles ap mo lengkot ga nemen saparap Galili. ¹⁵Neni ga anasa limixin to xeneng at laraugu singising la limixin axap diga emi asu aleng min.

Limixin To Nasaret Diga Sok Tixirixes Ne Iesu

(Mt 13:53-58; Mk 6:1-6)

¹⁶At lara laaleng Iesu gat pas uto Nasaret, no lemenemen ni ga silok teren; la at laaleng kaala neni gat pas uto at loogu singising i ngan neni gak lok amisix i. Ni ga xatu upana kusu na us Lovoang Kaala. ¹⁷La laradi gomgo ap mo loogu singising ga raba i mi lugun linga at leeme vapaase alii, ne Aisaia. Ni ga valas i la ni ga long lenget ka loxot ga lok keretna;

¹⁸‘Loroonan Kaala at ne Moroa i nemen tarak, mila ira soxolik ka vam ia xusu ana vavang mi Lagale Lavavang tinedi limixin banbalo. Ira sak tiki vam ia xusu ana tong asu langas ti soxomus asu limixin di nemen at loxokoxo, la ana lox arepalas lengkatli atnedi luvuttadi mi lengkatli atdi i main; la ana soxomus asu limixin di baava mi laxanmumuat at na lavatkangka; ¹⁹la ana tong asu levenaleng ne Moroa na vaxaru kaxat lugugu ti lox arooro limixin teren.’

Ais 61:1-2

²⁰La ne Iesu ga vegun ka lugun linga, la ga raba i ri laradi gak lok tatao loogu, la ni ga xis kopok. Limixin axap go xeneng at loogu singising diga ven tooro ne Iesu. ²¹La ni ga lok tidi xeretna, “Ana levelinga at Lovoang Kaala ira sorun ta ningina, kerekngan tai mo mi rongga i.”

²²Diga rongga ka levelinga ren la diga sangu mila levelinga ren ga sixit nunuan mun. Diga lok, “Neni nitna ne Josep mun, la kereva neni i epovo na tong i na lempanga?”

²³Ni ga lok tidi, “A lok do miba tong asu i na lavapaase poovo ria, ‘Laradi sangsanga, una lox aroo xa u.’ La miba lok bok tia, ‘Una lok mo lempanga sangsangu nade at lemenemen taram i ngan ta ugak lox i ro Kaprenaum.’”

²⁴La ne Iesu ga lok bok tidi, “A tong tuturun i na rinimi. Leeme vapaase alii, limixin di noxo siam ka i ro at lemenemen axa ren. ²⁵Mina rongga i na levelinga; at levenaleng at ne Elaisa, la goxopmen tara takabu at lavantun mi loxonatat maares la langsgangan loroxo ga rupot ap mo lenep axap. I ruturun do buaang lempatnaa to Israel, ²⁶ketla ne Moroa goxo riki ne Elaisa uto at teta atdi, ketla uto xusuk at lavatnaa boro Sarepat, at lenep silok Sidon. ²⁷La buaang nedi luvuttadi mi lanmeres gu diga nemen go Israel at levenaleng at leeme vapaase alii ne Elaisa; ketla ne Moroa goxo lox aroo tara atdi, ni ga lox aroo ne Naiman kusuk mun boro at lenep silok Siria.”

²⁸Se limixin to xeneng at loogu singising diga rongga i na, diga musak aleng. ²⁹Diga xatu upana, la diga sar asu ne Iesu ukamang basinge mo lemenemen, la diga lok ka i uto lisigege at lakaana mo lemenemen atdi gat kis e, kusu diba lu asi min ukopok. ³⁰Ketla neni ga vas polo mene ro xantubu at limixin la ga onon ta.

Iesu Ga Riki Asu Lagas Basinge Laradi

(Mk 1:21-28)

³¹Iesu gat pas uto Kaprenaum, lara lemenemen to Galili, la ga anasa limixin at laaleng kaala. ³²Diga sangu aleng at levenanasa ren mila levelinga ren ga mumuat.

³³Lara laradi go xeneng at loogu singising, lagas ga suxuna i; ga xup lolos aleng la ga lok, ³⁴“Aa! Iesu boro Nasaret, lavanga salai u vara i atnama? Kereva, u vot de xusu una lok kapmek nama? Aklen i do nenu nege; nenu Lanarong at ne Moroa!”

³⁵La ne Iesu ga vaase lolos ti mo lagas keretna, “Una lok pilo, la una vas su basinge na laradi!” La mo lagas ga lu asi mi nom laradi ro melamgo atdi, la ga sixisu basinge i la kopmen goxo lok kapmek toxot at labantuxu ren.

³⁶La limixin diga sangu, la diga lok tinedi getgesara, “Kereva na levelinga? Na laradi i vaase ri lagas, la lagas i rongga res teren. Levelinga ren i lolos la i mumuat aleng.” ³⁷La levelinga mumu ne Iesu ga onon at lengkot axap ap mo lenep.

Iesu Ga Lox Aroo Luvutulom At Ne Simon Pita

(Mt 8:14-17; Mk 1:29-34)

³⁸Iesu ga on basinge loogu singising la gat pas uto at loogu at ne Simon la ga vubeles teren. Luvutulom at ne Simon ga meres aleng mi liplivi, la

diga tong i na ri ne Iesu. ³⁹Ni gat pas la ga ru puvung i, la ga vaase lolos ti nom liplivi, la liplivi ga on basinge mo latkin, la soso mun ni ga xatu kaxat upana la ga lox agagas leveluxa ridi.

⁴⁰Ga ukantinao laxangking ga lok do na lotup, mo limixin diga ruuna larapen tangas atdi, digak meres mi levenasen anmeres axap, diga lam ka di uto at ne Iesu; la ni ga lok li lukngen to mavana atnedi getgesara, la ga lox aroo nedi axap. ⁴¹Iesu ga paase ri lubunggas la lubunggas bok diga vas su basinge buaang nedi limixin, la lubunggas digap kup keretna, “Nenu nitna ne Moroa!” La ne Iesu ga vaase lolos tidi la ni xopmen goxo ke xepe tara atdi gita vaase, mila digaklen i do neni Lanarong.

Iesu Ga Vavang To At Laraugu Singising

(Mk 1:35-39)

⁴²Ga maxantamak suubu, Iesu ga on basinge mo lemenemen la gat pas uto at lenep mimila. Limixin diga puse rin, la se diga vuse ka i, diga lolos do nemen ni guta vas kaxat basinge di. ⁴³Ketla neni ga lok tidi, “Aba vavang bok mi Lagale Lavavang at Linintoo at ne Moroa to bok at levenmenemen petpes, mila ne Moroa ga riki ia xusu ana lox i.” ⁴⁴La neni ga vavang to at laraugu singising at levennep axap at leme Judaia. Ren

Lorotoro At Ne Iesu Ti Luvuttadi Loklok Ka Anasa

(Mt 4:18-22; Mk 1:16-20)

5 ¹At lara laaleng Iesu ga tu to loxon at lavatdan kis Genesaret, la limixin diga esi kakape kusu uto saparav i, kusu dina ronga levelinga at ne Moroa. ²Ni ga ven legepu sepang to loxon, la luvuttadi sepsep mat no diga lok li vam du la digat gos laxatkat atdi. ³Iesu ga los kas at lara lesebang (neni lesebang at ne Simon) la ga tong i ri ne Simon kusu na so asu silatla lesebang basinge loloxon. Simon ga lox i kuren, la ne Iesu ga xis ap mo lesebang la ga anasa limixin.

⁴Se neni ga vaase axap, ni ga lok ti ne Simon, “So asu silatla lesebang taram uto vaxalom lixilik at lisimaramain, la nenu eburu mi larapen tangas taram mina lox asi laxatkat atnimi ukopok kusu mina loloa.”

⁵Simon ga lok tin, “Leeme silok, ma gugu lolos at na laaleng kanimin axap la maxo sep ka tenmat. Ketla, mo do u tong pam i, aba lox asi laxatkat.”

⁶Diga lox asi laxatkat, la laxatkat ga umsu mi laxanmat solo, la laxatkat ga lok do na rekoxorop ta. ⁷La diga xalim ka larapen tangas atdi to at lara lesebang petpes kusu dina vosiga di la dina lok tooro di; diga vot la diga suxa buru nom lesebang mi laxanmat la ma lixilik diga lok do dina dong si.

⁸⁻¹⁰Simon Pita eburu mi larapen tangas teren, diga sangu aleng at laxanmat diga loloa xaka i. Lumdak bok at ne Sebedi, Jems mi ne Jon

duga sangu aleng. Se ne Simon Pita ga ven na lavanga ga vot, neni ga xis tiktikbu mi luvatgulom teren to melango at ne Iesu la ga lok, “Leeme Silok, uto u basinge ia! Nia laradi xapmek!”

Iesu ga lok ti ne Simon, “Nemen uta marat. I ru ka i lingina uba loloa ka limixin!” ¹¹ Digatla oso mi lesepang uto loxon, la diga on basinge lempanga axap, la diga mumu asu ne Iesu.

Iesu Ga Lox Aroo Lara Laradi

(Mt 8:1-4; Mk 1:40-45)

¹² At lara laaleng Iesu ga nemen to at lara lemenemen; laradi ga meres mi lanmeres gu, mo ga umsu at labantuxu ren. Se neni ga ven ne Iesu, ni ga xis tiktikbu mi luvatgulom teren la ga sing ne Iesu, “Leeme Silok. Mo do u vara i, una lox aroo ia!”

¹³ Iesu ga song asu mi lekngen la ga long tu ren, la ga lok tin, “A vara i. Lanmeres taram na xap ta.” La soso mun mo lanmeres ga xap basinge mo laradi.

¹⁴ Iesu ga vaase lolos tin, “Nemen uta tong box i na ri tara, ketla unat pas uto at lamaasa, la neni na ven mumu u; melemu una lok laramtaba ram ti ne Moroa ngan ne Moses ga tong i, kusu ri lox asuusu i ri limixin axap do nenu mo ura lox avukat ta.”

¹⁵ Ketla levelinga mumu ne Iesu ga rem teles ampana uto at lengkot axap, la buaang limixin diga vot kusu dina ronga i la kusu neni na lox aroo nedi basinge levenanmeres atdi. ¹⁶ Ketla amisik neni gat pas uto at lengkot mimila, kusu na ngising.

Iesu Ga Lox Aroo Laradi Labantuxu Ren Ga Molo

(Mt 9:1-8; Mk 2:1-12)

¹⁷ At lara laaleng ne Iesu ga anasa; lentaba lubang Parisi la luvuttadi loklox ase at Lenavolo mo digat kis, diga laa boro at laramenemen axap to Galili la boro bok Judaia, la boro bok Jerusalem. Lololos at ne Moroa ga umsu ren kusu na lox aroo levenanmeres. ¹⁸ Lentaba luvuttadi digap kip lara laradi mi loora, labantuxu ren ga molo axap la diga lok tong i do, dina xip ka i uto xeneng at loogu la dina vaxamdi i ro melango at ne Iesu. ¹⁹ Ketla buaang nedi limixin diga umsu, la di goxo epovo kusu dina lox abeles lanmeres ukeneng. Kuren la diga xip kaka i upana at lavatlak gu, la diga lok das lenep teren, la diga lox asi lanmeres mi loora ren ukopok la diga lok li i ro melango at ne Iesu, kantubu at limixin.

²⁰ Se ne Iesu ga ven kisip lunuunu atdi, neni ga lok ti nom laradi, “Lentangas tarak, leveloklok kakapmek axap taram, a doxoma xepe i.”

²¹ Luvuttadi loklox ase at Lenavolo eburu mi lubang Parisi diga epaase kantubu atdi xeretna, “Nege i na laradi i paase vupu ri ne Moroa xeretna? Kopmen teta i epovo kusu na doxoma xepe laxapmek at tara; Moroa xusuk mun i epovo!”

²²Iesu gaklen levendoxoma atdi la ga lok tidi, “Tila lodoxoma atnimi i ekarakat mumu na lavanga? ²³Ua levelinga kopmen na lolos ti tong i; leveloklok kakapmek taram ara doxoma xepe vam i, koplana tong i do, katu kaxat la unat pas? ²⁴Ketla a vara i do minaklen i do, nenia, Laradi Mevana, a ruuna lololos at na lavatbung menemen kusu ri doxoma xepe leveloklok kakapmek!” La ne Iesu ga lok bok ti mo laradi xeretna, “A tong i ru, una xatu upana la una xip kaka loora ram la una vas kaxat ukolonu.” ²⁵La soso mun mo laradi ga xatu kaxat to melango atdi axap, la ga lok ka loora mikmidi ren, la gat pas ukolonu, ga emi asu mi ne Moroa. ²⁶Nedi axap diga sangu. La diga lingun, diga emi asu mi ne Moroa, la diga lok, “Lavanga vetpes dik dira ven i lingina!”

Iesu Ga Ro Ka Ne Levi
(Mt 9:9-13; Mk 2:13-17)

²⁷Melemu at nai, Iesu ga vas kaxat basinge mo lenep la neni ga ven laradi loklok ka pilas laasen teren ne Levi, gat kis to at loogu xekepe pilas. La ne Iesu ga lok tin, “Una mumu asu ia.” ²⁸La ne Levi ga xatu kaxat, ga ke xepe lempanga axap, la ga mumu asu ne Iesu.

²⁹La ne Levi ga lok leluxa silok to at loogu ren do ri ne Iesu, la buang nedi luvuttadi loklok ka pilas eburu mi lentaba luvuttadi bok, mo digat kis eburu min kusu ri anan. ³⁰Lentaba atnedi lubung Parisi la lentaba bok atdi luvuttadi loklox ase at Lenavolo, diga vaase kuxurung ti luvuttadi loklok ka anasa at ne Iesu. Diga sue xeretna, “Tila mi anan la mi inin eburu mi luvuttadi loklok ka pilas la limixin kapmek bok?”

³¹Iesu ga ronga i nom la ga lok tidi xeretna, “Limixin di lox avukat, kopmen dinak pakes ti loklok tooro, ketla nedi xusuk mun dik meres. ³²Aga rupot kusu ri ro xaka limixin bilinga kusu dina leeng, la kopmen nia a goxo rupot kusu rinedi limixin mokmokso.”

Lususue Mumu Loklok Ti Mun Anan
(Mt 9:14-17; Mk 2:18-22)

³³Lentaba luvuttadi diga lok ti ne Iesu xeretna, “Luvuttadi loklok ka anasa at ne Jon di mun anan amisik, la di ngising amisik, la luvuttadi loklok ka anasa bok at lubung Parisi di mun anan; ketla luvuttadi loklok ka anasa ram kopmen dina mun anan.”

³⁴La ne Iesu ga vorang i ridi mi lavapaase poovo xeretna, “At loklox anarong ti leepot, lentaba at laradi epot di noxo mun anan mila laradi epot move ik lox eburu midi. ³⁵Ketla laaleng move naba rupot la limixin petpes diba lam ka laradi epot basinge lentaba ren la dina mun anan ba ap mo levenaleng.”

Lempapaase Poovo Mumu Levenanasa Maxat At Ne Iesu

³⁶La ne Iesu ga vaase bok tidi mi lavapaase poovo xeretna, “Kopmen teta na balais ka loxontamon maxat kusu na sok gatgat pe lamamara at

labantamon maut; mo do neni na lox i xuren, labantamon maxat ira lok kapmek pam la kopmen na epovo bok ba xusu ata ba lok tavanga min; la nom loxontamon maxat noxo epovo xusu na lok pe avukat lamamara at loxontamon maut.”³⁷La ne Iesu ga vaase bok tidi mi lavapaase poovo. Ni ga lok keretna, “Kopmen tara na soli li laxadan vaen maxat uto xeneng ti labantuxu at lavatme i maut pam. Mo do neni na lox i xuren, mo labantuxu maut ba repagam la laxadan vaen naba soli su ukamang, la labantuxu maut naba lok kapmek.”³⁸Laxadan vaen maxat mina soli li i at labantuxu maxat!³⁹Kopmen tara i vara laxadan vaen maxat melemu do ni ira in pam laxadan vaen maut, neni ba lok, laxadan vaen maut i lox avukat.”

Iesu Ga Paase Mumu Laaleng Kaala

(Mt 12:1-8; Mk 2:23-28)

6¹At lara laaleng kaala Iesu gat pas kantubu at leventaamang piao. La luvuttadi loklok ka anasa ren diga xidik kaka lempeven piao, la diga sigis i mi levengkikngen di ti lok pes labantuxu at lempiao la diga anan ba i.²La lentaba lubang Parisi diga lok, “Lai nom mik lox i, la mira los polo Lenavolo, i tong i do nemen mitak lok panga keretnom at laaleng kaala?”

³La ne Iesu ga vorang i ridi xeretna, “Mina doma su at lempanga ne Devit ga lox i at laaleng neni eburu mi limixin teren diga roxo.⁴Neni ga vubeles uto at loogu at ne Moroa, la ga lok ka lengkongkide digam taba min ti ne Moroa, la ni ga anan i la ga raba bok loxot teren ti limixin teren. La kerepmo diga los polo Lenavolo, mila lavamaasa xusuk mun diga anan nom lengkongkide.”⁵La ne Iesu ga lok bok, “Nenia Laradi Mevana. Nenia leeme silok at laaleng kaala la a lok tatao mo laaleng.”

Iesu Ga Lox Aroo Laradi Lekngen Ga Molo

(Mt 12:9-14; Mk 3:1-6)

⁶At lara laaleng kaala manga, Iesu ga beles to xeneng at loogu singising la ga anasa. Lara laradi mo ga nemen lekngen tino ga molo.⁷Lentaba luvuttadi loklox ase at Lenavolo la lubang Parisi digam doma i do dina lok li ne Iesu at lavapaase, la diga reven mumu i do neni naba lox aroo mo laradi at laaleng kaala.⁸Ketla ne Iesu gaklen levendoxoma atdi, la ni ga lok ti mo laradi lekngen ga molo, “Katu kaxat la unat pas ude melamgo.” Nom laradi ga xatu kaxat la ga ru ro melamgo.

⁹La ne Iesu ga lok tidi, “Ana sue nimi; lavanga salai Lenavolo i siam min kusu ata lox i at laaleng kaala? Ti lok tooro laradi kopla ti lox asongor i? Ti lox arooro laradi kopla ti lok kapmex i?”

¹⁰Ni ga ven tangtagap tinedi axap, la ga lok ti mo laradi, “Song asu mi lakngam.” Ni ga lox i xuren, la lekngen ga lox avukat ta.¹¹Ketla diga

umsu mi lumukmusak la diga epaase mumu lavanga salai diba lox i ri ne Iesu.

Iesu Ga Soxolik Ka Lasangaun Legepura Luvuttadi Vavang
(Mt 10:1-4; Mk 3:13-19)

¹²At lara laaleng Iesu gat pas uto vana at lakaana kusu na lok lising, la ap mo laxanimin axap, neni gak lok lising teren ti ne Moroa go. ¹³Se at laxangking ga los su ga maxantamak suubu, neni ga ro bubua ka luvuttadi loklok ka anasa ren saparav i la ga soxolik ka lasangaun legepura atnedi, mo ni ga so asen di do luvuttadi vavang. ¹⁴Simon (ni ga so asen i do ne Pita) la neton laasen teren ne Endru; Jems, la ne Jon, Pilip la ne Batolomiu, ¹⁵Metiu la ne Tomas, lara ne Jems bok nitna ne Alpias, la ne Simon (neni lara at libinam tadi Selot), ¹⁶Judas, nitna ne Jems mi ne piken ne Judas Iskariot. Neni mo laradi ga song araba ne Iesu ri limixin esep kusu dina sev amer i.

Iesu Ga Anasa La Ga Lox Aroo Limixin
(Mt 4:23-25)

¹⁷La ne Iesu eburu mi luvuttadi loklok ka anasa ren diga si boro vana at lakaana, la ne Iesu ga ru ro at loxot mamana eburu minedi buaang limixin loklox ase. Buaang nedi limixin mo digak lok go, boro at lengkot axap Judaia, la boro bok Jerusalem, la boro loxon bok saparap lumenemen Taia la Sidon. ¹⁸Diga vot kusu dina ronga i la ni na lox aroo nedi basinge levenanmeres atdi. Nedi bok limixin, lubunggas ga lox asongot nedi, diga vot la ni ga riki asu lubunggas basinge di. ¹⁹La limixin diga lok tong pen i do dina long tu ren, mila lololos ga ravasu basinge i la ga lox avukat nedi axap.

Iesu Ga Paase Mumu Lomomo La Loklok Tuntun
(Mt 5:1-12)

²⁰Iesu ga ven ti luvuttadi loklok ka anasa ren la ga lok, "Luvukat tinemi limixin banbalo, mila Linintoo at ne Moroa, neni atnimi!" ²¹Luvukat tinemi limixin mo mik toxo, mila minaba ruuna epovo leveluxa. Luvukat tinemi limixin monga ming teng, mila minaba lok momo. ²²Luvukat tinemi, mo do limixin kapmek dina ven nimi mina mumu asu ia, Laradi Mevana, la dina musak nimi, la dina sok tixirixes nimi, la dina vaase kapmek tinimi, la dina lok tinimi do nemi limixin kapmek.

²³Mina momo aleng do na lempanga na vot, la mina tii momo, mila langsung luunun tinimi mo i nemen tangais nimi to vana at laxalibet. Do na lempanga na vot, nemen mita lok bukbulu. Lavalabat atnedi mo limixin kapmek diga lok bok lempanga xapmek kerepmo tinedi lavaeme vapaase alii at ne Moroa.

²⁴Ketla naba lok kapmek tinemi, mo mip novos; mila mirap novos avukat pam at na lorooro. ²⁵Naba lok kapmek tinimi monga mi umsu mi laxampanga solo, atla mibak toxo! Naba lok kapmek tinimi monga mik lok momo, mila miba duudu la minang teng! ²⁶Naba lok kapmek tinimi, do limixin axap dina paase avukat mumu nimi, mila lavalabat atnedi mo limixin kapmek diga paase avukat mumu nedo lavaeme vapaase alii xaxarang.”

Loklok Ti Balamu Limixin Munepen Midi

(Mt 5:38-48; 7:12a)

²⁷La ne Iesu ga lok bok tidi xeretna, “A tong i rinimi mo ming tonga ia; mina balamu nedo dit kis munepen minimi, mina lok luvukat tinedi di metlaat minimi. ²⁸Mina lox anarong nedo di vaase kapmek tinimi la mina sing tinedi di lok kapmek nimi. ²⁹Mo do tara na vasa lavapaales at tara atnimi, mina ke box i do neni na vasa bok mo lenep meo; mo do tara na lok kaka tavanga singsiga at tara atnimi, mina ke box i do neni na lok ka tavanga singsiga silok bok. ³⁰Mina raba nedo di ngising nimi ri tempanga; la do tara na lok ka tavanga do atnimi, nemen mita sing amlong tin. ³¹Loklok mina lox i rinedi, i ngan mun loklok mi vara i do dina lox i rinimi.

³²Mo do mi balamu xusuk mun nedo di balamu nimi, mi noxo ruuna ka loklox anarong at nom. Mila limixin kapmek bok di lox i xuren. ³³La mo do mina lok luvukat kusuk mun tinedi di lok luvukat tinimi, mi noxo ruuna ka loklox anarong at nom. Mila limixin bilinga bok dik lox i xuren. ³⁴La mo do mina raba xusuk nedo mo mi doxoma i do diba vorang i rinimi, mi noxo ruuna ka loklox anarong at nom. Mila limixin kapmek bok pam, dim taba nedo limixin kapmek kusu diba lok ka amlong bok lempanga ba epovo mi mo lempanga diga raba i. ³⁵Mina balamu limixin dit kis munepen minimi, la mina lok luvukat tidi; mina raba di mi lempanga la nemen gat mita sing amlong tin. Do mina lok na lempanga avukat, miba ruuna ka langangan luunun, la nemi miba ngan laxamdak at ne Moroa Silok Aleng. Mila Moroa ik lox avukat tinedi limixin kopmen dinak lox avukat tin la tinedi bok dik lok laxakapmek. ³⁶Mina balamu limixin axap, kerekngan mun ne Temen nimi ne Moroa i balamu limixin axap.”

Iesu Ga Paase Mumu Loklok Ti Vaase Mumu Loklok At Tara

(Mt 7:1-5)

³⁷La ne Iesu ga lok bok tidi xeretna, “Nemen mita ila mumu loklok at tara kusu ne Moroa noxo ila mumu loklok atnimi. Nemen mita lok li tavapaase mavana at tara, kusu ne Moroa noxo lok li tavapaase mavana atnimi; mina doxoma xepe laxakapmek atnedo di lox i rinimi, la kerepmo

ne Moroa naba doxoma xepe laxakapmek atnimi. ³⁸Mina raba limixin petpes mi lempanga, kusu ne Moroa naba raba nimi mi lempanga; miba ruuna ka langsung luunun i umsu aleng, i ngan lempanga avukat di soli li i at levengiknggen nimi; mo axap lempanga miba sang kobot teren. Lempanga mi lox i rinedi vetpes, neni mun i nom ne Moroa naba raba i rinimi.”

³⁹La ne Iesu ga tong asu lara lavapaase poovo tidi xeretna, “Taradi mi luxatli main teren ixo epovo kusu na sat kaka taradi bok mi luxatli main teren; mo do neni na lox i xuren, nedu buru duba subu tup ti lamamara. ⁴⁰Laxamdak loklox ase kopmen dina silok ti laradi loklox ase atdi; ketla ise do nedi axap laxamdak loklox ase dira lox axap loklox ase atdi, nedi diba epovo ba mi laradi loklox ase atdi.”

⁴¹La ne Iesu ga paase poovo bok keretna, “Nemen mita reven ti nom levendon i nemen at laxatli at neton nimi, la nemi xa kopmen mina long lenget ka loxonuna ik lok pe lengkatli atnimi. ⁴²Miba tong i ri neton nimi xeretna, ‘Neton nama, una mulus tinama xusu mana lok pes nom levendon at laxatli ram,’ ketla nemi xa kopmen mina ven kibis lengkonuna ik lok pe lengkatli atnimi. Nemi lavapen aala. Mina lok pes avot nom lengkonuna ik lok pe lengkatli atnimi la melemu ba, miba lok epovo ba i xusu mina lok pes ba levendon no at laxatli at neton nimi.”

Luuna Nunuan Kopmen Na Pisik Larapeven Una Xapmek

(Mt 7:16-20; 12:33-35)

⁴³La ne Iesu ga paase poovo bok keretna, “Luuna nunuan kopmen na pisik larapeven una xapmek; koplal luuna xapmek kopmen na pisik tarapeven una avukat. ⁴⁴Larauna axap, limixin di ven kibis di mi larapeven una atdi di pisix i; kopmen mina lok ka larapeven at laban arakap to at laban gagas, koplal larapeven una at luuna vaen to at tuna gamasa mun. ⁴⁵Laradi avukat i lox asu lununuan boro at lempanga avukat i nemen keneng at lebelen; laradi xapmek i lox asu laxakapmek boro at lempanga xapmek i nemen keneng at lebelen. La kerepmo lungusno at laradi i vaase asu lempanga salai i umsu at lebelen.”

Luradi Xipkip Gu

(Mt 7:24-27)

⁴⁶La ne Iesu ga tong bok lavapaase poovo ridi xeretna, “Tila mi tong ia do, ‘Leeme Silok, Leeme Silok,’ ketla kopmen mina mumu asu levelinga rak? ⁴⁷Ana lox ase nimi mi tara neni ing tonga levelinga rak la ira mumu asu i. ⁴⁸Neni i ngan laradi ga vaxaru loogu; ga sev asi lemet ukopok tinotno la gara lok li ba laraexem at nom loogu uto at laxanuat. Ladanut ga xip pot la gak ma nom loogu, ketla loogu kopmen goxo subu; mila ni ga xip avukat tinotno i. ⁴⁹Ketla lara i ronga levelinga rak la kopmen na mu asu i, neni i ngan laradi

ga vaxaru loogu to at laxangka, la kopmen ni goxo vaxaru i at laxanuut; ise ladanut gak ma nom loogu, la soso mun ga subu, la ga lok kapmek tinotno.

Iesu Ga Lox Aroo Lasaxaruki At Laasesep Boro Rom

(Mt 8:5-13)

7 ¹Iesu ga vaase axap mo levelinga rinedi limixin, la neni gat pas uto Kaprenaum. ²Lara laasesep at limixin esep boro Rom mo gak lok, neni ga ruuna lasaxaruki, la neni ga vavara aleng tinotno i; mo lasaxaruki gak meres la ma lixilik neni ga lok do na met. ³Se nom laasesep ga ronga levelinga mumu ne Iesu, neni ga riki lentaba luvuttadi silok at leme Judaia saparap ne Iesu, kusu dina sing i do ni nat pas la na lox aroo mo lasaxaruki ren. ⁴Diga vot parap ne Iesu la diga sing lolos i xeretna, "I lox avukat tinotno do una lok tooro mo laasesep, ⁵mila neni i balamu aleng limixin me Judaia la neni ga raba pilas kusu na xip loogu singising atnama." ⁶Kuren la ne Iesu ga emu eburu minedi.

Goxo vaxalom boro ap mo loogu, la mo laasesep ga riki lentaba larapen tangas teren kusu dina vosiga ne Iesu. Diga tong asu levelinga at laasesep ga lok keretna, "Leeme Silok, nemen uta rupot saparav ia. Nenu leeme silok la ixo lox avukat do una beles at loogu rak, ⁷la nenia axo lox avukat kusu ana vot parav u. Ketla una tong mun i la lasaxaruki rak naba lox avukat. ⁸Nenia bok aklen i do nenu u epovo ri lox i na mila nenia a nemen maxopok at lentaba gomgo rak la lentaba bok di nemen maxopok tarak. A lok ti lara, 'Unat pas!' la ni it pas. A lok ti lara, 'Ude u!' la ni it pas saparav ia; la a lok ti lasaxaruki rak, 'Una lox i na!' la ni i lox i."

⁹Iesu ga ronga i na levelinga, la ga sangu aleng. Neni ga ru gili la ga lok ti limixin diga mumu asu i, "A tong i rinimi do, keneng at lengkot axap Israel, a goxo long lenget tara lunuunu ren i silok ngan i na!" ¹⁰Mo luvuttadi, laasesep ga riki nedi, digamlong uto at loogu ap mo laasesep la diga long lenget ka lasaxaruki ren mo ga lox avukat ta.

Iesu Ga Lox Arooro Amlong Lamdak At Latkin Naa

¹¹Melemu lixilik Iesu ga vas kaxat uto at lara lemenemen laasen teren Nain, la luvuttadi loklok ka anasa ren eburu minedi buaang limixin diga emu min. ¹²Diga rupot go at langas povolo ap mo lemenemen. La limixin mo digap kip lara lorongan, neni leges amdak mun at labannaa, la buaang nedi limixin ap mo lemenemen digat pas eburu min. ¹³Se Leeme Silok ga ven i, lebelen ga lok bukbulu aleng tin la ni ga lok ti mo labannaa, "Nemen utang teng."

¹⁴La neni ga vas saparap mo lorongan la ga long tu at loora ren la mo luvuttadi digap kiv i, diga ru. Iesu ga lok, "Laau radi! A tong i ru do, una xatu kaxat!" ¹⁵Laradi no ga met ga xis upana la ni ga vaase la ne Iesu ga lok ka i la ga raba amlong nenen min.

¹⁶Limixin axap diga lingun la diga emi asu mi ne Moroa, la diga lok, “Langsangan leeme vapaase alii ira vot pam kantubu atdik! La ne Moroa ira vot pam kusu na lox arooro limixin teren!” ¹⁷La na levelinga mumu ne Iesu ga epeseves ap mo lenep silok axap la at levennep petpes bok saparap Judaia.

Jon Ga Riki Luradi Loklox Ase Ren Uto Saparap Ne Iesu
(Mt 11:2-19)

¹⁸Luvuttadi loklok ka anasa at ne Jon diga tong mo levelinga mumu ne Iesu ri ne Jon. Neni ga ro xaka lura atdi saparav i, ¹⁹la ga riki du saparap Leeme Silok kusu duna sue i mi levelinga xeretna, “Kereva, nenu vam Lanarong, kopla tara gove manaba ngangais i?”

²⁰Duga rupot saparap ne Iesu la duga lok, “Jon laradi sep susu, i sak tiki nema’ kusu mana sue u, ‘Kereva, nenu vam Lanarong, kopla tara gove manaba ngangais i?’”

²¹Ap mo laaleng Iesu ga lox aroo buaang nedi limixin basinge levenanmeres la ga riki asu lubunggas basinge limixin la ni ga lox arepalas bok levengkatli atnedi buaang limixin, levengkatli atdi ga main. ²²Neni ga vorang luradi vapaase at ne Jon mi levelinga keretna, “Munamlong la muna tong i ri ne Jon mumu lempanga mu ven i la mu ronga i; nedi limixin mi lengkatli main, mo di reven manga; nedi lengkangkedek atdi ga lok kapmek, mo dit pas avukat; la nedi dik meres mi lanmeres gu, mo di lox avukat; nedi levenbaalung i repe, ding tonga manga; la nedi diga met pam, mo di roo xat amlong; la Lagale Lavavang mo a vavang min ti limixin banbalo. ²³Naba lox avukat ti neni laradi noxo subu basinge ia, la lebelen ixo lok kapmek ti na lugugu rak.”

²⁴La luradi ne Jon ga riki du, dugamlong, la ne Iesu ga paase ri limixin mumu ne Jon. Ni ga lok, “Nemi migat pas uto saparap ne Jon to at lamatbin, laradi salai miga doxoma i xusu miba ven i? Kereva, miga lok do miba ven laradi i lok ngan lovobeo, lamanman it mas aonen i?

²⁵Laradi salai migat pas la miga ven i? Kereva, miga ven laradi ga siga lavanga singsiga avukat? Kopmen. Limixin ding siga lempanga singsiga avukat la di ruuna lapnovos silok, nedi kopmen di nemen at lamatbin kerekngan ne Jon. ²⁶Mina tong i ria, lavanga salai migat pas kusu mina ven i? Taradi vapaase alii? I raturun. A tong i rinimi do nemi miga ven laradi i silok ti leeme vapaase alii at ne Moroa. ²⁷Ne Jon neni laradi, Lovoang Kaala ga vaase min keretna,

‘Laradi vapaase rak, anaba riki amgo i ru xusu na lox agagas li langas tu.”

Mal 3:1

²⁸La ne Iesu ga lok bok, “A tong i rinimi do ne Jon neni i silok aleng tinedi limixin axap at na lavatbung menemen; ketla do tara i lok ngan laradi gamasa la neni lanat at Linintoo at ne Moroa, neni i silok aleng ti ne Jon.”

²⁹Limixin axap eburu mi luvuttadi loklok ka pilas diga rongga levelinga at ne Iesu; nedi mun na limixin diga lok kaka lesepe susu at ne Jon la kerepmo diga siam ka leventaangas at ne Moroa. ³⁰Ketla lubung Parisi eburu mi luvuttadi loklox ase at Lenavolo diga rongga xepe lesepe susu at ne Jon, la kerepmo diga sok tixirixes losoxovo at ne Moroa ridi.

³¹La ne Iesu ga lok bok, “Limixin at na levenaleng ana vaase poovo mido mi lavanga salai? ³²Di lok ngan laxamdak mi laxaalik kakalik dit kis to at loxot etang. Lara libinam atdi dip kup ti mo libinam,

‘Magak pixan lengkompixan epot tinimi, ketla nemi mi goxopara na tii momo. Magak pixan lengkompixan bukbulu, ketla mi goxopara i do minang teng!’

³³La ne Jon laradi sep susu ga vot, la ni ga mun anan la kopmen goxo inin laxadan vaen, la nemi miga lok do, ‘Lagas mo i nemen teren!’ ³⁴Ketla nenia, Laradi Mevana, aga vot, la nia aga anan la aga inin la miga lok, ‘Mina ven ba na laradi! Neni lavatpanga xoxo anan, la laradi inin, la i etangas mi luvuttadi loklok ka pilas eburu mi limixin kapmek!’ ³⁵Ketla lugugu at ne Moroa i pisik avukat la kerepmo i lox asuusu i do losoxovo at ne Moroa i lox avukat.”

Iesu Gat Kis To At Loogu At Ne Simon Neni La Parisi

³⁶Lara atnedi lubung Parisi ga lam kaka ne Iesu kusu na anan eburu min; Iesu ga beles to xeneng at loogu ren la ga xis kusu ri anan. ³⁷Lara latkin mo ga nemen ap mo lemenemen, lorooro ren gat pospa aleng. Neni ga rongga i do ne Iesu mo ga anan to at loogu ap mo laradi; kuren la ni ga lok ka lubuxom tuntutu dan teren ga umsu mi laxadan mavak. ³⁸La ni ga vosiga ne Iesu la ga ru to melemu saparap luxangkedek teren, gang teng la gak lox amlu luxangkedek at ne Iesu mi levengkabilidan at luxatli ren. La ni ga ves amesemes luxangkedek at ne Iesu mi lavatkabinim at lavatlak teren, la ga nes luxangkedek teren la ga soli laxadan mavak to at nom luxangkedek teren.

³⁹Nom laradi no ga sat kaka ne Iesu ga ven i na, la neni ga doma i xeretna, “Mo do na laradi neni leeme vapaase alii ruturun, neni gi baklen i do latkin salai mo i long tu ren la lorooro bilinga mo i nemen teren!”

⁴⁰La ne Iesu ga lok tin keretna, “Simon, a ruuna lara lavanga kusu ana tong i ru.”

Simon ga lok tin, “Laradi loklox ase, una tong i ria.”

⁴¹La ne Iesu ga tong lavapaase poovo mumu labalamu ap mo latkin; ni ga lok keretna, “Lura luradi duga lok ka lempilas boro at laradi nopnovos; lara ga lok ka lavalimo sangaun kobot (500) denarias, la mo lara lavalimo sangaun denarias. ⁴²Nedu eburu du goxo epovo kusu duna vorang amlong mo lempilas teren; kuren la ni ga lok tidu do nemen duta vorang i. Ua lara atdu na, ba balamu aleng mo laradi?”

⁴³Simon ga vorang i rin keretna, “Nia a lok do mo lara, laradi nopnovos ga doxomampe lavalimo sangaun kobot (500) denarias teren.”

Iesu ga lok, “Lovoporang taram ik mokso.”

⁴⁴Melemu Iesu ga rem gili uto at latkin la ga lok ti ne Simon, “U ven i na latkin? At pas ude at loogu ram, la uxo raba ia mi taxadan kusu ri gos luxangkedek tarak, ketla neni i gos luxangkedek tarak mi lengkabilidan at luxatli teren la neni i ves mesemes i mi lavatkabinim at lavatlak teren. ⁴⁵Nenu xopmen una nes ia, ketla se nenia a beles de xeneng, neni xopmen na molo ti nes luxangkedek tarak. ⁴⁶Uxo lok li laxadan mavak at lavatlak tarak, ketla neni i soli laxadan mavak at luxangkedek tarak. ⁴⁷Kuren la monga a tong i ru, do langsangan labalamu ren mo ira lox asuusu vam i do a doxoma xepe buaang leveloklok kakapmek teren. Mo do nege, i ruuna lamanbalamu lixilik mun i tong asu i do laxakapmek lixilik mun, ara doxoma xepe vam i.”

⁴⁸La ne Iesu ga lok ti mo latkin, “Leveloklok kakapmek taram, a doxoma xepe i.”

⁴⁹Lentaba luvuttadi digat kis go, diga epaase kantubu atdi xeretna, “Nege i na laradi, la neni xa i doxoma xepe laxakapmek?”

⁵⁰Ketla Iesu ga lok ti mo latkin, “Lunuunu ram ira lok arooro vam u; unat pas mi limila.”

Lavakin Diga Emu Mi Ne Iesu

8 ¹Melemu at lentaba levenaleng manga, Iesu gat pas kantubu at levenmenemen silok la lengkonmenemen kakalik, ga vavang mi Lagale Lavavang at Linintoo at ne Moroa. Lasangaun legepura luvuttadi loklok ka anasa diga emu min, ²la lentaba lavakin bok, gano ne Iesu ga lox avukat nedi basinge levenanmeres atdi la ga riki asu lubunggas basinge di; ne Maria (diga so asen box i mi ne Magdalene) gano lavanuti lubunggas ga ravasu basinge i; ³Joana, latkin at ne Kusa, laradi gomgo gak lok tatao at loogu at ne Erodes; la ne Susana, la nedi buaang bok lavakin diga lok tooro ne Iesu eburu mi luvuttadi loklok ka anasa ren mi levempilas nedi digak pakes tin.

Lavapaase Poovo At Laradi Gatlotlo Piao

(Mt 13:1-9; Mk 4:1-9)

⁴Buaang limixin digat pot saparap ne Iesu boro at levenmenemen axap; la se diga vot eburu, Iesu ga tong lavapaase poovo ridi xeretna.

⁵“Lara laradi lotlo gat pas uto xataamang kusu natlotlo piao; lentaba levenit piao ga subu ro at langa, la limixin digat pas teren, la lavapixa diga rava pot la diga rok axav i. ⁶Lentaba levenit piao ga subu ro at loxongkangka laxanuat ga nemen teren; la se diga su kaxat, diga met ta mila mo loxongkangka goxopmen tadan teren. ⁷Lentaba levenit piao ga

subu ro at livin gagas, la diga su xat eburu mi nom livin gagas; ketla livin gagas ga itis di. ⁸La lentaba levenit piao ga subu ro at laxangka avukat; la na levenit piao ga su xat la ga visik laxampeven piao solo.”

La ne Iesu ga lox axap mo lavapaase poovo la ga lok tidi xeretna, “Do mi ruuna levenbaalung, mina ronga avukat na levelinga.”

Lavasuun At Levempapaase Poovo

(Mt 13:10-17; Mk 4:10-12)

⁹Luvuttadi loklok ka anasa diga sue ne Iesu do ua lavasuun ap mo lavapaase poovo. ¹⁰La ne Iesu ga lok tidi, “Moroa ira raba vam nimi mi lakleklen at Linintoo ren, gano ga nemen alipe; ketla tinedi limixin petpes levelinga mumu Linintoo i lok ngan mun lavapaase poovo, kusu kopmen diba xasep teren; ngan levelinga i lox asorun Lovoang Kaala i lok keretna,

“Diba ven lugugu, ketla di noxo ven kibis i; la dinang tonga mo levelinga, ketla di noxo xasep teren.”

Ais 6:9

Iesu Ga Soxomus Lavapaase Poovo At Laradi Gatlotlo

(Mt 13:18-23; Mk 4:13-20)

¹¹La ne Iesu ga lok tidi xeretna, “Lavasuun at na lavapaase poovo i lok keretna; levenit neni levelinga at ne Moroa. ¹²Ti levenit ga subu ro at langas, i ru katling nedi ding tonga mo levelinga; ketla ne Satan i tupot la ik lok kepe nom levelinga basinge lebelen di, kusu ri lok pes lunuunu atdi la di noxo lok kaka lorooro. ¹³Ti levenit no ga subu ro at loxot uat, i ru katling nedi di ronga levelinga la di momo xaka i, ketla kopmen na si aleng ukeneng at lorooro atdi. Di nuunu mun at loxonatat aleng la do loklok tong pen i vot, dira subu manga. ¹⁴Ti levenit ga subu to at loxongkangka mi laxan gagas, i ru katling nedi di ronga mo levelinga, ketla levenainbulu la lapnovos la lomomo at na lorooro i umsu xeneng atdi la gira itis lorooro atdi, la kerepmo kopmen dina visik levempanga nunuan at lorooro atdi. ¹⁵Ti levenit no ga subu ro at loxongkangka avukat, i ru katling nedi di ronga levelinga la di lok li avukar i xeneng at lebelen di la i lox avukat, la ia nemen lolos se di visik levempeven avukat.”

Lavapaase Poovo At Lababao

(Mk 4:21-25)

¹⁶La ne Iesu ga tong lavapaase poovo tidi keretna, “Kopmen teta na sox aros lababao la na vung pavaa i mi lavatbaaket kopla na lok li i maxopok at loora. Ketla neni ik lok li i ro at lenep kasep, kusu limixin diba ven lososoo ren mo do dina beles to xeneng ap mo loogu. ¹⁷Lempanga mumu Linintoo no ga nemen alipe tinotno, naba ravasu ti lasaxaven; la

levelinga, lavasuun teren no i nemen alipe, melemu naba xasep. ¹⁸Kuren la mina lok tatao avukat nimi, kusu ring tonga avukat levelinga at ne Moroa. Do tara na siam ka mo levelinga Moroa i raba i min, Moroa naba raba box i mi laxasep avukat at levelinga ren; dola tara noxo siam ka levelinga at ne Moroa, Moroa naba lok pes bok laxasep kakalik teren, keke i do neni i doxoma i do im tebeng i.”

Luvutneton Mi Nenen Ne Iesu

(Mt 12:46-50; Mk 3:31-35)

¹⁹Nenen ne Iesu mi luvutneton diga vosiga i, ketla di goxo epovo kusu dinat pas saparav i mila limixin diga umsu. ²⁰Lara laradi ga lok ti ne Iesu, “Nenam eburu mi luvutnetam no di tu kamang la di vara i do dina epaase eburu minu.”

²¹Ketla ne Iesu ga lok tidi axap keretna, “Nedi mun ding tonga levelinga at ne Moroa la di mumu asu i, nedi mun luvutnaga mi luvutnetak.”

Iesu Ga Lox Amila Lamanman

(Mt 8:23-27; Mk 4:35-41)

²²At lara laaleng Iesu ga emu eburu mi luvuttadi loklok ka anasa ren la ni ga lok tidi, “Ata sen polo na lavatdan kis uto at lenep meo.” La diga los kas at lese pang la diga sen kaxat. ²³Se diga sen, Iesu ga unga. La mo langsung lamanman ga mas lolos mo lavatdan kis, la larapotas ga luxa lese pang la ga auret do lese pang na rem gili la nedi axap dina seeve.

²⁴Luvuttadi loklok ka anasa diga vosiga ne Iesu la diga sox aus i la diga lok, “Leeme Silok, Leeme Silok! Ata seeve nga na!”

Iesu ga xatu kaxat la ga vaase lolos pe lamanman mi laras ekapus; la duga lox atnaasan la langsung lenmila nga ga nemen. ²⁵La neni ga sue luvuttadi loklok ka anasa ren, “Kereva, kopmen tunuunu atnimi?”

Ketla diga sangan aleng la diga lingun la diga sue nedi getgesara, “Laradi salai na? I vaase sok lamanman la lavatdan kis la dira rongga res teren!”

Iesu Ga Riki Asu Lubunggas Basinge Laradi

(Mt 8:28-34; Mk 5:1-20)

²⁶La ne Iesu mi luvuttadi loklok ka anasa ren diga rupot to loxon ap mo lavatdan kis to at lenep Gerasa, na lemenemen ga nemen saparap na lavatdan kis Galili. ²⁷La ne Iesu ga vas su uloxon la ni ga ekip tangarang mi lara laradi mego ap mo lemenemen, lubanggas ga nemen teren. Buaang levenmaares neni gak lok beleben mene, la ni goxo nemen to xolonu. Ketla neni ga nemen amisik to at levenbuang digak mikmit labarongan e. ²⁸Se neni ga ven ne Iesu, ni ga xup lolos la ga xis tiktikbu

mi luvatgulom teren to melamgo ren, la ga vaase lolos ti ne Iesu, “Iesu, Nitna ne Moroa i silok aleng! Lavanga salai u vara i do una lox i ria? A sing u do nemen uta lox asongot aleng ia!” ²⁹Ni ga tong i na mila ne Iesu ga tong pam i ri lagas kusu na vas su basinge i. Buaang laxanaleng na lagas ga sep kapmex i la do neni ga nemen maxopok at loklok tatao at limixin, diga xoxo lukngen la luxangkedek teren mi lemparoos sen, ketla neni ga baba koxorop nom lemparoos sen la lagas ga sasat ka i uto at lenep goxopmen tempanga ren.

³⁰Iesu ga sue i, “Nege laasen taram?”

La ni ga lok, “Laasen tarak ne Buaang.” Mila buaang lubunggas diga beles pam teren. ³¹La nom lubunggas diga ngising ne Iesu do nemen neni guta sak tiki di uto at lemeroon.

³²Buaang laxanbo mo diga nemen auret, diga anan to at lakaana. Lubunggas diga sing ne Iesu kusu na riki asu di uto at nom laxanbo; la ni ga ke aonon di. ³³La lubunggas diga sixisu basinge nom laradi la diga vubeles uto xeneng at nom lababo; la nedi axap nom laxanbo diga sixisi at lakaana la diga los tup ukopok at lavatdan kis la diga xong axap.

³⁴Luvuttadi digak lok tatao mo laxanbo diga ven i na, la diga sixit kaxat la diga tong aonon na levelinga ri mo limixin to at lemenemen atdi la ri limixin to at lentaba lengkot petpes bok. ³⁵La limixin digat pas kusu dina ven mo lavanga ga vot. Diga vosiga ne Iesu la diga long lenget mo laradi, lubunggas ga vas su basinge vam i, mo gat kis saparap luxangkedek at ne Iesu; ga siga lempanga singsiga la lodoxoma ren ga xasep ta, la diga marat. ³⁶Nedi diga ven i na diga tong ri limixin do mo laradi ga lox avukat kereva. ³⁷La nom limixin ap mo lenep Gerasa diga sing ne Iesu kusu na onon ta, mila diga marat aleng. La ne Iesu ga los kas at lese pang la lese pang ga sen kaxat.

³⁸La laradi mo lubunggas ga vas su basinge i ga sing ne Iesu, “A vara i do ana emu eburu minu.”

Ketla ne Iesu ga riki aonon i, ga lok, ³⁹“Unamlong uto xolonu la una tong na lavanga ne Moroa i lok pam i ru.” La mo laradi gat pas maxeneng at nom lemenemen axap ga tong mo lavanga ne Iesu ga lok pam i rin.

Loolik At Ne Jairas

(Mt 9:18-26; Mk 5:21-43)

⁴⁰Se ne Iesu gamlong uto at lavatdan kis at lenep menak, buaang limixin diga paase momo min, mila nedi axap diga ngangais i. ⁴¹Ap mo mun loxonaleng lara laradi, laasen teren ne Jairas ga vot; neni laradi gomgo at loogu singising mego. Ni ga xis tiktikbu mi luvatgulom teren saparap luxangkedek at ne Iesu la ga sing i xusu nat pas uto at loogu ren; ⁴²mila legesolik mun teren ga lasangaun mi legepu maares teren mo ga auret kusu na met.

Se ne Iesu gat pas uto at loogu at ne Jairas, buaang nedi limixin diga umsu saparav i at lengkot axap. ⁴³La lara latkin mo ga nemen; lanmeres gaaling gak lok amisik teren at levenaleng axap, ga epovo at lasangaun mi legepu maares. La buaang laxampilas teren ga xap gamasa mun ti luvuttadi sangsanga, ketla kopmen teta goxo epovo kusu na lox avukar i. ⁴⁴Neni ga vosiga limixin to melemu at ne Iesu la ga long tu at lungusungus at lavanga singsiga at ne Iesu la soso mun nom lanmeres ga xap ta.

⁴⁵La ne Iesu ga sue di xeretna, “Nege i long tu rak?”

La nedi axap diga sev apkap la ne Pita ga lok, “Leeme Silok, buaang limixin mo dit pas saparav u la mo di mumu u.”

⁴⁶Ketla ne Iesu ga lok, “Lara mo i long tu rak, a suma i do lololos i sxisu basinge ia.”

⁴⁷La mo latkin ga ven i do diga long lenget ka i, kuren la ni ga vosiga i, ga dede la ga xis tiktikbu mi luvatgulom teren saparap luxangkedek at ne Iesu. Mo go melango at limixin axap, neni ga tong asu ua lavasuun teren la ni ga long tu at ne Iesu la kereva neni ga lox avukat soso mun. ⁴⁸La ne Iesu ga lok tin, “Latkin, lunuunu ram i lok avukar u. Unat pas at lenmila.”

⁴⁹Iesu move ga paase na levelinga la lara laradi gat pas boro at loogu at laradi gomgo, ne Jairas. La ni ga lok ti ne Jairas, “Loolik taram ira met pam, la nemen uta lox angtang bok ba laradi loklox ase.”

⁵⁰Ketla ne Iesu ga ronga i la ga lok ti ne Jairas, “Nemen uta marat, una nuunu mun la neni naba rooro.”

⁵¹Se neni ga vot to at loogu, neni goxo siam abeles tara ukeneng at loogu xusu dita vubeles eburu min, ketla ne Pita, Jon la ne Jems la ne temen mi nenen nom loolik kusuk mun. ⁵²Limixin axap go digang teng la digak saxaanu ap mo loolik. La ne Iesu ga lok, “Nemen mitang teng; loolik kopmen na met, neni mo i unga mun!”

⁵³Diga lok kalise i mila digaklen i do loolik mo gara met pam. ⁵⁴Ketla ne Iesu ga ranga axatu i mi lekngen la ga vaase lolos keretna, “Loolik, una xatu kaxat!” ⁵⁵Loroonan teren gamlong la ni ga xatu kaxat soso mun upana; la ne Iesu ga tong i ridi xusu dina raba i mi toxompanga anan. ⁵⁶Temen mi nenen duga sangu aleng, ketla ne Iesu ga vaase lolos di do nemen di guta tong i na lavanga ri teta.

Iesu Ga Riki Asu Luvuttadi Loklok Ka Anasa

(Mt 10:5-15; Mk 6:7-13)

9 ¹At lara laaleng Iesu ga ro bubua ka lasangaun legepura luvuttadi loklok ka anasa saparav i la ga raba nedi mi lololos kusu ri lox asu lubanggas la dina lox aroo limixin mekmeres. ²La neni ga lok do na riki asu di xusu dina vavang mi Linintoo at ne Moroa la dina lox aroo limixin mekmeres. ³La neni ga lok tidi, “Nemen mita xip kaka tempanga eburu

minimi ri mo lavatpas; nemen takdak, la nemen mita lok kaka teventat, la nemen teveluxa, la nemen tevempilas, la nemen bok tevempanga singsiga etara xun. ⁴Mo do mina beles at tara toogu la limixin dina siam ka nimi, mina nemen eburu midi se minaba vas kaxat basinge mo lemenemen. ⁵Mo do limixin di noxo siam ka nimi, mina on basinge nom lemenemen la mina semla xepe laxakup basinge levengangkedeck atnimi, i ngan loklok katling tidi kusu ri lox asuusu lebelemamao at ne Moroa.”^a ⁶La luvuttadi loklok ka anasa diga vas kaxat, la digat pas kantubu at lara menemen, diga vavang mi Lagale Lavavang, la diga lox aroo limixin at lengkot axap.

Erodes Ga Rangku

(Mt 14:1-12; Mk 6:14-29)

⁷Erodes, laradi gomgo boro Galili, ga ronga mo lempanga ga vot; la ni ga rangku aleng, mila lentaba luvuttadi mo digak lok do, “Jon, laradi sep susu mo ga roo xat amlong bok!” ⁸Lentaba diga lok do ne Elaisa mo ga vot, la lentaba diga lok do lara leeme vapaase alii me gano mo ga roo xat amlong ti lorooro. ⁹Erodes ga lok, “Agara ra korop pam laxaka at ne Jon; ketla nege i na laradi, mo nia a ronga i do na lok na lempanga?” La ni gak lok tong pen i do na ven ti ne Iesu.

Iesu Ga Raba Luxa Buaang Limixin

(Mt 14:13-21; Mk 6:30-44; Jo 6:1-14)

¹⁰Luvuttadi vavang digamlong la diga tong i ri ne Iesu leven gugu axap diga lox i. Neni ga sat kaka di eburu min la nedi xusuk mun diga vas kaxat uto at lara lemenemen, laasen teren Betsaida. ¹¹Se limixin diga ronga i na, diga mumu asu i. La neni ga siam ka di mi lomomo, la ga paase ridi mumu Linintoo at ne Moroa, la neni ga lox aroo nedi, diga meres.

¹²Ga ukantinao luvuttadi loklok ka anasa diga vosiga i la diga lok, “Una riki aonon limixin uto xusu dibat pas uto at levenmenemen la at lengkot petpes bok la dina puse ka tempanga anan la tengkot mikmidi bok tidi, mila na loxot i mimila rino.”

¹³Ketla ne Iesu ga lok tidi, “Nemi xa mina raba nedi mi teveluxa kusu ri anan.”

La diga vorang i xeretna, “Ma ruuna mun lavalimo lengkongkide la legepu venmat. Kereva, u vara i do manat pas la mana un kaka teveluxa tinedi na limixin?” ¹⁴Limixin go diga epovo at lavalimo larabin sangsangaun kobot. (5000)

^a **9:5** Na loklok i lox asuusu i do ne Moroa naba raba lumumuat ti limixin ap mo lemenemen.

Iesu ga lok ti luvuttadi loklok ka anasa ren, “Mina tong i ri limixin kusu dina xis kopok at lengkonbinam tadi i epovo at lavalimo sangaun.”

¹⁵Luvuttadi loklok ka anasa diga lox i xuren, la diga tong i ridi do dina xis kopok. ¹⁶Iesu ga lok kaka mo lavalimo lengkongkide la legepu venmat, la ga milik aurut uto vana at laxalibet, la ga tong avukat ti ne Moroa la ga sebex i, la ga raba luvuttadi loklok ka anasa min kusu dina epes i xantubu at limixin. ¹⁷La nedi axap diga anan la diga an mais; la luvuttadi loklok ka anasa diga luxa lasangaun legepura leventat mi leveluxa mo diga an ake ren.

Pita Ga Tong Asu Lunuunu Ren

(Mt 16:13-19; Mk 8:27-29)

¹⁸At lara laaleng ne Iesu xusuk mun gat pas kusu nang sing, la luvuttadi loklok ka anasa diga vot posiga i. La neni ga sue di, “Limixin di lok do nenia nege?”

¹⁹Diga vorang i rin keretna, “Lentaba di lok do nenu ne Jon laradi sep susu; lentaba di tong i do nenu ne Elaisa; la lentaba di tong i do lara leeme vapaase alii me gano mo i roo xat amlong.”

²⁰La ne Iesu ga sue di, “Kereva ba nimi? Nemi mi lok do nenia nege?”

Pita ga lok, “Nenu Lanarong at ne Moroa.”

²¹La ne Iesu ga vaase pe lolos di, do nemen di guta tong i ri tara do neni Lanarong.

Iesu Ga Paase Mumu Lanmet Teren

(Mt 16:20-28; Mk 8:30-9:1)

²²La ne Iesu ga lok, “Nenia Laradi Mevana, anaba xip losongsongot solo, la loxongkulao silok at limixin me Judaia, la lavamaasa silok la luvuttadi loklox ase at Lenavolo diba sok tixirixes kepe ia. Diba sev amer ia, la nenia anaba roo xat amlong at laaleng sepsev avantun.”

²³La neni ga lok ti luvuttadi loklok ka anasa ren, “Mo do tara i vara i do na emu minia, neni na domampe lorooro axap teren, la na gagas li i xusu nap kip losongsongot at levenaleng axap, la na mumu asu ba ia. ²⁴Do nege i vara i do na ranga alis lorooro ren, neni naba sang apkav i; ket do nege i soxope lorooro ren ti lok luvukat tarak, neni naba lok kaka lorooro avukat. ²⁵I lok kapmek do taradi na ruuna ka lempanga axap at na lavatbung menemen, la neni i subu basinge lorooro at ne Moroa. ²⁶Mo do taradi na lok mamangan kepe ia eburu mi levelinga rak, nenia, Laradi Mevana, anaba sok tixirixes xepe i ap mo laaleng nenia ana si ukopok mi lisisixam silok tarak la lisisixam silok at ne Tamak la at lubang angelo ren. ²⁷Mina doxoma i na! I ruturun tinotno, a tong i rinimi do lentaba atnimi na, di noxo met se at nom laaleng diba ven livipisik at levelinga mumu Linintoo at ne Moroa.”

Moroa Ga Lox Arepukus Ne Iesu

(Mt 17:1-8; Mk 9:2-8)

²⁸Iesu ga vaase axap na levelinga, la melemu at lavanuan levenaleng gara volo, Iesu ga lam kaka ne Pita, Jon, la ne Jems eburu min; la diga urut uto vana at lakaana kusu dina ngising. ²⁹Ga se neni ga lok lising, lemeren axap teren ga milik gamgames, la lavanga singsiga bok teren gam games aleng!

³⁰La ne Moses mi ne Elaisa duga rupot boro vana at laxalibet eburu mi lisisixam silok ga vung pavaa du. ³¹La duga vot pasa ne Iesu la duga epaase eburu min do neni naba lox asorun lavapaase alii at ne Moroa do neni naba met to Jerusalem. ³²La ne Pita eburu mi larapen tangas teren diga unga met, ketla diga aus kaxat la diga ven lisisixam silok at ne Iesu la luradi mo duga tu eburu min. ³³Se luradi duga lok do duna on basinge ne Iesu, Pita ga lok tin, “Leeme Silok, i lox avukat tinotno at loklok atnama nade. Ata lok tavantun taraugu xukuxut, tara ru, tara ri ne Moses, la tara ri ne Elaisa.” Ni goxoklen tinotno i do lai mo ni ga paase min.

³⁴Pita move ga paase, la lusugao ga ravasi la ga vung pavaa di; la luvuttadi loklok ka anasa diga marat aleng. ³⁵La levelinga ga ravasu boro xeneng at lusugao ga lok keretna, “Ana ne Nuruk. Aga soxolik ka vam i. Minang tonga levelinga ren.”

³⁶Ga se na levelinga ga xap, Iesu xusuk mun mo ga nemen eburu mi luvuttadi loklok ka anasa ren. Luvuttadi loklok ka anasa digak lok pilo mumu na lempanga, la di goxo tong asu i na ri teta ap mo levenaleng.

Iesu Ga Riki Xepe Lagas Basinge Lara Lamdak

(Mt 17:14-18; Mk 9:14-27)

³⁷Ap mo manga laaleng petpes diga vas si boro vana at lakaana, la buaang limixin diga ekip tangarang mi ne Iesu. ³⁸La lara laradi ga xup lolos to xantubu atdi nom limixin, ga lok keretna, “Leeme loklox ase! Pen i na, a sing u do una ven mumu lamdak tarak. Neni legesamdak mun tarak! ³⁹Lara lagas ing tanga tu ren la soso mun ip kup kaxat lolos la i lulu asi min uto ri laxangka; la lamdak i dede la lemeseng it kis pe lungusno ren! La na lagas ip sep amisix i la ma lixilik do na sev amer i! ⁴⁰A sing luvuttadi loklok ka anasa ram kusu dina riki xepe lagas uto, ketla kopmen dina epovo.”

⁴¹Iesu ga vorang i rin keretna, “Nemi limixin eburu mi luvuttadi loklok ka anasa, kopmen tunuunu atnimi! Lavanisa aleng tinotno nenia anaba xip tutu mi levenmumuat atnimi? Nemi mi lox amolo ia.” La neni ga lok ti mo laradi, “Ude mi nom lamdak.”

⁴²Se nom lamdak ga vas saparap ne Iesu, mo lagas ga sev asi i uto xopok at laxangka la ga sev adede lolos i. La ne Iesu ga vaase lolos ti nom

lagas la lagas ga on basinge mo lamdak la lamdak ga lox avukat ta, la ne Iesu ga raba amlong nom lamdak ti ne temen. ⁴³Nom axap limixin diga sangau aleng at nom lololos silok at ne Moroa.

Lesepev Agepura Lavapaase At Ne Iesu Mumu Lanmet Teren

(Mt 17:22-23; Mk 9:30-32)

Limixin move diga paase mumu lempanga axap ne Iesu gak lox i, la neni ga lok ti luvuttadi loklok ka anasa ren, ⁴⁴“Nemen mita domampe na levelinga ana tong i rinimi! Nenia Laradi Mevana, mo diba song araba ia uto ri lekngen di limixin kapmek.” ⁴⁵Ketla luvuttadi loklok ka anasa di goxoklen ua lavasuun at levelinga ren. Lavasuun at nai levelinga ga lipe atdi; kuren la di goxo xasep, la diga marat ti sue i mumu i na lavanga.

Nege I Silok

(Mt 18:1-5; Mk 9:33-37)

⁴⁶La leedak ga ravasu xantubu at luvuttadi loklok ka anasa mumu i do nege atdi ga silok. ⁴⁷La ne Iesu gaklen lavanga salai luvuttadi loklok ka anasa diga doxoma mumu i; kuren la neni ga lok kaka lara lamdak kakalik, la ga vaxaru saparav i min; ⁴⁸la ga lok tidi “Do nege i lok loklok nunuan keneng at laasen tarak ti na lamdak kakalik, neni i lok loklok nunuan tia; la do nege i lok loklok nunuan tia, neni i lok loklok nunuan ti ne Moroa, neni ga riki ia. Mila do nege i lixilik tinotno xantubu atnemi axap, neni i silok tinotno.”

⁴⁹Jon ga lok, “Leeme Silok, maga ven lara laradi ga riki kepe lubunggas mi laasen taram, la maga tong i rin do na xap ta i, mila neni xopmen at libinam tadi atdik.”

⁵⁰Iesu ga lok tin la tinedi bok luvuttadi loklok ka anasa, “Nemen mita ru vepe i, mila do nege i esep mi ne Satan, neni lentangas atdik.”

Limixin Me Samaria Diga Lox Abulubun Kepe Ne Iesu

⁵¹Levenaleng ga sixit auret ta xusu ne Moroa naba lok kaka ne Iesu upana at laxalibet, la neni ga lox agagas lodoxoma ren la neni ga vas kaxat uto Jerusalem. ⁵²Neni ga riki amgo lentaba luvuttadi mi lavapaase axasep, la diga on basinge i la digat pas uto at lara lemenemen to Samaria xusu diba lox agagas li lempanga axap tin kusu ba midi e. ⁵³Ketla limixin mego di goxo siam kaka i, mila digaklen i do neni mo gat pas uto Jerusalem. ⁵⁴Se ne Jems mi ne Jon luradi loklok ka anasa duga ronga i na, duga lok, “Leeme Silok, u vara i do mana ro xaka laxao boro vana at laxalibet la na xotos axap na limixin?” ⁵⁵Iesu ga rem gili amlong la ga vaase sok du; ⁵⁶la digat pas manga uto at lara lemenemen petpes.

Levenmumuat Atnedi Di Mumu Asu Ne Iesu
(Mt 8:19-22)

⁵⁷Digat pas ap mo langa, la lara laradi ga lok ti ne Iesu, “Aba mumu asu u at lengkot axap unat pas teren.”

⁵⁸Iesu ga lok tin, “Lubungman sio di ruuna lengkot mikmidi atdi, la lavapixa di ruuna levemposovos atdi, ketla nenia, Laradi Mevana, axo ruuna temenemen kusu ria rimdi la na lok mamana ren.”

⁵⁹La ne Iesu ga lok bok ti mo lara laradi vetpes, “Una mumu asu ia.” Ketla mo laradi ga lok tin, “Leeme Silok, una ke xepe be ia, kusu anat pas la anak mit ne tamak.”

⁶⁰Ketla ne Iesu ga vorang i rin keretna, “Una ke nedo limixin kopmen toxtot tidi xeneng at Linintoo, dinak mit limixin nedo di met pam. Unat pas at laramenemen la una vavang mi Linintoo at ne Moroa.”

⁶¹Lara laradi bok ga lok tin, “Leeme Silok, aba mumu asu u, ketla una ke xepe be ia xusu ana lox abeese be lentaba rak.”

⁶²Iesu ga lok tin, “Do tara i ru kaxat ka i xusu na gugu ria, la amisik neni ik milik amlong ti lempanga ren, neni xopmen na epovo ti lok lugugu at Linintoo at ne Moroa.”

Iesu Ga Riki Aonon Lavanuti Sangaun Mi Legepura

10 ¹Melemu at nai Leeme Silok ga soxolik ka bok lavanuti sangaun mi legepura luvuttadi la ga riki aonon di, legepura, legepura, kusu dinamgo rin la dina vavang mi Lagale Lavavang uto at lengkot axap, la at levenmenemen, neni ga lok do nabat pas ue. ²Neni ga paase poovo mi limixin di goxo nuunu ren. Ni ga lok, “Langsangan laraamang mo ira mukun pam, ketla ixo buaang nedo luvuttadi gugu xusu ti lox abeles leveluxa ukeneng at laraugu. Kuren la mina sing laradi loklok tatao at laraamang kusu neni naba riki asu tuvuttadi xusu ri lox abeles leveluxa. ³Minat pas uto at laramenemen! Nenia ana sak tiki nemi i ngan lubungsipsip uto xantubu at lubungman atat. ⁴Nemen mita xip kaka tengkon tonomka, koplata teventat, koplata tempanga vatpas; nemen gat mita ru at langas kusu mina paase aleng mi tara.

⁵Dola mina beles ukeneng at toogu, lavanga avot mina tong i xeretna, ‘Lenmila na nemen at na loogu.’ ⁶Mo do laradi at lenmila i nemen go ap mo loogu, mina ke nom lenmila atnemi na nemen eburu min; mo do xopmen, mina lok kaka amlong nom lenmila basinge di. ⁷Mina nemen at nom leges ogu mene nga; i lox avukat do mina anan la mina inin lempanga salai dina raba nemi min, mila laradi gugu i epovo xusu na lok kaka luunun teren. Nemi mina nemen at leges ogu mene nga ap mo lemenemen.

⁸Mo do mina beles at temenemen silok la dina vaase momo rangarang nemi, mina anan lempanga anan dina lox agagas li i rinimi. ⁹Mina lox

aroo levenanmeres ap mo lemenemen, la mina lok tinedi limixin mego do, 'Langas ti Linintoo at ne Moroa monga i auret.' ¹⁰Ket do nemi mina beles at temenemen, la kopmen dina vaase momo rangarang nimi mi lomomo go, mina vas su uto at langas, la mina lok tidi xeretna, ¹¹'Laxakup at na lemenemen atnimi no ma vas kaka i mi lengkangkede atnama, ma semla xepe raba nimi min, kusu ri lox asuusu lebelemamao at ne Moroa rinimi; ketla mina doxoma i na, langas ti Linintoo at ne Moroa monga i auret!' ¹²A tong i rinimi do at laaleng ete, Moroa noxo lox asu lumumuat silok ti mo limixin kapmek to Sodom, ketla ti mo limixin tongtonga xepe, lumumuat naba silok aleng tidi."

Levenmenemen Kopmen Di Goxo Nuunu

(Mt 11:20-24)

¹³La ne Iesu ga lok bok, "Naba lok kapmek aleng tinemi limixin to Korasin! La naba lok kapmek aleng bok tinemi limixin to Betsaida! Mo do na levempanga sangsangu nia ga lox i ro atnimi, dita lox i ro Taia la Sidon, gano migomgo limixin mego, nedu gita leeng pam la gita etara mun lengkontamon kapmek, la gita reevi vam laxakup at lengkot atdi kusu ri lox asuusu i do dira leeng basinge vam laxakapmek atdi! ¹⁴At laaleng ete Moroa naba lox asuusu lumumuat teren uto ri limixin at lumenemen Taia la Sidon, ketla langangan lumumuat naba nemen atnimi. ¹⁵La nemi limixin to Kaprnaum! Mi vavara i do mina silok ti limixin axap, ketla ne Moroa ba sok gingin asi minimi uto at lemenemen songsongot!"

¹⁶La ne Iesu ga lok ti luvuttadi loklok ka anasa ren keretna, "Do nege ing tonga nimi, neni ing tonga ia; la do nege i sok tixirixes nimi, i sok tixirixes ia; la do nege i sok tixirixes ia, i sok tixirixes ne Moroa ga riki ia ude."

Lomlong At Lavanuti Sangaun Mi Legepura

¹⁷Lavanuti sangaun mi legepura luvuttadi digamlong, diga umsu mi langangan lomomo la diga lok, "Leeme Silok, lubanggas diga ronga res atnama mo do maga vaase lolos tidi mi laasen taram!"

¹⁸La ne Iesu ga vorang i ridi xeretna, "Aga ven lixitkis orong at ne Satan ga xap la ni ga subu soso boro vana at laxalibet ngan lavanga i mam. ¹⁹Mina ronga i na. Ara raba vam nimi mi lololos, kusu mibat pas mavana at laxasii la at laxan aksoxomet, la mavana bok at lololos at ne Satan la kopmen tepanga naba lox asongot nimi. ²⁰Ketla nemen mita momo mumu i do lubanggas di ronga res atnimi; ketla mina momo mila levenasen atnimi, Moroa ira malagan pam i ro at laxalibet."

Iesu Ga Lok Momo

(Mt 11:25-27; 13:16-17)

²¹Ap mo mun loxonaleng Loroonan Kaala ga suxuna ne Iesu mi lomomo, la ni ga lok, "Tamak, nenu Leeme Silok at laxalibet mi lavatbung

menemen! A tong avukat tu mila ugara lox ase vam nedi limixin gamasa mi na lempanga; la uga lipe i basinge limixin leklen la limixin dokdoxoma. I ruturun, Tamak. Anai uga lox i mi lodoxoma la lomomo ram.

²²Tamak. Ura raba vam ia mi lempanga axap. Kopmen teta naklen nege Lamdak taram, ketla Tamak kusuk; la kopmen teta naklen nege ne Tamak, ketla Lamdak kusuk mun, la tinedi mun Lamdak i vara i kusu na lox ase di min.”

²³La ne Iesu eburu mi luvuttadi loklok ka anasa ren diga nemen kusuk la neni ga milik alu rinedi la ga lok tinedi, “Lomomo mun tinimi mi ven na lempanga! ²⁴A tong i rinimi do buaang lavaeme vapaase alii la lavaorong silok diga vara i do dina ven mo lempanga nemi mira ven pam i, ketla di goxo epovo; la diga vara i do dina rongga i mo levelinga mira rongga vam i, ketla di goxo epovo.”

Lavapaase Poovo Ti Lagale Laradi Boro Samaria

²⁵At lara laaleng lara laradi loklox ase at Lenavolo ga xatu kaxat la ga doma i do na lok tong ne Iesu. Ni ga lok, “Laradi loklox ase. Anaba lok lavanga salai xusu ri lok kaka lorooro avolo.”

²⁶Iesu ga lok tin, “Lovoang Kaala i tong i do xereva?”

²⁷La mo laradi ga vorang i rin keretna, “Mina balamu Leeme Silok ne Moroa atnimi mi lebelen nimi axap, mi lороonan axap atnimi, mi lololos axap atnimi, la mi levendoxoma axap atnimi; la mina balamu mo limixin di nemen saparav nimi kerekngan pam u balamu u.”

²⁸Iesu ga vorang i rin keretna, “Lesepepo ram ik mokso. Una lox i xuren la uba rooro.”

²⁹Ketla laradi loklox ase at Lenavolo ga vara i xusu na lok li i ri lomokmokso, kuren la ni ga lok ti ne Iesu “Nege mo lara i nemen saparav ia?”

³⁰Iesu ga vorang i rin, “Lara laradi ga vas kaxat boro Jerusalem uto Jeriko, la limixin kipkip pilo diga xala i, la diga sak mus pes levesingsiga ren, la diga sev i la diga on basinge i ga met aroo. ³¹Ap mo mene loxonaleng lara lamaasa gat pas mu mo langas; se neni ga ven i nom laradi, neni ga vas polo i uto at lisigege ngas. ³²La lara laradi gugu at loogu laplavang, neni bok ga vas polo go, la ga ven nom laradi, la ga vas polo manga i uto at lisigege ngas. ³³Ketla leeme boro Samaria mo ga mumu ngas ga rupot saparav i, la se neni ga ven i nom laradi, lebelen ga lok mu i. ³⁴Ni gat pas saparav i, la ga soli laxadan momonok at lo olip eburu mi lavaen to at levenin kooxing teren, la ga is pe mo levenin kooxing mi labantamon; la neni ga xip kaka nom laradi uto at lodongki ren la ga lok kaka i uto at loogu mikmidi; la neni gak lok tatao i. ³⁵Ap mo laaleng petpes ni ga lok kaka legepu denarias la ga raba mo laradi

gak lok tatao mo loogu min, la ni ga lok ti mo laradi gak lok tatao loogu. ‘Unak lok tatao na laradi, mo do nia anamlong bok at na langas, aba un amlong bok lempanga ram uga lok tooro na laradi min.’

³⁶La ne Iesu ga lok, “At lodoxoma ram ua lara atdi na lavantun ga balamu aleng mo laradi limixin kipkip pilo diga sev i?”

³⁷Laradi loklox ase at Lenavolo ga vorang i rin keretna, “Mo laradi ga lok tooro i.”

Iesu ga lok tin, “Una lok mun i xuren.”

Iesu Ga Vot Pasa Ne Mata Mi Ne Maria

³⁸Iesu eburu mi luvuttadi loklok ka anasa ren diga mumu mo langas la digat pas uto at lara lemenemen; la lara latkin, laasen teren ne Mata, ga xup kaka di uto at loogu ren. ³⁹Neni ga ruuna lara neton, laasen teren ne Maria, mo gat kis saparap luxangkedek at Leeme Silok la gang tonga leveloklox ase ren. ⁴⁰Ketla ne Mata gak lox angtang solo mavana at leven gugu neni ga lok do na lox i; kuren la neni ga vas saparap ne Iesu la ga lok, “Leeme Silok, uxo doxoma ia do netak i ke xusux ia xusu anak lox angtang mi na lempanga? Tong i rin kusu nat pas ude la neni na lok tooro box ia!”

⁴¹Leeme Silok ga lok tin, “Mata, Mata! Uk lok bukbulu aleng la urak lox angtang mavana at laxampanga solo. ⁴²Ketla leges avanga mun uk pakes tin. Maria i vara i do nang tonga leveloklox ase rak, la tara noxo lok pes i na basing i.” Lisingising

Iesu Ga Lox Ase Luvuttadi Loklok Ka Anasa Ren Mi

(Mt 6:9-13; 7:7-11)

11 ¹At lara laaleng Iesu ga ngising to at lara lenep. La melemu at lisingising teren, lara laradi loklox ase ren ga lok tin, “Leeme Silok, una lox ase nema mi lisingising, kerekngan ne Jon ga lox ase luvuttadi loklok ka anasa ren.”

²Iesu ga lok tinedi, “Mo do mina sing, miba vaase xeretna, Temen nema, mana lok ngangao at laasen taram. Linintoo ram na vot. ³Unam taba nema mi leveluxa at levenaleng axap. ⁴Doxoma xepe laxakapmek atnema, kerekngan nema ma doxoma xepe laxakapmek atnedi di lox i rinema; la nemen uta lok li nema ri leveloklok tong pen i lolos.”

⁵La ne Iesu ga lok ti luvuttadi loklok ka anasa ren keretna, “Dola tara atnemi nat pas uto at loogu at lentangas teren at laxanimin tubu la na lok tin, ‘Lentangas tarak, una raba ia mi tavantun tengkongkide. ⁶Lentangas tarak it pas at langas babaalom, mo vam i rupot to at loogu rak, la axo ruuna teveluxa kusu ri raba i min.’

⁷La do lentangas taram na vorang levelinga ram to xeneng at loogu ren keretna, ‘Nemen uta lox angtang ia! Lumusaragu dira vipe vam i, la nema

loxoetemen na mara unga vam. A noxo xatu kaxat bok ba la ana raba u mi tempanga anan.’⁸ A tong i rinimi, keke i do ixo xatu kaxat la ixo raba u mi lengkongkide mila neni lentangas taram, ketla neni naba xatu kaxat la na raba u mi lempanga axap nenu uk pakes tin mila nenu xa uxu mangan kusu una ngising aptaptangi.

⁹Kuren la a tong i rinimi do, mina ngising, la miba ruuna xaka i; mina puse, la miba vuse xaka i; mina dipdi, la lumusaragu naba rem suang tinimi. ¹⁰Mila, do mina ngising ne Moroa, miba lok kaka i; la do nemi mina puse, minaba vuse ka i; la lumusaragu naba rem suang tinimi mi dipdi.

¹¹Kereva, i epovo do temen lamdak na raba ne nitna mi tisii mo do neni na sing ti temat? ¹²Kopla i epovo kusu neni na raba i mi laksoxomet mo do neni na sing ti taxabili pixa? Kopmen. ¹³Keke i do mi bilinga, ketla miklen i do mim taba lempanga nunuan ti laxamdak atnimi. La kerepmo ne Moroa i nemen to vana at laxalibet naba raba Loroonan Kaala tinedi di ngising i!”

Iesu Ga Paase Mumu Ne Belsebul

(Mt 12:22-30; Mk 3:20-27)

¹⁴Iesu ga riki xepe lagas gak lok at laradi kopmen goxo paase; se nom lagas ga sixisu, laradi ga lox epovo xusu na paase. Buaang limixin diga sangu. ¹⁵Ketla lentaba luvuttadi diga lok, “Neni i riki asu lubanggas mi lololos at ne Belsebul, leeme gomgo at lubanggas.” ¹⁶Lentaba diga vara i xusu dina lok tong pen i, kuren la diga sue i xusu na lok tavanga sangsangu xusu ri lox asuusu i do ne Moroa ga riki i.

¹⁷Ketla ne Iesu gaklen levendoxoma atdi la ni ga tong lavapaase poovo ridi xeretna, “Dola tubungmixin di epes di ti lengkon binam tadi, la dia esep eburu minedi xa, kopmen noxo lok nunuan letuna atdi; loxoetemen do di epes di xusu ri esep, dinaba xis epeseves. ¹⁸Kuren la mo do ne Satan eburu mi limixin teren dina epeseves ti legepu binam tadi la dina esep, lololos teren naba nemen babaalom kereva? Mi tong i do a lox asu lubanggas mila ne Belsebul i raba ia mi lololos kusu ri lox i. ¹⁹Mo do nia a lox asu di mi lololos at ne Belsebul, kereva ba limixin sangsanga atnimi di lox asu di? Nedi di lox asuusu i do levelinga atnimi kopmen nak mokso! ²⁰Ket do a lox asu di mi lololos at ne Moroa, Linintoo at ne Moroa monga ira vot pam parap nimi.

²¹Mo do laradi lolos na lox agagas li lempanga esep teren, la na lok tatao loogu lolos teren, mo lempanga axap teren ba nemen avukat. ²²Ket do tara taradi, lololos teren i volo i, na esep eburu min la na sev asi i, neni naba lok ka lempanga esep at nom laradi gak lok tatao loogu ren min, la na epes lempanga salai neni ga xip pilo xaka i.

²³Taradi do kopmen neni atarak, neni i munepen minia; la do tara kopmen nak lok tooro ia ti xup bubua ka laxasipsip, neni i sak epeseves laxasipsip.”

Lomlong At Lagas

(Mt 12:43-45)

²⁴Iesu ga lok keretna, “Dola lagas na sixisu basinge laradi, bat pas saasaa at lengkot, ba reven ti toxot kusu rin ti lok mamana. Mo do noxo vuse ka toxot, naba doma i xeretna, ‘Anamlong uto at no laradi, nenia aga on basinge i.’ ²⁵La neni bamlong la na long lenget ka i do mo loxot im games la ira lox avukat pam. ²⁶La neni bat pas la na lok ka bok lavanuti lubunggas, lololos atdi i volo i, la dibat pas la diba vubeles ap mo laradi. Kuren la mo laradi ba nemen kakapmek tino.”

Lomomo Ruturun

²⁷Se ne Iesu ga vaase axap na levelinga, lara latkin to xantubu at limixin ga lok ti ne Iesu keretna, “Moroa na lox anarong latkin ga visix u la ga lox asilox u!”

²⁸Ketla ne Iesu ga vorang i rin keretna, “I ruturun, ketla nedi mun di rongga levelinga at ne Moroa la di mumu asu i, Moroa naba lox anarong di.”

Limixin Diga Sing Ne Iesu Kusu Na Lok Tavanga Sangsangu

(Mt 12:38-42)

²⁹Se limixin diga umsu saparap ne Iesu, neni ga lok tidi xeretna, “Limixin at na levenaleng nedi limixin kakapmek tinotno! Di sue ti tavanga sangsangu, ketla kopmen a noxo lok tara ridi, ketla diba doma mumu mun leretere at ne Jona. ³⁰Lugugu at ne Jona neni lampoovo rinedi limixin boro Nineve; la kerepmo lugugu at Laradi Mevana neni lampoovo tinedi limixin at na levenaleng. ³¹At laaleng ete latkin gomgo boro Seba naba xatu kaxat la na tong asu laxakapmek atnimi limixin at na levenaleng, mila neni ga vas kaxat boro vaxalom tinotno xusu na rongga levenanasa at ne Solomon; ketla a tong i rinimi do lara laradi ik lok pam kantubu atnimi, neni i silok ti ne Solomon. ³²At laaleng ete limixin boro Nineve dinaba ru kaxat la dina tong asu laxakapmek atnimi, mila diga leeng basinge laxakapmek atdi at nom laaleng diga rongga ne Jona ga vavang tidi; la a tong i rinimi do lara laradi ik lok kantubu atnimi neni i silok ti ne Jona.”

Lavapaase Poovo Ti Laxasep I Nemen Keneng At Labantuxu

(Mt 5:16; 6:22-23)

³³La ne Iesu ga lok keretna, “Kopmen taradi na sox aros lababao la na lok li alipe i xopla na lok li i ro maxopok at lavatbaaket; ketla neni i lok li i ro at loxot lababao i tu e, kusu limixin diba reven at laxasep teren do dina beles. ³⁴Lengkatli atnimi i ngan laxasep ti lorooro atnimi.

Dola lengkatli i reven ti lempanga avukat, lorooro atnimi mo ba umsu mi laxasep; ket do lengkatli atnimi i reven ti lempanga xapmek, lorooro atnimi naba nemen at lamain. ³⁵Mina lok tatao avukat nimi, kusu lorooro axap atnimi noxo umsu mi lamain. ³⁶Do lorooro axap atnimi naba umsu mi laxasep, la kopmen tekot main go xeneng teren, nom lorooro axap taram nabam games, kerekngan mun lababao i lox axasep labantuxu mi losoosoo ren.”

Laxakapmek At Lubung Parisi

(Mt 23:1-36; Mk 12:38-40)

³⁷Se ne Iesu ga vaase axap, lara atdi lubung Parisi ga lam ka i xusu na anan eburu min; la neni ga vubeles ukeneng at loogu la ga xis kopok kusu dina anan. ³⁸Mo la Parisi ga rakdu aleng mila neni ga ven ne Iesu kopmen goxo gos avot be lukngen kusu ri anan.

³⁹La Leeme Silok ga lok tin, “Nemi lubung Parisi mi gos anunuan no maxamang at lakap inin mi lavanga tingtigon, ketla no maxeneng atnimi, nemi mi umsu mi loklok ti belegao la loklok kakapmek bok. ⁴⁰Nemi limixin tangtangu! Kereva, kopmen ne Moroa goxo rudum i no maxamang la no bok maxeneng? ⁴¹Ketla mina raba lempanga salai no i nemen at lengkap mi levempelet atnimi tinedi limixin banbalo, la lempanga axap nabam games tinimi.

⁴²Naba lok kapmek tinotno rinimi, lubung Parisi! Mi raba ne Moroa mi lenep avot at lasangaun at lempanga, i ngan levengkuma mi leveloombo la lempanga vetpes bok; ketla nemi mi sok tixirixes loklok mokmokso la labalamu at ne Moroa. Anai nemi mina lox i, la nemen mita sok tixirixes nom loklok ti raba ne Moroa mi lenep avot at lasangaun at lempanga.

⁴³Naba lok kapmek tinotno tinimi lubung Parisi, mila mi vavara aleng lengkot kitkis to melamgo at laraugu singising; la mi vavara i do limixin dina seega rangarang nemi mi loklok ngangao ro at lengkot etang.

⁴⁴Naba lok kapmek tinotno rinimi! Nemi mi lok ngan lara maaut kopmen di goxo lok katling di, la limixin dit pas teren la kopmen dinaklen laxakapmek ik lok teren.”

⁴⁵Lara laradi loklox ase at Lenavolo ga lok ti ne Iesu, “Leeme loklox ase, ise nenu u tong i na, nenu u vaase sok bok nama.”

⁴⁶Iesu ga vorang i rin keretna, “Naba lok kapmek tinotno bok tinimi luvuttadi loklox ase at Lenavolo mila mi lok li levenaknixip melemu at levenantuno atdi limixin, la i lolos aleng kusu dinap kiv i, ketla nemi xa kopmen mina song asu lixilik mi tanatsivisip atnimi xusu mina lok tooro di tip kip mo lumumuat.

⁴⁷Naba lok kapmek tinotno rinimi! Mila miga lok lara maaut nunuan kusu ri lavaeme vapaase alii megano, ua lavalabat atnimi diga sev amet di. ⁴⁸La kerepmo nemi xa mi lox asuusu i do, nemi xa miga siam ap mo

laxakapmek lavalabat atnimi diga lox i; mila diga sev amet lavaeme vapaase alii, la nemi miga lok lara maaut tidi. ⁴⁹Kuren la ne Moroa mi lakleklen silok teren ga lok, ‘Aba riki lavaeme vapaase alii la luvuttadi vavang, la lentaba atdi diba sev amet di la lentaba diba lox asongot di.’ ⁵⁰Kuren la limixin at nai levenaleng dibap kip langsung lumumuat mumu laniu at lavaeme vapaase alii axap ga ru ka i at laaleng at ne Moroa ga rudum li na lavatbung menemen, ⁵¹at laniu at ne Abel ga se at laniu at ne Sakaria, no lavalabat atnimi diga sev amer i ro xantubu at loxot kokotos taba levempanga e xusu ri ne Moroa la loxot i xaala. I ruturun tinotno. A tong i rinimi do limixin at na levenaleng dinabap kip langsung lumumuat mumu nedi axap!

⁵²Naba lok kapmek tinotno rinimi, luvuttadi loklox ase at Lenavolo! Nemi xa mi rebeng alis lolos levelinga at ne Moroa i tong asu langas ti ruuna ka lorooro; ketla nemi xa kopmen mina xasep teren, la mi lok pe nedi di lok do dina lok kaka i.”

⁵³Se ne Iesu ga vas kaxat basinge mo loxot, luvuttadi loklox ase at Lenavolo la lubung Parisi diga ru ka i xusu dina lox abulubun kepe i la diga sue i mi laxasusue. ⁵⁴La kerepmo diga puse ngas kusu dina lok li ne Iesu at lavapaase silok mo do ni na tong kapmek toxolinga.

Lavapaase Mumu Laxaxarang At Lubung Parisi

(Mt 10:26-27)

12 ¹Ap mo laaleng buaang nedi limixin diga vot buru, la diga umsu aleng; kuren la diga epas gat; la ne Iesu ga vaase avot ti luvuttadi loklok ka anasa ren keretna, “Mina lok tatao avukat nimi basinge laiis^b at lubung Parisi. Di xarang nedi xa. ²Do lavanga salai limixin dina sibo pe i, nom i naba xis asuvos; la levendoxoma alipe, nom i limixin dibaklen axav i. ³Mo levelinga mina tong i at lamain, limixin diba rongga i at laxangking tubu; mo levelinga nemi mi vaase nemnem min to at lenbaalung at luvuttadi to xeneng at laraugu vipi pe, nom diba xup aonon min to mavana at lavatlak gu.”

Nege Mo Xusu Mina Marat Teren

(Mt 10:28-31)

⁴La ne Iesu ga lok tidi xeretna, “Larapen tangas tarak! A tong i rinimi, nemen mita marat atnedi di sev amet labantuxu, ketla melemu ren kopmen di noxo epovo ti lok tavanga i lok kapmek aleng ti lorooro atnimi. ⁵Ana tong i rinimi do legesa radi mun minak marat teren. Minak marat at ne Moroa, melemu do ira sev amet tara, neni i ruuna bok lololos kusu na lu abeles min uto at lemenemen songsongot. I ruturun tinotno.

^b 12:1 Laiis i ru katling leveloklox ase at lubung Parisi mi lubung Sadiusi.

A tong i rinimi do minak marat kujuk mun at ne Moroa. ⁶Luunun at lavalimo pixa legepu peni mene, ketla kopmen teta atdi ne Moroa naba domampe i. ⁷La kerepmo ne Moroa im doma mumu amisik nimi, ikleklen bok leexes at lengkabinim at lempatlak atnimi. Nemen mita marat mila luunun atnimi at lemeren ne Moroa i silok ti luunun at lavapixa.

⁸A tong tuturun i rinimi; do nege i tong asu i do neni atarak to melango at limixin axap, nenia, Laradi Mevana, anaba tong box i do neni atarak to melango at lubung angelo at ne Moroa. ⁹Ket do nege i tong i do i xopara ia ro melango at limixin la i lok do neni kopmen atarak, nenia, Laradi Mevana, anaba sok tixirixes box i ro melango at lubung angelo at ne Moroa. ¹⁰Do tara na tong toxolinga bilinga mumu ia, Laradi Mevana, i epovo do ne Moroa naba doxoma xepe nom laxakapmek teren; ketla do nege i tong lempanga i lok kapmek mumu Loroonan Kaala, ne Moroa noxo doxoma xepe nom laxakapmek teren.

¹¹Do dina song araba nimi uto at laraugu singising kusu dina lok li nimi at lavapaase, koplala to melango at luvuttadi silok koplala to melango at luvuttadi amgomgo, nemen mita bulu do miba vaase pe nimi xereva xopla lavanga salai miba tong i; ¹²mila Loroonan Kaala naba lox ase nimi mi levelinga ap mo mene loxonaleng la miba vaase asu i.”

Lavapaase Poovo At Laradi Gang Tangku Pavaa Lapnovos Teren

¹³Lara laradi ro xantubu atnedi nom limixin ga lok ti ne Iesu, “Leeme loklox ase, una tong i ri netak kusu na episa lapnovos ne temen nama’ ga met basinge i xantubu atnama’.”

¹⁴Iesu ga vorang i rin keretna, “Leeme, kopmen tara ga raba ia mi levelinga mumuat kusu ana ronga linga, koplala ana epes lempanga kantubu atnumu?” ¹⁵La ni ga vaase rinedi axap, “Mina reven avukat, la mina lok tatao avukat nimi basinge lempanga at na lorooro; mila lorooro ruturun ti laradi kopmen dina lok ka i at na lavatkangka, keke i do neni ip novos aleng.”

¹⁶Melemu ne Iesu ga tong asu lara lavapaase poovo ridi xeretna, “Lara laradi gap novos, ga ruuna loxongkangka mi laraamang gak lok teren; la nom lempanga neni gatlo li i ga visik levempeven una avukat. ¹⁷La ni ga lok keretna, ‘Axo ruuna toxot kusu ri lok li na lempanga. Aba lok lavanga salai?’

¹⁸La ni ga lok keretna, ‘Anaba lox i xeretna; aba ut asi laraugu lili luxa rak la ana lok taraugu silok, la aba lok li lempeven una rak go la lentaba lempanga vetpes bok. ¹⁹La melemu aba lok keretna. Ara ruuna vam lempanga nunuan, i epovo ria at laxanmaares solo. A ruuna ka vam lorooro nunuan, ana anan, ana inin, la ana momo!’

²⁰Ketla ne Moroa ga lok tin, ‘Nu laradi baulang! Lingina mun at laxanimin uba met; la nenu noxo lok kaka nom lempanga u lok do uba gagas li i ru.’”

²¹La ne Iesu ga lok bok, “Anai i lok ngan nedi di lili laxampanga solo kusu ridi, ketla to at lemeren ne Moroa kopmen di, dinap novos.”

Nemen Mita Bulu Mu Lempanga Anan La Lempanga Singsiga
(Mt 6:25-34)

²²La ne Iesu ga lok ti luvuttadi loklok ka anasa ren keretna, “La kerepmo a tong i rinimi do nemen mita bulu mu leveluxa mik pakes tin kusu miba rooro, koplala mumu levesingsiga mik pakes tin kusu ri etara. ²³Lorooro i silok aleng ti leveluxa, la labantuxu i silok aleng ti levesingsiga. ²⁴Mina ven lavapixa; dixotlotlo tevempeven una, la dina lili buru leveluxa; dixo ruuna taraugu koplala tengkot lili. Ketla ne Moroa im taba di! Moroa im doma i do nemi mi silok aleng ti lavapixa. ²⁵Ua lara atnimi i epovo xusu na nemen at tentaba tenmaares bok do ni na doma mu solo i? ²⁶Mo do mixo epovo kusu mina lok na lavanga lixilik, nemen mita doma mu solo i, kusu mina ruuna ka lempanga at na lorooro.

²⁷Mina ven lempatko di susu; dixo gugu la kopmen dinak lok tevesingsiga ridi. Ketla a tong i rinimi do ne Solomon, gap novos aleng, ketla levesingsiga ren goxopmen goxom games ngan i na lempatko. ²⁸Ne Moroa axa ik paxasiga na lempatko, i ngan lempivilis mo i nemen de lingina, la kantamak dina rin asonao i to at laxao. Kereva, Moroa ixo epovo xusu na taba nemi mi levesingsiga? Nemi limixin, lunuunu atnemi i lixilik aleng! ²⁹Kuren la nemen nemi mita bulu la mina doma i do miba an lavanga salai la mina in lavanga salai. ³⁰Limixin axap at na lavatbung menemen kopok di doma mu amisix i na lempanga. Ketla ne Temen nemi iklen i do nemi mik pakes ti na lempanga. ³¹Nemen mita doma solo ri na, ketla mina ruuna ka avot be Linintoo at ne Moroa, la ne Moroa naba raba ba nemi mi na lempanga.”

Lapnovos To Vana At Laxalibet
(Mt 6:19-21)

³²La ne Iesu ga lok bok, “Limixin tarak, nemen mita marat, mila ne Temen nemi, i momo xusu naba raba nemi mi Linintoo ren. ³³Mina sesep mi lempanga atnimi la mina raba lempilas at nom lempanga rinedi limixin banbalo la kerepmo mi noxo doma solo lengkontonom ka atnimi mo ba lok kapmek la lempilas atnimi na sonao, ketla minaba ruuna ka lapnovos tinimi ro vana at laxalibet. ³⁴Mina lox i xuren mila lorooro axap atnimi naba lok mu lapnovos atnimi.”

Lavapaase Poovo Ti Luvuttadi Gugu Diga Gagas

³⁵La ne Iesu ga lok bok, “Mina gagas ti lomlong tarak i ngan laradi i etara avarang lisingsiga la lababao ren i ngangao. ³⁶Kerekngan luvuttadi gugu di ngangais ti leeme silok atdi mo naba vot boro at loklox epot; do

neni na vot la nap dipdi, diba suang soso mun lumusaragu rin. ³⁷Naba lox avukat tinedi na luvuttadi gugu do leeme silok atnedi i long lenget ka di do di tuang, la dia gagas mo do neni imlong! A tong i rinimi, do neni xa naba vaxaera i xusu na gugu ridi, la na lox axis di ukopok la na raba panga anan di. ³⁸Naba lox avukat tinedi luvuttadi gugu mo do leeme silok atnedi i long lenget ka di, di gagas, mo do neni gi rupot at laxanimin tubu kopla at leregteng kaxak! ³⁹La mina xasep at nai! Mo do laradi at loogu iklen loxonaleng laradi xipkip pilo naba vot, neni noxo ke nom laradi xipkip pilo na das beles uto xeneng at loogu ren. ⁴⁰La nemi bok mina gagas mila Laradi Mevana naba vot at loxonaleng mi noxo doxoma i do ni naba vot teren.”

Lavapaase Poovo Ri Laradi Gugu Avukat La Laradi Gugu Kapmek
(Mt 24:45-51)

⁴¹Pita ga sue ne Iesu keretna, “Leeme Silok. Kereva, u tong i na lavapaase poovo rinema xusuk mun, kopla u doxoma i do ri limixin axap?”

⁴²Leeme Silok ga vorang i rin keretna, “Nege mo laradi ruturun la lasaxaruki avukat? Neni mo laradi, leeme silok teren naba lok li i xusu nak lok tatao loogu ren la na raba lavasaxaruki mi lempanga anan tidi at lengkonalleng mokmokso. ⁴³Naba lox avukat ti mo lasaxaruki, mo do leeme silok teren nabamlong la na long lenget ka i do i lox epovo lugugu ren. ⁴⁴A tong tuturun i rinimi do mo leeme silok naba lok li lasaxaruki ren kusu na lok tatao lempanga vipis axap teren. ⁴⁵Ket do nom lasaxaruki na lok; ‘Leeme silok tarak mo noxomlong soso.’ La nap sep lentaba lavasaxaruki, lavatlok eburu mi lavakin, la ira anan la ira inin la ira inin tangtangu. ⁴⁶Melemu leeme silok nabamlong at tara taaleng lasaxaruki ren ixo doxoma i do ni naba vot teren la at loxonaleng neni xopmen naklen i. Nom leeme silok naba sev asongot aleng nom lasaxaruki, la na lox aonon i uto at lemenemen kusu na nemen eburu minedi xopmen dina nuunu.

⁴⁷Lasaxaruki iklen lai leeme silok teren i vara i do ni na lox i, ketla kopmen na lox agagas li i, la kopmen na lok epovo lavavara ren, neni naba lok kaka langsung losongsongot. ⁴⁸Ket lasaxaruki do xopmen naklen lai leeme silok teren i vara i, la i lok lempanga i epovo xusu dina vixis i, leeme silok teren ba sev asongot lixilik mun i. Laradi do ne Moroa i raba i mi lempanga solo, ne Moroa naba sing i xusu na raba amlong bok tempanga solo; la ti laradi ne Moroa i raba solo i mi laxampanga, ne Moroa naba sing i mi taxampanga solo bok.”

Iesu Ga Vot Kusu Ri Lox Aepeseves Limixin
(Mt 10:34-36)

⁴⁹Iesu ga lok bok, “Aga vot kusu ana lok li na lavatkangka at laxao; la nia a vara i do nom laxao na bao soso! ⁵⁰A ruuna lara lumumuat

kusu anap kiv i, la labalak i muat aleng kusu ana lok kaka i se ana lox epovo i! ⁵¹Kereva, mi doxoma i do aga vot kusu ana lok li lumulum at na lavatbung menemen? A tong i rinimi do a goxo vot mi lumulum, ketla mi lixitkis epeseves. ⁵²I ru ka i lingina loxoetemen do lavalimo nedi diba epeseves, lavantun diba munepen mi legepura, la legepura diba munepen mi lavantun. ⁵³Luvuttemen laxamdak diba munepen mi laxamdak atdi, la laxamdak diba munepen mi luvuttemen di, la lavakin diba munepen mi laxaalik atdi, la laxaalik diba munepen mi luvutnen di; la loxoenenen, diba emunepen eburu.”

Loklok Ti Reven Kisip Levengkonaleng

(Mt 16:2-3)

⁵⁴Iesu ga lok bok ti limixin, “Do nemi mi ven loxontakabu i ru kaxat to at loxot laxangking it lotup e, soso mun mi lok do, larakabu mo naba vot. La i ruturun. ⁵⁵La do mi suma lamanman i la boro at laxaludan, nemi mi lok, a lok do nabaplivi mo; la i lok kuren. ⁵⁶Nemi lavapen aala! Mi reven lavatbung menemen mi laxalibet la mi epovo mina tong asu na lempanga; tila ba, mixo doxoma xibis lovtopot at Laradi Mevana?”

Mina Lok Lumulum Mi Limixin Munepen

(Mt 5:25-26)

⁵⁷Iesu ga lok bok, “Tila mi xopara i do mina mumu asu loklok nunuan la mirak lok li amisik limixin at lavapaase? ⁵⁸Mo do taradi na lok li lumumuat mavana atnimi la na lok kaka nimi ri lavapaase, mina lolos kusu mina lox akmokso nom lavapaase eburu min, do nemi move mit pas mu langas, kusu neni noxo vaxaru li nimi ro melamgo at laradi rongtonga linga, la laradi rongtonga linga na song araba nimi uto at laradi rutu mu, la laradi rutu mu na lok li nimi at loxokoxo. ⁵⁹A tong tuturun i rinimi do mi noxo epovo xusu miba vas su basinge loxokoxo se do mina un axap pam luunun at nom lavapaase.”

Mina Leeng Basinge Laxakapmek, Lavanga Mina Met

13 ¹Ap mo mun loxonaleng lentaba luvuttadi mo diga nemen go, diga vaase ri ne Iesu mumu lentaba luvuttadi boro Galili ne Paelat ga sev amet di at loxonaleng digaplavang saparap ne Moroa. ²La ne Iesu ga vorang i ridi xeretna, “Mi doxoma i do mo luvuttadi boro Galili diga xapmek tinotno rinedi leme Galili, kuren la diga met kerepmo. ³Kopmen tinotno! Ketla a tong i rinimi do, mo do mi noxo leeng basinge laxakapmek atnimi, nemi bok miba seeve. ⁴La kereva ba di nom lasangaun mi lavanuan luvuttadi to Siloam diga met at loxonaleng loogu babaalom ga subu kimit di? Mi doxoma i do nom luvuttadi diga xapmek tinotno rinedi limixin avukat diga nemen to Jerusalem?

⁵Kopmen tinotno! Ketla a tong i rinimi do, mo do mi noxo leeng basinge laxakapmek atnimi, nemi bok miba seeve.”

Lavapaase Poovo Ri Luuna Goxo Visik

⁶Melemu ne Iesu ga vaase ridi mi lavapaase poovo xeretna, “Lara laradi ga ruuna luuna pik ga susu ro at laraamang vaen teren. Ni gat pas kusu na ven ti tevempeven una go ap mo luuna pik, ketla ni goxo long lenget ka tara. ⁷Kuren la ni ga lok ti laradi loklok tatao at laraamang, ‘At lavantun maares axap ta, nia agat pas ude xusu ana ven ti tempeven una at na luuna pik, la axo vuse ka levenen una. Tara asi i ukopok! Tila i tu amisik la ira vaaxap lomono at laxangka?’

⁸Ketla laradi loklok tatao laraamang ga lok tin, ‘Leeme silok, una ke bok be i at na mun legesa maares; la ana xe xangkan i la ana suxa i mi taxannorang una. ⁹La mo do na luuna na visik tevempeven una pik at na lamaares mavana, naba lox avukat; mo do kopmen, una ra asi ba i!”^c

Iesu Ga Lox Avukat Lara Latkin At Laaleng Kaala

¹⁰At lara laaleng kaala ne Iesu ga anasa limixin to xeneng at loogu singising. ¹¹La lara latkin mo gak lok, lagas ga suxuna i la ga lox i gak meres at lasangaun mi lavanaan maares; lantuno ga kauk la ni goxo epovo xusu na tu akmokso. ¹²Se ne Iesu ga ven i, neni ga ro ka i uto melamgo atdi la ga lok tin keretna, “Latkin, u lox avukat pam basinge nom lanmeres taram!” ¹³Iesu ga lok li lukngen to at nom latkin la soso mun latkin ga lox akmokso lengkot teren upana la ga emi asu mi ne Moroa.

¹⁴Laradi gomgo at loogu singising ga belemamao aleng ne Iesu do ga lox avukat mo latkin at laaleng kaala; kuren la ni ga lok ti limixin, “Lavanna aleng kusu ridik ti lok leven gugu, kuren la minat pas ude at nom levenaleng kusu miba lok avukat basinge levenanmeres atnimi, ketla kopmen at laaleng kaala!”

¹⁵La Leeme Silok ga vorang i rin keretna, “Nemi limixin mi xarang axa nimi. At levenaleng kaala axap mi sepmus levendongki mi levenbulumaxao ro at levengkot mikmidi la mim lam kaka di xusu dina inin. ¹⁶La kereva ba, ixo lox avukat ti lok tooro na latkin me Judaia at laaleng kaala, Satan ga lok kapmex i xerepmo at lasangaun mi lavanaan levenmaares?”

¹⁷Ana lovoporang teren ga lox amangan nedi diga munepen min, la nedi nom limixin diga lok momo aleng at nom lavanga sangsangu ne Iesu ga lox i ap mo loxonaleng.

^c 13:9 Na lavapaase poovo rinedi limixin me Judaia la lavanga salai naba vot parap di do di noxo visik asu teveloklok nunuan.

Lavapaase Poovo Ti Liit Mastet I Lixilik Tinotno

(Mt 13:31-32; Mk 4:30-32)

¹⁸Iesu ga sue di xeretna, “Linintoo at ne Moroa i lok ngan lai? La ana tong poovo i atla? ¹⁹I lok ngan liit mastet, laradi ga lok kaka i la gatlo li i ro at loxongkangka ren; liit mastet ga su la ga vee una, la lavapixa diga xip lempotpos pixa atdi ro at lengkakan teren.”

Lavapaase Poovo Ri Laiis

(Mt 13:33)

²⁰Melemu manga Iesu ga sue di, “Linintoo at ne Moroa ana tong poovo i atla? ²¹I lok ngan laiis latkin i lok kaka i la ia lox eburu i mi loxompalava ise nom axap loxompalava i so xat.”

Lumusaragu I Veleot

(Mt 7:13-14, 21-23)

²²Iesu ga vas kaxat uto Jerusalem la at na lavatpas teren ni gat pas kantubu at levenmenemen silok la lengkon menemen kakalik, la ga anasa limixin. ²³La lara laradi ga sue i, “Leeme Silok. Kereva, tentaba tuvuttadi mene diba lok kaka lorooro avolo?”

Iesu ga vorang i ridi xeretna, ²⁴“Mina lolos kusu miba beles at lumusaragu lixilik at Linintoo at ne Moroa, mila buaang limixin diba lok tong i do dina beles ukeneng, ketla di noxo epovo. ²⁵Leeme gomgo at nom loogu naba xatu kaxat la na vi pe lumusaragu; la do nemi mina tu ro maxamang la minap dipdi la minak lok, ‘Leeme Silok. Suang lumusaragu rinama!’

Ketla neni naba lok tinimi, ‘Axoklen nemi, la axoklen i do meva nemi.’

²⁶La miba vorang amlong i rin keretna, ‘Maga anan la maga inin eburu minu, la uga anasa nama ro at levenmenemen atnama!’

²⁷Ketla neni naba lok manga, ‘Axoklen nemi la axoklen i do meva nemi. Uto nemi basege ia, nemi laxampanga bilinga!’

²⁸Miba lok leregteng silok la miba rungur ivivilis ap mo laaleng miba ven ne Abaram, la ne Aisak, la ne Jakop la nedi lavaeme vapaase alii ro at Linintoo at ne Moroa, ketla nemi xa diba lu asu minimi. ²⁹Limixin dibat pas boro at lengkot axap at lavatbung menemen la dinat kis eburu mi ne Moroa at Linintoo ren. ³⁰I ruturun do nege nedi monga di lok ngan lempanga gamasa, diba ruuna laasen silok; la nedi monga di ruuna laasen silok, diba lok ngan lempanga gamasa.”

Iesu Ga Lox Asu Labalamu Ren Ti Limixin To Jerusalem

(Mt 23:37-39)

³¹Ap mo laaleng lentaba atnedi lubang Parisi diga vot pasa ne Iesu la diga lok tin, “Una vas su basege na lenep la unat pas uto at tengkot petpes, mila ne Erodes i lok do na sev amer u de.”

³²Iesu ga vorang i ridi xeretna, “Mina vot pasa nom lavatman atat la mina tong asu levelinga rak tin do, ‘Nenia anak tiki asu lubanggas basinge limixin la anak lox avukat limixin lingina la kantamak bok, la at laaleng sepsev avantun aba lox axap lugugu rak. ³³Ketla nenia move anat pas at langas lingina, kantamak, la uatno; kopmen nak mokso ri leeme vapaase alii kusu dina sev amer i ro at toxot petpes, ketla to Jerusalem mene nga.”

³⁴La ne Iesu ga bulu aleng la ga lok, “Limixin me Jerusalem. Lavalabat atnimi digap sev amet lavaame vapaase alii, la diga lulu vat nedi limixin papaase asu levelinga, ne Moroa ga riki nedi ude. Buaang levenaleng a lok do ana kok nemi mi lukngak, i ngan lavatpalak kaxak i kok laxannatnat kaxak teren, ketla mixo siam ka ia. ³⁵Monga Moroa i lox axap loklok tatao ren tinimi. A tong i rinimi do mi noxo ven bok ba ia, se at nom laaleng naba vot la miba lok keretna,

‘Moroa i lox anarong mo laradi i pas mi laasen at Leeme Silok.’

Sam 118:26

Iesu Ga Lox Aroo Laradi Ga Meres

14 ¹At lara laaleng kaala Iesu gat pas kusu na anan at leluxa ro at loogu at lara lamgomgo at lubang Parisi; la luvuttadi loklox ase at Lenavolo diga reven pilo ne Iesu; mo do neni na lox aroo taradi at laaleng kaala, diba lok li i at lavapaase. ²Lara laradi luxangkedek teren mi lukngen ga dang, ga vot pasa ne Iesu; ³la ne Iesu ga sue di eburu mi lubang Parisi xeretna, “Kereva, Lenavolo atdik i tong i do i epovo ri lox aroo limixin at laaleng kaala koplaxopmen?” ⁴Ketla di goxo vorang levelinga at ne Iesu. Iesu ga lok ka mo laradi ga meres, la ga lox aroo i, la ga riki aonon i.

⁵La ne Iesu ga lok tidi, “Mo do tara atnimi i ruuna tamdak koplaxavatbulumaxao la i subu tup uto at lamamara at laaleng kaala; kereva, ixo epovo xusu mina rep aurut ka i at laaleng kaala?” ⁶Ketla di goxo epovo xusu dina vorang levelinga ren.

⁷Iesu ga long lenger i do lentaba lavaose diga xis at lengkot nunuan; kuren la neni ga vaase poovo mu i na loklok tinedi axap. Iesu ga lok keretna, ⁸“Dola taradi na lam kaka u uto at loklox epot, nemen utat kis to at lengkot nunuan. Lavanga tara gove i silok tu digara lam kaka vam i, ⁹la laradi gomgo at leluxa naba vot la na lok tu, ‘Nemen utat kis at na loxot.’ La kerepmo uba mangan, la diba lok kaka u la una xis to at lisigege. ¹⁰Dola tara na xup ka u uto at leluxa, unat pas la una xis to at lisigege, kusu nom laradi at leluxa naba vot la na lok tu xeretna, ‘Ude vana u, lentangas tarak, uto u at loxot kitkis avukat.’ Anai ba lox u la dina lok ngangao ram to melamgo atnedi lavaose. ¹¹Lavasuun at na lavapaase poovo i lok keretna; do nege i lox asilox i, ne Moroa ba lox alixilix i, la do nege i lox alixilix i, ne Moroa ba lox asilox i.”

¹²La ne Iesu ga lok ti mo laradi ga lam kaka i uto ap mo leluxa, “Mo do una lok teluxa kanangking koplá ukantinao, nemen uta lam kaka larapen tangas taram, koplá luvutnetam koplá lentaba at libibinat taram, koplá nedi dipnovos di nemen saparav u, mila diba vorang amlong i ru, la at na langas mun uba xip kaka luunun taram ti mo lavanga uga lox i. ¹³Mo do una lok leluxa, una lam kaka limixin banbalo, limixin levenantuno di i kauk, limixin labantuxu atdi i molo, la limixin katli main; ¹⁴la ne Moroa naba lox anarong u, mila kopmen dina epovo xusu dina vorang lempanga ram. Ketla ne Moroa axa naba raba u mi luunun at laaleng limixin mokmokso diba xatu kaxat basinge lanmet.”

Lavapaase Poovo Ri Leluxa

(Mt 22:1-10)

¹⁵Lara laradi gat kis to at laanan ga rongá i na la ga lok ti ne Iesu, “Luvukat tinedi no dibat kis at leluxa silok to xeneng at Linintoo at ne Moroa.”

¹⁶Iesu ga tong lavapaase poovo rin, “Lara laradi ga lok leluxa silok, la ni ga xup kaka buaang limixin. ¹⁷Ap mo laaleng ti leluxa, neni ga riki lasaxaruki ren kusu na tong i ri limixin do, ‘Ude nimi, lempanga axap ira gagas pam!’

¹⁸Ketla nedi axap diga tong i rin do kopmen di noxot pas ti mo leluxa. Lara avot ga lok ti nom lasaxaruki, ‘A un ka loxongkangka, la anat pas kusu ana ven be i; una ke be ia.’

¹⁹Lara bok ga lok, ‘A un ka lasangaun lempat bulumaxao la anat pas na xusu ana lok tong pen di ri lok lugugu. A sing u xusu una ke be ia.’

²⁰Leta vetpes bok ga lok, ‘Ana vam nia epot, la at na mun lavasuun teren la nia noxot pas ti leluxa.’

²¹Lasaxaruki gamlong la ga tong axap na lempanga ti leeme gomgo ren. La leeme gomgo ap mo loogu ga musak teng tinotno la ga lok ti lasaxaruki ren, ‘Soso mene nga u, unat pas uto at larangas silok la uto at lengkonnga livilik bok, la una lok kaka limixin banbalo, limixin levenantuno atdi i kauk la lengkatli main, la luvuttadi labantuxu atdi i molo.’

²²La lasaxaruki ga lox i xuren la ga lok ti leeme gomgo xeretna, ‘Levelinga ram ara lox epovo vam i, ketla lengkonnin angavang nave ri teventaba.’

²³La leeme gomgo ga lok ti lasaxaruki, ‘Unat pas uto at larangas at na lenep silok la at levenngas to at laxairing la una lok kaka limixin ude xeneng, kusu loogu rak naba umsu. ²⁴A tong i rinimi axap do kopmen teta atdi nom limixin, nia aga xup kaka avot di ri leluxa, diba anan at leluxa rak.”

Loklok At Laradi Loklok Ka Anasa At Ne Iesu

(Mt 10:37-38)

²⁵Buaang nedi limixin diga emu eburu mi ne Iesu. La neni ga rem gili la ga lok tinedi. ²⁶Dola tara i vara i xusu na mumu asu ia la ni xopmen

na doma asilox ia at ne temen la nenen la latkin teren la laxamdak mi luvutneton la luvurinen, la lorooro axa ren, neni xopmen na epovo xusu neni laradi loklok ka anasa rak. ²⁷Do nege xopmen na mulus kusu nap kip levenmumuat silok aleng la na mumu asu ia, neni xopmen na epovo xusu neni laradi loklok ka anasa rak.

²⁸Mo do tara atnimi i doxoma i do na xip toogu, neni na xis la na lox asu be luunun, do i epovo ri lox axap mo loogu. ²⁹Mo do ixo lox asu avukat luunun at loogu, la neni xopmen na epovo ri lox axap mo loogu, neni ia vaxaru vam laraxem teren, limixin petpes diba ven i la dibak lok kalise i. ³⁰Diba lok, ‘Na laradi ga vaxaru kaxat na loogu, ketla neni xopmen na epovo ri lox axav i!’

³¹Mo do toorong silok i gagas mi legesa sangaun larabin sangsangaun kobot (10,000) limixin teren kusu diba esep mi lara loorong silok, neni i ruuna legepu sangaun larabin sangsangaun kobot (20,000), neni na xis be la na doma mu i do kereva neni i epovo lolos kusu na esep mi mo lara loorong silok koplaxopmen. ³²Mo do xopmen, neni naba riki taradi kusu na ekip tangarang mi nom loorong silok, dola neni move i nemen paxalom, kusu ba sing ti lok lumulum.” ³³La ne Iesu ga lok, “Lavasuun at nai lempapaase poovo keretna; dola tara xopmen na ke xepe axap lempanga ren, neni kopmen na epovo xusu neni laradi loklok ka anasa rak.

Loxong Kakures I Ru Katling Limixin Nuunu

(Mt 5:13; Mk 9:50)

³⁴La ne Iesu ga lok bok tidi, “Laxakures neni lavanga avukat, ket do lololos teren na xap, kopmen bok ba tangas kusu diba lox i la na so xakures manga. ³⁵Laxakures i lok kapmek pam, kopmen na epovo ri laxangka koplax na lox eburu i mi levente bulumaxao; limixin diba lok kaka mene i la dina lu xepe nga min.

Laradi do i ruuna lubaalung ting tonga na levelinga, i lox avukat kusu neni nang tonga i.”

Lisipsip Ga Soogong

(Mt 18:12-14)

15 ¹At lara laaleng buaang nedi luvuttadi loklok ka pilas mi luvuttadi xapmek diga vot kusu dinang tonga ne Iesu. ²La lubung Parisi eburu mi luvuttadi loklox ase at Lenavolo diga paase ngunungun mu ne Iesu. Diga lok, “Ana laradi ik lox avukat ti limixin kapmek la neni i anan eburu bok midi!”

³La ne Iesu ga vaase ridi mi lara lavapaase poovo xeretna. ⁴“Dola tara atnimi i ruuna legesa sangaun kobot (100) sipsip la legesara atdi na soogong, neni naba lok lavanga salai? Neni naba on basinge lavasik

sangaun mi lavasik laxasipsip to at laxampivilis atdi, la nat pas kusu na ven ti nom legesara no ga vas soogong, se rinotno neni ira long lenget ka i. ⁵La neni ba lok momo aleng la na lok li i at laxaka ren, ⁶la na xip kaka amlong i uto xolonu. Melemu neni ba xup bubua ka larapen tangas teren la nedi lentaba di nemen aurer i, la na lok tidi, 'Ata momo aleng mila ara vuse ka vam lisipsip tarak ga vas soogong.' ⁷Kuren mun, la a tong i rinimi, do langsgangan lomomo aleng kantubu atnedi di nemen to vana at laxalibet mila tegesa radi xapmek neni i leeng basinge laxakapmek teren; ketla ti lavasik sangaun mi lavasik, lomomo lixilik mun tinedi ro vana at laxalibet; mila nedi dirak mokso vam la dixok pakes ti leeng.

Lavapaase Poovo Ti Legesuxuven Pilas

⁸Dola tatkin na ruuna lasangaun denarias la na xip kepe teges uxuven atdi, lavanga salai neni naba lox i? Neni naba sox aros lababao, la na suxu loogu ren, la ba reven avukat at lengkot axap se neni na vuse ka i. ⁹Dola neni na vuse ka i, neni ba xup bubua ka larapen tangas teren la nedi di nemen aurer i, la na lok tidi, 'A momo aleng mila ara vuse ka vam legesuxuven denarias tarak, no aga xip kepe i. Ata lok leluxa silok!' ¹⁰A tong i rinimi do, kerepmo lubang angelo at ne Moroa diba momo aleng do tegesaradi xapmek neni i leeng basinge laxakapmek teren."

Lavapaase Poovo Ri Lamdak Aau Ga On Basinge Ne Temen

¹¹La ne Iesu ga lok bok tidi xeretna, "Lara laradi ga ruuna legepu madak. ¹²Lara mumu ga lok ti ne temen, 'Tamak, una raba nga ia mi lenep tarak keneng at laplus taram.' Kuren la temen nom lamdak ga epes nom lempanga kantubu at lumdak teren.

¹³Melemu at lentaba levenaleng lamdak aau ga xip kaka lempanga ren la ga vas kaxat uto vaxalom at lara lenep petpes, la mo go neni ga gosogos gamasa mun mi nom lapnovos teren ti laxaloklok kapmek. ¹⁴Neni ga soxepe axap nom lempanga neni ga ruuna i. La langsgangan loroxo ga vot ap mo lenep silok axap, la neni ga nemen gamasa nga la goxopmen ta tempanga neni ga ruuna i. ¹⁵Kuren la neni gat pas kusu na gugu at lara laradi ap mo lenep silok, la mo laradi ga riki i uto at lang kolonu bo ren kusu na lok tatao lababo. ¹⁶Ni ga vara aleng i do neni naba anan levenbasa at lababo diga anan i. La kopmen teta goxom taba i mi teveluxa kusu rin ti anan.

¹⁷At lara laaleng neni ga ven kibis lorooro salai neni ga ruuna i, la ga lok, 'Limixin gugu at ne tamak di ruuna laxampanga anan solo xusu ridi ri anan, la nenia na a lok do ana sala nga! ¹⁸Ana vas kaxat la anamlong uto at ne tamak la ana lok, 'Tamak, agara lok pam laxakapmek ti ne Moroa la tu bok. ¹⁹Ixo epovo bok ba xusu una tong ia do lamdak taram; una lox ia ngan lasaxaruki ram.' ²⁰Kuren la ga vas kaxat uto at ne temen.

Neni move gat pas to vaxalom la ne temen ga ven kibis ka i; la lebelen ga umsu mi labalamu la ni ga sixit, la ga ot kongkodon ka lamdak teren, la ga nes i.

²¹La lamdak ga lok, ‘Tamak, agara lok pam laxakapmek ti ne Moroa la tu bok. Ixo epovo bok ba xusu una tong ia do lamdak taram.’

²²Ketla ne temen ga ro ka lavasaxaruki ren la ga lok, ‘Soso mun! Mina lok kaka lisingsiga nunuan tarak, la mina vaxasiga i min. Mina lok li lurung molot at lekngen la luvanga vatpas to at luxangkedek teren. ²³La minat pas la mina lok ka lubulumaxao maxat, la mina sev amer i, la ata lok laanan la ata momo! ²⁴Mila ana lamdak tarak ga met, ketla ira roo xat amlong pam; ga vuktanga, ketla ana nga ara lok ka amlong pam i.’ La diga ru ka leluxa.

²⁵Lamdak avot, ga nemen to at laraamang ga xanangking tubu. At lomlong teren boro xataamang, neni ga ronga lagamit gang teng at loxonaleng neni ga vas auret loogu. ²⁶La ni ga ro ka lara lasaxaruki la ga sue i, ‘Lavanga salai mo?’ ²⁷La lasaxaruki ga lok tin, ‘Netam iramlong pam ukolonu, la ne tamam i sep ka lubulumaxao maxat, mila neni ira lok ka amlong pam lamdak teren mi lороoro avukat at labantuxu ren.

²⁸Lamdak avot ga musak la ni goxo vara i xusu na beles uto xeneng at loogu; kuren la ne temen ga vas su ukamang la ga sing lolos i xusu na beles ukeneng. ²⁹La lamdak ga lok ti ne temen, ‘At na laxanmaares aga gugu ngan lasaxaruki ram la a goxong tonga xepe levelinga ram. La lavanga salai ugara raba vam ia min? Kopmen tinotno tanatme nenu gita raba ia min kusu ria ri lok leluxa eburu mi larapen tangas tarak! ³⁰Ketla ana lamdak taram ga gosogos gamasa mi lapnovos taram at loklok ting longka lavakin, la se neni imlong ukolonu nenu ura sep ka ba lubulumaxao maxat tin!’

³¹Temen ga vorang amlong i rin keretna, ‘Nuruk, amisik nenu u nemen eburu minia la lempanga axap nia a ruuna i ataram. ³²Ketla ata lok leluxa la ata momo, mila netam ga met, ketla ira roo xat amlong pam; neni ga vuktanga, ketla ara vuse ka amlong pam i.’

Lavapaase Poovo Ri Laradi Loklok Tatao Gugu

16 ¹La ne Iesu ga lok ti luvuttadi loklok ka anasa ren keretna, ‘Lara laradi gap novos aleng, ga ruuna laradi ri lok tatao leven gugu ren; la lentaba luvuttadi diga tong i rin do mo laradi gugu ga gosogos gamasa mi lempilas teren. ²Ni ga ro ka i ukeneng la ga lok tin, ‘Lavanga salai na a ronga limixin di paase mumu u min? Una malagan asu axap luunun at lempanga rak nenu ugak lok tatao i, mila xopmen una epovo xusu nenu laradi gugu rak.’

³Melemu laradi gugu ga lok, ‘Ana ba lok lavanga salai? Leeme gomgo rak mo i lok do na lok pes ia at na lugugu. La nia axo epovo lolos kusu ri

ke povorok laxangka, la a mamangan bok kusu ri ngising panga. ⁴Ana aklen lavanga salai nia aba lox i! La do ana xap at na lugugu, aba etangas minedi limixin kusu dibap kup kaka ia uto at laraugu atdi.'

⁵Kuren la ni ga xup kaka nedi limixin diga sing ka lempanga at leeme gomgo ren. La ni ga lok ti laradi avot, 'Lavanisa lempanga nenu una vorang i at leeme gomgo rak?'

⁶La mo laradi avot ga lok, 'Lavanuan sangaun kobot (800) buxom at la olip.'

La laradi gugu ga lok tin, 'Lok kaka na lovoang ti vaase axasev u mi lempanga nenu una vorang i la una xis kopok la una malagan asu lavanuet sangaun kobot (400).'

⁷La ni ga lok ti mo lara laradi mumu, 'La nenu, lavanisa nenu una vorang i?'

La laradi mumu ga lok, 'Leges abin sangaun kobot (1000) laxan lutlut piao.'

La laradi gugu ga lok tin, 'Lok kaka i na lovoang papaase axasep la una malagan lavanuan sangaun kobot (800).'

⁸La leeme gomgo at nom laradi babala ga long lenget lodoxoma at laradi gugu la ga lok tin keretna, 'Lakleklen taram i silok aleng.'

La ne Iesu ga lok keretna, "I ruturun aleng. Limixin at na lavatbung menemen dikleklen aleng ti lok leven gugu kantubu atdi. Ketla limixin at ne Moroa kopmen dina gugu avukat mi lugugu at ne Moroa." ⁹La ne Iesu ga lok bok tidi xeretna, "A tong i rinimi do mina lok kaka lempilas la minam taba limixin min kusu diba etangas avukat minimi; mila do lempilas na xap asonao, Moroa ba lam kaka nimi uto at loogu ren i nemen amisik.

¹⁰Do nege i ruturun at lempanga lixilik, neni naba ruturun bok at lempanga silok; la do nege i xaxarang at lempanga lixilik, neni naba xaxarang bok at lempanga silok. ¹¹Mo do kopmen mi goxo ruturun tik lok tatao lempanga at na lavatbung menemen, kopmen tara naba raba nimi mi nom lapnovos tuturun at ne Moroa. ¹²La mo do mi goxo ruturun at lempanga at lara vetpes, Moroa noxo raba nimi mi lempanga atnimi, ik lok no vana at laxalibet.

¹³Lasaxaruki kopmen na epovo xusu na gugu ri tegepu radi silok; neni naba belemamao lara la na balamu mo lara; neni naba ruturun ti lara la na sok tixirixes kepe tara. La kerepmo kopmen mina epovo xusu mina lotu ruturun saparap ne Moroa la mina doxoma mumu amisik lapnovos at na lavatkangka."

¹⁴Lubung Parisi diga rongga i na; la diga lok kalise ne Iesu, mila diga vavara aleng lempilas. ¹⁵La ne Iesu ga lok tidi, "Nemi vam nom mik lok do minak mokso at lemeren limixin, ketla ne Moroa ikleklen i do keneng at lebelen nimi i umsu mi laxakapmek. Do lavanga salai limixin

di doxoma i do i silok aleng, nom i ngan lavanga gamasa at lemeren ne Moroa.

¹⁶Lenavolo at ne Moses la levenmamalagan at lavaeme vapaase alii ga nemen se at levenaleng at ne Jon laradi sep susu. Ga ru ka i go Lagale Lavavang mumu Linintoo at ne Moroa ga lok kun i min, la buaang nedi limixin getgesara di lolos do ukeneng di. ¹⁷Kopmen na lolos do laxalibet mi na lavatkangka naba xap, ketla i lolos aleng ti tamangkot lixilik keneng at levelinga at Lenavolo xusu naba sonao.

¹⁸Do taradi na soxepe latkin teren, la na epot ka tatkin petpes, neni ira longka vam; la do taradi i epot at tatkin, latlok teren ga soxepe i, neni bok ira longka vam.”

Lasaro La Laradi Gap Novos

¹⁹La ne Iesu ga lok bok, “Laradi gapnovos gang siga levesingsiga ga lok nunuan aleng, la at levenaleng axap gantuuna laxampanga solo. ²⁰Lara laradi banbalo bok ga nemen, laasen teren ne Lasaro, labantuxu ren ga umsu mi laxanabi, la amisik digak lok kaka i uto at lumusmaragu at loogu at nom laradi nopnovos.

²¹Neni ga doxoma i do naba anan lengkonmumus luxa mo gam subu su boro at loxonin anan at nom laradi nopnovos. Lubungman bok digam dem laxanabi ren.

²²At lara laaleng laradi banbalo ga met la lubung angelo diga xip kaka i uto saparap ne Abaram, to vana at laxalibet; la nom laradi nopnovos bok ga met la digak mir i. ²³Neni ga suma aleng langsgangan losongsongot to Edesa, la ni ga milik aurut la ga ven ne Abaram gak lok paxalom tinotno, eburu mi ne Lasaro go saparav i. ²⁴La neni ga xup lolos keretna, ‘Tamak ne Abaram, una balamu ia, la una riki ne Lasaro xusu na song arup lisivisip teren uto at taxadan, la na lox amumudut lagam tarak min; nia na a nemen at langsgangan losongsongot keneng at na laxao!’

²⁵Ketla ne Abaram ga lok, ‘Nuruk, una doxoma i na. At lorooro ram uga ruuna laxampanga solo, la ne Lasaro ga lok kaka lempanga xapmek; ketla na nga neni mo i momo aleng nade, la nenu nga mo ura nemen keneng at langsgangan losongsongot. ²⁶La lavanga bok na, langsgangan lavagam i si aleng ik midi kantubu atda, kusu do nege na vas kaxat mede la udom, kopmen noxo epovo; la tara medom ixo epovo xusu na volo ude.’

²⁷Laradi nopnovos ga lok, ‘I lox avukat mene nga; a sing u do una riki ne Lasaro uto at loogu at ne tamak, ²⁸kusu neni nabat pas la na vaase aronga bok lavalimo luvutnetak la di noxot pas bok ti na lemenemen songsongot.’

²⁹Abaram ga lok tin keretna, ‘Luvutnetam di ruuna levelinga keneng at Lenavolo at ne Moses eburu mi levelinga at lavaeme vapaase alii xusu ri vaase aronga di; i epovo do luvutnetam dina rongga mo levelinga.’

³⁰Laradi nopnovos ga lok, ‘Tamak ne Abaram; kopmen na epovo! Ket do tara na xatu kaxat amlong basinge lanmet la nat pas uto saparap di, agut diba leeng ba basinge laxakapmek atdi.’

³¹Ketla ne Abaram ga lok, ‘Mo do di noxo rongga Lenavolo at ne Moses mi levelinga at lavaeme vapaase alii, di noxo leeng basinge laxakapmek atdi. La do tara na xatu kaxat amlong basinge lanmet la na vaase ridi, move di noxo leeng.’

Laxakapmek

(Mt 18:6-7, 21-22; Mk 9:42)

17 ¹Iesu ga lok ti luvuttadi loklok ka anasa ren keretna, “Leveloklok tong pen mo naba vot ti lox asubu limixin ti laxakapmek; ketla naba lok kapmek tinotno ri tara do na lox i na leveloklok. ²I epovo do diba sevut li tangsangan tavatkinem to at laxaka ren la diba dong asi i uto xopok at laras; lavanga na lok tara at laxamdak kakalik dina beles at laxakapmek la na suma lebelemamao at ne Moroa. ³At nai mina lok tatao avukat nemi!

Mo do netam na lok laxakapmek, una vaase sox i, la mo do neni na leeng, una domampe mo laxakapmek teren. ⁴La mo do neni na lok tavanuti teveng kakapmek keneng at leges aleng tu, la na vosiga amisix u la na lok, ‘A leeng basinge laxakapmek tarak’, una domampe laxakapmek teren.”

Lunuunu I Xakalik Ngan Liit Mastet

⁵Luvuttadi vavang diga lok ti Leeme Silok keretna, “Una lox asilok lunuunu atnama.”

⁶La Leeme Silok ga vorang i ridi xeretna, “Mo do mina ruuna lunuunu i xakalik ngan liit at lamastet, mi epovo xusu mina tong i ri na luuna do, ‘Una remsup eburu mi levenixe ram la una tu tou at laras!’ La ni ba rongga res atnimi.”

Lugugu At Lasaxaruki

⁷La ne Iesu ga lok bok tidi xeretna, “Mo dola tara atnimi i ruuna lasaxaruki i gugu to xataamang koplak ik lok tatao laxasipsip la do neni namlong boro xataamang, kereva uba tong i rin do, ‘Soso ude la una anan?’ ⁸Kopmen tinotno! Ketla uba tong i rin do, ‘Una lox agagas li leveluxa rak, la una siga loxontamon avukat taram la una ngangais ia ana anan la ana inin. Melemu ba una anan la una inin. ⁹Kereva, nom laradi ba tong loklox avukat bok ti lasaxaruki mila neni ga lox epovo lai laradi gomgo ga tong i rin? Kopmen tinotno. ¹⁰Nemi bok kuren; mo do mira lok pam lempanga nenia a tong i rinimi, i epovo do mina lok, ‘Nema lavasaxaruki gamasa mene; ma lok pam leven gugu atnama.”

Iesu Ga Lox Aroo Lasangaun Luvuttadi Mekmeres

¹¹At lavatpas teren to Jerusalem, Iesu gat pas at lapdopdo xantubu at lunep Samaria la Galili. ¹²Neni gat pas uto at lara lemenemen la neni ga

ekip tangarang mi lasangaun luvuttadi, lanmeres gu ga nemen atdi. Diga ru ro vaxalom, ¹³la diga xup keretna, “Iesu, Leeme Silok! Una balamu nama!”

¹⁴Iesu ga ven di la ga lok tidi, “Minat pas la mina lox ase labantuxu atnimi ro at lavamaasa.”

Diga vas kaxat la to at langas nedi axap diga lox avukat.

¹⁵Se lara atdi ga ven i do ga lox avukat, gamlong, la gap kup silok mi leemi asu mi ne Moroa. ¹⁶Neni ga xis tiktikbu mi luvatgulom teren saparap luxangkedek at ne Iesu, la ga tong aorong tin. Mo laradi neni boro Samaria.

¹⁷La ne Iesu ga sue i xeretna, “Lasangaun nedi luvuttadi diga lox avukat, lavasik bok ua? ¹⁸Tila ba la na laradi boro Samaria, neni xusuk mun legesara imlong kusu na tong loklox avukat ti ne Moroa?” ¹⁹La ne Iesu ga lok bok tin, “Katu kaxat la una onon; lunuunu ram ira lox avukat pam u.”

Lovotpot At Linintoo

(Mt 24:23-28, 37-41)

²⁰At lara laaleng lentaba lubang Parisi diga sue ne Iesu do at laaleng salai Linintoo at ne Moroa naba vot. La ne Iesu ga vorang i ridi xeretna, “Linintoo at ne Moroa kopmen na vot mi toloklok katling kusu miba ven i, ²¹kopla tara noxo lok tinimi do, ‘Mina ven ba i, ana nga i!’ kopla na tong i do, ‘Ano nga i!’ mila Linintoo at ne Moroa i nemen keneng at lebelen limixin.”

²²La ne Iesu ga lok ti luvuttadi loklok ka anasa ren keretna, “Laaleng naba vot la miba vara i do mina ven manga ia, Laradi Mevana; ketla mi noxo ven ia. ²³La lentaba diba lok tinimi, ‘Mina ven ba i no!’ Kopla, ‘Mina ven i nade!’ Ketla nemen mita vas su xusu mina ven tia, ²⁴mila lovotpot tarak naba lok petpes; lavanga na mam la na so gamgames to vana at lamavangkap la na so xat boro at tenep la uto at tara tenep; la maba lok mun kuren ti Laradi Mevana ap mo laaleng teren. ²⁵Ketla avot be nenia anaba xip losongsongot aleng la limixin at nai levenaleng diba sok tixirixes aleng ia.

²⁶Loklok at limixin ba lok ngan gano at levenaleng at ne Noa, la naba lok bok kuren at laaleng at lovotpot tarak. ²⁷Limixin axap diga anan la diga inin, la lavatlok la lavakin diga epot, se at nom laaleng ne Noa ga beles ti lavattaaxup la laran ga vot la ga sev amet nedi axap.

²⁸Ga lok ngan bok levenaleng at ne Lot. Limixin axap diga anan la diga inin, diga unun panga la diga sesep bok mi lempanga, digatlotlo taamang la digak paxaru laraugu. ²⁹At nom laaleng ne Lot ga on basinge lemenemen Sodom, laxao silok ga vot boro vana at laxalibet la ga sev amet nedi axap.

³⁰Naba lok mun kuren at nom laaleng, nenia, Laradi Mevana, ana ru asuvos. ³¹Ap mo laaleng laradi do na nemen to mavana at langkut at loogu ren, neni noxo vubeles bok ba ro at loogu ren kusu na lok kaka lempanga ren mo i nemen go; kuren mun do laradi nak lok to xataamang, neni noxomlong uto at loogu ren. ³²Mina doxoma latkin at ne Lot! ³³Do nege i lok do na ranga alis lorooro ren, neni naba sang apkav i; la do nege na soxepe lorooro ren, neni naba ranga alis i. ³⁴A tong i rinimi do, ap mo laxanimin tegepura dubak midi at teges ora; lubung angelo diba lok ka tara, la tegesara naba nemen alu. ³⁵Tegeputkin duba sep povovorok levempeven piao; lubung angelo diba lok ka lara la tara naba nemen alu. ³⁶[Tegepu radi duba gugu to xataamang; lubung angelo diba lok ka legesara, la tara naba nemen alu.]

³⁷La luvuttadi loklok ka anasa diga sue i, “Leeme Silok, na lempanga ba ravasu ua?”

La ne Iesu ga vorang i ridi xeretna, “Ap mo loxot lempatmaalom diba vot buru e, kusu dina anan labantuxu at laradi ga met.”

Lavapaase Poovo Ri Latkin Naa La Laradi Rongtonga Linga

18 ¹Melemu ne Iesu ga tong na lavapaase poovo ridi kusu ri lox ase di do diba ngising amisik la nemen gat di guta molo. ²Ni ga lok keretna, “Lara laradi rongtonga linga ga nemen to at lara lemenemen la ni xopmen goxo lok ngangao at ne Moroa la kopmen goxo lok ngangao at limixin. ³La lara labannaa rixin bok mo ga nemen ap mo lemenemen, la amisik neni gat pot pasa mo laradi rongtonga linga la ga ngising i xusu neni na lok tooro i, ga lok tin keretna, ‘Una lok tooro ia ri ronga linga rak mi laradi i munepen minia.’

⁴Ga lox abao la laradi rongtonga linga goxo mulus, ketla melemu neni ga lok, ‘I ruturun tinotno, nenia axo lok ngangao at ne Moroa la axo lok ngangao bok at limixin. ⁵Ketla na latkin ik lox angtang amisix ia; kuren la nenia aba ronga linga ren. Lavanga neni nat pot pasa amisix ia la na lox amolo ia!’

⁶La Leeme Silok ga lok, “Mina doxoma levelinga, nom laradi rongtonga linga xapmek ga tong i. ⁷La kereva, ne Moroa? Neni naba ronga linga at limixin axa ren, mo di ngising amisik tin kusu ri loklok tooro at lengkangking la at lengkanimin. La neni noxo lok sila bok kusu ri lok tooro di. ⁸A tong i rinimi do, neni naba ronga linga atdi la soso mun na lox epovo i. Ket do Laradi Mevana nabamlong ude at lavatbung menemen, kereva, nenia anaba long lenget ka limixin di nuunu?”

Lavapaase Poovo Ti La Parisi La Laradi Loklok Ka Pilas

⁹La ne Iesu ga tong bok na lavapaase ri limixin mo digak lok do nedi mo dik mokso aleng la digak lox abulubun kepe limixin petpes. ¹⁰Ni ga

lok keretna, “Legepu radi dugat pas uto vana at loogu laplavang kusu duna sing; lara neni la Parisi, la lara neni laradi loklok ka pilas. ¹¹La mo la Parisi ga ru kaxat upana la ga sing mi lodoxoma keretna, ‘Moroa, nenia a emi asu minu, mila nia xopmen anak morong, la ana xaxarang, la anang longka tixin, kerekngan limixin petpes; a tong avukat tu mila nia xopmen ana lok ngan na laradi loklok ka pilas. ¹²A mun anan at legepu aleng at legesevik, la am taba u mi loxot at lempanga rak’.

¹³Ketla laradi loklok ka pilas ga ru paxalom lixilik la neni xopmen goxo lox aurut lemeren uto vana at laxalibet, ketla neni ga sogotu at lobongobong teren la ga lok, ‘Moroa, una balamu ia, laradi xapmek.”

¹⁴La ne Iesu ga lok, “A tong i rinimi do, ana laradi, kopmen mo la Parisi, gak mokso at lemeren ne Moroa se neni gamlong ukolonu. Do nege i lox asilox i, Moroa naba lok alixilix i la do nege i lox alixilix i, Moroa naba lok asilox i.”

Iesu Ga Lox Anarong Laxamdak Mi Laxaalik Lixilik

(Mt 19:13-15; Mk 10:13-16)

¹⁵Lentaba limixin diga lok kaka laxamdak mi laxaalik kakalik atdi uto saparap ne Iesu xusu neni naba lox anarong di. Ketla luvuttadi loklok ka anasaren diga ven di la diga sep pepe di. ¹⁶Ketla ne Iesu ga ro bubua ka laxamdak mi laxaalik kakalik saparav i, la ga lok, “Mina ke laxamdak mi laxaalik kakalik dibat pas saparav ia; la nemen mita sep pepe di, mila Linintoo at ne Moroa i epovo ridi na. ¹⁷Nia a tong tuturun i rinimi! Do nege xopmen na siam kaka Linintoo at ne Moroa kerekngan lamdak kakalik, neni noxo beles teren.”

Laradi Gap Novos

(Mt 19:16-30; Mk 10:17-31)

¹⁸Lara lamgomgo at leme Judaia ga sue ne Iesu, “Laradi loklox ase avukat, anaba lok lavanga salai xusu anaba lok kaka lorooro avolo?”

¹⁹La ne Iesu ga sue i, “Tila u tong ia do a lox avukat? Kopmen tara na lox avukat ketla ne Moroa xusuk. ²⁰Uklen Lenavolo i lok keretna;

‘Nemen utang longka tixin, nemen uta sev amet tara, nemen uta xip pilo, nemen uta xarang taba tara, la una lok ngangao at ne tamam mi nenam.”

Pas 20:12-16

²¹Laradi ga vorang i rin keretna, “Ga ru ka i, laau ia, aga mumu asu vam na levelinga.”

²²Se ne Iesu ga rongga i na, neni ga lok tin, “Uk pakes bok kusu una lok legesa vanga. Una sesep mi lempanga axap taram la una raba lempilas ti luvuttadi banbalo, la unaba ruuna ka lapnovos to vana at laxalibet; la ude u la una mumu asu ia.”

²³Ketla na laradi ga rongga i na, neni ga lok bukbulu aleng, mila neni gap novos aleng. ²⁴Iesu ga ven tu ren la mo laradi ga bulu aleng la ni

ga lok, “Naba lolos aleng ti luvuttadi dip novos aleng kusu dina beles at Linintoo at ne Moroa! ²⁵I lolos aleng ti lakamel kusu na beles at lamamara at linil, la kerepmo i lolos aleng bok ti laradi nopnovos kusu ri beles at Linintoo at ne Moroa.”

²⁶Mo limixin diga ronga i na, diga sue, “Nege ba naba lok kaka lorooro i nemen amisik?”

²⁷La ne Iesu ga vorang di xeretna, “I lolos aleng do laradi nopnovos na vubeles at Linintoo at ne Moroa, ketla kopmen na lolos do ne Moroa na lox arooro i.”

²⁸La ne Pita ga lok, “Kereva ba nama, maga on basinge vam lempanga axap atnama kusu manaba mumu asu u.”

²⁹La ne Iesu ga lok, “Nia a tong tuturun i rinimi, mo do tara na on basinge loogu ren koplalakin teren, koplalakin neton, koplalakin temen mi nenen koplalakin laxamdak teren kusu ring tong asu levelinga at Linintoo at ne Moroa, ³⁰neni naba ruuna aleng laxampanga solo at na lorooro kopok, la at lorooro melemu ni naba rooro amisik.”

Iesu Ga Vaase Sepsev Avantun Mumu Lanmet Teren

(Mt 20:17-19; Mk 10:32-34)

³¹Iesu ga lam kaka lasangaun mi lelepura luvuttadi loklok ka anasa ren to vetpes basinge limixin la ga lok tidi, “Mina ronga i na! Atat pas uto Jerusalem la lempanga axap lavaeme vapaase alii diga malagan i mumu Laradi Mevana naba vot tuturun. ³²Limixin kapmek diba song araba i ri limixin kopmen di me Judaia la dibak lok kalise i, la dina paase kapmek tin, la diba vubis sanga i. ³³Dibak pixis i la diba sev amer i, ketla at laaleng sepsev avantun, neni naba roo xat amlong bok.”

³⁴Luvuttadi loklok ka anasa ren di goxo xasep at na levelinga; lempasuun at na levelinga ga lipe aleng tidi, la di goxo xasep teren.

Iesu Ga Lox Aroo Laradi Laxatli Ren Ga Main

(Mt 20:29-34; Mk 10:46-52)

³⁵Iesu gat pas auret lemenemen Jeriko la lara laradi laxatli ren ga main, gat kis go at lisigege ngas, ga ngising panga. ³⁶Se neni ga ronga limixin digat pas polo la neni ga sue di, “Lavanga salai mo?” ³⁷La diga lok tin, “Iesu boro Nasaret na it pas polo.”

³⁸La ni ga xup lolos keretna, “Iesu! Livisik li at ne Devit! Una balamu ia!”

³⁹Mo limixin digam gomgo, diga musax i la diga lok tin kusu nak lok pilo. Ketla neni gap kup lolos tinotno, “Livisik li at ne Devit! Una balamu ia!”

⁴⁰La ne Iesu ga ru la ga tong i ridi do dina lam kaka i saparav i. Se neni ga vas auret, Iesu ga sue i, ⁴¹“Lavanga salai u vara i do ana lox i ru?”

La ni ga lok, “Leeme Silok, a vara i do luxatli rak na xasep.”

⁴²La ne Iesu ga lok tin, “Luxatli ram na xasep. Lunuunu ram ira lox avukat pam u.” ⁴³La soso mun neni ga lox epovo i kusu na reven, la ni ga mumu asu ne Iesu, la ga emi asu mi ne Moroa. Se limixin diga ven i na, nedi axap diga emi asu mi ne Moroa.

Iesu La Ne Sakias

19 ¹La ne Iesu ga vas polo xeneng at lemenemen Jeriko. ²La lara laradi gomgo at limixin loklok kaka pilas mo ga nemen, laasen teren ne Sakias, neni laradi nopnovos. ³Neni gak lok tong pen i kusu ni na ven ne Iesu, do neni nege; ketla neni laradi mutmut mun la ni goxo epovo kusu na ven ne Iesu mila buaang nedi limixin diga ru pe i. ⁴Kuren la neni ga sixit migo ri limixin la ga eng urut at lara luuna pik kusu ri ven ne Iesu, do naba vas polo ap mo langas.

⁵Se ne Iesu ga vas pot ap mo loxot, neni ga milik aurut upana la ga lok ti ne Sakias, “Soso ukopok Sakias, mila lingina aba xis eburu minu to xeneng at loogu ram.” ⁶Sakias ga eng si soso la ga siam ka ne Iesu mi lomomo uto at loogu ren.

⁷Mo limixin diga ven i na, diga epaase ngunungun keretna, “Leeme Silok it pas ngan loose uto at loogu at laradi xapmek!”

⁸Sakias ga ru ro melango at limixin la ga lok ti ne Iesu, “Leeme Silok. Aba raba loxot atat at lempanga rak ti limixin banbalo; la do nenia agara xip pilo vam tavanga, aba un amlong i rin na vanuet.”

⁹Iesu ga lok ti limixin axap, “Lingina Moroa ira lok arooro vam limixin at na loogu; nia a lok tooro na laradi mila neni livisik li at ne Abaram.

¹⁰La kerepmo, nenia, Laradi Mevana, aga vot kusu ana puse rinedi diga soogong la ana lox arooro di.”

Lavapaase Poovo Ri Lempilas

(Mt 25:14-30)

¹¹Limixin diga ronga vam na levelinga, la ne Iesu ga tong bok lara lavapaase poovo ridi, mila neni mo gat pas auret ta lemenemen Jerusalem, la nedi diga nua i do, Linintoo at ne Moroa mo naba vot asuvos ap mo loxonaleng. ¹²Neni ga lok, “Lara leeme silok gat pas uto vaxalom at lara lenep silok kusu diba lox i ngan loorong silok la melemu neni nabamlong ukolonu. ¹³Avot at lavatpas kaxat teren neni ga xup kaka lasangaun lavasaxaruki ren la ga raba nedi getgesara mi legetges uxuven minas, la ga lok tidi, ‘Mina gugu mi na lempilas, se nenia anabamlong.’

¹⁴Ketla limixin teren ap mo lenep silok di goxopara rin, kuren la diga riki luvuttadi mi levelinga kusu dina mumu ren la diba lok, ‘Ma xopara na laradi kusu na lok ngan loorong silok atnama.’

¹⁵Ketla neni ga ruuna ka i nom lololos at loorong silok, la gamlong. La ni ga xup kaka lavasaxaruki ren, no neni ga raba vam di mi lempilas.

La nedi diga ru ro melamgo ren, la neni ga sue di do lavanisa levempilas diga lok kaka i.

¹⁶Lara avot ga vosiga i la ga lok, ‘Laradi silok, aga gugu mi mo lempilas uga raba ia min, la ara ruuna ka vam lasangaun minas.’

¹⁷Neni ga lok, ‘I lox avukat aleng; nenu lagale lasaxaruki. Nenu uga gugu avukat mi lempanga lixilik, kuren la ana lok li u, kusu unak lok tatao lasangaun levenmenemen silok.’

¹⁸Lasaxaruki sepsev agepura ga vas beles ukeneng la ga lok, ‘Laradi silok, aga gugu mi mo lempilas uga raba ia min; la ara ruuna ka vam lavalimo minas.’

¹⁹Neni ga lok ti na laradi, ‘Nenu unaba lok tatao lavalimo levenmenemen silok.’

²⁰La lara lasaxaruki ga vosiga i la ga lok, ‘Laradi silok, lempilas taram na; aga bom alipe i to xeneng at loxontamon. ²¹Aga marat taram, mila nenu laradi lolos. Uk lok kaka lempanga kopmen ataram, la u kaxat ka lempanga anan, nenu xopmen u goxotlotlo i.’

²²La ni ga lok tin, ‘Nenu lasaxaruki xapmek! Aba lok li u at lavapaase mumu levelinga axa ram. Uklen i do nia laradi lolos, ak lok kaka lempanga kopmen atarak la a kaxat ka lempanga anan kopmen nia agatlotlo i. ²³Tila ba nenu u goxo lok li lempilas tarak to at loogu loklok li pilas? La i se mo nia aramlong nia giba lok kaka amlong ta i mi lentaba bok mavana ren.’

²⁴La neni ga lok tidi mo diga tu go, ‘Mina lok kaka amlong mo legesu xuven minas basinge i la mina raba i ti lasaxaruki i ruuna lasangaun minas.’

²⁵Ketla diga lok tin, ‘Laradi Silok! Neni i ruuna vam lasangaun minas!’

²⁶La laradi silok ga lok, ‘A tong i rinimi do nedi di ruuna lempanga la di lok lugugu at ne Moroa min, aba raba bok di mi lentaba; ket do lara na ruuna lempanga lixilik, la kopmen na lok lugugu min, nia aba lok kaka amlong i ren. ²⁷Ketla tinedi na limixin di munepen minia, la di goxopara i xusu nenia loorong silok atdi, mina lam kaka di ude la mina sev amet di de melamgo rak!’”

Iesu Ga Beles To Jerusalem Ngan Loorong Silok

(Mt 21:1-11; Mk 11:1-11; Jo 12:12-19)

²⁸Iesu ga vaase axap na levelinga la neni ga vas migo ridi uto Jerusalem. ²⁹Se neni ga vas auret lumenemen Betpage la Beteni dugak lok at Lakaana Olip, neni ga riki amgo luradi loklok ka anasa ren. ³⁰Avot be ni ga lok tidu xeretna, “Munat pas uto at nom lemenemen ik lok to melamgo atnumu; la do muna vas beles ukeneng, muba long lenget ka lodongki diga xoxo li i la goxovisi dina xis teren. Muna soxomus ka i la muna lok kaka i ude. ³¹Mo do tara na sue numu do, ‘Tila nemu mu soxomus ka i nom lodongki?’ Muba lok tin do Leeme Silok i vara rin.”

³²Dugat pas at langas la duga long lenget ka lempanga axap kerekngan ne Iesu ga tong pam i ridu. ³³Se duga soxomus kaka i nom lodongki, luvuttadi loklok tatao at lodongki diga lok tidu, “Tila nemu mu soxomus ka i nom lodongki?”

³⁴Duga lok tidi, “Leeme Silok i vara rin.”

³⁵La duga lok kaka lodongki uto saparap ne Iesu. La duga lok kaka levesingsiga atdu la duga lok li i mavana at lodongki la duga rebeng ama urut ne Iesu uto vana at lodongki. ³⁶Se neni ga xis at nom lodongki la gat pas, limixin diga sa li levesingsiga atdi ro at langas.

³⁷Se neni ga vas auret Jerusalem, at loxot langas ga si ukopok at Lakaana Olip, buaang nedi limixin teren diga mumu asu i, diga xup kaxat la diga tong avukat ti ne Moroa la diga emi asu min mi luxupkup silok mumu lempanga sangsangu nedi diga ven pam i.

³⁸Digap kup keretna,

“Moroa na lox anarong loorong silok mo i vot ngan Lanarong at ne Moroa! Lumulum na nemen to vana at laxalibet, la ata emi asu mi ne Moroa!”

Sam 118:26

³⁹Lentaba lubang Parisi diga vaase kaxat to xantubu at limixin at ne Iesu. Diga lok, “Laradi loklox ase, tong i ri limixin atnimi kusu dina lok pilo!”

⁴⁰Iesu ga vorang i ridi xeretna, “A tong tuturun i rinimi; mo do dina lok pilo, laxanuat dibap kup mi leemi asu saparap ne Moroa.”

Iesu Gang Teng Mumu Limixin To At Lemenemen Jerusalem

⁴¹Ni ga vas auret lemenemen silok Jerusalem la se neni ga ven i, neni gang teng mumu limixin teren, ⁴²la ga lok keretna, “Lingina nemi limixin kopmen minaklen lavanga salai xusu naba lok lumulum. Ketla mo nga i nemen alipe vam. ⁴³Levenaleng naba vot, la limixin esep diba rit kangkan nemi mi lara ngas uat, la dina ru xangkan nemi, la dinabam tu xobot ka nemi at lengkot axap. ⁴⁴Diba lok kapmek tinotno nemi eburu mi laxamdak mi laxaalik atnimi dik lok maxeneng at langas uat; la kopmen tinotno tegesa xonuat diba ke i at toxot teren, mila mi goxo ven kibis i do ne Moroa ga vot kusu na lox arooro nemi!”

Iesu Ga Beles To Xeneng At Loogu Laplavang

(Mt 21:12-17; Mk 11:15-19; Jo 2:13-22)

⁴⁵La ne Iesu ga beles ukeneng at loogu laplavang la ga xala su mi limixin diga sesep mi lempanga atdi, ⁴⁶la ga lok tidi, “Levelinga at ne Moroa i nemen keneng at Lovoang Kaala i lok keretna,

‘Loogu rak diba so asen i mi loogu singising’;

Ais 56:7

ketla mira lok kapmek pam i, i ngan loogu loklox alipe at luvuttadi dip sep paxat ka panga!”

⁴⁷At levenaleng axap Iesu ga anasa limixin to at loogu laplavang. La lavamaasa silok mi luvuttadi loklox ase at Lenavolo, la luvuttadi amgomgo at limixin diga vara i xusu dina sev amer i. ⁴⁸Ketla di goxo lox epovo i mila diga marat at limixin la limixin axap digang tonga amisix i, mila diga vara aleng levelinga ren.

Lususue Mumu Lololos Ne Iesu Ga Gugu Min

(Mt 21:23-27; Mk 11:27-33)

20 ¹At lara laaleng ne Iesu ga nemen to xeneng at loogu laplavang, ga anasa limixin la ga vavang bok tidi mi Lagale Lavavang; la lavamaasa silok eburu mi luvuttadi loklox ase at Lenavolo, la loxongkulao silok diga vot posiga i, ²la diga sue i, “Una tong i rinama, nege ga lok li u xusu una lok na lempanga? La nege ga raba u mi nom lololos kusu una lox i?”

³La ne Iesu ga vorang i ridi xeretna, “Nia bok ana sue nimi mi lususue. Mina tong i ria, ⁴loklok ti sep susu limixin, ne Jon ga ruuna i ga laa meva? Boro at ne Moroa kopla boro at limixin at na lavatbung menemen?”

⁵La diga esue min kantubu atdi, la diga lok, “Ataba tong lavanga salai? Mo do ata lok keretna, ‘Boro at ne Moroa,’ neni naba lok, ‘Tila ba mi goxo nuunu at ne Jon?’ ⁶Do ata lok keretna, ‘Boro at limixin,’ ana axap limixin diba lu amet dik mi laxanuat, mila di nuunu do ne Jon neni leeme vapaase alii.”

⁷Kuren la diga lok ti ne Iesu, “Maxoklen i do ga laa meva.”

⁸La ne Iesu ga lok tidi, “Nenia bok a noxo tong i rinimi do nia a lok na lempanga mi lololos meva.”

Lavapaase Poovo Ti Luvuttadi Xapmek Diga Lok Tatao Laraamang

(Mt 21:33-46; Mk 12:1-12)

⁹La ne Iesu ga vaase manga mi lara lavapaase poovo ri limixin, ni ga lok, “Lara laradi gatlo laraamang vaen, la ni ga raba luvuttadi min kusu dinak lok tatao laraamang. La ni ga vas kaxat uto at lara lenep silok at lentaba levenmaares. ¹⁰Se at laaleng ga vot kusu dina dik kaka lempeven una, neni ga riki lara lasaxaruki uto at luvuttadi loklok tatao at laraamang kusu na lok ka toxot at lempeven una xusu rin. Ketla luvuttadi loklok tatao at laraamang digap sep nom lasaxaruki la diga riki amlong kixinax i. ¹¹Kuren la ni ga riki manga lara lasaxaruki; ketla luvuttadi loklok tatao at laraamang digap sep box i, la diga lox amangan tinotno i, la diga riki amlong kixinax i. ¹²Melemu neni ga riki lasaxaruki sepsev avantun, la luvuttadi loklok tatao at laraamang diga sep kapmex i, la diga lu asu min ukamang.

¹³La mo laradi at nom laraamang vaen ga lok, ‘Anaba lok lavanga salai? Aba riki lamdak akmokso rak, la kerepmo nedi diba lok ngangao ren!’

¹⁴Ketla nom luvuttadi diga ven i, diga lok tidi xa, ‘Lamdak akmokso at laradi at na laraamang. Ata sev amer i, la ataba ruuna ka na laraamang!’
¹⁵Kuren la diga lu asu min ukamang at laraamang vaen la diga sev amer i.”

La ne Iesu ga sue di, “Lavanga salai laradi at nom laraamang naba lox i ridi nom luvuttadi loklok tatao? ¹⁶Neni nabat pas la na sev amet nom luvuttadi, la na raba nom laraamang vaen ti tentaba tuvuttadi vetpes.”

Se mo limixin diga ronga i na, diga lok, “Kopmen tinotno!”

¹⁷La ne Iesu ga ven tidi la ga sue di xeretna, “Lai lavasuun at na levelinga boro at ne Moroa?

‘Nom luat luvuttadi xipkip gu diga sok tixirixes kepe i, ga ravasu ngan luat kis la lugugu ren i silok aleng.’ *Sam 118:22*

¹⁸Dola tara na subu at nom luat, neni naba rekoxorop axakalik; la do, mo luat na subu ro mavana at tara, neni naba remumus ngan laxakup.”

Lexekepe Pilas Ti Ne Kaisar

(Mt 22:15-22; Mk 12:13-17)

¹⁹Luvuttadi loklox ase at Lenavolo eburu mi lavamaasa silok diga lok tong i xusu dina ranga alis ne Iesu ap mo loxonaleng, mila digaklen i do ne Iesu ga tong na lavapaase poovo mumu mun di; ketla di goxo ranga alis i mila diga marat at limixin.

²⁰Diga ngangais ti toxonaleng petpes kusu ri ranga alis i. Diga un ka lentaba luvuttadi xusu diba lok ngan luvuttadi vapaase ruturun, la diga riki nedi xusu dina bala arup ne Iesu mi lususue, kusu diba ranga ka i la dina lok li i at lavapaase ro melamgo at laradi gomgo. ²¹Nom larapentu sixim diga lok ti ne Iesu, “Leeme loklox ase, maklen i do levelinga axap taram ik mokso. Maklen i do uxu doxoma solo i do tara i ruuna laasen silok koplaxopmen, ketla u lox ase luruturun mumu lavavara at ne Moroa ri limixin. ²²Tong i rinama, kereva i epovo xusu mana kepe levempilas ti ne Kaisar, koplaxopmen?”

²³Ketla ne Iesu ga ven kibis pam laxaxarang atdi la ga lok tidi, ²⁴“Mina lox ase ia mi tuxuven denarias. Lemeran mi laasen atnege mo i nemen teren?”

²⁵Diga lok, “At ne Kaisar.”

La ne Iesu ga lok, “I lox avukat mun, mina raba ne Kaisar mi lempanga i epovo at ne Kaisar, la mina raba ne Moroa mi lempanga i epovo at ne Moroa.”

²⁶La di goxo epovo xusu nedi gita ranga alis i ro melamgo at limixin; kuren la digak lok pilo mun, mila diga sangu at lovoporang teren.

Lususue Mumu Laxakatu Kaxat Amlong

(Mt 22:23-33; Mk 12:18-27)

²⁷Lentaba at lubang Sadiusi diga vot pasa ne Iesu. (Nedi na luvuttadi diga lok do limixin di met pam, di noxo rooro xat amlong.) Diga sue ne Iesu,

²⁸“Laradi loklox ase, Moses ga malagan na lenavolo rinama; mo do taradi na met la latkin teren mo i rooro, ketla kopmen taxamdak atdu, neton nom laradi naba epot ap mo lanaa rixin, kusu diba visik tamdak ti ruuna ka lempanga ap mo laradi ga met. ²⁹Ga lavanuti loxoeton; lara gomgo ga epot, la ga met gamasa, kopmen ni goxo visik taxamdak. ³⁰Lara sepsev agepura ga epot manga at nom latkin. Neni ga met bok la goxo visik taxamdak. ³¹La melemu lara sepsev avantun ga epot ka mo latkin la neni ga met bok la goxo visik taxamdak. Nedi axap loxoeton diga epot ap mo latkin la nedi axap diga met la di goxo visik taxamdak. ³²Melemu mo latkin ga met.” ³³La diga sue ne Iesu xeretna, “At laaleng dola limixin diga met, dina xatu kaxat amlong, ti nege rinotno nom latkin? Nedi axap nom lavanuti loxoeton diga epot teren.”

³⁴Iesu ga vorang i ridi xeretna, “Lavatlak mi lavakin at na levenmaares di epot. ³⁵Ketla lavatlak mi lavakin mo di epovo xusu dina rooro xat amlong at lanmet la dina nemen at lorooro melemu, kopmen di noxo epot. ³⁶Nedi diba lok ngan lubang angelo la kopmen di noxo met. Nedi laxamdak at ne Moroa, mila ne Moroa gara lox arooro amlong pam di basinge lanmet. ³⁷La ne Moses ga vaase axasep tuturun i do luvuttadi met diba rooro xat amlong. Ni ga lox asusu i at levelinga mumu luuna laxao gak lok teren. Ni ga paase mumu ne Moroa do,

‘Lomoroa at ne Abaram, la lomoroa at ne Aisak, la lomoroa at ne Jakop.’ *Pas 3:6*

³⁸Lavasuun at na i do neni Lamgomgo at luvuttadi di rooro, la kopmen at lanmet, mila neni lavasuun at lorooro.”

³⁹La lentaba luvuttadi loklox ase at Lenavolo diga lok, “Laradi loklox ase, lagale lovoporang taram!” ⁴⁰La di goxopara bok ba xusu dina sue i mi tevesusue.

Lususue Mumu Lanarong (Mt 22:41-46; Mk 12:35-37)

⁴¹La ne Iesu ga lok tidi, “Nemi mi tong i do Lanarong neni lurubuno avolo at ne Devit. Kereva? Na ik mokso koplak kopmen, ⁴²mila ne Devit axa ga tong i ro at lempikpitan teren do,

‘Moroa ga lok ti Leeme Silok tarak. Kis de saparap lakngak tino, ⁴³se nenia aba lok li nedi di munepen minu i ngan loxot burubut maxopok at luxangkedek taram.’ *Sam 110:1*

⁴⁴Devit axa ga so asen i do Leeme Silok. Ga lok kereva la Lanarong neni manga lurubuno avolo ren?”

Iesu Ga Vaase Aronga Luvuttadi Loklok Ka Anasa Ren (Mt 23:1-36; Mk 12:38-40)

⁴⁵Nom limixin axap digang tonga i, la ne Iesu ga lok ti luvuttadi loklok ka anasa ren keretna, ⁴⁶“Minak lok tatao avukat nimi basinge loklok at

luvuttadi loklox ase at Lenavolo, mo di vavara i xusu dinat pas tangtagap mi laxasingsigaara babaalom atdi la di vavara i xusu limixin diba seega rangarang di mi loklok ngangao ro at loxot etang; la di vavara aleng i do dinat kis at lengkot kitkis avukat to at laraugu singising la lengkot avukat to at lara peluxa; ⁴⁷la di lok kaka gamasa lempanga at lubungnaa rixin, la di ngising babaalom kusu limixin diba lok ngangao atdi. Losongsongot tidi naba lok kapmek aleng tinotno!”

Laramtaba At Labannaa Rixin

(Mk 12:41-44)

21 ¹La ne Iesu gat kis to xeneng at loogu laplavang la ga reven luvuttadi nopnovos diga kepe lempilas atdi ro at loxot lili pilas, ²la ni ga ven lara labannaa rixin banbalo ga xepe legepu xonatat peni. ³La ne Iesu ga lok, “A tong tuturun i rinimi do, at lemeren ne Moroa, na labannaa rixin banbalo i lok li lempilas i silok ti lempilas atdi nom axap. ⁴Nedi di raba loxot lixilik mun at lapnovos silok atdi; ketla neni, na labantixin banbalo i raba axap lempilas ni ga ruuna i.”

Iesu Ga Paase Mumu Loogu Laplavang Naba Lok Kapmek

(Mt 24:1-14; Mk 13:1-13)

⁵Lentaba at luvuttadi loklok ka anasa ren diga paase mumu loogu laplavang, la lisisinang teren, la lemparuat avukat la leventamtaba limixin digam taba ne Moroa min. La ne Iesu ga lok, ⁶“Ana xav i na lempanga mi ven i, laaleng naba vot la kopmen toxonuat at nai naba nemen to at loxot teren; diba ut tereve axav i ukopok.”

⁷La diga sue ne Iesu xeretna, “Leeme loklox ase, lingisa nom lempanga naba vot? La loklok katling salai naba ravasu do na lempanga na vot?”

⁸La ne Iesu ga lok, “Mina lok tatao avukat nimi; lavanga tara na xarang nimi mumu na lempanga, mila buaang nedi luvuttadi dibat pas mi laasen tarak la diba lok, ‘Nenia Lanarong!’ La diba lok bok, ‘Laaleng at loxotpot at Leeme Silok mo ia vot auret ta.’ Ketla nemen mita mumu asu di. ⁹Nemen mita marat mo do mina ronga laraesep; lempanga xerepmo naba vot avot, ketla laxavaxap at na lavatbung menemen kopmen noxo vot soso.”

¹⁰La ne Iesu ga lok bok tidi, “Limixin at levennep silok diba esep eburu mi limixin at levennep silok petpes; lavaorong silok at lara lenep diba esep eburu mi lavaorong silok at lara lenep petpes. ¹¹La langsung levenangne naba vot at tengkot eburu mi leean kangking la levenanmeres silok, la leven angangan lempanga loklox amarat naba vot eburu mi teveloklok katling boro vana at laxalibet.

¹²Avot ti na lempanga naba vot, diba ranga alis nimi la dina lox asongot nimi; diba song araba nimi ri lavapaase ro xeneng at laraugu

singising la dina lok li nimi at loxokoxo; la diba lok kaka nimi uto melango at lavaorong silok la luvuttadi amgomgo xusu dina lok li nimi at lavapaase mila nemi mi nuunu rak. ¹³Ap mo loxonaleng miba epovo xusu mina vaase asu Lagale Lavavang. ¹⁴Mina lox agagas li levendoxoma atnimi avot ti lavapaase la nemen mita bulu mumu levelinga sala miba vaase pe nimi min; ¹⁵mila nenia aba raba nimi mi levelinga la laxasep at lakleklen kusu kopmen teta atdi di munepen minimi naba epovo xusu na vorang levelinga atnimi. ¹⁶Luvuttemen nimi, la luvutneton nimi, la lempat atnimi la larapen tangas atnimi diba song araba nimi uto atdi nom limixin di munepen minimi la diba sev amet lentaba atnimi. ¹⁷Limixin axap diba belemamao nimi mila nemi mi nuunu rak. ¹⁸Ketla ne Moroa ba lok tatao avukat nimi. ¹⁹Do mina tu lolos, miba rooro.”

Iesu Ga Paase Mumu Luutut Tereve At Lemenemen Jerusalem

(Mt 24:15-21; Mk 13:14-19)

²⁰La ne Iesu ga lok bok, “Mo do mina ven limixin esep dina ru xangkan lemenemen silok Jerusalem, minaklen ta i dola ma lixilik la dina ut tereve i. ²¹La nedi no di nemen to Judaia diba sixiro uto at lempatkaana; la nedi no di nemen to at lemenemen silok, diba vas kaxat basinge i; la nedi no di nemen to maxamang at lemenemen silok, nemen di guta beles uto xeneng teren. ²²Mila ap mo levenaleng Moroa naba vorang laxakapmek at limixin me Israel la kerepmo ni naba lox asorun levelinga, Lovoang Kaala ga vaase i. ²³Ap mo levenaleng naba lok kapmek aleng ti lavakin di renan, la ti lavakin mi lengkadede atdi! Langsangan losongsongot naba vot at na lenep silok Israel, la lumukmusak silok at ne Moroa naba vot saparap na limixin. ²⁴Luvuttadi esep diba sev amet tentaba mi lemparise sepsep, la diba lam kaka tentaba ngan luvuttadi xokoxo uto at lengkot petpes; la limixin kopmen di me Judaia diba lok kapmek na lemenemen Jerusalem se ap mo levenaleng ne Moroa naba riki asu di.”

Lovotpot At Laradi Mevana

(Mt 24:29-31; Mk 13:24-27)

²⁵La ne Iesu ga lok bok tidi, “Leveloklok katling naba vot at laxangking, mi lagaaling la larapenti. La at na lavatbung menemen, limixin at lentaba levengkot diba lok bukbulu aleng la dibak lok tangtangu la diba marat mila laras na lulung aleng mi lempopaxanao. ²⁶Limixin diba doxoma makmarat ngangais mo lempanga naba vot at na lavatbung menemen; mila lempanga ro vana at laxalibet diba sixit ekarakat la kopmen di noxo sixit mu larangas atdi. ²⁷Ap mo levenaleng limixin diba ven ia, Laradi Mevana, anaba vot at loxontakabu mi langsangan lololos mi lisisixam. ²⁸Dola na lempanga na ru ka i xusu

na vot, miba xatu kaxat upana la mina milik aurut, mila laaleng loklox arooro atnimi mo i auret ta.”

Lavapaase Poovo Ri Luuna Pik

(Mt 24:32-35; Mk 13:28-31)

²⁹La ne Iesu ga tong lara lavapaase poovo ridi xeretna, “Mina doxoma luuna pik la lentaba larauna vetpes bok. ³⁰Dola mi ven lempavaxan una atdi i lok do na su xat, miklen i do levenaleng at lamaares mo nga i auret ta. ³¹Mo do mina ven mo lempanga xapmek na vot, mibaklen i do Linintoo at ne Moroa i auret na vot.

³²Na levelinga rak i ruturun. Na limixin di rooro lingina di noxo met se na lempanga na ravasu. ³³Laxalibet mi lavatbung menemen naba sonao, ketla levelinga rak noxo xap.”

Mina Lok Tatao Avukat Nimi

³⁴La ne Iesu ga lok keretna, “Mina lok tatao avukat nimi! Nemen mita esum solo mi loklok lara peluxa la liinin lara kadan lolos, la nemen mita bulu mu na lorooro; lavanga nom laaleng na vot asangu nimi. ³⁵Mila mo laaleng naba vot at loxonaleng limixin di noxo gagas teren. ³⁶Mina reven avukat ti na lempanga xapmek la mina ngising amisik kusu miba ruuna lololos la mi noxo subu ap mo levenmumuat naba vot, la kusu miba epovo do mina ru ro melamgo rak, Laradi Mevana.”

³⁷La ne Iesu ga nemen at lentaba levenaleng ga anasa ro xeneng at loogu laplavang; at levenaleng kantinao neni gat pas su mego la gat pas uto at Lakaana Olip, la at lengkanimin neni ga nemen go. ³⁸La limixin axap digat pas su no mene at lenmaxantamak uto at loogu laplavang kusu dinang tonga i.

Diga Sevut Li Levelinga Xusu Ri Sev Amet Ne Iesu

(Mt 26:1-5; Mk 14:1-2; Jo 11:45-53)

22 ¹Laaleng ga sixit auret ta xusu ri leluxa at loxongkide diga ove vetpes i, laasen ap mo leluxa do Lovovolo Pe.^d ²La lavamaasa silok eburu mi luvuttadi loklox ase at Lenavolo diga puse ngas xusu ri sev amet ne Iesu kusu limixin di noxoklen i, mila diga marat atdi.

Judas Ga Siam Kusu Neni Naba Song Araba Ne Iesu

(Mt 26:14-16; Mk 14:10-11)

³Satan ga vubeles ukeneng at ne Judas, laasen bok teren ne Iskariot; neni lara atdi lasangaun mi legepura luvuttadi loklok ka anasa. ⁴La ne

^d 22:1 Leluxa limixin me Iudaia diga lok katling laaleng, diga vas kaxat boro Isip. La di goxo lok li laais at lengkongkide atdi.

Judas ga vot pasa lavamaasa silok la luvuttadi amgomgo atnedi luvuttadi esep diga lok tatao loogu laplavang la ga epaase eburu midu mumu teventaangas kusu neni naba song araba ne Iesu ridi. ⁵Diga lok momo aleng la diga siam do diba un i mi tempilas. ⁶La ne Judas ga siam ap mo levelinga la ni ga puse ri tangas kusu neni naba song araba ne Iesu rinedi xusu limixin noxoklen i.

Iesu Ga Gagag Kusu Ti Laanan At Lovovolo Pe

(Mt 26:17-25; Mk 14:12-21; Jo 13:21-30)

⁷Laaleng ga vot kusu ni leluxa at loxongkide diga ove vetpes i; ap mo laaleng diga sev amet levesipsip ti lok katling leluxa at Lovovolo Pe. ⁸La ne Iesu ga riki ne Pita mi ne Jon mi levelinga xeretna, “Munat pas la muna lox agagas li leveluxa ri Lovovolo Pe xusu ridik ti anan.”

⁹La duga sue i, “U vara i do mana lox agagas li i at ua loxot?”

¹⁰La ne Iesu ga lok, “Muna rongga i na! Mo do muna beles ukeneng at lemenemen silok, lara laradi nabap kip lubuxom dan naba xip tangarang numu. Muna mumu asu i uto at loogu ni na beles teren; ¹¹la muna lok ti laradi ap mo loogu xeretna, ‘Laradi loklox ase i sue u do, loxot ua at na loogu ram, nema eburu mi luvuttadi loklok ka anasa rak maba lok katling leluxa at Lovovolo Pe ren?’ ¹²Neni naba lox ase numu mi loxot silok diga gagas li vam i no i nemen to vana at loogu, la muba lox agagas li lempanga anan go.”

¹³Duga vas kaxat la duga long lenget ka lempanga axap kerekngan ne Iesu gara tong pam i ridu, la duga lox agagas li leveluxa ri Lovovolo Pe.

Leluxa At Leeme Silok

(Mt 26:26-30; Mk 14:22-26; 1 Ko 11:23-25)

¹⁴Se at loxonaleng ti anan, Iesu ga xis eburu mi luvuttadi loklok ka anasa ren. ¹⁵La ni ga lok tidi, “A vara aleng i xusu ana lok katling na leluxa eburu minimi, avot at losongsongot mo abap kiv i. ¹⁶A tong i rinimi do, a noxo lok katling bok ba na leluxa, se at loxonaleng anaba lox epovo i ro at Linintoo at ne Moroa.”

¹⁷La ne Iesu ga lok kaka lakap inin, la ga tong avukat ti ne Moroa, la ga lok, “Mina lok kaka i na la mina in teren. ¹⁸A tong i rinimi do a noxo in bok ba at lavaen se at loxonaleng Linintoo at ne Moroa na vot.”

¹⁹La neni ga lok kaka loxongkide, la ga tong avukat ti ne Moroa, la ga sebex i, la ga raba luvuttadi loklok ka anasa ren min, la ga lok, “Labantuxu rak na, [a raba nimi min. Mina lox amisik na loklok kusu mina doma mumu ia.”

²⁰Se diga an axap, neni ga lok kaka bok lakap inin la ga raba nedi min la ga lok, “Ana lavaen i ngan lada rak la i lok katling lekabus maxat, la nenia anaba lox epovo i xusu ri lox arooro buaang limixin.]

²¹Ketla lara laradi naba song araba ia ri luvuttadi xapmek; it kis de eburu midik. ²²Nenia, Laradi Mevana, anaba met kerekngan lodoxoma at ne Moroa, ketla naba lok kapmek aleng ti mo laradi na song araba ia uto at luvuttadi xapmek.” ²³La diga esue min kantubu atdi do ua lara atdi naba lox i mo.

Leedak Mumu Lisisilok

²⁴La leedak ga ravasu xantubu at luvuttadi loklok ka anasa, mumu ua lara atdi neni ga silok tidi. ²⁵La ne Iesu ga lok tidi, “Lavaorong silok at na lavatbung menemen di ruuna lololos mavana at limixin atdi, la limixin di so asen di do, ‘Larapen tangas at limixin.’” ²⁶Ketla nemen mita mu asu mo langas atdi; lara silok kantubu atnimi neni na lok ngan lara kakalik, la lara gomgo neni na lok ngan lasaxaruki. ²⁷Nege i silok atdu na? Lara it kis to vana xusu na anan koplalara i gugurin? Mo lara it kis to vana. Ketla nenia a nemen kantubu atnimi ngan lasaxaruki. ²⁸At levenaleng levesongsongot ga vot saparap dik, nemi goxo sixiro basinge ia. ²⁹Ne Tamak ga lok li ia xusu ri vaxaxis avukat limixin, la ana lok li nimi xusu ri vaxaxis avukat limixin. ³⁰Kuren la miba anan la mina inin to at loxot kitkis tarak to xeneng at Linintoo rak, la mibat kis at liinin orong la miba rongalinga at lasangaun legepura larabibinat boro Israel.”

Iesu Ga Vaase Alii Do Ne Pita Naba Sok Tixirixes I

(Mt 26:31-35; Mk 14:27-31; Jo 13:36-38)

³¹La ne Iesu ga lok ti ne Simon, “Simon, Simon! Satan ira lok kaka vam lisisiam at ne Moroa xusu naba lok tong pen nemi axap, kerekngan laradi loklok tatao at laraamang i mangma asu levennit piao boro at lengkakan teren la i lok kepe leventuxu piao. ³²Ketla ara sing pam tu, ne Simon, kusu lunuunu ram noxo subu. La do una leeng basinge laxakapmek taram, una lox alolos luvutnetam.”

³³La ne Pita ga vorang i rin keretna, “Leeme Silok, a gagas kusu anat pas eburu minu uto at loxokoxo la aba met bok eburu minu!”

³⁴La ne Iesu ga lok tin keretna, “Pita, a tong i ru do laxaxak kovisi noxo reng lingina, la nenu uba sev apkap naba vantun do uxoklen ia.”

³⁵La ne Iesu ga lok tidi, “At nom laaleng nia aga riki aonon nimi xusu na lok lugugu rak la mi goxop kip tengkontonom ka, la lentat lukluxa, la tempanga vatpas; kereva, migak pakes bok ti tempanga?”

La diga vorang i rin keretna, “Ma goxok pakes ti tempanga.”

³⁶La ne Iesu ga lok, “Ketla monga, do nege i ruuna toxontonom ka koplalara tarat lukluxa, neni nap kiv i; la do nege xopmen na ruuna tavarise sepsep, neni na sesep mi lavanga singsiga ren kusu ri un ka tara. ³⁷A tong i rinimi do Lovoang Kaala i lok do,

‘Neni ga nemen eburu mi limixin bilinga.’

Ais 53:12

La naba sorun mumu ia. Lavanga salai diga malagan i at Lovoang Kaala mumu ia, monga na sorun.”

³⁸La diga lok, “Leeme Silok, legepu varise sepsep na.”

La ni ga lok tidi, “I epovo!”

Lakaana Olip

(Mt 26:36-46; Mk 14:32-42)

³⁹La ne Iesu ga vas su basinge mo lemenemen, la gat pas uto at Lakaana Olip, i ngan ni ga lox amisix i. Luvuttadi loklok ka anasa ren diga mumu asu i. ⁴⁰Se diga rupot ap mo loxot, neni ga lok tidi, “Mina sing kusu mi noxo subu at loklok tong.”

⁴¹La neni ga vas silatla axakalik uto basinge luvuttadi loklok ka anasa, la ga xis tiktikbu mi luvatgulom teren la ga sing. ⁴²La ni ga lok, “Tamak, mo do u vara i, una lok pes na lumumuat basinge ia. Ketla nemen gat uta mumu asu lavavara rak, ketla una mu asu mun lavavara ram.” ⁴³[La laangelo ga vot saparav i, ga si boro vana at laxalibet kusu na raba i mi lololos. ⁴⁴La neni ga bulu aleng la ga sing lolos tinotno, la lantentelep teren ga sen su ukopok ti laxangka ga ngan lempatkaarum da.]

⁴⁵Se neni ga xatu kaxat, neni ga vot pasa luvuttadi loklok ka anasa ren la ni ga long lenget di, diga unga mila diga bulu aleng. ⁴⁶La ne Iesu ga lok tidi, “Tila nemi mi unga? Mina xatu la mina ngising kusu mi noxo subu at loklok tong pen.”

Larangtanga Alis At Ne Iesu

(Mt 26:47-56; Mk 14:43-50; Jo 18:3-11)

⁴⁷Iesu move ga paase la buaang nedi limixin diga vot, la lara laradi laasen teren ne Judas gat pas to melamgo atdi; neni legesara atnedi lasangaun legepura luvuttadi loklok ka anasa, la neni ga vas auret ne Iesu la ga nes i. ⁴⁸La ne Iesu ga lok tin, “Judas, kereva, u song araba ia, Laradi Mevana, uto at limixin kapmek mi lenetnes?”

⁴⁹La nom luvuttadi loklok ka anasa mo diga nemen eburu mi ne Iesu diga ven lai mo ga lok do na vot, la diga lok, “Leeme Silok, u vara i do mana esep bok mi luvarise sepsep atnama?” ⁵⁰La lara atdi ga ra korop kepe labaalung tino at lasaxaruki at lamaasa gomgo.

⁵¹Ketla ne Iesu ga lok, “I epovo nga.” La ni ga long tu at lavatlak at nom laradi la ni ga lox avukat labaalung teren.

⁵²La ne Iesu ga ven lavamaasa silok la luvuttadi amgomgo at loogu laplavang la loxongkulao silok at leme Judaia mo digat pas ugo xusu diba ranga alis i. La ni ga lok tidi xeretna, “Mit pas ude mi lemparise sepsep la levesoso, i ngan ta do nia lavanga xipkip pilo. ⁵³At levenaleng axap aga nemen eburu minimi ro xeneng at loogu laplavang, la mi goxo lok tong pen i xusu mina ranga alis ia. Ketla monga at laxanimin tubu,

neni loxonaleng at ne Satan, kuren la nemi mi lok na lavanga xapmek at lamain.”

Pita Ga Sev Apkap

(Mt 26:57-58, 69-75; Mk 14:53-54, 66-72; Jo 18:12-18, 25-27)

⁵⁴Diga ranga alis ne Iesu la diga lam kaka i uto at loogu at lamaasa gomgo; la ne Pita ga mumu asu di ro vaxalom. ⁵⁵Limixin mo diga mas laxao go xantubu at lemelua, la ne Pita ga xis eburu minedi digat kis mamain. ⁵⁶La lara loolik, neni lasaxaruki, ga ven ne Pita gat kis go saparap laxao, neni ga ven avukar i la ga lok, “Na laradi bok ga nemen eburu mi ne Iesu.”

⁵⁷Ketla ne Pita ga sev apkap, ga lok keretna, “Axoklen mo laradi!”

⁵⁸Melemu lixilik, lara laradi ga ven kibis ne Pita la ga lok, “Nenu bok lara atnedi luvuttadi loklok ka anasa ren.”

Ketla ne Pita ga vorang i rin keretna, “Nia xopmen!”

⁵⁹La melemu at legesa xonatat aleng lara laradi vetpes manga ga vaase lolos keretna, “I ruturun tinotno, na laradi ga nemen eburu min, mila neni bok boro Galili.”

⁶⁰Ketla ne Pita ga vorang i rin keretna, “Axoklen lavanga salai u paase min!” La soso mun ap mo loxonaleng, neni move ga paase, la laxaxak ga reng. ⁶¹La Leeme Silok ga rem gili la ga ven mokmokso ri ne Pita, la ne Pita ga doma amlong ti levelinga at Leeme Silok, ga tong avor i rin keretna, “Avot ti laxaxak na reng lingina, uba sev apkap naba vantun do uxoklen ia.” ⁶²La ne Pita ga vas su ukamang la gang teng tuntun aleng.

Diga Lok Kalise Ne Iesu La Digap Sev I

(Mt 26:67-68; Mk 14:65)

⁶³Mo luvuttadi esep diga lok tatao ne Iesu diga lok kalise i la digap sev i. ⁶⁴Diga is pe luxatli ren mi loxontamon la diga sue i, “Una tong kisip ka i do, nege mo i sev u?” ⁶⁵La diga vaase buaang bok laxalinga xapmek tin.

Iesu Ga Ru Ro Melamgo At Lixitkis Buru

(Mt 26:59-66; Mk 14:55-64; Jo 18:19-24)

⁶⁶Laxangking ga losu, la loxongkulao silok at leme Judaia, la lavamaasa silok, la luvuttadi loklox ase at Lenavolo diga vot buru, la diga lok li ne Iesu uto melamgo atdi. ⁶⁷La diga lok, “Una tong i rinama; kereva, nenu Lanarong?”

La ni ga vorang i ridi xeretna, “Mo do nia ana tong i rinimi, mi noxo nuunu at levelinga rak; ⁶⁸la do nia ana sue nimi mi lususue, mi noxo vorang i. ⁶⁹Ketla i ru ka nga i mo lingina, nenia, Laradi Mevana, anabat kis to saparap lekngen tino at ne Moroa i lolos aleng.”

⁷⁰La diga lok, “Kereva, nenu ne Nitna ne Moroa?”

La ni ga vorang i ridi xeretna, “Levelinga atnimi ik mokso; nenia vam.”

⁷¹La diga lok, “Keke bok ba tevelinga! Nedik axa tara ronga vam levelinga ren la i epovo dik ta lok li lumumuat teren!”

Iesu Ga Ru At Lavapaase Ro Melamgo At Ne Paelat

(Mt 27:1-2, 11-14; Mk 15:1-5; Jo 18:28-38)

23 ¹Luvuttadi amgomgo axap diga xatu kaxat la diga lam kaka ne Iesu uto melamgo at ne Paelat. ²La diga bala raba i, diga lok, “Ma ranga alis na laradi, neni i sasar asoogong amisik limixin atnama. I tong i ridi do, nemen dita kepe pilas ti ne Kaisar, la ik lok bok do neni mo ne Karisito, loorong silok.”

³La ne Paelat ga sue i, “Kereva, nenu loorong silok at limixin me Judaia?”

La ne Iesu ga lok, “I ruturun. Nenu xa u tong i.”

⁴Melemu ne Paelat ga lok ti lavamaasa silok la limixin keretna, “Axo vuse ka tavasuun kusu ri sev amet na laradi.”

⁵Ketla digap kup aleng keretna, “Neni ik paxaru kaxat levenesep kantubu at limixin at lengkot axap Judaia mi leveloklox ase ren. Neni ga ru ka i ro Galili la monga neni garat pas ude.”

Iesu Ga Ru At Lavapaase Ro Melamgo At Ne Erodes

⁶Se ne Paelat ga ronga i na, neni ga sue, “Kereva na laradi, neni boro Galili?” ⁷Se ne Paelat gaklen ba i do ne Iesu boro Galili, mo lenep ne Erodes gak lok tatao i, neni ga riki ne Iesu uto at ne Erodes, mo ga nemen go Jerusalem ap mo levenaleng.

⁸Se ne Erodes ga ven ne Iesu, neni ga lok momo aleng; neni gang tonga mene levelinga mumu i, la buaang levenaleng neni ga vara i xusu na ven be ne Iesu. Ni ga vara aleng i xusu naba ven ne Iesu na lok tempanga sangsangu. ⁹Kuren la ne Erodes ga sue ne Iesu mi laxasusue solo, ketla ne Iesu goxo vorang i mi tekolonga. ¹⁰Lavamaasa silok mi luvuttadi loklox ase at Lenavolo digak lok bok go, la diga vaase babala raba aleng ne Iesu. ¹¹La ne Erodes eburu mi limixin esep teren diga saba xangka rino ne Iesu la diga vaxasiga i mi lavanga singsigaara at loorong silok kusu dina lok kalise i, la diga riki amlong i uto at ne Paelat. ¹²Ap mo mun laaleng Erodes mi ne Paelat duga etangas; duga munepen avot mun be at nai.

Luvuttadi Amgomgo Diga Sue Ne Paelat Do Ne Iesu Na Met

(Mt 27:15-26; Mk 15:6-15; Jo 18:39–19:16)

¹³Paelat ga xup bubua ka lavamaasa silok la luvuttadi amgomgo at limixin. ¹⁴La ni ga lok tidi, “Mi raba ia mi na laradi la mi lok do neni i sasar asoogong limixin. Monga nia a ven axasep teren de melamgo atnimi axap, la axo long lenget tavanga do neni ga bixurun at tavanga

xapmek mi vaase mumu i min. ¹⁵Kopla ne Erodes gita long lenger i ga bixurun, mila neni i riki amlong i ude saparap dik. La kopmen tempanga na laradi ga lox i xusu neni na met teren. ¹⁶Ketla anak pixis mun i, la ana soxomus asu manga i.” ¹⁷[Amisik at leluxa at Lovovolo Pe, laradi gomgo gak soxomus asu raba limixin mi taradi xokoxo.]

¹⁸Ketla limixin axap diga xup lolos ngan legesara la diga lok, “Sev amer i! La una soxomus asu raba nama mi ne Barabas!” ¹⁹Diga lok li ne Barabas at loxokoxo mila leesep ga ru kaxat go at lemenemen silok, la ni ga sev amet lara laradi.

²⁰Paelat ga vara i xusu na soxomus asu ne Iesu uto, kuren la ni ga xup manga ti limixin. ²¹Ketla diga vaase amlong tin, la diga lok, “Paxarem i. Paxarem i at laxaba!”

²²Paelat ga vaase manga ridi ga sev avantun, “Ketla laxapmek salai neni ga lox i? Axo vuse ka tevelinga xusu neni naba met teren! Anak pixis mene i la ana soxomus asu manga i.”

²³Ketla digap kup lolos amisik do ne Paelat na vaxarem ne Iesu at laxaba; la ne Paelat goxo epovo na ba gili levendoxoma atdi. ²⁴Kuren la ne Paelat ga mu asu lavavara at limixin mumu ne Iesu. ²⁵Neni ga soxomus asu mo laradi diga lok li i ro at loxokoxo mumu leesep la lesepsev amet tadi, la ni ga raba nedi mi ne Iesu xusu dina lok lavanga salai nedi diga vara i min.

Diga Vaxarem Ne Iesu At Laxaba

(Mt 27:32-44; Mk 15:21-32; Jo 19:17-27)

²⁶Diga lam kaka ne Iesu boro at loogu at ne Paelat la diga vas kaxat min uto at loxot diba sev amer i ren. At lavatpas atdi diga ekip tangarang mi lara laradi laasen teren ne Simon, boro Sairini, mo gat pas uto xeneng at lemenemen silok; ga laa boro at loxot petpes. Diga ranga alis i, la diga sox aruru parang i xusu nap kip mu asu ne Iesu mi laxaba.

²⁷Buaang nedi limixin diga mumu asu ne Iesu; kantubu atdi lentaba lavakin digang teng la diga duudu mumu ne Iesu. ²⁸Iesu ga milik amlong tidi la ga lok, “Nemi lavakin boro Jerusalem! Nemen mitang tingis ia, ketla minang tingis laxamdak mi laxaalik kakalik atnimi, ²⁹mila levenaleng songsongot naba vot la limixin diba lok, ‘Naba lox avukat ti lavakin kopmen dixo ruuna laxamdak mi laxaalik kakalik, la kopmen dina visik tengkadede.’ ³⁰Ap mo levenaleng limixin diba lok ti lempattavut keretna, ‘Mina subu pavaa nama!’ la ri lempatkaana, ‘Mina sak pavaa nama!’

Ose 10:8

³¹Do nedi di lok na lempanga xapmek tia, laradi avukat, Moroa naba vorang i ridi mi langsung lumumuat silok.”

³²Limixin esep diga lok kaka bok legepu radi, nedu buru luradi xapmek, kusu diba sev amet du eburu mi ne Iesu. ³³Diga rupot to at loxot laasen teren,

“Lavatlak Tongan,” la diga lok li ne Iesu ro at laxaba, la luradi xapmek bok, lara ga merem saparap lekngen tino at ne Iesu la lara ro saparap lekngen kia. ³⁴La ne Iesu ga lok, “Tamak, una doxoma xepe na laxakapmek atdi. Dixoklen lavanga salai mo di lox i.” La diga epes levempanga singsiga ren kantubu atdi, diga lu buru mi lengkonuat, kusu ri lok kisp ka nege ba lok kaka i.

³⁵Limixin diga tu go diga reven lempanga diga lox i ri ne Iesu. La luvuttadi amgomgo at leme Judaia diga lok kalise i, diga lok keretna, “Neni gak lox arooro lentaba vetpes; mo do neni Lanarong at ne Moroa ga soxolik ka i, neni ba lox arooro xa i.”

³⁶Luvuttadi esep bok diga lok kalise i, diga ru auret ne Iesu la diga raba i mi laxadan vaen. ³⁷La diga lok, “Una lox arooro xa u, mo do nenu loorong silok at limixin me Judaia!”

³⁸La na levelinga diga malagan i ro mavana ren keretna, “Na laradi neni Loorong Silok at limixin me Judaia.”

³⁹La lara laradi xapmek ga merem go, ga vaase aksaksa rin, la ga lok, “Kereva kopmen nenu Lanarong? Una lox arooro u eburu minama.”

⁴⁰La mo lara ga vaase sox i, la ga lok, “Kereva, uxu marat at ne Moroa? Neda na ta lok ka loklox aleeng mumu laxakapmek atda. ⁴¹La lumumuat tida ik mokso mila taga lok laxakapmek, i epovo ri na lumumuat; ketla neni laradi goxo lok taxakapmek.”

⁴²La ni ga lok ti ne Iesu xeretna, “Iesu, una doxoma ia, do unamlong ngan loorong silok!”

⁴³La ne Iesu ga lok tin, “A tong i na ru, lingina unaba nemen eburu minia ro at lemenemen at ne Moroa.”

Lanmet At Ne Iesu

(Mt 27:45-56; Mk 15:33-41; Jo 19:28-30)

⁴⁴Ga auret ti lasangaun legepu xonaleng, lamain ga lok pe laxangking la ga vung pe mo lenep silok axap se at lavantun konaleng. ⁴⁵La lavattamon ga merem to xeneng at loogu laplavang ga rem lais ti legepu xot. ⁴⁶La ne Iesu ga xup lolos, ni ga lok, “Tamak, a lok li lороonan tarak at lukngam!” Ni ga tong i na la ga met ta.

⁴⁷La laasesep ga ven i na la ni ga emi asu mi ne Moroa la ga lok, “I ruturun tinotno, neni laradi mokmokso.” ⁴⁸La limixin mo diga tu go xusu dina ven i na, diga vas kaxat uto xolonu, diga posope lenbongobong atnedi mi lainbulu. ⁴⁹Mo limixin digakleklen ne Iesu, eburu mi lavakin no diga mumu ne Iesu boro Galili, diga ru paxalom lixilik kusu dina ven na lempanga.

Digak Mit Ne Iesu

(Mt 27:57-61; Mk 15:42-47; Jo 19:38-42)

⁵⁰Lara laradi laasen teren ne Josep boro at lara lemenemen at leme Judaia laasen teren Arimatia. Ga neni lagale laradi, la limixin diga lok

ngangao aleng teren, la ni ga ngangais Linintoo at ne Moroa. ⁵¹Neni lara atnedi at lixitkis buru diga bala raba ne Iesu, ketla neni goxo siam mu levendoxoma la loklok diga lox i. ⁵²Neni ga vot pasa ne Paelat la ga sing kaka labantuxu at ne Iesu. ⁵³Melemu neni ga lox asi labantuxu at ne Iesu ukopok, la ga bom i mi labantamon nunuan, la ga lok li i ro at lamaaut, diga xe i ro at lavaruat silok; limixin di goxovisi li rongan go. ⁵⁴Mo laaleng ni laaleng gagas la laaleng kaala mo ga auret.

⁵⁵Lavakin no diga mumu ne Iesu boro Galili diga emu mi ne Josep la diga ven lamaaut la labantuxu at ne Iesu ne Josep ga li i. ⁵⁶Melemu digamlong ukolonu la diga lox agagas li levendan mavak mi levendan momonok ti soli i at labantuxu at ne Iesu. At laaleng kaala diga lox amas, kerekngan Lenavolo ga tong i.

Laxakatu Kaxat Amlong At Ne Iesu
(Mt 28:1-10; Mk 16:1-8; Jo 20:1-10)

24 ¹No mene maxantamak suubu at laaleng avot ap mo luik, lavakin digat pas uto at lamaaut, digap kip levendan mavak diga lox agagas li vam i. ²Diga ven lagalii uat lentaba vetpes diga xavun pes pam i boro at lungusungus at nom lamaaut; ³la diga beles ukeneng, ketla di goxo ven lenget ka labantuxu at Leeme Silok ne Iesu. ⁴Diga tu go la diga rakdu aleng mumu i na, la soso mun legepu radi mi leventamon atdu gam games aleng, duga ru saparap di. ⁵La diga umsu mi lanmarat, la diga xis tiktikbu mi lempatgulom atdi to xopok at laxangka, la luradi duga lok tidi, “Tila mi puse ri laradi mo i rooro nade at loxot at labarongan? ⁶Neni xopmen i de; neni ira roo xat pam. Mina doxomangke at levelinga neni ga vaase nimi min ap mo levenaleng neni ga nemen to Galili; ⁷ni ga lok keretna, ‘Diba song araba ia, Laradi Mevana ri limixin kapmek, la dinaba vaxarem ia ro at laxaba, la anaba roo xat amlong at laaleng sepsev avantun.” ⁸La lavakin diga domangke at levelinga at ne Iesu.

⁹La digamlong boro at lamaaut la diga tong na lempanga axap tinedi lasangaun legesara luvuttadi loklok ka anasa la tidi bok lentaba luvuttadi. ¹⁰Mo lavakin diga tong na lempanga ri luvuttadi loklok ka anasa; levenasen atnedi, ne Maria Magdalene, Joana, la ne Maria nenen ne Jakop la lentaba bok. ¹¹Ketla luvuttadi loklok ka anasa diga nua i do levelinga at lavakin, ga levelinga gamasa mun, la di goxo nuunu atdi. ¹²[Ketla ne Pita ga xatu kaxat la ga sixit kaxat uto at lamaaut; ni ga beles at lamaaut la ga ven labantamon diga bom ne Iesu min la kopmen bok tempanga. La neni gamlong ukolonu la gam doma mumu na lavanga.]

Lavatpas At Luradi Loklok Ka Anasa At Langas Uto Emaus
(Mk 16:12-13)

¹³Ap mo mun laaleng lura atdi luvuttadi loklok ka anasa dugat pas uto at lara lemenemen laasen teren Emaus; lababaalom ti lavatpas boro

Emaus uto Jerusalem i epovo at lasangaun mi legesa kilomita. ¹⁴La duga epaase xantubu atdu mumu mo lempanga gat pot go. ¹⁵Duga epaase la ne Iesu xa ga vot saparap du la ni ga emu eburu midu. ¹⁶Duga ven i, ketla du goxo ven kisiv i.

¹⁷La ne Iesu ga lok tidu, “Lai mo numu mu paase mumu i at na lavatpas atnumu?”

Duga ru pilo mi lainbulu. ¹⁸La lara atdu, laasen teren ne Kliopas, ga lok, “Agut nenu xusuk mun u nemen kantubu at leme Jerusalem uxoklen lempanga salai mo gat pot go at na levenaleng gara xap.”

¹⁹La ne Iesu ga sue du xeretna, “Lempanga salai?”

La duga vorang i rin keretna, “Mo lempanga ga rupot saparap ne Iesu boro Nasaret, anai laradi neni leeme vapaase alii la neni ga lok lempanga sangsangu la levelinga bok teren ga mumuat aleng at lemeren ne Moroa la limixin. ²⁰Lavamaasa silok atnama la luvuttadi amgomgo diga song araba i xusu na met, la diga vaxarem i at laxaba. ²¹La maga doma ruturun i do neni laradi ne Moroa ga riki i xusu naba lox arooro limixin me Israel. Maxeneng bok at nom, monga lingina ni laaleng sepsev avantun pe i nom lempanga ga vot, ²²la lentaba lavakin at libinam tadi atnama di lox arakdu nema; dit pas maxantamak suubu uto at lamaaut. ²³Ketla kopmen dina long lenget ka labantuxu ren. Dimlong la di lok do nedu mo di ven lisilimet at luangelo la du tong i ridi do ne Iesu mo ia roo xat pam. ²⁴Lentaba at libinam tadi atnama dit pas uto at lamaaut la di ven i do levelinga at lavakin i ruturun; ketla kopmen dina ven ne Iesu.”

²⁵La ne Iesu ga lok tidu, “Nemu luradi rangtangu. Kereva, lodoxoma atnumu i repe vam la mu domampe levelinga at lavaeme vapaase alii? ²⁶Kereva, muxoklen i do Lanarong naba xip losongsongot at na lempanga la na beles at lixitkis orong teren?” ²⁷La ne Iesu ga soxomus levelinga at Lovoang Kaala ridu mumu i; ga ru ka i at levenbuk at ne Moses la levenmamalagan at lavaeme vapaase alii.

²⁸Duga vas saparap lemenemen mo duga lok do dunat pas tin; la ne Iesu ga lok do ni na vas basinge du. ²⁹Ketla duga vaase lolos alis i, la duga lok, “Una nemen be minama’ at na loxonaleng mila laaleng na, ira xantinao nga na la lemenemen na ira buxumin ta.” Kuren la ni ga vas beles ukeneng la ga nemen eburu midu.

³⁰La ni ga xis to at loxot kitkis eburu midu, la ga lok kaka loxongkide, la ga tong loklox anarong; melemu neni ga sebek loxongkide, la ga raba du min. ³¹La lodoxoma atdu ga rem suang la duga ven kibis ba ne Iesu; ketla neni ga sonao basinge du. ³²La duga lok tidu xa, “Lebelen da iplivi aleng at loxonaleng neda ta ronga levelinga ren to at langas la ira soxomus Lovoang Kaala rida.”

³³La soso mun duga vas kaxat bilong uto Jerusalem, la duga vosiga nedu lasangaun legesara luvuttadi loklok ka anasa digak lox eburu bok mi

lentaba. ³⁴Ketla luvuttadi loklok ka anasa diga lok tidu, “Leeme Silok ira xatu kaxat tuturun pam! Neni ira ru asuvos pam ti ne Simon!” ³⁵La nedu duga tong ba i ridi mi mo lavanga salai ga vot parap nedu ro at langas, la lemeren du ga xasep la duga ven kisp ba ne Iesu at loxonaleng neni ga sebek loxongkide.

Iesu Ga Ru Asuvos Ti Luvuttadi Loklok Ka Anasa Ren

(Mt 28:16-20; Mk 16:14-18; Jo 20:19-23)

³⁶Nedu move duga tong na lempanga ri luvuttadi loklok ka anasa, la soso mun ne Iesu ga ru go xantubu atdi la ga lok tidi, “Lenmila na nemen eburu minimi.”

³⁷Ketla diga umsu mi lainmarat aleng, diga nua i do nedi mo diga ven loroonan panga. ³⁸Ketla neni ga lok tidi, “Tila nemi mik marat? La tila levendoxoma atnimi ik sixit ekarakat? ³⁹Mina ven lukngak la luxangkedek tarak bok la mina ven i do nenia mun. Mina long tu rak, la miba ven kibis ia, mila loroonan panga kopmen tabantuxu la tevesi ren, ketla nenia a ruuna labantuxu mi levesi.”

⁴⁰[Ni ga tong i na la ni ga lox ase di mi lukngen la luxangkedek teren.] ⁴¹Ketla kovisi di goxo nuunu, diga sangu la diga umsu mi lomomo; kuren la ni ga sue di, “Mi ruuna bok tempanga anan nade kusu ria ri anan?”

⁴²La diga raba i mi leemat tintin, ⁴³la ne Iesu ga lok ka i la ga anan i ro at lemeren di.

⁴⁴La neni ga lok tidi, “Anai lempanga nia aga tong i rinimi ap mo levenaleng nenia aga nemen eburu minimi; lempanga axap diga malagan i mumu ia keneng at Lenavolo at ne Moses, la levenmamalagan at lavaeme vapaase alii, la levempikpixon mo ira sorun.”

⁴⁵La neni ga lox arepalas levendoxoma atdi kusu dinakleklen avukat Lovoang Kaala, ⁴⁶La ni ga lok tidi, “Diga malagan i at Lovoang Kaala xeretna; Lanarong naba xip losongsongot la at laaleng sepsev avantun neni naba roo xat amlong. ⁴⁷La keneng at laasen teren diba tong asu Lagale Lavavang mumu loklok ti leeng la loklok ti doxoma xepe laxakapmek diba vavang min ti limixin axap at lavatbung menemen, ba ru ka i de Jerusalem. ⁴⁸La nemi miba tong asu na lempanga. ⁴⁹La nenia xa anaba riki mo laramtaba rinimi, mo ne Tamak gara xaape vam min do tinimi. Ketla miba nemen ngangais i ro Jerusalem se at loxonaleng lololos boro vana naba suxuna nimi.”

Moroa Ga Lam Ka Ne Iesu Uto Vana At Laxalibet

(Mk 16:19-20; Gu 1:9-11)

⁵⁰La ne Iesu ga lam ka nga di boro Jerusalem la uto Beteni, la ni ga song aurut mi lukngen la ga lox anarong di. ⁵¹Se neni ga lox anarong

pam di, neni ga on basinge di la ne Moroa ga lok kaka nga i uto vana at laxalibet. ⁵²Diga lotu saparav i la digamlong uto Jerusalem, diga umsu mi langsung lomomo. ⁵³La at levenaleng axap diga nemen to at loogu laplavang diga veemi asu mi ne Moroa.

Jon

Lagale Lavavang At Ne Iesu Karisito Jon Ga Malagan I

Levelinga Loklox Axasep

Levenmaares 85-95 A.D.

Jon neni lara atnedi lasangaun mi legepura luvuttadi loklok ka anasa at ne Iesu. Buaang levenaleng neni ga emu tangtagap amisik mi ne Iesu, kuren la neni ga ven leven gugu ren la gang tonga levenanasa at ne Iesu. Mak mi ne Metiu, la ne Luk, nedi diga malagan avot levenbuk atdi la lempapaase atdi ga sixit emu mun. Ne Jon neni ga mu pit la ga malagan lempapaase ga lok petpes aleng tino. Do ata ven na levenmamalagan at ne Jon i ven ngan ta do lara vetpes mo ga malagan i, ketla na levelinga ne Jon axa ga malagan i. Neni goxo vara i do na lox asilok axa i, kuren la neni ga lok; “Mo luvuttadi loklok ka anasa ren diga lok,” ua i epovo gita lok, “Mo luvuttadi loklok ka anasa ren maga lok.” Mo do una us lavavang ne Jon ga malagan i, uba ven i do ne Iesu neni lavatturunen at lempapaase ruturun. Neni lavatturunen at lisisixam la lorooro la neni lakde mi ladan at lorooro lexen. Neni laradi loklok tatao la neni ik lok tatao avukat dik. La neni langas nedik di lok ka i uto at ne Temen dik ne Moroa. Neni lentangas atdik, la Leeme Silok atdik, la lavatturunen atdik la neni mun ne Nitna ruturun at ne Moroa.

Lengkot silok keneng at na lubuk:

- 1:1-18 Iesu neni ga laa meva kusu dina visix i de.
 - 1:19-51 Iesu ga ro ka lentaba atnedi luvuttadi loklok ka anasa.
 - 2:2-12:50 Iesu ga gugu saxaven to melamgo at limixin.
 - 13:1-17:26 Levempapaase at ne Iesu at laanan kaala.
 - 18:1-19:42 Larangtanga alis la lanmet at ne Iesu.
 - 20:1-21:25 Iesu ga roo xat basinge lanmet.
-

Iesu Neni Lavapaase

1 ¹Ganoxa at lereot lavapaase mo gara nemen pam; la neni gak lox eburu mi ne Moroa, la neni ga epovo mun mi ne Moroa. ²Boro xa at lereot, lavapaase gak lox eburu mi ne Moroa.

³Keneng teren ne Moroa ga rudum li levempanga axap; la kopmen tepanga at nai luruntudum li, gita ravasu boro at tara vetpes. ⁴Ga lavapaase neni lavasuun at lorooro, la na lorooro ga raba laxasep ti limixin. ⁵La laxasep i soosoo ri limixin at lamain la mo limixin kopmen di goxo lox epovo i do gita lox asi i.

Lovotpot At Ne Jon Laradi Sep Susu

⁶Moroa ga riki laradi vapaase ren, laasen teren ne Jon. ⁷Ga vot kusu na paase ri limixin mumu nom laxasep, kusu nedi diba ronga i la dina nuunu at laxasep. ⁸Neni xa xopmen mo laxasep; neni ga vot mun kusu na tong asu levelinga ap mo laxasep. ⁹Anai ni laxasep tuturun, laxasep ga si ude at na lavatbung menemen la ik lox asuusu laxasep ti limixin axap.

¹⁰Ni ga nemen at na lavatbung menemen, ketla limixin di goxo ven kibis i, keke do neni ga rudum li lempanga axap. ¹¹Neni gat pas uto at lubangmixin teren, ketla limixin axa ren di goxo siam ka i. ¹²Ketla nedi diga siam ka i la diga nuunu ren, ni ga lok li nedi ngan tinotno luvutnitna ne Moroa. ¹³Di goxo ravasu ngan luvutnitna ne Moroa at loklok at na lavatbung menemen, i ngan ta do laxamdak mi laxaalik at lenasun, koplalavavara at latlok, kopmen; ne Moroa xa, neni ne Temen di.

¹⁴Lavapaase ga vee radi la ga nemen kantubu atnama. Maga ven lisisixam teren, la ni ga umsu mi letaba nabalamu la levelinga ruturun at ne Moroa. La mo lisisixam neni ga lok ka i ngan legesamdak at ne Temen.

¹⁵Jon ga vavang min la ga xup lolos ti limixin keretna, “Neni na laradi nenia aga paase alii mumu i. Aga vaase xeretna, ‘Laradi mo naba vot melemu rak, neni i silok aleng tia, mila neni ga rooro avot tia.’” ¹⁶Letaba nabalamu ren i silok aleng tidik, la kerepmo neni ira lox anarong nedik, la iram taba amisik dik mi nom leveloklox anarong. ¹⁷Moroa ga raba avolo ne Moses mi Lenavolo; ketla letaba nabalamu at ne Moroa mi levelinga ruturun ga ravasu at ne Iesu Karisito. ¹⁸Tara goxovisi ven ne Moroa. Ne Nitna xusuk mun, neni i epovo mi ne Moroa, neni it kis esogo mi ne Temen la neni xa ga paase axasep dik mi ne Moroa.

Levesusue Mumu Ne Jon Mi Lugugu Ren

(Mt 3:1-12; Mk 1:1-8; Lu 3:1-18)

¹⁹Limixin amgomgo ro Jerusalem diga riki aonon lentaba lavamaasa la lentaba luvuttadi gugu at loogu laplavang^a uto ri ne Jon la diga sue i do,

^a 1:19 Na luvuttadi, nedi at libibinat at ne Levi la diga lok tooro lavamaasa ro xeneng at loogu laplavang.

“Nenu nege?” ²⁰Jon goxo ronga xape di xusu neni gi toxo vorang lususue atdi, ketla neni ga vaase axasep di xusu diba xasep. Ni ga vaase xeretna, “Nenia xopmen Lanarong.”

²¹La diga sue manga i, “Nenu nege? Kereva, nenu mo leeme vapaase alii megano, ne Elaia?”

Jon ga vorang i ridi xeretna, “Nenia xopmen.”

La diga sue manga i xeretna, “Kereva, nenu leeme vapaase alii, ne Moroa ga xaape min at levelinga at ne Moses?”

La ni ga vorang i ridi xeretna, “Kopmen.”

²²Melemu rinotno diga sue i, “Una tong i rinama do nenu nege; ma vara i do maba lok ka tovoporang at na lususue uto atnedi limixin amgomgo diga riki nama. Una tong i do nenu nege.”

²³Jon ga vorang i ridi mi levelinga at leeme vapaase alii ne Aisaia, ni ga lok keretna,

‘Nenia mo lara ip kup to at lamatbin keretna, mina lox akmokso langas ti Leeme Silok.’ *Ais 40:3*

²⁴La lentaba lubung Parisi, luvuttadi amgomgo diga riki di, diga vot pasa ne Jon. ²⁵Diga sue i xeretna, “Do nenu xopmen Lanarong, kopla ne Elaia, kopla mo leeme vapaase alii, la tila u sep susu limixin?”

²⁶Jon ga vorang i ridi xeretna, “A sep susu limixin mi ladan mun; kantubu atnimi laradi mo i tu, nemi xopmen minaklen i. ²⁷Neni mo naba vot melemu rak, ketla nenia axo epovo xusu ana soxomus luvanga vatpas teren mila i silok aleng tia.”^b

²⁸Ana levempanga ga ravasu ro Beteni, to at lara lenep dan Joridan, ne Jon ga sep susu limixin e.

Lanasip At Ne Moroa

²⁹Ap mo manga lara laaleng Jon ga ven ne Iesu gat pas go boro, la ni ga vaase xeretna, “Pen ba i, ni nom Lanasip at ne Moroa naba doxoma xepe laxakapmek at limixin at na lavatbung menemen kopok. ³⁰Neni na laradi nenia aga paase min tinemi, la aga vaase do, “Laradi mo naba vot melemu rak, neni i silok aleng tia, mila neni ga rooro avot tia. ³¹Gano a goxoklen i do neni nege, ketla nenia aga vot de ngan laradi sep susu mene mi ladan kusu ri lox asuvos i ri leme Israel.”

³²La ne Jon ga tong asu lavapaase axasep keretna, “Aga ven Loroonan Kaala ga rava si boro vana at laxalibet la gasga i, ga lok ngan lamno.

³³Nia xovisi goxoklen i, ketla ne Moroa ga riki ia xusu anap sep susu limixin mi ladan la neni ga lok tia xeretna, ‘Uba ven Loroonan Kaala naba si boro vana la nasga taradi; neni mo laradi naba sep susu limixin

^b 1:27 Anai ni lavapaase poovo ri lox asuusu i do ne Jon ga lox asu langsung loklok ngangao ren ti ne Iesu.

mi Loroonan Kaala.’³⁴ Agara ven pam i la a tong i rinimi do neni ne Nitna ne Moroa.”

Luvuttadi Loklok Ka Anasa At Ne Iesu

³⁵ Ap mo manga lara laaleng melemu Jon ga nemen manga ro saparap ladan sen Joridan eburu mi legepu radi loklok ka anasa ren. ³⁶ At loxonaleng neni ga ven ne Iesu gat pas aurer i, la neni ga lok keretna, “Pen ba i. Neni na, lanasip at ne Moroa.”

³⁷ Mo laradi loklok ka anasa ren duga ronga na levelinga la duga emu eburu nga mi ne Iesu. ³⁸ Iesu ga rem gili la ga ven du, duga mumu asu i, la ga sue du, “Kereva mo?”

Duga vorang i rin keretna, “Rabai. Loogu ram ua?” (Lavasuun at loxoling Rabai do, leeme loklox ase.)

³⁹ La ne Iesu ga lok, “Uto dik ata ven i.” Kuren la duga emu min la duga ven lenep neni gak lok teren; la duga nemen go ap mo laaleng axap eburu min, ga se at lavanuet konaleng ga ukantinao.

⁴⁰ Endru, neton ne Simon Pita, neni lara atdu ga ronga mo levelinga at ne Jon la ga emu mi ne Iesu. ⁴¹ La soso mun ne Endru ga vot pasa neton, ne Simon la ga lok tin, “Mara long lenget ka vam Lanarong.” Lavasuun at loxoling Lanarong do, Karisito.

⁴² Melemu neni ga lam ka ne Simon uto saparap ne Iesu. Iesu ga ven tin la ga lok tin keretna, “Nenu, ne Simon, nitna ne Jon. Laasen ta ru ne Kepas.” Na laasen i lok ngan mun ne Pita la lavasuun teren do Luat Kis.

Iesu Ga Ro Xaka Ne Pilip Mi Ne Natanael

⁴³ Ap mo manga lara laaleng Iesu ga vara i do nat pas uto Galili. Ni ga vot pasa ne Pilip la ga lok tin keretna, “Ude u, la una mumu asu ia.”

⁴⁴ Pilip neni boro Betsaida, lemenemen at ne Endru mi ne Pita. ⁴⁵ Pilip ga vot pasa ne Natanael la ga lok tin, “Mara long lenget ka vam laradi ne Moses ga malagan axasep mumu i ro xeneng at levenbuk at Lenavolo; la lavaeme vapaase alii bok diga malagan mumu i. Neni ne Iesu, lamdak at ne Josep, boro Nasaret.”

⁴⁶ La ne Natanael ga sue i, “I epovo xusu tempanga avukat naba vot boro Nasaret?”

Pilip ga lok, “Ata onon la una ven ba i.”

⁴⁷ At loxonaleng ne Iesu ga ven ne Natanael ga vas auret, la ni ga vaase mumu i xeretna, “Neni laradi ruturun boro Israel; kopmen tempanga xaxarang nak lok at lorooro ren.”

⁴⁸ La ne Natanael ga sue i. “Uklen ba ia xereva?” Iesu ga vorang i rin keretna, “At loxonaleng ne Pilip kovisi na lam kaka u, ara ven pam u, ut kis to maxopok at luuna pik.”

⁴⁹ Natanael ga lok, “Rabai. Nenu ne Nitna ne Moroa. Nenu loorong silok mede Israel.”

⁵⁰Iesu ga lok tin, “U nuunu mene rak mila nenia a tong i ru do a ven u ro maxopok at luuna pik. Uba ven levempanga silok aleng ti na lavanga.”
⁵¹La ni ga lok bok tidu, “A tong tuturun i rinumu do muba ven laxalibet na rem suang la muba ven lubung angelo at ne Moroa dinat pas si la dinat pas urut uto saparav ia Laradi Mevana.”

Loklox Epot To Kena

2 ¹Melemu at lavantun levenaleng, limixin diga lok leluxa loklox epot to Kena at lenep silok Galili. Nenen ne Iesu bok mo gak lok, ²la ne Iesu eburu mi luvuttadi loklok ka anasa ren bok mo diga sing nedo do diba vot go at loklox epot. ³Se limixin diga in axap levendan vaen, nenen ne Iesu ga lok tin, “Levendan vaen atdi ira xap pam.”

⁴Iesu ga lok tin, “Naga, u noxo tong ase ia mi tavanga xusu ana lox i. Laaleng ti vaxaru kaxat lugugu rak kovisi na vot.”

⁵Nenen ne Iesu ga lok ti mo luvuttadi gugu, “Mina mumu asu levempanga salai do neni na tong i rinimi.”

⁶Limixin me Judaia diga ruuna leretere at loklok at lotu atdi mumu logosogos panga, ni lavasuun mun teren la lavanna lempat buxom tuntu mo ga nemen; nedo getgesara diga epovo rin tuntu ka tegepu sangaun kopla tavantun sangaun lenbuxak kidi.

⁷Iesu ga lok ti lavasaxaruki, “Minantu i na lempat buxom mi laxadan.” La digantu aumsu di mi laxadan.

⁸La melemu neni ga lok tidi, “Monga minantu ka toxongkadan at nom la mina lok ka i uto at laradi i lok tata leluxa.”

Diga lok ka i uto saparap mo laradi, ⁹la ni ga in tong pen mo loxongkadan, mo ga vee vaen pam. Ni goxoklen i do na lavaen ga la meva, ketla lavasaxaruki ren digaklen i; kuren la neni ga ro ka mo laradi diga lox aepor i, ¹⁰la ga lok tin, “Limixin axap di in lagale lavaen avot la melemu do dira in aleng, nedo dira in ba lavaen i so gamasa, ketla nenu ura lili vam lavaen avukat ise nga mo.”

¹¹Nai lavanga sangsangu avot tinotno ne Iesu ga lox i. Ni ga lox i na ro Kena at lenep silok Galili; neni ga lox asuusu lisisilok teren go, la luvuttadi loklok ka anasa ren diga nuunu ren.

¹²Melemu at nai, Iesu eburu mi nenen la luvutneton la luvuttadi loklok ka anasa ren digat pas uto Kaprenaum, la diga nemen lixilik go at lentaba levenaleng.

Iesu Ga Beles To Xeneng At Loogu Laplavang

(Mt 21:12-13; Mk 11:15-17; Lu 19:45-46)

¹³Laaleng ga auret ti leluxa at Lovovolo Pe at leme Judaia, kuren la ne Iesu ga urut uto Jerusalem. ¹⁴To xeneng at loogu laplavang neni ga long lenget ka luvuttadi diga sesep mi laxanbulumaxao, laxasipsip, la

levenamno atdi, la luvuttadi loklox ekun pilas bok mo digat kis saparap levengkot lili atdi. ¹⁵Iesu ga lok lakpiksa mi luxua, la ga xala su mi nom levempanga mi lavanuet kangkedek atdi boro xeneng basinge loogu laplavang, laxasipsip eburu mi laxanbulumaxao; la ni ga sogo pupukus levengkot lili la ga reeve laxampilas atdi. ¹⁶La ni ga lok ti luvuttadi diga sesep mi levenamno xeretna, “Mina lok kepe nom lavapixa uto xamang basinge na loogu. Nemen mita lok loogu at ne Tamak na lok ngan ta loogu sesep.”

¹⁷Luvuttadi loklok ka anasa ren diga doxoma ka i do Lovoang Kaala ga lok,

‘Labalamu rak ti na loogu ram ne Moroa i lolos aleng la ni lavasuun teren limixin bilinga dinaba sev amer ia.’ *Sam 69:9*

¹⁸Luvuttadi amgomgo at limixin me Judaia diga paase lolos tin keretna, “Una lok tavanga sangsangu xusu ti lox asuusu i rinama do nenu u ruuna lololos kusu ri lox i na.”

¹⁹La ne Iesu ga vorang i ridi xeretna, “Do mina ut asi na loogu laplavang, aba vaxaru amlong manga i xeneng at lavantun aleng.”

²⁰Diga sue i, “Uba vaxaru amlong i at lavantun aleng mene kereva? Diga lok na loogu laplavang at lavanuet sangaun mi lavanna maares axap.” ²¹Ketla ne Iesu xopmen goxo paase mi loogu laplavang, ketla neni ga paase mumu labantuxu ren. ²²Melemu at laaleng neni ga roo xat amlong at lanmet, luvuttadi loklok ka anasa ren diga doma amlong ti na levelinga ren. La diga nuunu at Lovoang Kaala la diga nuunu bok ap mo levelinga ne Iesu ga tong i.

Iesu Iklen Limixin Axap

²³At laaleng ne Iesu ga nemen to Jerusalem at leluxa at Lovovolo Pe, buaang nedi limixin diga nuunu at laasen teren atla diga ven mo levempanga sangsangu ren. ²⁴Ketla Iesu goxo nuunu atdi mila neni gaklen avukat limixin axap. ²⁵Goxo epovo bok do teta gita re ri ne Iesu mumu loklok at limixin mila neni gaklen levempanga axap ga nemen keneng at lorooro atnedi.

Iesu Eburu Mi Ne Nikodimas

3 ¹Lara laradi laasen teren ne Nikodimas, neni lara atdi luvuttadi amgomgo at leme Judaia la neni lara atnedi libinam tadi at lubung Parisi. ²At lara laxanimin neni ga mu bung ti ne Iesu la ga lok tin, “Rabai. Maklen i do nenu laradi loklox ase, la ne Moroa ga riki u; kopmen tara na epovo xusu na lok nom lempanga sangsangu, mo do ne Moroa noxo lok tooro i.”

³Iesu ga vorang i rin keretna, “A tong tuturun i na ru; do tara noxo lok kaka livipisik amaxat, neni noxo vubeles at Linintoo at ne Moroa.”

⁴Nikodimas ga sue i, “Naba lok kereva la laradi mukun dina visik amu box i? Neni xopmen na epovo xusu na beles at lavatpaasa at nenen la nenen na visik amu manga i.”

⁵La ne Iesu ga vorang i rin, “A tong tuturun i na ru; do tara noxo lok kaka lesepe susu la noxo lok kaka lorooro maxat boro at Loroonan Kaala, neni noxo beles at Linintoo at ne Moroa. ⁶La laradi, nenen i visix i at loklok at ne temen mi nenen, neni at na lorooro xopok; ket dola Loroonan Kaala i visik amaxar i, neni i ruuna lorooro maxat at Loroonan Kaala. ⁷Nemen uta rakdu atla nia a tong i ru do, ‘Una lok ka livipisik amaxat.’ ⁸Lamanman it mas mu lavavara ren. Ung tonga i, ketla uxoklen i do i laa meva la it mas ua. I lok ngan mun nedi limixin Loroonan Kaala i visik amaxat di.”

⁹Nikodimas ga sue i, “Naba lok kereva na?”

¹⁰Iesu ga vorang i rin, “Kereva, nenu laradi loklox ase silok at leme Israel la nenu xa uxoklen i na? ¹¹A tong tuturun i ru, nema ma paase mi lempanga makleklen i, la ma tong lempanga maga ven i, ketla kopmen tinotno tara atnimi limixin amgomgo, na lok do na siam ka levelinga atnama. ¹²Nenia ara vaase vam tu mi lempanga at na lavatbung menemen la uxu nuunu at na levelinga rak; uba nuunu at levelinga rak kereva do nia ana paase ru mi lempanga boro vana at laxalibet? ¹³La kovisi tara goxo urut uto vana at laxalibet, ketla legesa radi mene ga si boro vana at laxalibet la neni nenia, Laradi Mevana.

¹⁴Moses ga lox aurut lovoovo sii ro at lamatbin kusu limixin dina ven i la diba roo; la kerepmo nenia, Laradi Mevana, limixin diba lox aurut box ia at laxaba, ¹⁵kusu nege do i nuunu rak, neni naba ruuna ka lorooro avolo. ¹⁶Morua ga balamu rinotno limixin axap at na lavatbung menemen, kuren la ni gam taba mi legesa madak mun teren, kusu do nege i nuunu ren, neni noxo seeve, ketla neni naba ruuna ka lorooro avolo. ¹⁷Morua ga riki ne Nitna ude at na lavatbung menemen kopmen do neni na lok li loxokoxo ri limixin. Ketla Morua ga riki ne Nitna xusu neni Laradi Loklox Arooro ridi.

¹⁸Do nege i nuunu at ne Nitna, neni noxo lok kaka loxokoxo; do nege xopmen na nuunu, neni ira sok ka vam loxot tin, mila neni xopmen na nuunu at legesa madak mun at ne Moroa. ¹⁹Limixin dinaba lok kaka lumumuat atla, laxasepe gara vot pam at lavatbung menemen, la diga lox abulubun i; diga balamu aleng loklok at lubuxumin, mila leveloklok atdi ga lok kapmek. ²⁰Do nege i lok lempanga i lok kapmek, neni i xopara aleng tinotno laxasepe la ni noxot pas uto at laxasepe, mila neni ixo vara i do mo laxapmek teren na nemen at lasaxaven. ²¹Ket do nege luruptuvuk teren ik lok at luruturun, neni i nemen at laxasepe la kerepmo limixin di ven kisp lorooro ren la diklen i do ne Moroa i nemen eburu min.”

Iesu La Ne Jon

²²Melemu at nai Iesu eburu mi luvuttadi loklok ka anasa ren digat pas tangtagap maxeneng at lenep silok Judaia. Ni ga nemen eburu mido go

at lentaba leven gaaling, la neni gap sep susu limixin. ²³Jon bok gap sep susu limixin to Inon, goxo vaxalom solo boro Salim, mila levendan silok mo ga nemen go. Limixin digat pas parav i la ni gap sep susu nedi. ²⁴Ap mo levenaleng Jon kovisi goxo nemen at loogu xokoxo.

²⁵Lentaba luvuttadi loklok ka anasa at ne Jon eburu mi lara laradi boro Judaia diga etep mi levelinga mumu lususu rik lox adadat laradi at lemeren ne Moroa. ²⁶Kuren la diga vot pasa ne Jon la diga tong mo levelinga rin la diga lok tin keretna, “Rabai. Nenu una doma bilong ti mo laradi ga nemen eburu minu ro auret ladan sen Joridan, laradi nenu ga paase mumu i. Neni mo ip sep susu limixin, la limixin axap mo di mumu asu i.”

²⁷Jon ga vorang i ridi xeretna, “Kopmen teta naba ruuna ka tavanga do ne Moroa noxo raba i min. ²⁸Nemi xa miga ronga mo levelinga nia aga tong i xeretna, ‘Nia xopmen Lanarong, ketla ne Moroa ga riki amgo ia rin.’ ²⁹At loklox epot laradi i lok ka latkin tin, ketla lentangas teren i tu saparav i la ing tonga i; i lok momo xusu ri ronga levelinga ap mo laradi. La kerepmo nia a lok momo la lomomo rak i silok. ³⁰Neni naba silok aleng tia la nia aba lixilik tin.”

Iesu Ga Si Boro Vana At Laxalibet

³¹La ne Jon ga lok bok, “Do tara na si boro vana at laxalibet, neni i silok aleng tinotno ri limixin axap. Laradi mede xopok, neni at na lavatkangka mun la neni i paase ngan laradi mede at na lavatkangka. Ketla do tara na si boro vana at laxalibet, neni i volo aleng ti limixin axap. ³²Neni i paase mi levempanga neni ga ven i la gang tonga i, ketla kopmen teta i siam ka levelinga ren. ³³Do tara na siam ka levelinga ren, neni i lox asuusu i do levelinga at ne Moroa i raturun. ³⁴Mo laradi ne Moroa ga riki i, i paase mi levelinga at ne Moroa mila ne Moroa ga raba axav i mi Loroonan Kaala. ³⁵Morua i balamu aleng ne Nitna la ira lok li vam levempanga axap maxopok at loklok tatao ren. ³⁶Do nege i nuunu at ne Nitna ne Moroa, neni naba ruuna ka lorooro avolo; la nege do i ronga xepe ne Nitna ne Moroa, neni noxo ruuna ka lorooro avolo la lebelemamao at ne Moroa ik lok mu amisix i.”

Iesu Mi Latkin Boro Samaria

4 ¹Lubung Parisi diga ronga i do limixin solo diga mumu asu ne Iesu la ni ga sep susu di la kopmen bok ba timixin solo diga mumu asu ne Jon. ²Ne Iesu xa xopmen goxo sep susu tara; ketla luvuttadi loklok ka anasa mun teren digap sep susu limixin. ³Ne Iesu ga ronga i na levelinga la neni ga vas kaxat basinge nom lenep Judaia la gamlong manga uto Galili. ⁴At lavatpas teren ugo, ga epovo do neni nat pas keneng at lenep silok Samaria.

⁵Ni gat pas go Samaria la ga rupot to at lemenemen laasen teren Saikar; goxo vaxalom solo boro at lenep kangka ne Jakop ga raba lamdak teren ne Josep min. ⁶Lamamara dan at ne Jakop ga nemen e; la ne Iesu, ga molo ap mo lavatpas la ni ga xis go saparap lamamara dan. Taba ga xanangking.

⁷Lara latkin boro Samaria ga vas pot go xusu rintu dan. La ne Iesu ga lok tin, “Una raba ia mi toxondan ti inin.” ⁸Luvuttadi loklok ka anasa ren no nga di at lemenemen silok diga un panga anan.

⁹La nom latkin ga lok tin keretna, “Nenu laradi boro Judaia la nenia mede Samaria, tila u sing ia do anantu ka toxondan tu la una in?” Leme Judaia dixo inin at leventingtigon dan leme Samaria ding long tu ren.

¹⁰La ne Iesu ga vorang i rin, “Do uklen laramtaba at ne Moroa la mo laradi i sing u ri toxondan, i epovo do una sing i ri laxadan too, la ni naba raba u min.”

¹¹La nom latkin ga lok tin, “Leeme Silok, uxo ruuna tavat buxom silok kusu rintu dan la ladan no xa ik lok kopok. Uba lok ka rinotno nom laxadan too ua? ¹²Lurubuno atnema ne Jakop ga xe na lamamara dan tinama, la neni eburu mi laxamdak teren, la lempanga mi lavanuet kangkedek atdi, diga inin de; la kereva u lok do nenu mo u silok ti ne Jakop?”

¹³La ne Iesu ga vorang i ri latkin keretna, “Do tara na in at nom laxadan neni naba minu amu bok. ¹⁴Ket do tara na inin at laxadan nenia ana raba i min, neni noxo minu bok ba. I ruturun do laxadan nia ana raba i min naba lok ngan loxodan i puvut su xeneng at lorooro ren, la naba raba i mi lorooro avolo.”

¹⁵La nom latkin ga lok tin, “Leeme silok, una raba ia mi nom ladan, kusu a noxok minu bok ba la anoxot pot amisik de kusu rin tuntu dan.”

¹⁶La ne Iesu ga lok tin, “Una onon be la una lam kaka latlok taram. La munamlong ba ude.”

¹⁷Latkin ga lok tin, “Axo ruuna tatlok.”

La ne Iesu ga lok tin, “Ik mokso levelinga ram do kopmen tatlok taram. ¹⁸Ugara epot pam at lavalimo lavatlok la ti latlok mo nga nenu u epot teren, kopmen neni latlok tinotno ram. Lavapaase ram tia i ruturun.”

¹⁹Latkin ga lok, “Leeme Silok, a ven kisip ba i do nenu leeme vapaase alii. ²⁰Lavalabat atnama mede Samaria diga lotu parap ne Moroa at nai lakaana, ketla nemi leme Judaia mi tong i do lemenemen Jerusalem neni lenep ti lotu parap ne Moroa e.”

²¹Iesu ga lok tin, “Latkin, una nuunu at na levelinga rak; laaleng naba vot la limixin axap di noxo lotu parap ne Moroa at na lakaana kopla to Jerusalem. ²²Nemi limixin boro Samaria mixoklen tinotno ne Moroa mi lotu parav i; nema limixin me Judaia maklen ne Moroa mila Laradi Loklox Arooro neni at lubangmixin me Judaia. ²³Ketla mo laaleng naba

vot, nanga ira vot pam, la limixin lotu ruturun diba lotu parap ne Temen di mi lusumsuma at Loroonan Kaala la mi luruturun. Nedi mo limixin lotu ruturun, ne Temen di i vara di do dina lotu saporav i. ²⁴Moroa neni loroonan; la kerepmo nedi di lotu parav i dina lotu saporav i mi lusumsuma at Loroonan Kaala la mi luruturun.”

²⁵Latkin ga lok tin, “Aklen i do Lanarong, ne Karisito, naba vot. Do neni na vot, ni naba re axasep axap dik mi lempanga axap.”

²⁶Melemu ne Iesu ga lok tin, “Nenia vam na, mo nenu u epaase eburu min.”

Luvuttadi Loklok Ka Anasa Digamlong

²⁷Ap mo mun loxonaleng luvuttadi loklok ka anasa ren digamlong; la diga rakdu mila ne Iesu ga epaase eburu mi nom latkin. Ketla kopmen tara atdi ga sue latkin do, “U vara lavanga salai?” Kopla gita sue ne Iesu do, “Tila u epaase eburu mi nom latkin?”

²⁸Latkin ga vas kaxat basinge lavat buxom dan teren, la gamlong uto at lemenemen silok, la ga vaase ri limixin mego, ²⁹“Ude nimi la mina ven lara laradi; neni i vaase axasev ia mi lempanga axap neni agak lox i gano. Nenia a lok do neni vam Lanarong.” ³⁰Kuren la diga on basinge lemenemen silok la diga vas kaxat uto ri ne Iesu.

³¹Ap mo mun loxonaleng luvuttadi loklok ka anasa at ne Iesu, diga lok tin, “Rabai, una anan be.”

³²Ketla neni ga lok tidi xeretna, “Levempanga mo rak ik lok ti anan la nemi mixoklen i.”

³³La luvuttadi loklok ka anasa ren diga esue xantubu atdi xeretna, “Kereva, tentaba go di raba i mi teveluxa?”

³⁴Ketla Iesu ga lok lavapaase poovo ridi, “Leveluxa rak keretna, ana ronga res at lavavara at ne Moroa ga riki ia la ana lox axap lugugu neni ga raba ia min. ³⁵Nemi mik lok do, ‘Lavanuet gaaling bok mo la melemu ba mina sep kin at laraamang;’ ketla a tong i rinimi do mina ven avukat at laraamang; levempeven panga mo nga ia mukun pam la monga i gagas. ³⁶Mo laradi ik lok kaka bubua levempipisik at laraamang, i gu kaxat pam la ira lok kaka luunun tin, la mo levempipisik teren i lok ngan lorooro avolo; la kerepmo mo laradi itlotlo la mo laradi ik lok kaka bubua levempipisik at laraamang, du buru duba momo. ³⁷I lox asorun na levelinga i lok keretna, ‘Lara itlotlo la lara vetpes ik lok kaka bubua levempipisik at laraamang.’ ³⁸La kerepmo aga riki vam nimi xusu ri lok ka lempanga anan at laraamang, nemi xa xopmen mi goxotlotlo li i; lentaba vetpes digatlotlo li i go la nemi mik lok kaka levempipisik teren.”

Buaang Limixin Me Samaria Diga Nuunu

³⁹Buaang atnedi limixin me Samaria ap mo lemenemen diga nuunu at ne Iesu mila latkin ga lok do, “Neni ira tong axasep pam ia mi lempanga

axap nenia agak lox i.”⁴⁰ Kuren la ap mo loxonaleng mo limixin diga vot pasa i, diga sing i xusu na nemen eburu be midi; la ne Iesu ga nemen eburu midi go at legepu aleng.

⁴¹Buaang bok atnedi diga nuunu at ne Iesu, mumu levelinga ap mo latkin, ⁴²la diga lok tin keretna, “Ma nuunu ba, kopmen do at levelinga uga tong i, ketla mila nema axa mara ronga ba i, la maklen ba i do neni Laradi Loklox Arooro ruturun ti limixin at na lavatbung menemen.”

Iesu Ga Lox Aroo Lamdak At Laradi Gomgo

⁴³Melemu at legepu aleng Iesu ga nemen go Saikar, neni ga vas kaxat basinge di la gat pas uto Galili. ⁴⁴Ganoxa ne Iesu ga lok, “Laradi vapaase alii, kopmen di noxo lok ngangao ren to at lenep axa ren.” ⁴⁵Se neni ga vot go Galili, limixin mego diga lok momo aleng min, mila at loxonaleng nedi digat pas uto Jerusalem ti leluxa at Lovovolo Pe, diga ven lempanga axap ne Iesu ga lox i ap mo leluxa.

⁴⁶Iesu gamlong uto Kena at lenep Galili, lemenemen neni ga ba gili laxadan ti lavaen e.

La lara laradi gomgo at la gavaman ga nemen to Kaprenaum la lamdak teren ga meres. ⁴⁷Se neni ga ronga i do ne Iesu ga vot boro Judaia la uto Galili, ni ga vosiga i la ga sing i xusu nat pas uto Kaprenaum la na lox aroo lamdak teren; monga gak midi ameremet. ⁴⁸Iesu ga lok tin, “Kopmen tara atnimi noxo nuunu se do mina ven lempanga sangsangu.”

⁴⁹Laradi gomgo ga lok tin, “Leeme Silok, una emu eburu minia; dola kopmen, lamdak tarak naba met.”

⁵⁰Iesu ga lok tin, “Una onon, lamdak taram naba roo.”

Laradi gomgo ga nuunu at levelinga at ne Iesu la ga vas kaxat. ⁵¹At lavatpas teren uto xolonu lavasaxaruki ren diga xip tangarang kaka i la diga lok tin keretna, “Lamdak taram mo naba roo.”

⁵²La neni ga sue di mi loxonaleng salai lamdak teren ga lox avukat kakalik, la diga lok, “At legesa xonaleng itinongo xanangking mo liplivi ita repes basinge i.” ⁵³La temen lamdak ga doxoma bilong ti levelinga at ne Iesu ga vaase i rin at loxonaleng kerepmo do, “Lamdak taram naba roo.” Kuren la neni eburu minedi axap limixin diga nemen at loogu ren diga nuunu at ne Iesu.

⁵⁴Na lavanga sangsangu, ni lugugu sepsev agepura at lempanga sangsangu ne Iesu ga lox i melemu at laaleng ni ga vas kaxat boro Judaia la uto Galili.

Iesu Ga Lox Aroo Laradi Ro At Ladan

5 ¹Melemu at nai, limixin me Judaia diga lok leluxa silok to Jerusalem la ne Iesu gat pas tin. ²Ap mo lemenemen silok langas povolo silok gak lok, laasen teren ‘Langas Sipsip.’ Ladan kis gak lok

saparav i, laasen teren at lavapaase Ibru do Betsaida; lavalimo lengkon gu mo gak lok. ³Buaang atnedi limixin digak meres la mo digak midi ap mo lavalimo lengkon gu; levengkatli main, la nedi bok di goxo epovo rit pas, la nedi bok lengkot atdi ga molo axap. [Digat kis ngais ladan kusu na vonen kaxat; ⁴mila at leventaba levenaleng laangelo at ne Moroa ga putup ap mo ladan la gak lox avonen i. La do laradi mekmeres ga los tup avot ap mo ladan do ga onen kaxat, neni naba lox avukat basinge lanmeres teren.] ⁵Lara laradi mo ga nemen, lanmeres gak lok teren at lavantun sangaun mi lavanuan maares axap. ⁶Iesu ga ven i gak midi go, la gaklen pam i do mo laradi gak meres at buaang laxanmaares; kuren la ne Iesu ga sue i, “Kereva, u vara box i do una lox avukat?”

⁷Laradi mekmeres ga vorang i rin, “Leeme Silok. Axo ruuna tara nade xusu naba lok li ia ro at ladan kis, do ladan i vonen kaxat. Nia ak lok tong i do anat los tup teren, ketla leventaba vetpes ta giat los tup avot ta ria”.

⁸Melemu ne Iesu ga lok tin, “Katu kaxat, kip kaka lempanga mikmidi ram la una onon.” ⁹Soso mun mo laradi ga lox avukat ta, la ga xip kaka lempanga mikmidi ren la ga vas kaxat.

Na lavanga sangsangu ga vot at laaleng kaala; ¹⁰kuren la luvuttadi amgomgo at limixin me Judaia diga lok ti mo laradi ga lox avukat, “Lingina ni laaleng kaala, la ixok mokso at Lenavolo atdik kusu unap kip lempanga mikmidi ram.”

¹¹La ni ga lok, “Laradi no i lox avukar ia, i tong i ria do ana xip ka lempanga mikmidi rak la ana onon.”

¹²La diga sue i, “Nege nom laradi?”

¹³Ketla laradi no ga lox avukat goxoklen i do nege i mo laradi, mila buaang nedi limixin diga umsu ap mo loxot la ne Iesu no ga vas ekula kaxat pam.

¹⁴Melemu ba, Iesu ga vas panga ka i ro xeneng at loogu laplavang la ga lok, “Una ronga i na. Monga u lox avukat pam. Una xap ta rik lok laxakapmek; lavanga tavanga i lok kapmek aleng ba vot parav u.”

¹⁵Melemu mo laradi ga vas kaxat la ga tong i ri luvuttadi amgomgo at limixin me Judaia, do ne Iesu vam mo ga lox avukar i.

Luvuttadi Amgomgo Diga Puse Ngas Ti Sev Amet Ne Iesu

¹⁶Kuren la luvuttadi amgomgo diga ru ka i xusu dina munepen mi ne Iesu, mila neni ga lox aroo mo laradi at laaleng kaala. ¹⁷Iesu ga lok tidi, “Ne Tamak i gugu at levenaleng amisik se lingina, la nenia bok a gugu.” ¹⁸Na levelinga at ne Iesu ga lox axatu levendoxoma at luvuttadi amgomgo la diga puke ngas kusu dina sev amer i; lavasuun teren do ne Iesu ga lox aroo laradi at laaleng kaala, la neni ga tong i do ne Moroa ni ne Temen, la at na mun i neni ga tong i do neni i epovo mun mi ne Moroa.

¹⁹La ne Iesu ga lok tidi, “A tong tuturun i rinimi, nenia ne Nitna xopmen anak lok tevempanga mi lololos axa rak; nenia ak lok mun

levempanga salai nenia a ven i at ne Tamak. Levempanga salai ne Tamak ik lox i, nenia ne Nitna bok ak lox i. ²⁰Tamak i balamu ia, ne Nitna la ik lox ase ia mi levempanga salai neni axa ik lox i. Neni naba lox ase ia mi levempanga i silok aleng ti mo lempanga sangsangu, la nemi miba sangu aleng. ²¹Tamak ik lox axatu kaxat amlong nedi limixin diga met la im taba nedi mi lороoro; kuren mun la nenia ne Nitna am taba lороoro rinedi, nenia a vara i do ana raba di min. ²²Tamak ga ke xepe lugugu ri ronga linga. Ketla neni ga raba vam ia, ne Nitna mi lololos kusu ri ronga linga, ²³kusu limixin diba lok ngangao rak ne Nitna kerekngan mun di lok ngangao at ne Tamak. Do tara noxo lok ngangao rak ne Nitna, i lok ngan ta do ixo lok ngangao at ne Tamak, mo ga riki ia, ne Nitna ude.

²⁴A tong tuturun i rinimi. Do tara i ronga levelinga rak, la i nuunu ap mo lara ga riki ia, neni ira lok ka vam lороoro avolo. Neni xopmen noxo tu at lavapaase at laaleng ete, ketla ira roo suu vam basinge lanmet la ira ruuna ka vam lороoro avolo. ²⁵A tong tuturun i rinimi. Laaleng mo i auret la nangai ira vot pam la limixin diga met pam diba ronga linga rak, ne Nitna ne Moroa; la do nedi dina ronga res tarak, diba roo. ²⁶Tamak, neni bok lavasuun at lороoro, kuren mun la neni ga lox ia, ne Nitna xusu nenia lavasuun at lороoro. ²⁷La neni ira siam avolo vam ia, ne Nitna xusu anaba ronga linga at laaleng ete, mila nenia Laradi Mevana.

²⁸Nemen mita sangu at nai mila laaleng naba vot la limixin diga met pam diba ronga laxaka tarak, ²⁹la diba ru suu boro at lara maaut atdi; la nedi, diga lok loklok nunuan, diba xatu la dina rooro, la nedi digak lok laxakapmek, diba xatu la dinat pas uto at lemenemen songsongot. ³⁰Nenia axo epovo do ana lok lempanga mi lodoxoma axa rak; a ronga res mun at levelinga ne Moroa i tong i ria. Kuren la mo do nia ana ronga linga, a lox i mi langas i ruturun, mila axo lok tong i do ana lok lugugu xerekngan nia a vara i, ketla a gugu mun mi lodoxoma ap mo lara ga riki ia ude.

Lempapaase Aru Mumu Ne Iesu

³¹Do nenia xusuk ana paase aru axa ia, levelinga nia a vaase i, noxo mumuat. ³²Ketla ne Moroa i paase aru ia, la aklen i do mo levelinga ni i paase mu ia min, i ruturun. ³³Miga riki luvuttadi vapaase atnimi uto at ne Jon, la ni ga tong asu levelinga ruturun mumu ia. ³⁴Axok pakes ti levelinga at tentaba vetpes kusu ri lox axasev i do nia nege; ketla a tong na levelinga at ne Jon kusu nemi mina siam ka i la ne Moroa naba lox arooro nimi. ³⁵Jon ga tong asu levelinga at ne Moroa la kerepmo ni ga lok ngan lababao i lox asu laxasep, la at leventaba leven gaaling miga lok momo ren.

³⁶Ketla a ruuna levelinga mumu ia la i silok aleng ti levelinga ne Jon ga tong asu i. Leven gugu nia a lox i, ni leven gugu ne Tamak ga raba

ia min; anai levempanga nia a lox i, i lox asuusu i do ne Tamak ga riki ia. ³⁷La ne Tamak, mo ga riki ia, neni bok i paase aru ia. Nemi mi goxo ronga xibis tinotno laxaka ren, kopla mi gita ven labantuxu ren. ³⁸La nemi mi goxom tebeng tu avarang at levelinga ren keneng at lorooro atnemi, mila nemi mi goxo nuunu rak, no neni ga riki ia ude. ³⁹Mi reven mumu amisik Lovoang Kaala mila mi doxoma i do keneng teren miba vuse ka lorooro avolo. La mo levelinga i paase mumu ia. ⁴⁰Ketla nemi xa mi xopara na nuunu rak kusu miba lok ka lorooro.

⁴¹Nia a goxo vot de xusu ti lok ka leemi asu. ⁴²Ketla akleklen lebelen nemi. Aklen i do labalamu ri ne Moroa xopmen na nemen keneng at lebelen nemi. ⁴³Agara vot eburu vam mi lololos at ne Tamak, ketla kopmen mina siam ka ia. Do tara na paase mi lololos axa ren, nemi miba siam ka i. ⁴⁴Mi vavara i xusu miba lok ka leemi asu boro atnemi xa, ketla mi xopara i do mina lolos ka lomomo ri ne Moroa; la neni Lomoroa xusuk mun, kusu neni naba emi asu minimi. Kuren la i lolos aleng kusu mina nuunu.

⁴⁵Nemen mita doma i do nia anaba sok taba nemi mi levelinga ro melamgo at ne Tamak do nemi miga lok laxapmek. Ne Moses axa neni naba sok taba nemi mi levelinga, mila nemi mi nunua i do ne Moses naba lok tooro nemi. ⁴⁶Do nemi mi nuunu ruturun at levelinga at ne Moses, miba nuunu ruturun tarak, mila neni ga malagan mo levelinga mumu ia. ⁴⁷Ketla mo do mixo nuunu at levelinga ren, miba nuunu ba xereva at levelinga rak?”

Iesu Ga Raba Luxa Buaang Limixin
(*Mt 14:13-21; Mk 6:30-44; Lu 9:10-17*)

6 ¹Melemu at nai Iesu gamlong polo manga at lavatdan kis Galili. (Laasen bok teren Tiberias.) ²La buaang nedi limixin diga mumu asu i, mila digara ven pam levempanga sangsangu neni ga lox i ri lox avukat nedi digak meres. ³Melemu ne Iesu ga vas urut uto vana at loxongkaana la ga xis eburu mi luvuttadi loklok ka anasa ren. ⁴Leluxa silok at limixin me Judaia diga so asen i do Lovovolo Pe mo nga ga auret.

⁵Iesu ga milik tangtagap la ga ven i do, buaang nedi limixin mo digat pas kusu dina vot pasa i, kuren la ni ga sue ne Pilip, “Ataba un kaka teveluxa ua xusu ba epovo ri na limixin?” ⁶Ni ga tong i na xusu ri lok tong pen ne Pilip; neni gaklen pam lai neni naba lox i.

⁷Pilip ga vorang i rin, “Ixo epovo xusu ata un kaka tevengkongkide mi tegepu sangaun kobot (200) denarias kusu ridi ri anan.”

⁸Laradi loklok ka anasa at ne Iesu, laasen teren ne Endru, neton ne Simon Pita ga lok, ⁹“Lara lamdak na, i ruuna lavalimo lengkongkide xakalik at levempiao bali la luemat kakalik. Ketla noxo epovo ri na limixin solo.”

¹⁰La ne Iesu ga lok ti luvuttadi loklok ka anasa ren, “Mina tong i ri limixin kusu dina xis kopok.”

Mo lenep ga umsu mi laxampivilis. Kuren la limixin diga xis kopok; nedi lavatlok axap diga epovo at lavalimo larabin sangsangaun kobot (5000). ¹¹Iesu ga lok ka loxongkide, la ga tong loklox avukat, la digam taba mo limixin min digat kis. Ni ga tong avukat bok ti ne Moroa mi luemat la ga raba bok limixin min, la nedi axap diga an mais ga epovo at lavavara atnedi.

¹²Se diga an mais axap, Iesu ga lok ti luvuttadi loklok ka anasa ren, “Mina lok ka bubua lengkon atat luxa; nemen dik ata ke xepe tengkot.”

¹³Kuren la diga lok kaka bubua axap nom lengkon atat luxa, la diga suxa aumsu lasangaun mi legepura leventat min boro at nom lavalimo lengkongkide at lempiao bali, mo limixin diga anan i.

¹⁴Mo limixin go diga ven mo lavanga sangsangu ne Iesu ga lox i, la diga lok, “I ruturun aleng; neni mo leeme vapaase alii diga tong i do naba vot at na lavatbung menemen!” ¹⁵Iesu gaklen pam i do limixin mo diba vot pasa i la dina lok kaka i, kusu dina pu soso i ngan loorong silok tidi; kuren la neni xusuk ga vas kaxat uto at lengkongkaana vetpes.

Iesu Gat Pas To Mavana At Lavatdan Kis Galili

(Mt 14:22-33; Mk 6:45-52)

¹⁶Ga ukantinao bukboxumin, luvuttadi loklok ka anasa at ne Iesu diga vas si uto xopok at lavatdan kis, ¹⁷la diga los kas at lesebang la diga sen bilong at lavatdan kis uto Kaprenaum. Lavanga mo garang bungmain ta, la ne Iesu goxovisi vosiga di. ¹⁸Langsangan lamanman lolos gat mas la ga lok ladan ga rem ekapus. ¹⁹Luvuttadi loklok ka anasa digatla uto vaxalom la diga ven ne Iesu gat pas to mavana at lavatdan kis uto saparap di. La diga marat aleng. ²⁰Iesu ga lok tidi, “Nemen mita marat. Nenia mun na!” ²¹La diga mulus ka i uto at lesebang; la soso mun lesebang ga oso uto loxon ap mo loxot nedi diga sesen tin.

Limixin Diga Puke Ri Ne Iesu

²²Ap mo manga lara laaleng petpes, limixin no diga nemen to ap mo lenep ne Iesu ga raba nedi mi leveluxa e, diga ven i do legesa sepang mun mo ga nemen. Digaklen i do ne Iesu goxo emu eburu mi luvuttadi loklok ka anasa ren ap mo lesebang, la luvuttadi loklok ka anasa xusuk mun diga sesen. ²³Melemu leventaba lesebang boro Tiberias diga oso go saparap mo lenep limixin diga anan lengkongkide e, melemu at Leeme Silok ga tong avukat ti ne Moroa. ²⁴Se limixin diga ven i do Iesu goxok lox e, la luvuttadi loklok ka anasa ren bok, diga los kas at levesepang la diga sen uto Kaprenaum, kusu dina reven tin.

Iesu Neni Lakde At Lorooro

²⁵Se limixin diga long lenget ne Iesu to Kaprenaum, diga lok tin, “Leeme loklox ase, u vot de lingisa?” ²⁶Iesu ga vorang i ridi xeretna,

“A tong tuturun i rinimi. Mi reven pupuse ria mila miga anan levengkongkide la nemi axap miga an mais teren, ketla kopmen do miga xasep avukat at lavasuun at levempanga sangsangu nenia aga lox i. ²⁷Nemen mita gugu ri leveluxa ua naba sonao soso; ketla mina gugu lolos ti leveluxa i nemen amisik ti lorooro avolo. Na leveluxa, nenia, Laradi Mevana, anaba raba nemi min, mila ne Moroa ne Temen dik ira soxolik ka vam ia.”

²⁸Kuren la diga sue i, “Maba lok lavanga salai xusu manaba lox epovo lavanga ne Moroa i vara i do maba lox i?”

²⁹Iesu ga vorang i ridi xeretna, “Lavanga ne Moroa i vara i xusu mina lox i, i lok keretna; mina nuunu ap mo lara ne Moroa ga riki i.”

³⁰La diga sue rin keretna, “Lavanga sangsangu sala uba lox i xusu maba ven i la mana nuunu ba ram? Uba lok lavanga salai? ³¹Lavalabat atnama diga anan leveluxa at ne Moroa ro at lamatbin laasen teren lamaana, kerekngan Lovoang Kaala i tong i do, ‘Ni ga raba nedi mi levengkide boro vana at laxalibet.”

³²Iesu ga lok tidi, “A tong tuturun i rinimi. Ne Moses goxo raba nemi mi lakde boro vana at laxalibet, ketla ne Tamak axa im taba nemi mi lakde ruturun boro vana at laxalibet. ³³Mo lakde ne Moroa i raba i, neni i ngan mo lara ga si boro vana at laxalibet la im taba lorooro ri limixin at na lavatbung menemen.”

³⁴Diga lok, “Leeme Silok. I ru ka nga i mo lingina la melemu una raba amisik nema mi nom lakde.”

³⁵Iesu ga lok tidi, “Nenia lakde at lorooro. Mo do tara na vosiga ia, neni noxo roxo bok ba; la neni do i nuunu rak, neni noxo minu bok ba. ³⁶A tong i rinimi do mira ven pam ia, ketla kopmen mina nuunu rak, kerekngan a tong pam i rinimi. ³⁷Nedi axap ne Tamak i raba ia midi, dinaba vosiga ia. La do tara na vosiga ia, nenia noxo sok tixirixes i. ³⁸Nenia agoxo si boro vana at laxalibet do ti mu asu lavavara rak, ketla ti lox epovo lavavara ap mo lara ga riki ia ude. ³⁹Lavavara ap mo lara ga riki ia, i lok keretna; nenia noxo ke asoogong tegesara atdi limixin neni ga raba vam ia midi, la anaba lox aroo xat di at laaleng ete; ⁴⁰mila lavavara at ne Tamak i lok keretna, nedi do di ven kisp ne Nitna ne Moroa la di nuunu ren, dinaba lok ka lorooro avolo, la nia anaba lox aroo xat di at laaleng ete.”

⁴¹Limixin amgomgo diga epaase xuxurung mumu ne Iesu, mila neni ga lok do, “Nenia lakde aga si boro vana at laxalibet.” ⁴²Diga lok, “Neni mun ne Iesu, nitna ne Josep la ne Maria. Nedik taklen ne temen mi nenen. I lok kereva la neni i tong i do ni ga si boro vana at laxalibet?”

⁴³La ne Iesu ga vorang i ridi xeretna, “Na xap ta nimi at lavapaase xuxurung kantubu atnimi. ⁴⁴Kopmen tara i epovo na vosiga ia, se do ne Tamak na sat ka i ude saparav ia; la nia aba lox aroo xar i at laaleng ete. ⁴⁵Lavaeme vapaase alii diga malagan li levelinga xeretna,

'Limixin axap, ne Moroa naba anasa di.'

Ais 54:13

Nedi axap do di rongga ne Tamak la dia lok kaka loklox anasa ren, nedi diba vosiga ia. ⁴⁶Kovisi tara na ven ne Tamak; nenia aga laa boro at ne Moroa, nenia xusuk mun agara ven pam ne Tamak. ⁴⁷A tong tuturun i rinimi; do tara na nuunu rak, neni naba ruuna ka lorooro avolo. ⁴⁸Nenia lakde at lorooro. ⁴⁹Lavalabat atnimi diga anan leveluxa at ne Moroa ro at lamatbin, la diga met. ⁵⁰Ketla na lakde ga si boro vana at laxalibet, ni i lok petpes; la do tara na anan teren, neni noxo met. ⁵¹Nenia lakde at lorooro la aga si boro vana at laxalibet. Do tara na anan at na lakde, neni naba rooro amisik. Na lakde, ni levenuut tarak. Aba raba i ri limixin axap kusu diba rooro."

⁵²Anai levelinga ga vaxaru kaxat ka lavapaase mukmusak kantubu at luvuttadi amgomgo la diga esue xeretna, "Na laradi ba raba dik mi levenuut teren kereva xusu ri anan?"

⁵³Iesu ga lok tidi, "A tong tuturun i rinimi. Do mi noxo anan at levenuut tarak, Laradi Mevana, la mi noxo inin at lada rak, mi noxo ruuna ka lorooro. ⁵⁴Do tara na anan at levenuut tarak la na inin at lada rak, neni ira ruuna ka vam lorooro avolo, la nia anaba lox aroo xar i at laaleng ete. ⁵⁵Levenuut tarak ni leveluxa ruturun, lada rak ni laxadan tuturun ti inin. ⁵⁶Do tara na anan at levenuut tarak la na in at lada rak, neni i nemen tarak la nia a nemen teren. ⁵⁷Ne Tamak neni im taba lorooro, neni ga riki ia, la keneng mun teren, la nenia bok a rooro. Kuren la, do tara na anan at levenuut tarak, neni naba ruuna ka lorooro xeneng mun tarak. ⁵⁸Anai ni lakde ga si boro vana at laxalibet; ixo lok ngan lakde, lavalabat atdik diga anan i, ketla melemu diga met. Do tara na anan at na lakde, neni naba rooro amisik." ⁵⁹Iesu ga tong asu mo levelinga at laaleng neni ga anasa ro at loogu singising to Kaprenaum.

Luvuttadi Loklok Ka Anasa Diga On Basinge Ne Iesu

⁶⁰Buaang atnedi luvuttadi loklok ka anasa at ne Iesu diga rongga i na la diga lok, "Anai levenanasa i lolos tinotno. Nege i epovo na siam ka i?"

⁶¹Iesu gaklen pam i do luvuttadi loklok ka anasa ren diga paase kuxurung mumu na levelinga ren. La ni ga sue di, "Kereva, na levelinga i lok kapmek lebelen nimi? ⁶²Kereva, dola mina ven ia, Laradi Mevana, ana urut uto vana, minaba siam ka ba levenanasa rak? ⁶³Loroonan Kaala im taba limixin mi lorooro; levenuut kusuk mun kopmen na epovo na lok tooro di. Levelinga nenia a vaase vam nimi min, neni levelinga at Loroonan kaala la at lorooro. ⁶⁴Ketla leventaba atnimi move xopmen dina nuunu rak mi lunuunu atdi."

At lavakpaxaru kaxat at lugugu ren, Iesu gaklen pam nege nedi leventaba di goxo nuunu ren, la nege mo lara naba song araba i ri limixin kapmek. ⁶⁵La ni ga lok bok keretna, "Ni na levelinga neni lavasuun teren

la nia ara tong i rinimi do tara noxo vosiga ia se ne Tamak na lox avolo i xusu neni na nuunu rak.”

⁶⁶Melemu at nai, buaang atnedi luvuttadi loklok ka anasa ren digamlong basinge i la kopmen bok ba di goxo emu eburu min.

⁶⁷La ne Iesu ga sue lasangaun mi legepura luvuttadi loklok ka anasa ren keretna, “La nemi bok mi vara i do minamlong?”

⁶⁸Simon Pita ga vorang i rin keretna, “Leeme Silok, kopmen bok ba tara mabat kis esogo min. Nenu xusuk mun u ruuna levelinga im taba lorrooro avolo. ⁶⁹La monga ma nuunu la maklen i do nenu laradi melemelengan boro at ne Moroa.”

⁷⁰Iesu ga lok tidi, “Nia aga soxolik ka nemi lasangaun mi legepura ngan luvuttadi loklok ka anasa rak. Ketla legesara atnimi ni lamdak at ne Satan.” ⁷¹Iesu ga tong asu i na mumu ne Judas, lamdak at ne Simon Iskariot; Judas neni lara atnedi lasangaun mi legepura luvuttadi loklok ka anasa, la ga song araba ne Iesu ri limixin kapmek.

Iesu Mi Luvutneton

7 ¹Melemu at nai, Iesu gat pas at levenmenemen to Galili; ni goxo vara i xusu nat pas to Judaia, mila luvuttadi amgomgo diga vara i xusu dina sev amer i. ²Lara leluxa at leme Judaia mo ga sixit auret ta. Laasen at na leluxa do, ‘Leluxa at Laraugu Xukuxut.’ ³Luvutneton ne Iesu diga lok tin, “Una vas kaxat basinge na loxot, la unat pas uto Judaia ti mo leluxa, kusu luvuttadi loklok ka anasa ram diba ven levempanga sangsangu uba lox i. ⁴Do u vara i do limixin dinaklen u, nemen uta nemen alipe. Nenu uk lok levempanga sangsangu, kuren la una lox asuvos u ri limixin axap.” ⁵Diga tong asu i na mila kopmen tara atdi luvutneton ne Iesu ga nuunu ren.

⁶La ne Iesu ga lok tidi, “Loxonaleng ti lox asuvos ia xovisi na vot. I epovo do nemi minat pas uto at leluxa, ⁷mila limixin at lavatkangka di noxo musak nimi; ketla diba musax ia, mila nia a tong amisix i do loklok atdi i lok kapmek. ⁸Minat pas ti mo leluxa. Nenia noxot pas soso rin, mila loxonaleng ti lox asuvos ia xovisi na vot.” ⁹Ni ga tong i na, la neni ga nemen go Galili.

Iesu Gak Lok At Leluxa At Laraugu Xukuxut

¹⁰Melemu at luvutneton digat pas uto at leluxa, Iesu bok gat pas. Kusuk mun neni goxot pas asuvos, ni gat pas epep mun kusu limixin di noxoklen i do neni mo gak lok ap mo leluxa. ¹¹Luvuttadi amgomgo diga reven tin go at leluxa, la diga susue mo limixin diga vot go at leluxa, “Ua nga i no?”

¹²Buaang atnedi limixin diga paase siksikma mu ne Iesu. La leventaba luvuttadi diga lok, “Neni lagale laradi.”

Leventaba diga lok, “Kopmen, neni i sasar asoogong buang limixin.”
 13Ketla kopmen teta goxo paase mumu i at lasaxaven, mila diga marat at luvuttadi amgomgo.

14At laaleng sev avanuet ap mo leluxa, Iesu ga beles to xeneng at loogu laplavang la ga ru ka i xusu na anasa limixin. 15Luvuttadi amgomgo diga sangu aleng la diga esue, “Na laradi goxot pas ti loklox ase la ga lok ka na lakleklen meva?”

16Iesu ga vorang i ridi, “Lavanga salai nia a anasa min kopmen at lakleklen tarak, ketla boro ap mo laradi ga riki ia ude. 17Do tara i vara i do na lok levempanga ne Moroa i vara i, neni nabaklen kibis ka i do nenia a anasa mi levelinga boro at ne Moroa, kopla a paase aru mene nga ia mi lololos tarak. 18Laradi do i paase aru xa i, neni i ngan do i lox asilok axa i. Do tara i vara i do na lox asilok mo lara ga riki i, neni i paase ruturun la kopmen taxaxarang na nemen teren. 19Moses ga raba nemi mi Lenavolo. Ketla kopmen teta atnimi ik lox epovo na Lenavolo. La tila ba mik lok tong pen i do mina sev amer ia?”

20La limixin diga lok, “Lagas kapmek i nemen keneng taram! Nege nga mo ik lok do nap sev amer u?”

21La ne Iesu ga vorang i ridi xeretna, “Aga lok legesa vanga sangsangu la nemi axap miga sangu. 22Moses ga tong i rinimi do mina rivit kepe levengkontuxu at laxamdak atnimi. Kopmen ne Moses ketla lavalabat atnimi mo diga vaxaru ka i; miba vit kepe levengkontuxu at laxamdak lixilik atnimi at laaleng kaala. 23Mo do mina vit tamdak at laaleng kaala xusu mi noxo los polo Lenavolo, tila mi musak mila nia ga lox aroo laradi at laaleng kaala? 24Nemen mita ila mumu ia mi lodoxoma at na lavatkangka, ketla mina ila mumu ia mi lodoxoma avukat boro at ne Moroa.”

Agut Neni Na Lanarong

25Ap mo loxonaleng leventaba luvuttadi go Jerusalem diga lok, “Agut neni vam na laradi, luvuttadi amgomgo di lok do na sev amer i. 26Mina ven ba i neni i anasa at lemeren limixin axap. La kopmen tara na paase tangarang i. Agut limixin amgomgo diklen i do neni Lanarong. 27Ketla do Lanarong na vot, teta noxoklen i do neni meva. La nedik ataklen na laradi do neni ga laa meva.”

28La at loxonaleng ne Iesu ga anasa ro at loogu laplavang, neni ga vaase lolos keretna, “I ruturun do nemi miklen ia, la miklen i do nia aga laa meva. Ketla agoxot pas ude at lavavara axa rak. Mo lara ga riki ia, neni luruturun. La nemi mixoklen i. 29Ketla nenia aklen i, mila nenia agat pas boro ren la neni ga riki ia ude.”

30Melemu diga lok tong i do dina ranga alis i, ketla kopmen teta goxo long tu ren, mila loxonaleng teren goxovisi epovo. 31Ketla buang atnedi

limixin diga nuunu ren diga lok keretna, “Na laradi i lok lempanga sangsangu i silok aleng, kuren la ixo epovo do tara vetpes na vot ngan Lanarong la na lok lempanga i silok tin?”

Luvuttadi Amgomgo Diga Riki Lentaba Uto Saparap Ne Iesu

³²Lubung Parisi diga ronga limixin diga paase siksikma mu ne Iesu la levelinga ni ga tong i. Kuren la nedi eburu mi lavamaasa silok diga riki leventaba luvuttadi rutu mu at loogu laplavang uto at ne Iesu xusu dina ranga alis ka i.

³³Iesu ga lok, “A noxo nemen abao eburu minimi la melemu ba anat pas ba uto saparap mo lara ga riki ia. ³⁴Miba reven tia, ketla minoxo vuse ka ia, mila lenep nia ana nemen teren, nemi mixo epovo do minat pas uve.”

³⁵Luvuttadi amgomgo diga epaase xantubu atdi xeretna, “I lok do ni mo nat pas ua xusu nedik noxo vuse ka i. Agut neni nabat pas uto at tara temenemen silok at limixin boro Grik; no limixin me Judaia dik lox e la neni naba anasa limixin boro Grik. ³⁶Neni i lok do, ‘Miba reven tia, ketla mi noxo vuse ka ia.’ La i lok bok do, ‘Nemi mixo epovo do minat pas ti mo loxot nenia aba nemen e.’ Ua lavasuun at na levelinga?”

Ladan Im Taba Lorooro

³⁷At laaleng kavaxap ap mo leluxa ni laaleng silok. At mo laaleng, ne Iesu ga ru upana la ga xup lolos keretna, “Do tara go i minu, neni na vosiga ia la na inin. ³⁸I ngan Lovoang Kaala i lok, ‘Do tara na nuunu rak, laxadan im taba lorooro naba sesen su boro xeneng at lorooro ren.’ ³⁹Iesu ga vaase i na mumu Loroonan Kaala. Nedi diga nuunu at ne Iesu, diga ruuna ka i. Ap mo levenaleng ne Moroa goxovisi raba Loroonan Kaala, mila ne Iesu goxovisi urut uto vana ri lixitkis orong teren.

Limixin Diga Paase Mumu Ne Iesu La Diga Epeseves

⁴⁰Buaang atnedi limixin keneng ap mo laneelen diga ronga ne Iesu ga tong na levelinga la diga lok, “I ruturun aleng do na laradi, neni mo leeme vapaase alii, ne Moses ga paase alii min.”

⁴¹La leventaba diga lok keretna, “Neni Lanarong.”

Ketla leventaba vetpes diga lok, “Lanarong noxo laa boro Galili.

⁴²Lovoang Kaala i tong i do Lanarong naba vot boro at libibinat at ne Devit, la diba visix i ro Betilem, lemenemen ne Devit gak lox e.” ⁴³Kuren la limixin diga epeseves mumu ne Iesu. ⁴⁴Leventaba diga lok do dina ranga alis i, ketla kopmen teta goxo long tu ren.

Luvuttadi Amgomgo Di Goxo Nuunu At Ne Iesu

⁴⁵Luvuttadi rutu mu at loogu laplavang digamlong uto saparap lavamaasa silok mi lubung Parisi, la lavamaasa silok mi lubung Parisi diga lok, “Tila mixo lok ka i ude?”

⁴⁶La luvuttadi rutu mu at loogu laplavang diga lok, “Kopmen tara i paase asu levelinga mumuat kerekngan mo laradi.”

⁴⁷La lubung Parisi diga lok, “Kereva, i bala vukpuk bok nemi?”

⁴⁸Kereva, tara at luvuttadi amgomgo kopla tara at lubung Parisi go i nuunu ren? ⁴⁹Kopmen tinotno! Ana limixin kopmen dinaklen tempanga xeneng at Lenavolo at ne Moses, kuren la lasaxaek i mumu di.”

⁵⁰Nikodimas neni lara atdi, no migo neni ga vosiga ne Iesu at lara laxanimin. Neni ga lok tidi, ⁵¹“At Lenavolo atdik ata xo lok li lumumuat mavana at tara, se do dia ronga linga vam teren kusu ri vuse ka lai neni ga lox i.”

⁵²Diga vorang levelinga ren mi levelinga mukmusak, diga lok keretna, “Agut nenu bok laradi gamasa boro Galili? Una ven avukat Lovoang kaala la uba xasep do kopmen teeme vapaase alii naba vot boro Galili.” ⁵³[Melemu nedi axap diga epeseves la digat pas ukolonu.

Diga Long Lenget Ka Latkin Ga Longka

8 ¹La nedi digat pas uto xolonu atdi getgesara, ketla ne Iesu gat pas uto at Lakaana Olip. ²Ga maxantamak suubu ap mo lara laaleng petpes, neni gat pas uto at loogu laplavang. La nedi limixin axap diga tu bubua kangkan i, la ni ga xis kopok la ga anasa di. ³La luvuttadi loklox ase at Lenavolo eburu mi lubung Parisi diga lam abeles lara latkin, diga long lenget ka i ga longka; la diga vaxaru li i ro melamgo atdi axap. ⁴Diga lok ti ne Iesu, “Laradi loklox ase. Na latkin neni i epot la ma long lenget ka i, i longka lara latlok kopmen ateren. ⁵At Lenavolo, ne Moses ga raba lara lavapaase lolos do tara tatkin na lok na loklok, taba lu amer i mi laxanuat. Ua levelinga ram ti na loklok?” ⁶Diga tong i na xusu ri lok tong ne Iesu mila diga vara i xusu dina bala raba i.

Ketla ne Iesu ga rikbu si la ga malagan to xopok at laxangka mi lisivisip teren. ⁷Diga tu go la diga susue ne Iesu mi levesusue, la neni ga ru urut akmokso upana la ga lok tidi, “Do tara atnimi goxovisi lok taxapmek, neni na lok ka tuat la na lu avot na latkin.” ⁸La neni ga rikbu manga la ga malagan manga ro xopok at laxangka.

⁹Se diga ronga i na, digat pas kaxat sisi basinge mo loxot, luvuttadi mukun avot; la melemu ne Iesu xusuk mun ga nemen eburu mi latkin move ga tu go. ¹⁰Iesu ga ru urut la ga lok tin, “Latkin. Ua nga di no? Kereva, tara gove i nemen kusu na vaxaru u at lavapaase?”

¹¹La mo latkin ga lok tin, “Kopmen teta, Leeme Silok.”

Iesu ga lok tin, “Nenia bok kopmen ana vaxaru u at lavapaase. Una onon, ketla nemen uta lok bok ba taxakapmek.”]

Iesu Ni Laxasep Ti Lavatbung Menemen.

¹²La ne Iesu ga vaase manga ri limixin keretna, “Nia laxasep at na lavatbung menemen. Do tara na nuunu rak, neni naba ruuna ka laxasep at lorrooro, la kopmen noxot pas at lamain.”

¹³La lubung Parisi diga lok tin, “Nenu u paase aru axa u, la levelinga ram kopmen nak mokso.”

¹⁴Iesu ga vorang i ridi xeretna, “Keke i do nia a paase aru axa ia, ketla levelinga rak i ruturun, mila nenia aklen lemenemen nenia aga vas kaxat meve la anabat pas bok uve. Kopmen minaklen lemenemen nenia aga vas kaxat teren la ti lenep nenia abat pas tin. ¹⁵Nemi mi ila mumu limixin mi lodoxoma at na lavatkangka, ketla nia anoxo ila mumu loklok at tara. ¹⁶Ket do nia ana ila mumu loklok at tara, levelinga rak naba ruturun; mila kopmen nenia xusuk a tong mo levelinga, ketla ne Tamak ga riki ia, neni ik lox amumuat levelinga rak. ¹⁷Levelinga ro xeneng at Lenavolo atnimi i lok keretna; do legepu radi dina siam at tevelinga, mo levelinga i ruturun. ¹⁸Nenia a paase aru axa ia, la ne Tamak bok ga riki ia, i paase aru box ia.”

¹⁹Diga sue i, “Ne Tamam ua?”

La ne Iesu ga lok, “Mixoklen ia la ne Tamak. Mo do minaklen ia, mibaklen bok ne Tamak.” ²⁰Iesu ga tong na levelinga at loxonaleng neni ga anasa limixin to xeneng at loogu laplavang, to at loxot, levempanga lili pilas ga nemen e. Ketla kopmen tara goxo ranga alis i, mila loxonaleng tin goxovisi epovo.

Mi Noxot Pas Ti Mo Lenep Nenia Anabat Pas Uve

²¹Iesu ga lok manga ridi xeretna, “Anaba onon basinge nimi, la miba reven tia; ketla miba seeve nop laxakapmek atnimi, la mixo epovo do minat pas ti mo lemenemen nenia anabat pas uve.”

²²Luvuttadi amgomgo diga lok tidi xa xeretna, “Neni i lok do, ‘Nedik dixo epovo rit pas ti mo lenep neni nabat pas uve.’ Ua lavasuun at na levelinga? Agut i lok do neni naba sev amet axa i.”

²³Iesu ga vorang i ridi xeretna, “Nemi limixin mede xopok, nenia boro vana; nemi limixin at na lavatkangka, ketla nenia xopmen mede xopox ia. ²⁴Kuren la a tong i rinimi do nemi miba seeve mumu laxakapmek atnimi. Do mixo nuunu do nenia mo a tong pam i rinimi, miba seeve mumu laxakapmek atnimi.”

²⁵La diga sue i, “Nenu nege?”

Iesu ga vorang i ridi xeretna, “Nia ara tong pam i rinimi. ²⁶At laaleng ete nenia aba ruuna laxampapaase solo mumu laxakapmek atnimi. Mo lara ga riki ia ude, neni luruturun, la mo levelinga ni ga raba ia min, nia a tong asu i ri limixin axap at na lavatbung menemen.”

²⁷Di goxo xasep do ne Iesu ga paase ridi mumu ne Temen. ²⁸Kuren la ne Iesu ga lok tidi, “Se do mina xip aurur ia, Laradi Mevana, ro vana at laxaba, mibaklen ba i do nenia nege la mibaklen ba i do nenia axo lok levempanga mi lavavara axa rak, ketla a vaase mun mo levelinga ne Tamak ga raba ia min. ²⁹La mo laradi ga riki ia ude, mo ik lox eburu

minia, ixo ke xepe xusux ia, mila nenia ak lok amisik levempanga i lox amomo i.” ³⁰Buaang atnedi limixin diga ronga ne Iesu ga tong asu na levelinga diga nuunu ren.

Nege Laxamdak At Ne Abaram?

³¹Kuren la ne Iesu ga lok ti leme Judaia mo diga nuunu vam teren, “Dola minam tebeng levenanasa rak, ba raturun do nemi luvuttadi loklok ka anasa rak. ³²La kerepmo mibaklen levelinga raturun at lorooro, la mo levelinga naba lox asepmus nemi.”

³³La diga lok, “Nema livipisik li at ne Abaram, la kovisi toxonaleng ma nemen ngan lavaanat saxaruki at teta. Ua lavasuun at nom levelinga ram u tong i do, maba sepmus?”

³⁴Iesu ga lok tidi, “A tong tuturun i rinimi. Do tara i lok laxapmek, neni lasaxaruki at laxapmek. ³⁵Lasaxaruki neni noxo epovo xusu neni lara xeneng ap mo lixitkis koetemen, ketla neni i gugu mene ridi. Ketla lamdak ap mo loxoetemen, neni i nemen amisik keneng at lixitkis koetemen. ³⁶Do nenia, ne Nitna na lox asepmus nemi, nemi miba sepmus tuturun. ³⁷Aklen i do nemi livipisik li at ne Abaram. Ketla nemi move mi doma i do mina sev amer ia, mila levelinga rak kopmen na nemen aulis keneng at lorooro atnimi. ³⁸A paase mumu levempanga ne Tamak ga lox ase ia min, ketla nemi mik lok levempanga ne temen nemi ik lox i.”

³⁹Diga lok tin keretna, “Temen nema ne Abaram.”

Iesu ga vorang i ridi xeretna, “Do nemi laxamdak tuturun at ne Abaram, miba lok leven gugu nunuan kerekngan ne Abaram ga lox i. ⁴⁰Nenia a tong asu mun levelinga raturun aga ronga i boro at ne Moroa la mi vara aleng i do mina sev amer ia; ne Abaram goxo lok tevempanga xerepmo. ⁴¹Nemi mik lok levempanga ngan ne temen nemi ik lox i.”

Diga lok, “Ne Moroa xusuk mun neni ne temen nama. La nema laxamdak tuturun teren.”

Luvutnitna Ne Satan

⁴²Iesu ga lok tidi xeretna, “Dola ne Moroa ne Temen nemi, nemi minaba balamu ia mila nenia aga laa boro at ne Moroa la monga nenia ak lok de. A goxo vas kaxat mi lodoxoma axa rak, ketla ne Moroa ga riki ia. ⁴³Tila mixo xasep at levelinga rak? Lavasuun teren keretna, nemi mixo epovo do mina siam ka levelinga rak. ⁴⁴Nemi laxamdak at ne temen nemi, ne Satan. La mi vavara i do mina mumu asu lavavara at ne temen nemi. Ga ru ka i at lurutu kaxat neni laradi sepsev amet tadi. La neni xopmen na tu at luruturun, mila kopmen turuturun keneng teren. Do neni i vaase laxaxarang, neni ik lok mene levempanga i epovo rin, mila neni laradi xaxarang, la neni lavasuun at laxaxarang. ⁴⁵A paase raturun, kuren la mixo nuunu rak. ⁴⁶Kopmen tara atnimi i epovo na lox asuusu i

do nenia aga bixurun mi laxakapmek. Dola a paase ruturun, tila ba mi xopara na nuunu rak? ⁴⁷Laradi i laa boro at ne Moroa, neni nang tonga levelinga at ne Moroa. Nemi xopmen boro at ne Moroa, mila kopmen minang tonga levelinga ren.”

Iesu La Ne Abaram

⁴⁸Luvuttadi amgomgo diga lok ti ne Iesu xeretna, “Nenu laradi boro Samaria la lagas i nemen taram.”

⁴⁹Iesu ga vorang i ridi xeretna, “Lagas kopmen na nemen tarak, a lok ngangao at ne Tamak, ketla nemi mixo lok ngangao rak. ⁵⁰Axo vara i do ana lox asilox ia xusu limixin diba lok ngangao rak. Ketla ne Moroa i vara i do limixin na lok ngangao rak la neni leeme rongtonga linga. ⁵¹A tong tuturun i rinimi. Do tara na ronga res at levelinga rak, neni noxo seeve.”

⁵²Luvuttadi amgomgo diga lok tin, “Anaa maklen ba i do lagas i nemen taram. Abaram ga met, la lavaeme vapaase alii bok diga met, la u lok keretna, do tara na ronga res at levelinga ram, kopmen noxo met. ⁵³Temen nema ne Abaram ga met, la nenu u tong i do u silok ti ne Abaram, la lavaeme vapaase alii bok diga met. U doxoma ba i do nenu nege?”

⁵⁴Iesu ga vorang i ridi xeretna, “Dola nenia ana lok asilox ia, levelinga rak naba lok ngan lavanga gamasa. Ketla ne Tamak ik lox asilox ia. Nemi mi tong i do neni ne Moroa atnimi. ⁵⁵Nemi xa xopmen minat kis ekilen mi ne Moroa, ketla nenia at kis ekilen min. Dola nia gita tong i do nia xopmen anat kis ekilen min, nenia a lok ngan laradi xaxarang, kerekngan nimi. Ketla nenia at kis ekilen min, la ang tonga res at levelinga ren. ⁵⁶Temen nemi ne Abaram ga lok momo aleng do neni naba ven lovtopot tarak, neni ga ven i la ga lok momo.”

⁵⁷Luvuttadi amgomgo diga lok tin, “Nenu xovisi lavalimo sangaun maares taram. La tila u tong i do uga ven pam ne Abaram?”

⁵⁸Iesu ga vorang i ridi xeretna, “A tong tuturun i rinimi. Gano ne Abaram goxovisi vot, nenia mo aga nemen pam.” ⁵⁹Diga ranga ka laxanuat do ri lu ne Iesu; ketla neni ga vas ekula kaxat la ga on basinge loogu laplavang.

Iesu Ga Lox Axasep Luxatli Main At Laradi

9 ¹At lara laaleng Iesu gat pas at langa, la ni ga ven lara laradi luxatli ren ga main, nenen ga visik axa i min kuren. ²La luvuttadi loklok ka anasa at ne Iesu diga sue i, “Rabai, laxakapmek atnege ga lox i la luxatli ren ga main? Ateren koplā at nenen mi ne temen?” ³Iesu ga vorang i ridi xeretna, “Luxatli ren ga main kopmen toxot at laxapmek teren koplā at nenen mi ne temen. Luxatli ren i main kusu ri lox asuusu lololos at ne Moroa at lorooro ren. ⁴Levenaleng na ik lok kusu atak lok lugugu ap mo

lara ga riki ia ude. Ketla laaleng naba vot la ata noxo epovo xusu ata gugu. I lok ngan laxangking move i soosoo la ata lok leven gugu, ketla dola lamain na vot, ata noxo gugu bok ba. ⁵Nenia move a nemen nade at lavatbung menemen la nenia laxasep ti limixin at na lavatbung menemen axap.”

⁶Melemu at na levelinga ren, neni ga xalaubis uto at laxangka; la ga gis nom loxongkangka, ni ga lox amulum i la ni ga lok li i ro at luxatli at nom laradi. ⁷La neni ga lok tin, “Unat pas la una gos lamaram to at lavatdan kis Siloam.” Lavasuun at na laasen do, ‘Gariki.’ La mo laradi ga vas kaxat, la ga gos lemeren la gamlong uto xolonu, luxatli ren monga ga repalas pam, ga reven ta.

⁸Nedi digak lox aurer i, la nedi bok limixin diga reven i ga ngising panga, avot be ri na lavanga sangsangu, la diga esue xeretna, “Kereva, neni vam na laradi no gat kis la ga ngising panga?” ⁹Leventaba diga lok, “Neni vam.”

Ketla leventaba vetpes diga lok, “Kopmen, ketla neni i ven ngan i.”

Ketla mo laradi xa ga lok, “Nenia vam mo laradi.”

¹⁰La diga sue lolos i, “Luxatli ram i lox avukat kereva?”

¹¹La ni ga vorang i ridi xeretna, “Lara laradi, laasen teren ne Iesu i xalaubis amumulum loxongkangka, la ia gis i de at luxatli rak, la ia lok tia do anat pas uto Siloam la ana gos lamarak. La nia a vas kaxat la ise do nia a gos lamarak, ara ven bok ba.”

¹²La diga sue i, “Ua nga mo laradi?”

La ni ga lok, “Axoklen i.”

Lubung Parisi Diga Ven Mumu Na Laradi

¹³Melemu mo limixin diga lok ka na laradi, luxatli ren ga main uto at lubung Parisi. ¹⁴Mo laaleng ne Iesu ga xalaubis loxongkangka la ga lox avukat luxatli ren, ni laaleng kaala. ¹⁵Kuren la lubung Parisi diga sue mo laradi do luxatli ren ga lox avukat kereva. La ni ga lok tidi, “Mo laradi i lok li loxongkangka mumulum at luxatli rak, la a gos lamarak la monga a epovo xusu ana reven.”

¹⁶Leventaba lubung Parisi diga lok, “Laradi i lox i na, kopmen boro at ne Moroa mila i los polo Lenavolo.”

Ketla leventaba vetpes diga lok, “Neni xopmen laradi xapmek mila laradi kapmek ixo epovo xusu na lok tevempanga sangsangu ngan i na.” La lekarakat ga ravasu xantubu atdi.

¹⁷La lubung Parisi diga sue amu manga mo laradi, “U lok do neni i lox avukat luxatli ram. Kereva lodoxoma ram tin?”

La neni ga vorang i ridi xeretna, “Neni leeme vapaase alii.”

¹⁸La luvuttadi amgomgo di goxo nuunu do luxatli ren ga main la mo nga neni ga epovo do na reven; kuren la diga riki lara laradi xusu na lam

ka ne temen mi nenen. ¹⁹La diga sue du, “Lamdak atnumu na? La kereva, at laaleng nenen ga visix i, luxatli ren ga main? I lok kereva la neni i reven manga?”

²⁰Temen mi ne nenen duga vorang i ridi xeretna, “Maklen i do neni lamdak atnama, la maklen box i do maga visix i, luxatli ren ga main. ²¹Ketla monga maxoklen i do i lok kereva la i epovo xusu na reven; la maxoklen box i do nege ga lox avukat luxatli ren. Mina sue i, neni laradi silok ta la neni xa ba vorang levesusue atnimi.” ²²Temen mi nenen duga tong i na mila duga marat at luvuttadi amgomgo. Luvuttadi amgomgo diga tong li vam levelinga do tara na tong i do ne Iesu neni Lanarong, diba sep pepe i xusu neni noxo vubeles bok ba uto at loogu singising. ²³Na lavasuun teren la ne temen mi nenen mo laradi duga lok, “Neni laradi silok ta; mina sue i.”

²⁴Diga ro ka amu manga mo laradi, luxatli ren ga main la diga lok tin, “Una xaape de melango at ne Moroa do nenu una vaase ruturun. Maklen i do na laradi ga lox avukar u, ni laradi xapmek.”

²⁵Mo laradi ga vorang i ridi xeretna, “Axoklen i do neni laradi xapmek kopla kopmen. Ketla leges avanga mene aklen i xeretna, luxatli rak ga main, ketla monga a reven avukat.”

²⁶Diga sue i, “I lok lavanga salai ru? La i lok arepalas luxatli ram kereva?”

²⁷La mo laradi ga lok tidi, “Ara tong pam i rinimi, la nemi mixo ronga i. Tila mik lok do mina ronga amu manga i? Agut nemi bok, mi vara i do, mina lok ngan luvuttadi loklok ka anasa ren.”

²⁸Diga vaase kapmek tin la diga lok tin keretna, “Nenu laradi loklok ka anasa ren, nema luvuttadi loklok ka anasa at ne Moses. ²⁹Maklen i do ne Moroa ga paase ri ne Moses; ketla ti nom laradi maxoklen tinotno i do neni ga laa meva.”

³⁰Mo laradi ga vorang i ridi xeretna, “Lavanga vetpes na. Mo laradi i lox avukat luxatli rak la mixoklen i do neni i laa meva. ³¹Ataklen i do ne Moroa kopmen nang tonga nedi limixin kapmek; ketla ing tonga mun nedi luvuttadi di lotu saparav i la nedi luvuttadi di mu asu lavavara ren. ³²Ga ru ka i at lurutu kaxat at na lavatbung menemen, goxovisi tara ga lox arepalas tuxatli at taradi, nenen ga visik axa i, la luxatli ren ga main. ³³Do mo laradi, xopmen ne Moroa nak lox eburu min, neni gita xo epovo na lox arepalas luxatli rak ngan tai na.”

³⁴La diga lok tin keretna, “Nenu u umsu mi laxapmek ga ru ka i at nenam ga visix u, la kereva ba uk lok tong i do una lox ase nama?” Kuren la diga sep pepe i xusu neni noxo vubeles bok ba uto at loogu singising.

Luxatli At Lebelen Laradi I Main

³⁵Iesu ga ronga i do diga sep pepe mo laradi. La ni ga vosiga i la ga sue i, “Kereva, u nuunu at Laradi Mevana?”

³⁶Mo laradi ga lok, “Leeme silok, una tong i ria do neni nege, kusu anaba nuunu ren.”

³⁷Iesu ga lok tin, “Ura ven pam i, la neni mo nga i epaase eburu minu.”

³⁸Mo laradi ga lok, “Leeme Silok, a nuunu ram.” La ni ga xis tiktikbu mi luvatgulom teren to melamgo at ne Iesu la ga lotu saparav i.

³⁹Iesu ga lok tin, “Aga vot nade at lavatbung menemen kusu ri ila mu loklok at limixin, la nedi lengkatli main diba reven avukat, la nedi di reven, levengkatli atdi ba main.”

⁴⁰Leventaba lubung Parisi digak lok go eburu min, diga ronga na levelinga, la diga sue i, “U doxoma i do nema bok lengkatli atnama i main?”

⁴¹Iesu ga vorang i ridi xeretna, “Dola lengkatli atnimi i main, i lox asuusu i do kopmen taxakapmek nak lok atnimi. Ketla mi tong i do, ‘Ma epovo ri reven;’ la lavasuun at nom levelinga do nemi move mi bixurun mi laxakapmek.”

Lavapaase Poovo Ri Loroboro At Laxasipsip

10 ¹La ne Iesu ga lok bok tidi, “A tong tuturun i rinimi; laradi do ixok beles at lumusmarakom at loroboro at laxasipsip, ketla i xot lixa at lengkot petpes, neni laradi xipkip pilo la laradi saksak paxat panga. ²Laradi do i xot lixa akmokso ro at lumusmarakom, neni laradi loklok tatao at laxasipsip. ³Laradi loklok tatao at lumusmarakom i susuang lumusmarakom tin; la laxasipsip diang tonga xisip laxaka ren do neni i toro ri levesipsip axa ren mi levenasen atdi, la i ram lam asu di ukamang. ⁴Do ira lam asu axap di ukamang, neni im gomgo nga di, la laxasipsip dia mumu asu i, mila laxasipsip ding tonga xisip laxaka ren. ⁵Di noxo mu asu gamasa tara vetpes; kopmen, diba epeseves basinge i, mila dixo ronga xisip laxaka ren.” ⁶Iesu ga tong na lavapaase poovo ridi, ketla di goxo xasep at na levelinga ren.

Iesu Neni Laradi Nunuan Ti Loklok Tatao Sipsip

⁷Kuren la ne Iesu ga lok manga, “A tong tuturun i rinimi. Nenia lumusmarakom ti laxasipsip. ⁸Nedi luvuttadi vetpes digamgo ria, nedi luvuttadi saksak paxat panga la luvuttadi xipkip pilo, ketla laxasipsip digoxo ronga res atdi. ⁹Nenia lumusmarakom. Do tara na beles keneng at na lumusmarakom, neni naba ruuna ka lorooro avolo; neni nabat pas beles la nat pas su la na puse xaka lempivilis nunuan. ¹⁰Laradi xipkip pilo ik beles mene rip kip pilo, tip sep amet, la rik lok kapmek laxasipsip. Nenia agara vot pam kusu ti raba lorooro ri limixin, la mo lorooro rak naba umsu atdi.

¹¹Nenia laradi nunuan ti lok tatao laxasipsip la a gagas bok kusu ana met ti laxasipsip. ¹²Laradi do di un kaka mene i xusu ri lok tatao

laxasipsip, la laxasipsip kopmen ateren, neni ik sixiro do neni i ven tangarang ka lavatman sio it pas kusu ri sev amet laxasipsip. Do kuren laman naba atat alis ka tentaba at nai laxasipsip la laxasipsip diba rem epeseves. ¹³Mo laradi ba sixiro mila neni laradi diga un kaka mene i la neni ixo doxoma solo laxasipsip.

¹⁴Nenia laradi nunuan ti lok tatao laxasipsip, la nenia akleklen mo laxasipsip do atarak, la nedi dikleklen ia, ¹⁵kerekngan mun ne Tamak ikleklen ia, la nenia akleklen ne Tamak. La a gagas kusu ri met nop di. ¹⁶Leventaba laxasipsip bok mo rak la dixok lok keneng at na loroboro. Aba lok ka bok di ukeneng. La nedi bok diba ronga laxaka rak la diba ngan legesi binam sipsip mene eburu minedi leventaba laxasipsip no dira nemen pam keneng at loroboro la legesa radi loklok tatao sipsip ba lok tatao di. ¹⁷Tamak i balamu ia mila a momo xusu ri raba lorooro rak, la anaba lok ka amlong box i. ¹⁸Kopmen teta naba lok pes lorooro rak basinge ia. Aba raba gamasa mun i at lavavara axa rak. La a epovo xusu ri raba lorooro rak la a epovo bok kusu ri roo xat amlong. Ne Tamak ga raba ia mi lololos ti lox i xuren.”

¹⁹Na levelinga at ne Iesu ga lox epeseves manga nedi leme Judaia ri legepu binam tadi mi levendoxoma vetpes. ²⁰Buaang atnedi diga lok, “Lagas i nemen teren. Neni ing tangku. Tila ming tonga i?”

²¹Ketla leventaba diga lok, “Laradi do lagas i nemen teren, kopmen na epovo ri paase xerepmo. Lagas kopmen na epovo naba lox arepalas lengkatli main.”

Luvuttadi Amgomgo Di Goxo Nuunu At Ne Iesu

²²Laaleng ga vot nga xusu ri limixin me Judaia ri lok leluxa ro Jerusalem ti lok katling laaleng diga lox anarong loogu laplavang to Jerusalem. Ga ravasu ap mo leven gaaling at lamdut. ²³La ne Iesu gat pas to xeneng at loogu laplavang at lara loxot, laasen teren do ‘Loxot at ne Solomon.’ ²⁴La luvuttadi amgomgo at limixin me Judaia diga vot pasa i la diga lok, “Lavanisa aleng ta unak lok nama la mana i doxoma? Tong axasep avukat nema do kereva nenu Lanarong?”

²⁵Iesu ga vorang i ridi xeretna, “Aga tong pam i rinimi, ketla kopmen mina nuunu rak. Levempanga sangsangu ak lox i mi lololos at ne Tamak di lox asuusu ia. ²⁶Ketla kopmen mina nuunu rak mila nemi xopmen laxasipsip tarak. ²⁷Laxasipsip tarak ding tonga laxaka rak. Akleklen di, la di mumu asu levelinga rak. ²⁸A raba nedi mi lorooro avolo la di noxo seeve rinotno; la tara noxo lok kepe di basinge ia. ²⁹Ne Tamak ga raba ia mi nom laxasipsip la neni i silok ti levempanga vipis axap, la tara noxo lok kepe nedi laxasipsip basinge loklok tatao ren. ³⁰Nema’ mi ne Tamak ma lok ngan legesara.”

³¹La diga ranga ka manga laxanuut kusu dina lu i. ³²Iesu ga lok tidi, “Agara lok pam laxampanga sangsangu ne Tamak ga raba ia min kusu

ana lox i ro melamgo atnimi; ti ua lara at nai nemi mi lok do mina lu var ia xusu nen?”

³³Diga vorang i rin keretna, “Maxo lok do mana luvar u mumu mo levempanga sangsangu, ketla u tong i do nenu ne Moroa. Nenu mun laradi, ketla uk lok tong pen i do una lox axa u xerekngan ne Moroa la u paase vupu rin.”

³⁴Iesu ga lok tidi xeretna, “Levelinga xeneng at Lenavolo atnimi i lok keretna,

‘Nenia aga tong i do nemi xa levenmoroa.’ *Sam 82:6*

³⁵Ataklen i do levelinga at Lenavolo i ruturun tinotno; la ne Moroa ga tong di do levenmoroa, ti mo luvuttadi levelinga ren ga vot tidi. ³⁶La ne Tamak ga soxolik ka ia la ga riki ia ude at na lavatbung menemen. Tila ba la, mia tong i do nenia a paase vupu ri ne Moroa mila a tong i do nenia Nitna ne Moroa? ³⁷Dola nenia xopmen ana lok leven gugu at ne Tamak, nemen mita nuunu bok ba rak. ³⁸Ket do anak lok leven gugu ren, la mixo nuunu rak, mina nuunu at leven gugu rak, kusu miba doxoma i, la minaklen i do ne Tamak i nemen keneng tarak, la nenia xeneng teren.” ³⁹Diga lok do dina ranga alis i, ketla neni ga vas su mulus mene at lengkikngan di.

⁴⁰Iesu ga vas korop amu manga ladan sen Joridan uto at lenep ne Jon gap sep susu limixin e gano, la neni gak lok go. ⁴¹Buaang nedi limixin diga vot pasa i, la diga lok, “Jon goxo lok tevempanga sangsangu xeretna, ketla levelinga axap, ne Jon ga paase mumu na laradi min ga ruturun.”

⁴²La buaang limixin go diga nuunu at ne Iesu.

Lanmet At Ne Lasaro

11 ¹Lara laradi laasen teren ne Lasaro, ga nemen to Beteni, ga meres. Beteni ni lemenemen ua ne Maria mi ne Mata nedu lueton duga nemen go. ²La ne Maria neni lara no ga sobili laxadan mavak to at luxangkedek at Leeme Silok la ga ves amesemes i mi lavatkabinim at lavatlak teren. Ne Lasaro neni neinen du, mo gak meres. ³La na lueton duga lox aonon levelinga ri ne Iesu keretna, “Leeme Silok. Lentangas orong taram i meres.”

⁴Se ne Iesu ga rongga i na, neni ga lok, “Lanmet kopmen neni laxavaxap at nai ri ne Lasaro; na lavanga i vot kusu ri emi asu mi ne Moroa, la kusu Nitna ne Moroa naba ruuna ka leemi asu.” ⁵Iesu ga balamu aleng ne Mata du lueton, la ne Lasaro. ⁶Se ne Iesu ga lok ka levelinga do Lasaro ga meres, neni ga nemen avolo bok go ap mo lenep, neni gak lox e at legepu aleng bok.

⁷Melemu neni ga lok ti luvuttadi loklok ka anasa ren, “Atamlong uto Judaia.”

⁸Ketla diga lok tin, “Rabai. Ga merena luvuttadi amgomgo diga lok do dina lu var u, tila u lok do unamlong?”

⁹Iesu ga vorang i ridi, “Laaleng kangking i ruuna lasangaun mi legepu xon atat aleng. Kuren la, mo do taradi nat pas at laxangking tubu, neni xopmen nak sak kikixin, mila neni i ven laxasep at na lavatbung menemen. ¹⁰Ket do taradi nat pas at laxanimin, neni nak sak kikixin, mila kopmen taxasep na nemen keneng teren.”

¹¹Iesu ga tong i na, la melemu ni ga lok bok, “Lentangas atdik ne Lasaro mo i unga, ketla abat pas la ana lox aus i.”

¹²La luvuttadi loklok ka anasa ren diga lok tin keretna, “Leeme Silok. Mo do neni go i unga, neni naba lox avukat.” ¹³Ketla lavasuun at levelinga at ne Iesu do Lasaro ga met; la luvuttadi loklok ka anasa diga nua i do Lasaro ga unga mene.

¹⁴Kuren la ne Iesu ga tong axasev i ridi do, “Lasaro mo ira met pam. ¹⁵Ketla a momo do nia goxok lox eburu min. La mumu mun i na, miba nuunu ba rak. Atat pas uto xusu tana vosiga i.”

¹⁶Tomas lara laasen bok teren ne Didimas ga lok ti mo luvuttadi loklok ka anasa xeretna, “Ata emu eburu min, kusu ataba met eburu min.”

Iesu Neni Laxakatu Kaxat Amlong La Lorooro

¹⁷Iesu ga vot, la neni ga long lenget ka i do limixin diga li vam ne Lasaro ro at lamaaut la lavanuet aleng gara volo vam i. ¹⁸Beteni goxo vaxalom boro Jerusalem, ¹⁹la buaang luvuttadi amgomgo at limixin me Judaia diga vot kusu dina ven ti ne Mata mi ne Maria xusu ri vaase amenemen du mumu lanmet at neinen du. ²⁰Se ne Mata ga ronga i do ne Iesu mo ga vot, neni ga vas su xusu ri ekip tangarang min; ketla ne Maria ga men alu go xolonu.

²¹Mata ga lok ti ne Iesu, “Leeme Silok. Mo do nu gitak lok de, neinuk gi toxo met. ²²Ketla akleklen i do monga ne Moroa naba raba u mi lavanga salai do una sing i min.”

²³Iesu ga lok tin, “Neinum naba rooro xat amlong.”

²⁴La ne Mata ga lok, “Aklen i do neni naba rooro xat amlong at laaleng kavaxap.”

²⁵Iesu ga lok tin, “Nenia laxakatu kaxat amlong mi lorooro. Do tara i nuunu rak, neni naba rooro amlong do neni na met. ²⁶La do tara i rooro la i nuunu rak, neni noxo met. Kereva, u nuunu at na levelinga?”

²⁷La ne Mata ga lok, “I ruturun, Leeme Silok. A nuunu do nenu Lanarong, Nitna ne Moroa, la ne Moroa ga lok do nenu unaba si ude xopok at lavatbung menemen.”

Iesu Gang Teng

²⁸Melemu at na levelinga at ne Mata, neni gamlong la ga vaase nemnem ti ne Maria, la ni ga lok, “Leeme loklox ase nga mo i auret la i susue ru do una vot pasa i.” ²⁹Se ne Maria ga ronga i na, neni ga xatu

kaxat la ga vas soso mun kusu ri vas tangarang ka i. ³⁰Iesu goxovisi vot to xolonu, ketla neni move ga nemen ap mo lenep ne Mata ga xip tangarang ka i ve. ³¹Luvuttadi amgomgo mo digak lok go at loogu eburu mi ne Maria diga paase amenemen i. Se diga ven i ga xatu kaxat la ga vas su soso ukamang, diga mumu asu i. Diga nua i do neni mo gat pas uto at lamaaut, kusu nang teng go.

³²Se ne Maria ga vot to at lenep ne Iesu ga nemen e la ga ven i, neni ga xis tiktikbu mi luvatgulom teren la ga lok, “Leeme Silok, mo do nu gitak lok nade, neinuk gi toxo met.”

³³Iesu ga ven i gang teng, la luvuttadi amgomgo bok mo diga emu min digang teng, la lebelen ga lok tuntun aleng. ³⁴La ni ga sue di xeretna, “Miga li i ua?”

La diga lok, “Atat pas la una ven i.”

³⁵La ne Iesu gang teng.

³⁶La luvuttadi amgomgo diga lok, “Mi ven ba i, neni i balamu aleng ne Lasaro.”

³⁷Ketla leventaba atdi diga lok, “Neni ga lox arepalas luxatli at laradi luxatli ren ga main. La kereva, ni goxo epovo do na lox aroo ne Lasaro xusu ni noxo met?”

Iesu Ga Lox Axatu Amlong Ne Lasaro Basinge Lanmet

³⁸Lebelen ne Iesu ga lok tuntun amu bok, la neni gat pas uto at lamaaut; mo lamaaut gak lok to at lubuang la lavaruat gak lok pe lungusungus ap mo lubuang. ³⁹La ne Iesu ga lok tinedi xeretna, “Mina lok pes lavaruat basinge lubuang.”

La ne Mata, neinen ne Lasaro ga lok, “Leeme Silok, lorongan naba somao mila at lavanuet aleng ta, neni gak midi ro xeneng at lamaaut.”

⁴⁰Iesu ga lok tin, “Kereva, nenia agoxo tong box i ru do uba ven lololos at ne Moroa mo do una nuunu?”

⁴¹Diga lok pes lavaruat, la ne Iesu ga milik urut upana la ga lok, “A tong aorong tu Tamak, do u ronga ia. ⁴²Aklen i do amisik ung tonga ia, ketla a tong i na xusu na limixin diba nuunu do uga riki ia.”

⁴³Melemu at na levelinga ren, neni ga xup lolos keretna, “Lasaro. Pas su.” ⁴⁴La ne Lasaro ga vas su nga, la lukngen mi luxangkedek teren diga is i mi lentamon itis tongan; la labantamon bok diga is pe lavatlak teren min.

La ne Iesu ga lok, “Mina soxomus asu i, la mina soxepe i uto na onon.”

Luvuttadi Amgomgo Diga Lok Langas Linga Ri Sep Ne Iesu

(Mt 26:1-5; Mk 14:1-2; Lu 22:1-2)

⁴⁵Buaang atnedi luvuttadi amgomgo mo diga vot kusu ri ven ne Maria, kuren la diga ven na lavanga ne Iesu ga lox i la diga nuunu ren. ⁴⁶Ketla

leventaba atdi digamlong uto at lubung Parisi la diga tong i ridi mumu mo lavanga sangsangu ne Iesu ga lox i. ⁴⁷Kuren la lubung Parisi la lavamaasa silok diga vot buru la diga lok, “Ataba lok lavanga salai? Mina doma mumu levempanga sangsangu na laradi ik lox i. ⁴⁸Mo do ata ke xepe i nak lok na levempanga, limixin axap diba nuunu ren, la limixin boro Rom diba musak dik la dina lok kapmek loogu laplavang la limixin atdik.”

⁴⁹Lara atdi laasen teren ne Kaiapas, neni lamaasa gomgo ap mo lamaares ga lok, “Mixoklen tevempanga. ⁵⁰Mina xasep do i lox avukat ti tegesa radi na met nop limixin la kusu limixin boro Rom noxo sev amet axap limixin atdik.”

⁵¹Ni goxo tong i na mi lodoxoma axa ren, ketla neni ga lamaasa gomgo ap mo lamaares, la neni ga paase alii do Iesu mo naba met nop limixin me Judaia, ⁵²la kopmen tinedi xusuk, ketla tinedi bok limixin kopmen di me Judaia no diga epeseves la neni naba lox asi buru du ngan legesa bungmixin.

⁵³Ga ru ka i ap mo laaleng luvuttadi amgomgo me Judaia diga puse ngas do ri sev amet ne Iesu.

⁵⁴Kuren la ne Iesu goxot pas saxaven go Judaia. Ketla neni ga on basinge mo lenep la gat pas uto at loxot gak lok saparap lamatbin, uto at lemenemen laasen teren Epraem la gak lox eburu mi luvuttadi loklok ka anasa ren go. ⁵⁵Leluxa at leme Judaia laasen teren Lovovolo Pe mo ga auret ta, la buaang limixin at lengkot axap at levennep Judaia digat pas uto Jerusalem, kusu ri lox adadat nedi at lemeren ne Moroa ri mo leluxa. ⁵⁶Diga reven ti ne Iesu, la se diga vot go at loogu laplavang diga esue xa minedi getgesara, “Kereva, mi doxoma i do neni naba vot bok ti na leluxa?” ⁵⁷Lubung Parisi mi lavamaasa silok diga raba linga vam di. Do tara na ven lenget ne Iesu go at toxot, neni naba tong i ridi xusu diba ranga alis i.

Maria Ga Gos Luxangkedek At Ne Iesu Ro Beteni

(Mt 26:6-13; Mk 14:3-9)

12 ¹At lavanna aleng avot ti leluxa at Lovovolo Pe, Iesu gat pas uto Beteni, mo lemenemen ne Lasaro gak lox e; ni laradi ne Iesu ga lox arooro amlong i basinge lanmet. ²Limixin at ne Lasaro diga lox agagas li leveluxa rin go, la ne Mata ga raba luxa di, la ne Lasaro la leventaba luvuttadi bok diga anan eburu mi ne Iesu. ³La ne Maria ga lok ka lubuxom^c ga umsu mi laxadan mavak, laasen teren naat. Mo laxadan somavak luunun teren ga silok aleng. La neni ga soli i ro at luxangkedek at ne Iesu, la ga ves amesemes i mi lavatkabinim at lavatlak teren. Losomavak at na laxadan ga umsu go xeneng ap mo loogu.

^c 12:3 Na lubuxom tuntu diga lox i mi luat bunbun.

⁴La lara laradi loklok ka anasa at ne Iesu, ne Judas Iskariot, neni mo lara ga song araba ne Iesu ri limixin kapmek, ga lok keretna, ⁵“Kereva, ixo epovo dina sesep mi na laxadan mavak la naba epovo at lavantun sangaun kobot (300) denarias kusu dina raba limixin banbalo min?” ⁶Ni ga tong i na, mila neni laradi xipkip pilo la kopmen do ni ga doxoma limixin banbalo, ketla neni ga vara i do neni ba xip pilo xaka i. Neni gak lok tatao lempilas atdi la amisik ni gam nem teren.

⁷Ketla ne Iesu ga lok, “Keke mulus na latkin. Na ladan neni gam tebeng i xusu rik mir ia. ⁸Limixin banbalo dibat pot pasa amisik nimi xusu mibak lok tooro di, ketla nenia noxo nemen eburu amisik minimi.”

Lavamaasa Diga Puse Ngas Ti Sev Amet Ne Lasaro

⁹Buaang limixin me Judaia diga rongga i do ne Iesu gak lok to Beteni, kuren la digat pas ugo; digat pas mila diga vara i do dina ven ne Iesu mi ne Lasaro, mo ne Iesu ga lox arooro amlong i basinge lanmet. ¹⁰Kuren la lavamaasa silok diga tong li levelinga do diba sev amet bok ne Lasaro, ¹¹mila buaang nedi limixin me Judaia diga sok tixirixes lavamaasa la diga nuunu nga at ne Iesu.

Iesu Ga Beles To Jerusalem

(Mt 21:1-11; Mk 11:1-11; Lu 19:28-40)

¹²Ap mo laaleng petpes buaang nedi limixin mo diga vot ti leluxa at Lovovolo Pe la diga rongga i do ne Iesu mo gat pas uto Jerusalem. ¹³Kuren la diga ra ka laxangkakan bisi la diga vas su xusu ri ekip tangarang min. La diga lok,

“Ata emi asu mi ne Moroa. Luvukat ti mo laradi it pas mi laasen at Leeme Silok. Luvukat ti Loorong Silok boro Israel.” *Sam 118:25-26*

¹⁴Iesu ga lok ka lodongki maxat la ga xis teren, kerekngan Lovoang Kaala ga tong i xeretna,

¹⁵“Limixin me Saion. Nemen mita marat. Loorong Silok atnimi nom it pas saparap nimi, it kis at lodongki maxat.” *Sak 9:9*

¹⁶Ap mo laaleng na lavanga ga ravasu, luvuttadi loklok ka anasa di goxo xasep at lavasuun ap mo levelinga; ketla se at laaleng ne Iesu ga rooro xat amlong digaklen ba i do Lovoang Kaala ga tong asu na lavanga, la mo limixin diga lox i na ri ne Iesu.

¹⁷La mo limixin diga nemen eburu mi ne Iesu ap mo laaleng neni ga roo asu ka ne Lasaro boro at lamaaut, la ga lox aroo amlong i basinge lanmet. Diga tong asu na lavanga ro Jerusalem. ¹⁸La buaang nedi limixin digat pas kusu ri ekip tangarang min, mila diga rongga i do neni ga lox aroo amlong ne Lasaro. ¹⁹Kuren la lubung Parisi diga lok tinedi getgesara, “Mina ven ba i. Ata noxo lox asoxos toxot at levendoxoma atdik. Limixin axap mo dia mumu asu nga ne Iesu.”

Limixin Petpes Diga Lok Do Dina Epaase Eburu Mi Ne Iesu

²⁰Ap mo laaleng at leluxa, leventaba limixin me Grik diga nemen kantubu ap mo limixin mo digat pas uto Jerusalem kusu ri lotu. ²¹Diga vosiga ne Pilip, neni boro Betsaida at lenep Galili la diga lok tin, “Leeme Silok. Ma vara i do mana vot pasa ne Iesu.” ²²Pilip gat pas la ga tong i ri ne Endru, la nedu buru dugat pas la duga tong i ri ne Iesu.

²³La ne Iesu ga lok tidu xeretna, “Loxonaleng mo ia epovo vam kusu ne Moroa na lox asilox ia, Laradi Mevana. ²⁴A tong tuturun i rinumu. Luxuvenit piao, do limixin di noxotlo i, noxo visik. Do i mang la ditlo li i at laxangka, melemu ba visik buaang levempeven piao. ²⁵Do tara i balamu aleng lorooro ren, neni naba sang apkav i. La do tara ixo balamu aleng lorooro ren at na lavatbung menemen kopok, neni nabam tebeng amisix i ri lorooro avolo. ²⁶Do tara i vara i do na lok lugugu rak, neni na lok kaka be loklok tarak, kusu neni ba lok ngan lasaxaruki rak la ba nemen ap mo lenep nenia anak lox e. Ne Tamak naba lox asilox i do neni na lok lugugu rak.”

Iesu Ga Paase Mumu Lanmet Teren

²⁷La ne Iesu ga lok bok tidi, “Mo nga labalak ixo xis saga la aba tong ka lavanga salai? Agut aba lok do, ‘Tamak, i epovo do una lok kepe na lumumuat basinge ia?’ Kopmen. Nia aga si ude xusu ri beles at na loxonaleng at losongsongot.” ²⁸La ne Iesu ga sing ne Temen keretna, “Tamak. Una lox asuusu i nom lisisixam taram ti limixin kusu diba ven kibis i do nenu ne Moroa u silok aleng.”

Melemu laxaka at lara ga si boro vana at laxalibet, ga lok, “Ara lox ase vam di mi lisisixam tarak la aba lox amu box i.” ²⁹La limixin diga tu go diga ronga na levelinga la diga lok, “I mumuat ngan leretepaavat.” La leventaba diga lok, “Laangelo i paase rin.”

³⁰La ne Iesu ga lok tidi, “Na levelinga mi ronga vam i, kopmen ti lok tooro ia, ketla ti lok tooro nimi. ³¹Mo nga loxonaleng kusu ne Moroa na ila mumu loklok at limixin at lavatbung menemen; la ne Moroa naba lox axap lololos at ne Satan, neni lamgomgo at na lavatbung menemen. ³²Do dina vaxarem ia uto vana at laxaba la nia ana urut upana basinge na lavatbung menemen, nenia aba sat tomtom ka limixin axap saparav ia.” ³³Ni ga vaase i na mumu lanmet neni naba ekip tangarang min.

³⁴La limixin diga lok, “Lenavolo atnama i tong i do Lanarong na rooro amisik. Kereva u tong i do Laradi Mevana diba vaxarem i upana? La nege mo Laradi Mevana?”

³⁵Iesu ga vorang i ridi xeretna, “Laxasep at ne Moroa noxo nemen abao eburu minimi. At lavatpas atnimi at na lavatbung menemen, mina nemen at laxasep mila laxasep move i nemen eburu minimi, kusu laxakapmek

noxo los kis pavaa nimi ngan lamain; mila lara do it pas at lamain ixokleklen i do neni it pas ua. ³⁶Laxasep at ne Moroa move i nemen eburu minimi; kuren la mina nuunu ren, kusu nemi miba nemen ngan limixin at laxasep.” Melemu at na levelinga ne Iesu ga tong i, neni ga vas kaxat la ga lox alipe i basinge di.

Buaang Atdi Limixin Me Judaia Di Goxo Nuunu At Ne Iesu

³⁷Iesu ga lok buaang levempanga sangsangu ro melamgo at leme Judaia, ketla move di goxo nuunu ren. ³⁸La kerepmo diga lox aruturun levelinga at leeme vapaase alii ne Aisaia, ni ga lok,

“Leeme Silok, nege ga nuunu at levelinga maga tong i? Kopmen tara. Leeme Silok ga lox asuusu lololos teren ti nege? La kopmen tara goxo ven kibis i.” *Ais 53:1*

³⁹Na mun i lavasuun teren la di goxo epovo do dina nuunu. Ne Moroa ga paase alii at lungusno ne Aisaia, neni ga lok,

⁴⁰“Moroa ira lox amain pam lengkatli atdi, la ira vipe vam levendoxoma atdi xusu lengkatli atdi noxo reven la levendoxoma atdi noxokleklen. La di noxo vosiga ia xusu nenia aba lox arooro di.” *Ais 6:10*

⁴¹Aisaia ga tong i na mila neni ga ven lisisixam silok at ne Iesu la ni ga paase alii min.

⁴²La buaang luvuttadi amgomgo bok diga nuunu at ne Iesu, ketla diga e amarat at lubung Parisi. Kuren la di goxo paase asu lunuunu atdi ri tentaba vetpes, mila lavanga lubung Parisi dina sep pepe di xusu di noxo pubeles bok ba at loogu singising. ⁴³Diga vavara aleng i xusu limixin dina emi asu midi; la di goxo doma solo mumu leemi asu boro at ne Moroa.

Levelinga At Ne Iesu Naba Vaxaru Limixin At Lavapaase

⁴⁴Iesu ga vaase silok ti limixin keretna, “Do tara na nuunu rak, i nuunu bok ap mo lara ga riki ia ude. ⁴⁵Do neni i ven ia, i ngan do i ven mo lara ga riki ia ude. ⁴⁶Nia aga rupot ti na lavatbung menemen ngan laxasep kusu tara na nuunu rak, neni noxo nemen at lamain.

⁴⁷Do tara na ronga levelinga rak la kopmen na ronga res teren, nenia noxo lok li i at lavapaase, mila aga vot ti lox arooro limixin, la kopmen do ti lok li di at lavapaase. ⁴⁸La do tara i raba aralu ia la kopmen na sisiam ka levelinga rak, neni ira sok ka vam lenep tin, mila levelinga mun tarak naba lok li mo lara at lavapaase at laaleng ete. ⁴⁹Anai i ruturun aleng, mila kopmen nenia xusuk mo a paase mi lololos axa rak, ketla ne Tamak neni ga riki ia, ni ga tong lolos mo levelinga ria do nia aba tong i, la langas salai nia aba mu i ri vaase axasev i. ⁵⁰La aklen i do levelinga lolos teren naba lok li limixin at lorooro avolo. Levelinga axap tarak, ni levelinga ne Tamak ga tong i ria xusu ana paase i asu.”

Iesu Ga Gos Lengkangkedek At Luvuttadi Loklok Ka Anasa Ren

13 ¹At laaleng avot ti leluxa at Lovovolo Pe, Iesu gaklen pam i do loxonaleng ga epovo vam kusu rin ti on basinge na lavatbung menemen la nat pas uto saparap ne Temen. Amisik ne Iesu ga balamu limixin axa ren. La ni ga lox asuusu labalamu ren tidi at laaleng neni ga met teren.

²Iesu eburu mi luvuttadi loklok ka anasa ren digat kis eburu at laanan ga ukantinao. La ne Satan ga li vam lodoxoma ro xeneng at ne Judas Iskariot, lamdak at ne Simon do neni naba song araba ne Iesu ri limixin kapmek. ³Iesu gaklen pam i do ne Temen ga lok li levempanga axap maxopok at loklok tatao ren, la gaklen box i do neni ga si boro vana at ne Moroa la nabamlong bok tin. ⁴Kuren la ne Iesu ga xatu kaxat, la ga soxomus pes lavanga singsiga ren boro maxamang, la ga dos korov i mi lavattamon. ⁵Melemu neni ga lok ka laxadan la ga soli aruv i ro xeneng at lavatbaaket, la ga ru ka i xusu na gos lengkangkedek at luvuttadi loklok ka anasa ren; la melemu ga ves amesemes lengkangkedek atdi mi lavattamon no neni ga dos korov i min.

⁶Iesu ga vas saparap ne Simon Pita, la ne Simon Pita ga sue ne Iesu xeretna, “Leeme Silok. Kereva, una gos bok luxangkedek tarak?”

⁷Iesu ga vorang i rin keretna, “Uxoklen lai, mo nga nia ak lox i. Ketla melemu ba, uba xasep teren.”

⁸Ketla ne Pita ga lok, “A noxo ke xepe u xusu una gos luxangkedek tarak at toxonaleng.”

La ne Iesu ga lok tin keretna, “Dola nia a noxo gos luxangkedek taram, kopmen toxot taram kantubu at limixin tarak.”

⁹Simon Pita ga lok, “Leeme Silok, nemen uta gos kusuk mun luxangkedek tarak. Una gos bok lukngak mi lavatlak tarak.”

¹⁰Ketla ne Iesu ga lok, “Do nege ira susu vam, neni ira dadat pam; la ixo epovo xusu ni na susu amu bok; i epovo mun na gos luxangkedek teren. Nemi axap mira dadat pam, ketla legesara mun atnimi, kopmen.”

¹¹Iesu garaklen pam i do lara naba lok ka i la na song araba limixin kapmek min. Kuren la neni ga lok, “Nemi axap mi dadat; ketla legesara mun atnimi, kopmen.”

¹²Iesu ga gos axap lengkangkedek at luvuttadi loklok ka anasa ren, la melemu neni ga etara amlong manga lavanga singsiga ren. La ni gamlong ti loxot kitkis teren to at laxangkaaning. La ga sue di xeretna, “Kereva, mi xasep at lavanga salai mo vam nia a lox i rinimi? ¹³Mi tong ia do laradi loklox ase la Leeme Silok, la ik mokso xuren, mila nenia laradi loklox ase la Leeme Silok. ¹⁴La mo vam nia a gos lengkangkedek atnimi. Nemi bok, mina mu asu na loklok kantubu atnimi. ¹⁵Ara lok pam na loklok poovo xusu miba lox i xerekngan nia ara lok pam i rinimi. ¹⁶A tong tuturun

i rinimi, kopmen tasaxaruki na silok ti laradi gomgo ren, kopla laradi xikip linga na silok ti lara ga riki i. ¹⁷Do mina xasep at na levelinga, la mina lox epovo i, Moroa naba lox anarong nimi.”

Iesu Ga Vaase Alii Do Neni Naba Met

¹⁸La ne Iesu ga lok tidi, “Ketla kopmen nemi axap ta miba lok ka loklox anarong. Aklen nedi leventaba agara lok katling pam nedi ngan luvuttadi vavang tarak, ketla legesara mun atnimi, kopmen. Neni ik lok ti lox asorun levelinga xeneng at Lovoang Kaala i lok keretna,

‘Neni mo lara i an eburu minia at loxongkide, ira raba vam ia ri limixin kapmek.’ *Sam 41:9*

¹⁹A tong ta i mo rinimi avot ti mo lavanga naba rupot; la do na vot, miba nuunu ba do nenia Lanarong. ²⁰A tong tuturun i rinimi, do nege na siam ka tara nia ana riki i, neni i ngan i siam ka ia. La do tara na siam ka ia, i siam ka mo lara ga riki ia ude.”

²¹Iesu ga vaase axav i na la lebelen goxo xis saga avukat. La ga lok keretna, “A tong tuturun i rinimi, do lara mo xantubu atnimi naba song araba ia ri limixin kapmek.”

²²Luvuttadi loklok ka anasa ren diga epen etang, di goxoklen i do, Iesu ga paase mumu nege. ²³La lara atdi, no ne Iesu ga vavara aleng tino i, gat kis saparap tinotno ne Iesu. ²⁴Simon Pita ga lok loklok katling tin la ga lok, “Una sue i do, nege mo lara?”

²⁵Kuren la ni ga sep sogo at lobongobong at ne Iesu, la ga sue i, “Leeme Silok, nege mo?”

²⁶Iesu ga vorang i rin keretna, “Dola nia ana gos amlu xaka na loxongkide xeneng at laxadan sos, la ana raba mo laradi min, neni mo laradi.” Melemu neni ga lok ka loxongkide la ga gos amlu ka i, la ga raba ne Judas Iskariot min, lamdak at ne Simon. ²⁷Se ne Judas ga ranga ka loxongkide, Satan ga beles ukeneng teren.

La ne Iesu ga lok tin, “Mo lavanga u vara i do una lox i, una lok soso nga i.” ²⁸Ketla kopmen teta maxeneng at nom laanan ga xasep at lavasuun at levelinga ne Iesu ga tong i rin. ²⁹Judas neni gak lok tatao lempilas, la leventaba atdi diga nua i do Iesu ga paase ri ne Judas kusu na un ka tevempanga anan ti leluxa kopla na raba tevempanga ri limixin banbalo. ³⁰Melemu at ne Judas ga lok ka mo loxongkide, ni ga vas su nga ukamang. Lemenemen mo gara main ta.

Iesu Ga Vaase Alii Do Ne Pita Na Sok Tixirixes I

(Mt 26:31-35; Mk 14:27-31; Lu 22:31-34)

³¹Judas ga onon pam, la ne Iesu ga lok, “Monga lisisixam tarak, Laradi Mevana, naba ravasu asuvos, la maxeneng teren limixin diba ven axasep avukat lisisixam at ne Moroa keneng tarak, ne Nitna. ³²Do nenia ana lox

asuvos lisisixam at ne Moroa, Moroa ba lox asuvos lisisixam teren keneng tarak, ne Nitna la ba lok soso mene nga i.

³³Luvutnuruk. Aba nemen eburu minimi at loxonaleng kakalik mun. La melemu miba reven tia, kerekngan nia aga tong pam i ri leme Judaia; kuren la a tong box i mo rinimi, mo loxot nia anat pas tin, ixo epovo do minat pas uve.

³⁴Levelinga maxat na ana raba nimi min; mina ebalamu ela xeneng atnemi xerekngan nia aga balamu nimi. ³⁵Limixin axap dibaklen i do nemi luvuttadi loklok ka anasa rak, mo do mina ebalamu ela minimi xa.”

³⁶Simon Pita ga sue i, “Leeme Silok, ubat pas ua?”

Iesu ga vorang i rin, “Loxot nia anat pas uve, nenu u noxot pas tin monga, ketla melemu nenu uba mumu ba ia.”

³⁷Pita ga sue box i, “Ua lavasuun teren la monga nia axo epovo na mumu asu u? Nia aba met nov u.”

³⁸La ne Iesu ga vorang i rin, “Kereva, u epovo ri raba ruturun lorooro ram tia? A tong tuturun i ru, avot ti laxaxak naba reng ningina nubung la unaba sev apkap naba vantun do uxoklen ia.”

Iesu Ga Lox Amenemen Luvuttadi Loklok Ka Anasa Ren

14 ¹Iesu ga lok ti luvuttadi loklok ka anasa ren keretna, “Nemen gat lebelen nimi na bulu. Mina nuunu at ne Moroa, la mina nuunu bok tarak. ²Buaang lengkontaugu lixilik mo i nemen at loogu at ne Tamak. Mo dola kopmen, nia gita ba tong i rinimi. Anat pas ugo xusu ana lox agagas li lengkot tinimi. ³Dola anat pas ugo, ana lox agagas tengkot tinimi, la anabamlong bok la ana lam ka nimi ri mo lemenemen nenia ana nemen teren kusu nemi bok miba nemen eburu minia. ⁴Nemi miklen langas ti mo lemenemen nenia anat pas uve.”

Iesu, Neni Langas Ti Ne Temen

⁵Tomas ga lok ti ne Iesu, “Leeme Silok, maxoklen i do unat pas ua, kuren la mabaklen langas kereva?”

⁶Iesu ga vorang i rin, “Nenia langas, luruturun mi lorooro. Kopmen teta naba vosiga ne Tamak at tangas petpes, ketla atarak kusuk mun. ⁷Dola miklen avukar ia, mibaklen avukat bok ne Tamak. I ru ka i mo lingina, miklen ba i la mira ven ba i.”

⁸Pilip ga lok, “Leeme Silok, una lox ase nama mi ne Tamam la ni naba epovo atnama.”

⁹Iesu ga lok tin keretna, “Pilip, aga nemen amisik eburu minu la nu xovisi unaklen ia do? Do lara ira ven pam ia, neni ira ven pam ne Tamak. Ixo epovo do una tong i do, una lox ase nama mi ne Tamam. ¹⁰Kereva, uxo nuunu do nia a nemen at ne Tamak, la ne Tamak i nemen tarak? Levelinga a paase i rinimi kopmen atarak axa. Ketla at ne Tamak axa,

i nemen tarak neni gak lok mo leven gugu. ¹¹Mina nuunu at levelinga a tong i do, nenia a nemen at ne Tamak la neni i nemen tarak. Dola kopmen, mina nuunu rak mumu levempanga sangsangu nia agak lox i. ¹²A tong tuturun i rinimi do nege i nuunu rak, neni naba lok levempanga i ngan nia agak lox i. Neni naba lok levempanga i silok aleng ti mo levempanga nia agak lox i, mila nia anat pas uto vana at ne Tamak. ¹³La do mina sing ti tevempanga xeneng at laasen tarak, anaba lox epovo i, xusu nenia Nitna ne Moroa, anaba lox asilok laasen at ne Tamak. ¹⁴Minaba ngising ti levempanga nemi mi vara rin keneng at laasen tarak, la nia anaba lox i. ¹⁵Do mina balamu ia, minaba lok levempanga nia a tong i.”

Iesu Ga Vaase Alii Mi Lovotpot At Loroonan Kaala

¹⁶La ne Iesu ga lok bok, “Nia anaba sing ne Tamak, la neni naba raba bok nemi mi lara laradi loklok tooro, la neni naba nemen eburu amisik minimi. ¹⁷Neni Loroonan Kaala at luruturun. Limixin at na lavatbung menemen dixo epovo na siam ka i, mila kopmen dina ven kibis i xopla dinaklen i. Ketla nemi miklen i mila neni i nemen eburu minimi la neni naba nemen keneng atnemi. ¹⁸Dola ana onon, anoxo ke xepe nemi ngan lubangkarun, ketla anabamlong bok ude saparap nemi. ¹⁹Noxo lox abao la limixin at na lavatbung menemen dinoxo ven bok ba ia, ketla nemi miba ven ia. Nenia lavasuun at lorooro, kuren la nemi bok miba rooro. ²⁰Dola nom laaleng na vot, mibaklen ka i do nenia a nemen eburu mi ne Tamak la nemi mi nemen tarak; kerekngan mun nenia a nemen keneng atnemi. ²¹Do nege na siam ka levelinga rak la na ronga res teren, neni laradi i balamu aleng ia. La ne Tamak naba balamu nege tara do na balamu ia. La nenia bok anaba balamu i la ana lox asuvos ia rin.”

²²Judas (kopmen ne Judas Iskariot) ga sue i, “Leeme Silok, naba lok kereva la una lok nama xusu mana ven u, la kopmen limixin at na lavatbung menemen?”

²³Iesu ga vorang i rin keretna, “Do nege i balamu ia, neni naba ronga res at levenanasa rak. Ne Tamak naba balamu i, la nema’ mi ne Tamak, maba esuxun min la mana nemen eburu min. ²⁴Do nege xopmen na balamu ia, neni noxo ronga res at levenanasa rak. La mo levenanasa miga ronga vam i, kopmen atarak, ketla boro at ne Tamak ni ga riki ia.

²⁵Agara tong pam na levelinga rinimi at na levenaleng nenia a nemen eburu minimi. ²⁶Ketla laradi loklok tooro, ni Loroonan Kaala ne Tamak naba riki i xeneng at laasen tarak. Neni naba anasa nemi mi levempanga vipis axap la naba vaase aronga nemi ri levempanga agara tong pam i rinimi. ²⁷Lenmila rak na nemen maxeneng atnemi; limila rak ana raba nemi min. Axo raba i na i ngan limixin at na lavatbung menemen dim taba i xuren. Nemen mita bulu la mina marat.

²⁸Mia rongga vam levelinga rak keretna; ‘ana on basinge nimi, ketla anabamlong bok ude saparap nimi.’ Do mina balamu ia, miba momo aleng do nenia anat pas uto at ne Tamak; mila neni i silok aleng tia. ²⁹Agara tong avot pam na levempanga rinimi. Do na levempanga na vot, miba nuunu ba at na lempapaase rak. ³⁰Anoxo vaase babaalom eburu bok minimi mila laradi gomgo at na lavatbung menemen monga na vot. Kopmen tololos teren mavana rak. ³¹Ketla limixin at na lavatbung menemen dinabaklen ka i do a balamu aleng ne Tamak, la nia ak lok levempanga axap kerekngan neni ga tong i ria. Dik ta mo, ata vas kaxat basinge na lenep.”

Iesu Neni Luuna Vaen Tuturun

15 ¹Iesu ga lok bok ti luvuttadi loklok ka anasa ren, “Nenia luuna vaen tuturun, la ne Tamak neni laradi loklok tatao at laraamang. ²Neni i tara xepe mo lengkakan una rak, do kopmen dina pisik. La ip sep susudun mo lengkakan una do di pisik avukat, kusu dinaba pisik aleng. ³Mo levelinga aga vaase i rinimi gara lox adadat pam nimi. ⁴Mina nemen tarak, la nia anaba nemen atnimi. Laxakan una xopmen na epovo na visik do ni xopmen na nemen sogo at luuna. Nemi xopmen mina epovo ri visik lempeven una se do nemi mina nemen tarak.

⁵Nenia luuna vaen, la nemi mi ngan lengkakan una. Do nege i nemen tarak, la nenia a nemen teren, neni naba visik buaang tempeven una; kopmen mina epovo do mina visik tempeven una do nemi mixo nemen tarak. ⁶Do nege xopmen na nemen tarak, neni i lok ngan laxakan una dinaba ra korop pes i la dina lu asu min kusu na mang, la dina sigi bubua li i la dina xotos kepe i at laxao. ⁷Do mina nemen tarak, la do minam tebeng lolos levelinga rak, mina sing ti levempanga salai mi vara rin, la miba ruuna ka i. ⁸Do mina visik aleng, miba lox asuusu ba i do nemi luvuttadi loklok ka anasa rak, la miba lox asilok laasen at ne Tamak.

⁹A balamu nimi xerekngan mun ne Tamak i balamu ia; mina nemen keneng at labalamu rak. ¹⁰Do mina rongga res at levelinga rak, miba nemen keneng at labalamu rak, kerekngan mun nia agang tonga res at levelinga at ne Tamak la aga nemen keneng at labalamu ren. ¹¹A tong na levempanga rinimi xusu lomomo rak naba nemen keneng at lorooro atnimi, la nom lomomo atnimi naba silok. ¹²Lavapaase rak keretna, mina ebalamu ela minimi xerekngan nia a balamu nimi. ¹³Do tara na soxepe lorooro ren ti lok tooro larapen tangas teren, nom i lox asuusu i do labalamu ren i silok aleng. ¹⁴Do mina lok levempanga nia aga tong i rinimi, nemi larapen tangas tarak. ¹⁵Axo tong bok ba nimi do lavasaxaruki, mila lasaxaruki xopmen naklen levempanga, lamgomgo ren ik lox i. Ketla, a tong nimi do larapen tangas tarak, mila agara vaase vam nimi mi levempanga axap ne Tamak ga tong i ria. ¹⁶Nemi xopmen mi

goxo soxolik ka ia; nenia xa aga soxolik ka nimi xusu mina lok lugugu rak la mina visik asu tevempeven una nunuan, nom lempeven una nunuan kopmen noxop sopso, ketla naba nemen amisik. Kuren la ne Tamak naba raba nimi mi tevempanga salai mina sing tin keneng at laasen tarak.
 17Lavapaase rak tinimi xeretna; mina ebalamu ela minimi xa.

Lebelemamao At Limixin At Na Lavatbung Menemen

18Do limixin at na lavatbung menemen dina belemamao nimi, minaklen i do nedi ga belemamao avor ia. 19Ketla nia aga soxolik ka nimi basinge na lavatbung menemen. Do nemi mede at na lavatbung menemen, limixin diba vara aleng nimi. Ketla kopmen nemi mede; kuren la limixin at na lavatbung menemen diba belemamao nimi. 20Mina doxoma levelinga nia aga tong i rinimi i lok keretna, kopmen tasaxaruki na silok ti laradi gomgo ren. Do dina lox asongor ia, diba lox asongot bok nimi; do dina ronga res at levelinga rak, diba ronga res bok at levelinga atnimi. 21Diba lok na levempanga rinimi mila mi nuunu rak la dixoklen mo lara ga riki ia. 22Do nia gita vot la gita vaase ridi, nedi xa gitoxo bixurun mu laxakapmek atdi. Ketla monga, dixo epovo na tong i do xopmen dina ven kibis laxakapmek. 23Do nege taradi i xopara ia, neni i xopara bok ne Tamak. 24Do nia gi toxo lok teven gugu silok kantubu atdi, ua kopmen tara ga lok teven gugu xuren, ixo epovo xusu nedi gita bixurun mi laxapmek, ketla monga digara ven pam levempanga sangsangu nia aga lox i, la nedi move di xopara ia la ne Tamak. 25Ketla anai i lox asorun levelinga ik lok keneng at Lenavolo atdi i lok keretna.

‘Kopmen tavasuun at lebelemamao atdi saparav ia.’ *Sam 35:19, 69:4*

Laradi Loklok Tooro Naba Vot

26La ne Iesu ga lok bok tidi, “Laradi loklok tooro naba vot; neni Loroonan at luruturun, la ni naba si boro vana at ne Tamak. Aba sak tiki i saparap nimi boro at ne Tamak, la neni naba tong asu levelinga mumu ia. 27La nemi bok, miba paase asuusu minia, mila nemi migara nemen eburu vam minia; ga ru ka i at laaleng nenia aga ru ka lugugu rak.

16 1Agara tong axasep pam nimi mi na levempanga xusu mi noxo subu kot kantubu. 2Luvuttadi amgomgo dinaba sep pepe nimi xusu mi noxo vubeles bok ba uto at laraugu singising. La laaleng move naba vot, la do tara na sev amet tara atnimi, ni naba nua i do i lox i mo ri lox amomo ne Moroa. 3Dinaba lok na levempanga rinimi mila nedi xa xopmen dinaklen nema mi ne Tamak. 4La a tong pam i na rinimi, do levenaleng na vot kusu dina lok na levempanga, miba doxoma bilong ti na levelinga rak.”

Lugugu At Loroonan Kaala

La ne Iesu ga lok bok tidi xeretna, “Agoxo vaase i na levempanga at lavakpaxaru kaxat at levenanasa rak tinimi, mila aga nemen eburu

minimi. ⁵Ketla mo nga anat pas uto ap mo lara, neni ga riki ia ude, ketla kopmen tara dom kantubu atnimi gita sue ia do, unat pas ua? ⁶La mo nga nia a tong na levempanga rinimi, kuren la lainbulu mo ira umsu nga at lороoro atnimi. ⁷Ketla a tong tuturun i rinimi. I lox avukat do nenia ana on basinge nimi. Do nenia a noxo onon, laradi loklok tooro noxo vot pasa nimi. Ketla do ana onon, nenia aba riki aonon i ude saparap nimi. ⁸La do neni na vot, neni naba lox ase limixin at na lavatbung menemen do nedi di umsu mi laxakapmek la kopmen tomokmokso na nemen keneng atdi, la at laaleng ete, ne Moroa naba ronga linga at limixin axap. ⁹Neni naba lox ase di do di bixurun mi laxakapmek, mila kopmen dina nuunu rak. ¹⁰Neni naba lox ase di mi loklok mokmokso, mila nenia anabat pas uto at ne Tamak la minoxo ven bok ba ia. ¹¹Neni naba lox ase di do laaleng ete at ne Moroa naba vot, mila laradi gomgo at na lavatbung menemen, ne Moroa ira lok li vam i at lavapaase la ira li lumumuat mavana ren.

¹²A ruuna bok laxalinga solo xusu ana vaase nimi min, ketla naba lolos aleng tinimi xusu mina doxoma xaka i. ¹³Ketla Loroonan Kaala naba vot, ni naba paase asu luruturun at levelinga at ne Moroa, la ni naba anasa nga nimi mi mo levelinga axap i ruturun. Ni noxo anasa nimi mi lodoxoma axa ren, ketla neni naba paase asu levempanga neni ba ronga i boro at ne Moroa la neni naba paase nimi mi levempanga move naba vot. ¹⁴Neni naba lox asilok laasen tarak mi lugugu ren, mila neni naba lok kaka levelinga rak la na anasa nimi min. ¹⁵Levempanga ne Tamak i ruuna i, mo axav i atarak; kuren la a lok do Loroonan Kaala naba lok ka levelinga rak la ni na anasa nimi min.”

Lainbulu La Lomomo

¹⁶La ne Iesu ga lok bok, “Noxo lox abao la mi noxo ven ia la noxo lox abao la miba ven bok ba ia.”

¹⁷Leventaba atdi luvuttadi loklok ka anasa ren diga esue min kantubu atdi xeretna, “Ua lavasuun at na levelinga neni i tong i ridik? I lok do, ‘Noxo lox abao la mi noxo ven ia, la noxo lox abao bok la miba ven ia.’ La i lok bok do, ‘Mila nenia anat pas uto at ne Tamak.” ¹⁸La diga esue manga, “Ua lavasuun at na levelinga, ‘Noxo lox abao?’ Dik dixo xasep ap mo levelinga ren.”

¹⁹Iesu gaklen pam i do luvuttadi loklok ka anasa ren diga vara i do dina sue i mumu i na, kuren la neni ga lok tidi, “A tong i do, noxo lox abao la mi noxo ven ia, la noxo lox abao bok la miba ven bok ba ia. La mi esue mi na xantubu atnimi, do? ²⁰A tong tuturun i rinimi do, mibang teng la mina saxaanu. Ketla limixin at na lavatbung menemen diba momo; miba bulu, ketla lainbulu atnimi naba rem gili ri lomomo. ²¹Se do latkin i suma madak, neni i bulu, mila loxonaleng tin ti songot, ia vot pam; ketla do neni ira ranga madak, neni xopmen na doxoma

bok ba losongsongot teren, mila neni i momo mi lumumulum ira visik pam i. ²²I lok kuren mun tinimi; monga nemi mi bulu, ketla aba ven bok ba nimi la minaba umsu mi lomomo, la kopmen tara naba lok pes mo lomomo basinge nimi. ²³Do mo laaleng na vot, nemi noxo sue bok ba ia ri tavanga. A tong tuturun i rinimi, ne Tamak naba raba nimi mi levempanga salai nemi miba sing tin keneng at laasen tarak. ²⁴Ga ru ka i gano la ia se nga mo, mi goxo sing ti tevempanga xeneng at laasen tarak. Mina ngising ti tevempanga la miba ruuna ka i, kusu lomomo atnimi naba umsu.”

Iesu Ira Lox Asi Vam Laxakapmek At Na Lavatbung Menemen

²⁵Aga vaase na levelinga rinimi mi lempapaase poovo. Ketla laaleng move naba vot la nenia xopmen anoxo tong asu bok ba lempapaase poovo, ketla aba paase kasep tinimi mumu ne Tamak la miba xasep nunuan teren. ²⁶Do mo laaleng na vot, miba sing ne Moroa xeneng at laasen tarak; la axo tong i do nenia aba sing kusu ne Moroa naba lok tooro nimi. ²⁷Nemi xa mina sing ne Tamak mila ne Tamak axa i balamu aleng nimi. I balamu nemi mila nemi mi balamu ia la mira nuunu do nenia aga vas kaxat boro at ne Moroa. ²⁸Agat pas boro at ne Tamak la aga vot nade at na lavatbung menemen; la mo nga ana on basinge na lavatbung menemen la anamlong manga uto at ne Tamak.”

²⁹La luvuttadi loklok ka anasa ren diga lok tin, “I lox avukat, nenu mo u paase asaxaven ba, la kopmen bok ba una paase poovo. ³⁰Monga maklen ba i do nenu uklen levempanga axap; ixo epovo do tara naba sue u mi tevesusue. Anai i lok nema la ma nuunu do nenu uga laa boro at ne Moroa.”

³¹La ne Iesu ga lok tidi xeretna, “Mi nuunu ba mo, do? ³²Laaleng move naba vot, la na nga ia nemen pam, la miba epeseves basinge ia, la nenia xusuk abak lok. Ketla kopmen nenia xusuk, ne Tamak naba nemen eburu minia.

³³Agara tong pam i na rinimi xusu miba ruuna ka limila. Nemi minaba suma losongsongot boro at limixin at na lavatbung menemen. Ketla mina tu tuxuruxun. Ara los kimit pam laxakapmek at na lavatbung menemen.”

Lisingising At Ne Iesu

17 ¹Melemu at na levelinga Iesu ga milik aurut uto vana at laxalibet la ni ga sing keretna, “Tamak. Laaleng ira vot pam kusu una lox asilok laasen tarak, ne Nurum, la kusu nenia, ne Nurum, anaba lox asilok laasen taram. ²Nenu ga raba ia mi lololos tim gomgo ri limixin axap kusu ana raba lorooro avolo rinedi, uga raba ia midi. ³Lorooro avolo i lok keretna; do dinakleklen u, legesa Moroa ruturun kusuk mun la dinakleklen ia, ne Iesu Karisito, nenu ga riki ia ude. ⁴Nia agara lox asilok

pam laasen taram nade xopok at lavatbung menemen keretna, agara lox epovo vam lugugu uga raba ia min. ⁵La mo nga, Tamak, una lox asilok laasen tarak to melamgo ram, la kerepmo una lox asuusu lisisixam tarak aga ruuna avor i ri luruntudum li at na lavatbung menemen, at levenaleng aga nemen eburu minu.”

Iesu Ga Sing Ti Luvuttadi Loklok Ka Anasa Ren

⁶La ne Iesu ga sing bok keretna, “Nia aga lox asuvos laasen taram tinedi uga raba ia midi nade at na lavatbung menemen. Nedi limixin taram, la nenu uga raba ia midi la diga siam ka vam levelinga ram. ⁷Mo nga diklen i do loklok tarak mi levelinga rak, nenu ga raba ia min la di nuunu do nenia agat pas boro vana. ⁸Nia aga raba avolo levelinga ram la diga siam ka i. Di xasep avukat do aga rupot boro vana la di nuunu do nenu ga riki ia ude. ⁹Nia a sing tidi. Nia xopmen na sing ti limixin at na lavatbung menemen ketla a sing tinedi uga raba ia midi, mila nedi ataram. ¹⁰Levempanga axap tarak ik lok at lakngam, la levempanga axap taram ik lok at lakngak. La maxeneng teren uga lox asilok laasen tarak. ¹¹Nia noxo nemen nade at na lavatbung menemen, ketla nedi diba nemen de, la nia aba vosiga u. Tamak, nenu u melemelengan. Una lok tatao di mi lololos at laasen taram, neni mo laasen uga raba ia min, kusu nedi diba lok ngan legesara kerekngan neda ta lok ngan legesara. ¹²At levenaleng aga nemen eburu midi, aga lok tatao di mi nom laasen uga raba ia min. Kopmen tara atdi ga seeve, ketla legesara mun atdi naba seeve xusu na lox asorun levelinga at Lovoang Kaala.

¹³Mo nga ana vot pasa u, ketla a tong na levelinga ru at na lavatbung menemen kusu nedi na diba ruuna ka lomomo xerekngan lomomo rak. ¹⁴Nia aga raba vam di mi levelinga ram ketla limixin at na lavatbung menemen diga sok tixirixes di, mila nedi xopmen di mede at na lavatbung menemen, kerekngan nenia xopmen ia mede. ¹⁵Lisingising tarak kopmen do una lam ka di basinge na lavatbung menemen, ketla una lok tatao di basinge mo laradi xapmek. ¹⁶Nedi xopmen di mede at na lavatbung menemen kerekngan nenia kopmen mede at na lavatbung menemen. ¹⁷Una suxuna di mi levelinga ram, mila levelinga ram i ruturun. ¹⁸Aga riki nedi mi levelinga ram ti limixin at lavatbung menemen kerekngan mun uga riki ia ude at na lavatbung menemen. ¹⁹La ana raba lorooro rak kusu ri lok tooro di la kusu nedi bok diba raba ruturun lorooro atnedi ri lugugu rak.”

Iesu Ga Sing Ti Limixin Axap Di Nuunu

²⁰La ne Iesu ga sing bok ne Moroa keretna, “Kopmen ana sing kusuk tidi, ketla a sing bok tinedi vetpes diba nuunu rak mumu levelinga atdi. ²¹A sing u do nedi dina lok ngan mun legesara, Tamak, kerekngan mun

nenu uk lok keneng tarak la nia ak lok keneng taram. Una lok li di xusu dinak lok keneng atda, kusu limixin mun at lavatbung menemen diba nuunu do nenu uga riki ia ude. ²²Aga raba nedi mi lisisixam, kerekngan uga raba ia min, kusu nedi diba ngan legesara, kerekngan neda di ngan legesara. ²³Nenia xeneng atdi la nenu xeneng tarak, kusu nedi diba tu buru rinotno, la limixin at na lavatbung menemen dibaklen i do nenu ga riki ia la uga balamu di ngan mun u balamu ia.

²⁴Tamak. Uga raba vam ia midi, la a vara i xusu dina nemen eburu minia ap mo lenep nenia ana nemen e, kusu diba ven lisisixam tarak, mo lisisixam nenu ga raba ia min, mila uga balamu ia avot ti luruntudum li at na lavatbung menemen.

²⁵Tamak. Luruptuvuk taram ik mokso, la limixin at na lavatbung menemen kopmen dinaklen u, ketla nenia aklen u, la nedi na diklen i do uga riki ia ude. ²⁶Aga lox asuvos u ridi, la aba lok amisik box i, kusu labalamu u ruuna i ria naba nemen atdi, la nenia bok aba nemen keneng atdi.”

Diga Ranga Alis Ne Iesu

(Mt 26:47-56; Mk 14:43-50; Lu 22:47-53)

18 ¹Melemu at na lisingising, Iesu eburu mi luvuttadi loklok ka anasa ren diga vas kaxat la diga volo korop lasa dan Kidron. Lara laraamang olip ga nemen ap mo lenep, la ne Iesu ga vas beles go xeneng eburu mi luvuttadi loklok ka anasa ren.

²La ne Judas, mo laradi ga song araba ne Iesu, gaklen mo lenep laraamang gak lox e, mila buaang levenaleng ne Iesu eburu mi luvuttadi loklok ka anasa ren digat pot buru go. ³Lavamaasa silok mi lubung Parisi diga riki luvuttadi gugu atdi xusu dina emu mi ne Judas. Leventaba luvuttadi esep bok mo. La ne Judas gamgo nga di uto at laraamang. Digap kip levenapti mi lenbabao, la levempanga esep atdi.

⁴Iesu garaklen pam levempanga axap mo ga lok do na vot parav i; kuren la ni ga vas tangarang di la ga lok tidi, “Nege mo nemi mi reven tin?”

⁵La diga vorang i, “Iesu boro Nasaret.”

La ne Iesu ga lok, “Nenia vam na.” La ne Judas, laradi sosolo arup mo ga tu eburu midi. ⁶Se ne Iesu ga lok tidi do, ‘Nenia vam na,’ digasko lili bilong la diga subu si ukopok at laxangka.

⁷La ne Iesu ga sue manga di, “Nege i mo nemi mi reven tin?”

La diga lok, “Iesu boro Nasaret.”

⁸La ne Iesu ga lok tidi, “Ara tong pam i do nenia vam na. Mo do nemi mi reven tia, mina ke aonon di na leventaba.” ⁹Ni ga tong i na xusu levelinga ren ni ga tong avot pam i na soxos, “Tamak, aga lok tatao avukat nedi na uga raba ia midi.”

¹⁰Simon Pita ga ruuna lavarise sepsep; neni ga rev asu i la ga sep korop labaalung tino at lasaxaruki at lamaasa gomgo min. Laasen ap mo lasaxaruki ne Malkas.

¹¹Iesu ga lok ti ne Pita, “Una ke xepe lavarise sepsep taram. Kereva? U doxoma i do nenia xopmen a noxo songot at langas ne Tamak gara raba vam ia min?”

Iesu Ga Ru Ro Melamgo At Ne Anas

¹²Luvuttadi esep eburu mi laradi gomgo atdi la lavaeme silok me Judaia diga ranga alis ne Iesu, la diga xoxo i. ¹³La diga lam ka avor i uto at ne Anas. Neni ne nimino ne Kaiapas, la ne Kaiapas neni lamaasa gomgo ap mo lamaares. ¹⁴La neni mun na ne Kaiapas mo ga tong i ri luvuttadi amgomgo do i lox avukat do tegesa radi mun naba met nop limixin axap.

Pita Ga Sok Tixirixes Ne Iesu

(Mt 26:69-70; Mk 14:66-68; Lu 22:55-57)

¹⁵Simon Pita mi lara laradi loklok ka anasa bok duga mumu ne Iesu. Lamaasa gomgo gakleklen avukat mo laau, kuren la neni ga emu eburu mi ne Iesu uto xeneng at lemelua saparap loogu at lamaasa gomgo. ¹⁶La ne Pita ga nemen to maxamang at lumusmaragu. La mo laau ne Kaiapas gaklen avukar i, ga vas su ukamang, la ga tong i ri lara loolik go at lumusmaragu xusu ri siam abeles ne Pita ukeneng.

¹⁷La mo loolik go at lumusmaragu ga lok ti ne Pita, “Kereva, nenu bok pam lara atdi mo luvuttadi loklok ka anasa at nom laradi?”

Pita ga vorang i, “Nenia xopmen.”

¹⁸Ga lamdut aleng, kuren la lavasaxaruki la lavaeme silok diga lox antos laxao la diga tu kangkan i xusu dina mamain. Kuren la ne Pita bok gat pas ugo la ga tu mamain eburu minedi.

Lamaasa Gomgo Ga Susue Ne Iesu

(Mt 26:59-66; Mk 14:55-64; Lu 22:66-71)

¹⁹Ap mo mun loxonaleng lamaasa gomgo ga sue ne Iesu mumu luvuttadi loklok ka anasa ren la levenanasa bok teren.

²⁰La ne Iesu ga lok, “Aga paase at lasaxaven ti limixin axap, la levenanasa rak aga lox i ro xeneng at laraugu singising la loogu laplavang; la limixin me Judaia digat pot buru amisik. A goxo vaase alipe tepanga. ²¹La tila ba u susue ia? Una sue limixin digang tonga ia. Diklen tinotno levelinga rak.”

²²Se ne Iesu ga tong i na, lara leeme silok mo ga tu, ga vasa lavapaales at ne Iesu la ga lok, “I lok kapmek do u paase keretnom ti lamaasa gomgo.”

²³La ne Iesu ga vorang i rin keretna, “Dola nia go a vaase kapmek toxot, una tong i ri na limixin axap do levelinga salai mo i lok kapmek. Ket do nia a tong asu levelinga ruturun, tila u vasa ia?” ²⁴La ne Anas ga riki aonon i uto at ne Kaiapas, mi laxanoos move at lukngen. Kaiapas neni lamaasa gomgo.

Pita Ga Sok Tixirixes Amu Manga Ne Iesu
(*Mt 26:71-75; Mk 14:69-72; Lu 22:58-62*)

²⁵Pita move ga tu go gak lok mamain. La diga lok tin, “Nenu bok laradi loklok ka anasa at nom laradi.”

Ketla ne Pita ga sok tixirixes i, la ga lok, “Nenia xopmen.”

²⁶Lara lasaxaruki at lamaasa gomgo, neni at libibinat ap mo laradi ne Pita ga ra korop pes labaalung teren, ga lok, “Nenia a ven box u ro at laraamang olip.” ²⁷La ne Pita ga lok bok, “Kopmen.” La ap mo mun loxonaleng laxaxak ga reng.

Iesu Ga Tu Ro Melamgo At Ne Paelat
(*Mt 27:1-2, 11-14; Mk 15:1-5; Lu 23:1-5*)

²⁸Ga maxantamak suubu at labarakoxot lavamaasa silok diga lok ka ne Iesu boro at loogu at ne Kaiapas la uto at loogu nunuan at laradi gomgo boro Rom; limixin me Judaia di goxo vubeles go xeneng at loogu nunuan mila diga xopara i xusu dina lox abilinga lorooro atdi at lemeren ne Moroa, la di noxo epovo do dina anan at leluxa at Lovovolo Pe. ²⁹Kuren la ne Paelat ga vas su vosiga di ro xamang la ga sue di xeretna, “Lavanga salai mo nemi mi vaase mumu na laradi min?”

³⁰La diga vorang i xeretna, “Mo do neni xopmen laradi xapmek, ixo epovo xusu nema giba lok ka i ude saparav u.”

³¹Paelat ga lok tidi, “Nemi xa mina lok ka i la mina ronga linga ren kerekngan Lenavolo atnimi i tong i.”

La diga lok, “Nemi boro Rom kopmen mina mulus tinama do mana sev amet tara.” ³²Anai levelinga atdi ga soxos ti levelinga ne Iesu ga tong i mumu lanmet salai ba vot tin.

³³Paelat gamlong ukeneng at loogu silok la ga ro ka ne Iesu la ga lok tin, “Kereva, nenu loorong silok at limixin me Judaia?”

³⁴Iesu ga vorang i rin keretna, “Na lususue u sue ia min ataram axa, kopla teventaba vetpes di tong i ru?”

³⁵Paelat ga vorang amlong i rin keretna, “U doxoma i do nenia boro Judaia? Limixin axa ram la lavamaasa silok atdi, nedi di song araba ia minu. Lavanga salai uga lox i?”

³⁶Iesu ga lok, “Nenia xopmen ana lok ngan lavaorong silok mede at na lavatbung menemen; mo do nenia gi lok ngan di, luvuttadi di mumu asu ia giba esep eburu mi luvuttadi amgomgo xusu di noxo ranga alis ia. Lixitkis orong tarak kopmen mede xopok at na lavatbung menemen.”

³⁷La ne Paelat ga sue, “Kereva, nenu loorong silok?”

Iesu ga vorang i rin keretna, “I ruturun do nenia loorong silok. Lavasuun at lovtopot tarak ti na lavatbung menemen i lok keretna; ana tong asu luruturun. Do luruturun ik lok at tara, neni ing tonga ia.”

³⁸Paelat ga sue i, “Lavanga salai nom luruturun?”

La ne Paelat gamlong amu manga uto xamang ti luvuttadi amgomgo la ga lok tidi, “Kopmen nia ana vuse ka tavasuun kusu ri sev amet na laradi. ³⁹Ketla lara loklok atnimi do amisik ak soxomus asu laradi xokoxo at leluxa at Lovovolo Pe. Kereva, i epovo do ana soxomus asu loorong silok at limixin me Judaia rinimi?”

⁴⁰La diga vorang ne Paelat mi luxupkup lolos keretna, “Kopmen tinotno. Una soxomus asu ne Barabas.” Barabas neni laradi sepsev amet tadi la laradi sep paxat panga.

Paelat Ga Lok Li Lumumuat Mavana At Ne Iesu

19 ¹La ne Paelat ga lox aonon ne Iesu xusu luvuttadi esep dinak pixis i. ²La luvuttadi esep diga vele lavatkiam tin mi livin gagas la diga lok li i ro at lavatlak teren; diga lok ka labantamon memele at loorong silok la di ga lok li box i at ne Iesu. ³La digat pas li ren la digak lok kalise i xeretna, “Ma emi asu minu, loorong silok me Judaia.” La melemu diga pasa lemeren.

⁴Paelat ga vas su amu manga uto xamang la ga lok ti limixin, “Mina ronga i na; ana lok ka i ude xamang tinimi, xusu miba xasep do axo ka tavasuun kusu ri lok li lumumuat teren.” ⁵La ne Iesu ga vas su ukamang mi lavatkiam diga vele i mi laban gagas la labantamon memele. La ne Paelat ga lok tidi, “Mina ven i. Neni nga na laradi.”

⁶Se lavamaasa silok la luvuttadi silok at loogu laplavang diga ven ne Iesu, diga xup keretna, “Mina vaxarem i ro at laxaba; mina vaxarem i ro at laxaba.”

Paelat ga lok tidi, “Nemi xa mina lok ka i, la mina vaxarem i ro at laxaba. Nenia axo vuse ka tavasuun kusu ri lok li lumumuat teren.”

⁷Luvuttadi amgomgo diga lok tin keretna, “I epovo do neni na met mila ni ga los polo Lenavolo atnama, i lok do neni ne Nitna ne Moroa.”

⁸Se ne Paelat ga ronga mo levelinga, neni ga marat aleng. ⁹Neni gamlong uto xeneng at loogu silok la ga sue ne Iesu xeretna, “Nenu uga laa meva?” Ketla ne Iesu goxo vorang lususue ren. ¹⁰La ne Paelat ga lok tin, “U xopara una vaase ria? Una xasep do a ruuna lololos kusu ri soxomus asu u, la ri vaxarem box u at laxaba.”

¹¹Iesu ga lok tin keretna, “U ruuna lololos mavana rak mila ne Moroa mun ga raba u min. Na lavanga u lox i ria i lok kapmek, ketla mo laradi ga song araba ia ru, laxakapmek teren i silok aleng.”

¹²Se ne Paelat ga ronga i na, neni ga lok tong pen i do na vuse ka tangas kusu ri soxomus asu ne Iesu. Ketla luvuttadi amgomgo diga xup

lolos keretna, “Mo do una soxomus asu i, i ven ngan ta do nenu xopmen lentangas at ne Kaisar. Nom laradi ga lox asilox i ngan loorong silok, kuren la neni laradi munepen mi ne Kaisar.”

¹³Se ne Paelat ga rongga na levelinga, neni ga lam asu ne Iesu ukamang la ni ga xis kopok to at loxot kitkis ting tonga linga, laasen teren do, ‘Langas Uat.’ At lavapaase Ibru diga tong i do ‘Gabata.’ ¹⁴Na levempanga ga ravasu at lasangaun mi legepu xonaleng at laaleng gagas ti mo laaleng at leluxa at Lovovolo Pe.

La ne Paelat ga lok ti luvuttadi amgomgo, “Loorong silok atnimi na.”

¹⁵Diga xup lolos keretna, “Sev amer i. Sev amer i. Paxarem i ro at laxaba.”

Paelat ga sue di xeretna, “Kereva, mi vara i do ana vaxarem loorong silok atnimi ro at laxaba?”

La lavamaasa silok diga vorang i rin keretna, “Loorong silok mun atnema ma ruuna i, neni ne Kaisar.”

¹⁶La ne Paelat ga song araba ne Iesu ridi xusu dina vaxarem i ro at laxaba. La luvuttadi esep diga lok ka ne Iesu.

Diga Vaxarem Ne Iesu At Laxaba

(Mt 27:32-44; Mk 15:21-32; Lu 23:26-43)

¹⁷La ne Iesu ga vas su la ga sosolok laxaba ren la gat pas uto at loxot, laasen teren, “Lavatlak Tongan.” At lavapaase Ibru, laasen teren do Golgata. ¹⁸Mo go diga vaxarem ne Iesu ro at laxaba; la diga vaxarem bok legepu radi at luxaba, lara saparap lekngen tino ne Iesu la lara saparap lekngen kia; la ne Iesu ga merem kantubu atdu.

¹⁹La ne Paelat ga malagan langas linga la diga lok li i ro vana at laxaba. Mo levelinga ga lok keretna, ‘Iesu boro Nasaret, loorong silok at limixin me Judaia.’ ²⁰La buaang atnedi limixin me Judaia diga us i na, mila mo loxot diga vaxarem ne Iesu ren, kopmen goxo vaxalom boro at lemenemen silok, Jerusalem. Na langas linga diga malagan i at lempapaase Ibru, Latin la Grik. ²¹La lavamaasa silok diga lok ti ne Paelat, “Nemen uta malagan i do, ‘Loorong silok at limixin me Judaia.’ Ketla una malagan i do, ‘Na laradi ga lok do neni loorong silok at limixin me Judaia.’”

²²La ne Paelat ga lok, “Lavanga salai ara malagan pam i, keke i xuren.”

²³Melemu at luvuttadi esep diga vaxarem ne Iesu ro at laxaba, diga lok ka levempanga singsiga ren la diga epes i ri lavanuet beleben; i epovo ri lavanuet luvuttadi esep. Ketla diga ke be lavanga singsiga ren boro maxeneng, mo lavanga singsiga di goxo sok gatga li toxot teren. Limixin diga lox i ngan legesa bantamon, ga ru ka i ro vana la ukopok epopolo.

²⁴La luvuttadi esep diga lok tinedi getgesara, “Nemen gat dik guta ba koxorov i, ata lu buru mi lengkonuat kusu ri lok kisip ka nege naba lok ka i.”

Anai ga vot kusu ri lox asorun levelinga xeneng at Lovoang Kaala; i lok keretna,

‘Diga epes levempanga singsiga rak kantubu atdi, la diga lu buru mi lengkonuat kusu ri lok kisip ka nege naba lok ka labantamon tarak.’

Sam 22:18

La luvuttadi esep diga lox i xerepmo.

²⁵Leventaba lavakin diga tu auret saparap laxaba at ne Iesu; nenen, la neton, la ne Maria, latkin at ne Kliopas, la ne Maria Magdalene. ²⁶Iesu ga ven nenen la laradi loklok ka anasa ren, neni ga vavara aleng i, duga tu go; kuren la neni ga lok ti nenen keretna, “Neni lamdak taram.” ²⁷La neni ga lok ti laradi loklok ka anasa ren keretna, “Neni nenam.” Ga ru ka i ap mo loxonaleng mo laradi loklok ka anasa ga lok ka i xusu na lok tatao i ro xolonu ren.

Lanmet At Ne Iesu

(Mt 27:45-56; Mk 15:33-41; Lu 23:44-49)

²⁸Melemu ne Iesu gaklen i do levempanga axap mo diga lok axap pam i ri lox asorun levelinga xeneng at Lovoang Kaala mumu i; neni ga lok, “A minu.” ²⁹Lara lavatbuxom tuntu mo ga nemen go, ga umsu mi lavaen mamao. Diga lox abeles loxonbantamon teren la diga lok li i at loxonuna isop, la diga lox aurur i saparap lungusno at ne Iesu. ³⁰Iesu ga in mo lavaen la melemu ga lok keretna, “I xap ta.” La lavatlak teren ga riding si la neni ga met.

Laradi Esep Ga Bo Labangbaangis At Ne Iesu Mi Lososo

³¹Mo laaleng ni laaleng gagas, la laaleng melemu ren ni laaleng kaala, la luvuttadi amgomgo di goxopara i do labarongan nak lok at larakaba at laaleng kaala, mila ti mo laaleng kaala, ni laaleng silok tinotno. Kuren la diga sue ne Paelat do luvuttadi esep dina sep pit lengkangkedek at luvuttadi diga vaxarem di at larakaba xusu dinaba remet soso la dina lox asi nedu basinge larakaba. ³²Kuren la luvuttadi esep digat pas la diga sep pit lengkangkedek ap mo luradi duga merem at luxaba saparap ne Iesu. ³³Ketla se diga vot go at ne Iesu, diga ven i do neni ga met pam; kuren la di goxo sep pit luxangkedek teren. ³⁴Ketla lara laradi esep ga bo rup mi lososo ro at labangbaangis at ne Iesu la soso mun lada eburu mi ladan ga sen su.

³⁵Lara laradi ga ven na levempanga, neni i paase asu i ri limixin la levelinga ren i rutorun. La iklen i do levelinga ren i rutorun la i tong asu i xusu nemi bok mina nuunu at ne Iesu. ³⁶Na levempanga ga ravasu xusu ri lox asorun levelinga at Lovoang Kaala, i lok keretna,

‘Kopmen tekosi ren naba repit.’

Pas 12:46

³⁷La lara lenep at Lovoang Kaala i lok bok keretna,

'Limixin diba ven ti mo laradi diga bo i mi lososo.'

Sak 12:10

Digak Mit Labantuxu At Ne Iesu
(*Mt 27:56-61; Mk 15:42-47; Lu 23:50-56*)

³⁸Melemu at nai, Josep boro at lemenemen Arimatia, ga sing ne Paelat do ni na lok ka labantuxu at ne Iesu. Josep neni laradi loklok ka anasa at ne Iesu. Ketla neni goxo mumu i at lasaxaven mila neni ga marat at luvuttadi amgomgo. Paelat ga tong i rin do i epovo do ni na lok ka labantuxu at ne Iesu. Kuren la ne Josep gamlong la ga lox asi labantuxu ren. ³⁹Nikodimas, gano ga mu bung kusu na vaase mi ne Iesu, neni ga emu mi ne Josep, gap kip laxadan somavak ti lok li at labantuxu at ne Iesu. Mo ladan ga mumuat aleng. ⁴⁰Nedu duga lok kaka labantuxu at ne Iesu la duga vaxais i mi labantamon di bom tongan min la duga lok li laxadan somavak teren; kerepmo limixin me Judaia diga mumu asu i na ngan leretere atdi. ⁴¹Lara laraamang mo ga nemen saparap mo loxot diga vaxarem li ne Iesu ren, la keneng teren lara lamaaut maxat mo gak lok, la limixin di goxovisi li rongan go. ⁴²Mo lamaaut ga nemen auret, kuren la diga lok li soso mun ne Iesu mila mo laaleng ni laaleng gagas at limixin me Judaia ri laaleng kaala.

Iesu Ga Roo Xat Amlong At Lanmet
(*Mt 28:1-8; Mk 16:1-8; Lu 24:1-12*)

20 ¹No mene maxantamak suubu at laaleng avot ap mo luik, lavanga move gak lok main. Ne Maria Magdalene gat pas uto at lamaaut la ga ven i do leventaba diga xuvun pes pam luat boro at lungusungus at lamaaut. ²Ni ga sixit kaxat la ga vosiga ne Simon Pita la lara laradi loklok ka anasa bok, ne Iesu ga vavara aleng tin, la ga lok tidu xeretna, "Dira lok ka vam Leeme Silok boro at lamaaut la dik dixoklen i do di lok li i ua."

³La ne Pita mi mo lara laradi loklok ka anasa duga vas kaxat uto at lamaaut. ⁴La dugak sixit, ketla mo lara laradi loklok ka anasa ga sixit polo ne Pita la ga vot avot to at lamaaut. ⁵Ni ga rikbu si ukopok la ga ven lenbantamon mikmit tongan, ketla ni goxo vubeles ukeneng. ⁶Ga melemu ren ne Simon Pita, la ni ga vubeles epolo ukeneng at lamaaut. Ni ga ven lenbantamon mikmit tongan gak midi go, ⁷la mo loxontamon diga vaxais kangkan lavatlak at ne Iesu min, goxok midi eburu mi lenbantamon mikmit tongan, ketla ga repes pam la gak midi at lenep petpes. ⁸Melemu mo lara laradi loklok ka anasa, mo ga rupot avot to at lamaaut, neni bok ga vubeles ukeneng la ni ga ven i la ga nuunu do ne Iesu ga roo xat pam. ⁹Du goxovisi xasep at levelinga at Lovoang Kaala, ga tong i do neni naba roo xat amlong bok basinge lanmet. ¹⁰Melemu dugamlong uto xolonu.

Iesu Ga Ru Asuvos Ti Ne Maria Magdalene
(*Mt 28:9-10; Mk 16:9-11*)

¹¹Maria mo ga tu go maxamang at lamaaut; neni gang teng, la ga rikbu beles ukeneng at lamaaut, ¹²la ga ven luangelo go, duga siga levempanga

bunbun, la dugat kis at lenep labantuxu at ne Iesu gak midi e; lara ro at lavatlak la lara ro at luxangkedek.

¹³La duga sue i, “Latkin, ung teng atla?”

La ni ga lok, “Di lok ka vam Leeme Silok tarak uto, la axoklen i do di lok li i ua.” ¹⁴Se neni ga vaase axav i na, neni ga rem gili la ga ven ne Iesu ga tu go; ketla neni goxoklen i do neni ne Iesu.

¹⁵Iesu ga sue i, “Latkin, ung tingis lai? La nege mo nu u reven pupuke rin?”

Maria ga nua i do, neni laradi loklok tatao ap mo laraamang; kuren la neni ga lok tin, “Mo do ura lok ka vam i uto, tong axasev ia do u lok li i ua, la abat pas la ana lok ka i.”

¹⁶Iesu ga lok tin, “Maria.”

La ne Maria ga rem gili la ga vaase mi lavapaase Ibru, “Raboni.” Lavasuun teren keretna, leeme loklox ase.

¹⁷Iesu ga lok tin, “Nemen uta ranga tu rak, mila a xovisi ana onon uto vana at ne Tamak. Ketla una vosiga luvutnetak la una tong i ridi do anamlong be uto at ne Tamak, neni ne Temen nimi bok, Moroa rak, neni ne Moroa box atnimi.” ¹⁸La ne Maria Magdalene ga onon la ga tong i ri luvuttadi loklok ka anasa do neni ga ven pam Leeme Silok la ga tong levelinga at ne Iesu ridi.

Iesu Ga Vot Saxaven Ti Luvuttadi Loklok Ka Anasa Ren (*Mt 28:16-20; Mk 16:14-18; Lu 24:36-49*)

¹⁹Ga ukantinao at laaleng avot ap mo luik luvuttadi loklok ka anasa digak lox eburu ro xeneng at lara loogu la diga soxoba pe axap levenmusaragu mila diga e amarat at luvuttadi amgomgo. La ne Iesu ga vot la ga ru go xantubu atdi, la ga lok, “Limila nak lox eburu minimi.”

²⁰Melemu at levelinga ren, neni ga vaxase luvuttadi loklok ka anasa ren mi lukngen la labangbaangis teren. La diga umsu mi lomomo ap mo loxonaleng diga ven Leeme Silok.

²¹La ne Iesu ga lox amu manga ridi, “Limila nak lox eburu minimi. Ne Tamak ga riki ia, kuren la nenia bok, ana riki nimi.” ²²La ni ga mas asu lamamas teren tidi la ga lok tidi, “Mina lok kaka Loroonan Kaala. ²³Do mina doxoma xepe leveloklok kakapmek at tara, i lok ngan ne Moroa i doxoma xepe i. Do mixo doxoma xepe leveloklok kakapmek at tara, i lok ngan ne Moroa xopmen na doxoma xepe i.”

Iesu Ga Ru Asuvos Ti Ne Tomas

²⁴Tomas, laasen bok teren ne Didimas, neni lara at lasangaun mi legepura luvuttadi loklok ka anasa at ne Iesu. Neni goxok lox eburu mi luvuttadi loklok ka anasa ap mo laaleng ne Iesu ga vot pasa di. ²⁵Diga tong i rin do diga ven Leeme Silok la ni ga lok tidi keretna, “Do a noxo

ven levenin kooxing at lukngen la ana long tu ren la na long tu bok at labangbaangis teren, nenia a noxo nuunu do neni ga roo xat amlong basinge lanmet.”

²⁶Melemu at lavanuti aleng, luvuttadi loklok ka anasa diga nemen manga ap mo loogu, Tomas bok mo gak lok. La diga soxoba pe axap levenmusaragu, ketla ne Iesu ga vot la ga ru xantubu atdi la ga lok tidi xeretna, “Limila na nemen eburu minimi.” ²⁷La ni ga lok ti ne Tomas, “Una long tu de, una ven lukngak. Una song asu mi lakngam la una long tu at labangbaangis tarak. Nemen lodoxoma ram na sixit ekarakat, ketla una nuunu rak.”

²⁸La ne Tomas ga lok tin, “Nenu Leeme Silok tarak la lo Moroa rak.”

²⁹La ne Iesu ga lok tin, “Ura ven pam ia, kuren la u nuunu rak. Luvukat bak lok tinedi di xovisi na ven ia, ketla di nuunu rak.”

³⁰Iesu ga lok buaang levempanga sangsangu ro melamgo at luvuttadi loklok ka anasa ren, la levelinga ren kopmen nak lok at na lubuk. ³¹Ketla leventaba levempanga sangsangu ik lok at na lubuk kusu mina nuunu do ne Iesu neni Lanarong la Nitna ne Moroa; la do mina nuunu ren, miba ruuna ka lorooro avolo at laasen teren.

Lavanga Sangsangu Mumu Laxanmat

21 ¹Melemu ne Iesu ga ru asuvos ti luvuttadi loklok ka anasa ren to saparap lavatdan kis, Tiberias. Ga ravasu xeretna. ²At lara laaleng ne Simon Pita, la ne Tomas, laasen bok teren ne Didimas, la ne Natanael boro Kena at lenep silok Galili, la lumdak at ne Sebedi, la lara laradi loklok ka anasa bok digak lox eburu. ³La ne Pita ga lok tidi, “Nenia anat pas kusu ri sep mat.” La diga lok tin, “Nema bok mana emu minu.” La nedi axap diga vas kaxat la diga los kas at lese pang la digatla xat. Ketla ap mo laxanimin di goxo sep ka tepenmat.

⁴Maxantamak suubu ne Iesu ga ru ro loxon, ketla luvuttadi loklok ka anasa di goxo ven kibis i.

⁵Neni ga toro ridi xeretna, “Laxamdak. Kereva, mi sep ka tevenmat?” La diga vorang i rin keretna, “Kopmen.”

⁶La ni ga lok tidi xeretna, “Mina lu mi laxatkat atnimi ro at lenep tino at lese pang la mina sep ka tevenmat.” Diga lox i xuren la di goxo epovo na sat amlong laxatkat mila ga umsu mi laxanmat solo. ⁷La mo laradi loklok ka anasa ne Iesu ga vavara aleng i, ga lok ti ne Pita, “Leeme Silok mo.” Pita ga ronga i nom la soso mun ni ga etara lavanga singsiga ren, no ni ga lok kepe i, la ga los si uto at ladan la ga xobok uto loxon. ⁸Luvuttadi loklok ka anasa diga mumu mi lese pang, diga sasat laxatkat ga umsu mi laxanmat, mila digak lox auret mun loloxon. ⁹Se diga oso, diga ven laxao mi levenmat gak lok teren la diga ven bok lengkongkide ga nemen saparap laxao. ¹⁰La ne Iesu ga lok tidi, “Mina lok ka tevenmat at nom ude.”

¹¹La ne Simon Pita ga los kas at lese pang la ga oso mi laxatkat, ga umsu mi laxanmat silok ga epovo at legesa sangaun kobot mi lavalimo sangaun mi lavantun (153). Laxanmat solo ketla laxatkat kopmen goxo rem das. ¹²La ne Iesu ga lok tidi, “Ude nimi la mina anan be.” Kopmen tara atdi luvuttadi loklok ka anasa gita sue i do neni nege mila digaklen i do neni Leeme Silok. ¹³La ne Iesu gat pas la ga lok kaka lengkongkide la ga raba di min la ga raba bok di mi levenmat. ¹⁴Na lovtopot sev avantun at ne Iesu saparap luvuttadi loklok ka anasa ren melemu at laxakatu kaxat amlong teren at lanmet.

Iesu Ga Epaase Mi Ne Pita

¹⁵Se diga an axap pam, Iesu ga sue ne Simon Pita, “Simon, lamdak at ne Jon. Kereva, labalamu ram tia i silok aleng ti labalamu ram ti na luvuttadi?”

Ni ga vorang i rin keretna, “Laaba, Leeme Silok. Uklen i do a balamu u.”

La ne Iesu ga lok tin, “Una raba luxa laxannat sipsip tarak.”

¹⁶La ne Iesu ga sue manga i, “Simon, lamdak at ne Jon. Kereva, u balamu ruturun ia?”

La ni ga vorang i, “Laaba, Leeme Silok. Uklen i do a balamu u.”

La ne Iesu ga lok tin, “Una lok tatao levesipsip tarak.”

¹⁷La ne Iesu ga sue sev avantun box i xeretna, “Simon, lamdak at ne Jon. Kereva, u balamu ia?”

La ne Pita ga lok tuntun mila ne Iesu ga sue sev avantun box i, ‘Kereva, u balamu ia?’. La ni ga lok ti ne Iesu, “Leeme Silok, ukleklen lempanga axap, uklen i do nia a balamu u.”

La ne Iesu ga lok tin, “Una raba luxa levesipsip tarak. ¹⁸A tong tuturun i. Ga se nenu laau maxat mene, uga siga lempanga singsiga ram la ugat pas mu lavavara ram. Ketla do una sioxo, ubang song asu mi lukngam la tara vetpes nabak paxasiga u la dibam lam ka u uto at lengkot u noxopara unat pas uve.” ¹⁹Iesu ga tong i na xusu na lox ase ne Pita mi lanmet salai ni ba met teren kusu na lox aurut laasen at ne Moroa. La ni ga lok ti ne Pita, “Una mumu asu ia.”

²⁰Pita ga rem gili la ga ven i do mo laradi loklok ka anasa ne Iesu ga vavara aleng i, ga mumu asu du. Neni mo lara ga sep sogo at lobongobong at ne Iesu at laanan kaala la ga lok tin, “Leeme Silok, nege ba song araba u ri limixin kapmek?” ²¹Pita ga ven i la ga sue ne Iesu, “Leeme Silok, lempanga salai mo ba vot saparap na laradi?”

²²Iesu ga vorang i rin keretna, “Do nenia a vara i do neni na rooro se at lomlong tarak, nemen uta doma solo i nom. Nenu una mumu asu ia.” ²³Luvuttadi loklok ka anasa diga rongga na levelinga la diga tong i ri lavanga do mo laradi loklok ka anasa noxo met. Ketla ne Iesu goxo tong i

xuren, neni ga lok mun keretna, “Do nenia a vara i do neni na rooro se at lomlong tarak, nemen uta doma solo i nom.”

²⁴Mo laradi loklok ka anasa ga ven na lempanga la ga malagan levelinga at na lubuk, la maklen i do levelinga ren i ruturun.

²⁵Iesu ga lok lempanga vetpes bok i buaang aleng. Do tara na malagan alii na lempanga axap, agut laxanbuk naba umsu aleng la na lavatbung menemen axap noxo epovo rin.

Leven Gugu

Leven Gugu At Luvuttadi Vavang

Levelinga Loklox Axasep

Lumaares 61-62 A.D.

Luk ga malagan na lubuk ti ne Tiopilas. Avot tinotno ri na lubuk, Luk ga malagan la ga lox axasep leventetere la levempapaase la lorooro at ne Iesu keneng at lubuk Luk. Nai lubuk ne Luk ga malagan i kusu ri lox axasep ne Tiopilas ti lempanga salai luvuttadi vavang at ne Iesu diga lox i melemu at lanmet teren. Lentaba leventetere at nai diga re i ri ne Luk, ketla lentaba neni ga xasep teren mila neni ga emu mi ne Pol. Kuren la keneng at luvut silok 16, ta ven i do Luk ga vosiga ne Pol la ga emu min. Na lubuk i ruuna lavantun lengkot silok. Avot tinotno i lox ase dik mi luvuttadi vavang diga ruuna ka Loroonan Kaala ro Jerusalem la diga ru ka lugugu. Melemu i lox ase dik do diga vavang la limixin diga beles keneng at luutus atnedi, limixin to at lengkot Judaia la Samaria. I lox ase bok dik do mo Lagale Lavavang mumu ne Iesu ga epeseves la buaang nedi limixin at na lavatbung menemen diga rongga i. Na lubuk i lox ase dik do Loroonan Kaala ga raba lololos ti limixin kusu dina lok buaang lempanga sangsangu kusu buaang nedi limixin diba nuunu at ne Iesu.

Lengkot silok keneng at na lubuk:

- 1:1–5:42 Lurutu kaxat la lususu atnedi diga nuunu.
- 6:1–9:31 Limixin nuunu di ekip tangarang mi levesongsongot.
- 9:32–12:35 Lempapaase mumu levempavang at ne Pita.
- 13:1–14:28 Lavatpas avot at ne Pol.
- 15:1–41 Luvuttadi amgomgo diga vot buru ro Jerusalem.
- 16:1–18:23 Lavatpas sepsev agepura at ne Pol.
- 18:24–21:14 Lavatpas sepsev avantun at ne Pol.
- 21:15–28:31 Larangtanga alis la lavatpas at ne Pol uto Rom.

1 ¹Saparap leeme silok ne Tiopilas;
At lovoang avot tarak aga malagan axasev u mi lempanga ne

Iesu ga lox i la ga anasa min; ga ru ka i ap mo laaleng ni ga vaxaru kaxat leven gugu ren, ²se at laaleng ne Moroa ga lam kaka i uto vana at laxalibet. Goxovisi ni goxo urut uto vana la ni ga vaase mi levelinga at Loroonan Kaala rinedi luvuttadi ni ga soxolik ka nedi do luvuttadi vavang teren. ³At lavanuet sangaun aleng melemu at lanmet teren, ni ga ru asuvos tinedi luvuttadi vavang teren ti lox asuusu i do ni i rururun mo gara roo xat amlong pam basinge lanmet, la nedi axap diga ven i; la ni ga paase axasep mumu Linintoo at ne Moroa. ⁴At lara laaleng diga vot pasa i la ni ga raba nedi mi lavapaase alii la ga tong lolos i ridi xeretna, “Nemen mita vas kaxat basinge lemenemen Jerusalem, ketla mina nemen tangais laramtaba ne Tamak ga vaase alii min tinimi, i ngan nia aga tong pam i rinimi xeretna, ⁵Jon ga sep susu nimi mi ladan, ketla noxo lox abao bok ba la miba lok kaka lesepe susu at Loroonan Kaala, la Loroonan Kaala na vubeles atnimi.”

Moróa Ga Lam Kaka Ne Iesu Uto Vana At Laxalibet

(Mt 28:16-20; Mk 16:19-20; Lu 24:50-53)

⁶At lara laaleng luvuttadi vavang digak lox eburu mi ne Iesu la diga sue i, “Leeme Silok. Kereva, uba riki xepe bok luvuttadi amgomgo boro Rom, kusu nedik axa mede Israel ataba lok tatao nedik at na levenaleng?”

⁷Iesu ga vorang i ridi xeretna, “Ne Tamak axa ga lok katling pam mo laaleng mo lavanga naba rupot teren, la ixo epovo xusu minaklen i do at ua laaleng. ⁸Ketla nemi minaba umsu mi lolos mo do Loroonan Kaala na vubeles atnimi; la minaba paase katling mi lorooro rak tinedi limixin to at lemenemen silok Jerusalem, la to bok at lengkot axap at lunep silok Judaia la Samaria, la to at lengkot axap bok at na lavatbung menemen kopok.”

⁹Melemu at na levelinga ren, Moroa ga lam kaka i upana la loxontakabu ga lok pe i basinge levereven atnedi.

¹⁰Nedi move diga reven lolos mu at ne Iesu upana at lamavangkap la soso mun lura luradi duga siga levesingsiga bunbun duga ru saparap nedi. ¹¹La duga lok, “Luvuttadi me Galili, lai mo mi tu mu i la mia reven upana at lamavangkap? Na ne Iesu, ne Moroa i lam kaka i basinge nimi uto vana, ni nabamlong bok kerekngan tai mo nemi mi ven i, i urut uto vana at laxalibet.”

Diga Soxolik Ka Lara Ri Lok Kun Ne Judas

¹²Melemu luvuttadi vavang digamlong uto Jerusalem boro at loxongkaana, laasen teren, Lakaana Olip, ik lok saparap lemenemen silok Jerusalem. ¹³Diga vubeles uto xeneng at lemenemen silok Jerusalem la diga vubeles uto vana at loogu diga nemen teren; Pita, Jon, Jems la ne Endru, Pilip la ne Tomas, Batolomiu la ne Metiu, Jems nitna ne Alpias,

Simon neni at lubungmixin me Selot; la ne Judas nitna ne Jems. ¹⁴Digat pot eburu amisik mi lentaba lavakin la ne Maria nenen ne Iesu mi luvutneton ngan loxonbinam tadi xusu dina ngising.

¹⁵At lara laaleng Pita ga xatu kaxat kantubu atnedi legesa sangaun kobot mi legepu sangaun (120) luvuttadi nuunu; ¹⁶la ga lok tidi, “Luvutnetak mi luvurinak, levelinga keneng at Lovoang Kaala migomgo na ira sorun; kerekngan Loroonan Kaala ga tong asu i at lengkompixan at ne Devit, mu ne Judas, neni laradi gam gomgo rinedi luvuttadi xusu dina ranga alis ka ne Iesu. ¹⁷Judas neni mo lara atnedik ga gugu eburu minedik.”

¹⁸Judas ga lok ka luunun ti mo laxakapmek teren, la neni ga un kaka loxongkangka min. Ni ga subu go la lorongtong teren gara repagam la labantine ren ga sixisu nga ukamang. ¹⁹La nedi limixin axap diga nemen go Jerusalem, diga ronga mo lavanga, la diga so asen mo loxongkangka at lavapaase axa atdi, do Akeldama, lavasuun teren keretna, “Loxongkangka at Lada.”

²⁰La ne Pita ga lok bok, “Keneng at levempikipixan at ne Devit ni ga malagan i xeretna,

‘Mo loogu ren na nemen gamasa; la tara noxo nemen bok ba ren.’

Sam 69:25

Melemu bok,

‘Mo lugugu ren tara naba xip kaka i ren.’

Sam 109:8

²¹⁻²²Kuren la ata soxolik ka tara, kusu na gugu eburu midik la na tong asu laxakatu kaxat amlong at Leeme Silok ne Iesu. Ata soxolik ka tara atnedi luvuttadi diga nemen eburu midik ap mo levenaleng Leeme Silok ne Iesu ga emu eburu midik; ga vaxaru ka i ap mo laaleng ne Jon ga sep susu ne Iesu se at laaleng ne Moroa ga lam ka i uto vana at laxalibet; la neni ba xip ka mo lugugu at ne Judas.”

²³Kuren la diga soxolik ka legepu radi; Josep, laasen bok teren ne Basabas, la lara laasen bok ne Jastas; la ne Matatias. ²⁴La diga sing keretna, “Leeme Silok, nenu ukleklen lodoxoma at limixin. Una lox ase nama mi tara atdu na luradi nu ura soxolik ka vam i, ²⁵kusu na xip ka mo lugugu at ne Judas ngan luvuttadi vavang la ni gat pas uto at lemenemen songsongot i epovo rin.” ²⁶La diga ekampoovo mi levenuat la mo luat at ne Matatias ga subu avot to at laxangka, kuren la ni ga vubeles eburu minedi lasangaun legesara xusu rip kip mo lugugu.

Lovotpot At Loroonan Kaala Saparap Limixin Nuunu

2 ¹At lara laaleng limixin me Judaia diga lok laanan silok, diga tong i do Pentikos; nedi limixin axap diga nuunu diga vot eburu ro at lara loogu. ²La soso mun diga ronga lavanga ga rupot ngan lamanman silok boro vana at laxalibet, la ga lox aumsu mo loogu digat kis to xeneng

teren. ³La diga ven lavanga ngan laxao ga rem epeseves ap mo loxot diga nemen teren la gat los kis atnedi getgesara. ⁴Loroonan Kaala ga vubeles atnedi axap la diga lox epovo i do dina paase mi lempapaase petpes, i ngan Loroonan Kaala ga raba di min.

⁵Ap mo loxonaleng limixin at ne Moroa boro at lengkot axap at na lavatbung menemen digak lok go Jerusalem ti lotu saparap ne Moroa. Nedi at lubungmixin me Judaia. ⁶Diga ronga mo lavanga la buaang mun limixin diga rupot eburu ro ap mo loogu. Diga sangu mila nedi getgesara diga ronga i do luvuttadi vavang diga tong asu levelinga at ne Moroa mi lempapaase atdi xa. ⁷Diga sangu aleng la diga lok, “Na luvuttadi di paase xeretna nedi boro Galili. ⁸I lok kereva la nedik axap dia ronga nedi di epaase mi lempapaase axa atdik. ⁹Nedik na boro Patia, Midia, la Ilam; boro bok Mesopotemia, Judaia la Kapadosia, Pontas la Asia; ¹⁰Pirigia la Pampilia la boro Isip la at lengkot bok Libia saparap Sairini; la lentaba bok atdik na boro Rom. ¹¹Lentaba bok at lubungmixin me Judaia, la lentaba atdik boro vetpes, di lok kaka mun lunuunu at limixin me Judaia; la lentaba bok atdik boro Krit la Arabia ketla nedik axap di ronga di, di paase mi lempapaase axa atdik mumu lempanga sangsangu ne Moroa ga lox i.” ¹²Diga lingun la diga esue minedi getgesara, “Ua lavasuun at na?”

¹³Ketla lentaba diga lok kalise luvuttadi vavang, la diga lok keretna, “Na luvuttadi dia vinin solo laxangkadan lolos.”

Pita Ga Vavang Ti Limixin

¹⁴La ne Pita eburu mi luvuttadi vavang diga tu kantubu at limixin axap la ni ga lok tidi xeretna, “Limixin me Judaia la nemi mo mik lok de Jerusalem, mina ronga levelinga rak; nia ana soxomus lavasuun at na lavanga rinimi. ¹⁵Na luvuttadi xopmen dina in kerekngan nemi mi doma i, mo vam i vasik konaleng maxantamak suubu. ¹⁶Ketla nai ne Moroa ga vaase asu i at levelinga at leeme vapaase alii, ne Joel.

¹⁷Moroa ga lok keretna, ‘Auret ti laaleng kavaxap at lavatbung menemen nia anaba lox i na; anaba riki asi Loroonan Kaala rak uto xantubu at limixin axap. Laxamdak mi laxaalik atnimi dinaba paase alii tempanga; luvuraau maxat atnimi dinaba silimet tangarang ka tempanga; la luvuttadi asioxo atnimi dinabam tobo teventomtobo. ¹⁸Ap mo levenaleng anaba riki asi Loroonan Kaala rak uto xantubu at lavasaxaruki rak bok, lavatlok mi lavakin; la nedi dinaba paase alii tempanga. ¹⁹Anaba lok tempanga loklok katling to vana at laxalibet la tempanga sangsangu ro xopok at lavatkangka. Lada, laxao la lakbus at lusuxa naba rupot; ²⁰laxangking naba rem gili na ngan lamain la lagaaling naba memele ngan lada; la melemu mo laaleng silok at Leeme Silok naba rupot. ²¹La do tara na sing ti laasen tarak kusu ri loklok tooro, ni naba roo.”

²²La ne Pita ga lok bok, “Leme Israel. Mina rongga na levelinga; na ne Iesu me Nasaret ni laradi ne Moroa ga lox asilox i mi lempanga sangsangu kantubu atnimi la nemi axa miga ven pam mo lempanga ni ga lox i at lekngen ne Moroa. ²³Moróa xa ga lox agagas i la gaklen pam lavanga naba ravasu, kerekngan lodoxoma axa ren; la nemi miga sev amer i xeretna, miga siam taba luvuttadi xapmek do dina vaxarem i ro vana at laxaba. ²⁴Ketla ne Moroa ga lox arooro amlong i basinge lololos at lanmet mila kopmen goxo epovo kusu lanmet na ranga alis i. ²⁵I lok ngan ne Devit ga paase mumu i xeretna,

‘Nia a reven Leeme Silok to melamgo rak at levenaleng axap. Ni mo ik lok at lakngak tino, kusu nia noxo marat at levenmumuat limixin di lok li i rak. ²⁶Kuren la nia a umsu mi lomomo, la a paase momo mun. Nenia a ruuna lodoxoma voovo, ²⁷mila nenu, ne Moroa noxo ke xepe lороonan tarak keneng at lolos at lanmet. La u noxo ke xepe Lanarong taram la labantuxu ren napso. ²⁸Ugara lox ase vam ia mi langas ti nom lороoro ruturun. Nenu uba suxa umsu ia mi lomomo, mila nenu uk lox eburu minia.”

Sam 16:8-11

²⁹La ne Pita ga lok bok, “Luvutnetak mi luvurinuk, ana vaase axasep nimi mumu lurubuno avolo atdik, ne Devit. Ni ga met pam la digak mir i, la lamaaut teren mo i nemen de, ise at na laaleng. ³⁰Neni ga leeme vapaase alii at ne Moroa, la ni gaklen pam laxakaape alii at ne Moroa rin. Moroa ga vangpe do ni naba lok ka tara at livipisik li at ne Devit kusu ni naba lox asilox i, ngan loorong silok. ³¹Devit ga ven pam umelamgo ri lavanga salai ne Moroa naba lox i; kuren la ni ga paase mumu laxakatu kaxat amlong at Lanarong. Ni ga lok, ‘Lороonan teren noxo nemen to at lemenemen at labarongan; la labantuxu ren noxopso.’

³²Moróa ga lox aroo amlong ne Iesu basinge lanmet, la nema na maga ven lороoro amlong teren. ³³Ni ga lam kaka i uto vana at laxalibet la ga vaxaxis li i ro at lixitkis orong la ne Moroa xa ga raba i mi lololos kusu ni na riki Lороonan Kaala ren tinama, kerekngan tai mo nemi mi ven i la mi rongga i. ³⁴Mo loxot to vana xopmen na paase mumu ne Devit do ni ga urut uto vana at laxalibet; ketla ne Devit ga lok keretna,

‘Moróa ga tong i ri Leeme Silok tarak; una xis de at lakngak tino, ³⁵se nenia aba lok li mo limixin munepen taram, i ngan loxot burubut to maxopok at luxangkedek taram.’

Sam 110:1

³⁶Kuren la limixin axap me Israel dinaklen avukar i do na ne Iesu, no miga vaxarem i ro at laxaba, ne Moroa ga lok li i xusu neni Leeme Silok la Lanarong.”

³⁷Mo limixin diga rongga i na, diga bulu aleng la diga lok ti ne Pita eburu mi luvuttadi vavang, “Luvutneton nama, maba lok lavanga salai?”

³⁸Pita ga lok tidi, “Nemi getgesara mina leeng basinge leveloklok kakapmek atnimi, la mina lok kaka lesepe susu at laasen at ne Iesu

Karisito kusu ne Moroa naba doxoma xepe leveloklok kakapmek atnimi la nemi minaba ruuna ka na laramtaba at Loroonan Kaala. ³⁹Moróa ga lok na lavapaase alii rinimi la livipisik li bok atnimi la tidi bok no di nemen paxalom, la tinedi axap ne Moróa naba ro xaka nedi.”

⁴⁰Pita ga paase aronga di mi laxalinga solo la ni ga sing tinotno bok di xeretna, “Mina lok tatao avukat nemi xusu mi noxo suma langsangan losongsongot mo naba rupot saparap limixin kakapmek at na levenaleng.” ⁴¹Buaang atnedi diga nuunu ap mo levelinga la luvuttadi vavang diga sep susu di; lavantun larabin sangsangaun kobot (3000) limixin diga beles saparap nedi luvuttadi nuunu ap mo laaleng.

⁴²Diga tupot eburu amisik mi luvuttadi vavang kusu rik lok ka levenanasa at ne Moróa; digak lok levengkitkis buru la levenanan buru la levesingising atdi.

Lorooro Kantubu At Limixin Nuunu

⁴³Buaang lempanga sangsangu luvuttadi vavang diga lox i la ga lok buaang limixin diga sangu. ⁴⁴Mo luvuttadi nuunu diga vot eburu amisik la diga vepes bok lempanga axap atdi xantubu atnedi. ⁴⁵Diga sesep bok mi lempanga atdi la mo levempilas teren diga epes i xantubu atnedi ga epovo at levempakpakes atnedi getgesara. ⁴⁶At levenaleng axap digat pot eburu amisik ngan loxonbinam tadi ro xeneng at loogu laplavang la diga anan buru leveluxa atdi ro xolonu, diga anan mo leveluxa eburu mi lumulus la lomomo keneng at lebelen di. ⁴⁷Diga emi asu mi ne Moróa la limixin axap diga lok ngangao atdi. At levenaleng axap Leeme Silok gam lam abeles bok luvuttadi diga lok kaka lunuunu at laasen at ne Iesu ukeneng ap mo lexekekes atdi.

Pita Mi Ne Jon Duga Lox Aroo Laradi

3 ¹At lara laaleng Pita mi ne Jon dugat pas uto vana at loogu laplavang kusu duna lok lising at lavantun konaleng ukantinao, i ngan leme Judaia digak lox amisix i. ²At lara langas povolo, laasen teren do Lumusaragu Maraanu, lara laradi mo gat kis, luxangkedek teren ga molo axap; nenen ga visik axa i xuren. At levenaleng axap limixin digap kip kaka i uto ap mo langas povolo xusu na ngising panga rin ap mo limixin digat pas uto at loogu laplavang. ³Ni ga ven ne Pita mi ne Jon duga beles to ap mo loogu, la ni ga sing du xusu duna raba i mi tempanga. ⁴Duga ru la duga ven tooro i la ne Pita ga lok tin, “Una ven tinama.” ⁵Mo laradi ga milik tidu, ga nua i do ni mo naba lok ka tempanga atdu.

⁶Ketla ne Pita ga lok tin, “Nia xopmen tevempilas gamgames koplá leven gol tarak, ketla ana raba u mi lavanga nia a ruuna i; keneng at laasen at ne Iesu Karisito me Nasaret, a tong i ru do, una ru upana la

una vas kaxat.”⁷ La ne Pita ga ranga axatu i mi lekngen tino la ga lok aurur i upana. Ap mo mene loxonaleng luxangkedek teren ga lolos ta.⁸ Ni ga los kaxat mi luxangkedek teren la ga vas kaxat. La ni ga beles buru midu ukeneng at loogu laplavang gat pas la gat los momo la ga emi asu mi ne Moroa.⁹ Mo limixin diga ven mo laradi gat pas la ga emi asu mi ne Moroa,¹⁰ diga ven kibis i do ni laradi singising panga no gat kis to at Lumusaragu Maraanu at loogu laplavang, diga sangu aleng ap mo lavanga ga rupot saporav i.

Pita Ga Paase Ri Limixin

¹¹ Mo laradi move gam tebeng tu at ne Pita mi ne Jon la limixin axap mo diga rakdu aleng la diga sixit posiga nedi ro at loxot silok saporap loogu laplavang diga tong i do ‘Loxot at ne Solomon’; ¹² Pita ga ven mo limixin la ga lok tidi, “Leme Israel; lai mo mi sangu ren mumu i na lavanga, la lai mo nemi mi tu la mia reven tooro nama min? Mi doxoma i do ma lox avukat na laradi mi lolos axa atnama xopla at loklok nunuan atnama xusu neni i lox epovo i rit pas? ¹³ Moroa at ne Abaram, Aisak, la ne Jakop, Moroa at lavalabat atdik, neni ga lox asilok laasen at ne Iesu, lasaxaruki ren. Nemi miga song araba limixin kapmek min kusu dina sev amer i; la miga sok tixirixes i ro melamgo at ne Paelat, ap mo loxonaleng ne Paelat ga lok do na soxomus asu i. ¹⁴ Neni laradi dadat la mokmokso; ketla nemi miga lok abulubun kepe i, la miga sing ne Paelat kusu na soxomus asu laradi sepsev amet tadi. ¹⁵ La nemi miga sev amet ne Iesu, neni lavasuun at lorooro avolo. Ketla ne Moroa ga lox arooro amlong i basinge lanmet, la nema na ma paase katling i mi mo lavanga mila nema maga ven i. ¹⁶ At lunuunu mun at laasen at ne Iesu la na laradi mi ven i la miklen i, ira lok ka lolos maxat keneng at luxangkedek teren. Lunuunu keneng at laasen at ne Iesu na, i lox aroo na laradi de melamgo atnemi axap.

¹⁷ La na, luvutnetak mi luvurinuk, nia aklen i do nemi eburu mi luvuttadi amgomgo atnemi miga lox i ri ne Iesu; miga lox i mila mi goxo xasep at levelinga at ne Moroa. ¹⁸ Gano migomgo ne Moroa ga vaase asu levelinga at lavaeme vapaase alii ren do Lanarong teren naba xip losongsongot silok; la ne Iesu ga lox asorun mo levelinga. ¹⁹ Kuren la mina leeng basinge laxakapmek atnemi xusu ne Moroa naba doxoma xepe laxakapmek atnemi, ²⁰ la kusu ne Moroa ba raba nemi mi lorooro nunuan basinge levenmumuat at nai lavatbung menemen kopok la kusu ni naba riki asi ne Iesu, neni Lanarong; Moroa gara soxolik ka vam i do rinimi. ²¹ Ni naba nemen to vana at laxalibet se at laaleng ne Moroa naba lox amaxat lempanga axap, kerekngan neni ga tong asu i mi levelinga at lavaeme vapaase alii ren me gano. ²² Kerepmo ne Moses ga lok,

‘Moroa, neni Leeme Silok atnemi naba sak tiki leeme vapaase alii naba vot kantubu atnemi lubangmixin me Judaia, i ngan ni ga sak tiki ia. Mina

ronga levelinga axap neni naba tong i rinimi. ²³Do tara i xopara na ronga levelinga ren, neni naba nemen petpes basinge mo limixin ne Moroa ga soxolik ka vam nedi do ateren to at lorooro melemu; la ne Moroa naba sev amet nedi axap ding tonga xepe levelinga ren.” *Len 18:15,18,19*

²⁴La ne Pita ga lok bok, “Lavaeme vapaase alii ga vaxaru ka i at ne Samuel la nedi bok lentaba diga rupot melemu ren, nedi axap diga paase alii mumu lorooro at Leeme Silok. ²⁵Nemi mi ruuna laxakaape at ne Moroa keneng at lavaeme vapaase alii ren, la nemi mi nemen keneng at nom lekabus no ne Moroa ga lox i eburu mi lavalabat atnimi, kerekngan ni ga tong i ri ne Abaram keretna.

‘Keneng at livipisik li ram, nia anaba lox anarong limixin axap at lavatbung menemen.’

Lur 22:18, 26:4

²⁶La kerepmo ne Moroa ga soxolik ka lasaxaruki ren la ga sak tiki i udo parap nemi avot kusu na lox anarong nimi xeretna; ni na lok nimi xusu mina ven kibis laxakapmek atnimi la mina leeng basinge laxakapmek atnimi.”

Pita Mi Ne Jon Duga Ru At Lavapaase

4 ¹Pita mi ne Jon move duga paase ri limixin la ap mo loxonaleng lavamaasa, mi laradi esep ga lok tatao loogu laplavang, la lubang Sadiusi diga vot pasa du. ²Diga musak mila nedu duga tong i ri limixin do ne Iesu mo ga roo xat amlong pam basinge lanmet, ti lox asuusu i do limixin di met, dinaba roo xat amlong bok. ³Kuren la diga ranga alis du, la diga lok li du at loogu xokoxo se ap mo laaleng melemu, mila laxangking mo ga lok do na lotup ta. ⁴Ketla buaang atnedi diga ronga i mo lavapaase at ne Pita, diga nuunu; la lexekekes atnedi limixin nuunu ga urut ti lavalimo larabin sangsangaun kobot. (5000)

⁵Ap mo laaleng melemu luvuttadi amgomgo at lubangmixin me Judaia, loxongkulao silok mi luvuttadi loklox ase at Lenavolo diga rupot to Jerusalem. ⁶Diga rupot eburu mi ne Anas neni lamgomgo at lubangmaasa, la ne Kaiapas, ne Jon, ne Aleksanda la nedi bok lentaba at libibinat at ne Anas. ⁷Diga vaxaru ne Pita mi ne Jon to melamgo atdi la diga sue du, “Lolos atnege nemu mu ruuna ka i xusu muna lox i na? La laasen atnege nemu mu gugu min?”

⁸Pita ga umsu mi Loroonan Kaala la ni ga lok tidi, “Luvuttadi amgomgo at limixin, la nemi loxongkulao silok; ⁹mi sue nama lingina ri lempanga avukat mata lox i ri na laradi, luxangkedek teren ga molo, la kereva neni i lox avukat. ¹⁰Minaklen i la limixin axap bok me Israel minaklen i do na laradi na i tu melamgo atnimi, ni ita lox avukat at lolos at laasen at ne Iesu Karisito me Nasaret, no nemi miga vaxarem i at laxaba. Ketla ne Moroa ga lox axatu amlong i basinge lanmet. ¹¹Iesu neni laradi Lovoang Kaala ga paase mumu i xeretna,

‘Mo luat nemi luvuttadi xipkip gu miga sok tixirixes kepe i, na nga neni i ngan lamgomgo ri levenu at axap.’ *Sam 118:22*

¹²Keneng mun at laasen teren nedik ataba lok ka lorooro avolo; mila kopmen bok ba teta at na lavatbung menemen kopok, laasen teren ne Moroa ga raba limixin min kusu nedik ataba rooro mu i.”

¹³Luvuttadi amgomgo diga sangu aleng at ne Pita mi ne Jon duga paase lolos la kopmen du goxo marat; diga ven kibis box i do nedu dugat pas amisik eburu mi ne Iesu; la nedu luradi gamasa mun, la kopmen du goxok lok at toloklox ase. ¹⁴Di goxo vorang tempanga mila diga ven mo laradi no duga lox avukar i mo ga tu eburu mi ne Pita la ne Jon. ¹⁵Kuren la diga tong i ridu kusu duna vas su basinge mo loxot tongtonga linga; la diga epaase mumu mo lavanga kantubu atdi. ¹⁶Diga esue xeretna, “Ataba lok lavanga salai ridu na luradi? Limixin axap na di nemen de Jerusalem diaklen pam na lavanga sangsangu nedu na luradi duta lox i, la nedik kopmen ta epovo bok ba do ataba tong i do du toxo lox i. ¹⁷Ketla ata ru pe na lavanga xusu noxo epeseves kantubu at limixin; ata tong i ridu do nemen bok ba duta vaase asu mo laasen ti tara.”

¹⁸La diga ro abeles du ukeneng la diga tong alolos i ridu do nedu noxo tong bok ba mo laasen at ne Iesu la du noxo anasa mi mo laasen teren.

¹⁹Ketla ne Pita mi ne Jon duga vorang i ridi keretna, “Nemi xa mina doxoma mumu i na, do ua i lox avukat at lemeren ne Moroa; mana rongga res atnimi xopla mana rongga res at ne Moroa. ²⁰Kuren la nema ma noxo xap ti vaase asu mo lempanga nema maga ven i la maga rongga i.”

²¹Luvuttadi amgomgo diga vaase lolos aleng tidu, la melemu diga soxomus asu du. Di goxo epovo do dina sev amarat du; mila buaang limixin diga emi asu mi ne Moroa ri mo lavanga sangsangu ga rupot kantubu atdi. ²²Mo laradi duga lok mo lavanga sangsangu rin, levenmaares teren ga volo lavanuet sangaun.

Lisingising At Luvuttadi Nuunu

²³Melemu at losoksoxomus asu atdu, Pita mi ne Jon dugamlong saporap lentaba atdu, la duga tong mo levelinga, lavamaasa silok mi loxongkulao silok diga tong i. ²⁴Diga rongga i mo, la diga lok legesa doxoma mi lisingising saporap ne Moroa, diga lok keretna, “Leeme Silok, nenu luruntudum li at laxalibet, lavatbung menemen, laras la lempanga axap mo di rooro xeneng teren. ²⁵Uga vaase asu na levelinga mi Loroonan Kaala at lungusno at ne Devit, lurubuno nama. Neni lasaxaruki ram, ni ga lok,

‘Tila ba limixin kopmen me Judaia di musak; tila limixin di gagas ti esep eburu mi ne Moroa? Mo lodoxoma atdi ba xap kot. ²⁶Lavaorong silok at na lavatkangka di gagas li nedi la lavaeme silok bok di tupot eburu amisik kusu dina esep eburu mi ne Moroa la Lanarong teren.’ *Sam 2:1-2*

²⁷Kerepmo ne Erodes mi ne Pontias Paelat diga rupot eburu at na lemenemen silok eburu minedi limixin me Judaia la limixin kopmen di me Judaia; kusu dina lox abulubun kepe ne Iesu, neni lasaxaruki dadat taram, mo nu ga lok li i do Lanarong. ²⁸Diga rupot buru ri lok lempanga no nenu ugara gagas li vam i mi lolos taram la lodoxoma ram do naba vot. ²⁹Monga Leeme Silok, u ronga vam mo levelinga lolos di tong i; la una lox abelemes nema lavasaxaruki ram kusu mana vaase asu Lagale Lavavang. ³⁰Una song asu mi lakngam ti lox aroo levenanmeres la una lok bok tempanga sangsangu xeneng at laasen at lasaxaruki dadat taram, ne Iesu.”

³¹Melemu at lisingising atdi, mo loxot nedi diga vot eburu ren gang nengne. Diga umsu mi lolos at Loroonan Kaala la diga vaxaru ka i xusu dina paase asu levelinga at ne Moroa la kopmen bok ba teanmarat.

Luvuttadi Nuunu Diga Epes Lempanga Kantubu Atdi

³²Mo luvuttadi nuunu diga nemen mun keneng at legeso doxoma la legese belen. Kopmen teta atnedi ga lok do mo lempanga ren, ateren axa; ketla diga epes di getgesara mi lempanga axap diga ruuna i. ³³Luvuttadi vavang diga ruuna ka lolos la diga paase asu Lagale Lavavang at laxakatu kaxat amlong at Leeme Silok ne Iesu. La ne Moroa ga suxa umsu di mi leveloklox anarong. ³⁴Kopmen teta xantubu atdi gat kis pakpakes. Lentaba diga ruuna lengkongkangka la lentaba diga ruuna laraugu, diga sesep min la diga lok kaka levempilas at nom, ³⁵la diga raba luvuttadi vavang min; la mo levempilas diga epes ba i xantubu atnedi ga epovo at lavakpakes atnedi getgesara.

³⁶La ne Josep neni at libibinat at ne Levi, neni boro Saipras, mo luvuttadi vavang diga tong box i do Banabas (Lavasuun at laasen Banabas do, “Laradi loklox alolos.”) ³⁷Neni ga sesep mi loxongkangka ren, ga lok ka levempilas, la ga song araba luvuttadi vavang min.

Ananias Mi Ne Sapira

5 ¹Ketla lara laradi laasen teren ne Ananias eburu mi latkin teren ne Sapira. Ni ga sesep mi loxongkangka atdu, ²ketla ni ga ranga alis lenep unun ap mo levempilas do tin; latkin teren gakleklen i, la ni ga raba lenep uto ri luvuttadi vavang.

³Pita ga lok tin, “Ananias, tila u siam abeles ne Satan ia umsu at lodoxoma ram? La ia lok u, ura xarang Loroonan Kaala, la ura ranga alis bok lenep pilas ap mo luunun uga lok ka i ap mo loxongkangka. ⁴Avot nu goxovisi sesep min, ga taram axa; la melemu nu ga sesep min, levempilas bok ataram. Tila ba nenu u doxoma i do una lok na loklok? Nu xopmen una xarang limixin, nenu u xarang ne Moroa!”

⁵Ananias ga ronga i na la ga subu si ukopok la ga met; la nedi axap diga ronga i na, la diga marat aleng. ⁶La luvuraau maxat diga beles

ukeneng la diga bom labantuxu ren, diga xip asu i ukamang la digak mir i.

⁷Melemu lixilik latkin teren ga vubeles, ketla ni goxoklen i do latlok teren ga met pam. ⁸Pita ga lok tin, “Una tong i ria; kereva nai luunun axap nemu mi latlok taram muga ranga ka i ap mo loxongkangka?”

La ni ga siam la ga lok, “I ruturun, luunun axap.”

⁹La ne Pita ga lok tin, “Tila nemu mi latlok taram mu doma i do muna lok tong pen Loroonan Kaala at Leeme Silok? Limixin no dik mit latlok taram no di tu at lumusaragu mo nga, la diba xip kaka box u ukamang.”

¹⁰Ap mo mene loxonaleng ni ga subu saparap luxangkedek at ne Pita la ni ga met ta. Mo luvuraau diga beles ukeneng la diga ven i do latkin mo ga met, diga xip kaka i ukamang la digak mir i saparap latlok teren.

¹¹Langsangan lanmarat ga ravasu xantubu atnedi axap limixin nuunu la nedid bok mo diga ronga mo lavanga.

Luvuttadi Vavang Diga Lok Lempanga Sangsangu

¹²Buaang lempanga sangsangu Leeme Silok ga lox i at levengikngen di luvuttadi vavang teren kusu dina lox i xantubu at limixin. Nedi axap mo luvuttadi nuunu digat pot eburu amisik ngan loxonbinam tadi to at loxot laasen teren ‘Loxot at ne Solomon.’ ¹³Mo limixin kopmen tunuunu atdi diga marat tik lox eburu minedi, keke i do buaang limixin diga lok ngangao aleng atdi. ¹⁴Ketla buaang nedid limixin, lavatlok mi lavakin diga lok kaka lunuunu at Leeme Silok la diga beles at loxonbinam atdi. ¹⁵Kuren la limixin diga lok kaka luvuttadi mekmeres mi levenora atdi uto at levengkonngas kusu do, ne Pita na vas polo, mo lamamau at lovoovo ren naba lok pavaa di. ¹⁶La buaang nedid limixin diga vas kaxat boro at leven menemen saparap Jerusalem, diga lok kaka levenanmeres atdi, la nedid bok lubunggas ga suxuna nedid; la nedid axap diga lok avukat.

Luvuttadi Vavang Diga Xip Levesongsongot

¹⁷Ketla lamaasa gomgo at lavamaasa ga xatu kaxat eburu minedi limixin teren; mo limixin diga tong nedid do lubung Sadiusi, diga umsu mi levereven peves ti luvuttadi vavang. ¹⁸Diga ranga alis ka luvuttadi vavang la diga lok li nedid at loogu xokoxo. ¹⁹Ap mo laxanimin laangelo at ne Moroa ga suang lumusaragu ap mo loogu xokoxo la ni ga sat asu di ukamang la ga lok tidi, ²⁰“Uto nimi at loogu laplavang la mina tong asu Lagale Lavavang mumu lorooro maxat.”

²¹Luvuttadi vavang diga ronga res la ga maxantamak suubu diga beles to at loogu laplavang la diga vaxaru ka i xusu dina anasa limixin.

Lamaasa gomgo eburu mi limixin teren, diga ro bubua ka lubung amgomgo at lubungmixin me Judaia kusu nedid axap dina lok lavapaase silok; la diga lox aonon levelinga uto at loogu xokoxo xusu dina lok taba

nedi mi luvuttadi vavang. ²²Ketla at loxonaleng diga rupot di goxo ven luvuttadi vavang to at loogu xokoxo; kuren la digamlong uto at luvuttadi amgomgo xusu dina tong axasep nedi min. ²³Diga lok keretna, “At loxonaleng ma rupot to at loogu xokoxo, ma ven i do i tu pipe rinotno, la nedi mo luvuttadi rutu mu mo bok di tu at lumusaragu; la ma suang mo lumusaragu la nema maxo ven tara go xeneng.” ²⁴La mo lavamaasa silok la laradi gomgo at luvuttadi rutu mu diga ronga i na la diga rangku do lai mo ga rupot saparap mo luvuttadi vavang.

²⁵La lara laradi ga rupot la ga lok tidi, “Mina ronga i na. Luvuttadi mita lok li di itinongo ro at loogu xokoxo no di tu at loogu laplavang la dia anasa limixin.” ²⁶Kuren la laradi gomgo ga vas kaxat eburu mi luvuttadi rutu mu la diga lam ka amlong luvuttadi vavang. Kopmen di goxo sep nedi mila diga marat do limixin dina lu amet di mi laxanuat.

²⁷Nedi diga lam kaka luvuttadi vavang ukeneng, la diga vaxaru nedi ro melango at luvuttadi amgomgo at loxot tongtonga linga; la lamaasa gomgo ga lok tinedi xeretna, ²⁸“Maga raba nemi mi levelinga lolos do nemen gat nemi mita anasa mi mo laasen at ne Iesu; ketla ming tonga xepe i. Mira vaase asu vam nom levenanasa at lengkot axap de xeneng Jerusalem, la nemi mi lox i xuren kusu do nema maba xip tutu mi lanmet teren.”

²⁹Pita eburu minedi luvuttadi vavang diga vorang i ridi xeretna, “Mana ronga res kusuk mun at ne Moroa la ma noxo ronga res at limixin mun. ³⁰Morua, neni lomoroa at lavalabat atnedik, neni ga lox axatu ne Iesu basinge lanmet, melemu atnemi miga vaxarem i ro at laxaba. ³¹Morua ga xiv aurur i upana la ga vaxaxis i ro at lekngen tino mila neni lamgomgo la Laradi Loklox Arooro xusu na raba limixin me Israel mi langas ti leeng basinge laxakapmek atdi la ne Morua naba doxoma xepe i. ³²Nema na ma vaase asu na levelinga; Loroonan Kaala bok i vaase asu i, neni nom laramtaba ne Morua ga raba i rinedi ding tonga res at levelinga ren.”

³³Diga ronga i mo la diga musak aleng, la diga lok do dina sev amet di. ³⁴Ketla lara atdi, neni la Parisi laasen teren ne Gamaliel; neni laradi loklox ase at Lenavolo la limixin axap diga lok ngangao aleng teren. Ni ga xatu kaxat kantubu at luvuttadi amgomgo la neni ga sing nedi xusu dina riki asu be mo luvuttadi vavang ukamang at toxonaleng mutmut mun. ³⁵La neni ga lok tinedi luvuttadi amgomgo xeretna, “Leme Israel, mina doxoma avukat mumu lavanga salai mi lok do mina lox i ridi na. ³⁶Gano ne Tiudas ga vot, ga lok do neni mo i silok aleng; la mo limixin diga mumu asu i ga epovo at lavanuet sangaun kobot (400). Ketla neni ga uu la mo limixin teren diga epeseves la mo lugugu atdi ga met gamasa nga.

³⁷Melemu at na, ne Judas boro Galili ga rupot ap mo levenaleng at loklok ka asen; neni bok ga sat ka buayang limixin saparav i; ketla neni bok ga uu la mo limixin diga mumu asu i, diga epeseves. ³⁸Kuren la at

na lempanga nanga, nia ana tong asu i rinimi; nemen mita sev amet di. Mina ke mulus di xuren; mila do na lugugu di lox i mi lodoxoma axa atdi, to gira xap pam. ³⁹Ketla do lugugu atdi boro vana at ne Moroa, nemi xopmen mina epovo xusu minaba ru pe i. Miba ven i do nemi mi esep mi ne Moroa!”

⁴⁰Luvuttadi amgomgo diga mu asu na lavapaase at ne Gamaliel. Diga ro abeles luvuttadi vavang ukeneng, la digak pixis ned; la diga tong alolos i ridi do nemen gat ned; ta tong asu laasen at ne Iesu; la diga soxomus asu di.

⁴¹Luvuttadi vavang diga vas kaxat basinge luvuttadi amgomgo, diga umsu mi lomomo mila ne Moroa ga siam do diga epovo rip kip lainmangan at laasen at ne Iesu. ⁴²La at levenaleng axap to xeneng at loogu laplavang la to at leventaugu at limixin, diga anasa la diga vavang mi Lagale Lavavang at ne Iesu, neni Lanarong.

Lavanuti Radi Ri Lok Tooro Luvuttadi Vavang

6 ¹Ap mo levenaleng leexes at luvuttadi nuunu ga uturut amisik upana; la leedak ga ravasu xantubu atnedi limixin me Judaia mo diga paase Grik la ned; limixin me Judaia diga paase Judaia. Limixin mo diga paase Grik, diga lok do lempat naa atdi, di goxop kip ka epovo levempanga loklok tooro ridi at levenaleng axap. ²Kuren la ned; na lasangaun mi legepura luvuttadi vavang diga ro bubua ka ned; axap luvuttadi loklok ka anasa la diga lok, “Kopmen nak mokso rinama xusu mana ke xepe na Lagale Lavavang at ne Moroa la mana raba panga nemi. ³Luvutnetak mi luvurinu, mina soxolik ka tavanuti tuvuttadi xantubu atnemi xa, mo nemi mikleklen di do di umsu mi Loroonan Kaala la lodoxoma avukat; la nema maba lok li di, kusu dina lok tatao na lugugu, ⁴La nema xa maba raba lorooro axap atnema ri lugugu at lisingising la lugugu at lavapaase asu Lagale Lavavang.”

⁵Nedi axap diga lok momo ap mo levelinga at luvuttadi vavang; kuren la diga soxolik ka ne Stiven, laradi ga umsu mi lunuunu la Loroonan Kaala; la ne Pilip, Porokaras, Nakano, Timon, Pamenas; la ne Nikolaus neni boro Antiok, la goxopmen neni laradi me Judaia, ketla neni gam tebeng lunuunu ngan leme Judaia. ⁶Nedi na diga raba ned; ri luvuttadi vavang la diga lok lising la diga lok li levengkikngen di ro mavana atdi, kusu dina lox anarong di.

⁷La levelinga at ne Moroa ga epeseves. Leexes at limixin nuunu ro Jerusalem ga uturut amisik mene la buaang atnedi lavamaasa diga lok kaka lunuunu maxat ap mo Lagale Lavavang.

Luvuttadi Amgomgo Diga Xoxo Ka Ne Stiven

⁸Stiven neni laradi ga umsu mi letaba nalamu at ne Moroa; la ni ga umsu bok mi lolos la ga lok lempanga sangsangu kantubu at

limixin. ⁹Ketla lentaba luvuttadi di goxopara rin, nedi luvuttadi boro at lumenemen Sairini la Aleksandria; diga lotu at lara loogu singising, laasen teren, ‘Loogu Singising at Luvuttadi Sepsen.’ La lentaba limixin bok me Judaia boro Silisia la Asia di goxopara ne Stiven; nedi axap eburu mi ne Stiven diga etep mi levelinga. ¹⁰Ketla Loroonan Kaala ga raba ne Stiven mi lakleken silok; kuren la ni ga vaase mi lolos la di goxo epovo xusu dina vorang i.

¹¹La diga lok li lentaba xusu dina bala raba i, diga lok keretna, “Nema maga ronga ne Stiven, neni ga paase vupu ri ne Moses la ne Moroa.”

¹²Kerepmo diga lox axatu lodoxoma at limixin, loxongkulao silok la luvuttadi loklox ase at Lenavolo. Diga vosiga ne Stiven, la diga ranga alis i; la diga lam kaka i uto melango at luvuttadi amgomgo. ¹³La diga lox abeles lentaba luvuttadi xusu ti xarang taba i. Diga lok, “Na laradi i paase vupu ri na loogu laplavang at ne Moroa la Lenavolo at ne Moses. ¹⁴Maga ronga i do ga lok do ne Iesu me Nasaret ba ut asi na loogu laplavang la naba ba gili bok leretere ne Moses ga raba avolo dik min.”

¹⁵Nedi axap digat kis go, diga ven tooro ne Stiven la diga ven lemeren ga ngan ta lemeren at laangelo at ne Moroa.

Levelinga At Ne Stiven

7 ¹La lamaasa gomgo ga sue ne Stiven, “Kereva na levelinga di lox i ru, i ruturun?”

²La ne Stiven ga vorang i ridi xeretna, “Luvutnetak la luvuttamak. Mina ronga be levelinga rak. Moroa at laxasep ga rupot saparap ne Abaram ne temen dik ap mo laaleng neni ga nemen to Mesopotemia, la avot ti laaleng neni gat pas uto Aran; ³la ne Moroa ga lok tin, ‘Una on basinge lemenemen taram eburu mi libibinat taram; la unat pas ti mo lemenemen nia anaba lox ase u min.’

⁴Kuren la ni ga vas kaxat basinge lenep laasen teren Kaldia la ni gat pas kusu ri nemen to Aran. Melemu at lanmet at ne temen ne Abaram, Moroa ga ro ka i xusu na on basinge mo lemenemen la na vubeles at na lenep, monga nemi mi nemen teren. ⁵Morua xopmen goxo raba ne Abaram mi tenep at nai laxangka do tin axa, kopmen tinotno tekot go at na laxangka; ketla ne Moroa ga xaape min tin do ni naba raba i min la ateren axa, la mo livipisik li bok teren melemu. Ap mo laaleng ne Moroa ga lok na laxakaape ri ne Abaram, Abaram goxovisi ruuna taxamdak. ⁶Ketla ne Moroa ga lok tin, ‘Livipisik li ram diba nemen to at lenep petpes, ap mo lenep diba lok ngan lavasaxaruki la diba xip buaang laxanmumuat at lavanuet sangaun kobot (400) levenmaares. ⁷Ketla melemu aba song araba langsung levengkokoxo rinedi limixin do dina lox asongot limixin tarak. Melemu bok diba vas kaxat basinge mo lenep la diba lotu saparav ia at na lenep.’ ⁸La ne Moroa ga raba ne Abaram

mi leretere ri rivit kepe lengkontuxu, i ngan loklok katling ti limixin me Israel. Kuren la ne Abaram ga vit kepe loxontuxu at ne Aisak, melemu at lavanuan aleng latkin at ne Abaram ga visik asu i. Aisak ga vit kepe loxontuxu at ne Jakop, la ne Jakop ga vit kepe loxontuxu at lasangaun legepura nedi lavalabat atdik.

⁹Nedi na laxamdak at ne Jakop, diga reven peves at neton di, ne Josep; la diga sesep min ngan lasaxaruki uto Isip. Ketla ne Moroa ga nemen eburu min, ¹⁰la ni ga lox asepsu i basinge mo laxanmumuat gat pot saparav i. Ap mo loxonaleng ne Josep ga ru ro melamgo at ne Parao, loorong silok me Isip, Moroa ga raba ne Josep mi lodoxoma avukat la loklok nunuan. Parao ga ven kibis i la ga lok li ne Josep kusu neni lamgomgo ap mo lenep silok la keneng bok at loogu at loorong silok teren.

¹¹Ketla loroxo silok ga vot ap mo lunep silok, Isip la Kanan, la ga lox asu buaang laxanmumuat. Goxopmen bok tempanga anan ti lavalabat atdik. ¹²La ne Jakop ga ronga i do leveluxa mo gak lok to Isip, la ni ga sak tiki mo laxamdak teren uto; ni lavatpas avot atdi ugo. ¹³At lavatpas sepsev agepura atdi, ne Josep ga tong asu i ri luvutneton dola neni neton di; la ne Parao gaklen ba limixin at ne Josep ap mo laaleng. ¹⁴La ne Josep ga lox aonon lavapaase uto ri ne temen, ne Jakop, la ga tong i rin eburu mi libibinat teren kusu dinat pas uto Isip; nedi axap diga epovo at lavanuti sangaun mi lavalimo. ¹⁵La ne Jakop ga vas kaxat eburu mi limixin teren uto Isip; ap mo lenep neni eburu mi lavalabat atnedik diga nemen e, se diga met. ¹⁶Diga xip kaka amlong labarongan atnedi uto Sekem la digak mit di at loxot ne Abaram ga un kaka i at libibinat at ne Emo mi levempilas.

¹⁷Mo laaleng ga sixit auret kusu ne Moroa na lox epovo laxakaape ren ga lox i ri ne Abaram; lexekexes at lubungmixin me Judaia ga uturut aleng upana. ¹⁸Melemu lara loorong silok petpes, kopmen goxokleklen ne Josep, neni gam gomgo ri limixin me Isip. ¹⁹Ni ga bala vukpuk lavalabat atdik la ni ga musak di, ga lok nedi xusu dina lok pes laxamdak atdi uto kusu mo laxamdak lixilik atdi diba met.

²⁰Ap mo levenaleng lavalabat atdik digap kip levenmumuat, la lara latkin ga visik ne Moses, neni lagale lamdak la ga lox avukat at lemeren ne Moroa. Ni ga nemen maxopok at loklok tatao at ne temen at lavantun gaaling. ²¹Ketla ne temen mi nenen duga lok li i ro xamang la loolik at ne Parao ga lok ka i xusu ni na lox asilox i ngan lamdak tin. ²²Ni ga lox ase ro Isip la ga umsu mi lakleklen at leveloklok atdi, la ni ga silok aleng at levempapaase la at lempanga axap ni gak lox i.

²³Moses ga lavanuet sangaun maares teren la ni ga vara i do na ven limixin teren me Israel. ²⁴Ni ga ven lara atnedi, lara me Isip gap sev i; kuren la ni gat pas la ga lok do na lok tooro mo laradi me Israel, la ni ga

sev amer i xusu ri sepo i. ²⁵Ni ga nua i do limixin teren mo digaklen pam i do ne Moroa ga soxolik ka i xusu ni naba soxomus asu di at loxokoxo; ketla nedi xopmen di goxo xasep teren. ²⁶Ap mo lara laaleng melemu ni ga ven manga legepu radi me Israel duga esep, la ni ga lok do na lok lumulum kantubu atnedu; ni ga lok, 'Muna ronga i na. Nemu vam nom leton; tila nemu mu esep?'

²⁷Ketla mo lara ga vaxaru kaxat mo leesep ga so asu ne Moses la ni ga lok, 'Nege ga lok li u xusu nenu lamgomgo atnama la unang tonga linga atnama?' ²⁸U vara manga i do una sev amer ia xerekngan nenu uta sev amet mo laradi me Isip itinongo?' ²⁹Moses ga ronga i na la ga sixiro boro Isip la ni gara nemen to Midien ngan laradi xadiong. Mo go neni ga ruuna ka legepu madak.

³⁰Ni ga nemen go Midien at lavanuet sangaun maares la melemu at na, laangelo at ne Moroa ga rupot saparav i ro at lamatbin, gak lok at lakaana, laasen teren Sinai. Mo laangelo gak lok to at lara luuna lixilik; laxao gak lok ap mo luuna, ketla kopmen goxo rin kotos levempavaxan una ren. ³¹Moses ga sangu aleng teren, la ni ga vas saparap mo luuna xusu na ven avukar i. La ni ga ronga laxaka at Leeme Silok ne Moroa; ³²'Nenia ne Moroa at lavalabat atnemi, Moroa at ne Abaram, Aisak la ne Jakop.' Moses ga dede mi lanmarat la ni goxo lok do na ven bok ba i.

³³Moroo ga lok tin, 'Una lok pes luvanga vatpas taram, mila na loxot nenu u tu ren, ni i xaala aleng. ³⁴Nia ara ven pam levenmumuat limixin tarak di suma i ro Isip. Nia ara ronga vam lerengteng atnedi la nia ara si xusu ana lok tooro di. Ude nga u la nia aba sak tiki u uto Isip.'

³⁵Moses neni laradi limixin me Israel di goxopara rin. Diga sue i, 'Nege ga lok li u do nenu lamgomgo atnama la laradi rongtonga linga atnama.' Ketla ni laradi ne Moroa ga sak tiki i ngan lamgomgo la laradi loklox asu, kerekngan laangelo ga tong i ro ap mo luuna, laxao gak lok teren. ³⁶Neni ga lam asu ka limixin basinge lenep Isip, ga lok lempanga sangsangu ro Isip, la to bok at loxontas laasen teren, Laras Memele, la to bok at lamatbin at lavanuet sangaun maares. ³⁷Moses neni laradi ga paase ri limixin me Israel do 'Moroo naba riki taradi vapaase alii xerekngan neni ga riki ia; la neni at tara xa atnemi.' ³⁸Neni mo laradi ga nemen eburu mi limixin me Israel to at lamatbin, neni ga nemen eburu mi lavalabat atdik la laangelo bok mo ga paase rin to at lakaana Sinai; neni ga lok ka Lenavolo at ne Moroa xusu na raba i ri nedik limixin me Israel.

³⁹Ketla lavalabat atdik goxopara na ronga res teren, diga sok tixirixes xepe i la diga lok do dinamlong uto Isip. ⁴⁰Diga tong i ri ne Aron, 'Una lok tevempooovo moroa rinama xusu namgo rinama at langas. Nema xopmen manaklen i do lavanga salai ga rupot saparap mo laradi, ne Moses mo ga lam asu nama boro Isip.' ⁴¹Ap mo loxonaleng mun diga lok lovoovo bulumaxao mi levengkikngan di la digaplavang saparav i mi

leventamtaba la diga lok leluxa silok ti lok katling i. ⁴²La ne Moroa ga lox abulubun kepe nedí, la ga ke xepe nedí xusu dina lotu saparap lempanga i nemen to vana at laxalibet. I lok ngan levelinga i nemen keneng at lubuk at lavaeme vapaase alii i lok keretna,

‘Limixin me Israel! Kopmen mi goxoplavang mi lempanga mi lavanuet kangkedek tia la miga lok letaba min ti lara vetpes ap mo lavanuet sangaun maares to at lamatbin. ⁴³Ketla miga lok tatao loogu at lomoroa ne Molok, la lovoovo at lenti, ne Repan; nedí axap nom laxampoovo vanga nom nemi miga lox i do ri lotu ren. Kuren la aba riki xepe nemi uto melemu at lenep silok Babilon.’ *Amo 5:25-27*

⁴⁴Lavalabat atnedik diga lok tatao loogu kadis at ne Moroa ro at lamatbin. Diga gugu i ngan ne Moroa ga lox ase ne Moses min to at lakaana Sinai. ⁴⁵Melemu lavalabat atnedik no diga lok kaka mo loogu boro at luvuttemen nedí la diga xip kaka i eburu minedi at laaleng diga emu mi ne Josua; la diga lok kaka lara loxongkangka basinge lara libibinat petpes no ne Moroa ga lok kepe di ve, avot ti lovtopot atdi. La mo loogu ga nemen go se at levenaleng at ne Devit. ⁴⁶Moroa ga vara aleng ne Devit la ne Devit ga sue ne Moroa kusu na siam avolo i ri xip toogu laplavang ti Lomoroa at ne Jakop. ⁴⁷Ketla ne Solomon axa ga xip mo loogu ri ne Moroa.

⁴⁸Ketla ne Moroa neni i lolos la i silok, kopmen na nemen at leven gu limixin dip kiv i; i lok ngan leeme vapaase alii ga tong i xeretna,

⁴⁹‘Moroa ga lok keretna, laxalibet neni loxot kitkis tarak, la laxangka ni loxot burubut at luxangkede tarak. Toogu xereva nemi miba xiv i ria? Ua ba toxot tia ri lox amas? ⁵⁰Kereva, nia a goxo rudum li na lempanga axap?’ *Ais 66:1-2*

⁵¹La ne Stiven ga lok bok tidi, “Miba baulang alika? Lingisa ba minaba siam ka levelinga at ne Moroa ukeneng at lebelen nemi? La lingisa ba nemi miba ronga res at levelinga at ne Moroa? Nemi mi lok ngan pam lavalabat atnemi; nemi bok na mi xopara ri Loroonan Kaala! ⁵²Lavalabat atnemi diga lox asongot lavaeme vapaase alii axap. Digap sev amet luvuttadi at ne Moroa, no gano migomgo diga paase asu lovtopot at laradi mokmokso la lasaxaruki ren. Ketla nanga nemi miga song araba i ri limixin esep la miga sev amer i. ⁵³Nemi vam na miga lok ka Lenavolo at ne Moroa no lubang angelo diga song araba nemi min. Ketla nemi xopmen mina mumu asu i.”

Diga Lu Uat Ne Stiven

⁵⁴Mo luvuttadi amgomgo at loogu laplavang diga ronga i nom la diga musak aleng la diga atat etang levesangsa atdi ri ne Stiven mi lumukmusak. ⁵⁵Ketla ne Stiven ga umsu mi Loroonan Kaala, neni ga milik aurut upana at laxalibet la ni ga ven lisisixam at ne Moroa, la ne

Iesu ga tu at lekngen tino. ⁵⁶Ni ga lok, “Mina ven i! Nia a ven laxalibet i rem suang; la Laradi Mevana i tu ro at lekngen tino at ne Moroa.”

⁵⁷Digap kup lolos la diga lok pe levenbaalung atnedi mi levengkikngen di. La diga sixit eburu uto saparap ne Stiven, ⁵⁸diga sar asu i basinge mo lemenemen silok, la diga lu uar i. La mo luvuttadi diga lu uat ne Stiven diga lok li levempanga singsiga atdi ro at lara laradi, laasen teren ne Sol.

⁵⁹Nedi move diga lulu uat ne Stiven la ni ga sing keretna, “Iesu, Leeme Silok, una lok ka lороonan tarak!” ⁶⁰Ni ga xis tiktikbu mi luvatgulom teren la ni ga sing silok keretna, “Leeme Silok. Nemen uta doxoma na laxakapmek atnedi di lox i ria.” Ni ga tong i mo la ni ga met ta.

Sol Ga Lox Asongot Limixin Nuunu

8 ¹La ne Sol ga mulus ap mo lanu at ne Stiven. Ap mo mun laaleng luvuttadi nuunu ro Jerusalem diga vaxaru ka i xusu dina suma ka laxasongsongot silok. Luvuttadi nuunu diga epeseves at lengkot axap Judaia la Samaria, ketla luvuttadi vavang diga nemen to Jerusalem. ²Ket lentaba luvuttadi diga lotu saparap ne Moroa digak mit ne Stiven, diga saxaanu ren. ³Ketla ne Sol ga lok tong pen i do na sev amet limixin axap diga nuunu. La limixin esep digat pas uto at laraugu atnedi xusu dina ranga alis ka di, lavatlok eburu mi lavakin, la diga lok li di at loogu xokoxo.

Pilip Ga Vavang To Samaria

⁴Luvuttadi nuunu no diga epeseves, digat pas ti lengkot axap, la diga vavang mi Lagale Lavavang. ⁵Pilip gat pas uto at lara lemenemen at lenep Samaria la ni ga vavang mi Lagale Lavavang at Lanarong tinedi limixin me go. ⁶Buaang limixin diga ru pilo la diga ronga avukat mo levelinga at ne Pilip. Digang tonga i mo la diga ven bok lempanga sangsangu neni ga lox i. ⁷Laxan gas diga ravasu basinge buaang limixin mi langsan leregenteng; buaang atnedi limixin mo lengkot atnedi ga molo la nedi bok lentaba di goxo epovo rit pas, diga lox avukat. ⁸Kuren la langsan lomomo ga rupot saparap limixin ap mo lemenemen.

⁹Keneng ap mo lemenemen lara laradi laasen teren ne Simon; neni at leventaba levenaleng neni gak lox arakdu limixin me Samaria mi mo lempanga sangsangu ren. Ni ga lok do neni mo i silok tinotno. ¹⁰La buaang nedi ap mo lemenemen, nedi limixin gamasa la nedi lentaba silok diga lok ngangao aleng teren. Diga lok, “Neni nom lara i ruuna lolos at ne Moroa la lolos teren i silok.” ¹¹At levenaleng buaang neni gak lox arakdu nedi mi mo lempanga sangsangu ren; kuren la diga mumu asu levelinga ren. ¹²La nedi diga nuunu at lavapaase at ne Pilip mumu Lagale Lavavang at Linintoo at ne Moroa la at laasen at ne Iesu me Nasaret, Pilip ga sep susu di, lavatlok la lavakin bok. ¹³Simon bok neni ga nuunu, la melemu

at lesep susu ren ni ga nemen auret ne Pilip, la ni ga rakdu aleng at lempanga sangsangu ni ga ven ne Pilip gak lox i.

¹⁴Luvuttadi vavang to Jerusalem diga ronga i do limixin to Samaria diga nuunu at levelinga at ne Moroa; kuren la diga riki ne Pita mi ne Jon saparap ned i. ¹⁵Duga rupot la duga sing ne Moroa xusu ned i bok diba lok ka Loroonan Kaala. ¹⁶Loroonan Kaala goxovisi vubeles at tara atdi, diga lok kaka mene lesep susu at laasen at ne Iesu neni Leeme Silok. ¹⁷La ne Pita mi ne Jon duga lok li levengiknggen du at lempatlak atdi, la ned i diga lok ka Loroonan Kaala.

¹⁸Simon ga ven i do ne Moroa ga suxa ned i mi Loroonan Kaala ap mo loxonalleng ne Pita mi ne Jon duga lok li levengiknggen du at lempatlak atdi. La ni ga lok do na raba ne Pita mi ne Jon mi levempilas ¹⁹la ni ga lok, “Muna raba ia mi nom lololos, kusu do nia ana lok li lukngak at tara, ni ba umsu mi Loroonan Kaala.”

²⁰Ketla ne Pita ga vorang i rin, “Nenu eburu mi lempilas taram mi bat pas uto at lemenemen songsongot mila nu u doxoma i do nenu mo una un ka laramtaba at ne Moroa mi lempilas! ²¹Nenu xopmen tekot taram at na lugugu atnama; mila labalam kopmen nak mokso at lemeren at ne Moroa. ²²Una lox ekun lorooro ram la una sing saparap Leeme Silok, kusu neni ba doxoma xepe na laxakapmek ik lok at labalam. ²³Nia a ven i do nenu u umsu mi levereven peves, la lorooro ram i umsu mi laxakapmek la kopmen na epovo xusu una sixiro basinge i.”

²⁴La ne Simon ga lok ti ne Pita mi ne Jon, “A vara i do muna sing ti Leeme Silok, kusu kopmen tara at na lempanga mu tong pam i, naba rupot saparav ia.”

²⁵Melemu at lavapaase asu atnedu la levelinga at Leeme Silok, Pita mi ne Jon duga vas bilong uto Jerusalem. Ap mo lomlong atnedu duga vavang mi Lagale Lavavang to at laxanmenemen solo mego Samaria.

Pilip Eburu Mi Leeme Gomgo Boro Itiopia

²⁶Laangelo at ne Moroa ga vaase ri ne Pilip keretna, “Una lok agagas li u la una vas kaxat uto at langa i laa boro Jerusalem la uto Gasa.” (Na langa kopmen bok ba dinat pas teren). ²⁷La ne Pilip ga gagas la ga vas kaxat. La lara laradi boro Itiopia, neni leeme silok la ni ga lok tatao lempilas at latkin gomgo ne Kades boro Itiopia. Ni gat pas uto Jerusalem kusu naplavang saparap ne Moroa, la ni ga vas bilong mi lavatkaris teren. ²⁸Ni gat kis la ni ga utus at lubuk at leeme vapaase alii ne Aisaia. ²⁹Loroonan Kaala ga tong i ri ne Pilip, “Una vas tangarang mo lavatkaris la unat pas saparav i.”

³⁰Pilip ga sixit soso mun uto at lavatkaris la ni ga ronga mo laradi ga utus lubuk at leeme vapaase alii ne Aisaia; la ni ga sue i, “Uklen lai mo nu u utus i?”

³¹Mo laradi ga vorang i rin, “Nia abaklen i xereva? Kopmen tara vetpes kusu naba tong axasev ia min.” La ni ga sing ne Pilip do na eng urut la na xis to at lavatkaris eburu min.

³²Mo levelinga at ne Moroa xeneng ap mo lubuk ni ga utus i, ga lok keretna,

‘Neni ga lok ngan ta lisipsip no diga lok ka i xusu dina sev i; neni ga lok ngan lisipsip maxat no xopmen nak lok gusugus do di sep korop levengkabinim teren, ni goxo tong tekolonga. ³³Neni ga lox alixilix i la ni goxo vorang i mi tekolonga. Kopmen teta noxo lox epovo do na paase mumu livipisik teren, mila lorooro ren nade at lavatbung menemen ira vot pam at laxavaxap teren.’

Ais 53:7-8

³⁴Mo leeme silok ga lok ti ne Pilip, “Tong i ria, do nege mo na leeme vapaase alii ga paase mu i? Tin koplā ti tara vetpes?” ³⁵Pilip ga vaase rin, ga vaxaru ka i ap mo loxot, neni ga utus i, neni ga tong Lagale Lavavang at ne Iesu rin.

³⁶Nedu dugat pas ap mo langa la duga rupot to at lara loxot ladan ga nemen teren. La mo laradi gomgo ga lok, “Ladan na ik lok. Lai mo ik lok pe ia do ana lok kaka lesep susu?” ³⁷[Pilip ga lok tin, “Nenu u epovo do una lok ka lesep susu, mo do u nuunu ruturun mi lorooro axap taram.” Ni ga vorang i rin, “A nuunu do Iesu Karisito neni Nitna ne Moroa.”] ³⁸Mo leeme silok ga lox alis mo lavatkaris la lakaris ga ru; la Pilip eburu mi mo laradi duga vas si uto xopok at ladan la diga ru ro xeneng teren, la ne Pilip ga sep susu i. ³⁹Diga vas su boro at ladan la Loroonan Kaala at ne Moroa ga lok ka ne Pilip uto vetpes. La mo laradi goxo ven bok ba i, ketla ni gat pas epolo mun at langa, la ga umsu mi lomomo. ⁴⁰Pilip ga ven kibis i do ni mo ga nemen ta ro Asotas, la ni ga vas kaxat la gat pas kantubu ap mo levenmenemen, la ni ga vavang mi Lagale Lavavang se neni ga rupot to Sisaria.

Sol Ga Ven Kibis Ne Iesu

(Gu 22:6-16; 26:12-18)

9 ¹Ap mo levenaleng Sol move ga lolos do nap sev amet limixin nuunu at Leeme Silok. Ni gat pas uto at lamaasa gomgo, ²la ga sue i do ni na lok ka lavapaase axasep ti lox ase nedi limixin me Judaia diga nemen to Damasko. Neni ga vara i xusu na vuse ka nedi diga mumu asu langas at Leeme Silok go, la ni naba ranga alis di, lavatlok eburu mi lavakin la na sat ka di uto Jerusalem.

³At lavatpas teren uto Damasko, ga auret ti mo lemenemen silok, soso mun langsung laxasep boro vana at laxalibet ga soo pavaa i. ⁴Ni ga subu si ukopok at laxangka la ni ga ronga laxaka at lara ga lok tin, “Sol, Sol. Tila uk lox asongor ia?”

⁵Ni ga sue i, “Leeme Silok, nenu nege?”

Mo laxaka at lara ga lok tin keretna, “Nenia ne Iesu, mo nu uk lox asongor ia. ⁶Ketla una xatu la unat pas uto at lemenemen silok la mo go tara ba tong tempanga salai nenu uba lox i.”

⁷Mo luvuttadi diga emu mi ne Sol, diga ru pilo, la di goxo tong tekolonga; diga ronga laxaka at lara ketla di goxo ven teta. ⁸Sol ga xatu kaxat boro xopok at laxangka la ga valas luxatli ren, ketla ni goxo ven tempanga. Kuren la diga ranga ka i ro at lekngen la diga lam ka i uto Damasko. ⁹At lavantun aleng ni goxo epovo do na ven tempanga, la ap mo bok levenaleng ni goxo anan la goxo inin.

¹⁰Lara laradi loklok ka anasa ga nemen to Damasko, laasen teren ne Ananias. Ni ga ven lisilimet, la Leeme Silok ga lok tin, “Ananias.”

La ni ga vorang i, “Leeme Silok, nenia na.”

¹¹Leeme Silok ga lok tin, “Una gagas la unat pas uto at langas, laasen teren, Langas Mokmokso, la mo go at loogu at ne Judas, una sue ri laradi boro Tasas laasen teren ne Sol. Neni mo i ngising; ¹²la at lisilimet teren ni i ven lara laradi, laasen teren ne Ananias i beles ukeneng la i lok li lukngen at lavatlak teren kusu ni na ven bok ba.”

¹³Ananias ga vorang i rin keretna, “Leeme Silok, buaang limixin diga tong lempanga ria mumu nom laradi, la mumu bok lempanga xakapmek ni ga lox i ri limixin taram to Jerusalem. ¹⁴La ni gat pas ude Damasko mi levelinga lolos at lavamaasa silok, kusu na xoxo ka nedi di mumu asu laasen taram.”

¹⁵Leeme Silok ga lok tin, “Una vot pasa i, mila nia ara soxolik ka vam i xusu ni na mumu asu ia, la ni naba lox axasep laasen tarak tinedi limixin kopmen di me Judaia la ti lavaorong silok la ti limixin me Israel. ¹⁶La nia aba lox ase i mi mo lempanga ni naba songot teren mumu lunuunu ren saparav ia.”

¹⁷La ne Ananias ga vas kaxat la ga rupot to at loogu at ne Judas la ga beles ukeneng la ga lok li lukngen to at ne Sol la ni ga lok, “Netak ne Sol, Leeme Silok i riki ia, Iesu axa, no ga rupot saparav u ro at langas at lavatpas taram ude. Ni i riki ia xusu una reven bok ba la una lok ka Loroonan Kaala.” ¹⁸Ap mo mene loxonaleng, lavanga ga lok ngan lengkexeleng mat ga subu su boro at luxatli at ne Sol la ni ga epovo manga xusu ni na reven bok ba. Ni ga xatu kaxat la ga lok ka lesepsusu. ¹⁹La melemu at laanan teren, lolos teren garamlong bok ba. Sol ga nemen to Damasko eburu mi limixin nuunu at lentaba levenaleng.

Sol Ga Vavang To Damasko

²⁰Sol ga beles to xeneng at laraugu singising la soso mun ni ga vaxaru ka i xusu na vavang mi laasen at ne Iesu. Ni ga lok, “Iesu neni Nitna ne Moroa.” ²¹La nedi diga ronga i, diga rakdu la diga esue, “Kereva na? Na laradi ga nemen to Jerusalem la ni gap sev amet limixin diga nuunu at

ne Iesu. La ni gat pas ude xusu na ranga alis nedi la na lok kaka nedi uto at lavamaasa silok.”²² Ketla lavavang at ne Sol ga mumuat amisik, la ni ga lox asuusu i do ne Iesu mo neni Lanarong; la levelinga ren ga mumuat aleng la buaang atnedi limixin me Judaia mo diga nemen to Damasko di goxo epovo do dina vorang i.

²³Buaang levenaleng gara volo, la limixin me Judaia diga vot buru la diga lok li lara langas linga ri sev amet ne Sol; ²⁴ketla ne Sol ga ronga ka levelinga atdi. At levenaleng kangking la levenaleng kanimin diga reven tin to at levenmusaragu ap mo lemenemen kusu diba sev amer i. ²⁵Ketla ga at lara laxanimin luvuttadi no diga mumu asu ne Sol, diga lok ka i la diga suxa abeles i at laxaxi buso la diga lox asi i uto xopok at logo ga nemen to at lenep at langas uat diga rit kangkan mo lemenemen min.^a

Sol Ga Vot Pasa Luvuttadi Nuunu To Jerusalem

²⁶Sol ga vas bilong uto Jerusalem la ni gak lok tong pen i do ni na gugu eburu mi limixin nuunu. Di goxo nuunu do neni mo laradi nuunu la diga e amarat teren. ²⁷Melemu ne Banabas ga lok tooro i la ga lam ka i uto saparap luvuttadi vavang. Ni ga soxomus ba i ridi do ne Sol ga ven Leeme Silok to at langa la Leeme Silok ga paase rin. Ni ga tong box i ridi do ne Sol ga vavang mi laasen at ne Iesu ro Damasko la kopmen goxo marat. ²⁸Kuren la ne Sol ga nemen eburu minedi la gat pas uto at lengkot axap Jerusalem, la ni ga vavang lolos mi laasen at Leeme Silok la kopmen goxo marat. Goxopmen tara ga ru pe lugugu ren. ²⁹Ni eburu minedi limixin me Judaia mo diga paase Grik diga etep mi levelinga, ketla diga lok tong pen i do dina sev amer i. ³⁰Ketla limixin nuunu diga ronga i mo la diga lam ka ne Sol uto loxon at lemenemen Sisaria la diga lox aonon i uto Tasas.

³¹Kuren la luvuttadi nuunu at lengkot axap Judaia, Galili, la Samaria, diga ruuna limila la kopmen bok ba di goxo marat. La leexes at limixin nuunu ga urut; mila Loroonan Kaala ga gugu kantubu atdi, la diga lok ngangao aleng at Leeme Silok.

Pita Ga Nemen To Jopa La Lida

³²Pita ga vas tangtagap at lengkot axap saparap Jerusalem, la at lara laaleng ni gat pas kusu na ven limixin at ne Iesu no diga nemen to Lida. ³³Mo go ni ga ekip tangarang mi lara laradi, laasen teren ne Inias, labantuxu axap teren ga molo la ni goxo lox epovo i do na xatu kaxat at loora mikmidi ren at lavanuan maares axap. ³⁴Pita ga lok tin, “Inias. Iesu Karisito i lox aroo u. Katu kaxat la una sa avukat loora ram.” Ap mo

^a 9:25 Lentaba laraugu diga lox i ro mavana at larangas uat la diga ruuna larago lixilik uto maxamang at lemenemen silok.

mene loxonaleng Inias ga xatu kaxat upana. ³⁵Mo limixin diga nemen go Lida la Seron diga ven mo laradi ga lox avukat nga la buaang atnedi diga nuunu at Leeme Silok.

³⁶To Jopa lara latkin ga nemen, laasen teren ne Tabita; neni latkin nuunu. (Laasen bok teren at lavapaase Grik do ne Dokas). Ni ga raba axap lorooro ren kusu na lok tooro limixin pakpakes mi leven gugu nunuan. ³⁷At lara laaleng ni ga meres la ni ga met. Labantuxu ren diga gos i la diga vaxamdi li i ro xeneng at lara loogu ga nemen to vana.

³⁸Jopa xopmen goxo vaxalom boro Lida. La mo luvuttadi nuunu ro Jopa diga ronga i do ne Pita mo gak lok to Lida; kuren la diga riki legepu radi saparav i mi lavapaase keretna, “Soso mene u la unat pas uto Jopa.”

³⁹La ne Pita ga xatu kaxat la ga vas kaxat eburu midu. At loxonaleng neni ga rupot diga lam kaka i uto ap mo loogu mevana. Mo lempat naa diga ru bubua saparav i, digang teng la diga lox ase i mi lempanga singsiga la lenbantamon ne Dokas gak sox i ap mo levenaleng ni ga rooro ren.

⁴⁰Pita ga lox asu axap di ukamang ap mo loogu, la ga xis tiktikbu mi luvatgulom teren la ga sing; melemu ren, neni ga rem gili mu ne Tabita la ga lok, “Tabita, katu kaxat.” La ni ga valas luxatli ren la ga ven ne Pita la ga xis upana. ⁴¹Pita ga ranga axatu i mi lekngen. La ni ga ro bubua ka luvuttadi nuunu la lempat naa, la ga lox ase di mi ne Tabita mo gara roo xat pam. ⁴²Levelinga at na lavanga sangsangu ga rem epeseves at lengkot axap Jopa, la buaang limixin diga nuunu at Leeme Silok. ⁴³Pita ga nemen go Jopa at levenaleng buaang eburu mi laradi ga gugu lenbantuxu at levenbulumaxao laasen teren ne Simon.

Pita La Ne Konilias

10 ¹Lara laradi ga nemen to Sisaria laasen teren ne Konilias, neni laasesep at limixin esep boro Rom diga tong nedi do, “Limixin esep me Itali.” ²Konilias laradi ga lotu saparap ne Moroa; nedi axap diga nemen ap mo loogu ren diga lok ngangao at ne Moroa. Buaang lempanga neni ga lox i xusu ri lok tooro limixin pakpakes boro Judaia, la ni ga ngising amisik ne Moroa. ³At lara laaleng at lavantun konaleng ga ukantinao, neni ga ven lisilimet la keneng ap mo lisilimet teren neni ga ven axasep avukat laangelo at ne Moroa ga vubeles ukeneng at loogu ren la ga lok tin, “Konilias!”

⁴La ni ga ven tooro laangelo mi lanmarat la ni ga lok, “Lavanga salai mo, Leeme Silok?”

Laangelo ga lok, “Moroa ira siam ka vam levesingising taram la leven gugu nunuan taram, la ni ira doxoma vam u. ⁵La nanga una riki tuvuttadi uto Jopa kusu dina lam ka lara laradi, laasen tinotno ren ne Simon Pita. ⁶Neni loose i nemen to at loogu at laradi i gugu lempanga

singsiga mi lenbantuxu at levenbulumaxao, laasen teren ne Simon no i nemen saparap laras.”

⁷La nom laangelo at ne Moroa ga vas kaxat ta, la ne Konilias ga ro xaka luradi saksaxaruki ren eburu mi laradi esep, neni laradi ga mumu asu ne Moroa la neni bok ap mo limixin esep diga gugu tooro ne Konilias. ⁸La ne Konilias ga tong axasep di mi lavanga salai mo ga vot saparav i la ni ga riki di uto Jopa.

⁹Ap mo lara laaleng melemu at lavatpas atnedi diga vas auret to Jopa, la ga xanangking ne Pita ga eng urut uto vana at lavatlak gu xusu na lok lising. ¹⁰La ni ga roxo la ga vara i do na anan; luvuttadi ap mo loogu diga lox agagas li vam mo leveluxa ketla neni ga ven lara lisilimet. ¹¹Neni ga ven laxalibet ga rem suang la neni ga ven lara lavanga ga si boro vana at laxalibet ga lok ngan lavattamon silok, mo lavanga ga ruuna lavanuet mesuluk la diga lox asi i uto xopok saparap ne Pita. ¹²Ma xeneng at nom labantamon silok buaang levenasen panga mi lavanuet kangkedek ga nemen eburu mi lempanga axap diga vokaxao mi lebelen di la levenasen pixa axap. ¹³La ni ga ronga laxaka at ne Moroa ga lok tin, “Pita, una xatu kaxat, la una sep ka na leveluxa la una anan i.”

¹⁴Ketla ne Pita ga lok, “Kopmen tinotno, Moroa. Nia xovisi a goxo anan tempanga xeretna mila i bilinga.”

¹⁵La ne Moroa ga lok bok tin keretna, “Nemen uta tong tempanga do i bilinga mila nenia ara lox adadat pam i.”

¹⁶La na lavatamon ga vot ga vantun la soso mun gamlong uto vana at laxalibet.

¹⁷Pita gam doma mu lavasuun ap mo lisilimet. La ap mo mun loxonaleng mo luvuttadi ne Konilias ga riki di, diga sue axasep ka loogu at ne Simon ga nemen ua; mo nga diga tu ro melamgo at lumusaragu ap mo loogu.

¹⁸Diga seega la diga sue, “Tara nade laasen teren ne Simon Pita?”

¹⁹Pita move gam doma i do ni naklen tinotno lavasuun at mo lisilimet, la Loroonan Kaala ga lok tin, “Una ronga i na. Lavantun luvuttadi no di vara epaase minu. ²⁰Una xatu la una vas si ukopok, la nemen uta doma solo ri emu minedi, mila nenia a riki nedi ude.”

²¹La ne Pita ga vas si ukopok kusu na ven mo luvuttadi. La neni ga lok tidi, “Nenia laradi nemi mi reven tin. Tila nemi mi vot de?”

²²Diga lok tin, “Laasesep at luvuttadi esep, ne Konilias i riki nema. Neni lagale laradi la ni i lotu saparap ne Moroa la limixin me Judaia di lok ngangao aleng teren. Laangelo at ne Moroa ga tong i rin do ni ba lam ka u uto at loogu ren, kusu neni naba ronga levelinga nu ba vaase i min.”

²³Pita ga xup abeles di ukeneng la ga tong i rinedi do dina nemen be go ap mo laxanimin.

Ap mo laaleng melemu Pita ga gagas, la ni ga emu minedi; la lentaba luvuttadi nuunu bok boro Jopa diga emu eburu min. ²⁴Ap mo laaleng

melemu ni ga rupot to Sisaria. La ne Konilias ga nemen tangais i eburu mi lentaba ren la larapen tangas avukat teren no ni ga xup kaka nedi.

²⁵At loxonaleng ne Pita ga lok do na beles ukeneng at loogu at ne Konilias, Konilias ga vas tangarang i, la ga xis tiktikbu mi luvatgulom teren to melango at ne Pita. ²⁶Ketla ne Pita ga ranga axatu i la ga lok, “Una xatu kaxat upana, mila nenia mun laradi xuren.”

²⁷Pita ga epaase mi ne Konilias at loxonaleng ni ga beles la ni ga vosiga buaang nedi limixin go xeneng. ²⁸Ni ga lok tidi, “Nemi xa mi xasep do lotu me Judaia kopmen dina mulus do tara atnama nak lox eburu la na etangas minedi limixin kopmen di me Judaia. Ketla ne Moroa ga lox ase ia do nia a noxo tong taradi do i bilinga at lemeren ne Moroa. ²⁹Kuren la ap mo laaleng uga xup mu ria la nia nga na ara rupot; la nia a goxo ronga xepe u. A sue nga u na, tila nenu uga xup mu ria?”

³⁰Konilias ga lok, “At lavanuet aleng gara xap pam at lavantun konaleng ga ukantinao i epovo mi loxonaleng keretna, nia aga ngising to xeneng at loogu rak. La soso mun lara laradi ga siga labantamon gamgames ga ru ro melango rak. ³¹La ni ga lok, ‘Konilias! Moroa ira ronga vam levesingising taram, la ni ira doxoma vam leven gugu loklok tooro ram. ³²Una riki tentaba uto Jopa ri lam kaka lara laradi laasen teren ne Simon Pita. Neni loose i nemen eburu mi laradi i gugu lempanga singsiga mi lenbantuxu at lenbulumaxao, laasen teren ne Simon, no i nemen saparap laras.’ ³³Kuren la nenia aga riki soso luvuttadi gugu rak ap mo mun loxonaleng kusu dina lam kaka u, la i lox avukat dola ura vot pasa ia. Nanga nema mak lok at lemeren ne Moroa, ma ngangais kusu mana ronga levelinga mo ne Moroa ga tong pam i ru do uba vaase i rinama.”

Pita Ga Vavang Ti Ne Konilias Eburu Mi Limixin Teren

³⁴Pita ga vaase kaxat la ga lok, “Anaa, nia a ven kibis i do i ruturun tinotno do ne Moroa kopmen na ven kepe lentaba vetpes, i ven limixin axap ngan legesara mun. ³⁵Do tara i lok ngangao ren la ik lok lempanga ik mokso, ne Moroa naba siam kaka i, keke i do neni at lubangmixin petpes. ³⁶Nemi miklen Lagale Lavavang neni ga song araba limixin me Israel min; na Lagale Lavavang i lok lumulum kantubu at ne Moroa la limixin mumu lanmet at ne Iesu Karisito, neni Leeme Silok at limixin axap at na lavatbung menemen kopok. ³⁷Nemi miklen leretere ri lempanga silok ne Iesu ga lox i at lengkot axap at na lenep silok Judaia. Ni ga ru ka i ro Galili, melemu at ne Jon ga vavang mi lesepsusu ren. ³⁸Nemi miklen i do ne Iesu me Nasaret, ne Moroa ga lox anarong i mi Loroonan Kaala la ga raba box i mi lolos teren. Ni gat pas at lengkot axap la ga lok lempanga nunuan la ga lox aroo nedi bok ne Satan ga xoxo di, mila ne Moroa ga nemen eburu min.

³⁹Nema na maga reven mo lempanga neni ga lox i ro at lenep Judaia la Jerusalem. Diga vaxarem i at laxaba la ni ga met. ⁴⁰Ketla ne Moroa ga lox arooro amlong i basinge lanmet at laaleng sepsev avantun, la ga lox i xusu na ru asuvos, ⁴¹kopmen do ti limixin axap, ketla tinama xusuk mun, luvuttadi ne Moroa ga soxolik ka vam nama kusu ri vaase asu levelinga ren. Maga anan la maga inin eburu min melemu at laxakatu kaxat amlong teren. ⁴²La ni ga tong alolos i rinama do mana paase asu Lagale Lavavang tinedi limixin la mana tong asu i do neni mun laradi ne Moroa ga soxolik ka i xusu neni naba ronga linga atnedi di rooro la nedi digara met pam. ⁴³Nedi axap, lavaeme vapaase alii diga paase mumu vam i, diga tong alii i do tara i nuunu ren, nom laxakapmek teren, ne Moroa naba doxoma xepe i xeneng at laasen teren.”

Limixin Kopmen Di Me Judaia Diga Ruuna Ka Loroonan Kaala

⁴⁴Pita move ga paase la Loroonan Kaala ga vubeles atnedi nom, mo digat kis la digang tonga levelinga ren. ⁴⁵Luvuttadi nuunu at limixin me Judaia, no diga vas kaxat eburu mi ne Pita boro Jopa, diga rakdu aleng mila ne Moroa ga riki asi Loroonan Kaala ren saparap nedi limixin kopmen di me Judaia. ⁴⁶Diga ronga nedi diga epaase mi lempapaase vetpes la diga emi asu mi ne Moroa.

Pita ga lok, ⁴⁷“Na limixin dia ruuna ka vam Loroonan Kaala kerekngan pam nedik taga ruuna ka i. Ixo epovo do tara na sep pepe di, do di noxo lok ka lesepe susu mi ladan.” ⁴⁸Kuren la ni ga tong i ridi xusu dina lok ka lesepe susu xeneng at laasen at ne Iesu Karisito. Melemu diga sue i do ni na nemen eburu minedi at tentaba tevenaleng.

Pita Ga Vaase Asu Lugugu Ren To Jerusalem

11 ¹Luvuttadi vavang la luvuttadi nuunu at lengkot axap Judaia diga ronga i do limixin kopmen di me Judaia bok mo diga siam ka vam levelinga at ne Moroa. ²La ne Pita gamlong uto Jerusalem. La nedi limixin nuunu diga lok do ik mokso ri rivit kepe lengkontuxu, diga musak aleng ne Pita. ³Diga lok, “Nenu loose mun keneng at loogu atnedi limixin kopmen di me Judaia, kopmen dina rivit kepe lengkontuxu atnedi; la nenu uga anan eburu minedi.”

⁴La ne Pita ga tong axasep nedi mi mo lempanga ga ravasu. ⁵Ni ga lok keretna, “Nia aga ngising to Jopa la nia aga ven lisilimet; la aga ven lavanga ga si boro vana la ukopok, ga lok ngan lavattamon silok diga lox asi i boro vana at laxalibet ga ruuna lavanuet mesuluk; la ni ga los kis saparav ia. ⁶Nia aga ven avukat keneng teren la nia aga ven lempanga mi lavanuet kangkedek, limixin di lok tatao nedi la lentaba kopmen limixin dina lok tatao nedi, la lempanga axap di vokaxao mi lebelen di la levenasen pixa axap. ⁷La nia aga ronga laxaka at ne Moroa ga lok tia xeretna, ‘Pita, una xatu upana, una sep di la una anan i.’

⁸Ketla nia aga lok, ‘Kopmen tinotno, Moroa. Nenia a goxovisi an tepempanga i bilinga.’

⁹La ne Moroa ga vaase manga ria boro vana at laxalibet keretna, ‘Nemen uta tong tavanga do i bilinga, mila nenia ara lok pam do i lox avukat.’ ¹⁰Na lavanga ga ravasi ga vantun, la melemu nom lempanga axap garamlong bok nga uto vana at laxalibet.

¹¹Ap mo mene loxonaleng lavantun luvuttadi diga rupot boro Sisaria; nedi diga rupot ap mo loogu nenia aga nemen teren. ¹²La Loroonan Kaala ga tong i ria xusu anat pas eburu midi uto Sisaria la nemen nia ta doma solo i. La nedi na lavanna luvuttadi nuunu boro Jopa, nedi diga emu eburu minia uto Sisaria; la nema axap maga beles ukeneng at loogu at ne Konilias. ¹³Ni ga tong i rinama do ni ga ven laangelo ga tu ro xeneng at loogu ren la ga lok tin keretna, ‘Una riki tentaba uto Jopa kusu dina lam kaka lara laradi, laasen tinotno ren ne Simon Pita. ¹⁴Ni ba vaase tevelinga ru la nenu minedi axap na di nemen at loogu ram miba roo suu.’

¹⁵La nia aga vaxaru xaka i do ana vaase, la Loroonan Kaala ga vubeles atnedi getgesara kerekngan ap mo laaleng Loroonan Kaala ga beles atdik. ¹⁶La nia aga doxomangke at levelinga at Leeme Silok ga lok keretna, ‘Jon ga sep susu limixin mi ladan mene, ketla nemi miba lok ka lesepe susu at Loroonan Kaala.’ ¹⁷I xasep do ne Moroa ga raba limixin kopmen di me Judaia mi Loroonan Kaala, kerekngan ni ga raba nedik min; nedik taga lok ka lороoro maxat at ne Iesu Karisito. Nenia nege la ana lok tong pen i do ana lok pe lugugu at ne Moroa.”

¹⁸Diga rongga i na la lodoxoma atdi ga lok mulus la diga emi asu mi ne Moroa. Diga lok, “Moroa ira suang pam langas ti lороoro xusu limixin kopmen di me Judaia, dina leeng basinge laxakapmek atnedi la dina ruuna ka lороoro maxat.”

Luvuttadi Nuunu At Ne Iesu Diga Rupot To Antiok

¹⁹Buaang nedi luvuttadi nuunu diga epeseves uto at levengkot Judaia la at lengkot petpes bok mumu levesongsongot limixin kakapmek diga ru ka i at loxonaleng diga sev amet ne Stiven. Lentaba atnedi digat pas upaxalom uto Pinisia la Saipras la Antiok, diga tong asu Lagale Lavavang at ne Iesu ti leme Judaia kusuk la kopmen ti levenabung mixin petpes. ²⁰Ketla lentaba luvuttadi nuunu boro Saipras la Sairini, digat pas uto Antiok la diga vavang go ri limixin kopmen di me Judaia; diga tong asu Lagale Lavavang at Leeme Silok ne Iesu. ²¹La Leeme Silok ga lox alolos nedi la buaang nedi limixin diga nuunu la diga leeng basinge laxakapmek atdi la diga raba lороoro atdi ri Leeme Silok.

²²Levelinga mumu i na lavanga ga rupot ti limixin nuunu ro Jerusalem; kuren la diga riki ne Banabas uto Antiok. ²³Ni ga rupot la

ni ga ven i do ne Moroa ga lox aumsu mo limixin mi letaba nabalamu ren. Ni ga lok momo la ga vaase lolos tinedi axap kusu dina tu lolos mi lunuunu la luruturun atnedi saparap Leeme Silok mi lodoxoma atdi axap. ²⁴Banabas ga lok tooro di mila neni lagale laradi ga umsu mi Loroonan Kaala la lunuunu ren ga lolos. La buaang nedi limixin me Antiok diga raba lorooro atnedi ri Leeme Silok.

²⁵Melemu ne Banabas gat pas uto Tasas kusu na ven ti ne Sol. ²⁶La ne Banabas ga vosiga i la ni ga lam kaka i uto Antiok. At legesa maares kudun nedu dugat pot eburu minedi buaang limixin ap mo loxot la duga anasa di. Mo go mun Antiok limixin nuunu diga lok ka avot na laasen Kristen.

²⁷Ap mo levenaleng lentaba lavaeme vapaase alii diga vas kaxat boro Jerusalem la diga rupot to Antiok. ²⁸Lara atnedi ne Agabas ga xatu upana la at lololos at Loroonan Kaala ga vaase alii do lean kangking naba rupot at lavatbung menemen axap. Ga vot ap mo levenaleng ne Kolodias gam gomgo ri limixin me Rom. ²⁹Limixin nuunu boro Antiok diga vaase i do dina lok tooro limixin nuunu ro Judaia. Nedi diga ruuna lempilas buaang, diga raba i. ³⁰Diga lox i xuren la diga lox aonon lempilas at lukngen ne Banabas mi ne Sol, kusu duba raba luvuttadi gomgo at lotu min, go Jerusalem.

Levesongsongot Ga Vot Manga Saparap Limixin Nuunu

12 ¹Ap mo levenaleng loorong silok, ne Erodes ga ranga alis lentaba atnedi luvuttadi diga nuunu at ne Iesu la ga lok li di at loogu xokoxo. ²Neni ga ra korop laxaka at ne Jems, neton ne Jon mi lavarise sepsep. ³La ni ga ven i do na laniu ga lox amomo luvuttadi amgomgo at leme Judaia, kuren la ni ga ranga alis bok ne Pita la ga lok li i at loogu xokoxo. Na ga ravasu at levenaleng limixin me Judaia diga lok laanan at loxongkide diga ove vetpes i. ⁴Melemu at larangtanga alis at ne Pita diga lok li i ro at loogu xokoxo, mo go diga song araba lavanuet lara binam tadi esep, lavanuet at legesa binam kusu na lok tatao i. Erodes ga doxoma i do ni naba lok li i at lavapaase melemu ap mo laanan, laasen teren, Lovovolo Pe.

⁵Kuren la ne Pita ga nemen to xeneng at loogu xokoxo, ketla luvuttadi nuunu diga ngising amisik ne Moroa mi lorooro axap atnedi xusu ne Moroa na lok tooro i.

Laangelo Ga Soxomus Asu Ne Pita At Loxokoxo

⁶At laxanimin avot ap mo laaleng kusu ne Erodes na lok li ne Pita at lavapaase ro melamgo at limixin, Pita ga unga xantubu at luradi rutu mu. Ni goxo epovo na sixiro mila diga xoxo i mi luvarooos sen, la luvuttadi rutu mu mo digak lok at lumusaragu ap mo loogu xokoxo. ⁷Soso mun

laangelo at ne Moroa ga ru go, la laxasep ga soo to xeneng ap mo loxot. La laangelo ga sox aus ne Pita ro at laxavis teren la ga lok tin, “Soso mun! Katu kaxat!” La mo luvaroos sen ga subu basinge lukngen ne Pita.

⁸La laangelo ga lok, “Una sevut atmatkun labaane ram, la una xoxo li luvanga vatpas taram.” Pita ga lox i xuren la laangelo ga lok tin, “Una siga lavanga singsiga ram, la una mumu asu ia.” ⁹Pita ga mumu asu i uto xamang. Ni goxo xasep at levelinga ap mo laangelo; ni ga nua i do ni mo ga reven mun lapnobo. ¹⁰Duga vas polo lara loxot avot, mo luvuttadi rutu mu diga lok tatao i; la melemu duga volo loxot sepsev agepura; la melemu duga vot to at lumusaragu mi lemparoos sen teren no ga tu raba uto at lemenemen silok. Mo lumusaragu ga rem suang kaparang axa ridu, la duga vas su ukamang. Duga mu asu mo langas ap mo lemenemen la soso mun laangelo ga on basinge ne Pita.

¹¹La ne Pita ga ven kibis mo lavanga ga rupot saparav i la ga lok, “Na nia aklen ba i do i ruturun tinotno! Moroa i riki laangelo ren la ni ira lox asu ia at lolos at ne Erodes la basinge lempanga xakapmek leme Judaia di lok do na lox i ria.”

¹²Se ni ga ven kibis pam mo lavanga ga vot saparav i, la ni gat pas uto at loogu at ne Maria, nenen ne Jon Mak. Buaang limixin diga nemen go la diga ngising. ¹³Pita gapdipdi ro maxamang at lumusaragu la lara loolik asaxaruki, laasen teren ne Rodi ga vas kaxat kusu na vorang linga ren. ¹⁴Ni ga ronga xibis laxaka at ne Pita la ni ga lok momo aleng la ni ga sixit beles manga ukeneng, ketla ni xopmen goxo suang lumusaragu; la ni ga vaase axasev i do ne Pita mo ga tu xamang.

¹⁵La diga lok tin, “U baulang!” Ketla ni ga tong amisix i do mo levelinga ren i ruturun. Kuren la diga lok, “Laangelo ren mo.” ¹⁶Nedi move diga epaase la ne Pita garapdi amu bok. La diga suang mo lumusaragu la diga ven i la diga rakdu aleng. ¹⁷Ni ga sep makmak nedi xusu dinak lok pilo, la ni ga soxomus ba i ridi do ne Moroa ga lox asu i boro at loogu xokoxo kereva. Ni ga lok, “Mina tong i na ri ne Jems la luvuttadi nuunu. La ni ga on basinge nedi la gat pas uto at lemenemen petpes.”

¹⁸Ga maxantamak luvuttadi rutu mu diga rangku aleng at lavanga salai mo ga rupot saparap ne Pita. ¹⁹Erodes ga raba linga di xusu dina ven tin, ketla di goxo long lenget kaka i. Kuren la ni ga lok li luvuttadi rutu mu at lavapaase la ni ga tong i ri luvuttadi esep do dina sev amet di.

Melemu at na, Erodes ga on basinge lenep Judaia la ga nemen at lentaba levenaleng to Sisaria.

Lanmet At Ne Erodes

²⁰Erodes ga musak aleng mi limixin boro Taia la Sidon; ketla mo limixin diga lok ka ne Balastas ti lok tooro nedi; neni laradi ga lok tatao

loogu at ne Erodes. Kuren la digat pas saparap ne Erodes keneng at legesa binam tadi. La diga vara aleng do na lok luburadong, mila ap mo loxot atnedi, digak lok kaka leveluxa atnedi boro at lenep teren.

²¹Diga lok katling pam lara laaleng at lixitkis buru atnedi, la ap mo laaleng ne Erodes ga sigaara mi lempanga singsiga nunuan teren; la gat kis to at loxonin orong teren, la ga lok lavapaase ri mo limixin. ²²Diga xup lolos keretna, “Kopmen laradi nom i paase, ketla lomoroa nom.” ²³Ap mo mene loxonaleng laangelo at ne Moroa ga sep ne Erodes mi lanmeres, neni goxo lok ngangao at ne Moroa. Laxangkolon ga anan labantuxu ren la ga met ta.

²⁴Ketla levelinga at ne Moroa ga epeseves uto at lengkot axap la buaang limixin diga nuunu ren.

²⁵Banabas mi ne Sol duga lox axap lugugu atdu, la dugamlong uto Jerusalem; duga lok kaka ne Jon Mak eburu midu.

Diga Sok Katling Ne Banabas Mi Ne Sol

13 ¹At loogu lotu go Antiok lentaba lavaeme vapaase alii la lentaba luvuttadi loklox ase mo gak lok; Banabas, Simion (diga tong box i do laradi bibi), Lusias (boro Sairini), Manaen (mo nedu mi laradi gomgo ne Erodes duga etangas eburu), la ne Sol. ²At lara laaleng nedi diga lotu saparap Leeme Silok la diga mun anan, Loroonan Kaala ga lok tinedi, “Mina raba ia mi ne Banabas la ne Sol, kusu ri lok lugugu i ngan nia aga soxolik ka vam du rin.” ³La diga mun anan la diga ngising, la diga lok li levengikikngen di mavana atdu; la diga riki aonon ba du.

Banabas Mi Ne Sol To Saipras

⁴Loroonan Kaala ga riki ne Banabas mi ne Sol, la dugat pas uto Selusia la mo go duga los urut at lavattaaxup la duga mumu i uto at losoxan Saipras. ⁵Duga rupot go Salamis, la duga tong asu levelinga at ne Moroa go at laraugu singising at limixin me Judaia. Jon Mak gak lox eburu minedu kusu ri lok tooro du at lugugu.

⁶Diga vas kaxat basinge mo lemenemen la digat pas tangtagap ap mo losoxan axap, se diga rupot to Papos. Mo go diga ekip tangarang mi lara laradi laasen teren ne Ba-Iesu, ni laradi me Judaia la gakleklen lasak; ni ga xarang limixin do neni leeme vapaase alii at ne Moroa. ⁷Neni ga gugu ri laradi gomgo ap mo losoxan laasen teren ne Segias Paulus, ni laradi ga umsu mi lakleklen. Laradi gomgo ga ro xaka ne Banabas mi ne Sol uto saparav i, mila neni ga vara i do na ronga levelinga at ne Moroa. ⁸Ketla ne Ba-Iesu ga lolos kusu na ru pe levelinga atdu; laasen bok ap mo laradi sak ne Elimas (na laasen at lavapaase Grik). Ni ga lok tong pen i do na ru pe laradi gomgo xusu noxo nuunu at ne Iesu.

⁹La ne Sol, laasen bok teren ne Pol, ga umsu mi Loroonan Kaala, ni ga saga xatli ap mo laradi sak, ¹⁰la ga lok tin, “Nu lamdak at ne Satan! Nenu

u xopara ri leveloklox axap i lox avukat; buaang lempanga xaxarang la laxakapmek i umsu at lorooro ram. Nenu uk lox amisik do una baba gili levenanasa ruturun at Leeme Silok ne Moroa ri laxaxarang! ¹¹Monga lololos at Leeme Silok ne Moroa na rupot saporap u; luxatli ram na main. La nenu u noxo ven laxasep at laaleng kangking at lentaba levenaleng.”

Ap mo mun loxonaleng Elimas ga suma lamain ga lok pe luxatli ren, la ni gat pas tangtagap, gak lok tong pen i do na vuse ka tara xusu na ranga tu at lekngen la nam lam i.

¹²Laradi gomgo ga ven mo lavanga la ga nuunu; ni ga sangu ap mo levenanasa ni ga ronga i mumu Leeme Silok.

Banabas Mi Ne Pol Duga Rupot To Antiok

¹³Pol eburu mi larapen tangas teren diga mu lavattaaxup boro Papos la diga rupot to Pega at lenep silok Pampilia. Ketla ne Jon Mak ga on basinge du go, la gamlong uto Jerusalem. ¹⁴Duga vas kaxat boro Pega la diga rupot to Antiok at lenep silok Pisidia; la at laaleng kaala diga beles uto at loogu singising la diga xis kopok. ¹⁵Melemu at leexes at Lenavolo at ne Moses la levelinga at lavaeme vapaase alii, luvuttadi amgomgo at loogu singising diga lok tidu, “Lunetak, ma vara i do muna vaase ri limixin do nemu mu ruuna tevelinga loklox alolos tinedi.”

¹⁶Pol ga xatu kaxat upana, la ga sep makmak di, la ga lok keretna, “Luvuttadi me Israel la nemi bok kopmen me Judaia mi lotu saporap ne Moroa. Mina ronga ia. ¹⁷Moroo at lubangmixin me Israel ga soxolik ka lavalabat atdik, la ga lox asilok lubangmixin atdik at levenmaares nedi diga nemen ngan limixin kadiong to at lenep silok Isip. Moroo ga lox asu di mi lolos silok teren basinge mo lenep silok. ¹⁸La ga at lavanuet sangaun maares ni gak lok tatao di ro at lamatbin. ¹⁹La ni ga nemen eburu minedi la diga sak tup mi lavanuti larabung mixin go ap mo lenep silok Kanan, la ni ga raba di mi mo lenep silok ngan laramtaba atdi. ²⁰Mo lempanga ga ravasu at levenmaares ga epovo at lavanuet sangaun kobot mi lavalimo sangaun (450).

Melemu at na, ni ga lok katling li luvuttadi ngan luvuttadi rongtonga linga kusu dinabam gomgo ridi, se at lovotpot at leeme vapaase alii ne Samuel. ²¹La melemu diga sing ti toorong silok la ne Moroo ga lok taba di mi ne Sol, lamdak at ne Kis, at libibinat at ne Benjamin, kusu neni loorong silok tinedi at lavanuet sangaun maares. ²²Melemu at loklok pes teren, Moroo ga soxolik ka ne Devit kusu nam gomgo ridi. Ana levelinga at ne Moroo ga paase mumu na ne Devit min,

‘Nia ara ven i do ne Devit nitna ne Jesi, neni laradi ik lox amomo ia; neni laradi naba lok lempanga axap do nia ana vara i do ni na lox i.’ *1 Sml 13:14*
²³Keneng at lurubuno avolo mun at ne Devit, Moroo ga riki ne Iesu saporap leme Israel ngan Laradi Loklox Arooro ridi la kerepmo ne Moroo

ga lox epovo laxakaape ren. ²⁴Avot ti lovtopot at ne Iesu, Jon ga vavang ti limixin solo xusu dina leeng basinge laxakapmek atnedi la dina lok ka lesepe susu. ²⁵La ga auret do ne Jon na lox axap mo lugugu ren, la ni ga lok ti limixin keretna, ‘Nemi mi doma i do nia nege? Nia xopmen mo laradi mi nemen tangais i. Ketla neni mo naba vot melemu rak, i silok aleng la axo epovo xusu ana soxomus asu luvanga vatpas at luxangkedek teren.’

²⁶Luvutnetak mi luvurinuk. Ana tong na levelinga rinemi. Moroa ga riki ne Iesu ri livipisik li at ne Abaram, la tinemi bok kopmen me Judaia mi nemen de mo mi lotu saparap ne Moroa. Ni ga raba nedik mi na Lagale Lavavang ti lorooro avolo! ²⁷Mo limixin diga nemen to Jerusalem, la luvuttadi amgomgo atdi, di goxo ven kibis ne Iesu, la di goxo xasep at levelinga ro xeneng at levenbuk at lavaeme vapaase alii no diga vutus i at levenaleng kaala. Ketla diga lox asorun levelinga at lavaeme vapaase alii, mila diga sok tixirixes ne Iesu. ²⁸La nedi xopmen di goxo vuse ka tavasuun kusu dina sev amet ne Iesu, diga sing mun ne Paelat kusu na sev amer i. ²⁹La melemu at lempanga axap diga lox i rin, kerekngan Lovoang Kaala i tong i, diga lox asi i ukopok basinge laxaba, la diga li i ro at lamaaut. ³⁰Ketla ne Moroa ga lox aroo kaxat amlong i basinge lanmet, ³¹la buaang levenaleng neni ga ru asuvos tinedi digat pas eburu min boro Galili la uto Jerusalem. La nedi nom di tong asu levelinga ren ti limixin me Israel.

³²La nema na, ma tong na levelinga rinimi do ne Moroa ga lox epovo vam laxakaape ren ti lavalabat atdik. ³³La mo laxakaape ira sorun pam tinedik luvuttubuno avolo atnedi limixin me Israel keretna; Moroa ga lox aroo amlong ne Iesu basinge lanmet. I lok ngan mo levelinga ik lok at levempikpixon sepsev agepura at ne Devit. Moroa ga lok keretna,

‘Nenu ne Nuruk la Lanarong, lingina a lox u, i ngan Loorong Silok.’

Sam 2:7

³⁴La ne Moroa ga paase mumu laxakatu kaxat amlong at ne Iesu basinge lanmet, la kopmen bok ba noxo met. Ni ga lok keretna,

‘Nia aba raba ruturun u mi leveloklox anarong tarak kerekngan nia aga xaape min ti ne Devit.’

Ais 55:3

³⁵La kerepmo bok levelinga at ne Devit saparap ne Moroa i lok keretna;

‘Nu noxo ke xepe Leeme Dadat taram kusu napso at lamaaut!’ *Sam 16:10*

³⁶Devit gam tebeng lugugu at ne Moroa ap mo levenaleng teren, la melemu ni ga met, la digak mir i saparap lavalabat teren, la ni gap sopso.

³⁷Ketla nom laradi ne Moroa ga lox aroo amlong i basinge lanmet, ni goxopso. ³⁸Luvutnetak mi luvurinuk. Nemi axap, minaklen avukar i do, keneng mun at ne Iesu, langas i rem suang kusu ne Moroa naba doxoma xepe laxakapmek at limixin. Monga ma tong asu na levelinga rinimi.

³⁹Minaklen box i do nedi axap di nuunu ren, Moroa ira lox asepmus pam

di basinge leveloklok kakapmek atdi; Lenavolo at ne Moses kopmen na epovo na lox i xuren. ⁴⁰Mina lok tatao avukat nimi, mumu levelinga at lavaeme vapaase alii, i lok keretna;

⁴¹‘Nemi limixin mik lok kalise levelinga at ne Moroa, mina ronga i na; miba sangu la mina met! Nia anaba lok lara lugugu at levenaleng atnimi, ketla nemi xopmen mi noxo nuunu ren; la do tara na soxomus box i rinimi, move mi noxo nuunu ren.’ *Abk 1:5*

⁴²La ne Pol mi ne Banabas duga vas su basinge loogu singising, la limixin diga sing bok du do dubamlong ap mo lara laaleng kaala melemu, la duna vaase bok mo levelinga rinedi. ⁴³Melemu at limixin diga on basinge loogu singising, buaang atnedi limixin me Judaia la nedo bok kopmen di me Judaia, mo diga lok ka vam lotu at limixin me Judaia, diga mumu asu ne Pol mi ne Banabas; duga paase ridi la duga lox alolos di xusu dina nemen keneng at letaba nabalamu at ne Moroa.

⁴⁴Ap mo laaleng kaala melemu nedo axap ap mo lemenemen digat pas kusu dina ronga levelinga at ne Moroa. ⁴⁵Ketla lentaba limixin me Judaia diga ven i, la diga umsu mi levereven peves; diga paase tangarang mo levelinga ne Pol ga tong i, la diga paase xapmek tin.

⁴⁶Ketla ne Pol mi ne Banabas duga paase lolos aleng la kopmen du goxo marat. Duga lok keretna, “Ik mokso at lemeren ne Moroa do mana tong avot be levelinga at ne Moroa rinemi limixin me Judaia. Ketla nemi mi xopara rin, la kerepmo xopmen mina epovo ri ruuna ka lorooro avolo; mana ke xepe nimi la mana tong asu levelinga at ne Moroa ri limixin kopmen di me Judaia. ⁴⁷I lok ngan levelinga at ne Moroa ga raba dik min. I lok keretna;

‘La nia ara soxolik ka vam nimi, kusu nemi miba lok ngan laxasep la miba tong asu levelinga rak tinedi limixin kopmen di me Judaia, la miba lok ngan langas ti lorooro ri limixin to at lengkot axap at na lavatbung menemen.’ *Ais 49:6*

⁴⁸Mo limixin kopmen di me Judaia diga ronga i na la diga lok momo aleng, la diga emi asu mi Leeme Silok ne Moroa, mumu levelinga ren; la nedo ne Moroa ga soxolik ka vam di ri lorooro avolo, diga nuunu at ne Iesu.

⁴⁹Levelinga at ne Moroa ga epeseves at lengkot axap ap mo lenep silok. ⁵⁰Ketla limixin me Judaia diga lox axatu kaxat lodoxoma at luvuttadi amgomgo ap mo lemenemen silok la diga lox axatu lodoxoma at lavakin diga ruuna levenasen silok la diga lotu saparap ne Moroa. Diga vaxaru kaxat leedak ti ne Pol mi ne Banabas, la diga lok kepe du basinge lenep silok atdi. ⁵¹La luradi vavang duga lok kepe laxakup basinge lengkangkedek atdu saparap nedo xusu duna lox asu lumukmusak at ne Moroa ridi; la dugat pas uto Aikoniam. ⁵²Luvuttadi nuunu mego Antiok diga umsu mi Loroonan Kaala la lomomo bok.

Pol Mi Ne Banabas Duga Vavang To Aikoniam

14 ¹Pol mi ne Banabas duga lok mun lugugu ro Aikoniam kerekngan diga lox i ro Antiok. Duga beles to at loogu singising at limixin me Judaia la duga vavang avukat tinotno; kuren la buaang nedi limixin me Judaia eburu mi limixin bok kopmen di me Judaia diga nuunu. ²Ketla lentaba limixin me Judaia no di goxo nuunu, diga lox axatu lodoxoma at lentaba limixin kopmen di me Judaia la diga vaase pe lusumsuma atnedi basinge luradi nuunu. ³Pol mi ne Banabas duga nemen go at lentaba leven gaaling. Du goxo marat la duga paase lolos atla Leeme Silok ga lok tooro levelinga atdu mumu letaba nabalumu mila ni ga lok lempanga sangsangu at levengkikngen du. ⁴Nedi mo limixin ap mo lemenemen diga epes nedi, lentaba ri leme Judaia la lentaba ri luradi vavang.

⁵Melemu mo limixin kopmen di me Judaia la limixin me Judaia eburu mi luvuttadi amgomgo atdi, diga vaxaru kaxat kaka i xusu dina lok kapmek luradi vavang la dina lu amet du mi laxanuut. ⁶⁻⁷Ketla luradi vavang duga rongga i na la duga sixiro uto at lenep Likonia. Mo go duga vavang mi Lagale Lavavang to at lumenemen Listra la Debi, la to at lengkot petpes bok ap mo lenep.

Pol Mi Ne Banabas Duga Vavang To Listra La Debi

⁸Lara laradi ga nemen to Listra, luxangkedek teren ga molo axap, ni ga molo kaxat at laaleng nenen ga visik asu xa i xuren; la ni goxo epovo do nat pas. ⁹Gat kis go la gang tonga levelinga at ne Pol. Pol ga saga xatli ren la ga ven kibis i do mo laradi ga nuunu do ne Moroa ga epovo ri lox aroo i. ¹⁰La ni ga vaase lolos tin keretna, “Katu kaxat upana mi luxangkedek taram.” La soso mun mo laradi ga xatu kaxat upana la gat pas tangtagap.

¹¹Nedi mo limixin diga ven i, la di ga vaxaru kaka i do dina xup at lavapaase Likonia xeretna, “Na legepu radi du lok ngan ta levenmoroo, duga si ude xopok saparap nedik!” ¹²Diga raba ne Banabas mi lara laasen Sius, la ne Pol laasen Eemes, mila neni laradi vapaase. ¹³Lamaasa at lomoroa Sius, loogu laplavang teren ga nemen go maxamang ap mo lemenemen, ni ga lok ka leven bulumaxao eburu mi levesisinang uto at lumusaragu ap mo lemenemen. Ni eburu mi nom limixin diga vara i do dinaplavang mi teventamtaba saparap luradi vavang.

¹⁴Ketla Banabas mi ne Pol duga rongga i nom, la duga lolos kusu duna lok pe di. Kuren la duga ba koxorop lempanga singsiga atdu la duga sixit uto xantubu at limixin la duga xup keretna, ¹⁵“Nemi limixin, tila mi lox i na? Nema mun luradi, luradi xerekngan nimi! Nema na ma nemen de xusu mana tong asu Lagale Lavavang la mina ba gili lorooro atnimi basinge lempanga gamasa xerepmo. La mina mumu asu ne Moroa mo

i rooro, ga rudum li laxalibet, laxangka, laras la lempanga axap mo di nemen maxeneng atdi. ¹⁶Ganoxa ni ga mulus do limixin axap dina mumu xa lavavara atdi. ¹⁷Ketla neni i lox asuvos amisix i ap mo lempanga ni ga rudum li i; la im taba nimi mi larakabu boro vana at laxalibet, la ga lok katling levenaleng tik lok li bubua leveluxa at levenaleng axa ren. Ni im taba nemi mi leveluxa solo la ik suxa umsu lorooro atnimi mi lomomo.” ¹⁸Limixin diga lok do naplavang saparap du, la ga lolos aleng kusu luradi vavang duna lok pe di mi na levelinga.

¹⁹Lentaba limixin me Judaia diga la boro Antiok at lenep Pisidia la boro bok Aikoniam. La diga lox axatu kaxat lodoxoma at limixin me go Lистра la diga lu ne Pol mi laxanuat, la diga sar asu i basinge mo lemenemen; diga nua i do ni mo ga met. ²⁰Ketla luvuttadi nuunu diga ru kangkan i, la ni ga xatu kaxat, la gamlong bok uto ap mo lemenemen. Ap mo laaleng melemu nedu mi ne Banabas dugat pas uto Debi.

Pol Mi Ne Banabas Dugamlong Uto Antiok

²¹Pol mi ne Banabas duga tong asu Lagale Lavavang to Debi, la duga lok ka buaang luvuttadi diga lok ka lunuunu maxat. Dugamlong bok uto Lистра, la uto bok Aikoniam, la melemu dugat pas uto Antiok at lenep Pisidia. ²²Duga lox alolos lunuunu at luvuttadi nuunu, la duga vaase alolos di xusu dina tu tuxuruxun at lunuunu atnedi. Duga lok, “Nedik ataba ekip tangarang mi laxanmumuat solo, la kerepmo ataba beles at Linintoo at ne Moroa.” ²³At laraugu lotu getgesara luradi vavang duga sok katling loxongkulao silok ti lok tatao limixin; duga ngising la duga mun anan la duga lok li di maxopok at loklok tatao at Leeme Silok, mo diga nuunu ren. ²⁴La nedu duga vas kaxat la dugat pas kantubu at lenep silok Pisidia, duga rupot to at lenep silok Pampilia. ²⁵Duga vavang mi Lagale Lavavang to at lemenemen Pega, la melemu duga vas kaxat uto Atalia.

²⁶La duga los kas at lavattaaxup go Atalia la duga sen uto Antiok; ap mo lemenemen no limixin nuunu diga raba nedu maxopok at letaba nabalamu at ne Moroa ri lugugu mo duga lox axap pam i. ²⁷Duga rupot to Antiok la duga ro bubua limixin axap at lotu, la duga tong asu lempanga ne Moroa ga lox i at levengikngen du; la duga tong i do ne Moroa ga suang langas ti limixin kopmen di me Judaia xusu dina nuunu. ²⁸La buaang leven gaaling duga nemen go eburu mi limixin nuunu.

Lovotpot Buru To Jerusalem

15 ¹Lentaba luvuttadi nuunu diga la boro Judaia uto Antiok la diga lok ti luvuttadi nuunu mego keretna, “Nemi xopmen mi noxo lok ka lorooro do xopmen mi noxo vit kepe lengkontuxu atnimi xerekngan Lenavolo at ne Moses i tong i.” ²Pol mi ne Banabas duga rongga i na la

duga vaase mukmusak aleng la duga etep mi levelinga minedi; kuren la limixin nuunu ro Antiok diga lok katling ne Pol mi ne Banabas la lentaba bok kusu dibat pas uto Jerusalem la dina vot pasa luvuttadi vavang la loxongkulao silok la dina paase mumu na lavanga. ³Luvuttadi lotu me go Antiok diga sak tiki nedi uto Jerusalem, la digat pas maxeneng at lengkot Pinisia la Samaria la diga tong asu i ri limixin nuunu go, do limixin kopmen di me Judaia, mo diga leeng la diga nuunu at ne Iesu; lavavang at na ga lox amomo buaang nedi luvuttadi nuunu. ⁴Se diga rupot to Jerusalem, limixin at lotu me go la luvuttadi vavang la loxongkulao silok diga seega rangarang di, la ne Pol mi ne Banabas duga tong mo lempanga ne Moroa ga lox i xantubu at lugugu at nedu.

⁵Ketla lentaba luvuttadi nuunu, nedi lubung Parisi diga xatu kaxat la diga vaase lolos keretna, “Nedi mo limixin kopmen di me Judaia dina rivit kepe lengkontuxu atnedi la ata tong box i ridi do dina mumu asu Lenavolo at ne Moses.”

⁶Luvuttadi vavang eburu mi loxongkulao silok diga vot eburu xusu dina paase mumu loklok ti rivit kepe lengkontuxu. ⁷Melemu at laxampapaase solo atdi ga xap, Pita ga xatu kaxat upana la ga lok, “Luvutnetak, mikleklen i do gano migomgo Moroa ga soxolik ka ia xantubu atnimi xusu ana tong asu Lagale Lavavang tinedi limixin kopmen di me Judaia kusu dina ronga i la dina nuunu ren. ⁸La ne Moroa no ikleklen luruptuvuk at limixin, ga lox asusu i do ni ga siam ka limixin kopmen di me Judaia keretna; ni ga raba di mi Loroonan Kaala xerekngan ni ga raba dik min. ⁹Moraa ga lok legesa ngas mun ti lorooro rinedik limixin me Judaia la tinedi limixin kopmen di me Judaia; ni ga gos amaxat lebelen di mila diga nuunu ren. ¹⁰Kuren la nemen dik ta lok tong pen ne Moroa la nemen dik ta raba limixin nuunu mi na lumumuat ti rivit kepe lengkontuxu kusu dina lox epovo Lenavolo at ne Moses; mila no migo lavalabat atdik la nedik ta goxo epovo ri lox epovo na Lenavolo. ¹¹Nedik taga lok ka lorooro maxat keneng mun at letaba nabalamu at Leeme Silok ne Iesu, kerekngan bok nedi.”

¹²Nedi axap mo diga xis pilo at loxonaleng ne Banabas mi ne Pol duga tong asu lempanga sangsangu ne Moroa ga lox i at levengikngan du kantubu atnedi limixin kopmen di me Judaia. ¹³Melemu at lavapaase atdu, Jems ga lok keretna, “Luvutnetak, mina ronga ia! ¹⁴Ana vam ne Simon ira soxomus pam i do ganoxa ne Moroa ga lox asu labalamu ren saparap limixin kopmen di me Judaia la ga lok kaka lentaba atnedi xusu tin. ¹⁵Na levelinga rak i sixit epovo mi levelinga at lavaeme vapaase alii, lara atdi ga lok;

¹⁶‘Leeme Silok ga lok keretna. Melemu at na, anabamlong; la nia anaba vaxaru amlong bok loogu at ne Devit no ga subu. Anaba lok li amlong lengkot to ap mo loogu ga lok kapmek la ana vaxaru amlong box i. ¹⁷Nia

anaba lox i na xusu limixin kopmen di me Judaia bok diba puse ria; nedimo, nia ara ro ka vam di do atarak. ¹⁸Nenia, Leeme Silok atnimi, a tong i na la aba lok epovo na levelinga kerekngan aga tong li i gano migomgo.”

Amo 9:11-12

¹⁹Jems ga lok bok keretna, “At lodoxoma rak do nemen dik ta lox asoogong nedimo limixin kopmen me Judaia mo dit pas saparap ne Moroa. ²⁰Ketla ata malagan tevelinga ri vaase axasep nedimo do kopmen di noxo anan leveluxa no diaplavang pam min ti laxampoovo moroa; la dina ke loklok kakapmek maxamang at lixitkis epot, la di noxo anan lempanga mi lavanuet kangkedek no diga xur amer i la lada ren goxo sen su ukamang, la lempanga bok mi lada atnedi. ²¹La kerepmo diba lok ngangao at leme Judaia, no di utus lenavolo at ne Moses to xeneng at laraugu singising at levenaleng kaala ga ru ka i gano migomgo i se lingina; la mo levelinga ren dira vavang pam min at levenmenemen axap.”

Levelinga Ri Limixin Kopmen Di Me Judaia Di Nuunu

²²La luvuttadi vavang la loxongkulao silok eburu mi limixin axap at lotu, diga doma i do dina soxolik ka lentaba luvuttadi ap mo libinam tadi la dina sak tiki nedimo uto Antiok eburu mi ne Pol la ne Banabas. Diga soxolik ka ne Judas, laasen bok teren ne Basabas, la ne Sailas; nedu luradi silok kantubu at limixin nuunu. ²³Diga raba nedu mi mo lovoang ga lok keretna;

“Nema na luvuttadi vavang la loxongkulao silok, luvutneton nimi; ma lox aonon lomomo atnama rinemi limixin kopmen nemi me Judaia mo mi nemen to Antiok, Siria, la Silisia. ²⁴Maga ronga i do lentaba atnama digat pas udo saparap nimi, la diga lox ekarakat nimi la diga lox abulu nimi mumu loklok ti rivit kepe lengkontuxu; di xopmen di goxo lok ka tevelinga atnama xusu ri lox i mo. ²⁵Kuren la nema ma vot eburu la ma siam do mana soxolik ka teventaba tuvuttadi vapaase la mana riki nedimo udom tinemi. Dibat pas eburu mi larapen tangas atnama, ne Banabas mi ne Pol, ²⁶no duga raba lorooro atdu ri lugugu at Leeme Silok, ne Iesu Karisito; la kopmen du goxo marat at lanmet. ²⁷Ma riki bok nedu lura rinimi, ne Judas mi ne Sailas kusu duba vaase asu levelinga at lungusno atdu xerekngan nema ma malagan i. ²⁸Loroonan Kaala la nema mara siam pam do ma noxo lok li bok ba teventaangas mavana atnimi, ketla mina ronga res at na levelinga. ²⁹Mi noxo anan teveluxa no diraplavang pam min ti lempatpoovo moroa; mi noxo anan lempanga mi lada atnedi, mi noxo anan tempanga mi lavanuet kangkedek no diga xur amer i la lada ren kopmen goxo sen su, la mina ke loklok kakapmek

maxamang at lixitkis epot; naba lox avukat tinotno rinimi do mina ke xepe na lempanga. Atnimi bok be.”

³⁰Limixin lotu diga riki mo luvuttadi vapaase asu levelinga uto Antiok. Diga rupot la diga ro bubua ka mo axap limixin nuunu la diga raba nedi mi levelinga loklox axasep keneng ap mo lovoang. ³¹Limixin diga utus i mo levelinga, la diga umsu mi lomomo ti mo levelinga loklox alolos. ³²Judas la ne Sailas, nedu vam luradi vapaase alii, duga vaase abao aleng eburu mi luvuttadi nuunu, la duga lox alolos nedi. ³³Melemu at lentaba levenaleng mo go, diga lox aonon du mi lenmila atnedi mo luvuttadi nuunu; la dugamlong uto saparap nedi mo limixin no diga sak tiki avot be du. ³⁴[Ketla Sailas ga doxoma i do na nemen go.]

³⁵La ne Pol mi ne Banabas duga nemen go Antiok; nedu eburu mi lentaba buaang diga anasa limixin la diga vavang mi levelinga at Leeme Silok.

Pol Mi Ne Banabas Duga Epeseves

³⁶Lentaba levenaleng ga volo la ne Pol ga lok ti ne Banabas, “Atamlong la ata ven luvuttadi nuunu ro at levenmenemen axap no neda taga vavang mi levelinga at Leeme Silok e, la ataba ven i do nedi mo diak lok ta xereva.” ³⁷Banabas ga vara i do na lok ka ne Jon Mak eburu midu. ³⁸Ketla ne Pol ga doma i do goxo lox avukat do neni na emu eburu midu; mila gano ne Jon Mak goxo nemen eburu minedu ap mo lugugu, ketla ni gamlong kot mene atdu ro Pampilia. ³⁹Duga vaase lolos aleng mumu i na xantubu atnedu, la duga epeseves; Banabas ga lam kaka ne Mak la duga mu lavattaaxup uto Saipras. ⁴⁰Ketla ne Pol ga soxolik ka ne Sailas. La luvuttadi nuunu diga song araba ne Pol mi ne Sailas ti loklok tatao at Leeme Silok la duga vas kaxat. ⁴¹Dugat pas maxeneng at lunep silok Siria la Silisia, la duga lox alolos luvuttadi nuunu.

Timoti Ga Emu Eburu Mi Ne Pol La Ne Sailas

16 ¹Pol ga vas kaxat basinge mo lunep silok, la gat pas uto Debi la Listra. Lara laradi nuunu laasen teren ne Timoti ga nemen go Listra; nenen bok, ni latkin nuunu at lubangmixin me Judaia, ketla ne temen neni at lubangmixin me Grik. ²Luvuttadi nuunu ro Listra la Aikoniam diga tong i do ne Timoti neni laradi avukat. ³Pol ga vara i do ni na lok ka ne Timoti eburu min, kuren la ni ga vit kepe loxontuxu ren. Ni ga lox i na mila lentaba limixin me Judaia digak lok ap mo lemenemen, digaklen i do ne temen ne Timoti at limixin kopmen di me Judaia. ⁴Pol, la ne Sailas eburu mi ne Timoti digat pas kantubu ap mo laramenemen la diga tong asu mo leventaangas, luvuttadi vavang la loxongkulao silok diga tong li vam i ro Jerusalem; la ne Pol midi diga tong i ri limixin nuunu do dina mumu asu i. ⁵Kuren la limixin nuunu ap

mo lengkot ga su lolos at lunuunu atdi la leexes atnedi limixin nuunu ga uturut amisik keneng at levenaleng getgesara.

Pol Ga Ven Lisilimet To Troas

⁶Pol mi larapen tangas teren digat pas epolo maxeneng at lunep silok Pirigia la Galesia, mila Loroonan Kaala goxo siam do dina vaase asu Lagale Lavavang ap mo lenep Asia. ⁷Diga rupot to at lapdopdo at lenep Misia, la diga lok tong pen i do dina beles at lenep mogo Bitinia, ketla Loroonan at ne Iesu goxo siam do dina beles. ⁸Kuren la digat pas kantubu at lengkot Misia la diga rupot to Troas. ⁹Ap mo laxanimin Pol ga ven lisilimet la ni ga ven laradi boro Masadonia ga tu, la ga sing i, “Unat pas ude Masadonia la una lok tooro nama!” ¹⁰Melemu at ne Pol ga ven na lisilimet, soso mun nema maga gagas kusu manat pas uto Masadonia, mila magaklen i do Moroa ga ro ka vam nama kusu mana vaase asu Lagale Lavavang ti limixin me go.

Lidia Ga Ven Kibis Leeme Silok To Pilipai

¹¹Maga los kas at lavattaaxup la maga on basinge mo lemenemen Troas, la maga sen akmokso epolo uto Samoteres; la ap mo lara laaleng petpes melemu maga sen uto Neopolis. ¹²Maga vas kaxat mego uto Pilipai, lemenemen silok avot at lenep silok Masadonia; ni lemenemen buaang limixin boro Rom diga nemen go. Maga nemen ap mo lemenemen silok at lentaba levenaleng.

¹³At laaleng kaala maga vas kaxat basinge lemenemen silok uto at lisigege at ladan; maga nua i do toxot mo go at limixin me Judaia digat pot buru e la diga ngising. Maga xis kopok la maga paase ri lavakin mo diga rupot eburu go. ¹⁴Lara atdi mo digang tonga nama, laasen teren ne Lidia, neni boro Taiataira; neni ga sesep mi lempanga singsiga nunuan. Ni latkin ga lotu saparap ne Moroa; la Leeme Silok ga suang lebelen kusu ni na siam kaka mo lavapaase at ne Pol. ¹⁵Neni eburu minedi diga nemen min ap mo loogu ren diga lok ka lesepe susu; melemu ni ga xup kaka nama, “Ude nimi la mina nemen to at loogu rak, mo do nemi mi doxoma i do nenia latkin nuunu ruturun at Leeme Silok.” La ni ga vaase lolos tinama la maga beles.

Pol Mi Ne Sailas At Loogu Xokoxo To Pilipai

¹⁶At lara laaleng magat pas uto at loxot singising, maga ekip tangarang mi lara loolik, ni lasaxaruki la lagas ga nemen teren la ga lox epovo i do na paase alii umelamgo. La kerepmo ni ga lox asuusu laxampilas solo ri lamgomgo ren; mila ni ga tong levempanga salai naba rupot at levenaleng mo i tu migo ridi.

¹⁷Ni ga mumu asu nema mi ne Pol, la gap kup keretna, “Na luvuttadi nedi luvuttadi gugu at ne Moroa i silok aleng! Di tong asu langas at

lorooro rinimi!”¹⁸ La buaang levenaleng, ni ga lox i na; se ne Pol gara molo nga, la ni ga rem gili la ga lok ti mo lagas, “At laasen at ne Iesu Karisito, a tong i ru do una vas su basinge i!” Ap mo mene loxonaleng lagas ga on basinge i.

¹⁹Mo limixin digak lok tatao mo loolik diga ven i do langas atnedi rik lok ka pilas ga xap ta, diga ranga alis ne Pol mi ne Sailas la diga sat kaka du uto at luvuttadi gomgo at loxot tongtonga linga. ²⁰Duga ru ro melango at luvuttadi silok boro Rom. La nom limixin digak lok tatao mo loolik diga lok, “Na luradi nedu boro Judaia, la nedu du lok kaxat lekarakat de at lemenemen silok atdik. ²¹Duk lox ase limixin mi leveloklok no xopmen na epovo at loklok atdik; nedik at lubungmixin me Rom la ixo epovo do tana siam ka i la tana lok tong pen i.” ²²Buaang limixin diga beles ap mo leedak silok la diga ru buru mi limixin amgomgo la luvuttadi amgomgo diga lok kepe lempanga singsiga at ne Pol mi ne Sailas, la diga tong i ri limixin esep do dinabak pixis du mi lubuso. ²³Digak pixis aleng nedu mi lubuso la diga lok ka du uto at loogu xokoxo, la diga tong i ri mo laradi loklok tatao loogu xokoxo, kusu na lok pe avarang du la kopmen du noxo sixiro. ²⁴Laradi loklok tatao loogu xokoxo ga ronga na levelinga, la ni ga xoxo palaga lengkangkedek atdu kantubu at lempatkonuna mumuat. ²⁵At laxanimin tubu Pol mi ne Sailas duga lok lising la dugak pixan momo saparap ne Moroa, la lentaba luvuttadi bok mo diga xoxo nedi, digang tonga du. ²⁶La soso mun langsung langne silok ga vot la gak ma mo loogu xokoxo axap. Ap mo mene loxonaleng lumusaragu ga rem suang la lemparoos sen ga remus basinge nedi axap go xeneng at loogu xokoxo. ²⁷Laradi loklok tatao at loogu xokoxo ga rakdu tuang la ni ga ven i do laramusaragu ap mo loogu xokoxo ga rem suang axap pam, la ni ga nua i do limixin kokoxo digara sixiro vam; kuren la ni ga rev asu ka lavarise sepsep teren la ni ga lok do na bo bang amer i min. ²⁸Ketla ne Pol ga xup lolos keretna, “Nemen uta sev u! Nema axap na ma nemen.” ²⁹Laradi loklok tatao loogu xokoxo ga xup do ti tababao, ni ga sixit beles ukeneng, la ni ga xis tiktikbu mi luvatgulom teren la ga dede saparap lengkangkedek at ne Pol mi ne Sailas.

³⁰Ni ga lam asu du ukamang la ga lok, “Luave, ana lok lavanga salai xusu anaba lok ka lorooro maxat?”

³¹Duga lok, “Una nuunu at Leeme Silok ne Iesu, la nenu ba lok ka lorooro maxat, la nedi axap nom di nemen at loogu ram diba lok ka lorooro maxat.” ³²La duga tong Lagale Lavavang at Leeme Silok tin la tinedi bok mo diga nemen ap mo loogu ren. ³³Ap mo mene laaleng at laxanimin laradi loklok tatao loogu xokoxo ga sat kaka du la ga gos levenin kooxing atdu; la neni eburu minedi diga nemen at loogu ren diga lok ka lesep susu ap mo mene loxonaleng. ³⁴Ni ga lok ka ne Pol mi ne

Sailas uto at loogu ren la ga raba nedu mi leveluxa ri anan. Neni eburu minedi diga nemen at loogu ren diga umsu mi lomomo, mila diga nuunu ba at ne Moroa.

³⁵Ga maxantamak luvuttadi amgomgo diga sak tiki lavasaxaruki mi levelinga xeretna, “Mina soxomus asu du nom luradi uto.” ³⁶Kuren la laradi loklok tatao at loogu xokoxo ga tong i ri ne Pol, “Luvuttadi amgomgo di lox aonon levelinga rinumu mi ne Sailas kusu mana soxomus asu numu. Muna onon ta, la munat pas keneng at lenmila.”

³⁷Ketla Pol ga lok ti mo lavasaxaruki xeretna, “Di goxo vuse ka taxakapmek maxeneng atnama’; diga vixis nema’ at lemeren limixin, la kopmen nak mokso, mila nema’ na lunat boro Rom. Melemu diga lok li nama’ at loogu xokoxo. La at na dia lok do dina lox aonon nemnem nama’. Kopmen tinotno! I epovo do luvuttadi amgomgo axa dibat pas ude la dina soxomus asu nama’.”

³⁸Diga tong i na levelinga ri luvuttadi amgomgo; la diga rongga i do ne Pol mi ne Sailas nedu lunat boro Rom la kopmen luradi gamasa, la diga marat aleng. ³⁹Kuren la digat pas la diga vaase loklok bukbulu ridu; la diga lam asu du basinge loogu xokoxo la diga sing du do duna vas kaxat basinge mo lemenemen. ⁴⁰Pol mi ne Sailas duga on basinge loogu xokoxo, la dugat pas uto at loogu at ne Lidia. Mogo duga ekip tangarang mi limixin nuunu, la duga lox alolos di mi levelinga la duga onon ta.

Pol Mi Ne Sailas Duga Xip Losongsongot To Tesalonia

17 ¹Pol mi ne Sailas dugat pas kantubu at lunep silok Ampipolis la Apolonia, la duga vas pot to Tesalonia. Ap mo lemenemen loogu singising at lubungmixin me Judaia ga nemen e. ²Pol ga beles at loogu singising kerekngan ni gak lok amisix i. Mo go ni ga paase eburu mi limixin, la ga tong asu levelinga at Lovoang Kaala, at lavantun levenaleng kaala. ³Ni ga soxomus mo levelinga la ga lox asuusu i rinedi do i epovo Lanarong na met, la na xatu kaxat amlong bok basinge lanmet. La ne Pol ga lok, “Na ne Iesu mo nia a tong asu i rinemi, neni Lanarong.” ⁴Lentaba atnedi leme Judaia diga nuunu la diga mu asu ne Pol la ne Sailas; la buaang nedi bok limixin me Grik no diga lotu saparap ne Moroa, la buaang bok atnedi lavakin gomgo diga nuunu.

⁵Ketla lentaba at lubungmixin me Judaia diga reven peves aleng atdu la diga xup bubua ka nedi la diga lox axatu lodoxoma at limixin kusu dina esep. Diga lok li nom lemenemen axap at langsung lekarakat la diga ut das lumusaragu at loogu at ne Jeson. Diga lok tong pen i do dina vuse ka ne Pol mi ne Sailas la dina lok ka du kusu duna ru at lavapaase. ⁶Ketla di goxo vuse ka du, kuren la diga sat kaka ne Jeson la lentaba luvuttadi nuunu uto at limixin amgomgo ap mo lemenemen; la digap kup keretna, “Na luvuttadi di lok lekarakat silok at lengkot axap! La na dira

beles pam at lemenemen atdik. ⁷La ne Jeson ira lam ka di uto at loogu ren. Nedi dira los polo vam leventaangas at laradi gomgo ne Kaisar; di lok do lara loorong silok petpes mo, laasen teren ne Iesu.” ⁸Neni na levelinga diga lox axatu lodoxoma at limixin mi luvuttadi amgomgo ap mo lemenemen ti langsung leedak. ⁹Luvuttadi amgomgo ap mo lemenemen diga tong i ri ne Jeson la nedi luvuttadi nuunu xusu dina lok li tempilas ti un asu di, la melemu diga lox aonon nedi.

Buaang Nedi Limixin Boro Beria Diga Nuunu At Ne Iesu

¹⁰Ap mo mene laxanimin luvuttadi nuunu diga riki ne Pol mi ne Sailas uto Beria. Duga rupert, la at laaleng kaala dugat pas uto at loogu singising at lubungmixin me Judaia. ¹¹Limixin me go diga lox avukat aleng mila diga siam ka levelinga atdu; di goxo ronga xepe levelinga at ne Moroa kerekngan limixin to Tesalonia. Diga ronga mo levelinga mi langsung lomomo, la at levenaleng axap diga utus avukat levelinga at Lovoang Kaala, kusu dina ven i do levelinga at ne Pol ga raturun. ¹²Buaang atnedi diga nuunu, la buaang nedi lavakin silok boro Grik la buaang atnedi lavatlok boro Grik diga nuunu bok.

¹³Ketla lentaba limixin me Judaia boro Tesalonia diga ronga i do ne Pol mo ga vavang mi levelinga at ne Moroa ro Beria; diga vas kaxat ugo la diga lox axatu lodoxoma at limixin. ¹⁴La soso mun luvuttadi nuunu diga sak tiki ne Pol uto loxon, kusu na mu lavattaaxup; ketla Sailas mi ne Timoti duga nemen go Beria. ¹⁵La nedi diga emu mi ne Pol, digat pas eburu min uto Atens. Melemu digamlong uto Beria mi levelinga loklox axasep boro at ne Pol do ne Sailas mi ne Timoti duba vosiga soso mene i.

Pol Ga Vavang Ti Limixin To Atens

¹⁶Pol ga nemen tangais ne Sailas mi ne Timoti ro Atens, ni ga bulu aleng mila ni ga ven i do mo lemenemen ga umsu mi laxampoovo moroa. ¹⁷Kuren la ni ga paase ro at loogu singising eburu mi leme Judaia la limixin kopmen di me Judaia bok no diga lotu saparap ne Moroa. La at levenaleng axap ni ga vavang bok ti limixin mo digat pot amisik to at loxot potpot buru. ¹⁸Lentaba luvuttadi loklox ase diga tong nedi do Epikurian^b la Stoik^c diga etep mi levelinga eburu mi ne Pol. Lentaba diga sue, “Lavanga salai na laradi baulang i lok do na tong asu i?” Lentaba vetpes diga lok, “Ni i paase mumu levenmoroa at lengkot petpes.” Diga tong i na mila Pol ga vavang mumu ne Iesu la laxakatu kaxat amlong teren. ¹⁹Kuren la diga lam ka ne Pol, la diga vaxaxis i ro melamgo at

^b 17:18 Lara libinam tadi diga nuunu do lampeneves at labantuxu neni i silok aleng ti levelinga raturun. ^c 17:18 Lara libinam tadi di goxo nuunu at ne Moroa, ketla diga nuunu axa at lololos atdi. Di goxok lox asuus bok lomomo koplalainbulu keneng at lorooro atdi.

lixitkis buru at la Ariapagas^d la diga lok, “Nema ma vara i do mana ronga na loklox ase maxat, nenu u paase mumu i. ²⁰Lentaba levelinga ram i reng petpes at lodoxoma atnema, la ma vara i do manaklen i do ua lavasuun teren.” ²¹(Limixin me go Atens la limixin petpes bok mo diga nemen go, diga vavara amisix i do dina tere la dinang tonga tevelinga mumu lempanga maxat).

²²Pol ga xatu kaxat upana ro melamgo atdi ro at la Ariapagas la ga lok, “Limixin mede Atens! A ven i do at lorooro axap atnimi mi lotu saparap buaang levenmoroa, ²³mila nia at pas tangtagap at levengkot at lemenemen silok atnemi la a ven lengkot nemi mi lotu ren. A long lenger i do loxonin laplavang mo, miga malagan i do ‘Ti lomoroa kopmen dinakleken i.’ Nemi mi lotu saparav i, ketla nemi xopmen minakleken i la nenia na ana tong asu i rinimi.

²⁴Moroa ga rudum li lavatbung menemen axap la lempanga axap maxeneng teren; ni Lamgomgo at laxalibet la laxangka, la ni xopmen na nemen at laraugu lotu limixin di lox i. ²⁵La ni xopmen nak pakes ti tavanga do tara na raba i min, mila neni xa im taba lorooro la lamamas la lempanga axap ti limixin. ²⁶Moroa ga rudum li legesa radi la limixin axap ni livipisik li ren la ni ga lok li nedi xusu dina nemen at lengkot axap at na lavatbung menemen. La neni xa ga sok katling levenaleng ti limixin la levenmenemen atdi. ²⁷Moroa ga lox i na kusu diba ven tin, la dina vosiga i mo do di vara i. Neni xopmen na nemen paxalom basinge dik. ²⁸I lok ngan lentaba diga tong i xeretna;

‘Moroa im taba dik mi lorooro la lolos.’

I ngan bok lentaba luvuttadi vapaase atnimi diga tong i do;

‘Nedik laxamdak teren.’

²⁹Nedik laxamdak at ne Moroa, kuren la nemen dik ta doxoma i do lampoovo ren i lok ngan lampoovo at logol koplā li siliva xopla levenuto limixin di lox i mi lakleken la lololos atdi. ³⁰Gano ne Moroa goxo doma solo laxakapmek at limixin ap mo levenaleng limixin kopmen di goxokleken i; ketla lingina i tong lolos i ri limixin at lengkot axap do dina leeng basinge laxakapmek atdi. ³¹Mila neni ira lok katling pam lara laaleng neni naba lok li limixin axap at lavapaase, la lavapaase ren nabak mokso aleng; la ni ga soxolik ka vam lara laradi xusu na ronga linga at laaleng ete. Ni ga lox asuvos pam mo laradi ri limixin axap mi loklok katling keretna, ni ga lox aroo amlong i basinge lanmet.”

³²Diga ronga ne Pol ga vaase mumu laxakatu kaxat amlong at lanmet la lentaba atnedi diga lok kalise i; ketla lentaba diga lok, “Ma vara i do mana ronga box u, una vaase amu box i.” ³³Kuren la ne Pol ga on basinge

^d 17:19 Lara loxongkaana ro Atens la neni lenep digat pot buru e ri levengkitkis buru atnedi luvuttadi amgomgo mego.

loxot papaase. ³⁴La lentaba luvuttadi mene diga mumu i la diga nuunu; kantubu atnedi ne Dionisias lara atnedi boro at la Ariapagas, la lara latkin, laasen teren ne Damaris, la lentaba vetpes bok.

Pol Ga Tong Asu Lagale Lavavang To Korin

18 ¹Melemu at na, Pol ga on basinge lemenemen Atens la gat pas uto Korin. ²Mo go ni ga ekip tangarang mi laradi me Judaia laasen teren ne Akuila; lemenemen aulis teren Pontas. Ni ga nemen to Itali at lemenemen Rom eburu mi latkin teren ne Pirikila; ketla diga on basinge mo lemenemen, mila lakaisar ne Kolodias ga tong i ri limixin me Judaia xusu nedi axap dina vas kaxat basinge lemenemen Rom. Pol gat pas kusu na ven tidu, ³la ni ga nemen midu la ga gugu eburu midu, mila neni gakkelen lugugu gu mi levengkadis, kerekngan du. La kerepmo diga lok kaka lempilas tidi. ⁴Ni ga vavang amisik to at loogu singising at levenaleng kaala, gak lok tong pen i do na lok limixin me Judaia la me Grik dina nuunu.

⁵At lara laaleng ne Sailas mi ne Timoti duga rupot boro Masadonia, la melemu ne Pol ga raba levenaleng axap teren ti vavang mi Lagale Lavavang la ga tong i ri limixin me Judaia do ne Iesu, neni Lanarong. ⁶Ketla limixin me Judaia diga lox abulubun i la diga vaase levelinga xapmek mumu i, la ni ga vaase lolos tidi la ga semla xepe laxakup at lavanga singsiga ren; la ni ga lok tidi, “Do nemi mi xopara levelinga at ne Moroa, nemi xa minabap kip lumumuat teren. Kopmen bok ba toxot tarak ap mo i. Nia anat pas kusu ana vavang ti limixin kopmen di me Judaia.”

⁷La ni ga on basinge di la ni gat pas kusu na nemen to at loogu at laradi xopmen neni me Judaia, laasen teren ne Tisias Jastas, neni ga lotu saparap ne Moroa; la loogu ren ga nemen saparap loogu singising. ⁸Krispas, neni laradi gomgo ap mo loogu singising ga nuunu at Leeme Silok, neni la nedi axap diga nemen at loogu ren diga nuunu; la buaang bok atnedi go Korin diga rongga Lagale Lavavang, la diga nuunu la diga lok ka lesepe susu.

⁹At lara laxanimin Pol ga ven lisilimet, la Leeme Silok ga lok tin, “Nemen utak marat, ketla una vavang amisik la nemen uta doxoma abulubun la una ke xepe na lugugu rak, ¹⁰mila nenia ak lox eburu minu, kopmen tara noxo lok empana i do na sev u, mila buaang nedi at na lemenemen, nedi limixin tarak.” ¹¹Kuren la ne Pol ga nemen go at legesa maares mi lavanna gaaling, ga vanasa limixin mi levelinga at ne Moroa.

¹²At lara laaleng ne Galio ga nemen ngan lamgomgo at limixin to Grik, la limixin me Judaia, diga vot eburu la diga ranga alis ne Pol la diga lok ka i uto at lavapaase. ¹³Diga lok, “Na laradi i lok tong pen i do na lok pes lunuunu at limixin di lotu saparap ne Moroa la i anasa di mi lara langas petpes kopmen na sixit emu mi Lenavolo.”

¹⁴Pol ga lok do na vaase, la ne Galio ga lok ti limixin me Judaia, “Do ni ga lok laxakapmek, i epovo do nia ana ronga levelinga atnemi limixin me Judaia. ¹⁵Ketla nemi mi paase mumu mene levelinga la levenasen at Lenavolo atnemi. Nia xopmen laradi rongtonga ri lempanga xerepmo. Nemi xa mina epaase mumu i nom.” ¹⁶La ni ga lox asu di ukamang basinge lavapaase. ¹⁷Ketla diga ranga alis ne Sositenes, laradi gomgo at loogu singising, la digap sev i ro melamgo at loxot tongtonga linga. Galio ga ven i na, ketla ni ga ven kepe mun i.

Pol Gamlong Uto Antiok

¹⁸Pol ga nemen to Korin at levenaleng buaang; melemu ni ga on basinge luvuttadi nuunu la ni ga los kas at lavattaaxup la ni eburu mi ne Pirikila la ne Akuila diga sen uto Siria. Avot ti mo lavatpas, Pol ga lok laxakaape saparap ne Moroa to Senkiria, la ni ga gan pes levengkabinim at lavatlak teren. ¹⁹Diga rupot to Epesas, la ne Pol ga on basinge ne Pirikila mi ne Akuila. Ni gat pas uto at loogu singising la neni eburu mi limixin me Judaia diga etep mi levelinga. ²⁰Diga sing i xusu neni na nemen eburu minedi at tevenaleng, ketla ni goxo siam. ²¹La ni ga lok tidi, “Mo do lavavara at ne Moroa, abamlong bok ude rinimi.” La ni ga los kas at lavattaaxup la ga sen kaxat boro at lemenemen Epesas. ²²La ni ga rupot to Sisaria la gat pas uto Jerusalem la ga vot pasa mene limixin nuunu me go; melemu ni gat pas uto Antiok.

²³Melemu at leventaba levenaleng at loklok teren go, ni ga vas kaxat, la gat pas maxeneng at lengkot axap, Galesia, la Pirigia, neni gak lox alolos limixin nuunu.

Apolos Ga Vavang To Epesas

²⁴Lara laradi me Judaia laasen teren ne Apolos, neni boro Aleksandria, gat pas uto Epesas. Ni laradi levelinga ren ga lok nunuan amisik la ni galeklen avukat levelinga at Lovoang Kaala. ²⁵Ni ga lok ka levelinga mumu langas at Leeme Silok, la ni ga ruuna langangan lomomo xusu ni na anasa limixin mi levelinga mumu ne Iesu, la levelinga ren gak mokso. Ketla neni gaklen kusuk mun lesep susu at ne Jon. ²⁶Ni ga vaase lolos to xeneng at loogu singising. La ne Pirikila mi ne Akuila duga ronga i la duga lam ka i uto at loogu atdu. La duga soxomus avukat box i rin, mi langas nunuan at Leeme Silok.

²⁷Apolos ga doxoma i do ni nat pas uto at lenep silok Grik; kuren la luvuttadi nuunu ro Epesas diga paase aronga i la diga malagan lovoang ti luvuttadi nuunu ro Grik; diga tong i ridi do dina siam ka i ugo. Ni ga rupot, la ni ga lok tooro avukat nedi mo diga nuunu at ne Iesu mi loklok tooro at ne Moroa. ²⁸At lemeren limixin axap ni ga volo aleng limixin me Judaia mi leete silok. Ni ga lox asuusu i at Lovoang Kaala do ne Iesu, neni Lanarong.

Pol Ga Vavang Mi Laasen At Ne Iesu To Epesas

19 ¹Ap mo levenaleng ne Apolos ga nemen to Grik at lemenemen Korin, la ne Pol gat pas at langas babaalom maxeneng ap mo lunep silok Galesia la Pirigia la ni ga rupot to Epesas. Mo go ni ga vosiga lentaba luvuttadi nuunu. ²La ni ga sue di, “Kereva, miga lok kaka bok Loroonan Kaala at loxonaleng nemi miga nuunu?”

Diga vorang i xeretna, “Nema xovisi mana rongga i do Loroonan Kaala mo i nemen.” ³Pol ga sue di, “Lesepe susu salai nemi miga lok ka i?”

Diga vorang i xeretna, “Maga lok ka lesepe susu at ne Jon.”

⁴Pol ga lok, “Lesepe susu at ne Jon tinedi diga on basinge laxakapmek atdi; la ne Jon ga tong i ri limixin do dina nuunu at lara mo ga mumu asu i, neni ne Iesu.” ⁵Diga rongga i na la diga lok ka lesepe susu at laasen at Leeme Silok ne Iesu. ⁶Pol ga lok li lukngen to mavana atdi, la Loroonan Kaala ga vubeles atdi la diga paase mi lempapaase vetpes la diga tong asu levelinga at ne Moroa. ⁷Nedi axap diga epovo at lasangaun mi legepura.

⁸Maxeneng at lavantun gaaling Pol ga pubeles at loogu singising, la ni ga paase lolos ti limixin, ni ga vetep mi levelinga eburu minedi la ga lok tong pen i do na sat ka lunuunu atnedi ri Linintoo at ne Moroa. ⁹Ketla lentaba atdi di goxopara levelinga ren la di goxo nuunu, la diga vaase kapmek ti langas at Leeme Silok to melamgo at limixin axap. Kuren la ne Pol ga on basinge di la ga lam ka luvuttadi nuunu eburu min; la at levenaleng axap ni ga paase ro at loogu vapaase at ne Tirinas. ¹⁰Pol ga nemen go la ga anasa limixin at legepu maares; kuren la limixin no diga nemen taba ro at lengkot Asia, nedi leme Judaia la leme Grik bok diga rongga levelinga at ne Moroa.

Lubunggas Diga Sep Laxamdak At Ne Siva

¹¹Moroo ga lok buaang lempanga sangsangu silok at lekngen ne Pol. ¹²La limixin diga soe ka lengkontamon at labantuxu ren, la diga lok li at labantuxu at limixin mekmeres la levenanmeres atdi gara xap, la lubunggas diga ravasu basinge di.

¹³Lentaba at leme Judaia mo digat pas tangtagap la digak lok pes lubunggas basinge limixin; diga lok tong pen i do dina gugu mi laasen at Leeme Silok ne Iesu. Diga lok ti lubunggas keretna, “Nia a tong i rinimi do mina sixisu at laasen at ne Iesu, mo ne Pol i vavang min.”

¹⁴Nedi lavanuti laxamdak at laradi boro Judaia, ni laradi gomgo at lubungmaasa, laasen teren ne Siva, mo digak lox i na. ¹⁵Ketla lara lagas ga lok tidi, “Aklen ne Iesu la aklen bok ne Pol, ketla axoklen nemi.”

¹⁶Laradi mi nom lagas ga nemen teren ga xala di mi langsung lololos teren ga volo axap di, la gap sep kakapmek di. Diga sixiro basinge mo

loogu ren la lengkot atdi ga lok kakapmek tinotno, la diga sixiro beleben nga.

¹⁷La nedi axap limixin me Judaia la boro Grik bok, no diga nemen to Epesas diga ronga i na; la diga lingun, la limixin axap diga lok ngangao aleng at laasen at ne Iesu. ¹⁸Buaang atnedi luvuttadi nuunu mi lavakin nuunu diga vot eburu la diga tong asu lempanga xakapmek digak lox i gano. ¹⁹Buaang atnedi mo digakleklen lasak, diga lok buru levenbuk kakapmek atnedi la diga xotos i ro melamgo at limixin axap. Diga exes luunun ap mo levenbuk diga un i min, ga volo lavalimo sangaun larabin sangsangaun kobot (50,000) levempilas gamgames. ²⁰La kerepmo levelinga at Leeme Silok ga epeseves la ga lox alolos bok limixin nuunu.

Langsangan Lekarakat To Epesas

²¹Melemu at na lempanga ga ravasu, Pol ga doma li be i do ni nat pas uto Jerusalem la na mu langas kantubu at lenep Masadonia la at lenep Grik. Ni ga lok, “Melemu at lavatpas tarak uto Jerusalem, abat pas uto Rom.” ²²Kuren la ni ga riki ne Timoti mi ne Erastas, nedu luradi loklok tooro ren uto Masadonia, la ni ga nemen to Asia at lentaba levenaleng.

²³Ap mo levenaleng langsangan lekarakat ga nemen go Epesas mumu langas at Leeme Silok. ²⁴Lara laradi ga nemen go, laasen teren ne Demitrius; ni ga gugu lempoovo moroa mi lisiliva; la gak lok bok lempoovo vanga at loogu laplavang at lomoroa rixin ne Artemis; la nedi luvuttadi diga gugu lugugu xerepmo diga xip kaka langsangan luunun ap mo lugugu. ²⁵Kuren la ni ga xup bubua ka nedi digak lok mo lugugu la ga lok tidi, “Nemi limixin, miklen i do luunun atdik ip tavasu mun at na leven gugu. ²⁶Nemi xa mira ven pam i la mira ronga vam mo levelinga ne Pol i tong i. Ni lok do levenmoroa limixin di lox i mi levengkikngen di, kopmen levenmoroa ruturen. La ni ira sat ka vam buaang nedi limixin mi levelinga ren, la ira lox asubu di basinge lomoroa rixin nade Epesas la at lengkot axap bok at na lenep Asia. ²⁷I lok kapmek do na ne Pol ira vot de la na lok limixin kusu dina lox abulubun kepe lempoovo vanga nedik tak lox i. I lok kapmek bok do limixin dina lox abulubun kepe loogu laplavang at lomoroa rixin ne Artemis la dina lok abulubun kepe bok ne Artemis; limixin axap nade Asia la at na lemenemen axap di lotu saparav i.”

²⁸Mo limixin diga ronga na levelinga la diga musak aleng la diga xup lolos kaxat, “Artemis me Epesas neni i silok aleng.” ²⁹Mo luxupkup ga epeseves ap mo lemenemen axap; mo limixin diga ranga alis ne Gaius mi ne Aristakas, nedu boro Masadonia dugat pas amisik eburu mi ne Pol, la diga sixit eburu minedu uto at loxot papaase buru. ³⁰Pol ga vara i do nat pas uto melamgo at limixin axap, ketla luvuttadi nuunu di goxo siam do ni nat pas. ³¹Lentaba luvuttadi amgomgo at lenep silok Asia, nedi larapen

tangas at ne Pol diga lox aonon bok lavapaase rin; diga sing tin do ni noxo vas uto at loxot papaase buru; kuren la ne Pol goxot pas tin.

³²La nedi limixin axap ap mo loxot papaase buru diga lok langsung an luxupkup; ketla buaang atdi digap kup gamasa mene mila di goxoklen lavasuun ap mo lovotpot buru. ³³Lentaba atdi diga lok do ne Aleksanda neni lavasuun at nai, mila leme Judaia diga lok li i do ni na ru ro melango at limixin. Kuren la ne Aleksanda ga sep makmak di mi lekngen kusu na lok lavapaase axasep tinedi limixin do neni eburu mi larapen tangas teren kopmen toxot atdi ap mo leedak. ³⁴Ketla diga ven kibis i do neni laradi me Judaia, la digap kup amisik aleng ngan legesa radi xeretna, "Atemis me Epesas neni i silok aleng!"

³⁵La melemu at nai leeme gomgo at limixin ga lox amila di. Ni ga lok, "Limixin me Epesas! Nemi axap miklen i do nedik mede Epesas tak lok tatao loogu laplavang at lomoroa silok ne Atemis la lovoovo ren, no ga subu boro vana at laxalibet. ³⁶Ixo epovo do tara na tong i do na levelinga kopmen na ruturun. Kuren la minak lox atnaasan la nemen mita lok tempanga xapmek. ³⁷Mi lam ka vam na luradi ude, ketla du xopmen du goxo xip pilo tavanga ro at laraugu laplavang la du goxo vaase xapmek ti lomoroa rixin atdik. ³⁸Dola ne Demitrius la nedi luvuttadi gugu box eburu min di ruuna tekarakat eburu mi tentaba, levengkonaleng move ri lavapaase la luvuttadi amgomgo mo di nemen; di epovo ri lok li tara at lavapaase ren. ³⁹Ket do tavanga gove nemi mi vara rin, minaba epaase mu ba i ro at lovotpot buru atnimi xa. ⁴⁰I epovo do dina lok li dik at lavapaase mumu na leedak i ngan mo lingina. Kopmen tavasuun at na leedak, la nedik ta noxo lox epovo i do ataba tong tavasuun nunuan ti nai." ⁴¹Melemu at lavapaase ren ni ga lox aepeseves nedi.

Pol Gat Pas Uto Masadonia La Grik

20 ¹Melemu at leedak gara xap pam, Pol ga xup bubua ka luvuttadi nuunu, la ni ga vaase loklok tooro rinedi la diga xaduk aonon i. La ni ga on basinge nedi la gat pas uto Masadonia. ²Ni gat pas to xeneng ap mo loxot la ni ga vaase loklok tooro ri limixin nuunu mi levelinga buaang. La melemu ni gat pas uto Grik. ³Ni ga nemen go ga at lavantun gaaling. Ga se ni ga gagas kusu ri mu lavattaaxup uto Siria, ni ga long lenger i do leme Judaia mo diga paase alii ri sev i; kuren la ni ga doma li i xusu namlong kantubu at lenep silok Masadonia. ⁴Sopata, nitna ne Pairas boro Beria, gat pas eburu min; la ne Aristakas la ne Sekandas boro Tesalonia; Gaius boro Debi; Timoti; la ne Tikikas la ne Tropimas boro at lenep silok Asia. ⁵Digamgo rinama la diga ngangais tinama ro Troas. ⁶Maga sen kaxat boro Pilipai melemu at lara leluxa laasen teren Lovovolo Pe; la melemu at lavalimo aleng maga vosiga di ro Troas, mo go maga nemen eburu midi at lavanuti aleng.

⁷At laaleng avot ap mo luik ga ukantinao maga vot buru ri lok katling laanan kaala at ne Iesu. Pol ga vaase ri limixin, la ni ga vavang babaalom se at laxanimin tubu mila ni ga lok do naba onon ap mo laaleng melemu. ⁸Buaang levenbabao ga nemen to vana ap mo loogu nema magak lok teren. ⁹Lara laau radi laasen teren ne Iutikas, gat kis to at loxon go lixilik; Pol ga vaase aleng la lemeren ne Iutikas ga unga aleng tinotno, se ni ga unga met, ni ga subu si boro vana xa ap mo loogu babaalom upana, la ukopok ti laxangka. Diga ranga axatu i, ga lavanga met ta. ¹⁰Ketla ne Pol ga vas si ukopok la ga subu pavaa i la ga ot kongkodan ka i la ni ga lok tidi, “Nemen mita bulu, neni mo i rooro mene la kopmen na met!” ¹¹Melemu digamlong upana ap mo loogu la diga lok laanan kaala. La ne Pol ga vaase babaalom tidi se at laxangking ga losu maxantamak suubu, la ni ga on basinge di. ¹²Diga lok ka mo laau radi uto xolonu, la lebelen di gak lox atnaasan aleng mila ni goxo met.

¹³La nema maga vas kaxat me go uto at lavattaaxup la maga sen kaxat uto Asos kusu manaba xas ka ne Pol upana ri lavattaaxup. Ni ga tong i rinama do manabak lok ngais i go, mila ni gat pas mene ugo. ¹⁴La ni ga ekip tangarang minama ro Asos, la maga xas ka i upana at lavattaaxup la maga sen kaxat uto Matilini. ¹⁵Maga sen kaxat me go la maga rupot to saparap losoxan Kios ap mo laaleng petpes. Melemu at lara laaleng bok nga, maga sesen uto saparap losoxan Samos, la ap mo manga lara laaleng petpes maga rupot to Mailitas. ¹⁶Pol ga doxoma i do ni naba sen polo go Epesas, kusu ni noxo nemen abao ro at loxot Asia. Ni gak lok soso xusu ni naba rupot to Jerusalem, edompo mi laaleng ti lok katling la Pentikos.

Pol Ga On Basinge Limixin Nuunu Boro Epesas

¹⁷Pol ga riki lara laradi mi levelinga boro Mailitas uto Epesas, ga sing loxongkulao silok at lotu xusu dina ekip tangarang min. ¹⁸Diga vot posiga i la ni ga lok tinedi, “Miklen i do luruptuvuk tarak ga lox avukat ap mo levenaleng nia aga nemen eburu minemi, ga vaxaru ka i at laaleng nia aga rupot de at lenep Asia. ¹⁹Mi langsung loklok ngangao la lanteng; aga lok leven gugu rak kerekngan lasaxaruki at ne Moroa, la aga ekip tangarang mi levenmumuat at leme Judaia diga lok li i rak. ²⁰Mikleklen i do nia a goxo lipe tekolinga ri lok tooro nemi limixin; ketla nia agak lox ase nemi ro at lengkot potpot buru la to at leventaugu atnimi. ²¹Ti leme Judaia la limixin kopmen di me Judaia bok aga vaase lolos tinedi do dina leeng basinge laxakapmek atnedi, la dina vot parap ne Moroa, la dina nuunu at Leeme Silok ne Iesu.

²²La ananga nia a ronga res at Loroonan Kaala, kusu anat pas uto Jerusalem; la nia axoklen i do lavanga salai naba rupot saparav ia go. ²³Nia akleklen i do at laramenemen axap Loroonan Kaala ik lok tia dola limixin diba lok li ia at loogu xokoxo la aba xip laxanmumuat aleng.

²⁴Ketla nia a lok do lorooro rak i lok ngan ta do lavanga gamasa mun tia; nia a vara mun i do ana lox axap lavatpas tarak la ana lox axap lugugu at Leeme Silok ne Iesu ga raba ia min; mo lugugu ri tong asu Lagale Lavavang mumu letaba nabalamu at ne Moroa.

²⁵Agarat pas tangtagap pam kantubu atnimi, aga tong asu langas ti Linintoo at ne Moroa. La na a tong tuturun i rinimi; aklen i do kopmen tara atnimi noxo ven bok ba ia. ²⁶Kuren la a tong tuturun i rinimi na lingina; mo do tara atnimi na ronga abulubun levelinga at ne Moroa, ni nabap kip lumumuat teren. Nia xopmen lavasuun teren, ²⁷mila nia a goxo lipe tempanga ketla aga tong asu lempanga axap ne Moroa ga lok do na lox i at lorooro atnimi. ²⁸Mina lok tatao avukat nemi la mina lok tatao nedi bok limixin, Loroonan Kaala gara lok li vam nedi maxopok at loklok tatao atnimi. Mina lok ngan luvuttadi loklok tatao sipsip kantubu at limixin at ne Moroa, no ni ga lok li di do ateren axa mumu lanmet at ne nitna. ²⁹Aklen i do melemu at loxonalleng nia ana onon, limixin kapmek diba rupot kantubu atnimi, diba lok ngan lubungman atat la diba lok kapmek lunuunu at lentaba atnimi. ³⁰Laaleng move naba rupot la lentaba atnimi diba ba gili levelinga ruturun kusu ri sat ka limixin nuunu basinge ne Moroa. ³¹Mina lok tatao avukat nemi. Mina doma bilong ti mo lavantun maares nenia aga paase lolos tinemi axap at levenaleng kangking la kanimin, la agang teng mu nimi.

³²La ana nia a lok li nimi maxopok at loklok tatao at ne Moroa la levelinga mumu letaba nabalamu ren ba lok tooro nimi. Neni xa i epovo ri lox alolos lunuunu atnimi la na raba nemi mi lapnovos no ni i gagas li i ri limixin teren. ³³Nia a goxom doma mu tempilas koplala tempanga singsiga atnimi. ³⁴Nemi xa miklen i do aga gugu mi na lukngak la aga lox epovo ka lempanga, nema mi larapen tangas tarak magak pakes tin. ³⁵At lempanga axap nia aga lox i, aga lox ase nimi do mina lolos kusu mina lok tooro mo limixin banbalo. Mina lox i xuren mila ne Iesu ga lok keretna, 'I lox avukat do tara i lok kaka levempanga, ketla i lox avukat aleng do tara na raba levempanga ri laradi vetpes.'

³⁶Pol ga vaase axap la ni ga xis tiktikbu mi luvatgulom teren eburu minedi axap limixin la ni ga sing. ³⁷Nedi axap digang teng aleng la diga votor i la digat nes i. ³⁸Diga lok bukbulu aleng at levelinga ni ga tong i do di noxo ven bok ba i. La diga emu min uto at lavattaaxup.

Pol Gat Pas Uto Jerusalem

21 ¹Maga lox abeese limixin me Epesas mi lainbulu silok la maga on basinge di. Maga sen kaxat la maga sen epopolo uto Kos. Ap mo laaleng melemu maga rupot to Rodes, la maga sen kaxat mego uto at lemenemen Patara. ²Mo go maga long lenget lara lavattaaxup, mo ga lok do na sen kaxat uto Pinisia; kuren la maga los kas ap mo lavattaaxup

la maga sen kaxat. ³Maga vot at lara loxot la maga ven losoxan Saipras, la maga sen polo i at lenep kia ap mo losoxan uto at lenep silok Siria. Maga oso ro Taia, mo go lavattaaxup ga oso xusu dina xip asu lentaba lempanga. ⁴Maga long lenger i do lentaba luvuttadi nuunu mo diga nemen go, la maga nemen eburu minedi at lavanuti aleng. Mi lololos at Loroonan Kaala diga tong i ri ne Pol do ni noxot pas uto Jerusalem. ⁵Ketla levenaleng atnama ri nemen go ga xap, la maga on basinge mo lemenemen silok. Nedi axap, eburu mi lavakin atnedi la laxaalik kakalik atdi, diga vas kaxat eburu minema uto loxon. Maga xis tiktikbu mi lempatgulom atnama ro loxon la maga lok lising. ⁶Melemu diga xaduk aonon nema, la maga los kas at lavattaaxup la nedi digamlong ukolonu.

⁷Maga sen kaxat boro Taia la uto Potolemas, mo go maga vot pasa luvuttadi nuunu la maga nemen eburu minedi at leges aleng. ⁸Ap mo lara laaleng melemu maga on basinge di la maga rupot to Sisaria. Mo go magat pas uto at loogu at laradi vapaase asu Lagale Lavavang, laasen teren ne Pilip, la maga nemen eburu min. Neni lara atnedi lavanuti luvuttadi no diga soxolik ka di ro Jerusalem. ⁹Neni ga ruuna lavanuet laxaalik kovisi di goxo epot, mo diga vavang mi levelinga at ne Moroa.

¹⁰Maga nemen go at lentaba levenaleng, la lara leeme vapaase alii, laasen teren ne Agabas ga rupot boro Judaia. ¹¹Ni ga vosiga nama, la ga lok ka labaane at ne Pol, la ni ga xoxo ka lukngen ne Pol mi luxangkedek teren la ga lok, “Loroonan Kaala i tong i do laradi at na labaane, limixin me Judaia diba xoxo i; diba lox i na ro Jerusalem, la diba song araba i ri limixin kopmen di me Judaia.

¹²Maga rongga i na la nema eburu mi lentaba me go maga ngising tinotno ne Pol do ni noxot pas uto Jerusalem. ¹³Ketla ni ga lok, “Lai nom nemi mik lox i, ming teng keretnom la mirak lox abulu lorooro rak? Nia a gagas pam kusu dinaba xoxo ia. La nia a gagas bok kusu ri met mo go Jerusalem kusu ri xip aurut laasen at Leeme Silok ne Iesu.” ¹⁴Ma goxo lox epovo i xusu ri ba gili lodoxoma ren, kuren la maga ke xepe i la maga lok, “Lavavara at ne Moroa do ni na lox i xuren.”

¹⁵Melemu at lentaba levenaleng maga nemen go, maga lok agagas li lempanga atnama la maga vas kaxat uto Jerusalem. ¹⁶Lentaba luvuttadi nuunu boro Sisaria bok mo digat pas eburu minema, la diga lok ka nama uto at loogu at lara laradi, laasen teren ne Nason boro Saipras, neni lara atnedi diga lok ka avot lunuunu saparap Leeme Silok.

Pol Ga Ven Ti Ne Jems

¹⁷At lovotpot atnama go Jerusalem luvuttadi nuunu diga lok momo aleng minama. ¹⁸Ap mo lara laaleng melemu nema mi ne Pol magat pas kusu mana ven ti ne Jems; la nedi axap luvuttadi amgomgo at lotu go Jerusalem diga rupot to ap mo lovotpot buru. ¹⁹Pol ga paase momo

rinedi la ga tong asu lempanga axap no ne Moroa ga lox i at lekngen kantubu at limixin kopmen di me Judaia.

²⁰Melemu at levelinga at ne Pol, limixin diga emi asu mi ne Moroa. La diga lok ti ne Pol, “Neton nama. U ven i do, buaang limixin me Judaia di nuunu, la nedi dim tebeng lolos Lenavolo. ²¹La lentaba vetpes di tong i do, nenu mo uk lox ase leme Judaia mo dik lok at laramenemen at limixin kopmen di me Judaia, la u tong i ridi do dina ke xepe Lenavolo at ne Moses, la nemen nedi guta vit kepe lengkontuxu at laxamdak atdi la nemen diguta mumu asu leveloklok atnedik leme Judaia. ²²Dibaklen i do nenu mo u rupot pam. Ataba lok lavanga salai? ²³Una lok lempanga keretna. Lavanuet luvuttadi na diga xaape saparap ne Moroa. ²⁴Una lam ka di la una mu asu mo loklox eburu minedi xusu una dadat at lemeren ne Moroa, la una lok bok luunun ap mo loklok tinedi; kuren la diba epovo do dina gan kepe lempat kabinim at lempatlak atdi xusu dina lox epovo mo laxakaape atdi saparap ne Moroa. Kerepmo la limixin axap dibaklen i do mo levelinga mumu u xopmen na ruturun; la diba xasep do nenu ung tonga res at Lenavolo at ne Moses. ²⁵Ketla mara lox aonon pam levelinga ri limixin kopmen di me Judaia no diga nuunu. Mo levelinga i tong i ridi do di noxo anan teveluxa no diplavang min ti lempatpoovo moroa, la di noxo anan tavanga mi lada ren, la di noxo anan lempanga mi lavanuet kangkedek no diga xut amer i, la dina ke loklok ting longka tixin.”

²⁶Kuren la ne Pol ga lam ka di mo lavanuet luvuttadi la ga emu minedi la ap mo lara laaleng melemu ni ga lox epovo luunun tidi la diga gan kepe levengkabinim at lempatlak atdi. La ni ga beles to xeneng at loogu laplavang la ga vaase axasep lavanisa levenaleng ti laxavaxap ap mo loklok la at ua laaleng diba raba laramtaba atdi.

Leme Judaia Diga Ranga Alis Ne Pol

²⁷Levenaleng ap mo loklok ga lok do na xap ta, lentaba leme Judaia boro at lenep Asia diga ven ne Pol to xeneng at loogu laplavang. Diga lox axatu kaxat levendoxoma at limixin axap me go, la diga ranga alis i. ²⁸Digap kup keretna, “Nemi limixin me Israel. Ude nimi la mina lok tooro nama. Anai laradi na it pas tangtagap at lengkot axap la ik lox ase limixin do dina lox abulubun kepe limixin me Judaia la dina ke xepe Lenavolo atdik la na loogu laplavang. La ana nga ira lok ka laradi xopmen me Judaia ukeneng at loogu laplavang la kerepmo i lok puvula na loogu xaala!” ²⁹Diga tong i na mila diga ven ne Tropimas boro Epesas eburu mi ne Pol to xeneng ap mo lemenemen silok, la diga nua i do ne Pol ga lam ka i uto xeneng ap mo loogu laplavang.

³⁰Mo lemenemen silok axap ga umsu mi langsung leedak, la limixin digak sixit eburu, la diga ranga alis ne Pol la diga sat ka i ukamang basinge loogu laplavang. La soso mun diga vipe lumusaragu ap mo loogu

laplavang. ³¹Mo limixin diga lok tong i do dina sep ne Pol la soso mun lara laradi ga lox aonon levelinga ri leeme gomgo at limixin esep boro Rom do limixin axap go Jerusalem mo diga lok lekarakat. ³²La soso mun mo leeme gomgo ga lok ka lentaba digak lok mu ren la lentaba limixin esep la diga sixit uto saparap mo limixin. Mo limixin diga ven mo leeme gomgo eburu mi limixin esep, la diga xap ta lesepep ne Pol.

³³Leeme gomgo ga vas saparap ne Pol, la ga ranga alis i, la ga tong i ri limixin esep do dina xoxo i mi luvaroos sen. La ni ga sue, “Nege i na laradi, la lavanga salai mo ni i lox i?”

³⁴Lentaba xeneng atdi mo limixin diga tong lara levelinga vetpes. La lentaba diga tong leta lepelinga vetpes bok, langsung lekarakat silok ga vot, la mo leeme gomgo goxo lox empana i do naklen ka lavasuun at na leedak; kuren la ni ga tong i ri limixin teren kusu dina lam ka ne Pol uto at loogu lolos atdi. ³⁵Diga emu min uto at laata at loogu, la limixin esep diga xip ka i mila limixin diga musak aleng. ³⁶Diga mumu asu i la digap kup keretna, “Sev amer i!”

Pol Ga Vaase

³⁷Mo limixin esep diga lok do na lok ka ne Pol uto at loogu lolos la ni ga lok ti leeme gomgo mi lavapaase Grik, “I epovo bok do ana tong tevelinga ru?”

Mo leeme gomgo ga rakdu la ga sue i, ³⁸“Kereva. Nenu xopmen mo laradi boro Isip? At lentaba levenaleng ga xap pam, neni ga lok kaxat leesepe eburu mi lagavaman la gam gomgo rinedi lavanuet larabin sangsangaun kobot (4000) limixin esep uto at lamatbin.”

³⁹Pol ga lok keretna, “Nenia lara at limixin me Judaia, boro at lemenemen Tasas at lenep Silisia; nenia me go ap mo lemenemen silok doxodok. A sing u do i epovo ana vaase ri limixin.”

⁴⁰Leeme gomgo ga siam do ni na vaase; kuren la ne Pol ga xatu kaxat to at laata ap mo loogu la ga sep makmak di. Diga lok pilo, la ne Pol ga vaase ridi mi lavapaase Ibru.

22 ¹“Luvutnetak mi luvuttamak, mina ronga ia; ana paase de melamgo atnimi!”

²Diga ronga ne Pol ga vaase ridi mi lavapaase Ibru, la diga ru atnaasan, la ne Pol ga paase ridi. ³“Nenia lara at limixin me Judaia, boro at lemenemen Tasas at lenep Silisia, ketla diga lok ka ia ude Jerusalem i ngan laradi loklok ka anasa at ne Gamaliel. Aga lox ase avukat keneng at Lenavolo at lavalabat atdik, la aga lolos tinotno ri mumu asu ne Moroa kerekngan nemi axap na lingina. ⁴Aga ranga alis buaang nedi limixin diga mumu asu ne Iesu la agap sev amet di. Agang tanga alis lavatlok mi lavakin la agak lok li di at loogu xokoxo. ⁵Lamaasa gomgo at luvuttadi laplavang la nedi bok luvuttadi amgomgo dikleklen i do nia a paase

ruturun. Aga lok ka levelinga loklox axasep boro atdi luvuttadi amgomgo rinedi leme Judaia ro Damasko. Kuren la nia agat pas ugo xusu ana xoxo ka mo limixin la ana lok ka amlong di uto Jerusalem kusu dina xip lumumuat.

Pol Ga Tong Asu Lorooro Ren

(Gu 9:1-19; 26:12-18)

⁶Agat pas mu langa la aga vas saparap lemenemen Damasko; ap mo loxonaleng laxangking ga xis tubu la aga ven langsung laxasep boro vana at laxalibet ga ngao pavaa ia. ⁷Aga subu ukopok ti laxangka la aga ronga laxaka at lara ga sue ia, ‘Sol, Sol. Tila uk lox asongor ia?’

⁸Aga sue i, ‘Leeme Silok, nenu nege?’

Ni ga lok tia, ‘Nenia ne Iesu boro Nasaret mo nu uk lox asongor ia.’

⁹Nedi luvuttadi diga emu minia diga ven mo laxasep, ketla di goxo ronga laxaka ap mo laradi ga paase ria.

¹⁰Aga sue i, ‘Leeme Silok, aba lok lavanga salai?’

La Leeme Silok ga lok tia, ‘Una xatu kaxat la unat pas uto Damasko, la mo go tara ba tong lugugu no ne Moroa ira lok katling pam i ru.’

¹¹Luxatli rak ga main mila mo laxasep ga lolos aleng. Kuren la nedi diga emu minia diga ranga ru at lakngak la diga lam ka ia uto Damasko.

¹²Lara laradi, laasen teren ne Ananias, laradi lotu la gang tonga res at Lenavolo atdik la limixin me Judaia go Damasko diga lok ngangao aleng teren. ¹³Ni ga vosiga ia la ga ru saparav ia la ga lok, ‘Netak ne Sol, una ven mi luxatli ram.’ Ap mo mene loxonaleng nia ga valas luxatli rak la aga reven bok ba min, la aga ven mo laradi.

¹⁴Ni ga lok, ‘Moroa at lavalabat atdik ga soxolik ka vam u do unaklen lodoxoma ren, la uba ven kibis Lanarong teren, luruaptuvuk teren ik mokso; la unang tonga levelinga ren. ¹⁵La nenu uba tong asu levelinga ri limixin axap mumu mo lempanga nenu uga ven i la ugang tonga i. ¹⁶La nemen utat kis gamasa. Katu kaxat la una lok ka lesepe susu la ne Moroa naba doxoma xepe leveloklok kakapmek taram, mo do una sing ti loklok tooro at Leeme Silok.’

Pol Laradi Vavang Ti Limixin Kopmen Di Me Judaia

¹⁷La ne Pol ga lok bok keretna, ‘Agamlong uto Jerusalem, la aga ngising to xeneng at loogu laplavang la aga ven lara lisilimet. ¹⁸Keneng at na lisilimet nia aga ven Leeme Silok ga lok tia, ‘Soso u la una vas kaxat basinge lemenemen Jerusalem, mila limixin me de di noxo siam ka levelinga ram mumu ia.’

¹⁹Aga lok, ‘Leeme Silok, diklen avukat tinotno i do nia agat pas uto at laraugu singising la agap sep mo limixin diga nuunu ram. ²⁰La at laaleng diga sev amet laradi vapaase ram ne Stiven, nenia mo aga tu saparap di,

la nia aga siam ti mo laniu ren la agak lok tatao levempanga singsiga ap mo limixin diga sev i.'

²¹Moroa ga lok tia, 'Una vas kaxat basinge na lemenemen; nia aba riki u uto vaxalom tinedi limixin kopmen di me Judaia.'

²²Leme Judaia diga rongga levelinga at ne Pol at loxonaleng ni ga tong i na levelinga. Diga xup kaxat lolos keretna, "Tiki pes i! Sev amer i! Neni xopmen na epovo ri rooro at na lavatkangka!"

²³Digap kup lolos la diga ba koxorop levempanga singsiga atdi la diga lulu mi laxakup upana. ²⁴Ketla leeme gomgo at limixin esep ga sak tiki limixin teren do dina lok ka ne Pol uto at loogu lolos, la ga tong i ridi do dinak pixis i xusu ri vuse ka ua lavasuun teren la leme Judaia diga vaase lolos tangarang i. ²⁵Se diga xoxo ka i do dinak pixis i, Pol ga lok ti laasesep mo ga tu go, "Kereva, ik mokso at leventaangas atnimi do minap sep lanat boro Rom, no xopmen di goxo rongga levelinga ren at lavapaase?"

²⁶Mo laasesep ga rongga i na la ni gat pas uto at leeme gomgo la ga sue i xeretna, "U lok do una lok lavanga salai? Ana laradi neni lanat boro Rom!"

²⁷Kuren la leeme gomgo ga vosiga ne Pol la ga sue i, "Una tong i ria; kereva, nenu lanat boro Rom?"

Pol ga vorang i xeretna, "I ruturun."

²⁸Leeme gomgo ga lok, "Nia bok lara xuren, mila nia aga xepe buang laxampilas."

Pol ga lok, "Ketla nenia lanat boro Rom mila ne tamak gak lok bok kuren."

²⁹La soso mun mo limixin esep diga lok do dina sue i mi levesusue, digasko bilong basinge i; la mo leeme gomgo ga marat mila ni gaklen ba i do ne Pol neni lanat boro Rom, la ni ga lok li gar i at loxokoxo.

Pol Ga Ru Ro Melango At Luvuttadi Amgomgo La Ga Paase

³⁰Leeme gomgo ga vara i do naklen ua lavasuun teren la leme Judaia diga lok li ne Pol at lavapaase; kuren la ap mo lara laaleng melemu, ni ga soxomus asu ne Pol; la ga tong i ri lavamaasa silok la nedi luvuttadi amgomgo at leme Israel kusu dina rupot buru min. La ni ga lam ka ne Pol, la ga vaxaru i ro melango atdi.

23 ¹Pol ga sok katli ka luvuttadi silok la ga lok tidi, "Luvutnetak. Luruptuvuk tarak i lox avukat axap at lemeren ne Moroa, ise at na laaleng lingina." ²Ketla lamaasa gomgo ne Ananias ga tong i ridi luvuttadi diga tu auret ne Pol do dina vasa lungusno ren. ³Pol ga lok tin, "Moroa naba vasa u, nenu u ngan ta laxapla ro maxamang inbun la to xeneng i lok kapmek! Ut kis de xusu una mumu asu Lenavolo at ne Moroa la una rongga linga rak; ketla nenu xa u los polo Lenavolo at ne Moroa la ura tong i ridi do dina vasa ia!"

⁴Mo luvuttadi diga tu saparap ne Pol diga lok tin, “Nenu u paase kapmek ti lamaasa gomgo at ne Moroa!”

⁵Pol ga vorang i ridi, “Luvutnetak, nia axoklen i do neni lamaasa gomgo. Levelinga ik lok to xeneng at Lovoang Kaala i lok keretna, ‘U noxo vaase kapmek ti laradi gomgo at limixin.’”

⁶La ne Pol ga ven i do lentaba atdi na limixin nedi lubung Sadiusi la lentaba bok atdi nedi lubung Parisi, la ni ga vaase silok tinedi luvuttadi, “Luvutnetak, nenia la Parisi, la ne tamak bok, neni la Parisi. A tu at lavapaase mila nia aklen i do ne Moroa naba lox arooro amlong nedi diga met pam diba roo xat amlong.” ⁷Diga ronga i na, la lubung Parisi mi lubung Sadiusi diga edak kaxat, la diga epeseves ti legepu binam tadi. ⁸Mila lubung Sadiusi dik lok do limixin di noxo roo xat amlong basinge lanmet, la do kopmen tubung angelo mi labaroonan; ketla lubung Parisi di nuunu at na lavantun lempanga.

⁹Luxupkup go ga silok la lentaba luvuttadi loklox ase at Lenavolo, nedi at lenep at lubung Parisi diga xatu kaxat la diga vaase lolos, “Maxo vuse ka tavanga i lok kapmek at na laradi. Agut loroonan at na lorooro xopla laangelo mo ga paase rin!” ¹⁰Mo leedak ga lolos tinotno la leeme gomgo at limixin esep ga marat do limixin dina etep mi ne Pol la dina sev amer i. Kuren la ni ga tong i ri luvuttadi esep do dinat pas uto saparap mo limixin la dina lam ka ne Pol basinge di, la dina lok li i ro at loogu lolos.

¹¹Ap mo laxanimin Leeme Silok ga ru saparap ne Pol la ga lok, “Una lolos! Ura tong asu vam levelinga rak na de Jerusalem, la unaba tong asu box i to Rom.”

Leme Judaia Diga Tong Li Langas Ti Sev Amet Ne Pol

¹²Ga maxantamak suubu ap mo lara laaleng melemu, lentaba at leme Judaia diga rupot buru la diga tong li levempapaase. Diga xaape ri ne Moroa do di noxo an tempanga anan la di noxo in taxadan se dina sev amet ne Pol. ¹³Nedi axap diga epovo at lavanuet sangaun mo diga lok na lavapaase ri sev amet ne Pol. ¹⁴Kuren la diga vot pasa lavamaasa silok at luvuttadi laplavang la loxongkulao silok la diga lok, “Mara lok pam laxakaape saparap ne Moroa do nema axap ma noxo anan tempanga anan la ma noxo in taxadan se manaba sev amet ne Pol. ¹⁵Monga nemi eburu mi luvuttadi amgomgo mina lox aonon tevelinga ri leeme gomgo at limixin esep boro Rom kusu na lok taba nimi mi ne Pol; mina xarang i dola mi vara i xusu mina ronga levelinga ruturun mumu i. Ketla nema maba nemen gagas go mun auret ti sev amer i, mo neni xovisi noxo rupot nade.”

¹⁶Ketla lisixilik at ne Pol ga ronga mo lavapaase alii atdi; kuren la ni gat pas la ga beles to xeneng ap mo loogu lolos la ga tong na levelinga ri ne Pol.

¹⁷Kuren la ne Pol ga ro xaka lara laasesep la ga lok tin, “Una lok ka na laau radi uto at leeme gomgo at limixin esep; neni i ruuna levelinga xusu na tong i rin.” ¹⁸Mo laasesep ga lam ka i uto at leeme gomgo at limixin esep la ga lok, “Laradi xokoxo ne Pol i xup kaka ia la i sing ia xusu ana lam ka na laau radi ude saparav u, mila neni i ruuna levelinga xusu na tong i ru.”

¹⁹Leeme gomgo ga ranga tu at lekngen la ga lam ka i uto at loxot mimila la ga sue i, “Lai mo nu u lok do una tong i ria?”

²⁰La ni ga lok, “Leme Judaia di siam do diba sue u kantamak kusu una lok ka ne Pol uto saparap nedi axap luvuttadi amgomgo, diba xarang i dola luvuttadi amgomgo di vara i do dina ronga levelinga ruturun mumu i. ²¹Ketla nemen uta ronga res atdi, mila i vanuet sangaun la i soxope asu lenep bok mo diba lipe tangais i. Dira lok pam laxakaape saparap ne Moroa do di noxo anan tempanga anan la di noxo in taxadan, se dinaba sev amet ne Pol. Mo nga di gagas ti lox i, la di ngangais linga mun taram.”

²²Leeme gomgo ga lok, “Nemen uta tong i na ri tara do nenu ura tong pam i ria.” La ni ga sak tiki aonon i uto.

Leeme Gomgo Ga Lox Aonon Ne Pol Uto Saparap Ne Pelik

²³Leeme gomgo at luvuttadi esep ga ro xaka luasesep teren la ga lok tidu, “Muna lox agagas li tegepu sangaun kobot (200) luvuttadi esep la minat pas uto Sisaria, eburu mi lavanuti sangaun luvuttadi esep no dit kis at lemparos, la legepu sangaun kobot (200) luvuttadi esep mi levesoso, la mina gagas ti vas kaxat at lavasik konaleng at laxanimin. ²⁴Mina lox agagas li bok temparos tip kip ne Pol la lempanga ren, la mina lok ka atnaasan i uto saparap laradi gomgo ne Pelik.”

²⁵Kuren la leeme gomgo at luvuttadi esep ga malagan levelinga la ga lok keretna:

²⁶“Nenia ne Kolodias Lisias; a malagan na levelinga ru laradi gomgo ne Pelik ma lok ngangao rino ram. Nia a lox aonon lavapaase momo ru.

²⁷Leme Judaia diga ranga alis na laradi la diga lok do dina sev amer i. Agaklen ka ba i do na laradi neni lanat boro Rom. Kuren la nenia atat pas itinongo eburu mi luvuttadi esep tarak la mata lok ka i basinge di. ²⁸Ata vara i do anaklen tinotno ua lavasuun at lumukmusak atdi rin, kuren la nia ata lam ka i uto saparap luvuttadi amgomgo axap atdi. ²⁹Nia ata long lenger i do ni xopmen toxo lok tepanga xapmek kusu ni naba met nov i xopla ana lok li i at loogu xokoxo; lelinga dita lok li rin mumu mene Lenavolo atdi. ³⁰La lelinga i rupot tia do lentaba me Judaia mo di tong li leventaangas do ri sev amer i; kuren la mo a lox aonon soso i udom saparav u. Aba tong i ridi do dina lok li i at lavapaase ro melamgo ram.”

³¹Luvuttadi esep diga lox epovo levelinga at leeme gomgo. Diga lam ka ne Pol la diga emu eburu min ap mo laxanimin uto vaxalom at

lemenemen Antipatris. ³²Ap mo lara laaleng melemu, nedi luvuttadi esep mo digat pas at laxangka, digamlong uto at loogu lolos; diga on basinge no limixin mi lemparos kusu dina emu mi ne Pol. ³³Diga lam ka i uto Sisaria la diga raba lovoang mi levelinga loklox axasep ti laradi gomgo ne Pelik, la diga lok li ne Pol saparav i. ³⁴Laradi gomgo ga exes mo levelinga la ga sue ne Pol do ni meva. La ni ga ronga i do neni boro Silisia. ³⁵La ni ga lok, “Aba ronga linga ram do mo luvuttadi di lok li u at lavapaase dina rupot.” Kuren la ni ga tong i ri limixin loklok tatao do dina lok tatao ne Pol to at loogu silok at ne Erodes.

Leme Judaia Diga Lok Li Ne Pol At Lavapaase

24 ¹Melemu at lavalimo aleng lamaasa gomgo, ne Ananias gat pas uto Sisaria eburu mi lentaba at loxongkulao silok at limixin me Judaia, la lara leeme vapaase bok, laasen teren ne Tetalas. Diga ru ro melamgo at laradi gomgo ne Pelik la diga lok li lavapaase atdi ri ne Pol. ²Diga xup kaka ne Pol ukeneng ap mo loogu la ne Tetalas ga lok keretna, “Laradi silok ne Pelik! Loklok tatao ram tinama i lok li nama at langsung lumulum, la buaang lempanga loklok tooro mo nenu uga lox i ri limixin at lenep silok atnama. ³Ma lok momo aleng at na ro at lengkot axap at levenaleng getgesara, la ma tong avukat tinotno ru. ⁴Axo vara i do ana lox amolo u mi lempapaase rak, ketla a vara i do una ronga avukat na levelinga lixilik atnama.

⁵Maga ronga i do na laradi i lox araut lekarakat; ni ik paxaru kaxat levenesep to xantubu at leme Judaia no di nemen at lengkot axap at na lavatbung menemen; la neni lamgomgo at loxonbinam tadi laasen teren Nasarin. ⁶Neni ga lok bok pam do na lok puvula loogu laplavang, la maga xoxo xaka i. [Maga lok do mana lok li i at lavapaase kerekngan Lenavolo atnama i tong i. ⁷Ketla leeme gomgo ne Lisias ga rupot posiga nama la ga lam ka i basinge nama, eburu mi buaang limixin esep teren. ⁸Kuren la ne Lisias ga lok tinama do maba vaase mumu ne Pol to melamgo ram. Mo do una susue na laradi, nenu uba ronga i do levelinga rak i ruturun.”]

⁹La nedi axap leme Judaia diga lok tooro ne Tetalas at mo lavapaase la diga lok do mo levelinga ga ruturun.

Pol Ga Vorang Levelinga Atdi Ro Melamgo At Ne Pelik

¹⁰La ne Pelik ga lok loklok katling ti ne Pol kusu na vaase, la ne Pol ga lok, “Aklen i do nenu ugang tonga linga at na lenep silok at levenmaares buaang; kuren la nia a momo ri vorang levelinga atdi de melamgo ram. ¹¹Nenu xa uba long lenget ka i atdi do una sue di, do gat lasangaun mi legepura levenaleng ga xap pam, nia agat pas uto Jerusalem ti lotu saparap ne Moroa. ¹²Leme Judaia di goxo ven ia mi tara, do ma gita

epaase musak to xeneng at loogu laplavang, kopla a gita lox axatu lodoxoma at limixin to xeneng at laraugu singising kopla to ap mo lemenemen silok. ¹³Ketla dixo epovo do dina lox asuusu i do na levelinga atdi i ruturun. ¹⁴Ana tong i na ru. Nia a lotu saparap ne Moroa at lavalabat atnama keretna; a mumu asu mo langas di tong i do i xaxarang. Ketla a nuunu at levelinga diga malagan i at Lenavolo at ne Moses, la levenmamalagan at lavaeme vapaase alii. ¹⁵Nia a doxoma voovo ri ne Moroa xerekngan bok di, di nuunu do limixin axap, limixin avukat la limixin kapmek, diba roo xat amlong basinge lanmet. ¹⁶Kuren la a lolos amisik ti ke laxakapmek la ana nemen mokmokso at lemeren ne Moroa la limixin.

¹⁷Melemu at lentaba levenmaares aga nemen petpes basinge lemenemen Jerusalem, agat pas ugo ri xip ka lempilas tinedi limixin tarak mo dik pakes; la aga vara i do anaplavang saparap ne Moroa. ¹⁸Aga lox i na la aga lox epovo loklok tik lox adadat; la ned i na diga vosiga ia ro at loogu laplavang. Goxopmen bok timixin solo diga nemen eburu minia la goxopmen bok tekarakat ap mo loxot. ¹⁹Ketla leme Judaia boro at lenep Asia mo diga nemen go; ba lox avukat do ned i axa dina ru de melamgo ram la dina lok lavapaase, mo do di ruuna tevelinga xusu dina lok li i mavana rak. ²⁰Kopla i epovo do na limixin na di tu de, dina tong lavanga salai diga ven i rak, aga bilinga ren ap mo laaleng nia aga tu ro melamgo at luvuttadi amgomgo. ²¹Nia aga tu mun at legesa vanga. Nia aga xup lolos ap mo laaleng nia aga tu ro melamgo atdi xeretna, ‘Mi vaxaru ia at lavapaase mo lingina mila a nuunu do limixin no diga met pam diba roo xat amlong ti lorooro.’

²²Kuren la ne Pelik, gakleklen tinotno mo langas at Leeme Silok ga lox axap mo lavapaase. Ni ga lok tidi, “Aba ronga bok ba na levelinga melemu, la aba lok axav i, mo do leeme gomgo at limixin esep ne Lisias na rupot.” ²³Ni ga tong i ri laradi loklok tatao at ne Pol do ni nak lok maxopok at loklok tatao at luvuttadi rutu mu, ketla dina raba i mi tevengkonalleng tin kusu na vas tangtagap la dina siam abeles larapen tangas teren kusu dina raba i mi tempanga i epovo at lavakpakes teren.

Pol Ga Ru To Melamgo At Ne Pelik Mi Ne Darusila

²⁴Melemu at lentaba levenaleng Pelik ga rupot mi latkin teren ne Darusila, neni boro Judaia. Pelik ga tong mu ri ne Pol do neni na vubeles la ni ga ronga ne Pol ga paase mumu lunuunu at ne Iesu Karisito. ²⁵Ketla ne Pol ga paase mumu luruvtuvuk avukat, la loklok ti lok tatao avukat lodoxoma, la laaleng at ne Moroa naba lok li limixin at lavapaase, la ne Pelik ga marat aleng tinotno la ga lok, “I epovo nga. Aba ro xaka bok ba u do nia ana ruuna bok ba taaleng.” ²⁶Pelik ga vara ri tempilas boro at ne Pol la ni ga tong i rin do ni naba soxomus asu ne Pol mo do neni na raba i

mi tuunun; kuren la ni gap kup kaka amisik ne Pol la ga paase mumu mo luunun ti un asu i.

²⁷Melemu at legepu maares gara volo, Pokias Pestas ga lok ka loxot at ne Pelik ngan laradi gomgo ap mo lenep silok. Pelik ga vara i do na lox atdan lodoxoma at leme Judaia, kuren la ni ga ke xepe ne Pol to at loogu xokoxo.

Pol Ga Sing Do Dina Lox Aonon I Uto Saparap Ne Kaisar

25 ¹Pestas ga rupot go Sisaria, la melemu at lavantun aleng ga volo i, neni ga vas kaxat me go Sisaria la ga rupot to Jerusalem. ²Mo go lavaeme silok la luvuttadi amgomgo at leme Judaia diga lok li levelinga atdi mumu ne Pol. ³Diga sing lolos ne Pestas kusu na lok tavanga avukat tidi la na lox aonon ne Pol uto Jerusalem, mila diga lok li vam levelinga do diba sev amer i do neni na vas polo go at langa. ⁴Pestas ga vorang i xeretna, “Pol mo i nemen at loxokoxo to Sisaria, la nenia axa abamlong soso bok ugo. ⁵Mina riki tentaba at luvuttadi amgomgo atnimi xusu dinat pas uto Sisaria eburu minia la dina lok li lavapaase mumu mo laradi go, mo do neni gara lok pam tavanga xapmek.”

⁶Pestas ga nemen eburu minedi at lavanuan aleng koplā i sangaun aleng, la neni gamlong uto Sisaria. Ap mo lara laaleng melemu ni gat kis to at loxot tongtonga linga; la ga tong mu ri ne Pol kusu na beles uto xeneng saparav i. ⁷Pol ga rupot, la leme Judaia no diga vas kaxat boro Jerusalem diga ru xangkan i la diga lok li laxampapaase lolos mumu i; ketla kopmen di goxo lox asuusu i do levelinga atdi ga ruturun.

⁸La ne Pol ga lok keretna, “Axo lok kapmek tempanga mumu Lenavolo at leme Judaia, koplā loogu laplavang koplā at ne Kaisar.”

⁹Pestas ga vara i do na lox amomo leme Judaia, kuren la ni ga sue ne Pol, “U vara box i do unat pas uto Jerusalem la una ru ro melambo rax e la nia ana ronga na levelinga di lok li i ram?”

¹⁰Pol ga lok, “A tu na de melambo at loxot tongtonga linga at ne Kaisar; at na loxot mun miba ronga linga rak. A goxo lok kapmek tempanga at leme Judaia; kerekngan nenu ukleklen avukat tinotno i. ¹¹Dola nia agara los polo vam Lenavolo la agara lok pam tavanga xusu nia anaba met nov i, i lox avukat mene; a noxo sing do aba sixiro basinge i. Ket do na levelinga di lok li i rak kopmen na ruturun, ixo epovo do tara na song araba ia uto atdi; a vara i do una lox aonon ia uto at ne Kaisar.”

¹²Pestas ga epaase eburu mi limixin papaase ren la ni ga lok, “Ura sing pam do ubat pas uto at ne Kaisar, kuren la nenu uba vot posiga i.”

Pestas Ga Soxomus Lavapaase Mumu Ne Pol

¹³Melemu at lentaba levenaleng gara volo la loorong silok, ne Agripa eburu mi neinen, laasen teren ne Benis duga rupot to Sisaria xusu duna ven ti ne

Pestas la kusu duna vaase momo rin. ¹⁴Duga nemen go Sisaria at levenaleng buaang, la ne Pestas ga paase mumu ne Pol ti mo loorong silok keretna, “Lara laradi i nemen at loxokoxo, no ne Pelik ga on basinge i. ¹⁵Nia agat pas uto Jerusalem, la lavamaasa silok la loxongkulao silok at leme Judaia diga lok li levempapaase rin la diga sing ia xusu ana lok li lumumuat teren.

¹⁶Ketla nia aga tong i ridi do nedik limixin boro Rom kopmen dik tana song araba gamasa taradi uto ri lanmet. Neni naba epen etang mi mo laradi nedu gi edak, kusu neni bok naba ronga levelinga ren la na vorang i. ¹⁷Mo luvuttadi silok diga rupot de, la nia xopmen a goxok lok sila; ap mo mun lara laaleng melemu aga xis to at loxot tongtonga linga la aga tong i ri laradi esep kusu na lox abeles ne Pol ukeneng. ¹⁸La nedi mo limixin diga lok li i at lavapaase; diga xatu upana, kusu dina vaase; la nia aga nua i do diba vaase mu i mi taxapmek. Ketla di goxo lox i. ¹⁹Diga ruuna mun levesusue eburu min mumu leventaangas at lotu atnedi la mumu bok lara laradi laasen teren ne Iesu, no gara met pam; ne Pol ga lok do neni mo i rooro. ²⁰A goxo epovo do anaba lok ka tevelinga mumu na lavanga; kuren la aga sing ne Pol kusu ni nat pas uto Jerusalem, la ana ronga mo lavapaase ren go. ²¹Ketla ne Pol ga sing do ni na nemen maxopok at loklok tatao rak na de Sisaria, la ne Kaisar axa naba ronga linga ren. Kuren la aga tong i ri luvuttadi esep kusu dina lok tatao avukar i se nia aba lox aonon i uto at ne Kaisar.”

²²Agripa ga lok ti ne Pestas, “A vara i do nenia xa aba ronga linga bok ap mo laradi.”

Pestas ga vorang i xeretna, “Uba ronga linga ren kantamak.”

²³Kuren la ap mo laaleng melemu Agripa la ne Benis duga rupot mi lisanang avukat atdu, la limixin diga lok ngangao aleng atdu. La duga beles to xeneng at loxot tongtonga linga ua luvuttadi amgomgo at limixin esep la limixin silok ap mo lemenemen digat kis tangais i ve. La ne Pestas ga tong mu ri ne Pol la limixin esep diga lox abeles i ukeneng.

²⁴Pestas ga lok, “Loorong silok ne Agripa, la nemi axap mik lox eburu minama; mina ven na laradi ne Pol! Limixin me Judaia nade la boro bok Jerusalem diga raba linga ia mumu i. Diga paase lolos do ni naba met. ²⁵Ketla a goxo vuse ka tempanga do ni ga lok kapmex i xusu ni ba met nov i. Ketla neni xa ga sing ti ne Kaisar; kuren la nia a doma li vam i xusu ana sak tiki ne Pol uto saparav i. ²⁶Ketla axo vuse ka tevelinga loklox axasep teren kusu ana malagan i uto ri leeme gomgo atdik ne Kaisar. Kuren la ana lok li i uto melamgo atnimi la to melamgo ram, ne Agripa! Kuren la, melemu at na lavapaase, aba malagan tevelinga. ²⁷Mila ixok mokso do ana riki gamasa taradi xokoxo la xopmen tavapaase axasep ti levelinga diga lok li i ren.”

Pol Ga Vorang Lavapaase Ro Melamgo At Ne Agripa

26 ¹La ne Agripa ga lok ti ne Pol, “I lox avukat do una lok lavapaase ram.”

Pol ga sep makmak di, la ga lok keretna, ²“Laradi silok ne Agripa, a vara na tong i do a lok momo mila ana lok bok lavapaase rak de melamgo ram na lingina, la ana vorang levelinga at leme Judaia diga lok li i rak. ³Ana i ruturun mila nenu ukleklek tinotno leretere la levenekarakat ik lok kantubu atnedi leme Judaia. A sing nimi na, do mina xis atnaasan la mina rongia ia.

⁴Buaang atnedi leme Judaia diklen avukat lorooro rak ga vaxaru xaka i at laau rak. Diklen avukat luruvtuvuk tarak ga lok kereva to at lemenemen tarak la to bok Jerusalem. ⁵Buaang levenmaares digakleklek ia. La nanga dikleklek i do aga nemen keneng at lara libinam tadi at lotu atnama mo di mumu asu aleng Lenavolo. Di tong nedid do lubang Parisi. Di epovo do dina tong i do na levelinga rak i ruturun, mo do di vara i. ⁶La na a tu nade at lavapaase atla a ngangais ne Moroa do ni ba lox empana laxakaape ren ga lox i ri lavalabat atdik. Na laxakaape ri lox axatu limixin basinge lanmet la diba vubeles at Linintoo at ne Moroa. ⁷La lasangaun mi legepura levenabung mixin atnama di ngangais ne Moroa xusu naba lox epovo na laxakaape ren tidi la dina lotu saparap amisix i at levenaleng axap. La mumu vam i na laxakaape, la leme Judaia, limixin tino rak, dia lok li ia at lavapaase! ⁸Tila ba, i lolos aleng tinimi xusu nemi mina nuunu do ne Moroa i epovo naba lox arooro amlong limixin diga met pam?

⁹Ganoxa nenia bok aga doxoma i do ana lok lempanga axap kusu ri ru pe lugugu at ne Iesu boro Nasaret. ¹⁰Aga lok na lempanga ro Jerusalem la aga lok ka levelinga lolos boro at lavamaasa silok kusu ana lok li limixin buaang at ne Moroa ro at loogu xokoxo; se diga lok do dina sev amet di, la nenia bok aga sisiam do dinap sev amet di. ¹¹Buaang laxanaleng agak lox asongot di ro xeneng at laraugu singising, la agak lok di xusu dina tong i do di xopara ri ne Iesu. Agak musak aleng tinotno di, kuren la agat pas bok uto vaxalom at lara menemen petpes kusu anak lox asongot nedid.

Pol Ga Ven Kibis Ne Iesu Ro At Langas

(Gu 9:1-19; 22:6-16)

¹²La kerepmo agat pas uto Damasko mi lavapaase axasep boro at lavamaasa silok, diga raba ia mi lisisiam. ¹³Mo go mun ap mo langas ga xanangking tubu, aga ven lababao gamgames aleng, ga soso boro vana at laxalibet; laxasep teren ga volo laxasep at laxangking la ga ngao pavaa ia eburu minedi luvuttadi diga emu minia. ¹⁴Nema axap maga subu ukopok at laxangka, la aga rongia laxaka at lara ga vaase Ibru ria, ga lok keretna, “Sol, Sol! Tila uk lox asongor ia? Uk lox asongor axa u xerekngan lodongki i rubut alu mi laxangkedek teren la kerepmo i lok asongor i at loxonuna at laradi loklok tatao ren!’

¹⁵Aga sue, ‘Leeme Silok, nenu nege?’

La Leeme Silok ga lok, ‘Nia ne Iesu, mo nenu uk lox asongor ia. ¹⁶Ketla una xatu kaxat la una ru mi luxangkedek taram. Ana ara vot asaxaven pam tu xusu ri soxolik ka u, i ngan lasaxaruki rak; nenu uba tong asu na lavanga nenu u ven i rak lingina ri lentaba vetpes la lempanga bok aba lox ase u min melemu. ¹⁷Aba lox arooro u basinge limixin me Judaia la basinge bok limixin kopmen di me Judaia, nia aba riki u saparap di. ¹⁸Nenu uba suang lodoxoma atnedi la uba sat kaka nedi basinge lamain at ne Satan uto at laxasep at ne Moroa, la basinge lolos at ne Satan uto saparap ne Moroa, kusu dina nuunu rak. La kerepmo ne Moroa naba doxoma xepe leveloklok kakapmek atnedi la dinaba ruuna ka loxot tidi xantubu ap mo limixin ne Moroa ga soxolik ka vam di.’

Pol Ga Vaase Asu Lugugu Ren Ngan Laradi Vavang

¹⁹Kuren la laradi silok ne Agripa, a goxo ronga xepe mo lisilimet aga ven i boro vana at laxalibet. ²⁰Aga vavang avot to Damasko la to bok Jerusalem, la melemu bok to at lengkot axap Judaia, la kantubu bok at limixin kopmen di me Judaia; aga vavang do dina leeng basinge laxakapmek atnedi la dina mumu asu ne Moroa la dina lok lempanga ri lox asuusu i do dira leeng pam. ²¹Lavasuun mun at nai la leme Judaia diga ranga alis ia ro at loogu laplavang, la diga lok do dina sev amer ia. ²²Moroo ga lok tooro aleng ia ise at na laaleng lingina; kuren la nia a ru na de, a tong asu levelinga ruturun tinemi axap, limixin gamasa la limixin silok. La na levelinga rak nia a tong asu i, i epovo mi levelinga at lavaeme vapaase alii la ne Moses, nedi diga tong i do na lempanga naba vot. ²³Diga tong i do Lanarong naba xip losongsongot la neni lara avot naba roo xat amlong basinge lanmet, kusu ri vaase asu langas ti lok ka lorooro ri leme Judaia la ti limixin kopmen di me Judaia.”

²⁴Pol move ga paase la ne Pestas ga xup tin keretna, “U baulang nom, ne Pol! Langsangan lakleklen taram i lox u la ura baulang!”

²⁵Pol ga vorang i rin keretna, “Leeme silok! Nia xopmen ana baulang. Na levelinga rak i ruturun la ik mokso. ²⁶Loorong silok ne Agripa! Ana vaase ru mi lolos la kopmen a noxo marat, mila nenu u xasep at na lempanga mumu ne Iesu. Nia a lok do nenu u xasep at na lempanga axap, mila na lempanga xopmen goxo ravasu ro at toxot lipe. ²⁷Kereva, u nuunu at levelinga at lavaeme vapaase alii? Aklen i do nenu u nuunu xuren!”

²⁸Agripa ga lok ti ne Pol, “Kereva, at na mun loxonaleng la u lok do una lox ia ngan laradi nuunu?”

²⁹Pol ga lok, “At na loxonaleng koplaxonaleng melemu, lisingising tarak ti ne Moroa do nenu la nedi axap nom ding tonga ia mo lingina, diba nuunu at ne Iesu xerekngan ia, ketla di noxo nemen at loxokoxo ngan ia.”

³⁰La ne Agripa, la laradi gomgo ne Pestas, la ne Benis, la nedi bok lentaba vetpes diga xatu kaxat. ³¹La diga vas su la diga lok tinedi getgesara xeretna, “Na laradi ixo lok kapmek tepanga xusu ni naba met nov i xopla na nemen at loxokoxo.”

³²La ne Agripa ga lok ti ne Pestas, “I epovo xusu ata lox asu na laradi mo do ni xopmen goxo sing ti ne Kaisar kusu na ronga linga ren.”

Limixin Esep Diga Lok Ka Ne Pol Uto Rom

27 ¹Lavaeme silok diga tong li levelinga rinama xusu maba sen kaxat mi lavattaaxup uto Itali at lemenemen silok Rom, la diga lok ka ne Pol la lentaba limixin kokoxo bok uto saparap ne Julias, neni laasesep at limixin esep boro Rom diga tong nedi do, “Limixin esep at ne Kaisar.” ²Nema mi ne Pol maga los kas at lavattaaxup boro Adramatiam, mo ga gagas kusu na sen kaxat uto at levesoolom at lenep silok Asia, la maga sixit kaxat. Aristakas, neni boro Masadonia at lemenemen Tesalonia, neni ga emu eburu minema.

³Ap mo lara laaleng melemu maga rupot to Sidon; Julias gak lok loklox avukat aleng ti ne Pol la ni ga siam ti ne Pol kusu ni nat pas la na ven larapen tangas teren, kusu diba raba i mi levempanga salai neni gak pakes tin. ⁴Maga sen kaxat basinge mo lenep, la maga sesen uto melemu ap mo losoxan Saipras kusu lamanman noxo mas tangarang lavattaaxup. ⁵Maga volo laras saparap lenep Silisia la Pampilia, la maga vot to Mira at lenep Lisia. ⁶Mo go laasesep ga ronga i do lara lavattaaxup boro Aleksandria mo ga lok do na sen kaxat uto Itali; kuren la ni ga lox aurut nema uto vana ren. ⁷Maga sesen sila at laxanaleng buaang, ga lolos aleng tinama xusu mana sesen saparap lemenemen Kinidas; la ma goxo lox epovo i xusu mana mu mo lenep tas mumu langsung lamanman. Kuren la maga sesen epopolo uto melemu at losoxan Krit, maga volo lungusungus laasen teren Salmoni. ⁸Maga sesen auret tinotno ro loxon, la lavatpas ga lolos aleng ketla maga vot to at lara loxot diga tong i do Losoolom Avukat; goxo vaxalom bok boro at lemenemen silok Lasia.

⁹Maga nemen at lentaba levenaleng mo go, ga lolos tinotno rinama ri sen mi lavattaaxup, mila leven gaaling at lamanman ga rupot pam la laras ga repit aleng. Laaleng at ne Moroa ti mun anan no gara volo vam, neni laaleng ga lok katling laxakatu kaxat at leven gaaling at lamanman. Kuren la ne Pol ga vaase aronga di. Ni ga lok keretna, ¹⁰“Nemi limixin, a ven i do lavatpas atdik mede la uto, naba lok kapmek tinotno; langsung lumumuat naba vot saparap lempanga atdik la ti lavattaaxup bok, la ti lороoro bok atdik.” ¹¹Ketla laasesep ga mumu asu levelinga at laradi gang tanga lisitia ap mo lavattaaxup la at laradi gam gomgo ap mo lavattaaxup, la kopmen ni goxo nuunu at levelinga at ne Pol. ¹²Mo losoolom kopmen goxo lox avukat tinama xusu mana nemen teren ap mo

leven gaaling at lamanman; kuren la buaang atnedi diga lok do dina sen kaxat mi lavattaaxup la dina sen epopolo uto Pinisia mo do dina epovo. Ni lara losoolom to Krit ga nemen alipe at lamanman la diba nemen go at leven gaaling at lamanman.

Langsangan Lamanman Ga Rupot To At Laras

¹³Lamanman kakalik borou ga mas kaxat, la limixin diga lok do naba lox avukat mun mo lavatpas atnedi; kuren la diga rep aurut laaga la diga sen auret tinotno ro loxon at losoxan Krit. ¹⁴Ketla soso mun mo lamanman lolos ga mas kaxat boro at losoxan. Limixin diga so asen mo lamanman mi lamanman silok borois mero xopok. ¹⁵Ga mas lolos mo lavattaaxup la lavattaaxup goxo epovo xusu na sixit tangarang mo lamanman. Maga molo ri lok tong pen i la maga ke xepe i la lamanman gat mas aonon lavattaaxup atnama. ¹⁶Maga sesen alipe ro melemu ap mo losoxan kakalik, laasen teren Koda; ga lolos aleng kusu mana lok li avukat lese pang kakalik mo maga sasar i go melemu at lavattaaxup. ¹⁷Maga xip aurur i la maga dos alis lavattaaxup mi lempatkua. Diga marat aleng mila lavanga dina sixit mavana at laxangkaneng at lenep Libia la lavattaaxup na reporok; kuren la diga lox asi laaga ap mo lavattaaxup la maga ke lavattaaxup, lamanman gat mas aonon gamasa i. ¹⁸Mo langsangan lamanman ga lolos aleng tinotno; kuren la ap mo lara laaleng melemu diga lok kaxar i xusu dina lu asi mi lempanga go vana ap mo lavattaaxup ukopok ti laras. ¹⁹La ap mo manga lara laaleng melemu diga lu asi mi lempanga gugu ap mo lavattaaxup. ²⁰Buaang laxanaleng ma goxo ven laxangking mi laxampenti, la lamanman mo gat mas lolos aleng, maga nua i do nema axap ma noxo roo suu.

²¹La buaang laxanaleng mo limixin di goxo anan la ne Pol ga ru ro melamgo atdi la ga lok, "Nemi loxongkulao, nemi mi goxo mumu asu levelinga rak la taga sen kaxat boro Krit; do mi gita rongga res tarak, dik gixo ekip tangarang mi na lumumuat. ²²Ketla na a sing nimi do mina lolos! Kopmen teta atnimi naba met. Ketla lavattaaxup kujuk mun naba lok kapmek. ²³Nia aklen i na mila at laxanimin laangelo boro at ne Moroa no nenia ateran la a lotu saparav i, i vot pasa ia. ²⁴La i lok tia xeretna, 'Pol! Nemen uta marat gat. Uba tu ro melamgo at ne Kaisar; la ne Moroa i balamu nimi la i siam pam do nedi axap at lavattaaxup dinaba roo suu.' ²⁵Kuren la nemi limixin mina lolos mila nia a nuunu at ne Moroa do ni naba lox epovo lempanga xerekngan ni i tong pam i ria. ²⁶Ketla lamanman ba rev aoso lavattaaxup uto loxon at lara losoxan."

²⁷At laxanimin at laaleng sev asangaun mi lavanuet at lamanman gap kiv aonon nema ro at laras Adaria. At laxanimin tubu luvuttadi loklok tatao ap mo lavattaaxup diga nua i do nema mo maga sesen auret ta uto loxon. ²⁸Kuren la diga lu asi mi luxua, losoxovo ga nemen teren la maga

long lenger i do mo laras ga epovo at legesa sangaun kobot mi legepu sangaun (120) lababaalom teren ukopok; melemu xakalik diga soxovo manga i la diga long lenger i do ga vasik sangaun lababaalom teren ukopok. ²⁹Diga marat aleng mila lavattaaxup naba ebaa ro at laxanuut; kuren la diga lox asu lavanuet lemparaga ro melemu at lavattaaxup la maga sing kusu laxangking na losu.

³⁰Luvuttadi loklok tatao ap mo lavattaaxup diga lok do dina sixiro basinge lavattaaxup; diga lox asi lesebang kakalik uto xopok at laras la diga lok poovo i do dina lok li laxanaga ro melamgo ap mo lavattaaxup. ³¹Ketla ne Pol ga lok ti laasesep eburu mi limixin esep keretna, “Mo do na luvuttadi loklok tatao di noxo nemen de vana at lavattaaxup, nemi xopmen mi noxo roo suu.” ³²Kuren la limixin esep diga ra korop luxua no gang tanga mo lesebang lixilik la ni ga sen su basinge di la uto nga.

³³Laxangking mo ga lok do na losu nga, la ne Pol ga sing nedo axap kusu dina an tempanga anan. “Migak lok bukbulu la miga nemen gamasa at lasangaun mi lavanuet aleng ta, la at na axap levenaleng mi goxo anan tempanga anan. ³⁴A sing nimi, do monga mina an tempanga anan; mik pakes tin kusu kopmen tara atnimi noxo met la kopmen tara atnimi noxo seeve.” ³⁵Melemu at na lavapaase ren, Pol ga lok ka lengkongkide, la ga tong avukat ti ne Moroa ro melamgo atnedo axap, la ga sebex i la ni ga an kaxat. ³⁶Diga lok ka lolos at levelinga at ne Pol, la nedo getgesara bok diga an bok lempanga anan. ³⁷Leexes atnama ga epovo at legepu sangaun kobot mi lavanuti sangaun mi lavanna (276) mo maga nemen go vana at lavattaaxup. ³⁸Melemu atnedo diga an mais, diga lu asu mi laxampiao uto xopok ti laras kusu lavattaaxup naba balalak.

³⁹Laxangking ga losu la luvuttadi loklok tatao ap mo lavattaaxup di goxo ven kibis mo losoxan. Ketla diga ven lara losoolom mi laxangkaneng teren la diga doxoma i do, mo i epovo, diba sen oso mi lavattaaxup atdi uto at laxangkaneng.

⁴⁰Kuren la diga ra korop asu lemparaga la diga ke nedo diga dong si ukopok at laras; la ap mo mene loxonaleng diga soxomus lara kua no diga xoxo alis mo lisitia min. Diga lox aurut labantamon to melamgo at lavattaaxup kusu lamanman naba mas aonon lavattaaxup, la na sen epopolo uto loxon. ⁴¹Ketla lavattaaxup ga so ru ro mavana at laxangkaneng, la ga xis tino nga, no melamgo at lavattaaxup ga ebaa la goxo epovo ri sen bilong uto melemu la lara paxanao ga saava vovorok axakalik mo lavattaaxup.

⁴²Limixin esep diga lok lodoxoma xusu ri sev amet luvuttadi xoxoxo, kusu di noxo box oso uto loxon la dina sixiro. ⁴³Ketla laasesep ga vara i xusu na lox arooro ne Pol, kuren la ni ga vaase vepe di do nemen di guta lox i mo. Ni ga tong i rinedo digakleklen ti xobok kusu dina los su boro at lavattaaxup la ukopok la dina bok oso uto loxon. ⁴⁴La nedo di goxo epovo

ri xobok, diba mumu mi lengkonuna ga tepovorok ap mo lavattaaxup. La kerepmo nema axap maga rupot avukat to loxon.

Pol Ga Nemen To Malta

28 ¹Maga rupot avukat go loxon, la maga long lenger i do mo losoxan laasen teren Malta. ²Limixin mego diga lok tooro avukat nama. Larakabu mo ga vot kaxat la maga mudut aleng tinotno; la diga xip kaka lengkumut la diga mas antos laxao la diga lox avukat tinotno nama. ³Pol ga lok ka lengkonuna la ga lok li i ro at laxao la lara lisii ga sixisu ukamang, basinge lengkonuna mumu liplivi ap mo laxao la ga at avarang at lekngen ne Pol. ⁴Limixin ap mo losoxan diga ven mo lisii ga merem to at lekngen ne Pol la diga lok tinedi getgesara xeretna, “Na laradi neni laradi sepsev amet tadi, kuren la ne Moroa noxo lok arooro i, keke i do ni goxo seeve ro at laras.” ⁵Ketla ne Pol ga semla xepe mo lisii uto at laxao la tavanga xapmek goxo rupot saparav i. ⁶Diga ngangais mo lekngen ne Pol do naba dang kaxat koplā neni na subu la na met. Ketla melemu diga ngais babaalom aleng la kopmen di goxo ven tepanga xakapmek ga vot saparav i, kuren la diga ba gili lodoxoma atdi la diga lok, “Neni lomoroa.”

⁷Goxo vaxalom at loxongkangka at laradi silok ne Pabilias, neni laradi gomgo ap mo losoxan. Ni ga lok tooro aleng nama, la at lavantun aleng maga nemen ngan lavaose ro at loogu ren. ⁸Temen ne Pabilias mo gak midi at loora, ni gak meres aleng mi liplivi la lebelen dedele. Pol ga beles uto xeneng at loogu ren, ga sing, la ga lok li lukngen to mavana ren, la ni ga lox avukat ta. ⁹Mo limixin diga ven i na la diga lok ka bok nedi limixin mekmeres me go ap mo losoxan uto saparap ne Pol la ni ga lox aroo nedi. ¹⁰Diga lok ngangao aleng atnema la diga raba nema mi buaang leventamtaba. Melemu at lavantun gaaling ga auret do mana sixit kaxat mi lavattaaxup la diga lok li lempanga rinama ro vana at lavattaaxup, diga raba nama mi lempanga ri mo lavatpas atnema.

Pol Ga Vas Kaxat Boro Malta Uto Rom

¹¹Maga nemen go at lavantun gaaling la maga sen kaxat mi lavattaaxup boro Aleksandria, laasen teren, “Luxalaisang Moroa.” Mo lavattaaxup ga nemen go ap mo losoxan at leven gaaling at lamanman. ¹²Maga rupot to at lemenemen silok Sirakus la maga nemen go at lavantun aleng. ¹³Maga sen kaxat manga mego la maga rupot to at lemenemen Regiam. Ap mo laaleng melemu lamanman avukat ga vot, la at mo manga lara laaleng melemu maga rupot to at lemenemen Putioli. ¹⁴Maga long lenget lentaba luvuttadi nuunu mo go la diga sue nama xusu mana nemen eburu minedi at lavanuti aleng. La magak lox amisix i xuren at lavatpas atnama uto Rom. ¹⁵Luvuttadi nuunu ro Rom diga ronga i do nema maga vot la digat

pas epolo uto at lenep etang at ne Apias la uto at lemenemen laasen teren Lavantun Laraugu kusu ri ekip tangarang minama. Pol ga ven di la ga tong avukat ti ne Moroa la lodoxoma ren ga lolos ba.

Pol Ga Ekip Tangarang Mi Leme Judaia Ro Rom

¹⁶Maga rupot to Rom, la diga siam do ne Pol na nemen kujuk la lara laradi esep na lok tatao i.

¹⁷Melemu at lavantun aleng Pol ga xup bubua ka luvuttadi amgomgo at leme Judaia. Diga rupot buru, la ne Pol ga lok tinedi, “Luvutnetak! A goxo lok tepanga xapmek mumu limixin atdik kopla leretere at lavalabat atdik. Ketla diga lok li ia at loxokoxo ro Jerusalem la diga song araba ia uto at limixin me Rom. ¹⁸Diga susue ia la diga lok do na soxomus asu ia, mila diga long lenger i do nia xopmen a goxo lok kapmek tepanga xusu nia aba met nov i. ¹⁹Ketla leme Judaia di goxopara i do dina soxomus asu ia la nia aga sing kusu uto ia at ne Kaisar kusu na ronga linga rak. Nia aga lox i nom ketla nia a goxo lok li tevempapaase mumu rinedi mo limixin me Judaia. ²⁰Kuren la aga sing kusu ana ven nimi la ana epaase eburu minimi; nia a nemen at loxokoxo mila a nuunu at Lanarong, mo nedik limixin me Judaia ta nemen tangais i.”

²¹Diga lok tin, “Maxo ruuna tevelinga loklox axasep boro Judaia mumu u, kopla tara atnema me Judaia ga laa me go mi tevelinga, kopla gita tong tevelinga xapmek mumu u. ²²Ketla ma vara i do mana ronga levelinga ram, mila ma ronga i do at lengkot axap limixin di paase mumu nom libinam tadi nenu uk lok teren.”

²³Kuren la diga lok katling lara laaleng eburu mi ne Pol, la buaang limixin diga vot ap mo laaleng to ap mo loogu ne Pol ga nemen teren. Ga maxantamak suubu se at laxanimin neni ga soxomus lavasuun at levelinga at Linintoo at ne Moroa rinedi. Ni ga lok tong pen i do na sat ka lodoxoma atdi mi levelinga ma xeneng at Lenavolo at ne Moses la levenmamalagan at lavaeme vapaase alii xusu diba nuunu at ne Iesu. ²⁴Lentaba atnedi diga nuunu at levelinga ren, ketla lentaba xopmen di goxo nuunu. ²⁵Kuren la diga vas kaxat basinge i mila levendoxoma atnedi ga ekarakat melemu at levelinga at ne Pol. Ni ga tong i ridi xeretna, “Loroonan Kaala ga vaase ruturun at lungusno at leeme vapaase alii ne Aisaia tinedi lavalabat atnemi. ²⁶Ni ga lok,

‘Uto u la una lok tinedi nom limixin keretna, mibang tonga, ketla mi noxo xasep teren; miba reven, ketla mi noxo ven kisiv i. ²⁷Mila levendoxoma atnedi na limixin ira rebonot pam, dira lok pe vam levenbaalung atnedi. La dira vampe vam levengkatli atdi. Naba lok kapmek do dina ven mi levengkatli atdi; la dina ronga mi levenbaalung atdi, la levendoxoma atdi nakleklen, la dina rem gili saparav ia, la nia ana lox avukat nedi.”

²⁸La ne Pol ga lok bok, “Minaklen avukar i do, levelinga loklox arooro at ne Moroa diga lox aonon pam i uto at limixin kopmen di me Judaia. Dibang tonga i.” ²⁹[Melemu at ne Pol ga tong i na, leme Judaia diga on basinge i, la diga epaase mukmusak aleng kantubu atdi.]

³⁰Ga legepu maares Pol ga nemen mo go ap mo loogu neni ga unun amisix i, la gak lok momo aleng tinedi digat posiga i. ³¹Ni ga vavang mi Linintoo at ne Moroa la ga vanasa bok mi laasen at Leeme Silok, ne Iesu Karisito la kopmen tara goxo ru pe lugugu ren; ni ga paase mi lolos la kopmen gita marat.

Rom

Lovoang At Ne Pol Ti Limixin Nunu to Rom

Levelinga Loklox Axasep

Lamaares 58 A.D.

Anai ni lovoang at ne Pol ga malagan i rinedi limixin nuunu diga nemen to Rom. Pol gak lok to Korin la ni ga malagan na lovoang, la melemu neni ga raba lara loono min, laasen teren ne Poebe, la neni ga lok ka na lovoang uto at lemenemen silok Rom gak lok at lenep silok Itali. At mo levenmaares lara laradi mo gat kis sisilok ti limixin to Rom diga so asen i do ne Kaisar. Amo lemenemen ni lemenemen silok. Pol ga vara i xusu na lox ase dik do nedik axap limixin ata gara xapmek pam at lemeren ne Moroa, la ixo epovo do nedik atabak mokso at leven gugu atdik koplak leveloklok nunuan atdik. Mo dola nedik ata nuunu mene at ne Iesu Karisito, Moroa naba lox asepmus nedik basinge laxakapmek atdik la neni naba doxoma xape laxapmek atdik. Pol ga vara i xusu neni nat pas uto Rom la nak lok go mi levempavang teren. Mo limixin nuunu lentaba atnedi, boro Judaia la lentaba atnedi, nedi limixin Grik.

Lengkot silok at lovoang Rom:

- 1:1-17 Lavasuun teren la ne Pol ga malagan i na lovoang.
- 1:18-3:20 Kopmen teta naba lok ka lorooro mi lololos axa ren.
- 3:21-4:25 Lavatturunen ti lok ka lorooro ni lunuunu mun.
- 5:1-8:39 Lixitkis la lavatpas atnedi di lok ka lorooro maxat.
- 9:1-11:36 Moroa naba ro ka amu manga limixin me Israel.
- 12:1-15:13 Lorooro at laradi nuunu.
- 15:14-16:27 Lavapaase momo la levelinga loklox axap.

Lavapaase Axasep

1 ¹Nenia ne Pol, lasaxaruki at ne Iesu Karisito, la nia luun pavang, ne Moroa ga soxolik ka ia la ga ro ka ia xusu ana vavang mi Lagale Lavavang teren. ²Na Lagale Lavavang ne Moroa ga vaase alii min ganoxa at levenngusno atdi lavaeme vapaase alii ren, la diga malagan li i xeneng at Lovoang Kaala, ³mumu ne Nitna ni Leeme Silok atnedik ne Iesu Karisito ni ga nemen ngan laradi mede at na lavatbung menemen, diga visix ka i at livipisik li at ne Devit. ⁴Ti loklok teren i xaala aleng, ne Iesu ga lok kaka laasen do Nitna ne Moroa at loxonaleng ni ga roo xat amlong basinge lanmet mi langsung lololos teren. ⁵Keneng mun at ne Iesu la ti lox aurut laasen teren, Moroa ga raba ia mi letaba nabalamu ren kusu nia ana ru katling i ri lok lugugu ngan laradi vavang at ne Karisito, la ana sasar asu ka limixin boro xamang at limixin kopmen di me Judaia, kusu dinaba nuunu ren la dinang tonga res teren. ⁶La nemi bok limixin dom Rom, ne Moroa gara ro xaka vam nimi ri ne Iesu Karisito.

⁷Nia a malagan na levelinga rinemi axap mi nemen dom Rom, Moroa i balamu nimi la ga ro xaka nimi do nemi limixin teren.

Letaba nabalamu la lenmila rinimi boro at ne Moroa ne Temen nedik, la Leeme Silok ne Iesu Karisito.

Lisingising Ti Tong Loklox Avukat

⁸Avot be, nia a tong loklox avukat ti ne Moroa rak keneng at ne Iesu Karisito rinemi axap, atla limixin at lengkot axap at na lavatbung menemen di ronga levelinga mumu nom lunuunu atnemi. ⁹Moroa nia a gugu rin mi lorooro axap tarak, la nia a vavang mi Lagale Lavavang at ne Nitna, neni iklen i do na levelinga rak i ruturun aleng do nia am doma amisik nimi, ¹⁰keneng at levesingising tarak at levenaleng axap. Nia a ngising ne Moroa dola lodoxoma ren kuren, neni naba suang langas tia xusu anaba vot saparap tinotno ba nimi dom.

¹¹Nia a vara aleng i do nia anaba ven nimi la ana raba nimi mi leveloklok tooro at Loroonan at ne Moroa eburu minemi ri lox alolos nimi. ¹²Nia a doma i do dik ataba elok tooro ela; nemi miba lox alolos ia mumu lunuunu atnemi la nenia aba lox alolos nemi mumu lunuunu rak. ¹³Luvutnetak mi luvurinuk. Nia a vara i do mina xasep nunuan; buaang laxanaleng nia agam doma i do anat pot pasa nimi, ketla lentaba lempanga ga tu pe ia. Nia a vara i xusu ana vavang dom atnemi xusu teventaba dinaba nuunu bok, kerekngan ia aga lox i ro at lengkot petpes kantubu at limixin kopmen me Judaia.

¹⁴Nia a ruuna lugugu silok anaba lox i ri limixin axap, ti leme Grik la tinedi bok limixin petpes, ti limixin akleklen la tinedi bok kopmen takleklen solo atnedi. ¹⁵Kuren la lodoxoma rak iplivi aleng, kusu ana vavang tinemi bok limixin mi nemen dom Rom.

Lolos At Lagale Lavavang

¹⁶Nia xopmen ana lok mamangan ti vavang mi Lagale Lavavang, atla ni lololos at ne Moroa ri lox arooro nedi axap di nuunu, leme Judaia avot la melemu rinedi limixin kopmen me Judaia, ¹⁷atla Lagale Lavavang i lox asusu i do ne Moroa ik lox akmokso limixin mi legesa ngas mene nga, neni lunuunu la kopmen tangas petpes bok ba, kerekngan Lovoang Kaala i tong i xeretna,

“Laradi ip sep sogo at ne Moroa mi lunuunu ren, ni naba roo suu.”

Abk 2:4

Loklok Kakapmek At Limixin

¹⁸Moróa ira lox axasep pam i ri limixin axap dola neni ixot kis epen mi leveloklok kakapmek at limixin, atla nom loklok kakapmek atnedi i sasar angtang kaka di basinge luruturun at ne Moróa, kuren la ni naba lox asi nom lebelemamao ren ti sev asongot di. ¹⁹Moróa i lox asongot di atla di xasep nunuan pam ap mo leveloklok teren ni i lox axasep di min. Moróa xa i lox axasep di min, ²⁰ga ru xaka i gano ne Moróa ga rudum li na lavatbung menemen, mo loklox eburu mi lololos lexen teren i nemen amisik. Limixin kopmen dina epovo na ven mo lololos eburu mi loklok teren, ketla di ven kakasep kaka i at levempanga ne Moróa ga rudum li i. Kuren la kopmen tevelinga atdi ri lox asepsu di basinge lebelemamao at ne Moróa.

²¹Digaklen ne Moróa, ketla digoxo emi asu min kopla digita tong loklox avukat tin. Levendoxoma atnedi ga rebonot axap, la levendoxoma rangtangu atnedi ga umsu mi lubuxumin. ²²Diga lok do nedi luvuttadi leklen, ketla xopmen; nedi luvuttadi baulang mene. ²³Kopmen di goxo lotu saparap ne Moróa ruturun i rooro amisik, ketla diga lotu saparap laxampoovo at luvuttadi mede xopok, la lavapixa eburu mi levempanga dit pas mi lavanuet kangkedek, kopla lempanga ngan laxangkavu.

²⁴Mo limixin digang tangku xerepmo, kuren la ne Moróa ga ke xepe di ri lok leveloklok kakapmek maxamang at lixitkis epot ngan diga vavara rin. La i lok ngan bok pam nedi eburu diga lok lengkot mamangan la diga lox abilinga labantuxu atdi. ²⁵Diga lox ekun luruturun at ne Moróa mi laxaxarang, diga lotu saparap levempanga ne Moróa ga rudum li i, la diga domampe laradi runtudum kusu dina lotu saparav i. Ata emi asu amisik min. Tuturun.

²⁶Limixin diga lox asu i mo loklok, kuren la ne Moróa ga ke xepe di ri mo leveloklok i lox asusu langsung lainmangan. Lavakin bok diga velongka, na ixo epovo do dina lox i. ²⁷La lavatlok bok kuren di goxopara nak midi eburu mi lavakin, la levendoxoma atnedi ga ngaongao xa ridi. Lavatlok diga lok levempanga mun mamangan, kuren la livipisik teren do diga ruuna ka levesongsongot ga epovo mi nom loklok kakapmek atnedi.

²⁸La limixin di goxopara i do dinam tebeng lakleklen tuturun mumu ne Moroa, kuren la ni ga ke xepe di ri mumu asu levendoxoma atdi xa i ekarakat, kerepmo la diga lok levempanga ixo epovo do dina lox i. ²⁹Di umsu mi laxanasen kakapmek axap, i ngan lodoxoma xapmek, loklok ti belegao, la loklok kakapmek maxamang at lixitkis epot. Lorooro atdi i umsu mi loklok ngaongao ri lempanga at lentaba vetpes, di esev amet, di esep, di lok levenekarakat, di babala vukpuk, di doma xakapmek amisik ti leventaba vetpes, la di tere mumu. ³⁰Di lox asi limixin mi levelinga, di velox angtungun mi ne Moroa, di ekilu, dim simi di la dit las di, la di doma xaka bok leventaangas petpes ti lok laxakapmek, kopmen dina ronga res at luvuttemen di mi luvutnen di. ³¹Kopmen dina ruuna tevendoxoma avukat, kopmen dina doma xatling levelinga atnedi, la kopmen dina lox asusu labalamu ela, la loxokok ti lemet atdi. ³²Diklen i do Lenavolo at ne Moroa i tong i do limixin di mumu asu na leventaangas dinaba seeve. Ketla move dik lok na leventaangas la di momo mun mido limixin petpes ua di lok mo langas.

Moróa Naba Ven Mumu Loklok At Limixin Axap

2 ¹Nemi limixin, ixo epovo do mina viila mumu loklok at leventaba vetpes mila nemi mixo sepsu ap mo leveloklok kakapmek kerekngan nedi di lox i. Dola mi ila mumu loklok atnedi, la do mi lok bok nom levempanga di lox i, mi lok li xa lumumuat atnemi. ²Nema maklen i do ne Moroa ik mokso dola ni i ila mumu loklok at limixin di lok na leventaangas kapmek. ³Ketla nemi bok mi lok nom levempanga, no nemi mi viila mumu di min. Kereva, mi doma i do nemi limixin gamasa mun minaba sepsu at loklox asongot at ne Moroa? ⁴Kopla mi doma abalalak mene nom langangan labalamu ren, mi loklok mulus teren la kopmen ni noxo ila mumu soso loklok atnemi. Tuturun miklen i do ne Moroa i lox avukat, atla ni i vara i do mina ven kisiv i nom la mina leeng.

⁵Ketla levendoxoma atnemi i rebonot la mi xopara na leeng; kuren la mi lox asilok nom loklox asongot tinemi ap mo laaleng ne Moroa naba ila mumu loklok at limixin la na lox asu lebelemamao ren ti lasaxaven.

⁶“Moróa naba raba unun ti legetgesara mumu xa levempanga ni ga lox i.”

Sam 62:12

⁷Leventaba at limixin dik lox amisik leveloklok i nunuan, kerepmo di puse ri lisisixam mi loklok ngangao la lorooro nunuan; ne Moroa naba raba di mi lorooro avolo. ⁸Ketla leventaba atnemi limixin di doxoma mene di, la di sok tixirixes levelinga ruturun at ne Moroa, di vavara i do dina mumu asu levempanga i lok kapmek; nedi na dinaba ekip tangarang mi lebelemamao la lumukmusak at ne Moroa. ⁹Limixin dinaba ruuna ka loklox asongot mi levenmumuat atla dik lok levempanga xopmen na lok nunuan, leme Judaia avot la melemu rinedi limixin kopmen di me Judaia. ¹⁰Ketla ne Moroa

naba raba lisisixam mi laasen silok, la limila rinedi axap di lok levempanga nunuan, ti leme Judaia avot la melemu rinedi bok limixin kopmen di me Judaia. ¹¹Moroa i viila mumu loklok at limixin mi legesampoovo mene.

¹²Limixin kopmen me Judaia dixo ruuna Lenavolo at ne Moses, dik lok laxakapmek la diba seeve. Limixin me Judaia di ruuna na Lenavolo, di lok laxakapmek la ne Moroa ba ila mumu loklok atnedi atla dixo mu asu Lenavolo. ¹³Kopmen dina so asen limixin do dik mokso atla ding tonga mun Lenavolo, ketla nedi di mumu asu levelinga at Lenavolo dik mokso at lemeren ne Moroa. ¹⁴Limixin kopmen me Judaia, dixo ruuna Lenavolo, ketla levendoxoma nunuan atdi i lok di xusu dina mu asu leventaangas teren, keke i do dixoklen i. Kuren la i lok ngan ta do di ruuna Lenavolo keneng at lebelen di. ¹⁵Loklok atnedi i lox asusu i do levempanga Lenavolo i paase min, Moroa ga malagan i keneng at lebelen di. Levendoxoma nunuan atdi i lox asusu box i dola na i ruturun, mila at leventaba levenaleng levendoxoma atnedi i lox akmokso di, la at lentaba levenaleng i su auru loklok atdi. ¹⁶Lagale Lavavang nia a vavang min, i tong asu i do ne Moroa naba ila mumu loklok at limixin at laaleng ete la keneng at ne Iesu Karisito neni naba ila mumu bok levendoxoma alipe xapmek at limixin.

Limixin Me Judaia La Lenavolo

¹⁷La kereva nimi? Mi tong i do nemi luvuttadi me Judaia la mi nuunu at Lenavolo, la mit las nimi do mit kis esogo mi ne Moroa; ¹⁸la miklen bok levempanga ne Moroa i vara i xusu minak lox i, la mira lok ka vam lakleklen keneng at Lenavolo xusu mina ila xaka levempanga ik mokso; ¹⁹la mi tong lolos i do mim lam limixin kopmen dinaklen ne Moroa ngan lengkatli main, la nemi laxasep tinedi di nemen at lamain bonot, ²⁰la mi tong i do nemi luvuttadi loklox ase rinedi limixin loklok atdi i bilinga, la nemi luvuttadi loklox ase rinedi limixin kopmen takleklen atdi, mila keneng at Lenavolo mi ruuna levelinga axap i ruturun. ²¹Mi lox ase leventaba vetpes kuren, la tila ba xopmen mina lox ase xa nimi? Mi vavang keretna, “Nemen mitap kip pilo.” Ketla nemi xa luvuttadi xipkip pilo. ²²Mi tong i xeretna, “Nemen mita velongka.” Ketla nemi luvuttadi longlongka. Mi paase vupu ri laxampoovo moroa, ketla nemi mip kip pilo ro xeneng at laraugu lotu at laxampoovo moroa. ²³Mit las nimi mi Lenavolo at ne Moroa, ketla mik lox amangan ne Moroa atla mixo mu asu Lenavolo ren. ²⁴Lovoang Kaala i tong i xeretna,

“Limixin kopmen me Judaia di vaase xapmek ti laasen at ne Moroa mumu loklok atnemi leme Judaia.”

Ais 52:5

²⁵Loklok ti rivit kepe lengkontuxu naba lok tooro mun taradi mo do i mumu asu Lenavolo; ketla do laradi na los polo Lenavolo, ni naba lok ngan mun mo laradi xopmen di goxo vit kepe loxontuxu ren. ²⁶Dola laradi

xopmen me Judaia la kopmen di goxo vit kepe loxontuxu ren, ketla i mumu asu levelinga at Lenavolo, Moroa ba ven i ngan laradi diga vit kepe loxontuxu ren. ²⁷Nedi limixin kopmen me Judaia di mu asu Lenavolo, keke i do kopmen dina vit kepe levengkontuxu atnedi, dinaba sok taba nemi leme Judaia at laaleng ete, atla mixo mu asu levelinga at Lenavolo, keke i do ne Moroa ga raba nemi min, la miga vit kepe bok levengkontuxu atnemi.

²⁸Nege rinotno ni laradi me Judaia? Kopmen nom laradi i ruuna mene laasen do laradi me Judaia, la livirivit katling at labantuxu ren na lok ngan lavanga gamasa mene. ²⁹Ketla laradi ruturun me Judaia ni i ruuna lorooro maxat keneng teren, la diga vit katling loroonan teren, la nai ni lugugu at Loroonan Kaala at ne Moroa, kopmen at Lenavolo diga malagan i. Laradi xerepmo i lok kaka leemi asu ren boro at ne Moroa, la kopmen at limixin.

Moroa I Ruturun Amisik

3 ¹Kereva ba, limixin me Judaia di ruuna levenasen silok i volo limixin kopmen di me Judaia? Kopla di ruuna lisisilok mila diga rivit kepe lengkontuxu atnedi? ²Laaba, limixin me Judaia dik lox avot keneng at lodoxoma at ne Moroa, la ne Moroa ga doxoma rinotno i do ni na raba levelinga ren tidi kusu dina lok tatao i.

³Naba lok ba xereva do teventaba atnedi di goxo ruturun at levendoxoma atnedi ri ne Moroa? I milik ngan ta do ne Moroa noxo ruturun ta, do?

⁴Kopmen tinotno! Moroa neni naba ruturun amisik la keke i do limixin axap laxampanga xaxarang. I ngan Lovoang Kaala i vaase i xeretna,

“Una lox asuusu i do nenu uk mokso at loxonaleng una paase; unaba vas asi levelinga i ru ram at loxonaleng di sok taba u min.” *Sam 51:4*

⁵La kereva ba, do laxakapmek atnedik na ravasu silok tinotno xusu limixin axap dina ven i do ne Moroa ik mokso, ataba tong ka lavanga sala? Ataba tong ka nga i do ne Moroa kopmen nak mokso atla neni i lox asongot nedik? (Na levelinga i ngan levelinga at limixin at na lavatkangka.) ⁶Kopmen tinotno! Do ne Moroa xopmen nak mokso, neni ixo epovo do na vaxaru limixin at lavatbung menemen at lavapaase. ⁷La kereva ba, do losoogong tarak na lok lisisixam la luruturun at ne Moroa na ravasu ri laxasep, ua lavasuun teren la neni naba lox asongor ia ngan laradi xapmek? ⁸Do laxapmek na lox asuusu lempanga avukat, kereva, i lox avukat ti tong asu levelinga xeretna, “Atak lok laxakapmek, kusu luvukat naba vot?” Lentaba luvuttadi diga lox asi ia la diga sok taba ia mi na levelinga! Luvuttadi di ruuna na lodoxoma, dinaba ru at lavapaase la dinaba lok ka losongsongot nop loklok atnedi.

Kopmen Taradi Nak Mokso

⁹Kereva, nedik limixin me Judaia taba sepsu basinge lebelemamao at ne Moroa mila nedik limixin tino ren? Kopmen tinotno! Ara malagan

ase vam nemi min at levelinga avot tarak do, limixin me Judaia la nedi xopmen di me Judaia, nedi axap dik lok maxopok at lololos at laxakapmek. ¹⁰I ngan Lovoang Kaala i vaase i xeretna,

“Kopmen teta nak mokso. Kopmen tinotno tegesara go. ¹¹La kopmen teta ikleklen lomokmokso, kopla i puse ri ne Moroa. ¹²Limixin axap digara raba arulu vam ne Moroa; la digara on pam at laxapmek; la kopmen tinotno tara na lok lempanga i lox avukat, kopmen tinotno. ¹³Lorooro atdi i umsu mi laxakapmek ngan lempatmaaut; la laxaxarang ip tavasus at levenngusno atnedi, la levengkolinga sepsev amet ngan lempat sii angkang, ip tavasus at levenbulubun atnedi; ¹⁴levenngusno atnedi i umsu mi levelinga xapmek i so mamao. ¹⁵Soso mene nga nedi di vavara loklox asongot la dinap sev amet luvuttadi; ¹⁶la dik paxaru levesongsongot mi lainbulu at levengkot axap nedi dit pas teren. ¹⁷Kopmen dinaklen langas at limila, ¹⁸la kopmen dinaklen loklok tik lox asuus loklok ngangao ri ne Moroa.”

¹⁹Anaa ba nedik taklen i do, levempanga axap keneng at Lenavolo, ik lok mu asu nedi dik lok maxopok at Lenavolo, kusu ri lok pepe levempapaase vepe at limixin, la na lok kaka limixin at lavatbung menemen axap kusu dinak lok maxopok at lavapaase ro melango at ne Moroa. ²⁰Kuren la kopmen tinotno taradi go, neni na mumu asu rinotno leventaangas at Lenavolo kusu ni na vee ngan laradi mokmokso at lemeren ne Moroa; la mo levempanga Lenavolo ik lox i, ik lok laradi xusu neni nabaklen i do neni ira lok pam laxapmek.

Langas Ne Moroa I Lox I Xusu Ri Lox Asepmus Limixin

²¹Ketla amo nga, langas ti lok limixin ngan limixin mokmokso at lemeren ne Moroa ira ravasus vam, la kopmen tekot at Lenavolo nak lok teren. Lenavolo eburu mi levelinga at lavaeme vapaase alii di su auru i na. ²²Ketla ne Moroa ik lok li akmokso limixin mumu lunuunu atnedi saparap ne Iesu Karisito. La ne Moroa ik lox i na rinedi axap di nuunu at ne Karisito. Kopmen tevereven petpes atnedi leme Judaia la limixin kopmen me Judaia, ²³atla limixin axap digara lok pam laxapmek la digara subu kot basinge loklok mokmokso at ne Moroa. ²⁴Ketla ne Moroa ik lox asepmus di mumu letaba nabalamu ren at lekngen at ne Iesu Karisito, mo ga un ka amlong di. ²⁵Moroo ga raba ne Iesu ngan laxaavuk tinedi limixin dina nuunu do neni ga lox asu lada ren at laxaba xusu ri uu nop loklok atdi. Moroo ga lox i na xusu ri lox asuus i do neni laradi mokmokso, mila gano migomgo neni gak lok atnaasan, la goxo reven ti laxapmek at limixin; ²⁶ketla ana nga at na levenaleng, neni i doxoma lolos laxapmek at limixin, kusu ri lox asaxaven loklok mokmokso ren. At na mun langas, la ne Moroa i lox asuus i do neni xa ik mokso la ik lox asepmus limixin axap di nuunu at ne Iesu.

²⁷Kereva, i epovo dik taba simi dik mi lorongtonga res at Lenavolo? Kopmen tinotno. Ixo epovo do dik ta simi dik min mila nedik di nuunu. ²⁸La ata vaase box i xeretna do, laradi i sepmus basinge laxakapmek teren, mumu mun lunuunu la kopmen do mumu leventaangas at Lenavolo. ²⁹Kereva, ne Moroa neni lomoroa xusuk mun at leme Judaia? La neni kopmen lomoroa atnedi kopmen me Judaia? Laaba, neni xuren. ³⁰Moroa neni legesara, la neni naba lox asepmus leme Judaia mumu lunuunu atnedi, la nedi bok kopmen di me Judaia xuren, mumu bok lunuunu atnedi. ³¹Kereva ba Lenavolo? Ata lok kepe nga i mila ata nuunu xusuk ta? Kopmen la kopmen tinotno, ketla ata su auru Lenavolo.

Lavapaase Poovo At Ne Abaram

4 ¹Ataba tong ka nga i do kereva mumu ne Abaram lavareme avolo at lavalabat atnedik? La neni gakleklen lavanga sala na loklok ti lox amokso laradi? ²Do neni ga sepmus basinge laxapmek at leven gugu neni gak lox i, neni gitaba ruuna tavanga neni gibam simi i ren. Ketla neni goxo epovo xusu na simi aurur i at lemeren ne Moroa. ³Lovoang Kaala i vaase xeretna,

“Abaram ga nuunu at ne Moroa, la at lunuunu mun teren la ne Moroa ga siam kaka i ngan laradi mokmokso.” *Lur 15:6*

⁴Laradi do i gugu, ik lok kaka luunun, luunun teren kopmen na lok ngan laramtaba, ketla ik mokso do neni na lok ka i. ⁵Do laradi kopmen na nuunu saga at leven gugu neni ik lox i, ketla i nuunu at ne Moroa mo i lox asepmus limixin dik lok laxakapmek, lunuunu mun teren i lox i la ne Moroa i siam kaka i ngan laradi mokmokso. ⁶Neni na lavasuun at levelinga at ne Devit at loxonaleng neni ga paase mumu luvukat ti mo laradi ne Moroa i siam kaka i ngan laradi mokmokso, la kopmen do at leveloklok teren ik lox i;

⁷“Luvukat tinedi ne Moroa ga domampe laxaloklok kakapmek atnedi, la neni gara sibo pe vam laxakapmek atnedi! ⁸La luvukat ti mo laradi, Leeme Silok noxo doma rinotno bok ba laxakapmek teren.” *Sam 32:1-2*

⁹Kereva, na luvukat ne Devit ga paase min, atnedi xusuk mun di rivit kepe lengkontuxu atnedi? Kopmen. Tinedi bok kopmen dina vit kepe lengkontuxu atnedi. I ngan loxot at Lovoang Kaala i lok keretna, “Abaram ga nuunu at ne Moroa, la mumu mun lunuunu ren, ne Moroa ga siam kaka i ngan laradi mokmokso.” ¹⁰Na luvukat ga vot tinotno at ua loxonaleng? Ga vor avot koplā, ga vot ba melemu at laaleng diga vit kepe loxontuxu at ne Abaram? Taklen i do ga vor avot, la kopmen do melemu ba. ¹¹Diga vit kepe loxontuxu ren ga melemu ba, la mo loklok diga lox i rin, ga lok ngan loklok katling ti lox asorun i do at lunuunu mun at ne Abaram, ne Moroa ga siam kaka i ngan laradi mokmokso, avot tinotno ri livirivit kepe loxontuxu ren. Kuren la ne Abaram i lok ngan

ne temen nedik axap di nuunu at ne Moroa la dik lok keneng at lisisiam ngan luvuttadi mokmokso ren, nedi bok di goxovisi vit kepe lengkontuxu atnedi. ¹²Neni ne temen nedi bok mo diga vit kepe vam lengkontuxu atnedi la diga lok ka lunuunu ngan lunuunu at ne temen nedik ne Abaram ga ruuna i, avot tinotno ri laaleng diga vit kepe loxontuxu ren.

Laxakaape At Ne Moroa Naba Sorun At Lunuunu Mene

¹³Ne Moroa ga lok laxakaape eburu mi ne Abaram do lavatbung menemen axap, ateren eburu mi livipisik li ren. Na laxakaape goxo vot mumu i do ne Abaram gang tonga res at Lenavolo, ketla atla neni ga nuunu. Kuren la ne Moroa ga siam kaka i ngan laradi mokmokso. ¹⁴Do lavanga ne Moroa ira xaape vam min kusu naba raba i rinedi ding tonga res at Lenavolo, naba lok ngan do kopmen tavaasuun at lunuunu at laradi la laxakaape bok at ne Moroa neni lavanga gamasa. ¹⁵Lenavolo ik lox asuusu lebelemamao at ne Moroa, ketla do xopmen tenavolo, kopmen bok torongtonga xepe at Lenavolo.

¹⁶Kuren la laxakaape at ne Moroa naba sorun mun mumu lunuunu, kusu ne Moroa na lox asuusu letaba nabalamu ren la laxakaape ren naba sorun ti livipisik li axap at ne Abaram kerekngan levelinga at ne Moroa ga tong i. Kopmen do tinedi xusuk di mumu asu Lenavolo, ketla tinedi bok di nuunu ngan ne Abaram, neni ne temen nedik axap di ruuna lunuunu. ¹⁷I ngan Lovoang Kaala i vaase i xeretna,

“Ara lok li vam u ngan ne temen limixin keneng at laranep silok buaang.”

Lur 17:5

Kuren la na laxakaape naba sorun ngan ne Moroa ga tong alii i la ne Abaram ga nuunu ren. Neni ne Moroa ik lox aroo luvuttadi basinge lanmet la mi levelinga mun teren neni ga rudum li levempanga goxovisi vot.

¹⁸Ga lolos aleng ti ne Abaram kusu na nuunu ap mo laxakaape at ne Moroa rin, ketla neni ga nuunu ren la gam doma voovo rin; kuren la neni ga ravasu ngan ne temen limixin at laranep silok buaang. I ngan Lovoang Kaala i vaase i xeretna,

“Livipisik li ram naba umsu.”

Lur 15:5

¹⁹Ga auret kusu levenmaares teren na lok ka lasangaun kobot (100) maares axap; ketla lunuunu ren goxo molo at levenaleng neni gam doma mumu labantuxu ren, ua gak milik ngan laradi met, koplama mumu ne Sera ga sioxo nga la ni goxo ruuna taxaalik. ²⁰Lunuunu ren goxo on basinge i, la neni bok goxo lox abulubun laxakaape at ne Moroa; ketla lunuunu ren ga suxa aumsu i mi lololos, la neni ga xip aurut laasen at ne Moroa. ²¹Neni ga doxoma rinotno i do ne Moroa ga epovo ri lok levempanga neni ga xaape min. ²²Neni ba na lavasuun teren la ne Moroa ga siam abeles kaka i ngan laradi mokmokso mumu mun lunuunu ren saparap ne Moroa. ²³Na levelinga i vaase xeretna do,

“Moroa ga siam ka i ngan laradi mokmokso.”

Lur 15:6

Di goxo malagan i xusu tin kusuk mun. ²⁴Diga malagan box i rinedik do ne Moroa naba siam ka nedik ngan luvuttadi mokmokso, la di nuunu at neni ga lox aroo amlong ne Iesu, Leeme Silok atnedik basinge lanmet. ²⁵Moroa ga song araba i xusu naba met mumu laxakapmek atnedik, la ni ga roo xat amlong kusu ri lox asepmus dik.

Lomokmokso Eburu Mi Ne Moroa

5 ¹Amo nga mumu lunuunu atnedik, Moroa ga lox asepmus pam dik basinge laxakapmek, kuren la nedik di ruuna ka lumulum eburu mi ne Moroa mumu Leeme Silok atdik ne Iesu Karisito. ²La neni gara siam ka vam nedik mumu lunuunu atnedik, la levereven kibis atnedik ti letaba nabalamu at ne Moroa, mo nga nedik di rooro ren. Nedik di momo mumu levendoxoma voovo atnedik do neni naba lox asuusu lisisixam teren tidik. ³La dik ta xip aurut bok laasen teren keneng at levenmumuat atnedik, atla dik taklen i do levenmumuat im taba dik mi lololos kusu ata tu atmatkun keneng at leveloklok tong pen. ⁴La mo lololos ik lox asuusu lorooro mukun keneng atnedik, la na lorooro mukun ik lox asuusu levendoxoma voovo xeneng atnedik. ⁵Na lodoxoma voovo xopmen na lox abulu nedik, atla ne Moroa gara soli asu vam labalamu ren ukeneng at lorooro atnedik mi Loroonan Kaala, ni laramtaba at ne Moroa rinedik.

⁶La at levenaleng nedik move digoxo ruuna tololos, ne Karisito ga met tinedi limixin kapmek, at loxonaleng ne Moroa ga vit li i. ⁷I lolos aleng ti tara xusu neni na met ti taradi mokmokso. Nia a lok do agut tepenaleng ba go, tara naba mulus ti met ti laradi avukat. ⁸Ketla ne Moroa gara lox asuusu vam labalamu rinotno ren tinedik keretna; at loxonaleng nedik move diga nemen at laxapmek, neni ga riki ne Nitna kusu ri met nop loklok atdik.

⁹Moroa ga lox asepmus dik mi lada at ne Karisito, kuren la keneng teren i epovo rinotno do nedik taba roo suu basinge lebelemamao at ne Moroa. ¹⁰Nedik diga munepen mi ne Moroa, ketla neni ga vaxat ka buru nedik saparav i mumu lanmet at ne Nitna. La amo nga Moroa ga lok lumulum eburu minedik, i epovo rinotno do nedik ataba roo suu mumu lorooro at ne Karisito. ¹¹Ketla kopmen laxavaxap ta mo at na levelinga; nedik ata xip aurut laasen at ne Moroa mumu Leeme Silok atnedik ne Iesu Karisito atla neni ga lok lumulum tinedik eburu mi ne Moroa.

Adam Mi Ne Karisito

¹²Laxakapmek ga vubeles at lavatbung menemen mumu mun legesa radi, la laxapmek teren ga raba lanmet bok eburu min. La livipisik at na, lanmet ga epeseves ti limixin axap, atla limixin axap dik lok laxakapmek. ¹³Lenavolo gaba vot mene melemu, ketla laxakapmek garak lok pam. At

levenaleng Lenavolo goxovisi vot, ne Moroa kopmen goxom doma mu solo laxakapmek at limixin. ¹⁴Ketla ga ru ka i at levenaleng at ne Adam i se at levenaleng at ne Moses, lanmet ga ru pavaa limixin axap, la ga ru pavaa bok nedi di goxo lok laxakapmek ngan lara ne Adam ga lox i, ni ga ronga xepe levelinga at ne Moroa. Ne Adam ga ru katling lara laradi mo ga vot melemu.

¹⁵Ketla nedu xopmen duna epovo atla letaba nabalamu at ne Moroa kopmen na lok ngan laxapmek at ne Adam. I ruturun do buayang limixin diga met mumu mun laxapmek at legesa radi. Ketla labalamu at ne Moroa i silok tinotno, la ga lox asuusu letaba nabalamu mene bok teren ti limixin axap mumu labalamu at legesa radi ne Iesu Karisito. ¹⁶La laramtaba at ne Moroa la laxapmek at legesa radi, nedu xopmen duna epovo. Melemu at legesa xakapmek at ne Adam, loxokoxo ga vot ti limixin, ketla melemu at laxangkakapmek solo ga vot, laramtaba at labalamu ga lox asuusu lesepepmus basinge laxapmek. ¹⁷I ruturun mila at laxakapmek at legesa radi mene nga, la laxapmek ga ru pavaa limixin axap, mumu mun legesa radi. Ketla i epovo rinotno do nedi diba lok kaka letaba nabalamu i umsu aleng la loklok mokmokso boro at ne Moroa, la dinabat kis orong at lorooro avolo mumu mun legesa radi, ne Iesu Karisito.

¹⁸Kuren la legesa xapmek mene ga lok loxokoxo ri limixin axap. I ngan bok legeso loklok at laradi mokmokso mene ga lox asepmus la ga raba lorooro ri limixin axap. ¹⁹Lorongtonga xepe at legesa radi mun ga sat ka limixin axap ti laxapmek. La kerepmo bok lorongtonga res at legesa radi naba lox akmokso limixin basinge laxakapmek atdi.

²⁰Lenavolo ga ravasu kusu limixin dina ven kisiv i do loklok kakapmek atdi i lok kapmek aleng, ketla at lengkot ua laxapmek ga ravasu solo ren, letaba nabalamu bok at ne Moroa ga ravasu silok tinotno. ²¹Kuren la at loxonaleng laxapmek i tu ri sat ka limixin ti lanmet, letaba nabalamu bok at ne Moroa i tu xusu ti sar akmokso di, la na lam kaka di ri lorooro avolo mumu ne Iesu Karisito, Leeme Silok atnedik.

Lanmet Ik Lok At Laxakapmek, Ketla Lorooro

Ik Lok At Ne Karisito

6 ¹Ataba tong i xereva? Ataba lok do atak lox amisik laxakapmek kusu ne Moroa naba lox asilok letaba nabalamu ren tinedik? ²Kopmen tinotno! I lok ngan do nedik digara met pam basinge laxapmek, kuren la nedik ataba rooro bok ba xeneng at laxapmek kereva? ³Nemi mikleklen tinotno i na; at loxonaleng nedik diga lok kaka lesepe susu keneng at laasen at ne Iesu Karisito, i lok ngan do nedik diga lok ka loxot at lanmet teren. ⁴Kuren la mumu bok lesepe susu atnedik, i lok ngan digak mit

nedik eburu min la digak lox eburu min at lanmet teren kusu nedik bok ataba roo xat mi lorooro maxat, kerekngan ne Iesu ga roo xat amlong at lanmet mi lololos at ne Temen.

⁵Do nedik gitak lox eburu min keneng at lanmet teren, nedik gitaba roo xat bok eburu min, ngan neni ga lok kuren. ⁶La nedik taklen i na, lorooro maut atnedik gara met pam eburu mi ne Karisito ro vana at laxaba, kusu ri sele utut lololos at laxakapmek atnedik getgesara, la kusu nedik ata xok lok at loxokoxo at laxapmek, ⁷atla do taradi na met, neni naba sepsu basinge lololos at laxapmek.

⁸Do nedik taga met pam eburu mi ne Karisito, nedik ta nuunu do atanaba rooro bok eburu min. ⁹Dik taklen i do ne Karisito gara roo xat pam at lanmet, la neni noxo met bok ba, atla lanmet kopmen na ruuna tololos ti lox asi i. ¹⁰La lanmet neni gak lok teren, ni lanmet ti laxakapmek atnedik, la neni ga met gesara mene nga; la lorooro mo nga neni i rooro ren, ni lorooro i esogo rinotno eburu mi ne Moroa.

¹¹At na mun langas mina doma mu i na do nemi miga met basinge laxapmek, ketla miga roo xat la mit kis esogo eburu mi ne Moroa xeneng at lixitkis eburu atnemi mi ne Iesu Karisito. ¹²Kuren la nemen mita ke laxapmek na lok tatao labantuxu gamasa atnemi mo naba met; la nemen mita ronga res at lavavara mun at labantuxu atnemi. ¹³La nemen gat miguta raba tamangkot at labantuxu atnemi ri laxapmek, kusu mina lok levempanga xapmek. Ketla mina raba axa nemi ri ne Moroa, na ngan laradi ga ravasu at lanmet ti lorooro, la mina raba lorooro axap atnemi rin kusu rik lok lugugu i nunuan la ik mokso. ¹⁴Nemen gat miguta ke xepe laxapmek nam lam nemi, atla nemi xopmen minak lok maxopok at loklok tatao at Lenavolo; ketla mik lok maxopok at letaba nabalamu at ne Moroa.

Lavaanat Saxaruki At Lomokmokso

¹⁵Nedik dixok lok maxopok at Lenavolo, ketla dik lok maxopok at letaba nabalamu at ne Moroa. Kuren la ataba lok ba lavanga salai? Kereva, nedik atanak lok laxakapmek? Kopmen tinotno! ¹⁶Mikleklen tinotno i do, mo do mina raba nemi ngan lavaanat saxaruki ring tonga res at tara vetpes, nemi mi lok ngan lavaanat saxaruki at laradi ming tonga res teren; kuren la nemi lavaanat saxaruki at laxapmek no im taba lanmet, koplana nemi lavaanat saxaruki at lorongtonga res no ba lam ka nemi ri lesepepmus. ¹⁷Ketla a tong loklox avukat tinotno ri ne Moroa. Gano nemi migak lok ngan lavaanat saxaruki at laxapmek; ketla melemu ren mi lorooro axap atnemi, miga ronga res at levelinga ruturun miga ronga i. ¹⁸La miga sepmus basinge laxapmek, la miga lok ngan lavaanat saxaruki at loklok mokmokso.

¹⁹A paase poovo mi lavaanat saxaruki la luvuttadi amgomgo atdi kusu minaba ronga xibis kaka na levelinga mila lunuunu atnemi kopmen na

lolos. Gano nemi miga raba lorooro axap atnemi ri lugugu ngan lavaanat saxaruki at laxakapmek la laxangkakapmek solo. Kuren pam, la mina raba bok lorooro axap atnemi ngan lavaanat saxaruki ri lok leveloklok mokmokso la leveloklok i xaala. ²⁰At levenaleng migak lok ngan lavaanat saxaruki at laxapmek, miga sepsu basinge leventaangas at lomokmokso. ²¹Miga ven livipisik sala at laxaloklok nemi migak lox i, la mo ba mira mamangan teren? Livipisik ap mo levempanga, ni lanmet! ²²Ketla, amo nga migara sepmsu pam basinge laxapmek, la mo nga mi lok ngan lavaanat saxaruki at ne Moroa; mo lavanga nemi minaba lok kaka i, neni lorooro i xaala, la livipisik teren neni lorooro avolo. ²³Luunun at laxapmek, ni lanmet; ketla laramtaba at ne Moroa, ni lorooro avolo keneng at ne Iesu Karisito, Leeme Silok atnedik.

Lavapaase Poovo Boro At Loklox Epot

7 ¹Luvutnetak mi luvurinuk. Nemi miklen lavanga salai na nenia a lok do ana vaase min, atla nemi axap miklen Lenavolo. La Lenavolo im gomgo nga mun laradi at levenaleng mun neni i rooro ren. ²I ngan bok keretna; latkin epot ik lok maxopok at loklok tatao at latlok teren, ketla do latlok teren na met, neni xopmen bok ba nak lok at loklok tatao at latlok teren. ³Kuren la do neni ik lox eburu mi tatlok petpes at loxonaleng, latlok teren nove i rooro, diba tong mo latkin do neni latkin longlongka; ketla do latlok teren na met, neni ira sepsu basinge loklok tatao at latlok teren, la mo do neni na epot kaka tatlok petpes, neni xopmen na lok laxakapmek.

⁴Luvutnetak mi luvurinuk. Nemi bok migak lok kuren. Nemi bok migara met pam eburu mi ne Karisito basinge Lenavolo, atla nemi lengkot at labantuxu at ne Karisito, la amo nga nemi mun teren. Neni ga roo xat amlong at lanmet kusu nedik ataba pisik asu levempipisik nunuan ti ne Moroa. ⁵At levenaleng nedik diga rooro mu asu lavavara at labantuxu atnedik, laxandoxoma xapmek ga umsu keneng at labantuxu atnedik, la Lenavolo at ne Moroa ga lox aplivi mo lodoxoma; kuren la nedik digak lok levempanga ga epovo ri lanmet. ⁶Ketla amo nga, nedik diga met ti lorooro maut, mo ga otot tutu minedik, nedik dira sepsu ba basinge Lenavolo, la ata gugugu at langas maxat at Loroonan, la kopmen bok ba Lenavolo migomgo.

Lenavolo La Laxapmek

⁷Ataba tong kaka ba la? Ataba tong i do Lenavolo neni ik lox asuusu laxapmek? Kopmen tinotno. Ketla neni ba na Lenavolo ga lox aklen ia do laxakapmek ni lavanga xapmek at lemeren ne Moroa, la ga lox ase box ia mi laxapmek tarak. La nenia gi toxoklen bok loklok ti ngaongao ri lempanga at tara vetpes, do Lenavolo gi toxo vaase do, "Nemen gat u

guta ngaongao ri lempanga at tara vetpes.”⁸ La mumu mun Lenavolo, laxapmek ga ru kaxat la ga visik li solo mo laxakapmek keneng tarak; ketla do kopmen tenavolo, laxapmek bok noxo ruuna tololos ti lok tepanga ria.⁹ Nenia bok, agak lok petpes basinge Lenavolo; ketla at loxonaleng Lenavolo ga vot, laxapmek ga roo xat keneng tarak;¹⁰ kuren la i lok ngan ta do loroonan tarak ga met. Aga ven i xeretna do, Lenavolo ua ga vot kusu ri raba lorooro, ga raba ia mi lanmet.¹¹ Laxapmek ga lox epovo i xusu na xarang aruv ia mumu mun Lenavolo; la mumu Lenavolo, laxapmek ga sev amer ia.

¹² Ketla Lenavolo neni i xaala, la leventaangas linga xeneng teren bok i xaala, la ik mokso la i lox avukat.¹³ Kereva, lavasuun at na do luvukat at Lenavolo ga raba ia mi lanmet? Kopmen tinotno. Laxapmek axa ga raba ia mi lanmet keneng mun at Lenavolo, mo i lox avukat. Lenavolo ga vot kusu anaba ven kibis i do laxapmek ni lavanga salai; la mumu mun levempapaase at Lenavolo, laxapmek i ravasu ngan lavanga i lok kapmek tinotno.

Lodoxoma Soksokgu At Laradi

¹⁴ Nedik diklen i do Lenavolo neni boro at Loroonan Kaala; ketla nenia laradi mene nga la aga ravasu ngan lasaxaruki at laxapmek.¹⁵ Nia xopmen anakleklen levempanga nenia ak lox i; la axok lok levempanga avukat nenia a vavara xusu anak lox i, ketla arak lok manga levempanga xapmek nenia a xopara rin.¹⁶ At loxonaleng nenia ak lok levempanga nenia a xopara xusu anak lox i, na loklok i lox asuusu i do nenia a siam do Lenavolo neni ik lox avukat.¹⁷ Kuren la kopmen nenia rinotno mo ak lok mo levempanga xapmek; ketla laxapmek i nemen keneng tarak, neni ik lox i.¹⁸ Aklen i do luvukat kopmen na silok keneng at lorooro at labantuxu rak. I raturun do lodoxoma rik lok luvukat ik lok keneng tarak, ketla nenia axo epovo xusu ana lox i.¹⁹ Kopmen anak lok loklox avukat no nenia a vavara xusu anak lox i, ketla arak lok laxapmek no nenia axopavara xusu anak lox i.²⁰ Do nenia ana lok levempanga no nia a xopara xusu ana lox i, i lok ngan do kopmen nenia mo ak lox i mo, ketla laxapmek no ik lok keneng tarak, neni ik lox i.

²¹ Kuren la a long terex i do lara loklok mo ik lok lugugu ren keretna, at loxonaleng ak lok do anak lok luvukat, ketla kopmen, ak soxolik ka manga laxapmek.²² La to xeneng tinotno rak, a vavara rinotno ri Lenavolo at ne Moroa.²³ Ketla a reven lodoxoma vetpes i gugu xeneng at labantuxu rak la mo i vesep eburu mi lodoxoma avukat ik lok keneng tarak. La mo lodoxoma i lok li ia xeneng at loxokoxo at laxakapmek la i gugu keneng at labantuxu rak.²⁴ Lainbulu silok ik lok tarak, atla nege naba lok kepe ia basinge na labantuxu im lam kaka ia ri lanmet?²⁵ A tong loklox avukat tinotno ri ne Moroa mumu ne Iesu Karisito, Leeme Silok atdik, atla neni naba lox arooro dik.

Kuren la lorooro rak ik lok keretna; keneng at lodoxoma rinotno rak, nenia a lok ngan lasaxaruki at Lenavolo at ne Moroa; ketla keneng at labantuxu rak, i ngan nenia a gugu ngan lasaxaruki at laxapmek.

Lorooro Keneng At Loroonan Kaala

8 ¹Kopmen bok ba toxokoxo tinedi di nemen keneng at ne Iesu Karisito; ²atla keneng at ne Iesu Karisito, Loroonan Kaala ga raba dik mi lorooro la gara lox asepmus pam dik basinge lololos at laxapmek eburu mi lanmet. ³Lenavolo goxo epovo ri lox arooro limixin atla limixin diga ruuna laxapmek keneng at lorooro atdi; ketla ne Moroa ga lox arooro dik, neni ga riki asi lamdak tinotno ren, la neni ga lok kepe laxapmek keneng at limixin. La ni ga ruuna ka labantuxu ngan labantuxu at limixin kusu na raba lorooro ren ngan laxaavuk. ⁴Moroga lox i na xusu neni naba lox epovo leventaangas avukat at Lenavolo tinedik, kopmen ata mumu asu lavavara at labantuxu, ketla di mumu asu lodoxoma at Loroonan Kaala.

⁵Nedi di rooro mun keneng at labantuxu atnedi, levendoxoma atnedi i mumu asu mun lavavara at labantuxu. La nedi di rooro mu asu Loroonan Kaala im lam di xuren, levendoxoma atnedi i mumu asu mun lavavara at Loroonan Kaala. ⁶Do levendoxoma atnedi na mumu asu mun lavavara at labantuxu, laxavaxap teren, lanmet; ket do levendoxoma atdi na mumu asu lavavara at Loroonan Kaala, laxavaxap teren, lorooro eburu mi lenmila. ⁷Limixin dinaba ravasu ngan lavamunepen mi ne Moroa do, levendoxoma atdi na mumu asu mun lavavara at labantuxu atdi. Kopmen dina rongga res at levelinga at ne Moroa, la ixo epovo rinotno do dina rongga res teren. ⁸La ixo epovo rinotno do nedi di rongga res at lavavara at labantuxu, dina lox amomo ne Moroa.

⁹Ketla nemi xopmen mina rooro at lavavara at labantuxu; ketla mi rooro mu mun lavavara at Loroonan Kaala, mo do Loroonan Kaala at ne Moroa i nemen keneng atnemi. La do nege di, dixo ruuna Loroonan Kaala at ne Karisito, nedi xopmen limixin at ne Karisito. ¹⁰Ketla do ne Karisito nak lok keneng atnemi, labantuxu atnemi naba met mumu laxapmek, ketla loroonan atnemi naba rooro atla ne Moroa naba siam kaka nemi ngan limixin mokmokso. ¹¹Mo do Loroonan at ne Moroa, mo ga lox aroo ne Iesu basinge lanmet, nak lok keneng atnemi, ne Moroa, mo ga lok aroo ne Karisito basinge lanmet, neni naba raba bok labantuxu atnemi mi lorooro, atla Loroonan teren ik lok keneng atnemi.

¹²Kuren la luvutnetak mi luvurinuk, nedik ta ruuna lugugu xusu tanaba lox i xeneng at lorooro atnedik. Ketla kopmen do nedik atap tuvuk gamasa mene nga mi lorooro at labantuxu. ¹³Do mina rooro mu asu mene nga lavavara at labantuxu, nemi minaba met; ket do mina lok kaka Loroonan Kaala la mina sev amet leveloklok kakapmek atnemi min, minaba roo.

¹⁴Nedi no Loroonan at ne Moroa i sasat nedi, nedi luvutnitna ne Moroa, ¹⁵atla Loroonan no ne Moroa gara raba vam nimi min ik lok nimi xusu mi noxo marat ngan lasaxaruki; ketla i lok nimi xusu nemi luvutnitna ne Moroa, la nedik di toro ri ne Moroa mi lololos at Loroonan Kaala keretna, “Tamak! Tamak!” ¹⁶Loroonan at ne Moroa i tu buru mi leventoonan atnedik, kusu ri lox asuusu i do nedik luvutnitna ne Moroa. ¹⁷La nedik luvutnitna, kuren la atanaba ruuna xaka leveloklox anarong ne Moroa ga lok li ri limixin teren, la nedik eburu mi ne Karisito atanaba ruuna ka bok leveloklox anarong no ne Moroa ga lok li i rin; atla do nedik ata xip tooro ne Karisito mi losongsongot teren, nedik tanaba ruuna ka bok loxot at lisisixam teren.

Lisisixam Avolo Melemu

¹⁸Nenia a doma i do nedik di suma losongsongot at na levenaleng, ixo epovo rinotno xusu ata lox epovo du mi lisisixam avolo mo ne Moroa naba raba dik min. ¹⁹Lempanga axap at ne Moroa ga rudum li di, di ngangais tinotno kusu ne Moroa na lox asuvos tinotno luvutnitna. ²⁰Moroa ga lok li lasaxaek mavana at luruntudum li ren. Anai kopmen at lavavara at luruntudum li ketla at lavavara at ne Moroa ga lok li i xuren. Ketla lodoxoma voovo at luruntudum li i lok keretna, ²¹na luruntudum li naba sepsu at tara taaleng la noxopso bok ba, ketla nabak lok sepsu la naba lok kaka lisisinang avolo ngan luvutnitna ne Moroa.

²²La dik takleklen i do i se nga at na levenaleng, na luruntudum li axap it mes mi losongsongot i ngan latkin i visik. ²³Ketla xopmen neni xusuk mun; nedik bok di ruuna Loroonan Kaala ngan laramtaba avot at ne Moroa, nedik bok dit mes keneng axa atnedik at levenaleng dik di ngangais tinotno ne Moroa xusu neni na lok li nedik ngan luvutnitna, la na lox asepsu labantuxu atnedik. ²⁴Nedik diga roo suu mene i ngan nedik diga doxoma voovo xuren; ketla do ata ven luruturun na vot at lodoxoma voovo atnedik, ataba tong i xeretna do, neni xopmen lodoxoma voovo mo, atla ixo epovo do di doma voovo ri tavanga di ven tu vam teren. ²⁵Ket do nedik ata doma voovo ri tavanga dik dixo ven i, ataba ngais atnaasan i.

²⁶Keneng at na lodoxoma voovo, Loroonan Kaala naba lok tooro nedik do nedik taxo ru lolos, atla dik taxoklen i do ataba sing kereva; la Loroonan axa i ngising tinedik saparap ne Moroa mi levelinga metmes nia axo epovo xusu ana mii poovo i mi tekolinga. ²⁷La ne Moroa neni i reven levempeve at luvuttadi, la iklen lodoxoma at Loroonan atla Loroonan i tu katling limixin at ne Moroa ukeneng eburu mi lodoxoma at ne Moroa.

Limixin Nuunu Dinaba Volo

²⁸Nedik ataklen i do ne Moroa i gugu mi luvukat at levempanga axap, keneng at lorooro atnedi di balamu i, la nedi no neni gara ro xaka

vam nedi xerekngan lodoxoma ren kuren. ²⁹Avot ti luruntudum li at na lavatbung menemen ne Moroa gakleklen limixin teren la ga soxolik ka di kusu dina ravasu ngan ne Nitna ne Moroa, la neni naba lok ngan lamgomgo ri laxanneton solo. ³⁰La ne Moroa ga ro xaka nedi neni ga soxolik ka nedi; la nedi bok neni gara ro xaka vam di, neni ga lox asepmus bok nedi, la nedi nom neni ga lox asepmus di, neni ga epes di mi lisisixam teren.

Labalamu At Ne Moroa Keneng At Ne Iesu Karisito

³¹Melemu at na ataba tong kaka lavanga salai? Do ne Moroa na tu eburu minedik, nege i epovo xusu na vas asi nedik? ³²Neni xopmen tinotno goxo rebeng alis ne Nitna rinotno, ketla ga raba i ngan laxaavuk tinedik axap. Neni ga raba nedik mi ne Nitna; kereva, neni naba raba gamasa bok nedik mi levempanga axap? ³³Nege i epovo na lok li limixin soksoxolik ka at ne Moroa ro at loxokoxo at laxapmek? Kopmen tara atla ne Moroa axa ga lox asepmus dik. ³⁴Nege naba epovo xusu na lok li dik at lavapaase? Kopmen tara, atla ne Iesu Karisito, mo neni ga met la ga roo xat amlong bok, monga it kis at lekngen tino ne Moroa. La i ngising ne Moroa xusu na lok tooro nedik! ³⁵Nege rinotno ba, i epovo xusu na lox epeseves nedik basinge labalamu at ne Karisito? Kopmen tepanga. Ixo epovo do levenmumuat na lox i, kopla levenaleng lolos, kopla levesongsongot mumu lunuunu atdik, kopla loroxo, kopla loklok banbalo, kopla lempanga sepsev amet, kopla lanmet. ³⁶I ngan Lovoang Kaala i vaase i xeretna,

“Nema mak lok keneng at lurube at lanmet at laxanaleng axap mumu u; dik lok nema ngan laxasipsip dit pas kusu dina sev amet di.” *Sam 44:22*
³⁷Keneng at na levempanga axap, dik digara lok ka vam lixitkis nunuan mumu langas at laradi ua i balamu nedik! ³⁸La nenia aklen tinotno i do kopmen tepanga naba lox epeseves nedik basinge labalamu ren; lanmet kopla lorooro, kopla taangelo, kopla tagas, kopla tepe lolos salai, kopla lorooro ningina, kopla lorooro melamgo atnedik; ³⁹kopla lempanga ro mavana at lavatbung menemen, kopla lempanga ro maxopok teren, la kopmen tinotno tepanga de at luruntudum li at ne Moroa i epovo xusu ri lox epeseves nedik basinge labalamu at ne Moroa, mo ga lox asuusu i rinedik keneng at ne Iesu Karisito, Leeme Silok atdik.

Morua Eburu Mi Limixin Teren

9 ¹Nenia at ne Karisito la nenia axo xaxarang. Loroongan Kaala ik lok tatao lodoxoma avukat tarak la ik lok axasep box ia do nenia axo xaxarang. ²A paase ruturun i na dola lainbulu la lebelen tuntun tarak ti lubungmixin tarak i silok aleng. ³La i epovo dola nenia gita xip tutu mi lebelemamao at ne Moroa la gita lox epeseves ia basinge ne Karisito, kusu

ri lok tooro luvutnetak, nedi limixin axa rak me Judaia. ⁴Nedi limixin soksoxolik ka at ne Moroa; la ni ga lok li nedi ngan luvutnitna. Ni ga lok levenekabus eburu minedi la lisisixam teren ga nemen kantubu atdi, la ga raba nedi mi Lenavolo; la diklen langas kusu dina lotu saparav i mi luruturun; la dira ruuna ka vam levengkakaape ren. ⁵Nedi lubangmixin diga ravasu at loxongkulao silok at ne Moroa me gano. La ne Karisito, neni ga vot ngan laradi, neni at nedi na lubangmixin. Ata emi asu mi laasen at ne Moroa neni i lok tatao lempanga axap la kopmen taxavaxap teren! Tuturun.

⁶Nia axo vaase dola, ne Moroa goxo lox epovo laxakaape ren; atla kopmen limixin axap me Israel nedi limixin soksoxolik ka at ne Moroa. ⁷Nedi livipisik li at ne Abaram, ketla kopmen nedi axap luvutnitna ne Moroa. Ne Moroa ga vaase ri ne Abaram keretna,

“Lubungmixin at ne Aisak kusuk mun dinabak lok ngan livipisik li ram.”

Lur 21:12

⁸Lavasuun at na xeretna, kopmen nedi axap livipisik li at ne Abaram di lok ngan lubangmixin tuturun, ketla nedi mun ne Moroa ga xaape midiri ne Abaram di lok ngan lubangmixin tuturun at ne Abaram. ⁹La ne Moroa ga lok mo laxakaape mi na levelinga;

“Ap mo laaleng mokmokso nia anabamlong la ne Sera naba ruuna ka tamdak temes.”

Lur 18:10,14

¹⁰Ketla kopmen neni xusuk mun na. Lumdak at ne Rabeka duga ruuna legese remen du, la neni lurubuno avolo atnedik ne Aisak. ¹¹Ketla avot at livipisik at na lumdak koplaku du gita lok tempanga avukat koplaku tempanga xapmek, ne Moroa ga lox avot be losoksoxolik teren kusu mo losoksoxolik teren naba tu at lodoxoma ren. ¹²Losoksoxolik teren keretna, neni goxo ven ti lugugu atdu, ketla neni ga doma mu lorotoro ren. Kuren la ne Moroa ga lok ti nenen du xeretna,

“Lara avot naba gugu taba lara mumu.”

Lur 25:23

¹³I ngan Lovoang Kaala i tong i xeretna,

“A vara aleng ne Jakop, ketla axo mulus ka ne Esao.”

Mal 1:2-3

¹⁴Ataba tong ka la? Taba tong ka i do na levelinga at ne Moroa ixok mokso? Kopmen tinotno. ¹⁵I ngan mo levelinga ne Moroa ga vaase i ri ne Moses keretna,

“Anaba lox asuusu lebelemumu rak ti nege a doma i, la anaba lox asuusu labalamu rak ti nege a doma i.”

Pas 33:19

¹⁶Loklok at laradi noxo lox i xusu ne Moroa naba soxolik ka i, ketla lebelemumu xusuk mun at ne Moroa. ¹⁷I ngan Lovoang Kaala i vaase mumu ne Parao xeretna,

“Nenia aga lok li u ngan Loorong Silok; lavasuun teren keretna, kusu anaba lox asuusu lolos tarak keneng at lorongtonga xepe ram, la keneng at nai limixin at lavatbung menemen axap dinabaklen laasen tarak.” *Pas 9:16*

¹⁸Kuren la ne Moroa i belemumu nedi do neni i doma di, la i lox amer avavarang levendoxoma atnedi do neni i doma box i xuren.

¹⁹Tara atnemi naba sue ia xeretna, “Dola kuren, Moroa naba sok taba taradi xereva? La nege i epovo xusu na esev eburu mi lodoxoma at ne Moroa?” ²⁰Ketla nege nenu, laradi gamasa, u gagang linga ne Moroa? Ixo epovo do lavat sosopen kangka na susue laradi ik lox i do, “Tila u lox ia xeretna?” ²¹Laradi ga lok mo lososopen kangka, neni xa i epovo xusu neni na lok mo loxompong kangka at langas ua i doma i xuren, la na lok bok tegepu sosopen mi mo mun legese xompong kangka, tara nunuan ti ove at levenaleng silok la tara diba vove min at levenaleng axap.

²²La ne Moroa i lok bok losoksoxolik teren kuren. Neni ga vara i xusu na lox asu lumukmusak teren la na lox ase lololos teren, ketla neni move naba ke amulus nedi limixin dik lox abelemamao i, keke i dola nedi limixin kapmek la i epovo xusu neni na sele utut nedi. ²³La ni ga vara box i xusu neni na lox asu lagale lisisixam teren, no ni ga soli asu i rinedik limixin ua neni ga belemumu dik, la ti nege atdik no neni gara gagas pam di xusu dinaba lok kaka lisisixam teren, ²⁴mo nabak lok tinedik na, neni gara ro ka vam nedik, kopmen do at limixin me Judaia xusuk mun, ketla boro bok at limixin kopmen di me Judaia. ²⁵I ngan neni ga vaase i ro xeneng at lubuk at ne Osea xeretna,

“Limixin di goxo ruuna ka ia, nia anaba tong di do nedi limixin tarak. Lara lubungmixin no nenia a goxo xok di, anaba tong di do nedi at laxat tinotno rak.” *Ose 2:23*

²⁶La neni ga lok bok,

“La to ap mo loxot tino neni ga tong i do, nemi xopmen limixin tarak, mogo neni naba tong di do nedi luvutnitna ne Moroa, mo i rooro.”

Ose 1:10

²⁷La ne Aisaia ga vaase mumu bok leme Israel keretna,

“Limixin bok me Israel di buaang aleng ngan levenit kangkaneng nou saparap laras, ketla teventaba mun atdi naba roo suu. ²⁸Leeme Silok naba lok soso mun ti vorang laxakapmek at limixin at lavatbung menemen axap.” *Ais 10:22-23*

²⁹I ngan ne Aisaia gara tong pam i gano, ni ga lok keretna,

“Amo dola Leeme Silok i lolos aleng gi toxo ke xepe lavalabat atnedik, nedik na gitaba lok kapmek ngan limixin me Sodom, nedik gitaba uu ngan limixin me Gomora.” *Ais 1:9*

Lorongtonga Xepe At Leme Israel

³⁰Ataba tong ka toxolinga salai? Do limixin kopmen di me Israel, nedi di goxok lok tong i xusu dinak mokso at lemeren ne Moroa, ketla diga sepmus mene mumu lunuunu atnedi. ³¹Ketla leme Judaia, nedi lavaanat soksoxolik ka at ne Moroa diga puse ri teventaangas kusu dina nemen

mokmokso at lemeren ne Moroa, la di goxo epovo. ³²Tila ba la di goxo epovo? Atla levempanga diga lox i goxo ru rinotno at lunuunu atdi, ketla at leven gugu mun atdi. Digak sak kikixin at luat, ³³no Lovoang Kaala i paase min keretna,

“Mina ven ba i, a lok li luat to xeneng at lemenemen Saion ti lok limixin dinaba sak kikixin teren. Mo luat naba lok nedi dina subu. Ketla nege do i nuunu ren, neni noxo doma saasaa.” *Ais 8:14, 28:16*

10 ¹Luvutnetak mi luvurinu. Lodoxoma rinotno ro xeneng at laxat tarak do limixin tinotno rak dinaba roo suu. La a ngising amisik ne Moroa rinedi. ²Nenia a epovo xusu ana tong i do nedi di lolos kusu ri lok lugugu ri ne Moroa. Ketla mo lavavara atnedi ri ne Moroa, kopmen na ru rinotno at lakleklen tuturun. ³Nedi di goxoklen langas ti lomokmokso ne Moroa ga lox i rik lox asepmus di basinge laxakapmek, ketla diga puse ngas axa at levendoxoma atnedi; kuren la di goxo raba axa di ri ne Moroa la langas ne Moroa ga lox i rik lox akmokso limixin. ⁴La ne Karisito gara lox epovo vam Lenavolo, kusu nege i nuunu, neni laradi mokmokso.

Langas Ti Linintoo At Limixin Axap

⁵Moses ga malagan levelinga mumu langas ti lomokmokso mi lorongtonga res at Lenavolo, ni ga lok keretna,

“Nege do i mumu asu levempanga Lenavolo i tong i, neni naba lox epovo axav i ri roo suu ren.” *Mas 18:5*

⁶Ketla ana levelinga i paase mumu langas ti lomokmokso saparap ne Moroa mi lunuunu;

“Nemen gat uguta doma raba u mi lususue do, nege naba urut uto vana at laxalibet?” (kusu ri lok ka ne Karisito ude xopak.) *Len 30:13*

⁷La i paase bok keretna,

“Nemen gat uguta lok bok do, nege naba si uto xopak at lemenemen at labarongan?” (kusu ri lox asu ne Karisito basinge limixin diga met pam.) *Len 30:13*

⁸Ketla Lovoang Kaala i lok keretna;

“Levelinga at ne Moroa mo ik lok saparap nimi, nom ik lok at levenbulubun atnimi la no xeneng bok at levempeve atnimi.” *Len 30:14*

Neni na, levelinga at lunuunu nema ma vavang min. ⁹Do mina vaase asu mi levenbulubun atnimi do ne Iesu ni Leeme Silok, la mina nuunu mi lebelen nimi axap do ne Moroa ga lox aroo amlong ne Iesu at lanmet, nemi minaba roo suu. ¹⁰Kuren la nemi do mina nuunu mi lebelen nimi axap, nemi minaba sepmus; la do mina vaase asu i mi levenbulubun atnimi, minaba roo suu. ¹¹Lovoang Kaala i vaase i xeretna,

“Do nege do i nuunu ren, neni noxo doma saasaa.” *Ais 28:16*

¹²Ana levelinga i vung kimit limixin axap, atla kopmen tevereven petpes kantubu at limixin me Judaia la limixin kopmen di me Judaia; Moroa

xusuk mun legese Eme Silok atnedik axap, la ik lox anarong aleng nedi di ngising ti loklok tooro boro ren. ¹³I ngan levelinga at Lovoang Kaala i vaase xeretna,

“Limixin axap di toro ke at laasen at Leeme Silok, dinaba roo suu.”

Jol 2:32

¹⁴Ketla dinaba sing kereva do nedi xovisi dina nuunu? La dinaba nuunu xereva do nedi xovisi dina ronga xaka levelinga? La dinaba ronga ka tavanga salai do kovisi tara na vaase asu tevelinga ridi? ¹⁵La tevelinga naba ravasu xereva mo do dixo riki asu taradi ri vavang min? I ngan Lovoang Kaala i tong i xeretna,

“I lox avukat tinotno lavatpas atnedi di vot mi Lagale Lavavang.”

Ais 52:7

¹⁶Ketla limixin axap di goxo siam kaka Lagale Lavavang. I ngan bok ne Aisaia ga lok keretna,

“Leeme Silok. Goxo buaang nedi diga nuunu at levelinga maga vaase asu i.”

Ais 53:1

¹⁷Kuren la lunuunu it pot do laradi ing tonga levelinga, la levelinga i laala boro at Lagale Lavavang at ne Karisito. ¹⁸Ketla a sue xeretna, i ruturun do di goxo ronga levelinga? Laaba, diga ronga i, i ngan pam Lovoang Kaala i vaase i xeretna;

“Levempapaase atdi ga ravasu ri limixin at lavatbung menemen axap. La levelinga ga vot tinotno ro at latnese at na lavatkangka.” *Sam 19:4*

¹⁹Ana sue bok lususue xeretna; kereva, limixin me Israel di goxo xasep ap mo levelinga? Laaba, diga xasep teren. La ne Moroa ga lok tong i do na sar amlong di. Moses neni lara avot ga tong mo lodoxoma at ne Moroa xeretna,

“Anaba lok nemi xusu minaba reven peves at limixin kopmen dina ruuna toxot keneng at losoksoxolik at ne Moroa; la anaba lok bok nemi xusu mina belemamao mumu lara lubungmixin kopmen dinaklen ne Moroa.”

Len 32:21

²⁰La ne Aisaia ga vaase axasep tinotno xeretna,

“Lara lubungmixin di goxo puse ria ketla diga vuse ka ia, la nia aga vot saparap nedi di goxo susue vupuse ria.”

Ais 65:1

²¹Ketla ti limixin me Israel, Moroa ga vaase xeretna,

“At levenaleng axap agara gagas pam kusu ri siam kaka amlong nedi luvuttadi rongtonga xepe la luvuttadi gagang linga.”

Ais 65:2

Lebelemumu At Ne Moroa Ri Limixin Me Israel

11 ¹A sue bok keretna. Kereva, ne Moroa ga sok tixirixes kepe limixin tinotno ren? Kopmen tinotno! Nenia rinotno vam lara me Israel la nenia at livipisik li at ne Abaram la nenia at libibinat me Benjamin. ²Moroa goxo sok tixirixes limixin teren, neni gara soxolik

ka vam nedi ganoxa at lurutu kaxat. Mina doxoma bok loxot ik lok at Lovoang Kaala i paase mumu ne Elaia la at loxonaleng neni ga vaase ri ne Moroa mumu luruptuvuk at leme Israel? Ni ga lok keretna,

³“Leeme Silok, digara sev amet pam lavaeme vapaase alii ram la digara ut asi levengkonin laplavang tarang; kuren la nenia xusuk ta na legesara ak lok, la mo manga diak lok tong i do dina sev amer ia.”

1 Lav 19:10,14

⁴Lovoporang sala ne Moroa ga raba i min? Ni ga vorang i rin keretna,

“Nenia move a ruuna lavanuti larabin sangsangaun kobot (7000) limixin di kox ia la kovisi dina lotu saparap lomoroa xaxarang ne Baal.”

1 Lav 19:18

⁵Mo levenaleng i lok ngan pam na levenaleng it pot ningina, lentaba mun ne Moroa ga soxolik ka vam nedi keneng at letaba nabalamu ren. ⁶Losoksoxolik teren i tu at letaba nabalamu ren, la kopmen do at levempanga nedi diga lox i. Do losoksoxolik at ne Moroa gita ru at levempanga luvuttadi dik lox i, giba lok ngan do letaba nabalamu ren, kopmen tugugu ren.

⁷Kuren la limixin me Israel di goxo vuse ka lorooro nunuan no nedi diga puse rin. Lenep binam tadi lixilik mene nga no ne Moroa ga soxolik ka nedi, nedi diga vuse ka i; la nedi axap nom, levenbaalung atnedi ga repe ri lorotoro at ne Moroa. ⁸I ngan Lovoang Kaala i vaase xeretna,

“Moroa ga lox angtangku levempeve atnedi eburu mi levendoxoma atdi; di noxo reven mi levengkatli atdi xopla dinang tonga mi levenbaalung atdi i se nga mo lingina.”

Len 29:4

⁹La ne Devit ga vaase bok keretna,

“Keke di, dinak sak baba la leveloklox anarong ne Moroa ga raba di min naba xap, la dina subu la dina lok ka losongsongot. ¹⁰Keke levengkatli atdi nam pamet kusu di noxo reven; la levesi atdi na kauk amisik maxopok at levenaknixip atnedi.”

Ais 69:22-23

¹¹Ana sue bok mi lara lususue. Kereva, limixin me Judaia digak sak kikixin mene nga xopla diga subu epopolo? Digak sak kikixin mene nga. Nedi diga lok laxakapmek, kuren la loklox arooro gat pas tinedi limixin kopmen di me Judaia, kusu ri lok leme Judaia dina puse ri ne Moroa.

¹²Kerepmo laxapmek at leme Judaia ga lox asuusu leveloklox anarong ti limixin at na lavatbung menemen axap; labaava atnedi ga lox asuusu leveloklox anarong ti limixin kopmen di me Judaia. Ketla laxaloklox anarong naba umsu aleng ap mo laaleng do leme Judaia dina nuunu la dina beles keneng at leexes at ne Moroa.

Loklox Arooro Ti Limixin Kopmen Di Me Judaia

¹³Nia a paase nga na rinemi limixin kopmen nemi me Judaia. I ngan ta do nenia laradi vavang ti limixin kopmen di me Judaia la a momo ri lok

na lugugu rak. ¹⁴Nia a lok do mo lugugu rak naba lok bok limixin tinotno rak dinaba vaase mumu ia, kuren la anaba lox epovo i xusu ana lok ka amlong teventaba atdi. ¹⁵At levenaleng ne Moroa ga lok kepe nedi, neni ga vaxat ka limixin at na lavatbung menemen saparav i. Naba lok avukat tinotno do ne Moroa na lox amlong ka leme Judaia. Naba lok ngan ta do luvuttadi met di roo xat amlong ti lorooro. ¹⁶Do di raba toxongkide avot ti ne Moroa, mo axap bok lakde, ateren; la do di raba box i mi levenixe una, levengkakan bok at luuna ni at ne Moroa.

¹⁷Lentaba levengkakan at luuna olip toonu ga repit su basinge luuna ren, la levengkakan at luuna olip aaxa boro at laxairing gara ru kun ta i. Nemi limixin kopmen nemi me Judaia mi lok ngan na levengkakan una aaxa, la na nga mi lolos la mipnovos at lorooro at lroonan atnemi xerekngan leme Judaia. ¹⁸Kuren la nemen gat mita simi aurut nimi mavana ap mo lentaba lengkakan diga subu, atla nemi lengkakan mene nga; la nemi xopmen levenixe una, atla levenixe una ik lox alolos nemi. ¹⁹La nemi minaba lok keretna, "I ruturun, ketla levengkakan ga repit pes la di lox avolo loxot tinama." ²⁰I ruturun. Diga repit pes atla di goxo nuunu, la nemi miga ru kun nedi atla nemi miga nuunu. Ketla nemen gat miguta doma i do mi silok; mina lok tatao nemi kusu nemi bok mi noxo subu. ²¹Ne Moroa goxo ke atnaasan bok leme Judaia do lengkakan tinotno ba ren; kereva, mi lok do ni naba ke atnaasan bok nemi?

²²Kuren la mina ven kisip ba i do ne Moroa i belen tuntun la i tu bok mi loboat. Neni i tu mi loboat tinedi diga subu vam, ketla i belen tuntun tinimi do nemi move mik lok keneng at lebelen tuntun teren; ketla do mixok lok bok keneng teren, minaba repit pes bok. ²³La do leme Judaia dina lok kepe lumun nuunu atdi, dinaba ru amlong to at levengkot nedi diga tu ve gano, atla ne Moroa i epovo ri lok li amlong bok nedi. ²⁴Nemi limixin kopmen nemi me Judaia mi lok ngan laxakan at luuna olip aaxa no ga repit pes la ira ru manga rovana at luuna olip toonu. Ga lolos aleng ti lok mo langas. Limixin me Judaia di lok ngan lengkakan at luuna olip toonu, kuren la ne Moroa i epovo rinotno do na vaxaru amlong lengkakan no ga repit su, atla ni na lok li amlong di ro at luuna akmokso atdi.

Lebelemumu At Ne Moroa Ti Limixin Axap

²⁵Luvutnetak mi luvurinuk. Levelinga ruturun mo ik lox alipe, la a vara i do minaklen i. La ni naba rupe levendoxoma atnemi la mina doma i do lakleklen atnemi i volo lentaba vetpes. Mo levelinga i lok keretna; loonon taba aralu at limixin me Israel basinge ne Moroa noxok lox abao, naba se mun do buaang timixin kopmen di me Judaia dina rem gili saparap ne Moroa. ²⁶La melemu at na, limixin axap me Israel dinaba roo suu basinge loklok nedi digak lok teren. I ngan Lovoang Kaala i tong i xeretna,

“Laradi Loklox Arooro naba laa boro Saion, la na lok kepe laxaloklok kakapmek at livipisik li at ne Jakop. ²⁷Anaba lok na lekabus eburu minedi at loxonaleng nia ana doxoma kepe laxakapmek atnedi.”

Ais 59:20-21, 27:9

²⁸La limixin me Judaia diga xopara Lagale Lavavang, kuren la di lok ngan lavamunepen at ne Moroa la di ru kun tinemi limixin kopmen nemi me Judaia. Ketla mumu mun losoksoxolik axa at ne Moroa, nedi di lok ngan axa larapen tangas teren mumu loxongkulao silok atnedi me gano. ²⁹Moroa kopmen na baba pukus lodoxoma ren tinedi, kuren la neni noxo lok kepe limixin soksoxolik ka ren la leveloklox anarong ni ga raba di min. ³⁰Nemi limixin kopmen nemi me Judaia, nemi miga ronga xepe avot ne Moroa; ketla ana mira ruuna ka vam lebelemumu ren atla leme Judaia diga ronga xepe i. ³¹I sixit emu mene nga xeretna; nemi mira ruuna ka vam lebelemumu at ne Moroa, limixin bok me Judaia mo nga ding tonga xepe ne Moroa, nedi bok dinaba ruuna ka lebelemumu ren. ³²La ne Moroa gara lok li vam limixin axap at loxokoxo at lorongtonga xepe, kusu neni naba lox asuusu lebelemumu ren tinedi axap.

Leemi Asu Ri Ne Moroa

³³“Lapnovos at ne Moroa i silok aleng. Lodoxoma ren la lakleklen teren i si aleng. Nege i epovo xusu na soxomus lavasuun at lodoxoma ren? Nege i epovo xusu naklen avukat leventaangas teren? ³⁴Nege iklen lodoxoma at Leeme Silok? Nege i epovo xusu na vaase aklen i? ³⁵Nege gata raba vam i mi tepanga, xusu neni giba vorang amlong i rin? ³⁶Levempanga axap neni xa ga rudum li di, la levempanga axap ga ravasu mumu xa i la ateran axa, la ata emi asu mi laasen teren amisik la kopmen taxavaxap teren. Tuturun.”

Ais 40:13, Jop 41:11

Lorooro Xeneng At Lugugu At Ne Moroa

12 ¹Luvutnetak mi luvurinuk. I vasuun mun at lebelemumu silok at ne Moroa rinedik, kuren la a sing nemi xeretna; mina raba axap nemi ngan laramtaba i rooro ri ne Moroa ri lok lugugu ren la ti lox amomo i. Neni na langas i lox asuusu lotu ruturun, mina raba i min. ²Nemen gat mita reven seo at laxaloklok at na lavatbung menemen, ketla mina ke ne Moroa na lox ekun levendoxoma atnemi mi lodoxoma ren kusu miba ravasu ngan luvuttadi maxat at levempanga mik lox i, la minaba epovo ba xusu mina long lenget ka lodoxoma at ne Moroa ri levempanga i lox avukat la ik lox amomo i la ik mokso.

³La mumu mun letaba nabalamu at ne Moroa ria, a vaase i na rinemi axap keretna; nemen gat nemi miguta mi aurut nemi do mi silok ti mo lentaba vetpes, ketla mina viila mumu avukat lorooro atnemi la mina ven nemi do lunuunu atnemi i epovo mun mi lodoxoma at ne Moroa tinemi

xuren. ⁴Nedik di ruuna levenasen kot axap at labantuxu atnedik, la mo levenasen kot axap di ruuna levenasen gugu vetpes. ⁵I lok ngan pam nedik axap na nedik di buaang, ketla nedik di lok ngan legesa bantuxu mene xeneng at ne Karisito la nedik dik lox eburu ngan levenasen kot axap at legesa bantuxu mun. ⁶Nedik di ruuna leventamtaba vetpes; kuren la nedik atana gugu mi leventamtaba vetpes atnedik i ngan letaba nabalamu ne Moroa ga raba nedik min. Do laramtaba atnedik ti paase levelinga at ne Moroa, ata lox epovo i ngan lunuunu atnedik di ruuna i xuren. ⁷Do laramtaba atnedik tik lok tooro, atak lok tooro. Dola ti lox ase, atak lox ase. ⁸Mo dola ti paase tooro lentaba vetpes, ata lox epovo box i xuren. Mo dola tim taba, ata raba solo mi lempanga atdik; mo dola ti lok tatao limixin, ata lok tatao avukat di; mo dola ti belemumu leventaba vetpes, ata lox epovo i mi lomomo.

Labalamu

⁹Nemen gat miguta voovo mene i do mi ruuna labalamu, ketla mina balamu rinotno limixin axap. La mina sok tixirixes kepe leveloklok kapmek, la minam tebeng alolos at leveloklok avukat. ¹⁰Mina balamu rinotno leventaba vetpes i ngan loxoeton tinotno xeneng at ne Karisito, la mina lolos amisik kusu ri lox asuusu loklok ngangao atnimi ti leventaba vetpes. ¹¹Mina gugu lolos, la nemen gat migutak molo. Mina gugu taba Leeme Silok mi lebelen nimi la lodoxoma axap atnimi. ¹²Lodoxoma voovo atnemi na umsu mi lomomo. Minak lok atnaasan at levenaleng mi ekip tangarang mi levenmumuat, la mina ngising amisik. ¹³Mina lox epovo lavakpakes at limixin at ne Moroa, la mina lok maraose mi limixin petpes.

¹⁴Mina ngising ne Moroa xusu neni naba lox anarong nedi di raba nemi mi losongsongot la nemen gat mita tong taba di mi lasaxaek. ¹⁵Mina lok momo minedi di momo la minang teng buru minedi ding teng. ¹⁶Mina nemen eburu mi limixin axap at limila. La nemen gat mita xip aurut axa nemi, ketla mina siam kaka leven gugu ik lok kopok. Nemen gat miguta doma i do lakleklen atnimi i volo aleng.

¹⁷Do tara na lok laxakapmek tinemi, nemen gat miguta vorang i mi laxakapmek. Mina lok tong pen tinotno i xusu mina lok levempanga ik mokso ro melango at limixin axap. ¹⁸Mina lok lempanga avukat i epovo atnimi, kusu minabak lok at lenmila eburu mi limixin axap. ¹⁹Larapen tangas tarak, nemen gat miguta belemamao kaxat kusu ri vorang tavanga, ketla mina ke xepe ne Moroa na lok asuusu lebelemamao ren; atla Lovoang Kaala i vaase i xeretna,

“Leeme Silok ne Moroa i vaase xeretna, ‘Nenia anaba ru kun la ana lok lugugu rak, la nenia anaba lok lovoporang at levempanga.’” *Len 32:35*

²⁰Ketla nemi mina lox i ngan Lovoang Kaala i tong box i xeretna,

“Dola taradi munepen atnemi na roxo, mina raba luxa i; do neni na minu, mina raba i mi taxadan tin; la mo do mina lox i na loklok, i ngan ta do mim subunga li laxao liplivi ro at lavatlak teren.” *Ler 25:21-22*
²¹Nemen gat miguta ke xepe laxapmek na sev asi nemi; ketla mina sev asi laxapmek mi loklox avukat.

Loklok Maxopok At Lubung Amgomgo

13 ¹Limixin axap dinak lok maxopok at lubung amgomgo at lagavaman atnedik, atla kopmen taasen silok goxo vot gamasa, Moroa xa ga lok li nedi. La lagavaman atdik, ne Moroa ga lok li di. ²Kuren la, nege do kopmen na ronga res at lubung amgomgo, i lok ngan do neni i lox abulubun ne Moroa, la laradi do i lox i na, neni naba ru at lavapaase nop mo loklok teren. ³Limixin di lok luvukat, di noxo marat at luvuttadi amgomgo, ketla nedi di lok laxakapmek dinaba marat atdi. Kereva, mi vara i do mi noxo marat at luvuttadi di ruuna levenasen silok? Do mi vara i xuren, minak lok luvukat kusu dinaba emi asu minimi, ⁴atla nedi luvuttadi gugu at ne Moroa la di gugu ri luvukat atnemi. Ketla do mina lok laxapmek, mina marat atdi, atla nedi di ruuna lolos ti lok li nemi at loxokoxo. Nedi lavasaxaruki at ne Moroa la dik lok na lugugu at ne Moroa xeneng atnedi dik lok laxapmek. ⁵Kuren la i epovo rinotno do minang tonga res at luvuttadi di ruuna levenasen silok, kopmen dola mina doma xusuk mun lumukmusak at ne Moroa, ketla mumu bok lodoxoma avukat atnemi i tong box i do minang tonga res.

⁶Ni lavasuun bok at na la nemi mi kepe vempilas atla nedi na luvuttadi amgomgo di gugu ri ne Moroa at loxonaleng di lox epovo lugugu atnedi xeneng atnedik. ⁷Mina raba di mi levempanga di ngising tin. Do nedi dina sing pilas, mina kepe pilas; dola ri loklok ngangao, mina lox asu bok loklok ngangao atnemi rinedi.

Labalamu La Lenavolo

⁸Nemen gat miguta sing kaka tavanga at tara vetpes, kusu miba vorang bok ba i rin, ketla mina lolos kusu mina raba labalamu ri leventaba vetpes. Nege do i balamu leventaba vetpes, na i lox asuusu i do neni ing tonga res at Lenavolo. ⁹Lasangaun lenavolo i lok keretna,

“Nemen gat uguta longka; nemen ugutap sev amet tadi; nemen gat utam nem panga; nemen gat lodoxoma ram na xipgas levempanga at tara vetpes;” *Pas 20:13-15,17*
 la leventaba levempanga bok ik lok keneng at Lenavolo. La lavasuun atnedi axap na levenngas linga i lok keretna,

“Una balamu leventaba vetpes ngan u balamu axa u.” *Mas 19:18*
¹⁰Nege do i balamu lara vetpes, neni xopmen tinotno noxo lok laxakapmek tin. Do mina balamu, i ngan do mi ronga res at lasangaun axap Lenavolo.

¹¹Mina lox epovo loklok at labalamu, atla nemi miklen loxonatat aleng sala nga i mo. Loxonaleng ira vot pam tinimi ri aus kaxat at lanunga, atla loxonaleng tidik ti roo suu, mo ira auret ta; gano at laaleng nedik diga nuunu kaxat avot teren ga vaxalom. ¹²Noxo lox abao la lamain na xap, la laaleng kangking na vot ta. Mina xap ta at loklok laxampanga at lamain, la mina lok kaka levempanga esep ti esep at laaleng kangking. ¹³Mina lok kaka luruvtuvuk nunuan, na ngan do limixin dik lok keneng at laxasep at laaleng kangking; nemen gat miguta raba gamasa lorooro atnemi ri levempanga ik lok kapmek lorooro, ngan liinin tangtangu laxangkadan lolos, loklok kakapmek maxamang at lixitkis epot, lengkot mamangan, lekarakat, la levereven peves. ¹⁴Ketla mina lok ka levempanga esep at Leeme Silok ne Iesu Karisito, la mina doxoma xepe leveloklok kakapmek ngan lavavara at labantuxu mun.

Nemen Uguta Viila Loklok At Tara Vetpes

14 ¹Mina siam abeles kaka mo laradi keneng at lotu atnemi, lunuunu ren kopmen na lolos, ketla nemen gat miguta etep mi levelinga eburu min mumu mo leveloklok ik paxaru kaxat lekarakat. ²Lunuunu at laradi ik lox i xusu neni i epovo ri anan at levenasen luxa axap, ketla laradi lunuunu ren kopmen na lolos, neni i anan mun levempanga boro xataamang. ³Laradi do i anan gamasa guta lox abulubun gat lara do i anan mun levenbi; la neni do i anan levenbi, guta lok abulubun gat mo laradi ga siam kaka i ri anan levenasen luxa axap, atla ne Moroa gara siam kaka vam i. ⁴Kopmen lugugu atnemi kusu mina viila mumu loklok at laradi gugu at lara vetpes. Keke mulus i, do neni na ru lolos koplana subu, ketla lavanga xusuk mun atdu mi lamgomgo ren. Ketla neni naba ru lolos, atla Leeme Silok mun i epovo ri lox alolos i.

⁵Tara taradi naba doma i do lara laaleng move neni laaleng silok tinotno la tara vetpes naba doma i do levenaleng axap i epovo mene nga. La nedu getgesara xa dunak lox alolos levendoxoma atnedu xuren. ⁶Nege i doxoma alolos i do lara laaleng move i silok, neni i lox i mi loklok ngangao ren ti Leeme Silok. Nege do i anan gamasa levempanga axap, i lok box i mi loklok ngangao ren ti Leeme Silok, atla neni i tong loklox avukat ti ne Moroa ri levempanga anan. Nege do kopmen na anan teventaba teveluxa, neni i lok box i mi loklok ngangao ren ti Leeme Silok, la i tong loklox avukat bok ti ne Moroa rin. ⁷Kopmen teta atdik na ruuna torooro xusu tin kusuk mun, la kopmen bok teta atdik na see ka lanmet do tin kusuk mun. ⁸Nedik di rooro, di rooro ri Leeme Silok la nedik di remet nop bok laasen at Leeme Silok; keke i do ata met koplana rooro, ketla nedik move at Leeme Silok.

⁹Ni lavasuun teren la ne Karisito ga met la ga roo xat amlong kusu neni naba lok ngan Leeme Silok tinedi di rooro la tinedi bok diga met pam. ¹⁰Tila ba mi

viila mumu leveloklok at luvutneton nimi? Tila la mi lox abulubun di? Nedik axap na tanaba ru ro melamgo at ne Moroa, la neni naba reven mumu loklok atnedik axap. ¹¹I ngan Lovoang Kaala i vaase levelinga at Leeme Silok keretna, “Leeme Silok ne Moroa i lok keretna. I ruturun do nenia a rooro, la i ruturun bok do limixin axap dinaba xis mi lempatgulom atdi ro melamgo rak, la limixin axap dinaba tong asu i do nenia ne Moroa.” *Ais 49:18*
¹²Kuren la nedik axap ataba raba lavapaase axasep ti ne Moroa mumu lrooro atdik.

Nemen Gat Uguta Lox Asubu Netam

¹³Kuren la mina xap ta at liviila mumu leveloklok at luvutneton nimi. La mina doma i do nemen gat miguta lok tavanga ri lok luvutneton nimi na sak kikixin koplā na subu beles ti laxapmek. ¹⁴Loklok tarak eburu mi Leeme Silok ne Iesu i lox ia la nia aklen tuturun i do kopmen tempanga anan na bilinga varang gamasa mene nga; ketla do taradi xa na nuunu do lempanga anan mo i bilinga, mo lempanga anan naba bilinga rin. ¹⁵Mo do mina lox abulu luvutneton nimi at leveluxa nemi mi anan i, nemi mixo lox asuusu labalamu. Nemen gat miguta lok leveluxa no nemi mi anan i na lox asubu rinotno laradi no ne Karisito ga uu xorop tin. ¹⁶Nemen miguta lok tavanga no nemi mi doma i do i lox avukat la na lok kapmek levenasen atnimi. ¹⁷Linintoo at ne Moroa neni kopmen loklok ti anan la ti inin, ketla neni lomokmokso, la limila, la lomomo at Loroonan Kaala im taba i. ¹⁸La dola nege i lox epovo lugugu ri ne Karisito at na langas, neni ba lox amomo ne Moroa la limixin diba lok momo mi na loklok teren.

¹⁹Kuren la minak paxaru li levendoxoma atnemi at levempanga naba raba nimi mi limila, la naba lok tooro bok ti lox alolos lunuunu at limixin axap. ²⁰Nemen gat miguta sele utut lugugu ne Moroa gara lok pam i, mumu mun leveluxa mi anan i. Leveluxa axap, i epovo do mina anan i, ketla i lok kapmek do mina an tavanga naba lox asubu luvutneton nimi uto xeneng at laxapmek. ²¹Langas avukat mene minaba lox i xeretna, mina xap ta at laanan levempanga lolos la liinin kadan lolos la teveloklok sala bok naba lok luvutneton nimi dina subu.

²²Mina rebeng alis lunuunu atnimi at na levempanga xantubu atnemi mi ne Moroa. Luvukat ti mo laradi kopmen na suma xapmek at loxonaleng ni i lok lempanga ua neni i doma i do ik mokso. ²³Ketla do tara na anan aptaptang gamasa tavanga ua ixo anan i, ne Moroa naba lox abaava i at loxonaleng do neni na anan i, atla neni xopmen na anan i mi lunuunu ren. Kuren la, levempanga salai do kopmen na tu at lunuunu atnimi la do mi lox i, neni laxapmek.

Mina Momo Mi Leventaba Vetpes La Kopmen Do Nemi Axa

15 ¹Nedik lunuunu atnedik i lolos, ata xip tooro nedi dixo lolos mi levenaknixip atnedi. La nemen gat dik guta doma xusuk mene

nedik la ata lox amomo dik. ²Ketla ata lox amomo luvutneton nedik la ata lok tooro di, kusu ri lox aru alolos lunuunu atnedi. ³I ngan ne Karisito goxo momo axa min. Ketla loklok teren i lok ngan Lovoang Kaala i tong i xeretna, “Levelinga xapmek atnedi diga tong asu i ru, ga subu mavana rak.”

Sam 69:9

⁴Levempanga axap ik lok at Lovoang Kaala, diga malagan i gano xusu ri lox ase nedik, kusu nedik ataba lok kaka lodoxoma voovo xeneng at Lovoang Kaala mo im taba dik mi loklox atnaasan la lavapaase tooro.

⁵La a vara i do ne Moroa at loklox atnaasan la at lavapaase tooro na raba bok nemi mi luruburu xantubu atnemi xa na ngan langas ne Iesu Karisito gara lok pam i, ⁶kusu minaba ruuna mun legesa doxoma la nemi eburu minaba emi asu mi laasen at ne Moroa la neni ne Temen Leeme Silok atnedik ne Iesu Karisito.

Lagale Lavavang Ti Limixin Kopmen Di Me Judaia

⁷Kuren la mina esiam ela xaka atnaasan nemi getgesara, i ngan bok ne Karisito gara siam kaka vam nemi kusu mina lox asuusu leemi asu ri ne Moroa. ⁸Nenia a tong i rinemi do ne Karisito i lok ngan lasaxaruki at leme Judaia kusu ri lox asuusu i do ne Moroa neni i ruturun mi levelinga ren la ti lox asorun bok levengkakaape at ne Moroa eburu mi loxongkulao silok me gano, ⁹la ti lox avolo limixin kopmen nedi me Judaia xusu dina epovo ri emi asu mi laasen at ne Moroa mumu lebelemumu ren. I ngan Lovoang Kaala i vaase i xeretna,

“Ni lavasuun teren la anaba tong loklox avukat tu xantubu at limixin kopmen di me Judaia, la anak pixan ti emi asu mi laasen taram.” *Sam 18:49*
¹⁰La i vaase bok keretna,

“Nemi limixin kopmen nemi me Judaia mina momo eburu mi limixin at ne Moroa.” *Len 32:43*

¹¹La i vaase bok keretna,

“Nemi axap limixin kopmen nemi me Judaia, mina emi asu mi Leeme Silok, la limixin axap dinak pixan emi asu bok min.” *Sam 117:1*

¹²La ne Aisaia i vaase bok keretna,

“Lara at livipisik li at ne Jesi naba vot; la neni naba ravasu xusu ri lok tatao limixin kopmen nedi me Judaia, la dinaba lok li levendoxoma atnedi ren.” *Ais 11:10*

¹³A ngising do ne Moroa at levendoxoma voovo axap, na suxa aumsu nemi mi lomomo la limila mumu lunuunu atnemi saparav i, kusu levendoxoma voovo atnemi naba su silok eburu mi lolos at Loroonan Kaala.

Levelinga Loklox Alolos At Ne Pol

¹⁴Luvutnetak mi luvurinuk. Nenia a suma rinotno i dola nemi mi umsu mi luvukat, la mi umsu bok mi lakleklen, la mi epovo xusu mina elox ase

ela. ¹⁵Ketla keneng at na lovoang a malagan levelinga lolos kusu ri lox axasep levendoxoma atnemi ri levempanga nenia agara vaase vam nemi min. Nenia a epovo ri paase lolos tinimi mila gano ne Moroa ga raba ia mi na lugugu, ¹⁶i ngan laradi gugugu at ne Iesu Karisito ti gugugu ri limixin kopmen nedi me Judaia. A vavang mi Lagale Lavavang boro at ne Moroa ngan lamaasa, kusu ne Moroa naba siam kaka limixin kopmen di me Judaia ngan laramtaba at Loroonan Kaala ga gagas min tin.

¹⁷Nenia at kis esogo eburu mi ne Iesu Karisito, kuren la nia a epovo xusu ana momo at lugugu rak ti ne Moroa. ¹⁸Anaba paase xusuk mun at levempanga ne Karisito gara lok tooro vam ia min la ti lam kaka limixin kopmen di me Judaia xusu dina ronga res at ne Moroa xeneng at levelinga rak la leven gugugu rak, ¹⁹la keneng bok at lolos at leveloklok katling la levempanga sangsangu, la at lolos at Loroonan Kaala. La at lempatpas tarak boro Jerusalem uto Ilirikam la mo levenmenemen kantubu, agara vaase asu avukat pam Lagale Lavavang at ne Karisito. ²⁰Lodoxoma amisik tarak kusu ana paase asu Lagale Lavavang to at levenmenemen di goxovisi gita ronga ka na Lagale Lavavang, kusu a noxo ru mun pana at lugugu laradi vetpes gara lok pam i. ²¹I ngan Lovoang Kaala i vaase i xeretna, “Nedi di goxo tong i ridi, dinaba ven kibis i, la nedi di goxovisi gita ronga i, dinabaklen i.”

Ais 52:15

²²Neni lavasuun teren la buaang levenaleng nenia goxo epovo agita vot saparap nemi.

Lodoxoma At Ne Pol Kusu Tit Pas Uto Rom

²³Ketla amo ba ara lox axap ba lugugu rak at na levenmenemen, la agara vavara amisik at laxanmaares kusu anabat pas la ana ven nemi. ²⁴La a doma i do anaba lox epovo ba i mo. A vara i do anaba ven nemi at loxonaleng nenia ana lok lavatpas tarak uto Spein, la minaba lok tooro box ia rit pas ugo melemu at loklok tarak eburu minemi at lentaba levenaleng. ²⁵Ketla amo nga, anat pas be uto Jerusalem kusu ri lok lugugu at ne Moroa xeneng at limixin teren go. Nia anabat pas ugo, ²⁶atla limixin at ne Moroa boro Masadonia la boro Grik di vara i xusu dina raba leventamtaba loklok tooro atnedi ri limixin banbalo dik lok kantubu at limixin at ne Moroa ro Jerusalem. ²⁷Nedi xa diga doma i do dina lox i, atla di suma i do diga lok kaka lalokloklox anarong solo xeneng at Lagale Lavavang ga ravasu at levenngusno at limixin nuunu boro Jerusalem. Kuren la limixin kopmen nedi me Judaia di doma i do di gugugu porang ti leme Judaia mi leveloklox anarong at labantuxu. ²⁸Do ana lox epovo axav i na la ana raba axap levempilas diga gagas li i xusu rinedi, ana gagas ba rit pas uto Spein, la ap mo lavatpas tarak uto, anaba ven ba nemi. ²⁹Do nenia ana vot posiga nemi, aklen tinotno i do anabat pas eburu mi loklox anarong silok tinotno at ne Karisito.

³⁰Luvutnetak mi luvurinu, a sing nemi xeneng at laasen at Leeme Silok ne Iesu Karisito la labalamu at Loroonan Kaala im taba i. A vara i xusu mina lok tooro ia mi levesingising ti ne Moroa ri loklok tatao ren tia. ³¹Mina ngising ti ne Moroa xusu neni nabak lok tatao ia at lavatpas tarak keneng at limixin dixo nuunu dik lok keneng at lenep Judaia, la lugugu bok tarak keneng at lemenemen silok Jerusalem kusu limixin at ne Moroa mego dinaba siam kaka i. ³²Kuren la nenia anaba vot pasa nemi mi lomomo, do lavavara at ne Moroa xuren, la anaba lok kaka lolos eburu bok minemi. ³³A vara i do ne Moroa at limila nak lox eburu minemi axap. I ruturun.

Levempapaase Loklok Momo

16 ¹Na levelinga ti vaase axasep nemi mi lara neinen dik laasen teren ne Poebe, la neni ga lok lugugu silok keneng at lotu at lemenemen Senkiria. ²Mina seega rangarang i keneng at laasen at Leeme Silok, i epovo mi loklok at limixin at ne Moroa, la minabak lok tooro i at levempanga neni bak pakes tin; atla neni garak lok tooro vam buang limixin, la nenia bok.

³A lox aonon lavapaase momo rak ti ne Pirikila mi ne Akuila, nedu lenasun duga gugu eburu minia xeneng at lugugu at ne Iesu Karisito, ⁴la duga abelemes tinotno bok mi lorooro atdu ri lok tooro ia, la kopmen do nenia xusuk, ketla limixin axap bok at laraugu lotu atnedi kopmen di me Judaia. ⁵Lavapaase momo bok tinedi dit pot buru ro at loogu atdu. Lavapaase momo bok ti lentangas orong tarak ne Epinitas, neni laradi avot at lenep Asia ga nuunu at ne Karisito. ⁶Lavapaase momo bok ti ne Maria ga gugu lolos ti lok tooro nemi. ⁷Lavapaase momo bok ti ne Endronikas mi ne Junias luradi me Judaia no dugak lox eburu minia ro at loxokoxo; la luvuttadi vavang diklen avukat nedu la nedu duga lok ngan luradi mumu asu ne Karisito avot tia. ⁸Lavapaase momo bok tarak ti ne Apilietas lentangas tarak keneng at lurutu buru at Leeme Silok. ⁹Lavapaase momo bok ti ne Eban laradi gugu bok tarak keneng at lugugu at ne Karisito la ti lentangas orong tarak ne Sitakis. ¹⁰Lavapaase momo bok ti ne Apelis, ga lox asusu i do luruburu ren mi ne Karisito i tu atmatkun. Lavapaase momo bok ti ne Aristabalas midi loxoetemen. ¹¹Lavapaase momo bok ti ne Erodian leeme me Judaia la ti luvutnetak at laasen at Leeme Silok dik lok at loogu at ne Nakiso. ¹²Lavapaase momo bok tarak ti ne Taraipina mi ne Taraiposa nedu lutkin du gugu lugugu at ne Moroa la ti lentangas orong bok tarak ne Pesis neni latkin gak lok lugugu silok at Leeme Silok. ¹³Lavapaase momo bok ti ne Rupas laradi i gugu avukat lugugu at Leeme Silok, la ti nenen bok no gak lok tatao ia ngan ta do ne nitna. ¹⁴Lavapaase momo bok tarak ti ne Asinkritas, la ne Peligon, la ne Eramas, la ne Patrobas la ne Eemes, la nedi bok luvutnetak

keneng at laasen at ne Karisito mo dik lox eburu minedi. ¹⁵Lavapaase momo bok ti ne Pilologas mi ne Julia, ti ne Nerius bok mi neinen, la ti ne Olimpas bok eburu mi limixin axap at ne Moroa mo dik lox eburu minedi. ¹⁶Mina eseega rangarang mi lenetnes i xaala. Limixin axap bok at laraugu lotu at ne Karisito di lox aonon lavapaase momo atnedi rinemi.

Levempapaase Avit

¹⁷Luvutnetak mi luvurinuk, mo nga a sing nemi; minak lok tatao nemi basinge luvuttadi no dik lok do dinak lok levenekarakat, la dik lox antun lunuunu at limixin la nedi no dik lox abulubun leveloklox ase nemi migara lok kaka vam i; minak lok petpes basinge nedi. ¹⁸Leventaba dik lok mo leveloklok, kopmen dina gugu ri Leeme Silok atnedik, ne Karisito, ketla di gugu mun tinedi xa. Levempapaase atnedi ik lox avukat tinotno eburu mi levendoxoma atnedi; kerepmo dik lox atdan kaka limixin, lunuunu atdi xopmen na lolos, kusu dina sar asoogong di. ¹⁹Limixin axap digara ronga vam lorongtonga res atnemi saparap Lagale Lavavang, kuren la a momo aleng minemi. Ketla a vara i do minaklen leveloklox avukat, la mina ven kepe lavanga i lok kapmek.

²⁰La ne Moroa laradi at lenmila, mo ma lixilik na but povorok ne Satan to maxopok at lengkangkedek atnemi.

Letaba nabalamu at Leeme Silok atdik ne Iesu nak lox eburu minemi.

²¹Ne Timoti bok laradi gugu rak i lox aonon lavapaase momo ren tinemi; nedi mi ne Lusias, la ne Jeson, la ne Sosipata; nedi legesa vapaase rak boro Judaia.

²²Nenia bok na ne Tetias, a ru katling ne Pol ti malagan na lovoang;^a a lox aonon lavapaase momo xeneng at laasen at Leeme Silok.

²³Ne Gaius laradi no nema mak lok lotu ro at loogu ren i lox aonon lavapaase momo bok teren tinemi.

La ne Erastas bok laradi ik lok tatao lempilas at lemenemen silok eburu mi neton nedik ne Kuatas nedu du lox aonon bok lavapaase momo atnedu. ²⁴Letaba nabalamu at Leeme Silok atdik ne Iesu Karisito nabak lox eburu minemi axap. Tutturun.

Lisingising Loklox Axap

²⁵Ata emi asu mi laasen at ne Moroa. Neni i epovo ri lox aru lolos lunuunu atnemi, mumu Lagale Lavavang nenia a vavang min. Ni Lagale Lavavang at ne Iesu Karisito, mo lavapaase asu at luruturun gak lok lipe at laxanmaares buaang. ²⁶Ketla amo nga, mo levelinga ruturun gara ru asuvos pam ti laxasep, keneng at levenmamalagan at luvuttadi vapaase alii; ne Moroa laradi xopmen taxavaxap teren ga vaase asu i xusu

^a 16:22 Pol ga vaase i na levelinga ri ne Tetias la neni ga malagan i.

limixin at laranep silok axap dinabaklen i, la nedi axap dinaba nuunu ren la dinang tonga res teren. ²⁷Ata emi asu kusuk mun mi laasen at ne Moroa neni laradi ak leklen la leemi asu bok tin mumu lugugu at ne Iesu Karisito amisik la kopmen taxavaxap teren. I raturun.

1 Korin

Lovoang Avot At Ne Pol Ti Limixin Nunu To Korin

Levelinga Loklox Axasep

Lamaares 57 A.D.

Ne Pol gak lok to Epesas la ni ga malagan na levelinga rinedi limixin nuunu ro Korin. Korin neni lemenemen gak lok gomgo to lenep silok Grik. La keneng at nai lemenemen lentaba luvuttadi nedi leme Grik la lentaba nedi me Judaia. Mo luvuttadi digak lok go buaang atnedi digap novos aleng la diga ruuna buaang laxampanga solo la diga ruuna bok levenakleklen silok, ketla nedi diga lotu parap lempoovo vanga la levesumsuma xapmek bok at na lavatbung menemen ga umsu nga xeneng at levendoxoma atdi. At lavatpas sepsev agepura at ne Pol, neni ga vaase asu avot mo Lagale Lavavang tinedi limixin to Korin. Neni ga anasa go at lamaares kudun la loxot atat. (Leven Gugu 18:1-17) Melemu at nai Apolos gat pas ugo la ga vavang; la ne Pol ga ronga levelinga mumu nedi limixin nuunu boro Korin do goxo lok nunuan, la nedi bok limixin me Korin diga malagan aonon lovoang ti ne Pol la diga sue i mi lentaba lempanga bok. Kuren la ne Pol ga lox aonon na lovoang tinedi la ga malagan li levelinga lolos tidi mumu leveloklok kakapmek atdi, la ga vorang bok levesusue atdi.

Lengkot silok at lovoang 1 Korin:

- 1:1-9 Lempapaase loklok momo at ne Pol tinedi.
 - 1:10-4:21 Pol ga vaase sok di mila diga epeseves.
 - 5:1-7:40 Lorooro at laradi nuunu la lavaun epot.
 - 8:11-11:1 Leventuptuvuk diba mu asu i.
 - 11:2-14:40 Limixin nuunu di lok ngan labantuxu at ne Iesu.
 - 15:1-58 Laxakatu kaxat amlong at ne Iesu boro at lanmet.
 - 16:1-4 Lempilas uto at limixin boro Jerusalem.
 - 16:5-24 Pol ga lox axap levelinga ren.
-

Lavapaase Axasep

1 ¹Nenia ne Pol. Nema' mi ne Sositenes, neni neton dik at laasen at ne Karisito ma vaase momo rinimi. Moroa ga ro ka ia kusu ana paase asu Lagale Lavavang at ne Iesu Karisito ngan laradi vavang teren.

²A malagan i na lovoang tinemi limixin at ne Moroa dom Korin; la ne Moroa ga lox akmokso luruptuvuk atnimi at lekngen ne Iesu Karisito xusu nemi limixin dadat teren. Moroa ga ro xaka vam nimi do ateren; la nemi mit kis esogo amisik mi ne Iesu Karisito, kerekngan limixin to at lengkot axap di lotu parap Leeme Silok atdik ne Iesu Karisito, neni Leeme Silok atdi la Leeme Silok bok atdik.

³Letaba nabalamu mi lenmila rinimi boro at ne Temen nedik la Leeme Silok ne Iesu Karisito.

Lempang Avukat Ne Moroa Ga Raba Nedik Min

⁴Do nia a ngising, a tong loklox avukat amisik ti ne Moroa mumu nimi, mila ni ga raba nemi mi letaba nabalamu ren keneng at laasen at ne Iesu Karisito; ⁵la kantubu at nom mirapnovos pam at leveloklox anarong at ne Moroa, i ngan laramtaba ri tong asu levelinga at ne Moroa la lakleklek nunuan at levelinga at Lovoang Kaala. ⁶La kerepmo neni ga lox asusu i rinimi do lavavang mumu ne Karisito maga tong asu i rinimi ga ruturun. ⁷La livipisik teren keretna, ne Moroa ira raba vam nimi mi leveloklox anarong axap la mi noxotkis pakpakes bok ba se at nom laaleng Leeme Silok atdik ne Iesu Karisito naba vor asaxaven, i ngan tai mo mi nemen tangais i mi lomomo. ⁸Neni bok naba lox alolos lunuunu atnimi se at laaleng kavaxap la kerepmo at laaleng ete at Leeme Silok ne Iesu Karisito neni noxo ven terek kaka laxakapmek atnimi. ⁹Moroa ga ro xaka vam nimi xusu minat kis esogo mi ne Iesu Karisito, Nitna ne Moroa; neni Leeme Silok atdik. Moroa neni laradi ruturun la naba lox epovo levelinga neni ga tong li i.

Pol Ga Vaase Lolos Mumu Lixitkis Ekarakat

¹⁰Luvutnetak mi luvurinuk. At laasen at Leeme Silok atdik ne Iesu Karisito, a sing nimi do nemi axap mina etaba belen, kusu kopmen tekarakat noxo nemen kantubu atnimi. Nemi axap mina ru buru mi legeso doxoma la mi lumulus at lebelen nimi. ¹¹Luvutnetak mi luvurinuk. Nia a tong i na rinimi mila lentaba di nemen at loogu at ne Koloii digara tong asu vam i ria do lekarakat mo i nemen kantubu atnimi. ¹²Lekarakat atnimi i lok keretna; nemi getgesara mi epaase mi levempapaase xopmen nak mokso. Lentaba di lok, "Nema at ne Pol." La lentaba di lok, "Nema at ne Apolos." La lentaba di lok, "Nema at ne Pita." La lentaba di lok do, "Nema at ne Iesu Karisito." ¹³Kereva, i lox avukat do limixin at ne

Karisito dina epeseves? Kereva, nenia ne Pol aga uu nop loklok atnimi rovana at laxaba? Kereva, miga lok ka lesepe susu at laasen at ne Pol? Kopmen tinotno.

¹⁴Nia a tong loklox avukat ti ne Moroa do nenia xopmen a goxo sep susu buaang tentaba atnimi, kusuk mun ne Krispas la ne Gaius; ¹⁵kuren la kopmen tara i epovo na tong i do miga lok ka lesepe susu at laasen tarak la nemi at ne Pol. ¹⁶Aga sep susu bok ne Stepanas eburu minedi diga nemen at loogu ren, ketla axo xasep do aga sep susu bok tentaba vetpes. ¹⁷Karisito goxo riki ia xusu ana sep susu limixin. Ni ga riki ia xusu ana tong asu Lagale Lavavang. La nenia xopmen goxo tong asu i mi lakleklen at limixin mun. Do kuren, a lok laniu at ne Iesu ngan lavanga gamasa la kopmen tololos teren.

Lololos Mi Lakleklen At Ne Moroa Ne Iesu Ga Lox Asuusu I

¹⁸Lagale Lavavang mumu laniu at ne Iesu rovana at laxaba i lok ngan lavanga gamasa rinedi diba seeve; ketla tinedik, limixin atanaba roo suu, Lagale Lavavang i lok ngan lololos at ne Moroa rinedik. ¹⁹At Lovoang Kaala Moroa ga lok keretna,

‘Aba lok kapmek levendoxoma atnedi limixin dokdodoxoma, la ana uulu lakleklen atnedi limixin akleklen.’ *Ais 29:14*

²⁰La kereva ba levelinga at limixin dokdodoxoma? La kereva ba levelinga at limixin akleklen? La kereva ba levelinga at limixin di etep mi levelinga at na lavatbung menemen? Moroa ira lox asuusu vam i do levelinga at na lavatbung menemen ni lavanga gamasa.

²¹Moraa i ruuna lakleklen solo la ni ga lok pe limixin akleklen kusu kopmen di noxo epovo na vuse sa ren mi lakleklen atdi xa. Ketla ne Moroa ga lok losoxovo do ni naba lox arooro nedi dina nuunu at Lagale Lavavang, keke i do limixin di tong i do Lagale Lavavang ni lavanga gamasa. ²²Limixin me Judaia di vara tempanga sangsangu ri lox aruturun Lagale Lavavang la limixin me Grik di vara mene levendoxoma nunuan. ²³Ketla nema ma vavang mene mi laniu at ne Karisito ga uu rovana at laxaba; i lolos aleng do leme Judaia dina nuunu do Lanarong ga uu xerepmo, kuren la di noxo nuunu at ne Karisito; la mo laniu i ngan lavanga rangtangu ri limixin me Grik. ²⁴Ketla ne Moroa ga soxolik ka leventaba atnedi leme Judaia la leme Grik. Ma vavang mi laasen at ne Karisito, neni i lox asuusu lololos la lakleklen at ne Moroa rinedi. ²⁵Lagale Lavavang mumu laniu at ne Iesu, nedi di tong i do lavanga gamasa; ketla ni i volo aleng lakleklen at limixin. La nedi di tong box i do laniu at ne Karisito i lox asuusu i do ne Moroa neni ixo ruuna tololos, ketla lololos teren i volo lololos atnedi.

²⁶Luvutnetak mi luvurinuk. Mina doma bilong ti lorooro atnimi ap mo laaleng ne Moroa ga ro xaka nimi. Kopmen goxo buaang atnimi

digakleklen solo at lemeren limixin la kopmen goxo buaang bok atnimi diga ruuna levenasen silok la kopmen goxo buaang bok atnimi diga lox avukat at lemeren limixin. ²⁷Ketla ne Moroa ga soxolik ka nedi limixin kopmen takleklen atdi xusu ri lox asi limixin akleklen at na lavatbung menemen. La ne Moroa ga soxolik ka vam nedi xopmen tavenasen silok kusu ri lox asi limixin silok at na lavatbung menemen. ²⁸Moróa ga soxolik ka nedi, limixin diga ven asi ridi ngan levempanga gamasa la diga lox abulubun kepe di. Ne Moroa ga lox i nom kusu na lox alixilik mo lempanga i silok at lodoxoma at limixin, ²⁹la kusu tara noxo xip aurut laasen teren to melango at ne Moroa. ³⁰Ketla ne Moroa gara lok ka vam nimi ri lixitkis etangas eburu mi ne Iesu Karisito la ne Moroa ga lok katling pam ne Karisito ngan laxasep tidik; keneng mun at ne Iesu Karisito, ne Moroa ga vaxaxis buru dik min, la ga lok dik ngan limixin dadat teren, la gara lox asepmus nedik basinge laxakapmek atdik.

³¹Kuren la i ngan Lovoang Kaala i tong i do,

‘Do tara i vara na xip aurut laasen at tara, neni na xiv aurut laasen at Leeme Silok.’

Jer 9:24

Lavavang Mumu Laniu At Ne Iesu Karisito

2 ¹Luvutnetak mi luvurinuk. Nenia agat pas udo saparap nimi xusu ana vavang tinimi mi levelinga at ne Moroa, kopmen lavapaase rak goxo sixit nunuan ngan laradi vapaase, la lavavang tarak goxo umsu mi lakleklen at na lavatbung menemen. ²At levenaleng nenia aga nemen eburu minimi, aga doxoma i do ana ke xepe be levelinga axap la ana vavang kujuk be mi laniu at ne Iesu Karisito ga uu at laxaba. ³Nenia aga rupert avot dom atnimi, la lengkot tarak goxo lolos avukat la aga dede aleng mi lanmarat; ⁴la leveloklox ase rak mi lavavang tarak kopmen goxo ravasu mi tengkolinga nunuan mi lakleklen at na lorooro. Ketla levelinga rak ga lox asuusu lolos at Loroonan Kaala at ne Moroa. ⁵Nia aga lox i xuren kusu lunuunu atnimi saparap ne Iesu Karisito noxo mumu levendoxoma at limixin at na lavatbung menemen, ketla na nemen kujuk at lolos at ne Moroa.

Levendoxoma Nunuan Loroonan Kaala Im Taba Nedik Min

⁶Tinedi mo dira mukun pam keneng at lunuunu, nema luvuttadi vavang, ma paase ridi mi lakleklen at ne Moroa, ketla kopmen lakleklen at na lavatbung menemen, koplá levendoxoma at luvuttadi amgomgo at na levenaleng; mo lolos atnedi naba sonao kot. ⁷Maga tong asu Lagale Lavavang at ne Moroa rinimi, mo ga nemen ali-pe. Moroa gara tong li vam i xusu naba lox aurut levenasen atdik, avot ti loklok li at na lavatbung menemen. ⁸Kopmen teta at luvuttadi amgomgo at na lavatbung menemen ga xasep at na levelinga nunuan at ne Moroa. Mo do

nedi gitaklen i, di gitoxo vaxarem Leeme Silok to vana at laxaba. Neni i ruuna lisisixam silok. ⁹Ketla levelinga at Lovoang Kaala i lok keretna,

“Buaang leveloklox anarong, ne Moroa ga gagas min tinedi di balamu aleng i; tara goxo ven mo leveloklox anarong kopla gita ronga i, la tara goxo doma ka i do naba vot.” *Ais 64:4*

¹⁰Ketla ne Moroa ga lox axasep pam na levempanga ridik keneng at lololos at Loroonan Kaala. Loroonan Kaala i sin axasep lempanga axap, eburu mi levendoxoma alipe at ne Moroa. ¹¹At lorooro at laradi, loroonan axa ren ikleklen lempanga i nemen keneng at lorooro ren; la kerepmo Loroonan Kaala mun at ne Moroa ikleklen avukat ne Moroa. ¹²La nedik, kopmen dik ta goxo ruuna ka mo lodoxoma at limixin mede xopok at na lavatbung menemen. Ketla nedik taga ruuna ka Loroonan Kaala ne Moroa ga riki i ri lox ase dik, kusu atabaklen leveloklox anarong, ne Moroa ga raba gamasa vam dik min. ¹³Na lavavang atnama luvuttadi vavang ma vavang min, kopmen at limixin akleklen at na lavatbung menemen, ketla lavavang atnama boro xa at Loroonan Kaala mo ga anasa nama min. La kerepmo mak soxomus levelinga mumu ne Moroa rinedi di ruuna Loroonan Kaala. ¹⁴Ketla laradi do kopmen na ruuna Loroonan Kaala xeneng at lorooro ren, neni ixo epovo ri siam ka levelinga at Loroonan Kaala at ne Moroa. Neni xopmen na xasep nunuan teren; i lok ngan lempanga gamasa rin, mila Loroonan Kaala xopmen na nemen keneng at lorooro ren kusu ri lok axasev i rin. ¹⁵Ketla laradi mun Loroonan Kaala i nemen keneng at lorooro ren, neni i epovo xusu na ila mumu lempanga axap; do taradi xopmen na ruuna Loroonan Kaala, ixo epovo xusu na ila mumu laradi i nuunu. ¹⁶I ngan levelinga at Lovoang Kaala i lok keretna, “Nege iklen lodoxoma at ne Moroa? Nege i epovo xusu naba anasa i?”

Ais 40:13

Ketla nedik mun ta xasep pam at lodoxoma at ne Karisito.

Lavasaruki At Ne Moroa

3 ¹Luvutnetak mi luvurinu. Gano nia aga vot pasa nemi, miga lok ngan mun lengkadede, lunuunu atnemi dom Korin goxovisi ru matmatkun. Kuren la levelinga rak tinimi xopmen goxo lok ngan lempapaase rinedi digara siam ka vam Loroonan Kaala kusu nam gomgo nga di. Kopmen, nia aga paase rinimi ngan ta nemi limixin mede at na lavatbung menemen, atla lunuunu atnemi xovisi goxo lolos, ga lok ngan mun lunuunu at lengkadede. ²Lengkadede di inin mene levendan tus la kopmen dina anan levempanga anan i lolos. La nemi migak lok bok kuren, mila mi goxot kis gagas ti levelinga mumuat tarak. La ise nga mo kovisi mina gagas tin, ³mila nemi move mi rooro ngan limixin mede at na lavatbung menemen. Leveven peves mi levenekarakat move i nemen kantubu atnimi, la nai i lox asuusu i do nemi move mi rooro

eburu mi loklok at na lavatbung menemen; la kerepmo loklok atnimi i lok ngan loklok at limixin at na lavatbung menemen. ⁴Mi vetep amisik mi levelinga xantubu atnimi, lentaba di lok do, “Nema at ne Pol,” la lentaba di lok do, “Nema at ne Apolos.” Mi lok ngan tinotno limixin at na lavatkangka.

⁵Ua lavasuun teren la nemi mi epaxara nema mi ne Apolos? Nema mun luasaxaruki at ne Moroa; maga tong asu Lagale Lavavang tinimi la miga nuunu ren. Nema buru ma lok mun leven gugu Leeme Silok ga raba nama min. ⁶Nenia agatlotlo li levelinga at ne Moroa xeneng at lorooro atnimi; la ne Apolos ga soli dan at nom levelinga, ketla ne Moroa axa ga lox asusu nom levelinga xeneng at lorooro atnimi. ⁷Laradi itlotlo la laradi i soli dan, nedu xopmen duna silok. Ne Moroa xusuk mun i silok, mila neni i lox asusu nom levelinga xeneng at lorooro atnimi. ⁸Mo lara itlotlo la mo lara i soli dan, nedu du epovo mun, la nedu getgesara duba lok ka luunun naba epovo at lugugu atdu, ⁹mila nema eburu mun luradi gugu at ne Moroa la nemi mi lok ngan laxantaamang teren. La nemi bok mi lok ngan loogu, ne Moroa ga vaxaru i.

Moróa Naba Lok Tong Pen Lugugu Atdik

¹⁰Moróa ga raba ia mi lakleklen kusu ana lok lugugu avukat; la kerepmo aga lok lugugu xantubu atnimi, i lok ngan laradi akleklen at lixipkip gu, la aga vaxaru li laabuxumpio at loogu, la lentaba vetpes dip kip gu mavana ren. Ketla nedi xa dina lok tatao avukat di xusu dina lok lugugu avukat. ¹¹Ne Moróa gara lok li vam ne Iesu Karisito xusuk mun, neni laabuxumpio, la kopmen bok ba taabuxumpio vetpes tara naba lok li i. ¹²Mavana at na laabuxumpio lentaba luvuttadi diba xip gu mi lempanga ngan logol, lisiliva koplá levenuto mi luunun teren i silok. La lentaba diba xip gu mavana at na laabuxumpio mi levenuna gamasa, la lempivilis koplá levenbeo mun. ¹³At laaleng ete, ne Moróa naba lox asuvos ba luruturun at leven gugu at limixin getgesara, i lok ngan ta di lok tong pen leven gol at laxao, la kerepmo ne Moróa naba lok tong pen bok lugugu at limixin getgesara, do kereva i lox avukat koplá xopmen. ¹⁴Do nege laradi ga xip gu mavana at na laabuxumpio la do laxao noxo rin asonao i, neni naba lok ka luunun tin. ¹⁵Ketla lugugu at lara do laxao na rin asonao i, neni noxo lok kaka tuunun; ketla neni xa naba roo ngan laradi ma lixilik na uu at laxao.

¹⁶Miklen avukat pam i do, nemi xa laraugu laplavang at ne Moróa la Loroonan Kaala at ne Moróa i nemen keneng atnimi. ¹⁷Dola tara na sele utut kepe loogu laplavang at ne Moróa, Moróa naba lok kapmek box i, mila loogu laplavang at ne Moróa, i xaala la nemi vam nom laraugu laplavang teren.

¹⁸Nemen gat tara guta xarang axa i. Mo do tara xantubu atnimi i doxoma i do neni mo laradi akleklen ngan limixin at na lavatbung

menemen, i epovo do neni na ke xepe mo lakleklen teren la na lok kaka lakleklen tuturun at ne Moroa. ¹⁹Limixin at na lavatbung menemen di lok do lakleklen atnedi i silok aleng tinotno, ketla nom lakleklen atnedi i lok ngan mun lavanga gamasa at lemeren ne Moroa. I ngan Lovoang Kaala i tong i xeretna,

“Moroa i vuulu lugugu at limixin akleklen.” *Jop 5:13*

²⁰La at lara lenep bok keneng at Lovoang Kaala i lok keretna,

“Ne Moroa ikleklen i do lodoxoma at limixin akleklen, i ngan lavanga gamasa.” *Sam 94:11*

²¹Kuren la nemen tara na lox aurut laasen at laradi gomgo at lotu mila nedi axap di lok tooro nimi ngan lavasaxaruki. ²²Pol mi ne Apolos la ne Pita; la lempanga at na lavatbung menemen, la lorooro, la lanmet, la mo lempanga ik lok ningina la mo lempanga axap naba ravasu melemu; na axap ne Moroa ga lok li i xusu ri lok tooro nimi. ²³Ketla na i ruturun dola nemi at ne Karisito, la ne Karisito at ne Moroa.

Leven Gugu At Luvuttadi Vavang

4 ¹Kuren la mina doxoma mumu nema luvuttadi vavang, ma lok ngan lavasaxaruki at ne Iesu Karisito, la nema mak lok tatao losoxovo at ne Moroa mo ga nemen alipe, kusu mana paase axasep limixin min. ²Lara lavanga i silok aleng ti laradi loklok tatao at levelinga at ne Moroa i lok keretna; neni na lok amisik lugugu ruturun ti laradi gomgo ren. ³Nenia, axo doxoma solo i do nemi koplalimixin at na lavatbung menemen mina ila mumu ia, atla nia axo ila mumu lorooro rak. ⁴Nenia axa aklen i do kopmen taxakapmek i nemen at lorooro rak, ketla anai xopmen na lox asuusu i do nenia laradi sep mus at ne Moroa; ketla Leeme Silok naba viila mumu lugugu rak. ⁵Kuren la nemen mita ila mumu avot tara ri mo laaleng do naba vot. Laaleng ti ila mumu loklok at limixin noxo vot se Leeme Silok nabamlong; la neni naba lok li lempanga mo nga ik lok at lamain bonot ti laxasep, la naba lox asaxaven levendoxoma i nemen alipe ro xeneng at lorooro at limixin. Ap mo laaleng Moroa naba lox asuusu leemi asu ri limixin.

⁶Luvutnetak mi luvurinu. Ara vaase poovo vam minema' mi ne Apolos, i ngan nema' luampoovo ri nom axav i levelinga nenia a malagan i. La maxeneng at nom i, minaba xasep ap mo levelinga i lok keretna, 'Mina ila mumu avukat levelinga at luvuttadi amgomgo, kerekngan Lovoang Kaala i tong i.' La kerepmo mi noxo xip aurut taasen at tara taradi gomgo atnemi la mi noxo lox asi taradi gomgo vetpes. ⁷Kopmen tara ga lok li nimi xusu mina silok ti mo lentaba vetpes. Moroa ga raba nemi mi nom lempanga axap mi ruuna i. Kuren la nemen mita xip aurut levenasen atnemi min, mila nom lempanga mi ruuna i ne Moroa ga raba nemi min.

Pol Ga Paase Axalat Ti Limixin Me Korin

⁸Kereva, mi doxoma i do mira mukun pam at lorooro atnimi at ne Iesu Karisito? La kerepmo mira doxoma i do nemi mi lok kaka vam leveloklox anarong axap. La mira doxoma i do mi silok ngan lavaorong silok, la mi silok tinema luvuttadi vavang. Do nemi mina silok kerepmo, nenia a doma i do naba lox avukat tinotno, atla nema bok mabat kis eburu minimi ngan lavaorong silok. Ketla nema xopmen mana silok kerepmo, ⁹mila nia a doma i do ne Moroa ira lok li vam nama, luvuttadi vavang, kusu mana ruuna levenasen gamasa at lemeren limixin. Ma lok ngan laradi xokoxo, luvuttadi amgomgo di sev amer i ro at lemeren limixin axap at na lavatbung menemen la melamgo at lubang angelo. ¹⁰Limixin at na lavatbung menemen di tong i do nema luvuttadi baulang mun, mila ma gugu at laasen at ne Iesu. Ketla nemi mi lok do mi nemen avukat keneng at ne Iesu. Limixin at na lavatbung menemen di lok do nema luvuttadi gamasa la nemi mi doma i do nemi limixin silok at lorooro at ne Iesu. Limixin at na lavatbung menemen dik lox abulubun nama, ketla dik lok ngangao atnimi. ¹¹At na laxanaleng, nema luvuttadi vavang, maga roxo la maga minu; maga etara lenbantamon tekoxorop; la kopmen nom mene i, limixin digap sep bok nama la goxopmen temenemen aulis atnama rik lok mamas teren; ¹²la maga gugu lolos kusu mana lok kaka levempanga ri lok tooro lixikis atnema. Diga vaase xakapmek tinama, ketla maga sing ne Moroa xusu na lox anarong nedi. Diga lox asongot nema, ketla maga momo ri xip tutu min. ¹³Diga vaase xapmek tinema, ketla maga vorang mun i mi levelinga nunuan. Nema ma lok ngan mun luvuttadi baava; la nema ma lok ngan ta laxanbibiong dip kupku xepe i at na lavatbung menemen ise at na levenaleng.

¹⁴A malagan i na levelinga rinimi, kopmen do ri lox amangan nimi; a malagan i xusu ri vaase aronga nimi; nia a balamu nimi ngan nemi luvutnuruk tinotno. ¹⁵Keke i do mi ruuna buaang luvuttadi loklok tatao, ketla mi ruuna mun legesara ngan ne temen nimi. At lorooro atnimi at ne Iesu Karisito, nenia a lok ngan ne temen nimi, atla nia aga vavang tinemi mi Lagale Lavavang. ¹⁶Kuren la a sing lolos nemi do mina mumu asu loklok tarak. ¹⁷Lavasuun mun at nai la nia ara riki aonon pam ne Timoti udom saparap nimi. Neni ne nuruk tinotno at laasen at Leeme Silok, la a balamu i. Neni laradi raturun at lorooro ren keneng at Leeme Silok. Neni naba vaase axasep manga nimi mi loklok tarak keneng at lorooro at ne Iesu Karisito. La loklox ase ren i epovo mi loklox ase rak kerekngan aga lox ase limixin min at laraugu lotu at lengkot axap.

¹⁸Lentaba atnimi mo di doma i do nedi di silok aleng, la di doxoma i do nenia noxo vot pasa bok ba nimi xusu ri vaase sok di. ¹⁹Mo do Leeme Silok na vara i, anaba vot pasa soso nimi xusu nia anaba xasep

at lempanga salai luvuttadi loklox asilok di tong i, la nia anabaklen i do di ruuna ruturun pam lololos at Leeme Silok. ²⁰Nia anaba ven kibis di mila lanat at Linintoo at ne Moroa i ruuna lololos at ne Moroa maxeneng at lorooro ren, la xopmen lavapaase gamasa mun. ²¹Kereva, mira lox akmokso vam lorooro atnimi? Do xopmen, nenia aba vot mi laadas. Do mina ronga res tarak, nenia aba vot mi labalamu la loklox atnaasan.

Pol Ga Paase Mumu Loklok Kakapmek Ga Nemen At Lotu

5 ¹Aga ronga i do loklok kakapmek maxamang at lixitkis epot mo i nemen kantubu atnimi, la na loklok it pospa aleng; la kopmen tavanga xerepmo na nemen kantubu at lavamolon. Aga ronga i do lara laradi mo i nemen eburu mi latkin sev agepura at ne temen. ²Ua lavasuun teren la mi lok do mi silok, la kopmen mina doma mumu na laxakapmek silok i nemen kantubu atnimi? I epovo do nemi mina bulu la mina riki pes nom laradi bilinga basinge luruburu at lotu atnimi. ³Nenia a nemen paxalom basinge nimi, ketla a doxoma suu amisik atnimi at loroonan tarak, la kerepmo i lok ngan ta do nenia a nemen eburu minimi dom Korin; la keneng at laasen at Leeme Silok atdik ne Iesu, nenia ara lok li vam lumumuat at nom laradi ga lok mo lavanga bilinga. I lok ngan ta do nenia mo a nemen eburu minimi. ⁴Do mina vot eburu at laasen at Leeme Silok ne Iesu, ba lok ngan ta do a nemen eburu minimi, la lololos at Leeme Silok atdik ne Iesu mo ba nemen eburu midik. ⁵Ap mo laaleng mina song araba ne Satan mi nom laradi xusu ni na suma ka losongsongot ap mo loklok kakapmek teren la kerepmo neni naba roo suu ap mo laaleng Leeme Silok namlong teren.

⁶Nemi mi lok do loklok atnimi i lox avukat la mi silok aleng, ketla kopmen. Ixok mokso rinimi xusu mina ke xepe nom laradi i lok nom loklok. Miklen levelinga i lok keretna, “Laxakapmek kakalik at legesa radi naba lok kapmek limixin axap.” ⁷Mina lok pes nom loklox asilok basinge lotu atnimi xusu miba nemen avukat tinotno ngan lavavara at ne Moroa. I lok ngan gano leme Judaia diga nemen to Isip, diga sep ka levempatnat sipsip atdi xusu ri lok pe lumukmusak at ne Moroa la nedi limixin di goxo met. La kerepmo ne Karisito i ngan lavatnat sipsip ga uu nop loklok atdik ngan laxaavuk tidik. ⁸Kuren la limixin me Judaia dik lok katling amisik mo laaleng ne Moroa ga lam asu di basinge lemenemen Isip. La kerepmo dik ata doxoma amisik mo loklox arooro atdik, la ata lok kepe laxakapmek la ata lok kaka luruvtuvuk i dadat la ik mokso aleng.

⁹Ap mo lavapaase aga lox aonon i rinimi, aga tong i rinimi do nemen gat mita etangas eburu mi limixin at lotu di lok laxakapmek maxamang at lixitkis epot. ¹⁰Axo tong limixin maxamang at lotu di nemen kuren koplalimixin dik lok papavas, koplalimixin sepsep paxat

panga, koplā nedi di lotu saporap laxampoovo moroa. Ixo epovo do mina nemen petpes basinge limixin kerepmo, mila limixin kapmek di umsu at na lavatbung menemen. ¹¹Lavasuun at levelinga rak i lok keretna, nemen mita etangas eburu mi laradi lotu, neni laradi i lok laxakapmek maxamang at lixitkis epot, koplā ik lok papavas la i lotu saporap laxampoovo moroa, ik lox asi lentaba vetpes mi levelinga, la i inin tangtangu, koplā ip sep paxat panga. Nemen mita etangas eburu mi laradi ik lok kerepmo la nemen gat mitat kis eburu min kusu ri anan.

¹²Kopmen lugugu rak kusu ana ila mumu loklok atnedi lavamolōn, ketla lugugu atdik kusu ata ila mumu loklok atnedi di nemen keneng at lotu la di lok laxakapmek kerepmo. ¹³Ne Moroa xusuk mun naba ila mumu nedi lavamolōn. I ngan Lovoang Kaala i tong i xeretna,

“Nemi mina ila mumu loklok ap mo laradi xapmek la mina lok pes i basinge lotu atnimi.”

Len 17:7; 19:19

Leven Ekarakat Kantubu At Limixin Lotu

6 ¹Mo do tara atnimi i ruuna tekarakat eburu mi tara taradi vetpes at lotu, nemen gat ni nat pas uto at lubang amgomgo at lavamolōn kusu dina lox akmokso mo lekarakat. Ketla neni nat pas min uto at limixin di nuunu at ne Moroa xusu diba lox akmokso du. ²Mi xasep avukat pam do limixin di nuunu at ne Moroa dinaba ila mumu loklok at limixin axap at laaleng ete. La do melemu nemi xa minaba ila mumu loklok at limixin axap, tila ba la mixo epovo xusu mina ila mumu loklok at na lempanga lixilik mun. ³Miklen i do nedik luvuttadi nuunu at ne Iesu ataba ila mumu bok loklok at lubang angelo. La kerepmo dik ta epovo do tana ila mumu leveloklok at na lorooro. ⁴Kuren la mina lok katling teventaba at lotu xusu dina ila mumu loklok atnimi mo do teven ekarakat na vot kantubu atnimi. I epovo do nedi luvuttadi mene xuren at lotu dina xip ka mo lugugu mila maxeneng at na diba lox avukat ti laradi maxamang at lotu. ⁵A tong i na rinimi ri lox amamangan nimi. Kereva, kopmen taradi dom kantubu atnimi i epovo ri ila mumu loklok atnemi limixin at lotu? ⁶Ketla nemi mi mumu na loklok kakapmek; taradi nuunu na lok li bok taradi nuunu at lavapaase ro melamgo at taradi xopmen tunuunu ren saporap ne Iesu Karisito.

⁷Anai leven ekarakat kantubu atnimi limixin nuunu mik lok ka i uto at lavapaase, i lox asuusu i do nemi mira subu vam at lunuunu atnimi. Kuren la nemen mita vosiga laradi maxamang at lotu ri lox amokso lumumuat mo do limixin dina vaxaxip nemi mi laxakapmek. La nemen mita vosiga laradi maxamang at lotu ti lox amokso tumumuat mo do teventaba vetpes dina xip pilo ka levempanga atnimi. ⁸Ketla nemi xa mi lok laxakapmek tinemi getgesara, la mi xip pilo bok lempanga atnemi, ketla mira domampe vam i do nemi loxoeton mun keneng at laasen at ne Iesu Karisito.

⁹Mi xasep pam do limixin kapmek di noxo ruuna ka toxot to xeneng at Linintoo at ne Moroa. La mina xasep nunuan at na levelinga; limixin di lok loklok kakapmek maxamang at lixitkis epot, la di lotu saparap laxampoovo moroa, la di elongka, koplav lavatlok axa di velongka.

¹⁰La nedi dip kip pilo mi loklok ti belagaa, koplav di inin tangtangu, la dik lox asi lentaba mi levelinga, koplav dip sep paxat ka lempanga, kopmen tara atdi noxo ruuna ka toxot to xeneng at Linintoo at ne Moroa.

¹¹Lentaba atnivi digak lok kerepmo. Ketlav ne Moroa ga gos nemi axap basinge laxakapmek atnivi; la nemi xa ga ravasu ngan limixin dadat at ne Moroa; la at laasen mun at Leeme Silok ne Iesu Karisito la mi Loroonan mun at ne Moroa, neni ga lox asepmus nivi basinge loklok kakapmek.

Mina Ke Xepe Loklok Ti Lok Laxakapmek

¹²Lentaba atnivi dinaba tong i do, “I epovo do nia ana lok levempanga axap.” I ruturun, ketlav kopmen levempanga axap naba lok tooro nivi. La neni ana tong i do, “I epovo do ana lok lempanga axap.” Ketlav aba ke xepe levempanga xapmek mo i epovo na xoxo ia. ¹³La lentaba diba lok keretna, “Moroa ga lok levenbelen dik ti leveluxa la ga lok leveluxa ri lox aumsu levenbelen dik.” I ruturun, ketlav ne Moroa naba lox asonao buru labantuxu mi lengkot teren. I ruturun bok do labantuxu atdik kopmen tik lok laxakapmek maxamang at lixitkis epot, ketlav ne Moroa ga rudum li dik kusu ata emi asu mi Leeme Silok; la Leeme Silok axa ik lok tatao labantuxu atdik. ¹⁴Morova ga lox axatu Leeme Silok basinge lanmet, la neni bok naba lox aroo amlong nedik mi lololos teren basinge lanmet.

¹⁵Miklen i do labantuxu atnivi neni i lok ngan levengkot at labantuxu at ne Karisito. Kereva, i lox avukat kusu ana lok pes tenep at labantuxu at ne Karisito la ana lox etang i mi labantuxu at latkin ngarangat? Kopmen tinotno. ¹⁶Mi xasep pam do laradi i lox etang labantuxu ren mi latkin ngarangat, nedu du lok ngan legesara mun keneng at labantuxu atdu. Levelinga ro xeneng at Lovoang Kaala i tong axasep avukar i do,

“Nedu du lok ngan legesara mun keneng at labantuxu atdu.” *Lur 2:24*

¹⁷Ketlav laradi na xis etangas mi Leeme Silok, loroonan teren i lok ngan legesara eburu mi Leeme Silok.

¹⁸Mina ke xepe rinotno loklok kakapmek maxamang at lixitkis epot. Laxakapmek petpes do lara i lox i, kopmen na lok kapmek labantuxu ren; ketlav laradi do i lok na loklok ti lok laxakapmek maxamang at lixitkis epot, neni i lox abilinga rinotno labantuxu ren. ¹⁹Mi xasep pam do labantuxu atnivi, i lok ngan loogu laplavang at Loroonan Kaala, mo i nemen keneng atnivi, la ne Moroa axa ga raba nemi min. Nemi xopmen atnivi xa, ketlav nemi at ne Moroa. ²⁰Neni ga xuruse ka vam nemi mi luunun. Kuren la mina ke xepe loklok kakapmek keneng at labantuxu atnivi la kerepmo miba lox asuusu loklok ngangao ri ne Moroa.

Levesusue Mumu Loklox Epot

7 ¹A vara i do ana vorang levempapaase miga malagan i ria. Lara avot mumu leepot. I lox avukat do lubungnaa dina nemen gamasa la nemen dita epot. ²Ketla mumu mene loklok kakapmek maxamang at lixitkis epot mo i umsu, la kerepmo i lox avukat do lavatlok dina epot ka tavakin getgesara ridi, la lavakin dina epot ka tavatlok getgesara bok tidi. ³I epovo do latlok na lox asorun axap lugugu ren ngan latlok epot, la latkin na lox asorun axap lugugu ren ngan latkin epot, la nedu xa duna lox epovo lavakpakes atnedu xeneng at loklok at leepot. ⁴Latkin epot noxo lok ngan lara loklok tatao xusuk ti labantuxu ren, ketla latlok teren bok na lok tatao i. La kerepmo bok latlok epot kusuk noxo lok ngan lara loklok tatao ri labantuxu ren, ketla latkin bok teren na lok tatao i. ⁵Nemen duna emorong mi lubantuxu atnedu, ketla do duna epaase mumu i, la dola dura siam teren, i lox avukat do duna ke be mo loklok at teventaba tevenaleng ti lok levesingising atnedu saparap ne Moroa. Ketla melemu at nai duna nemen eburu manga; mo do duna lox i na, Satan noxo lox epovo i xusu na lok li du at loklok tong pen. A tong i na rinimi mila nemi xopmen mina nemen lolos at loklok at leepot. ⁶Na a vaase i na rinimi xopmen do nemi axap mina mu asu i la mina epot, ketla a vaase i na, i ngan lisisiam tarak tinimi. ⁷I lox avukat do nemi axap minak lok naa kerekngan ia; Moroa ga lox ia xusu a epovo anak lok naa i ngan laramtaba ren tia. Ketla lentaba vetpes kopmen na epovo rik lok naa la ne Moroa im taba di mi leventamtaba vetpes.

⁸Tinemi lavatlok mi nemen naa, la tinemi lavakin lavatlok atnimi diga met pam, a vara i do ana vaase rinimi xeretna; i lox avukat do minak lok naa kerekngan ia. ⁹Ketla do mixo epovo xusu mina lok tatao avukat luruptuvuk atnimi, la levendoxoma atnimi move i ngaongao mumu loklok at leepot, i lox avukat mene do mina epot. I lox avukat do mina epot mila i lok kapmek do nom lavavara atnimi na lok nimi la levendoxoma atnimi na xalibi amisik ti mo loklok.

¹⁰Lara lavanga bok, kopmen atarak ketla at Leeme Silok. Tinemi limixin epot a ruuna lara lavapaase lolos tinimi xeretna, latkin epot noxo soxope latlok teren. ¹¹Mo do neni na lox i xuren, neni nak lok naa la nemen bok ba na epot, koplana neni namlong mu latlok teren. La kerepmo bok latlok kopmen noxo ba korop leepot mi latkin teren.

¹²La tinemi limixin axap, a tong i do na levelinga ana vaase i, kopmen at Leeme Silok ketla atarak mun. Mo do latlok i lok kaka lunuunu maxat keneng at ne Karisito, ketla latkin teren kopmen na nuunu at ne Karisito, la mo latkin i momo do nedu nak lok buru xeneng at leepot atdu, latlok kopmen noxo soxope i. ¹³La mo do latkin i lok kaka lunuunu maxat keneng at ne Karisito, la latlok teren kopmen na nuunu at ne Karisito, la

mo latlok i momo do nedu dunak lox eburu xeneng at leepot atdu, latkin noxo soxope i, ¹⁴mila latlok kopmen na nuunu, neni i lok ngan laradi dadat at ne Moroa mila neni i epot at latkin i nuunu at ne Karisito. La latkin kopmen na nuunu, neni i lok ngan latkin i nemen dadat at lemeren ne Moroa mila neni i epot at latlok i nuunu at ne Karisito. La kerepmo laxamdak mi laxaalik kakalik atdu dixo lok ngan levempanga bilinga; ketla di dadat at lemeren ne Moroa.

¹⁵Ketla do tara atdu xopmen na nuunu at ne Karisito la i vara i do na soxope mo lara i nuunu at ne Karisito, i lox avukat mene do mina ke xepe i na mu asu lodoxoma ren. La i lox avukat do lara i nuunu, latlok koplalok latkin, na siam do mo latlok koplalok latkin na on basinge i. Moroa ga soxolik ka dik limixin nuunu at ne Karisito kusu ata nemen at lumulum. ¹⁶La nemi lavakin nuunu, mina ke xepe di do dina on basinge nemi, mila kopmen minaklen i do i epovo mina lok tooro di kusu dina ven kisip ne Karisito. La nemi bok lavatlok nuunu, mina ke xepe di do dina on basinge nemi mila kopmen minaklen i do i epovo mina lok tooro di xusu dina ven kisip ne Iesu. La kerepmo i epovo do nedi dina ba korop leepot.

Mina Nemen Kerekngan Ne Moroa I Vara I

¹⁷Ketla nemi getgesara mina nemen at lixitkis migak lok teren ap mo laaleng ne Moroa ga ro xaka nemi. Mo lixitkis atnemi i ngan laramtaba Leeme Silok gara raba vam nemi min. Anai lavapaase a lox ase limixin min at laraugu lotu at lengkot axap. ¹⁸I ngan ta do tara, digara vit kepe vam loxontuxu ren, la gara siam ka vam lorotoro at ne Moroa rin, nemen ni ta lok tong pen bok ba i do neni na lok pes nom liinin pirivit. Mo do tara di goxo vit kepe loxontuxu ren, la ni ga siam kaka lorotoro at ne Moroa rin, nemen bok ba i guta vit kepe loxontuxu ren. ¹⁹La kerepmo loklok ti rivit kepe loxontuxu koplalok loklok ti ke xepe i, ni lavanga gamasa mun. Lavanga mun i mumuat ni laradi ing tonga res at levelinga at ne Moroa. ²⁰Nemi getgesara mina nemen lolos ap mo lixitkis migak lok teren ap mo laaleng miga siam ka lorotoro at ne Moroa rinimi. ²¹Kereva, uga nemen ngan lasaxaruki se ne Moroa ga ro kaka u? Nemen gat uta bulu mu i, ketla mo do taaleng na vot tu xusu una nemen ngan laradi sepmus, una momo min. ²²Lasaxaruki, Leeme Silok gara ro xaka vam i, neni i lok ngan laradi sepmus at Leeme Silok. La kerepmo bok laradi sepmus, ne Karisito gara ro xaka vam i, neni i lok ngan lasaxaruki at ne Karisito. ²³Moroa gara xuruse ka vam nemi mi luunun; kuren la nemen mita mumu asu levelinga at tara vetpes. ²⁴Luvutnetak mi luvurinuk. Nemi getgesara minat kis esogo nunuan mi ne Moroa at nom lixitkis nemi migak lok teren ap mo laaleng ne Moroa ga ro xaka nemi.

²⁵Monga a vara i do ana paase rinimi mumu lususue miga sue ia min mumu nedi dik lok naa. Axo lok ka lavapaase mumuat boro at Leeme

Silok mumu na lavanga, ketla ana vaase nimi mi lodoxoma rak, nia a epovo do ana tong i na rinimi mila Leeme Silok ga lox asuusu vam lebelemumu ren tia la iklen i do nenia laradi ruturun. ²⁶Levenmumuat naba vot saparap limixin di nuunu. Kuren la a doxoma i do i lox avukat do taradi na nemen ngan ta i mo neni ik lok kuren. ²⁷Dola tara i epot pam, nemen ni guta ba korop leepot teren. Dola tara ik lok naa, nemen ni guta epot bok ba. ²⁸Mo do taradi i epot, kopla latkin maxat i epot, kopmen taxakapmek teren. Ketla mo do tara i epot, i epovo do buaang laxanmumuat naba vot parav i. A xopara i do mina solok laxanmumuat solo at na lorooro.

²⁹Luvutnetak mi luvurinuk. Lavasuun at na levelinga rak i lok keretna; ixo lox abao bok ba levenaleng mo i nemen ti lomlong at ne Karisito. La i ru ka i mo ningina, lavatlok epot dina nemen ngan ta luvuttadi at ne Moroa. ³⁰La nedi dik bulu at levenmumuat atdi, dina xasep do nom lainbulu naba xap; la nedi dik lok momo, dina xasep do nom lomomo noxo nemen amisik; la nedi di unun panga, dina xasep do nom lempanga noxo nemen abao. ³¹La nedi dik lox arangtang mi lempanga at na lorooro, dina xasep do nom loklok kopmen lavanga i silok aleng. Lavasuun at na levelinga rak keretna; leveloklok at na lavatbung menemen ik lok ningina naba xap asonao.

³²A vara i do mi noxo ekip tangarang mi levenmumuat at na lorooro. Latlok naa ik lox angtang amisik mi leven gugu at Leeme Silok, mila neni ik lok tong i do ni nak lox amomo Leeme Silok. ³³Ketla latlok epot ik lox angtang amisik mi lempanga at na lorooro, mila neni i vavara i do nak lox amomo amisik latkin teren. ³⁴Kuren la lodoxoma ren i ekakan. La latkin naa bok mi latkin maxat duk lox angtang amisik mi leven gugu at Leeme Silok, mila du vara i do nedu duna nemen dadat at lorooro atdu la loroonan bok atdu. Ketla latkin epot ik lox angtang amisik mi lempanga at na lorooro mila i vavara i do ni nak lox amomo mun latlok teren.

³⁵A paase i na mila a vara rino i do ana lok tooro nemi. Axo lok do ana lok li teventaangas mumuat kusu miba mu asu i. Ketla kusuk mun, a vara i xusu mina lok lempanga salai ik mokso la i lox avukat, la mina raba lorooro axap atnimi ri lugugu at Leeme Silok la nemen mita ranga alis toxot teren.

I Lox Avukat Do Lara Na Nemen Naa Kusu Naba Lok Lugugu At Ne Moroa

³⁶Mo do tara i doxoma i do neni kopmen nap tuvuk avukat mun ti latkin diga ora i do tin, la i vara na epot kaka i, i lox avukat duna epot; kopmen na lok kapmek. ³⁷Ketla do mo laradi no di goxo pu soso i xusu na epot ap mo latkin diga ora i do tin, la neni i lok lodoxoma ren do neni noxo epot ap mo latkin; la do, mo lodoxoma ren i lox i mi lorooro axap

teren, la lodoxoma ren ira doma vam lavanga salai neni naba lox i, i lox avukat mene do neni noxo epot ap mo latkin. ³⁸Kuren la laradi i epot at latkin diga ora i do tin, neni i lok loklok i nunuan; ketla, mo laradi kopmen na epot at latkin, diga ora ka i do tin, neni i lok loklok i nunuan aleng.

³⁹Ixo epovo dola latkin epot na soxope latlok teren, ketla do latlok teren na met, i epovo do neni na epot kaka tatlok petpes do neni i vara rin. Ketla nemen gat ni na epot at laradi xopmen na nuunu at Leeme Silok; ⁴⁰kuren la mo latkin naba momo aleng, do neni na nemen ngan lanaa. Anai lodoxoma rak la aklen i do Loroonan Kaala at ne Moroa ik lok tarak; kuren la ara tong i na levendoxoma rak tinimi.

Lususue Mumu Lempanga Lomlomon Ti Laxampoovo Moroa

8 ¹A vara i do ana vorang lususue atnimi mumu lempanga lomlomon limixin diplavang min ti laxampoovo moroa. I ruturun aleng do, “Nedik axap ta ruuna levenakleklen,” kerekngan limixin di tong i. Do laradi i ruuna lakleklen solo, neni ba xip aurut laasen teren, ketla mo laradi i umsu mi labalamu, ik lox aru lolos lorooro nunuan kantubu at limixin nuunu. ²Do laradi i doxoma i do neni mo i silok ti luvutneton mumu lempanga salai neni ikleklen i, neni xopmen na ruuna lakleklen avukat. ³Ketla do laradi i balamu aleng ne Moroa, ne Moroa ikleklen avukat mo laradi.

⁴Kuren la ana paase mumu lempanga lomlomon limixin diplavang min saparap laxampoovo moroa. Lentaba at limixin nuunu di anan leveluxa, lentaba vetpes diplavang min ti laxampoovo moroa. Ata xasep do lovoovo vanga ni loklok katling ti lavanga kopmen na rooro la ataklen i do legeso Moroa mene nga i nemen. ⁵Limixin di tong i do tevenasen moroa go i nemen to vana at laxalibet kopla at na lavatangka; la buuang atdi na laxan moroa la lempanga xerepmo limixin di lotu saparap di. ⁶Ketla legeso Moroa mun tinedik axap, neni ne Temen nedik la neni laradi loklok li at lempanga axap, la nedik ata rooro rin. La legesa Eme Silok atnedik mun ne Iesu Karisito, la keneng mun teren ne Moroa ga rudum li lempanga axap la keneng mun teren nedik di rooro.

⁷Ketla kopmen limixin axap at lotu dinaklen avukar i do laxampoovo moroa ni lavanga gamasa. Leventaba atdi di arala nga di ri na laxampoovo moroa, ise nga at na levenaleng. Do di anan leveluxa limixin petpes diplavang min ti laxampoovo moroa, nedi move di doxoma i do di lotu saparap laxampoovo moroa. Ketla kopmen na ruturun. Lunuunu atdi xopmen na lolos, kuren la di doxoma i do nedi mo dira bilinga vam ap mo leveluxa di anan i. ⁸Leveluxa axap limixin nuunu di anan i, kopmen noxo lox axis buru di mi ne Moroa. Do nedik ata anan mo leveluxa limixin diplavang min saparap laxampoovo moroa, lixitkis etangas atdik mi ne Moroa noxo rekorop, la luruburu atdik mi ne Moroa noxo xap.

⁹Ketla nemi limixin sepmus mina lok tatao avukat nemi, kusu mo loklok atnemi mumu mo lempanga anan noxo lox asubu lunuunu atnedi xopmen dina lolos. ¹⁰Dola taradi, lunuunu ren kopmen na lolos, na ven nemi limixin akeklen mina anan tempanga anan limixin petpes digaplavang min to xeneng at loogu laplavang at tavatpoovo moroa, la neni naba mulus kusu ri anan mo lempanga anan. ¹¹Kuren la na laradi, lunuunu ren kopmen na lolos, ne Iesu Karisito ga uu nop bok loklok teren, neni naba subu atla nemi limixin akeklen mi anan mo leveluxa diplavang min ti laxampoovo moroa. ¹²La kerepmo nemi mira lok pam laxakapmek ti luvutneton nemi atla mira lok kapmek tinotno vam lodoxoma avukat atdi la ira ekakan; la kerepmo mira lok pam laxakapmek ti ne Karisito. ¹³Kuren la, do mo leveluxa nia a anan i, i lox asubu lunuunu at tara, nia a noxo epovo bok ba ri anan teveluxa xerepmo, kusu nia noxo lox asubu bok ba taradi ri laxakapmek.

Pol Ga Vaase Pe I

9 ¹Kereva, nenia laradi sepmus la nenia laradi vavang at ne Moroa? Kereva, nenia aga ven ne Iesu, Leeme Silok atdik? La kereva, nemi livipisik at lugugu rak ngan laradi vavang at Leeme Silok? ²Lentaba dixo ven kisiv ia do laradi vavang, ketla nemi miga ven kisiv ia. Nemi mit kis etangas mi ne Iesu, la kerepmo i lox asuusu i do nemi loklok katling at lugugu rak ngan laradi vavang at Leeme Silok.

³Tinedi di paase mumu ia atla nia axop kip unun at lugugu rak, nia a vaase pe ia xeretna. ⁴Kereva, ixok mokso xusu mina raba luxa la kadan ia ri lok tooro ia at lugugu rak? ⁵La kereva, i epovo do ana lok kaka tatkin nuunu eburu minia at levempatpas tarak, kerekngan mun lentaba luvuttadi vavang, la luvutneton ne Iesu, la ne Pita dik lox i? ⁶Kopla nema xusuk mi ne Banabas mana gugu lolos ti lixitkis atnema?

⁷Mina xasep at na levempapaase poovo. Ixok mokso do taradi esep na gugu at lugugu vetpes ti lok ka luunun tin. La i epovo do laradi lotlo, neni na anan akmokso livipisik at levempanga ni gatlotlo i. La i epovo bok do laradi loklok tatao sipsip na ruuna ka levendan tus at levesipsip teren.

⁸Ana levelinga nia a tong i kopmen mede xopok at na lavatbung menemen. Kereva, Lenavolo xopmen na tong bok na lavapaase?

⁹Levelinga keneng at Lenavolo at ne Moses i tong i do, "Nemen mita velegum pe lungusno at lubulumaxao do i rubur asu levempeven piao." Kereva, ne Moroa im doma mumu solo mo lubulumaxao? ¹⁰Kopla neni ga tong i na mumu mun luvuttadi gugu ren? I ruturun tinotno do diga malagan i na levelinga rinama luvuttadi vavang. I lok ngan ta legepu radi duga lok laxantaamang la legesara atdu ga but povorok laxangka la gatlotlo levempanga at nom laraamang la melemu mo laradi vetpes ga vit

kaka laxampiao. Nedu eburu duga gugu atla duga doxoma i do duba lok ka tevempipisik avukat ap mo laxantaamang atdu. ¹¹La kerepmo nema luvuttadi vavang, magatlo li vam levelinga at ne Moroa keneng at lebelen nimi la migara visik pam lempeven una nunuan. Kuren la i lox avukat do nema mana lok ka teveloklok tooro medom atnimi. ¹²Leventaba luvuttadi vavang petpes diga lok ka levempilas la levempanga anan dom atnimi la i lox avukat kuren. Ga epovo bok do nemi gita lok tooro nama kerepmo, atla maga rupot avot tidi la maga tong asu levelinga at ne Moroa rinimi.

Ketla ma goxo sing panga nimi. Maga gugu lolos aleng ti lok tooro lixitkis atnama. Lavasuun teren keretna. Maga xopara i do teventaba atnimi dina lox abulubun kepe Lagale Lavavang at ne Iesu Karisito mumu levempilas ti luvuttadi vavang. ¹³Ketla miklen i do luvuttadi di gugu ro xeneng at loogu laplavang at ne Moroa, di lok ka levempanga anan tidi boro ap mo levempanga limixin dim taba min ti ne Moroa. La do limixin diplavang mi leveluxa lomlomon to at loxonin laplavang, luvuttadi gugu di lok ka bok levengkot ap mo leveluxa diplavang min tidi ri anan. ¹⁴La kerepmo bok Leeme Silok ga tong i rinama do nedi di vavang mi Lagale Lavavang, diba lok ka luunun tidi at Lagale Lavavang kusu naba epovo at lixitkis atnedi.

¹⁵Ketla nia a goxo mu asu i na langas kusu ana sing panga nimi; la kopmen ana malagan i na xusu minaba mu asu na langas la mina lok tooro ia. Kopmen teta goxo lok tooro ia la a doxoma i do anak lok mun kuren la keke leveloklok tooro. La kopmen tara noxo lok kun na lodoxoma rak do nia noxop kip unun at lugugu rak, se nia anaba met. ¹⁶Nia a vavang mi Lagale Lavavang, ketla ixok mokso ria xusu ana xip aurut laasen tarak, mila Leeme Silok gara vaxaxip pam ia mi lugugu ren kusu ana lox i. Dola nia a noxo vavang mi Lagale Lavavang, naba lok kapmek aleng tino ria. ¹⁷Dola nia gita lox i na lugugu mi lodoxoma xa rak, i epovo ba do nia ana lok ka luunun; ketla nenia xa goxo lok katling ia ri na lugugu, ne Moroa xa ga nu taba ia min. ¹⁸Lavanga sala nia anaba lok ka i at na lugugu? I lok keretna; dola nia ana vavang mi Lagale Lavavang, nia noxo ro unun at limixin. La kerepmo nenia a noxo siam ka luunun ti na lugugu, keke i do ik mokso do ana lok ka i.

¹⁹Nenia laradi sepmus mun, ketla nenia a lox ia ngan lasaxaruki at limixin axap kusu anaba lok ka buaang nedi limixin ukeneng, kusu dina nuunu at Lagale Lavavang at ne Iesu. ²⁰Do ana vavang ti limixin me Judaia, loklok tarak na ngan mun loklok atdi, kusu loklok axa rak noxo lok pe lugugu at ne Moroa xeneng at lorooro atnedi. Nenia xopmen anak lok maxopok at Lenavolo at ne Moses, ketla a lok li ia xuren ap mo levenaleng a tong asu Lagale Lavavang tinedi dik lok maxopok at Lenavolo. Lavasuun teren keretna; diba nuunu at Lagale Lavavang. ²¹La kerepmo bok do ana nemen eburu mi limixin kopmen me Judaia, la di

nemen maxamang at Lenavolo, loklok tarak na ngan loklok atnedi xusu dina nuunu at ne Karisito. Anai, kopmen lavasuun teren do a rongga xepe Lenavolo at ne Moroa, ketla a nemen tinotno maxopok at lavavara at ne Karisito. ²²Kantubu atnedi lunuunu atdi ixo lolos, ana nemen ngan bok di, kusu aba lok ka bok di la ana lox alolos lunuunu atdi. La kerepmo a lox ia ngan limixin axap, kusu aba sat ka bok tentaba atnedi uto xeneng at Linintoo at ne Moroa. ²³Na levempanga axap a lox i ri lok ka buaang limixin kusu dina nuunu at Lagale Lavavang la kerepmo aba lok ka bok tenep at leveloklox anarong boro at ne Moroa.

²⁴Miklen i do keneng at lekampoovo at limixin siksixit, dik sixit kusu ri lok ka luunun, ketla legesara mun atnedi i lok ka luunun. La kerepmo nemi mina lolos at lisiksixit kerepmo xusu miba lok ka luunun. ²⁵Do limixin di nemen keneng at lekampoovo, di mumu asu leventaangas linga axap; di mu asu i xusu diba lok ka lavatbungorong kopmen na nemen amisik; ketla nema ma mumu asu leventaangas kusu manaba lok kaka lavatbungorong, i ngan luunun naba nemen amisik. ²⁶Kuren la a lolos ti lox amomo ne Moroa, i ngan laradi siksixit ik sixit epopolo uto at latnese at loxot siksixit. Nenia a lok ngan bok laradi sepsep, kopmen ni na ke xepe gamasa lekngen kusu nat ket polo. ²⁷Nenia a gugu lolos ti lok kaka limixin uto xeneng at Linintoo la ba lok kapmek do nenia noxo vubeles teren. Kuren la a lox amisik labantuxu rak kusu ana mumu asu leventaangas linga la kerepmo nenia aba epovo bok ti nom luunun mo ne Moroa ba raba limixin nuunu min.

Lavapaase Aronga Ri Leveloklok Kakapmek

10 ¹Luvutnetak mi luvurinuk. A vara i do mina doma su at levempanga ga vot saparap lavalabat atdik gano migomgo, at levenmaares diga mumu asu ne Moses. Diga nemen maxopok at loklok tatao at ne Moroa, ni gam gomgo ridi at loxontakabu, la diga vas polo tubu at loxontas, laasen teren Laras Memele. ²Keneng at loxontakabu la keneng ap mo loxontas, i lok ngan ta diga lok ka lesepe susu atdi ngan loklok katling at lixitkis etangas atdi mi ne Moses. ³Nedi axap diga anan at levempanga anan at ne Moroa, ⁴la diga inin at legesa dan, ne Moroa ga raba di min at langas petpes. Diga inin at ladan boro ap mo luat na roonan mo ga emu midi; la mo luat neni ne Iesu Karisito. ⁵Ne Moroa ga nemen eburu midi ketla buaang atdi diga lox amusax i, kuren la diga remet eteke mene ro at lengkot axap at lamatbin.

⁶Na axap levempanga ni lampoovo ridik, ti lox aronga dik do nemen gat dik guta vavara solo ri levempanga xakapmek, i ngan limixin me Israel diga lox i. ⁷Nemen gat mita lotu saparap lempatpoovo moroa i ngan leventaba atnedi digak lok kuren. I lok ngan levelinga at Lovoang Kaala i tong i do,

“Limixin digat pot buru ri leveluxa la melemu diga tii mi leventinii xapmek la diga pubeles at laxapmek.” *Pas 32:6*

⁸Nemen gat dik guta lok laxakapmek maxamang at lixitkis epot ngan buaang atnedi diga mumu asu i xuren; la keneng at leges aleng, ga legepu sangaun mi lavantun larabin sangsangaun kobot (23,000) nedi limixin diga uu. ⁹Nemen gat dik guta lok tong pen Leeme Silok ne Moroa i ngan leventaba atnedi diga lox i, la laxasii gap sev amet di. ¹⁰Nemen mita paase ngunungun amisik ti ne Moroa i ngan leventaba atdi limixin me Israel digak lox i, la ne Moroa ga riki laangelo sepsep teren la ga sev amet di.

¹¹Anai levempanga ga vot saparap di i ngan lampoovo ridik ik lok at Lovoang Kaala, la i lok ngan levempapaase aronga ri nedik na, ta nemen ta at levenaleng i auret ti laxavaxap at na lavatbung menemen.

¹²Dola nege go i doxoma i do lunuunu ren mo i tu lolos at lemeren ne Moroa, i lox avukat do ni na lok tatao nunuan i kusu neni noxo subu kot. ¹³Leveloklok tong pen axap it pot saparap nimi, ni i lok ngan mun mo leveloklok tong pen it pot saparap limixin axap. La ne Moroa i ruturun; la ni noxo ke xepe nimi ri loklok tong pen, nemi xopmen mina epovo xusu miba xip tutu min. Se at nom laaleng do loklok tong pen na vot saparap nimi, neni naba lox alolos nimi xusu minaba tu lolos la minaba vas su basinge mo loklok tong pen kusu mi noxo subu.

Nemen Mitat Pas Ti Levenanan At Laxampoovo Moroa

¹⁴Kuren la, luvutnetak mi luvurinuk, mina ru asepsu basinge levelaplavang ti laxampoovo moroa. ¹⁵A paase rinimi i ngan luvuttadi akleklen; nemi xa mina ila avukat at na levelinga rak. ¹⁶At leluxa at Leeme Silok nedik di tong loklox avukat ti ne Moroa mumu lakap orong i ngan lada at ne Karisito; la nedik di inin teren, i ngan ta do dik ta lok katling luruburu atdik maxeneng at ne Karisito. La do dik di anan at lakde, i ngan labantuxu at ne Karisito naba lox asuusu i do dik ta lok katling luruburu atdik maxeneng at ne Karisito. ¹⁷Leges akde mene nedik ta anan teren, kuren la nedik ta lok ngan legesa bungmixin, keke i do nedik di buaang.

¹⁸Mina doma mumu limixin me Israel, mo limixin digak lok ka lempanga anan atdi riplavang ti ne Moroa, la kerepmo diga xis esogo min. ¹⁹Kereva, mo lovoovo moroa neni lomoroa ruturun? Kopla leveluxa limixin diplavang min ti lovoovo moroa ni laramtaba ruturun? ²⁰Kopmen tinotno! A tong i rinimi do lavamolon diplavang ti laxan moroa xaxarang, i lok ngan diplavang ti lubunggas la xopmen ti ne Moroa, la a xopara i do mina lox esogo mi lubunggas. ²¹La kerepmo ixo epovo do mina inin at lakap at Leeme Silok, la at lakap bok at lubunggas. La kopmen tinotno na epovo do mina anan at leveluxa at Leeme Silok la minam tebeng alis

bok loklok at lotu saparap lubunggas. ²²Do nemi mina mu asu i na, nemi minaba lox amusak ne Moroa. La mikleklen i do, kopmen mina lolos ngan ne Moroa.

²³I epovo do dik ata lok levempanga axap, ketla kopmen levempanga axap i lox avukat. I epovo do dik ata lok levempanga axap, ketla kopmen nom levempanga axap naba lok tooro dik kusu atabaklen avukat ne Moroa la ata mumu asu leventaangas teren. ²⁴Ixo lox avukat do tara na lok tavanga xusu naba epovo xusuk mun at lixitkis teren, ketla neni na rebeng kaka leveloklok nunuan kusu na lok tooro leventaba vetpes.

²⁵I epovo do mina anan leveluxa lomlomon di sesep min to at levengkot etang la nemen mita doma mumu solo i do digaplavang pam min ti laxampoovo moroa, ²⁶mila Lovoang Kaala i tong i do, “Lavatkangka axap mi levempanga axap di nemen keneng teren, nom axav i at ne Moroa.”

²⁷Mo do luvuttadi xopmen dina nuunu, la dina povot tinimi uto at larapeluxa atnedi, la mi doxoma i do minat pas, i lox avukat do mina anan levempanga anan axap di raba nimi min, la nemen mita doma mumu solo i do digaplavang pam min ti laxampoovo moroa. ²⁸Ketla do tara vetpes na lok tinimi xeretna, “Anai leveluxa digaplavang min ti laxampoovo moroa.” Nemen gat mita an at nom leveluxa; i lox avukat do mina ronga res teren kusu mi noxo lok kapmek lodoxoma at nom laradi i tong i na rinimi. ²⁹Do mina anan mo leveluxa, noxo lok kapmek lodoxoma atnimi, ketla ap mo mun laradi vetpes.

Ketla tara ba lok keretna, “Kopmen nak mokso do lodoxoma at tara vetpes na lok pe ia xusu nia a noxo anan mo leveluxa. ³⁰La mo do ana tong loklox avukat ti ne Moroa ri mo leveluxa, ixo epovo do tara vetpes na mi abulubun taba ia min, atla nia ara tong avukat pam min ti ne Moroa.”

³¹I lox avukat mene, ketla levempanga salai do mi lox i, mina anan koplama inin, mina lox i xusu ri lox asu lisisixam at ne Moroa. ³²La mina rooro mi luruptuvuk nunuan kusu limixin me Judaia la limixin kopmen me Judaia la limixin nuunu di noxo sak kikixin at lunuunu atdi. ³³Minak lok levempanga i ngan nia ak lox i. A lok tong pen i do ana lox amomo limixin axap at levempanga nenia ak lox i. Nia xopmen ana lolos kusu ri lok lempanga ria, ketla a doma mumu loklok tooro ri limixin axap kusu di naba lok kaka lorooro avolo.

11 ¹Mina mumu asu loklok tarak, kerekngan nia a mumu asu loklok at ne Karisito.

Luruptuvuk At Lavakin Keneng At Levenaleng Potpot Buru

²Nenia a emi asu minimi mila mi doxoma amisix ia la mi mumu asu levenanasa, agara anasa vam nimi min.

³Ketla a vara i do minaklen avukar i do ne Karisito neni i nemen mavana at lavatlok axap, la latlok neni i nemen mavana at latkin teren; la ne Moroa neni i nemen mavana at ne Karisito. ⁴Kuren la latlok do i ngising kopla i tong asu levelinga at ne Moroa la i kua pe lavatlak teren, neni xopmen na lok ngangao at ne Iesu Karisito. ⁵La nege tatkin do i ngising kopla i tong asu levelinga at ne Moroa la kopmen na xua pe lavatlak teren, neni xopmen na lok ngangao at latlok teren. I lok ngan mun latkin in gan pes axap levengkabinim at lavatlak teren. ⁶Mo dola tatkin kopmen na xua pe lavatlak teren, i lox avukat do neni na sep korop atmut lavatkabinim teren. Ketla ni lavanga loklok mamangan do tatkin na gan kepe levengkabinim at lavatlak teren kopla na sep korop lavatkabinim teren. Kuren la neni na kua pe amisik lavatlak teren to at lotu. ⁷Ixo epovo do latlok na xua pe lavatlak teren, mila neni i lox asuusu lampoovo mi lisisixam at ne Moroa la kerepmo ni i emi asu mi ne Moroa. Ketla latkin na xua pe lavatlak teren at lotu mila neni i lox asuusu lampoovo at loklok ngangao ren ti latlok teren. ⁸Na i ruturun mila ne Moroa goxo rudum li latlok mi loxosi at latkin, ketla ne Moroa ga rudum li latkin mi loxosi at latlok. ⁹La ne Moroa goxo rudum li latlok ti lok tooro latkin teren, ketla ne Moroa ga rudum li latkin ti lok tooro latlok teren. ¹⁰Kuren la latkin na kua pe lavatlak teren; i ngan ta loklok katling ti latlok teren, i silok tin; ni na lox i xuren mila lubang angelo diba ven i do latkin i lok ngangao at latlok teren.

¹¹At lixitkis etangas atdik eburu mi Leeme Silok atdik, i lox avukat do latlok na nuunu saga at latkin teren, la latkin na nuunu saga at latlok teren. ¹²Mina lox i xuren mila ne Moroa ga rudum li latkin mi loxosi at latlok la lavakin di pisik lavatlok. Ketla levempanga axap ga ravasu at lodoxoma at ne Moroa.

¹³Nemi xa mina ila mumu i na do kereva, ik mokso ri tatkin do na sing ti ne Moroa at lemeren limixin at lotu la kopmen na xua pe lavatlak teren? Kopmen. ¹⁴Leretere atdik i tong i do latlok do i ruuna lavatkabinim silok, mo lavatkabinim silok teren i sat ka lainmangan tin. ¹⁵Ketla lavatkabinim silok at latkin ni lampeneves ti limixin. Ne Moroa xa ga raba i mi lavatkabinim silok kusu ri xua pe lavatlak teren. ¹⁶Ketla do tara i vara i do na etep mi na levelinga rak, a tong i do kopmen teretere vetpes bok ba go i nemen mumu na loklok ti kua vatlak to xeneng at lotu, ik lok kantubu atnema luvuttadi vavang kopla limixin at lotu at ne Moroa.

Leluxa At Leeme Silok

(Mt 26:26-29; Mk 14:22-25; Lu 22:14-20)

¹⁷Mumu na levenanasa, nia xopmen ana emi asu minimi, atla levempotpot buru atnimi ri lotu xopmen na lox asu tevempanga nunuan,

i lox asuusu mene levempanga i lok kakapmek. ¹⁸Lavanga avot i lok keretna; nia aga ronga i do lixitkis epeseves mo ik lok kantubu at levempotpot buru atnimi; la a lok do nai i raturun. ¹⁹Lixitkis epeseves ik lok kantubu atnimi, la kerepmo i lox asuusu i do leventaba mene atnimi di mumu asu raturun ne Moroa. ²⁰Do mit pot buru ap mo levempotpot buru atnimi, xusu ri anan leluxa at Leeme Silok, nemi xopmen mina mumu asu loklok at nom leluxa. ²¹Legetgesara xa mo i anan avot ta, la kopmen dina ngangais be ri leventaba xopmen tevempanga anan atnedi, la nedidit pot la dirak toxo mila leveluxa ira xap pam; la lentaba mo diran an mais la dira inin tangtangu nga. I lok kapmek tinotno. ²²Kereva, kopmen taragu atnimi getgesara ri anan la mina inin e? Nom loklok i lox asuusu i do mi lox abulubun lotu at ne Moroa la mira lox amangan bok limixin at lotu mo xopmen tempanga anan atdi. La kereva levelinga rak mumu i na? Mi nua i do nia anaba emi asu minimi? Kopmen tinotno.

Levenanasa Mumu Leluxa At Leeme Silok

²³Na levenanasa Leeme Silok ga raba ia min, nia aga raba avolo vam nimi min. Ap mo laxanimin diga ranga alis kaka Leeme Silok ne Iesu ren, neni ga lok ka loxongkide. ²⁴La ni ga tong orong ti ne Moroa, ni ga sebex i la ga lok ti luvuttadi loklok ka anasa ren keretna, “Labantuxu rak na, a raba i rinimi. Minak lox amisix i na xusu ri doxoma ia.” ²⁵Melemu at laanan, neni ga lok kaka lakap vaen la ga lok box i ngan loxongkide; neni ga lok ti luvuttadi loklok ka anasa ren keretna, “Ana lakap vaen ni lekabus maxat at ne Moroa ga lox i mi lada rak eburu minimi. Mina lox amisix i na xusu ri doxoma ia, mo do mina in i.” ²⁶Lavasuun at na xeretna, dola mina anan at na lakde la mina inin at nai lakap vaen, mi lox asuusu i do Leeme Silok ga uu nop loklok atdik. La ata mumu asu na loklok se neni nabamlong.

²⁷Do nege i anan at lakde koplai i inin at lakap at Leeme Silok la ixo lox i mi loklok ngangao, neni i lok pam laxapmek ti labantuxu mi lada at Leeme Silok. ²⁸Kuren la nemi getgesara mina ila mu avot be lorooro atnimi. Do mira leeng basinge vam laxakapmek atnimi, i epovo ba mina anan at lakde la mina inin ba at nom lakap. ²⁹Do tara xopmen na ven kibis lavasuun at lakde mi lakap, neni ira sok ka vam loxot tin do neni i anan la i inin at nom leluxa at Leeme Silok. ³⁰Nom mene i lavasuun teren la buang atnemi dik meres la labantuxu atdi i molo, la leventaba dira remet. ³¹Ketla ne Moroa noxo lox asongot dik kerepmo, do nedik axa ata ila mumu avot be luruvtuvuk atnedik la melemu ba ata anan ba at leluxa at Leeme Silok. ³²Ketla ne Moroa ip sev amarat dik kerepmo, kusu nedik ta noxo seeve eburu minedi limixin at na lavatbung menemen dixo nuunu at Leeme Silok.

³³Kuren la, luvutnetak mi luvurinuk, a tong i rinimi xeretna; dola mina vot buru kusu mina anan at leluxa at Leeme Silok, mina ngais ka be nedidit

kovisi dina rupot. ³⁴La do tara i roxo, neni na anan avot be ro at loogu ren, la kerepmo mi noxo ekip tangarang mi lebelemamao at ne Moroa.

La ti mo levelinga vetpes bok miga sue ia mumu i, aba vaase bok ba nimi min do nia ana vot pasa nimi.

Leventamtaba At Loroonan Kaala

12 ¹Luvutnetak mi luvurinuk. Ana anasa nimi mi leventamtaba boro at Loroonan Kaala, xusu mina xasep teren. ²Mikleklen i do ganoxa miga nemen ngan lavamolon kopmen tunuunu atdi; lempatpoovo moroa gam gomgo rinimi la ga sasar asoogong nimi. ³Kuren la mina ila mumu loklok at limixin do di nuunu ruturun koplaxopmen. Kuren la mina xasep do mo laradi, Loroonan Kaala at ne Moroa i suxuna i, kopmen noxo tong i do 'Lasaxaek naba mu ne Iesu!' Ketla laradi do Loroonan Kaala at ne Moroa na suxuna i, neni xusuk mun i epovo na tong i do 'Iesu, neni Leeme Silok.'

⁴Buaang laxantamtaba at Loroonan Kaala, ketla na axav i leventamtaba i laala mun boro at Legeso Roonan Kaala im taba i.

⁵Buaang leventaangas ti lok tooro lugugu at ne Moroa, ketla nedik axap ta gugu ri legesa Eme Silok. ⁶Buaang leventaangas axap ti lok lugugu at ne Moroa, ketla legesa Moroa mun im taba levelolos ti limixin axap ti lok leven gugu ren.

⁷Moroo im taba legetgesa radi mi leventamtaba at Loroonan Kaala kusu rin ti lok tooro limixin axap di nuunu. ⁸Loroonan Kaala i lox epovo i xusu na raba laradi mi laramtaba ri tong asu Lagale Lavavang. La ti lara vetpes na mun legeso Roonan Kaala i raba i mi laramtaba ri tong axasep levelinga at ne Moroa. ⁹La ti lara manga na Loroonan Kaala mun i raba i mi lunuunu i lolos aleng. La ti lara manga i raba i mi lololos kusu ri lox avukat limixin mekmeres. ¹⁰La Loroonan Kaala i raba lara mi lololos ti lok levempanga sangsangu; la ti lara vetpes manga i raba i mi laramtaba ri paase alii; la ti lara manga laramtaba xusu na ila levelinga dola ila meva, boro at Loroonan Kaala xopla xopmen. La ti lara manga Loroonan Kaala i raba i mi laramtaba ri paase mi levempapaase vetpes; la ti lara i raba i mi laramtaba xusu rik soxomus lavasuun ap mo levempapaase vetpes. ¹¹Ketla neni mun legeso Roonan Kaala ik lox i na; la im taba leventamtaba ri legetgesa radi ngan Loroonan Kaala i vara i.

Lavapaase Poovo Mumu Limixin Lotu Dina Ru Buru

¹²Labantuxu at laradi i ruuna buaang laxangkot; ketla neni mun legesa bantuxu mi levengkot axap ik lok teren. Karisito ik lok mun kuren.

¹³Nedik axap limixin, ne Moroa gara suxuna vam dik mi mo legeso Roonan Kaala ren, kuren mun la nedik at legesa bantuxu; mila nedik axap ataga lok ka vam legeso Roonan Kaala ne Moroa ga raba nedik min.

Keke i do buaang atnedik limixin, la nedik at levengkot petpes, leventaba at leme Judaia, la leventaba xopmen di me Judaia, la leventaba nedi levenasaxaruki, la leventaba nedi luvuttadi mene xuren.

¹⁴Kopmen tegesoxot mene xeneng at labantuxu, ketla buaang levengkot teren. ¹⁵Mo luxangkedek i nemen ngan axa luxot at labantuxu; ixo epovo do luxangkedek na lok, ‘Nema xopmen lukngen, la kerepmo nema xopmen at labantuxu.’ ¹⁶La lubaalung naba nemen ngan axa luxot at labantuxu; ixo epovo do du na lok, ‘Nema xopmen luxatli, kuren la nema xopmen lenep at labantuxu.’ ¹⁷Dola labantuxu axap ni luxatli, ni naba ronga levelinga xereva? La do ni mun lubaalung, neni naba sumak kereva? ¹⁸Ketla ne Moroa goxo lok labantuxu atdik kuren. Moroa ga lok li levengkot axap at labantuxu atdik kerekngan lavavara ren kusu naba lok kuren. ¹⁹Mo do levengkot axap at labantuxu ni legesoxot mun, kopmen bok ba tabantuxu. ²⁰Ketla i ngan ta i do buaang levengkot ik lok at labantuxu, ketla nedi at legesa bantuxu mun.

²¹Kuren la luxatli du noxo tong i ri lukngen do, “Maxok pakes tinumu!” La lavatlak noxo tong i ri luxangkedek do, “Axok pakes tinumu!” ²²Ketla ti levengkot at labantuxu, kopmen tugugu silok atdi, nedi di lok tooro aleng. ²³La ti mo levengkot at labantuxu atdik, ixo lox avukat do limixin dina ven i, dik di etara pe nunuan tintotno i; la ri levengkot bok at labantuxu atdik ixo lox avukat do dik ata paase mumu i, nedik di ke xepe i. ²⁴Ketla ti levengkot at labantuxu atdik i lox avukat, kerekngan lemeren dik, nedik dixo etara pe i. Moroa axa ga rudum li axap levengkot at labantuxu atdik kerepmo, kusu limixin dina lok ngangao ap mo levengkot at labantuxu limixin di lox abulubun i. ²⁵Kuren la kopmen tekarakat nak lok at labantuxu, ketla levengkot axap di elok tooro ela. ²⁶Mo do toxot at labantuxu na songot, nedi bok lentaba levengkot petpes at labantuxu diba songot eburu min. Mo do tenep at labantuxu na ruuna ka lomomo, mo bok levengkot petpes diba lok momo eburu min.

²⁷La kerepmo nemi axap mi lok ngan labantuxu at ne Karisito, la nemi getgesara mi lok ngan levengkot ap mo labantuxu ren. ²⁸Keneng at lotu Moroa gara soxolik ka vam limixin ti lok leven gugu; neni ga lok katling ka luvuttadi vavang ngan neni lugugu avot la i silok ti leventaba vetpes, la lara mumu ren luvuttadi vapaase alii, la lara mumu luvuttadi ri anasa limixin mi levelinga at ne Moroa; la lara mumu manga ren nedi di lok levempanga sangsangu; lara melemu manga nedi ne Moroa ga raba di mi lololos kusu ri lox avukat limixin mekmeres; leventaba ri lok tooro limixin, leventaba ri gomgo nga di la lara mumu rinotno leventaba ri paase mi levempapaase vetpes. ²⁹Kopmen nedi axap luvuttadi vavang, koplaluvuttadi vapaase alii, koplaluvuttadi loklox ase; kopmen nedi axap di ruuna lololos kusu ri lok levempanga sangsangu, ³⁰kopla ri lok avukat levenanmeres, koplaluvuttadi paase mi levempapaase vetpes, koplaluvuttadi

ri soxomus lavasuun at levempapaase vetpes. ³¹Ketla lebelen nimi na ngaongao aleng kusu mina ruuna ka mo leventamtaba i silok aleng.

Lara lavanga i lox avukat tinotno ri na leventamtaba, i lok keretna.

Labalamu

13 ¹I epovo do ana paase mi levempapaase axap limixin di paase min at na lavatbung menemen kopok, la ana paase bok mi levempapaase at lubang angelo, ketla mo do axo ruuna labalamu, levempapaase rak naba lok ngan mun lanteng at laxavu mi lanteng at lagamit kopmen tvasuun teren. ²La do a ruuna laramtaba at ne Moroa xusu ri vavang alii, la anaklen pipis levempanga axap, la anaklen avukat bok levendoxoma alipe at ne Moroa; la lunuunu rak ti ne Moroa i lolos aleng la a epovo xusu ana riki pes levempatkaana; ketla mo do kopmen tabalamu na nemen tarak, nenia mun lavanga gamasa. ³La do ana raba xape axap levempanga rak kusu ri lok tooro limixin banbalo, la ana siam kape mi labantuxu rak kusu dina xotos i ro at laxao, ketla kopmen tabalamu na nemen tarak, nom axav i, noxo lok tooro ia.

⁴Laradi balamu ik lok mulus mene, la ik lok tooro luvutneton. Neni xopmen na ngaongao ri lempanga at lentaba vetpes la kopmen nap kip aurut laasen teren. ⁵Laradi balamu i ruuna luruptuvuk nunuan la kopmen nak morong, la kopmen nak musak soso, la kopmen na doxoma amisik laxakapmek lara vetpes i lox i rin. ⁶Laradi balamu xopmen nak lok momo at laxakapmek limixin dik lox i, ketla ik lok momo at lununuan limixin dik lox i. ⁷Laradi balamu xopmen na porang laxakapmek lara vetpes ik lox i rin, la i nunua i do limixin diba lok lununuan la i doxoma aie xape levenmumuat it pot saparav i.

⁸Anai leventamtaba at Loroonan Kaala, laramtaba ri paase alii, la laramtaba ri paase mi levempapaase vetpes, la laramtaba ri tong asu levelinga at ne Moroa. Di axap na lavantun di noxo nemen abao la dina sonao manga; ketla labalamu naba nemen amisik la kopmen taxavaxap teren. ⁹Leventamtaba atdik boro at Loroonan Kaala i raba dik min, i ngan laramtaba ri tong asu levelinga at ne Moroa la laramtaba ri paase alii, nedik taxoklen avukat lugugu ren. ¹⁰Ketla melemu Laradi Mokmokso nabamlong la mo leventamtaba kopmen ataklen avukar i naba xap asonao.

¹¹Ga lamdak kakalix ia, levempapaase rak mi lusumsuma rak la lodoxoma rak ga lok ngan mun at lamdak lixilik; ketla na nga ara vee radi, ara lok kepe axap pam loklok at laxamdak lixilik. ¹²La kerepmo nanga dik kopmen ata xasep at levempanga ne Moroa i lox i ridik, i ngan laradi i reven lemeren at liriong kopmen na xasep. Ketla melemu at lomlong at ne Iesu Karisito, dik taba epen etang mi ne Moroa. Nanga lakleklen atdik mumu ne Moroa i lixilik mene, ketla melemu tabaklen axav i, kerekngan ne Moroa ikeklen axap dik.

¹³Kuren la ana lavantun levempanga naba nemen amisik, lunuunu saparap ne Moroa, lodoxoma voovo ti lomlong at ne Karisito, la labalamu; la lara i silok aleng at nai lavantun, ni labalamu.

Leventamtaba At Loroonan Kaala

14 ¹Mina lolos kusu lorooro atnimi na mumu asu loklok at labalamu. La lebelen nimi na ngaongao xusu mina lok kaka leventamtaba at Loroonan Kaala, ketla mo laramtaba ri paase asu levelinga at ne Moroa, mina lolos ti lok ka i. ²Lara do i paase mi levempapaase vetpes, neni xopmen na paase ri limixin, ketla i paase ri ne Moroa, la kopmen tara na xasep nunuan at levempapaase neni i paase min. Neni i ngan ta do i paase mi levelinga lipe boro at loroonan teren la levempapaase ren ixo xasep at levendoxoma at limixin. ³Ketla mo laradi i paase asu levelinga at ne Moroa, ni i paase ri limixin, la kerepmo bok i lok tooro di, la i lox alolos di, la i lox aulis levendoxoma atdi. ⁴Laradi i paase mi levempapaase vetpes, neni i lok tooro xusuk mene i; ketla lara i paase asu levelinga at ne Moroa, ni i lok tooro limixin axap kusu lunuunu atdi naba lolos. ⁵I lox avukat do nemi axap mina paase mi levempapaase vetpes, ketla lavanga i silok ti na, a vara i do nemi axap mina lok ka laramtaba ri paase asu levelinga at ne Moroa. Laradi do i paase asu levelinga at ne Moroa, mo levelinga ren i mumuat aleng ti lara i paase mi levempapaase vetpes, la mo levelinga ren i epovo na xasep ti limixin; ketla i lox avukat mene do tara go i nemen la i ruuna bok laramtaba boro at Loroonan Kaala xusu ri soxomus avukat lavasuun ap mo levempapaase vetpes, kusu na lok tooro limixin at lotu.

⁶Kuren la luvutnetak mi luvurinuk, do nenia ana vot pasa nimi la ana paase rinimi mi levempapaase vetpes, mo lavapaase rak naba lok tooro nimi xereva? Kopmen tinotno. Ketla do ana tong asu levelinga boro at ne Moroa rinimi koplana raba nemi mi tavapaase axasep at Lovoang Kaala, koplana vavang tinimi mi levempapaase alii, koplana anasa nimi, nom i naba lok tooro aleng nimi. ⁷Lavapaase poovo mumu i na, i lok keretna; mina doxoma mumu be levempanga rengteng i ngan laxaatu dit mas i la loxontaaleng dip sev i. Do laradi xopmen nat mas avukat laxatu, ata ba ronga xibis mo loxompixan kereva? La do lara ip sep loxontaaleng, la kopmen nap sep avukar i, ataba ronga xibis mo loxompixan kereva? ⁸La mo do laradi it mas luru ri leesep la kopmen na mas aonon avukat lerengteng teren, limixin esep di noxo gagas avukat ti leesep. ⁹La i lok mun kuren tinimi. Do mina tong asu levelinga at ne Moroa mi levempapaase vetpes, kopmen tara naba xasep nunuan teren. Levelinga atnimi naba ngan lamamas gamasa. ¹⁰Buaang laxampapaase axap at na lavatbung menemen, la na levempapaase axap, levempasuun mo ren i nemen. ¹¹Ketla mo do nia xopmen anaklen lavapaase lara

i vaase asu i, mo laradi i paase na levelinga, naba lok ngan laradi xadiong tia la nenia bok aba lok ngan laradi xadiong tin. ¹²La i lok bok kuren tinimi. Nia aklen i do nemi mi vara aleng i xusu mina ruuna ka leventamtaba at Loroonan Kaala; kuren la mina lolos kusu mina lok kaka leventamtaba i epovo xusu ri su auru lotu.

¹³Ni lavasuun teren la do laradi i paase mi levempapaase vetpes, neni na sing bok ne Moroa ri laramtaba xusu ri soxomus avukat lavasuun ap mo levempapaase vetpes. ¹⁴Dola nia ana sing mi levempapaase vetpes, mo levelinga i ravasu at loroonan tarak, ketla mo levelinga xopmen na xasep at lodoxoma rak. ¹⁵Kuren la nia aba lok ba lavanga salai? Do nenia a sing saparap ne Moroa, a vara i xusu lisingising tarak na ravasu at loroonan tarak la naba ravasu bok at lodoxoma rak; la a vara box i xusu mo levengkompixan abak pixan i, naba ravasu at loroonan la at lodoxoma bok tarak. ¹⁶Do mina emi asu mi ne Moroa mi levempapaase vetpes boro xeneng at loroonan kusuk mun atnimi, la do taradi go xopmen na lotu i nemen eburu minimi ap mo lixitkis buru, la neni ixo xasep at levempanga salai mo mi paase asu i. La ni naba tong i do “I ruturun!” kereva, do mina lox axap lisingising loklox avukat atnimi? ¹⁷Keke i do lisingising loklox avukat atnimi ri ne Moroa mo i lox avukat, ketla nom lisingising atnimi xopmen noxo lok tooro mo laradi kopmen na lotu.

¹⁸Nenia a tong avukat ti ne Moroa mila a paase aleng mi levempapaase vetpes, la nemi kopmen. ¹⁹Ketla to at levempotpot buru at limixin keneng at lotu, i lox avukat do ana tong mene tavalimo tengkolinga i xasep kusu ri lox ase limixin. Ixo lox avukat do ana paase mi taxalinga solo at levempapaase vetpes la kopmen na lok tooro limixin.

²⁰Luvutnetak mi luvurinuk, nemen levendoxoma atnemi na lok ngan loklok at laxamdak lixilik, ketla mina ke xepe laxakapmek kerekngan laxamdak lixilik. La mina doma mumu avukat na leventamtaba ngan limixin mukun. ²¹Keneng at Lenavolo i lok keretna,

“Moroa ga lok, ‘Nia aba paase ridi na limixin tarak mi levempapaase vetpes at limixin kadiiong, la aba paase ridi mi levelinga at limixin kadiiong, ketla di noxo rongga res tarak.’”

Ais 28:11,12

²²Kuren la laramtaba ri paase mi levempapaase vetpes ni i lox asuvos ne Moroa ridi limixin kopmen dina nuunu la kopmen tidi limixin di nuunu; la laramtaba ri tong asu levelinga at ne Moroa i nemen ti limixin teren, la kopmen tidi limixin kopmen dina nuunu. ²³Mo do limixin lotu axap dina vot buru la nedi axap dina ru ka i do dina paase mi levempapaase vetpes la do teventaba tuvuttadi gamasa go koplavuvuttadi xopmen dina nuunu, dina vubeles, nedi diba nua i do nemi mo mi baulang. ²⁴Ketla mo do mina paase mi levelinga at ne Moroa la do luvuttadi gamasa xopla tuvuttadi kopmen dina nuunu, dina vubeles ukeneng, nedi dinaba rongga xibis mo levelinga nedi di rongga i. La mo

levelinga nedi di rongga i, naba vuk gili lodoxoma atdi; ²⁵la dinaba ven kibis levempanga xakapmek i nemen keneng at lorooro atnedi; at na mun i loklok dinaba xis tiktikbu la dina lok ngangao ri lotu saparap ne Moroa, la dina tong asu i do, “I ruturun tinotno, Moroa i nemen eburu minimi.”

Loklok Ti Mumu Asu I Xeneng At Lotu

²⁶Luvutnetak mi luvurinuk. Ti lox axap na levelinga rak a vara i xusu ana tong axasep nimi keretna. Do minat pot buru ri lotu, lara na ruuna loxompixan; lara ri loklox ase mi levelinga at ne Moroa; la lara mi levelinga loklox axasep boro at ne Moroa, la lara ri levempapaase vetpes, la lara ri soxomus mo levempapaase vetpes. Na levempanga axap mina lox i xusu ri lox alolos limixin at lotu. ²⁷Do teventaba di lok do dina vaase mi levempapaase vetpes, nemen dita epaase at legeso xonaleng, ketla dina epangan asu. I lox avukat do tegepura xopla tavantun mene dina vaase. La tara vetpes bok naba ba gili mo levempapaase vetpes. ²⁸Ketla do xopmen tara go i nemen kusu ri soxomus lavasuun ap mo levelinga, i lox avukat do, mo laradi i paase mi levempapaase vetpes, nat kis atnaasan la ni na emaangu pilo mene mi ne Moroa.

²⁹Legepura xopla lavantun mo dira gagas pam kusu dina vaase asu levelinga at ne Moroa, la leventaba vetpes dinat kis atnaasan la dina ila mumu mo levelinga do ni levelinga ruturun pam at ne Moroa xopla xopmen. ³⁰Ketla do tara go it kis ap mo lixitkis buru i lok ka tevelinga boro at ne Moroa, mo lara i paase, neni na vamngus be. ³¹Ixo epovo do nemi axap mina vaase asu levelinga at ne Moroa at legeso xonaleng; mina epangan asu xusu nemi axap miba elox ase la mina elok tooro ela. ³²La nedi di ruuna laramtaba ri paase asu levelinga at ne Moroa dina lok tatao avukar i. ³³la kerepmo lotu atnimi nabak sixit nunuan. Mina lox i xuren mila ne Moroa ga xup kaka dik kopmen do rik lox angtang gamasa, ketla ni ga xup kaka dik kusu lotu atdik nabak sixit nunuan, atla neni ne Moroa at limila.

To at laraugu lotu at limixin at ne Moroa, ³⁴lavakin dinat kis pilo ro xeneng at levempotpot buru at lotu. Kopmen nak mokso ridi do dina paase; la di noxo gomgo, kerekngan Lenavolo at ne Moses i tong i. ³⁵Mo do lavakin di vara i xusu dinaklen ka tavanga, i lox avukat do dina sue be lavatlok atdi min to at laraugu atdi. Lavanga mamangan aleng do latkin na vaase kaxat to xeneng at lovtotpot buru at lotu.

³⁶Kereva, levelinga at ne Moroa ga vas kaxat medom atnimi? Kopmen. Kereva, nemi xusuk miga lok kaka levelinga at ne Moroa? Kopmen.

³⁷Mo do tara i doxoma i do neni laradi vavang at ne Moroa xopla i ruuna laramtaba at Loroonan Kaala, neni na ven kisiv i do na levelinga rak nia a malagan i, ni levelinga lolos at Leeme Silok. ³⁸Ketla do xopmen dina ven kisiv i do na levelinga rak boro at ne Moroa, nemen mita rongga res at levelinga ren.

³⁹Kuren la luvutnetak mi luvurinuk, lebelen nimi na ngaongao xusu mina paase asu levelinga at ne Moroa, ketla nemen mita ru pe tara i ruuna laramtaba xusu ri paase mi levempapaase vetpes. ⁴⁰Ketla levempanga axap minak lox i mi lomokmokso xusu lotu nak sixit nunuan.

Karisito Ga Roo Xat Pam At Lanmet

15 ¹Luvutnetak mi luvurinuk. A vara i do mina doma amlong ti nom Lagale Lavavang, nenia aga vavang min tinimi; miga siam ka i la lunuunu atnimi ga ru alolos teren. ²Mo do lunuunu atnimi natmatkun teren, miba lok ka lorooro ren. Ket do kopmen mina nuunu at levelinga xerekngan nia aga vavang min, lunuunu atnimi naba lok ngan lavanga gamasa.

³Nia aga raba nemi mi levelinga nia aga lok kaka i boro at ne Karisito. Mo levelinga ga lok keretna. Karisito ga uu xorop ti loklok kakapmek atdik ngan Lovoang Kaala i tong i. ⁴La digak mir i, la at laaleng sepsev avantun ni ga roo xat amlong manga, kerekngan Lovoang Kaala i tong i. ⁵La ni ga ru asuvos ti ne Pita la melemu rinedi lasangaun mi legepura luvuttadi vavang. ⁶La melemu bok neni ga ru asuvos tinedi lavalimo sangaun kobot (500) mi lenep mixin diga nuunu ren. Leventaba atdi digara met pam ketla buaang atnedi move di rooro. ⁷La melemu neni ga ru asuvos ti ne Jems la tinedi bok luvuttadi vavang axap. ⁸Melemu rinotno ni ga vot asuvos ba ria ngan ta laxadede nenen i visik kubun i.

⁹La nenia a lok ngan laradi gamasa maxopok atnedi luvuttadi vavang. Kopmen ana epovo xusu limixin dina tong ia do laradi vavang, mila nia agap sev asongot limixin nuunu at ne Moroa. ¹⁰Ketla ne Moroa ga lox asusu langangan letaba nabalamu ren tia la ni ga lox amaxar ia, i ngan ta laradi vavang; la maxeneng at na letaba nabalamu ni ga raba ia min, laxampanga nunuan ga ravasu at lorooro rak, i ngan aga gugu lolos tinotno rinedi lentaba luvuttadi vavang. Ketla xopmen lololos tarak na nia aga gugu min, ketla letaba nabalamu at ne Moroa mo ga lox ia xusu a epovo ana gugu lolos. ¹¹Kuren la kopmen na lok petpes, dola nia aga vavang koplaluvuttadi vavang diga vavang tinimi; nema axap maga vavang mene mi legesa vavang la na Lagale Lavavang pam nemi miga siam kaka i.

Laxakatu Kaxat Amlong At Ne Karisito La Atnedik Bok

¹²Lagale Lavavang maga vavang min tinimi dola, Moroa gara lox arooro xat amlong pam ne Karisito ri lorooro. Kuren la kopmen na ruturun i ngan ta i mo leventaba atnimi di tong i do limixin digara met pam, di noxo roo xat amlong. ¹³Mo do i ruturun do limixin di met la di noxo xatu kaxat amlong ti lorooro, i ven ngan tai do ne Moroa goxo lox arooro amlong ne Karisito. ¹⁴La mo do ne Karisito goxo roo xat amlong at lanmet, kopmen

tavasuun tinotno ren kusu mana vavang tinimi la lunuunu bok atnimi ba lok ngan lavanga gamasa. ¹⁵La mavana at nai, i ven ngan ta i do maga xarang taba ne Moroa do neni ga lox arooro amlong ne Karisito basinge lanmet; mila do i ruturun do limixin diga met pam di noxo roo xat amlong ti lorooro, i lox asuusu i do ne Moroa bok goxo lox arooro xat amlong ne Karisito. ¹⁶Do xopmen taxakatu kaxat amlong, ne Karisito bok kopmen gi toxo roo amlong. ¹⁷La do ne Karisito xopmen goxo roo amlong, lunuunu atnimi keneng at ne Karisito xopmen na ruturun; la laxakapmek move atnimi ik lok, ne Moroa xovisi na doxoma xape i. ¹⁸La tinedi bok diga met mi lunuunu atnedi at ne Karisito, nedi bok diba seeve, do laxakatu amlong at ne Karisito xopmen na ruturun. ¹⁹La mo do lodoxoma voovo atdik ti ne Karisito at na mun lorooro la kopmen ti lorooro melemu, lebelen tuntun at limixin tinedik naba silok ti lentaba vetpes.

²⁰Ketla at na levenaleng, na levelinga i ruturun tinotno, Karisito gara roo xat amlong pam at lanmet ngan livipisik avot tinedi dinaba roo xat amlong; la kerepmo maklen tinotno i do mo limixin nuunu diga met pam, dinaba roo xat amlong bok. ²¹Lanmet ga vot ti nai lavatbung menemen mumu mene legesa radi; kuren la lorooro xat amlong bok atnedi digara met pam i vasuun mun at ne Karisito, ²²mila keneng mun at laxakapmek at ne Adam ga raba avolo dik min. Kuren la lanmet ga vubeles mu limixin axap; la keneng at lixitkis esogo atdik mi ne Karisito, limixin axap di nuunu, do dina met, dinaba roo xat amlong. ²³Ketla nedi getgesara dinaba roo xat amlong at levengkonaleng axa atdi. Avot tinotno ne Karisito ga xatu kaxat amlong, la at laaleng neni namlong ude xopok, nedi ba mo limixin digara met pam mi lunuunu atdi xeneng at ne Karisito, dinaba roo xat amlong. ²⁴La melemu ba, laxavaxap at na lavatbung menemen naba vot; Karisito naba ruuna lololos mavana at levelolos atnedi luvuttadi amgomgo, labaroonan kapmek, la lavaeme silok axap diga sok tixirixes ne Moroa; la neni naba raba avolo ba Linintoo ren ti ne Moroa ne temen. ²⁵Karisito naba nemen ngan laradi gomgo se ne Moroa naba sev asi axap nedi dit kis munepen min la na lok li di maxopok at luxangkedek at ne Karisito. ²⁶Morua naba lok kepe be nedi axap la melemu ni na lok kepe axap ba lanmet. ²⁷I ngan Lovoang Kaala i tong i do, "Morua naba lok li levempanga axap maxopok at luxangkedek teren." Kopmen lavasuun teren do ne Moroa bok nak lok maxopok at ne Karisito, ketla ne Moroa ga lok li levempanga axap maxopok at ne Karisito. Na i xasep tinotno. ²⁸Do levempanga axap ne Moroa na lok li i maxopok at loklok tatao at ne Karisito, melemu ne Karisito, nitna naba lok li i maxopok at ne Moroa; Karisito ga lok li levempanga axap maxopok teren la ne Moroa nabak lok tatao axap mavana atdi.

²⁹Dola xopmen taxakatu kaxat amlong, kopmen tavasuun teren kusu nemi mi lok ka lesepe susu ridi limixin digara met pam. Do labarongan

di noxo roo xat amlong, na loklok atnimi noxo lok tooro di. ³⁰La kereva ba nema. Do xopmen taxakatu kaxat amlong, tila ba nema ma nemen keneng at losongsongot mumu lugugu at ne Moroa at levenaleng axap? ³¹Luvutnetak mi luvurinuk. At levenaleng axap nia a vekip tangarang mi limixin dik lok do dinap sev amer ia. La a lok momo rinotno atla nemi mi nuunu saparap ne Iesu Karisito, Leeme Silok atnedik la na lomomo i sok lodoxoma rak kusu ana tong asu i na levelinga rinemi. ³²La do xopmen taxakatu kaxat amlong, kopmen tavaasuun teren do agara esep eburu vam mi levempanga esep mi lavanuet kangkedek atdi ro Epesas. La do labarongan di noxo roo xat amlong, nenia aba ke xepe lugugu at ne Moroa la aba mumu asu loklok di tong i xeretna,

“Ata anan la ata inin mila dik ataba met soso mun.” *Ais 22:13*

³³Mina lok tatao nimi xusu tara noxo sar asoogong nimi ri laxakapmek kerepmo. La mina xasep do limixin kapmek diba lok kapmek luruptuvuk nunuan atnimi. ³⁴Minamlong ti levendoxoma nunuan atnimi la mina xap basinge leveloklok kakapmek atnimi, mila lentaba atnimi xopmen dina xasep nunuan at loklok at ne Moroa. A vaase i na xusu miba mangan.

Loklok Ti Labantuxu Maxat At Lanmet

³⁵Ketla tentaba diba sue, “Labarongan dinaba roo xat ti lorooro xereva? Labantuxu salai dinaba ruuna xaka i?” ³⁶Nemi laxampanga rangtangu. Do tara itlo liit panga ro at laxangka, noxo su xat soso do xovisi na mang. ³⁷La lavanga utlo li i at laxangka, ni liit panga gamasa mene nga, at lavatpiao, kopla tevempanga vetpes; kopmen unatlo axap nom luuna xusu naba su xat. ³⁸La ne Moroa xa ik lok katling mo liit kusu na su ngan lodoxoma ren ti mo liit panga. La neni xa ik lox asuusu mo liit naba su ngan luuna axa ap mo liit.

³⁹Labantuxu at levempanga axap di rooro xopmen dina epovo; laradi i ruuna labantuxu vetpes, la levempanga mi lavanuet kangkedek i lok petpes la ti lavapixa i lok petpes la ti lenmat i lok petpes.

⁴⁰La levempanga di nemen to vana at laxalibet, di lok petpes ti levempanga mede xopok. Levereven ap mo levempanga boro vana at laxalibet i lok petpes ti levereven at levempanga at na lavatkangka. ⁴¹Levereven at laxangking i lok petpes; la lagaaling levereven petpes teren, larapenti levereven petpes la kantubu at nom larapenti, leventaba i lok petpes bok.

⁴²Naba lok mun kuren do nedi digara met pam, dina roo xat amlong ti lorooro. Do dik mit lorongan, neni i mau. Do i roo xat, neni xopmen na mau bok ba. ⁴³Do dik mir i, neni i ven kapmek. La do neni i roo xat, neni naba ven avukat tinotno la na lolos. ⁴⁴Do dik mir i, neni labantuxu mene. La do na roo xat, ni labantuxu maxat boro at Loroonan Kaala. Nedik di ruuna labantuxu at na lavatbung menemen, kuren la i epovo bok do

ata ruuna ka labantuxu maxat boro at Loroonan Kaala. ⁴⁵I lok ngan Lovoang Kaala i tong i do, “Laradi avot ne Adam, ne Moroa ga rudum li i ngan laradi rooro.” Ketla ne Adam mumu pit, neni ne Karisito, im taba lorooro at loroonan kusu ridik. ⁴⁶Kopmen loroonan nam gomgo avot, ketla labantuxu avot la melemu ba loroonan. ⁴⁷La ne Adam, ne Moroa ga rudum li i mi laxakup at laxangka, ketla ne Karisito, neni ga si boro vana at laxalibet. ⁴⁸Nedik di ruuna ka labantuxu ne Moroa ga rudum i mi laxangka ngan laradi avot ne Adam; la dik ataba ruuna ka bok labantuxu ngan at ne Karisito, ni ga si min boro vana at laxalibet. ⁴⁹La dik ataga ruuna ka labantuxu at laradi at na lavatangka. La melemu levereven at labantuxu maxat atdik naba lok ngan levereven at labantuxu at laradi ga si boro vana at laxalibet.

⁵⁰Luvutnetak mi luvurinuk. Nia a tong tuturun i do labantuxu atdik at na lorooro xopok, kopmen na epovo ri vubeles at Linintoo at ne Moroa. La levempanga i mau, kopmen na epovo xusu na lok ka tenep at lorooro avolo.

⁵¹⁻⁵²Mina rongga avukat na levelinga ga nemen aliipe. Buaang atnedik kovisi di noxo met, ketla do laangelo na mas luru xusu ri lok katling laxavaxap at na lavatbung menemen, soso ap mo mun loxonaleng nedik ataba unus. Naba lok soso mun ngan ta do laradi i vamsi, mila do dina mas luru, labarongan axap dinaba roo xat la kopmen di noxo met bok ba la nedik axap ataba unus. ⁵³Labantuxu do i mau, ni naba ngan ta labantuxu xopmen na mau. La labantuxu i epovo na met, ni naba milik ngan ta labantuxu ixo epovo na met. ⁵⁴La mo do levempanga na ravasu xerepmo, la lololos at lorooro na sev asi lololos at lanmet, neni na lavanga naba lox asorun levelinga at Lovoang Kaala i lok keretna,

“Dira vas asi axap tinotno vam lanmet.”

Ais 25:8

La i lok bok,

⁵⁵“Moroa ga lox axap pam lanmet la ga lok kepe lololos teren tik lox asongot la ti lok lainbulu.”

Ose 13:14

⁵⁶Lanmet i lok ka lololos tik lox asongot limixin boro at laxakapmek, la laxakapmek i lok ka lololos boro at Lenavolo. ⁵⁷Ketla ata emi asu mi ne Moroa mila neni ga raba dik mi lorooro la ga lok pes lanmarat at lanmet basinge dik. Ni ga lox i na xeneng at Leeme Silok atdik ne Iesu Karisito.

⁵⁸Kuren la luvutnetak mi luvurinuk orong, mina tu lolos at levelinga at ne Moroa la nemen tara ta sar asoogong ka nimi basinge luruturun teren. Minak lox angtang amisik at leven gugu atnimi ri Leeme Silok, atla mikleklen i do leven gugu atnimi ri Leeme Silok, ni noxo lok ngan lavanga gamasa.

Levenetaba Ri Luvuttadi Nuunu

16 ¹Nanga a vara i do ana vaase rinimi mumu levempilas miga malagan axasep min tia xusu ri lok tooro limixin at ne Moroa

di nemen to Judaia; mina lox i ngan nia agara vaase vam i ri limixin at laraugu lotu ro at lenep silok Galesia xusu dibak lox i. ²Amisik at levenaleng kaala nemi getgesara mina lili levempilas i epovo mina xape i. La mina gagas li i xuren, kusu nenia a noxo sing pilas atnimi mo laaleng nenia ba vot pasa nimi. ³Melemu do nia ana vot, nenia aba riki tuvuttadi uto Jerusalem, la anaba malagan taba mo luvuttadi migara siam pam midi mi levelinga loklox axasep kusu ridi rip kip laramtaba atnimi. ⁴Mo do nenia ana lok mulus tit pas ugo, nedi bok diba emu eburu minia.

Levendoxoma Alii At Ne Pol Kusu Ri Lempatpas Teren

⁵Nia aba vot pasa nimi melemu do nenia anat pas keneng at lenep silok Masadonia ketla a noxo nemen abao go. ⁶Agut aba nemen eburu minimi go at teventaba teven gaaling, kopla at leven gaaling axap at lamdut kusu nemi miba lok tooro ia at lavatpas tarak dom at levengkot salai nia anat pas teren. ⁷Axo vara i do ana vot pasa nimi monga la ana nemen eburu minimi at teventaba tevenaleng mene. A doxoma i do aba nemen eburu minimi at teventaba teven gaaling abao, mo do Leeme Silok na siam.

⁸Ketla nia aba nemen nade Epesas se at laaleng at la Pentikos, ⁹mila langas ira rem suang pam tia ri lok leven gugu silok ketla buaang bok limixin di ru pe lugugu rak.

¹⁰Mo do ne Timoti na vot pasa nimi, i lox avukat do mina seega rangarang i, mila neni mo ik lok lugugu at Leeme Silok, kerekngan mun ia. ¹¹Nemen gat tara na lox abulubun kepe i, ketla mina lok tooro i xusu ri lok mo lavatpas teren keneng at lenmila, kusu neni nabamlong bok ude saporav ia; la a doxoma i do neni nabamlong eburu midi luvuttadi nuunu.

¹²Ti neton nedik ne Apolos. A sing alolos i xusu naba vot pasa nimi eburu midi leventaba luvuttadi nuunu; ketla neni i xopara rinotno xusu ni mo nat pas ta. Do tevenaleng na sepmus tin, neni nabat pas.

Levelinga Loklox Alolos

¹³Mina lok tatao avukat amisik lorooro atnimi. Mina tu tuxuruxun at lunuunu atnimi la nemen mita marat. ¹⁴At lorooro axap atnimi mina lox asuusu labalamu.

¹⁵Miklen ne Stiven midi loxoetemen, nedi avot diga lok ka lorooro maxat to Grik, la nedi xa diga raba axap pam di ri lugugu at ne Moroa xantubu at limixin teren. La a sing nimi, luvutnetak mi luvurinum, ¹⁶kusu mina mumu asu levelinga at luvuttadi xerepmo, la atnedi bok di gugu eburu midi.

¹⁷A momo ri lovotpot at ne Stiven la ne Potunatas, la ne Akaikas boro atnimi e, mila dira ru katling pam nimi. ¹⁸La dira lox axis saga labalak kerekngan ta diga lox axis saga lebelen nimi. Luvuttadi xeretna mina lok ngangao aleng atdi.

Levelinga Loklox Axap

¹⁹Limixin nuunu at laraugu lotu xeneng at lenep silok, Asia di lox aonon lomomo atdi saporap nimi. Akuila la ne Pirikila la limixin nuunu dit pot buru amisik to at loogu atdu, di lox aonon bok lomomo atdi. ²⁰La nedi axap bok luvutnetak nade at laasen at ne Karisito di lox aonon bok lomomo atdi. Mina eseega rangarang mi lenetnes i xaala.

²¹Nenia axa ne Pol a malagan i na mi lakngak akmokso. Lavapaase momo rinimi.^a

²²Do nege xopmen na balamu Leeme Silok atdik, lasaxaek naba nemen teren.

Leeme Silok atnema, unamlong.

²³Letaba nabalamu at Leeme Silok atdik ne Iesu na nemen eburu minimi.

²⁴Labalamu rak nak lox eburu minemi axap keneng at laasen at ne Iesu Karisito. I ruturun.

^a **16:21** Pol ga sok mene na lavapaase momo, la lara vetpes ga malagan levelinga keneng at na lovoang, ne Pol ga vaase i min.

2 Korin

Lovoang Sepsev Agepura At Ne Pol Ti Limixin Nunu To Korin

Levelinga Loklox Axasep

Lamaares 57 A.D.

At nai lovoang, Pol ga malagan aonon amu manga levelinga uto at limixin boro Korin at lenep Masadonia. Korin neni lemenemen silok to Grik. At lovoang avot at ne Pol ga malagan i rinedi limixin to Korin, neni ga vaase sok di. La melemu at nai neni ga riki ne Taitas ugo saparap di, kusu neni naklen mumu ka avukat nedi la neni bamlong la na vaase ne Pol min. Ne Taitas gamlong la ga vaase la ga lok, “Limixin boro Korin mo diga rongga levelinga at ne Pol la mo diga leeng pam, ketla lentaba di goxopara levelinga lolos at ne Pol.” Keneng at nai lovoang i vanuet lempanga matmatkun ik lok teren. Lara avot, ne Pol ga momo aleng minedi mo luvuttadi diga leeng basinge leveloklok atdi. Lara i sev agepura ni ga vaase aronga amu manga di. Lara i sev avantun neni ga vaase i rinedi mumu laramtaba diba lok li bubua i xusu rinedi limixin banbalo. Lara i sev avanuet neni ga vaase axasep nedi do neni mo laradi vavang tuturun.

Lengkot silok at lovoang 2 Korin.

- 1:1-11 Lavapaase momo at ne Pol ti limixin.
- 1:12-7:16 Pol ga vaase mumu lorooro at Loroonan Kaala.
- 8:1-9:15 Leveloklok tooro ri limixin boro Jerusalem.
- 10:1-13:10 Pol ga vaase pe i ngan laradi vavang.
- 13:11-13 Pol ga lox axap lempapaase ren.

Lavapaase Axasep

1 ¹Nenia ne Pol, laradi vavang at ne Iesu Karisito; Moroa xa ga soxolik ka ia ri mo lugugu; ne Timoti, neton dik i paase aru box ia at na

lovoang.

Nia a sok na lovoang tinemi limixin mi nuunu at ne Moroa dom Korin, la tinemi bok limixin nuunu mik lok to at lengkot axap at lenep silok Grik.

²Letaba nabalamu mi lenmila rinemi boro at ne Moroa ne Temen nedik la Leeme Silok atdik ne Jesu Karisito.

Pol Ga Tong Aorong Ti Ne Moroa

³Ata emi asu mi ne Moroa ne Temen Leeme Silok atdik ne Jesu Karisito; Temen dik kusuk mun lavasuun at labalamu, la neni lo Moroa at loklox amenemen. ⁴Neni xusuk mun i lox amenemen nama at levenmumuat it pot parap nama, kusu nema bok maba epovo xusu mana lox amenemen nedi di ruuna levenmumuat kerepmo mi na lavapaase amenemen, nema maga ruuna ka i boro at ne Moroa. ⁵Nema map kip buaang laxasongsongot keneng at lunuunu atnama saparap ne Karisito; kuren la keneng at ne Karisito nema ma ruuna xaka bok loklox amenemen silok at ne Moroa. ⁶Mo do mana songot at lorooro axap atnama mumu nimi, naba lox avukat aleng mila losongsongot atnama naba lox asuusu loklox amenemen eburu mi lorooro rinimi; la mo do mana lok kaka loklox amenemen ukeneng ti lorooro atnama, na bok naba ravasu ngan loklox amenemen ti lok tooro nimi, mo loklox amenemen i su auru nimi xusu mina tu lolos tip kip mo levesongsongot ngan nema map kiv i. ⁷Nema maklen tinotno i do nemi minaba tu lolos at lunuunu atnimi; atla mi vekip tangarang mi mo levesongsongot eburu minama la mira ruuna xaka bok loklox amenemen ngan nama.

⁸Luvutnetak mi luvurinuk. Ma vara i xusu mina xasep ti levenmumuat maga ekip tangarang min to Asia. Mo levenmumuat maga xip tutu min ga silok aleng la ga mumuat aleng, la ma lixilik maga lok do mana doma abulubun ta at lorooro atnama. ⁹I raturun tinotno do maga nua i do nema mo mana met ta. Ketla ana lumumuat ga vot ti lox alolos nama xusu ma noxo nuunu at lolos axa atnama, ketla at ne Moroa xusuk mun, mo ik lox arooro limixin basinge lanmet. ¹⁰Neni ga ranga asepsu nama basinge mo langas ti lanmet la neni nabak lox amisik box i. La ma lok li lodoxoma voovo mavana ren do neni mo nabang tanga axatu bok nama at levenmumuat i nemen tangais nama at na levenaleng i tu umelamgo atnama. ¹¹Nemi bok miba lok tooro nama mi levesingising; kuren la buaang bok atnemi diba tong aorong ti ne Moroa do neni ga vorang levesingising atnimi la ga lox aroo nama basinge lanmet.

Pol Ga Lox Ekun Lodoxoma Ren

¹²Nema ma lok momo aleng, mila lodoxoma nunuan atnema i lox ase nema do, loklok atnema at na lavatbung menemen ngan maga ebibinat

ka minemi, ga lok nunuan mene nga la kopmen taxakapmek teren ngan ne Moroa ga lok tooro nama min. Kuren mun maga mumu asu letaba nabalamu at ne Moroa la kopmen do at lakleklen maut at laradi at na laxangka. ¹³Ma malagan na lovoang tinimi mi levelinga i xasep aleng la kopmen tevelinga ren go ik lox alipe. La nia am domam poovo i do mibaklen axasep nunuan ba mo levelinga, ¹⁴nemi mi goxo xasep nunuan teren; kuren la nemi minaba lok momo aleng mumu nama kerekngan nema maba lok momo mumu nimi ap mo laaleng Leeme Silok ne Iesu namlong teren.

¹⁵Nia agaraklen tinotno vam i na, kuren la nia aga doxoma i do anat pas avot be udom atnimi xusu miba lok ka amu manga leveloklox anarong. ¹⁶Aga doma gagas i xusu at lavatpas tarak uto Masadonia la lomlong bok tarak, aba vot pasa be nimi xusu anaba lok ka teveloklok tooro me dom atnimi ti lavatpas tarak uto Judaia. ¹⁷Ise nenia aga soxovo li i na, aga soxovo li i mi luruturun, nia xopmen agoxo soxovo li mene i mi loklok at na lavatbung menemen la ana sisiam gamasa mene do tuturun la kopmen.

¹⁸Levelinga at ne Moroa i paase asu i, i ruturun la kerepmo levelinga rak tinimi xopmen loxolinga mene do tuturun koplak kopmen. ¹⁹I lok ngan ne Iesu Karisito, Nitna ne Moroa, mo nema mi ne Sailas la ne Timoti maga vavang min kantubu atnimi, neni xopmen na voovo ela mi levelinga ren, ketla kusuk mun neni i paase ruturun. ²⁰I ngan do buaang laxampapaase alii at ne Moroa, ne Iesu ga lox asorun i. Kuren la ne Iesu Karisito ni luruturun la ma vaase asu i ri lox asuusu lisisixam at ne Moroa. ²¹Moraa xa ik lox alolos nema eburu minimi xusu dik ataba tu atmatkun keneng at ne Iesu Karisito. Neni ga soxolik ka dik, ²²la neni ga lok katling dik do ateran akmokso la ga lok li Loroonan Kaala ren keneng atdik ngan lampinebeng.

²³A sing ne Moroa xusu na vaase aru ia at na levelinga ana vaase i, la neni ikleklen axap keneng at lorooro rak. Nia a goxopara na lok li lumumuat atnimi; ni lavasuun teren la nia goxot pas udom Korin. ²⁴Ma xopara i do mana pu soso nimi ri levelinga salai miba nuunu ren, mila mi tu lolos pam at lunuunu atnimi. Ketla ma gugu xantubu atnimi xusu miba ruuna ka lomomo.

2 ¹Nia aga doma i do nia noxo vot pasa bok ba nimi at tara tavatpas melemu, kusu a noxo lox abulu nimi. ²Mo do ana lox abulu nemi, nege bok ba naba lox amomo ia? La ixo epovo do nia aba lok ka tomomo boro at tara vetpes. ³Ni lavasuun teren la nia aga malagan mo lovoang petpes tinimi. Agoxopara i do ana vot pasa nimi la ana ruuna ka lainbulu mila nemi vam nom limixin do ri lox amomo ia. Aga nuunu do miba momo eburu minia. ⁴Aga malagan mo lovoang tinimi mi langsung lumumuat la lanteng keneng at lorooro rak la lengkabilidan bok gara

sixisu at luxatli rak, la mo levelinga xopmen do ri lox abulu nemi, ketla nia aga malagan i ti lox axasep nemi xusu mina ven kisip labalamu silok tarak tinimi.

Mina Doxoma Xape Laxakapmek At Laradi Ga Lox I

⁵Mo laradi xantubu atnimi goxo lox abulu solo ia, ketla neni ga lox abulu aleng lentaba atnemi limixin lotu. La nia axopara i do lumumuat teren na silok solo. ⁶Buaang atnemi miga siam mi mo lumumuat neni ga ruuna ka i, la na xap ta go. ⁷Ketla mo nga mina doxoma xape laxakapmek teren, la mina su auru i mi levelinga xusu ri lox axatu kaxat bok lodoxoma ren basinge lainbulu la loklox abulubun. ⁸Kuren la a sing alolos nemi do mina lox asuusu amu bok mo labalamu atnemi rin. ⁹Aga malagan mo lovoang tinemi mumu mun i na. Aga vara i do ana long lenget ka i do mina ronga res ap mo levelinga rak keneng at nom lumumuat la mibang tonga res amisik at levelinga rak. ¹⁰Do nemi mina doxoma xape laxapmek teren, nenia bok aba doxoma xape i; ketla axok pakes ti doxoma xepe laxakapmek teren, ketla i epovo do nia ana lox i xuren kusu ana ru tooro nimi at lemeren ne Karisito. ¹¹Kerepmo la ne Satan noxo epovo na sar asoogong nedik, mila nedik diklen levendomdoma la leven gugu ren.

Luvuttadi Vavang At Lekabus Maxat

¹²Gase aga vot to Troas kusu ana vavang mi Lagale Lavavang mumu ne Karisito, aga long lenger i do Leeme Silok ga suang langas tia ri lok lugugu go. ¹³Ketla aga bulu aleng mila nia agoxo ven kora ka netak ne Taitas go. Kuren la aga on basinge di, la agat pas uto Masadonia.

¹⁴Ketla ata tong avukat ti ne Moroa, mo im gomgo amisik tinama at lugugu atnama; anai i lok ngan at lavatpas momo atnema xeneng at ne Karisito ik sak tup mi lavamunepen atnama; la at lekngen nama neni i paase asu Lagale Lavavang at lengkot axap la neni i so misigisigis tinedi dikleklen i. ¹⁵Nedik di ru katling ne Karisito ngan lavanga i so misigisigis ti ne Moroa; la nedi dik lok ka lorooro maxat, la nedi bok dinaba seeve, dim somax i. ¹⁶Tinedi dinaba seeve, di ven kibis lanmet; la tinedi di roo suu, di ven kibis lorooro; kuren la nege i epovo nap kip lugugu at Lagale Lavavang atla i silok aleng? ¹⁷Nema maxo lok ngan nedi mo buaang lentaba di tong asu levelinga at ne Moroa xusu dina lok kaka lempilas. Ketla ma paase asu levelinga at ne Moroa mi luruturun, ma gugu at lemeren ne Moroa ngan lavaanat saxaruki at ne Karisito.

Pol Ga Vaase Pe I Ngan Laradi Vavang

3 ¹Kereva, ana vaxaru ka manga i do ana lox aru manga ia? Kopla mak pakes ti tovoang loklox axasep udom tinimi xopla me dom

atnimi xerekngan lentaba luvuttadi di lox i. ²Keneng at lorooro axap atnama, aklen i do nemi xa mi lok ngan lovoang loklox axasep atnama xusu limixin axap diba us i la dina ven kisiv i do nema luvuttadi vavang tuturun at ne Moroa. ³I xasep do ne Karisito xa ga malagan na lovoang mumu nimi, la ni na levempipisik at lugugu atnama. Kopmen goxo malagan i mi loxodan mamalagan to at tuat, ketla ni ga malagan li i mi Loroonan at ne Moroa ro at levempeve at limixin.

⁴Ma vaase i na mila ma nuunu saga at ne Moroa keneng mun at ne Karisito. ⁵Nema maxo epovo xusu mana vaase ka gamasa na lugugu at ne Moroa do ma epovo ri lox i. Lakleklen atnama, la lololos atnama, ana axav i, ne Moroa im taba i. ⁶La ne Moroa axa ga lox aepovo nama xusu mana tong asu Lagale Lavavang mumu lekabus maxat. Ana lekabus kopmen boro at Lenavolo, ketla boro at Loroonan Kaala. Lenavolo i lox asuusu lanmet, ketla Loroonan im taba lorooro.

Lekabus Maxat Ni Lavanga I Silok Aleng

⁷Lenavolo, Moroa ga malagan i mi lengkonin mamalagan to at luat mamasao, la lisisixam at ne Moroa ga vot at loxonaleng neni ga raba ne Moses min. Keke i do lisisixam to at lemeren ne Moses goxo lolos bok ba, ketla limixin me Israel di goxo ven tooro i, mila lemeren gan tanan aleng. Mo do na Lenavolo, lugugu ren ti raba lanmet, ga vot mi lisisixam, ⁸i ruturun tinotno do lugugu at Loroonan naba lox asuusu lisisixam silok aleng. ⁹Lagale Lavavang, neni i nunuan aleng ti Lenavolo mila lugugu at loklox arooro neni in tanan aleng ti lugugu at Lenavolo ik lox asuusu loxokoxo. ¹⁰La Lenavolo mo gan tanan, ketla lisisixam teren kopmen na soosoo lolos mila lisisixam at lekabus maxat i lolos aleng tin. ¹¹Lenavolo goxok lox abao la ga ruuna lisisixam silok; ketla lisisixam at Lagale Lavavang i silok aleng tin mila ni naba nemen amisik.

¹²Nedik tam doma voovo ri mo lisisixam at Lagale Lavavang; kuren la nedik di abelemes aleng. ¹³Nedik taxo lok ngan ne Moses, mo ga lok li loxontata at lemeren, kusu limixin me Israel di noxo ven mo lisisixam goxo nemen abao. ¹⁴Levendoxoma atdi ga rebonot pe aleng, la ise at na levenaleng levendoxoma atdi move i repe mi levengkontata i kubak pe i, at loxonaleng di utus levenbuk at lekabus migomgo. Na loxontata i repes mun basinge laradi at loxonaleng neni i lok ka ne Karisito. ¹⁵Mo at na levenaleng dola di utus Lenavolo at ne Moses, mo loxontata move i tu pe levendoxoma atdi. ¹⁶Ket do laradi i repukus uto saparap Leeme Silok, loxontata i repes. ¹⁷Loroonan, neni nom Leeme Silok la nedi limixin ua Loroonan at ne Moroa ik lok atnedi, diba sepmus basinge lololos at laxapmek. ¹⁸La nedik axap di lox asuusu lisisixam at ne Moroa, mila kopmen bok ba tengkontata nak lok pe lengkatli atdik. La na mun lisisixam i laala boro at Leeme Silok, neni Loroonan, la ik lox ekun dik ngan lampoovo ren la ti mo langsung lisisixam silok teren.

Lugugu At Ne Pol

4 ¹Keneng at lebelemumu at ne Moroa, neni ga raba nama mi na lugugu, kuren la nema ma noxo lox abulubun bok ba. ²La keneng at na lugugu ma lok kepe leventaangas kakapmek la leveloklok kakarang. La maxo bala vukpuk bok limixin mi lakleklen atnama, la kopmen mana lox ekun levelinga at ne Moroa; ketla ma tong asu axasep aleng levelinga ruturun at ne Moroa la kerepmo ma lox aru nama ti limixin axap to at lemeren ne Moroa. ³La do Lagale Lavavang ma tong asu i, i lipe la kopmen na xasep, ni xopmen na xasep mene rinedi limixin dinaba seeve. ⁴Dixo nuunu mila levendomdoma atdi, lomoroa at na lavatbung menemen iram tu kobot pe vam i. La neni i tu kobot pe mo laxasep at Lagale Lavavang kusu noxo soosoo axasep di, mo laxasep i susu boro at lisisixam at ne Karisito, neni lampenaxa at ne Moroa. ⁵Nema maxo vavang minama xa, ketla ma vavang asu mi ne Iesu Karisito ngan Leeme Silok; la nema ma lok ngan lavasaxaruki atnimi mumu lugugu at ne Iesu. ⁶Moroa axa ga lok keretna, “Laxasep na soosoo su at lamain.” Neni mun ne Moroa mo ga lok laxasep teren i soosoo xeneng at lorooro atdik kusu ri raba dik mi laxasep at lakleklen mumu lisisixam at ne Moroa mo ga soosoo at lemeren ne Karisito.

⁷Ketla nedik di ruuna nom lakleklen i ngan lapnovos silok keneng at labantuxu gamasa atdik ti lox asuusu i do mo langangan lololos, ni at ne Moroa mun la kopmen atdik. ⁸Atang songot at levenaleng axap, ketla na levesongsongot kopmen na rubur asi dik; ata baava mi levenmumuat, ketla dik kopmen atan tun mu i. ⁹Limixin di lox asongot dik, ketla ne Moroa kopmen na domampe dik; lavamunepen atdik di sev asi dik, ketla kopmen dina lok kapmek dik. ¹⁰Amisik mat pas ti lengkot axap map kip levenmumuat, kerekngan ne Iesu ga suma i, kusu mo lorooro ren limixin diba ven kibis box i at labantuxu atnama. ¹¹At lorooro axap atnema, ma nemen amisik keneng at levenmumuat at lanmet mumu laasen at ne Iesu, kusu mo lorooro ren limixin diba ven box i at labantuxu atnama, mo noxo nemen abao. ¹²Kuren la levesongsongot i auret kusu na sev amet nama mumu Lagale Lavavang, ketla nemi min tuuna xaka lorooro avolo.

Mina Nemen Keneng At Lunuunu

¹³Lovoang Kaala i tong i do, “A paase asu levelinga mila a nuunu.” La kerepmo bok nema ma nuunu kuren la ma paase asu Lagale Lavavang. ¹⁴Ataklen i do ne Moroa ga lox axatu kaxat amlong Leeme Silok ne Iesu ri lorooro, la neni naba lox axatu kaxat amlong bok dik keneng at ne Iesu, la na lok li nemi eburu minema ro melamgo at ne Moroa. ¹⁵Ma suma levesongsongot nop nimi; kuren la do letaba nabalamu at ne Moroa na vot saparap bok teventaba tuvuttadi, nedi diba umsu aleng mi levelinga loklox avukat la diba lox asuusu leemi asu ri ne Moroa.

¹⁶Neni mo lavasuun teren la ma noxo lox abulubun; keke i do labantuxu atnama mo irak lok si nga; ketla labaroonan atnama i susu amaxat amisik at levenaleng getgesara. ¹⁷La na levesongsongot lixilik i lox asusu i do langsgangan luunun avolo i umsu aleng mi lisisixam at ne Moroa mo i gagas kusu rinama; la i silok aleng ti levesongsongot man tuuna xaka i. ¹⁸La amisik ma reven ti ne Iesu, maxo reven ti levempanga at na lavatbung menemen mo noxo nemen abao, ketla ma reven ti levempanga nedik dixo reven i la i nemen amisik.

Loogu Atdik No Vana At Laxalibet

5 ¹Dik atakleklen i do lorooro atdik at na labantuxu noxo nemen abao, ba lok ngan mun loogu xukuxut. Mo do ira rem utut pam, nedik di ruuna lara loogu ro vana at laxalibet ne Moroa ga gagas li vam i ridik la naba tu amisik. Mo loogu limixin di goxo lok i mi levengkikngen di. ²Nade at na lavatbung menemen nedik tap kup sae mi levesongsongot la ata vara nga i do ata siga ka mo lorooro boro vana at laxalibet. ³Do nedik ata siga i, ne Moroa noxo long lenget ka dik atak lok beleben. ⁴Nedik nave tak lok at na lorooro, atap kup sae mi levesongsongot la tap kip levenaknixip; la kopmen do dik dira vara nga i do dina lok kepe labantuxu atdik, ketla ata vara i do ata siga ka nga lorooro boro vana at laxalibet, kusu lorooro at na labantuxu, lorooro avolo naba sumkonom ka i. ⁵Morua xa neni ga gagas pam nedik ti na lorooro avolo, la neni ga raba nedik mi Loroonan teren ngan lampinebeng ti mo levempanga neni i ruuna i do ridik.

⁶Kuren la amisik nedik di abelemes. Atakleklen i do nedik nave dik lok at na lorooro at na labantuxu, di nemen to vetpes basinge Leeme Silok. ⁷La nedik dit pas mi lunuunu, keke i do nedik taxo reven mo lempanga dik di nuunu ren. ⁸Nedik di abelemes la ta vavara aleng i do ata on basinge na lorooro at na labantuxu la atana lok ka lorooro avolo ro at lemenemen aulis atdik eburu mi Leeme Silok. ⁹Kuren la do nedik tak lok at na lorooro koplata met, ata lolos kusu atak lox amomo Leeme Silok; ¹⁰mila nedik getgesara ataba ru asuvos to melamgo at lenep tongtonga linga at ne Karisito; kusu nedik getgesara ataba lok ka luunun, i nunuan koplata i lok kapmek; la neni ba raba i na i epovo at loklok atnedik at na lorooro at labantuxu.

Atatkis Ekilen Eburu Mi Ne Moroa Xeneng At Ne Karisito

¹¹La nema luvuttadi vavang makleklen ua lavasuun teren kusu ata marat at lebelemamao at Leeme Silok, kuren la ma gugu lolos kusu ri lok ka buaang nedi limixin. Ne Moroa ikleklen avukat lorooro atnama, la a doma box i do keneng at lorooro atnimi miklen avukat bok lorooro atnama. ¹²Nema maxo lok do mana lox aru lorooro atnema rinimi;

ketla ma vara i xusu mana lok nimi xusu mina mumu lorooro atnama. Kerepmo la miba epovo ri vorang nedi luvuttadi dik lox asilok di mumu lixitkis silok atdi la dixo ila mumu luruptuvuk atdi. ¹³Mo do mana vaase la lodoxoma atnema na ngan ta do i baulang, ma lox i xusu ri lox aurut lugugu at ne Moroa; la do lodoxoma atnema na xasep, ma lox i ri lok tooro nimi. ¹⁴Labalamu at ne Karisito i sasat dik, la atakleklen tuturun i do legesara mun ga uu nop loklok at limixin axap, i lok ngan ta do limixin axap diga met. ¹⁵Neni ga uu nop loklok at limixin axap kusu do nege nedi di rooro at na lavatbung menemen, di noxo rooro rinedi xa, ketla dina rooro ri ne Karisito mo ga doma di la ga met la ga roo xat amlong.

¹⁶Kuren la i ru ka nga i mo, nema maxo doma mumu bok ba lodoxoma at na lavatbung menemen ti ila mumu loklok at limixin, ngan no nema maga ila mumu bok loklok at ne Karisito xerepmo, ketla mo nga maxo lok bok ba i xuren. ¹⁷Do tara i nuunu at ne Karisito, neni i ngan laradi maxat at loroonan teren; levempanga xapmek at lorooro maut ira xap pam, la lorooro maxat mo ira vot ta. ¹⁸Ana axav i boro at ne Moroa, la keneng at ne Karisito neni ga vaxat buru dik at lixitkis munepen atdik eburu min kusu nedik ateren; la ni ga raba nema mi lugugu ri vaxat buru limixin uto saparap ne Moroa. ¹⁹Moraa gak lok mo lugugu ren keneng at ne Karisito, ni ga vaxat buru ka limixin at na lavatbung menemen do tin; la ni goxo doma mu laxakapmek digak lox i. La ni ga raba nema mi levelinga mumu na lugugu ri vaxat buru limixin uto saparap ne Moroa. ²⁰Kuren la nema ma paase katling ne Karisito, la ne Moroa i toro rinimi xeneng at levempapaase atnama. Ma sing nemi at laasen at ne Karisito do mina ke ne Moroa na vaxat ka nimi uto saparav i. ²¹Karisito neni xopmen taxakapmek teren, ketla ti lununuan tidik, Moroa ga lox i ga xip tutu mi laxakapmek atdik, kusu keneng teren ataba ravasu ngan limixin mokmokso at ne Moroa.

6 ¹At leven gugu atnema eburu mi ne Moroa, ma sing nemi do nemen mita siam ka mo letaba nabalamu at ne Moroa mi lumun pipisik mun. ²Mina ronga na levelinga ne Moroa ga tong i.

“Aga ronga nemi at loxonaleng mokmokso kusu ana lox asuusu letaba nabalamu rak. Aga lok tooro nimi at laaleng ti lox arooro.” *Ais 49:8*
Mina ronga i na. Ana ni laaleng kusu mina siam ka mo letaba nabalamu at ne Moroa. Ana ni laaleng kusu miba lok ka loklox arooro.

Levenmumuat Ne Pol Gap Kiv I

³Ma xopara i do tara na ven lenget ka tosoogong at lugugu atnema mila ma xovara i do mana lok pe langas ti lorooro. ⁴Ketla keneng at levempanga axap ma lox i, ma lox asuusu loklok at lavasaxaruki at ne Moroa, la map kip levenmumuat, la levesongsongot, la levenaknixip mi

lumulus. ⁵Limixin dip sep nama, la di lok li nema at loxokoxo, la di soso antiriban nema la di lok nema ma gugu lolos aleng la kopmen manak lok ka tevenanunga avukat la kopmen tevempanga anan atnema. ⁶At loklok dadat atnema, la lakleklen, la loklok mumulus, la loklok nunuan, maga lox asuusu i do nema lavasaxaruki at ne Moroa, la at Loroonan Kaala bok mi labalamu ruturun. ⁷La maga lox asuusu box i at levempapaase ruturun atnema, la mi lololos at ne Moroa. Ma ruuna lorooro mokmokso ngan lavanga esep atnama, ti esep la ti see bok atnama. ⁸Lentaba di lok ngangao atnama la lentaba di paase galelep bok tinama; lentaba di paase aksaksa rinama la lentaba di emi asu bok minama. Dik lok tinama do nema luvuttadi xaxarang, ketla ma paase mi luruturun; ⁹limixin at na lavatbung menemen di lox abulubun nama, ketla limixin at ne Moroa diklen nama; ma vekip tangarang amisik mi lanmet, ketla mina ven ba nema move ma rooro. Di raba songsongot nema, ketla kopmen dina sev amet nama. ¹⁰Keke i do ma suma lainbulu, ketla ma momo amisik mun teren; mat kis banbalo, ketla ma lox apnovos nedi limixin buaang; ma xis apkap, ketla ma rebeng kobot ka levempanga axap.

¹¹Larapen tangas atnama dom Korin. Mara paase palas avukat pam levelinga rinimi, la lebelen nama i rem suang tinimi. ¹²Kopmen mana rebeng alis lebelen nama rinimi; ketla nemi xa mi vipe lolos lebelen nimi rinama. ¹³A paase nga na rinimi ngan nemi laxamdak tarak; lusumsuma salai ma raba nemi min, nom i mina lox ase nama min. Mina suang levempeve atnimi.

Nemen Mita Etangas Eburu Mi Limixin Kopmen Dina Nuunu

¹⁴Nemen mita etangas eburu minedi limixin kopmen dina nuunu, mila ixo epovo xuren. Lomokmokso mi laxapmek duba ru buru xereva? Laxasep mi lamain duba nemen eburu xereva? ¹⁵Karisito mi ne Satan duba mulus kereva at tara todoxoma? Laradi nuunu mi laradi xopmen na nuunu duba mulus kereva? ¹⁶Lumukmulus naba vot kereva at loogu laplavang at ne Moroa eburu mi laxampoovo vanga? Mila nedik axa laraugu laplavang at ne Moroa, neni i rooro; la ne Moroa xa ga tong i xeretna,

“Abak lox eburu midi la anat pas kantubu atdi, la nenia ba ngan ne Moroa atdi la diba lok ngan limixin tarak. ¹⁷Kuren la mina vas su basinge limixin kapmek la mina nemen petpes basinge di. Nenia Leeme Silok ne Moroa a tong i na.”

Moroa ga tong box i xeretna,

“La nemen mita vubeles at laxapmek, kusu nia aba siam ka nimi.

¹⁸La nia aba ngan ne Temen nimi, la nemi miba lok ngan luvutnuruk; nenia Leeme Silok ne Moroa a lolos aleng la a tong na levelinga.”

7 ¹Larapen tangas orong tarak. Na levelinga a tong pam i, ni levengkakaape ne Moroa ga lox i ridik; kuren la ata lox adadat dik basinge leveloklok kakapmek axap, mo i lox abilinga labantuxu la labaroonan atdik, la ata lok ka luruptuvuk i xaala, mi loklok ngangao atdik ti ne Moroa.

Lomomo At Ne Pol

²Lebelen nimi na mulus amlong ka nama; ma goxo lok tavanga xapmek ti tara, la ma goxo lox asongot tara, kopla ma gita xip paxat ka tavanga at teta. ³Axo tong i na xusu ri lox amangan nimi, mila agara tong avot pam i rinimi do nemi mi nemen keneng at lempeve atnama, dola mana met kopla mana rooro. ⁴Lunuunu rak i rem saga atnimi, a ruuna lusumsuma momo i umsu aleng mumu nimi. Kuren la a umsu mi lolos la keneng at na laxanmumuat a lok momo aleng.

⁵Se magat pas uto Masadonia, lorooro atnama goxo lok mamana, ketla limixin diga lox asongot nama at lengkot axap, la levenekarakat ga pubeles mu nama la lainmarat ga vot saparap nama mumu nedi limixin diga lok ka lunuunu maxat. ⁶Ketla ne Moroa mo ik lox amenemen limixin bukbulu, ga lox amenemen nama mi lovtopot at ne Taitas saparap nema. ⁷Kopmen at lovtopot mene ren, ketla at levempapaase axasep bok teren mumu levempapaase loklox alolos atnimi rin. Ga tong i rinama do mi vara aleng i do mina ven ia, la mi bulu mu box ia. La mi gagas kusu mina su auru ia; kuren la a momo aleng tinotno.

⁸Lovoang tarak aga malagan i rinimi ga lox abulu nimi, nia axo bulu mu box i. Avot be nia aga bulu mu i, ketla aklen i do mo lovoang ga lox abulu nimi at lentaba levenaleng mene nga. ⁹Ketla monga nia a momo aleng, kopmen do mumu nga i mo nia aga lox abulu nimi, ketla a lok momo mila lainbulu atnimi ga vaxat pukus lorooro atnimi. La ne Moroa xa ga siam mi mo lainbulu xeneng atnimi, kuren la nema ma goxo lok tavanga xapmek tinimi. ¹⁰Lainbulu ne Moroa i lok kaxar i, ni ik lok leretepukus keneng at leveve at laradi la im gomgo nga i at langas ti lorooro, la neni noxo bulu mu mo lainbulu. Ketla lainbulu mede at lavatbung menemen im taba lanmet. ¹¹Mina ven lempanga ne Moroa ga lox asuusu i mi na lainbulu atnimi ngan levereven kibis eburu mi lodoxoma ri vaase pe nimi la loklox aronga mumu laxapmek kantubu atnimi la lusumsuma avukat tinama la lurutu eburu minema la mi gagas ti raba songsongot nedi di lok leveloklok kakapmek. Keneng at nai leveloklok, miga lox asuusu axa nemi do mi goxo ruuna tosoogong keneng at na lekarakat. ¹²Kerepmo la mo lovoang nia aga malagan i rinimi, a goxo malagan i mumu mo laradi ga lok laxapmek, kopla mo lara ga suma mo laxapmek; ketla aga malagan i ri lox axasev i rinimi, at lemeren ne Moroa, do lodoxoma liplivi atnimi mumu nama i lolos aleng.

¹³Kuren la mo lovoang aga malagan i rinimi ga lok nemi miga repukus, la maga lok momo at nai. La ma goxo momo xusuk mun at nai, ketla maga lok momo bok at lovtopot at ne Taitas saparap nama la mumu bok leveloklok nunuan miga lox amomo i min. ¹⁴Gano aga tong i rin do nemi limixin avukat la miga lox asorun levelinga rak, la mi goxo lox amangan ia. Maga paase luruturun tinimi, la at na mun langas levempapaase loklox aurut atnama maga lox i ri ne Taitas, ira ravasu ruturun ta. ¹⁵La mo labalamu ren tinimi i lolos aleng tinotno at levenaleng neni im doma su at lorongtonga res atnimi rin, la miga siam ka atnaasan tinotno i mi loklok ngangao i silok. ¹⁶A momo aleng mila i epovo do ana nuunu saga rinotno atnimi.

Laramtaba Ri Limixin Pakpakes To Judaia

8 ¹Luvutnetak mi luvurinuk. Ma vara i do minaklen avukat letaba nabalamu at ne Moroa ga lox asuusu i ri limixin at lotu ro Masadonia. ²Digak lok keneng at levenmumuat ga lolos aleng, ketla lomomo atdi ga silok aleng tinotno; kuren la digak lik kat asu rinotno mo leventamtaba atdi, keke i do nedi limixin pakpakes mun. ³A tong tuturun i rinimi do diga raba silok mavana at levempanga atdi diga ruuna i. At lodoxoma xusuk mun, ⁴diga sing lolos nama xusu mana siam kusu nedi bok dina raba teventamtaba ri limixin at ne Moroa to Judaia; ⁵la kopmen ana xusuk mun i. Avot diga raba lorooro atnedi ri Leeme Silok, la at lavavara bok at ne Moroa diga raba bok lorooro atnedi ri ronga res atnama. ⁶Kuren la maga sing ne Taitas, mo ga vaxaru ka lugugu ti gagas mo laramtaba xantubu atnimi, kusu na lox epasum na lugugu la na lok tooro nemi ri lox axap na lugugu at labalamu. ⁷Mip novos aleng at levempanga nemi mi ruuna i, ngan lunuunu la levempapaase la at lakleklen bok atnimi, la keneng at lomomo atnimi ri lok tooro, la keneng bok at labalamu atnimi rinama; kuren la mina lolos kusu minak lox aplivi na lugugu tik lox agagas li mo laramtaba.

⁸A noxo lok li teventaangas linga xusu miba mu asu i. Ketla a paase mumu leventamtaba limixin petpes diba raba i, kerepmo ana lok tong mun labalamu atnimi do i lolos aleng ti labalamu at limixin petpes koplaxopmen. ⁹Nemi mikleklen letaba nabalamu at Leeme Silok atdik ne Iesu Karisito, neni gap novos aleng, ketla ti luvukat tinedik neni ga ravasu ngan laradi banbalo, kusu mibap novos.

¹⁰Lodoxoma rak at nai lavanga xeretna; i lox avukat tinimi do mina lox axap lugugu mumu letaba miga vaxaru ka i at no lamaares ga xap. Nemi avot tinotno migamgo, la kopmen do miga lok poovo mene i, ketla lebelen nemi ga vara aleng kusu mina lox i. ¹¹Kuren la mina lox angtang mi mo lugugu, la mina lok axap avukar i. Lebelen nemi na xatu xusu mina lox axav i, kerekngan levendoxoma atnimi, la mina lox i mi nom

levempilas mi ruuna i. ¹²Mo do lebelen nimi naplivi ri raba, ne Moroa ba siam ka laramtaba atnimi i epovo at levempilas mi ruuna i la kopmen at levempilas mixo ruuna i.

¹³Nia axo vara i do ana ke atnaasan teventaba la nemi xusuk mun mina xip mo lugugu at laramtaba pilas ngan laknixip silok; ketla a vara i do nemi eburu midu mina epovo ela mun. ¹⁴At na levenaleng mo lapnovos atnimi, i epovo xusu mina lok tooro di min; la do melemu mina xis pakpakes manga, diba lok tooro nimi mi lapnovos atdi. Mo do mina mu asu i na, loklok tooro ela naba epovo mun kantubu atnimi limixin at nom lumenemen. ¹⁵I ngan Lovoang Kaala i tong i do,

“Laradi gap naba solo, ni goxo ruuna ka tempanga ga volo aleng; la mo laradi ga lili lixilik, ni goxok pakes ti tempanga.” *Pas 16:18*

Taitas Eburu Mi Larapen Tangas Teren

¹⁶Ma tong avukat ti ne Moroa mila neni ga lox epovo box i do na lok li mo lebelen angtang keneng at ne Taitas kerekngan nema maga ruuna i xusu ri lok tooro nimi. ¹⁷La kopmen ap mo xusuk mun do neni ga siam ka lisingising atnama, kusu ri vosiga nimi la na lok tooro nimi; ketla at lavavara rinotno xa ren la neni nabat pas kusu na vosiga nimi. ¹⁸Maba riki ne Taitas eburu bok mi lara neton nedik, mo, limixin di lok ngangao aleng teren to at laraugu lotu axap mumu lugugu ren ti tong asu Lagale Lavavang. ¹⁹La kopmen ana xusuk mun i, limixin at laraugu lotu diga soxolik ka i xusu na emu eburu minama uto Judaia la nap kip laramtaba. Na laramtaba naba xip aurut laasen at Leeme Silok, la naba lox asuusu box i do ma vara aleng i do mana lok tooro. ²⁰Maba lok tatao avukat laramtaba xusu tara noxo vaase mumu nama mumu na laramtaba silok nema mabap kiv i. ²¹Lodoxoma atnama xeretna, ma vara aleng i do mana nemen mokmokso, la kopmen to at lemeren Leeme Silok kusak, ketla to bok at lemeren limixin.

²²La maba riki aonon bok neton nedik petpes eburu midu; buayang levenaleng neni gara lox asuusu vam i rinama do i gagas amisik kusu na lok tooro; la mo nga i lolos aleng ti lok tooro mila lunuunu ren i rem saga atnimi. ²³La ti ne Taitas, neni lara bok atarak la i gugu eburu minia xusu ri lok tooro nimi. La tinedu luneton dik, nedu duba emu eburu min saparap nimi, nedu du ru katling laraugu lotu, la loklok atdu i lox asuusu loklok ngangao ri ne Karisito. ²⁴Kuren la mina lox asuusu labalamu atnimi ridi, kusu laraugu lotu axap diba xasep do levelinga atnama ti emi asu minimi i ruturen.

9 ¹Ixok pakes tia xusu ana malagan tinimi mumu loklok tooro miba lox aonon i uto ri limixin at ne Moroa di nemen to Judaia. ²Akleklen i do nemi mi gagas amisik kusu ri lok tooro, kuren la a lox aru amisik nimi ri limixin Masadonia. Aga tong i ridi do nemi limixin to Grik

mi gagas kusu ri lok tooro, ga ru ka i at no lamares ga xap. Mo lavavara atnemi ga lox axatu buaang levendoxoma xeneng atdi xusu nedi bok dina lok tooro. ³Mo nga nia ana riki aonon na luvutneton dik, kusu lavapaase aru atnama mumu nimi xeneng at laramtaba atnimi noxo ravasu ngan lavanga gamasa mun. Ketla i ngan nia ara tong pam i do, minaba gagas li mo loklok tooro atnemi. ⁴Panga tentaba me Masadonia na emu minia udom saparap nimi la dina long lenger i do nemi mixo gagas; maba mangan aleng mumu nimi, la maba tong ka lavanga sala atla maga nuunu abos do miba lox epovo i. La ni lavanga mamangan tinimi. ⁵Kuren la a doma i do i epovo do ana sing na luvutneton dik kusu dinamgo ria udom atnimi xusu dina gagas li avot be nimi ri laramtaba nemi miga vaase alii min. Minaba gagas at loxonaleng do nia ana vot, la na laramtaba ba lox asuusu i do mi etaba mila miga vara i xuren, la kopmen do miga morong min.

Lavapaase Poovo Mumu Loklok Ti Raba

⁶Mina doma i na, neni do itlotlo tevempanga lixilik mun naba ruuna tevempanga lixilik bok; la laradi do itlotlo taxanit panga solo, neni naba ruuna teveluxa solo. ⁷Nedi getgesara dina raba kerekngan lodoxoma atdi la nemen gat loklox angtungun koplara na pu soso di, mila ne Moroa i momo mi laradi i raba mi lomomo xeneng teren. ⁸La ne Moroa xa i epovo na raba nimi mi leveloklox anarong axap naba umsu aleng, kusu at levenaleng axap miba ruuna epovo amisik at levempanga axap la ne Moroa xa ba lok levempanga atnimi mitlotlo i na pisik nunuan kusu miba epovo rinotno do mina lok leven gugu nunuan. ⁹Kerekngan Lovoang Kaala i tong i do,

“Neni im taba mi lomomo rinedi limixin banbalo, mo loklok teren tim taba naba nemen amisik.” *Sam 112:9*

¹⁰Moróa im taba levenit panga ritlotlo mi levengkongkide ri anan la kerepmo neni naba raba bok nimi mi levenit axap nemi mik pakes tin la na lox asuusu i xusu miba pisik asu leven gugu nunuan i buaang aleng. ¹¹Neni nabak lok nimi minap novos aleng at levempanga axap, kusu miba lok tooro amisik limixin petpes. La buaang bok atnedi limixin diba tong aorong ti ne Moroa ri laramtaba atnimi ridi, no miba raba mu nama min.

¹²Mo loklok tooro ap mo laramtaba atnimi noxo ven mun ti lavakpakes at limixin at ne Moroa, ketla ba lox asuusu bok buaang lorotong avukat keneng at lorooro atdi ri ne Moroa. ¹³Mo laramtaba atnimi ba lox asuusu i do nemi limixin tuturun; la limixin petpes diba emi asu mi ne Moroa mumu lorongtonga res mi lurutu lolos atnimi ri Lagale Lavavang at ne Karisito, la mumu bok mo lomomo atnimi ri lok tooro mi levantamtaba ridi la ti limixin petpes bok. ¹⁴La diba sing lolos bok tinimi mi labalamu rinotno xeneng at lorooro atdi, mumu lugugu asuusu atnimi ri lagale

letaba nabalamu at ne Moroa, mo neni ga raba nimi min. ¹⁵Ata tong avukat tinotno ri ne Moroa ri mo laramtaba ren tidik i silok aleng tinotno.

Pol Ga Vaase Pe At Lugugu Ren

10 ¹Nenia ne Pol; a sing nimi, mi mo loklok mumulus la loklok atnaasan at ne Iesu Karisito. Do nia a nemen eburu minimi, mi lok do nenia ne Pol ak lok mumulus mene; ket do a nemen paxalom basinge nimi, mi lok do nia a paase lolos tinimi. ²A sing nemi do luruptuvuk atnimi na lox avukat mun kusu at laaleng nenia ana vot pasa nimi, noxo epovo bok ba xusu ana vaase lolos tinimi mi lololos axa rak. I ngan nia a doma i do ana lox asuusu i rinedi leventaba luvuttadi di doma i do nema map tuvuk ngan luvuttadi at na lavatbung menemen. ³I ruturun do mat pas at na lavatbung menemen, ketla maxo vesep mi levendoxoma mun at limixin at na lavatbung menemen. ⁴Levempanga esep atnama ri esep at na lavatbung menemen kopmen mede at na lavatkangka; ketla ni i ruuna lololos boro at ne Moroa la i epovo xusu ri sele utut kepe lengkot kitkis at laradi munepen atdik min. ⁵Ma sesele utut kepe leventetere xaxarang la levendoxoma silok i lok petpes ti lakleklen at ne Moroa, la ma baba gili levendoxoma axap at limixin kusu dina ronga res at ne Karisito. ⁶La melemu at loxonaleng mira ronga res nunuan axap, maba gagas ba xusu mana lok li tevenmumuat atnedi dik lok kantubu atnemi la ding tonga xepe.

⁷Nemi mi ven mumu levereven at labantuxu at laradi la kopmen mina reven lorooro axap teren. La do tara i doma ruturun i do neni at ne Karisito, i lox avukat do neni na xasep do nema bok at ne Karisito xerekngan i. ⁸Nia axo mangan do nia ana lox aru ia mumu lugugu rak ti tong asu Lagale Lavavang, Leeme Silok ga raba nama min. Mo Lagale Lavavang, no Leeme Silok ga raba i xusu ri lox alolos labaroonan atnimi la kopmen ti lok kapmek nimi. ⁹Nia a xopara i do mo lodoxoma na ravasu atnimi do nenia aba lox amararat nimi mi lemboang tarak, ¹⁰mila leventaba di lok do, “Levemboang at ne Pol i lolos la i mumuat aleng. Ket do neni na nemen eburu midik, neni nabasko la levempapaase ren noxo mumuat solo.” ¹¹Luvuttadi xerepmo dina xasep nunuan do levempanga salai ma vaase i xeneng at lovoang, kopmen na lok petpes ti levempanga maba lox i at loxonaleng mabak lox eburu minimi.

¹²Maxo lok do mana mii poovo nema ri leventaba la mana ila mumu nema rinedi leventaba di lok do di silok aleng. Ketla di soxovo lorooro atnedi mi leventaba atdi xa, la dira ila mumu nedi ri leventaba atdi xa, nedi xopmen dinaklen tempanga. ¹³Ketla nema ma noxo paase asilok nema mumu levempanga vetpes, naba epovo mun mi lugugu ne Moroa ga raba nema min, la mo lugugu i vung kimit bok nimi. ¹⁴Nema ma epovo

na lox aru nema mumu nimi, mila nema maga vot dom atnimi xusu mana tong asu Lagale Lavavang at ne Karisito rinimi. ¹⁵La kopmen mana lox aru nema mumu leven gugu at leventaba vetpes. Ketla lavavara atnema do mo lunuunu atnemi na sisilok, la manaba lok bok buayang teven gugu xantubu atnimi. ¹⁶La melemu ren nema maba vavang mi Lagale Lavavang to at levennep kangka vetpes i nemen paxalom basinge nemi, mila ma xopara na gugu at lengkot ua lentaba vetpes diga gugu vam go la mana lox aru nema mumu leven gugu leventaba vetpes digara lok pam i. ¹⁷I ngan Lovoang Kaala i tong i xeretna,

“Do tara do na vara loklox aru, neni nak lox aru Leeme Silok ne Moroa.”

Jer 9:24

¹⁸Moróa xopmen na siam ka mo laradi ik lox aru axa i, ketla neni i siam ka mo laradi, Leeme Silok ne Moróa ik lox aru i.

Pol La Luvuttadi Vavang Kaxarang

11 ¹A vara aleng i do mina xip tooro ia at na lodoxoma rangtangu rak. A sing nimi do mina xip tooro ia ren. ²A suma i do lodoxoma rak iplivi aleng mumu nimi mi mo liplivi at ne Moróa xa, mila aga ora ka nimi do ri ne Karisito xusu ana raba nimi ngan loono dadat ti leges atlok teren. ³Ketla a marat do lavanga tara na sasar asoogong levendoxoma atnimi la mina ke xepe lunuunu lolos la lotu ruturun atnimi ri ne Karisito, kerekngan ne Iva; lisii ga xarang i mi lakleklen kapmek teren. ⁴A marat do tara na vot la na vavang mi ne Iesu vetpes ti na ne Iesu nema ma vavang min, la mina lok ka lороonan kopmen at ne Moróa, eburu mi lavavang i lok petpes aleng tinotno ri Lороonan Kaala at ne Moróa eburu mi lavavang nemi miga rongka ka i la miga siam kaka i. ⁵Ketla a doma i do nia xopmen ana lixilik tinotno rinedi luvuttadi vavang kaxarang, di lok do di silok aleng. ⁶Keke i do nia axoklen avukat lavavang, ketla a lok nunuan at lakleklen nia a ruuna i, la magara lox ase axasep tinotno vam nimi min.

⁷Nia goxo ro unun tinimi at levenaleng nia aga vavang mi Lagale Lavavang at ne Moróa rinimi. Aga lox asi ia kantubu atnimi kusu ana lox aurut nimi mi Lagale Lavavang. Kereva, nenia aga lok laxapmek mi na loklok? ⁸Aga lok kaka levempilas boro at laraugu lotu vetpes ngan luunun tia, kuren la aga lox epovo i xusu ana vavang ti lok tooro nemi. ⁹La at levenaleng nia aga nemen eburu minimi la agak pakes ti tempanga, ketla a goxo lox angtang solo nimi, mila levempakpakes tarak limixin nuunu boro Masadonia diga lok tooro ia min. Kuren la nia goxo ngising panga nimi la melemu bok nia noxo sing panga nimi. A xopara na raba nimi mi lanknixip. ¹⁰Luruturun at ne Karisito ik lok tarak, la kerepmo kopmen tara medo Grik naba rupe ia at na levelinga loklox aru do nenia axo lok kaka levempilas ti lugugu rak do. ¹¹La tila ba nia a

vaase i na? Ti lox asu i do axo balamu nimi? Kopmen. Moroa iklen i do a balamu nimi. ¹²La move nenia a noxo lok kaka lempilas boro atnedi limixin ding tonga levelinga rak; kerepmo aba lox asusu laxaxarang atnedi di lox aru di do nedi mo luvuttadi vavang la di gugu ngan nema.

¹³Limixin kerepmo kopmen di luvuttadi vavang tuturun. Nedi luvuttadi vavang kaxarang la di xaxarang mi leven gugu atdi la dik lok poovo i xusu dina ven ngan luvuttadi vavang at ne Karisito. ¹⁴Nia axo rakdu bok, mila ne Satan ik lok poovo box i ngan laangelo at laxasep. ¹⁵Kuren la ixo lolos ti luvuttadi gugu ren kusu dinak lok poovo nedi ngan luvuttadi gugu at levelinga mokmokso. Laxavaxap at lorooro atdi diba lok ka akmokso luunun ti levempanga nedi diga lox i.

Pol Ga Paase Axalat Ti Leme Korin

¹⁶A vara na tong amu box i do, nemen tara ta nua i do nia a baulang. Ket do mi doma i xuren, mina siam ka ia do laradi baulang kusu aba lox aru lixilix ia. ¹⁷Na levelinga nia a vaase i ri lox aru ia, axo vaase i mi lavavara at Leeme Silok, ketla a vaase i ngan laradi baulang. ¹⁸Buaang nedi luvuttadi di lox aru di ngan limixin at na lavatkangka, kuren la nenia bok aba lox aru ia. ¹⁹Mi momo rip kip tutu mi mo luvuttadi xaxarang la mo loklok baulang atdi mila mi lok ngan luvuttadi akleklen. ²⁰I ruturun mi xip tutu mi nege i lok nemi ngan lavasaxaruki ren, kopla ip kip pilo levempanga atnimi, la i ven asi rinimi, kopla i vasa bobonot levenmeren nimi. ²¹A vara na tong i do a lok mamangan aleng, mila maga marat ti lox i na rinimi.

Ketla do di vara i do dina lox aru di at tavanga, a vara box i do ana lox aru ia xerekngan di. (Na levelinga rak i lok ngan levelinga at laradi baulang.) ²²Kereva, nedi limixin me Ibru? Nenia bok pam kuren. Kereva, nedi limixin me Israel? Nenia bok pam kuren. Kereva, nedi livisik li at ne Abaram? Nenia bok pam kuren. ²³Kereva, nedi lavasaxaruki at ne Karisito? Nenia bok lasaxaruki at ne Karisito la a lok nunuan aleng tidi. (A paase ngan laradi baulang tinotno.) Agara lok pam laxan gugu buaang. Buaang levenaleng agara nemen pam at loogu xokoxo, la digak pixis aleng ia, la nia axo epovo xusu ana exes i; la agak lox auret ti lanmet. Nia a lok do nedi dixo ekip tangarang mi levempanga xerepmo. ²⁴I valimo levenaleng limixin me Judaia digak pixis ia ga se at lavantun sangaun mi lavasik. ²⁵I vantun levenaleng limixin boro Rom digak pixis ia mi levenakpiksa; la at leges aleng diga lu ia mi laxanuat. I vantun levenaleng lavattaaxup ga lok kapmek minama la at leges aleng kangking la kanimin agam kobok mun to at laras. ²⁶Buaang levempatpas tarak aga nemen keneng at levenmumuat to at laradanut la boro bok at luvuttadi xipkip pilo; la aga nemen bok keneng at levenmumuat boro atnedi limixin axa rak me Judaia la boro bok atnedi limixin kopmen di

me Judaia. Aga nemen bok keneng at levenmumuat to at laramenemen silok, la aga nemen bok at levenmumuat to at lamatbin, la to bok at laras, la boro bok atnedi diga voovo ngan limixin nuunu. ²⁷Aga nemen bok keneng at leven gugu ga lolos aleng, la a goxo lok ka tevenanunga avukat la agak toxo la agak minu la aga mun anan la agak mudut aleng la goxopmen tevesingsiga avukat tia. ²⁸La mavana at nai levempanga, lara lumumuat mo it pot parav ia at levenaleng getgesara la ni lodoxoma liplivi mumu limixin lotu. ²⁹Do tara na lok molo at lunuunu ren, nia a doma mumu aleng lunuunu ren; dola tara i los beles at laxapmek, nia a umsu aleng mi lainbulu.

³⁰Dola ana lox aru ia, ana lox asilok ia mi na levempanga ga vot parav ia ua di lox asusu lomolo rak. ³¹Moroa Temen Leeme Silok ne Iesu, limixin axap dina emi asu min at levenaleng axap la iklen i do nia axo babala mi na levelinga. ³²To Damasko laradi gomgo maxopok at loorong silok ne Aretas ga tong lolos i xusu dina ru pe levenngas povolo ap mo lemenemen Damasko xusu dina ranga alis ia. ³³Ketla larapen tangas tarak diga suxa abeles ia at laxaxi buso la diga lox asi ia ukopok boro at logo gak lok at laxapla at loogu la aga roo suu at lukngen.

Lisilimet At Ne Pol

12 ¹A vara na lox aru ia, keke i do kopmen na lok tooro tara. Ketla monga a vara i xusu ana vaase levesilimet la levempapaase asusu bok boro at Leeme Silok. ²Aklen lara laradi nuunu at ne Karisito at lasangaun mi lavanuet maares gara xap pam, Loroonan Kaala ga lok ka i uto vana at laxalibet i sev avantun. Nia axoklen i do nai ga vot tuturun kopla ni ga ven mene lisilimet, Moroa xusuk mun iklen i. ³La aklen i do na laradi Moroa ga lok ka i uto at lemenemen teren, ketla nia axoklen i do labantuxu ren ga urut kopla lороonan mun teren, Moroa xusuk iklen i. ⁴La go ni ga ronga levelinga i xaala aleng la ixo epovo do tara na tong asu i. ⁵Aba lox aru mo laradi, a noxo lox aru ia; ketla kusuk mun nia ba lox aru ia at levempanga i lox asusu lomolo rak. ⁶Dola a vara i xusu ana lox aru ia, nia noxo lok ngan laradi baulang; mila a paase mi luruturun. Ketla axo xip tutu min, atla ixo lox avukat do tara i doxoma mumu solo ia ri levempanga salai neni i ven i rak la i ronga ia min.

⁷Ketla mumu mo levempanga nunuan aga ven i, nia aga ruuna ka losongsongot de at labantuxu rak, la na losongsongot i lok ngan lasaxaruki at ne Satan kusu na sev asongot tinotno ia la ti ru pe ia basinge loklox asilok. ⁸I vantun levenaleng aga sing ne Moroa mumu i na lavanga, la aga sing i xusu na lok pes i. ⁹Ketla ni ga vorang i ria xeretna, “Letaba nabalamu rak tu i epovo xuren, mila lololos tarak naba gugu lolos aleng mo do a lox asusu i ri limixin, at levenaleng di molobe.” Kuren la aba lok momo aleng tinotno ri mo leveloklok molo rak, kusu mo

lololos at ne Karisito naba nemen keneng tarak. ¹⁰Ti lox aru ne Karisito, a lok momo aleng ti lomolo rak, la levempapaase vupu la levenmumuat la levesongsongot la levenmumuat i lolos aleng, mila do nia a molo, aba suma xaka lololos silok.

Pol Ga Paase Axalat Ti Leme Korin

¹¹A lok ngan tinotno laradi baulang mumu mo levelinga a tong pam i, ketla nemi xa miga pu soso ia rin. I epovo do nemi mina lox aru ia, mila nia xopmen ana lixilik tino ti nom luvuttadi vavang kaxarang mi lok do di silok aleng, keke i do nenia laradi gamasa mun. ¹²Nia aga lolos kusu ana lok levempanga i lox asuus i do nenia laradi vavang aga lox i xantubu atnimi; leveloklok katling at ne Moroa la levempanga sangsangu. ¹³Nia aga gugu xantubu atnimi xerekngan aga gugu xantubu at limixin at laraugu lotu vetpes, ketla nia goxo lox angtang nemi do ri toloklok tooro ria. Mina doxoma xepe na laxapmek tarak.

¹⁴A gagas tana xusu ana vot pasa nimi la ni lavatpas sepsev avantun tarak tinimi. La nia noxo lox angtang nimi mila nia axo vara levempilas atnimi, ketla a vara lorooro atnimi ri Leeme Silok. Laxamdak lixilik dixo lili bubua lapnovos ti luvuttemen di mi luvutnen di, ketla luvuttemen di mi luvutnen di, di lili lapnovos ti laxamdak atdi. ¹⁵Kerepmo aba lok momo aleng do ana raba axap lorooro rak, mi levenaleng tarak, la lololos tarak kusu ri lok tooro nimi. Kereva, ixo epovo do mina balamu lixilix ia xerekngan nia a balamu aleng tinotno nimi? ¹⁶Nemi axap miba siam do nia goxo lok ngan laknixip tinimi axap. Ketla leventaba diba lok do nia a babala vukpuk nimi mi levelinga xaxarang. ¹⁷Kereva, agut nia aga sing panga nimi at loxonaleng aga riki leventaba luvuttadi gugu rak udom? ¹⁸Aga sing ne Taitas do nat pas udom, la aga riki aonon bok lara laradi nuunu eburu min. Kereva, Taitas ga babala vukpuk nimi? Kopmen tinotno. Kereva, neni la nenia, nema magap tuvuk at legeso doxoma la ma ruuna legesu ruptuvuk mene?

¹⁹Agut mi doxoma i do nema mo mak lok tong i do mana paase see atnama ro melango atnimi? Kopmen tinotno. Ma paase ngan limixin at ne Karisito to melango at lemeren ne Moroa. Larapen tangas orong tarak. Levempanga axap ma lox i xusu ri lok tooro nimi. ²⁰A marat do at loxonaleng nia ana vot dom, aba long lenget nemi do mira lok petpes aleng pam ti lodoxoma nia a vara i do mibap tuvuk kuren; la nemi bok miba long lenger i do nenia bok aba lok petpes ti lodoxoma nemi miga vara i do nia aba lok kuren. A marat do aba ven lenget levenedak la levereven peves la levenmukmusak la levenekarakat la lavapaase nemnem la loklox asilok patlak la levempanga xopmen na sixit nunuan keneng at lotu. ²¹A marat do mo nia ana vot manga, ne Moroa rak naba lox abulu ia dom melango atnimi, la aba lok mamangan aleng

mu buaang atnedi digara lok pam laxapmek gano, la kovisi di goxo leeng basinge laxapmek atdi diga lox i, ngan loklok ti elongka la loklok kakapmek maxamang at lixitkis epot la lengkot mamangan kerepmo.

Levempapaase Loklox Aronga

13 ¹Na lavatpas, neni ba lok ngan lavatpas sepsev avantun tarak saparap nimi. Lovoang Kaala i tong i do, “Do tara na lok li tara at lavapaase, i lox avukat do tegepura koplavantun tuvuttadi dina paase be.” ²At lavatpas sepsev agepura rak saparap nimi, agara vaase aronga vam nedi mo luvuttadi diga lok mo leveloklok kakapmek, la ti mo luvuttadi vetpes bok; la mo nga a nemen paxalom, ketla ana vaase aronga bok nemi xeretna. Dola melemu nia ana vot, a noxo maraanga tara atnimi, ³la minaba ven kisip avukat ba i do ne Karisito i paase keneng tarak. Neni kopmen lavanga mokmolo, ketla neni naba lox asuusu lololos teren kantubu atnimi. ⁴I ruturun do neni ga merem at laxaba, la ap mo loxonaleng goxopmen tololos teren, ketla mo nga i rooro amisik mi lololos at ne Moroa. Kerepmo nema luvuttadi gugu ren, kopmen tololos atnama, ketla at lugugu atnema xantubu atnimi, nema manaba ruuna lololos at ne Moroa, mila nema mat kis ekilen eburu mi ne Karisito.

⁵Mina ila mumu lorooro atnimi kusu miba ven kibis i do nemi mi ruuna lunuunu ruturun. Kereva, mixokleklen i do ne Iesu Karisito i nemen keneng atnimi? Do xopmen, i lox asuusu i do mira subu vam at loklok tong pen. ⁶A nuunu do nemi miba ven kisiv i do nema ma goxo subu at loklok tong pen at luvuttadi vavang. ⁷Ketla monga ma sing ne Moroa do nemi mi noxo lok taxapmek, kopmen ti lox asuusu i do nema maga volo vam ap mo loklok tong pen; ketla ma sing tinemi xusu miba ravasu ngan limixin nunuan at ne Moroa la keke i do nema mana subu kot. ⁸Nema maxo epovo do maba lok tavanga ri rupe levelinga ruturun at ne Moroa, ketla ma gugu mene xusu ri su auru i. ⁹Ma lok momo do nemi mi tu lolos; keke i do nema maxo ruuna lololos. La ma sing bok kusu miba ravasu nunuan axap keneng at lorooro atnimi. ¹⁰Ni lavasuun teren la nia a malagan i na at loxonaleng nia ak lok paxalom basinge nimi, kusu do nia ana vot, a noxo lok li lumumuat mavana atnimi mi mo lololos Leeme Silok ga raba ia min. Lugugu at na lololos i lok keretna, ti lox alolos lunuunu atnimi la kopmen do ri lox asi lunuunu atnimi.

Levempapaase Avit

¹¹Atnimi bok be luvutnetak mi luvurinuk. Mina lolos ti ruuna ka luruptuvuk i nunuan aleng mene nga la mina ronga res at lisingising tarak tinimi, la levendoxoma atnimi na ngan legesara mun; la mina nemen keneng at limila. La ne Moroa ni lavasuun at labalamu la limila, neni naba nemen eburu minimi.

¹²Mina eseege rangarang mi lenetnes i xaala. ¹³La limixin nuunu axap mede di lox aonon lomomo atdi rinimi.

¹⁴Letaba nabalamu at Leeme Silok ne Iesu Karisito la labalamu at ne Moroa la loklok mukmulus at Loroonan Kaala nak lox eburu amisik minemi axap. I ruturun

Galesia

Lovoang At Ne Pol Ti Limixin Nunu To Galesia

Levelinga Loklox Axasep

Lamaares 57 A.D.

Galesia neni laasen at lara lenep silok. Keneng at nai lenep silok Galesia, lentaba lavaeme loklox ase mo digat pas saasaa la diga vavang mi levenanasa xapmek. Kuren la ne Pol ga malagan aonon i na lovoang. Na lavaeme loklox ase diga anasa xeretna. Nedik na ua ata nuunu at ne Karisito, atana mumu asu bok leveloklok at leme Judaia la Lenavolo, kusu atanaba lok ka lorooro ren. Ketla keneng at na lovoang ne Pol ga lox axasev i do ata nuunu mene at ne Iesu xusuk mun, la keneng mun at nai nedik ata ba lok ka lorooro avolo.

Lengkot silok ik lok keneng at na lovoang:

- 1:1-5 Lavapaase momo at ne Pol ti limixin.
 - 1:6-2:21 Dina lox abulubun kepe levenanasa xapmek.
 - 3:1-4:31 Nedik dixo lok ka lorooro mi lolos axa atdi.
 - 5:1-6:10 Ataba lok ka lorooro mun keneng at ne Karisito.
 - 6:11-18 Pol ga lox axap levelinga ren.
-

Lavapaase Axasep

1 ¹Nenia ne Pol, la nenia laradi ga lok ka lorotoro ngan laradi vavang la mo lorotoro goxo ravasu at taradi gamasa, ketla ga ravasu boro at ne Iesu Karisito eburu mi ne Moroa, ne Temen, no ga lox aroo amlong i at lanmet. ²Nema axap loxoeton nade ma lox aonon lomomo atnema rinemi limixin lotu at laramenemen do at lenep silok Galesia.

³Letaba nabalamu la lenmila rinemi boro at ne Moroa ne Temen nedik la Leeme Silok atnedik ne Iesu Karisito. ⁴Iesu ga raba lorooro ren ti ru

korop ti laxapmek atnedik kusu neni naba lox asepmus nedik basinge leveng kakapmek at na levenaleng lolos; ana ga ravasu ngan lavavara at ne Moroa ne Temen nedik. ⁵Ata xip aurut laasen at ne Moroa, la leemi asu rin amisik la kopmen taxavaxap teren. I ruturun.

Leges Agale Lavavang

⁶Nia a sangu aleng atnemi, atla goxo lox abao bok la mira ke xepe nga ne Moroa, mo ga ro xaka nemi mi letaba nabalamu ren keneng at ne Karisito, la mo nga mira sisiam kaka nga lavavang petpes. ⁷La i ruturun tinotno do kopmen bok ba tepavang avukat petpes; ketla a vaase i na atla lentaba luvuttadi mo dik lox ekarakat lodoxoma atnemi la dirak lok tong i xusu dinaba ba gili Lagale Lavavang at ne Karisito ti langas petpes. ⁸Ketla do nema luvuttadi vavang koplā taangelo boro vana at laxalibet na vavang mi tevelinga xopmen na sixit emu mi Lagale Lavavang at ne Moroa, ana nema maga vavang min tinemi, lasaxaek na mu asu i. ⁹Nema magara paase vam i na gano la amo manga ara vaase amu manga ren, dola tara na vavang tinemi mi tavavang na lok petpes ti lara nemi migara ruuna xaka vam i, lasaxaek na mu asu mo laradi.

¹⁰Nenia xopmen ana vaase i na xusu do ti lok limixin diba lok momo minia, kopmen tinotno. Nenia a vaase i na xusu ti lox amomo ne Moroa. La nenia kopmen ana vaase i na xusu limixin dinaba emi asu minia. Kopmen. Do nenia gita lox i xuren, ixo epovo bok do nenia giba lok ngan lasaxaruki at ne Karisito.

Langas Ne Pol Ga Mu Asu I Ri Lok Ngan Laradi Vavang

¹¹Luvutnetak mi luvurinuk. A vara do ana tong i rinemi xeretna do, Lagale Lavavang nenia a vavang min, goxo ravasu at lodoxoma at taradi at na laxangka. ¹²La a goxoklen kaka i at taradi, xopla taradi ga lox ase ia min. Ne Iesu Karisito axa ga lox asuvos taba ia min.

¹³Limixin digara tong axasep pam lorooro rak tinemi at levenaleng nenia aga rooro rinotno xeneng at loklok at leme Judaia, la nenia agak lox asongot aleng limixin at lotu at ne Moroa, la aga lolos tinotno xusu ana sev amet axap lunuunu atnedi. ¹⁴La loklok tarak keneng at lotu Judaia ga volo rinotno leventaba diga visik emu nema keneng at lenep Judaia; la nenia aga lolos tinotno xusu ana mumu asu leveloklok at lavalabat atnema. ¹⁵Ketla avot ti livipisik tarak, ne Moroa gara soxolik kaka avot pam ia, la keneng at letaba nabalamu ren, neni ga ro xaka ia do ateren. ¹⁶La at loxonaleng neni ga doma i xusu na lox asuvos ne Nitna ria, la kusu anaba vavang mi Lagale Lavavang teren ti limixin kopmen di me Judaia, nenia a goxo vot pasa bok ba teta xusu neni gita re ase ia, ¹⁷koplā agitat pas bok be uto Jerusalem kusu ri ven nedi lavaun pavang avot tia. Ketla agat pas epopolo uto Arabia, la melemu agamlong uto Damasko.

¹⁸Ga melemu ba at lavantun maares la nenia agarat pas ba uto Jerusalem ti vot pasa ne Pita, la agak lox eburu min at lasangaun mi lavalimo levenaleng. ¹⁹La nenia a goxo ven tu ap mo lentaba lavaun pavang bok, ketla ne Jems kusuk mene nga, neni neton Leeme Silok. ²⁰La na levempanga nenia a malagan i, i raturun tinotno, la ne Moroa iklen i do nenia a xopmen ana xaxarang. ²¹La melemu agat pas uto at lunep silok, Siria la Silisia. ²²Ga ap mo levenaleng limixin at ne Karisito ro Judaia di goxokleklen ia. ²³Digakleklen mun levempanga, leventaba vetpes diga paase di min keretna do, “No laradi gak lox asongot limixin nuunu, neni na i vavang mi mo lunuunu, neni gak lok tong i do na sele utur i.” ²⁴Kuren la diga xip aurut laasen at ne Moroa la diga emi asu min mumu mo levempanga ga ravasu at lorooro rak.

Pol Eburu Mi Leventaba Lavaun Pavang Bok

2 ¹Ga melemu at lasangaun mi lavanuet maares, agamlong manga uto Jerusalem eburu mi ne Banabas, la ne Taitas bok ga emu minema'. ²Agat pas ugo atla, ne Moroa xa ga vaase i ria xusu anat pas ugo. La keneng at lara lixitikis buru atnama mi lubang amgomgo kusuk mun, nenia aga soxomus Lagale Lavavang a vavang min ti limixin kopmen di me Judaia. Nia aga lox i na xusu dina siam mu mo lugugu rak. Lavanga no lugugu avot tarak la ana lugugu at na levenaleng na subu. ³Ketla diga siam mu levelinga atnama mi ne Taitas, laradi loklok tooro rak. Neni laradi xopmen i me Judaia, la di goxo tong i do ni na vit kepe toxontuxu ren. ⁴Ketla leventaba diga vara i xusu dina vit kepe lengkontuxu at luvuttadi nuunu xopmen di me Judaia, la digak lok labala ngan nedi luvuttadi nuunu la nedi na lemet tadi digak beles mun at libinam atnema ngan luvuttadi vereven alii; la diga vavara mun i xusu dinang long terek lesepepmus tinotno basinge Lenavolo nema magak lok kaka i xeneng at ne Iesu Karisito. Diga vara mun i xusu dinak lok ka nema ukeneng at leveloklok atnedi, la manak lok maxopok at leventaangas at Lenavolo. ⁵Ketla nema ma goxo ronga res atnedi at tekonaleng, atla ma goxopara i xusu mana lok lodoxoma atnemi na xipgas la mina doma xepe Lagale Lavavang i raturun.

⁶Tinedi no limixin di tong di do lubang amgomgo at lotu, nenia axo doma solo i do nedi di silok kopla xopmen; atla ne Moroa xopmen na viila mumu leveloklok at tara mi levereven teren. Nedi di goxo vaase bok ba tekolinga mavana at lavavang tarak. ⁷Ketla nedi diga ven kibis i do ne Moroa ga raba ia mi lugugu silok ti paase asu Lagale Lavavang ti limixin kopmen nedi me Judaia, ga lok ngan pam neni ga raba bok pam ne Pita mi lugugu silok ti vavang mi Lagale Lavavang ti limixin me Judaia. ⁸Morua ga lox alolos ne Pita xusu neni laradi vavang ti limixin me Judaia la kerepmo bok neni ga lox alolos ia xusu nenia laradi vavang

ti limixin kopmen di me Judaia. ⁹La ne Jems, ne Pita la ne Jon, nedi na lubung angkipkip at lotu, diga ven kibis i do ne Moroa ga raba nema' mi ne Banabas mi na lugugu i lok petpes tinotno; kuren la diga etep tikngen minama' mi ne Banabas, ga lok ngan loklok katling do nema axap ma ruuna legesa gugu mene nga. La diga lok lisisiam do nema' mi ne Banabas, maba gugu xantubu at limixin kopmen di me Judaia, la nedi diba gugu ro at leme Judaia. ¹⁰La nedi diga vara i xusu nema' mana doxoma bok levempakpakes at limixin banbalo kantubu atnedi, nenia aga ruuna lodoxoma liplivi rinotno ri lok na lavanga.

Pol Ga Vaase Lolos Ti Ne Pita Ro Antiok

¹¹Ketla at loxonaleng ne Pita gat pas uto Antiok, nenia aga vaase tangarang tinotno i at lemeren e, atla ga xasep tinotno do neni ga soogong. ¹²At lara laaleng ne Jems ga riki lentaba luvuttadi nuunu me Judaia ugo; avot ti lovotpot atdi, ne Pita nga no garak lok pam la gara vaanan eburu mi limixin kopmen di me Judaia. La melemu at loxonaleng na luvuttadi me Judaia diga vot, neni goxo an eburu bok ba minedi, atla neni ga marat at Lenavolo at leme Judaia mumu loklok ti ke laanan eburu mi limixin kopmen di me Judaia, la atla neni ga anan eburu mi luvuttadi no di goxo vit kepe lengkontuxu atdi. ¹³La nedi bok mo leme Judaia mego Antiok, digara lok ngan bok laxampanga makmarat ngan bok ne Pita; la ne Banabas bok gara mu asu bok nedi la nedi axap diga soogong.

¹⁴Kuren la at loxonaleng nia aga ven i do nedi di goxo mu asu langas mokmokso mi luruturun at Lagale Lavavang, aga vaase ri ne Pita ro melamgo rinotno atnedi axap keretna, "Nenu laradi me Judaia, ketla nenu nom e, u mumu asu leveloklok at limixin kopmen di me Judaia, la uxop tuvuk ngan laradi me Judaia. Kuren la ua lavasuun teren la u sat ka limixin kopmen di me Judaia xusu dina mumu asu leveloklok at leme Judaia?"

Limixin Di Roo Suu Mumu Mun Lunuunu Atnedi

¹⁵Limixin me Judaia di tong i xeretna, "Nema limixin me Judaia, la nema xopmen mana ngan nedi limixin kopmen di me Judaia dixo mumu asu Lenavolo." ¹⁶Ketla nema leme Judaia maklen i do, laradi mun i nuunu at ne Iesu Karisito, neni mun i sepmus basinge loklok kakapmek, la kopmen do i mumu asu Lenavolo. La kerepmo bok ma nuunu at ne Iesu Karisito xusu manaba sepmus basinge loklok kakapmek, kopmen do ti mumu asu Lenavolo. Ana kopmen noxo ravasu at loklok ti mumu asu Lenavolo, atla kopmen teta naba sepmus basinge loklok kakapmek do neni na mumu asu mun Lenavolo.

¹⁷La amo do nema ma doma i do mana lok kepe Lenavolo la mana sepmus basinge loklok kakapmek keneng at lunuunu atnema saparap ne

Karisito, anai naba lox asuusu i do nema limixin ma ruuna laxapmek mila ma lok kepe vam Lenavolo. Kereva ba, lunuunu saparap ne Karisito i lok nema ngan luvuttadi xapmek, kuren la ne Karisito i lox asu laxakapmek? Kopmen tinotno. ¹⁸Do nenia anamlong ti loklok at Lenavolo no nenia aga lok kepe i, anaba lox asuusu i xeretna do nenia laradi rongtonga xepe at Lenavolo. ¹⁹Lavasuun at na xeretna. Lenavolo ga lox ase ia do nenia laradi xapmek, kuren la aga lok ka lunuunu maxat la aga sepmus ba basinge Lenavolo. La mo nga nia a epovo na rooro ti lok lugugu at ne Moroa. ²⁰I lok ngan ta do diga vaxarem ia eburu mi ne Karisito ro at laxaba; la kopmen nenia xa na a rooro, ketla ne Karisito axa na i rooro xeneng tarak. La lorooro nenia ak lok keneng teren, ni lorooro mi lunuunu keneng at ne Nitna ne Moroa, la neni ga balamu ia la ga raba lorooro ren kusu na uu nop loklok tarak. ²¹Nenia a xopara i xusu ana sok tixirixes letaba nabalamu at ne Moroa. Ketla do taradi na doma i do neni naba sepmus basinge loklok kakapmek mumu lumumu asu ren at Lenavolo, i milik ngan ta keretna do, goxopmen tavasuuun ti lanmet at ne Karisito.

Lenavolo Xopla Lunuunu

3 ¹Laxampanga rangtangu nemi leme Galesia. Nege rinotno ga sar asoogong lodoxoma atnemi basinge lunuunu raturun, kusu mina mumu asu Lenavolo? Gano migara ven axasep pam lavasuun at lanmet at ne Iesu Karisito ro vana at laxaba. ²La mina tong be i ria. Kereva, nemi miga ruuna xaka bok Loroonan at ne Moroa mumu lumumu asu atnemi at Lenavolo? Kopla, miga ruuna xaka Loroonan at ne Moroa mumu lorongtonga atnemi ri Lagale Lavavang la lunuunu atnemi saparav i? ³Ming tangku solo xereva? Miga ru kaxat avot lunuunu atnimi mi Loroonan at ne Moroa; la mo nga mi lok do mina ruuna ka lunuunu ngan limixin mukun mi lololos axa atnimi. Ketla kopmen mina epovo. ⁴Migarap kip levesongsongot mumu lunuunu atnemi. Kereva, migang songot gamasa mun? ⁵Kereva, Moroa im taba nemi mi Loroonan Kaala la ik lok levempanga sangsangu xeneng atnemi, atla mik lok levempanga Lenavolo i paase i, kopla at levereven kibis atnemi ri Lagale Lavavang?

⁶Mina doma mu be lorooro at ne Abaram, ngan Lovoang Kaala i vaase i xeretna,

“Neni ga nuunu at ne Moroa, la mumu mun lunuunu ren saparap ne Moroa, Moroa ga siam kaka i ngan laradi mokmokso.” *Lur 15:6*

⁷Kuren la mina ven kibis i do nedi limixin di ruuna lunuunu, diba ravasu ngan livipisik li rinotno at ne Abaram. ⁸Lovoang Kaala ga vaase avot be i xeretna do ne Moroa naba lok li limixin kopmen di me Judaia ngan nedi limixin mokmokso mumu mun lunuunu atnedi. La avot ti lovotpot at Lagale Lavavang keneng at ne Iesu, Lovoang Kaala ga vaase asu i ri

ne Abaram keretna, “Mumu mun lunuunu ram, nenia anaba lox anarong limixin axap at na lavatbung menemen.”⁹ Ne Abaram ga nuunu, kuren la neni ga lok ka loklox anarong, la nedi di nuunu, dinaba lok kaka bok loklox anarong ngan i.

¹⁰La nedi axap ding tonga res kusuk mun at Lenavolo at leme Judaia xusu dina lok kaka lorooro, nedi dik lok maxopok at lasaxaek ne Moroa im taba i. I ngan Lovoang Kaala i vaase i xeretna,

“Do nege do ixong tonga res amisik at levengkot axap keneng at Lenavolo, neni ik lok maxopok at lasaxaek ne Moroa im taba i.” *Len 27:26*

¹¹Amo nga, i xasep tinotno do, kopmen teta naba sepmus basinge loklok kakapmek mumu mun lumumu asu ren at Lenavolo; i ngan Lovoang Kaala i vaase i xeretna,

“Laradi xusuk mun ua neni i sepmus keneng at lunuunu ren, neni naba ruuna ka lorooro avolo.” *Abk 2:4*

¹²La Lenavolo ixo ruuna tekot keneng at lunuunu, ketla Lovoang Kaala i vaase i xeretna,

“Do nege i lox epovo levempanga axap Lenavolo i paase i, neni naba ruuna ka lorooro avolo.” *Mas 18:5*

¹³Ketla ne Karisito ga ruuna ka lasaxaek at loxonaleng neni ga ru korop ka lasaxaek, no ne Moroa im taba nedi di mumu asu Lenavolo min; kerepmo neni ga un ka amlong nema basinge nom lasaxaek; i ngan Lovoang Kaala i vaase i xeretna,

“Do nege na rem to vana at laxaba, neni i ruuna xaka lasaxaek boro at lebelemamao at ne Moroa.” *Len 21:23*

¹⁴Ne Karisito ga un ka amlong nama kusu no loklox anarong ne Moroa ga xaape min ti ne Abaram naba volo bok ti limixin kopmen di me Judaia. Ne Iesu Karisito ga lox epovo i na rinama, kusu mumu mun lunuunu atnama maba ruuna xaka Loroonan no ne Moroa ga xaape min.

Iesu Neni Livisik Li At Ne Abaram

¹⁵Luvutnetak mi luvurinuk. Ana vaase poovo mi legepu radi do nedu du paase mi tavanga at laxanaleng axap la du siam teren la du malagan tovoang ti lox axasep liviriviti li atdu; ixo epovo bok ba xusu teta naba ba gili i xopla na soxurung arup tepempanga ukeneng teren. ¹⁶La i ngan pam ne Moroa ga lok laxakaape ren ti ne Abaram eburu mi legesi visik li ren. Lovoang Kaala kopmen na vaase mi loxolinga ri limixin solo, ngan loxolinga “Livipisik li ren.” Lavasuun teren do buaang limixin, kopmen. Legesara mene nga, ngan loxolinga, “Legesi visik li ren,” la neni ne Karisito. ¹⁷Lavasuun at levelinga rak keretna; ne Moroa ga lok laxakaape eburu mi ne Abaram la neni ga vit li i xusu neni noxo doma xepe i. La Lenavolo no ga vot ba melemu at lavanuet sangaun kobot mi lavantun sangaun maares (430) la ixo epovo xusu na los polo xopla na lok kepe

mo laxakaape at ne Moroa ri ne Abaram. ¹⁸Do laramtaba at ne Moroa ri ne Abaram ga vot mumu mene nga Lenavolo, naba milik ngan ta do, mo laramtaba ren kopmen nak lok at laxakaape ren. Ketla mumu mun laxakaape ren ne Moroa, la neni ga lox asuusu letaba nabalamu ren la ga raba laramtaba ren ti ne Abaram.

¹⁹Lavanga sala ba i neni lugugu at Lenavolo? Lenavolo ga vot kusu ri lox aven kibis limixin mi lavanga sala rinotno laxapmek, la gak lok mun se at lovtopot at livisik li at ne Abaram, la neni ne Moroa ga xaape min. La ne Moroa xa ga raba lubang angelo ren mi Lenavolo xusu dina raba ne Moses min ngan laradi me xantubu, la ne Moses ga raba limixin min. ²⁰Ketla at laaleng ne Moroa ga raba ne Abaram mi laxakaape ren, neni axa ga lox i, kopmen teangelo xopla laradi me xantubu gita raba ne Abaram min.

²¹Kereva ba, Lenavolo i ra korop levengkakaape at ne Moroa? Kopmen tinotno. Amo dola neni gita raba bok tenavolo rim taba lorooro, i lok ngan do limixin axap ding tonga res at Lenavolo, nedi dinabak mokso basinge loklok kakapmek. Ketla kopmen na ruturun. ²²Ketla Lovoang Kaala i vaase i xeretna do, limixin axap at na lavatbung menemen, dik lok maxopok at lololos at laxapmek; kuren la na laramtaba ne Moroa ga xaape min ti limixin, it pot mumu mun lunuunu saparap ne Iesu Karisito, la ne Moroa im taba i rinedi di nuunu.

²³Ketla, avot ti langas at lunuunu ga vot, Lenavolo gak soxoba pe nema ngan luvuttadi dik lox at loxokoxo se rinotno at laaleng lunuunu saparap ne Karisito ga ravasu. ²⁴Kuren la Lenavolo gak lok tatao luruptuvuk atnema la ga gagas li nama ti mo laaleng ne Karisito ga vot teren; neni ga vot kusu mana sepmus basinge loklok kakapmek keneng at lunuunu atnema. ²⁵Kuren la amo nga, lunuunu ik lok atnema, la Lenavolo ixo lok tatao bok ba nema.

Nemi Luvutnitna At Ne Moroa

²⁶Nemi axap luvutnitna ne Moroa mumu mene lunuunu atnemi saparap ne Iesu Karisito. ²⁷Nemi miga sep susu ukeneng at laasen at ne Karisito, la amo nga Moroa ga lok nimi xusu mina vee ngan ne Karisito. ²⁸Kuren la limixin me Judaia eburu minedi xopmen di me Judaia, di epovo axap mun, kuren bok pam at luvuttadi asaxaruki la luvuttadi dik lok gamasa, la nedi bok lavatlok la lavakin; nemi axap mi lok ngan mun legesara keneng at lurutu eburu mi ne Iesu Karisito. ²⁹Do nemi at ne Karisito, mi lok ngan pam do nemi livipisik li at ne Abaram, la minaba ruuna xaka mo loklox anarong ne Moroa ga xaape min ti ne Abaram.

4 ¹La ti lox epasum levelinga rak, keretna; no lamdak naba ruuna xaka lempanga apnovos at ne temen, neni i lok ngan laradi saksaxaruki at levenmaares neni i aau la i mumu asu levelinga at ne

temen, ketla melemu neni naba silok la naba ruuna ka levempanga axap at ne temen. ²La neni nabak lok levempanga, luvuttadi loklok tatao ren na tong i rin kusu neni nak lox i, naba se rinotno at loxonaleng ne temen ga vit li i, xusu na lox asilox i. ³I lok ngan pam gano nedik ta goxo xasep nunuan at luruturun la dik taga nemen maxopok at Lenavolo eburu mi leventaangas teren nade xopok at na lavatbung menemen. ⁴Ketla loxonaleng ga vot ne Moroa ga vit li i, neni ga riki ne Nitna rinotno. La neni ga ravasu ngan lamdak at latkin at na lavatkangka, la neni gak lok maxopok at Lenavolo at leme Judaia, ⁵kusu ri un ka amlong nedi digak lok maxopok at Lenavolo, la kusu nedik ataba ravasu ngan luvutnitna ne Moroa. ⁶Nedik luvutnitna ne Moroa, kuren la neni ga riki asu Loroonan i nemen keneng at ne Nitna ukeneng ti lorooro atnedik, la neni mo Loroonan ik lok nedik la diram doma su at ne Temen nedik la dira toro rin keretna, “Tamak, Tamak!” ⁷Kuren la nemi mixo lok ngan bok ba lavaanat saxaruki, ketla nemi luvutnitna. Kuren la ne Moroa naba raba nemi mi leveloklox anarong neni ga gagas li i xusu ri luvutnitna.

Lodoxoma Rinotno At Ne Pol Mumu Lenavolo

⁸Gano, nemi mi goxoklen ne Moroa, kuren la miga lok ngan lavaanat saxaruki at laxampoovo moroa. ⁹Ketla amo manga miraklen ne Moroa, i ruturun aleng do ne Moroa iklen nemi; ira lok bok ba mo xereva la miramlong mu manga mo leveloklok la leventaangas gamasa at Lenavolo la mira lok li nemi maxopok teren? Tila la mira vara manga i xusu mina lok ngan lavaanat saxaruki at na laxaloklok? ¹⁰La mi mumu asu manga mo leveloklok ti lok katling levenaleng la leven gaaling la levenaleng at laavat la lamaares. ¹¹Nenia am doma solo mumu nemi. Kereva, leven gugurak aga lox i xantubu atnemi, neni naba ngan lugugu asen kepe mun?

¹²Luvutnetak mi luvurinu, a sing tinotno nemi xusu mina ke xepe mo leveloklok la leventaangas at Lenavolo kerekngan nenia aga ke xepe i; la kerepmo nia axok lok maxopok teren kerekngan nemi bok mi goxok lok maxopok teren. Ap mo levenaleng nenia aga nemen eburu minimi, nemi mi goxo lok tepanga xapmek tia. ¹³Miklen bok ua lavasuun teren la nenia aga vavang avot mi Lagale Lavavang tinemi; lavasuun teren atla nenia aga lok mekmeres. ¹⁴Keke i do mo lanmeres tarak megano ga lox angtang nemi, ketla nemi mi goxo sok tixirixes ia la mi goxo raba arulu ia. Ketla miga seega rangarang kaka ia ngan nemi giba lox i ri laangelo boro vana at laxalibet koplā ne Iesu Karisito axa. ¹⁵Lomomo ga umsu atnemi, ketla ana nga, ira on ta ua? Do nemi gita epovo xuren, la nemi ro migita lik gogo su vam mi levengkatli atnemi la mi gita raba ia min. ¹⁶Kereva, nemi mi munepen minia, atla aga paase nemi mi luruturun?

¹⁷Limixin petpes mo di tong asu lavavang petpes di doma solo nemi la di lok tong i xusu dina sat kaka nemi, ketla na loklok atdi i lok kapmek

tinotno, atla di vara mun i xusu dinak lox epeseves nemi basinge ia, kusu nemi minaba etangas eburu minedi. ¹⁸I lox avukat do limixin dina doma solo mumu tentaba vetpes, mo do loklok nedi dik lox i, i lox avukat. La i lox avukat do mina doma mumu solo amisik tentaba vetpes la kopmen do ap mo mun levenaleng nenia ak lox eburu minemi. ¹⁹Luvutnuruk orong! Nenia a suma losongsongot mumu nemi ngan latkin ing songot at laaleng pipisik teren, la anaba suma na losongsongot se at laaleng lorooro at ne Karisito naba suxuna axap nemi. ²⁰Aram doma mata i do nenia a girak lox eburu minemi, kusu agiba xasep at loklok atnimi la agiba lok kun lavapaase rak la agira paase atnaasan tinimi. A lok bukbulu mu aleng nemi.

Lampoovo At Ne Agar Mi Ne Sera

²¹A vara i xusu ana sue be nemi lentaba do ua lavasuun teren la mi vara i do minak lok maxopok at Lenavolo? Kereva, ming tonga xaka bok lempanga Lenavolo i paase i? ²²I paase xeretna do, ne Abaram, ga ruuna legepu madak, ga lara lamdak at latkin asaxaruki ren, la lara at latkin tinotno ren. ²³La lamdak neni ga ruuna xaka i at latkin asaxaruki ren, ga ravasu at loklox araut madak, ketla lamdak ua neni ga ruuna xaka i at latkin tinotno ren, diga visix i mumu laxakaape at ne Moroa.

²⁴Mo lempanga ga vot kantubu ap mo legeputkin, neni lampoovo at legepu ekabus. I ngan lara at ne Agar, i ru katling limixin ua diga visik abeles di at loxokoxo, eburu mi lekabus mumu Lenavolo ua diga lok ka i ro at lakaana Sinai. ²⁵La ne Agar, neni i ru katling bok lakaana Sinai, keneng at lenep taba Arabia; neni lampoovo ri lemenemen silok Jerusalem ik lok keneng at loxokoxo eburu mi limixin axap me Judaia. ²⁶Ketla ne Jerusalem ua ik lok to vana at laxalibet, neni xopmen nak lok at loxokoxo, la neni, nenen dik; ²⁷i ngan Lovoang Kaala i vaase xeretna, “Nenu latkin uxo ruuna laxamdak, una momo. La nenu latkin ua u xovisi una suma losongsongot ngan lavakin dim suma i at loxonaleng di pisik laxamdak, unap kup la una momo mi lososoro. La latkin latlok teren ga on basinge i, neni naba ruuna taxannitna solo polo mo lara ua latlok teren kopmen na vonon basinge i.” *Ais 54:1*

²⁸Luvutnetak mi luvurinuk, nemi luvutnitna ne Moroa, mumu lusuusu at laxakaape ren, ngan laxakaape ren ti ne Abaram mi lamdak ne Aisak. ²⁹Ap mo levenaleng mo lamdak ua diga visix i at langas tik lox araut madak, neni ga lox asongot mo lamdak diga visix i mumu Loroonan at ne Moroa; la at na levenaleng, ik lok bok kuren. ³⁰Ketla Lovoang Kaala i vaase lavanga salai? I vaase xeretna,

“Una riki aonon latkin asaxaruki eburu mi ne nitna, mila nitna noxo ruuna xaka toxot at levempanga at ne temen, kerekngan lamdak at latkin tinotno ram.” *Lur 21:10*

³¹Kuren la luvutnetak mi luvurinuk, nedik kopmen luvutnitna mo latkin asaxaruki, ketla nedik luvutnitna at latkin sepsepmus at ne Abaram.

Lesepsepmus Atnedik Keneng At Ne Karisito

5 ¹Nedik di sepmus tinotno, mila ne Karisito gara lox asepmus pam nedik basinge leveloklok la leventaangas at Lenavolo. Kuren la mina tu lolos at lunuunu atnemi, la mi guta ke xepe bok ba lorooro atnemi la nak lok ngan manga lavaanat saxaruki at Lenavolo.

²Mina rongga avukar i na. Nenia ne Pol a tong tinotno i rinemi do, amo do mina doma i do mina vit kepe lengkontuxu atnemi, naba milik ngan keretna do, lugugu at ne Karisito ixo epovo na lok tooro nemi. ³Ana vaase aronga amu bok nemi xeretna; do taradi na siam min kusu dina vit kepe toxontuxu ren, i epovo rinotno do mo laradi na mumu asu axap Lenavolo. ⁴La nemi mi lolos tinotno xusu mina sepmus basinge laxakapmek atla mi mumu asu Lenavolo, nemi mi lok ngan ta do, mi ra korop pes axa nemi basinge ne Karisito. La nemi mik lok ta maxamang at letaba nabalamu at ne Moroa. ⁵Ketla nema na ma ruuna lugugu at lolos at Loroonan keneng at lunuunu atnema ma ngangais mi lomomo ri mo laaleng lorooro atnema nabak mokso rinotno. ⁶Do nema mak lox eburu mi ne Iesu Karisito, mo leveloklok ti rivit kepe lengkontuxu kopmen lavanga silok; ixo lok petpes tinotno xantubu at taradi diga vit kepe toxontuxu ren la tara di goxo vit kepe toxontuxu ren. Ketla legesa vanga mene nga i silok aleng, neni lunuunu la labalamu i ravasu ren.

⁷Gano nemi miga mumu asu avukat tinotno levelinga at ne Moroa. Ketla lavanga sala gara sep pepe bok ba nemi xeneng at lorongtonga res at luruurun? Nege gara sat amlong bok ba lodoxoma atnemi? ⁸Ixo epovo rinotno xusu ne Moroa na lox i na rinemi, neni xa ga ro xaka nemi ri langas sepmus. ⁹La lere avolo i lok keretna, “Tegesa radi mene atnemi naba lok nemi la mina ekip kaxat ti langas petpes.” ¹⁰Keneng at Leeme Silok nia a nuunu rinotno do nemi mi noxo mu bok ba langas petpes, la neni no nege ga lok ekarakat lodoxoma atnemi, ne Moroa naba lok li lumumuat teren.

¹¹Luvutnetak mi luvurinuk. Lentaba di tong i do nenia move a vavang do loklok ti rivit kepe levengkontuxu i lox avukat. Do kuren, tila ba la leme Judaia move di lox asongor ia? Dola amo langas ti rivit kepe lengkontuxu i ruturun, naba milik ngan ta do levempavang tarak mumu laxaba at ne Karisito, noxo vaxaru kaxat tepenekarakat. ¹²Nia a lok do mo limixin dik lox ekarakat lodoxoma atnemi, di noxo repes basinge mo loklok; i lox avukat do dina mumu asu mo loklok la dina vit kepe axap ta i.

Lorooro Keneng At Loroonan Kaala

¹³Luvutnetak mi luvurinuk. Lorotoro gak lok tinemi xusu minaba sepmus basinge leveloklok la leventaangas at Lenavolo. Ketla nemen

gat mi guta ke na loklok at lesepepmus basinge Lenavolo na lok ngan mun lavanga ri sisiam avolo nemi xusu lorooro at labantuxu atnemi na sasat nemi. Ketla mina ke labalamu ri lok tooro nemi xusu minaba elok tooro ela, ¹⁴mila lasangaun Lenavolo axap dik lok mene nga at legesa ngas linga xeretna, “Una balamu limixin ngan pam do u balamu axa u.” ¹⁵Ketla do minap tuvuk ngan lempanga mi lavanuet lengkangkedek atdi la minak lox asongot ela axa nemi, mina memek avukat, atla lavanga mina eso rele.

Loroonan Eburu Mi Lorooro At Labantuxu

¹⁶Na levelinga nenia a vaase i, i lok keretna; mina lok ka loklok at Loroonan Kaala la mi noxo vavara solo levendoxoma at labantuxu atnemi; ¹⁷atla levempanga labantuxu atnedik i vavara i, neni i lok petpes ti levempanga Loroonan i vavara i; la levempanga Loroonan i vavara i, i lok petpes ti levempanga labantuxu atnedik i vavara i. Nedu na dixo vepen, la Loroonan Kaala i lok nemi xusu mi noxo lok lempanga, labantuxu atnemi i vavara i. ¹⁸La amo do Loroonan im lam nemi, nemi mixok lok bok ba at loxokoxo at Lenavolo.

¹⁹La levendoxoma xapmek i ravasu at labantuxu, i xasep tinotno at lemeren limixin. La i lox asuusu rinotno loklok kakapmek maxamang at lixitkis epot, la lengkot mamangan la leveloklok petpes i lok kapmek; ²⁰loklok ti lotu saparap laxampoovo vanga la lasangsanga xapmek. La limixin ua di munepen la dira vesepe; la levereven peves eburu mi lebelemamao la laradi itlasi polo limixin axap. La levenekarakat la loklok ti vepeseves ti lara nep binam axap; ²¹la loklok ti ngaongao ri levempanga at leventaba vetpes, la di vavara inin kadan lolos amisik la di lok levenanan kapmek, la mo bok lekampanga vetpes bok keretnom. Amo nga a vaase aronga nemi ngan aga vaase aronga vam nimi gano do nedi dik lok na levempanga, di noxo ravasu ngan lavaanat at Linintoo at ne Moroa.

²²Ketla mo lara i ruuna Loroonan Kaala at lorooro ren i pisik asu labalamu, lomomo, lenmila, loklox atnaasan, loklox anare, luvukat, loklok tuturun, ²³loklok mulus, la lodoxoma avukat ti sasar i. Kopmen bok ba tevelinga go i ru pepe nedi na levempanga. ²⁴La nedi limixin at ne Iesu Karisito, digara ke xepe vam lorooro maut la levendoxoma xapmek eburu mi lavavara at labantuxu atnedi. ²⁵Loroonan Kaala gara raba vam nedik mi lorooro, kuren la ata ke i namgo nga lorooro atnedik. ²⁶Nemen gat nedik guta simi aurut nedik kopla ata velox abelemamao ela minedik kopla ata reven peves mumu lempanga vetpes at lentaba atnedik.

Ata Ekip Tooro Ela Mi Levenmumuat Atnedik

6 ¹Luvutnetak mi luvurinu. Amo dola limixin nuunu dina long terek tara xantubu atdi do neni i lok tavanga i lok kapmek, nemi limixin

tongtonga res at Loroonan Kaala, mina lox akmokso mo laradi; ketla mina lox i mi lumulus. La mina lok tatao avukat lorooro atnemi axa, kusu mo laxakapmek teren noxo lok tong pen nemi. ²Mina ekip tooro ela mi levenmumuat atnemi; do mina lox i xuren, i lok ngan pam do ming tonga res at levelinga at ne Karisito. ³Do tara na doma i do neni mo laasen teren i volo rinotno ketla neni laradi gamasa mene, neni mo laradi i xarang axa i. ⁴Nemi getgesara mina viila avukat luruptuvuk atnemi. Dola luruptuvuk at tara atnemi na lox avukat, i epovo ba do neni na momo at levempanga neni ga lox i; ketla ixok mokso do neni na mii poovo i mi luruptuvuk at leventaba vetpes. ⁵La nedik axap ata lok tatao avukat luruptuvuk atnedik getgesara.

⁶Do lara i lok kaka levenanasa ti mumu asu ne Karisito, i epovo do neni na raba mo leeme loklox ase mi levempanga ri lok tooro i.

⁷Nemen gat mi guta ke tara na xarang arup nimi xusu mina lok laxakapmek; ixo epovo do tara na xarang arup ne Moroa, atla lavanga sala laradi itlo li i, neni axa naba lok kaka levempipisik teren. ⁸Do neni natlo li lavavara mun at labantuxu ren, neni naba dik kaka levempeven teren, neni lanmet; la do neni natlo li levempanga at Loroonan, neni naba dik kaka lorooro avolo. ⁹Nemen gat nedik guta molo basinge leven gugu i lox avukat; atla, do nedik atoxo molo basinge i, mo laaleng tinotno naba vot la nedik ataba dik kaka levempeven teren. ¹⁰Kuren la amo nga nedik move di ruuna levenaleng, i lox avukat do atanak lok loklok i lox avukat ti limixin axap, i ngan tinedi rinotno bok dik lox eburu minedik keneng at lunuunu atnedik.

Levempapaase Aronga Avit

¹¹Mina ven i do nenia a malagan lempatkolina silok tinotno la nenia xa a malagan i mi lakngak.^a

¹²Nedi limixin dik lok tong pen i xusu dinak sok aruru parang nemi do ri rivit kepe lengkontuxu atnemi; nedi luvuttadi dim simi aurut nedi mumu lavatpas atdi keneng at Lenavolo. La dik lok mene nga i xusu di naba sepsu basinge losongsongot mumu laxaba at ne Karisito. ¹³La nedi bok no dik lox arala xaka di mi livirivit kepe lengkontuxu atdi, nedi dixong tonga res at Lenavolo; di vara i do dina rivit kepe lengkontuxu atnemi xusu dina lox aurut levenasen atdi mila mi ronga res atdi la mi rivit kepe lengkontuxu atnemi. ¹⁴Ketla nenia anaba lolos kusuk mun ti paase aurut laxaba at Leeme Silok atdik ne Iesu Karisito; mumu mun mo laxaba ren, levendoxoma momo rak ti loklok at na lavatbung menemen ga met axa gano, la levempanga bok gak lox angtang ia at na lavatbung menemen ga met axa gano. ¹⁵Ixo lok petpes tinotno xantubu at taradi

^a 6:11 Lara vetpes ga malagan i na levelinga keneng at na lovoang ne Pol ga vaase min.

diga vit kepe toxontuxu ren, la tara di goxo vit kepe toxontuxu ren; mo loklok kopmen lavanga silok. Ketla lavanga mene nga i silok keretna, laradi i ba gili lorooro ren kusu na lok ka lorooro maxat. ¹⁶Lenmila eburu mi lebelemumu nabak lox eburu minedi di mumu asu na levelinga xeneng at lorooro atnedi, la nedi axap bok limixin tuturun at ne Moroa.

¹⁷Ti lox axap na levelinga rak keretna, a xopara i xusu teta mego na raba ia mi tekarakat, atla labantuxu rak ira umsu vam mi laxanbuluo at laxanandas i lox asusu i do nenia laradi saksaxaruki at ne Iesu.

¹⁸Luvutnetak mi luvurinuk. Letaba nabalamu at Leeme Silok atnedik ne Iesu Karisito nabak lox eburu axap minemi. I ruturun.

Epesas

Lovoang At Ne Pol Ti Limixin Nunu To Epesas

Levelinga Loklox Axasep

Lamaares 62 A.D.

Pol gak lok at loxokoxo to Rom. Neni ga malagan i na lovoang tinedi limixin to Epesas, kusu nedi diba utus avot be i la melemu nedi limixin nuunu mo diga nemen to at lentaba levenmenemen silok dinaba exes box i. Epesas neni lemenemen matmatkun to at lenep Asia. Mo limixin diga nemen go diga vavara aleng lapnovos silok la diga raba aleng lorooro atdi ti lotu parap lomoroa xaxarang laasen teren ne Diana (Atemis). Buaang atnedi na limixin boro Epesas kopmen di me Judaia, ketla kusuk mun goxo buaang nedi lentaba me Judaia mo diga nemen eburu minedi. Pol ga anasa nedi do keneng mun at ne Iesu, limixin me Judaia la nedi kopmen di me Judaia di ru buru nunuan. At na levenaleng limixin axap dina ru buru nunuan eburu mi ne Karisito la dina lok ngan mun legesa binam tadi.

Lengkot silok ik lok keneng at na lovoang.

- 1:1-2 Lurutu kaxat at levelinga.
 - 1:3-3:21 Lorotoro ri limixin la lunuunu atdi saparap ne Iesu.
 - 4:1-6:9 Loklok at lorooro maxat.
 - 6:10-20 Atana esep at lenep at Leeme Silok.
 - 6:21-24 Pol ga lox axap levelinga ren.
-

Lavapaase Axasep

1 1 Nenia ne Pol, laradi vavang at ne Iesu Karisito; Moroa ga soxolik ka ia ri na lugugu.

Nia a malagan na levelinga rinemi limixin nuunu boro Epesas, mi nuunu ruturun keneng at ne Iesu Karisito. ²Letaba nabalamu mi lenmila rinemi boro at ne Temen dik la Leeme Silok ne Iesu Karisito.

Leveloklox Anarong At Loroonan Kaala Ri Limixin Nuunu

³Nedik ata emi asu mi ne Moroa, Temen ne Iesu Karisito, Leeme Silok atdik. Neni gara lox anarong pam nedik mi leveloklox anarong axap boro vana at laxalibet tinedik limixin at ne Karisito. ⁴Ni ga soxolik ka nedik mumu ne Karisito, avot ti luruntudum li at lavatbung menemen, kusu dik tana dadat basinge laxakapmek la taba nunuan axap at lemeren. Neni i umsu mi labalamu la kerepmo, ⁵ga paase alii do ne Iesu Karisito naba lok tomtom buru ka nedik axap ngan luvutnitna, i ngan lomomo la lodoxoma ren kuren. ⁶Kuren la nedik axap ata emi asu mi ne Moroa ri letaba nabalamu ren i nunuan aleng, la ni ga raba gamasa dik min, maxeneng at lugugu at ne Nitna, mo ne Moroa i balamu i. ⁷Ni ga met la lada ren ga sen su kusu ri un ka amlong dik, la kusu ne Moroa naba doxoma xepe leveloklox kakapmek atdik. Kerepmo ne Moroa ga lox asuusu letaba nabalamu ren i silok aleng, ⁸mo ni ga lox aumsu dik min eburu mi lodoxoma avukat la lakleklen teren. ⁹La at lavavara ren ni ga tong axasep dik mi lodomdoma alii ren, mo ga nemen alipe la ni ga doma alii i do ne Karisito ni lavasuun teren. ¹⁰La at laaleng mokmokso ne Moroa naba lox epovo nom lodomdoma alii la naba sat tomtom buru ka lempanga axap, mo ik lok to vana at laxalibet la ik lok bok nade xopok at lavatbung menemen, kusu ne Karisito naba nemen ngan lamgomgo atdi.

¹¹Maxeneng at ne Karisito, Moroa ga soxolik ka dik do ateren; ganoxa ni ga tong li i xuren, la na i epovo mi lodomdoma alii at ne Moroa, mo ik lok lempanga i ngan lodoxoma la lavavara ren. ¹²Ni ga lox i xuren kusu nema avot leme Judaia maga nuunu at ne Karisito, taba emi asu mi ne Moroa la taba lox aurut laasen teren. ¹³La nemi bok miga ravasu ngan limixin at ne Karisito at loxonaleng miga ronga xisip levelinga ruturun teren, ni Lagale Lavavang i vaase axasep loklox arooro ri limixin. Ap mo loxonaleng miga ru ka lunuunu saparap ne Karisito, Moroa ga lok li nimi ngan limixin teren la ga raba nimi mi loklok katling teren, ni Loroonan Kaala, mo ne Moroa ga paase alii min ti limixin teren. ¹⁴Na Loroonan Kaala i lok ngan lampinebeng ti loklox arooro atdik kusu nedik tanaba lok ka mo leventamtaba ne Moroa gara vaase alii vam min ti limixin teren, la nabak lok kuren se at laaleng ne Moroa naba lox epovo loklox arooro ridik. Ata emi asu mi ne Moroa i silok aleng.

Lisingising At Ne Pol

¹⁵Nia aga ronga levelinga mumu lunuunu atnemi maxeneng at Leeme Silok, ne Iesu, la labalamu atnemi ti limixin axap at ne Moroa; ¹⁶kuren

la, nia xopmen na xap korop ti tong loklox avukat ti ne Moroa mumu nimi. La at levesingising tarak a doma mumu nimi, ¹⁷la a sing amisik lagale lo Moroa, ne Temen Leeme Silok atdik, Iesu Karisito, ti song araba nimi mi Loroonan teren, mo naba suxa nimi mi lodoxoma nunuan la laxasep kusu nemi mibakleklen avukat ne Moroa. ¹⁸Nia a sing bok ne Moroa do lodoxoma atnemi na rem suang kusu miba xasep ap mo leveloklox anarong, neni ga ro ka nimi ri lok ka i. Mo leveloklox anarong i ngan lapnovos silok i lox avukat aleng la i nemen tangais limixin axa ren. ¹⁹La miba xasep ap mo lololos teren i silok aleng, mo i lok tooro nedik limixin nuunu. Mo lololos i ravasu at lololos silok at ne Moroa, ²⁰mo ni ga lox asu i ap mo laaleng neni ga lox axatu ne Karisito basinge lanmet la ga vaxaxis i saparap lekngen tino ro vana at laxalibet. ²¹Neni ga lok li ne Karisito tim gomgo ri leventoonan eburu mi lubungangelo la luvuttadi amgomgo atdi la limixin lolos kerepmo; laasen teren i silok ti levenasen atdi; la ik lok kuren at na levenaleng la nabak lok bok kuren ap mo levenaleng mo ba vot. ²²Moraa ga lok li lempanga axap maxopok at luxangkedek at ne Karisito la ga lok li i rim gomgo at lempanga axap at lotu. ²³Limixin at lotu nedi di lok ngan labantuxu at ne Karisito, mo i nemen ampama atnedi axap la i nemen ampama bok at lengkot axap at na lavatbung menemen.

Lorooro Maxat Maxeneng At Ne Karisito

2 ¹Ganoxa nemi miga lok ngan laxampanga met mene, mumu laxakapmek, ²mo ga umsu at lorooro atnemi ap mo levenaleng miga mumu asu leveloklok at na lavatkangka la levelinga at laradi gomgo, ne Satan, ik lok to vana at lamavangkap, la na loroonan kapmek i gugu keneng at limixin tongtonga xepe. ³Nedik axap taga nemen kuren, taga lok lempanga kusu ri lox amomo mun lodoxoma la labantuxu atdik, mo ga umsu mi lavavara kapmek at lorooro maut. La nedik taga nemen maxopok at lebelemamao at ne Moroa kerekngan nedi. ⁴Ketla ne Moroa i umsu mi lebelemumu, ga lox asu langsung labalamu ren tidik, ⁵la ga lox arooro nedik mumu laxakatu kaxat amlong at ne Karisito, keke i do nedik taga lok ngan laxampanga met la taga umsu mi laxakapmek. Neni ga lox arooro nedik keneng mun at letaba nabalamu ren. ⁶I lok ngan ta do ne Moroa ga lox axatu amlong dik eburu mi ne Karisito la ga lox axis dik eburu min to vana at laxalibet; na i ravasu boro at lugugu at ne Iesu Karisito. ⁷Neni ga lox i na xusu at levenaleng i tu melamgo, neni naba lox asuusu i do letaba nabalamu ren i nunuan axap, mo letaba nabalamu ga ravasu at labalamu ren tidik maxeneng at lugugu at ne Iesu Karisito. ⁸Moraa ga lox arooro nedik maxeneng at letaba nabalamu ren, mo letaba nabalamu ik lok tinedi di nuunu at ne Iesu Karisito. Limixin kopmen dina epovo kusu dina lox arooro nedi xa; ketla mo letaba nabalamu, ni

laramtaba boro at ne Moroa. ⁹Kopmen tara i epovo na lok kaka loklox arooro mumu leven gugu nunuan teren, mila mo do xuren, limixin diba simi aurut di. ¹⁰Nedik ta lok ngan loogu ne Moroa ga vaxaru i, mila neni ga rudum li nedik at lekngen ne Iesu Karisito, kusu nedik taba lok leven gugu nunuan, mo ne Moroa ga gagas li avot pam i xusu dik taba lox i.

Nedik Ta Lok Ngan Legesara Eburu Mi Ne Iesu

¹¹Nemi limixin kopmen me Judaia; leme Judaia di so asen nimi do 'limixin kopmen toloklok katling.' Nedi di vit kepe lengkontuxu atdi i ngan loklok katling at ne Moroa. ¹²Nemen mita domampe i do miga lok kereva ganoxa. Ap mo levenaleng nemi goxoklen ne Karisito. Nemi miga lok ngan limixin kadiiong ti leme Judaia la goxopmen tenep atnimi keneng at levenekabus no ne Moroa ga lox i eburu mi limixin teren. La goxopmen todoxoma voovo rinotno atnemi, la at na lavatbung menemen mi goxoklen ne Moroa. ¹³Miga nemen paxalom basinge i, ketla na nga, keneng at lada at ne Iesu Karisito, Moroa ga lox axis bus nimi eburu min.

¹⁴Iesu, neni lavasuun at lumulum atdik la ga lox axis eburu leme Judaia la limixin kopmen di me Judaia. Ni ga das asi laxapla no gak lox epeseves di la neni ga lok kepe lekarakat kantubu atdi.^a ¹⁵At lanmet teren neni ga sep korop kepe loklok ti mumu asu Lenavolo at leme Judaia eburu mi levelinga lolos la leventaangas teren. Ni ga vara i do na lok kaka nom luabung mixin la na lok legesa bungmixin tin; la na langas mun naba lok kaxat lumulum. ¹⁶At lanmet teren ni ga lok lumulum kantubu atdi; la at nom laxaba ni ga lox etang nom legepu bungmixin ngan legesa bantuxu la ga lam ka di kusu dina xis etaba belen. ¹⁷Karisito ga rupot la ga vavang mi Lagale Lavavang mumu lumulum tinemi limixin kopmen me Judaia miga nemen paxalom basinge ne Moroa la tinedi leme Judaia diga nemen saparav i. ¹⁸Maxeneng at ne Iesu nema leme Judaia eburu minemi limixin kopmen me Judaia dik ta epovo na vot pasa ne Temen dik mi legesa doxoma la legesa Roonan Kaala.

¹⁹Kuren la nemi limixin kopmen me Judaia kopmen mina lok ngan bok ba limixin kadiiong. Nemi lavaanat at Linintoo ren eburu mi limixin teren la i lok ngan ta do mi nemen at loogu at ne Moroa. ²⁰Nom loogu luvuttadi vavang mi lavaeme vapaase alii diga vaxaru i, la keneng ap mo loogu, ne Iesu Karisito ni luat kis teren. ²¹La mo loogu it kis atmatkun pana ren la neni i lox asilox i la i vee ngan loogu xaala ri Leeme Silok ne Moroa. ²²La ne Karisito i lox abeles bok nimi kusu miba lok ngan lengkot ap mo loogu, la Loroonan Kaala at ne Moroa i nemen pam e.

^a 2:14 Lavasuun at na i do avot ti lovtopot at ne Karisito, limixin me Judaia mi limixin kopmen di me Judaia di goxo etangas eburu.

Pol Ga Ruuna Lugugu Ti Paase Asu Lagale Lavavang

3 ¹Nenia ne Pol, a ruuna mo lugugu ti lox axis nemi, limixin kopmen nemi me Judaia eburu mi ne Iesu Karisito, la ni lavasuun bok teren la nenia ak lok de at loxokoxo.

²Nia a doxoma i dola nemi miga ronga vam i do ne Moroa ga raba ia mi lugugu ti paase asu mo levelinga mumu letaba nabalamu ren tinimi. ³Mo levelinga ganoxa ga nemen lipe, ni ne Moroa ga lox asuvos i ria, la nia aga malagan i rinimi at lovoang mutmut gano. ⁴La mo dola nemi mina us i, miba xasep at lodoxoma rak mumu mo levelinga lipe at ne Karisito. ⁵At levenaleng axap gano, Moroa xopmen goxo lox asuvos mo levelinga lipe tinedi lavaola. Ketla na mun Loroonan Kaala at ne Moroa ga lox asuvos i rinema luvuttadi vavang eburu mi lavaeme vapaase alii ren ngan nema lavaanat soxolik at ne Moroa. ⁶Mo levelinga lipe i lok keretna. At Lagale Lavavang limixin kopmen di me Judaia di epovo na lok kaka leveloklox anarong at ne Moroa kerekngan limixin me Judaia; la nedi legepu bungmixin diba lok ngan lengkot at legesa bantuxu mun la nedi eburu diba lok kaka mo lempanga ne Moroa ga vaase alii i rinedi di nuunu at ne Iesu Karisito.

⁷Moroa ga lok li ia ngan lasaxaruki ren ti paase asu Lagale Lavavang; na lugugu i ngan letaba nabalamu ria, mo ga ravasu at lololos teren, la i lox alolos ia at na lugugu. ⁸Nenia laradi lixilik tinedi axap limixin at ne Moroa, ketla neni ga lox asu letaba nabalamu ren tia kusu nenia ana vavang mi ne Karisito, ni i lok ngan lapnovos i silok aleng la kopmen tara i epovo na vuse ka tempanga silok kerekngan neni. La a vavang ti limixin kopmen di me Judaia, ⁹kusu nedi eburu mi limixin axap diba xasep ap mo levelinga lipe, ni mo levelinga ne Moroa ga raba ia min kusu ana tong asu i. Nom levelinga Moroa ga lipe i gano la ga nemen kuren at laxanmaares buaang, ga ru ka i at levenaleng ne Moroa ga rudum li lempanga axap. ¹⁰Lavavara ren ga lok keretna, neni na lox asuvos lagale lodoxoma ren la mo nga limixin lotu dinap kip ka mo lugugu ti lox asuusu mo lodoxoma ren ti lubang angelo la leventoonan to vana at laxalibet. ¹¹Nom lodoxoma ren i epovo mi lodomdoma alii avolo ren, neni ga lox epovo i mi lugugu at ne Iesu Karisito, Leeme Silok atnedik. ¹²Maxeneng teren nedik ta epovo na vosiga ne Moroa, kopmen tavanga i ru pe dik la kopmen tainmarat, mo do dik ta nuunu at ne Iesu Karisito. ¹³Kuren la nia a sing nemi do mina lolos la nemen mita subu kot kantubu at lunuunu atnimi mumu levesongsongot nia ap kiv i. Na levesongsongot ga vot mila agak lok tooro nimi, ketla mina lok momo mun maxeneng teren.

Lisingising At Ne Pol Ti Limixin Me Epesas

¹⁴Do nenia a doxoma na lodomdoma alii ren, nia a xis tintiding to melamgo at ne Tamak. ¹⁵Neni i so asen limixin teren mi laasen loklox

avolo ren, nedi boro vana at laxalibet la nedi bok at na lavatbung menemen, nedik axap di lok ngan legesa bungmixin. ¹⁶Nenia a sing ne Moroa do maxeneng at langsgangan lapnovos teren, neni naba lox alolos lorooro axap atnimi mi lololos boro at Loroonan Kaala. ¹⁷La at lunuunu atnemi, ne Karisito naba nemen to at lebelen nimi. La a sing ne Moroa do mina umsu mi labalamu kusu lunuunu atnimi na tu lolos, kerekngan levenixe at luuna ing tanga alis laxangka la luuna ira tu lolos; ¹⁸la mina umsu mi lolos eburu minedi limixin at ne Moroa kusu miba xasep do labalamu at ne Karisito i babaalom, ip teplas, i urut, la i si aleng tino, ¹⁹la miba xasep do nom labalamu ren i silok polo lakleklen at limixin la kerepmo miba umsu mi leveloklox avukat axap at ne Moroa xa.

²⁰Ata emi asu mi ne Moroa, i epovo na lok laxampanga solo, mo i volo axap mo lempanga nedik di ngising tin la di doxoma i, la mo levempanga i ravasu at lololos teren, mo i gugu xeneng at lorooro atdik. ²¹La limixin lotu dinap kip aurut laasen at ne Moroa to at lotu, la keneng at laasen at ne Iesu Karisito, la lavaola move i tu umelamgo dinap kip aurut laasen teren amisik la kopmen taxavaxap teren. I ruturun.

Nedik Limixin Nuunu I Ngan Labantuxu At Ne Iesu

4 ¹Nenia ak lok at loxokoxo mumu lugugu at Leeme Silok. Kuren la nia a sing nimi do lorooro atnimi naba lok nunuan axap, i epovo mi lorotoro at ne Moroa tinimi la i epovo mi lavavara at ne Moroa. ²Lorooro axap atnimi na umsu mi langsgangan loklok ngangao la loklox anare; mina nemen mulus mene la mina lox asuusu labalamu rinedi di lok laxakapmek. ³La mina lolos kusu mina tu buru mi legesa doxoma at Loroonan Kaala, la lorooro atnimi nat kis atnaasan mi limila. ⁴Legesa bantuxu mene nga la legesa Roonan Kaala, kerekngan mun ne Moroa gara ro xaka vam nimi ti legesa doxoma voovo, ⁵la leges Eme Silok, legesa nuunu la legesa sep susu; ⁶legesa Moroa la neni ne Temen nedik axap. Neni langomgo at limixin axap teren, ni ik lok at lengkot axap la i nemen keneng atnedik limixin axap teren.

⁷Karisito ga lox epes letaba nabalamu ren tinedik getgesara. ⁸I ngan Lovoang Kaala i tong i,

“Ap mo laaleng ni gat pas uto vana at laxalibet, ni ga emu ka buaang limixin kokoxo eburu min, la ni ga raba levenasen tamtaba ri limixin teren.”

Sam 68:18

⁹Anai, i tong i do neni gat pas uto vana at laxalibet, kuren la avot ti nom neni ga si ukopok ti na lavatbung menemen. ¹⁰Neni ga si ukopok, la melemu gat pas uto mavana xa at laxalibet kusu laasen teren na epeseves ti lengkot axap. ¹¹Neni vam ga raba leventamtaba ri limixin teren. Ni ga soxolik ka lentaba ri gugu ngan luvuttadi vavang la lentaba ri gugu ngan luvuttadi vapaase alii. Lentaba diga lok ka lugugu ngan luvuttadi vapaase

asu levelinga at ne Moroa, la lentaba ri gugu ngan luvuttadi loklok tatao lotu la lentaba ti lox ase limixin mi levelinga at ne Moroa. ¹²Karisito ga raba leventamtaba kerepmo ri lox agagas limixin teren ti lok lugugu ren kusu diba epovo na elok tooro ela la dina lox alolos labantuxu at ne Karisito. ¹³La na loklok ba gugu xeneng nedik axap se taba lok ngan legesara rinotno at lunuunu saporap ne Nitna ne Moroa la taba ruuna ka nom lakleklen mumu ne Nitna ne Moroa. Kerepmo la nedik taba vee ngan limixin mukun ap mo lunuunu la lorooro atdik ba nunuan axap kerekngan ne Karisito.

¹⁴Do lorooro atdik nak lok kuren, lunuunu atdik noxo lok ngan lunuunu at laxamdak lixilik, it los ekat ngan laras i repit la iap sep tang at lisim la ira onon taba ugo la ude to at lamaxat. Kerepmo lavaeme loklox ase xaxarang di lok tong i xusu dina sar asoogong lunuunu atdik basinge ne Karisito mi leveloklox ase xaxarang la levelinga babala arup. ¹⁵Ketla nedik ta paase asu levelinga ruturun at ne Moroa, la lorooro atdik na umsu mi labalamu; la at lorooro axap atdik, ataba ravasu lolos la mina sep sogo ri langomgo atdik ne Karisito. ¹⁶Nedik axap ta lok ngan labantuxu ren la maxeneng teren dik tat kis buru. La lengkot axap at labantuxu ren na elok tooro ela, la kerepmo labantuxu ren ba su lolos la ba lox aru axa i mi labalamu, mo do lengkot axap na gugu nunuan.

Lorooro Maxat Maxeneng At Ne Karisito

¹⁷Nia a sing lolos nemi keneng at laasen at Leeme Silok do mina rongga res at na levelinga. Mina xap ti mu asu leveloklok kakapmek at limixin kopmen di me Judaia. Mo levendoxoma atdi noxo lok tooro di. ¹⁸Levendoxoma atnedi i nemen keneng at lamain. Nedi xopmen dina ruuna ka toxot keneng at na lorooro ne Moroa im taba i, mila kopmen takleklen tinotno atnedi la lebelen atnedi i rebonot pe. ¹⁹Nedi xopmen dina suma lainmangan mumu leveloklok kakapmek dik lox i. La dira xap kusu dina lok leveloklok nunuan la dia vubeles at leveloklox axap i bilingot. La levendoxoma atdi i vekip kaxat ti lok laxakapmek.

²⁰Levenanasa mumu ne Karisito xopmen na lok kuren. ²¹Nemi migara rongga xaka vam levelinga ren la diga lox ase nemi min, ik sixit emu mi levenanasa ruturun at ne Iesu. ²²Miga lox ase kusu mina lok kepe lorooro maut mo gak lok at lorooro atnemi ganoxa, la lodomdoma ri laxakapmek gara lok kapmex i. ²³La miga lox ase kusu levendoxoma atnemi na maxat. ²⁴La miga lox ase kusu mina lox ekun nom lorooro maut mi lorooro maxat, mo i lok ngan lampoovo at ne Moroa la i umsu mi loklok mokmokso i ruturun la loklok i dadat.

²⁵Kuren la nemi getgesara mina lok pes kepe levelinga xaxarang la mina paase mi luruturun ti limixin at ne Moroa, mila nedik axap lengkot at labantuxu at ne Karisito. ²⁶Do mina musak, nemen mita lok laxapmek;

lumukmusak atnimi na xap avot ti laxangking na lotup. ²⁷Nemen mita raba ne Satan mi toxonin angavang. ²⁸Mo laradi xipkip pilo gutap kip pilo bok ba. Ketla neni na lok lugugu mi lukngen la na lok leven gugununan kusu neni na epovo na lok tooro nedi limixin pakpakes.

²⁹La lavapaase kapmek noxo ravasu at levenngusno atnemi. Levelinga avukat mene nga mina paase asu i, kusu na lox alolos nedi limixin dik pakes ti levelinga avukat la kusu na lok tooro limixin di ronga nemi. ³⁰Nemen mita lox abulu Loroonan Kaala at ne Moroa. Loroonan Kaala neni loklok katling ne Moroa ga raba vam nimi min, i ngan lampinebeng ti loklox arooro atdik. ³¹Nemi mina lok kepe axap loklok ti lebelen kapmek, lebelemamao, lumukmusak, loxoxo xaka, lavapaase mumu, la mo axap leveloklok kakapmek. ³²La mina suxa lorooro atnimi mi lebelen tuntun la labalamu kantubu atnemi limixin nuunu, la mina domampe laxakapmek atnimi getgesara kerekngan ne Moroa ga lok pes laxakapmek atnimi at laasen at ne Karisito.

Lorooro Atdik Keneng At Laxasep

5 ¹Nemi luvutnitna at ne Moroa, mo i balamu aleng nimi; kuren la mina mu asu lampoovo ren. ²La lorooro atnimi na umsu mi labalamu kerekngan ne Karisito ga lox asuusu labalamu ren tidik la ga raba lorooro ren; mo loklok at ne Karisito i lok ngan laramtaba i so misigisigis la lavanga laplavang saparap ne Moroa.

³Ketla nemen tara atnimi guta lok laxakapmek i lok keretna, loklok kakapmek maxamang at lixitkis epot, lengkot mamangan, loklok ti belegaao. Na lempanga xopmen nak mokso ri limixin dadat at ne Moroa kusu dina lox i. ⁴La mina ke xepe lavapaase kapmek, levelinga rangtangu, la lavapaase sese i lok kapmek; na lempanga kopmen na lox avukat. Ketla mina umsu mi levelinga ti tong avukat ti ne Moroa. ⁵Nemi mina xasep at na. Do tara na lok loklok kakapmek maxamang at lixitkis epot, koplana lok lengkot mamangan, koplana loklok ti belegaao (na loklok i ngan loklok ti lotu saparap lempoovo moroa), kopmen toxot tin to xeneng at Linintoo at ne Karisito la ne Moroa. ⁶Nemen tara na bala arup nemi ri laxakapmek mi levelinga gamasa mila, do tara na lok nom lempanga la na ronga xepe levelinga at ne Moroa, lebelemamao ren ba vot saparap nom laradi. ⁷Kuren la nemen mitat kis etangas eburu mi mo limixin tongtonga xepe.

⁸Gano nemi miga nemen at lamain. Ketla na nga Leeme Silok ga lok li nemi at laxasep. Nemi minat pas ngan luvuttadi at laxasep. ⁹Mo laradi i ruuna laxasep at lorooro ren i lox asuusu luvukat, loklok mokmokso la loklok at lavapaase i ruturun. ¹⁰La mina lok tong pen i kusu mina xasep ap mo leveloklok, i lox amomo Leeme Silok. ¹¹Nemen mita etangas eburu minedi luvuttadi dik lok leveloklok at lamain. Mo leveloklok i ngan

lavanga gamasa la noxo visik asu lempanga avukat, ketla mina vaase sok nedi limixin di lox i; ¹² mila lavanga mamangan do tara na vaase asu levengkakapmek i lipe ro at lemeren limixin. ¹³ Ketla laxasep i lox asuvos leveloklok kakapmek la limixin dira xasep ba do mo lempanga i lok kapmek, ¹⁴ mila lamain kopmen na epovo nak lox eburu mi laxasep. I lok ngan na levelinga,

“Nenu laradi mo u vunga, soso una aus. Nenu una aus basinge lanmet la ne Karisito naba raba u mi laxasep.” *Ais 26:19*

¹⁵ Nemi mina lok tatao avukat lavatpas atnemi. Nemen mitat pas ngan laradi kopmen takleklen teren. Minat pas ngan laradi i ruuna lakleklen. ¹⁶ Amisik mina gagas kusu mina lok leven gugu at ne Moroa, mila na levenaleng i umsu mi laxakapmek. ¹⁷ Kuren la nemen nemi mita lok lempanga rangtangu, ketla mina xasep at lavavara at Leeme Silok. ¹⁸ La nemen mita inin tangtangu mi laxadan lolos; mo loklok naba lok kapmek nemi. Ketla mina umsu mi Loroonan Kaala, ¹⁹ la mina paase kantubu atnemi mi levengkompixan at ne Devit la lengkompixan at lotu la lengkompixan emi asu. Minak pixan la mina lok levempanga kerepmo mi lorooro axap atnemi saporap Leeme Silok. ²⁰ At levenaleng axap mina tong avukat ti ne Moroa Temen dik at lempanga axap neni i lox i at laasen at Leeme Silok atnedik, ne Iesu Karisito.

²¹ Mina lox asi nemi maxopok at luvutneton nemi kusu miba lox asuusu loklok ngangao atnemi ri ne Karisito.

Levelinga Ri Lavaun Epot

²² Nemi lavakin. Minang tonga res at levelinga at lavatlok atnemi, kerekngan ming tonga res at levelinga at Leeme Silok; ²³ mila latlok ni lamgomgo at latkin teren, kerekngan ne Karisito ni lamgomgo at lotu. Lotu ni labantuxu at ne Karisito, la ne Karisito neni Laradi Loklox Arooro atdik. ²⁴ Lotu i nemen maxopok at ne Karisito, la kerepmo bok lavakin dinang tonga res at lavatlok atdi at leveloklox axap.

²⁵ Nemi lavatlok. Mina balamu lavakin atnemi, kerekngan ne Karisito ga balamu limixin lotu la ni ga raba lorooro ren tidi. ²⁶ Neni ga lox i xuren kusu ri lox adadat di basinge laxakapmek. Ni ga lox adadat di mi levelinga ren i ngan ladan. ²⁷ Neni ga vara i do na lox agagas li di kusu dina ven nunuan tinotno at lemeren. La nedi di noxo ruuna taxakapmek, toxot kapmek la tevenasen panga xerepmo, diba nemen mokmokso la kopmen taxapmek atdi. ²⁸ At na mun langas lavatlok, mina balamu lavakin atnemi, kerekngan mi balamu axa labantuxu atnemi. Mo laradi i balamu latkin teren, i lox asuusu i do i balamu axa i. ²⁹ La kopmen taradi na munepen mi labantuxu axa ren, ketla neni i raba luxa i la i lok tatao avukar i, kerekngan ne Karisito i lok tatao limixin at lotu; ³⁰ mila nedik lengkot at labantuxu at ne Karisito.

³¹I ngan Lovoang Kaala i tong i xeretna,
 “Ni lavasuun teren la laradi i onon basinge ne temen mi nenen kusu
 neni na nemen eburu mi latkin teren, la nedu duna lok ngan legesara.”

Lur 2:24

³²Na levelinga ni lavanga i silok aleng la i lolos kusu dik tana xasep
 teren. Ketla nia a doxoma i do i ru katling ne Iesu eburu mi lotu ren.

³³Ketla nemi getgesara mina balamu lavakin atnimi, kerekngan mi
 balamu axa nimi. La lavakin dina lok ngangao at lavatlok atdi.

Levelinga Ri Laxamdak Mi Laxaalik

6 ¹Nemi laxamdak mi laxaalik. Minang tonga res at levelinga at
 luvuttemen nimi mi luvutnen nimi at laasen at Leeme Silok, mila na
 loklok ik mokso ti mu asu i. ²Lovoang Kaala i tong i,

“Mina lok ngangao at luvuttemen nimi mi luvutnen nimi.” *Pas 20:12*

Na loxot at lasangaun lenavolo, ni lara avot i tong asu loklox anarong
 tinedi di ronga res teren. ³Nom loxot i lok keretna,

“Mina lok ngangao at luvuttemen nimi mi luvutnen nimi kusu lorooro
 atnimi naba lox avukat mun la naba nemen babaalom at na lavatkangka.”

Len 5:16

⁴Nemi luvuttemen laxamdak mi laxaalik. Nemen mita lok kapmek
 lebelen laxamdak mi laxaalik atnimi la dina musak, ketla mina lok tatao
 di mi loklok tik lox akmokso di at luruptuvuk atdi la mina anasa di mi
 levenanasa at Leeme Silok.

⁵Lavasaxaruki. Minang tonga res at luvuttadi amgomgo atnimi la mina
 umsu mi loklok ngangao la lanmarat; la lebelen nimi nak lox avukat tidi.
 Minang tonga res atdi kerekngan nemi ming tonga res at ne Karisito.

⁶Minang tonga res atdi kopmen do ap mo mene nga di reven tata nemi,
 ketla mina gugu amisik ngan lavasaxaruki at ne Karisito la mina lox
 epovo lavavara at ne Moroa mi lorooro axap atnimi. ⁷Mina lok leven
 gugu atnemi mi lorooro axap atnimi, i lok ngan ta do mi gugu ri Leeme
 Silok, la kopmen ti limixin mun, ⁸mila miklen i do Leeme Silok naba
 raba luunun tinedi axap dik lok luvukat, keke i do neni lasaxaruki xopla
 xopmen.

⁹Nemi lubung amgomgo. Luruptuvuk atnemi na lok ngan legesara
 parap lavasaxaruki atnimi la mina xap at loklok ti paase mukmusak tidi.
 Mina doxoma i do ne Karisito laradi gomgo atnimi la atnedi bok, la ik lok
 to vana at laxalibet la i viila mumu nedik axap mi leges ampoovo mene
 nga.

Mina Gagas Ti Leesep

¹⁰Ti lox axap na lovoang. Mina lox alolos lorooro atnimi keneng at
 Leeme Silok la mina lok kaka lololos teren i silok pologat. ¹¹Mina siga

levempanga singsiga no ne Moroa ga raba nemi min kusu miba epovo ri esep la mina tu lolos tangarang laxanbabala at ne Satan. ¹²Nedik na kopmen ta esep tangarang mi limixin ketla nedik di esep tangarang mi laxampanga lolos at lamain at na lavatbung menemen, nedi lubungangelo xapmek, lubunggas, la luvuttadi amgomgo atdi. La dik ta esep tangarang mi lubungmixin kapmek at ne Satan dik lok to vana at lamavangkap. ¹³Kuren la mina siga axap levempanga singsiga at ne Moroa i raba i ri leesep kusu mina gagas avukat ti mo laaleng kapmek at leesep, la miba epovo na tu lolos. La do mi gagas avukat pam, minaba tu tuxuruxun at nom leesep.

¹⁴Kuren la mina tu tuxuruxun; mina rebeng ka levelinga ruturun, i ngan labanbaane di sevut li i at labangbaangis atnimi; la mina suxa lороoro atnimi mi loklok mokmokso, i ngan labantaape at lobongobong. ¹⁵La mina gagas ti paase asu Lagale Lavavang at lumulum i ngan labantaape at lengkangkedek tit pas avukat at nom leesep. ¹⁶La mina sosolok bok nom lunuunu i ngan lenban kusu ri sep banpe nom axap levesoso xao at ne Satan i soso min. ¹⁷La mina lok ka loklox arooro i ngan lavatkiam tik lok pe lesepep la minaklen ka levelinga at ne Moroa i ngan lavarise sepsep at Loroonan Kaala. ¹⁸Mina lox i na levempanga xeneng at levesingising atnemi, kusu minaba sing ka loklok tooro at ne Moroa. At levenaleng axap mina ngising at leventaangas axap no Loroonan i sasat ase nemi min. La mumu mun na langas, minaba tu lolos la mi noxo subu kot; mina ngising amisik ti limixin at ne Moroa.

¹⁹La mina ngising bok tia, kusu ne Moroa naba raba ia mi levenngas linga at levenaleng nia a lok gagas ti paase, kusu nia noxo marat la anaba lox axasep Lagale Lavavang mo ga nemen ali-pe. ²⁰Ni lavasuun teren la nenia, laradi xipkip levelinga at ne Moroa, ak lok de at loxokoxo. Mina ngising bok do nenia noxo marat ti tong asu Lagale Lavavang kerekngan ne Moroa i vara i.

Levempapaase Avit

²¹Tikikas, neni neton orong atdik la lasaxaruki ruturun at Leeme Silok. Neni naba vosiga nemi la naba raba nemi mi lavapaase axasep mumu lороoro rak la lugugu rak nade. ²²Ni lavasuun teren la nenia aba riki i udom saparap nemi xusu miba xasep do lороoro atnema ik lok kereva, la kusu neni naba lox alolos nemi.

²³Morua ne Temen dik la Leeme Silok ne Iesu Karisito duna raba nemi luvutneton nama mi lenmila, la labalamu eburu mi lunuunu, ²⁴la letaba nalamu naba nemen eburu minedi axap di balamu Leeme Silok atnedik, ne Iesu Karisito la mo labalamu noxo xap. I ruturun.

Pilipai

Lovoang At Ne Pol Ti Limixin Nunu To Pilipai

Levelinga Loklox Axasep

Lamaares 62 A.D.

Pol gak lok at loxokoxo to Rom la neni ga malagan i na lovoang uto rinedi limixin nuunu to Pilipai. Keneng at nai lovoang neni ga malagan i, neni ga tong avukat ti limixin boro Pilipai mumu laramtaba atdi, na laramtaba diga lok li i at lekngen ne Epaprodaitas la neni ga lok ka i uto at ne Pol ti lok tooro i. Pilipai neni lemenemen matmatkun at lenep Masadonia. At lavatpas sepsev agepura at ne Pol neni gat pas uto Pilipai la mo go neni ga vavang mi Lagale Lavavang tinedi, la lusus ren lentaba luvuttadi diga nuunu.

Lengkot silok keneng at na lovoang.

- 1:1-11 Pol ga vaase momo ri limixin.
 - 1:12-30 Levenmumuat ne Pol ga ekip tangarang min.
 - 2:1-30 Limixin dina suma levenmumuat mi loklok mumulus.
 - 3:1-21 Pol ga vaase aronga di mumu lavaeme loklox ase xaxarang.
 - 4:1-20 Pol ga tong avukat tinedi ri laramtaba atdi.
 - 4:21-23 Pol ga lox axap levelinga ren.
-

Lavapaase Axasep

1 ¹Nenia ne Pol. Nema' mi ne Timoti, luasaxaruki at ne Iesu Karisito. Ma sok na lovoang tinemi limixin at ne Moroa mi nemen keneng at lemenemen silok Pilipai, la ti luvuttadi amgomgo bok at lotu la luvuttadi loklok tooro, mo miga siam kaka ne Iesu Karisito xeneng at lorooro atnimi.

²Letaba nabalamu la lenmila rinemi boro at ne Moroa ne Temen nedik la ne Iesu Karisito, Leeme Silok atdik.

Lisingising At Ne Pol

³Nenia a tong avukat ti ne Moroa ap mo levenaleng axap do nenia a doxoma su atnimi. ⁴La at levesingising axap tarak tinemi axap, a ngising mi lomomo, ⁵mila miga lok tooro ia mi lugugu at Lagale Lavavang ga ru ka i at laaleng nia aga vaxaru xat ka lugugu dom kantubu atnimi la ise ningina. ⁶Kuren la aklen tinotno i do ne Moroa, ni ga vaxaru ka i na lugugu nunuan keneng atnimi, neni naba lox epovo na lugugu nunuan keneng at lorooro atnimi at na levenaleng la naba se at laxavaxap at lugugu atdik at laaleng ete at ne Iesu Karisito.

⁷Am doma su amisik atnimi mi lomomo. La at lusumsuma rak ik mokso do ana doma mumu nemi. Nemi miga gugu eburu minia ap mo lugugu ne Moroa ga raba ia min la ni ga raba nimi mi lolos kusu minap kiv i, i se nga na nenia ak lok at loxokoxo, la ap mo bok levenaleng nenia agat pas tangtagap kusu ana lox asuusu i do Lagale Lavavang i return, la kusu ana lok limixin nuunu kusu dina ru lolos teen. ⁸La ne Moroa aklen i do nom nabalamu rak saparap nimi, i laa at labalamu at ne Iesu Karisito.

⁹Lisingising tarak saparap ne Moroa i lok keretna. Nenia a ngising do labalamu atnimi na sisilok, eburu mi lakleklen tuturun, la lodoxoma nunuan, ¹⁰kusu miba epovo do mina soxolik ka lempanga sala i nunuan la kerepmo lorooro axap atnimi naba dadat, la kopmen teveloklok kakapmek noxo nemen teren se at laaleng ete at ne Karisito; ¹¹la lorooro atnimi nabak mokso xusu minaba visik asu levempipisik nunuan, ne Iesu Karisito naba lox asuusu i at lorooro atnimi; kerepmo lisisixam eburu mi leemi asu nabat pas ti ne Moroa.

Pol Ga Nemen At Loxokoxo

¹²Luvutnetak mi luvurinuk. A vara i xusu minaklen nunuan i do mo levesongsongot gat pot saparav ia, ga lok tooro aleng tinotno lusus at Lagale Lavavang. ¹³Kuren la mo luvuttadi esep at loorong silok eburu mi luvuttadi di nemen de, diklen i do nia ak lok at loxokoxo mila nenia lasaxaruki at ne Karisito. ¹⁴Mo lemenemen tarak nade xeneng at loxokoxo i lox alolos bok buaang nedo limixin nuunu kusu dina vavang abelemes mi levelinga at ne Moroa la kopmen Tamara atdi.

¹⁵I raturun leventaba di vavang mi ne Karisito kusu ri lox asilok levenasen atdi, di umsu mi loklok ti ngaongao ri lempanga at lentaba vetpes la loklok tik lox asilok di; ketla leventaba di vavang mi luruvtuvuk atdi i nunuan. ¹⁶Di lox i mi labalamu, atla diklen i do ne Moroa ga raba ia mi lugugu ri vaase pe Lagale Lavavang. ¹⁷Nedi nom luvuttadi di paase asu ne Karisito, di vara i do dina lox asilok levenasen atdi. Di doxoma i do dina lox aurut gamasa levesongsongot mavana rak atla nia a nemen at loxokoxo. ¹⁸Nia xopmen ana doxoma solo i nom. A momo mun dola

at leventaangas axap dina vavang mi ne Karisito; keke i do lavavara atdi xopmen nak mokso.

¹⁹La a lok momo bok mila aklen i do at levesingising atnimi la loklok tooro at Loroonan Kaala at ne Iesu Karisito, dinaba soxomus asu ia basinge na loogu xokoxo. ²⁰Lavavara axap at labalak do nenia a noxo subu basinge lugugu rak la ana lok mamangan, ketla at levenaleng axap nia anoxo marat tangarang kaka teta xusu limixin dinaba ven kisip ne Karisito keneng at lorooro rak do nenia move ana rooro xopla at loxonaleng do nenia ara met pam. ²¹Lavanga salai lorooro? Tia ne Karisito mun. Do nia ana met, naba lox avukat aleng. ²²Dola lorooro rak nak lox abao, nenia ba lok tevengugu nunuan. Kerepmo la nia axoklen i dola ua langas nenia aba soxolik ka i. ²³Lodoxoma rak i ekarakat ti legepu nep. A vara aleng i do ana on basinge na lorooro la ana nemen buru mi ne Karisito, no mi lox avukat tinotno. ²⁴Ketla i epovo rinotno bok do nenia aba nemen kusu ri lok tooro nimi. ²⁵Aklen tinotno i la a xasep do aba nemen. Nenia aba nemen eburu minemi axap, ti lox asilok lususu at lunuunu atnimi, la kusu lomomo na silok keneng at lorooro atnimi. ²⁶Kuren la do nia ana nemen buru bok minemi, anaba lok nimi xusu lomomo atnimi naba susu aleng keneng at laasen at ne Iesu Karisito.

²⁷Nemen mita doxoma solo ri lavanga salai mo naba vot saporav ia, ketla luruptuvuk atnemi na epovo mi Lagale Lavavang at ne Karisito. Kuren la do nia ana vot pasa bok nimi kopla a noxo vot, aba ronga ba i do mi tu lolos mi legese belen la legesedoxoma, la mit kis eburu ngan legesara kusu mina esep lolos ti lunuunu mumu Lagale Lavavang. ²⁸Nemen mita marat atnedi di munepen minimi; amisik mina belemes, la nom lurutu lolos atnimi naba lok ngan loklok katling tidi do nedi dinaba seeve la nemi miba ruuna ka lorooro avolo, mo ne Moroa xa naba raba nimi min. ²⁹Moroga ga raba nimi mi lugugu at ne Karisito, kopmen do at lunuunu xusuk ketla minaba ekip tangarang bok mi losongsongot. ³⁰Nedik ta nemen ap mo leesep. Nom mun leesep miga reven ia aga esep teren migomgo, la miga ronga i do nia move a vesep tin at lorooro rak.

Langsangan Loklok Ngangao La Lisisilok At Ne Karisito

2 ¹Lorooro atnimi keneng at ne Karisito i lox alolos nimi la labalamu ren i lox amenemen bok nimi. Nemi mit kis esogo mi Loroonan Kaala la mira ruuna ka vam lebelemumu. ²Kuren la a sing alolos nimi xusu mina lox epampana lomomo rak mi leveloklox avukat keretna; mina ruuna ka legesa doxoma, labalamu ela, mi legese belen. ³Nemen mita doma i do mina lox asilok nimi, ketla mina lox asi nimi maxopok at limixin; amisik mina doxoma mumu nunuan nedi avot la melemu ba nemi, la mina umsu mi langsangan loklok ngangao. ⁴Nemi getgesara nemen gat mita reven mun ti levempanga nemi mi vavara rin, ketla i lox avukat do mina reven bok ti levempanga luvuttadi vetpes di vavara rin.

⁵Levendoxoma atnimi na mumu asu mene lodoxoma at ne Iesu Karisito.

⁶Neni gat pas mi lamakmaran at ne Moroa, ketla neni goxo doma i do mi lololos axa ren la neni naba silok ngan ne Moroa. ⁷Ketla ti na, at lavavara xa ren, ni ga on basinge nom lixitkis silok teren, la ga lok ka lorooro at lasaxaruki. Neni ga vee radi, ⁸la ga vas su ngan laradi ruturun. Neni ga lox axakalix i la gat pas at langas tongtonga res uto epopolo at lanmet teren to at laxaba. ⁹Na mun i lavasuun teren la ne Moroa ga rebeng kaxat kaka i uto vana xa la ga lox asilox i mi laasen i silok axap ti loxonaleng. ¹⁰Kuren la limixin axap dina lok ngangao at laasen at ne Iesu; nedi limixin no vana at laxalibet la nedi bok at na lavatbung menemen la nedi bok diga met pam; nedi axap dinaba xis tiktikbu mi lempatgulom atdi. ¹¹La nedi axap diba tong asu i dola ne Iesu Karisito neni Leeme Silok la kerepmo dina emi asu mi ne Moroa, ne temen dik.

Mina Babao Ngan Laxampenti

¹²Larapen tangas orong tarak. Migang tonga res amisik tarak ap mo levenaleng, nenia aga nemen eburu minemi, la nemi move mirang tonga res bok tarak at na levenaleng nia a nemen paxalom basinge nemi. Kuren la mina gugu lolos kusu lorooro atnimi naba lok nunuan at lemeren ne Moroa, eburu mi loklok ngangao, ¹³mila ne Moroa i gugu amisik keneng at lorooro atnimi ri lok amisik nemi xusu mina vara lodoxoma ren la mina epovo xusu mina mu asu i.

¹⁴At levempanga axap mi lox i, nemen mita gagalinga la mita etep mi levelinga, ¹⁵kusu luruptuvuk atnimi ba nunuan la miba dadat basinge laxakapmek atnimi la nemi minaba lok ngan laxamdak at ne Moroa ap mo levenaleng mi nemen kantubu at limixin kakapmek at na lavatbung menemen, mo di umsu mi laxapmek. Do lorooro atnimi na nemen kuren, minaba babao ngan laxampenti i soosoo axasep bok lamavangkap.

¹⁶Mina nemen avukat at levenaleng mi tong asu levelinga at lorooro rinedi. Dola mina lox i kuren, nenia bok anaba xip aurut nimi at laaleng ete at ne Karisito, mo naba lox asuusu i do lugugu rak la lololos tarak goxo xap gamasa at lugugu ren. ¹⁷Ketla i lox avukat mun do dina sev amer ia, kusu labantuxu rak naba lok ngan laplavang atnimi saparap ne Moroa la na laramtaba naba lox asuusu lunuunu atnimi; mo do kuren a lok momo eburu minimi. ¹⁸La kerepmo bok mina lok momo la mina sosoro eburu minia.

Timoti La Ne Eproditas

¹⁹Dola lavavara at Leeme Silok ne Iesu, a doxoma i do aba riki soso ne Timoti udom saparap nemi, kusu nenia aba rongga tevelinga mumu nemi, kusu naba lox alolos ia. ²⁰Kopmen tara i lok ngan ne Timoti, im

doma amisik lorooro atnimi. ²¹Buaang limixin dik lox angtang axa mi levempanga atdi, ketla kopmen dinam doma solo lugugu at ne Iesu Karisito. ²²La nemi miklen pam i do neni gara lox asuusu vam lugugu avukat teren, atla neni ga gugu eburu minia ri tong asu Lagale Lavavang, kerekngan lamdak i gugu eburu mi ne temen. ²³Kuren la a gagas ti riki soso i udom saparap nemi dola anaklen i do dina lok lavanga salai ria. ²⁴Laa nuunu at Leeme Silok dola nenia xa aba vot soso saparap nemi.

²⁵A doxoma i do i lox avukat bok do ana riki amlong neton dik ne Epaprodaitas udom saparap nemi; neni ga gugu la ga esep at lenep tarak, la ni ga lok ngan lasaxaruki atnemi atla neni gap kip leveloklok tooro atnemi ria. ²⁶Neni i vara aleng i do na ven nemi axap ketla i lok bukbulu atla miga ronga i do neni ga meres. ²⁷I ruturun neni ga meres la ma lixilik ga lok do na met. Ketla ne Moroa ga balamu i, kopmen do neni xusuk, Moroa ga balamu box ia la ga lox asepsu ia basinge lainbulu silok atla ni ga lox aroo ne Epaprodaitas. Kuren la nenia agoxo suma manga lainbulu silok. ²⁸La a vara rino i do ana riki i saparap nemi, kusu nemi ba lok momo dola mina ven tu ren. Kuren la lodoxoma rak naba xis aulis. ²⁹Mina seega rangarang i mi lomomo silok ngan neton nemi at Leeme Silok; mina lok ngangao at luvuttadi ngan i, ³⁰mila neni ga raba lorooro ren la ma lixilik gita met mumu lugugu at ne Karisito, kusu ri lok tooro ia mi mo lugugu nemi xa xopmen mi goxo epovo na lox i.

Laradi Mokmokso Ruturun

3 ¹Luvutnetak mi luvurinuk. Ti lox axap levelinga rak; mina momo at Leeme Silok. I lox avukat mene do nia ana sox amu bok mo levelinga nia aga malagan pam min tinimi, mo ba lok tooro nemi xusu mi noxo subu.

²Mina lok tatao avukat nemi atnedi di lok leveloklok kakapmek; di pu soso limixin kusu dina vit kepe levengkontuxu atnedi. Loklok atnedi i lok ngan lubungman. ³Nedik na digara ruuna ka vam loklok katling tuturun at ne Moroa la nedik di lotu saparap ne Moroa keneng at Loroonan Kaala la nedik di momo xeneng at lixitkis atdik eburu mi ne Iesu Karisito. Nedik kopmen tana nuunu do mo loklok ti rivit kepe lengkontuxu la leveloklok kerepmo at leme Judaia ba lok tooro dik. ⁴Nenia xa a ruuna lempasuun kusu ri nuunu ap mo leveloklok at leme Judaia. Dola tara na doxoma i dola neni i epovo xusu na mu asu mo leveloklok, nenia a epovo rinotno. Lempasuun i lok keretna. ⁵Diga vit kepe loxontuxu rak melemu at lavanuti aleng ne naga ga visix ia; nenia lanat me Israel at libibinat at ne Benjamin, la nia laradi ruturun me Ibru. Nenia ga lok ngan la Parisi, la aga mumu asu Lenavolo me Judaia i ngan la Parisi. ⁶Ganoxa nenia agak lox asongot limixin at lotu, atla nia aga lok do mo loklok nia agak lox i naba lox amomo ne Moroa la mo ga lox asuusu i do lusumsuma rak

ti ne Moroa ga lolos. Nenia aga doma i do laradi nabak mokso mun at lemeren ne Moroa, do neni na mu asu rinotno Lenavolo, kuren la agoxo subu at toxot teren.

⁷Nia aga nua i do na levempanga ba lok tooro ia ro melango at ne Moroa, ketla xopmen; ara ke xepe vam i na la agalok kun i mi ne Karisito. ⁸Kopmen mo levempanga xusuk mun, ketla levempanga axap at lороoro rak i ngan lavanga gamasa la lороoro rak keneng at ne Iesu Karisito, Leeme Silok tarak, ni lavanga i silok aleng tinotno. La mo leveloklok at leme Judaia ara lu xape axap pam min kusu ana mumu asu mene ne Karisito. A doxoma i do mo leveloklok i ngan lavanga kakapmek mun la aga lok kepe i xusu ana ruuna ka ne Karisito, ⁹la anat kis esogo min. Nenia a goxo lok ka lomokmokso at lemeren ne Moroa mumu i do agang tonga res at Lenavolo. Kopmen. Nenia na a nemen mokmokso at lemeren ne Moroa mumu lunuunu rak keneng at ne Karisito. La ne Moroa axa ga lok li ia xusu ana sepmus basinge loklok kakapmek. ¹⁰A vara i xusu anaklen ne Karisito la ana lok kaka lololos i ngan mo lololos at laxakatu kaxat amlong teren basinge lanmet, la a vara i do ana vubeles at losongsongot teren kusu anap kiv i la ana lok kepe lороoro xapmek, i ngan ta do ana met basinge i kerekngan ne Karisito ga met basinge na lороoro. ¹¹La nia am doma voovo do anaba roo xat bok basinge lanmet la ana rooro.

Lisiksixit Uto At Laxavaxap At Lороoro

¹²Nenia axo doma i do ara rebeng ka vam mo lороoro la ara ravasu ngan laradi xopmen taxapmek teren. Nenia move a lolos kusu ana rebeng atmatkun ka mo loklok i nunuan, mila ne Iesu Karisito ga un ka ia do tin. ¹³Luvutnetak mi luvurinuk, nia a doxoma ruturun i do nia xovisi ana lox epovo i; ketla legesa vanga mun, a lox i. Nia a doxoma xape mo levempanga ga vot saparav ia gano la nia a lolos kusu ana rebeng kaka mo levempanga ne Karisito i gagas li i ria, mo naba vot melemu. ¹⁴Kuren la ak sixit mokmokso ri ruuna ka mo levempanga, mo ne Moroa ga ro ka ia rin keneng at ne Iesu Karisito ri lороoro no vana.

¹⁵Tinedik axap dira mukun pam, lodoxoma atdik naba lok kuren. Ketla do leventaba di ruuna lodoxoma vetpes, Moroa ba lox axasev i ridi. ¹⁶Ketla lavatpas atdik at na lороoro naba epovo mi lороoro maxat miga lok ka vam i.

¹⁷Luvutnetak mi luvurinuk. Nemi axap mina mumu asu lampoovo rak, la mina ven mumu nedi di mumu asu mo levelinga nema maga lox ase nimi min. ¹⁸Agara tong amisik pam i rinemi ganoxa, la na ana tong amu box i mi lainbulu silok, do buaang atnedi diga sok tixirixes kepe levelinga at lanmet at ne Karisito ro vana at laxaba ngan nedi lavamunepen min. ¹⁹Nedi dinabat pas uto at lemenemen songsongot, dim doma

mun levempanga anan la lavavara mun at labantuxu. Di momo mun ti levempanga i raba di mi lainmangan silok, la dim doma mun levempanga at na lavatbung menemen. ²⁰Ketla nedik lavaanat boro vana at laxalibet, la di ngangais mi lomomo ti Laradi Loklox Arooro, Leeme Silok ne Iesu Karisito, naba si boro vana at laxalibet. ²¹Neni naba lox asuusu lololos silok teren kusu levempanga axap naba mu asu mun lavavara ren la neni naba lox ekun labantuxu gamasa atnedik kusu naba lok ngan labantuxu ren imgames la i lolos.

Levelinga Loklox Axap

4 ¹Luvutnetak mi luvurinuk. Mi rongam vam na levelinga rak; kuren la mina tu atmatkun at lorooro atnimi keneng at Leeme Silok. Larapen tangas orong tarak. A balamu aleng nimi la a sosoro aleng ti tong asuusu nimi ri limixin mila labalak i lok momo aleng mumu nimi.

²Iuodia la ne Sintike, nia a sing lolos numu, xusu muna mulus ti lok ngan leton keneng at Leeme Silok. ³Laa vaase bok tu, lagale laradi; uga gugu nunuan eburu minia. Una lok tooro na lutkin, la una lok lumulum kantubu atdu kusu duba xis eburu, atla gano nedu duga gugu lolos ti tong asu Lagale Lavavang, eburu bok mi ne Klemen, la nedi vetpes bok digara gugu vam eburu minia, nom levenasen atnedi ira nemen pam at lubuk at lorooro at ne Moroa.

⁴Lomomo atnimi keneng at Leeme Silok na nemen amisik. A tong amu box i do mina momo. ⁵Mina lox ase limixin axap mi loklok mulus mo i umsu at lorooro atnimi. Noxo lox abao la Leeme Silok naba vot. ⁶Nemen mita bulu mu tempanga, ketla mina sing ne Moroa ri levempanga axap mik pakes tin, la at lorooro axap atnimi mina tong loklox avukat tin. ⁷La lenmila at ne Moroa i volo lakleklen at luvuttadi, mo lenmila naba xubak pe lorooro axap atnimi xusu mina tu atmatkun keneng at ne Iesu Karisito.

⁸Ti lox axap levelinga rak, luvutnetak mi luvurinuk; mina suxa umsu lodoxoma atnimi mi levempanga nunuan la nom i lox asuusu leemi asu, levempanga mo i ruturun, loklok mokmokso la loklok dadat, la loklok ti balamu, la loklok ti lok ngangao at leventaba vetpes. ⁹Mina lok mo levempanga nia aga lox ase vam nimi min la miga lok ka box i rak, at levempapaase la at loklok la at lugugu bok tarak. La ne Moroa nom im taba dik mi lenmila naba nemen eburu minimi.

Pol Ga Tong Avukat Ti Laramtaba

¹⁰Nia a lok momo aleng keneng at lorooro rak eburu mi Leeme Silok mumu mo laramtaba miga raba ia min. Gano loklok tooro atnimi ria ga xap ketla miga lok kaxat manga i. Aklen i do labalamu atnimi saparav ia goxo xap, ketla mi goxo lok epovo mene i, atla goxopmen tangas tinimi.

¹¹Nenia a tong i na, kopmen do nia anak pakes ti tevempanga; ketla nia a lok momo mun ti levempanga salai nia aruuna i. Mo do i buaang koplaxixo buaang, i lox avukat mun. ¹²At leventaba levenaleng agak pakes la at leventaba levenaleng aga ruuna epovo. A xasep eburu at na luxonaleng. Nenia axo doxoma solo i do a nemen at lavakpakes koplaxa ruuna laxampanga solo. Keke i do a roxo xopla a an mais, ketla nia a lok momo mun at levenaleng axap. ¹³Nenia a epovo xusu ana lok levempanga axap mi lololos mun, ne Karisito im taba ia min.

¹⁴Ketla i lox avukat do miga lok tooro ia ap mo levenaleng mumuat ga vot saporav ia. ¹⁵Nemi limixin boro Pilipai miklen avukar i dola nia aga on basinge lenep silok Masadonia ap mo levenaleng nia aga vavang avot mi Lagale Lavavang, la kopmen teventaba vetpes di goxo lok tooro ia, nemi xusuk migam taba ia. ¹⁶Ap mo levenaleng nenia aga nemen pakpakes to Tesalonia, la miga lox aonon leveloklok tooro ria, kopmen at teges aleng mun, ketla amisik migak lox i. ¹⁷At lorooro rak nia axo doma solo ri ruuna ka leventamtaba, ketla a vara i do ana ven bok tuunun tinimi mavana ap mo luunun mo i ngangais nimi ro vana. ¹⁸Nia ara lok ka vam leventamtaba atnimi, no ne Epaprodaitas gap kiv i ria ude boro atnimi, la i volo mo levempanga agak pakes tin. Na leventamtaba i lok ngan leventamtaba somavak limixin di xotos i ri ne Moroa, la ni i sisiam kaka i la i sosoro rin. ¹⁹Moróa rak naba raba nemi mi levempanga axap mik pakes tin, i epovo mi langangan lapnovos keneng at ne Iesu Karisito.

²⁰Leemi asu amisik ti ne Moróa ne Temen dik la kopmen taxavaxap teren. I ruturun.

Lavapaase Momo

²¹Nia a lox aonon lavapaase momo rinemi limixin axap mi nuunu at ne Iesu Karisito. Luvutnetak mi luvurinuk, dik lok eburu minia de, di lox aonon bok lavapaase momo atnedi rinemi. ²²Nedi axap limixin at ne Moróa nade, di lox aonon lavapaase momo rinemi. Nedi rinotno limixin gugu at loogu at ne Kaisar di lox aonon lavapaase momo rinimi. I ruturun.

²³Letaba nabalamu at Leeme Silok ne Iesu Karisito na nemen eburu mi lorooro atnemi. I ruturun.

Kolosi

Lovoang At Ne Pol Ti Limixin Nunu To Kolosi

Levelinga Loklox Axasep

Lamaares 62 A.D.

Pol gak lok at loxokoxo to Rom, la neni ga malagan i na lovoang la ga raba ne Tikikas mi ne Onesimas min la duga lok ka i la duga raba limixin at lotu min to Kolosi. Lavasuun at na lovoang i lok keretna. Ne Pol gak lok at loxokoxo mumu Lagale Lavavang la ne Epapras gat pas parav i la ga tong i rin do lentaba luvuttadi mo diga tong levelinga xaxarang at lotu tinedi limixin nuunu to Kolosi. Mo levelinga xaxarang atdi ga lok keretna. Lentaba lubungangelo mo nedik ata lotu parap di. Lara ne Iesu mo ik lok petpes, la neni xopmen na lok ngan ne Moroa, ketla i lok ngan lubungangelo. Pol ga ronga i na la neni ga malagan i na la ga lox aonon i xusu ri lok asuusu laxaxarang ap mo leveloklox ase xaxarang.

Lengkot silok keneng at na lovoang:

- 1:1-2 Lavapaase momo at ne Pol.
- 1:2-14 Pol ga emi asu aleng mi limixin boro Kolosi.
- 1:15-23 Lempapaase mumu lisisilok at ne Iesu Karisito.
- 1:24-2:5 Lempapaase mumu leven gugu at ne Pol.
- 2:6-3:4 Limixin me Kolosi dina sok tixirixes levenanasa xaxarang.
- 3:5-4:1 Leventaangas nunuan ti limixin nuunu.
- 4:2-18 Lempapaase loklox alolos mi lavapaase abeese ren.

Lavapaase Axasep

1 ¹Nenia ne Pol, laradi vavang at ne Iesu Karisito, Moroa ga soxolik ka ia xuren, la ne Timoti bok, neton dik.

²Nema' ma malagan na lovoang tinemi limixin nuunu do Kolosi. Nemi limixin at ne Moroa la mi nuunu ruturun at ne Karisito.

Letaba nabalamu la lenmila tinemi boro at ne Moroa ne Temen dik.

Lisingising Ti Tong Loklox Avukat

³At levesingising atnama' ma tong loklox avukat amisik ti ne Moroa, ne Temen Leeme Silok atdik ne Iesu Karisito, ⁴mila maga ronga i do lunuunu atnimi saparap ne Iesu Karisito i tu tuxuruxun, la lorooro atnimi i umsu mi labalamu saparap limixin nuunu. ⁵Na lunuunu la labalamu atnimi i nemen lolos at lorooro atnimi, mila mi ngangais mi lomomo ri mo leveloklox anarong i nemen tangais nimi ro vana at laxalibet; mo leveloklox anarong miga ronga vam i ap mo levenaleng diga vavang mi levelinga ruturun tinimi, mo levelinga ni Lagale Lavavang. ⁶Na Lagale Lavavang i ruuna laxampipisik solo la i sat kaka limixin at na lavatbung menemen axap kusu dina nuunu at ne Iesu Karisito la dina lok leveloklok i nunuan. La kerepmo bok Lagale Lavavang i pisik kantubu atnimi, ga ru ka i ap mo laaleng miga ronga i la miga ven kibis letaba nabalamu at ne Moroa, mo letaba nabalamu i ruturun tinotno. ⁷Eprapas ga anasa nimi mi nom letaba nabalamu; neni lagale laradi i gugu eburu minema' la ni laradi ruturun i lok lugugu at ne Karisito ti lok tooro nimi. ⁸Neni ga tong i rinama' do lorooro atnimi i umsu mi labalamu, Loroonan Kaala ga suxa aumsu nimi min.

⁹Maga ronga i nom, kuren la kopmen mana xap mi lisingising tinimi. Ma sing ne Moroa, kusu na suxa aumsu nimi mi lakleklen at lavavara ren, la kerepmo miba ruuna ka lodoxoma avukat keneng at lorooro atnimi, mo lodoxoma i ravasu boro at Loroonan Kaala. ¹⁰Ma lok levesingising keretnom kusu lorooro atnimi ba epovo mi lavavara at Leeme Silok la kusu mina lok lempanga naba lox amomo i. Nom lempanga i lok keretna, lorooro atnimi naba pisik asu leveloklok nunuan solo, la nemi minaba lok kaka lakleklen at ne Moroa, ¹¹la miba ruuna ka lololos, mo i laa boro vana at lololos silok at ne Moroa kusu miba tu tuxuruxun at lunuunu atnimi la mi noxo subu kot kantubu; la miba umsu mi lomomo, ¹²la miba tong loklox avukat ti ne Temen dik, ni ga lok nimi xusu miba epovo rinotno ri ruuna ka loxot atnimi ap mo luunun ni ga lox agagas li vam i ri limixin teren to xeneng at Linintoo i umsu mi laxasep. ¹³Neni naba raba nimi mi nom, mila ni ga lox arooro dik basinge lamain lolos at ne Satan, la neni ga lox arooro dik kusu tana vubeles at Linintoo at ne Nitna, mo ne Moroa i balamu i. ¹⁴Keneng at ne Iesu, Moroa ga un ka amlong dik, la ni ga doxoma xape bok leveloklok kakapmek atdik.

Iesu Neni Lamgomgo

¹⁵Karisito neni lampoovo at ne Moroa nedik kopmen tana reven tu ren. Neni lanat meren avot, la i silok tinedi levempanga ne Moroa ga rudum li

di. ¹⁶Moroa ga rudum li levempanga xeneng at lolos at lekngen ne Nitna; levempanga axap to vana at laxalibet la de xopok at lavatbung menemen, lempanga dik ta reven di la lempanga dik dixo epovo ta reven di. Ni ga rudum li bok leventoonan eburu mi lubungangelo, la luvuttadi amgomgo atdi la limixin lolos kerepmo dik lok to vana. Moroa ga rudum li nom lempanga axap keneng at lololos at lekngen ne Nitna kusu dina lox aurut laasen at ne Nitna. ¹⁷Karisito ga rooro avot ti nom lempanga axap, la neni lusu auru atdi. ¹⁸Neni lamgomgo at lotu ren kerekngan lavatlak at laradi, ni lamgomgo at labantuxu ren. Neni lavasuun at lorooro maxat, la neni lara avot ga roo xat amlong basinge lanmet. Ni ga lox i xuren kusu neni xusuk naba ruuna ka lixitkis silok ti levempanga axap. ¹⁹At lodoxoma axa at ne Moroa do ne Nitna, naba venaxa ka ren, ²⁰la at lodoxoma bok at ne Moroa do, ne Nitna naba lok lumulum kantubu at ne Moroa la limixin axap, nedi limixin mede xopok at na lavatbung menemen la nedi limixin to vana at laxalibet. Karisito ga lok lumulum mi lada ren, mo ga sen su ro vana at laxaba.

²¹Gano migomgo miga nemen paxalom basinge ne Moroa, leveloklok atnimi la lodoxoma atnimi ga lok kapmek la kerepmo migak lok ngan limixin munepen teren. ²²Ketla mo nga, Moroa ga lok lumulum tinimi mumu mun lanmet at labantuxu at lamdak teren, kusu lorooro atnimi ba dadat axap ap mo laaleng miba tu saxaven to melamgo ren, la taxakapmek noxok lok bok ba atnimi la tara noxo lok li bok ba nimi at lavapaase mumu loklok kakapmek. ²³Naba lok kuren mo do mina tu tuxuruxun at lunuunu atnimi la kopmen tara na sat kaka nimi basinge lunuunu atnimi saparap Lagale Lavavang. At nom mun Lagale Lavavang la nia ne Pol a tong asu i ngan lasaxaruki at ne Moroa, la na Lagale Lavavang mo di vavang min ti limixin axap at na lavatbung menemen, ni levelinga nemi miga ronga i.

Lugugu At Ne Pol At Lotu

²⁴La na nga nia a lok momo mumu levesongsongot tarak nia ap kiv i ti lok tooro nimi; la kerepmo a lox epovo levesongsongot no ne Moroa ga lok katling i ria kusu na lok tooro limixin at lotu min, mo i lok ngan labantuxu at ne Karisito. ²⁵La aga lok ka na lugugu ngan lasaxaruki ti limixin at lotu; la ne Moroa axa ga soxolik ka ia rin kusu ana paase asu levelinga at ne Moroa rinimi, la a noxo ke xepe toxot teren. ²⁶Moroa ga lox alipe mo levelinga basinge lavaola axap diga nemen gano, ketla melemu ga lox asuvos i ri limixin teren. ²⁷Moroa ga soxovo li i do na lox asuvos Lagale Lavavang ti limixin teren; mo levelinga i lok ngan lapnovos silok la i lox asuusu lisisixam at ne Moroa. Mo levelinga i lok keretna, Karisito nabat kis esogo eburu mi limixin kopmen di me Judaia la nedi bok diba ruuna ka loxot at lisisixam teren.

²⁸Nema ma vavang mi ne Karisito ri limixin; ma vaase aronga di la ma anasa di mi lakleklen at ne Moroa kusu nedi axap diba ruuna ka luruptuvuk mokmokso kerekngan ne Karisito la kopmen taxakapmek atdi. La diba nemen kuren se ap mo laaleng diba tu ro melamgo at ne Moroa. ²⁹Ti lox empana na lugugu, nenia a gugu lolos, mi nom lololos ne Karisito i vetaba min tia la i gugu keneng tarak.

2 ¹Ana tong axasep nimi do nia a gugu lolos ti lok tooro nimi eburu mi limixin nuunu boro Lodisia eburu minedi bok kovisi dina epen etang minia. ²Lavavara rak i lok keretna, lorooro atdi na lolos la diba ru buru mi labalamu ela kusu lorooro atdi ba umsu mi laxasep silok, mo i lok ngan lapnovos silok tidi. Ap mo mun langas nedi dibaklen lodomdoma lipe at ne Moroa, la mo lodomdoma lipe neni ne Karisito. ³Neni mun lengki ti suang mo lodomdoma lipe, kusu limixin diba epovo dinaklen ka mo lodoxoma la lakleklen silok at ne Moroa. ⁴A malagan na levelinga rinimi, kusu tara noxo xarang arup nimi mi tevelinga xaxarang, keke i do i reng nunuan mene nga. ⁵Nia a tong i na rinimi mila nenia xopmen anak lox eburu minimi, ketla a nemen eburu minemi keneng at lodoxoma rak, la a momo do mi tu buru la mi tu tuxuruxun at lunuunu atnimi keneng at ne Karisito.

Keke Mo Leventaangas Linga Kopmen Boro At Ne Moroa

⁶Nemi miga siam kaka ne Iesu Karisito ngan Leeme Silok atnimi, kuren la minat kis esogo eburu min. ⁷Minam tebeng lolos teren la lunuunu atnimi na tu tuxuruxun teren kerekngan mo diga lox ase nimi min kuren. La mina umsu mi loklok ti tong loklox avukat ti ne Moroa.

⁸Mina lok tatao avukat nimi kusu teta noxo lox asoogong nimi mi leventetere xaxarang, kopmen tavaasuun teren; mo lakleklen i laa boro at leveloklox ase at limixin mun la boro bok at leveloklok mede xopok at na lavatkangka, kopmen boro at ne Karisito.

⁹Lampenaxa at ne at Karisito i lok ngan mun ne Moroa; neni ga lox asuusu nom leveloklok de xopok at na lavatbung menemen ngan laradi. ¹⁰La nemi bok miga lok ka vam nom leveloklok at ne Karisito, neni lamgomgo ri lubang angelo eburu mi limixin lolos atdi. ¹¹Nemi miga lok ka loklok katling at ne Karisito, kopmen mo loklok katling ua limixin di rivit kepe lengkontuxu at laxamdak lixilik atdi, ketla mo loklok katling at ne Karisito i ngan mira lok kepe vam lorooro maut mumu mun lugugu at ne Karisito. ¹²Se nemi miga lok ka lesepe susu, i lok ngan ta do miga vutup at lamaaut eburu mi ne Karisito la ap mo lesepe susu bok nemi miga xatu kaxat amlong eburu mi ne Karisito keneng at lunuunu atnimi la lololos at ne Moroa, mo ga lox aroo xat ne Karisito basinge lanmet.

¹³Ganoxa leventoonan atnimi ga met, atla migak lok leveloklok kakapmek la mi goxovisi lok kepe lorooro maut, ketla ne Moroa ga

sar asu nemi ri lorooro eburu mi ne Karisito. Moroa ga doxoma xepe leveloklok kakapmek axap atdik. ¹⁴Neni ga lok kepe vam mo lovoang lolos eburu mi leventaangas linga ren mo ga paase axasep laxakapmek atdik; mo lovoang ga lok ngan lavanga loklok pe kantubu atnedik mi ne Moroa. Moroa ga lok kepe i at loxonaleng ne Jesu ga uu ro vana at laxaba. ¹⁵La ne Moroa ga volo kepe laxalolos at laxantoonan kapmek la laxanamgomgo xaxarang keneng at lanmet at ne Karisito to at laxaba; neni ga lox asuusu i do dinaba lok kaka lainmangan silok.

Nemen Mita Mumu Asu Leventaangas Gamasa At Na Lavatkangka

¹⁶Kuren la ixok mokso do tara na ila mumu loklok atnimi mumu mo leveluxa mi anan i la levengkadan mi inin i; kopla mumu larapeluxa at ne Moroa kopla mumu larapeluxa loklok katling ti lagaaling i vot maxat kopla ti laaleng kaala. ¹⁷Nom lempanga axap i ngan lamamau mun at lempanga mo ba vot melemu; ketla ne Karisito ni luruturun teren. ¹⁸Ixok mokso do tara na tong i rinimi do mixo epovo kusu mina lok kaka leveloklox anarong at ne Moroa. Laradi xerepmo i lok poovo i do i lox asi aleng lorooro ren; i nua i do i ruuna laasen silok mila i lotu saparap lubungangelo la mumu bok levesilimet teren, ketla i ruuna loklok papavas la i mumu asu mene lodoxoma kopmen tavasuun teren boro at na lavatkangka. ¹⁹La ira xap tim tebeng lolos ne Karisito, neni lavatlak at labantuxu. Karisito xa neni imgomgo nga na labantuxu, la labantuxu im tem saga mun at lavatlak, la mo do labantuxu na repes boro at lavatlak, neni ixo epovo rinotno na su maraanu.

²⁰I lok ngan ta do nemi miga met eburu mi ne Karisito la miga sepmus basinge mo leventaangas at na lavatkangka. Tila ba nemi mi mumu asu i nom kerekngan limixin mede xopok? Mi mumu asu na levelinga keretna, ²¹“Nemen mita long tu at na. Nemen mita dem pinga i na. Nemen mita rebeng ka i na.” ²²Na levenngas linga i tu katling levempanga gamasa mun la naba xap gamasa mene mila kopmen na laa boro at ne Moroa; nedi boro at lodoxoma at limixin mun. ²³Di ven tai mo leventaangas do i ruturun mila nedi di mumu asu i, di lotu amisik, la dik lok poovo i do di lox asi aleng lorooro atdi la dik lox asi aleng labantuxu atdi;^a ketla mo leventaangas kopmen na lok tooro di kusu dina ke xepe leveloklok kakapmek at labantuxu.

Leventaangas Ti Lorooro Nunuan

3 ¹Nemi miga lok kaka lorooro maxat, i lok ngan ta do miga roo xat amlong basinge lanmet eburu mi ne Karisito. Kuren la mina lok li

^a 2:23 Anai ni lotu xaxarang la diga lox i na lempanga ri lok poovo i do nedi mo luvuttadi nuunu ruturun.

lorooro atnimi at lempanga boro vana at laxalibet, no ne Karisito it kis ap mo loxot kitkis avolo teren saparap lekngen tino at ne Moroa. ²Mina lok li alolos lodoxoma atnemi ap mo lempanga la mina ke nom leveloklok mede xopok at lavatkangka. ³Mila lorooro maut atnimi gara met pam, la lorooro maxat atnemi i nemen avukat mi ne Karisito saparap ne Moroa. ⁴Karisito, ni lavasuun at lorooro ruturun atnemi, la do neni naba ru asuvos, kerepmo nemi bok miba ru asuvos eburu min la minaba ruuna ka lagale lisisinang teren.

⁵Kuren la mina lok kepe leveloklok kakapmek i nemen atnemi, kerekngan loklok kakapmek maxamang at lixitkis epot, loklok kakapmek at labantuxu, lodoxoma liplivi tik lok laxakapmek, lavavara rik lok laxakapmek, la loklok ti belegaa, mo i lok ngan nom loklok ti lotu parap levempoovo moroa. ⁶Na leveloklok naba lox asuusu lebelemamao at ne Moroa mo naba vot. ⁷Gano lorooro atnimi ga umsu mi nom lempanga, la migak lox amisix i. ⁸Ketla mo nga nemi mina lu xepe mi na leveloklox axap; lumukmusak, lebelemamao, lodoxoma xapmek, loklok ti lox asi tara mi levelinga, la lavapaase xapmek. ⁹Nemen mita ekarang ela kantubu atnimi, mila nemi miga lok kepe vam mo lorooro maut eburu mi leveloklok teren, ¹⁰la miga sang ka lorooro maxat, mo ne Moroa ik lox amaxat amisix i mi lakleklen teren kusu miba lok ngan lampoovo at ne Moroa, lanat tuntudum li. ¹¹La ti lusus ba ren keretna, kopmen bok ba leme Grik dina lok petpes ti leme Judaia, leme Judaia la nedi kopmen me Judaia, limixin etaba, limixin at lamain, limixin saksaxaruki la limixin di nemen gamasa mun; legesa Karisito mun ik lok la i suxuna lorooro atnedi axap.

¹²Nemi lavaanat soksoxolik at ne Moroa la neni i balamu nimi. Kuren la, mina siga ka lebelemumu, labalamu, langsung loklok ngangao, loklox anare la loklox atnaasan. ¹³Mina mulus kaka nedi limixin di vamigis nimi la mina domampe laxakapmek atnedi di lok laxakapmek tinimi. Mina domampe laxakapmek atnedi kerekngan Leeme Silok i doxoma xepe laxakapmek atnemi. ¹⁴La lara lavanga bok mo i silok ti nom levempipisik nunuan at lorooro, ni labalamu; la mina lox aumsu nimi mi labalamu mo naba lox eburu avukat limixin axap.

¹⁵Mina ke limila na suxuna lorooro atnimi, mo limila ne Karisito im taba i; mila ne Moroa ga ro xaka nemi kusu mina nemen keneng at limila ngan legesa bantuxu. La amisik mina tong loklox avukat ti ne Moroa. ¹⁶La mina ke levelinga at ne Karisito na nemen atmatkun keneng at lorooro atnimi. Mina umsu min mo do mina lox ase la mina vaase axasep ela nimi mi lakleklen at ne Moroa. La minak pixan ti ne Moroa mi lengkompixan at ne Devit la lengkompixan at lotu la lengkompixan emi asu; la lorooro atnimi na umsu mi loklok ti tong avukat saparap ne Moroa. ¹⁷Levempanga axap mi lox i la mi vaase i, mina lox i at laasen at

Leeme Silok ne Iesu, la mina tong loklox avukat ti ne Moroa, ne Temen nedik mumu leveloklox anarong at ne Karisito.

Loklok At Lixitkis Koetemen

¹⁸Nemi lavakin. Minang tonga res at lavatlok atnimi mila na loklok, ni loklok at lavakin di nuunu at Leeme Silok.

¹⁹Nemi lavatlok. Mina balamu lavakin atnimi, la nemen mita metlaat tidi.

²⁰Nemi laxamdak mi laxaalik. At lorooro axap atnemi, minang tonga res at luvuttemen nimi mi luvutnen nimi. Do mina lox i xuren, nom loklok naba lox amomo Leeme Silok.

²¹Nemi luvuttemen laxamdak mi laxaalik. Nemen gat mita lox abulu laxamdak mi laxaalik atnimi; lavanga dina lok tuntun aleng.

²²Nemi lavasaxaruki. Minang tonga res at luvuttadi amgomgo atnemi at levempanga axap; kopmen do ap mo mene nga loxonaleng di reven tata nemi kusu mi vara i do dinaba ven lenget luruptuvuk nunuan atnimi; ketla mina lok lugugu atnimi mi lomomo at lebelen nimi la loklok ngangao saparap Leeme Silok.

²³Mo do lavanga salai mi lox i, mina gugu ren mi lorooro axap atnimi, kerekngan tai do mi gugu at Leeme Silok la kopmen ti laradi mun at na lavatbung menemen.

²⁴Mina xasep do Leeme Silok naba raba nimi mi laramtaba, i ngan luunun tinimi, mila nemi mi gugu ri ne Karisito, neni Leeme Silok atnimi. ²⁵La limixin bilinga axap naba lok ka luunun naba epovo mi leveloklok kakapmek digak lox i, mila ne Moroa i viila limixin axap mi legesampoovo mene nga.

4 ¹Lavaeme amgomgo, minak lok tatao nunuan lavasaxaruki atnimi la loklok nemi minak lox i rinedi na lox avukat. Mina lox i xuren mila nemi bok mi ruuna Leeme Silok no vana at lalalibet.

Mina Ngising Amisik

²Mina ngising amisik, la levesingising atnimi na ruturun mene nga, la mina tong loklox avukat ti ne Moroa. ³La mina ngising bok tinema' kusu ne Moroa naba suang lumusaragu nade rinama' ti paase asu Lagale Lavavang mumu ne Karisito, gano mo Lagale Lavavang ga nemen alipe. La nenia a nemen at loxokoxo mumu mun i mo Lagale Lavavang. ⁴Mina ngising ne Moroa do nia ana valas axasep nunuan levelinga ren kusu limixin diba xasep teren, la levelinga at ne Moroa ba xasep kerekngan ne Moroa i vara i. ⁵Mina ruuna ka loklok nunuan at lorooro atnimi rip tuvuk avukat saparap nedi nom kopmen dina nuunu; la mina gagas at levenaleng axap ti tong asu Lagale Lavavang tidi. ⁶Levempapaase atnimi nap tavasu nunuan amisik kusu rik lox amomo limixin, la mina gagas do miba vorang avukat limixin mi levelinga at ne Moroa.

Levelinga Xavaxap

⁷Netak orong ne Tikikas, ni laradi i ruturun at lugugu ren la lasaxaruki eburu minema at lugugu at Leeme Silok, la neni naba raba nemi mi

lavapaase axasep mumu ia. ⁸La nenia aga lox aonon i udom saparap nemi, kusu ri lok kaxat lomomo atnemi la na tong i do nema mo map tuvuk kereva. ⁹Neni ba emu eburu bok mi ne Onesimas, neni laradi ruturun la netak orong; neni at libinam tadi atnemi. Nedu duba tong asu lempanga salai mo it pot nade.

¹⁰Aristakas, mo i nemen eburu minia at loxokoxo, i lox aonon bok lavapaase momo ren; la ne Mak, lovopno at ne Banabas bok kuren. Nemi migara lok ka vam lavapaase axasep ti siam abeles ne Mak dola ni na mu langas uto atnemi. ¹¹Josua, laasen bok teren ne Jastas, i lox aonon bok lavapaase momo rinimi. Nedi na lavantun mene boro Judaia kantubu atnedi di gugu eburu minia rik lok ka limixin uto at Linintoo at ne Moroa, la dik lox amenemen ia. ¹²Lavapaase momo rinimi boro at ne Epapras, lara at libinam tadi atnemi; neni lasaxaruki at ne Iesu Karisito. Neni i ngising lolos amisik tinemi, i ngising amisik ne Moroa ri lox alolos nemi kusu miba tu tuxuruxun keneng at lunuunu atnemi kerekngan limixin mukun la miba xasep aleng at lodoxoma at ne Moroa. ¹³Na nenia a tong asu langsung lugugu ren tinimi la ti limixin bok to Lodisia la to Irapolis. ¹⁴Lentangas orong atdik ne Luk, leeme loklok tatao anmeres, nedu mi ne Demas du lox aonon lavapaase momo rinemi. ¹⁵Mina lox aonon lavapaase momo rak ti luvutneton dik mo di nemen to Lodisia la ti mo latkin ne Nimpas, la tinedi limixin lotu mo dit pot etang amisik to at loogu ren.

¹⁶Melemu do mina us axap na levelinga i nemen keneng at na lovoang, mina xasep bok do miba us box i ro xeneng at loogu lotu to Lodisia. La miba us bok mo lovoang, luvutneton dik me Lodisia diba raba nimi min.

¹⁷La mina vaase bok ti ne Akipas keretna, “Una lolos kusu una lox epovo mo lugugu Leeme Silok ga raba u min.”

¹⁸A malagan i na lavapaase momo mi lakngak akmokso. Lavapaase momo rinimi boro at ne Pol. Nemen mita domampe i do nenia ak lok de at loxokoxo.^b

Mo letaba nabalamu at ne Moroa na nemen amisik eburu minemi. I ruturun.

^b 4:18 Pol ga sok mene lavapaase momo, la lara vetpes ga malagan levelinga ne Pol ga vaase min.

1 Tesalonia

Lovoang Avot At Ne Pol Ti Limixin Nunu To Tesalonia

Levelinga Loklox Axasep

Lamaares 52 A.D.

Ise ne Pol gak lok to Korin neni ga malagan i na lovoang avot tinedi limixin nuunu to Tesalonia. Tesalonia neni langsung lemenemen silok at lenep Masadonia. At lavatpas sepsev agepura at ne Pol neni ga vavang tinedi limixin mi Lagale Lavavang mo go Tesalonia, la ni lavavang avot teren ti mo lemenemen. Keneng mun at nai lavavang teren la lentaba luvuttadi diga ravasu ngan luvuttadi nuunu (Leven Gugu 17:1-14). Lentaba atdi na luvuttadi nuunu nedi me Judaia, ketla buaang atnedi na luvuttadi diga nuunu, nedi kopmen di me Judaia. La tinedi na luvuttadi me Judaia, lentaba atdi diga nuunu la diga on basinge lotu at leme Judaia, kuren la luvuttadi amgomgo at limixin me Judaia diga reven peves atdi la diga xala aonon ne Pol eburu mi larapentangas teren, la digat pas uto Beria. Melemu at nai ne Pol ga riki aonon ne Timoti la ni gat pas uto Tesalonia. Se neni gamlong, neni ga tong asu levelinga avukat mumu nedi.

Lengkot silok keneng at na lovoang:

- 1:1 Lavapaase momo at ne Pol.
- 1:2-10 Pol ga tong aorong ti ne Moroa.
- 2:13-3:13 Levelinga mumu lorooro at ne Pol kantubu atnedi.
- 4:1-12 Leventaangas ua i lox avukat ti limixin nuunu.
- 4:13-5:11 Levenanasa mumu lomlong sepsev agepura at ne Iesu.
- 5:12-28 Lempapaase loklox alolos.

Lavapaase Axasep

1 ¹Nenia ne Pol. Nema mi ne Sailas la ne Timoti, ma malagan na lovoang tinemi limixin nuunu dom Tesalonia. Nemi limixin at ne Moroa, ne Temen dik la Leeme Silok, ne Iesu Karisito.

Letaba nabalamu la lenmila rinemi boro at ne Moroa.

Lorooro La Lunuunu At Limixin Boro Tesalonia

²Ma tong avukat amisik ti ne Moroa mila nemi mi tu lolos at lunuunu atnimi. La ma ngising amisik tinemi at levesingising atnama. ³Mam doma su amisik atnimi at lemeren ne Moroa mumu leven gugu nunuan miga lox i, mila mi nuunu at ne Iesu Karisito, la mi balamu box i. La mi tu lolos mila mim doma voovo ri lovtopot at Leeme Silok, ne Iesu Karisito.

⁴Luvutnetak mi luvurinuk. Moroa i balamu nimi la ma ven kibis i do gano neni ga soxolik ka nimi xusu mina nuunu ren. ⁵Maklen i na mila ap mo levenaleng nema maga tong asu Lagale Lavavang tinimi, goxopmen levelinga mene nga, ketla levelinga ga lolos la maga lok bok levempanga sangsangu mi lololos at Loroonan Kaala; la miga ven i do nema maga nuunu ruturun at Lagale Lavavang. La luruptuvuk atnama ga lox avukat kusu mana lok tooro nimi. ⁶Miga siam kaka Lagale Lavavang mi lomomo. La limixin diga lox asongot nimi, ketla nemi move miga umsu mi lomomo, mo Loroonan Kaala ga raba nimi min, la kerepmo miga mumu asu loklok at Leeme Silok la atnema bok.

⁷La limixin nuunu boro at lunep silok Masadonia la Grik diga rong levelinga ap mo loklok atnimi, la diga mumu asu i. ⁸Buaang limixin ap mo lunep silok la ap mo levennep petpes bok diga rong i do miga nuunu at levelinga at Leeme Silok; kuren la nema ma noxo tong asu bok ba mo levelinga do nemi miga siam kaka vam Lagale Lavavang. ⁹Nedi xa di tong i rinama do miga siam abeles kaka nama mi lomomo, la miga lok kepe laxampoovo moroa la miga lok kaka lunuunu maxat saparap ne Moroa, mo i umsu mi lorooro la neni ne Moroa ruturun. ¹⁰La di tong i do nemi mit kis tangais ne Nitna, mo naba ravasi boro vana at laxalibet. Moroa ga lox arooro amlong ne Iesu basinge lanmet, la ni naba lox arooro bok dik basinge lebelemamao at ne Moroa, mo naba rupot.

Lugugu At Ne Pol To Tesalonia

2 ¹Luvutnetak mi luvurinuk. Nemi mikleklen i do lovtopot atnama ga visik asu levempipisik nunuan. ²Miklen i do maga vavang avot to Pilipai la limixin mego diga lox asongot nama, la diga paase sese kapmek tinama. Melemu magat pas uto at lemenemen atnimi dom Tesalonia, la buaang atnedi diga xopara nama; ketla ne Moroa ga lok

kepe lanmarat basinge nama; la maga tong asu Lagale Lavavang tinimi. ³Se maga vavang tinimi, maga paase mokmokso, la luruptuvuk atnama ga lox avukat aleng la ma goxo xarang nimi. ⁴Ganoxa ne Moroa ga ven i do lorooro atnama ga lox avukat la ga raba nama mi Lagale Lavavang teren kusu mana tong asu i. Maga xopara na emi asu minama; ketla maga vavang kusu ne Moroa na lok momo minama, neni iklen lodoxoma atnama do i lox avukat koplakopmen. ⁵Ap mo laaleng maga vavang tinimi, ma goxo lox atdan kaka tevempanga atnimi la ma goxo ruuna loklok belegaao. Nemi miklen i na la ne Moroa bok iklen i do loklok atnama ga lox avukat mun. ⁶La maga xopara limixin petpes eburu minemi mina emi asu minema.

⁷Ketla nema luvuttadi vavang at ne Iesu Karisito; la keneng at na maga epovo ri sing panga nimi, ketla ma goxo lox i xuren. La ma goxo paase lolos tinimi, ketla loklok atnama gak lok mulus atnaasan mun kerekngan latkin i lok tatao laxamdak mi laxaalik kakalik teren. ⁸La maga lolos aleng kusu mana tong asu Lagale Lavavang tinimi la magap kip levenmumuat. Kerepmo maga balamu nimi.

⁹Luvutnetak mi luvurinuk. Mina doma bilong ti mo lugugu lolos atnama. Maga tong asu Lagale Lavavang at ne Moroa rinimi, la maga gugu at lengkangking la at lengkanimin, maga gugu pilas kusu nemi mi noxo kepe tevempilas atnimi xusu ri lok tooro nama. ¹⁰Miga reven loklok atnama, la ne Moroa bok ga reven i, dola luruptuvuk atnama gak mokso la ga lox avukat aleng kantubu atnemi limixin nuunu la goxopmen taxakapmek gak lok atnama. ¹¹Miklen i do maga anasa nimi getgesaran ngan laradi i anasa lamdak teren. ¹²Maga paase tooro nimi, la maga paase amenemen nimi, la maga paase aronga nimi xusu lorooro atnimi na lox avukat kerekngan ne Moroa i vara i. Moroa ga ro ka nimi xusu minaba nemen eburu min to xeneng at Linintoo ren la minaba lok kaka lisisixam teren.

¹³La nema ma tong avukat amisik ti ne Moroa mumu nimi. Ap mo laaleng miga siam kaka levelinga at ne Moroa maga tong asu i rinimi, miga doma i do mo levelinga boro at ne Moroa, la goxopmen levelinga at luvuttadi gamasa. Mo levelinga i gugu xeneng at lorooro atnemi limixin mi nuunu.

¹⁴Luvutnetak mi luvurinuk. Lorooro atnemi ga vee ngan lorooro at limixin nuunu at ne Moroa to Judaia, mo di nuunu at ne Iesu Karisito; nedi digap kip levesongsongot mumu lunuunu atdi, mila limixin me Judaia axa diga lox asongot di; la kerepmo nemi bok migap kip levesongsongot, mila limixin mi legesa vapaase atnimi axa diga lox asongot nimi. ¹⁵La mo limixin me Judaia diga sev amet Leeme Silok ne Iesu; ganoxa lavalabat atdi diga sev amet lavaeme vapaase alii at ne Moroa. La nedi diga riki xepe nama boro at lenep silok Judaia.

Moroa i xopara ri mo loklok atdi. La di lok kapmek lixitkis at limixin axap keretna; ¹⁶digak lok pe nama xusu ma noxo tong asu bok Lagale Lavavang tinedi limixin kopmen di me Judaia, kusu di noxo vubeles at Linintoo at ne Moroa. Laxakapmek atnedi limixin me Judaia i silok la mo laxakapmek ti lok pe limixin kopmen di me Judaia i lox asilok laxakapmek atdi. Kuren la lebelemamao at ne Moroa ira rupot pam saparap di.

Pol Ga Vara Aleng I Xusu Na Ven Limixin Boro Tesalonia

¹⁷Luvutnetak mi luvurinuk. Leventaba limixin dom Tesalonia diga riki xepe nama basinge nimi, la maga nemen to Atens at leventaba leven gaaling. Ketla maga doxoma amisik nimi, la maga lok bukbulu aleng la maga lolos kusu mana vot pasa nimi. ¹⁸Maga lok do mana vot pasa nimi; nenia xa, ne Pol, amisik aga lok tong pen i xusu ana vosiga nimi, ketla ne Satan ga tu pe nama. ¹⁹Maga lolos do mana vosiga nimi mila lunuunu atnimi i lox alolos lorooro atnama; la mi lox amomo nama; la maba lok momo aleng ap mo laaleng Leeme Silok, ne Iesu nabamlong teren, mila mi tu lolos at lunuunu atnimi. ²⁰I ruturun tinotno. Mi lox amomo aleng nama.

Timoti Gat Pas Uto Tesalonia

3 ¹La ma goxo epovo do mana ngangais gamasa ro Atens, la maga siam do nema' mi ne Sailas manak lok be ro Atens, ²la maga riki ne Timoti kusu na vosiga nimi. Neni i lok ngan neton dik la neni bok ik lok lugugu at ne Moroa, la i vavang mi Lagale Lavavang at ne Iesu Karisito. Maga riki i xusu neni na lox alolos lunuunu atnimi la na paase tooro nimi; ³mila nemi mip kip levesongsongot la ma xopara i do tara atnimi na subu at lunuunu ren. Miklen i do ne Moroa ga soxolik ka nedik, kusu atap kip levesongsongot. ⁴Maga nemen eburu minemi, la maga tong i rinimi do nedik atanabap kip levesongsongot. La nemi mi xasep do mo levelinga atnama ga vot tuturun, levesongsongot ga rupot saparap dik. ⁵Kuren la nenia a goxo epovo do ana ngangais gamasa, la aga riki ne Timoti saparap nimi xusu neni naklen ka be lunuunu atnimi, do i ruturun ne Satan ga lok tong pen nimi la miga subu vam, la mo lugugu maga lox i xantubu atnimi ga ravasu ngan lavanga gamasa.

⁶Ketla na nga ne Timoti gamlong basinge nimi ude la neni ga tong asu levelinga avukat tinama. Neni ga tong i rinama do lunuunu mi labalamu atnimi move i lolos la lodoxoma atnimi i lok momo minema; la mi vara aleng i do mina ven nama ngan nema ma vara aleng i do mana ven nimi. ⁷Luvutnetak mi luvurinuk, map kip levesongsongot mi levenmumuat, ketla ma lok momo mila lunuunu atnimi i tu lolos. ⁸La ma rooro avukat mila lunuunu atnimi i tu lolos at Leeme Silok. ⁹Nema ma emi asu mi

ne Moroa mumu nimi; nemi mi lox amomo aleng nama at lemeren ne Moroa. ¹⁰At levenaleng kanimin la levenaleng kangking ma ngising amisik ne Moroa do mana vot pasa nimi la mana lok tooro nimi, kusu mana lox epovo lavakpakes at lunuunu atnimi.

¹¹Lisingising atnama keretna; Moroa Temen dik eburu mi ne Iesu, Leeme Silok atdik duna lok tangas tinama xusu manaba vot pasa nimi. ¹²La Leeme Silok na lox asilok labalamu atnimi xusu mina ebalamu ela la mina balamu aleng limixin petpes bok, kerekngan nema ma balamu nimi. ¹³La kerepmo neni na lox alolos lorooro atnimi xusu lorooro atnimi nak mokso aleng at lemeren ne Moroa ne Temen dik, ap mo laaleng ne Iesu, Leeme Silok atdik nabamlong eburu mi limixin dadat teren.

Loklok Ne Moroa I Momo Aleng Tin

4 ¹Nia ana lox axap levelinga rak. Luvutnetak mi luvurinuk. Maga lox ase vam nimi mi lavatpas at limixin di nuunu xusu mina rooro avukat la mina lok mo levempanga avukat ne Moroa i vara i. Mik lox i xerepmo, ketla ma sing nimi at lemeren Leeme Silok, ne Iesu keretna; mina lolos kusu lorooro atnimi naba lox avukat axap. ²Mi xasep pam at levelinga at Leeme Silok, ne Iesu, maga tong i rinimi.

³Moroa i vara i do lorooro atnimi na xaala aleng. Mina ke xepe loklok ti elongka la loklok kakapmek maxamang at lixitkis epot. ⁴Nemi getgesara mina xasep at loklox avukat ti epot kaka tatkin la mina lox i nom mi loklok nunuan. ⁵La kerepmo nemen mita mumu asu mo loklok kakapmek atnedi dixoklen ne Moroa. ⁶La kerepmo bok nemen mita lok kapmek lixitkis at luvutneton nimi di nuunu at ne Iesu. Maga tong axasep pam i do Leeme Silok ne Moroa naba lox asongot nedi di lok kapmek lixitkis epot. ⁷Moroa ga ro ka nimi xusu mina dadat aleng, kopmen do ri lox abilinga lorooro atnimi. ⁸Kuren la nedi mo di noxo ronga res at na levelinga atnama, dixo lok tavanga rinama, ketla di lox abulubun kepe levelinga at ne Moroa, mo ga raba nemi mi Loroonan Kaala ren.

⁹Nema noxo malagan tevelinga mumu labalamu atnimi saporap limixin nuunu; mila ne Moroa ga lox ase vam nimi do mina ebalamu ela. ¹⁰Luvutnetak mi luvurinuk. I ruturun do mi balamu nedi axap luvutneton dik to at lenep silok Masadonia; ketla ma tong alolos i rinimi do mina balamu aleng di. ¹¹La mina lolos kusu minat kis mulus at lorooro atnimi la mina lok tatao avukat levempanga atnimi; mina gugu xusu mina lok kaka levempanga mik pakes tin at na lorooro. Mina lox i na xerekngan magara tong pam i rinimi gano. ¹²Kerepmo lavamolon diba lok ngangao atnimi la mi noxok pakes ti loklok tooro at limixin petpes.

Leeme Silok Naba Ro Xaka Limixin Teren

¹³Luvutnetak mi luvurinuk. Ma vara i do mina xasep mumu nedi digara met pam; la ma xopara i do minak lok bukbulu xerekngan nedi

limixin kopmen dina nuunu at ne Iesu Karisito. Do tara atdi na met, di lok bukbulu aleng mila dixo doxoma voovo ri lorooro melemu. ¹⁴Ketla nedik ta nuunu do ne Iesu ga met la ga roo xat bok, kuren la ata nuunu do ne Moroa naba ro xaka nedi limixin nuunu diga met pam; la dinabat pas eburu mi ne Iesu uto vana at laxalibet.

¹⁵Na lavapaase axasep boro at Leeme Silok. Nedi limixin nuunu move di rooro at lomlong at Leeme Silok, di noxomgo avot upana rinedi diga met pam. ¹⁶Ap mo laaleng limixin dinaba ronga luxupkup lolos la laangelo gomgo naba toro, la luru at ne Moroa nabang teng, la Leeme Silok naba si ukopok boro vana at laxalibet. La nedi limixin nuunu diga met pam, dinaba roo xat amlong la dinaba urut avot. ¹⁷La nedi limixin nuunu move di rooro ap mo laaleng, dinaba urut la dinaba vot pasa nedi digamgo vam at labantakabu; la dinaba ekip tangarang mi Leeme Silok to at lamavangkap la nedik tanaba nemen amisik eburu min. ¹⁸Kuren la mina elok tooro ela mi na levelinga xeneng atnemi.

Lagagas Alii Ti Lomlong At Leeme Silok

5 ¹Luvutnetak mi luvurinuk. Nema ma noxo tong i rinimi at ua laaleng ne Iesu nabamlong teren. ²Mila mi xasep tinotno do mo laaleng naba rupot ngan laradi xipkip pilo i rupot at laxanimin. ³Dola limixin dina lok keretna, “Limila ik lok at na lavatbung menemen; lanmarat kopmen nak lok de,” losongsongot silok ba vot saparap limixin at na lavatbung menemen. Mo laaleng naba rupot soso mun; naba lok ngan mo losongsongot it pot at latkin i suma lamdak. La kopmen tara noxo epovo na sixiro basinge i.

⁴Ketla nemi luvutnetak mi luvurinuk, mi noxo rakdu ap mo laaleng ngan laradi xipkip pilo i lox arakdu limixin; atla kopmen minak lok at lamain. ⁵Nemi axap mik lok at laxasep at ne Moroa. I lok ngan ta do mi nemen at laaleng kangking la levempanga i xasep. ⁶Kuren la nemen dik guta vunga xerekngan limixin kopmen dina nuunu at ne Iesu; ketla ata gagas avukat la nemen dik guta nemen tangtangu. ⁷Mila nedi di vunga la di inin tangtangu, di nemen at lamain. ⁸Ketla nedik limixin at laxasep, atam tebeng lodoxoma nunuan la ata umsu mi lunuunu mi labalamu, i lok ngan lavatban tik lok pe laxakapmek. La ata lok ka lodoxoma voovo ri loklox arooro at ne Moroa. Na lodoxoma i lok ngan lavatkiam ti lok tooro nedik at lorooro atdik. ⁹Moraa xopmen goxo soxolik ka nedik kusu tana ekip tangarang mi lebelemamao ren; ketla neni ga soxolik ka dik kusu taba lok kaka loklox arooro at Leeme Silok, ne Iesu Karisito. ¹⁰Ni ga met kusu dik taba nemen eburu min. Do nedik taga met pam kopla move taba rooro se at lomlong teren, tanaba nemen amisik eburu min. ¹¹Kuren la mina elok tooro ela mi na levelinga la mina lox alolos lorooro atnemi ngan migara lok pam i.

Lavapaase Loklox Axap

¹²Luvutnetak mi luvurinuk. Ma sing nimi dola mina lok ngangao atnedi limixin, Leeme Silok gara soxolik ka vam di xusu dinam gomgo

rinimi at lotu. Nedi di lok tatao lorooro atnimi la di lox ase nimi mi levelinga at Leeme Silok. ¹³La mina balamu aleng di mila di gugu at lugugu at ne Moroa. La mina umsu mi limila at lixitkis atnimi.

¹⁴Luvutnetak mi luvurinuk. Ma tong i rinimi do mina paase alolos nedi dik molo. La mina paase tooro nedi dik marat soso. La mina lok tooro nedi lunuunu atdi xopmen na lolos, la minat kis mulus mi limixin axap. ¹⁵Nemen gat tara guta vorang laxakapmek mi laxakapmek. Ketla mina lolos amisik kusu mina lox asuusu loklox anare kantubu atnimi la limixin petpes bok.

¹⁶Minak lok momo amisik. ¹⁷Mina ngising amisik saparap ne Moroa. ¹⁸Mina tong avukat ti ne Moroa at levempanga axap. At lorooro atnemi mi nuunu at ne Iesu Karisito, mina lok na levempanga mila ne Moroa i vara i.

¹⁹Nemen mita ru pe lugugu at Loroonan Kaala. ²⁰Nemen mitang tonga xepe levelinga atnedi di vavang tinimi. ²¹La mina lok tong pen levempapaase maxat; minam tebeng lolos mo levelinga i lox avukat ²²la mina ke xepe mo levelinga i lok kapmek.

²³A sing ne Moroa i umsu mi limila, do neni na lox adadat lorooro atnimi la neni na lox alolos lodoxoma eburu mi lorooro la labantuxu atnimi, kusu minaba nemen mokmokso at lemeren ne Moroa ap mo laaleng Leeme Silok, ne Iesu Karisito nabamlong teren. ²⁴Moroa ga ro xaka nimi xusu neni na lox arooro nimi la levelinga ren i ruturun; neni xa naba lok mo levempanga at lorooro atnimi ngan ni ga tong alii vam i.

²⁵Luvutnetak mi luvurinuk. Mina sing ne Moroa xusu ni naba lok tooro nama. ²⁶Mina eseeqa rangarang mi lenetnes i xaala. ²⁷A tong i rinimi at lemeren Leeme Silok do mina exes na lovoang ti limixin axap at lotu.

²⁸Letaba nabalamu rinemi boro at Leeme Silok atdik, ne Iesu Karisito. I ruturun.

2 Tesalonia

Lovoang Sepsev Agepura At Ne Pol Ti Limixin Nunu To Tesalonia

Levelinga Loklox Axasep

Lamaares 53 A.D.

Pol move gak lok to Korin la ni ga malagan i na lovoang sepsev agepura uto rinedi luvuttadi nuunu to Tesalonia. Pol gara rongga xora vam i do lentaba luvuttadi boro mo Tesalonia mo di goxo nuunu at lomlong sepsev agepura at ne Iesu. Diga doxoma ekarakat i do ne Iesu mo garamlong pam, kuren la digaptuvuk gamasa la di goxo lok tepempanga. Keneng at nai lovoang ne Pol ga anasa di do laradi sosolo arup na vot la naba bala arup buaang limixin ti laxapmek, la melemu ba Laradi Mokmokso ne Iesu Karisito nabamlong kusu limixin kapmek diba lok ka luunun kapmek tidi. Pol ga vaase lolos bok tidi la ga vara i xusu dina lox ekun lorooro atdi, kusu diba lox asu teven gugu nunuan.

Lengkot silok keneng at na lovoang:

- 1:1-2 Lavapaase momo at ne Pol.
 - 1:3-12 Pol ga tong aorong ti ne Moroa ti lurutu lolos atdi.
 - 2:1-17 Levenanasa mumu laradi sosolo arup la lomlong at ne Iesu.
 - 3:1-15 Lempapaase loklox alolos mumu leven gugu nunuan.
 - 3:16-18 Pol ga vaase abeese.
-

Lavapaase Axasep

1 ¹Nenia ne Pol. Nema mi ne Sailas la ne Timoti, ma malagan na lovoang tinemi limixin nuunu dom Tesalonia. Nemi limixin at ne Moroa ne Temen dik la Leeme Silok, ne Iesu Karisito.

²Letaba nabalamu la lenmila boro at ne Moroa ne Temen dik la Leeme Silok, ne Iesu Karisito na nemen eburu minemi.

Laaleng Ete La Lovotpot At Ne Iesu

³Luvutnetak mi luvurinuk. I lox avukat do nema ma tong avukat amisik ti ne Moroa mumu nimi. I lox avukat mila lunuunu atnimi ira susu silok la labalamu ela xantubu atnimi ira sisilok bok. ⁴Kuren la nema ma xip aurut nimi ri levelotu at ne Moroa, mila nemi mi tu lolos at lunuunu atnimi kantubu at levesongsongot mi levenmumuat, mo mip kiv i.

⁵Lunuunu atnimi i tu lolos, la na i lox asuusu i do lodoxoma at ne Moroa ik mokso aleng la at laaleng ete neni naba ila mumu loklok atnimi la minaba epovo xusu mina vubeles uto xeneng at Linintoo ren. Ni lavasuun at levesongsongot atnimi. ⁶Moróa ik mokso aleng la neni ba vorang levesongsongot atnedi dim taba nimi min. ⁷La neni naba lok kepe levesongsongot basinge nimi la atnema bok ap mo laaleng Leeme Silok, ne Iesu naba si ukopok boro vana at laxalibet. Neni ba vot eburu mi lubungangelo lolos teren la lisisixam silok, naba soosoo ngan laxao bokbolot. ⁸La ne Moroa naba lox asongot nedi, dixokleklen i la nedi bok kopmen dinang tonga res at Lagale Lavavang at Leeme Silok atdik ne Iesu. ⁹La Leeme Silok naba raba di mi lumumuat i silok aleng la dibap kip amisix i. Diba nemen amisik to vetpes basinge lemeren Leeme Silok la di noxo suma lololos avukat at ne Moroa. ¹⁰Diba lok ka na lumumuat ap mo laaleng ne Iesu naba si ukopok la limixin axap teren diba emi asu min la diba lok ngangao ren. La nemi bok miba emi asu min, mila miga siam kaka Lagale Lavavang maga tong asu i rinimi.

¹¹Kuren la ma ngising amisik ne Moroa do neni na lox epovo nimi ri mo lороoro melemu, mo ne Moroa atdik ga ro ka nimi rin. La neni na lok tooro nimi mi lololos teren kusu miba epovo do mina lok leven gugu nunuan kerekngan limixin nuunu di vara na lox i. ¹²La kerepmo limixin diba ven leven gugu nunuan atnimi la diba emi asu mi ne Iesu Karisito la diba emi asu bok minimi. Naba ravasu xuren mila ne Moroa atdik mi Leeme Silok ne Iesu Karisito du lox asuusu letaba nabalamu rinimi.

Laradi Xapmek

2 ¹Mumu lomlong at Leeme Silok atdik ne Iesu Karisito, la lovtopot atdik ti nemen saparav i. Luvutnetak mi luvurinuk, ma sing nimi ²do nemen mita lok bukbulu soso koplá mita rakdu at levelinga leventaba di tong i do mo laaleng at lovtopot at Leeme Silok ga rupert pam. Leventaba diga xarang nimi do na levelinga ni lavapaase alii boro atnama koplá maga lox aonon i saparap nimi ro xeneng at lovoang maga malagan i rinimi. ³Mi guta ke avolo tara na xarang nimi kerepmo, mila lekarakat silok naba rupert avot ti lovtopot at Leeme Silok. Ap mo

levenaleng mumuat, buaang limixin dinaba lox abulubun kepe ne Moroa. La lara laradi kapmek naba ru asuvos. Ketla ne Moroa naba lok kapmek i ro at lemenemen songsongot. ⁴Avot be mo laradi xapmek naba sok tixirixes ne Moroa la levelotu axap; la neni naba tong i do neni i silok aleng la nabat kis to at loogu laplavang at ne Moroa la neni naba lok ti limixin keretna, “Nenia ne Moroa.”

⁵Mina doma su ap mo levelinga, nenia aga tong i rinimi ap mo levenaleng agak lox eburu minimi. ⁶La mi xasep pam do lara lavanga ik lok pe nom laradi xapmek kusu neni naba ru asuvos ap mo laaleng ne Moroa ga lok katling pam i. ⁷La ne Satan ga lox aonon pam loklok ting tonga xepe ude at na lavatbung menemen la mo levempanga i gugu nemnem to xeneng at lorooro at limixin; ketla buaang limixin kopmen dina xasep teren. Mo lavanga loklok pe naba lok pe mo loklok kakapmek at ne Satan se ne Moroa naba lok kepe mo lavanga loklok pe la ⁸ap mo laaleng laradi xapmek naba suvos ba. Ketla at lovtopot at Leeme Silok ne Iesu, neni naba lok kepe mo laradi xapmek mi lamamas teren la naba sev amer i mi lagamgames at lemeren.

⁹At lovtopot at nom laradi xapmek, Satan naba lok tooro i. Neni naba ruuna lololos silok la ni ba lok levempanga sangsangu la leveloklok katling kusu na xarang arup limixin min. ¹⁰La neni naba lok leveloklok i lok kapmek kusu na xarang arup limixin mo dinaba seeve, dinaba onon uto at lemenemen songsongot mila diba rongga xepe levelinga ruturun mo im taba limixin mi loklox arooro. ¹¹Kuren la ne Moroa naba lox angtangku lodoxoma atdi xusu dina nuunu ap mo levelinga xaxarang, ¹²la kusu dinaba lok kaka lumumuat silok, ni lemenemen songsongot, mila di noxo nuunu at levelinga ruturun teren la dibak lok momo mene mi levempanga kopmen nak mokso.

Moraa Ga Soxolik Ka Vam Nimi Ri Lorooro

¹³Luvutnetak mi luvurinuk. Leeme Silok i balamu nimi. La ik mokso do mana tong avukat amisik ti ne Moroa mumu nimi, mila ne Moroa gara soxolik ka vam nimi ganoxa at lereot kusu neni na lox arooro nimi. Na loklox arooro ga ravasu keretna; miga nuunu at levelinga ruturun at ne Moroa, la Loroonan Kaala ga lox adadat lorooro atnimi. ¹⁴Moraa ga ro ka nimi ri lorooro avolo xeneng at Lagale Lavavang, maga tong i rinimi. Neni ga ro xaka nimi xusu mina ruuna xaka loxot at lisisixam at Leeme Silox atdik ne Iesu Karisito. ¹⁵Kuren la luvutnetak mi luvurinuk, mina tu lolos la minam tebeng lolos mo levenanasa maga lox ase vam nimi min. Maga tong asu i nom tinimi gano la maga lox aonon bok mo levelinga at levempoang.

¹⁶Lisingising atnama i lok keretna. Leeme Silok atdik, ne Iesu Karisito la ne Moroa ne Temen nedik duga balamu nedik, la duga raba dik mi

levelinga loklok tooro, naba nemen amisik la duga raba dik mi lodoxoma voovo ti lorooro avolo. ¹⁷Ma sing du do duna lox alolos lorooro atnimi xusu mina lok leven gugu nunuan la mina tong asu levelinga i nunuan.

Mina Ngising Tinama

3 ¹Luvutnetak mi luvurinuk. Na laxavaxap at na lovoang. Mina ngising ne Moroa do neni na lok tooro nama xusu levelinga at Leeme Silok na epeseves soso la limixin diba siam kaka i mi lomomo kerekngan nemi miga siam kaka i. ²La mina sing bok dola limixin kapmek di noxo ru pe lugugu atnama, mila buaang limixin mo, kopmen tunuunu atdi. ³Ketla Leeme Silok i lok tooro ruturun amisik limixin teren la neni naba lox alolos lorooro atnimi la naba lok tatao nimi basinge ne Satan. ⁴La nema ma nuunu bok do Leeme Silok i lok tooro ruturun nimi la na mi mumu asu levelinga atnama la melemu bok minaba mumu asu i. ⁵La ma sing Leeme Silok do neni na lok tooro nimi xusu mina xasep avukat ti labalamu at ne Moroa, la mina tu lolos kerekngan ne Iesu Karisito ga tu lolos at lorooro ren.

Nemen Limixin Guta Molo At Lugugu

⁶Luvutnetak mi luvurinuk. Ma sing nimi at laasen at Leeme Silok atdik ne Iesu Karisito, do mina ru asepsu basinge di nom limixin nuunu dik molo at lugugu, la kopmen dina mumu asu mo levenanasa nia aga anasa nimi min. ⁷Nemi mi xasep do ik mokso rinimi xusu mina mumu asu mo loklok atnama, maga ruuna i ap mo levenaleng maga nemen kantubu atnimi. Maga gugu lolos, la ma goxok molo. ⁸Ma goxo lok kaka gamasa tevempanga atnimi, maga un kaka leveluxa la levempanga vetpes bok magak pakes tin. Maga gugu lolos at levenaleng kangking la at levenaleng kanimin kusu mi noxo xepe pilas ti lok tooro nama. ⁹Gak mokso do mana sing kaka tevempanga atnimi, ketla ma goxo lox i xuren; mila maga vara i do mana lok lampoovo xerepmo rinimi. ¹⁰Maga nemen kantubu atnemi, la maga tong i rinimi xeretna, “Do tara i xopara na gugu, nemen gat ni ta anan eburu minimi.”

¹¹Ma tong i na rinimi mila magang tonga i do leventaba atnimi dik molo mene la dit pas tangtagap mi lavapaase siksikma la kopmen dina gugu. ¹²At laasen at Leeme Silok ne Iesu Karisito ma tong lolos i ridi do dina nemen atnaasan la dina gugu ri levempanga dik pakes tin. ¹³Luvutnetak mi luvurinuk, nemen mitak molo rik lok leven gugu i nunuan.

¹⁴Do tara noxo rongga res at na levelinga, mina malagan katling i, la mina ke xepe i xusu neni na lok mamangan. ¹⁵Nemen mita edax i, ketla mina paase aronga i ngan neton nimi.

Lavapaase Momo

¹⁶A sing Leeme Silok at limila do neni xa na raba nimi mi limila ren at levenaleng axap la at leventaangas axap. Leeme Silok na nemen eburu amisik minemi axap.

¹⁷Nenia ne Pol, a malagan na levengolinga mi lakngak akmokso. Lavapaase momo rak tinimi. A malagan na levempoang keretna.^a

¹⁸Letaba nabalamu at Leeme Silok atdik ne Iesu Karisito na nemen eburu minemi axap. I ruturun.

^a 3:17 Pol ga sok mene nga na laxakan. La laradi vetpes ga malagan levelinga ne Pol ga vaase i min.

1 Timoti

Lovoang Avot At Ne Pol Saparap Ne Timoti

Levelinga Loklox Axasep

Levenmaares 63-67 A.D.

Timoti neni boro at lenep Asia. Ne temen neni boro Grik la nenen neni latkin boro Judaia. At lavatpas sepsev agepura at ne Pol neni ga soxolik ka ne Timoti ngan laradi loklok tooro rin la duga gugu buru. (Gu 16:1-3) Melemu Pol ga raba ne Timoti mi lentaba leven gugu kusu neni naba lok tatao lotu ro Epesas. At nai lovoang Pol ga vaase aronga ne Timoti mumu luvuttadi loklox ase xaxarang; lavanga dina lok lunuunu at luvuttadi nuunu dina subu. Neni ga vaase alolos bok i mumu lotu at luvuttadi nuunu. Melemu neni ga vaase mumu mo leventaangas ua i nunuan kusu luvuttadi amgomgo dinak lox i. Neni ga vaase alolos bok ne Timoti mumu leveloklok ua in manton ti ne Timoti, atla neni laradi gugu at ne Karisito kantubu at limixin nuunu.

Lengkot silok keneng at na lovoang:

- 1:1-2 Pol ga tong avukat ti ne Timoti.
 - 1:3-20 Lempapaase mumu levenanasa nunuan.
 - 3:1-16 Lempapaase mumu nedi luvuttadi amgomgo at lotu.
 - 4:1-16 Timoti na lok tatao avukat lorooro ren la levenanasa ren.
 - 5:1-6:21 Lempapaase mumu lugugu at ne Timoti la lurutu migo ren ti limixin nuunu.
-

Lavapaase Axasep

1 ¹Nenia ne Pol, laradi vavang at ne Iesu Karisito, mo nedik ta doxoma voovo rin. Nedu mi ne Moroa, Laradi Loklox Arooro atdik, duga soxolik ka ia ri na lugugu.

²Nia a malagan na lovoang ti ne Timoti, lamdak tinotno rak maxeneng at legesa nuunu.

Letaba nabalamu, lebelemumu, la limila bok tu boro at ne Temen dik la ne Iesu Karisito, Leeme Silok atdik.

Levempapaase Aronga Mumu Leveloklox Ase Xaxarang

³Nia a vara i do una nemen go Epesas, kerekngan aga tong i ru ap mo laaleng nia aga vas kaxat uto Masadonia. Leventaba luvuttadi me go Epesas di vanasa limixin mi levenanasa xaxarang; kuren la una tong i ridi do dina xap ta ap mo loklok. ⁴La una tong i ridi do dina xap ta ap mo laxampapaase solo mumu leventetere, la levenasen at lavalabat, mila nai ik lox asu mun levedadak; la ik lox asi lugugu at ne Moroa, mo lugugu i lox alolos lunuunu at limixin. ⁵Lavasuun at nai levelinga rak, ti lox axatu labalamu xantubu at limixin nuunu; nom labalamu i ravasu boro xeneng at lorooro kopmen taxakapmek teren la boro bok at lodoxoma, kopmen tusumsuma xapmek teren la boro bok at lunuunu ruturun. ⁶Leventaba luvuttadi digara rem gili su vam basinge i na la dira domampe vam langas at lunuunu la di tong asu mun levelinga kopmen tavaasuun teren. ⁷Di vara i do dina anasa limixin mi Lenavolo at ne Moroa, ketla dixo xasep teren la dixo xasep bok ap mo levelinga di anasa limixin min.

⁸Nedik ataklen i do Lenavolo i lox avukat, mo do tara im tebeng avukar i. ⁹Ataklen box i do Lenavolo at ne Moroa, kopmen tinedi limixin avukat, ketla tinedi limixin di los polo Lenavolo, la tinedi limixin tongtonga xepe, la tinedi limixin kopmen dina lotu saparap ne Moroa, la ti luvuttadi xapmek, la tinedi bok kopmen dina lok ngangao at ne Moroa la levempanga at lotu, la tinedi dip sev amet luvuttemen di mi luvutnen di, la tinedi dip sev amet limixin petpes, ¹⁰la tinedi bok di lok laxakapmek maxamang at lixitkis epot, la tinedi lavatlok di velongka, la tinedi bok di babala ka limixin kusu dina gugu atdi; la tinedi bok di xaxarang la di tong asu levelinga xaxarang mumu laradi i tu at lavapaase; tinedi bok di lok levempanga xerepmo xopmen na epovo mi levelinga ruturun at ne Moroa. ¹¹Na levelinga ik lok to xeneng at Lagale Lavavang, mo ne Moroa ga raba ia min, kusu ana tong asu i. Lagale Lavavang ne Moroa i lox asuusu lisisixam at ne Moroa, kuren la ata emi asu mi ne Moroa.

Pol Ga Tong Avukat Mumu Labalamu At Ne Moroa

¹²A tong avukat ti ne Iesu Karisito, Leeme Silok atdik, ni gara raba vam ia mi lololos ti lok lugugu rak. A tong avukat tinotno rin mila ni ga ven ia do nenia laradi ruturun, la ni ga soxolik ka ia xusu ana gugu rin. ¹³Keke i do gano migomgo aga paase vupu rin, la agap sep limixin teren, la agak lox asongot di. Ketla ne Moroa ga lox asuusu lebelemumu

ren tia, mila nenia agoxoklen levempanga salai gak mokso la goxopmen tunuunu rak. ¹⁴La Leeme Silok atdik ga sobang asi mo letaba nabalamu ren mavana rak la ga raba box ia mi lunuunu la labalamu, no i ravasu at ne Iesu Karisito.

¹⁵Anai levelinga ruturun tidik, ata siam ka i la ata nuunu bok teren. Iesu Karisito ga si ude xopok at na lavatbung menemen kusu ri lox arooro limixin kapmek. Loklok kakapmek tarak i silok aleng ti loklok kakapmek atnedi. ¹⁶Ketla ni lavasuun mun teren la ne Moroa ga lox asuusu lebelemumu ren tia, kusu ne Iesu Karisito na ngangais aleng tia ri leeng basinge leveloklok kakapmek tarak, keke i do nenia laradi a lok kapmek aleng ti limixin axap. La nai loklok at ne Iesu Karisito, ni lampoovo rinedi limixin axap diba nuunu ren la dina lok ka lorooro avolo. ¹⁷Kuren la ata emi asu mi Loorong Silok naba rooro amisik, la kopmen noxo met la dik taxo epovo ri ven i; neni xusuk mun ne Moroa. Ata lox asuusu amisik loklok ngangao la leemi asu rin! Tuturun.

¹⁸Timoti, nenu lamdak tarak. Ana raba u mi na levelinga i epovo mi levelinga vapaase alii at lugugu ram saparap ne Moroa gano migomgo. Do una mumu asu i, ba lox alolos u xusu unaba esep avukat ap mo leeseep nunuan, ¹⁹la ubam tebeng lolos lunuunu la u noxo suma loklok mamangan at lorooro ram. Leventaba luvuttadi diga ronga xepe na levelinga, la diga lok kapmek pam lunuunu atdi. ²⁰Kantubu atdi, ne Aimenias la ne Aleksanda, aga song araba vam du ri lekngen ne Satan, kusu dubaklen ka i do du noxo paase vupu ri ne Moroa.

Pol Ga Paase Lolos Mumu Leveloklok At Lotu

2 ¹Lavanga avot keretna. Nia a sing lolos u do limixin at lotu dina tong asu amisik levesingising la levelinga loklox avukat kusu ri lok tooro limixin axap; ²la levesingising bok ti lok tooro lavaorong silok la tinedi limixin amgomgo, kusu ataba nemen atnaasan at lorooro nunuan eburu mi limila, la lorooro atdik na umsu mi loklok ngangao saparap ne Moroa la kopmen taxakapmek teren. ³Ana i lox avukat la i lox amomo aleng ne Moroa, Laradi Loklox Arooro atdik. ⁴Neni i vara i do limixin axap dinaba ruuna ka lorooro avolo, la dinabaklen avukat levelinga ruturun teren, ⁵mila legesa Moroa mun, la legesa radi mun ik lok lumulum kantubu at ne Moroa mi limixin, neni ne Iesu Karisito. ⁶Ni ga raba xa i ngan laxaavuk ti lox arooro limixin axap basinge laxakapmek atdi. Na ga ravasu ruturun at loxonaleng mokmokso ren. ⁷La nai lavasuun teren la ni ga sak tiki ia ngan laradi vavang la laradi loklox ase ti limixin kopmen me Judaia, kusu ri tong asu levelinga ruturun at lunuunu ridi. Nia xopmen ana xaxarang, nia a tong asu levelinga ruturun.

⁸A vara i do lavatlok at levengkot axap dina ngising amisik, la dina song aurut mi levengkikngen di upana keneng at levesingising atdi la

kopmen teven mukmusak la levenedak noxo nemen at lorooro atnedi. ⁹A vara box i do lavakin dina lok tatao avukat nedi la dina ven mumu avukat levesingsiga atdi la dina sinang avukat di; nemen dita meva lempatkabinim atnedi la nemen bok dita sinang mi leven gol la levenpeal, la levempanga singsiga, luunun teren i silok. ¹⁰Ketla dina lox asu leven gugu nunuan, mo ik mokso ri lavakin di lotu ruturun saparap ne Moroa.

¹¹I lox avukat do at loxonaleng lavakin dina rongga levelinga at ne Moroa, dinat kis atnaasan la dina lox axakalik di. ¹²Axo vara i do lavakin dina lox ase lavatlok to xeneng at lotu la di noxomgomgo ri lavatlok; dinak lox atnaasan mun. ¹³Lavasuun at nom keretna; Moroa ga rudum li avot ne Adam la melemu ba ne Iva. ¹⁴Lara lavasuun bok teren i lok keretna; kopmen ne Adam ga mu asu laxaxarang at ne Satan, nom latkin ga mu asu i la ga los polo levelinga at ne Moroa la ga lok laxakapmek. ¹⁵Ketla lavakin di pisik laxamdak lixilik; kuren la dinaba lok ka lorooro, mo do dina nemen lolos at lunuunu la labalamu la lixitkis dadat mi loklok mulus.

Luvuttadi Amgomgo At Lotu

3 ¹Anai ni levelinga ruturun; mo do tara i vara i do na xip ka lugugu at laradi gomgo at lotu, neni i vara lavanga avukat. ²Laradi gomgo at lotu neni laradi kopmen tosoogong teren at lemeren limixin; neni latlok at leges atkin mun la it kis atnaasan; la ik lok tatao avukat luruptuvuk teren, loklok teren i lok nunuan mene nga; neni ik lok maraose minedi limixin boro vetpes; la neni i epovo ri lox ase limixin; ³neni ixo inin tangtangu mi levengkadan lolos la kopmen nak musak soso, ketla neni it kis atnaasan la lorooro ren i umsu mi lumumulus la limila; neni ixo vara solo ri levempilas; ⁴neni i epovo ri vaxaxis avukat lixitkis atdi loxoetemen, la i lox ase avukat laxamdak mi laxaalik teren kusu dinang tonga res la dina lok ngangao bok teren. ⁵Do tara xopmen naklen ti vaxaxis avukat lixitkis koetemen teren, naba lok ba kereva la ni na lok tatao avukat limixin at ne Moroa? ⁶Laradi gomgo neni laradi mi lunuunu ren i xus pam; mila i lok kapmek do neni na lox asilox i la ni na subu beles at lebelemamao at ne Moroa, kerekngan ne Satan. ⁷Neni laradi limixin di nemen maxamang at lotu, di lok ngangao ren, kusu neni noxo ruuna ka tevelinga xakapmek at limixin dina lox i rin la ni na subu tup ti lelixo at ne Satan.

Luvuttadi Loklok Tooro Xeneng At Lotu

⁸Luvuttadi loklok tooro xeneng at lotu dina umsu mi luruptuvuk avukat at lemeren limixin, la levelinga atdi nak mokso; di noxo inin tangtangu levengkadan lolos, la di noxok lok kaka levempilas at langas kopmen nak mokso; ⁹dinam tebeng amisik leveloklox ase at luruturun

keneng at lunuunu at ne Moroa la lodoxoma atdi nak lox avukat mun. ¹⁰Una lok tong pen avot be di, la dola dina gugu avukat, dina lok ka ba nom lugugu loklok tooro.

¹¹Lavakin bok atdi dinap tuvuk nunuan la di noxo tere mumu, ketla dinat kis atnaasan mun la dina ruturun at levempanga axap.

¹²Na laradi loklok tooro, neni latlok at leges atkin mun, la neni i epovo na vaxaxis avukat laxamdak mi laxaalik teren la nedi axap bok to at loogu ren. ¹³Do na luvuttadi loklok tooro dina lok leven gugu avukat, diba lok ka laasen silok la dinaba vaase basabas mi lunuunu atdi xeneng at ne Iesu Karisito.

Lavasuun At Lunuunu Atdik

¹⁴Nia a malagan na levelinga ru ketla a doxoma i do aba vot pasa soso box u. ¹⁵Do nia a noxo vot soso, nenu u epovo na lox ase limixin kusu dina lok tatao avukat di keneng at lixitkis koetemen atdi mi ne Moroa; na loklok, ni lavasuun at lotu ruturun at ne Moroa i rooro amisik, neni luxus una la lusu auru at levelinga ruturun.

¹⁶I ruturun aleng do lotu atdik, ni lavanga i silok aleng mumu Leeme Silok atdik;

“Neni ga rupot ngan laradi; Loroonan Kaala ga lox asuusu i do lorooro ren ga nemen mokmokso; la lubungangelo diga ven i. Limixin diga vavang min to at lengkot axap la limixin diga nuunu ren nade at na lavatbung menemen; la ne Moroa ga lok ka i uto vana at laxalibet.” *Sam 9:11*

Luvuttadi Loklox Ase Xaxarang

4 ¹Loroonan Kaala i vaase axasev i do leventaba dinaba soxope lunuunu atnedi at na levenaleng i tu melango; diba ronga res at labaroonan kaxarang la diba mumu asu leveloklox ase at lubunggas. ²Na levenanasa xerepmo luvuttadi xaxarang dinaba lox ase limixin min; no levendoxoma avukat atdi gara sonao vam, i lok ngan din boo i mi lavaruat liplivi la kopmen dina suma i. ³Luvuttadi xerepmo di anasa limixin do i lok kapmek ti epot la ti anan bok leventaba levenasen luxa. Ketla ne Moroa ga rudum li nom leveluxa axap kusu ri limixin nuunu, mo diklen levelinga ruturun. La dina lok lisingising ti tong loklox avukat ti mo leveluxa. ⁴Levempanga axap ne Moroa ga rudum i, i lox avukat; kopmen tevempanga ataba sok tixirixes i, ketla ata lok ka levempanga axap mi lisingising ti tong loklox avukat; ⁵mila levelinga at ne Moroa la nom lisingising, i lox avukat mo leveluxa xusu ne Moroa na siam teren.

Lasaxaruki Avukat At Ne Iesu Karisito

⁶Dola una vaase asu na levenngas linga tinedi luvutnetam, uba lok ngan lasaxaruki avukat at ne Iesu Karisito; mila loroonan taram

i anan mais at lunuunu la at levenanasa avukat, nu ugara mumu asu vam i. ⁷Ketla una ru asepsu basinge nom leventetere xaxarang mo ixo lox avukat ti paase asu i. Ketla una lolos amisik kusu una ruuna ka luruptuvuk avukat at ne Moroa. ⁸Lugugu at labantuxu i lox asuusu loklok tooro ri labantuxu; ketla leveloklok at Loroonan at ne Moroa, naba lox asuusu leventaangas axap i nunuan, la uba ruuna ka lorooro avukat at na lorooro xopok la at lorooro melemu bok.

⁹Na levelinga i ruturun, ata siam ka i la ata nuunu ren. ¹⁰Ni lavasuun teren la dik ata gugu lolos la atam tabaavat, mila dik ta lok li vam lodoxoma voovo atdik at ne Moroa mo i rooro, neni Laradi Loklox Arooro at limixin axap la atnedi bok di nuunu.

¹¹Una paase na levempanga ri limixin at lotu la una vanasa bok di min. ¹²Nemen uta ke xepe tara na vas asi u ukopok atla nenu laau doxodok; ketla una lok ngan lampoovo ri limixin nuunu, at levempapaase ram, luruptuvuk taram, labalamu ram, lunuunu la loklok i dadat. ¹³Avot ti lovotpot tarak, una raba axap lorooro ram ti utus levelinga keneng at Lovoang Kaala ti mo limixin, la una vavang la una vanasa bok di. ¹⁴Nemen uta lox abulubun kepe laramtaba at Loroonan nom i nemen keneng taram; uga lok ka i ap mo laaleng luvuttadi vapaase alii diga paase alii i la luvuttadi mukun diga sa li levengkikngen di mavana ram.

¹⁵Una mumu asu amisik na levempanga la una raba lorooro axap taram tin, kusu limixin axap diba ven lusuusu at lugugu ram. ¹⁶Una lok tatao avukat lorooro ram eburu mi nom levenanasa uga anasa limixin min. Unak lox amisix i na levempanga; dola una lox i xuren, unaba lox arooro u eburu minedi nom ding tonga levelinga ram.

Lugugu At Ne Timoti Saparap Limixin Nuunu

5 ¹Do taradi mukun na lok laxakapmek, nemen uta paase lolos tin, ketla una vaase amulus tin ngan neni ne tamam. Una lox anares ka luvuraau maxat ngan ta luvutnetam. ²la lavakin mukun ngan luvutnenam, la lovosono maxat ngan ta luvurinum, mi loklok i dadat aleng.

Levelinga Ri Lavakin, Lavatlok Atdi Gara Met Pam

³Una lok ngangao at lempatnaa, kopmen teventaba na lok tatao di. ⁴Do lanaa rixin i ruuna laxamdak mi laxaalik koplaluvuttubuno di, i lox avukat do dina lox epovo lugugu atnedi ri livisik li atnedi, la mumu na langas dina vorang ba loklok tatao at luvuttemen di mi luvutnen di la luvuttubuno di, atla ne Moroa i lok momo mi mo loklok. ⁵Latkin do neni lanaa, la kopmen tara ri lok tatao i, neni nak lok li lodoxoma ren ti loklok tatao at ne Moroa rin, la na ngising amisix i at levenaleng kanimin la at levenaleng kangking. ⁶Ketla lanaa no im taba amisik labantuxu ren ti loklok kapmek, neni ira

met pam, keke i do neni move i rooro. ⁷Una tong axasep limixin mi na levelinga, kusu kopmen tara noxo ven kaka tosoogong atnedi. ⁸Ketla do tara xopmen na lok tatao avukat leventaba akmokso ren, neni ira sev apkap pam at lunuunu la neni i lok kakapmek tinotno ri laradi kopmen na nuunu.

Lubungnaa Lotu I Lok Tooro Di

⁹Nemen uta exes abeles tanaa ukeneng ti leexes at lubungnaa, do kovisi levenmaares teren na volo lavanna sangaun, la ni ga epot mene at leges atlok, ¹⁰la lorooro ren i umsu mi leven gugu nunuan la lorooro ren ga lok keretna. Neni latkin loklok tatao avukat laxamdak mi laxaalik teren, la ni ga lok maraose mi limixin kading dig a vot to at loogu ren, la ni ga lok levempanga nunuan tinedi limixin nuunu la ni ga lok tooro nedi dig a xip tutu mi levenmumuat, la ga raba axap lorooro ren ti lok leven gugu nunuan.

¹¹Ketla nemen uta lox abeles lovosono naa ukeneng ti leexes at lubungnaa, mila do levendoxoma atdi na ngaongao ri epot, dinaba repukus basinge ne Karisito; ¹²la kerepmo diba lok kakapmek tinotno mila di los polo nom laxakaape atdi dig a lox avor i. ¹³La di lox arala ka box i xusu dina gosogos gamasa, la dinam simgu, ketla i lok kapmek tino bok atla di lox arala ka bok leretere mumu ri leventaba vetpes, la di lox angtang di mi larangtagap gamasa, la di tong levempanga xopmen na lox avukat. ¹⁴Kuren la a vara i do nedi lovosono naa dina epot la dina ruuna madak, la dina lok tatao avukat levempanga ro xeneng at laraugu atnedi, kusu kopmen di noxo raba luvuttadi munepen minedik kusu di noxo vaase xakapmek tidik. ¹⁵Mila leventaba lubungnaa dira rem gili su vam kusu dina mumu asu ne Satan.

¹⁶Ketla do tara tatkin, neni latkin nuunu la i ruuna tubungnaa ro at libibinat teren, neni na lok tatao avukat di la neni noxo lok li lumumuat mavana at lotu; atla lotu naba lok tatao mene nedi lubungnaa no dik pakes aleng tinotno.

¹⁷Luvuttadi amgomgo at lotu mo di lok leven gugu avukat ngan lubang amgomgo, i epovo do dina lok ka bok luunun mavana at luunun atnedi, nedi mene di gugu lolos mi lavavang la di anasa; ¹⁸atla Lovoang Kaala i vaase xeretna;

“Nemen uta velegum lungusno at lubulumaxao, mo i rubut asu lemepevem piao.”

Len 25:4

La i lok bok keretna,

“Laradi gugu i epovo na lok ka luunun teren.”

Lu 10:7

¹⁹Nemen uta ronga res at levelinga at legesa radi i vaase asu i mumu laxakapmek at laradi mukun at lotu, ket do legepura koplavantun di vaase asu i, una ronga res teren. ²⁰Do tara atdi na lok taxakapmek, una vaase sox i ro melamgo at limixin, kusu dinaba marat.

²¹At lemeren ne Moroa la at ne Iesu Karisito la at lubung angelo melemelengan, a sing alolos u xusu una mumu asu na levelinga; nemen uta lox asilok taradi mavana at limixin axap la nemen uta lox asi tara at levempanga axap nenu u lox i.

²²Nemen gat uta takas kusu una sa li lukngam to mavana at taradi ri lok lugugu at Leeme Silok, la nemen uta lok tooro tara mi laxakapmek teren, una lox adadat amisik lorooro ram.

²³Nemen uta inin dan kusuk mun; ketla una inin levengkondan kakalik at lavaen kusu ri lok tooro labalam, mila uk meres amisik.

²⁴Laxakapmek at leventaba i nemen saxaven mene, i epovo dik ataba ven kaka i; la nom laxakapmek atnedi imgomgo rinedi uto at loxot papaase; ketla laxakapmek at leventaba, taba ven ba ren melemu. ²⁵La kerepmo mun lentaba leven gugu nunuan i nemen saxaven, la mo leven gugu nunuan limixin kopmen dina ven i, naba nemen at lasaxaven.

6 ¹Nedi lavasaxaruki, dina lok ngangao at luvuttadi amgomgo atdi, kusu kopmen teta noxo vaase xapmek ti laasen at ne Moroa la at levenanasa bok atnama. ²Lavasaxaruki at luvuttadi nuunu, nemen di guta lox amangan luvuttadi amgomgo, mila nedi vam loxoeton di. Ketla i lox avukat do dina lok lugugu avukat tidi, mila nedi di ru orong mumu lugugu atnedi nom luvuttadi amgomgo atdi. Una lox ase limixin mi na levelinga.

Leveloklox Ase Xaxarang

³Do nege na anasa limixin mi levelinga vetpes, la kopmen na sixit eburu mi levelinga raturun at Leeme Silok atdik ne Iesu Karisito, la eburu bok mi levenanasa at lotu atdik, ⁴neni i umsu mi loklox asilok la kopmen naklen tevempanga. Lorooro ren kopmen na lox avukat; ni i vavara mun i xusu ni na etep mi levelinga la nak musak amisik; la na, i lox asuusu mun leretere mumu, lekarakat, la lavapaase xapmek, la lodoxoma xapmek; ⁵la lumukmusak naba nemen alolos amisik kantubu atnedi la lodoxoma atdi ba lok kapmek tino. La di doxoma i do lotu ni langas tip novos.

Lapnovos Tuturun

⁶Ketla do laradi i ruuna xobot ka vam leveloklok i nunuan la i lok momo mun mi mo lempanga i ruuna i, i lok ngan ta do neni ip novos aleng. ⁷Levempanga salai dik taga rupot eburu min ti na lavatbung menemen? Kopmen! La levempanga salai dik ata ba xip kaka i basinge na lavatbung menemen? Kopmen! ⁸Kuren la, mo do nedik ata ruuna levempanga anan mi levempanga singsiga, nom i epovo atdik. ⁹Ketla nedi di vara i do dinap novos aleng, di ekip tangarang mi leveloklok tong pen la di vonon axa at lara pelixo atnedi limixin tangtangu la mo laxandoxoma xakapmek atnedi i lox asubu di ukopok ti losongsongot la

labaava. ¹⁰Lavavara pilas ni lavasuun tinotno at laxaloklok kakapmek. Leventaba diga vara aleng kusu dina ruuna ka i la dira vas basinge vam lunuunu atdi la dira ekip tangarang mi loklok tuntun at lorooro atnedi.

Levelinga Ri Ne Timoti

¹¹Ketla nenu, laradi at ne Moroa, una ru asepsu at nai levempanga. La una lolos ti loklok mokmokso at ne Moroa, lunuunu, labalamu, la loklok ti tu lolos kantubu at levenmumuat, la lixitkis atnaasan. ¹²Unak sikit lolos at lekampoovo at lunuunu, kusu unaba ruuna ka mo lorooro i nemen amisik; ti mo mene lorooro ne Moroa ga ro ka u rin ap mo laaleng nenu ga vaase asu lunuunu ram to melamgo at limixin buang. ¹³At lemeren ne Moroa, neni im taba lorooro ri levempanga axap, la at lemeren ne Iesu Karisito, mo ga vaase mi luruturun to melamgo at ne Pontias Paelat; a sing lolos u do ¹⁴una mu asu ruturun na levelinga la nemen uta ke taxakapmek na nemen at lorooro ram, se at lovtopot at Leeme Silok atdik ne Iesu Karisito. ¹⁵Mo lovtopot teren naba vot akmokso at loxonalleng ne Moroa gara lok katling pam i; neni i umsu mi leveloklox anarong la neni xusuk mun lamgomgo atdik, Loorong Silok at lavaorong silok axap, la Leeme Silok ti lavaeme silok. ¹⁶Neni xusuk mun naba roo avolo la i nemen keneng at langangan laxasep la kovisi tara goxo ven tu ren, la tara noxo ven box i. Loklok ngangao xusuk tin eburu mi lololos amisik! Tuturun.

Levelinga Xavaxap

¹⁷Una vaase axasep di dip novos aleng mi laxampanga at na lorooro do nemen ditak lox asilok di, la di noxo lok li lodoxoma atdi keneng at levenapnovos at na lorooro, mila lapnovos noxo nemen amisik; ketla dina lok li levendoxoma atdi at ne Moroa xusuk mun, mo im taba amisik dik mi levempanga axap ti lox amomo dik. ¹⁸Una tong i ridi xusu dina lok mun luvukat, la dinap novos mi leven gugu nunuan, kusu dina episa levempanga atdi mi limixin petpes. ¹⁹At na mun langas dinaba lok li bubua lapnovos silok, mo ba nemen tangais di, ngan loogu avukat at lorooro melemu, la dina ruuna ka nom lorooro, ni lorooro ruturun.

²⁰Timoti, una lok tatao avukat nom lugugu ne Moroa gara raba vam u min. Una ke xepe levelinga kopmen at ne Moroa, la levelinga rangtangu; leventaba di so asen mo levelinga do “Levelinga at lakleklen;” ketla kopmen nak mokso. ²¹Leventaba di lok do di lok ka vam mo lakleklen la kerepmo dira lok kepe vam lunuunu atdi.

Letaba nabalamu at ne Moroa na nemen amisik eburu minu. I ruturun.

2 Timoti

Lovoang Sepsev Agepura At Ne Pol Saparap Ne Timoti

Levelinga Loklox Axasep

Levenmaares 67-68 A.D.

Anai ni lovoang sepsev agepura ri ne Timoti. Pol ga malagan i na lovoang to Rom at mo levenaleng neni ga nemen at loxokoxo. Diga lok li i at loxokoxo atla neni ga vavang mi ne Iesu Karisito. Pol ga doma i do noxo lox abao la dina sev amer i; kuren la at mo levenaleng neni ga malagan i na. Timoti neni laradi loklok tooro at ne Pol la nedu duga gugu buru la neni bok gamgomgo rinedi luvuttadi nuunu mo digak lok to Epesas. Timoti mi ne Pol du buru duga nuunu at ne Karisito; kuren la ne Pol ga so asen ne Timoti do lamdak teren. At nai lovoang Pol ga paase mumu labalamu ren ti ne Timoti la ni ga vara i do neni na tu lolos tip kip mo levesongsongot neni ga ven i xeneng atnedi di munepen mi ne Iesu Karisito. Pol ga vara box i do ne Timoti na raba axap lorooro ren ti levenanasa mokmokso.

Lengkot silok keneng at na lovoang:

- 1:1-7 Pol ga tong avukat ti ne Moroa mumu ne Timoti.
- 1:8–2:13 Timoti na tu lolos la na visik asu leven gugu nunuan.
- 2:14-16 Leveloklok katling ti lox ase dik mi luvuttadi gugu ruturun at ne Karisito.
- 3:1-9 At laxavaxap laxapmek at limixin naba su silok aleng.
- 3:10–4:5 Pol ga vaase alolos ne Timoti ri lugugu ren.
- 4:6-18 Lusumsuma at ne Pol mi lavavara ren.
- 4:19-22 Pol ga vaase abeese lentaba at lempapaase momo.

Lavapaase Axasep

1 ¹Nenia ne Pol, Luun Pavang at ne Iesu Karisito; Moroa ga soxolik ka ia xusu ana tong asu levelinga at lorooro keneng at ne Iesu Karisito.

²A malagan na levelinga ru ne Timoti; nenu lamdak orong tarak.

Letaba nabalamu, lebelemumu, la lenmila bok tu boro at ne Moroa ne Temen dik la ne Iesu Karisito, Leeme Silok atdik.

Levelinga Emi Asu La Loklox Alolos

³Nenia a tong avukat ti ne Moroa, nia a gugu rin ngan lavalabat tarak diga gugu rin la kopmen taxapmek i nemen keneng tarak. Nia a emi asu amisik mi ne Moroa at levenaleng kangking la levenaleng kanimin keneng at levesingising tarak. ⁴A doma su bok ap mo laaleng aga on basinge u la ugang teng; la a vara i do ana ven box u xusu lorooro rak naba umsu mi lomomo. ⁵A doma su bok at lunuunu ram. Lunuunu lolos bok ga nemen at lorooro at ne tubum ne Lois la at lorooro bok at nenam ne Iunis; la nenia aklen i do lunuunu lolos kerepmo ik lok bok at lorooro ram.

⁶Na mun i lavasuun teren la nia a vaase alolos u xusu unam tebeng alolos nom laramtaba ne Moroa gara raba vam u min ap mo loxonaleng nenia aga sa li lukngak mavana ram. ⁷Atla nom Loroonan ne Moroa ga raba dik min kopmen nak lox amarat dik, ketla Loroonan teren ik suxa aumsu dik mi lololos, labalamu la lodoxoma avukat.

⁸Kuren la nemen uta lok mamangan ti paase asu levelinga at Leeme Silok atnedik. La nemen uta lok mamangan mu box ia atla nenia a nemen at loxokoxo mumu ne Karisito. Ketla atap kip levesongsongot mumu Lagale Lavavang mi lololos ne Moroa ga raba dik min. ⁹Neni ga lox arooro dik la ga ro ka dik kusu ataba lok ngan limixin teren. Kopmen mumu levempanga dik gara lok pam i; ketla at lavavara ren, i lok ngan letaba nabalamu ren tidik keneng at ne Iesu Karisito; ni ga raba dik mi na letaba nabalamu avot ti luruntudum li at na lavatbung menemen. ¹⁰Ketla ne Iesu Karisito ga rupot pam de at na lavatbung menemen, la ga lox asuusu vam nom letaba nabalamu ren ngan Laradi Loklox Arooro atdik la ni ga lox axap lololos at lanmet. La at na levelinga at Lagale Lavavang ni ira lox asuusu vam lorooro avolo. ¹¹Ne Moroa gara soxolik ka vam ia ngan luun pavang la laradi loklox ase ri paase asu Lagale Lavavang. ¹²Ni lavasuun teren la nia arap kip levesongsongot; ketla nia move a tu lolos mila nia a nuunu at ne Iesu Karisito; la akleklen tinotno i do neni i epovo na lok tatao ia la na lok tatao bok mo lugugu ne Moroa ga raba ia min, se ap mo laaleng neni nabamlong teren.

¹³Unam tebeng alolos nom levelinga raturun at ne Moroa, nia aga anasa u min gano. Ni lampoovo una mumu asu i, la una nemen alolos at lunuunu ram; la labalamu ram saporap ne Iesu Karisito na nemen lolos.

¹⁴At lololos at Loroonan Kaala nom i nemen keneng at lorooro atnedik, una lok tatao avukat nom levelinga ruturun uga lok ka i.

¹⁵Uklen i do nedi axap limixin nuunu boro at lenep silok Asia eburu mi ne Pigalas la ne Eremogenes diga on basinge vam ia. ¹⁶Ketla a sing Leeme Silok do ni naba lox asuusu lebelemumu ren ti ne Onisiparas mido loxoetemen; atla neni gak lox alolos amisix ia la neni goxo lok mamangan do nia aga nemen at loogu xokoxo. ¹⁷Se neni ga rupot de Rom, neni ga puse ria se ni ga vuse ka ia. ¹⁸A sing Leeme Silok atdik dola neni na lox asuusu lebelemumu ren ti ne Onisiparas ap mo laaleng at Leeme Silok. Nenu u xasep nunuan do ne Onisiparas gak lok tooro aleng ia ro Epesas.

Laradi Esep Tuturun At Ne Iesu Karisito

2 ¹Timoti, nenu lamdak tarak. Nia a tong i na ru do una lolos at letaba nabalamu nedik tan tuuna ka i at ne Iesu Karisito. ²Unam tebeng alolos levenanasa nu uga ronga ia aga paase asu i at lemeren nedi buang limixin, una raba nedi limixin min no di epovo nam tebeng avukar i, la di epovo na lox ase limixin petpes bok min.

³Do levesongsongot na vot saporav u, una tu lolos at lunuunu ram kerekngan laradi esep at ne Iesu Karisito. ⁴Laradi esep i gugu lolos kusu laradi gomgo ren na lok momo min, la neni noxo gugu at teven gugu vetpes. ⁵Una lok ngan bok laradi ik sixit at lekampoovo. Do neni i vara na sixit polo nedi dik sixit eburu min, neni na mu asu avukat levelinga at luvuttadi di lok tatao mo lekampoovo. ⁶Una lok ngan bok laradi gugu taamang; neni i gugu lolos kusu neni avot na lok kaka loxot at levempipisik at laraamang. ⁷Una doxoma na levelinga nia a paase i, mila Leeme Silok naba lox axasev u mi lavasuun teren.

⁸Una doxoma ne Iesu Karisito, neni ga roo xat amlong basinge lanmet, neni livisik li at ne Devit. Anai levelinga ni Lagale Lavavang nia a vavang min. ⁹La nenia a ekip tangarang mi levesongsongot atla nia a vavang mi Lagale Lavavang, la di xoxo alis ia ngan laradi xapmek mi lavaros; ketla levelinga at ne Moroa xopmen na nemen at lavaros. ¹⁰Kuren la nia a tu lolos keneng at levesongsongot kusu ri lok tooro mo lavaanat soxolik at ne Moroa la kusu nedi bok dinaba lok kaka loklox arooro at ne Iesu Karisito la ri lox asuusu bok lisisixam avolo ren. ¹¹Na levelinga i ruturun;

“Do dik taga met buru vam min, dik ataba roo xat eburu bok min. ¹²Do dik tana tu lolos keneng at levesongsongot, dik tanaba lok tatao limixin eburu min. Do dik ata sev apkap kepe i, neni bok naba sev apkap kepe dik. ¹³Do dik kopmen ata ruturun, neni move na ruturun, mila neni noxo los polo levelinga ren.”

Laradi Gugu Rururun At Ne Moroa

¹⁴Una tong aronga amisik limixin at lotu mi na levelinga la una paase lolos tidi at lemeren ne Moroa do nemen dita etep mi levelinga. Na loklok ixo lok tooro di la naba lok kapmek lodoxoma at limixin tongtonga.

¹⁵Nenu xa una lolos kusu luruvtuvuk taram naba lox avukat at lemeren ne Moroa ngan laradi xopmen na lok mamangan mi lugugu ren, la neni i anasa avukat mi levelinga rururun at ne Moroa.

¹⁶Nemen uta paase eburu mi limixin di paase rangtangu la di paase ngan ta xopmen dina lok ngangao at ne Moroa; la mo loklok atdi i sat kaka limixin basinge ne Moroa; ¹⁷la levelinga xerepmo i lok ngan laxanabi silok, mo i anan labantuxu at laradi. Legepu radi du anasa xerepmo, ne Aimenias mi ne Pilatas. ¹⁸Nedu duga soogong basinge levelinga rururun at ne Moroa. La duga lok kapmek lunuunu at leventaba limixin, duga xarang di keretna, “Moroa ga lox arooro vam limixin at na lorooro la noxo lox axatu amlong bok ba limixin basinge lanmet.” ¹⁹Ketla levelinga at ne Moroa i tu lolos la kopmen tara i epovo na ba gili i. Diga lox amuat levelinga ren keretna,

“Leeme Silok ikleklen nedi ateren axa,”

Kex 16:5

la

“Nedi di tong asu i do nedi limixin at Leeme Silok, dina lok kepe laxakapmek at lorooro atdi.”

Ais 28:16

²⁰At loogu silok at lara leeme silok leventingtigon mo ik lok; diga lox i mi levempanga i nunuan ngan leven gol la levenuat gamgames. La leventaba leventingtigon bok diga lox i mi levengkonuna la diga vov i ro maxamang mi lengkongkangka mila leventaba di ove min at levenaleng silok, la mo leventaba vetpes di ove min at levenaleng gamasa. ²¹Lavasun at nom keretna; do tara i lok kepe leveloklok kakapmek teren, neni naba lok ngan nom leventingtigon avukat di anan min at levenaleng silok, atla ni i lok lugugu avukat ti leeme silok teren la ni i gagas kusu na lok leven gugu nunuan. ²²Kuren la una ke xepe leveloklok kakapmek, kerekngan loklok at luvuraa; la una lolos kusu una mu asu leveloklok keretna; loklok mokmokso, lunuunu, labalamu, la limila. Una lok na levempanga eburu minedi limixin di nuunu at Leeme Silok la nedi lorooro atdi i lok nunuan.

²³Ketla una nemen petpes basinge limixin tangtangu la di etep mi levelinga rangtangu. Limixin dik lok kerepmo, di lox asuusu levenekarakat. ²⁴Lasaxaruki at Leeme Silok, kopmen noxo lok levenekarakat, neni na etaba belen mi limixin axap, la neni lagale laradi loklox ase. ²⁵Neni na lok ngan laradi mulus do ni nak lox akmokso nedi xopmen dina etaba belen min, kusu ne Moroa naba siam ka amlong di la ni na doxoma xepe laxakapmek atnedi la dinabaklen lurururun. ²⁶La melemu levendoxoma atnedi naba xasep, la dina sixiro basinge lelixo at ne Satan, i ranga alis kaka di xusu dina rongga res teren.

Levenaleng Kavaxap

3 ¹Una xasep avukat at na levelinga. Ap mo levenaleng i auret ti laxavaxap at na lavatbung menemen, levenmumuat naba rupot saparap limixin nuunu. ²Buaang limixin dinaba doxoma xa di, di noxo ruuna bok ba labalamu ri limixin petpes, diba vavara solo lempilas, diba lox asilok axa di, diba emi asu xa midi, diba paase kapmek ti limixin petpes, di noxo ronga res at luvuttemen di mi luvutnen di, di noxo tong avukat ti tara, di noxo lok ngangao at ne Moroa. ³Labalamu noxok lok atdi, di noxo domampe laxakapmek leventaba vetpes di lox i ridi, diba lox asi tentaba mi levelinga, dixo mumu asu loklox avukat, diba esep amisik, la diba xopara ri leveloklok nunuan. ⁴Diba song araba limixin avukat ti limixin kapmek tip sep di, diba lok levempanga rangtangu, di noxo ruuna loklok ngangao, diba ngaongao aleng ti levempanga at na lavatbung menemen, la di noxo vara ne Moroa; ⁵diba lok ngan limixin lotu ketla diba tong i do kopmen tololos at lotu. Una nemen petpes basinge limixin kerepmo.

⁶Leventaba atnedi dit pas tangtagap ti lox ase limixin, la di etangas mi leventaba larakoenasun la di sat ka lodoxoma at lavakin, lunuunu atdi kopmen na lolos. Mo lavakin dip kip levenmumuat mumu leveloklok kakapmek atdi la soso mun di mumu asu lodoxoma kapmek atdi xa. ⁷Ding tonga res at nom luvuttadi xaxarang la dixo epovo naklen ka levelinga ruturun at ne Moroa. ⁸Gano ne Janes mi ne Jambris dugang tonga xepe levelinga at ne Moses la kerepmo bok nom luvuttadi xaxarang ding tonga xepe levelinga ruturun, limixin lodoxoma atdi xopmen na sixit nunuan la lunuunu atdi ira subu vam. ⁹Ketla mo lugugu xakapmek atdi ba xap soso, mila limixin axap diba xasep ap mo loklok tangtangu atdi, la diba lok ngan ne Janes mi ne Jambris.

Lempapaase Alii Ri Ne Timoti

¹⁰Ketla nenu u mumu asu avukat levenanasa rak la loklok tarak; ura lok kaka vam lorooro rak, la ura ven kibis lunuunu rak; ngan loklok mulus, labalamu la a tu lolos bok at lunuunu rak. ¹¹Nenu ukleklen i do limixin diga lox asongor ia mumu lunuunu rak, la agap kip levesongsongot kerepmo ro Antiok, Aikoniam, la to bok Listra. Mo levesongsongot ga lolos aleng, ketla nia aga tu lolos, la Leeme Silok ga lox aroo ia basinge di ap mo levenmenemen. ¹²Nedi axap di vara i xusu dina nemen mokmokso at lunuunu atdi saparap ne Iesu Karisito, dinabap kip levesongsongot. ¹³Ketla nedi limixin kapmek mi limixin pereven ka dinaba lok kapmek aleng, la diba xarang limixin la limixin petpes diba xarang nedi. ¹⁴Ketla nenu ne Timoti, unam tebeng lolos mo levelinga ruturun nia agara anasa vam u min la ura nuunu lolos teren. Ukleklen

di luvuttadi loklox ase ram. ¹⁵Ga vaxaru ka i ga lamdak kakalix u, ugaraklen pam levelinga at Lovoang Kaala, la u xasep teren. Na levelinga i epovo na lox axasev u mi langas ti lorooro mo do una nuunu at ne Iesu Karisito. ¹⁶Levelinga axap keneng at Lovoang Kaala, ne Moroa ga lox asuvos i la i lok tooro aleng nedi di anasa limixin; la di paase aronga limixin di lok laxakapmek; la di lox akmokso lorooro at limixin; la di lox ase limixin mi loklok mokmokso; ¹⁷kusu limixin at ne Moroa naba gagas kusu dina epovo ri lok leven gugu nunuan.

4 ¹At lemeren ne Moroa la at lemeren ne Iesu Karisito, mo naba ila mumu lorooro at limixin di rooro la at limixin diga met pam; la neni nabamlong la naba nemen ngan Loorong Silok. Kuren la a sing alolos u xeretna. ²Una vavang mi levelinga at ne Moroa. Una gagas at levenaleng axap ti tong asu i; una lox akmokso lorooro at limixin, una paase aronga di, la una paase tooro di; lorooro ram na umsu mi loklok mulus, ketla una lox ase nunuan limixin. ³Laaleng naba vot la limixin di noxo ronga xaka na levenanasa ruturun at ne Moroa, ketla dinaba mu asu lavavara atdi xa; diba ro xaka buaang lavaeme loklox ase xaxarang, kusu diba lox ase nedi mi levelinga di vavara nang tonga i. ⁴Diba ke xepe levelinga ruturun at ne Moroa la diba mu asu leventetere xaxarang. ⁵Ketla nenu ne Timoti, una lok tatao avukat lorooro ram at levenaleng axap; una tu lolos at lixipkip levesongsongot; una lok lugugu at laradi i vavang mi Lagale Lavavang, la una lox epovo leven gugu axap taram.

⁶Loxonaleng mo i auret ta do nenia ana met. Lanmet tarak ba lok ngan laramtaba saporap ne Moroa. ⁷Nenia aga lolos kusu ana sixit avukat at lekampoovo, la arak sixit pam at loxot i vaxalom, ketla am tebeng avarang lunuunu. ⁸Lavatbungorong tia i ngan luunun ti luvuttadi mokmokso mo i nemen tangais ia. Leeme Silok ni laradi rongtonga linga la loklok teren ik mokmokso, ni naba raba ia mi nom luunun ap mo laaleng neni nabamlong teren. La kopmen tia xusuk ketla tinedi bok di ngangais mi lodoxoma liplivi ri lomlong teren.

Levelinga Xavaxap

⁹Una lolos kusu una rupot soso de, ¹⁰mila ne Demas, ga vara lorooro at na lavatkangka la neni ga on basinge ia la gat pas uto Tesalonia. Kresen gat pas uto Galesia, Taitas ga onon uto Dalmatia. ¹¹Luk kusuk mene na i nemen eburu minia. Una lam ka bok ne Mak ude eburu minu atla neni i epovo na lok tooro ia mi lugugu. ¹²Nenia aga riki ne Tikikas uto Epesas. ¹³At lavatpas taram ude, uba lok kaka bok lavanga singsiga rak aga lok li i ro Troas at loogu at ne Sipas. Unaba lok kaka bok leven gun linga rak, a vara aleng mo leventaba, diga lox i mi labantuxu at levesipsip.

¹⁴Aleksanda, neni nom laradi i gugu aen, ni ga lok kapmek aleng lugugu rak. La Leeme Silok naba vorang mo laxakapmek teren mumu mo

lavanga neni ga lox i ria. ¹⁵Una lok tatao avukar u mila ne Aleksanda i tu pe alolos na Lagale Lavavang nedik ata paase asu i.

¹⁶Ap mo laaleng avot nenia aga tu at lavapaase, goxopmen tara ga rupot ti lok tooro ia, limixin axap tarak diga sixiro basinge ia. A sing ne Moroa do neni noxo vorang nom laxakapmek atdi. ¹⁷Ketla Leeme Silok ga nemen eburu minia la ni ga lox alolos ia, kusu nia aga epovo xusu ana tong asu Lagale Lavavang tinedi limixin kopmen di me Judaia la diga ronga i. La Leeme Silok ga lox aroo ia basinge lanmet. ¹⁸La neni naba lox aroo ia basinge leveloklok kakapmek axap, la neni naba lam abeles ia uto vana at laxalibet at Linintoo ren. Leemi asu amisik tin la kopmen taxavaxap teren. I ruturun.

Lavapaase Momo

¹⁹A lox aonon lavapaase momo ri ne Pirikila mi ne Akuila la tinedi axap di nemen to at loogu at ne Onisiparas. ²⁰Erastas ga nemen to Korin, la nenia aga on basinge ne Tropimas to Mailitas, atla neni ga meres.

²¹Una lolos kusu una rupot soso de avot ti laavat.

Iubulas, ne Pudén, Lainas, mi ne Kolodia di lox aonon lavapaase momo bok tu; nedi axap bok luvutneton dik di lox aonon levelinga momo ru.

²²Leeme Silok na nemen eburu mi lороonan taram. Letaba nabalamu at ne Moroa na nemen eburu minu. I ruturun.

Taitas

Lovoang At Ne Pol Saparap Ne Taitas

Levelinga Loklox Axasep

Lamaares 67 A.D.

Taitas neni xopmen laradi me Judaia, ketla mumu mun levenanasa at ne Pol, neni ga nuunu at ne Iesu Karisito. At mo lavatpas at ne Pol ti tong asu Lagale Lavavang, ne Taitas neni lara atdi la nedi diga emu tangtagap amisik. Pol ga riki ne Taitas la ni gatpas uto Korin ga gepura nga. Melemu ne Pol ga tong i ri ne Taitas la neni ga ravasu ngan laradi gomgo mavana at luvuttadi nuunu diga nemen to at losoxan Krit.

Lengkot silok keneng at na lovoang:

1:1-4 Lavapaase momo at ne Pol ti ne Taitas.

1:5-16 Lempapaase mumu luvuttadi amgomgo at limixin nuunu.

2:1-15 Levenanasa mumu leveloklok i nunuan.

3:1-11 Leveloklok nunuan ti lorooro at luvuttadi nuunu.

3:12-15 Lentaba lempapaase bok at ne Pol la lavapaase abeese.

Lavapaase Axasep

1 ¹Nenia ne Pol, lasaxaruki at ne Moroa la nenia laradi vavang at ne Iesu Karisito. Nenia a gugu rik lox alolos lunuunu at lavaanat soxolik at ne Moroa. Nia a vanasa nom limixin mi levelinga ruturun at ne Moroa xusu lorooro atdi nak mokso aleng, ²la dinam doma voovo ri lorooro avolo. Na lorooro avolo ne Moroa ga tong alii i ganoxa at lereot. La levelinga ren i ruturun tinotno, neni xopmen laradi xaxarang. ³La neni ga malagan katling na levenaleng kusu neni na lox asuvos na levelinga mumu lorooro avolo ri limixin; la neni ga soxolik ka ia xusu nenia ana

tong asu nom levelinga ren. Neni ne Moroa la neni Laradi Loklox Arooro atnedik.

⁴Nenia a malagan na levelinga ru ne Taitas, nenu u lok ngan ne nuruk tino, mila nenu u nuunu at ne Iesu Karisito xerekngan ia.

Letaba nabalamu mi lenmila tu boro at ne Moroa ne Temen dik eburu mi ne Iesu Karisito, Laradi Loklox Arooro atnedik.

Lugugu At Ne Taitas Ro At Losoxan Krit

⁵Nenia aga lok li u, ne Taitas, to Krit la aga on basinge u. Lavasuun teren keretna; leventaba leven gugu at lotu ro Krit kovisi na sixit avukat. La a vara i do una gugu axap nom levempanga nenia goxo epovo na gu axav i. Una soxolik ka tuvuttadi amgomgo ri lox ase limixin at laraugu lotu keneng at levenmenemen getgesara. Una lox i na, kerekngan nia aga tong i ru gano. ⁶Loklok ap mo luvuttadi mukun na lok nunuan la nedi getgesara dina epot ka leges atkin mun, la laxamdak mi laxaalik atdi dina nuunu at ne Iesu, la loklok atdi nak mokso aleng kusu limixin petpes noxo epovo na tong i do nom laxamdak mi laxaalik di lok amisik laxakapmek, la kopmen dinang tonga res.

⁷Nedi nom luvuttadi amgomgo dina lok tatao lugugu at ne Moroa maxeneng at lotu ren; kuren la lorooro atdi nak mokso aleng at lemeren limixin. Di noxo paase xuxurung. Nemen di tak musak soso, di noxo inin tangtangu mi lengkadan lolos. Nemen di ta vesepe. Nemen di ta vavara pilas solo. ⁸Ketla nedi dina lok maraose mi limixin boro vetpes; dina mumu asu loklok i nunuan ti lok tooro limixin; lodoxoma atdi na lox avukat mun; dina mumu asu loklok i nunuan; loklok atdi xopmen taxakapmek teren; la di epovo ri lok tatao avukat luruptuvuk atdi at lempanga ua xopmen na lox avukat. ⁹Nedi dinam tebeng lolos levelinga ruturun at ne Iesu xerekngan nia aga lox ase vam di min. Dina nemen kuren kusu dina lox alolos lunuunu at limixin mi levelinga ik mokso, la kusu dina lox akmokso lodoxoma atnedi limixin nuunu di xopara levelinga at ne Iesu.

¹⁰Una soxolik ka nedi, loklok atnedi ik mokso xerepmo; kusu dina sep pepe buaang nedi limixin nuunu ro Krit ding tonga xepe levelinga ruturun. Mo limixin di paase gamasa mun la di babala arup limixin. Nedi limixin me Judaia, mo dim tebeng alolos levelinga at ne Moses.

¹¹Una sep pepe di xusu di noxo vaase bok ba ro xeneng at laraugu lotu, mila dik lox ase limixin mi levelinga xopmen nak mokso la kerepmo dik lok kapmek lunuunu at limixin la dik lok kapmek bok lixitkis koetemen. Di lox i xerepmo xusu dina lok kaka levempilas la na loklok atdi i lok kapmek tinotno.

¹²Lara leeme vapaase me go Krit ga lok keretna, “Limixin me Krit nedi limixin kaxarang, loklok atdi i lok kapmek ngan lababo sio la nedi dik

molo at lugugu la di xoxo anan amisik.”¹³ Na levelinga ren i ruturun. Kuren la una vaase sok di, kusu dina tu lolos at lunuunu atdi. ¹⁴Una paase lolos bok tidi xusu di noxo mumu asu leventetere at lubungmixin me Judaia; la kusu di noxo mu asu levelinga atnedi ding tonga aie levelinga at ne Moroa. ¹⁵Di lok do leventaba leveluxa i xaala; ketla i lox avukat do limixin nuunu dina anan leveluxa axap; nedi limixin kakapmek kopmen dina nuunu at ne Iesu Karisito la di ke xepe leventaba leveluxa mila lodoxoma atdi xopmen na lox avukat la loklok atdi i lok bilinga. ¹⁶Di tong i do di nuunu at ne Moroa, ketla kopmen na ruturun; mila levempanga nunuan kopmen na ravasu at lorooro atdi. Loklok atdi i lok kapmek at lemeren ne Moroa la at lemeren limixin. Nedi limixin tongtonga xepe mun, la dixo epovo na lok tevempanga i nunuan.

Leveloklox Ase Nunuan Ti Luvuttadi Nuunu

2 ¹Ketla nenu ne Taitas, una lox ase limixin nuunu mi loklok nunuan ik sixit eburu mi levelinga at ne Moroa. ²Una lox ase luvuttadi mukun keretna; di noxo inin tangtangu mi laxadan lolos; dinam tebeng loklox avukat kusu limixin dina lok ngangao atdi. Levempanga axap dina lox i, na lox avukat mun la lunuunu atnedi nak mokso rinotno. Dina umsu mi labalamu. Dola teventaba dina lok tong pen di, di noxo subu, ketla diba tu lolos at lunuunu atdi.

³La kerepmo bok una tong i ri lavakin mukun keretna: luruptuvuk atnedi na dadat la na xaala, di noxo tere mumu tara, di noxo inin amisik lengkadan lolos. Ketla loklok nunuan na ravasu at lorooro atdi, kusu limixin dina ven di la dina mumu asu nom loklok nunuan atdi. ⁴Loklok atdi na lox avukat, kusu dina ba epovo na tong asu levelinga ri lavakin maxat keretna; dina balamu lavatlok atdi la dina balamu laxamdak mi laxaalik atdi. ⁵Dina mumu asu loklox avukat; luruptuvuk atdi na dadat; dina gugu avukat to xolonu atdi; dina lok tooro limixin axap; dinang tonga res at levelinga at lavatlok atdi. Dina mumu asu luruptuvuk nunuan, kusu limixin ma xamang at lotu di noxo epovo na tong i do levelinga at ne Moroa i lok kapmek.

⁶La kerepmo bok una tong i ri luvuraau maxat do dina mumu asu loklox avukat. ⁷At levempanga axap nenu una lok leveloklok i nunuan ngan lampoovo ridi xusu nedi bok dina lok levempanga nunuan. Dola una lox ase limixin, una paase ruturun tidi la levelinga ram nak sixit nunuan, ⁸la una vavang bok mi levelinga nunuan, kusu nedi di munepen midik, di noxo epovo na vaase mumu dik, ketla diba lok mamangan.

⁹La una tong i ri lavasaxaruki do nedi dinang tonga res at luvuttadi amgomgo atdi at levempanga axap; la dina gugu avukat kusu luvuttadi amgomgo atdi diba lok momo mi lugugu atdi; la nemen di guta vorang linga mi levelinga xapmek ti luvuttadi amgomgo atdi. ¹⁰Nemen ditap

kip pilo xaka levempanga at luvuttadi amgomgo atdi; ketla dina mumu asu loklok nunuan kusu luvuttadi amgomgo atdi diba ven i, do di epovo na gugu avukat at levempanga axap. Dina mumu asu na leveloklok kusu limixin kopmen dina nuunu at ne Iesu dinaba ven kibis i do levelinga at ne Moroa, leeme loklox arooro atdik, i lox avukat tinotno.

¹¹Nom limixin nuunu dina mumu asu avukat levelinga at ne Moroa, mila ne Moroa ga lox asuusu letaba nabalamu ri limixin axap, neni ga riki ne Iesu Karisito xusu na lox arooro di. ¹²Kuren la ata ke xepe leveloklok kakapmek keretna; dina ke xepe lorooro xapmek; nemen dik ta puse lolos ti levempanga at na lavatbung menemen; nemen dik gutak lok tangtangu, ketla lorooro atdik na dadat; la ata lok mo levempanga ne Moroa i vara i at na lavatbung menemen kopok. ¹³La kerepmo atam tebeng loklox avukat ap mo levenaleng atat kis tangais ti mo langsgangan laaleng avukat, la lovtopot nunuan at ne Iesu Karisito, neni ne Moroa silok atdik la neni Leeme Loklox Arooro atdik; neni naba rupot mi lisisixam silok at ne Temen. ¹⁴Neni ga raba i xusu neni na un kaka amlong nedik basinge laxakapmek atdik ngan limixin dadat la kusu tana nemen ngan limixin teren kusuk mun la tana lolos ti lok leven gugu nunuan.

¹⁵Na levelinga a tong pam i ru, ne Taitas, una anasa limixin me Krit min, kusu una lox alolos lorooro atdi mi na levelinga; la kerepmo bok una vaase sok di, atla kopmen torooro avukat atdi. La tara atdi guta lox abulubun kepe u, mila nenu leeme vapaase at ne Moroa.

Luruptuvuk At Limixin Nuunu

3 ¹La ne Taitas, una tong box i ri nom limixin nuunu do dina doxoma mumu lixitkis atdi maxopok at lagavaman mi lavaeme silok; la dinang tonga res at levelinga atdi la dina gagas kusu dina lok leven gugu nunuan; ²la di noxo paase xapmek mumu tara; ketla limila na nemen at lebelen di; dina balamu limixin; la dina lok ngangao ruturun at limixin axap, limixin nuunu la limixin bok maxamang at lotu.

³Gano nedik limixin ta goxoklen lorooro avukat, ta goxo ronga res at levelinga at ne Moroa la levelinga bok at lavaeme silok. Satan ga xarang dik la tagara puse ri levempanga at na lavatbung menemen; la taga mumu mene nga lavavara atnedik. Lorooro atdik ga umsu mi laxakapmek mi levereven peves at lempanga at limixin petpes; la limixin diga musak dik la ta goxo epen avukat.

⁴Ketla loklok nunuan la labalamu at ne Moroa, Laradi Loklox Arooro atdik ga rupot, ⁵la neni ga lox arooro dik. Neni goxo lox arooro dik mumu leven gugu nunuan atdik; ketla neni ga balamu gamasa mun dik. Lebelemumu ren ni lavasuun at loklox arooro ren. Moroa ga lox arooro dik keretna; Loroonan Kaala ren ga gos kepe vam leveloklok kakapmek

atdik la ga raba dik mi livipisik amaxat. ⁶Moroa ga sak tiki Loroonan Kaala ren saparap dik kusu na lok tooro dik; i epovo xuren, mila ne Jesu Karisito, Laradi Loklox Arooro atdik, ga uu nop loklok atdik. ⁷Kuren la ne Moroa ga lox asuusu letaba nabalamu ren tidik, la kerepmo diga tong i do nedik limixin mokmokso; la kerepmo nedik ta lok ngan laxamdak teren la dik tanaba ruuna ka lorooro avolo. ⁸Na levelinga mumu loklox arooro at ne Moroa i ruturun; la una lolos ti tong asu amisix i ri limixin nuunu me Krit, kusu dina lolos ti lok leven gugu nunuan. Na leven gugu nunuan i lox avukat la i lok tooro limixin axap.

⁹Ketla nemen uta vetep mi levelinga at levempanga gamasa. Na levelinga i lok ngan ta levenasen at lavalabat at lubungmixin me Judaia, la i lok ngan bok levelinga ik lok to xeneng at Lenavolo at ne Moses. Una ke na levempanga, mila na levempanga noxo lok tooro limixin nuunu. ¹⁰Una vaase sok nege taradi i lok leven ekarakterat. Do neni move na lox axis epeseves limixin, una vaase sok box i. Dola neni noxo ronga res at levelinga ram, una ke xepe i. ¹¹Una lox i xuren mila limixin kerepmo lodoxoma atdi i xaxarang arup di la lorooro atdi i umsu mi laxapmek. La mo laxapmek teren i lox asuusu i do levelinga bok teren i lok kapmek.

Levelinga Loklox Axap

¹²Leventaba levelinga bok na, nenia ana tong i ru. Ana sak tiki ne Atemas kopla ne Tikikas saparav u. Dola neni na rupot, neni na lok kun u la una lolos ti vot pasa ia ro at lemenemen Nikopolis; nenia aba nemen go at leven gaaling at laavat.

¹³La una lok tooro avukat ne Sinas, laradi likling at levelinga, eburu mi ne Apolos at lavatpas atdu. Una lok taba du mi levempanga duk pakes tin ti mo lavatpas. ¹⁴La limixin axap atnedik, dina lolos amisik ti lok leven gugu nunuan kusu diba lox epovo lavakpakes atdi la diba lok tooro limixin petpes.

¹⁵Nema eburu mi limixin nuunu dik lok de, ma lox aonon lavapaase momo ru. Una raba bok lavapaase momo atnema rinedi limixin di etangas minema xeneng at lunuunu atnedi.

Letaba nabalamu na nemen eburu minemi axap. I ruturun.

Pilimon

Lovoang At Ne Pol Saparap Ne Pilimon

Levelinga Loklox Axasep

Lamaares 62 A.D.

Pilimon neni laradi gap novos aleng; la neni bok laradi nuunu boro at lemenemen silok Kolosi. Ne Pilimon ga ruuna lara laradi ga ngan laradi gugu teren la neni ga lasaxaruki mene laasen teren ne Onesimas. Na lasaxaruki ren ga sixiro basinge ne Pilimon. Ni ga sixiro la ga ekip tangarang mi ne Pol ap mo levenaleng neni gak lok at loxokoxo. At lempapaase ren eburu mi ne Pol ne Onesimas ga leeng la ga nuunu at ne Iesu Karisito. Pol mi ne Onesimas dugak lok buru la ne Pol ga vara i do ne Onesimas namlong; kuren la neni ga malagan i na lovoang uto ri ne Pilimon. At nai lovoang ne Pol ga paase ti ne Pilimon la ga vara i do neni na lok ka amlong ne Onesimas mi lomomo. Neni naba lok ka amlong i mi lomomo, kopmen do neni lasaxaruki ketla atla neni eburu minedi di nuunu at ne Iesu Karisito.

Lengkot silok at na lovoang:

- 1:1-3 Levelinga momo at ne Pol ti ne Pilimon.
 - 1:4-7 Pol ga tong avukat ti ne Moroa mumu ne Pilimon.
 - 1:8-22 Pol ga vara i do ne Pilimon na lok ka amlong ne Onesimas.
 - 1:23-25 Pol ga vaase abeese.
-

Lavapaase Axasep

¹Nenia ne Pol, nia a nemen de at loogu xokoxo mila nenia a tong asu Lagale Lavavang at ne Iesu Karisito. Timoti, neton dik, ik lox eburu minia.

Nema mi ne Timoti ma malagan na lovoang tu, ne Pilimon. Nenu lentangas avukat atnama la nu laradi gugu at ne Moroa ngan nema. ²Na

lovoang bok ti ne Apia, neni i lok ngan neinen nama, la ti ne Akipas, neni bok laradi gugu at ne Moroa ngan nema, la tinedi limixin nuunu di lotu amisik to at loogu ram.

³Letaba nalamu eburu mi lenmila tu boro at ne Moroa ne Temen dik la Leeme Silok, ne Iesu Karisito.

Lisingising At Ne Pol

⁴Do nenia a ngising amisik ne Moroa, a tong avukat amisik tin mumu u, ne Pilimon; ⁵mila ang tonga i do lunuunu ram saparap Leeme Silok, ne Iesu i lolos, la u balamu bok limixin teren. ⁶A sing ne Moroa do lixitkis ekilen atnema eburu minemi limixin nuunu naba lox asuusu avukat leveloklox anarong ne Karisito im taba dik min. ⁷Netak orong. Nenia a lok momo aleng la lorooro rak i lolos atla nom labalamu silok taram saparap limixin nuunu i umsu aleng. La kerepmo bok uga lox alolos lorooro at limixin axap di nuunu.

⁸Nenia a epovo ana vaase basabas tu mila nenia laradi gugu at ne Karisito, ⁹ketla nia noxo vaase lolos, ana paase mi labalamu. Nenia a tu katling ne Iesu Karisito la at na loxonaleng nia a nemen to at loogu xokoxo. ¹⁰La nia a sing u mumu ne Onesimas, neni i lok ngan lamdak tarak mila neni ga ru kaxat lunuunu maxat nade at loogu xokoxo. ¹¹Ganoxa neni ga gugu ru, neni goxo gugu avukat, ketla na nga lingina i epovo na lok tooro avukar u, la na lok tooro box ia.

¹²Ana riki amlong i udom saparav u, a balamu aleng i. ¹³I lox avukat do neni na nemen eburu minia xusu neni na lok tooro ia mi Lagale Lavavang de at loogu xokoxo. Nenu xopmen unak lok de xusu unaba lok tooro ia, ketla ne Onesimas, i lok ngan ta i lok kun u. ¹⁴Nenia aga vara i do neni na nemen be de eburu minia, ketla neni lasaxaruki ram kuren la nenia a noxo lox alis gamasa i. I lox avukat do una sep siam be. ¹⁵A lok do neni ga sixiro basinge u at leventaba leven gaaling mene, ketla neni naba nemen amisik eburu minu ngan netam tinotno xeneng at ne Karisito. ¹⁶Neni noxopmen lasaxaruki mene nga, neni naba lok ngan netam orong la ba lok lempanga avukat tu. Neni ik lok tooro aleng ia ketla neni naba lok tooro aleng tinotno u ngan lasaxaruki la neni netam tinotno at Leeme Silok.

¹⁷Dola u doma i do nenia lentangas avukat taram, una seega rangarang i ngan u seega rangarang ia. ¹⁸Do neni ga lok kapmek tevempanga ram kopla neni ga nem kaka tevempanga, nenia aba vorang i ru. ¹⁹Nenia ne Pol, a malagan na levelinga ru. Na levelinga rak i raturun la nenia anaba vorang levempanga ram. Ketla una doma i do nenia aga lok tooro u xusu una lok ka lorooro. ²⁰Netak. Una siam ka ne Onesimas kusu naba lok ngan lavanga avukat tia at laasen at Leeme Silok la uba lox amomo aleng ia.

²¹A malagan na levelinga la aklen tinotno i do nenu unaba rong a res tarak la uba lok levempanga vetpes bok tia. ²²La lara lavanga bok. Una gagas li toxot mikmidi ria. A lok do ne Moroa naba vorang levesingising atnemi xusu nenia aba vot pasa bok nimi.

²³Epapras neni i lox aonon lavapaase momo ren tu. Neni bok na ik lok at loogu xokoxo atla neni ga tong asu Lagale Lavavang at ne Iesu Karisito. ²⁴La nedi bok di gugu eburu minia di lox aonon lavapaase momo ru; ne Mak, ne Aristakas, ne Demas, ne Luk, la nedi axap di gugu eburu minia.

²⁵Letaba nabalamu at Leeme Silok ne Iesu Karisito na nemen eburu minemi. I ruturun

Ibru

Lovoang Ti Limixin Me Ibru

Levelinga Loklox Axasep

Levenmaares 67-69 A.D.

Se ne Iesu ga urut uto vana at laxalibet, lavantun sangaun mi lavalimo levenmaares ga men pe i la lara ga malagan i na lovoang tinedi limixin me Judaia, diga so asen bok di do leme Ibru. Laradi ga malagan i na lovoang kopmen neni goxo malagan li laasen teren. Na limixin me Ibru nedi diga nuunu at ne Iesu, la lentaba luvuttadi diga lox asongot di la diga doma i do dinamlong ti loklok at lotu atnedi me Judaia la dina ke xepe lunuunu atdi keneng at ne Iesu Karisito. Laradi ga malagan i na lovoang tinedi ga vaase pe di do nemen di, guta mu asu i na. Ne Iesu Nitna ne Moroa neni mun i silok ti ne Moses; ne Iesu neni langomgo ruturun at lotu, neni im gomgo nga nedi luvuttadi di lok leven gugu at lotu. Lara langas mo ga nemen kusu ti sev amet lempanga mi lavanuet kangkedek atdi xusu dinam taba min ti ne Moroa, anai ni lenep at lekabus migomgo, ketla ne Iesu ga lok kepe mo loklok, neni ga vot at na lavatbung menemen kusu ri lok pes laxapmek basinge dik, neni ga met la ga raba labantuxu ren. Laradi ga malagan na lovoang ni ga lox axasep na langas tinedi xusu nedi di noxo repes basinge ne Iesu, ketla dinam tembeng atmatkun teren.

Lengkot silok keneng at na lovoang:

1:1-4 Moroa ga tu asuvos min tidik keneng at ne Nitna.

1:5-2:18 Karisito neni i silok tinedi lubungangelo.

3:1-4:13 Karisito neni i silok ti ne Moses.

4:14-7:28 Karisito neni i silok ti lubungmaasa.

8:1-9:28 Lekabus maxat ne Karisito ga lox i, ni i silok ti lekabus migomgo.

10:1-39 Lada at ne Karisito i silok aleng ti lada at lempanga mi lavanuet kangkedek atdi.

11:1-40 At lunuunu mun nedik tabak mokso.

12:1-13:19 At lurutu alolos mun atdik, nedik ata nuunu mun at ne Karisito la ata rongga res teren.

13:20-25 Levelinga loklox abeese.

Nitna ne Moroa I Silok Ti Lubung Angelo

1 ¹Ganoxa ne Moroa ga vaase ri lavalabat atdik at levenngusno nedi lavaeme vapaase alii, at levengkonalleng getgesara la at leventaangas axap. ²Ketla at na levenaleng melemu at lovtopot at ne Iesu, Moroa ira paase nga ridik limixin nuunu at lungusno ne Nitna. Neni ga soxolik ka i xusu naba ruuna ka levempanga axap, la keneng at ne Iesu, ne Moroa ga rudum li levempanga axap. ³Ne Nitna i lox asuusu lisisixam at ne Moroa la ni lampenaxa rinotno ren. Ne Nitna i lok tatao levempanga axap at na lavatbung menemen la mo levempanga i mumu asu levelinga ren i lolos aleng. Neni ga lok langas ti limixin kusu dina dadat basinge laxakapmek; melemu at na, neni ga xis to at lekngen tino at ne Moroa i silok to vana at laxalibet. ⁴Kuren la neni ga ruuna ka lixitkis silok mavana at lubung angelo, kerekngan mo laasen neni ga ruuna ka vam i, ni laasen i silok tidi.

⁵Moroa goxo vaase ri tara ta angelo do,

“Nenu ne Nuruk, ningina nenia a lok ngan ne Tamam.”

Sam 2:7

La ni goxo vaase mumu taangelo xeretna,

“Nenia aba lok ngan ne Temen, la neni ba lok ngan ne Nuruk.”

2 Sml 7:14

⁶La at loxonaleng ne Moroa ga riki asi lamdak avot teren ude xopok ti na lavatbung menemen, neni ga lok,

“Lubung angelo axap tarak dina lotu saparav i.”

Len 32:43

⁷Moroa ga vaase mumu lubung angelo la neni ga lok,

“Nenia a lok lubung angelo rak dip tava soso mene ngan lamanman, la nedi di lok ngan lavasaxaruki rak la di lolos ngan levenbabao at laxao.”

Sam 104:4

⁸Ketla neni ga lok ti ne Nitna xeretna,

“Nenu ne Moroa, lixitkis orong taram naba nemen amisik la amisik la nenu uba lok limixin axap kusu diba mu asu loklok mokmokso ram.

⁹Nenu u vavara aleng ti lomokmokso la u xopara ri laxakapmek; kuren la Moroa, ne Moroa ram ira suxa aumsu vam u mi lomomo i silok aleng, mo i volo lomomo atnedi larapen tangas taram.”

Sam 45:6,7

¹⁰Neni ga lok bok ti ne Nitna xeretna,

“Nenu Leeme Silok, ganoxa at lereot uga rudum li lavatbung menemen mi laxalibet mi lukngam. ¹¹Na levempanga uga rudum li di, naba sonao la diba lok ngan lempanga gamasa, ketla nenu uba rooro amisik. La dinaba rem teterek ngan labantamon. ¹²Uba vegun pes di ngan labanmo mikmidi, la ngan lavanga singsiga uba soxun kepe i, ketla nenu xopmen unak lox ekun lodoxoma ram, la kopmen bok taxavaxap at lorooro ram.”

Sam 102:25-27

¹³Moroa goxo vaase ri tara atnedi lubang angelo xeretna do,
 “Una xis de at lakngak tino, se nenia aba lok nedi di munepen minu,
 ngan loxot burubut ti luxangkedek taram.” *Sam 110:1*
¹⁴Lubung angelo nedi leventoonan avukat mun, dik lok tooro ne Moroa;
 la neni ik sak tiki di rik lok tooro nedi limixin ne Moroa ga soxolik ka
 vam di xusu dinaba lok kaka loklox arooro.

Minam Tebeng Lolos Lunuunu Atnimi

2 ¹Nitna ne Moroa ga raba dik mi loklox arooro, kuren la minam
 tebeng lolos lunuunu atnimi mumu mo levenanasa miga ronga ka
 vam i, kusu mi noxo soogong basinge mo lunuunu. ²Lubung angelo diga
 raba ne Moses mi Lenavolo la ixo epovo do tara na los polo i. Do nege
 ga ronga xepe i xopla goxo mu asu i, neni ga ba lok ka losongsongot
 ga epovo at loklok teren. ³La kerepmo bok do nedik ata ronga xepe
 Lagale Lavavang, ixo epovo do nedik taba sepsu basinge lebelemamao
 at ne Moroa. Leeme Silok neni avot ga ru ka lavavang at langas ti loklox
 arooro, la nedi luvuttadi vavang diga ronga xaka mo levelinga ren, la
 diga lox aruturun i ridik. ⁴Moroa ga lox asuusu box i do mo levelinga ren
 i ruturun mi leveloklok katling la levempanga sangsangu la leventamtaba
 at Loroonan Kaala, ne Moroa gara epes pam limixin teren min, ga epovo
 at lavavara ren.

Iesu Ga Ravasu Ngan Limixin

⁵Moroa goxo lok li lubang angelo xusu dibam gomgo ri limixin ap mo
 lemenemen move naba vot melemu, na nema ma paase mumu i. ⁶Ketla
 limixin at ne Moroa dibam gomgo ri lavanga axap kerekngan lara ga tong
 i keneng at Lovoang Kaala; i lok keretna,

“Ua lavasuun teren la nenu ne Moroa u doxoma mu solo limixin, la
 labalam ik lok mu laxamdak atdi? ⁷Nenu uga raba limixin mi levenasen
 silok, ketla ik lok maxopok kakalik at lubang angelo, la uga lox anarong di
 mi lixitkis silok kusu diba ruuna ka leemi asu la loklok ngangao. ⁸Uga tong
 li i do una lox asilok di xusu diba lok tatao mo levempanga axap.” *Sam 8:4-6*
 Ne Moroa ga lok li levempanga axap maxopok at loklok tatao atdik,
 kopmen goxo ke xepe tavanga. Na lingina kovisi nedik ata ven i do
 levempanga ik lok maxopok at loklok tatao atdik. ⁹Ketla nedik ata ven
 kibis i do ne Iesu neni ga ruuna lixitkis silok tinedi lubang angelo, la ne
 Moroa ga lox asi lixilik mun i maxopok atdi xusu na xip lumumuat at
 lanmet ti lox asuusu lodoxoma at ne Moroa do limixin axap diba lok ka
 lorooro avolo. Kuren la lingina Iesu ira lok ka vam lixitkis silok la limixin
 di lok ngangao ren.

¹⁰Gak mokso do ne Moroa, neni ga rudum li levempanga axap la i lok
 tatao bok di, do neni na ke xepe ne Iesu xusu neni na xip laxasongsongot

kusu na lox agagas avukat ti lugugu ren. Kuren la neni ga ruuna ka laasen do Lamgomgo at langas ti loklox arooro la ga lok ka bok buaang limixin kusu dina ruuna ka loklox arooro. ¹¹Ne Iesu eburu minedi limixin ni ga lox adadat di, dik lok keneng at legesa xitkis koetemen. Kerepmo la ne Iesu neni i lok momo aleng ti tong di do luvutneton. ¹²Neni ga lok ti ne Moroa,

“Nenia anaba tong asu laasen taram ti luvutnetak la anabak pixan emi asu minu ro melango at lovtopot buru atdi.” *Sam 22:22*

¹³La ne Iesu ga lok bok,

“Aba nuunu at ne Moroa kerekngan di.” *Ais 8:17*

La ga lok bok,

“Nenia na, ak lox eburu mi limixin ne Moroa ga raba ia midi.” *Ais 8:18*

¹⁴I ruturun do nedi luvuttadi mun, la kerepmo ne Iesu ga vee radi xusu at lanmet teren neni naba sele utut kepe lololos at ne Satan, mo ik lok limixin kusu dinak marat at lanmet. ¹⁵Ketla ne Iesu ga lox asepmus di basinge loxokoxo at ne Satan, mila at lorooro axap atdi xeneng ap mo loxokoxo, digak marat at lanmet. ¹⁶La na nedik ta ven kibis i do neni goxo vot ti lok tooro lubang angelo, ketla neni ba lok tooro nedi di ruuna lunuunu ngan ne Abaram. ¹⁷Kuren la na lavasuun teren la neni ga vee radi at lorooro axap teren ngan luvutneton kusu neni ba ravasu ngan laradi ga umsu mi lebelemumu la laradi ruturun at lugugu at lamaasa gomgo ri ne Moroa, la ga ravasu ngan laxaavuk kusu ne Moroa na doxoma xepe laxakapmek at limixin. ¹⁸Neni xa ga xip lumumuat at loxonaleng ne Satan ga lok tong pen i, ketla ne Iesu goxo subu, kuren la neni i epovo na lok tooro nedi di ekip tangarang mi leveloklok tong pen.

Iesu I Silok Ti Ne Moses

3 ¹Luvutnetak mi luvurinuk. Nemi bok lavaanat soxolik at ne Moroa mo ga ro ka vam nimi ngan limixin teren. Kuren la mo levempanga ne Iesu gak lox i, ni na veve mam pixan amisik tidik. Iesu, neni Luun Pavang la Lamaasa Gomgo. La na nedik dira nuunu ren. ²Neni ga ruturun ti ne Moroa mo ga soxolik ka i ri lugugu ren, kerekngan ne Moses ga ruturun ap mo levenaleng neni gak lok tatao limixin at ne Moroa. ³La ne Iesu ga ruuna ka laasen i silok ti ne Moses, kerekngan mun laradi gugu gu, neni i ruuna laasen silok ti mo loogu neni i lox i. ⁴Na i ruturun mila levenabung mixin getgesara di ruuna lara laradi ga lok li di; ketla ne Moroa ga lok li levempanga axap. ⁵Moses ga ruturun ngan laradi gugu ri lok tatao limixin at ne Moroa la neni ga paase asu levempanga ba vot melemu. ⁶Ketla ne Karisito i ruturun at lugugu ri lok tatao limixin at ne Moroa xerekngan lanarong i lok tatao libibinat teren. Do atam tebeng lolos lunuunu atdik la tana ngangais mi lomomo ri lomlong teren, i lox asuusu i do nedik limixin at ne Karisito.

Loklok Mamana Ri Limixin At Ne Moroa

⁷Nedik limixin at ne Karisito, kuren la nemen mita ronga xepe levelinga ren. I ngan levelinga at Lovoang Kaala, Loroongan Kaala ga vaase i xeretna,

“At na loxonaleng do mina ronga levelinga at ne Moroa, ⁸nemen gat mita lox alolos lebelen nimi xerekngan lavalabat atnimi diga ronga xepe ne Moroa ap mo levenaleng ne Moroa ga lok tong pen lunuunu atdi ro at lamatbin.” *Sam 95:7-8*

⁹La ne Moroa ga lok keretna,

“Lavalabat atnimi diga lox amusax ia ro at lamatbin, la at lavanuet sangaun maares diga ven levempanga sangsangu nenia aga lox i. ¹⁰Ana i lavasuun teren la nia aga belemamao limixin ap mo loola. La aga lok, ‘Lebelen di i onon petpes amisik basinge ia, la kopmen ta dinaklen leventaangas tarak.’ ¹¹Kuren la aga vangpe at lumukmusak tarak do, ‘Di noxo vubeles tinotno at loxot loklok mamas tarak kusu dina rooro avukat.” *Sam 95:9-11*

¹²Luvutnetak mi luvurinuk. Mina lok tatao avukat nimi xusu tara atnimi noxo ruuna taxakapmek la loklok ting tonga xepe levelinga at ne Moroa xeneng at lorooro ren, la kerepmo na sok tixirixes kepe ne Moroa, mo i rooro. ¹³Ketla at na levenaleng nemi move mi rooro ren, mina epang aru xusu laxakapmek noxo solo arup tara atnimi la lebelen na repe ri levelinga at ne Moroa. ¹⁴Nedik tabat kis esogo mi ne Karisito do nedik tam tebeng lolos lunuunu se at laxavaxap at lorooro atdik, kerekngan nedik taga nuunu ruturun ap mo levenaleng taga lok kaka lunuunu maxat. ¹⁵I lok ngan Lovoang Kaala i tong i do,

“At na levenaleng do mina ronga levelinga ren, nemen gat mita lox alolos lebelen nimi xerekngan nedi lavalabat atnimi diga ronga xepe ne Moroa.” *Sam 95:7-8*

¹⁶Nege di nom diga ronga laxaka at ne Moroa la melemu diga ronga xepe i? Nedi mo limixin me Israel, ne Moses ga lam asu ka di boro Isip. ¹⁷At lavanuet sangaun maares diga lok laxakapmek la diga raba arulu ne Moroa. Kuren la ne Moroa ga musak di la buaang atnedi diga remet eteke mun to at lamatbin. ¹⁸La ne Moroa ga vangpe do di noxo vubeles tinotno ri mo loxot loklok mamas teren, mila diga ronga xepe levelinga ren. ¹⁹Kuren la nedik di ven i do buaang atnedi di goxo lox epovo i xusu dina vubeles mila di goxo nuunu at ne Moroa.

Loklok Mamas Ti Limixin At Ne Moroa

4 ¹Lumusaragu move i rem suang kusu ri pubeles ti mo loxot loklok mamas teren; kuren la mina lok tatao avukat nimi xusu teventaba atnimi di noxo subu kot ti mo loklok mamas. ²Nemi bok miga ronga Lagale Lavavang

kerekngan nedi diga rongga i. Ketla mo lavavang diga rongga i, goxo lok tooro di mila di goxo nuunu ren. ³Mo nga nedik dira nuunu vam, i lok ngan ta do tara vubeles pam ap mo loxot loklok mamas kerekngan ne Moroa ga tong i do,

“Kuren la aga vangpe at lumukmusak tarak do, ‘Di noxo vubeles tinotno at na loxot loklok mamas tarak.’”

Sam 95:11

Ketla lugugu ren gara xap pam ga ru ka i at luruntudum li at na lavatbung menemen. ⁴To xeneng at Lovoang Kaala ne Moroa ga vaase mumu laaleng sepsev avanuti mi na levelinga,

“At laaleng sepsev avanuti, Moroa ga lox amas basinge leven gugu axap teren.”

Lur 2:2

⁵La ap mo levelinga a tong pam i, i lok bok keretna,

“Di noxo vubeles tinotno ri loxot loklok mamas tarak.”

Sam 95:11

⁶I raturun do leventaba move diba vubeles ap mo loxot loklok mamas.

La nedi gano diga rongga Lagale Lavavang, di goxo vubeles teren mila diga rongga xepe levelinga at ne Moroa. ⁷Kuren la ne Moroa ga lok katling bok lara laaleng, ga soxor i do ningina. La at leventaba levenmaares melemu at lavatpas su at leeme Israel boro Isip, neni ga vaase at lungusno ne Devit kerekngan levelinga neni ga tong i gano, ga lok keretna,

“At na loxonaleng lingina, do mina rongga laxaka ren, nemen gat mita lox alolos lebelen nimi.”

Sam 95:7,8

⁸Do ne Josua gita raba di mi loklok mamas ap mo levenaleng neni ga lam abeles limixin uto Kanan, Moroa xopmen gixo vaase bok ba melemu mumu taaleng petpes, kusu nedik taba lok ka loklok mamas teren. ⁹Loxonaleng ti vubeles to xeneng at loxot loklok mamas at ne Moroa move i rem suang ti limixin teren. ¹⁰Do tara i ruuna loklok mamas at lorooro ren, neni ira on basinge vam lugugu axa ren at na lavatbung menemen. I lok ngan ne Moroa ga lok mamas basinge lugugu ren. ¹¹Kuren la mina raba axap lodoxoma atnimi xusu mina vubeles ap mo loklok mamas la kopmen tara noxo subu kot la na mu asu lampoovo atnedi leme Israel, diga raba arulu ne Moroa.

¹²Levelinga at ne Moroa i ruuna lorooro la i lolos aleng; i lok ngan lavarise i anan evan, mo i tara xoxorop laranin etudum la laramomodong atdik; la kerepmo bok levelinga at ne Moroa i pubeles uto xa xeneng at lodoxoma la lorooro atdik kusu na lox asu leveloklok kakapmek; kuren la nedik toxo epovo xusu ata lipe at lemeren ne Moroa, neni ikleklen levendoxoma atdik la levesumsuma at lebelen dik. ¹³Kopmen tevempanga at na lavatbung menemen axap i epovo na nemen ali pe at lemeren ne Moroa. Neni ne Pen Axasep la i reven leveloklok axap at limixin dim doma i xopla dim suma i, la neni naba lok li limixin at lavapaase mumu mo leveloklok.

Iesu Neni Lamaasa Avolo

¹⁴Nedik di ruuna Lamaasa Avolo, neni ga urut pam uto vana at laxalibet, la mo nga it kis at lekngen tino at ne Temen. Neni ne Iesu,

Nitna ne Moroa. Kuren la nedik atam tebeng lolos mo lunuunu atnedik tagara ruuna ka vam i. ¹⁵Mo Lamaasa Avolo atdik, neni i epovo na suma rooro dik at leveloklok tong pen mila neni ga suma bok laxaloklok tong pen ngan dik, ketla neni xopmen goxo lok taxakapmek. ¹⁶Kuren la nemen dik guta marat kusu tana vot pasa ne Moroa mi lodomdoma atdik mila neni i umsu mi lebelemumu la nedik taba ruuna ka letaba nabalamu ren la loklok tooro do nedik atak pakes tin.

5 ¹Lavamaasa amgomgo axap Moroa i soxolik ka di xantubu at limixin kusu dina ru katling di at lugugu at ne Moroa. Dim taba leventamtaba ri tong loklox avukat ti ne Moroa la diplavang bok mi levempanga mi lavanuet kangkedek ti laxakapmek at limixin. ²Lamaasa gomgo im suma leveloklok tong pen, kuren la i epovo do ni na suma rooro nedi di lok laxakapmek mila kopmen dinaklen i do mo levempanga i lok kapmek. ³Ni lavasuun teren la lamaasa gomgo naba lok laplavang mi levempanga ri laxakapmek axa ren, la ri laxakapmek bok at limixin.

⁴Kopmen na epovo do tara na lok ka mo lugugu mi lavavara mun teren, ketla ne Moroa xa naba soxolik ka i ngan neni ga soxolik ka ne Aron. ⁵La ne Karisito bok kopmen goxo xip ka mo lugugu silok at lamaasa gomgo mi lavavara ren. Ketla ne Moroa ga lok tin keretna, “Nenu ne Nuruk, ningina nenia a lok ngan ne Tamam.” *Sam 2:7*

⁶La at loxot petpes at Lovoang Kaala Moroa ga lok bok tin keretna, “Nenu Lamaasa Avolo ngan ne Melkisedek, la kopmen taxavaxap at lugugu ram.” *Sam 110:4*

⁷Ap mo levenaleng ne Iesu ga rooro ren at na lavatbung menemen, neni ga sing eburu mi lerengteng silok ti ne Moroa do na lox arooro i basinge lanmet, la ne Moroa ga sepo lisingising teren la ga lox alolos i mila neni ga lox asi i maxopok at lavavara at ne Moroa. ⁸I ruturun do neni ne Nitna ne Moroa, ketla mo losongsongot neni gap kiv i, ga lox epovo i xusu na mu asu lavavara at ne Temen. ⁹Kerepmo la ne Moroa ga lox agagas li i, la neni ga ravasu ngan ta lavasuun at lorooro avolo rinedi ding tonga res teren, ¹⁰la ne Moroa ga lok li i ngan Lamaasa Avolo ngan ne Melkisedek.

Nemen Mita Subu Kot Kantubu

¹¹Ma ruuna laxalinga solo mumu ne Iesu ngan Lamaasa Avolo, ketla naba lolos ti mus na levelinga rinimi mila lodoxoma atnimi kopmen na gagas ti lok ka na levenanasa. ¹²At na levenaleng i epovo do mina lok ka lugugu ri anasa limixin mi levelinga at ne Moroa; ketla kopmen mina epovo mila move mik pakes kusu tara na lox ase amu manga nimi mi levenanasa avot at levelinga at ne Moroa. I lok ngan ta do nemi move mi lok ngan lubang kadede, di tus at luvutnen di; kovisi mina epovo kusu mina anan leveluxa lolos. ¹³Lara do i rooro mi ladan tus at nenen,

i ngan laxadede; i lok ngan ta do nemi xovisi mina ven kibis levempanga i lox avukat la levempanga i lok kapmek. ¹⁴Ketla tinedi dira mukun pam at lunuunu atdi, di epovo dina ven kibis levempanga i lox avukat la levempanga i lok kapmek, mila dik lok kaka amisik levelinga at ne Moroa.

6 ¹Kuren la nemen mitam tebung mun mo levenanasa miga lok ka avor i, i lox avukat kusu mina lolos ti lok kaka levenanasa at ne Karisito kusu miba ravasu ngan limixin mukun. Mina ke be mo levenanasa avot, i lok keretna, laanasa mumu loklok ti leeng basinge laxakapmek kusu mo laxakapmek noxo lox asuusu lanmet; laanasa mumu lunuunu ri ne Moroa; ²laanasa ri lesepe susu; laanasa ri loklok ti sa li levengkikngen mavana at teventaba rik lox anarong di; laanasa ri laxakatu kaxat basinge lanmet; la laanasa ri lugugu at ne Moroa ngan laradi rongtonga linga at laaleng ete. ³Do ne Moroa na mulus, mina ke be na levenanasa la mina lok kaka be mo levenanasa mumu.

⁴⁻⁶Nedi limixin diga rongga Lagale Lavavang la diga nuunu ren la digara suma vam lomomo at lorooro avolo la digara lok ka vam Loroonan Kaala, la digaraklen pam lorooro nunuan ne Moroa ga vaase alii min ti limixin, la digara ven pam ne Moroa ga lok levempanga sangsangu; do mo limixin dina raba arulu ne Moroa, ixo epovo xusu dina leeng basinge mo laxakapmek mila ap mo mun loklok i lok ngan ta do nedi xa dira vaxarem amu manga ne Nitna ne Moroa ro at laxaba, la kerepmo dira lok li manga i at lainmangan to at lemeren limixin.

⁷Lavapaase poovo mumu i na loklok i lok keretna. Laxantaamang do larakabu it pot amisik teren la i lox asuusu levempipisik nunuan naba lok tooro nedi di gugu i, la mo laxantaamang naba ruuna ka loklox anarong at ne Moroa. ⁸Ketla do livin gagas mi laxampivilis kapmek kusuk mun na su ap mo laxantaamang, mo laxantaamang i lok kapmek axap, la i nemen maxopok at lebelemamao at ne Moroa, la kopmen bok ba tara noxotlo tevempanga go.

⁹Larapen tangas tarak. Ma paase lolos tinimi xetla nemen mita doma solo i nom, mila ma nuunu ruturun do leveloklok i nunuan naba ravasu atnimi, mo levempanga naba lox asuusu i do mira lok ka vam loklox arooro. ¹⁰Moraa neni laradi mokmokso la neni noxo domampe leveloklok nunuan nemi miga lox i, la mo labalamu nemi miga lox asuusu i at laasen teren ap mo levenaleng miga lok tooro limixin teren la move mik lok tooro di. ¹¹Nema ma vara i do nemi getgesara mina lox asuusu leveloklok kerepmo se at laxavaxap at lorooro atnimi, la kerepmo miba ruuna ka ruturun mo leveloklox anarong mim doma ngangais tin. ¹²Ma xopara i do mina molo at lunuunu atnimi xetla mina mu asu loklok atnedi lavalabat atnimi diga tu lolos amisik at lunuunu atdi la digat kis tangais mo leveloklox anarong ne Moroa ga paase alii min tidi.

Lavapaase Alii At Ne Moroa Naba Sorun

¹³Ap mo laaleng ne Moroa ga lok lavapaase alii ren ti ne Abaram, neni ga vara i do na lox amumuat levelinga ren, ketla goxopmen tara ga silok tin kusu neni naba vangpe min; kuren la neni ga vangpe xa mi laasen teren. ¹⁴Mo lavapaase alii ren ga lok keretna, “At laasen tarak nia anaba lox anarong u, la livipisik li ram dinaba umsu aleng.” ¹⁵La ne Abaram gat kis atnaasan mun la ga ngangais ne Moroa, se ni ga lox asorun mo lavapaase alii rin.

¹⁶Do tara i vara na vangpe, neni na vangpe mi laasen at laradi i silok tin; la mo lavangpangpe naba lox amuat levelinga ren. Lavangpangpe i epovo ri lox axap leven ekarakterat. ¹⁷La ne Moroa ga vara i do limixin teren dibaklen tuturun i do neni naba lox epovo levelinga ren tinedi la diba ruuna ka leveloklox anarong neni ga vaase alii min tidi; kuren la neni ga lox amuar i mi lavangpangpe. ¹⁸Legepu vanga mo ik lok kusu na lox amuat levelinga ren, i lok keretna; lavapaase alii ren la lavangpangpe ren, la ixo epovo do ne Moroa na xarang limixin. Kuren la ne Moroa ga lox i na xusu na lox alolos lunuunu atnedi diga on basinge laxakapmek kusu dina rebeng kaka mo levempanga nunuan ne Moroa ga vaase alii min. ¹⁹Nedik takleklen i do ne Moroa naba lox asorun levempapaase alii ren, kuren la lebelen dik it kis aulis ngan lese pang it kis aulis do di sepkaa alis i ro xopok at lavaruat. La kerepmo bok i epovo do nedik tana xis esogo mi ne Moroa no vana at laxalibet; i lok ngan gano lamaasa ga vubeles at loxot i xaala aleng, mo loxot gak lok to melemu at lavatbantamon silok to xeneng at loogu laplavang. ²⁰La kerepmo bok ne Iesu gamgo ridik uto vana xusu na lok lugugu ngan Lamaasa Avolo kerekngan ne Melkisedek, la lugugu at Lamaasa Avolo noxo xap.

Melkisedek Neni Lamaasa

7 ¹Na leeme ne Melkisedek, gano neni loorong silok to Salem la neni lamaasa at ne Moroa i silok aleng. Neni ga ekip tangarang mi ne Abaram at laaleng ne Abaram eburu mi limixin teren digamlong boro at lesep no diga sep kepe leventaba lavaorong silok la limixin atdi; la ne Melkisedek ga lox anarong i. ²La ne Abaram ga raba ne Melkisedek mi loxot i sev asangaun ap mo levempanga neni ga lok kaka i ap mo lavaorong silok.

Avot, lavasuun at laasen ne Melkisedek do, “Loorong silok at loklok mokmokso;” la laasen bok do loorong silok boro Salem i epovo mi levelinga xeretna, “Loorong silok at lenmila.” ³Nedik kopmen ataklen leretere at ne temen mi nenen la leretere at lavalabat teren, la dik taxoklen i do diga visix i la ni ga met lingisa. La kerepmo Nitna ne Moroa i lok ngan ne Melkisedek, mo i nemen amisik ngan lamaasa.

⁴Mina doma i do ne Melkisedek ga silok aleng. Ataklen i do neni ga silok mila ne Abaram, Temen nedi lubangmixin me Israel ga raba i mi loxot i sev asangaun ap mo levempanga ni ga lok kaka i at laaleng neni ga esep eburu mi lavaorong silok. Mo loxot ga lox avukat aleng. ⁵Lenavolo i tong i do livipisik li at ne Levi mo digap kip lugugu ngan lavamaasa, dinak lok ka loxot i sev asangaun boro xa at limixin atdi, keke i do nedi axap mun livipisik li at ne Abaram. ⁶Na laradi ne Melkisedek, neni goxopmen livisik li at ne Levi, ketla neni ga lok ka loxot i sev asangaun boro at ne Abaram, ni ga ruuna ka lavapaase alii boro at ne Moroa la ne Melkisedek ga lox anarong i. ⁷La i rurun aleng do lara i silok, neni na lox anarong mo lara i lixilik tin. La kerepmo ne Melkisedek ga silok ti ne Abaram. ⁸La nedi limixin me Israel diga raba loxot i sev asangaun ti lavamaasa; mo lavamaasa di goxo rooro amisik, ketla ne Melkisedek nedik kopmen ataklen i do neni ga met, limixin di lok do move i rooro. ⁹I epovo na tong i do ne Levi la lavamaasa melemu ren, dik lok kaka loxot i sev asangaun boro at limixin me Israel, nedi xopmen na silok ti ne Melkisedek, mila lurubuno di ne Abaram ga raba ne Melkisedek mi loxot i sev asangaun. ¹⁰I epovo ana tong i xuren mila ap mo laaleng ne Abaram ga raba ne Melkisedek mi loxot i sev asangaun, i lok ngan ta do ne Levi mi lavamaasa melemu ren diga raba ne Melkisedek mi loxot i sev asangaun, keke i do luvutnen di goxovisi visik di.

Iesu Neni Lamaasa Ngan Ne Melkisedek

¹¹Limixin me Israel di goxo epovo do dina dadat basinge laxakapmek mila xopmen di goxo epovo xusu dina mu asu avukat leventaangas la levelinga at lavamaasa mo digak lok at libibinat at ne Levi; mo leventaangas, ni lavasuun at Lenavolo, ne Moroa ga raba limixin me Israel min. Kuren la limixin digak pakes ti lamaasa vetpes kusu na vot, la ba lok ngan ne Melkisedek; neni noxo lok ngan ne Aron mi lavamaasa at libibinat at ne Levi. ¹²La ne Moroa ga soxolik ka Lamaasa vetpes kusu na lox adadat limixin basinge laxakapmek, kuren la neni ga lox ekun Lenavolo mi lekabus maxat, mila do tara na lox ekun leventaangas at lavamaasa, neni na lox ekun bok Lenavolo. ¹³La mo Lamaasa vetpes, neni ne Iesu la neni at libibinat petpes la goxopmen tara ap mo libibinat ga ruuna ka lugugu ngan lamaasa. ¹⁴I xasep do Leeme Silok atdik, neni at libibinat at ne Juda, la ne Moses kopmen goxo tong i do teventaba at na libibinat naba ravasu ngan lavamaasa. ¹⁵La levelinga atnama mumu lekabus maxat i xasep aleng mila lamaasa vetpes kerekngan ne Melkisedek gara vot pam. ¹⁶Lenavolo i tong i do, nedi mun at libibinat at ne Levi, di epovo xusu dina xip ka lugugu ngan lavamaasa. Ketla ne Iesu ga lok ka mo lugugu at langas petpes. Neni ga lok ka i mila neni ga ruuna lololos silok la kopmen taxavaxap at lorooro ren. ¹⁷I lok ngan ne Moroa ga tong i at Lovoang Kaala, levelinga ren i lok keretna,

“Nenu unaba nemen amisik ngan lamaasa kerekngan ne Melkisedek.”

Sam 110:4

¹⁸Moroa ga vaxaxis ase Lenavolo at ne Moses mila goxopmen ta tololos teren la kopmen ta goxo epovo ri lok tooro limixin; ¹⁹la Lenavolo xopmen goxo epovo na lox adadat limixin basinge laxakapmek. La ne Moroa ga lok li langas maxat, i lox avukat ti Lenavolo la maxeneng ap mo langas maxat, i epovo do tana xis esogo mi ne Moroa.

²⁰La ne Moroa ga vangpe do ne Iesu na xip ka lugugu at lamaasa, ketla ne Aron la lavamaasa melemu ren diga xip ka mo lugugu ketla goxopmen tavangpangpe at ne Moroa ridi. ²¹Ketla ne Moroa ga vangpe do ne Iesu na lok ka lugugu ngan lamaasa at laaleng ne Moroa ga lok tin keretna,

“Leeme Silok ne Moroa ga vangpe vam la neni noxo lox ekun lodoxoma ren. Ni ga lok, ‘Nenu naba nemen amisik ngan lamaasa.’” *Sam 110:4*

²²Moroa ga vangpe xerepmo, kuren la ne Iesu neni i lok ngan losoksoxoba pe ri lekabus maxat, mo i nunuan aleng ti Lenavolo.

²³Buaang atnedi lavamaasa amgomgo diga lok lugugu mila diga vekukun mi lugugu do lara ga met. ²⁴Ketla ne Iesu, kopmen taxavaxap at lorooro ren la kerepmo neni bak lox amisik lugugu at lamaasa. ²⁵Kuren la neni i epovo na lox arooro rinotno nedi di vosiga ne Moroa, mo do dina nuunu sogo at ne Iesu; mila ne Iesu naba nemen amisik saparap ne Moroa la na ngising i xusu na lok tooro di.

²⁶Lamaasa gomgo xerepmo i lox epovo lavakpakes atdik; luruptuvuk teren i nunuan axap, neni xopmen goxo ronga xepe levelinga at ne Moroa, goxopmen taxakapmek gak lok teren. Ap mo levenaleng neni ga nemen de at na lavatbung menemen neni goxo vubeles ti laxakapmek eburu mi limixin kapmek; la melemu ne Moroa ga lox asilox i ro vana at laxalibet. ²⁷Neni xopmen goxo lok ngan mo leventaba lavamaasa amgomgo, nedi xa digaplavang amisik ti laxakapmek atdi, la ti laxakapmek bok at limixin; ketla ne Iesu ga lok laplavang ti laxakapmek at limixin axap, ni ga lok legesa laplavang mun, at laaleng ni ga raba lorooro ren kusu na uu nop loklok atdik. ²⁸Maxeneng at Lenavolo luvuttadi diga lok lugugu ngan lavamaasa amgomgo, la lorooro atdi goxok mokso xerekngan ne Iesu. Ketla ne Moroa ga raba limixin mi Lenavolo, la melemu ni ga vangpe do ne Nitna na lok kaka lugugu at lamaasa gomgo, luruptuvuk teren nabak mokso amisik.

Iesu Neni Lamaasa Gomgo At Lekabus Maxat

8 ¹Lavasuun at na levelinga atnama i lok keretna. Nedik ta ruuna lamaasa gomgo xerepmo, mo it kis at lekngen tino at loxonin orong at ne Moroa i silok aleng, to vana at laxalibet. ²Neni ik lok lugugu at ne Moroa ro xeneng at loxot i xaala aleng mo ik lok at loogu raturun, kopmen limixin di goxo lox i, ketla ne Moroa xa ga lox i.

³Nedi axap, lavamaasa amgomgo dip kip lugugu xusu dina raba ne Moroa mi leventamtaba la levementa laplavang, la kerepmo bok i epovo do Lamaasa gomgo ne Iesu na ruuna tavanga xusu ni na raba ne Moroa min. ⁴Do neni gik lok nade at na lavatbung menemen, neni gi toxo ruuna ka lugugu ngan lamaasa mila leventaba luvuttadi mo gik lok pam kusu ri raba leventamtaba ngan Lenavolo i tong i. ⁵Nedi di gugu ro at loxot kaala nade xopok at na lavatbung menemen, na loxot kaala neni lampoovo mun ap mo loxot kaala no vana at laxalibet. Ni lavasuun teren la ne Moroa ga vaase lolos ne Moses at laaleng neni ga lok do na xip loogu kadis at ne Moroa, la ne Moroa ga lok tin keretna, "A vara i do una xip avukat na loogu ngan lampoovo nia aga lox ase u min to at lakaana Sinai." ⁶Ketla mo lugugu ne Iesu ga lok ka i, i lox avukat ti lugugu at lavamaasa mede xopok, i ngan bok lekabus maxat i lox avukat ti lekabus migomgo; la leveloklox anarong at lekabus maxat i lox avukat ti leveloklox anarong at lekabus migomgo. La ne Iesu neni lavasuun at lekabus maxat, ni ga lok lumulum kantubu at limixin mi ne Moroa.

⁷Lekabus migomgo goxo epovo na lox axis eburu ne Moroa mi limixin, kuren la ne Moroa ga lok lekabus maxat. ⁸Moroo ga ven kibis i do lekabus migomgo goxo epovo mila limixin diga soogong aleng; ni ga lok, "Mina ronga i na. Laaleng mo naba vot la nia anaba lok lekabus maxat mi limixin tarak to Israel la limixin tarak at libibinat me Juda. ⁹Mo lekabus maxat ba lok petpes ti lekabus migomgo, mo nia aga lox i eburu mi lavalabat atdi ap mo levenaleng nia aga lam asu di boro Isip. Nia aba lok lekabus maxat mila di goxo ruturun ti lekabus migomgo, la nia aga raba arulu di. ¹⁰Nenia ne Moroa, mina ronga na levelinga. Melemu nia anaba lok lekabus maxat mi limixin me Israel. Mo lekabus naba lok keretna; nia anaba lox adoxoma di mi levelinga rak, la anaba buradong levelinga rak keneng at lebelen di. Nia anabat kis esogo midi la anabak lok tatao di ngan limixin tarak. ¹¹Kopmen bok ba tara naba anasa lentangas teren kopla neton mi levelinga keretna, 'Unaklen ne Moroa.' Mila nedi axap dinaba xis ekilen eburu minia; nedi limixin silok la limixin gamasa bok. ¹²Nia anaba doxoma xepe laxakapmek atdi la nia noxo domangke rinotno bok ba at laxakapmek atdi." *Jer 31:31-34*

¹³Moroo ga soxot na lekabus do lekabus maxat, kuren la Moroa ga ke xepe lekabus migomgo mila kopmen bok ba tugugu ren la ma lixilik na sonao axap.

Leveloklok At Lekabus Migomgo

9 ¹At lekabus migomgo Moroa ga raba leme Israel mi leventaangas kusu dina mu asu i ri lok leven gugu xeneng at lotu, la diga bak kangkan loxot silok ti lotu saparap ne Moroa. ²To xeneng teren diga xip lara loogu kadis. La keneng ap mo loogu kadis diga lok legepu xonnep

gu; at loxonnep gu avot diga lok li loxot kusu lababao bak lok teren, la loxonin eburu mi levengkongkide gak lok bok teren, mo levengkongkide di etaba min ti ne Moroa. Na loxot diga soxor i do loxot kaala. ³To melemu at na loxonnep gu, ni lenep gu i sev agepura; diga soxor i do loxot i xaala aleng tino. Lara lavattamon ga merem to xantubu ri lox epeseves mo lunep gu. ⁴To melango at lavattamon lara loxonin laplavang mo gak lok, diga lox i mi logol la digaplavang go mi levempavaxan una ga so mavak; la to xeneng at loxot i xaala aleng tinotno, lara lobokis bok mo gak lok, diga vop pe i ro maxeneng la maxamang teren mi logol. Mo lobokis ga lok katling lekabus ne Moroa ga lox i eburu mi limixin teren. To xeneng ap mo lobokis lara lavanga lukluxa mo gak lok, diga lox i mi logol, la keneng teren diga lok li levengkoluxa ap mo leveluxa limixin me Israel diga anan i ro at lamatbin; diga so asen i mi lamaana; lakdak bok at ne Aron no ga suudun, gak lok go xeneng, la legepuxon uat no ne Moroa ga malagan li lasangaun Lenavolo ren. ⁵To mavana at na lobokis luvanga raptava at ne Moroa mo dugak lox asuusu lisisixam silok boro vana at laxalibet, duga tu puvung mo loxot, ua lavamaasa diga sep susu i mi lada at levempanga mi lavanuet kangkedek atdi xusu ne Moroa na doxoma xepe laxakapmek at limixin. Ketla mo nga nia xopmen na epovo kusu ana re axap na levempanga.

⁶Melemu at na, do digara lox agagas li vam na loogu kadis, lavamaasa diga ru ka ba i kusu dina lok leven gugu atdi. Diga pubeles uto xeneng mun at lenep gu avot at levenaleng axap ti lok lugugu atdi ngan lavamaasa. ⁷Ketla lamaasa gomgo xusuk mun neni ga pubeles ti mo loxonnep gu maxeneng tino, mo loxot ga xaala aleng tinotno. Neni ga vubeles go at leges aleng mun keneng at legesa maares. Neni goxo pubeles gamasa, ni ga ba pubeles axa eburu mi lada at levempanga mi lavanuet kangkedek. La neni ga lok letaba mi mo lada ti laxakapmek teren la laxakapmek bok at limixin do digara soogong pam, ketla di goxoklen i do mo levempanga ga lok kapmek. ⁸Loroonan Kaala i lox ase dik, mumu na lavanga do langas povolo uto saporap ne Moroa goxovisi rem suang, ap mo levenaleng loogu kadis move ga tu. ⁹Ana lavanga ni lampoovo mun ti na levenaleng ti lox asuusu i do leventamtaba la levelaplavang diga etaba min kopmen goxo epovo na lok kepe loklok mamangan at laxakapmek atnedi diga etaba mi mo levempanga. ¹⁰Mo leveloklok ti laanan la liinin la leventaangas ti sogos panga, mo leventaangas ga nemen mun kusu mo limixin dina mumu asu i se at laaleng lekabus maxat ga vot.

Lada At Ne Karisito

¹¹Ketla ne Karisito ga vot ngan Lamaasa Avolo xusu na lox agagas leveloklox anarong at lekabus maxat, ne Moroa im taba limixin teren

min. Neni xopmen goxo vubeles at loogu kadis mede xopok, ketla neni ga vubeles uto xeneng at loxot i xaala aleng la i lox avukat aleng no vana at laxalibet, mo loxot limixin kopmen di goxo lox i mi levengiknngen di. Lavasuun at na do mo loxot kopmen nak lok de at na lavatbung menemen la ixo epovo nedik ataba ven i mi levengkatli atdik. ¹²Karisito xopmen goxo lok kaka lada at lubulumaxao la at lavatme la ga vubeles min, ketla neni ga vubeles mi lada axa ren ti mo loxot ga xaala aleng no vana at laxalibet, la ga lok letaba min at legesa xonaleng mun, ga lox i xuren kusu na un avolo dik mi lada ren la dik ataba ruuna ka lorooro avolo. ¹³Lada at laxanme la laxanbulumaxao la laxakup at lanat bulumaxao diga kotos i, lamaasa gomgo ga sep susu limixin min, nedi nom diga lok laxakapmek kusu dina dadat to maxamang mun. ¹⁴Ketla na loklok at lekabus migomgo kopmen na epovo mi mo lavanga ne Karisito ga lox i. At loklok tooro at Loroonan at ne Moroa neni ga raba xa i ri ne Moroa ngan laplavang avolo, goxopmen taxakapmek teren, kusu na lox adadat dik basinge laxakapmek mo ba lox asuusu lanmet. Kerepmo i epovo do ata mu asu lavavara at ne Moroa, mo i rooro.

¹⁵Kuren la Karisito, neni laradi ga lok lumulum kantubu at limixin mi ne Moroa, la at na langas neni ga lok lekabus maxat. La nedi ne Moroa gara soxolik ka vam di, diba ruuna amisik leveloklox anarong neni ga vaase alii min tidik. Karisito ga met ngan laxaavuk kusu na lox asepmus limixin teren basinge laxakapmek diga lox i ap mo levenaleng diga mumu lekabus migomgo.

¹⁶⁻¹⁷Do temen lara i auret na met, neni i epes laxamdak teren mi levempanga ren, ketla nedi noxo ruuna ka soso mo levempanga do neni move i rooro. Se do ne temen di na met, i epovo ba do mo laxamdak dina ruuna ka mo levempanga at ne temen di. ¹⁸Ni lavasuun teren la lada at lavanga mi lavanuet kangkedek do ga met pam, ga lox alolos lekabus migomgo. ¹⁹Ne Moses ga tong asu vam levenngas linga at Lenavolo ri limixin axap, neni ga lok ka lada at levempatnat bulumaxao, la ga lox eburu i mi ladan. La neni ga lok lavanga sep susu mi lavatkabinim sipsip diga lox amemele i la mi levengkakan una at luuna isop. Neni ga lok ka lada min la gap sep susu lugun linga at Lenavolo la limixin bok. ²⁰Moses ga lok keretna, “Na lada neni loklok katling at lekabus no ne Moroa ga tong i do ata mumu asu i.” ²¹La at nom langas neni ga sep susu loogu kadis la levempanga axap diga lok mo lugugu at ne Moroa min. ²²I ruturun aleng do levempanga axap diga lok mo lugugu min, diga lox axaala di mi lada xerekngan Lenavolo i tong i. La do lada noxo sen, Moroa noxo doxoma xepe laxakapmek at limixin.

²³Kuren la ga epovo do limixin dina lox adadat mo levempanga at loogu kadis mi lada at levempanga digaplavang min. Ketla mo levempanga at loogu kadis ni lampoovo mun ap mo levempanga no vana at laxalibet. Ketla

mo levempanga ruturun no vana at laxalibet gak pakes ti lada at ne Karisito; la mo lada ren i lolos aleng ti lada at laxanbulumaxao, la mo lada ren ik lox agagas li mo loxot tidik. ²⁴Karisito goxo lok lugugu ren to xeneng at loxot kaala limixin diga lox i; mo loxot ni lampoovo mun ap mo loxot tuturun no vana at laxalibet. Ketla neni ga vubeles to vana at laxalibet kusu na tu ro at lemeren ne Moroa la na ngising i ri lok tooro dik. ²⁵Neni ga vubeles uto vana at laxalibet, kopmen tim taba amisik lorooro ren ngan lamaasa gomgo ga pubeles amisik mi lada uto xeneng at loxot i xaala aleng at levenmaares axap, ketla mo lada xopmen lada axa ren. ²⁶Do ne Karisito gita mumu mo loklok, neni gitaba suma amisik losongsongot, ga ru ka i at lavakpaxaru kaxat at na lavatbung menemen. Ketla at na levenaleng kavaxap, ne Karisito ga vot gesara mun kusu na raba lorooro ren ngan laplavang ti lok kepe laxakapmek la ti lox arooro dik basinge lololos at laxakapmek.

²⁷Limixin axap dinaba met la melemu at na, Moroa ba lok li di at lavapaase. ²⁸La kerepmo ne Karisito ga met gesara mun ngan laplavang kusu na lox adadat buaang limixin basinge laxakapmek atdi; la neni nabamlong bok sev agepura, kopmen ti met nop loklok atdik, ketla neni naba lox arooro rino nedi dit kis tangais i.

Karisito Ga Raba Lorooro Ren

10 ¹Lenavolo at leme Judaia ni lampoovo mun ti mo leveloklox anarong at ne Moroa mo naba vot. Lenavolo ni xopmen mo leveloklox anarong. Kuren la mo leveloklok tiplavang diga lox amisix i at levenmaares axap, goxo epovo rinotno xusu na lox adadat nedi diga vosiga ne Moroa kusu dina lotu saparav i. ²Do gita epovo na lox adadat di, na loklok tiplavang to gita xap pam. Mila mo langas i epovo giba lox adadat tinotno limixin, la kerepmo di gitoxo epovo na suma lainmangan bok ba mumu laxakapmek atdi. ³Ketla mo levelaplavang ga lox adoxoma mun limixin mi laxakapmek atdi la kerepmo digam suma lainmangan, ⁴mila ixo epovo do lada at laxanbulumaxao la laxanme na lox adadat limixin basinge leveloklok kakapmek atdi.

⁵Kuren la ap mo loxonaleng ne Karisito ga lok do na si ude at lavatbung menemen, neni ga lok ti ne Moroa xeretna,

“Labalam goxo ru levelaplavang la leventamtaba, ketla ugam doma gagas kusu uba riki asi ia la anaba vee radi ngan limixin kusu anaba raba u minia ngan laplavang. ⁶U goxo lok momo mi leventamtaba diga xotos i ro at laxao la leventamtaba diga etaba min ti lok kepe laxakapmek at limixin. ⁷Kuren la aga lok keretna, ‘Moroa. Nenia na. A vot pam ti mu asu lavavara ram kerekngan mo levelinga keneng at lugun linga ram diga malagan i mumu ia.”

Sam 40:6-8

⁸Avot be ne Iesu ga lok keretna; “Labalam goxo ru levelaplavang la leventamtaba gamasa eburu bok mi leventamtaba diga xotos i ro at laxao

la leventamtaba diga etaba min ti lok kepe laxakapmek atdi. La u goxo lok momo mi na loklok.” Keke i do Lenavolo at ne Moses ga tong i do limixin dina mu asu mo loklok. ⁹La neni ga lok bok, “Nenia na; a vot pam ti mu asu lavavara ram.” Kerepmo la ne Moroa ga lok kepe mo leveloklok tiplavang megano la ga lox ekun i mi mo laplavang i sev agepura, ne Karisito xa ga lox i mi lada ren. ¹⁰Ne Karisito ga mu asu lavavara at ne Moroa, la neni ga raba lorooro ren ngan laplavang at legesa xonaleng mun kusu na lox adadat limixin basinge laxakapmek atdi.

¹¹At levenaleng axap lavamaasa diga tu ro xeneng at loogu kadis la digak lok lugugu at lotu; at levenaleng axap diga etaba mi leges asen panga laplavang mun, mo levempanga goxopmen tinotno na epovo xusu ri lox adadat limixin basinge laxakapmek atdi. ¹²Ketla Lamaasa Avolo ga etaba mi legesa laplavang mun ti laxakapmek, u ningina la amisik bok, la melemu neni ga xis to saparap lekngen tino at ne Moroa. ¹³Ga ru ka i ap mo laaleng neni ga ngangais ne Moroa na lok li limixin munepen teren ngan loxot burubut ti luxangkedek teren. ¹⁴Karisito ga raba lorooro ren ngan laplavang, kuren la ni ga lok langas kusu limixin dina dadat amisik la na nga ne Moroa ik lok kepe laxakapmek at limixin di nuunu ren.

¹⁵Loroonan Kaala bok i tong asuusu i na; i lok keretna,

¹⁶“Melemu nia anaba lok lekabus maxat mi limixin tarak; anaba buradong levelinga rak keneng at lebelen di la nia anaba lox adoxoma di mi levelinga rak.” *Jer 31:33*

¹⁷La i lok bok,

“Nia a noxo domangke rinotno bok ba at laxakapmek atdi.” *Jer 31:34*

¹⁸La do ne Moroa ira doxoma xepe vam laxakapmek at limixin, kopmen dinak pakes bok ba ri lok laplavang kusu ri lok kepe laxakapmek.

Langas Maxat Tim Taba Lorooro

¹⁹Luvutnetak mi luvurinuk. I epovo do ata vosiga ne Moroa ap mo loxot i xaala aleng, mila ne Iesu gara suang pam mo langas mi lada ren. ²⁰Mo langas neni langas maxat im taba lorooro, Iesu ga suang pam i ridik ap mo laaleng neni ga raba labantuxu ren kusu na uu at laxaba. Lavattamon silok to xeneng at loogu kadis ga ru katling labantuxu at ne Iesu la mo lavattamon ga rem lais tubu, i ngan ta do ga suang mo langas tidik. ²¹La nedik ta ruuna Lamaasa Avolo, neni langomgo ri limixin at ne Moroa. ²²Kuren la mina vosiga ne Moroa do lebelen nimi irak mokso vam la lunuunu atnimi irat matkun pam la lebelen nimi xopmen tusumsuma xapmek teren mila ne Moroa ga lox adadat pam nimi kerekngan di gos labantuxu atdik mi ladan i nunuan. ²³Minam tebeng lolos lunuunu atnimi ri mo leveloklox anarong mo naba vot mila ne Moroa naba lox asorun levempapaase alii ren. ²⁴La mina doxoma ka teventaangas kusu mina lox axatu lebelen nimi ri elok tooro ela la lorooro atnimi na umsu

mi labalamu la leveloklok i nunuan. ²⁵Nemen mita ke xepe mo leveloklok tit pot buru, kerekngan leventaba atnimi dira ke xepe vam i. Ketla nemi xa mina epang aru xusu lunuunu atnimi naba lolos; la mina lox amisix i na, mila laaleng ete i auret na vot.

²⁶Do tara atnimi ga siam ka vam luruturun at Lagale Lavavang, ketla iramlong ti laxakapmek, i lok ngan ta do i raba arulu ne Moroa la kopmen tavanga laplavang bok ba kusu ba lox arooro i. ²⁷Ketla neni ba suma mun lanmarat silok at lebelemamao at ne Moroa at laaleng ete mila laxao bokbolot mo naba anan limixin di munepen mi ne Moroa. ²⁸Do tara ga los polo lenavolo at ne Moses, la do tegepu radi xopla tavantun tuvuttadi diga venemet mo laradi ga lok laxapmek, neni gaba met etaba mun. ²⁹Kerepmo la do tara na sok kepe lunuunu ren at ne Iesu, i lok ngan ta dola i vas axangka ne Nitna ne Moroa; la neni i lok lada at ne Iesu ngan ta lavanga gamasa, mo lada at lekabus maxat ga sen kusu na lok kepe laxakapmek teren, la ira vaase vupu vam ti Loroonan Kaala, mo i lox asuusu letaba nabalamu at ne Moroa ridik. Do tara na lok na leveloklok kakapmek, neni naba lok ka loklox asongot silok. ³⁰Ataklen i do ne Moroa xa ga lok keretna,

“Nenia xa anaba sepo laxakapmek at limixin.”

Len 32:35

La ga lok bok,

“Moroa naba vaxaru limixin teren at lavapaase, mo do dina soogong basinge levelinga ren.”

Len 32:36

³¹Naba lok kapmek aleng do tara na ekip tangarang mi lebelemamao at ne Moroa, mo i rooro.

³²Mina doma amlong ti mo levenaleng miga lok ka avot lunuunu.

Ap mo levenaleng miga ekip tangarang mi levenmumuat la leveloklox asongot mumu lunuunu atnimi. Ketla miga tu lolos la mi goxo subu.

³³At lentaba levenaleng diga sok taba nimi mi laxalinga xapmek la diga lox asongot nimi ro melamgo at limixin axap. At leventaba levenaleng bok miga ru eburu mi nedi diga xip mo levesongsongot. ³⁴Miga balamu nedi digak lok at loogu xokoxo la miga lok momo mene nga do limixin diga sak paxat ka levempanga atnimi mila migaklen i do nemi xa miba ruuna lapnovos i lox avukat aleng no vana at laxalibet, mo lapnovos naba nemen amisik.

³⁵Kuren la nemen mita soxepe lunuunu atnimi; do minam tebeng lolos teren, Moroa naba raba nimi mi leveloklox anarong i nunuan aleng. ³⁶Do mina suma levenmumuat at lorooro atnimi, mina tu lolos at lunuunu atnimi xusu minaba ruuna ka mo leveloklox anarong ne Moroa ga vaase alii min tidik, mo do mina mu asu lavavara ren. ³⁷Kopmen noxo lox abao la Lanarong nabamlong kerekngan ne Moroa ga tong i xeretna,

“Mo lara diga tong i do naba vot, neni naba vot tuturun, neni noxok lok sila. ³⁸Ket do nege laradi do luruptuvuk teren ik mokso, neni naba ruuna

ka lorooro avolo, mo do neni nat pas eburu mi lunuunu. La do neni na raba arulu ia, labalak noxo lox avukat tin.” *Abk 2:3,4*
³⁹Ketla nedik kopmen na lok ngan nedi di raba arulu ne Moroa la dira seeve, ketla nedik ta lok ngan nedi di nuunu at ne Moroa la dira ruuna ka vam lorooro avolo.

Limixin Diga Nuunu At Ne Moroa

11 ¹Lunuunu neni loklok tim doma ngangais ti leveloklox anarong ne Moroa naba raba limixin teren min; la lunuunu ik lox aklen dik ti mo levempanga nedik kopmen ta reven tu ren. ²Kerepmo la ne Moroa ga emi asu minedi lavalabat atdik gano, mila diga ruuna lunuunu.

³Nedik ta ruuna lunuunu, kuren la ataklen i do ne Moroa ga rudum li levempanga axap mi levelinga ren, la ataklen i do levempanga nedik di ven i mi levengkatli atdik ga ravasu at levempanga nedik goxo ven i.

⁴Abel ga ruuna lunuunu, kuren la neni ga raba ne Moroa mi laplavang ga lox avukat ti laramtaba at ne Kaen. Abel ga ruuna lunuunu, kuren la ne Moroa ga emi asu min la ga raba i mi laasen do laradi mokmokso, ap mo laaleng ne Moroa ga siam ka leventamtaba ren. Lunuunu ren move i ngan lampoovo ridik kusu ata mumu asu i, keke i do neni ga met pam.

⁵Enok ga ruuna lunuunu, kuren la neni goxo met, ketla ne Moroa ga lok ka i uto vana at laxalibet, la limixin diga puse rin la di goxo vuse ka i, mila ne Moroa ga lam ka vam i uto vana. Avot at na, Moroa ga emi asu min, mila loklok teren ga lox amomo i. ⁶La mo do tara xopmen tunuunu ren, ixo epovo ni na lox amomo ne Moroa, mila do tara i vara na vot pasa ne Moroa, neni na nuunu do ne Moroa mo i rooro la neni i epovo naba lox anarong nedi lebelen di i ngaongao xusu dinaklen ne Moroa.

⁷Noa ga ruuna lunuunu, kuren la at laaleng ne Moroa ga tong i rin do laran naba vot, ni ga ronga res la ga lok lavattaaxup silok kusu na lox arooro nedi loxoetemen. Neni ga ruuna lunuunu la kerepmo ga lox asuusu i do loklok at limixin ap mo levenaleng ga lok kapmek, la neni ga ravasu ngan laradi mokmokso at lemeren ne Moroa mila neni ga ruuna lunuunu saparap ne Moroa.

⁸Abaram ga ruuna lunuunu. Kuren la at lara laaleng ne Moroa ga tong i rin do na on basinge lemenemen teren kusu nat pas ti lara lemenemen to vaxalom; Moroa ga vaase alii rin do neni naba raba i min melemu ngan lemenemen tino rin. La ne Abaram ga ronga res teren la ga vas kaxat, neni goxoklen i do mo lemenemen gak lok ua. ⁹Neni ga ruuna lunuunu la ga lox araut lemenemen tin ap mo loxot ne Moroa ga vaase alii min tin. Ketla ap mo lenep neni ga nemen ngan laradi xadiong, gak lok mun at loogu kadis, la melemu ne Aisak, nitna ne Abaram, la ne Jakop, tubuno ne Abaram dugak lok bok at laraugu kadis. Nedu bok duga ruuna mo lavapaase alii boro at ne Moroa ngan ne Abaram. ¹⁰Neni ga

ronga res mila neni gam doma ngangais ti mo lemenemen silok, bak lox amisik la ne Moroa ga lox agagas mo lemenemen silok ti limixin teren.

¹¹Abaram ga ruuna lunuunu, keke i do gara sioxo vam, la latkin bok teren ne Sera goxo epovo do na visik, ketla nedu duga visik lara lamdak. Kuren la ne Abaram ga ravasu ngan ne temen mo lamdak, mila ne Abaram ga nuunu do ne Moroa naba lox asorun lavapaase alii ren. ¹²La ne Abaram, neni lasioxo nga, ketla ga buaang aleng livipisik li ren, ga umsu aleng ngan laxampenti mede vana la laxangkaneng to loxon, nedik taxo epovo ri exes di, na livipisik li ga ravasu at na legesa radi mun.

¹³Nedi axap luvuttadi diga ruuna lunuunu at lorooro axap atdi se at loxonaleng diga met. Nedi goxo ruuna ka mo levempanga ne Moroa ga vaase alii min tidi, ketla diga ven avaxalom ka mo levempanga la diga momo ka i, keke i do di goxovisi ruuna ka i. La diga siam ka mun lorooro alua at na lavatbung menemen. ¹⁴Limixin di paase xerepmo, i lox asuusu i do temenemen aulis gove di puse rin. ¹⁵Do nedi gove gitam doma amlong ti mo lemenemen no nedi diga on basinge i, nedi ro gitamlong pam ti mo lemenemen atdi. ¹⁶Ketla lodoxoma atdi move ga vara ri temenemen avukat tinotno, mo lemenemen ik lok to vana at laxalibet. Kuren la ne Moroa i lok momo xusu dina soxor i do ne Moroa atdi mila neni ga lox agagas lemenemen tidi.

¹⁷Abaram ga ruuna lunuunu, kuren la ap mo laaleng ne Moroa ga lok tong pen i, neni ga ronga res la ga raba ne Aisak ngan laplavang. Abaram neni mo laradi ne Moroa ga vaase alii rin do livipisik li ren naba umsu aleng. Ketla melemu manga ni ga gagas kusu naplavang mi mo legesa nitna. ¹⁸Ne Moroa gara tong pam i rin do, "Aisak neni laradi ba lox asilok livisik li ram." ¹⁹Abaram gaklen i do ne Moroa i epovo na lox arooro luvuttadi met; ketla ne Moroa ga sep pepe i la ni goxo sev amet ne Aisak. I lok ngan ta do ne Moroa ga lox arooro ne Aisak basinge lanmet.

²⁰Aisak ga ruuna lunuunu, kuren la neni ga lox anarong ne Jakop mi ne Esao mi levelinga mumuat mumu mo levempanga naba ravasu at lorooro atdu la at livipisik li bok atdu melemu at levenaleng at lanmet teren.

²¹Jakop ga ruuna lunuunu, kuren la neni ga lox anarong lumdak at ne Josep la ga lotu saparap ne Moroa, ap mo loxonaleng neni ga sox auru i mi lakdak teren, mila neni gara sioxo vam la ga auret levenaleng kusu neni na met.

²²Josep ga ruuna lunuunu, kuren la ga auret ti lanmet teren, neni ga vaase alii do at tara taaleng limixin me Israel diba vas kaxat basinge lemenemen Isip la neni ga vaase alii bok at limixin teren kusu dinaba xip ka levesi ren do dina vas kaxat uto Kanan.

²³Temen ne Moses mi nenen duga ruuna lunuunu, kuren la duga lipe ne Moses at lavantun gaaling melemu at livipisik teren, mila duga ven

i do mo lamdak goxopmen lamdak gamasa, ketla lamdak ga lok petpes tino, la du goxo marat at lavapaase lolos at loorong silok, ga tong i do dina sev amet axap levengkadede remes at limixin me Israel do dina visik asu di.

²⁴Moses ga ruuna lunuunu, kuren la neni ga silok, la ni ga xopara i xusu limixin dina soxor i do lamdak at loolik at ne Parao. ²⁵Ketla neni ga vara i xusu na xip laxasongsongot eburu mi limixin at ne Moroa la neni ga xopara i xusu na lox amomo lorooro ren mi laxakapmek, mo naba xap asonao mun. ²⁶Moses ga doma i do ik mokso do neni na lok ka lainmangan eburu mi limixin teren at lugugu at Lanarong. Mo lainmangan ga lox avukat aleng ti lapnovos boro Isip, mila neni ga reven ti mo luunun move ne Moroa ba raba i min. ²⁷Neni ga ruuna lunuunu, kuren la neni ga vas kaxat basinge lemenemen Isip la goxo marat at lumukmusak at loorong silok me go, ketla neni ga tu lolos at lunuunu ren, mila neni ga ven kibis ne Moroa, mo limixin di goxo epovo na ven i. ²⁸Moses ga ruuna lunuunu, kuren la neni ga tong i ri limixin me Israel kusu dina sep ka tevempatnat sipsip la dina saba li lada ap mo laxasipsip to at laramusaragu at laraugu atdi, na loklok ga lok kaxat mo leluxa diga soxor i do Lovovolo Pe. Diga lox i na xusu mo laangelo sepsep noxo sev amet lavaanat meren at limixin me Israel. Ketla Moroa ga riki i do na sev amet lavaanat meren at limixin me Isip.

²⁹Limixin me Israel diga ruuna lunuunu, kuren la diga vas korop Laras Memele, digat pas mun at laxangka mesemes. Ketla at loxonaleng limixin esep boro Isip diga lok tong pen i xusu dina vas polo, laras gak mit di la diga xong axap.

³⁰Limixin me Israel diga ruuna lunuunu, kuren la lara langas uat lolos mo ga tu xangkan lemenemen silok Jeriko ga rebubuxup si ukopok. Mo lavanga ga vot melemu at lavanuti aleng limixin me Israel digat pas kangkan mo lemenemen.

³¹Raap, latkin ngarangat ga ruuna lunuunu, kuren la neni goxo uu eburu minedi limixin boro Jeriko diga ronga viribang, mila neni ga lok tooro luradi esep at leme Israel mo dugakling lemenemen at laaleng ne Josua ga riki du xusu dunakling mo lemenemen Jeriko.

³²Aba tong ka bok ba lavanga salai? Nia xopmen ana epovo xusu ana vaase bok ba mila loxonaleng kopmen na epovo kusu aba tong asu axap lorooro atnedi loxongkulao nuunu kerekngan ne Gidion, Barak, Samison, Jepita, Devit, Samuel, la leventaba vetpes bok eburu mi lavaame vapaase alii; ³³diga ruuna lunuunu, kuren la leventaba atdi diga sep kepe levenabung mixin, leventaba atdi diga lok tatao limixin atdi mi loklok mokmokso, la kerepmo ne Moroa ga lok tooro di xerekngan neni ga vaase alii min tidi; la leventaba atdi, lavamolon diga lu arup midi uto at laramet laion la lubang laion di goxo epovo na anan di, mila ne Moroa

ga vamngus lubang laion. ³⁴Leventaba atdi lavamolon diga lu arup midi uto xeneng at laxao ketla laxao goxo epovo na rin di; leventaba atdi diga ves avolo levemparise sepsep at limixin esep; la leventaba atdi levengkot atdi ga molo xetla ne Moroa ga lox alolos di; la leventaba diga ravasu ngan luvuttadi lolos tino, kuren la diga xala xepe limixin esep boro at levengkot petpes. ³⁵Leventaba lavakin diga ruuna lunuunu kuren la leventaba atnedi digara met pam, ketla ne Moroa ga lox aroo amlong bok di.

Leventaba atnedi luvuttadi nuunu, diga lok ka losongsongot kapmek tinotno, lavamolon diga lok mo leveloklok ti lok kepe lunuunu atdi, ketla diga tu lolos la diga siam ka mo laxanmumuat, mila diga nuunu do melemu diba lok ka lorooro avolo. ³⁶Lavamolon diga lok kalise xapmek leventaba atdi la digak pixis kapmek tino di, la diga koxo alis leventaba bok la diga lox abeles di at laraugu xokoxo. ³⁷Diga lu amet leventaba atdi mi laxanuut, la diga soo xorop avu leventaba atdi mi lempasoo, la diga sev amet leventaba atdi mi lemparise.

Leventaba atdi luvuttadi nuunu diga siga mun levenbantuxu sipsip la levenbantuxu me, mila kopmen tevempanga singsiga avukat atdi la di goxo ruuna tevempanga at lorooro atdi, diga xip laxasongsongot la lavamolon diga lok kapmek tinotno di. ³⁸Lavamolon diga doma i do mo limixin nuunu diga lok kapmek aleng, ketla at lemeren ne Moroa nedi limixin mokmokso, la ixo epovo do dina nemen at na lavatbung menemen. Diga pas tangtagap to at lamatbin la to at levempatkaana la diga nemen to xeneng at laxantabuang la at laramamara ro xeneng at laxangka, mila goxopmen taramenemen atdi.

³⁹Diga ruuna lunuunu, kuren la ne Moroa ga emi asu midi, ketla tara atdi goxo lok ka mo leveloklox anarong at lekabus maxat ap mo levenaleng diga rooro ren. Mo leveloklox anarong ne Moroa ga vaase alii min ti limixin teren. ⁴⁰Moroe ga lox agagas lekabus maxat kusu neni na lox adadat dik. La kerepmo bok neni ga lox adadat nedik eburu minedi na limixin digap kip laxasongsongot.

Moroe I Lox Aleeng Limixin Teren

12 ¹Buaang nedi lavalabat atdik no vana at laxalibet mo di reven dik ngan laneelen di reven lekampoovo; kuren la mina ke xepe levempanga axap mo ik lox angtang lunuunu atnimi la mina ke xepe bok laxakapmek mo nemi mik sak kikixin teren, la minak sixit eburu mi lololos ap mo lekampoovo ne Moroa ga lox agagas i rinimi. ²Lodoxoma atnimi na tu atkatla at ne Iesu, neni lavasuun la lurutu kaxat at lunuunu atdik. Neni ga siam ka laxasongsongot la lainmangan at laxaba mila ni ga doma mun mo lomomo neni naba ruuna ka i; la na nga neni it kis at lenep tino at loxonin orong at ne Moroa. ³Mina doma mumu mo

laxasongsongot limixin kapmek diga lox i rin; at na loklok neni lampoovo rinimi, xusu nemi mi noxo molo la mina soxope lunuunu atnimi.

⁴At na levenaleng mira raba arulu vam laxapmek la mira tu lolos, ketla limixin kapmek kovisi dina sev amet teventaba atnimi. ⁵Nemen gat mita domampe mo levelinga loklox alolos, i ngan laradi i anasa ne nitna min; mo levelinga i lok keretna,

“Nuruk, nemen gat uta doxoma abulubun do ne Moroa, Leeme Silok na lox aleeng u do u lok laxapmek; la nemen gat uta bulu ap mo loklok, ⁶mila Leeme Silok ik lox aleeng nedi, neni i vavara aleng di. La do neni na lox asongot nemi, ana i lox asuusu i do nemi mi lok ngan laxamdak tinotno ren.”

Ler 3:11-12

⁷Mina tu lolos tip kip levesongsongot mi lomomo mila ne Moroa i ke xepe mo levenmumuat kusu na vot saporap nemi ri lox aleeng nemi. I lok ngan bok nade xopok at na lavatbung menemen, luvuttemen laxamdak di lox aleeng laxamdak atdi, do di lok tavanga i lok kapmek. ⁸Limixin axap di lok leveloklox aleeng. Do ne Moroa ixo lox aleeng nemi, ana i lox asuusu i do nemi xopmen laxamdak tuturun teren, ketla nemi mi lok ngan mun laxamdak mexalanga. ⁹Lara lavanga bok, nedik axap di ruuna luvuttemen dik, mo diga lox aleeng dik la nedik ga lok ngangao atdi mumu mo loklok. Kuren la i lox avukat aleng do mina siam ka mo leveloklok at ne Moroa, ne Temen nemi; neni ga rudum li dik la leventoonan atdik la kerepmo ataba ruuna ka lorooro avolo. ¹⁰Luvuttemen dik diga lox aleeng dik at leventaba levenmaares mun mumu lodoxoma atdi; ketla ne Moroa i lox aleeng dik kusu ataba vee radi avukat la ataba lok ka mo loklok teren ik mokso axap. ¹¹Na leveloklok kopmen na lox amomo dik ketla i lox asongot dik. Melemu at na leveloklok, lorooro atnimi naba lok asuusu lomokmokso la lenmila do mina siam ka mo loklox aleeng.

¹²Kuren la mina raba axap lodoxoma atnimi xusu mina mumu lavavara at ne Moroa la miba lok ka levempanga neni ga vaase alii vam min tinimi, kerekngan laradi i lox alolos labantuxu ren kusu rik sixit at lekampoovo. ¹³Mina lok tatao avukat lavatpas atnimi, xusu do teventaba atnimi mo lunuunu atdi xopmen na lolos, di noxo soxepe axap lunuunu atdi at ne Karisito, ketla diba ven mo leveloklox avukat atnimi, la diba mu asu i la kerepmo lunuunu atdi naba lolos.

Lavanga Mina Ronga Xepe Ne Moroa

¹⁴Mina lolos kusu mina nemen at lumulum eburu mi limixin axap, la mina nemen mokmokso, mila do tara noxo ruuna loklok mokmokso, neni noxo ven ne Moroa at lorooro melemu. ¹⁵Mina lok tatao avukat nemi xusu tara atnimi noxo sok tixirixes kepe letaba nabalumu at ne Moroa la na seeve; la nemen nemi guta ke xepe teventaba atnimi dina lok lekarakat

kusu mo laxakapmek na lox asubu lunuunu at limixin, kerekngan laradi sak i sev amet limixin. ¹⁶Mina lok tatao avukat nimi xusu tara atnimi noxo vubeles ti loklok i lok kapmek maxamang at lixitkis epot la kerepmo na lok kapmek lara kitkis epot atnimi; kopla na lok ngan ne Esao, neni goxo lok ngangao at ne Moroa, la neni ga xip kepe laasen silok do lanarong, mila lavaanat meren digak lok ka loklox anarong at luvuttemen di; ketla neni ga xip kepe mo loklox anarong kusu ni na lok ka levempanga anan mun ti labantuxu ren. ¹⁷Nemi miklen i do melemu bok ba neni ga lok do na lok ka amlong mo loklox anarong, ketla ne temen ga sok tixirixes kepe i. Neni goxo epovo na lox ekun lodoxoma at ne temen, keke i do neni ga reng mu mo loklox anarong.

¹⁸Do mina vosiga ne Moroa, mi noxo ven mo levempanga limixin me Israel diga ekip tangarang min at lavatpas atdi boro Isip. Diga vot to at lakaana Sinai la ne Moroa ga sep pepe di do di noxo long tu ren; la diga ven mo lakaana, laxao silok ga anan teren, la lamain silok mi lusugao ga vung kimir i; langsung lamanman eburu mi leretepaavat la lavanga ga mam to ap mo lakaana. ¹⁹La diga ronga lerengteng at luru la diga ronga laxaka at ne Moroa. Diga ronga i na, la diga marat aleng la diga sing i xusu noxo vaase bok ba tevelinga ridi. ²⁰Di goxo epovo na ronga ne Moroa mila diga marat aleng at levelinga ren, ni ga lok keretna, “Limixin axap gi noxo long tu at na lakaana, la do tavanga mi lavanuet kangkedek teren na los polo na levelinga rak, limixin dina lu amer i.” ²¹Diga ven i mo lavanga la diga umsu mi lanmarat, kuren la ne Moses ga lok, “Nia a marat aleng, kuren la a dede.”

²²Ketla nemi mi goxo ekip tangarang mi tevempanga xeretna at lovtotpot atnimi saparap ne Moroa. I lok ngan ta do mira vot pam to saparap lakaana Saion la lemenemen Jerusalem, neni lemenemen at ne Moroa, mo i rooro. Mira vot pam ap mo lemenemen i umsu aleng mi lubang angelo, kopmen tara i epovo ri exes di, mo dik lok buru la dik pixan emi asu saparap ne Moroa. ²³La mira vot eburu vam mi limixin nuunu nedi lavanarong at ne Moroa, mo ga malagan li vam levenasen atdi ro vana at laxalibet. Mira vosiga bok pam ne Moroa, neni laradi rongtonga linga at limixin axap, la mira vot pam saparap labaroonan atnedi limixin mokmokso no digara met pam la ne Moroa ga lox adadat pam di la na nga dik lok to vana at laxalibet. ²⁴Mira vosiga vam ne Iesu, neni ga lok lumulum ti lekabus maxat kantubu at ne Moroa eburu mi limixin, la mira vot pam ap mo loxot ne Iesu ga semla li lada ren to melamgo at ne Moroa ngan luunun ti laxakapmek at limixin. Mo lada ren i lox avukat ti lada at ne Abel, mila lada at ne Abel ga lox asuusu lumukmusak at ne Moroa ketla lada at ne Iesu i lox asuusu lumulum.

²⁵Mina lok tatao avukat nimi xusu mi noxo ronga xepe ne Moroa, mo i paase rinimi. Moroa ga paase ri lavalabat atdik to Sinai, ketla

buaang atnedi diga rongga xepe levelinga ren la diga ekip tangarang mi lebelemamao ren. La kerepmo bok, do nemi mina rongga xepe levelinga at ne Moroa no vana at laxalibet, ixo epovo do mina sepsu at lebelemamao ren, mila levelinga ren tidik i mumuat aleng ti mo levelinga neni ga raba di min. ²⁶Ap mo levenaleng Moroa ga paase ri lavalabat atdik to Sinai, la lavatbung menemen axap ga dede. Ketla melemu neni ga vaase do, “Abangma gesara bok na lavatbung menemen eburu mi laxalibet.” ²⁷Na levelinga do “gesara bok,” i lox asuusu i do ne Moroa naba sele utut kepe axap levempanga neni ga rudum li di at na lavatbung menemen la laxalibet bok, kusu mo levempanga neni i vara i do nak lok, naba nemen amisik.

²⁸Nedik ata lok ka lixitkis at Linintoo ren mo noxo xap, kuren la ata tong avukat ti ne Moroa la ata lotu ruturun saparav i, la lorooro atdik na umsu mi langsung loklok ngangao saparav i, ²⁹mila ne Moroa atdik neni laxao sesele utut.

Levelinga Xavaxap

13 ¹Mina balamu ela nemi mila nemi limixin at ne Moroa. ²Nemen mita ke xepe loklok ti lok maraose mi luvuttadi xadiong. Leventaba diga mu asu na loklok, ketla di goxoklen i do diga lok maraose mi lubang angelo at ne Moroa. ³Mina lox asuusu labalamu atnimi rinedi limixin nuunu di nemen at loxokoxo, i lok ngan ta do nemi bok mik lox eburu midi at loxokoxo; la mina lok tooro limixin nuunu mo dip kip losongsongot mumu lunuunu atdi, mila nemi bok migap kip levenmumuat kerepmo.

⁴Nemi axap mina mu asu avukat loklok keneng at leepot la mina ke loklok ti elongka mila nedi di mu asu loklok ti elongka, Moroa naba lok li di at lavapaase, eburu minedi bok limixin di los polo levelinga at ne Moroa mumu loklok keneng at leepot. ⁵Mina ke xepe loklok ti vavara solo levempilas la mina lok momo mi mo levempanga mi ruuna i, mila ne Moroa ga lok keretna,

“Nia noxo on basinge rinotno nemi la loklok tatao rak kopmen tinotno noxo xap.” *Len 31:6*

⁶Kuren la i epovo do ata tong tuturun mo levelinga kerekngan Lovoang Kaala i tong i,

“Moroa neni laradi loklok tooro rak, kuren la nenia anoxo marat mila ixo epovo do limixin dina lok kapmex ia.” *Sam 118:6*

⁷Mina doma loklok at luvuttadi amgomgo atnimi gano, mo diga vaase nemi mi Lagale Lavavang at ne Moroa. Mina doma lunuunu diga ruuna i at lorooro atdi se diga met, la mina lok ka lunuunu xerepmo. ⁸Diga nuunu do ne Iesu Karisito ixok lox ekun levelinga ren; levelinga ren ga sorun gano la i sorun lingina la naba sorun bok melemu.

⁹Nemen gat mitang tonga nedi di lox ase nimi mi levenanasa vetpes, mo ba sar asoogong nimi basinge lunuunu atnimi at ne Iesu. I lox avukat do mina lok ka letaba nabalamu eburu mi loklok tooro at ne Moroa xusu mina lox alolos lebelen nimi. La mina ke xepe mo leveloklok at Lenavolo mumu leveluxa salai ri anan la leveluxa salai kopmen ti anan; na loklok noxo lok tooro lorooro atnedi di mumu asu i. ¹⁰Ketla nedik ta ruuna laradi loklox arooro; ni ga lox epovo luunun ti laxakapmek atdik la kopmen toxot at na rinedi di mumu asu lekabus migomgo.

¹¹At leventaangas at lekabus migomgo lamaasa gomgo ga lok ka lada at levempanga mi lavanuet kangkedek la ga vubeles min uto xeneng at loxot ga xaala aleng. Mo lada ga lok ngan laplavang ti laxakapmek at limixin. Ketla diga lok ka mo levempanga mi lavanuet kangkedek la diga rin asonao i ro maxamang at lemenemen. ¹²La kerepmo ne Iesu bok ga xip losongsongot to maxamang at lemenemen silok Jerusalem kusu na lox adadat limixin basinge laxakapmek mi lada xa ren. ¹³Kuren la mina xis esogo mi ne Iesu, la minap kip lainmangan kerekngan ne Iesu gap kiv i ap mo laaleng neni ga merem at laxaba ro maxamang ap mo lemenemen, ¹⁴mila kopmen temenemen tino ridik nade xopok at lavatbung menemen, ketla nedik ta ngangais ti mo lemenemen ne Moroa ga lox agagas li i ridik.

¹⁵Iesu ga uu ngan laxaavuk tidik, kuren la ata emi asu amisik mi ne Moroa, i lok ngan laplavang atdik tin la i lok ngan bok livipisik atnedi di nuunu at laasen teren. ¹⁶La nemen mita domampe loklok tik lok lununuan la loklok tim taba panga nedi dik pakes, mila ana leveloklok i lok ngan laramtaba atdik ti ne Moroa la neni i momo ren.

¹⁷Mina ronga res at luvuttadi amgomgo at lotu la mina mu asu levelinga atdi mila nedi di lok tatao nimi la ne Moroa nabakling lugugu atdi, mo do diga lok tatao avukat nimi. Mina ronga res atdi xusu diba lok momo mun at lugugu atdi. Do mina ronga xepe levelinga atdi, na loklok ting tonga xepe naba lok li lumumuat mavana atdi la naba lok kapmek lunuunu atnimi.

¹⁸Mina ngising amisik ne Moroa do neni na lok tooro nama. Nema xopmen mana ruuna tusumsuma xapmek mila maklen i do lebelen nama ip sepsen tino, la ma vara aleng i do mana ruuna luruptuvuk i nunuan axap. ¹⁹A vara i xusu anamlong posiga soso nimi, kuren la at langsgangan lavavara rak, do mina sing ne Moroa ri na lavanga.

²⁰Moróa at lumulum ga lox aroo amlong Leeme Silok atdik ne Iesu basinge lanmet; la at lada ren neni ga vaxaru kaxat lekabus maxat mo ba nemen amisik. Neni laradi loklok tatao atdik ngan laradi i lok tatao lubungsipsip teren. ²¹A sing ne Moroa do na lox agagas avukat nimi xusu minaba mu asu lavavara ren la neni na gugu at lebelen nimi xeneng at loklok tooro at ne Iesu Karisito. Ata ba lok mo levempanga neni naba momo ren la ata emi asu min la na leemi asu rin noxo xap. Tutturun.

²²Luvutnetak mi luvurinuk. Nia a sing nimi do mina siam ka levelinga rak keneng at na lovoang. Na levelinga kopmen na baalom solo, i xubulik mene nga.

²³A vara i xusu minaklen i do neton dik ne Timoti diga soxomus asu vam i boro xeneng at loogu xokoxo. Do neni na vot pasa soso ia, nema eburu manaba vosiga nimi.

²⁴A lox aonon lavapaase momo rak ti luvuttadi amgomgo atnimi la ti limixin axap at ne Moroa. La nedi bok limixin nuunu boro Itali di lox aonon lavapaase momo rinimi.

²⁵Letaba nabalamu at ne Moroa na nemen amisik eburu minemi axap. I ruturun.

Jems

Lovoang At Ne Jems

Levelinga Loklox Axasep

Lamaares 62 A.D.

Laradi ga malagan i na lovoang neni ne Jems. Buaang nedi luvuttadi akleklen di lok do nai ne Jems neni neton ne Iesu. Neni ga malagan i na lovoang ti lara libinam tadi at ne Moroa ua nedi diga raba lorooro atnedi ri ne Iesu Karisito. Anai libinam tadi diga ekip tangarang aleng mi levesongsongot boro at lavamunepen at ne Karisito. Kuren la diga epeseves at lengkot axap. Digak lok at levenmenemen silok buaang la digak lok ngan limixin me xadiong. Ti nai ne Jems neni laradi gomgo atnedi limixin nuunu digak lok to Jerusalem.

Lengkot silok keneng at nai lovoang:

- 1:1 Levelinga momo at ne Jems ti limixin.
- 1:2-8 Langas ti lok ka lunuunu mi levedomdoma nunuan.
- 1:9-11 Lempapaase mumu limixin banbalo la limixin nopnovos.
- 1:12-18 Nemen dik tana subu kot la tana lok laxapmek.
- 1:19-27 Nedik ta noxo rong aie xepe mene levelinga at ne Moroa.
- 2:1-13 Legesu ruptuvuk mun kantubu at limixin axap.
- 2:14-26 Atana lox asu lunuunu atdik, mi loklok tik lok tooro limixin.
- 3:1-18 Atana lok tatao avukat levempapaase atdik.
- 4:1-5:6 Lorooro atdik na nemen nunuan ngan laradi nuunu.
- 5:7-20 Levenanasa vetpes bok.

Lavapaase Axasep

1 ¹Nenia ne Jems, lasaxaruki at ne Moroa la at Leeme Silok ne Iesu Karisito. Nia a malagan na levelinga ri lasangaun mi legepura larabibinat me Judaia di epeseves at na lavatbung menemen axap. Nia a malagan lavapaase momo rinemi.

Levenmumuat I Lox Asu Lunuunu Lolos

²Luvutnetak mi luvurinuk. Do levenasen panga mumuat na vot parap nimi, i lox avukat do mina momo mene, ³atla miklen i do nom levenmumuat i tupot parap nimi kusu ri lox alolos lunuunu atnimi la melemu miba tu tuxuruxun keneng at lunuunu atnimi. ⁴Mina tu lolos amisik maxeneng at levenmumuat, la nemen mita subu kot. La kerepmo miba vee ngan limixin mukun at lunuunu atnimi la kopmen tempanga xapmek bak lok at lorooro atnimi mo ba umsu aleng mi leveloklok nunuan. ⁵Ketla do tara atnimi ik pakes ti lodoxoma avukat, ni na sing ne Moroa, atla ne Moroa naba raba aleng i min; Moroa im taba buang lempanga ri limixin getgesara la neni xopmen noxo rebeng alis toxot teren mumu loklok atdik. ⁶Ketla mina nuunu lolos at lengkonaleng mi ngising parap ne Moroa, la nemen lodoxoma atnimi na sixit ekarakat. Laradi xopmen na nuunu lolos, i ngan lovotes i repit to at laras la ik sixit la lamanman i mas ekapus i uto la uto at lengkot axap. ⁷Laradi xerepmo noxo nua i do naba lok ka levenasen panga boro at Leeme Silok. ⁸Neni xopmen na epovo ri lox alii lodoxoma at lorooro axap teren la ni xopmen na epovo ri lox aulis lunuunu ren parap ne Moroa.

Laradi Banbalo La Laradi Nopnovos

⁹Do laradi banbalo ik lok kantubu atnemi limixin nuunu, neni na lok momo mun, keke i do kopmen tevempanga ren; laaleng move ne Moroa naba xip aurur i. ¹⁰Ketla do laradi nuunu i ruuna buang levempanga, neni naba lok momo mo do ne Moroa na lox asi i. Neni i lok ngan mun lempusuvus aaxa i nemen lixilik mun la ia met ta. ¹¹Laxangking i urut la iplivi aleng la i lox amolos axap nom lempusuvus aaxa la i subu uto xopok at laxangka; lampeneves teren ira xap. At nom mun langas laradi i ruuna levempanga solo naba met basinge leven gugu axap teren ap mo levenaleng i lok lugugu ren.

Leveloklok Tong Pen Ti Laradi Nuunu

¹²I lox avukat aleng do laradi nuunu na tu tuxuruxun maxopok at leveloklok tong pen. Mo do laradi ira sak tup pam mi leveloklok tong pen, i lox avukat mila ne Moroa naba raba i mi lavatbungorong, i lok ngan luunun tin la neni lorooro avolo. Ganoxa ne Moroa ga paase alii i do ni naba raba i ri mo limixin di balamu i.

¹³Do loklok tong pen i vot parap tara la i lok laxakapmek, ni noxo lok do ne Moroa i raba na loklok tong pen tin. Kopmen tara i epovo ri lok tong pen ne Moroa ti lok laxapmek, la neni xa noxo lok tong taradi. ¹⁴Ketla laradi i suma loklok tong pen at loxonaleng lavavara xapmek axa ren i sar asoogong i. ¹⁵La mo lavavara xapmek teren naba sisilok la ba lox

asuusu laxakapmek. Melemu at na, laxakapmek na sisilok la na lox asu lanmet.

¹⁶Luvutnetak mi luvurinuk orong. Nemen tara na xarang nimi mumu i na. ¹⁷Leventamtaba mo i lox avukat aleng, ni axap nom boro vana at laxalibet; i si boro vana at ne Temen dik, mo ga rudum li laxangking, lagaaling, la laxampenti; kopmen teretepukus at loklok teren la kopmen toxot at lamain ik lok keneng teren. ¹⁸Neni ga mumu asu lavavara ren la ga raba nedik mi lorooro maxat, mo ga laa boro at levelinga ruturun teren, kusu nedik taba lok ngan levempipisik avot, la taba gomgo ri lempanga axap, ni ga rudum li i.

Nemi Mina Ronga Na Levelinga, La Mina Mumu Asu Box I

¹⁹Luvutnetak mi luvurinuk. Mina doxoma na lavanga. Nemi axap mina lok soso ri ronga res, ketla nemen mita vaase porang soso levelinga, la mita musak soso, ²⁰mila lumukmusak at laradi kopmen na lox asuusu luruptuvuk avukat, kerekngan ne Moroa i vara i. ²¹Kuren la, leveloklok axap i bilingot la laxakapmek i umsu aleng at na lavatbung menemen, ni nom mina lok pes kape i. La mina lox asi nimi la mina xonom ka levelinga at ne Moroa, ni gatlo li i ro xeneng at lorooro atnimi. Ni mun nom levelinga i epovo na lox arooro nimi.

²²Nemen mita lok ngan luvuttadi rongtonga xape mun di ronga levelinga at ne Moroa, la kopmen dina mumu asu i. ²³Do laradi i ronga mo levelinga, ketla kopmen na gu mu asu i, ni i ngan laradi i ven loroonan teren at liriong ²⁴la i reven avukat lemeren la melemu i vas kaxat, la soso mun i domampe mo lemeren i lok kereva. ²⁵Ketla do tara i ven kibis mo levelinga i nunuan aleng, mo levelinga naba lox asepmus i basinge loxokoxo at laxakapmek. Do neni nang tonga amisix i la noxo domampe i, ketla na gu mu asu i, Moroa naba lox anarong i at lempanga ni i lox i.

²⁶Lentaba dik lok keretna, “Nenia laradi nuunu la loklok tarak i lox avukat at lemeren ne Moroa.” Ketla do ni xopmen na lok tatao avukat lavapaase ren, ni i xaxarang axa lebelen, la lunuunu ren i ngan lavanga gamasa. ²⁷Leveloklok mo i nemen, ne Moroa i vara i do limixin dina lox i. Do dina lox epovo i, i lox asuusu i do di nuunu ruturun. Nom leveloklok i lox avukat aleng la i lok keretna. Limixin dina lok tatao avukat lubangkarun la lavakin, lavatlok atdi diga met pam; la dina lok tooro di at levenmumuat atdi. La lara lavanga bok, nedik ata lok tatao avukat lavatpas atnedik, la loklok at na lavatkangka noxo lox abilingot lorooro atnedik.

Labalamu Atnedik Na Evan Mi Limixin Axap

2 ¹Luvutnetak mi luvurinuk. Nemi mi nuunu parap Leeme Silok ne Iesu Karisito, mo i umsu mi lisisixam. Kuren la nemen mita lox asi

laradi kopmen taasen silok teren la nemen mita lox aurut tara vetpes; ketla mina ven limixin axap ngan legesara. ²Mo dola laradi nopnovos i ruuna laarung molot at lekngen la i siga lempanga singsiga nunuan la ia vubeles at loogu lotu atnimi, i lox avukat mene. La do laradi kopmen tempanga ren i siga lempanga maut mun, la neni i beles bok at loogu lotu, loklok atnimi ridu na epovo mun. ³Ixo lox avukat do nemi mi lox asuusu loklok ngangao aleng ti nom laradi i siga lempanga singsiga nunuan la mi tong i rin do ni na lok ka loxot kitkis avukat; ketla ti laradi banbalo mi tong i rin, do ni na tu mun koplana xis to vetpes koplana xis kopok at laxangka parap lengkangkedek at limixin. ⁴Mo do nemi mi lok na loklok, nemi mi lok laxakapmek, atla mi lox abulubun kepe limixin banbalo keneng at lotu atnimi. Na lodoxoma i lok kapmek aleng.

⁵Luvutnetak mi luvurinuk orong. Nemi axap mina rongga ia. Luvuttadi mo di lok ngan lavanga gamasa at lemeren limixin at na lavatangka, Moroa ga soxolik ka vam di kusu diba umsu mi lunuunu la dina nemen ngan lavaanat too at Linintoo ren. Neni ga paase alii i do nedi limixin di balamu i, diba lok ka loxot at Linintoo ren. ⁶Ketla nemi mi lox abulubun kepe limixin banbalo. Nemi miklen i do, limixin nopnovos di lox abulu nemi la di lok kaka lempilas atnimi. Nedi vam nom di lok li nemi at lavapaase. ⁷La di paase kapmek ti laasen avukat at ne Iesu, mo ne Moroa ga lox anarong nemi min.

⁸Nemi miba lok levempanga ik mokso, mo do mina mu asu mo levelinga i silok aleng la ik lok keneng at Lovoang Kaala, mo i lok keretna, “Mina balamu limixin petpes ngan mi balamu nemi.” ⁹Ketla do mi lox asi tara la mi lox aurut tara vetpes, nemi mi lok laxakapmek, la mira los polo vam Lenavolo at ne Moroa. La kerepmo mi lok ngan limixin tongtonga viribang. ¹⁰Do taradi i mumu asu avukat Lenavolo at ne Moroa, ketla i rongga xepe loxot lixilik teren, i lok ngan neni ia los polo axap pam i. ¹¹I lok ngan i na. Moroa ga vaase levelinga keretna, “Nemen gat lelongka.” La ga vaase bok, “Nemen gat uta sev amet taradi.” Mo do mixo lok loklok ti elongka, ketla mi sev amet taradi, nemi mi los polo vam levelinga axap at ne Moroa la mi lok ngan limixin tongtonga viribang.

¹²Lavapaase la loklok atnimi na lox avukat axap mila ne Moroa naba lok li nemi at lavapaase mo do loklok atnimi kopmen na epovo mi levelinga ren, mo ik lox asepmus nedik. ¹³At lorooro atnimi do kopmen mina ruuna lebelemumu, Moroa naba vaxaru nemi at lavapaase la ni noxo lox asuusu lebelemumu ren tinimi. Loklok ti vaxaru tara at lavapaase ixo lox avukat solo, ketla loklok ti lox asuusu lebelemumu i lox avukat aleng.

Leven Gugu Nunuan Eburu Mi Lunuunu

¹⁴Luvutnetak mi luvurinuk. Do taradi i tong i do i ruuna lunuunu, ketla kopmen teveloklok nunuan at lorooro ren, lunuunu ren i lok ngan

lavanga gamasa la ixo epovo do lunuunu kerepmo na lox arooro i. ¹⁵Dola luvutneton nimi xopla luvurinen nimi dik pakes ti levempanga singsiga, la kopmen dina lok ka epovo teveluxa anan ¹⁶la do tara atnimi na vot pasa di la na lok tidi keretna, “Moroa na lox anarong nimi, mina nemen avukat la mina anan avukat,” ketla kopmen na lok tooro di mi lempanga singsiga la lempanga anan, mo levelinga ren kopmen na lok tooro di. ¹⁷La at na langas bok, mo do lunuunu xusuk ik lok la kopmen teven gugu nunuan nak lox eburu min, mo lunuunu i ngan lavanga gamasa.

¹⁸Taradi na lok keretna, “I lox avukat mun do lara i ruuna lunuunu la lara vetpes i ruuna leven gugu nunuan;” ketla nia a tong i rin keretna, “Do tara xopmen na lok teven gugu nunuan, neni xopmen na ruuna lunuunu. Nia a ruuna leven gugu nunuan, mo i lox asuusu lunuunu rak.” ¹⁹I lox avukat do una nuunu do legesa Moroa xusuk mun. I ruturun, ketla lubunggas bok di nuunu xuren la dik marat aleng.

²⁰Mo laradi, neni lavanga baulang. Lunuunu ren i ngan lavanga gamasa mo do i ruuna lunuunu xusuk la kopmen teven gugu nunuan i nemen at lorooro ren. ²¹Ana lox asuusu i do na levelinga rak i ruturun mi lorooro at ne Abaram. Lurubuno atdik ne Abaram ga ronga res at ne Moroa; ni ga raba lamdak teren ne Aisak ngan laplavang. La kerepmo ne Moroa ga tong i do ne Abaram ni laradi mokmokso. ²²I xasep do mo loklok at ne Abaram ga lox asuusu lunuunu ren la ga lox amuat lunuunu ren. ²³La loxot at Lovoang Kaala ga sorun keretna, ‘Abaram ga nuunu at ne Moroa la Moroa ga siam ka ba i ngan laradi mokmokso.’ *Lur 15:6*

La ne Moroa ga so asen ba i do lentangas teren.

²⁴Kuren la nemi axap mina ven avukar i do ne Moroa na lox asepmus laradi mo do i ruuna leven gugu nunuan eburu mi lunuunu. Do i ruuna lunuunu xusuk mun, ixo epovo.

²⁵La at na langas mun ne Raap, latkin ngarangat, gak mokso at lemeren ne Moroa. Neni ga lok tooro luradi likling boro Israel la ga riki du uto vetpes kusu limixin esep di noxo ranga alis du. ²⁶Kuren la mina xasep keretna, labantuxu kopmen toroonan teren, ni ira met pam; la kerepmo bok lunuunu kopmen teven gugu nunuan teren, ni ira met pam.

Mina Lok Tatao Avukat Lavapaase Atnimi

3 ¹Luvutnetak mi luvurinuk. Kopmen na lox avukat do buaang atnimi na lok ka lugugu ngan luvuttadi loklox ase at levelinga at ne Moroa, mila ne Moroa naba ila mumu aleng lugugu at luvuttadi loklox ase. Mira xasep pam at na. ²Nedik axap tak sak kikixin at leventaangas buaang. Ket do laradi kopmen nak lok laxakapmek at lavapaase ren, neni laradi mokmokso rinotno la ni iklen bok ti lok tatao lorooro axap teren.

³Nedik ta lok li loxonaen lixilik at lungusno at lavaros ti lox i kusu naba ronga res atdik, la nedik ta epovo na sixit min uto at lengkot ta vara

i. ⁴Kopla mina doxoma mumu lavattaaxup i silok aleng la lamanman lolos ik lox asen i at laras. Lisitia at lavattaaxup i lixilik mun, ket do laradi gomgo ren na vara i do na sen min ti toxot, ni naba vaxar akmokso lisitia la lavattaaxup ira sen ti mo lenep i vara i. ⁵Na lisitia i lok ngan lagam at laradi; ni loxot lixilik mun at labantuxu ren, ketla lagam i epovo do na tong asu levelinga loklox asilok. Nemi minam doma mumu i na; laxao lixilik i epovo ri an kaka axap laxairing silok. ⁶La lagam i lok ngan mo laxao. Ni i ngan lavanga xapmek ti lengkot axap at labantuxu, la ik lox axatu kaxat leveloklok kakapmek at labantuxu, la ik lox axatu kaxat bok leveloklok i bilingot at lorooro axap at laradi. La laxao xerepmo ip tavasu at lemenemen songsongot.

⁷Limixin di epovo na lox amenemen levenasen panga rooro axap at na lavatbung menemen, ngan levempanga mi lavanuet kangkedek boro at laxairing, levempixa, levesisi la lempanga di kaxao mi lebelen di, la levenmat at laras. ⁸Ketla kopmen taradi i epovo ri lox amenemen lagam. Amisik lagam ik lox axatu kaxat laxakapmek. Neni i epovo na sev amet tara kerekngan mun luxuasep.

⁹Mi leven gam atdik nedik di xip aurut laasen at ne Moroa, ne temen dik. La nedik di paase kapmek bok min ti limixin petpes no ne Moroa ga rudum li di kerekngan lampoovo ren. ¹⁰Levelinga ri xip aurut laasen at ne Moroa la levelinga xapmek bok ip tavasu at legesa gam mene nga. Luvutnetak mi luvurinuk, na loklok kopmen nak mokso. ¹¹I lok ngan na lempapaase poovo. Ladan mumudut eburu mi ladan i so mamao noxo sen su at legesa xatli dan. ¹²Luvutnetak mi luvurinuk. Luuna pik ixo epovo ri visik levempeven olip. La luuna vaen ixo epovo ri visik levempeven pik. La ixo epovo bok do tara na lok ka ladan mumudut boro at ladan i so mamao.

Lodoxoma Avukat Ne Moroa Im Taba I

¹³Do tara xantubu atnemi i ruuna lodoxoma avukat mi lakleklen solo, neni na lox asuusu i mi lavatpas teren i lox avukat axap la i umsu mi leveloklok nunuan; neni i lox i na mi langsung loklok ngangao mi lodoxoma avukat. ¹⁴Ket dola tara i ruuna levereven peves ti lempanga at tara vetpes la loklox asilok, ixo epovo do neni na lox aurur i do neni laradi avukat, la ixo epovo na sev apkap do neni laradi rongtonga xepe at levelinga raturun. ¹⁵Lodoxoma kerepmo kopmen na laa boro vana at ne Moroa. Ni loklok at na lavatkangka mun at ne Satan. ¹⁶Do limixin at lara lemenemen di ruuna levereven peves ti lempanga at tara vetpes la loklox asilok, lixitkis atnedi naba lok kapmek la buaang leveloklok kakapmek nabak lok kantubu atdi.

¹⁷Ketla nedi limixin di ruuna lodoxoma at ne Moroa, di ruuna loklok keretna. Lara avot, luruptuvuk atdi i dadat, limila i nemen kantubu atdi,

loklok mulus bok mo, la ding tonga res at lentaba vetpes; di umsu mi lebelemumu la dik lox amisik leveloklok nunuan. La di ke xepe loklok tik lox asi tara, la loklok kaxarang. ¹⁸Nedi dik lok lumulum kantubu at limixin, mo lugugu atdi ba pisik asu lorooro nunuan kantubu at limixin axap.

Lentangas At Laxapmek Neni I Munepen Mi Ne Moroa

4 ¹Nom levenekarakat la levenedak kantubu atnimi i laa meva? Ni nom ik sixisu boro at lebelen nimi; lavavara ri laxakapmek i nemen atnimi la na loklok ik paxaru kaxat levenesep keneng at lorooro atnimi. ²Nemi mi vara levempanga, ketla kopmen mina epovo ri lok kaka i. Nemi mi sev amet limixin la mi ngaongao ri lempanga at lentaba vetpes, ketla kopmen mina epovo ri lok kaka nom levempanga mi vara rin. Mi vetep mi levelinga la mi vesep. La kopmen mina lok kaka tempanga avukat mila kopmen mina ngising ne Moroa rin. ³Do nemi mi ngising ne Moroa ri levempanga mi vavara rin, kopmen minak lok kaka i, atla lodoxoma atnimi kopmen nak mokso; atla mi vavara mun i xusu rik lox amomo labantuxu atnimi.

⁴Loklok atnimi i lok ngan loklok at laradi ing longka tixin. Do laradi i vara mu loklok at na lavatkangka, neni i sok tixirixes kepe ne Moroa. Kerepmo la laradi i vara na etangas mi loklok at na lavatkangka, neni i munepen mi ne Moroa. ⁵Nemen mita doma i do Lovoang Kaala i tong i do Loroonan Kaala, mo ik lok atdik, i sasat limixin ti levereven peves. ⁶Ketla ne Moroa i raba dik mi letaba nabalamu, kerekngan Lovoang Kaala i tong i,

“Moroa ixo ru ebelen minedi di lox aurut levenasen atdi. Ketla neni i lox asuusu letaba nabalamu ren tinedi di lox asi lorooro atnedi maxopok teren.”

Ler 3:34

⁷Kuren la nemi mina lox asi lorooro atnimi la mina nemen maxopok at ne Moroa. Nemi mina sok tixirixes kepe levelinga at ne Satan la ni naba ke xepe nimi la naba sixiro. ⁸Nemi mina nemen auret ne Moroa la ni naba nemen tino eburu minimi. Nemi luvuttadi at laxakapmek, lorooro atnimi na maxat bilong, i ngan laradi i gos lukngen la ira maxat manga. Nemi mi ruuna legepu doxoma, mina lok pes nom levendoxoma xapmek basinge lorooro atnimi. ⁹Mina bulu, mina saxaanu, la minang teng. Nemi ming longon, mina soxun loklok ting longon la minang teng. Nemi mi sosoro, mina soxun nom loklok ti sosoro la mina bulu. ¹⁰Nemi mina lox asi xa nimi at lemeren ne Moroa. Do mina lox i xuren, Moroa naba xip aurut nemi.

Nemen Mita Vaase Asi Luvutneton Nimi

¹¹Luvutnetak mi luvurinuk. Nemen mita vaase asi tara kantubu atnimi mi tevelinga. Do taradi i vaase asi neton mi levelinga, kopla na ila mumu

loklok teren, i lok ngan ta do i ronga xepe Lenavolo at ne Moroa la i lox asi i. Do mina vaase asi levelinga at ne Moroa, kopmen mina ronga res teren, la mi lox asi i. ¹²Moróa xusuk mun ik lok li levelinga ngan Lenavolo kusu limixin dina mumu asu i la ni xusuk mun i viila mumu loklok atdik. Ni xusuk mun i epovo ri lox arooro laradi kopla na riki i uto at lemenemen songsongot. Ketla kopmen nak mokso do mina viila mumu loklok at limixin di nemen saparap nimi.

Nemen Mita Lox Aurut Levenasen Atnimi

¹³Na mina ronga ia. Nemi lentaba luvuttadi mi paase xeretna, “Lingina kopla kantamak nedik tabat pas uto at lemenemen silok, la taba nemen go at legesa maares la taba lok leven gugu rip novos ka buaang levempilas.” ¹⁴Ketla levelinga keretnom kopmen na mokso, mila nemi mixoklen i do lorooro atnimi naba lok kereva kantamak. Nemi mi lok ngan mene lamantakabu, ik lok lixilik mun la ira sonao gamasa manga. ¹⁵Ketla nemi mina tong i keretna, “Mo do ne Moróa i vara i, nedik ata rooro, la ataba lok lempanga.” ¹⁶Ketla nemi xa mi xip aurut levenasen atnimi la mi tong asu levelinga loklox asilok. Mo axap leveloklox asilok patlak kerepmo, ni i lok kapmek. ¹⁷Kuren la do laradi iklen luruptuvuk nunuan, ketla neni kopmen na mu asu i, na laradi i lok laxakapmek.

Levempapaase Ri Luvuttadi Nopnovos

5 ¹Nemi limixin nopnovos mina ronga ia. Minang teng la mina bulu mila levenmumuat naba vot saparap nimi. ²Lapnovos atnimi ira xap pam, la levesingsiga atnemi laxampide ira ngas koxorop pam i. ³Leven gol atnimi la levesiliva ira lok kapmek pam mi libilinga, la na libilinga naba lox asuusu laxakapmek atnimi at laaleng ete la neni naba rin labantuxu atnimi ngan laxao. Nemi migak lok li bubua buaang levenaknixip la levempilas at na levenaleng kavaxap.

⁴Nemi xovisi mina raba luunun at luvuttadi di kaxat panga ro xataamang. Mina lox empana levesingsing atdi! Levenanteng atdi, ne Moróa ira ronga vam i. Neni Leeme Silok la i lolos aleng. ⁵Lorooro atnimi at na lavatangka i umsu mi laxampanga avukat la nemi mik lok momo. Nemi mira anan avukat la mirang pong solo, ketla laaleng at ne Moróa rip sep kutkut limixin kapmek mo naba vot. ⁶Nemi mi lok li limixin avukat at lavapaase la mip sev amet nedi di goxo lok taxakapmek; la kopmen dina tu ebelen eburu minimi.

Lorooro Atnedik Na Tu Tuxuruxun Mi Lising

⁷Luvutnetak mi luvurinuk. Mina ngangais mi lomomo se Leeme Silok nabamlong. Mina doma mumu laradi loklok tatao at laraamang; i tu tuxuruxun, la ia ngangais se laxangka na lox asuusu lempanga. Neni i nemen kangais bok ti larakabu mo na vot at leven gaaling teren. ⁸Nemi

bok mina tu tuxuruxun la mina ngangais mi lomomo, mila lovtopot at Leeme Silok i auret. ⁹Luvutnetak mi luvurinuk. Nemen nemi mita gagalinga mu luvutneton nemi, mila ne Moroa naba vaxaru nemi at lavapaase. Lovtopot at laradi rongtonga linga i auret.

¹⁰Luvutnetak mi luvurinuk. Mina doma bilong ti lavaeme vapaase alii. Nedi diga vavang mi laasen at Leeme Silok la limixin diga lox asongot di, ketla diga tu tuxuruxun. La nedi di lok ngan lampoovo rinimi kusu mina tu tuxuruxun, mo do levenmumuat na vot saparap nemi. ¹¹Nedik di so asen nedi lavaeme vapaase alii do limixin nunuan mila diga tu lolos. Nemi miga ronga vam leretere at ne Jop; neni ga tu tuxuruxun la ga sosolok laxanmumuat gat pot parav i, la melemu Leeme Silok ga lok luvukat tin. Leeme Silok i umsu mi labalamu la lebelemumu.

¹²Luvutnetak mi luvurinuk. Lara lavanga i silok aleng, i lok keretna; nemen mita vangpe mi laxalibet kopla laxangka kopla levempanga vetpes bok. Dola nemi mina tong i do, “tuturun,” kopla “kopmen,” Moroa ba lok momo. Do mina lok lavangpangpe xerepmo, Moroa ba raba luunun kapmek tinimi.

Lising At Laradi Avukat I Ruuna Lololos

¹³Kereva, tara go atnimi ip kip tevenmumuat? Neni nak lok lising. Tara bok go i lok momo? Neni nak pixan emi asu. ¹⁴Tara bok go atnimi i meres? Neni na ro ka loxongkulao silok at lotu la dina lok levesingising tin la dina saba i mi loxodan momonok at la olip at laasen at Leeme Silok. ¹⁵Mo do nedi di nuunu ruturun do Leeme Silok naba lox aroo mo laradi, Leeme Silok naba lox aroo i. La do neni ga lok laxakapmek, Leeme Silok naba doxoma xepe laxakapmek teren. ¹⁶Kuren la mina soxomus ela laxakapmek atnimi kantubu atnimi, la mina sing tinemi getgesara, kusu Leeme Silok naba lox aroo nemi. Do laradi nuunu loklok teren ik mokso, levesingising teren naba lolos aleng la naba epovo rinotno ri lok tooro laradi.

¹⁷I lok ngan levesingising at ne Elaia. Ni laradi ga lok ngan dik. Neni ga ngising lolos ne Moroa ri larakabu noxo vot la larakabu goxo vot ti laxangka at lavantun maares la lavanna gaaling. ¹⁸La melemu ni ga lok bok lising la ne Moroa ga lox asi larakabu ri lavatkangka la leveluxa ro at lentaamang ga su avukat.

Laradi Nuunu I Lox Amlong Laradi Xapmek Basinge Lanmet

¹⁹Luvutnetak mi luvurinuk. Mo do tara atnimi i vas tabaara basinge langas tuturun, mina sar amlong ka i. ²⁰Nemi mina ven kisip na lavanga. Do taradi i lok tooro laradi kakapmek, la laradi kakapmek i on basinge langas at lanmet la iamlong parap ne Moroa, neni ira lox arooro vam mo laradi basinge lanmet lexen la ne Moroa naba doxoma xepe buayang laxaloklok kakapmek teren. I ruturun.

1 Pita

Lovoang Avot At Ne Pita

Levelinga Loklox Axasep

Lamaares 65 A.D.

Pita ga malagan i na lovoang la na lovoang gat pas tinedi limixin nuunu mo diga epeseves at lengkot axap at lavatbung menemen. Na limixin nuunu diga nemen at lengkot petpes ngan limixin me xadiong. Ise ne Pita gak lok to Rom, neni ga malagan i na lovoang. Limixin nuunu diga ekip tangarang mi lentaba leveloklox asongot boro at lagavaman boro Rom mumu lumumu asu atdi ti ne Iesu Karisito. Pita ga vara i xusu na lox alolos di kusu dina tu lolos keneng at lunuunu atdi. Pita ga vaase aronga bok di mumu loklox arooro atnedi, la mumu bok ne Iesu la dina tu lolos amisik at levenmumuat kerepmo, la mumu bok lomlong at ne Iesu, kusu nedi diba doma mumu i na lempanga. Neni ga vaase aronga bok di mi leventaangas i nunuan ua ik mokso xusu ri limixin nuunu at ne Iesu Karisito dina mu asu i.

Lengkot silok keneng at na lovoang:

1:1-2 Lempapaase momo.

1:3-12 Lavapaase axasep mumu loklox arooro at ne Moroa.

1:13-2:10 Lixitkis atdik eburu mi ne Moroa.

2:11-3:12 Lorooro at limixin nuunu.

3:13-4:19 Ataba ekip tangarang mi levesongsongot mumu lunuunu atnedik.

5:1-9 Lentaba lempapaase bok mumu limixin nuunu.

5:10-14 Loklox anarong la lavapaase abeese.

Lavapaase Axasep

1 ¹Nenia ne Pita luun pavang at ne Iesu Karisito. Nia a malagan na lovoang tinemi limixin soksoxolik at ne Moroa; mi lok ngan limixin kadiong ti na lavatbung menemen la mik lox epeseves to at levennep taba

ro Pontas, Galesia, Kapadosia, Asia, la Bitinia. ²Ganoxa, Moroa ne Temen dik ga doxoma alii i do ni na soxolik ka nimi ngan limixin teren la na lox adadat nemi mi Loroonan Kaala ren, kusu minaba ronga res at ne Iesu Karisito, la neni naba lox adadat nemi mi lada ren.

Letaba nabalamu ren la lenmila na umsu xeneng at lorooro atnemi.

Lodoxoma Voovo

³Ata emi asu mi ne Moroa neni ne Temen, Leeme Silok atnedik ne Iesu Karisito, mumu mun lebelemumu silok teren tinedik, la neni ga lox arooro xaka amlong ne Iesu Karisito basinge lanmet kusu ri raba nedik mi lorooro maxat. La nai, ik suxa nedik mi lodoxoma voovo ri lorooro avolo. ⁴La nedik ataba epovo xusu ataba ven tu at laaleng ua taba lok kaka levenapnovos at leveloklox anarong no ne Moroa ik lok li i ri limixin teren to vana at laxalibet, kusu mo leveloklox anarong noxo lok kapmek la na xap gamasa. ⁵La ne Moroa ik lok li i rinemi limixin mi ruuna lunuunu la neni ik lok tatao nemi mi lololos teren kusu ri loklox arooro, mo ne Moroa naba lox asuvos i at laxavaxap at na lavatbung menemen. ⁶La mik lok momo aleng at na lavanga, keke i do mi ekip tangarang lixilik bok be mi tavanga i lox abulu nemi mumu buaang leveloklok tong pen ik lox asongot nemi. ⁷Ketla ana levempanga it pot ti lox asusu mun i do lunuunu atnemi i lolos. I ngan bok leven gol ni i epovo xusu dina lok kapmex i, din tin tong pen box i ro at laxao; la lunuunu atnemi, neni lavanga i silok aleng ti logol, neni dinaba lok tong pen i xusu ri long lenget ka i do i lolos koplakopmen. Melemu minaba ruuna ka leemi asu, la lisisixam eburu mi loklok ngangao at laaleng ne Iesu Karisito naba ru asuvos. ⁸Nemi xovisi mina ven tu ren, ketla mi kox i; la mo nga mixo ven tu ren, ketla mi nuunu ren. La mi umsu mi lomomo i silok aleng, la neni mo lomomo nenia axo epovo xusu ana mii poovo i mi tepanga mila i silok aleng. ⁹Lavasuun teren keretna, nemi min tuuna xaka loklox arooro xeneng at labaroonan atnemi, mumu mun lunuunu atnemi saporav i.

¹⁰La luvuttadi vapaase alii diga terea mumu avukat tinotno levelinga mumu mun i na loklox arooro, nedi diga vaase alii mi letaba nabalamu no ne Moroa im taba nemi min. ¹¹Diga puse i xusu dinaklen kaka rinotno loxonaleng at lovtopot at ne Karisito la naba vot kereva. La digam doma vupuse do Loroonan at ne Karisito no gak lok keneng atnedi, ga paase alii mi levesongsongot ne Karisito naba ekip tangarang min la neni naba ru pavaa mo levesongsongot, la melemu ren neni naba lok kaka langsung lisisixam. ¹²Ne Moroa ga raba asu na levelinga rinedi na luvuttadi vapaase alii xusu nedi di noxo gugu xusuk tik lok tooro nedi xa, ketla ti lok tooro nemi, at loxonaleng diga vaase mumu mo levelinga. Ana nemi mira ronga xaka vam i at luvuttadi xipkip linga di vaase asu Lagale Lavavang mi lololos at Loroonan Kaala boro vana at laxalibet. Neni na Lagale Lavavang lubang angelo bok di vara aleng i xusu dinaklen i.

Lavapaase Asu At Lixitkis Kaala

¹³Kuren la mina lox agagas levendoxoma atnemi ri lok mo levempanga ne Moroa i vara i. Mina lok tatao avukat luruptuvuk atnemi la mina lok li axap levendoxoma atnemi pana at lorooro avolo, no mina lok ka i at laaleng ne Iesu Karisito na ru asuvos. ¹⁴Minang tonga res at ne Moroa, la nemen gat mi gutam lomlong ti mo lavavara xapmek miga ruuna i gano at levenaleng migak lok at larangtangu. ¹⁵La levempanga minak lox i, minak lox i eburu mi lorooro axap atnemi nan manton; atla ne Moroa neni ga ro xaka nemi, neni in manton. ¹⁶I ngan Lovoang Kaala i vaase xeretna, “Mina lok ka loklok in manton mila nenia an manton.”

¹⁷La minaklen i do ne Temen nemi no vana at lalaxibet, no nemi mi ngising tin, neni i viila mumu luruptuvuk at limixin la i viila mumu loklok atdi mi legesampoovo mun; kuren la mina raba axap lorooro atnemi at na lavatbung menemen eburu mi loklok ngangao saparav i. ¹⁸La nemi miklen luunun, ne Moroa ga un kaka amlong nemi min basinge lorooro etaba ga ravasu at lavalabat atnemi. La mo luunun ixo epovo xusu tara na lok kapmek i, ngan lisiliva xopla logol; ¹⁹ketla ne Moroa ga un ka nemi mi lada, ni luunun silok at ne Karisito kopmen taxakapmek teren la kopmen bok tibira at Lanasip at ne Moroa. ²⁰Avot ti luruntudum li at na lavatbung menemen, Moroa ga soxolik ka i xusu ri lok lugugu ren ganoxa la neni ga ravasu at na levenaleng kavaxap kusu ri lok tooro nemi. ²¹La at na mun langas neni ga lox i la nemi mira nuunu at ne Moroa, no ga lox arooro amlong i at lanmet la ga raba box i mi laasen silok; kuren la lunuunu atnemi la levendoxoma voovo atnemi i tu rinotno at ne Moroa.

²²La mo nga, mira ronga ka vam levelinga ruturun la kerepmo lorooro atnemi ira dadat pam la labalamu ruturun i ravasu at lorooro atnemi ti luvutneton nemi; kuren la mina ebalamu ela mi lorooro axap atnemi; ²³mila miga ruuna xaka livipisik amaxat la na lorooro maxat noxo xap ngan laradi at na lavatkangka, ketla naba nemen amisik; na lorooro ga ravasu at levelinga at ne Moroa la i rooro la naba nemen amisik. ²⁴I ngan Lovoang Kaala i vaase xeretna,

“Limixin axap di noxo nemen abao ngan levempivilis la lampeneves atnedi na xap ngan levempusuvus aaxa. Levempivilis naba mang, la levempusuvus naba subu su; ²⁵ketla levelinga at Leeme Silok, ne Moroa ik lox amisik la kopmen taxavaxap teren.”

Ais 40:6-8

Na levelinga neni Lagale Lavavang nemi miga ronga xaka i.

2 ¹Kuren la mina lok pes lalaloklok kakapmek basinge nemi; la nemen bok ba mita xaxarang, kopla mina lili aage levelinga, la mina reven peves, kopla mina lox asi tara mi levelinga. ²Minak lok ngan laxamdak mumulum, no di vavara inin amisik levendan tus at loroonan,

atla do mina inin amisix i, minaba vee mukun at lunuunu atnimi la mina roo suu. ³I ngan Lovoang Kaala i tong i xeretna,

“Nemi xa miga long terex i do lebelemumu at Leeme Silok i lox avukat.”

Sam 34:8

Luat Too

⁴Mina vot parap Leeme Silok, neni luat too no limixin diga lu xepe min do goxo epovo ri lok tugugu, ketla ne Moroa ga soxolik kaka i ngan luat, luunun teren i silok aleng la i epovo ri lok tugugu. ⁵Nemi bok mira lok ngan pam larauat too rip kip gu, la ne Moroa xa i xip loogu laplavang minemi, kusu nemi minaba gugu ngan lavamaasa at ne Moroa; la minam taba i mi leventamtaba at loroonan mo ne Moroa naba siam kaka i xeneng at ne Iesu Karisito. ⁶I ngan Lovoang Kaala i tong asu levelinga at ne Moroa xeretna,

“A soxolik kaka luat i ruuna luunun i silok aleng la anaba lok li i ngan luat ti lemesuluk at lemenemen Saion la do nege na nuunu ren, neni kopmen tinotno noxo ruuna ka lainmangan.”

Ais 28:16

⁷Mo luat neni i silok at levendoxoma atnemi limixin mi nuunu ren; ketla tinedi dixo nuunu ren, i lok ngan Lovoang Kaala i lok keretna;

“Mo luat luvuttadi gugu gu diga lu xepe min do i lok kapmek, ga ravasun ngan luat lugugu ren i volo rinotno mo larauat axap.”

Sam 118:22

⁸La loxot bok at Lovoang Kaala i vaase xeretna,

“Na luat naba lok limixin kusu dina sak kikixin la naba lox asubu nedi.”

Ais 8:14

Di sak kikixin atla xopmen dina nuunu at levelinga at ne Moroa; anai i epovo mi lavavara at ne Moroa rinedi.

⁹Ketla nemi lavaanat soxolik ka; nemi lavamaasa at loorong silok, la nemi lubang mixin dadat la nemi limixin at ne Moroa akmokso. Neni ga soxolik ka nemi xusu minaba lox asuusu lugugu avukat teren, neni ga ro xaka nemi boro xeneng at lamain bonot la uto xeneng at laxasep maraanu ren. ¹⁰Ketla avot be at na, nemi goxo ngan limixin at ne Moroa, ketla amo nga nemi mi lok ngan limixin teren; i ngan bok gano nemi mi goxoklen lebelemumu at ne Moroa, ketla amo nga, mira ruuna ka vam lebelemumu ren.

Lavasaxaruki At Ne Moroa

¹¹Larapen tangas orong tarak. A sing nemi mi lodoxoma axap tarak. Nemi mi lok ngan mun limixin kadiiong de at na lavatbung menemen, kuren la mina ru asepsu basinge leveloklok kakapmek at labantuxu, atla neni na leveloklok i vesep eburu mi labaroonan atnemi. ¹²La minap tuvuk avukat at lemeren nedi lavamolun, la mo do dina sok taba parang nemi mi toloklok kakapmek, nedi dinaba ven kibis ba leveloklok nunuan atnemi la dinaba emi asu mi ne Moroa at laaleng potpot teren.

¹³Minang tonga res atnedi axap luvuttadi amgomgo, limixin di lok li di, mila Leeme Silok i vara i xuren. Minang tonga res at loorong silok at lenep kangka atnemi, neni imgomgo ri limixin axap. ¹⁴La minang tonga res bok atnedi luvuttadi amgomgo at levenep silok, loorong silok ik sak tiki nedi xusu dina lox asongot nedi dik lok laxakapmek la dina emi asu minedi dik lok luvukat; ¹⁵mila ne Moroa i vara i do minak lok leven gugunuan kusu minaba vamus levelinga gamasa at luvuttadi rangtangu. ¹⁶Minap tuvuk avukat ngan limixin sepmus at ne Moroa; la nemen gat miguta se bopbop pe laxapmek atnemi mi leveloklok sepse at lemeren mun at limixin; ketla minap tuvuk ngan lavaanat saxaruki at ne Moroa. ¹⁷Mina lok ngangao bok at limixin axap, la mina balamu limixin nuunu; la mina lok ngangao at ne Moroa la at loorong silok bok.

Lampoovo At Losongsongot At Ne Iesu

¹⁸Nemi lavasaxaruki. Minak lok mu asu levendoxoma at lubung amgomgo atnemi la mina lox asu rinotno loklok ngangao atnemi rinedi, kopmen do mina lok ngangao xusuk atnedi di belemumu nemi, ketla tinedi bok do di vaat tinemi. ¹⁹Moraa naba lox anarong nemi do dina lox asongot nemi mumu mun loklox avukat atnemi na mu asu lodoxoma ren. ²⁰Ketla mi noxo lok kaka loklox anarong do dina sep nemi xusu laxakapmek nemi miga lox i. Ketla do mina lok ka mun i at loxonaleng mina lok loklox avukat la dina lox asongot nemi xusu nen; Moroa naba lox anarong ba nemi do mina tu tuxuruxun at na levenaleng di lox asongot nemi. ²¹La ne Moroa ga ro xaka nemi mumu i na langas at losongsongot, mila ne Karisito axa ga suma losongsongot tinemi la ga lok taba nemi mi na langas, kusu minaba mumu asu lenaim teren.

²²“Neni goxo lok bok tekakapmek, la teta goxo ronga asu bok tekaxarang ga ravasu at lungusno ren.”

Ais 53:9

²³At loxonaleng diga paase aksaksa rin, neni goxo vorang di mi teloklok bok kuren; la at laaleng neni ga lok kaka loklox asongot, neni goxo lok tepanga, ketla neni ga lok li levendoxoma axap teren at ne Moroa neni laradi rongtonga linga la na lugugu ren ik mokso rinotno. ²⁴Ne Karisito axa neni ga xip leveng kakapmek atnedik keneng at labantuxu ren uto at laxaba kusu nedik tanaba sepmus basinge loklok kakapmek atnedik la ata rooro tik lok leveloklok ik mokso. La nemi mi lox avukat pam mumu mun laranin kooxing teren. ²⁵Nemi miga lok ngan laxasipsip diga soronga, ketla ana nga, migaramlong pam kusu mina mumu asu Lamgomgo atnemi la neni laradi loklok tatao bok at lorooro at leroonan atnemi.

Lara Koenasun

3 ¹At na mun langas bok la nemi lavakin minang tonga res at levendoxoma at lavatlok atnemi, kusu do tentaba atnedi do dixo

nuunu at levelinga at ne Moroa, loklok mun atnemi naba lok nedi la dina nuunu. La ixo epovo bok do minaba vaase axa toxolinga ri lox amlong levendoxoma atnedi. ²Dinaba ba gili mun lorooro atnedi mumu mun loklox avukat la loklok ngangao atnemi rinedi. ³Nemen gat migutak lok kaka leveloklok tooro me maxamang kusu ri lok nemi mina milik maraanu, ngan langas mik lox i at levengkabinim at lempatlak atnemi, kopla levenpun mi vonga i la levesingsiga ming siga i. ⁴Ketla lorooro atnemi nak milik maraanu la mina umsu mi loklox atnaasan i lok nunuan aleng, neni mo loklok i silok aleng ti ne Moroa. ⁵Naba lok ngan lavakin mokmokso me gano digak lok li levendoxoma atnedi at ne Moroa la diga sisinang amaraanu nedi mila diga mumu asu levendoxoma at lavatlok atnedi. ⁶Ne Sera gak lok kerepmo; neni gang tonga res at ne Abaram, kuren la neni ga toro rin do leeme silok teren. Nemi miba lok ngan laxaalik teren do minak lok luvukat la mi noxok marat at tepempanga.

⁷Kuren pam la nemi bok lavatlok, mina ekilen ela mi levempakpakes at lavakin atnemi la minaklen avukat box i do nedi dixo ruuna tololos solo la mina lok tooro nedi. Mina raba nedi mi loklok ngangao mila nemi buru axap minaba ruuna xaka laramtaba i rooro boro at ne Moroa. Mina mu asu i na levelinga xusu, kopmen tekarakat naba lok pe levesingising kantubu atnemi lavatlok eburu mi ne Moroa.

Losongsongot Mumu Leveloklox Avukat

⁸Ti lox axap na levelinga xeretna, nemi axap mina ruuna legesa doxoma eburu mi legesa sumsuma xeretna; mina doma mumu nedi di ruuna levenmumuat, la mina ebalamu ela ngan nemi loxoeton la mina belemumu nedi la mina lox asi nemi. ⁹Nemen gat miguta vorang laxapmek mi laxapmek kopla mina vorang lavapaase kapmek mi lavapaase kapmek bok; ketla mina vorang i na leveloklok mi loklox anarong, atla loklok anarong neni lavanga ne Moroa ga xaape xusu neni naba raba nemi min at laaleng neni ga ro xaka nemi. ¹⁰I ngan Lovoang Kaala i vaase i xeretna,

“Do nege i vara i xusu na ruuna lorooro nunuan, la i vara i xusu neni na ven levenaleng avukat, neni na ke xepe lavapaase kapmek, la na xav i at laxaxarang. ¹¹La neni na ke xepe laxakapmek la nak lok luvukat, la neni na lolos ti lok ka limila keneng axap at leveve ren. ¹²Leeme Silok i reven aratao limixin mokmokso la ing tonga res at levesingising atnedi; ketla neni im taba arulu nedi dik lok laxapmek.” *Sam 34:12-16*

¹³Nege naba lox asongot parang nemi do levendoxoma atnemi naplivi rik lok luvukat? ¹⁴Ketla do mina lok kaka loklox asongot mumu loklok avukat mi lox i, minaba ruuna xaka bok leveloklox anarong. Kuren la nemen gat miguta marat at teta, kopla mina bulu. ¹⁵Ketla keneng at lorooro atnemi mina lok ngangao at ne Karisito, atla neni Leeme

Silok. Mina gagas at levenaleng axap ti porang levesusue at limixin at levenaleng dina susue nemi mi levendoxoma lolos atnemi saparap ne Karisito. ¹⁶Ketla mina vaase ridi mi lumulus la loklok ngangao, la lorooro atnemi nak lok nunuan kusu do dina paase xapmek mumu lorooro avukat atnemi keneng at ne Karisito, dinaba mangan at levelinga kapmek nedi di paase i. ¹⁷I lox avukat kusu mina xip kaka losongsongot at leveloklox avukat, do neni lavavara at ne Moroa xuren, la kopmen do at leveloklok kakapmek. ¹⁸Karisito ga met gesara mene nga ri ru korop ti laxakapmek axap atnemi, la neni laradi avukat ga met ti rukun levesongsongot ti limixin di lok laxakapmek, kusu ri lam kaka nemi uto saparap ne Moroa. Diga sev amet labantuxu ren, ketla Loroonan Kaala ga lox aroo xat amlong i; ¹⁹la at lorooro xat at loroonan teren, neni ga vavang ti limixin, labaroonan atnedi gak lok at loxokoxo.^a ²⁰Nedi labaroonan at na limixin digang tonga xepe ne Moroa at levenaleng neni ga ngangais atnaasan nedi at levenaleng ne Noa ga gugu lavattaaxup teren. Keneng teren ga lavanuan mun nedi diga roo suu basinge laran, ²¹la ga lok ngan neni lampoovo at lesepe susu, ana nga nemi bok mi roo suu ren. Ni xopmen do rit gos kepe laxakapmek at labantuxu, ketla neni laxakaape mi lox i ri ne Moroa mi lodoxoma avukat. La neni na i lox aroo nemi mumu mun lorooro xat amlong at ne Iesu Karisito, ²²la neni gara urut pam uto vana at laxalibet, la amo nga ik lok at lekngen tino at ne Moroa, la neni lamgomgo at lubang angelo axap eburu mi luvuttadi loklok tatao la limixin lolos boro vana at laxalibet.

Lorooro Maxat

4 ¹Karisito ga suma losongsongot at labantuxu ren, kuren la nemi bok mina ru lolos ngan levendoxoma neni ga ruuna i; mo do nege i ekip tangarang mi losongsongot at labantuxu ren mumu lunuunu ren saparap ne Karisito, i lox asuus i do neni ixok lok bok ba xeneng at laxapmek. ²Kuren la mina ke axap lorooro atnemi at na lavatbung menemen kusu mina mu asu lodoxoma at ne Moroa, la kopmen lavavara kapmek mun at luvuttadi at na lavatkangka. ³Lekanaleng mo gara xap pam migak lok laxaloklok kapmek mo luvuttadi at lamain di vavara nak lox i, ngan loklok kakapmek maxamang at lixitkis epot, la levereven peves, liinin kadan lolos, lengkot mamangan, la laplavang ti laxampoovo vanga, ni laxapmek bok no i bilingot tinotno. ⁴Limixin no dik lox amisik at na laxakapmek, di sangu rinotno at loxonaleng nemi mixo emu minedi rik lok mo leveloklok i lok kapmek; kuren la di paase aksaksa mumu nemi. ⁵Ketla nedi dinaba raba levelinga loklox axasep atnedi ri ne Moroa mumu laxapmek diga lox i, neni laradi i gagas kusu na viila limixin axap

^a 3:19 Na lemenemen di so asen i do Edesa.

di rooro la nedi bok diga met pam. ⁶Neni ba na lavasuun teren la ne Iesu ga vavang bok mi Lagale Lavavang ti limixin diga met pam, atla neni naba viila axap limixin mumu mo leveloklok diga lox i at lороoro atdi. Ketla Lagale Lavavang gat pas tinedi xusu labaroonan atnedi naba roo la dinaba epovo ri rooro avolo ngan ne Moroa.

Laradi Loklok Tatao Avukat At Leventamtaba At Ne Moroa

⁷Laxavaxap at levempanga axap, mo nga i auret. Kuren la levendoxoma atnemi na xasep nunuan la mina lok tatao avukat levempatpas atnemi, kusu miba epovo na lok levesingising. ⁸Mavana at levempanga axap, mina ebalamu ela nemi mi luruturun atla labalamu at limixin naba ru pe laxangkakapmek solo. ⁹Mina lok maraose abeles kaka leventaba vetpes uto xeneng at laraugu atnemi la nemen gat mita gagalinga. ¹⁰Nemi getgesara mi ruuna lugugu at loklok tatao levenasen tamtaba at ne Moroa, kuren la mina gugu avukat mi nom leventamtaba axap no ne Moroa ga raba nemi min, ti lok tooro leventaba vetpes. ¹¹I ngan nege do neni laradi vavang, neni na vavang akmokso mi levelinga at ne Moroa; la do nege i gugu taba, neni na gugu taba mi lololos ne Moroa im taba i min, kusu keneng mun at na leventamtaba axap, leemi asu nabat pas ti ne Moroa mumu mun ne Iesu Karisito. Leemi asu la lololos tin amisik la kopmen taxavaxap teren. Tuturun.

Losongsongot At Laradi I Mumu Ne Karisito

¹²Larapen tangas orong tarak. Nemen gat miguta sangu at leveloklox asongot lolos ik lok tong pen nemi, la na ngan ta lavanga maxat petpes i vot parap nemi. ¹³Ketla mina sosoro atla nemi mi ru buru mi ne Karisito at losongsongot teren, kusu minaba umsu mi lomomo at laaleng lisisixam teren na ru asuvos. ¹⁴La do limixin di paase aksaksa rinimi mumu laasen at ne Karisito, luvukat nabat pas tinemi. Lavasuun at na keretna, mo lороonan i lox asuusu lisisixam, ni Lороonan at ne Moroa la ik lok keneng atnemi. ¹⁵La do teventaba atnemi na lok kaka loklox asongot, ixo lox avukat do dina lok ka i ngan luvuttadi sepsep tadi, koplа luvuttadi xipkip pilo xopla luvuttadi xapmek, koplа nemi mik lox angtang lorooro at leventaba vetpes. ¹⁶Ketla do mina lok ka loklox asongot mumu mun i do nemi luvuttadi mumu asu at ne Karisito, nemen gat nemi guta mangan at loklok di lox i rinimi, ketla mina tong avukat ti ne Moroa atla nemi mip kip laasen at ne Karisito. ¹⁷Laaleng ira auret pam ti laaleng ete na ru kaxat, la ne Moroa naba viila mumu avot be loklok at limixin tinotno ren. Do na ru kaxat avot minedik, naba lok kapmek tinotno rinedi, dixo rongа res at Lagale Lavavang at ne Moroa. ¹⁸I ngan Lovoang Kaala i vaase i xeretna,

“I lolos aleng do luvuttadi mokmokso dina roo suu, ketla naba lok ba xereva rinedi luvuttadi xopmen dinaklen ne Moroa la dik lok laxakapmek?”

¹⁹Kuren la nedi dik lok kaka losongsongot mila dik lok mu asu lavavara at ne Moroa, dina tu lolos at leveloklok nunuan, la lunuunu atnedi na tu tuxuruxun at ne Moroa, laradi runtudum li, la neni kopmen na domampe laxakaape ren.

Lubung Sipsip At Ne Moroa

5 ¹Nenia langomgo at lotu ngan lubung amgomgo dik lok kantubu atnimi. Nenia aga ven levesongsongot ne Karisito gap kiv i, la nenia anaba ruuna ka lisisixam eburu minemi mo naba ru asuvos. La a sing nemi lubung amgomgo xeretna, ²mina lok tatao avukat laxasipsip ne Moroa gara raba vam nemi min, la minak lok tatao nedi mi lavavara axap atnimi, ngan ne Moroa i vara i xuren. Nemen gat miguta lok lugugu atnemi mi lodoxoma rip kip unun teren, ketla mina lox i mi lodoxoma rinotno ri gugu. ³Nemen gat miguta ru polo nedi dik lok maxopok at loklok tatao atnemi, ketla minap tuvuk ase nedi. ⁴La do Laradi Gomgo rinotno at lubungsipsip na vot, minaba ruuna xaka luunun, ni lempatbungorong i ruuna lisisixam, la mo lisisixam teren noxo repes.

⁵La nemi bok luvuraau minang tonga ka levelinga at limixin mukun la mina mumu asu i. La nemi axap mina lok kaka langangan loklok ngangao kusu na umsu kantubu atnemi. I ngan Lovoang Kaala i vaase xeretna, “Moroa naba vaase asi luvuttadi di simi aurut nedi, ketla i lox asu letaba nabalamu ren tinedi dik lox asi di.” *Ler 3:34*

⁶Kuren la mina lox asi nemi maxopok at lukngen lolos at ne Moroa, kusu neni naba xip aurut nemi at laaleng ni ga lok katling i. ⁷Mina ke raba i mi levenanbulu atnemi, atla neni im doma loxokok tinemi.

⁸Mina lok tatao avukat lavatpas atnimi la mina reven avukat, atla laradi munepen atnemi neni ne Satan im booro saasaa ngan lavat laion mukmusak, la i puse ri tuvuttadi xusu neni nak lox epeseves nedi basinge ne Karisito. ⁹Ketla mina tu lolos at lunuunu atnemi la mina tu munepen min, atla mikleklen i do luvuttadi axap at na lavatbung menemen di nuunu dip kip na legesemet songsongot mun.

¹⁰Noxo lox abao la levesongsongot atnimi naba xap, la ne Moroa i umsu mi letaba nabalamu la ni ga ro xaka nemi kusu mina ruuna ka lisisixam avolo ren keneng at ne Karisito la neni naba lox axatu nemi, la neni naba lox alolos nemi la na lok li nemi ro at lixitkis avukat. ¹¹La ateren kusuk mun lololos amisik la kopmen taxavaxap teren. Tuturun.

Levelinga Loklox Axap

¹²Ne Sailas ga lok tooro ia xusu ri malagan na lovoang mutmut tinemi, la neni netak at laasen at ne Karisito. A vara i xusu ana lox alolos nemi mi levelinga at na lovoang, anai neni letaba nabalamu rinotno at ne Moroa. Kuren la mina tu lolos keneng teren.

¹³Luvutneton nemi at lotu keneng at lemenemen Babilon, ned i limixin soksoxolik ka, di lox aonon lavapaase momo atnedi rinemi, la ne nuruk bok ne Mak i lox aonon lavapaase momo rinemi. ¹⁴Mina eseega rangarang mi lenetnes at labalamu.

Lenmila nak lox eburu axap minemi limixin at ne Karisito. I ruturun.

2 Pita

Lovoang Sepsev Agepura At Ne Pita

Levelinga Loklox Axasep

Lamaares 66 A.D.

Anai ni lovoang sepsev agepura at ne Pita ga malagan i ri limixin nuunu mo diga nemen tangtagap at lengkot axap. La nai lovoang ni lempapaase aronga rinedi atla buaang nedi luvuttadi loklox ase xaxarang mo digat pas tangtagap. Na luvuttadi loklox ase xaxarang diga tong i do, leventangas kapmek ni i lox avukat la diga lok dola ne Iesu noxomlong bok ba. Kuren la ne Pita ga vaase axasep nedi mi lakleklen tuturun mumu ne Iesu xusu keneng at ne Iesu nedi diba tu lolos. Lavasuun at lomlong at ne Iesu, kopmen noxomlong soso ni i lok keretna. Moroa i vara i xusu limixin axap diba leeng avot mun be la melemu neni namlong ba.

Lengkot silok keneng at na lovoang:

1:1-2 Lempapaase momo.

1:3-15 Moroa ga soxolik ka dik kusu ri ruuna ka mo lorooro ren.

1:16-21 Levempapaase at lavaeme vapaase ali do ne Iesu ni i ruturun.

2:1-22 Lavapaase aronga mumu luvuttadi loklox ase xaxarang.

3:1-18 Lempapaase mumu lomlong at ne Iesu.

Lavapaase Axasep

1 ¹Nenia ne Simon Pita, lasaxaruki la luun pavang at ne Iesu Karisito.

La a malagan i na levelinga rinemi limixin miga ruuna xaka lunuunu xeneng at lomokmokso at ne Moroa atnedik, neni Laradi Loklox Arooro ne Iesu Karisito; la mo lunuunu i lox avukat ngan lunuunu atnama.

²La mumu mun lakleklen atnemi xeneng at ne Moroa la ne Iesu Leeme Silok atnedik, a sing do letaba nabalamu eburu mi lenmila na su silok keneng at lorooro atnemi.

Lorotoro La Losoksoxolik At Ne Moroa

³Lololos at ne Moroa gara raba vam nedik mi levempanga axap nedik dik pakes tin ti lok kaka lorooro avolo la ti ruuna ka luruptuvuk nunuan mumu lakleklen atnedik ti ne Iesu Karisito, mo ga ro xaka nedik kusu atak lox eburu min keneng at lisisixam la luvukat teren. ⁴Keneng at na lempanga, neni gara raba vam nedik mi leventamtaba i nunuan aleng, neni ga tong li i rinedik, kusu na leventamtaba naba beng pe nemi basinge levendoxoma xapmek at na lavatkangka la lavavara xapmek, la kusu na leventamtaba naba lam kaka nemi xusu minaba ruuna xaka luruptuvuk nunuan la minak mokso kerekngan neni.

⁵Neni lavasuun ba ren la mina lolos tinotno xusu minak lox epasum luvukat ukeneng ti lunuunu atnemi; la minak lok epasum lakleklen ukeneng at luvukat atnemi; ⁶la minak lox epasum lavatpas adoxoma at luruptuvuk atnemi ukeneng at lakleklen atnemi; la minak lox epasum lurutu lolos ukeneng at lavatpas adoxoma atnemi; la minak lok epasum lomokmokso ukeneng at lurutu lolos atnemi; ⁷la minak lox epasum luvukat ti luvutneton nemi ukeneng ti lomokmokso; la minak lox epasum labalamu ukeneng at luvukat ti luvutneton nemi. ⁸Do mina ruuna xaka i na levempanga la dina umsu xeneng at lorooro atnemi, dinaba lok nemi la mina lox asusu leveloklok nunuan mumu lakleklen atnemi keneng at Leeme Silok atnedik ne Iesu Karisito. ⁹Ketla nege do ixo ruuna i na leveloklok nunuan, neni i lok ngan laxatli main no ixo epovo xusu neni na reven la ira domampe nga i do Moroa gara gos adadat pam i basinge laxakapmek teren me gano.

¹⁰Kuren la luvutnetak mi luvurinuk, mina lolos kusu mina doma amuat lorotoro la losoksoxolik at ne Moroa rinemi; la do mina lox i na, kopmen tinotno mi noxo subu basinge lunuunu atnemi. ¹¹Do mina mu asu na langas, lumusaragu naba rem suang tinotno xusu miba vubeles ukeneng at Linintoo ik lox amisik la neni Linintoo at Laradi Loklox Arooro atnedik, Leeme Silok ne Iesu Karisito.

¹²Kuren la nenia anabak lox adoxoma aklen amisik nemi ri na langas, keke i do miraklen pam di la mira tu lolos keneng at luruturun miga ruuna xaka i. ¹³Nia a lok do, ik mokso mun tia xusu anak lox axatu levendoxoma atnemi mi na levempanga at na levenaleng nenia move a rooro, ¹⁴atla aklen i do, noxo lox abao la ana on basinge labantuxu at na lavatbung menemen, ngan levelinga at Leeme Silok atdik ne Iesu Karisito ga tong taba ia min. ¹⁵Anaba lolos tinotno xusu ana vuse xaka tangas ti lok nemi xusu minabam doma aklen ti na levempanga at levenaleng melemu at lanmet tarak.

Nema Maga Reven Lisisixam At Ne Moroa

¹⁶Nema ma goxo mumu asu mun tekonterepi gamasa mene nga boro at levendoxoma at limixin at levenaleng maga tong asu Lagale Lavavang tinimi mumu lololos la lovtopot at Leeme Silok atnedik ne Iesu Karisito. Ketla nema maga ven tinotno lisisilok teren mi levengkatli atnema. ¹⁷At loxonaleng ne Moroa ne Temen ga raba i mi laasen silok la lisisixam, nema mo magak lok, la maga ronga laxaka tadi ga laa boro at lisisixam silok ga vaase xeretna,

“Neni na ne Nuruk, a balamu i la a momo min!”

Mt 17:5

¹⁸La nema xa maga ronga mo laxaka tadi ga ravasu boro vana at laxalibet at loxonaleng nema magak lox eburu min to vana at lakaana xaala.

¹⁹La nema ma nuunu rinotno at levelinga at lavaeme vapaase alii diga paase i. I lox avukat mina ronga ka avukat na levelinga, atla neni naba lok ngan lababao i soosoo at laxanimin la ira se at labarakoxot, la naba lok ngan lavatpentian i soosoo ro xeneng at lorooro atnemi. ²⁰La pana axap at levempanga axap, minakleklen box i do ixo epovo rinotno xusu tara naba lox asuusu lavasuun at levempapaase alii no xeneng at Lovoang Kaala mi lodoxoma axa ren; ²¹atla, kopmen tepempapaase alii ga ravasu mun at lodoxoma mene nga at taradi at na laxangka, ketla lavaeme vapaase alii, diga vonon mumu mene nga Loroonan Kaala at levenaleng diga paase asu levelinga ga laala boro at ne Moroa.

Leveloklox Ase Xaxarang

2 ¹Luvuttadi vapaase alii xaxarang diga ravasu gano xeneng at limixin me Israel, la lavaeme loklox ase xaxarang bok, dinaba ravasu xa maxeneng atnemi. La dinaba lox abeles nemnem levenanasa xaxarang kusu ri lox asubu lunuunu atnemi. Dinaba sok tixirixes Leeme Silok mo ga un kaka amlong nedi, kuren la nedi xa dinaba ekip tangarang soso mi labaava. ²La buaang atnemi minaba mu asu leveloklox ase xaxarang atdi, la laxakapmek atnedi maxamang at lixitkis epot; kuren la mumu mun mo leveloklok atnedi, limixin maxamang at lotu dinaba vaase kapmek ti langas at luruturun. ³La loklok ti belegaa bok at na lavaeme loklox ase xaxarang naba silok la dinaba lok ka lempilas atnemi mi leventetere xaxarang diga doxoma xaka i. La at laxanaleng buaang, ne Moroa ira gagas pam kusu na lok li lumumuat atdi la naba sele utut nedi.

Morua Naba Vorang Laxakapmek At Limixin

⁴Kerepmo ne Moroa goxo ke atnaasan lubungangelo diga lok laxapmek, ketla neni ga lu arup midi to at lemenemen songsongot, la dik lok keneng

at loxokoxo at lamain, la diba nemen go se at laaleng ete. ⁵La kerepmo bok ne Moroa goxo ke atnaasan bok lavatbung menemen gano, neni ga lox asu laran ti limixin di goxo mu asu lodoxoma ren; la neni ga lox aroo xusuk mun ne Noa, neni laradi ga vavang mumu loklok mokmokso, la eburu bok mi lavanuti leventaba luvuttadi. ⁶I lok ngan bok pam ne Moroa ga sele utut bok lumenemen silok to Sodom la Gomora mi laxao; la neni ga lox i na ngan ni lampoovo ri lavanga salai naba vot atnedi dixo mumu asu lodoxoma ren. ⁷Neni ga lox aroo asu laradi mokmokso ne Lot, la neni laradi gak bulu aleng mumu lorooro bilinga at limixin to Sodom la Gomora di goxo mumu asu levelinga at ne Moroa. ⁸Mo laradi avukat gak lox eburu minedi, at laxanaleng axap; la neni gang songot mi lanbulu at levenaleng neni ga reven i la gang tonga leveloklok kakapmek atnedi. ⁹Kuren la Leeme Silok ne Moroa i epovo ri lox asepsu limixin avukat basinge levesongsongot, la i epovo bok kusu na lok li limixin tongtonga xepe ro xeneng at loxokoxo la na lox asongot nedi se at laaleng ete. ¹⁰Naba lok tinotno xuren tinedi di mumu asu levendoxoma xapmek at labantuxu la ding tonga xepe levelinga at ne Moroa.

Loklok At Lavaeme Loklox Ase Xaxarang

La nedi na lavaeme loklox ase xaxarang, di abelemes tinotno la dik lox asilok di, la dixok lox asu loklok ngangao atnedi ri limixin di nemen to vana at laxalibet, ketla di paase xapmek mumu di. ¹¹Ketla lubang angelo di ruuna lololos polo nedi na lavaeme loklox ase xaxarang, dixo babala raba na lavaeme loklox ase xaxarang at lemeren Leeme Silok. ¹²Ketla ana limixin, di tu eburu xusu ri paase xapmek mumu limixin keneng at levempanga nedi dixokleklen i, la dip tuvuk baulang ngan levempanga aaxa mi lavanuet kangkedek atnedi; lugugu mun atnedi keretna, diga visik mun di xusu dinabak lox alis kaka di la dinap sev amet nedi; la dinaba seeve ngan laxampanga aaxa mi lavanuet kangkedek atnedi.

¹³La ne Moroa naba vorang nedi mi losongsongot mumu levesongsongot nedi diga raba limixin min. La dik lox amomo nedi xeretna, dik lok levempanga at laxasep at laaleng kangking kusu rik lox epovo lavavara xapmek at labantuxu atnedi; la loklok atdi ik token kantubu atnemi la di mumu asu loklok kakapmek at levenaleng di anan eburu minemi. ¹⁴Di vavara xusuk mun i xusu dinak lok mu lavakin dik lok lengkot kapmek; la levempavara atnedi rik lok leveloklok kakapmek, kopmen na vaxap. La di sasat kaka limixin, lunuunu atdi xopmen na lolos, kusu dina lok laxapmek. La dik lok arala levempeve atnedi mi loklok ti belegaao. Kuren la nedi dik lok maxopok at lasaxaek ne Moroa naba raba di min! ¹⁵Kerepmo diga on basinge langas lom la dirat pas soogong gamasa nga; dira mumu asu nga langas no ne Balam ne nitna ne Beo ga mumu i, neni ga vavara solo i xusu neni nak lok laxapmek

kusu neni nabak lok kaka levempilas. ¹⁶Ketla ne Moroa ga musax i xusu laxapmek teren. Kuren la lodongki goxo epovo ri paase, ketla ga ba gili laxaka ren ngan laradi la ga vaase rin kusu na xav i at loklok tangtanguku.

¹⁷Nedi na limixin di lok ngan laraasa mes, la di lok ngan bok lengkon takabu lamanman takabu it mas kepe i. Ne Moroa gara lok li agagas pam loxot tidi ro xeneng tinotno at lamain bonot. ¹⁸Dim simi aurut nedi mi levendoxoma rangtanguku la levelinga gamasa. La dik lok lengkot mamangan kusu dinang kan kaka nedi dik lok do dinak sixiro basinge limixin di mumu asu langas kapmek. ¹⁹Di tong taba limixin do dinaba sepmus basinge Lenavolo, ketla nedi xa, di nemen at loxokoxo at laxakapmek mila limixin kerepmo di nemen ngan lavasaxaruki maxopok at lempanga salai imgomgo ridi. ²⁰Amo dola limixin digara sixiro vam at laxapmek at lavatbung menemen mumu lakleklen atnedi xeneng at Leeme Silok atnedik, la Laradi Loklox Arooro ne Iesu Karisito; la melemu, nedi diramlong mu manga loklok me gano. Nedi na limixin dik lok keretna, dik lok tinotno xeneng at loxot kapmek aleng la i lok kapmek tinotno ri no lorooro xapmek avot nedi digak lok teren. ²¹Gitaba lox avukat tinotno rinedi xusu di gitoxoklen langas at lomokmokso; la i lok kapmek tinotno mila di garaklen pam i la melemu diga repukus basinge manga mo levelinga xaala ne Moroa ga raba nedi min. ²²La lavanga nedi dik lox i, i lox asorun leventetere avolo, i lok keretna,

“Laman imlomlong kusu na anan laxan biromto ren.”

Ler 26:11

La bok,

“Lobo do ira susu avukat pam, irat pas bok la ira soe i ro xeneng at lapke.”

Lavapaase Alii At Lovotpot At Leeme Silok

3 ¹Larapen tangas orong tarak. Neni na lovoang sepsev agepura nenia a malagan i rinemi. La keneng atdu buru na luvoang, aga malagan levelinga xusu ri lox aus levendoxoma atnemi la ti lox adoxoma manga nemi mi levelinga i nunuan. ²A vara i xusu anak lox adoxoma aklen nemi mi levelinga me gano at luvuttadi vapaase alii at ne Moroa la levelinga at Leeme Silok atnedik la Laradi Loklox Arooro; la ni na levelinga, luvuttadi vavang diga paase nemi min.

³Avot be, minaklen avukar i do, at levenaleng kavaxap teventaba tuvuttadi rongtonga xepe dinaba rupot, la dinaba mumu asu mun levendoxoma xapmek atdi xa. La nedi na luvuttadi, dinaba paase aksaksa rinemi. ⁴La dinaba susue sese xeretna, “Neni ga tong li i rinemi do neni nabamlong, do? Ua nga i no? Luvuttemen nema no digara met axap pam, ketla levempanga move ik lok at lengkot atdi, ga ru kaxat ka i at luruntudum li at lavatbung menemen!” ⁵Nedi na diba doxoma abulubun i do ganoxa ne Moroa ga rudum li laxalibet mi lavatkangka. Moroa ga

tong levelinga mun la laxalibet ga vot la laxangka ga ravasu mun at ladan. ⁶La neni vam na ladan, neni ga vee danut la ga sele utut lavatbung menemen gano. ⁷Ketla, laxalibet eburu mi laxangka move duk lok mumu asu levelinga at ne Moroa, la duk lox agagas kusu laxao naba sele utut nedu. La nedu dunabak lok se ap mo laaleng limixin ua dixo mumu asu ne Moroa dinaba ru at lavapaase la ne Moroa naba sele utut nedi.

⁸Ketla larapen tangas orong tarak, nemen mi guta domampe lara lavanga keretna; Leeme Silok kopmen na ven leges aleng, la legesa abin sangaun kobot (1000) maares do nedu du ruuna levenampoovo vetpes; kopmen, at levereven teren keretna, nedu na, du epovo mun. ⁹Leeme Silok kopmen nak lok sila rik lok levempanga neni gara tong li vam i xuren, na ngan tepentaba go dim doma i xuren. Ketla neni ik lox atnaasan nemi, mila neni i xopara i xusu teta na seeve; neni i vara i xusu limixin axap dina leeng basinge laxapmek atnedi.

¹⁰Ketla laaleng at Leeme Silok naba vot ngan laradi xipkip pilo. Ap mo laaleng, laxalibet naba sonao eburu mi leretepaavat lolos, la levempanga axap to vana at lamavangkap naba an la na lok kapmek axap; la lavatkangka eburu mi levempanga dik lok keneng teren naba sonao axap at laxao.

¹¹Kuren la nemi minaba lok ngan limixin sala rinotno, do minaklen i do na lavatbung menemen naba rem utut keretna? Lorooro axa atnemi na xaala la kopmen taxakapmek noxok lok teren. ¹²Ap mo levenaleng mina ngangais mi lomomo ti laaleng at ne Moroa, mina lox alolos mo laaleng kusu na vot soso mun. Ap mo laaleng laxalibet naba an, la na rem utut, la levempanga axap naba releus at liplivi. ¹³Ketla nedik ata ngangais mi lomomo ri lempanga ne Moroa ga tong li i rinedik; la neni laxalibet maxat la lavatkangka maxat, la lorooro nunuan ik mokso nabak lok go.

Levempapaase Avit

¹⁴Kuren la, larapen tangas orong tarak, at na nga levenaleng mi ngangais mi lomomo ri mo laaleng, a vara i do, mina tu lolos kusu noxopmen toxot kakapmek koplak toxot ik token nak lok at lorooro atnemi, la minak lox eburu mi ne Moroa keneng at lenmila ren. ¹⁵Mina doxoma avukat do Leeme Silok atnedik i ngangais mi lumulus, kusu limixin dina roo suu; i ngan pam neton orong atnedik ne Pol ga malagan tinemi mi lakleklen at ne Moroa ga raba i min. ¹⁶Neni i paase amisik keneng at lempoang teren mumu na levempanga. Leventaba levempanga lolos mo ik lok keneng at lempoang teren la i lolos kusu ata xasep teren; la limixin dixo tu lolos at lunuunu atnedi, di ba gili xapmek lempasuun ap mo levelinga ren, la di ba gili xapmek bok levelinga xeneng at Lovoang Kaala. Kuren la mumu mun mo langas dik lox i, dinaba seeve.

¹⁷Larapen tangas orong tarak, miraklen pam i do lavaeme loklox ase xaxarang mo naba vot. Kuren la mina lok tatao avukat nemi, kusu mi

noxo mu asu laxapmek at limixin dixo mumu asu levelinga at ne Moroa
la mina subu bilong basinge lengkot avukat nemi mi tu ren. ¹⁸Ketla
minak lox epasum i xusu mina susu xeneng at letaba nabalamu la
lakleklen at Leeme Silok atnedik la Laradi Loklox Arooro ne Iesu Karisito.
La leemi asu xusuk tin, ningina la amisik! I raturun.

1 Jon

Lovoang Avot At Ne Jon

Levelinga Loklox Axasep

Levenmaares 90-95 A.D.

Jon neni laradi loklok ka anasa at ne Iesu. I se neni gak sokso neni ga nemen to Epesas. Neni ga malagan i na lovoang tinedi limixin nuunu diga nemen to Asia, mumu legepu vanga. Lara avot i lok keretna: neni ga malagan i na xusu ri lox asuvos luruturun mumu lorooro ruturun. Ni ga lok keretna, do nedik di ruuna labalamu ri ne Moroa la ti ne Iesu Karisito dik ata ruuna bok labalamu ti larapen tangas atdik. Lara mumu i lok keretna: lentaba luvuttadi babala diga vot la diga xarang taba limixin nuunu mi levelinga xeretna, “Labantuxu atdik, neni lavanga ua i lok kapmek. Neni loxot tinotno at laxapmek; kuren la ne Iesu goxo vot mi labantuxu. Neni ga vot la neni ga milik ngan laradi ketla neni goxo ruuna labantuxu. La diga doma do ne Iesu xopmen lamdak tuturun at ne Moroa.” Na levelinga limixin babala diga tong i la di goxopara limixin dina ruuna loklok nunuan la dina lox asuusu labalamu; kuren la ne Jon ga malagan i na lovoang kusu ri lok kepe i mo laxaxarang atdi.

Lengkot silok keneng at na lovoang:

1:1-4 Lavasuun tinotno at na lovoang.

1:5–2:27 Langas at laxasep mi langas at lamain nedu xopmen duna epovo.

2:18-29 Jon ga vaase aronga nedi mumu lavamunepen.

3:1–4:6 Nege nedi limixin at ne Moroa la nege nedi limixin at ne Satan.

4:7–5:5 Ik mokso do limixin nuunu dina ebalamu ela.

5:6-21 Lempapaase mumu lavantun luvuttadi diga paase katling ne Iesu Karisito, la lorooro avolo.

Lavapaase Im Taba Lorooro

1 1 Nema luvuttadi vavang ma malagan li na levelinga mumu mo laradi ga rooro avot ti luruntudum li at na lavatbung menemen.

Nema maga rongga levelinga ren la maga ven i mi levengkatli atnema, maga reven kisip lugugu ren la maga long tu ren. Neni lavapaase im taba lorooro la ma vavang min tinimi. ²Mo laradi im taba lorooro ga vor asuvos, nema maga reven i la ma tong asu i rinimi. La ma vavang bok min tinimi, neni lavasuun at lorooro avolo, la neni gat kis esogo eburu mi ne Temen dik la melemu ga vor asuvos tinama. ³Lempanga axap mo laradi ga lox i, maga ven pam i, la maga rongga vam levelinga ren, ma vavang bok min tinemi, kusu nemi minat kis esogo eburu minema kerekngan nema mat kis esogo mi ne Temen dik la mi ne Nitna bok ne Iesu Karisito. ⁴Nema ma malagan na levelinga nunuan tinimi kusu lomomo atdik naba umsu aleng.

Lavatpas Atdik Keneng At Laxasep

⁵Na levelinga nema mara rongga vam i boro at ne Nitna la ma vavang min tinemi keretna, Moroa neni laxasep la kopmen lamain nak lok teren. ⁶La mo do tara atdik na lok do it kis esogo mi ne Moroa, ketla lamain i umsu keneng at lorooro ren, neni laradi xaxarang la lorooro ren kopmen nak mokso la kopmen na sixit emu mi levelinga ruturun. ⁷Ketla mo do nedik ta nemen at laxasep, kerekngan ne Moroa i nemen at laxasep, nedik atat kis esogo eburu; la lada at ne Iesu, nitna ne Moroa i lox adadat nedik basinge levengkakapmek axap.

⁸Dola tara na lok keretna, “Kopmen taxpmek tarak,” neni i xarang axa i, la levelinga ruturun kopmen nak lok teren. ⁹Ketla mo do nedik ta soxomus asu laxakapmek atnedik ti ne Moroa, neni naba doxoma xape i la neni naba lox adadat nedik basinge leveloklok kapmek axap atdik, mila neni Laradi Ruturun la Leeme Mokmokso. ¹⁰Dola tara na lok keretna, “Nenia a goxo lok taxpmek,” neni mo laradi i lox asuusu i do ne Moroa i ngan leeme xaxarang, mila ne Moroa ga tong i do limixin axap di lok laxakapmek. La do mo laradi i lok kerepmo, levelinga at ne Moroa kopmen na nemen keneng teren.

Iesu Neni Laradi Loklox Arooro Atdik

2 ¹Luvutnuruk orong. Nia a malagan na levelinga rinemi kusu mi noxo lok taxpmek. Ketla do tara na lok laxakapmek, ne Iesu Karisito neni Leeme Mokmokso naba lok tooro i, naba sing saparap ne Moroa ne Temen dik, kusu ne Moroa naba doxoma xepe mo laxakapmek teren. ²Iesu neni laxaavuk tidik la ni ga lok langas kusu ne Moroa na doxoma xepe laxakapmek atdik. La ni noxo domampe laxakapmek atnedik kusuk mun, ketla neni ba doxoma xepe bok laxakapmek at limixin axap at na lavatbung menemen.

³Dola nedik ta mu asu levelinga at ne Moroa, i ngan nedik taklen tinotno i do nedik limixin teren. ⁴Mo do tara na lok dola neni at ne

Moroa, ketla neni kopmen na mu asu levelinga ren, neni laradi xaxarang, la levelinga ruturun at ne Moroa xopmen nak lok keneng at lorooro ren. ⁵Ketla mo do tara na mu asu levelinga at ne Moroa, i lox asuusu i do labalamu at ne Moroa ik lox ampana avukat keneng at lorooro ren. Neni na langas nedik ataba ven asuusu ba i do nedik dit kis esogo mi ne Moroa; ⁶do taradi na doma i do lorooro ren ik lok keneng at ne Moroa, lavatpas teren na lok ngan tinotno ne Iesu Karisito.

Leretere Maxat

⁷Larapen tangas orong tarak. Na levelinga a malagan li vam i, kopmen leretere maxat. Levelinga ganoxa min, la miga ruuna ka i at lurutu kaxat at lunuunu atnimi saparap ne Iesu Karisito, la mo levelinga migara ronga vam i ni levelinga me migomgo. ⁸Ketla nia ana malagan li leretere maxat, ne Iesu ga lox asuusu i at lorooro ren la ik lok bok keneng at lorooro atnimi. Do tara na mu asu na levelinga, i lox asuusu i do lamain ira xap la laxasep i vubeles pam at lorooro ren.

⁹Do tara na tong i do neni i nemen at laxasep, ketla neni ik milik angtungun ti neton, ni move i nemen keneng at lamain. ¹⁰Do tara na balamu neton, neni i nemen keneng at laxasep la kopmen taxapmek nabak lok teren kusu na lox asak kikixin i. ¹¹Ketla do tara nak milik angtungun ti neton, neni i nemen keneng at lamain, la lavatpas teren at na lorooro xopok ik lok at lamain kerekngan laradi luxatli ren i main, la it pas tangtagap gamasa mila laxakapmek ik lok pe luxatli ren.

¹²Nenia a malagan na lovoang tinemi luvutnuruk orong. Lavasuun teren keretna, Moroa ira doxoma xepe vam laxakapmek atnimi maxeneng at laasen at ne Iesu Karisito. ¹³Nenia a malagan na lovoang tinemi limixin mukun. Lavasuun teren keretna, nemi miklen ne Iesu Karisito mo gak lok ganoxa at lereot. Nenia a malagan na lovoang tinemi limixin maxat. Lavasuun teren keretna, nemi mira on basinge vam loklok kakapmek at ne Satan. Nia a malagan na lovoang tinemi luvutnuruk orong. Lavasuun teren keretna, miklen ne Moroa, ne Temen dik. ¹⁴Nia a malagan na lovoang tinemi limixin mukun. Lavasuun teren keretna, nemi miklen ne Iesu Karisito mo gak lok ganoxa at lereot. Nia a malagan na lovoang tinemi limixin maxat. Lavasuun teren keretna, nemi mi tu tuxuruxun at lunuunu atnimi la levelinga at ne Moroa i lox asuusu lempanga nunuan at lorooro atnemi; la mira on basinge vam loklok kakapmek at ne Satan.

Nemen Mita Mumu Asu Loklok At Na Lavatkangka

¹⁵Nemen mita ngaongao mu loklok at na lavatkangka eburu mi lapnovos teren. Mo do tara na ngaongao mu i, naba lox asuusu i do labalamu at ne Moroa, ne Temen dik kopmen nak lok keneng teren.

¹⁶Leveloklok axap at na lavatkangka ngan levempavara kapmek at labantuxu, levereven peves, la loklox asilok, nedi na leveloklok kopmen na laa boro at ne Temen dik. Mo leveloklok i suusu at loklok at lavatkangka. ¹⁷La na lavatkangka eburu mi leveloklok kakapmek teren, naba xap. Ketla laradi do i mumu asu lavavara at ne Moroa, neni naba rooro avolo.

Lavapaase Aronga Mumu Nedi Di Munepen Mi Ne Iesu

¹⁸Luvutnuruk orong. Levenaleng kavaxap at na lavatbung menemen ira rupot pam. Gano nemi miga ronga levelinga do laradi munepen ba rupot, la buaang atdi dira rupot pam. Kuren la nedik diraklen i do levenaleng kavaxap i rupot pam. ¹⁹Gano diga nemen eburu minedik ngan limixin at ne Iesu Karisito. Ketla nedi goxopmen limixin teren; kuren la diga on basinge dik. Nedi do gita nuunu at ne Iesu Karisito, nedi gitoxo on basinge dik. Ketla diga on basinge vam dik, kuren la dik ta xasep do nedi xopmen at ne Iesu Karisito.

²⁰Ketla ne Iesu Karisito, Leeme Melemelengan, ga raba vam nimi mi Loroonan Kaala at ne Moroa, kuren la nemi axap miga ruuna ka vam levelinga ruturun teren. ²¹Nia a malagan na lovoang tinimi kopmen do mixoklen levelinga ruturun teren, ketla a malagan i na mila mikleklen levelinga ruturun la kopmen taxaxarang i nemen atnedi di ruuna levelinga ruturun at ne Moroa. ²²Nege neni laradi vapaase xaxarang? Ni laradi i paase keretna, “Iesu neni kopmen Lanarong at ne Moroa.” Ni na laradi ik sok tixirixes kepe ne Temen dik eburu mi ne Nitna; kuren la neni laradi munepen at ne Moroa. ²³Do taradi i sok tixirixes kepe ne Nitna ne Moroa, i ngan do neni i sok tixirixes kepe bok ne Temen. Do taradi i nuunu at ne Nitna ne Moroa, neni i nuunu bok at ne Moroa, ne Temen nedik.

²⁴Minam tebeng lolos amisik mo levelinga miga ronga i, ap mo levenaleng miga ruuna ka lunuunu maxat. Do kuren, minabat kis esogo amisik mi ne Nitna, la ne Temen. ²⁵La neni naba lox epovo lavapaase alii ren, no ni ga xaape min tinedik keretna, neni naba raba nedik mi lorooro avolo.

²⁶Nia a malagan na levelinga rinemi ri lox axasep nimi mi loklok at limixin di lok tong i xusu dina sar asoogong nimi. ²⁷Ketla nemi miga ruuna ka vam Loroonan Kaala, ne Iesu Karisito ga raba nimi min, la mo Loroonan Kaala ik lok keneng atnemi. La ixo epovo do tara na anasa nimi, ketla Loroonan Kaala i lox axasep nimi mi lempanga axap, la mo Loroonan Kaala xopmen laxaxarang mun, ketla ni i ruturun. La nemi minat kis esogo mi ne Iesu kerekngan Loroonan Kaala ira lox ase vam nimi min.

²⁸Luvutnuruk orong. Minat kis esogo amisik mi ne Iesu kusu at lovotpot teren mi noxo marat la mi noxo mangan.

²⁹Nemi mi xasep do ne Iesu neni Leeme Mokmokso, la kerepmo nemi mi xasep bok do laradi ik lok leveloklok nunuan, i lox asuusu i do neni i ruuna ka vam livipisik amaxat.

Mo Nga Dik Gi Nemen Ngan Luvutnitna Ne Moroa

3 ¹Labalamu at ne Temen dik i silok aleng, ni gara lok asuusu vam i ridik keretna. Neni ga soxot nedik do luvutnitna ne Moroa. La i ruturun tinotno, nedik luvutnitna ne Moroa. Limixin at na lavatkangka dixokleklen ne Moroa; kuren la nedi xopmen dinaklen bok dik. ²Larapen tangas orong tarak. Mo nga nedik luvutnitna ne Moroa, ketla kovisi bok ata xasep do nedik taba lok tinotno xereva. Ketla nedik takleklen i do at laaleng ne Iesu na ru asuvos, nedik taba lok ngan i mila ataba epen etang tinotno ba min. ³Nedi axap di ngangais mi lomomo ti mo laaleng, amisik di lok kepe laxakapmek at lorooro atdi kusu dina dadat basinge laxakapmek la lorooro atnedi naba dadat axap kerekngan ne Iesu.

⁴Do tara na lok laxakapmek, i los polo levelinga at ne Moroa, mila laxakapmek ni loklok ti los polo levelinga at ne Moroa. ⁵La nemi mikleklen i do ne Iesu ga rupot kusu ri lox asepmus limixin basinge laxakapmek atdi. La kopmen taxapmek nak lok at ne Iesu. ⁶La nedi dit kis esogo mi ne Iesu, di noxo lox amisik laxakapmek. Ketla do tara i lox amisik laxakapmek, i lox asuusu i do neni xovisi na ven kibis ne Iesu la kopmen naklen i.

⁷Luvutnuruk orong. Mina lok tatao avukat nemi kusu tara noxo sar asoogong nimi. Do tara ik lox amisik lempanga ik mokso, neni laradi mokmokso, kerekngan ne Iesu ik mokso aleng. ⁸Do tara ik lox amisik laxakapmek, neni at ne Satan, mila ne Satan ga lok laxakapmek, ga ru ka i ganoxa at lereot. Lavasuun at lovtopot at ne Nitna ne Moroa do neni na sele utut kepe lugugu at ne Satan. ⁹Do tara i ruuna livipisik amaxat at lorooro ren keneng at ne Moroa, ni noxok lox amisik laxakapmek, atla lorooro maxat at ne Moroa i nemen keneng teren. Do tara i ruuna ka vam livipisik amaxat at ne Moroa, neni ixo epovo ri lox amisik laxakapmek. ¹⁰Anai i lox axasep dik do nege di luvutnitna ne Moroa, la nege bok di luvutnitna ne Satan. Lara do i lok tavanga kopmen nak mokso, kopl kopmen na balamu neton, neni xopmen ne nitna ne Moroa, ketla neni ne nitna ne Satan.

Mina Balamu Ela Nimi Ngan Limixin At Ne Moroa

¹¹Mo levelinga miga ronga i, ga ru ka i at lurutu kaxat at lunuunu maxat atnimi saparap ne Iesu Karisito, la mo levelinga i lok keretna; nedik ata ebalamu ela. ¹²Nemen dik ta lok ka loklok at ne Kaen. Neni laradi at ne Satan la neni ga sev amet neton, laasen teren ne Abel. Tila ba ne Kaen ga sev amet ne Abel? Lavasuun teren do ne Kaen ga ven kibis

i do luruptuvuk teren ga lok kapmek la luruptuvuk at ne Abel ga lox avukat. ¹³Luvutnetak mi luvurinuk. Nemen mita sanga dola limixin at na lavatkangka dinak milik angtungun tinemi. ¹⁴Nedik ataklen i do dik gara on basinge vam lololos at lanmet, la dik dira beles polo ri lorooro. Nedik takleklen i na mila nedik ta ebalamu ela. Do tara kopmen tabalamu ren, neni move i nemen maxopok at lololos at lanmet. ¹⁵Do tara ik milik angtungun ti neton, neni i lok ngan laradi sepsev amet tadi, la atakleklen i do laradi sepsev amet tadi kopmen torooro avolo rin.

¹⁶At na loklok at ne Iesu Karisito nedik ta xasep at lavasuun at labalamu. I lok keretna, Iesu Karisito ga met nop loklok atdik. Kuren la nedik bok ata raba lorooro atnedik ti lok tooro limixin at ne Moroa. ¹⁷La kerepmo, do taradi apnovos i ven ti neton ik pakes aleng, ketla kopmen na raba i mi tempanga, kereva, i balamu ne Moroa? Kopmen tinotno. ¹⁸Luvutnuruk orang. Labalamu atnedik kopmen noxo lok ngan levelinga la lempapaase gamasa mene nga, ketla ata ruuna ka labalamu ruturun, kusu leveloklok atdik ba lox asuusu i do labalamu ruturun mo ik lok keneng atdik.

¹⁹Do nedik ta ruuna labalamu xerepmo, i lox asuusu i do nedik luvuttadi at ne Moroa, mo i ruturun. La kerepmo nedik ta noxo suma lanmarat ap mo laaleng dik taba ru ro melamgo at ne Moroa. ²⁰Do nedik ata suma xapmek ap mo laaleng mumu laxakapmek nedik ga lok pam i gano, ata xasep do nedik limixin at ne Moroa, la neni noxo lok li lumumuat atdik, mila ne Moroa noxo doma solo mo lusumsuma atdik la ikleklen lempanga axap la naba doxoma xepe laxakapmek atdik.

²¹Larapen tangas orang tarak. Nedik ta noxo ruuna ka lumumuat mumu lusumsuma atdik, kuren la nedik ta noxo suma lanmarat to melamgo at ne Moroa, ²²la i epovo do ata sue ne Moroa ri lempanga ta vara rin. La neni naba raba dik min mila nedik ta mumu asu levelinga ren la tak lok lempanga ik lox amomo i. ²³La levelinga ren tidik i lok keretna, nedik tana nuunu at laasen at ne Nitna, neni ne Iesu Karisito la atana ebalamu ela kerekngan ne Iesu ga tong i ridik. ²⁴Do tara i mumu asu levelinga at ne Moroa, neni it kis esogo mi ne Moroa la ne Moroa it kis esogo min. La nedik takleklen i do ne Moroa it kis esogo midik mila neni ga raba dik mi Loroonan Kaala ren.

Mina Ila Mumu Avot Be Levenanasa Vetpes

4 ¹Larapen tangas orang tarak. Nemen gat mita rebeng alis soso levenanasa atnedi di tong i do di ruuna Loroonan Kaala; ketla mina viila mumu avot be levenanasa atdi do i sixit epovo mi levenanasa at ne Moroa. Mina lox i xuren atla buaang lavaeme vapaase xaxarang dit pas tangtagap at lengkot axap. ²I epovo do mina ven kibis mo laradi i ruuna levenanasa at Loroonan Kaala at ne Moroa. Do neni i tong asu i do

ne Iesu, neni Lanarong at ne Moroa la ga vee radi ngan nedik, la neni i ruuna Loroonan Kaala at ne Moroa. ³Ketla do tara kopmen na tong i do ne Iesu ga rupot boro at ne Moroa, neni kopmen at ne Moroa. Limixin kerepmo nedi luvuttadi munepen mi ne Iesu. Nemi miga ronga i do diba rupot la monga dira nemen pam at na lavatbung menemen.

⁴Luvutnurut orong. Nemi limixin at ne Moroa. Mira ke xepe vam lavaeme vepaase xaxarang atla ne Moroa i nemen keneng atnemi la lololos teren i volo lololos at ne Satan, neni lamgongo at limixin at na lavatbung menemen. ⁵Nedi mede at na lavatbung menemen mun, kuren la di anasa mi levempanga at na lavatbung menemen, la limixin at na lavatbung menemen ding tonga res atdi. ⁶Ketla nedik limixin at ne Moroa, la mo do lara ikleklen ne Moroa, neni bang tonga res atdik. La mo lara do kopmen neni at ne Moroa, neni noxong tonga res atdik. La kerepmo i epovo ta ven kibis i do nege i ruuna Loroonan Tuturun, la nege i ruuna loroonan kaxarang.

Morua Ni Laradi Balamu

⁷Larapen tangas orong tarak. Ata ebalamu ela mila ne Moroa ni lavasuun at labalamu. Mo lara do i umsu mi labalamu, ni ne nitna ne Moroa la ikleklen ne Moroa. ⁸Mo lara do kopmen tabalamu ren, neni kopmen naklen ne Moroa atla ne Moroa neni laradi balamu. ⁹La ne Moroa ga lox asuusu labalamu ren tinedik keretna, neni ga riki legesamdak teren ude at na lavatbung menemen, kusu nedik taba ruuna ka lorooro avolo ma xeneng at lugugu ren. ¹⁰Labalamu i lok keretna; kopmen dola nedik diga balamu ne Moroa, ketla neni ga balamu dik la ga riki ne Nitna ngan laxaavuk ti ru korop ti laxakapmek atnedik. ¹¹Larapen tangas orong tarak. Do ne Moroa i balamu nedik kerepmo, nedik bok ata ebalamu ela. ¹²Kopmen tara goxo ven tu at ne Moroa; ketla do nedik ta ebalamu ela, i lox asuusu i do ne Moroa i nemen keneng atdik, la labalamu ren i lox ampama avukat keneng at lorooro atdik.

¹³Nedik di xasep dola nedik di rooro at ne Moroa la ne Moroa i rooro atdik, atla ni ga raba vam dik mi Loroonan Kaala ren. ¹⁴La nema magara ven pam ne Nitna la ma tong asu i dola ne Temen dik ga riki ne Nitna ngan Laradi Loklox Arooro ri limixin at na lavatbung menemen. ¹⁵Do tara i tong asu i do ne Iesu Nitna ne Moroa, ne Moroa i nemen keneng teren la neni i nemen keneng at ne Moroa. ¹⁶La nedik axa takleklen i do ne Moroa i balamu dik la kerepmo ta xasep do ik lok tatao dik.

Morua neni laradi balamu la do tara i rooro keneng at labalamu, ni i nemen keneng at ne Moroa la ne Moroa i nemen keneng teren. ¹⁷At na mun langas labalamu at ne Moroa ik lox ampama avukat keneng at lorooro atdik kusu at laaleng ete ata noxo ruuna lanmarat, mila lorooro atnedik at na lavatbung menemen i lok ngan mun lorooro at ne Iesu.

¹⁸Do tara i ruuna labalamu, ixo epovo do lanmarat na nemen keneng at lorooro ren. La mo labalamu ruturun teren naba lok kepe mo lanmarat i nemen at lorooro ren; lanmarat ik lok at laradi i lok laxakapmek la ba xip lumumuat. Do tara i ruuna lanmarat, kovisi labalamu na epampana avukat at lorooro ren.

¹⁹Nedik ta umsu mi labalamu atla ne Moroa ga balamu avot dik. ²⁰Do tara i lok dola i balamu ne Moroa ketla ik milik angtungun ti neton, ni laradi xaxarang; atla neni ixo epovo xusu ni na balamu ne Moroa no neni goxovisi ven tu ren do neni noxo balamu avot be neton ua neni ira ven tu vam teren. ²¹Mo lavapaase ne Karisito gara raba vam dik min i lok keretna; do tara i balamu ne Moroa, neni na balamu bok neton.

Limixin At Ne Moroa Di Los Kimit Laxakapmek

5 ¹Do tara i nuunu do ne Iesu neni Lanarong at ne Moroa, i lox asuusu i do i ruuna ka vam livipisik amaxat at lorooro ren keneng at ne Moroa; la do tara i balamu ne Temen, i balamu bok limixin at ne Moroa. ²Do tara i balamu ne Moroa la i ronga res at levelinga ren, i lox asuusu i do neni i balamu limixin at ne Moroa. ³Do nedik ta ronga res at levelinga ren, i lox asuusu i do dik ta balamu ne Moroa. La noxo lolos tinedik kusu tana mumu asu levelinga ren. ⁴Do tara i ruuna ka vam livipisik amaxat at lorooro ren keneng at ne Moroa, i lox asuusu i do neni ira on basinge vam leveloklok at na lavatbung menemen. Do tara i nuunu at ne Iesu, na i lox asuusu i do neni ira on basinge vam loklok at na lavatbung menemen. ⁵Nege i epovo kusu na los kimit loklok at na lavatbung menemen? Neni xusuk mun laradi i nuunu dola ne Iesu neni Nitna ne Moroa.

⁶Iesu Karisito ga si boro vana at laxalibet la lempanga loklok katling ga rupot ti lox asuusu i do neni ne Nitna ne Moroa. Ladan ga ru katling lesep susu at ne Iesu la lada ga ru katling lanmet teren. Ni goxo lok ka mun lesep susu, ketla neni ga met bok. La Loroonan Kaala i tong asu i do ne Iesu neni ne Nitna ne Moroa la i epovo do ata siam ka levelinga ren atla levelinga ren i ruturun. ⁷Kerepmo na lavantun lempanga i lox asuusu i. ⁸Ni Loroonan Kaala, ladan, la lada; la na lavantun axap di lox asuusu leges avanga mun. ⁹I epovo dik ta nuunu at levelinga at taradi, ketla levelinga at ne Moroa i mumuat aleng ti mo levelinga, mila neni levelinga mumu ne Nitna. ¹⁰Do tara i nuunu at ne Nitna ne Moroa, neni i ruuna ka vam mo levelinga keneng at lorooro ren. Do tara kopmen na nuunu at ne Moroa, i lok ne Moroa ngan laradi xaxarang, atla ni kopmen na nuunu ap mo levelinga ne Moroa ga vaase i mumu ne Nitna. ¹¹Mo levelinga i lok keretna, Moroa ga raba vam dik mi lorooro avolo, la langas ti mo lorooro i nemen at lekngen ne Nitna. ¹²Dola tara i nuunu at ne Iesu, i ruuna ka vam nom lorooro. Do tara kopmen na nuunu at ne Iesu, ne Nitna ne Moroa, neni noxo ruuna ka nom lorooro.

Lorooro Avolo

¹³Nia a malagan na lempanga rinemi mi nuunu at laasen at ne Nitna ne Moroa kusu mina xasep do mira ruuna ka vam lorooro avolo. ¹⁴Nedik taklen tuturun i do dik ta epovo na vosiga ne Moroa, neni i ronga dik mo do dik ta sing ti lempanga i epovo at lavavara ren. ¹⁵Nedik ta xasep pam do ne Moroa ing tonga levesingising atdik, kuren la nedik ta xasep bok do neni im taba dik mi mo lempanga ta ngising tin.

¹⁶Do tara na ven neton na lok laxakapmek, la mo laxakapmek kopmen na lolos kusu tara naba seeve ren; neni na sing ti ne Moroa, la ne Moroa naba raba i mi lorooro. Nia a paase mumu nom limixin di lok laxakapmek la di noxo seeve ren. Ketla lara laxakapmek mo, do limixin dina lox i, dinaba seeve mu i.^a Nia xopmen na paase mi nom. ¹⁷Do tara na lok lempanga kopmen na mokso, ni i lok laxakapmek; la leveloklok kakapmek mo, do tara na lox i, neni noxo seeve ren.

¹⁸Nedik takleklen i do mo tara i ruuna ka vam livipisik amaxat at lorooro ren keneng at ne Moroa, neni noxo lok bok ba laxakapmek. La ne Nitna ne Moroa i lok tatao i kusu laradi kapmek ne Satan noxo lok kapmek i. ¹⁹Nedik takleklen i do nedik limixin at ne Moroa, la limixin at na lavatbung menemen kopmen dina nuunu at ne Iesu Karisito, di nemen maxopok at lololos at laradi xapmek, ne Satan. ²⁰Nedik ta xasep bok pam keretna, ne Nitna ne Moroa ga rupot la ga raba vam dik mi laxasep, kusu nedik tabakleklen ne Moroa, neni laradi ruturun. Nedik dik lok at ne Moroa i ruturun la at ne Nitna, Iesu Karisito. La ne Moroa neni lavasuun at lorooro avolo.

²¹Luvutnuruk orong, mina lok tatao nimi basinge lempoovo moroa. I ruturun.

^a 5:16 Tinedi di vas gasinge ne Moroa la di sok tixirixes kepe rinotno i.

2 Jon

Lovoang Sepsev Agepura At Ne Jon

Levelinga Loklox Axasep

Levenmaares 95-100 A.D.

Jon neni goxo lox axasep solo laasen teren keneng at nai lovoang neni ga malagan i, limixin diga doxoma i do ne Jon neni ga malagan i na levelinga. At lodoxoma atdik do, lainmarat ga nemen keneng at lorooro ren mumu lavamunepen; kerepmo la neni goxo tong asuvos laasen teren. Keneng at levelinga ua neni ga suang na lovoang teren min neni ga lok, "Latkin," neni gam doma mu lotu la kerepmo la neni ga lipe laasen teren mi levelinga xerepmo. Nedik dixo xasep solo do neni ga malagan na levelinga ri limixin at lotu xopla ti lara latkin. Lentaba limixin digam doma i do ne Iesu ga vot ngan loroonan panga la goxopmen labantuxu ren. Ketla ne Jon ga malagan na lovoang kusu na sok tixirixes kepe mo lodoxoma. Neni ga tong i do ne Iesu ga vot mi labantuxu. La neni ga lok ngan bok laradi nunuan mene. Neni ne Moroa ruturun pam la laradi ruturun pam. Jon neni ga malagan i na levelinga ren mi levenanasa xerepmo.

Lengkot silok keneng at na lovoang:

1:1-3 Levelinga mumu asu.

1:4-6 Labalamu ela.

1:7-11 Lempapaase aronga mumu luvuttadi loklox ase xaxarang.

1:12-13 Lavapaase abeese.

Lavapaase Axasep

¹Nenia lamgomgo at lotu. A malagan na levelinga ru, latkin soksoxolik at ne Moroa la ti laxaalik mi laxamdak taram. Nia a balamu ruturun nimi. Kopmen nenia xusuk mun, ketla nedi axap diklen levelinga ruturun

at ne Moroa di balamu bok nimi, ²mila levelinga ruturun at ne Moroa i nemen keneng at lorooro atdik la naba nemen amisik eburu midik.

³Letaba nabalamu, lebelemumu, la lenmila rinedik boro at ne Temen dik, la ne Iesu Karisito, Nitna ne Moroa; la lorooro atdik naba lox asuusu levelinga ruturun la labalamu.

Levelinga Ruturun La Labalamu At Limixin Lotu

⁴Nenia a lok momo aleng mila nia aga ronga i do lentaba at laxamdak mi laxaalik taram di mumu asu levelinga at ne Moroa, kerekngan ne Temen dik ga tong taba dik min. ⁵La monga a sing u, latkin orong, do dik tana ebalamu ela. Na xopmen leretere maxat a malagan i ru. Na leretere dik taga ronga ka i ap mo laaleng nedik taga lok ka lorooro maxat at ne Iesu Karisito. ⁶Lavasuun at na labalamu i lok keretna. At lorooro axap atdik tana ronga res at levelinga at ne Moroa. Mo leretere, nemi miga ronga i ap mo laaleng miga lok ka lorooro maxat i lok keretna. Lorooro atnimi na umsu mi labalamu.

⁷Buaang nedi luvuttadi sosolo arup diga vas epeseves su uto at na lavatbung menemen. Mo limixin kopmen na tong asu i dola Iesu Karisito ga vot ngan laradi ruturun. Luvuttadi xerepmo nedi lavaanat sosolo arup, la di munepen mi ne Karisito. ⁸Mina rooro eburu mi loklok tatao, kusu nemi xopmen mi noxo ke aie mo lunuunu atnimi, migara gugu vam tin; la miba ruuna xobot luunun.

⁹Do tara ixo mumu asu levenanasa at ne Karisito, la i lox epasum i mi levenanasa vetpes, neni xopmen nat kis esogo mi ne Moroa. Ketla do tara i mumu asu levenanasa at ne Karisito, neni it kis esogo mi ne Temen dik la ne Nitna. ¹⁰Do tara i vot pasa nimi la i vaase asu levenanasa kopmen at ne Karisito, keket mita mulus ka i. La keket mita lok maraose min la mina seega rangarang i. ¹¹Do tara i mulus ka i, naba lok ngan dola neni i tu eburu min keneng at lempanga xakapmek teren.

Levempapaase Avit

¹²A ruuna buaang lempapaase xusu ana tong i rinimi. Ketla axo vara i xusu ana malagan i at lovoang mi lavanga mamalagan; kujuk mun a doxoma i do aba vosiga nimi, la ana epaase eburu minimi kusu nedik taba lok momo aleng.

¹³Laxamdak mi laxaalik at netam orong di lox aonon lomomo rinimi. I ruturun.

3 Jon

Lovoang Sepsev Avantun At Ne Jon

Levelinga Loklox Axasep

Levenmaares 95-100 A.D.

Jon neni laradi loklok ka anasa at ne Iesu, neni ga malagan i na lovoang ti lentangas teren ne Gaius. Anai ni lovoang tuturun. At nai lovoang ne Jon goxo tong asuvos laasen teren, ketla limixin diga doma i do ne Jon neni ga malagan i. Keneng at nai lovoang at lengkakan 9-11 neni levelinga matmatkun. Mo levelinga i lok keretna: Atana gugu mi lodoxoma nunuan atdik kusu ri soxolik ka luvuttadi loklok tatao ri lotu. Ixo lox avukat do atana soxolik ka luvuttadi amgomgo at na lavatkangka kusu dinam gomgo at lotu, atla ne Diotrepes ga lox axatu kapmek lotu, la lorooro at limixin lotu goxok mokso, la at na mun langas loklok la lorooro at lotu atdi goxo lox avukat. Kuren la nedik atana soxolik ka nedi luvuttadi ua di balamu aleng ne Moroa, kusu dinam gomgo ngan luvuttadi amgomgo at lotu, la kusu nedik taba mumu asu di.

Lengkot silok keneng at na lovoang:

- 1:1-4 Lavapaase momo.
 - 1:5-8 Lavapaase mumu asu ri ne Gaius.
 - 1:9-12 Lavapaase mumu ne Diotrepes la ne Demitrius.
 - 1:13-15 Lavapaase abeese.
-

Lavapaase Axasep

¹Nenia lamgomgo at lotu.
A malagan na lovoang ti lentangas orong tarak, ne Gaius. Nenia a balamu ruturun u.

²Lentangas tinotno rak. Nia a sing ne Moroa do una momo mi lorooro avukat u ruuna ka i at labantuxu ram kerekngan loroonan taram i ruuna lorooro avukat. ³Nenia aga lok momo aleng at loxonaleng leventaba at luvutneton dik diga rupot la diga vaase asusu lorooro ram, do u ruturun amisik, i ngan do lorooro ram ik sixit emu mi levelinga ruturun at ne Moroa. ⁴Ise nenia a rong a i do luvutnuruk di mumu asu luruturun, nenia a lok momo aleng.

Jon Ga Emi Asu Mi Ne Gaius

⁵Lentangas orong tarak. At lugugu ram ti lok tooro luvutneton dik, uk lox ampana avukar i, keke i do nedi limixin dik taxoklen di. ⁶Diga vaase asusu labalamu ram to melango at limixin at lotu nade. La ba lox avukat do una lok tooro nedi at lavatpas atdi, mila loklok kerepmo i epovo at lavavara at ne Moroa. ⁷Diga on basinge lara menemen atdi ri vaase asu laasen at ne Karisito la di goxo lok kaka tevempanga anan kopla tevempilas boro at lavamolon. ⁸Kuren la i epovo rinotno do nedik limixin nuunu ata lok maraose mi nom luvuttadi kusu nedik axap ata gugu eburu ti tong asu levelinga ruturun.

Diotrepis Mi Ne Demitrius

⁹Aga malagan pam lovoang ti limixin nuunu at lotu mumu i na lavanga; ketla ne Diotrepis neni laradi i vavara aleng i do na lok ngan lamgomgo atdi, la neni ixo mu asu levelinga atnama. ¹⁰Kuren la do nenia ana vot saparap nimi, anaba tong asu axap lempanga neni ira lok pam i, mo i lok kapmek; ik lok levempapaase ren mumu nama ua i lok kapmek aleng. Neni xopmen nak lok mene nga mo loklok, ketla neni ixok lok tooro bok luvuttadi vavang do dit pot to at lemenemen teren la neni ip sep pepe limixin at lotu mo di vavara nak lok tooro mo luvuttadi vavang; la ik lok kepe bok mo limixin basinge lixitkis keneng at lotu.

¹¹Lentangas tinotno rak. Nemen gat uguta mu asu loklok at luvuttadi xapmek; ketla una mu asu leveloklox avukat. Do nege i lok leveloklox avukat, neni at ne Moroa; la do nege i lok laxakapmek, neni kovisi na ven kibis ne Moroa.

¹²Limixin axap di paase levelinga avukat mumu ne Demitrius la lorooro ren ik sixit epovo mi levelinga ruturun. Nema bok ma paase levelinga avukat mumu i, la nenu uklen i do na levelinga atnama i ruturun.

Levempapaase Avit

¹³A ruuna laxalinga solo xusu ana tong i ru, ketla a xopara i xusu ana malagan i mi lempanga mamalagan. ¹⁴Am doma alii i do aba ven ba u melemu la ataba epentu la ata epaase.

¹⁵Limila na nemen eburu minu; nedi larapen tangas axap taram nade di lox aonon levelinga momo ru. Nenu xa una raba levelinga momo ri larapen tangas atnama medo. I ruturun.

Jut

Lovoang At Ne Jut

Levelinga Loklox Axasep

Lumaares 66-67 A.D.

Jems neni ga ruuna lara neton laasen teren ne Jut, la neni ga malagan i na lovoang. Ketla ti na ne Jems, neni lamgomgo atnedi limixin nuunu diga nemen to Jerusalem. Buaang nedi luvuttadi akleklen di doma i do na ne Jut neni neton ne Iesu (Mk 6:3, Mt 13:55). Keneng at na lovoang ne Jut ixo lox axasep dik do na lovoang neni ga malagan i ri nege limixin nuunu. Neni ga malagan i la ga vara i xusu na vaase mumu loklox arooro atdik boro at ne Moroa. Neni ga malagan i na lovoang mila lentaba levelinga nedi luvuttadi loklox ase xaxarang diga lox ase xapmek limixin nuunu mi levenanasa atdi. Kuren la at na mun loklox i na la neni ga malagan i na lovoang la ga vaase aronga di. Neni ga vaase alolos di do leveloklox ase ruturun mumu ne Iesu neni lenban tinedi.

Lengkot silok at na lovoang:

1:1-2 Lavapaase emi asu.

1:3-16 Lempapaase mumu luvuttadi loklox ase xaxarang.

1:17-23 Dina tu lolos at lunuunu atdi.

1:24-25 Leemi asu ri ne Moroa la ne Iesu Karisito.

Lavapaase Axasep

¹Nenia ne Jut, lasaxaruki at ne Iesu Karisito, la neton ne Jems.

Nia a malagan na lovoang tinemi limixin, mo ne Moroa gara ro xaka vam nimi do tin, la mi rooro xeneng at labalamu at ne Moroa ne Temen dik, la mik lok keneng at loklok tatao at ne Iesu Karisito.

²Lebelemumu, limila, la labalamu at ne Moroa na umsu xeneng at lorooro atnimi.

Luvuttadi Loklox Ase Xaxarang

³Larapen tangas orong tarak. Nia a vara aleng i xusu ana sok levelinga rinimi mumu mo langas ti lorooro avolo, ne Moroa im taba dik min. Ketla lara lavanga silok ira vot pam la a tong i rinimi do minam tebeng lolos levelinga at ne Moroa, ni ga raba avolo gesara mun i ri limixin teren.

⁴Nia a tong i na rinimi mila lentaba limixin kopmen dina nuunu at ne Moroa, dira vubeles nemnem pam keneng at lotu atnimi. Nedi di ba gili xapmek levelinga mumu letaba nabalamu at ne Moroa atdik, kusu dinaba mu arup levelinga atdi ri lok laxakapmek maxamang at lixitkis epot. La di sok tixirixes ne Iesu Karisito, ni Leges Orong Silok kusuk mun atnedik axap la Leeme Silok atnedik. Ganoxa levelinga xeneng at Lovoang Kaala ga tong li i do nedi dinaba ruuna ka levesongsongot silok.

⁵Nemi mira xasep pam at na, ketla a vara i do ana vaase adoxoma manga nimi xeretna; Moroa ga sar asu limixin teren basinge lenep silok Isip. Ketla melemu ni ga sev amet nedi di goxo nuunu ren. ⁶Mina doma avukat box i na; gano lentaba at lubungangelo diga ke xepe lixitkis silok atdi la diga onon tino basinge lemenemen atdi ro vana at laxalibet. Kuren la ne Moroa ga lok li di ro at lamain bonot la ga xoxo di mi lemparoos sen naba nemen amisik. La dinaba nemen go se at laaleng silok ne Moroa naba rongga linga at limixin axap; la ap mo laaleng ne Moroa ba lok li lumumuat atdi. ⁷La kerepmo bok limixin diga nemen to at lumenemen Sodom la Gomora la to bok at levenmenemen gak lox auret ti mo lumenemen. Diga lok laxakapmek maxamang at lixitkis epot la lengkot mamangan kerepmo. Monga nedi di nemen keneng at laxao bokbolot naba nemen amisik, la anai neni lavapaase aronga ri limixin axap.

⁸La kerepmo bok mo luvuttadi loklox ase xaxarang dira vubeles pam at lotu atnimi, dim tobo mun la levenapnobo atdi i sasat nedi ri laxapmek la dik lok laxapmek mi lenbantuxu atdi, ding tonga xepe levelinga at ne Moroa, la di paase vupu ri limixin silok no vana at laxalibet. ⁹I ngan ganoxa laangelo gomgo ne Mikael ga etep mi levelinga eburu mi ne Satan; nedu ga etep mi levelinga do nege naba lok ka labantuxu at ne Moses. Mikael goxo sok taba ne Satan mi levelinga xapmek. Ni ga lok mene xeretna, "Satan. Moroa axa i vaase sox u." ¹⁰Ketla nom limixin di paase xapmek mumu lempanga salai nedi xopmen dina xasep teren; nedi di lok ngan mun lempanga mi lavanuet kangkedek atdi la di mumu asu mun lodoxoma atdi xa, la mo loklok naba lok kapmek axap lorooro atdi.

¹¹Naba lok kapmek aleng tidi. Nedi di mu asu loklok at ne Kaen. La di ke lodoxoma avukat tik lok ka lempilas kerekngan ne Balam. Nedi limixin tongtonga xepe xerekngan ne Kora la diba uu bok kuren.

¹²Nedi dit kis eburu minimi mo do mi anan leveluxa at Leeme Silok. Nedi di lok ngan lempanga ik token kantubu atnemi la kopmen dinak

lok mamangan. Nedi dixo doma bok ba teta, ketla di doma xusuk mun di. Nedi di lok ngan lempotakabu, lamanman it mas aonon di, ketla kopmen tarakabu atdi. Nedi di lok ngan levenuna kopmen na pisik at laaleng pipisik teren la di xe su min la ira met tino. ¹³Nedi di lok ngan lovopaxanao silok boro at laras; la loklok mamangan atdi ik lox asuvos ngan lovopaxanao i repoposok. Nedi di lok ngan laxampenti ik sixit ekarakat to vana at laxalibet. Moroa ga lox agagas lamain bonot aleng tidi, la dinaba nemen amisik go.

¹⁴Enok ni laradi sepsev avanna melemu at ne Adam, la neni ga paase alii mumu nom luvuttadi kapmek. Ni ga lok keretna, “Mina reven avukat. Leeme Silok naba rupot eburu minedi buaang limixin dadat teren, ¹⁵la ni naba lok li limixin axap at lavapaase la nedi di goxo nuunu ren la nedi diga lok lempanga xapmek, la nedi diga tong asu levelinga xapmek mumu i, neni naba lok li lumumuat atdi.” ¹⁶Nedi na limixin di paase xuxurung amisik, la dik sok taba xusuk mun limixin petpes mi laxapmek atdi; di mumu asu mun lavavara xapmek atdi xa, la di lox asilok levenasen atdi; la dik lox atdan limixin petpes kusu dinap kip paxat ka lempanga atnedi.

Mina Tu Lolos

¹⁷Larapen tangas orong tarak. Nemi mina doxoma lavapaase at luvuttadi vavang at Leeme Silok atdik ne Iesu Karisito. ¹⁸Diga paase rinimi xeretna, “At levenaleng kavaxap at na lavatbung menemen, limixin mo dinaba rupot la diba paase sese xapmek leventaangas nunuan at limixin nuunu. La diba mumu lavavara xapmek atdi mo xopmen na sixit emu mi lavavara at ne Moroa.” ¹⁹Nedi diba vaxaru ka levenekarakat kantubu at limixin at lotu. Diba mu asu xusuk loklok at limixin at na lavatangka la Loroonan Kaala noxok lok keneng at lorooro atdi.

²⁰Ketla larapen tangas orong tarak, mina lox alolos amisik lorooro atnimi at lunuunu i xaala. La mina ngising lolos amisik mi loklok tooro at Loroonan Kaala. ²¹La minam tebeng alis amisik labalamu at ne Moroa kusu labalamu atnimi na umsu ap mo levenaleng mit kis tangais lebelemumu at Leeme Silok atnedik ne Iesu Karisito, la ni naba raba nimi mi lorooro avolo.

²²Nemi mina lox asuusu lebelemumu rinedi limixin lunuunu atnedi xopmen na lolos la mina lok tooro di. ²³La mina sat kaka amlong limixin di subu vam at lunuunu atdi, la kerepmo miba lox aroo di basinge laxao at lemenemen songsongot; la mina lox asuusu lebelemumu rinedi limixin petpes, la mina lok tatao bok nimi kusu mo laxakapmek atdi noxo lox asubu nimi; la mina ke xepe bok leveloklok i bira at limixin kapmek di ruuna i.

Leemi Asu Ri Ne Moroa

²⁴Leemi asu ri ne Moroa i epovo ri xubak pe avukat nimi la nemi noxo subu ri laxakapmek. La neni i epovo ri lox axis nimi ro melamgo ren

keneng at lisisixam silok; la kopmen taxakapmek atnimi ketla minaba umsu mi lomomo silok aleng. ²⁵Leemi asu ri ne Moroa, neni Laradi Loklox Arooro atdik la neni lo Moroa xusuk mun; la lololos axap la loklok ngangao gat pas tin ganoxa at lereot, it pas bok tin at na levenaleng lingina, la nabat pas bok tin ap mo levenaleng i tu melamgo. At laasen at ne Iesu Karisito, Leeme Silok atdik. I ruturun.

Lisilimet

Lisilimet At Ne Jon

Levelinga Loklox Axasep

Lumaares 95-96 A.D.

Melemu at lanmet at ne Iesu la luruturut teren uto vana at laxalibet lavanna sangaun koplavanna sangaun mi lavalimo lenmaares ga men pe i la ne Jon ga malagan i na lovoang ti lotu. Jon ga vara i do mo lotu na lolos tinotno, mila limixin munepen diga lox asongot limixin at ne Moroa mumu levereven kisip atdi ri ne Iesu Karisito i ngan Leeme Silok. I se ne Jon ga nemen at loxokoxo to at losoxan Patimos, Moroa ga lox i xusu na ven lisilimet la ga lox ase i mi lempanga salai ba vot melemu. Keneng ap mo lisilimet Iesu ga vas asi lololos at ne Satan mi mo lentaba lavamunepen bok teren; la ga lox ase ne Jon do nedik ua ata nuunu at ne Iesu ataba nemen to vana at laxalibet.

Lengkot silok keneng at na lovoang:

- 1:1-8 Jon ga lox aonon lavapaase momo ren ti limixin.
- 1:9-3:22 Jon ga ven Leeme Silok keneng at lisilimet.
- 4:1-8:1 Jon ga ven levenmumuat mo naba vot.
- 8:2-11:19 Jon ga ven lvanuti levenangelo.
- 12:1-13:18 Satan la luradi vapaase ren diga ravasu.
- 17:1-20:10 Moroa naba lok li ne Satan at laxao.
- 20:11-16 Laaleng ete.
- 21:1-22:21 Laxalibet maxat mi lavatbung menemen maxat.

Lavapaase Axasep

1 ¹Ana lovoang, ni lisilimet boro at ne Iesu Karisito, ne Moroa ga raba i min, kusu na lox ase lavasaxaruki ren mi lempanga salai mo naba vot soso mun. La ne Iesu ga riki laangelo ren kusu na vaase axasev i ri ne Jon, lasaxaruki ren, ²la neni naba tong asu mo lempanga axap ni ga

ven i. La anai, ni levelinga boro at ne Moroa, la mumu bok mo levelinga ruturun ne Iesu Karisito ga vaase i. ³Luvukat ti mo laradi do na us na levempapaase alii, la luvukat bok tinedi di ronga na levelinga, la di mu asu levelinga ik lok keneng at na lovoang; mila levenaleng ira auret pam ti na lempanga naba vot.

Lavapaase Momo

⁴Nenia ne Jon, a malagan na levelinga tinemi lavanuti leventaugu lotu mik lok at lenep silok Asia.

Letaba nabalamu la lenmila at ne Moroa nak lox eburu minimi. Neni ga nemen gano, i nemen lingina la naba vot bok melemu. La lavapaase momo bok tinemi boro at lavanuti leventoonan, mo di tu to melamgo at loxonin orong at ne Moroa, ⁵la lavapaase momo bok boro at ne Iesu Karisito, neni laradi ruturun at lavapaase ruturun la neni lara avot mo ne Moroa ga lox axatu kaxat amlong i basinge lanmet, la ni lamgomgo at lavaorong silok at na lavatbung menemen.

Ne Iesu ga balamu nedik la ga lox asepmus dik basinge laxakapmek mi mo lada ren. ⁶La ga lok li nedik ngan lavamaasa at Linintoo ren, kusu dik tana lok lugugu at ne Moroa, ne Temen. Ata emi asu mi ne Iesu, lisisixam mi lololos axap teren; neni naba nemen amisik. I ruturun. ⁷Mina ven avukat tin. Neni mo naba vot eburu mi loxontakabu, la larabung mixin axap eburu minedi diga vaxarem i at laxaba, dinaba ven i. La limixin axap at na lavatbung menemen dinaba saxaanu mu bok ba i. La nai naba ravasu ruturun kuren. I ruturun.

⁸Morua Leeme Silok atdik ga lok keretna, “Nenia mun Lurutu Kaxat la Lumumupit at lempanga axap. Nia aga nemen gano, a nemen lingina, la anaba vot bok melemu. Nenia a lolos aleng.”

Levelinga Ri Ne Jon

⁹Nenia ne Jon, neton nemi limixin mi nuunu at ne Iesu. La nenia na ap kip levesongsongot eburu minimi, la nedik eburu lavaanat at Linintoo ren, la ata tu tuxuruxun at lunuunu atdik, do nedik ata ekip tangarang mi levesongsongot.

Nenia agak lok at losoxan to Patimos, nia aga nemen go ngan laradi xokoxo mila nia aga tong asu Lagale Lavavang at ne Moroa mi levelinga ruturun at ne Iesu. ¹⁰At lara laaleng, ni laaleng at Leeme Silok, Loroonan at ne Moroa ga suxuna ia, la aga silimet tang ka ne Iesu. La keneng at na lisilimet, aga ronga laxaka linga silok to melemu rak, gang teng ngan lurus. ¹¹La mo laxaka linga ga lok, “Una lok kaka lugun la una malagan asu na lempanga nenu uba ven i; la una lox aonon i uto at lavanuti leventaugu lotu, tara uto Epesas, la tara uto Smena, la tara uto Pegamam, la tara uto Taiataira, la tara uto Sadis, la tara uto Piladelpia, la tara bok uto Lodisia.”

¹²Aga rem gili kusu ana ven i do nege mo laradi ga paase ria, la aga ven lavanuti levenbabao gol gak lok. ¹³La kantubu at nom levenbabao lara laradi ga tu go, neni ga lok ngan Laradi Mevana, ga sigaara mi lavanga singsiga baalom, la loxontamon tantanan ga is korop lobongobong teren min. ¹⁴La lavatlak teren eburu mi levengekabinim teren gan bun aleng tinotno, ga ngan lovopaxanao i sovosok; la luxatli ren ga babao ngan laxao bokbolot. ¹⁵La luxangkedek teren ga ngangao ngan loxonuat, no laxao i an amemeles i la laxaka linga ren ga reng ngan lenaonkaka at ladan it los ukopok. ¹⁶At lekngen tino, neni gam tebeng lavanuti larapenti, la to at lungusno lavarise sepsep ga anan evan gak lok teren. La lemeren ga lok ngan laxangking i soosoo bobonot mi lololos teren.

¹⁷Se nia aga ven i, aga subu saporap luxangkedek teren la nia aga met aroo. Ketla ni ga sogo tu rak mi lekngen tino, la ni ga lok tia, “Nemen gat uta marat. Nenia mun Lurutu Kaxat la Lumumupit. ¹⁸Nenia mun lorooro. Aga met pam, ketla na nga a ruuna ka lorooro kopmen taxavaxap teren. La a ruuna bok lololos mavana at lanmet kusu ana suang lumusaragu at lanmet, la a ruuna lololos mavana at lanmet la a lok tatao lumusaragu ro Edesa.

¹⁹Kuren la una malagan asu lempanga salai u ven pam i la lempanga salai mo naba vot melemu. ²⁰Levelinga alipe at lavasuun at lavanuti larapenti nenu u ven i de at lakngak tino, di lok katling lavanuti nedi lubung angelo dik lok tatao mo lavanuti leventaugu lotu. La lavanuti levenbabao gol, di ru katling nom lavanuti leventaugu lotu.”

Lempapaase Uto Saporap Limixin Lotu Ro Epesas

2 ¹Leeme Silok ga lok bok tia, “Una malagan na levelinga ti laangelo ik lok tatao limixin lotu ro Epesas.

‘Na levelinga boro ap mo lara im tebeng lavanuti larapenti at lekngen tino la neni it pas kantubu at lavanuti levenbabao gol. ²Akleklen lorooro atnimi, la aklen bok leven gugu lolos atnimi la aklen i do mi tu lolos kantubu at levesongsongot mo nemi mip kiv i. Aklen box i do mixo esuxun mi limixin kapmek, la mira lok tong pen pam nedi di lok do nedi mo luvuttadi vavang, ketla mira long lenget ka i do nedi limixin kaxarang. ³Aklen i do nemi mira tu tuxuruxun pam at lunuunu atnimi, la migap kip levesongsongot mi lomomo, mo levesongsongot mumu laasen tarak, la mixo molo xape lunuunu atnimi.

⁴Ketla a ruuna na lempapaase mumu nemi at lempanga miga lox i, kopmen na lox avukat; labalamu atnimi ria kopmen na lolos kerekngan miga balamu avor ia at laaleng miga ravasu ngan limixin nuunu. ⁵Mina doma bilong ti mo labalamu avot atnimi ria, kusu miba ven kibis i do mira subu vam basinge ia. La mina leeng tinotno la minamlong ti mo

leveloklok nunuan nemi miga lox avor i. Mo do mi noxo leeng, aba vot saparap nemi la ana lok kepe nom lababao atnimi. ⁶Ketla lara lavanga mo, nia a lok momo minimi ren, mila mi xopara aleng mo leveloklok kakapmek atnedi limixin di mumu asu ne Nikolaus. La nenia bok axo vara rino mo loklok.

⁷Do tara i ruuna lubaalung, i lox avukat do neni na ronga na levelinga at Loroonan at ne Moroa i tong asu i ri limixin lotu. Do tara i tu tuxuruxun la it pas asi lololos at laxapmek, aba lox epovo i rin kusu ni na anan at levenpeven at luuna at lorooro, mo ik lok to at lagale lemenemen at ne Moroa.”

Lempapaase Uto Saparap Limixin Lotu To Smena

⁸Leeme Silok ga lok bok tia, “Una malagan na levelinga ri laangelo ik lok tatao limixin lotu to Smena.

‘Anai ni levelinga ap mo lara neni Lurutu Kaxat la Lumumupit, mo ga met ketla gara roo xat amlong pam. ⁹Aklen levesongsongot nemi mip kiv i, la aklen i do mit kis pakpakes, ketla nemi mip novos aleng mi lempanga boro vana at laxalibet. Aklen levelinga xaxarang atnedi limixin di tong i rinimi do nedi me Judaia, ketla kopmen, nedi mun limixin lotu at ne Satan. ¹⁰Nemen mita marat ap mo levenmumuat minabap kiv i. Mina ronga i na, Satan naba lok li teventaba atnemi ri loklok tong, la ba lok li teventaba atnemi at loxokoxo; la mibap kip mo levesongsongot at lasangaun aleng mun. Mina tu lolos mi lunuunu atnemi saparav ia, keke i do miba met mumu i, la aba raba nemi mi lorooro avolo ngan lavatbungorong tinimi.

¹¹Do tara i ruuna lubaalung, i lox avukat do neni na ronga levelinga at Loroonan at ne Moroa i tong asu i ri limixin lotu. Do tara i tu lolos keneng at levenmumuat, neni noxo suma rinotno lanmet sepsev agepura.”

Lempapaase Uto Saparap Limixin Lotu Ro Pegamam

¹²La Leeme Silok ga lok bok tia, “Una malagan na levelinga ri laangelo ik lok tatao limixin lotu ro Pegamam.

‘Anai levelinga boro ap mo laradi i ruuna lavarise sepsep i anan evan. ¹³Akleklen i do mik lok at lemenemen, ne Satan i nemen keneng teren ngan loorong silok. Ketla laasen tarak mim tebeng alolos i. La nemi xopmen mi goxo soxepe lunuunu atnemi ap mo levenaleng ne Antipas ga uu ren; neni ga nemen ngan laradi ruturun la laradi vapaase asu levelinga rak. Limixin at ne Satan diga sev i dom kantubu at lemenemen silok atnemi, nom ne Satan i nemen teren.

¹⁴Ketla a ruuna lempapaase lixilik mun mumu nemi at lempanga mi lox i kopmen na lox avukat. Lentaba atnemi dom dim tebeng alolos levenanasa at ne Balam, mo ga lox ase ne Balak kusu na sar asoogong

limixin me Israel ti laxakapmek. Ni ga tong i ridi do dina anan leveluxa laplavang ri lempoovo moroa la ni ga sar asoogong di kusu dina lok laxakapmek maxamang at lixitkis epot. ¹⁵La lentaba luvuttadi bok kantubu atnimi di mumu asu levenanasa at ne Nikolaus. ¹⁶Kuren la mina leeng tinotno. Mo do mi noxo leeng, anaba vot soso mun la ana esep eburu midi mi lavarise sepsep ba ravasu mede at langasuk.

¹⁷Do tara i ruuna lubaalung, i lox avukat kusu neni na ronga na levelinga Loroonan at ne Moroa i tong asu i ri limixin lotu. Ti mo lara do i tu lolos la it pas asi amisik laxapmek, aba raba i mi leveluxa boro vana at laxalibet, laasen teren lamaana, no i nemen alipe. La aba raba box i mi luat bunbun, eburu mi laasen maxat, mo bak lok at luat bunbun. Kopmen teta naklen mo laasen, ketla mo laradi xusuk mun naba ruuna ka mo luat nabaklen i.”

Lempapaase Uto Saparap Limixin Lotu Ro Taiataira

¹⁸La Leeme Silok ga lok bok, “Una malagan bok na levelinga ti laangelo ik lok tatao limixin lotu to Taiataira.

‘Anai levelinga boro at ne Nitna ne Moroa, luxatli ren i babao ngan laxao bokbolot, la luxangkedek teren i ngangao ngan loxonuat, laxao i an amemeles i. ¹⁹Akleklen lorooro atnimi, la aklen bok labalamu atnimi la lunuunu atnimi, la leveloklok nunuan atnimi. Aklen levesongsongot nemi mip kiv i, la mo leveloklok nunuan atnimi at na levenaleng i buaang aleng ti mo leveloklok nunuan nemi miga lox i ap mo levenaleng miga ravasu ngan limixin nuunu.

²⁰Ketla axo lok momo minimi mumu i na; mi siam kaka nom latkin ne Jesebel, i tong i do neni latkin papaase alii at ne Moroa, ketla neni i sar asoogong limixin tarak ti lok laxakapmek maxamang at lixitkis epot la i lok nedi kusu dina anan leveluxa diplavang min ti lempoovo moroa. ²¹Ara tong taba vam nom latkin mi levenaleng kusu ni na leeng basinge nom loklok kakapmek, ketla i xopara. ²²Kuren la aba sev i mi levesongsongot silok, la nedi digang longka i, anaba lok li nedi at losongsongot silok do nedi di noxo leeng basinge leveloklok kakapmek ap mo latkin. ²³La aba sev amet bok laxamdak teren. La limixin axap di nuunu dibaklen i do nenia ne Penasiak, aklen lorooro at limixin axap la aba vorang laxakapmek atnemi mi levesongsongot i epovo at loklok at legetgesa radi. ²⁴Ketla lentaba limixin nuunu atnimi dom Taiataira mixo lok momo at nom laanasa at ne Jesebel. Mixo siam ka laanasa ren la miga ke xepe bok mo levenanasa mumuat di tong i do levendomdoma alipe at ne Satan. Nenia a noxo tong bok tevelinga lolos tinimi xusu mina mu asu i; ²⁵ketla na legesa vanga xusuk mun, minam tebeng lolos mo lorooro nunuan atnimi, se at lomlong tarak.

²⁶Do tara i tu lolos la it pas asi lololos at laxapmek la i lox epovo lavavara rak se at laxavaxap at na lavatbung menemen, aba raba i mi

lololos kusu rim gomgo ridi buaang limixin at na lavatbung menemen. ²⁷I lok ngan ne Tamak ne Moroa ga raba ia mi lololos kusu nia anam gomgo ri limixin. Anai i lok ngan nom levelinga at Lovoang Kaala, i lok keretna, ‘La neni naba lolos kusu na lok tatao di mi lakdak lolos, la neni naba sep povorok nedi ngan lengkong sosopen kangka i reporok.’ *Sam 2:9*
²⁸La nia aba raba bok nedi limixin tarak mi lentian. ²⁹Do tara i ruuna lubaalung, i lox avukat do neni na ronga levelinga Loroonan at ne Moroa i tong asu i ri limixin lotu.”

Lempapaase Uto Saparap Limixin Lotu Ro Sadis

3 ¹La Leeme Silok ga lok bok tia, “Una malagan i na levelinga ti laangelo ik lok tatao limixin lotu ro Sadis.

‘Anai levelinga boro ap mo laradi i ruuna lavanuti leventoonan dik lok to melamgo at ne Moroa, la im tebeng lavanuti larapenti. Akleklen leveloklok atnimi; limixin di lok do mi ruuna lorooro, ketla kopmen, mi ruuna mun lanmet. ²Araklen pam i do lorooro atnimi xopmen na mu asu lavavara at ne Moroa rak. Kuren la mina xatu kaxat basinge mo lanmet la mina lox alolos mo lorooro, lavanga mina met epopolo. ³Mina doxoma bilong ti mo levenanasa miga ronga ka vam i, la mina mu asu i. La mina leeng tinotno basinge mo leveloklok kakapmek atnimi. Mo do mi noxo xatu kaxat basinge mo lanmet, aba vot pasa nimi ngan laradi xikip pilo, la nemi xa mi noxoklen loxonaleng potpot tarak.

⁴Ketla lentaba mun atnimi ro Sadis kopmen di goxo lok laxakapmek. Nedi mo diba sigaara mi levesingsiga bunbun la dinaba emu minia mila nedi mo di epovo rinotno. ⁵La nedi di tu lolos at lunuunu atdi, nedi bok diba sigaara mi levesingsiga bunbun. Nia xopmen tinotno a noxo lok kepe levenasen atdi ro at lubuk at lorooro, ketla nia aba tong i ri ne Tamak eburu mi lubang angelo ren do nedi limixin tarak. ⁶Do tara i ruuna lubaalung, i lox avukat do neni na ronga levelinga at Loroonan at ne Moroa i tong asu i ri limixin lotu.”

Lempapaase Uto Saparap Limixin Lotu Ro Piladelpia

⁷Leeme Silok ga lok bok tia, “Una malagan na levelinga ti laangelo ik lok tatao limixin lotu dik lok ro Piladelpia.

‘Ana levelinga neni boro at laradi i melemelengan la i raturun. La neni im tebeng lengki at ne Devit, loorong silok me gano; mo lengki i susuang lumusaragu at Linintoo at ne Moroa. Mo lumusaragu neni i susuang i, kopmen tara na epovo xusu na vi pe i, la mo lumusaragu neni i vi pe i, ixo epovo do tara na suang i. ⁸Akleklen leveloklok atnimi. Ketla mina ronga i na, ara suang taba vam nimi mi lumusaragu, la ixo epovo do tara na sat pe i. Aklen i do nemi mi ruuna lololos lixilik mene la aklen box i do nemi migang tonga res at levelinga rak, la kopmen migoxo sok tixirixes laasen

tarak. ⁹Lentaba limixin mo di tong i do nedi me Judaia, ketla kopmen, nedi lavaanat babala la nedi limixin lotu at ne Satan. Anaba lok nedi la dina vot pasa nimi la dina xis tiktikbu mi lempatgulom atdi dom melamgo atnimi la diba tong asu i do nenia a balamu aleng tinotno nimi. ¹⁰Nemi miga momo ri mumu asu levelinga rak, ga lok keretna, ‘Mina tu lolos kantubu at levenmumuat.’ Kuren la aba lok kepe nimi basinge nom levenmaares mumuat mo naba vot at na lavatbung menemen, kusu na lok tong pen limixin axap. ¹¹Anaba vot soso mun; minam tebeng alolos mo lunuunu atnimi kusu tara noxo xip pilo ka mo lempatbungorong atnimi. ¹²Do tara na tu lolos, aba lox i ngan luxus una at loogu laplavang at ne Moroa rak, la ixo epovo rinotno do neni naba vas su basinge i. Aba malagan li laasen at ne Moroa rak teren la laasen orong bok at lemenemen silok at ne Moroa rak. Mo lemenemen silok, ni Jerusalem maxat mo naba ravasi boro vana at laxalibet basinge ne Moroa rak. La aba malagan bok laasen maxat tarak go ren. ¹³Do tara i ruuna lubaalung, i lox avukat do neni na ronga levelinga at Loroonan at ne Moroa i tong asu i ri limixin lotu.”

Lempapaase Uto Saparap Limixin Lotu Ro Lodisia

¹⁴La Leeme Silok ga lok bok tia xeretna, “Una malagan na levelinga ti laangelo ik lok tatao limixin lotu ro Lodisia.

‘Ana levelinga boro at ne Luruturun, ni laradi raturun i tong asu levelinga at ne Moroa la ni lamgomgo at luruntudum li at ne Moroa.

¹⁵Aklen leveloklok atnimi la aklen i do lodomdoma atnimi xopmen naplivi ri lok lugugu at ne Moroa. A vara i do lotu atnimi naplivi aleng kopla na mumudut tinotno. ¹⁶Kuren la nenia anaba riki xepe nimi basinge ia mila nemi mik lok kantubu, lotu atnimi kopmen naplivi la kopmen na mumudut tinotno. ¹⁷Nemi mi tong i do, ‘Nema mo map novos aleng la ma ruuna lempanga axap la maxok pakes bok ti tempanga.’

Ketla mixoklen i do nemi limixin etaba la mi baava. Nemi mi lok ngan limixin pakpakes, lengkatli atdi i main, la dik lok beleben. ¹⁸Kuren la a tong lolos i na rinimi do mina un ka logol nunuan mede rak, ni logol laxao in tin pes levenbiva basinge i la imgames aleng; la kerepmo mibap novos aleng. Mina un ka bok levesingsigaara bunbun kusu miba etara pe lengkot mamangan atnimi min, kusu mi noxok lok beleben. Mina un ka bok levendan momonok kusu miba saba li i dom at lengkatli atnimi, kusu miba reven.

¹⁹Nedi nia a balamu di, a vaase aronga di la a lox aleeng di. Kuren la nemi bok mina doma avukat la mina leeng. ²⁰Mina ronga i na. A tu ro at lumusaragu la ap dipdi; la do tara i ronga xibis laxaka rak la na suang lumusaragu, aba vubeles ukeneng at loogu ren la mana anan eburu.

²¹Do tara na tu lolos at lunuunu ren la it pas asi lololos laxapmek, aba mulus ka i xusu ni nabat kis eburu minia ro at lixitkis orong tarak,

kerekngan ia aga sak tup mi lavamunepen tarak la na nga nia at kis eburu mi ne Tamak to at loxonin orong teren. ²²Do lubaalung mo at tara, i lox avukat do neni na ronga na levelinga at Loroonan at ne Moroa i tong asu i ri limixin lotu.”

Loxonin Orong At Ne Moroa Ro Vana At Laxalibet

4 ¹Melemu at na, aga ven manga lara lisilimet; maxeneng teren aga ven lara lumusaragu ga rem suang to vana at laxalibet. La aga ronga laxaka at lara xerekngan no avot nia aga ronga i, gang teng ngan lurus; ga lok tia, ‘Ude vana u, la ana lox ase u mi lempanga naba rupot melemu at nai.’ ²La soso mun Loroonan at ne Moroa ga suxuna ia, la to at laxalibet loxonin orong mo gak lok mi lara gat kis teren. ³La mo laradi gat kis teren, neni ga milik ngan tinotno limikmilik at la jespa, loxonuat gamgames i memele la ga milik bok ngan lakanilian, loxonuat gamgames i memele aleng ngan lada; la laxaburi gak lok kangkan mo loxonin orong ga milik ngan la emaral, loxonuat gamgames i mamaxa. ⁴La legepu sangaun mi lavanuet bok lengkot kitkis orong gak lok kangkan mo loxonin orong la legepu sangaun mi lavanuet loxongkulao amgomgo digat kis teren. Diga sigaara mi levesingsiga bunbun la lempatbungorong i gol gak lok to at lempatlak atnedi. ⁵Boro at nom loxonin orong, langangao at lavanga i mam ga ravasu; aga ronga leretepaavat ga on. La to melamgo at nom loxonin lavanuti levenbabao mo ga babao; nedi lavanuti leventoonan at ne Moroa. ⁶La to melamgo ap mo loxonin orong, lara lavanga bok mo ga milik ngan ta langsung liriong silok ga xasep aleng la ga silok ngan lavatdan kis.

La lavanuet levempanga rooro di tu kangkan amisik loxonin orong, di umsu mi laxangkatli to melamgo la to melemu bok. ⁷Lara avot ga lok ngan la laion, lara sepsev agepura ga lok ngan lubulumaxao, lara sepsev avantun ga ruuna lamakmaran at lavatlak at laradi, la lara sepsev avanuet ga ven ngan lamalom taptava. ⁸Ti nom lavanuet levempanga rooro dik lox amisik, nedi getgesara diga ruuna lavanna levempapa, diga umsu mi levengkatli digak lok at lengkot axap la to bok maxopok at levempapa atdi. La at levenaleng kangking la kanimin kopmen dina xap ti tong na levelinga,

‘I melemelengan, i melemelengan, i melemelengan. Neni Leeme Silok ne Moroa i lolos aleng. Ni ga nemen ganoxa la i nemen mo, la naba vot bok melemu.’

Ais 6:3

⁹La mo lavanuet levempanga rooro di tong asu amisik leemi asu la loklok ngangao la levelinga rotong avukat ti mo lara it kis amisik to at loxonin orong teren. La ni naba rooro amisik. Do dina tong i nom, ¹⁰mo legepu sangaun mi lavanuet loxongkulao amgomgo dit kis tiktikbu mi lempatgulom atdi to melamgo at ne Moroa mo it kis at loxonin orong

teren la di lotu parap ne Moroa naba rooro amisik la kopmen taxavaxap teren. La di lok li lempatbungorong atdi ro melamgo at loxonin la di lok keretna,

¹¹ ‘Moroa Leeme Silok atnama, nenu xusuk mun u epovo na lok kaka leemi asu, loklok ngangao mi lololos, mila nenu uga rudum li lempanga axap; la at lavavara mun taram uga rudum li di la uga lok li di xusu dina rooro.’

Lanasip Ga Lok Ka Lugun Linga Boro At Ne Moroa

5 ¹Melemu nia aga ven lugun linga ro at lekngen tino ap mo lara gat kis to at loxonin orong. Mo lugun linga ga umsu mi levenmamalagan to melamgo la to bok melemu ren, digam lut avarang i mi lavanuti levelumlut. ²La nia aga ven laangelo lolos gap kup lolos mi lususue xeretna, ‘Nege i epovo do na ba kaxat na levelumlut la na obes na lugun linga?’ ³Ketla kopmen teta ro vana at laxalibet kopla ro xopok at lavatbung menemen kopla de maxopok at lavatkangka gita epovo xusu na obes mo lugun linga la gita us mo levelinga ga nemen keneng teren. ⁴La nia agang teng aleng mila kopmen teta gita epovo xusu gita obes i nom lugun linga la ri us mo levelinga. ⁵Melemu lara atdi luvuttadi amgomgo ga lok tia, ‘Nemen utang teng. Mo laion, ni at libibinat at ne Juda, la livisik li at ne Devit, neni ira but asi vam lavamunepen min, la neni mun i epovo ri sak korop mo lavanuti levelumlut la na obes mo lugun linga.’

⁶La aga ven lara Lanasip ga tu kantubu rinotno at nom loxonin orong, la mo lavanuet levempanga rooro eburu mi loxongkulao amgomgo diga tu kangkan i; Lanasip ga tu, ga ven ngan ta do limixin diga sev amet pam i. Neni ga ruuna lavanuti levengkom la lavanuti levengkatli, nedi leventoonan at ne Moroa, mo ga riki asi di ri lengkot axap at na lavatbung menemen. ⁷La mo Lanasip gat pas la ga lok ka mo lugun linga boro at lekngen tino at ne Moroa, mo gat kis at loxonin orong. ⁸Neni ga lok ka mo lugun linga, la nom lavanuet levempanga rooro eburu mi nom legepu sangaun mi lavanuet loxongkulao amgomgo diga xis tiktikbu mi lempatgulom atdi ro melamgo at Lanasip. Nedi getgesara digam tebeng lengkon taaleng eburu mi leventingtigon gol mo ga umsu mi levempavaxan una so mavak. Ni ga ru katling levesingising atnedi limixin at ne Moroa. ⁹La nom lavanuet levempanga rooro eburu minedi loxongkulao amgomgo diga vixan lara loxompixan maxat, i lok keretna,

‘Nenu u epovo rinotno xusu una lok ka lugun linga la una ba kaxat kepe mo levelumlut teren mila limixin diga sev amer u; ketla uga roo xat amlong la at nom mun lada ram uga un ka amlong limixin ti ne Moroa. Nedi at levenabung mixin axap la boro bok at levempapaase vetpes, la boro bok at lenbantuxu vetpes, la boro bok at larabibinat petpes. ¹⁰La uga lok katling di ngan lavamaasa at Linintoo ram kusu diba lok lugugu

at ne Moroa, la dinabam gomgo ri limixin axap at na lavatbung menemen ngan limixin amgomgo atdi.’

Sam 98:1, Pas 19:6

¹¹Melemu aga milik la aga ronga buaang nedi laxanangelo, diga umsu aleng la a goxo epovo xusu ana us di. Diga tu kangkan mo loxonin orong eburu mi lavanuet levempanga rooro la loxongkulao amgomgo. ¹²La diga vaase silok keretna,

‘Lanasip, no limixin diga sev amer i; neni i epovo rinotno xusu na ruuna ka lololos, lapnovos, lakleklen, loklok ngangao, leemi asu la leveloklox anarong.’

1 Let 29:11

¹³Melemu aga ronga leemi asu boro at lempanga axap ne Moroa ga rudum li di, nedi limixin eburu mi levempanga mi lavanuet kangkedek atdi, la nedi bok pana at laxalibet la nade xopok at lavatbung menemen la lempanga bok dik lok keneng at lebelen laxangka la lempanga dik lok at lebelen laras; diga lok,

‘Ti mo lara it kis at loxonin orong la ti Lanasip bok, ma raba numu mi leveloklox anarong, loklok ngangao, leemi asu la lololos ba nemen amisik la kopmen taxavaxap teren.’

1 Let 29:11

¹⁴La mo lavanuet levempanga rooro diga lok, ‘I ruturun.’ La mo loxongkulao amgomgo diga xis tiktikbu mi lempatgulom atdi la diga lotu parap ne Moroa eburu mi Lanasip.

Lanasip Ga Ba Kaxat Kepe Levelumlut At Lugun Linga

6 ¹Melemu aga ven Lanasip ga ba kaxat kepe lumlut avot at nom lavanuti levelumlut, la aga ronga lara atnedi lavanuet levempanga rooro ga vaase silok ngan leretepaavat ga lok ti lara, “Ude u.” ²La nia aga milik kaxat la aga ven lavaros bunbun, la mo laradi gat kis teren, neni gam tebeng labanara; la ni ga lok ka lavatbungorong, la ni ga sixit kaxat uto at lengkot axap at na lavatbung menemen ngan ta laradi esep kusu na sev asi lavamunepen teren.

³La melemu Lanasip ga ba kaxat kepe manga levelumlut sepsev agepura; la aga ronga lavanga rooro sepsev agepura ga lok ti lara, “Ude u.” ⁴La lara lavaros manga ga vas su, ga memele aleng. La mo laradi gat kis teren, ga lok ka lololos kusu na lok kepe lumulum kantubu at limixin at na lavatbung menemen, kusu limixin diba esev amet. La neni ga lok ka bok lavarise sepsep i baalom aleng.

⁵La melemu Lanasip ga ba kaxat kepe manga levelumlut sepsev avantun, la aga ronga lavanga rooro sepsev avantun ga lok ti lara, “Ude u!” La aga ven lara lavaros ga bibi aleng, la mo laradi gat kis teren gam tebeng lisikel to at lekngen. ⁶La aga ronga lavanga ga lok ngan laxaka linga boro xantubu ap mo lavanuet levempanga rooro, ga lok, “I epovo do una lox aurut luunun at lempanga anan; kuren la legesa buxom piao ni luunun lixilik ti laradi i gugu at leges aleng, la lavantun buxom balirais

ni luunun lixilik ti laradi i gugu at leges aleng, ketla nemen uta lok kapmek ladan momonok la laxadan vaen.”

⁷La Lanasip ga ba kaxat kepe levelumlut sepsev avanuet la aga ronga laxaka linga at lavanga rooro sepsev avanuet ga lok ti lara, “Ude u.” ⁸La nia aga milik kaxat, la aga ven lara lavaros ga ngangan la mo laradi gat kis teren, laasen teren ne Lanmet; la lara ga mumu ro melemu, laasen teren ne Edesa. La duga lok ka lololos mavana at lenep i sepsev avanuet at limixin axap at na lavatbung menemen, kusu duna sev amet di keneng at levenesep silok; la loroxo la levenanmeres silok la levempanga mi lavanuet kangkedek atdi diba sev amet bok limixin.

⁹La Lanasip ga ba kaxat kepe manga levelumlut sepsev avalimo. La aga ven uto saparap loxonin laplavang la maxopok teren aga ven labaroonan at limixin nuunu diga met gano. Limixin diga sev amet di mila diga tong asu levelinga at ne Moroa la levelinga ruturun at ne Iesu Karisito. ¹⁰Digap kup lolos mi laxaka linga xeretna, “Moroa lolos aleng, nenu u melemelengan la u ruturun aleng. Lingisa ba uba vaxaru li limixin at lavapaase la una sev amet di ri vorang laniu nema maga ekip tangarang min?” ¹¹La nedi getgesara diga lok kaka levesingsigaara bunbun la diga lok ka levelinga do dina ngangais be la dina lok mamas, se limixin dina sep bok tentaba at luvutneton di eburu mi lavasaxaruki xerekngan nedi diga uu. Do luutus at nom limixin na epovo, Moroa naba vorang laniu atnedi axap.

¹²La aga ven Lanasip ga ba kaxat kepe manga levelumlut sepsev avanna. La langne silok ga vot, la laxangking gak maxat ngan lavanga singsiga limixin di lox i mi laxabinim bibi at lavatme; la lagaaling axap kopmen goxo soosoo axasep bok ba, ketla ga soosoo memeles ngan ta lada. ¹³La laxampenti boro vana at laxalibet diga subu si ukopok ti lavatbung menemen kerekngan lempeven at luuna pik mo i mada vam, im subu si do lamanman silok it mas i. ¹⁴La lamavangkap ga sonao ngan lugun diga vegun i, la lempatkaana axap eburu mi levesoxan diga vas kaxat uto vetpes.

¹⁵Melemu lavaorong silok at lavatbung menemen la limixin gomgo la luvuttadi amgomgo at limixin esep, la limixin dip novos la limixin lolos, la nedi bok lavasaxaruki la limixin sepmus bok, diga lipe ro at laratabuang la ro xantubu at lempattavut silok to at larakaana, ¹⁶digap kup ti lempatkaana mi lemparuat keretna, “Mina subu pavaa nama la mina lox alipe nama basinge mo laradi it kis to at loxonin orong la basinge bok lebelemamao, Lanasip ba lox asu i rinama, ¹⁷mila mo laaleng silok at lebelemamao atdu na nga ira vot pam la ixo epovo xusu tara naba ekini min.”

Limixin Boro Israel (144,000)

7 ¹Melemu at nai aga ven lavanuet lubungangelo diga tu ro at lavanuet mesuluk at na lavatbung menemen, digam tebeng alis lavanuet

laramera manman at lavatbung menemen kusu lamanman noxot mas lavatbung menemen kopla laras kopla larauna. ²La nia aga ven manga lara laangelo ga vas su boro at loxot, laxangking it los su e. Neni gap kip lavanga loklok katling at ne Moroa i rooro amisik. La ni gap kup mi laxaka silok ti mo lavanuet lubungangelo diga lok ka lololos kusu ri lok kapmek lavatangka eburu mi laras. ³La ni ga lok, “Nemen mita lok kapmek lavatangka kopla laras kopla larauna, ise do mana lok li loklok katling to at levenmang at lavasaxaruki at ne Moroa.” ⁴La diga tong i ria do leexes atdi axap mo limixin diga ruuna loklok katling at ne Moroa ro at levenmang atdi ga epovo at legesa sangaun kobot mi lavanuet sangaun mi lavanuet larabin sangaun kobot (144,000). Nedi at lasangaun mi legepura larabinat me Israel.

⁵Lasangaun mi legepura larabin sangaun kobot (12,000) diga lok katling di at libibinat at ne Juda; lasangaun mi legepura larabin sangaun kobot (12,000) at libibinat at ne Ruben; lasangaun mi legepura larabin sangaun kobot (12,000) at libibinat at ne Gat. ⁶Lasangaun mi legepura larabin sangaun kobot (12,000) at libibinat at ne Asa; lasangaun mi legepura larabin sangaun kobot (12,000) at libibinat at ne Napitali; lasangaun mi legepura larabin sangaun kobot (12,000) at libibinat at ne Manase. ⁷Lasangaun mi legepura larabin sangaun kobot (12,000) at libibinat at ne Simion; lasangaun mi legepura larabin sangaun kobot (12,000) at libibinat at ne Levi; lasangaun mi legepura larabin sangaun kobot (12,000) at libibinat at ne Isaka. ⁸Lasangaun mi legepura larabin sangaun kobot (12,000) at libibinat at ne Sebulon, lasangaun mi legepura larabin sangaun kobot (12,000) at libibinat at ne Josep, la lasangaun mi legepura larabin sangaun kobot (12,000) at libibinat at ne Beniamin.

Buaang Limixin Diga Sigaara Levempanga Singsiga Bunbun

⁹Melemu at nai aga ven buaang nedi limixin, ixo epovo do tara na us nedi. Nedi boro at lengkot axap at na lavatbung menemen, la at larabinat axap la at levenasen bantuxu axap la boro at lempapaase axap, diga tu ro melamgo at loxonin orong la to melamgo bok at Lanasip. Diga sigaara mi levempanga singsiga bunbun. La digam tebeng lempavaxan bisi at levengkikngen di. ¹⁰La digap kup lolos keretna,

“Loklox arooro boro at ne Moroa, mo it kis at loxonin orong teren la boro bok at Lanasip.”

Sam 3:8

¹¹La mo lubungangelo axap diga tu kangkan loxonin orong la nedi legepu sangaun mi lavanuet loxongkulao amgomgo eburu mi lavanuet levempanga rooro, diga xis tiktikbu mi lempatgulom atdi ro melamgo at loxonin orong la diga lotu parap ne Moroa. ¹²Diga lok keretna,

“Tuturun pam. Loklox anarong, la leemi asu, lakleklen, luvukat, la loklok ngangao, mi lololos ti ne Moroa atdik amisik la kopmen taxavaxap teren. Tuturun tinotno.”

¹³La lara atnedi loxongkulao amgomgo ga sue ia, “Nege di na limixin di sigaara mi levesingsiga bunbun, la di laa rinotno meva?”

¹⁴La aga lok tin keretna, “Leeme Silok. Axoklen i, nenu uklen i.”

La ni ga lok tia, “Nedi na limixin digap tavasus basinge levenmaares lolos; la dira gos pam levesingsigaara atdi mi lada at Lanasip la dira lox anbun axap pam i. ¹⁵Kuren la di tu amisik to melamgo at loxonin orong at ne Moroa la di gugu amisik tin at lengkangkiking mi lengkanimin keneng ap mo loogu laplavang teren; la ne Moroa, mo it kis at nom loxonin orong, neni naba lok tatao avukat di ro xeneng at loogu ren. ¹⁶Di noxo roxo bok ba, la di noxo minu bok ba; la laxangkiking noxo soosoo lolos bok ba mavana atdi la liplivi at laxangkiking noxo sep polo ridi, ¹⁷mila Lanasip mo ik lok kantubu at loxonin orong, neni naba lok tatao di kerekngan laradi ik lok tatao levesipsip teren, la neni ba sat kaka nedi uto at levendan tooro i puvut su la ne Moroa naba lok kepe axap levengkamkabili dan basinge lengkatli atnedi.”

Lanasip Ga Ba Kaxat Kepe Levelumlut Sepsev Avanuti

8 ¹La Lanasip ga ba kaxat kepe levelumlut sepsev avanuti, la lenmila aoon ga nemen to vana at laxalibet at lavantun sangaun minit.

²La aga ven lavanuti lubungangelo mo di tu amisik to melamgo at ne Moroa, la diga lok ka lavanuti leventu.

³La lara laangelo vetpes, mo gam tebeng logol tingtigon kusu ri xotos levempavaxan una mavak, neni ga vot la ga tu saparap loxonin laplavang to melamgo at ne Moroa. La ni ga lok ka laxampavaxan una kusu na xotos i ri ne Moroa la ga raba bok ne Moroa mi levesingising at limixin teren. Neni ga lox i na ap mo loxonin i gol aleng ga tu ro melamgo at loxonin orong at ne Moroa. ⁴La lusuxa at nom levempavaxan una mavak ga urut boro at lekngen mo laangelo uto vana saparap ne Moroa eburu mi mo levesingising atnedi limixin at ne Moroa. ⁵La laangelo ga lok ka lavattingtigon la ga suxa i mi laxao boro at loxonin laplavang la ga lu asi min uto at laxangka, la leretepaavat ga repat aoon mi lavanga ga mam eburu mi langne silok.

Lubungangelo Diga Mas Leventu Atnedi

⁶Melemu mo lavanuti lubungangelo diga gagas mi lavanuti laratu atnedi kusu dina mas di. ⁷Laangelo avot ga mas mo luru ren. La lengkos uat gan bun aleng eburu mi laxao ga subu ukopok ti laxangka eburu mi lada. La lenep sepsev avantun at laxangka ga an axap mi laxao la lenep sepsev avantun bok at larauna ga an axap mi laxao la lempivilis avukat ga an axap.

⁸La laangelo sepsev agepura ga mas luru ren, la mo lara lavanga ga lok ngan lavattaavut silok, laxao gak lok teren, lara ga lu asi min uto xopok

at laras. La lenep sepsev avantun at laras ga vee da; ⁹la lenep sepsev avantun at lempanga axap di rooro at lebelen laras diga met. La lenep sepsev avantun at levempattaaxup diga lok kapmek.

¹⁰La laangelo sepsev avantun ga mas luru ren la langsung lavatpenti ga subu si boro vana at laxalibet ga ngangao lolos ngan loxonaros kao silok, la ga subu at lenep sepsev avantun at laratadan. ¹¹Laasen ap mo lenti ne Laksoxobi. Lenep sepsev avantun at laradan axap ga so mamao; la buaang nedi limixin diga in ap mo laradan diga met, mila mo levendan ga rem gili la ga so mamao.

¹²La laangelo sepsev avanuet ga mas luru ren la laxangking la lagaaling la larapenti, lara ga sep di la lenep sepsev avantun at laxangking ga buxumin, la lenep sepsev avantun bok at lagaaling ga buxumin, la lenep sepsev avantun at larapenti goxo soosoo. Lenep sepsev avantun at levenaleng kangking, laxangking kopmen goxo soosoo; la lenep sepsev avantun at levenaleng kanimin, lagaaling kopmen goxo soosoo bok.

¹³Nia aga reven i na, la aga ronga lamalom, gang teng lolos to vana at lamavangkap la ni gang teng keretna, “Naba lok kapmek aleng, naba lok kapmek aleng tinedi limixin di rooro at na lavatbung menemen, mila levenmumuat lolos naba vot at loxonaleng mo lavantun lubangangelo dina mas laratu atdi la mo loxonaleng ira auret ta.”

9 ¹La laangelo sepsev avalimo ga mas mo luru ren la aga ven lenti no xopok at laxangka ga subu si boro vana lamavangkap. La mo lenti ga lok ka lengki ri suang lumusaragu at lemeroon. ²La ni ga suang lumusaragu at lemeroon la lusuxa ga ravasu ngan lusuxa at langsung laxao. La mo lusuxa ga vula pe laxangking eburu mi lamavangkap la laxangking goxo epovo ri soosoo. ³La laxanasku ga ravasu boro at lusuxa uto at laxangka, la diga lok ka lololos ngan lololos at laksoxomet at na lavatkangka. ⁴La diga lok ka levelinga do nemen gat di guta lok kapmek lempivilis at na lavatkangka koplal levenasen ang bok, koplal levenuna; ketla dina lox asongot mene limixin, kopmen di goxo ruuna loklok katling at ne Moroa ro at levenmang atdi. ⁵La diga lok ka lololos kusu ri lox asongot nedi at lavalimo gaaling mun, ketla nemen gat di guta sev amet di. Mo losongsongot nedi diga suma i, ga lok ngan losongsongot at laksoxomet do i bi asongot laradi. ⁶La keneng ap mo lavalimo gaaling limixin dibam suma mo losongsongot silok la diba vara ri lanmet, ketla di noxo vuse ka i. Diba vara meremet ketla lanmet naba o basinge di.

⁷Mo laxasixu diga ven ngan laxanos diga gagas kusu ri leesep. La to at lempatlak atdi diga siga lempatbungorong, ga lok ngan logol. La levenmeren diga lok ngan levenmeren at luvuttadi. ⁸Lengkabinim atdi ga baalom ngan lengkabinim at lavakin la levesangsa atdi ga lok ngan levesangsa at laion. ⁹Diga siga pe lenbongobong atdi mi levempanga

singsiga aen; la lasasang at levempapa atdi ga lok ngan lasasang at laxanos eburu mi laxangkaris digak sixit uto at leesep. ¹⁰La diga ruuna bok levenatketke la ga soxobi ngan at levenaksoxomet; la mo lololos ti sev asongot gak lok at levenatketke atdi la diga epovo na lox asongot limixin keneng at nom lavalimo gaaling. ¹¹Diga ruuna loorong silok, neni laangelo ik lok tatao lemeroon; laasen teren keneng at lavapaase Ibru do ne Abadon la at lavapaase Grik do ne Apolion. Lavasuun at na laasen do 'Laradi sesele utut kepe.'

¹²Lumumuat avot mo gara xap ta, ketla legepu mumuat move gara vot bok.

¹³La laangelo sepsev avanna ga mas lurus ren, la aga ronga laxaka linga boro at lavanuet mesuluk ap mo loxonin laplavang i gol la i tu ro melango at ne Moroa, ¹⁴la ni ga lok ti mo laangelo sepsev avanna xeretna, "Una soxomus asu lavanuet lubungangelo mo dik lok at loxokoxo to at ladan silok Iupretis." ¹⁵Ni ga soxomus asu mo lavanuet lubungangelo la mo diga gagas ti mo loxonatat aleng ap mo laaleng ap mo lagaaling la ap mo lamaares kusu dina sev amet lenep sepsev avantun at limixin axap. ¹⁶La aga ronga luutus at limixin esep ga buaang aleng, digat kis at laxanos atdi ga epovo at legepu sangaun kobot milion. 200,000,000. ¹⁷La keneng at na lisilimet tarak aga ven mo laxanos la mo luvuttadi digat kis atdi diga siga pe lenbongobong atdi, mi levempanga singsiga aen mo ga memele aleng, la ga mamaxa ngan la sapira, ni loxonuat gamgames i mamaxa; la nom lempanga singsiga ga ngangan bok ngan salpa, mo i lok ngan laxakup ngangan. La lempatlak ap mo laxanos ga lok ngan lempatlak at laxan laion, la laxao eburu mi lusuxa la lasalpa ga ravasu boro at levenngusno atdi. ¹⁸La na lavantun levempanga, laxao, lusuxa, la lasalpa ga sev amet lenep sepsev avantun at limixin axap. ¹⁹Lololos ap mo laxanos gak lok to at levenngusno atdi, la to at levenatketke atdi. Mo levenatketke atdi ga lok ngan lempasii la diga ruuna lempatlak atdi kusu dina sev asongot bok limixin min.

²⁰La nedi limixin di goxo met ap mo levesongsongot, di goxo leeng basinge leveloklok kakapmek atdi. La move di goxo xap ti lotu saparap lubunggas la lempoovo moroa diga lox i mi levenuut ngan logol, la siliva la borons la levenuut petpes bok la levengkonuna, mo lempanga dixo epovo do dina reven la dinang tonga la dinat pas. ²¹La kopmen bok nedi limixin di goxo leeng basinge loklok ti sev amet tadi, la loklok ti lok levesak la loklok kakapmek maxamang at lixitkis epot la loklok kipkip pilo.

Laangelo La Lugun Linga Lixilik

10 ¹Melemu aga ven manga lara laangelo lolos ga si boro vana at laxalibet. La loxontakabu ga itis i ngan lavanga singsigaara, la

laxaburi gak lok to mavana at lavatlak teren. La lemeren ga soosoo ngan laxangking la luxangkedek teren ga lok ngan legepu xus una, laxao gak lok teren. ²To at lekngen neni gam tebeng loxon gun linga lixilik mo ga repalas pam; la laxangkedek tino ren ni ga vaxaru i ro at laras la laxangkedek kia ren ni ga vaxaru i ro at laxangka. ³La ni ga xup lolos mi laxaka linga silok ga lok ngan lavat laion im booro lolos; neni ga xup kerepmo la lavanuti levempanga tepaavat diga vaase porang i. ⁴Aga gagas kusu ana malagan mo levelinga diga tong i, ketla aga ronga laxaka linga at lara ro vana at laxalibet ga lok tia, “Nemen uta malagan mo levelinga atdi, ni ba nemen alipe mun.”

⁵La mo laangelo aga ven i, ga tu ro at laras la to at laxangka, ga songurut mi lekngen tino upana ri laxalibet, ⁶la ga vangpe mi laasen at ne Moroa mo i rooro amisik la kopmen taxavaxap teren, la ga rudum li laxalibet la lempanga dik lok teren, la lavatkangka la lempanga dik lok teren, la laras la lempanga dik lok keneng teren, la ni ga lok keretna, “Moroa kopmen noxo ngais abao.” ⁷Ketla ap mo levenaleng laangelo sepsev avanuti naba mas luru ren, ne Moroa naba lox asoron mo lodoxoma alipe ren, kerekngan neni gara tong axasep pam i ri lavaeme vapaase alii ren, nedi lavaanat saxaruki ren. ⁸La mo laxaka linga nia aga ronga avor i, ga paase ria boro vana at laxalibet, ga lok manga ria, “Unat pas la una lok ka lugun linga mo i repalas pam la mo ik lok at lekngen laangelo mo i tu ro at laras la laxangka.”

⁹La aga vot pasa mo laangelo la aga sue i mi lugun linga kusu na raba ia min; la ni ga lok tia, “Una lok ka na lugun linga la una anan i; naba so mamao to at labalam ketla ro at langsum ni naba so avukat ngan limisiu.” ¹⁰Aga lok ka mo lugun linga lixilik boro at lekngen laangelo la aga an i, la ni ga lok ngan tinotno ladan misiu ro at langsuk; se aga linge i, ni ga so mamao ro at labalak. ¹¹La laangelo ga lok tia, “Mo manga una tong asu levelinga at ne Moroa mumu laxanabung mixin solo, levennep silok i buaang, la larapapaase la lavaorong silok.”

Moraa Ga Riki Legepu Radi Xusu Duna Vavang

11 ¹La laangelo ga raba ia mi lakdak soksoxovo, la ni ga lok tia, “Unat pas la una soxovo loogu laplavang at ne Moroa la loxonin laplavang keneng teren, la una us bok nedi di lotu go. ²Ketla nemen uta soxovo lemelua ik lok kangkan mo loogu laplavang, mila nom lemelua ik lok ti limixin kopmen di me Judaia. La nedi dibat pas axangka lemenemen kaala Jerusalem at lavanuet sangaun mi legepura leven gaaling. ³La ap mo levenaleng aba riki aonon luradi vapaase rak mi lololos kusu duna vavang mi levelinga rak ap mo legesa abin sangsangaun kobot mi legepu sangaun kobot mi lavanna sangaun aleng (1,260); la duba siga mun lengkontamon gurusek at limixin dik saxaanu.” ⁴Mo luradi vapaase, nedu legepu una olip la nedu

bok lubabao di tu gagas to melango at ne Moroa, ni lo Moroa at na lavatbung menemen. ⁵La do tara na lok tong i xusu na sep du, laxao ba soli su boro at lungusno du, la ba rin asonao lavamunepen atdu; la at na mun langas do tara na lok tong i xusu na sep du, neni naba met kerepno. ⁶Dunaba ruuna lololos kusu ri ru pe larakabu la noxo vot ap mo levenaleng do nedu dunaba vavang teren, la dunaba ruuna bok lololos kusu duna ba gili levendan ti lada, la dunaba ruuna bok lololos tip sev amisik limixin at na lavatbung menemen mi levenasen songsongot axap, mo do duba vara i do duna lox amisix i.

⁷Do duna lox axap mo lugugu ri vaase asu levelinga at ne Moroa, lara lavatpanga sio mi lavanuet kangkedek teren ba vasu ap mo lemeroon la ba esep mi mo luradi at ne Moroa la naba ranga alis du la na sev amet du. ⁸La lubantuxu atdu nabak midi ro at langas ap mo lemenemen silok, ap mo mun loxot Leeme Silok atdu ga met at laxaba ve. Luasen poovo ap mo lemenemen ne Sodom la ne Isip. ⁹La limixin boro at levengkot axap, la larabibinat, la levempapaase, la levenbantuxu diba reven lubantuxu atdu at lavantun mi loxon atat aleng la di noxo mulus kusu dina lok li lubantuxu atdu at lamaaut. ¹⁰La limixin axap at lavatbung menemen diba momo aleng mumu lanmet atdu. Diba lok larapeluxa silok la diba etaba ela mi leventamtaba atdi. Lavasuun teren do na luradi vapaase duba lok buaang levempanga songsongot mavana at limixin.

¹¹Ketla melemu at lavantun mi loxon atat levenaleng, Moroa ba raba mamas du, la duba xatu kaxat, la nedi limixin diba ven du, diba marat aleng. ¹²La na luradi vapaase duba ronga lara na vaase ridu boro vana at laxalibet la ba lok, "Ude numu vana." La duba urut uto vana at laxalibet keneng at loxontakabu, la limixin munepen midu mo diba tu la diba reven du.

¹³La ap mo mun loxonaleng langsung langne ba vot, la lenep i sepsev asangaun ap mo laraugu xeneng at lemenemen silok ba rem tereve axap; la lavanuti larabin sangsangaun kobot (7000) limixin diba met at nom langne, la nedi limixin diba roo suu ap mo langne diba marat aleng tinotno la diba emi asu mi ne Moroa no vana at laxalibet.

¹⁴La nom lumumuat sepsev agepura na nga ira xap, ketla lumumuat sepsev avantun move la i auret do na vot.

Laangelo Sepsev Avanuti

¹⁵La laangelo sepsev avanuti ga mas lurus ren, la aga ronga laxaka linga silok at lentaba to vana at laxalibet ga lok keretna,

'Amo nga Leeme Silok atdik eburu mi Lanarong teren du ru ka loklok tatao at na lavatbung menemen. La nedu dunaba lok tatao amisik la kopmen taxavaxap teren.'

Sam 145:13

¹⁶La nedi legepu sangaun mi lavanuet loxongkulao amgomgo mo digat kis at levengkonin orong atdi to melango at ne Moroa, diga xis tiktikbu mi lempatgulom atdi la diga lotu parap ne Moroa. ¹⁷Diga lok keretna,

‘Ma tong avukat tu, Leeme Silok, ne Moroa i lolos aleng, mo ga nemen gano la i nemen bok lingina, mila ura gu asu vam mi langsung lololos taram la ura ru ka vam loklok tatao ram at na lavatbung menemen. ¹⁸Nedi lavamolon diga musak teng tino, ketla laaleng ira vot pam kusu una lox asuusu lebelemamao ram, la uba lok li limixin digara met pam at lavapaase. Ni laaleng bok kusu uba raba luunun avukat ti lavaeme vapaase alii ram, nedi lavasaxaruki ram la tinedi limixin nuunu la nedi bok dik lok ngangao at laasen taram; nedi limixin gamasa la nedi bok di ruuna laasen silok. La laaleng ira vot pam kusu uba sele utut kepe nedi limixin diga lok kapmek lixitkis nunuan at na lavatbung menemen.’

Sam 2:1

¹⁹Melemu at na, loogu laplavang at ne Moroa ga rem suang to vana at laxalibet, la limixin diga ven lobokis kaala, mo ga lok katling lekabus maxat at ne Moroa. La limixin diga ven lavanga ga mam etitit, la diga ronga leretepaavat gak lox epasum la diga suma lavarangne silok la lengkos uat gan bun aleng ga subu.

Latkin La Ne Satan

12 ¹Lara loklok katling silok ga ravasu to vana at lamavangkap. Lara latkin ga rupot, laxangking ga itis i ngan lisingsigaara ren, la lagaaling gak lok to maxopok at luxangkedek teren, la ni ga siga lasangaun mi legepura larapenti ro at lavatlak teren ngan lavatbungorong. ²Neni ga balan madak, la ga auret ta do na visik, la losongsongot teren ga lolos la neni ga reng. ³La lara loklok katling bok ga ravasu to vana at lamavangkap. Lara langsung lavattulaava memele ga rupot. Ni ga ruuna lavanuti lempatlak la lasangaun lempatkom, la lavanuti lempatbungorong gak lok at nom lavanuti lempatlak teren. ⁴Latketke ren ga rev asi lenep sepsev avantun at larapenti boro vana at laxalibet la ga lu asi midu ude xopok at lavatkangka. La na lavattulaava ga tu to melango at nom latkin kusu neni na anan lamdak teren do ni na visik asu i. ⁵La neni ga visik lamdak temes, mo naba lok tatao limixin axap at na lavatbung menemen la loklok tatao ren naba lolos aleng. Ketla ne Moroa ga lok ka mo lamdak uto vana at loxonin orong teren. ⁶La mo latkin ga sixiro uto at lamatbin at lara loxot ne Moroa ga lox agagas li i, la neni ba lok tatao i go at legesa abin sangsangaun kobot mi legepu sangaun kobot mi lavanna sangaun (1,260) aleng.

⁷La lara leesep ga xatu kaxat to vana at laxalibet. Mikael, lara laangelo gomgo eburu mi lubungangelo teren diga esep eburu mi nom lavattulaava; la nom lavattulaava eburu mi lubungangelo ren diga esep tangarang di. ⁸Ketla ne Mikael eburu mi lubungangelo ren diga sak tup mi mo lavattulaava, la neni eburu mi lubungangelo ren goxopmen bok ba toxot tidi xusu tik lok to vana at laxalibet. ⁹La ne Mikael eburu mi

lubungangelo ren diga lu asi mi mo lavattulaava eburu mi lubungangelo ren. Neni lavattulaava me gaxatnak, luasen teren ne Devel la ne Satan, mo i sasar asoogong limixin axap ti laxapmek; nedi diga lu asi midi ude xopok at na lavatbung menemen.

¹⁰La aga ronga laxaka linga silok to vana at laxalibet ga lok keretna, “Mo nga loklox arooro at ne Moroa la lololos teren eburu mi Linintoo ren naba ru asaxaven. La na nga Lanarong teren naba lox asuusu lololos teren to xopok at lavatbung menemen; mila ne Satan mo ga tu ro melango at ne Moroa xusu neni na babala raba luvutneton dik at levenaleng kangking la kanimin. La lubungangelo at ne Moroa digara lu asi vam min uto xopok. ¹¹La luvutneton nedik dira sak tup pam mi ne Satan mila diga nuunu at lada at Lanasip la at lempapaase ruturun at ne Moroa, mo levelinga diga tong asu i la di goxo marat mi lorooro atdi, diga gagas kusu dina met. ¹²Kuren la mina momo, nemi limixin mik lok de vana at laxalibet. Ketla naba lolos aleng tinedi limixin di nemen to xopok at lavatbung menemen la to saparap laras; mila ne Satan ira si vam saparap nimi la i musak aleng tinotno, mila ikleklen i do neni noxo nemen abao ro xopok.”

Jop 1:9-11, Sam 96:11

¹³Nom lavattulaava ga ven kibis i do lubungangelo diga lu asi min ude xopok at lavatbung menemen, la neni ga xala mu mo latkin, no ga visik mo lamdak temes. ¹⁴Ketla ne Moroa ga raba nom latkin mi legepu vapa at lamalom silok kusu rin ti rava basinge mo lavattulaava la uto at lamatbin. Mo go ne Moroa ga lox agagas li vam loxot tin, kusu ni bak lok tatao i go at lavantun mi loxonatat levenmaares. ¹⁵La ladan sen silok ga rem sobang su boro at lungusno at lavattulaava, kusu ladanut naba suxu xepe nom latkin la na sev amer i. ¹⁶Ketla lavatkangka ga lok tooro nom latkin, la lara lamamara ga rem suang la lavatkangka ga xanom mo ladan silok ga sixisu boro at lungusno at nom lavattulaava. ¹⁷La melemu mo lavattulaava ga musak teng aleng mumu nom latkin, la ni ga vas kaxat basinge i, la ga onon uto at lenep petpes kusu na esep eburu mi livipisik li at nom latkin; nedi mo ding tonga res at levelinga at ne Moroa la di nuunu at levempapaase ruturun at ne Iesu. ¹⁸La mo lavattulaava ga tu ro loxon at lisigege at laras.

Lavatpanga Sio Mi Lavanuet Kangkedek Teren

13 ¹La nia aga ven lara lavatpanga sio mi lavanuet kangkedek teren ga ravasu boro at laras, ni ga ruuna lasangaun kom la lavanuti lempatlak, la lasangaun lempatbungorong gak lok ap mo lasangaun kom. La at nom lavanuti lempatlak, lavanuti levenasen aksaksa gak lok ti vaase vupu ri ne Moroa. ²La mo lavatpanga sio ga lok ngan lavatlepat, la lengkangkedek teren ga lok ngan at lavatbea, la lungusno ga lok ngan at lavat laion. La mo lavattulaava ga raba i mi lololos teren la lixitkis teren

ti lok tatao limixin la lisisilok teren mavana at lempanga axap. ³La ga milik ngan lara at nom lempatlak at nom lavatpanga sio ga ruuna lining kooxing, lara ga sev aroogo i, ketla neni ga lox avukat manga. La limixin axap at na lavatbung menemen diga sangu aleng at nom lavatpanga sio la diga mumu asu i. ⁴La diga lotu parap nom lavattulaava mila neni ga raba lololos teren ti lavatpanga sio. La mo limixin diga lotu parap bok lavatpanga sio, diga lok keretna, “Kopmen tara i epovo mi na lavatpanga sio, la kopmen tara i epovo na sak tup min.”

⁵La ni ga lok ka lololos kusu na vaase vupu la aksaksa ri ne Moroa. La ni ga epovo bok ti lok lempanga salai i vara rin at lavanuet sangaun mi legepu gaaling. ⁶La ni ga ru ka i xusu na paase vupu ri ne Moroa, la ri laasen teren, la loxot kitkis teren, la tinedi bok dik lok to vana at laxalibet. ⁷La ni ga lok ka lololos kusu na esep mi limixin at ne Moroa la na sak tup midi. La ni ga lok ka bok lololos mavana at limixin boro at larabung mixin axap la boro bok at levenasen bantuxu la boro bok at lempapaase axap la boro bok at levennep silok axap. ⁸La limixin axap at na lavatbung menemen diba lotu parav i; nedi limixin kopmen levenasen atdi ik lok at lubuk at lorooro, mo lubuk ga nemen avot ti luruntudum li at na lavatbung menemen, la ni lubuk at Lanasip, mo ga uu at laxaba.

⁹Do tara i ruuna lubaalung, i lox avukat do neni na ronga ka na levelinga.

¹⁰‘Do ne Moroa gara tong li vam i do tara nabat pas ti loxokoxo, neni naba vubeles ti loxokoxo; la do ne Moroa gara tong li vam i do diba sep tara mi lavarise sepsep, neni naba uu at leesepp mi lavarise sepsep.’

Jer 15:2, 43:11

Kuren la limixin at ne Moroa dina tu tuxuruxun at lunuunu atdi la dina ngangais mi lomomo keneng ap mo levenmumuat.

Lavatpanga Sio Ga Vasu Boro Maxopok At Laxangka

¹¹La nia aga ven bok lara lavatpanga sio vetpes ga vasu boro maxopok at laxangka; neni ga ruuna legepu kom, ga lok ngan luvatkom at lanat sipsip; la mo lavatpanga sio ga paase aksaksa ngan mo lavattulaava silok. ¹²Neni ga ruuna ka lololos ap mo lavatpanga sio avot la ga pu soso limixin kusu dina lotu parap mo lavatpanga sio avot, no lara ga sev aroogo i, ketla neni ga lox avukat manga. ¹³La mo lavatpanga sio sepsep agepura ga lok buaang lempanga sangsangu; ni ga lok laxao ga si boro vana at lamavangkap la ukopok ti laxangka. Ni ga lox i na ro melamgo at limixin axap kusu dina ven i. ¹⁴La neni ga ruuna lololos ti lok levempanga sangsangu kusu na lox asilok lavatpanga sio avot, la kerepmo neni ga xarang arup limixin at na lavatbung menemen. Ni ga tong i ridi xusu dina lok lovoovo vanga ap mo lavatpanga sio avot, mo ga ruuna linin kooxing at lavarise sepsep, ketla kopmen goxo met teren. ¹⁵La

mo lavatpanga sio sepsev agepura ga ruuna ka lololos tin kusu na mas arup lamamas tooro uto xeneng at nom lovoovo vanga at lavatpanga sio avot, kusu neni na epovo ri paase la na sev amet nedi di xopara na lotu parav i. ¹⁶La na lavatpanga sio sepsev agepura ga pu soso limixin axap, nedi limixin gamasa la limixin silok, nedi limixin nopnovos la limixin banbalo, la nedi limixin sepmus la limixin saksaxaruki; ni ga pu soso di xusu dina lok li loklok katling ap mo lavatpanga sio to at levengikikngen tino di xopla to at levenmang atdi. ¹⁷La do tara i vara na un ka tempanga kopla na sesep mi lempanga, neni na ruuna be mo loklok katling; nom loklok katling ni laasen at nom lavatpanga sio xopla lexekexes at laasen teren.

¹⁸Mina lok ka lodoxoma avukat ti na. Do tara ikleklen aleng, neni na gu asu na leexes at lavatpanga sio. Na leexes i lok katling lara laradi, la leexes teren i epovo at lavanna sangaun kobot mi lavanna sangaun mi lavanna. (666)

Lanasip Eburu Mi Limixin Teren

14 ¹La nia aga milik kaxat la aga ven Lanasip ga tu to at lakaana Saion. La aga ven bok buaang limixin eburu min, mo diga epovo at legesa sangaun kobot mi lavanuet sangaun mi lavanuet larabin sangsangaun kobot (144,000) la diga ruuna laasen at ne Iesu eburu mi laasen at ne Temen to at levenmang atdi. ²La aga ronga laxaka linga boro vana at laxalibet ga ninni ngan ladan silok i sesen lolos la ga ninni ngan bok lavanga i repaavat. Mo laxaka linga aga ronga i ga lok ngan bok luvuttadi diga sep levengkontaaleng. ³La mo digak pixan mi loxompixan maxat to melamgo at loxonin orong at ne Moroa, la to melamgo at lavanuet levempanga rooro la to melamgo at loxongkulao amgomgo. Kopmen teta goxo epovo nak lok kaka mo loxompixan, ketla nedi na limixin kusuk mun, Moroa gara un ka amlong nedi kantubu at limixin at lavatbung menemen. ⁴Nedi mun na limixin di goxo lok taxakapmek maxamang at lititkis epot, mila diga tu asepsu basinge loklok ti elong ka. Nedi na limixin di mumu amisik Lanasip; Moroa ga un ka amlong di xantubu at limixin la diga lok ngan levempipisik avot ti ne Moroa la Lanasip. ⁵La kopmen di goxo tong asu toxolinga xaxarang at lorooro axap atdi; la kopmen tavanga xapmek ik lok atdi.

Lempapaase Asu At Lavantun Lubungangelo

⁶La nia aga ven manga lara laangelo gap tava to vana at lamavangkap, la ni gap kip Lagale Lavavangi i nemen amisik kusu na tong asu i ri limixin axap at na lavatbung menemen, nedi boro at levennep silok axap, la boro bok at larabung mixin axap, la boro bok at levempapaase axap, la boro bok at levenasen bantuxu axap. ⁷Ni ga vaase silok keretna, “Mina

lok ngangao aleng at ne Moroa la mina emi asu min, mila loxonaleng i auret kusu neni na ronga linga at limixin axap. Mina lotu parap ne Moroa, mo ga rudum li laxalibet, lavatangka, laras, la laradan axap.”

⁸La na laangelo avot ga onon la laangelo sepsev agepura ga rupot manga la ga lok, “Lemenemen silok Babilon ira xapmek pam, mo ga pu soso limixin at levengkot axap kusu dina vubeles at laxakapmek silok teren.”

⁹Melemu atdu laangelo sepsev avantun ga rupot manga la ga xup lolos keretna, “Mo do tara na lotu saparap mo lavatpanga sio la lavatpooovo vanga ren, la na ruuna ka loklok katling ap mo lavatpanga sio to at lamang teren, koplala to at lekngen, ¹⁰neni bok naba suma ka lebelemamao at ne Moroa i lolos aleng; la neni nabang songot aleng to xeneng at laxao at lasalpa to melamgo at lubungangelo at ne Moroa la to melamgo bok at Lanasip. ¹¹La mo losongsongot ba lok ngan lusuxa i urut amisik la kopmen noxo xap at levenaleng kangking la kanimin bok; tara naba ekip tangarang mi na losongsongot do neni ga lotu saparap lavatpanga sio la lavatpooovo ren, koplala neni ga ruuna loklok katling at laasen at lavatpanga sio.” ¹²Na lavanga naba rupot, kuren la nedi limixin nuunu at ne Moroa mo ding tonga res at levelinga ren la di tu tuxuruxun at lunuunu atdi saparap ne Iesu, i epovo xusu dina nemen mulus mo do levenmumuat ba rupot.

¹³La aga ronga levelinga ga si boro vana at laxalibet ga lok tia, “Una malagan i na. Luvukat tinedi dinaba met mi lunuunu atdi keneng at Leeme Silok ne Iesu, i ru ka nga i mo.” La Loroonan Kaala ga lok bok keretna, “I ruturun aleng. Diba ruuna loklox amas basinge levenmumuat la levesongsongot atdi, mila diba ruuna ka luunun avukat at lorooro melemu ti mo leveloklok nunuan digara lok pam i.”

Lisilimet At Laaleng Ete

¹⁴La nia aga milik kaxat, la aga ven loxontakabu bunbun, la to mavana ap mo loxontakabu aga ven lara gat kis teren, ga milik ngan Laradi Mevana, la lavatbungorong gol gak lok at lavatlak teren, la neni gam tebeng lavarise sengsen. ¹⁵La lara laangelo vetpes manga ga vas su boro xeneng at loogu laplavang, la gap kup lolos ti mo laradi gat kis at loxontakabu la ga lok, “Una ru ka lugugu mi nom lavarise ram, mila laaleng mo ira vot ta, kusu una sep korop ka levempiao at na lavatbung menemen mo ira mukun pam.” ¹⁶La mo laradi gat kis ap mo loxontakabu ga gu xat mi mo lavarise ren at lavatbung menemen la ni ga lok bubua ka limixin axap at ne Moroa.

¹⁷La lara laangelo vetpes manga ga vasu at loogu laplavang to vana at laxalibet, la neni bok gam tebeng lavarise sengsen. ¹⁸La lara laangelo vetpes mo gak lok tatao laxao, ga laa boro at loxonin laplavang. La ni

ga xup lolos ti mo laangelo gam tebung lavarise sengsen; la ni ga lok keretna, “Una gugu mi nom lavarise sengsen taram la una lok bubua ka levempipisik at lavaen at na lavatbung menemen, mila lempeven teren ira mukun pam.”¹⁹ Kuren la laangelo ga gu xat mi lavarise ren at na lavatbung menemen la ga lok bubua ka lempeven at lavaen, la ga lu abeles midi ro xeneng at loxot lili at levempeven vaen, mo i ru katling lebelemamao at ne Moroa.²⁰ La mo lempeven vaen digat pas puuvus asu ladan teren to maxamang ap mo lemenemen silok, la lada ga sixisu boro xeneng ap mo loxot lili at levempeven vaen; mo lada ga umsu aleng ngan ladanut la lamaxat ap mo ladan ga si aleng ngan lababaalom at laradi la ga sesen uto vaxalom, ga epovo at lavantun sangaun kobot (300) leveng kilomita.

Lavanuti Lubungangelo La Lavanuti Levesongsongot Silok

15¹La nia aga ven manga lara loklok katling to vana at laxalibet, ga silok aleng la ga ven nunuan. Lavanuti lubungangelo mi lavanuti levesongsongot mo, nedi lumumupit ti leveloklox asongot axap, la di ru katling laxavaxap at lebelemamao at ne Moroa, mo ni naba lox asuusu i.²La aga ven lara lavanga ga milik ngan loxontas gan tanan eburu mi laxao. La aga ven bok nedi limixin diga sak tup mi mo lavatpanga sio la lavatpoovo vanga ren, la lexekexes at laasen teren; diga tu saparap mo loxontas gan tanan la digam tebung levengkontaaleng to at levengkikngen di, ne Moroa ga raba di min;³la digak pixan mi loxompixan at ne Moses, lasaxaruki at ne Moroa la digak pixan bok mi loxompixan at Lanasip; diga lok keretna,

“Moroa Leeme Silok, u lolos aleng. Lempanga axap nenu uk lox i, i silok la i lox avukat aleng. Leventaangas taram la leveloklok taram ik mokso la i ruturun aleng. Nenu Loorong Silok mavana at limixin axap at na lavatbung menemen.⁴Leeme Silok. Limixin axap dinaba lok ngangao ram la di naba emi asu mi laasen taram, mila nenu xusuk mun u melemelengan. Limixin axap at na lavatbung menemen dinaba vosiga u la dinaba lotu parav u, mila levendomdoma mokmokso ram ga ravasu at lasaxaven.”

Sam 111:2; 145:7; Jer 10:7 Sam 86:9

⁵Melemu at na nia aga ven loogu laplavang ga rem suang to vana at laxalibet la aga ven mo lenep i xaala aleng to xeneng teren.⁶La lavanuti lubungangelo eburu mi lavanuti leveloklox asongot diga vas su boro xeneng ap mo loogu laplavang. Diga sinang mi levesingsigaara gamgames, gan tanan aleng la levengkontamon gol ga itis korop lenbongobong atdi.⁷La lara ap mo lavanuet levempanga rooro ga raba na lavanuti lubungangelo mi lavanuti leventingtigon gol ga umsu mi langsung lebelemamao at ne Moroa, mo naba nemen amisik, la kopmen taxavaxap teren.⁸La loogu laplavang ga umsu mi lusuxa boro at

lisisixam la lololos at ne Moroa la goxo epovo do tara gita beles ukeneng at loogu laplavang ise at laxavaxap ap mo lavanuti leveloklox asongot at lavanuti lubungangelo.

Lavanuti Leventingtigon At Lebelemamao At Ne Moroa

16 ¹La nia aga ronga laxaka linga silok ga vaase su boro xeneng at loogu laplavang, la ga lok ti mo lavanuti lubungangelo xeretna, “Minat pas la mina soli asu lebelemamao at ne Moroa i nemen keneng at nom lavanuti leventingtigon to at lavatbung menemen.”

²La laangelo avot gat pas la ga soli asu mo lebelemamao ri limixin at na lavatbung menemen. La lemparabi silok gang songot aleng, ga vot saparap mo limixin diga ruuna loklok katling ap mo lavatpanga sio la diga lotu parap lavatpoovo vanga ren.

³La laangelo sepsev agepura ga soli asu lebelemamao at ne Moroa ri laras la laras ga ravasu ngan ta lada at laradi i met, la lempanga axap at lebelen laras ga met.

⁴La laangelo sepsev avantun ga soli asu mo lebelemamao at ne Moroa ti laradan silok la levempuvut dan bok, la diga ravasu ngan lada. ⁵La aga ronga laangelo ik lok tatao laradan ga lok ti ne Moroa,

“Lodoxoma ram ti lok li na losongsongot ura lok li vam i at lavatbung menemen ik mokso aleng. Kuren la ne Moroa, nenu u melemelengan lingina la gano bok, ⁶mila nedi limixin kapmek diga sev amet limixin nuunu eburu mi lavaeme vapaase alii ram, kuren la ura raba nedi limixin kapmek mi lada kusu nedi dina in i, la ik mokso aleng do nedi limixin kapmek dina in mo lada.”

Ais 49:26

⁷La melemu aga ronga lempapaase boro at loxonin laplavang ga lok keretna,

“I raturun aleng. Nenu ne Moroa, Leeme Silok, u lolos aleng. La lodoxoma ram ti lox asusu mo levesongsongot, ik mokso la i epovo rinotno at loklok, mo limixin diga lox i.”

⁸La laangelo sepsev avanuet ga soli asu lebelemamao at ne Moroa ro at laxangking. La laxangking ga lok kaka lololos kusu nan bonbo limixin mi liplivi silok teren. ⁹La laxangking gan bonbo nedi, la diga paase aksaksa ri laasen at ne Moroa, mo i ruuna lololos mavana at nom levesongsongot. Ketla nom limixin di goxo para rinotno xusu dina leeng basinge laxapmek atdi la dina emi asu mi ne Moroa.

¹⁰La laangelo sepsev avalimo ga soli asu manga lebelemamao at ne Moroa ro at loxot kitkis at lavatpanga sio, la mo lixitkis teren ga nemen at lamain bonot, la limixin diga atat aleng leven gam atdi mumu losongsongot silok atdi. ¹¹La diga paase aksaksa ri ne Moroa no vana at laxalibet mumu losongsongot la laxanabi atdi, ketla di goxo para rinotno xusu dina leeng basinge mo laxapmek diga lox i.

¹²La laangelo sepsev avanna ga soli asu lebelemamao at ne Moroa to at ladan silok Iupretis. La mo ladan ga mes axap, kusu ri lox agagas li langas ti lavaorong silok boro at lenep laxangking i soosoo su e. ¹³La nia aga ven lavantun lubunggas ga milik ngan laxarokrok, lara ga sixisu boro at lungusno at lavattulaava, la lara boro at lungusno at lavatpanga sio, la lara boro at lungusno at laradi vapaase alii xaxarang. ¹⁴Nedi na leventoonan at lubunggas di ruuna lololos kusu dinak lok lempanga sangsangu. La diga epeseves ti lavatbung menemen axap, kusu dina lok bubua ka lavaorong silok eburu mi limixin esep atdi ri mo leesep ba vot ap mo langsung laaleng silok at ne Moroa i lolos aleng.

¹⁵La ne Iesu ga lok keretna, “Nia aba vot ngan laradi xipkip pilo. Luvukat ti mo lara i gagas amisik la ik lok gagas nunuan lisingsigaara ren kusu neni noxo lok beleben la noxo lok mamangan.”

¹⁶La mo leventoonan kapmek diga lok bubua ka lavaorong silok to at lemenemen laasen teren at lavapaase Ibru do ‘Amagedon.’

¹⁷La laangelo sepsev avanuti ga soli asu lebelemamao at ne Moroa ti lamavangkap, la langsung lavapaase silok ga ravasu boro at loxonin orong, mo ik lok keneng at loogu laplavang; ga lok keretna, “Ira xap ta.” ¹⁸La lavanga ga mam etitit ga vot, la leretepaavat boro vana at laxalibet ga tit la langsung langne silok ga vot. La goxovisi tangne silok kerepmo ga vot, ga ru ka i at luruntudum li at limixin, la mo langne ni ga lok kapmek aleng. ¹⁹La mo lemenemen silok ga epeseves ti lavantun levengkot la mo levenmenemen silok at na lavatbung menemen ga rem utut axap. La ne Moroa ga doma asu laxapmek at limixin to at lemenemen silok, Babilon, la neni ga lox asuusu lebelemamao silok teren ti mo limixin. ²⁰La levesoxan axap mi lempattavut diga sonao. ²¹La langsung larakabu ga vot la lengkos teren ga lok ngan lemparuat la lumumuat teren ga epovo at lavanuet sangaun mi lavalimo leven kilogerem, la ga subu at limixin, la diga paase aksaksa ri ne Moroa mila losongsongot at na lavatakabu ga lok kapmek aleng.

Latkin Ngarangat

17 ¹La lara atdi na lavanuti lubungangelo, mo digam tebeng mo lavanuti leventingtigon, ga vot pasa ia la ga lok, “Pen ba i na, la ana lox ase u mi losongsongot silok, ne Moroa naba sep mo latkin ngarangat min, mo it kis saparap laxan taadan solo. ²Lavaorong silok axap at na lavatbung menemen digang longka i la limixin at na lavatbung menemen diga lok laxakapmek min, i lok ngan ta do diga inin tangtangu mi lavaen.”

³La Loroonan Kaala ga vubeles tarak la nom laangelo ga xip kaka ia uto at lamatbin. La nia aga ven lara latkin gat kis to vana at lara lavatpanga sio ga memele aleng la ga ruuna lavanuti lempatlak la

lasangaun lempatkom; la laxanasen kapmek, ni levelinga vupu ri ne Moroa ga umsu at labantuxu ren. ⁴Na latkin ga sigaara mi lisingsiga ga memele aleng la ga umsu mi logol eburu mi lengkonuat gamgames, luunun silok ap mo lengkonuat; la leven peal inbun gak lok bok ap mo lisingsigaara ren. Ni gam tebeng lavattingtigon gol ga umsu mi laxangkakapmek teren eburu mi libilinga at loklok teren. ⁵La levelinga ga nemen to at lamang teren ketla lavasuun teren goxo xasep. Mo levelinga ga lok keretna,

“Lemenemen silok Babilon, ni lavasuun at loklok ngarangat la neni bok lavatturunen at leveloklok kakapmek axap at na lavatbung menemen.”

⁶La nia aga ven mo latkin ga inin tangtangu mi lada at limixin at ne Moroa, la atnedi bok limixin diga met mila diga nuunu at ne Iesu.

Se nia aga ven i, aga sangu aleng. ⁷Ketla laangelo ga lok tia, “Tila u sangu? Ana soxomus lavasuun at nom latkin eburu mi lavatpanga sio, neni it kis pana ren, la i ruuna lavanuti lempatlak teren la lasangaun lempatkom. ⁸Mo lavatpanga sio ga rooro gano, kopmen na rooro lingina, ketla melemu naba vasu boro at lemeroon la ba seeve to at lemenemen songsongot. La nedi limixin at na lavatbung menemen, kopmen levenasen atnedi goxok lok keneng at lubuk at lorooro, ga ru ka i at lurutu kaxat at na lavatbung menemen, dinaba sangu aleng do dina ven na lavatpanga sio. Neni ga rooro be, ketla monga neni kopmen na rooro, ketla naba rupot melemu.

⁹Do tara i vara na xasep at na, neni na doma mumu avukar i. Mo lavanuti lempatlak i ru katling lavanuti lengkongkaana la latkin ngarangat it kis to mavana atdi. La mo lavanuti levempatlak i ru katling bok lavanuti lavaorong silok. ¹⁰La lavalimo atdi diga met pam, la legesara atdi mo nga it kis ngan loorong silok; la legesara bok ba vot ketla ba nemen at lentaba levenaleng mun. ¹¹La lavatpanga sio, mo ga rooro la na nga i met pam, neni loorong silok sepsev avanuan; la neni bok lara atnedi lavanuti lavaorong silok la ni naba seeve.

¹²La mo lasangaun lempatkom nenu ura ven pam i, di ru katling lasangaun lavaorong silok kovisi dina lok ka lixitkis atdi kusu dinam gomgo ri limixin. Ketla nedi eburu mi lavatpanga sio diba lok ka lololos ngan lavaorong silok at lavanna sangaun minit mene. ¹³La nedi diba ruuna legesa doxoma mun la diba raba lavatpanga sio mi lololos atdi la diba mumu asu i. ¹⁴La na lavatpanga sio eburu mi lasangaun lavaorong silok diba esep eburu mi Lanasip. La Lanasip eburu minedi neni ga ro xaka di, la nedi bok neni ga soxolik ka di la nedi bok di mumu asu ruturun i, diba sak tup mi na lavatpanga sio eburu mi lasangaun lavaorong silok, mila Lanasip neni Leeme Silok mavana at lavaeme silok axap la neni Loorong Silok mavana at lavaorong silok.”

¹⁵La nom laangelo ga lok bok tia, “Mo laxantaadan nenu ura ven pam i, la latkin ngarangat it kis saparav i, ni i ru katling limixin boro at levenasen bantuxu, la boro at larabung mixin axap, la boro at levennep silok axap, la boro at levempapaase axap. ¹⁶La mo lavatpanga sio eburu mi lasangaun levempatkom nenu ura ven pam i, nedi diba munepen mi latkin ngarangat. Diba lok kapmek tinotno i la diba ke i nak lok beleben; la diba anan levenbaaxin teren la diba xotos labantuxu ren mi laxao. ¹⁷Diba lox i na mila ne Moroa ira lok pam di xusu dina mumu asu lodoxoma at ne Moroa. Kuren la diba mulus kusu dina raba axap lololos atdi ri lavatpanga sio la neni naba lok lugugu ren min, ba se at levelinga at ne Moroa mumu na levesongsongot naba sorun. ¹⁸La mo latkin ngarangat ura ven i, i ru katling mo lemenemen silok, ni imgomgo ri laramenemen silok at lavaorong silok at na lavatbung menemen.”

Moroa Ga Sele Utut Lemenemen Babilon

18 ¹Melemu at nai aga ven lara laangelo vetpes manga ga si boro vana at laxalibet, mi langsung lololos teren; la na lavatbung menemen axap ga xasep mi losoosoo ap mo laangelo. ²La ni ga xup lolos keretna,

“Lemenemen silok Babilon ira xapmek pam. La na nga ira lok ngan pam lemenemen aulis ti lubanggas mi laxantoonan kapmek; la lavapixa axap di bilingot la di lok kapmek dik lok teren. ³La limixin boro at levennep silok axap dira in pam laxandan vaen teren, mo i ru katling loklok ti elongka; la lavaorong silok axap at na lavatbung menemen diga elongka min, la nedi limixin diga sesep mi lempanga atdi digap novos aleng mila mo latkin, lebelen ga ngaongao aleng ti mo lempanga diga sesep min.”

⁴La aga ronga laxaka linga vetpes ga si boro vana at laxalibet ga lok, “Limixin tarak. Mina vas kaxat basinge lemenemen Babilon; lavanga mina sok ka toxot tinimi at laxakapmek at limixin at nom lemenemen; la lavanga minang songot eburu minedi mi mo losongsongot nenia aba raba nedi min. ⁵Laxakapmek at nom latkin ira ekovana upana at laxalibet i ngan ta lavatkaana, la ne Moroa ira doma asu vam laxakapmek teren. ⁶Mina vorang amlong taba i mi laxapmek ngan neni ga lox i rinimi. La mo laxapmek neni ga lox i rinimi, mina vorang i rin na gepura. La mina raba i mi laxadan vaen no i so bobo aleng ti lara neni ga raba nemi min. ⁷Mina raba i mi langsung losongsongot aleng la lainbulu silok la naba silok kerekngan ni ga lox asilox i mi leemi asu axa min la lapnovos. La keneng at lebelen ni i lox asilox i xeretna, ‘Nenia loorong tixin; nenia kopmen lavatnaa, la nia xopmen noxo lok bukbulu at lorooro axap tarak.’ ⁸Kuren la at legesa aleng mene, ne Moroa naba sev i mi tangsangan tosongsongot; lemeremet, la lainbulu silok la langsung loroxo silok naba

vot parav i. La laxao naba rin asonao i mila Leeme Silok ne Moroa i lolos la neni ba ila mumu loklok teren.” *Lur 19:15; 2 Let 28:9; Sam 10:6; Ais 9:14*

⁹La lavaorong silok at na lavatbung menemen, mo digang longka mo latkin la digak lok laxakapmek eburu min, dinabang teng la dina duudu, mo do dina ven lusuxa ap mo laxao na xotos asonao lemenemen Babilon.

¹⁰Diba tu ro vaxalom mi lainmarat mumu mo losongsongot, la diba lok, “I lok kapmek aleng. Babilon ira xapmek pam. Ni lemenemen silok la i lolos aleng. Ketla at lavanna sangaun minit mene ira lok kapmek pam.”

¹¹La limixin sesep at na lavatbung menemen dibang teng la diba duudu mumu i, mila kopmen teta noxo un kaka bok ba lempanga atdi. ¹²I lok ngan leven gol, levesiliva, levenasen uat gamgames, leven peal, levenasen bantamon avukat, lenbantamon memele, levenasen una avukat, levempanga axap limixin di lox i mi la ivori, levenuna mi luunun silok teren, borons, aen, lemparuat nunuan; ¹³la sinomon, spais, levempavaxan so mavak, la laxadan i so mavak, la laxadan vaen, la laxadan monok at la olip, la palava avukat eburu mi levempiao, laxanbulumaxao, la laxasipsip, laxanos, lempatkaris, lavasaxaruki, la i ruturun do diga sesep bok mi limixin. La na lempanga axap no xopmen bok ba teta ba un kaka i. ¹⁴La mo limixin sesep diba lok ti mo lemenemen, “Lempanga nunuan taram uga xovox i, ira sonao vam, la lapnovos taram eburu mi lempanga nunuan taram ira xap pam, la u noxo lok ka amlong bok ba i.”

¹⁵La limixin sesep digap novos aleng ap mo lemenemen, diba tu to vaxalom la diba marat aleng mumu mo losongsongot la dibang teng la dibak saxaanu aleng. ¹⁶La diba lok,

“I lok kapmek aleng. Lemenemen silok Babilon ira xapmek pam. Ni ga umsu mi levesingsigaara ga lok nunuan aleng la ga memele aleng, la ga vonga logol eburu mi levenuat gamgames la leven peal. ¹⁷La keneng mun at lavanna sangaun minit mo lapnovos silok teren ira sonao la ira xap pam.”

La nedi limixin amgomgo at lempattaaxup la nedi di gugu go xeneng, la nedi bok limixin di lok ka luunun at lugugu ro saparap laras, diba tu to vaxalom, ¹⁸la diba ven lusuxa silok ap mo lemenemen, la dibap kup keretna,

“Goxopmen temenemen at na lavatbung menemen kerekngan na lemenemen silok.”

¹⁹La diba revi laxakup to mavana at lempatlak atdi la dibang teng la dibak saxaanu, la dibang teng gagalinga xeretna,

“I lok kapmek aleng. Lemenemen silok Babilon ira xapmek pam. Laxantaaxup ga oso go kusu na lox asu lapnovos silok ti limixin ap mo lemenemen silok. La keneng mun at lavanna sangaun minit la lempanga axap teren ira seeve vam.”

²⁰La lara laxaka linga ga lok bok,

“Nemi axap mik lok to vana at laxalibet, mina momo. Nemi limixin at ne Moroa, la luvuttadi vavang la lavaeme vapaase alii, mina sosoro aleng, mila ne Moroa ira vorang taba vam i mi langsung losongsongot mumu lempanga xapmek neni ga lox i rinimi.” *Jer 51:48*

²¹La lara laangelo lolos ga ranga ka lara langsung lavaruat la ga lu arup min to at laras la ga lok keretna,

“Lemenemen silok Babilon; at na mun langas lara ba lu asi mi na lemenemen kerekngan na lavaruat, la kopmen tara noxo vuse ka bok ba i. ²²La teta noxo ronga ka bok ba lerengteng at levengkontaaleng, lerengteng kaka tadi, lerengteng kaatu eburu mi lerengteng at luru keneng teren. La taradi gugu noxo lok bok ba lugugu ren go, la kopmen bok ba tavaruat noxo sax amumus levempiao. ²³Di noxo ven kaka bok ba losoosoo at lababao do xeneng at nom lemenemen, la di noxo ronga bok ba teepang amomo at teloklox epot maxat. La luvuttadi apnovos me go nedu diga lolos aleng keneng at lavatbung menemen axap, la diga sak tup mi lara nep silok axap mumu mun lengkot at lemenemen digak lox i. ²⁴La na lemenemen Babilon i ruuna ka losongsongot mila diga vuse ka laxanda at lavaeme vapaase alii eburu mi limixin at ne Moroa ro xeneng ap mo lemenemen silok; laaba, lada atnedi axap no limixin diga sep nedu at na lavatbung menemen.” *Ais 24:8, 23:8; Jer 7:34, 25:10, 51:49*

Ata Emi Asu Mi Ne Moroa

19 ¹Melemu at nai, aga ronga laxaka linga atnedi buaang limixin to vana at laxalibet, digap kup lolos keretna,

“Ata emi asu mi ne Moroa, neni Leeme Loklox Arooro atdik, la i ruuna lisisixam la lololos teren i silok aleng, ²mila lodoxoma ren ti raba limixin mi levsongsongot ik mokso aleng la i ruturun. Moroa ira lok li vam lumumuat at latkin ngarangat, mo ga lox abilinga limixin at na lavatbung menemen mi loklok ti elongka. La ne Moroa ira vorang pam laxakapmek ap mo latkin ga sev amet lavasaxaruki at ne Moroa.”

³La digap kup bok,

“Ata emi asu mi ne Moroa. Neni ga sele utut lemenemen Babilon la lusuxa ren i urut uto vana la mo laxao noxo xap.” *Ais 34:10*

⁴La mo legepu sangaun mi lavanuet loxongkulao amgomgo la lavanuet levempanga rooro diga xis tiktikbu mi lempatgulom atdi la diga lotu parap ne Moroa. La diga lok,

“I ruturun, ata emi asu mi ne Moroa.”

⁵La nia aga ronga laxaka linga ga laa boro at loxonin orong at ne Moroa la ga lok keretna,

“Ata emi asu mi ne Moroa. Nemi lavasaxaruki ren, la nemi mi lok ngangao ren la nemi limixin gamasa la nemi limixin silok, mina emi asu mi ne Moroa.” *Sam 115:13, 134:1*

Loklox Epot At Lanasip

⁶La aga ronga laxaka linga at limixin buaang ga ninni ngan ladan silok i sesen lolos la ga lok ngan bok leretepaavat boro vana at laxalibet i tit; la mo laxaka linga ga ravasu xeretna,

“Ata emi asu mi ne Moroa, mila Leeme Silok atdik ne Moroa, neni i silok aleng la naba nemen amisik ngan lamgomgo at lempanga axap. ⁷Ata momo la ata sosoro la ata emi asu min, mila laaleng loklox epot at Lanasip mo ia vot ta la loono rin mo nga ira gagas li vam i. ⁸La ni ira lok ka vam labantamon avukat in bun aleng, in tanan la im games aleng.”

Na labantamon bunbun i ru katling leveloklok nunuan at limixin at ne Moroa.

⁹La mo laangelo ga lok tia, “Una malagan i na, ‘Luvukat tinedi limixin ne Moroa ba xup ka di ri leluxa at loklox epot at Lanasip.”

La ni ga lok bok tia, “Anai, ni levelinga ruturun boro at ne Moroa.”

¹⁰Nia aga ronga i na la aga xis tiktikbu mi luvatgulom tarak to saparap luxangkedek teren kusu ana lotu parav i, ketla ni ga lok tia, “Nemen gat uta lotu parav ia. Nenia lasaxaruki mun at ne Moroa kerekngan nenu eburu mi luvutnetam, mo mim tebeng levelinga ruturun at ne Iesu. Una lotu parap ne Moroa. Mo levelinga ruturun ne Iesu ga tong asu i, ni lavasuun at levempavang at luvuttadi vapaase asu levelinga.”

Laradi Ruturun Gat Kis At Lavaros Bunbun

¹¹La nia aga ven laxalibet ga rem suang la aga ven lara lavaros bunbun. La mo laradi gat kis go mavana ren, laasen teren, ne Luruturun. Lodoxoma ren ik mokso la kerepmo neni laradi ing tonga linga la ik paxaru kaxat levenesep. ¹²Luxatli ren i soosoo ngan laxao i ngangao, la ni ga xua buaang lempatbungorong to at lavatlak teren. La lara laasen ik lok teren la kopmen teta naklen lavasuun teren, ketla neni xusuk mun iklen i. ¹³La mo lavanga singsigaara ren i umsu mi lada la laasen ap mo laradi ne ‘Levelinga at ne Moroa.’ ¹⁴La limixin esep boro vana at laxalibet di mumu asu i, dit kis at lemparos bunbun la di sigaara mi levesingsiga i nunuan la in bun aleng la i dadat. ¹⁵Lavarise sengsen i sixisu boro at lungusno ren kusu ri sak tup minedi limixin at levennep silok. La neni naba lok tatao di ngan lamgomgo atnedi, la loklok tatao ren ba lolos aleng. Neni naba lox asusu lebelemamao silok at ne Moroa i lolos aleng. ¹⁶La lara langas linga ik lok to at lisingsigaara ren la to bok at laaon teren; nom langas linga i lok keretna, “Loorong Silok mavana at lavaorong silok la Leeme Silok mavana at lavaeme silok.”

¹⁷La nia aga ven lara laangelo ga tu ro mavana at laxangking. La ni ga xup lolos ti lavapixa axap dip tava de vana at lamavangkap keretna,

“Ude nimi la mina vot buru ri langsung léluxa at ne Moroa. ¹⁸Ude nimi la mina anan levenbaaxin at lavaorong silok la luvuttadi amgomgo at limixin esep, la levenbaaxin at luvuttadi lolos, la levenbaaxin at lemparos eburu minedi limixin dit kis teren, la levenbaaxin atnedi limixin sepmus eburu mi limixin saksaxaruki, la atnedi bok limixin gamasa la loxongkulao silok.”

¹⁹La aga ven bok lavatpanga sio eburu mi lavaorong silok at na lavatbung menemen eburu mi limixin esep atdi, diga vot eburu xusu dina esep eburu mi nom laradi gat kis at lavaros bunbun la limixin esep teren. ²⁰La nedi diga ranga alis lavatpanga sio eburu mi leeme vapaase alii xaxarang, mo gak lok lempanga sangsangu ri sar asoogong limixin kusu dina lox asilok laasen at lavatpanga sio. Ni ga lok mo lempanga sangsangu xusu na bala arup buaang nedi limixin la diga ruuna ka loklok katling at lavatpanga sio la diga lotu parap lavatpoovo vanga ren. La diga lu arup mi lavatpanga sio la leeme vapaase alii xaxarang, move duga rooro, ro at lemet kao, mo i tos amisik mi lasalpa. ²¹La mo lavarise sepep ga sixisu boro at lungusno ap mo lara gat kis at lavaros bunbun, la ga sep kutkut axap limixin esep at lavatpanga sio. La lavapixa axap diga anan tino at levenbaaxin atdi.

Satan Gak Lok At Loxokoxo

20 ¹La nia aga ven lara laangelo ga si boro vana at laxalibet, neni gam tebeng lengki at lemeroon la gam tebeng bok lavaros sen silok. ²La mo laangelo ga ranga alis lavattulaava la ga xoxo i kusu na nemen kuren at legesa abin sangsangaun kobot (1000) levenmaares. Mo lavattulaava ga nemen ganoxa, neni ne Devel la laasen bok teren ne Satan. ³La mo laangelo ga lu arup min ukopok at lemeroon, la ni ga vipe lavatban la gam lut pe avarang lumusaragu ap mo lemeroon. La ne Satan nabak lok go at legesa abin sangsangaun kobot (1000) levenmaares la ap mo levenaleng neni noxo bala arup bok ba limixin at lavatbung menemen se at laxavaxap ap mo levenmaares. Melemu at nom neni naba sepmus at lentaba levenaleng mene.

⁴La nia aga ven lengkonin at lavaorong silok, la nedi limixin digat kis teren, diga ruuna lololos kusu dina ila mumu loklok at limixin. La aga ven bok leventoonan atnedi limixin la limixin petpes diga ra korop lengkaka atdi mila diga tong asu lunuunu atdi keneng at ne Iesu, la diga nuunu bok at levelinga at ne Moroa. At lorooro atdi di goxo lotu parap lavatpanga sio la lavatpoovo vanga ren la di goxo lok ka loklok katling at lavatpanga sio to at lenmang atdi koplá levengikngen di. Diga roo xat amlong la nedi eburu mi ne Karisito digam gomgo ri limixin at legesa abin sangsangaun kobot (1000) levenmaares. ⁵La nedi limixin petpes diga met pam, kopmen di goxo roo xat amlong se at laxavaxap ap mo

legesa abin sangsangaun kobot (1000) levenmaares. Anai, ni laxakatu kaxat amlong avot at labarongan. ⁶Naba lox avukat aleng tinedi na lavaanat soxolik at ne Moroa, diba nemen ap mo laxakatu kaxat amlong avot. Di noxo suma lanmet sepsev agepura ketla diba lok ka lugugu ngan lavamaasa ri ne Moroa la ri ne Karisito; la nedi eburu mi ne Karisito dibam gomgo ri limixin at legesa abin sangsangaun kobot (1000) levenmaares.

Lanmet At Ne Satan

⁷Melemu ap mo legesa abin sangsangaun kobot (1000) levenmaares na xap, Moroa naba soxomus asu ne Satan boro at loxokoxo. ⁸La ni naba vasu ri bala limixin at lengkot axap at na lavatbung menemen. La nedi lubangmixin me Gok la Magok, Satan naba lok bubua ka di kusu ri leesep, la luutus atdi naba umsu aleng kerekngan laxangkaneng to loxon. ⁹Dinabat pas boro at lengkot axap la dinaba rupot to at mo lemenemen silok at ne Moroa i vavara aleng tin, la dinaba ru xangkan i. Ketla laxao naba si boro vana at laxalibet la naba xotos axap di. ¹⁰La mo laradi babala arup, ne Satan, Moroa naba lu arup min uto at lemet kao at lasalpa; mo lemet kao lavatpanga sio eburu mi laradi vapaase alii xaxarang dubak lox e, la go nedi lavantun dinaba ruuna ka losongsongot silok at levenaleng kangking la kanimin la kopmen taxavaxap teren.

Laaleng Ete Silok

¹¹La nia aga ven langsgangan loxonin orong bunbun la mo Laradi gat kis teren; la lavatkangka eburu mi laxalibet duga sixiro basinge i la duga sonao nga. ¹²La aga ven nedi diga met pam, limixin silok la limixin gamasa, diga tu ro melango at loxonin orong at ne Moroa. Lentaba lempatbuk mo ga repalas. La lara lubuk ap mo levenbuk diga suang i, ni lubuk at lorooro. La ne Moroa ga ila mumu loklok atnedi limixin, la mo leveloklok atdi gak lok ap mo levenbuk. ¹³La nedi limixin diga met to at laras la nedi bok limixin diga met la diga nemen to Edesa, la limixin axap diga met, diga tu ro melango at ne Moroa la neni ga ila mumu loklok atdi la diga lok ka luunun ga epovo mi leveloklok digara lok pam i. ¹⁴La ne Moroa ga lu arup axap tino nga mi lanmet eburu mi lenep Edesa uto at lemet kao. Mo lemet kao, ni lanmet sepsev agepura. ¹⁵La nedi limixin levenasen atdi goxok lok at lubuk at lorooro, Moroa ga lu arup bok midi uto at lemet kao.

Laxalibet Maxat Mi Lavatkangka Maxat

21 ¹La nia aga ven laxalibet maxat la lavatkangka maxat, mila laxalibet avot mi lavatkangka avot ga xap la laras ga sonao. ²La aga ven lemenemen melemelengan, ni lemenemen maxat Jerusalem, ga

si boro vana at laxalibet boro at ne Moroa, ni ga nganang ngan latkin i gagas kusu na epot maxat at latlok teren. ³La aga ronga luxupkup silok boro at loxonin orong at ne Moroa ga lok, “Mina ven ba i, lemenemen aulis at ne Moroa monga ira si vam la neni nak lok eburu mi limixin. La ne Moroa naba nemen eburu minedi, la nedi diba lok ngan limixin teren, la ni naba nemen ngan ne Moroa atdi. ⁴Neni naba ves kepe lengkabili dan basinge lengkatli atnedi. La limixin kopmen di noxo met bok ba, la di noxo saxaanu bok ba kopla dinang teng la di noxo songot bok ba; mila lavatkangka avot ga sonao vam eburu mi lempanga axap gak lok keneng teren.”

⁵La mo Laradi gat kis at loxot kitkis teren ga lok, “Monga ana lox amaxat lempanga axap.” La ni ga lok bok tia xeretna, “Una malagan i na mila na levelinga i ruturun la i epovo do limixin dina nuunu ren.”

⁶La ni ga lok bok, “Ara lox empampana vam lugugu rak; nenia Lurutu Kaxat la Lumumupit. Aba vaxain nedi limixin do di minu mi mo ladan i puvut su boro at lavatturunen at ladan at lorooro la kopmen di noxo un i. ⁷Dola nege na vas asi lololos at laxakapmek, neni naba ruuna na leveloklox anarong keretna; nenia aba nemen ngan ne Moroa ren la neni naba nemen ngan ne nuruk. ⁸Ketla nedi limixin makmarat la nedi dina sok tixirixes lunuunu atdi, la nedi dina lok laxakapmek silok la nedi dina sev amet parang limixin, la nedi dina lok loklok kakapmek maxamang at lixitkis epot, la nedi luvuttadi sak, la nedi dina lotu parap levemppoovo moroa, nedi limixin babala; nedi axap na, nenia anaba lu arup midi uto xeneng at lemet kao i ngangao mi lasalpa. Na losongsongot, ni lanmet sepsev agepura.”

Lemenemen Maxat Jerusalem

⁹La lara at nom lavanuti lubungangelo mo gam tebeng lavanuti lempattingtigon ga umsu mi lavanuti levesongsongot, ni ga lok tia, “Ude u, la ana lox ase u mi mo loono maxat, neni latkin ti Lanasip.” ¹⁰La Loroonan Kaala ga vubeles tarak, la nom laangelo ga xip kaka ia uto at lakaana silok la ga lox ase ia mi lemenemen melemelengan Jerusalem, mo ga si boro vana at laxalibet la boro at ne Moroa. ¹¹La mo lemenemen gan tanan aleng mi lisisixam at ne Moroa. Mo lemenemen ga soosoo aleng ngan lengkonuat gamgames, luunun teren i urut aleng, i ngan jessa, i gamgames la i xasep aleng. ¹²La langsung larangas uat matmatkun ga baalom aleng upana la ga tu xangkan mo lemenemen silok Jerusalem; la lasangaun mi legepura laramusaragu gak lok ap mo larangas uat, la lasangaun mi legepura lubung angelo ga lok tatao mo laramusaragu, legesa angelo at legesa musaragu. La ap mo laramusaragu levenasen atnedi lasangaun mi legepura larabibinat at limixin boro Israel gak lok atdi, leges asen at legesa musaragu. ¹³Lavantun laramusaragu gak lok to meso, lavantun levenmusaragu gak lok to mero,

lavantun laramusaragu gak lok to mexun, la lavantun laramusaragu gak lok to mesi. ¹⁴La mo langas uat gat kis mavana ap mo lasangaun legepura larauat kis, la levenasen atnedi lasangaun mi legepura luvuttadi vavang at Lanasip gak lok teren.

¹⁵La mo laangelo ga paase tia, ni ga ruuna losoxovo i gol, kusu na soxovo mo lemenemen silok eburu mi laramusaragu ren la larangas uat teren.

¹⁶Lababaalom at larangas uat ap mo lemenemen silok mi lerepteplas teren la lababaalom upana ukopok ga epovo mun. La nom lababaalom teren ga epovo at legepu abin sangsangaun kobot mi lavalimo sangaun kobot (2500) kilomita. ¹⁷La ni ga soxovo bok lerepteplas ap mo larangas uat la ga epovo at lavantun sangaun mi legepu asongo. Laangelo ga soxovo mo lemenemen kerekngan limixin di soxovo lemenemen.

¹⁸Langas uat ap mo lemenemen diga lox i mi la Jespa, la mo lemenemen silok diga lox i mi logol tinotno, la ga xasep ngan lagalas. ¹⁹La mo larauat kis at larangas uat diga xovox i mi laxanasen uat axap i gamgames. Lara avot neni la Jespa; lara mumu neni la Sapai; lara sev avantun neni la Aget; la lara sev avanuet neni la Emeral.

²⁰Lara sev avalimo neni la Onikis; lara sev avanna neni la Kanelien; lara sev avanuti neni la Krisolait; lara sev avanan neni la Beril; la lara sev avasik neni la Topas; la lara sev asangaun, neni la Kirisoperes; la lara sev asangaun mi legesara, neni la Jasin, la lara sev asangaun mi legepura, neni la Emetis. ²¹La mo lasangaun mi legepura laramusaragu, nedi lasangaun legepura leven peal la at legetgesa musaragu diga lox i mi legesa peal mun, la langas lom ap mo lemenemen ga gol tinotno la ga xasep ngan lagalas.

²²La nia a goxo ven toogu laplavang go xeneng at nom lemenemen silok, mila ne Moroa xa Leeme Silok neni i lolos aleng la nedu eburu mi Lanasip duk lox amisik ap mo lemenemen silok; kuren la limixin dixok pakes ti toogu kusu dina lotu parap ne Moroa mi Lanasip go. ²³La mo lemenemen silok ixok pakes ti laxangking mi lagaaling kusu duna soosoo axasev i. Lisisixam at ne Moroa im taba amisik losoosoo at levenaleng axap, la Lanasip ni lababao ren.

²⁴La limixin axap at na lavatbung menemen diba nemen at nom losoosoo, mo i soosoo su boro ap mo lemenemen silok. La lavaorong silok axap at na lavatbung menemen diba xip beles levenapnovos atdi ukeneng teren.

²⁵La laramusaragu ap mo lemenemen silok noxo tu vipipe, la noxopmen bok ba taxanimin go. ²⁶La limixin at lavatbung menemen diba xip beles mi levenapnovos atdi uto xeneng ap mo lemenemen silok. ²⁷Ketla kopmen tinotno taxakapmek naba beles keneng teren, nedi dik lok lengkot mamangan kopla di xaxarang, di noxo vubeles teren. Nedi xusuk mene levenasen atdi ik lok to at lubuk at lorooro at Lanasip diba beles keneng teren.

Ladan Tooro

22 ¹La laangelo ga lox ase ia mi ladan at lorooro ga xasep aleng. La ga puvut su boro at loxot kitkis at ne Moroa la Lanasip; ²la ga

sesen to xantubu at langas lom at lemenemen silok. La to meo la meo at na ladan, luuna at lороoro i tu go la keneng at legesa maares mo luuna i pisik, i epovo at lasangaun mi legepu aleng, la i pisik gesara at legetgesa gaaling. Lempavaxan una ren dik lok ka i ri lox aroo limixin at lavatbung menemen. ³La mo lasaxaek ik lok mavana at na lavatbung menemen noxok lox ap moi lemenemen silok. Loxonin orong at ne Moroa eburu mi Lanasip naba nemen go la lavasaxaruki ren diba lotu parav i. ⁴La diba epen etang mi ne Moroa, la laasen teren nabak lok to at lenmang atdi. ⁵La noxopmen bok ba taxanimin, la limixin di noxok pakes bok ba ri taxasep at lababao xopla laxangking, mila Leeme Silok ne Moroa neni naba lok ngan laxasep tidi, la dinaba ruuna lixitkis silok ti lok tatao limixin la dinaba nemen amisik kuren, la kopmen taxavaxap teren.

⁶La laangelo ga lok tia, “Na levelinga i ruturun amet la i epovo do limixin dina nuunu ren. La Leeme Silok, ne Moroa im taba Loroonan Kaala ren ti lavaeme vapaase alii ren la ni ga riki laangelo ren kusu na lox ase lavasaxaruki ren mi lempanga salai naba vot soso.”

Iesu Mo Naba Vot

⁷Iesu ga lok keretna, “Mina ronga i na, anaba vot soso mun. Luvukat tinedi di mumu asu levempapaase alii at na lubuk.”

⁸Nenia ne Jon; aga ronga na levelinga la aga ven na lempanga, la aga xis tiktikbu mi luvatgulom tarak ti lotu parap laangelo mo ga lox ase ia mi na lempanga. ⁹Ketla neni ga lok tia, “Nemen uta lotu parav ia. Nenia mun lasaxaruki at ne Moroa kerekngan u la luvutnetam, nedi lavaeme vapaase alii la nedi bok ding tonga res at levelinga at na lubuk. Una lotu parap kusuk ne Moroa.”

¹⁰La ni ga lok tia, “Nemen uta lipe levelinga vapaase alii at na lubuk, mila loxonaleng monga i auret kusu na levelinga na sorun. ¹¹La nedi dik lok laxapmek, una ke nedi dinak lok laxapmek; la nedi loklok atdi i bilinga, dina nemen kuren; la nedi dik lok leveloklok i nunuan, dina lox epasum i mi leveloklok i nunuan; la nedi di ruuna loklok i dadat, dina nemen kuren.”

¹²La ne Iesu ga lok, “Mina ronga ia. Nenia anabamlong soso mun! Nia aba xip ka luunun eburu minia, kusu anaba raba limixin getgesara mi luunun naba epovo mi lempanga salai diga lox i. ¹³Nenia Lamgomgo la Laxavaxap, Lurutu Kaxat mi Lumumupit.

¹⁴Luvukat tinedi dira gos adadat pam levesingsiga atdi, kusu lороoro atdi naba epovo xusu dina anan at lempeven una boro at luuna at lороoro, la dina beles keneng at levenngas povolo uto at lemenemen silok. ¹⁵Ketla limixin kakapmek la lavaun sak, la nedi limixin diga lok laxakapmek maxamang at lixitkis epot la limixin sepsev amet tadi, la nedi di lotu parap lempoovo vanga, la nedi bok di vavara aleng i xusu

dina paase babala la dik lox amisix i; nedi axap na di noxo vubeles to xeneng ap mo lemenemen silok.

¹⁶Nenia ne Iesu. Ara riki vam laangelo rak tinemi limixin at lotu xusu ni na vaase axasep nimi mi na levelinga. Nenia lavatturunen la livisik li at ne Devit; la nenia lentian i soosoo aleng. ¹⁷Loroonan Kaala eburu mi latkin epot maxat du lok keretna, ‘Ude nimi.’ La nedi di ronga i na, dina lok bok keretna, ‘Ude nimi.’ Do nege i minu, i epovo do neni na rupot, la nege i vara ladan tooro, neni na lok ka i, mila kopmen tuunun teren.”

¹⁸Nenia ne Jon, a vaase aronga nemi axap mira ronga vam na lempapaase alii at na lubuk; do tara na tong abeles parang tengkot ukeneng at na lubuk, Moroa naba raba i mi nom levesongsongot ik lok keneng at na lubuk. ¹⁹La do tara na lok pes tempanga basinge na lempapaase alii at na lubuk, Moroa naba lok kepe levempeven una ren to at luuna at lorooro la neni noxo nemen bok ba ro xeneng at lemenemen melemelengan at ne Moroa. Mo luuna la mo lemenemen, ik lok at na lubuk.

²⁰La neni mo i paase aru i na, i lok keretna, “I ruturun aleng; nenia mo anaba vot soso nga.”

I ruturun. Ude u, Leeme Silok ne Iesu!

²¹Letaba nabalamu at Leeme Silok ne Iesu nak lox eburu mi limixin at ne Moroa. I ruturun.